

# **Majepacu Jũmenijicui Yávaiye Mamaene Coyuitucubo**

**El Nuevo Testamento en el  
idioma cubeo de Colombia**



# **Majepacü Jũmenijicui Yávaiye Mamaene Coyuitucubo**

El Nuevo Testamento en el idioma cubeo de Colombia  
[cub]

texto: © 1989-2009, Wycliffe Bible Translators, Inc.  
[www.Wycliffe.org](http://www.Wycliffe.org)

Primera edición,  
© 1989, Sociedad Bíblica Internacional

Segunda edición,  
© 2009, Wycliffe Bible Translators, Inc.

Edición para la Web  
© 2013, Wycliffe Bible Translators, Inc.

[www.ScriptureEarth.org/cub](http://www.ScriptureEarth.org/cub)



Licencia Creative Commons  
Reconocimiento-NoComercial-SinObraDerivada 4.0  
<http://creativecommons.org/licenses/by-nc-nd/4.0>

# Índice

| <i>título</i>                 | <i>abreviatura</i> | <i>página</i> |
|-------------------------------|--------------------|---------------|
| Mateo.....                    | (Mt) .....         | 5             |
| Marcos .....                  | (Mr) .....         | 83            |
| Lucas.....                    | (Lc) .....         | 129           |
| Juan .....                    | (Jn) .....         | 206           |
| Hechos .....                  | (Hch) .....        | 265           |
| Romanos .....                 | (Ro) .....         | 337           |
| 1 Corintios .....             | (1 Co) .....       | 374           |
| 2 Corintios .....             | (2 Co) .....       | 410           |
| Gálatas.....                  | (Gá) .....         | 435           |
| Efesios.....                  | (Ef) .....         | 449           |
| Filipenses.....               | (Fil) .....        | 462           |
| Colosenses .....              | (Col) .....        | 470           |
| 1 Tesalonicenses .....        | (1 Ts) .....       | 478           |
| 2 Tesalonicenses .....        | (2 Ts) .....       | 485           |
| 1 Timoteo .....               | (1 Ti) .....       | 489           |
| 2 Timoteo .....               | (2 Ti) .....       | 498           |
| Tito .....                    | (Tit) .....        | 505           |
| Filemón.....                  | (Flm) .....        | 510           |
| Hebreos.....                  | (He) .....         | 513           |
| Santiago.....                 | (Stg).....         | 548           |
| 1 Pedro .....                 | (1 P) .....        | 557           |
| 2 Pedro .....                 | (2 P) .....        | 567           |
| 1 Juan.....                   | (1 Jn).....        | 573           |
| 2 Juan.....                   | (2 Jn).....        | 582           |
| 3 Juan.....                   | (3 Jn).....        | 584           |
| Judas.....                    | (Jud).....         | 586           |
| Apocalipsis .....             | (Ap) .....         | 589           |
| Ñaradaviva yávaicamuaque..... |                    | 625           |

*Caiye iye Jūmenijisni yánaiyede ĩ́vacari  
toivare ðarejaquetavũ ina ĩ́re toivacaivũ  
bácavũre. Que baru ĩ́i yánaiye bojesvũ majare,  
maje buenajiyere aiye iye yánaiyede jāvene,  
aru maje coreóvarãjiyere aiye maje ãteina  
teiyede, aru maje oatũvarãjiyere aiye maje  
ðaiyede, aru maje majinajiyere aiye aipe ðaiye  
jaũrõre, svãjĩvũ meara Jūmenijisni jāĩnore. Nai  
Jūmenijisvũre tetecavũbe nóre ðarĩ me majini,  
parĩni corevũ, ðasvũvũ caiye téne.*

*2 Tímoteo3:16-17*

# San Mateo

Mamabuĩnore coyuiyebu Mateo bácu ũi toivaiye báquede Jesucristorã. Mateo bácu barejaquémavu judíovacacu, Galilea âmicurijoborôcacu, aru Jesús ũi yávaiye méne beorĩ coyucôjeimaracacu. Levĩ âmícucu barejaquémavu Mateo bácu, ñai jabovare tãutura ïcaipôecu bácu, Roma âmicurô jaborôre memenu mácu, Jesús ũi órejaquiye jipocare ũ mácu. Majidivu ne dápiaiyepe iye coyuiyede Jesucristorã toivarejaquemavu ũ mácu cucu bácu Israel bácuĩ páramena ne curijoborõi. Pôecu cubebi majicu ye uju ũi toivaiju bácarôre diede, ubenita obedivu majidivu ne dápiaiyepe âniuju bácarôre 70 d.C. jipocare.

Mateo bácu jádovarejaquemavu Jesúre yópe jabocupe. Toivarejaquemavu judíovare, ne majinaiyepe ayu Jesúre Jümenijicui daroimu macuyúre, yópe ũi coyucôjeiye báquapedeca úre coyucaipôeva mácvure aru ne toivaiye báquapedeca Majepacu Jümenijicui yávaiye javequede coyuitucubore. Coyurejaquemavu 1:1 David bácu aru Abraham mácu Jesús ũi jipocacavu bácvure, dápiare ðacuyu Jümenijicu “Yópe ðarãjare”, ũi aye báquapedeca na mácvuque (Gn 15:18, 2 S 7:8-16). Jádovarejaquemavu Jesúre yópe buaipôecupe máre. Cüinápurupe paiye Jesús ũi coyuiye báquede toivarejaquemavu Mateo bácu: (1) Jümenijicui jaboteĩnore coyuíno (caps. 5-7); (2) Jesús ũi yávaiye méne beorĩ coyucôjeimarare cõjeiyede coyuíno (cap. 10); (3) jári dápiari ne ðarãjiyepe ainore coyuíno (cap. 13); (4) aipe ðaiye jauřore Jesúre ju aipôevare coyuíno (cap. 18); aru (5) ijãravu cüiyede aru Jümenijicui jaboteĩno buiyede coyuíno (caps. 13-24).

---

## Jesucristo ũi jipocacavu bácvure coyuíno

(Lc 3.23-38)

**1** <sup>1</sup>Yu toivaquijivu ne âmiãre inã Jesucristo ũi jipocacavu bácvure, ũi jipoca pôeteĩvu bácvure. Útame ñai jabocu bácu David bácuĩ páramecu, aru Abraham mácuĩ páramecu máre.

<sup>2</sup>Abraham mácu Isaac bácuĩ pacu barejaquémavu. Isaac bácu Jacob bácuĩ pacu barejaquémavu. Jacob bácu Judájã mácvu nêpacu barejaquémavu. <sup>3</sup>Judá bácu Fares bácu aru Zara bácu nêpacu barejaquémavu. Aru Tamar báco nêpaco barejaquémavu. Fares bácu Esrom mácuĩ pacu barejaquémavu. Esrom mácu Aram mácuĩ pacu barejaquémavu. <sup>4</sup>Aram mácu Aminadab bácuĩ pacu barejaquémavu. Aminadab bácu Naasón mácuĩ pacu barejaquémavu. Naasón mácu Salmón mácuĩ pacu barejaquémavu. <sup>5</sup>Salmón mácu Booz bácuĩ pacu barejaquémavu. Aru Rahab báco jípaco barejaquémavu. Booz bácu Obed bácuĩ pacu barejaquémavu. Aru Rut báco jípaco barejaquémavu. Obed bácu Isaĩ bácuĩ pacu barejaquémavu. <sup>6</sup>Isaĩ bácu David bácuĩ pacu barejaquémavu. Ñai David bácu Israecavu bácvu ne jabocu barejaquémavu. David bácu Salomón mácuĩ pacu barejaquémavu. Aru Urías bácuĩ márepaco jípaco barejaquémavu.

<sup>7</sup>Salomón mácu Roboam mácuí pacu barejaquémavu. Roboam mácu Abías bácuí pacu barejaquémavu. Abías bácu Asa bácuí pacu barejaquémavu. <sup>8</sup>Asa bácu Josafat bácuí pacu barejaquémavu. Josafat bácu Joram mácuí pacu barejaquémavu. Joram mácu Uzías bácuí ñecu marejaquémavu. <sup>9</sup>Uzías bácu Jotam mácuí pacu barejaquémavu. Jotam mácu Acáz bácuí pacu barejaquémavu. Acáz bácu Ezequías bácuí pacu barejaquémavu. <sup>10</sup>Ezequías bácu Manasés bácuí pacu barejaquémavu. Manasés bácu Amón mácuí pacu barejaquémavu. Amón mácu Josías bácuí pacu barejaquémavu. <sup>11</sup>Josías bácu Jeconías bácuí nēñecu marejaquémavu. Dinummuare, ne curinumuare, ina Babilonia ámicurōcavu bácvu ne buorī nuvaimara marejaquémavu maja Israecavu maje jipocacavu bácvu. Na mácvure nuvarejaquemavu pu Babilonia ámicurōita.

<sup>12</sup>Na mácvure ne buorī nuvariburu yóboi, Jeconías bácu Salatiel bácuí pacu barejaquémavu. Salatiel bácu Zorobabel bácuí pacu barejaquémavu.

<sup>13</sup>Zorobabel bácu Abiud bácuí pacu barejaquémavu. Abiud bácu Eliaquim mácuí pacu barejaquémavu. Eliaquim mácu Azor bácuí pacu barejaquémavu.

<sup>14</sup>Azor bácu Sadoc bácuí pacu barejaquémavu. Sadoc bácu Aquim mácuí pacu barejaquémavu. Aquim mácu Eliud bácuí pacu barejaquémavu. <sup>15</sup>Eliud bácu Eleazar bácuí pacu barejaquémavu. Eleazar bácu Matán mácuí pacu barejaquémavu. Matán mácu Jacob bácuí pacu barejaquémavu. <sup>16</sup>Jacob bácu Joséi pacu barejámeda. Ñai José Maríai márepacu barejámeda. Aru Maríai Jesúi paco barejámeda. Ñai Jesús Jūmenijicu ũi epeimu, Cristo, barejámeda.

<sup>17</sup>Que baru Abraham mácuí curinumuare, pu David bácuí curinumuata, catorce paiyajuboa bácvu curejaquemavu. Aru David bácuí curinumuare, pu ina Babilonia ámicurōcavu bácvu ne buorī nuvaiyeta maja Israecavu maje jipocacavu bácvure Babiloniaita, apevu catorce paiyajuboa bácvu curejaquemavu. Aru maja Israecavu maje jipocacavu bácvure ne buorī nuvaiyede, pu ñai Cristoi pōteiyeta, apevu catorce paiyajuboa bácvu curejaquemavu.

### Jesucristo ũi pōteino

(Lc 1.27, 31; 2.1-7, 21)

<sup>18</sup>Yópe barejávuya Jesucristo ũi pōteino macarō. Jípaco bacodó Maríai ámicuco barejámeda. Joséi márepaco bacodó barejámeda. Óre ũi nomicubedata cāreja, javeta ō micatedejaquemavu ñai Espiritu Santo ũi paruéque. <sup>19</sup>José boropatebecu barejámeda Jūmenijicuí jáinore. Que baru Maríai ōi juedojicure eaiyede coreóvarī, judíova ne ðaicōjeiyepedeca ðaiyurī, óre jaruvacuyu barejámeda. Ũbenita Josécapūravu ye jaruvaiyubedejameda óre pōeva ne jáiyede, “Cuyoje tede ðaquiichuvu yu óre” ayu. Que baru óre pōeva ne jámene jaruvaiyuridurejameda ñai José. <sup>20</sup>Ũi nópe dápíarīburu yóboi, cūinácu ángele, Jūmenijicuí daroimu, earejameda vuorūmūi José yebai. Aru yópe arī, coyurejameda ũre:

—Mu, José, David bácuí pāramecu, jidubecūva Maríare nomicujacu mu. Espiritu Santo ũi juedojímo mácotame ō. <sup>21</sup>Ũmu juedojicure cuvacadome ō. Ũ macuyúme meadacuyu ũi pōevare, ne ámeina teiyede jaruvarī. Que baru ũi macuyú Jesús ámicucuyume ũ, arejameda ñai ángele Joséde.

<sup>22</sup>Caiye iye nópe vaidéjavūya cūináturu Jūmenijicu ũi coyucōjeiye báquepedeca cūinácu ũi yáviyede coyucaipōecu bácvure. Yópe arī, toivaicōjenejaquemavu ũi mácvure Jūmenijicu:

<sup>23</sup> Nomió ãmicucubecova jueðoeaŕi jueðocuvacodome ò. Emanuel  
ãmícucuyume ù macuyú, arejaquemavu ñai Jümenijicui yáva iyede  
coyucaipöecu bácu.

Emanuel aiyurò, “Jümenijicu maja que cubi”, aiyuròtamu. <sup>24</sup> Que teni José  
coedarí, ángele ùi aiyé báquepe ðarejameða. Maríare nuvarejameða ùi  
cürami. <sup>25</sup> Òbenita óque cubedejameða cáreja, pu òi mácuŕe jueðocuvari buru  
yóboita. Aru òi jueðocuvaede, “Jesús bájacu mu” arí, ámidorejameða José.

### Abiá covare bueipöeva Jesúre ne járanuino

**2** <sup>1</sup> Belén ámicuríimaroí, Judea ámicuríjororóí, pöetedejameða Jesús. Òi  
pöteiyede dijororócu ne jabocu Herodes ámicucu barejámeða. Ò  
curejameða Jerusalén ámicuríimaroí. Dinumŕe aviá dainocavu, abiá covare  
bueipöeva, earejameða Herodes yebai. <sup>2</sup> Earí, yópe arí, jénari járejameða:  
—¿Muja judíova muje jabocu bacuyú, ári pöetecuba ù? Cünácu abiácoru ùi  
pöteiyede jáðovañŕe jári, daivubu ñu ja, jínajivu mearore úre, arejameða  
ina abiá covare bueipöeva.

<sup>3</sup> Apevu diede ne coyuiyede jápiarí, ámei cárijíñu marejámeða ñai jabocu.  
Òi jabocu bae boje, apecu jabocu ùi pöteiyede jápiaiyubedejaquemavu. Aru  
obedivu Jerusalécavu máre cárijivu barejámeða. <sup>4</sup> Cárijíñu, úre memecaivŕe  
órejaicöjenejameða Herodes apevu sacerdotevare jaboteipöevare aru  
Jümenijicui yáva iyé báquede bueipöevare máre. Ne eaiyede, yópe arí, jénari  
járejameða ñai jabocu:

—¿Ári pöteyuba Jümenijicui epeimu ijárvui, ñai Cristo? arejameða náre.  
<sup>5</sup> Yópe arí, coyurejameða úre:

—Belén ámicuríimaroí, Judeacaróí, pöetecuyume Jümenijicui epeimu, ñai  
Cristo. Yopede ca toivaicöjenejaquemavu Jümenijicui yáva iyede coyucaipöecu  
bácuŕe:

<sup>6</sup> Judea ámicuríjororocaró ímaro, Belén ámicuríimaroí, pöetecuyume  
ñai, Israecavu ne jabocu bacuyú, náre jipocatecuy. Que baru  
diímaro quíjinovacari, paruró maquiyébu, arí coyurejaquemavu  
Jümenijicui yáva iyede coyucaipöecu bácuŕe, arejameða ina judíovai  
jabova Herodede.

<sup>7</sup> Ne coyuríburu yóboi, úre memecaivŕe yavenina órejaicöjenejameða  
Herodes ina abiá covare bueipöevare, pöeva ne jápiabenoí. Náque boroteni,  
coreóvarí majidejameða aipiye bajure abiácoru ùi jároró mácaróre. <sup>8</sup> Majicu  
bácu, náre jarorejameða pu Belén ámicuríimaroita. Yópe ðaicöjenejameða  
náre:

—Voráñu ja muja jueðojícure. Vorí eaiyu bácu, coyuráðajará yure  
cojedeca. Yu máre nucuyumu ùi yebai, mearore jícuyú úre, arejameða  
borocucu ñai Herodes.

<sup>9</sup> Jápiayu bácu ùi coyuiyede, ina abiá covare bueipöeva mái nurejameða,  
yópe ñai jabocu ùi aiyé báquedeca. Que teni abiácoru, ne jáimu mácu  
aviá dainocapüravui, náre jipocateni nurejameða pu ùi eaiyede jueðojícui  
cüríñamine. Aru ðíñami pu enoi mauteðejameða. <sup>10</sup> Ne jáiyede abiácoru  
mauteyŕe cuibeda ðíñami pu enoi, uraró torojurejameða ne úmei. <sup>11</sup> ðíñami  
cürami jívui ne ecoiyede, járejameða jueðojícure jípacu Maríaque. Ñuatutarí  
ùí yebai, jíðejameða mearore úre. Que teni ne cuve ímaritöcuare voarí,

úrure, olíbano ámicue mumijuede, aru mirra ámicue mumijuede máre jídejaimada úre. <sup>12</sup>No yóboi, vuorümüi, Jümenijicu copainuicõjemenejaimada náre Herodes yebai. Que baru ma apemamata copainurejaimada ne curõita.

### **Jesúi bucuva Egiptoi ne dupini nuino**

<sup>13</sup>Ina abiácvare bueipõeva ne nuriburu yóboi, cüinácu ángele, Jümenijicui daroimu, cuetedejaimada Joséde vuorümüi. Yópe arí, coyurejaimada úre:

—Coedarí, nacajari, nuvajacu jueđojícure, jípacore máre, Egipto ámicurijoborõit a. Dupini nujara muja. Jueđojícure vorí, boarí jaruvaicõjecuyume Herodes. Que baru mautejará muja nore pu “Nujara”, ji aiyeta cojedeca, arejaimada ñai ángele Joséde.

<sup>14</sup>Coedarí, jueđojícure, jípacore máre, nuvarejaimada José. Diñamimareca Egipto ámicurijoborõita dupini nurejaimada na. <sup>15</sup>Aru nore, Herodes üi yaibéde cáreja, mautedejaimada na. Caiye iye nópe vaidéjavüya cünáturu Jümenijicu üi coyucõjeiye báquepedeca cünácu üi yávaiyede coyucaipõecu bácore. Yópe arí, toivaicõjenejaquemavu ü mácore Jümenijicu: “Jímacure cutucacu yu, üi etaquiepe ayu Egipto ámicurijoborõre jocarí”, arejaquemavu Jümenijicu.

### **Herodes ümu jueđojínare üi boarí jaruvaicõjeino**

(Mr 1.24; Lc 2.39; Jn 1.45)

<sup>16</sup>Ina abiácvare bueipõeva, ne copainumene Herodes yebai yópe üi cõjeino mácarõpe, Herodecapūravu jorojinejaimada, ne ju abe boje úre. Ne juvoiyede coreóvayu bácu, jorojĩnu, churaravare boarí jaruvaicõjenejaimada caivu ina ümu jueđojína pucaujua cuvabevure cáreja. Yópe üi corevaiyepene ina abiácvare bueipõeva ne coyuiye báquepe, mamarumure ne jáiye báquede abiácorure, Herodes boarí jaruvaicõjenejaimada caivu ina ümu jueđojínare, Belén ámicurĩmaroi curivure aru no ĩmaro joabenoi curivure máre. <sup>17</sup>Yópe Raquel báco õi oiye báquepe, nopedeca ina Belécavu máre orejaimada. Caiye iye nópe vaidéjavüya cünáturu Jümenijicu üi coyucõjeiye báquepedeca üi yávaiyede coyucaipõecu bácu Jeremías bácore. Yópe arí, toivaicõjenejaquemavu ü mácore Jümenijicu:

<sup>18</sup>Ramá ámicurĩmarore jápurateavüya urarõ ne chĩori oiye. Ico

Raquedecabe odo mamara mácvure boje. Nárecabu yaivu bácvu.

Que baru orí dajocabebico õ, arejaquemavu Jümenijicui yávaiyede coyucaipõecu bácu.

<sup>19</sup>Apenumua vaiyede, Herodes bácu üi yainĩburu yóboi, José üi cuede Egipto ámicurijoborõi, bediõva cojedeca vuorümüi cuetedejaimada úre cünácu ángele, Jümenijicui daroimu. Yópe arí, coyurejaimada úre:

<sup>20</sup>—Coedarí, nacajari, nuvajacu jueđocure, jípacore máre. Muje joborõ, Israel ámicurijoborõi, nujara cojedeca. Ñai boaiyucu bácu jueđocure jave yaibí, arejaimada ñai ángele Joséde.

<sup>21</sup>José coedarí, nuvarejaimada jueđocure jípacoque. Aru copainurejaimada Israel ámicurijoborõita. <sup>22</sup>Israecarõ Judea ámicurijoborõi nájurorivu barejaimada na. Ubenita Herodes bácu mácu, Arquelao ámicucu, Judeacavure jaboteyu barejaimada jípacu bácu yóboi. Aru die borore jápiarí, jiducu, Josécapūravu cuiyubedejaimada noi. Bediõva cojedeca vuorümüi,

Joséde nore nuicōjemenejameđa Jūmenijicu. Que baru apeno Israecarō, Galilea āmicurijoborōi, nurejaimađa Joséjā. <sup>23</sup> Nazaret āmicuriīmaroi nuri, earī, curejaimađa na. Nōpe vaidējāvūya cūināturu Jūmenijicui coyūicōjeiye báquepedeca ina ūi yāvaiyede coyūcaipōeva mácavure. Yópe arī, “Nai Cristo Nazarecacu bacuyúme”, arejaquemavu na mácavu.

**Juan Bautista ūi coyūino Jūmenijicui yāvaiyede pōecubenoī**

(Mt 4.17; 7.19; 12.34; 23.33; Mr 1.1-8, 15; Lc 3.1-9, 15-17; Jn 1.19-28; 8.33)

**3** <sup>1</sup> Obediūja yóboi, Juan Bautista coyurī búrejameđa Jūmenijicui yāvaiyede. Judea āmicurijoborōcarō pōecubenoī, pōeva vaivure coyure curejameđa nore. <sup>2</sup> Yópe arī, coyurejameđa:

—Chīori dāpiarī muje āmeina teiyede, oatuvajarā muje daiyede. Muje nōpe daiyede, maumena mujare jabotecuyume Jūmenijicu, arejameđa, coyuyu náre.

<sup>3</sup> Nai Juan Bautista barejaquémavu Jūmenijicui yāvaiyede coyūcaipōecu bácu Isaías ūi coyūimu mácū. Javede yópe arī, Isaías bácu coyūicōjenejaquemavu Jūmenijicu Juan Bautista bacuyúrā:

Jūmenijicure coyūcaipōecu codoboboyure jápiarājarama pōecubenoī:

“Meađajarā muje ūmene copū etaburī maje jabocure, nopedeca muje meađaiyepe daimare nai ūmu, muje pueđaimu, ūi daquiye jipocai.

Que đarī dajocajarā muje āmeina teiyede Jūmenijicui daroimu macuyú ūi daquiye jipocai, Jūmenijicui copū etaquiyepe ayu mujare”, arejaquemavu Isaías bácu, coyuyu Juan Bautista bacuyúrā.

<sup>4</sup> Juan Bautista dorejameđa camello āmicucui pođaque đaicajede ūi cuitótecaje. Aru ūi járíoicáva máre āimacajeque đaicáva marejávūya. Ū āre curejameđa mujuñuvare aru mumicorore máre, yópe apevu nócavu cūve cūvabevure. <sup>5</sup> Obedivu pōeva, Jerusalén āmicuriīmarocavu, Judea āmicurijoborōcavu, aru Jordán āmicuriya jia ēcaruacavu máre jápiarānurejaimađa Juan Bautista yebai. <sup>6</sup> Aru jiai, Jordán āmicuriyai, na coapa “Āmecubu yu” ne arīburu yóboi Jūmenijicure, ne chīori dāpiaiye boje ne āmeina teiyede, jáđovarejameđa Jūmenijicue.

<sup>7</sup> Obedivu judíovai jabova, fariseo āmicuriyajubocavu aru saduceo āmicuriyajubocavu máre, jáđovaranurejaimađa Jūmenijicue jiai. Ūbenita na eavure jári, yópe arejameđa Juan Bautista:

—¡Muja jujovaivubu, muje daiye boje mearape! ¡Aru ađavape paivubu muja, muje āmeđaiye boje apevure! Jūmenijicui jorojīquijāravu eaiyede, jāve dupini buojabenamu muja. <sup>8</sup> Đajarā muja yópe pōeva chīoivū ne āmeina teiyede, oatuvaivū ne daiyepe. <sup>9</sup> Yópe arī, “Majeñecu Abraham mácū meacu barejaquémavu. Jūmenijicu yóvarejaquemavu ū mácure. Que baru meara bajutamu maja Jūmenijicui jáinore. Aru ūi jorojīquinore dupini buojarājaramu maja”, arī dāpiabejarā muja. Jāve coyuyubu mujare: Muja oatuvabevu baru, Jūmenijicui jorojīquijāravu eaiyede dupini buojabenamu muja. Jápiajarā. Jūmenijicu ucu baru, buojaibi oatuvayū iboá cūraboare Abraham mácui pāramena mārājivure đacuyū, ne đarājiyepe ayu yópe ūi urōpe. <sup>10</sup> Yópe jiore memeipōecu ūi jáiyede jocucua jeidua mearua cūbecure ūi jioi, ūi jaruvajuroepe dicuäre toaboi, nopedeca Jūmenijicu jáñu mujare mearo đabevure, jaruvacuyume mujare toabo cūiméboi.

<sup>11</sup> Yũ jãve mujare jádovaivu Jũmenijicure ocoque, muje chĩori dápiaiye boje muje ãmeina teiyede. Ubenita dacũyume ji yóboi cũinácu, ji pueno parũcu. U macũyũme jádovaũũ mujare Jũmenijicũque Espĩritu Santoque, uĩ cuquiyepẽ ayũ mũaque aru uĩ cađatequiyepẽ ayũ mujare máre. Aru u macũyũme jádovaũũ mujare Jũmenijicũque toaque máre, muje meara tenajiyepẽ ayũ yópe pœva ne meadaiyepẽ tãure toaque, aru uĩ nãjine đaquiyepẽ ayũ mujare, meara tebedu. Que baru caivu pueno meacu bajube u. Yũcapũravũ pare uĩ cãchinocacũbu. Que baru uĩre cađateni buojabevũ yũ. Pũ oarĩ buojabevũ yũ nũvacayũ uĩre uĩ curaidoare. <sup>12</sup> Yópe oteiyẽ memeipœcũ uĩ veoiyepẽ jaraboque, oteiyede epecũyũ uĩ epeĩnami, aru oteiyẽ cajeáre juacũyũ, nopedeca Jũmenijicũ uĩre ju aivũre epecũyũme uĩ jaboteinoi aru uĩre ju abevũre jaruvacũyũme toabo cũiméboi, arĩ buedejameđa Juan Bautista.

**Juan Bautista uĩ jáđovaino Jesũre Jũmenijicũque**

(Mt 12.18; 17.5; Mr 1.9-11; Lc 3.21-22; 9.35)

<sup>13</sup> Dinũmũre Jesũs nũrejameđa, etacũyũ Galilea ãmicurijoborõre jocarĩ, pũ Juan Bautista yebaita, Jordán ãmicuriya jiai, uĩ jáđovaquiyepẽ ayũ uĩre Jũmenijicũque. <sup>14</sup> Juan Bautistacapũravũ uĩre jáđovaiyubedejameđa. Que baru arejameđa Jesũre:

—Yũre jãuvũ mi jáđovaino ocoi Jũmenijicũque, ji ãmeina teiyẽ boje. Mũrecabu meacu baju. Que baru mũre jãubevũ ji jáđovaino ocoi Jũmenijicũque, arejameđa Jesũre Juan Bautista.

<sup>15</sup> Ubenita Jesũcapũravũ arejameđa:

—Yópe Jũmenijicũi đaicõjeiyepẽ đaiye jãuvũ majare. Que baru mũre jãuvũ mi jáđovaino yũre ocoi Jũmenijicũque, arejameđa uĩre Jesũs.

Que baru Juan Bautista jáđovarejameđa Jesũre Jũmenijicũque no jiai. <sup>16</sup> Uĩ jáđovariburu yójĩboi, maumena marejameđa Jesũs jiare jocarĩ. Dinũmũmiareca vorĩ nũrejãvũya cavarõ mearo Jũmenijicũi curõ. Aru Jũmenijicũi Espĩritu jurecope ěmeni tubacodadore uĩ pũnora járejameđa Jesũs. <sup>17</sup> Aru ina curivũ noi jãpiarejaimađa apeno yãvainore, cavarõ mearo Jũmenijicũi curõque aiyede yópe: “Nainecabe jĩmacũ, ji mũmũ. Me torojũvũ yũ uĩre”, arejameđa Jesũre Jũmenijicũ.

**Abujuvai jabocu uĩ Jesũre jujovarĩduino**

(Mr 1.12-13; Lc 4.1-13; He 2.18; 4.15)

**4** <sup>1</sup> Dinũmũre ñai Espĩritu Santo nũvarejameđa Jesũre pœcũbenoi, ñai abujuvai jabocu uĩ jujovarĩduquiyepẽ ayũ uĩre. <sup>2</sup> Aru cuarenta pajãravũa, cuarenta paiĩnamia yéde ãmenejameđa Jesũs. Que baru no yóboi ãvũé ijidejavũya uĩre. <sup>3</sup> Ñai jujovayũ, Satanás ãmicucũ, earĩ, Jesũs ãyũaiyũre coreóvarĩ, arejameđa uĩre:

—Jãveneca Jũmenijicũi mácu baru, ãiye đajacu iboá cũraboare, arejameđa.

<sup>4</sup> Ubenita Jesũs arejameđa ñai abujuvai jabocure:

—Mi aiyepẽ đabevũ yũ. Jũmenijicũi yãvaiye uĩ toivaicõjeiyẽ báque coyũivũ yópe: “Pœva cubenama ne ãiye matũiyeda. Quénora curãjarama caiye Jũmenijicũi yãvaiyeque máre”, arejameđa Jesũs.

<sup>5</sup> Que arĩburu yóboi, ñai abujuvai jabocu nũvarejameđa Jesũre Jerusalén ãmicurĩĩmaroi. Uĩre mũri nũre đarejameđa Jũmenijicũi cũrami pũnora. <sup>6</sup> Aru arejameđa uĩre:

—Jāve Jūmenijicui mácū baru, turī nujacu yore jocarī, pū joborōita. Que baru Jūmenijicui yávaiye ūi toivaicōjeiye báque coyuiṽu mi borore yópe: “Jūmenijicu jarocuyume ūi ángelevare, ne corenajiyepe ayu mure. Jāmúorajarama mure ne puruáque mi ijíe tebequiyepa aivṽu mi cubobare cūraboque”, arī toivarejaquemavṽu. Que baru mi turī naru, yṽu jáñṽu buojacuyumu Jūmenijicu dayure yópe ūi aye báquepedeca, arejameḁa Jesúre ñai abujuvai jabocu.

<sup>7</sup>Aru Jesúcapūravṽu arejameḁa úre:

—Mi ayepe ḁabevṽu yṽu. Jūmenijicui yávaiye ūi toivaicōjeiye báque coyuiṽu yópe: “Jūjovabejacu mi jabocu Jūmenijicure. Jáḁovaicōjemejacu ūi paruéde”, arī toivarejaquemavṽu. Que baru yéde ḁabevṽu yṽu, jáḁovaicōjejurocu ūi paruéde. Majivṽu yṽu paruere, arejameḁa Jesús.

<sup>8</sup>Aru bediόva cojedeca ñai abujuvai jabocucapūravṽu nuṽarejameḁa Jesúre. Cūracū ūmujuricū puenoi jáḁovarejameḁa caiye ijāravucarōa imaroare aru caiye die cuve méne máre. Aru arejameḁa úre:

<sup>9</sup>—Caiye iye jabocubu yṽu. Que baru jíquijivṽu mure caiye iyede, mi ñuatutarī mearore jídu yure, arejameḁa Jesúre ñai abujuvai jabocu.

<sup>10</sup>Dinumure Jesúcapūravṽu arejameḁa úre:

—Mi ayepe ḁabevṽu yṽu. Aru mṽu, Satanás, maumena nujacu mṽu yure jocarī. Jūmenijicui yávaiye ūi toivaicōjeiye báque coyuiṽu yópe: “Mearore jíjacu mi jabocu Jūmenijicure aru úre cūinácura memecajacu yópe ūi urōpe”, arejameḁa Jesús.

<sup>11</sup>Que baru ñai abujuvai jabocu nurejameḁa Jesúre jocarī. Aru ángeleva coreni cadatedejaimada úre.

### **Jesús Galileai ūi bueni buino**

(Mt 3.2; 14.3; Mr 1.14-15; 6.17; Lc 3.19-20; 4.14-15; Jn 2.12)

<sup>12</sup>Dinumure Herodes ámicucu jabocu buoicōjenejameḁa Juan Bautistare. Die borore jápiayṽu bácu Jesús, nurejameḁa Galilea ámicurijoborōi.

<sup>13</sup>Naza ret ámicurīimarore dajocarī, nuri apeno joborōi, Zabulón aru Neftalí ámicurīyajuboa pōeyajuboacavṽu ne curijoborōi, nurejameḁa Jesús. Capernaum ámicurīimaroi cucunurejameḁa, macajitabu urabu écarui. <sup>14</sup>Nópe vaidéjavūya cūináturu Jūmenijicu ūi coyuiṽu toivaicōjeiye báquepedeca ūi yávaiyede coyucaipōecu bácu, Isaías ámicucure. Yópe arī, toivaicōjenejaquemavṽu ūi mácure Jūmenijicu:

<sup>15</sup>Zabulón aru Neftalí ámicurijoborōai, Jordán ámicuriya apeduve, jia uradacapūravui, Galilea ámicurō, judiόva ámeṽu ne curōtamu.

<sup>16</sup>Ina pōeva ñeminoi dobarivṽu bácvṽu urarō mearo miadārore jáḁama. Ina pōeva bótainope painoi dobarivṽu bácvure, ne ūme yaijuroede, miadāe tuivṽu náre, arejaquemavṽu Jūmenijicui yávaiyede coyucaipōecu bácu.

Nópe ūi coyuiyede, yópe aiyurejaquemavṽu: Ina judiόva ámeṽu Jūmenijicui yávaiyede jāvene majibedejaquemavṽu aru jāravṽu cūiméjaravṽu baquinóre cuvabedejaquemavṽu Cristoi daquie jipocai.

<sup>17</sup>Dinumumiata bueni búrejameḁa Jesús. Yópe arī, coyure curejameḁa:

—Chīori dápiarī muje ámeina teiyede, oatuvajarā muje ḁaiyede. Muje nópe ḁaiyede, maumena mujare jabotecuyume Jūmenijicu, are nurejameḁa Jesús.

**Jesús ũi “Dajarā” aino yóvaicũvaivũ moa boaipõevare**

*(Mt 9.35; Mr 1.16-20, 39; Lc 5.1-11)*

<sup>18</sup>Que teniburu yóboi, Jesús cuyũ macajitabũ urabũ Galilea āmicurijitabũ ēcarui, járejamedã pucarã ũmũvare, Simóre aru Andrés ĩmacũmaquevũre. Moa boarĩ bojedaipõeva marejáimada na. Que baru duvaivũ barejáimada ne pápicũ uracũre dibũ macajitabũ. <sup>19</sup>Ne que teiyede, Jesús arejamedã náre:

—Dajarã yúque. Epequĩvivũ mũjare, mũje davarãjiyepe põevare ji yebai, yópe mũje moare davaĩyepe pápicũque, ji meadaquĩyepe náre, arejamedã Jesús.

<sup>20</sup>Que ayũre jápiarĩ, dajocarejaimada ne pápicũare, nũrajivũ Jesúque.

<sup>21</sup>Aru cuyũ cãreja, jipocai járejamedã apevũ pucarã ũmũvare, Zebedeoi mārare, Santiago aru ĩmacũ Juan. ĩmarejaimada népacũque ne jiadocũĩ, meadaivũ ne pápicũare. Járina, cuturejamedã náre. <sup>22</sup>Quénora cũinã dajocarejaimada dicũre aru népacũre märe, nũrajivũ Jesúque.

**Jesús ũi bueino obedivũ põevare**

*(Lc 6.17-19)*

<sup>23</sup>Jesús bueyũ barejáame Jũmenijicũĩ yávaiyede caino Galilea āmicurijoborõi judfovai cójijiĩnamiai. Coyũyũ barejáame iye yávaiye méne Jũmenijicũĩ jaboteiyede põevare. Aru meadayũ barejáame põevare caiye duica ĩjié coapa aru caino ĩjinore märe. <sup>24</sup>Que baru caivũ põeva Siria āmicurijoborõcavũ jápiarejaquemavũ Jesũĩ borore. Aru obedivũ põeva névũ ĩjimarare meadarānũvarejaima Jesús yebai. Ina duica ĩjiéde cũvarivũre, ĩjiéde nájivũre, ĩjinore cũrivũre, abujuva ĩmamarare, bidivũre aburi ne ĩjicamũre etaiyeque, aru nacajaiye majĩbevũre märe meadarejame Jesús. <sup>25</sup>Aru obedivũ põeva nũrejaima ũi yóboi, Galilea āmicurijoborõcavũ, Decápolis āmicurõcavũ, Jerusalén āmicurĩĩmarocavũ, Judea āmicurijoborõcavũ, aru Jordán āmicurĩya jia apedũvecavũ märe.

**Jesús ũi bueino obedivũ põevare cũracũĩ**

*(Lc 6.20-23; Hch 7.52; 1 P 3.14; 4.14)*

**5** <sup>1</sup>Jesús jáñũ ina obedivũ põevare, mũri nũrejamedã cũracũĩ. Noi ũi dobacũnuiyede, buecũyũ ũi bueimarare, ina põeva nũrejaimada ũi yebai. <sup>2</sup>Näre yópe arĩ buenĩ búrejamedã Jesús, ne majinajiyeye ayũ aipe ārojarivũre ina põevare, Jũmenijicũĩ jaboteimara mārājivũre. Yópe arejamedã:

<sup>3</sup>—Torojurājarama ina cõmaje ārojarivũ ne ũmei, ne coreóvaiye boje ne baju āmeina teivũ. Jũmenijicũĩ ũi cađatebedu náre, buojabema đavũ mearore. Nárecabu Jũmenijicũĩ jaboteimara. <sup>4</sup>Torojurājarama ina chĩoivũ ne baju āmeina teiye boje, aru ĩjāravũcavũ ne āmeina đaiye boje märe. Nárecabu Jũmenijicũĩ torojure đaquimara. <sup>5</sup>Torojurājarama ina “¿Meara mārĩca ñũja?” abevũ, ne coreóvaiye boje Jũmenijicũĩ jĩyũre caiye náre jawéde, ne cũvarãjiyepe ayũ méne, aru ne đarãjiyepe ayũ mearore. Mamajāravũ edaquĩjāravũ baquinóre, nárecabu Jũmenijicũĩ mearore jĩcaquimara. <sup>6</sup>Torojurājarama ina teiyũrivũ boropatebevũpe Jũmenijicũĩ jáĩnore, yópe āuyavũ ne āiyũrepe aru náre cũĩñóiyede ne ũcũiyũrepe. Nárecabu

Jūmenijicui boropatebede đaquimara. <sup>7</sup>Torójurājarama ina cōmaje āroje jáivu apévure, ne coreóvaiye boje Jūmenijicui náre cōmaje āroje jámenu, na máre nájijurorivure ne āmeina teiye boje. Nárecabu Jūmenijicui cōmaje āroje jáquimara. <sup>8</sup>Torójurājarama ina pucaūmea cubevu, ne đaiyue boje caiyede yópe Jūmenijicui urópe, ne baju urópe đaiyubevuva. Nárecabu Jūmenijicure járajivu. <sup>9</sup>Torójurājarama ina cārijimene đavū apévure, ne baju cārijimevuvu cūe boje Jūmenijicue. Nárecabu Jūmenijicu “Jímaramu”, ũi aquimara. <sup>10</sup>Torójurājarama ina pōeva apēvu ne nájine đaimara, ne đaiye boje mearore yópe Jūmenijicui urópe dajocabevuva. Nárecabu Jūmenijicui jaboteimara. <sup>11</sup>Torójurājaramu muja pōeva Jūmenijicure ju abevu ne jaraiyede mujare, ne nájine đaiyede mujare, aru ne borocurī āmeina coyuiyede mujara máre, muje yóvaiye boje yure. <sup>12</sup>Me torójurājaramu muja. Que teni boje uraróre cūvarājaramu muja cavarō mearo Jūmenijicui curōi. Nopedeca ina javēvavu bācavu, Jūmenijicure ju abevu bācavu máre, nájine đarejaquemavu ina Jūmenijicui yāvaiyede coyucaipōeva māvavure, muje jipocacavu bācavure, arejameđa Jesús.

**“Yuquirare” aru “pēoibure” jári dāpiarī ne đarājiyepe aino**

(Mr 4.21; 9.50; Lc 8.16; 11.33; 14.34-35; Jn 8.12; 9.5; 1 P 2.12)

<sup>13</sup>Bedióva Jesús, yópe arī, budejameđa náre:

—Mujarecabu yópe yuquirape paivu ijaravui. Meadaivubu maje āiyede yuquiraque. Nopedeca muja meara đaiyubu pōevare. Yuquira maje āiyede meadaivu. Ūbenita yuquira ejué bíjaru, āiyede meadarī buojabevu. Quédata pōeva jaruvadama diede mára, dimai cuivu ne curarājiyepe aivu diena. <sup>14</sup>Mujarecabu yópe miadárope paivu ijaravui. Cūináro imaro cūracū puenoi curō maru, ye yaveni buojaino āmevu. Que baru caivu pōeva járajarama diimarore. <sup>15</sup>Pōecu pēoibure pēoriburu yóboi, nómemi dibure puebu cāchinoi. Quénora űoimi dibure jocuve puenora. Que baru caivu diñami cūrami curivu járajarama me. <sup>16</sup>Nopedecabu muje cūe pōeva ne jáinore. Ména cūjarā muja ijaravui, yócvu ne járajayepe aivu muje mearore đaiyede. Diede jári, coreóvarājarama aipe ārojacure majepacu cavarō mearocacure. Aru “Meacubu mu”, arājarama űre, arejameđa Jesús.

**Jesús űi bueino Jūmenijicui jaboteiyede aru űi đaicōjeiyede**

(Lc 16.17)

<sup>17</sup>Cojedeca Jesús, yópe arī, budejameđa náre:

—“Jaruvacudayube”, arī dāpiabejarā yure iye đaicōjeiyede Jūmenijicui coyuiye báquede Moisés bācure, aru ina Jūmenijicui yāvaiyede coyucaipōeva māvavu ne coyuiye báquede máre. Diede jaruvacudabevu yu. Quénora mujare jáđovacudayubu aipe aiyuróre, aru aipe đaiye jauróre caiye diede jaubevuva. <sup>18</sup>Que baru jáve coyuyubu mujare: Cūinájaravu yo cavarō aru yo joborō máre cūiquíyebu. Ūbenita caiye iye Jūmenijicui yāvaiye, űi toivaicōjeiye báque, ye cūiméquiye. Quénora caiye vaiquíyebu yópe Jūmenijicui toivaicōjeiye báquepedeca űi yāvaiyede. <sup>19</sup>Caiye iye Jūmenijicui yāvaiye, űi toivaicōjeiye báque, javvu majare. Que baru caivu pōevare ju are đaiye javvu caiye diede. Ūbenina yávabecube Jūmenijicu. Ácu pōecu apejīe űi yāvaiyede ju abede đabecu baru, aru apévure máre bueyu baru ne ju abede đabenajiyepe ayu,

úrecabe jaboteimũ ámecũyũ cavarõ mearo Jũmenijicui curõi. Ubenita ácu põecu caiye Jũmenijicui yáviyede ju are ðayũ baru, aru apevure máre bueyũ baru ne ju are ðarãjiyepe ayũ, úrecabe Jũmenijicui jaboteimũ me pueðaimũ macũyũ cavarõ mearo Jũmenijicui curõi. <sup>20</sup>Que baru coyũyũbu mujare: Mearore ðaiye jaũvũ mujare ina Jũmenijicui yáviye báquede bueipõeva pũeno aru ina fariseova pũeno máre. Ne pũeno Jũmenijicui urõpe ðarĩ, mearore ðabevũ baru muja, ye Jũmenijicui jaboteimara ámenajaramu muja, aru cavarõ mearo ùi curõi cubenajaramu muja, arejameða Jesús.

**Jesús ùi bueino põeva ne jaraiyede**

(Lc 12.57-59)

<sup>21</sup>Yópe arĩ, buedejameða Jesús:

—Jápiadavũ muja ina javecavũ jápiaivũ bácvure iye coyũiye báquede yópe arĩ: “Põevare boarĩ jarũvabejarã muja. Ácu põecu apecure boarĩ jarũvayũ baru, úrecabe ñájicũyũ”, arejaquemavũ. <sup>22</sup>Ubenita yácapũravũ coyũyũbu mujare yópe: Ácu põecu jarayũ baru apecure, úrecabe ñájicũyũ. Ácu põecu “Árũmecubũ mu” ayũ baru apecure, úrecabe ñájicũyũ. Aru ácu põecu “Jũmenijicure coreóvabecubũ mu” ayũ baru apecure, úrecabe ñájicũyũ toabo cũiméboi. Põeva nópe ámeina yávaivũ apecure ámeina ðaivũbu, yópe ne boarĩ jarũvajuroepe úre.

<sup>23-24</sup>‘Que baru mu nũvañũ maru mi Jũmenijicure jácaquiyede ùi cũrami, aru nore earĩ, dápiayũ baru apecũ chĩõñure mi ámeina ðaiye boje úre, epeni ðajocajacũ mi Jũmenijicure jácaquiyede iva úre jácaiyede juaiva jipocai. Nujacũ ñai mi ámeina teimũ yebai, jẽniacũyũ ùi árũmetequiyepe ayũ iye mi ámeina teiye báquede úre copũ. Mi cãrijimene ðarĩburu yóboi úque, copainuri Jũmenijicui cũrami, mi jácaquiyede jíjacũ úre.

<sup>25</sup>‘Apecũ ùi ámecororu mure, aru ùi nũvaiyuru mure jabova ne ámeina teivure jẽniari jáiñami, maumena “Meaðarãjarevũ” ajacũ úre, ùi nũvamequiyepe ayũ mure jabova ne ámeina teivure jẽniari jáipõecure, aru ùi jẽni jíbequiyepe ayũ mure churaravare, aru ne jarũvabenajiyepe aivũ mure ámeina teivure jẽni jacoĩñami jívuĩ. <sup>26</sup>Jãve coyũyũbu mure: Ne buoru mure ámeina teivure jẽni jacoĩñami, etabecũyũmu mu caiye iye mi bojecube ðaiyede bojeðayuta, arejameða náre Jesús.

**Jesús ùi bueino põeva ne ámeina ðaiyede apevũ némarebucũvaque**

(Mt 18.8-9; Mr 9.43, 47)

<sup>27</sup>Bedióva Jesús buedejameða, yópe arĩ:

—Jápiadavũ muja ina javecavũ jápiaivũ bácvure iye coyũiye báquede yópe arĩ: “Ámeina ðabejarã muja apevũ némarebucũvaque”, arejaquemavũ. <sup>28</sup>Ubenita yácapũravũ coyũyũbu mujare yópe: Ácu põecu jáñũ maru nomióre, jẽiyurĩ dápiayũ baru óre, úrecabe ámeina ðayũ óque ùi que dápiaye boje.

<sup>29</sup>‘Que baru mu ámeina teyũ baru mi jáiyede yacorũ meapũravũcarũque, ñni jarũvajacũ ðiðure. Meaquiyebu bíjaru mure cũinãrũ yacorũ, Jũmenijicui jarũvabequiyepe ayũ mi baju caibajure toabo cũiméboi. <sup>30</sup>Aru mu ámeina teyũ baru mi ðaiyede purũ meapũravũcapũrũque, burarĩ jarũvajacũ ðipũrũre. Meaquiyebu bíjaru mure cũinápũrũ, Jũmenijicui jarũvabequiyepe ayũ mi baju caibajure toabo cũiméboi, arejameða náre Jesús.

**Jesús ñi bueino nomi jaruvainore**

(Mt 19.7, 9; Mr 10.4, 11-12; Lc 16.18; 1 Co 7.10-11)

<sup>31</sup> Bedióva Jesús buedejamedá, yópe arĩ:

—Jápiadavũ muja ina javecavũ jápiaivũ bácvure iye coyuiye báquede yópe arĩ: “Ácu pōecu jaruvayũ baru jímarepacore, óre jĩjacurĩ cūináyoca ‘Mure jaruvayũbu yu’ aiyocare”, arejaquemavũ. <sup>32</sup> Ëbenita yúcapūravũ coyuyũbu mujare yópe: Ácu pōecu jaruvayũ baru jímarepacore ãmeina ðabecoreca apesũque, úrecabe ãmeina ðare ðacuyũ óre, ñi jaruvarĩburu yóboi cũco baru apesũque. Aru ácu pōecu purũbuoyũ apesũ ñi jaruvaimo mácoque, úrecabe ãmeina ðayũ óque òi mamarũmũcacũre jaruvarĩ, arejamedá Jesús.

Nópe ayũ, “Nomi jaruvainore ubevũ yu”, aiyucũ barejaquémavũ Jesús.

**Jesús ñi bueino pōeva “Jãve ðacuyũmu” ne aiyede**

(Mt 23.22; Stg 5.12)

<sup>33</sup> Yópe arĩ, buedejamedá Jesús:

—Jápiadavũ muja ina javecavũ jápiaivũ bácvure iye coyuiye báquede yópe arĩ: “Borocurĩ, ‘Jãve ðacuyũmu yu ji coyuiyepe’, abejarã muja. Quénora ðacajarã Jũmenijicũre caiyede yópe muje coyuiye báquedepedeca úre”, arejaquemavũ. <sup>34</sup> Ëbenita yúcapūravũ coyuyũbu mujare yópe: Muje yáva iyede ye jēniamejara apesũre, ñi jáðovaquiyepesũ aivũ muje coyuiye jãvene. Cavarõ mearotamu Jũmenijicũi dobarõ mearo curõ. Que baru jēniamejara cavarõ mearocacũre, ñi jáðovaquiyepesũ aivũ muje coyuiye jãvene. <sup>35</sup> Ijãravutamũ yópe Jũmenijicũi cuboba tuoinope, ñi cuedaiye báque boje ijãravũre aru ñi purũcvæe boje caiyede. Que baru jēniamejara ijãravũcacũre, ñi jáðovaquiyepesũ aivũ muje coyuiye jãvene. Jerusalén ãmicurĩĩmarotamu Jũmenijicũ, ñai jabocũ parucũ baju, ñi ĩmaro. Que baru jēniamejara Jerusalécacũre, ñi jáðovaquiyepesũ aivũ muje coyuiye jãvene. <sup>36</sup> Muja oarĩ ðabevũ cūináme muje podamene boede aru ñemiéne máre. Jũmenijicũ cūinárecabe oarĩ ðayũ diede. Que baru jáðovamejara muje coyuiye jãvene mi jipobũque. <sup>37</sup> Que baru muje yáva iyede jũ ajarã aru bi ajarã quénora. Apejiene coyuivũ baru, ãmeina ðajebu. Ina borocurĩ yávaivũre jēniaiyesũ jãvũ apesũre, ñi jáðovaridũquiyepesũ aivũ ne coyuiye jãvene. Ëbenita muja jãvene yávaivũre jãubevũ diede, arejamedá Jesús.

**Jesús ñi bueino pōeva ne ñájine ðaiyuede ne mauvare**

(Lc 8.29-30)

<sup>38</sup> Bedióva yópe arĩ, buedejamedá Jesús:

—Jápiadavũ muja ina javecavũ jápiaivũ bácvure iye coyuiye báquede yópe arĩ: “Ácu pōecu ñi ãmedaru apesũ yacorũre, ñi yacorũre máre ãmedajarã muja. Aru ácu pōecu ñi ãmedaru apesũ cōpiyore, ñi cōpiyore máre ãmedajarã muja”, arejaquemavũ. <sup>39</sup> Ëbenita yúcapūravũ coyuyũbu mujare yópe: Maucũvabejarã ina mujare ãmedaivũre. Quénora cūinácu pōecu ñi pēvarũ muje meapūravũcaviobũre, copedini pēvaicōjejara muje cãcopūravũcaviobũre máre. <sup>40</sup> Aru cūinácu pōecu ñi nuvaicōjenu mujare jabova ne ãmeina teivũre jēniari jáĩĩnami, aru ñi ãmecororu mujare, jabocũ ñi jícōjequiyepesũ ayũ mujare muje camisare ñai pōesũre, ñi nuvaicōjequiyesũ jipocai, úre jĩjarã dicajede aru

mujë puenocacajede máre. <sup>41</sup> Cûinácû churara ùi nûvacaicôjenu mujare ùi cûvede cûinákilometro, yópe Romacavû ne jabova ne cõjeinope, nûvacajará diede pûcakilometros, diede ðaiyûbevûvacari. <sup>42</sup> Ñai mujare jêniañûre jîjarâ ùi jêniaiyede, bojedabecûreca mujare. Aru ñai mujenore “Jîjarâ cãreja” ùi aru, jû arî jîjarâ mujare ùi jêniaiyede máre, jacopaiyovabecûreca mujare mujë jýye báquede úre, arejamedá Jesús.

**Jesús ùi bueino maje ùrõre maje mauvare**

(Lc 6.27-28, 32-36)

<sup>43</sup> Jesús buedejamedá cojedeca:

—Jápiadavû muja ina javecavû jápiaivû bácvûre iye coyûiye báquede yópe arî: “Ûjarâ mujevure aru ubejarâ mujë mauvare”, arejaquemavû. <sup>44</sup> Ûbenita yûcapûravû coyuyubu mujare yópe: Ûjarâ mujë mauvare. Ina mujare ñájine ðaivure jêniacajará Jûmenijicuque, ùi mearo ðacaquiyepe aivû náre. <sup>45</sup> Que ðaivû baru, majepacû cavarõ mearocacû ùi mára marajáramu muja. Ûpe paivû barâjáramu muja, mujë mearo ðaiyede mearare aru âmenare máre. Ûrecabe aviáre bóre ðayû ina mearare aru ina âmenare máre, aru ocare ðayû ina boropatebevure aru ina boropateivure máre. <sup>46</sup> Muja, Jûmenijicûi pôeva, mujë ùru náre ina ùrivure mujare, Jûmenijicu ye bojedabecûyume ména pôevare ne que ðaiyede. Ina máre, jabovare táutura ícaipôeva, âmeina ðaivûvacari, nópe ðadama. <sup>47</sup> Muja, Jûmenijicûi pôeva, jacoyûivû baru mujevû quévûra, mearore ðabevû muja. Ina máre, judíova âmevû, âmeina ðaivûvacari, nópe ðadama. <sup>48</sup> Que baru mujacapûravû, cõmaje âroje jári, mearore ðajarâ apévure jaubevûva, yópe majepacû cavarõ mearocacû ùi ðaiyepe, arejamedá Jesús.

**Jesús ùi bueino aipe ðaiye jaurõre pôevare, ne cadatenajiyeye cõmaje ârojarivure aino**

(Mt 23.5)

**6** <sup>1</sup> Bedíova cojedeca Jesús, yópe arî, buedejamedá:

—Me jájara muja mujë ðaiyede mearore, cadatenajivû ina cõmaje ârojarivure. Náre cadatedu, jáicõjenajivû apévure mujë ðaiyede mearore. meamejebu. Nópe ðaru, majepacû cavarõ mearocacû ye bojedabecûyume mujare.

<sup>2</sup> Que baru cainûmua mujë jícaiyede cadatenajivû ina cõmaje ârojarivure, jíbejarâ caivû ne jáinoi, yópe ina mujovaivû ne jýyepe. Nácapûravû jýyaima maje cõjijîñamiai aru mái máre, jáicõjenajivû apévure, ne mearo yávarâjiyepe aivû nára. Jáve coyuyubu mujare: Nácapûravû javede cuvama ne boje caiyede. Apevû pôeva ne mearore jýye náre, diebu ne boje matuiye. Majepacû cavarõ mearocacû ye bojedabecûyume náre. <sup>3</sup> Ûbenita mujacapûravû, mujë jícaiyede cadatenajivû ina cõmaje ârojarivure, ñamene coyûbejarâ mujë ðaiyede. <sup>4</sup> Quénora cainûmua jîjarâ yavenina, apevû ne coreóvabenajiyeye aivû. Nópe ðaru, majepacû cavarõ mearocacû, ñai jáñû mujë ðaiyede yavenina, bojedacûyume mujare ména, arejamedá Jesús.

**Jesús ùi bueino aipe ðaiye jaurõre pôevare, ne jênarijiiyepe Jûmenijicuque aino**

(Mr 11.25-26; Lc 11.2-4; 18.10-14)

<sup>5</sup> Yópe arî, buedejamedá Jesús:

—Cainumua muje jēniaiyede majepacu Jūmenijicuque, đabejarā yópe ina jujovaivu ne đaiyepe. Nácapūravu jēniadama Jūmenijicuque, núrivu maje cójijiñamiai aru tãibuai máre, jáicōjenajivu apevure, ne ména yávarājiyepe aivu nára. Jáve coyuyubu mujare: Nácapūravu javede cuvama ne boje caiyede. Apevu pōeva ne mearore jíye náre, diebu ne boje matuiye. Majepacu cavarō mearocacu ye bojedabecuyume náre. <sup>6</sup>Ūbenita mujacapūravu, muje jēniaiyede Jūmenijicuque, ecori muje cūramiai, jedevacobede bieniburu, apevu ne jámenoi, jēniajara majepacuque muja coapa. Nópe đaru, majepacu cavarō mearocacu, ñai jáñu muje đaiyede yavenina, bojedacuyume mujare ména.

<sup>7</sup>Muje jēniaiyede majepacu Jūmenijicuque, cúpecare nūmejara cūináromia borore muje coyuiyede. Nópe đadama ina judíoia āmevu, Jūmenijicure coreóvabevu, “Ūrarō ñuje coyuru Jūmenijicure, jápiaquijichubi ñujare”, ne ūbenina arī dápiaiye boje. <sup>8</sup>Ne đaiyepe đabejarā muja. Muje jēniarajiye jipocai javeta coreóvaibi majepacu cavarō mearocacu aipe jaurōre mujare. <sup>9</sup>Que baru yópe arī, jēniajara majepacu Jūmenijicuque:

Mu, ñujepacu, cavarō mearocacu, meacu bajubu mu. Que baru caivu pōeva mure pueđari mearore jíjarāri. <sup>10</sup>Búre đajacu mu mi jabotequiyede pōevare. Caivu ijāravucavu đajarāri mearore yópe mi urōpe, yópe ina cavarō mearocavu ne đaiyepe mi urōpe cainumua.

<sup>11</sup>Íjacu ñujare jāravua coapa ñuje āiyeva. <sup>12</sup>Aru ārumetejacu ñuje āmeina teiyede, yópe ñuja máre ñuje ārumeteiyepe caiye apevu ne āmeina đaiyede ñujaque. <sup>13</sup>Ñai abujuvai jabocu űi jujovajuroede ñujare vainí tuicōjemejacu ñujare, ñuje đabenajiyepe āmenore. Quénora ñujare āmedare đaicōjemejacu ñai abujuvai jabocure, arejameda Jesús, náre bueyu Jūmenijicuque jēniaiyede.

<sup>14</sup>Aru yópe arī, coyure nurejameda Jesús:

—Mujacapūravui ārumetedu pōevare ne āmeina teiye báquede mujare, majepacu cavarō mearocacucapūravu máre ārumetecuyume muje āmeina teiyede. <sup>15</sup>Ūbenita mujacapūravui ārumetebedu pōevare ne āmeina teiye báquede mujare, majepacu cavarō mearocacucapūravu máre ārumetebecube muje āmeina teiyede, arejameda Jesús.

**Jesús űi bueino aipe đaiye jaurōre pōevare āmevuva  
āiyede ne jēniarajiyepe Jūmenijicuque aino**

<sup>16</sup>Yópe arī, budejameda Jesús:

—Muje āmene āiyede jēniarajivu Jūmenijicuque, chīore cubejarā pōeva ne jáinore, ne coreóvarājiyepe aivu muja āmevure āiyede, muje jēniarajiyepe aivu Jūmenijicuque. Nópe đadama ina jujovaivu. Nácapūravu chīore cuyama, jáicōjenajivu apevure ne ména yávarājiyepe aivu nára, ne āiyede āme boje. Jáve coyuyubu mujare: Nácapūravu javede cuvama ne boje caiyede. Apevu pōeva ne mearore jíye náre, diebu ne boje matuiye. Majepacu cavarō mearocacu ye bojedabecuyume náre. <sup>17</sup>Ūbenita mujacapūravu, muje āiyede āmene jēniarajivu Jūmenijicuque, chīore cubejarā. Quénora vaivéni muje pođare, cūitútujara muje jivare. <sup>18</sup>Muje nópe đaru, apevu pōeva coreóvabenama muja āmevure āiyede. Quénora majepacu cavarō mearocacu cūinácura coreóvacuyume muja āmevure āiyede. Aru ñai jáñu muje đaiyede yavenina, bojedacuyume mujare ména, arejameda Jesús.

**Jesús ñi bueino maje cavarājiyede mearo bajure cavarō mearoita**

(Lc 12.33-34; Stg 5.2-3)

<sup>19</sup>Cojedeca yópe arī, buedejameđa Jesús:

—Vobejarā muja urarō muje cuae méne ijāravui. Diede bocomiva ainomu, cura etainomu, aru ñavacurivu ecorī ñavainomu. <sup>20</sup>Ūbenita vojarā muja urarō muje cuae méne cavarō mearo Jūmenijicui cūrōi, bocomiva ne āmenoi, cura etabenoī, aru ñavacurivu ne īmenoi märe. <sup>21</sup>Que baru muje cuae cūrōre dāpiarājaramu muje ūmeque märe, arejameđa Jesús.

**Jesús ñi bueino pōeva ne ñainore ne dāpiainope**

(Lc 11.34-36)

<sup>22</sup>Cojedeca Jesús buedejameđa náre, ūque curivure:

—Pōeva ne yacorua, pōoinope, járe ñaivu náre, ne memenajiyepa aino aru ne majinajiyepa aino āri ne nuiyede. Pōeva ne yacorua ijetedu náre, ye ne memeyede aru ne nuiyede märe majibenama. Aru pōeva ne ūme, yacoruaape paino, pōore ñaivu ne dāpiayede. <sup>23</sup>Que teni pōecu cainumua dāpiayū baru ijāravuquede, ijetede ñaibi űi ūmene, űi dāpiabe boje cavarō mearo Jūmenijicui cūrōquede. Aru ñai pōecu űi ūme bñacuyume. Que baru pōeva ne jámenu ne yacoruaque āmenotamu. Ūbenita pueno āmenotamu ne ūme ñemino maru, arī buedejameđa Jesús.

**Jesús ñi bueino tāuturare urōre aru űbenore Jūmenijicure**

(Lc 16.13)

<sup>24</sup>Yópe arī, buedejameđa Jesús cojedeca:

—Jūmenijicure aru tāuturare märe ārumejara muja. Cūinācu pōecu Jūmenijicure ārucu baru, pare ārumemi tāuturare. Aru tāuturare pare ārucu baru, ārumemi Jūmenijicure. Que baru ñai tāuturare űcu baru, Jūmenijicure űbecuyume, arejameđa Jesús.

**Jesús ñi bueino Jūmenijicui coreiyede űi pōevare**

(Lc 12.22-31; 1 P 5.7)

<sup>25</sup>Bediōva yópe arī, buedejameđa Jesús:

—Que baru coyuyubu mujare: Muja āurivū baru Jūmenijicure, cārijimejara muja apurivū muje ārajiyede, muje űcurajiyede märe. Aru cārijimejara muja muje bajure, muje dorājiyede märe. Jūmenijicui apure ñaiye boje mujare, jāve muje āiyede märe cūvare ñacuyume. Aru űi cue ñaiye boje muje bajuāre, jāve muje doiyede märe cūvare ñacuyume. <sup>26</sup>Jārijide apa muja ina mñjinare. Majepacu cavarō mearocacu jñbi náre ne āiyeva, na otebevureca, aru oteiyede imevureca, aru diede märe epebevureca oteiyede epeiñamia jñvui. Aru caivu mñjina obedivū pueno bojecurivutamu muja, Jūmenijicui pueno űe boje mujare. Que baru mujare jauéde jñcuyume ű. <sup>27</sup>Aru mujacacu cārijijñ maru, cūināora cure ñarī majibebi űi cuede ijāravui. Que baru cārijiyē meamevū mujare.

<sup>28</sup>Que baru, ñaipe teni cārijivurū muja muje dorājiyede? Jārijide apa muja iye cōvūare, dācarōre. Die bucuiyavū, mememevacari, aru ne cuitótecajeare märe naremevacari. <sup>29</sup>Ūbenita coyuyubu mujare: Iye cōvua métamu, caiye

icafea ñai jabocu bácu Salomón mácu cuitótecajea bojecuricajea pueno.  
<sup>30</sup> ¡Muja pare quíjino ju aivubu Jūmenijicure! Jūmenijicu nópe mearo ñaibi iye cōriáre, caride dáí cuede aru javenare pōeva ne juarājiyede. Nopedeca Jūmenijicu jícuyume mujare muje cuitótecajea meacajeare caiye iye cóvua pueno.  
<sup>31</sup> Que baru cārijimejara muja yéde muje ārajiyede, muje ūcurajiyede, aru muje dorājiyede máre.  
<sup>32</sup> Ina judíova āmevu, Jūmenijicure ju abevu, cārijini vodama caiye iyede, ne ārajiyede, ne ūcurajiyede, aru ne dorājiyede máre. Aru majepacu cavarō mearocacu majibi caiye iye mujare jauéde.  
<sup>33</sup> Ūbenita vojarā muja iye Jūmenijicui jaboteinoquede, muje ñaiyue boje mearore yópe ūi ñaicōjeiyepe. Aru Jūmenijicu jícuyume muje ārajiyede, muje ūcurajiyede, aru cuitótecajeare máre.  
<sup>34</sup> Que baru cārijimejara iye vaiquiyede mujare javenare. Caijāravua coapa pōeva ñájiñama āmenore. Que baru dápiajará cari jāravūque āmenore, apejāravu edaquijāravūque āmenore dápiabevua, arí buedejameda náre Jesús.

### Jesús ūi pōevare apevure āmecoroicōjemeno

(Mr 4.24; Lc 6.37-38, 41-42)

**7** <sup>1</sup> Jesús, yópe arí, budejameda náre cojedeca:  
 —“Āmenatamu” arí, āmecorobejará muja apevure. Muje nópe aru, majepacu Jūmenijicu āmecororí, “Āmenatamu muja” acuyume mujare.  
<sup>2</sup> Yópe muje āmecoroiepe apevure, nopedeca mujare āmecorocuyume Jūmenijicu. Nópe muje apevure jýepedeca, jícuyume mujare Jūmenijicu.  
<sup>3</sup> Ūrarō āmeina teino muje cūvaru, āmecoroie jaubevū apevu quíjino āmeina teivure. Nópe ñaiye yópe bájebu: Me jáivubu muja mujecu ūi docujīe curōre ūi yacorui. Ūbenita jāmevu muja muje ūrarō docucurōre muje yacorui, mujecure “¿Mi docujīene ĩnaji mi cuvaede mi yacorui?” arí buojabevū muja.  
<sup>5</sup> ¡Jujoivaivutamu muja! Mamarumu ĩjara muja muje ūrarō docucurōre muje yacorure. No yóboi mearo jáivuta, ĩjara mujecu ūi docujīene ūi cuvaede ūi yacorui.  
<sup>6</sup> Jūmenijicui yáyaiye pueno me bajure coyubejará ina pōeva āmenare, diede jápiarī eabevure. Nópe ñaru, yópe pōeva ne jýjuroepebu jiaruare yavimivare. Jiarua méne aru āmene máre coreóvabeni, copedini cūñaima náre jívure. Nopedeca ina pōeva āmena, Jūmenijicui yáyaiyede jápiaiyubevū, āmedarājarama mujare diede coyuriduvure náre. Aru ji yáyaiye méne, pueno bojecuede pōevare ne ūmei, buebejarā ina pōeva āmenare, diede jápiarī eabevure. Nópe ñaru, yópe pōeva ne ñuvajuroepebu cūrajiboa bojecurijīboa perla āmicurijiboare vāriya ne jipocai. Nijiboare coreóvabeni, curadaima nijiboare jobo jívui. Nopedeca ina pōeva āmena, ji yáyaiye méne jápiaiyubevū, āmedarājarama mujare diede bueniduvure náre, arí buedejameda Jesús.

### Jesús ūi bueino aipe jēniaiye jaurōre Jūmenijicuque aru aipe ñaiye jaurōre apevure

(Lc 6.31; 11.9-13; Jn 14.13-14; 15.7, 16; 16.23-24; 1 Jn 3.21-22; 5.14-15)

<sup>7</sup> Jesús coyurejameda náre yópe:

—Jēniare ñujara Jūmenijicuque, aru jícuyume muje jēniainore ūque. Vore ñujara ūre, aru earājaramu. Muje órejare ñuiyede jedevacobei, Jūmenijicu voacacuyume mujare.  
<sup>8</sup> Que baru caivu jēniaivu Jūmenijicuque cūvama ne

jēniainore. Caivu voivu eadama ne voimure. Aru caivu órejaivure jedevacobei voaibi náre Jūmenijicu, arī budejamedā Jesús.

<sup>9</sup> Aru cojedeca Jesús, yópe arī, budejamedā náre:

—¿Muja juedocvarivu, mujemacu ũi jēniaru mujare páubore, jíje bária muja ũre cūrabore? <sup>10</sup> ¿Aru mujemacu ũi jēniaru mujare moacure, jíje bária muja ũre ādare? ¡Que āmevu! <sup>11</sup> Que baru muja āmena méne cūvaede jíni majiépedeca mujemarare, majepacu cavarō mearocacu pūeno méne cūvaede jíni majibi muja jēniaivure ũque.

<sup>12</sup> 'Que baru đajarā apevure yópe muje ũepe đaivure mujaque me. Nopedeca đaicōjenejaquemavu Jūmenijicu pōevare ũi coyuiye báquede ũi yávaivede Moisés bácure aru ina Jūmenijicu yávaivede coyucaipōeva mácavure máre, arejamedā Jesús.

### **Jesús ũi bueino jedevacobe quíjicobede**

(Lc 13.24)

<sup>13</sup> Yópe arī, náre buede nurejamedā Jesús:

—Ecojarā Jūmenijicu jaboteinoi, yópe muje ecoiyepe jedevacobe quíjicobei. Yópe jedevacobe uracobepe aru urama maiyójabe ne cuimape, obedivu pōeva nuivabu, ne bíjarājiyede toabo cūiméboi. <sup>14</sup> Ūbenita yópe jedevacobe quíjicobepe aru quíjima maiyójae ne cuima, obebejina nuivabu, ne meadarājiyede cavarō mearo Jūmenijicu curōi, arejamedā Jesús.

### **Jesús ũi bueino maje majinore jocucua jēidua**

(Mt 3.10; 12.33; Lc 3.9; 6.43-44)

<sup>15</sup> Cojedeca Jesús budejamedā náre, ne majinaiyepe ayu aipe ārojarivure bueipōevare:

—Me jájara ina Jūmenijicu yávaivede coyucaipōevape teivu, ũbenina ne buenaiyepe aivu borocuede. Námu yópe āimara jiejecurivu lobova āmicurivupe paivu. Ovejavape teni ina lobova eodama ne yebai, boarājivu náre. Nopedeca ina borocuede bueivu, Jūmenijicure ju aivupe yavadama, ecorājivu muje yebai. Ūbenita āmedaiyurivabu mujare muje ũmei. <sup>16</sup> Náre coreóvarājaramu muja ne đaiyeque, yópe maje coreóvaiyepe jocucure dicu jēiduaque. Miuñua jēmevu áyaiboare. Nopedeca jēmevu higo āmicuridua miuñuare. <sup>17</sup> Jocucu meacu cūvavu jēidua mearuare. Ūbenita jocucu āmecu, āmeduare cūvavu. <sup>18</sup> Jocucu meacu cūbevū jēiye āmene jícu. Aru jocucu āmecu cūbevū jēiye méne jícu. <sup>19</sup> Caiye jocucua jēidua mearua cubedu, jiore memepōecu coení jaruvajebu toaboi. Nopedeca Jūmenijicu ina borocuede bueivure nájine đacuyume. <sup>20</sup> Nopedeca coreóvarājaramu muja ina borocuede bueivure aru ina yávaivede jāvene bueivure máre ne đaiyeque, arejamedā Jesús.

### **Jesús ũi bueino caivu ne ecobenajinore Jūmenijicu jaboteinore**

(Lc 13.25-27)

<sup>21</sup> Bedióva buede nurejamedā Jesús:

—Caivu ina yure aivu “mu, ñuje jabocu”, ũbenita đabevuvacari yópe jipacu, cavarō mearocacu, ũi ũrōpe, ecobenama ũi jaboteinore. Quévura ina ũi ũrōpe đaivu ecorājarama nore. <sup>22</sup> Ānijāravu daquijāravu baquinóre

obedivü pöeva, yópe arí, coyurājarama yure: “Mü, ñuje jabocu, ñujarecabu Jūmenijicui yávaiyede coyucaivü bācavü, aru jaruvaivü bācavü abujuvare, aru ure pöeva ne ñarí majibede máre ñaivü bācavü mi āmiái, mi paruéque”, arājarama. <sup>23</sup>Dinümü maquinóre náre coyucuyumu yu: “Jívu āmevü müja. ¡Que baru caivü müja āmeina teivü ñujara yure jocarí!” acuyumu, arejameña Jesús, náre ecoicōjemecu Jūmenijicui jaboteinore.

#### **Jesús üi coyüino pucadāmia cūramia ñaivü bācavüre**

(Mr 1.22; Lc 4.32; 6.47-49)

<sup>24</sup>Cojedeca Jesús, yópe arí, buedejameña náre:

—Ina jápiaivü yure aru ñaivü ji cōjeiyepe ñaivübu yópe ñai cūramine ñayupe jājaroi. <sup>25</sup>Ocarí, jia yaborí, oco eaquemavü ñinamine. Urarō japuquemavü ümevü. Übenita cūjibetequemavü ñinami, jājaroi núe boje. <sup>26</sup>Übenita ina jápiaivüvacari yure, ñabevü baru ji cōjeiyepe ñaivübu yópe ñai cūramine ñayupe jājamenoi. <sup>27</sup>Ocarí, jia yaborí, oco eaquemavü ñinamine. Urarō japuquemavü ümevü. Aru tuquemavü ñinami. Urarō bíjaino matequémavü, arí buedejameña Jesús.

Üi nópe aiyede, yópe aiyucu barejaquémavü Jesús: Ina ñaivü yópe üi urópe bíjabenajarama, übenita ina ñabevü yópe üi urópe bíjarājarama.

<sup>28-29</sup>Aru Jesús üi buení buojaiyede, ina obedivü pöeva, üi coyuiyede jápiaivü bācavü urarō dápiarí cuicumarejaima, üi bueiye boje náre yópe parucupe ina Jūmenijicui yávaiye báquede bueipöeva pueno.

#### **Jesús üi meadaino pojeiyure**

(Mr 1.40-45; Lc 5.12-16)

**8** <sup>1</sup>Jesús ĕmeñü mácure dicü cūracūre jocarí, obedivü pöeva nurejaima üi yóboi. <sup>2</sup>Aru nurejameña Jesús yebai cūinācu pojeiyu. Ñuatutarí, arejameña üre:

—Mü, ji jabocu, ucu baru, meadajacu ji pojeiyede. Buojaivü mü meadayü yure, arejameña.

<sup>3</sup>Dinümüre Jesús, üi puruque jabióvarí tuoyn, arejameña üre:

—Üvu yu. Caride meatejacu mü, arejameña Jesús.

Aru maumejiena Jesús üi que aiyede, meatedejameña. <sup>4</sup>Jesús coyucicōjemecu apevüre arejameña:

—Cūiná, ñarí Jerusalén āmicuríimaroi, jádovajacu sacerdotede. Aru jíjacu mi meateiye boje, yópe Jūmenijicui ñaicōjeiyede üi coyuiye báquepe Moisés bācure, pöeva ne coreóvarājiyepe ayu mi meateinore, arejameña üre Jesús.

#### **Jesús üi meadaino churaravai jabocui yebacacure**

(Mt 22.13; 25.30; Lc 7.1-10; 13.28-29)

<sup>5</sup>Jesús üi ecoiyede Capernaum āmicuríimaroi, cūinācu ümü, cien paivü churaravai jabocu, nurejame üi yebai. Yópe arí, jēniañu marejáme, üi cañatequiyepe ayu:

<sup>6</sup>—Mü, ji jabocu, cūinācu ji yebacacu cubi cūrami, parayü, nacajaiye majibecu. Aru pare ñájiñume ü, arejame Jesúre ñai jabocu.

<sup>7</sup>Aru Jesús arejame:

—Yúvacari üre meadacudaquijivü, arejame Jesús.

<sup>8</sup> Ëbenita ñai jabocu arejame Jesúre:

—Mu, ji jabocu, meacubu mu. Ëbenita yúcapûravu âmecutamu. Que baru darĩ ecobejacu ji cûrami. Quénora coyujacu mi cõjeinore. Aru ji yebacacu meatecuyume. <sup>9</sup> Yurecabu cücü ne cõjeiyeque ina ji jabova. Aru cuvavu churaravare, ji cõjeimarare. Nácacu cûinácure “Nujacu” ji arĩburu, nûimi ñ. Aru “Dajacu” ji arĩburu, daibi ñ. Aru ji ñaicõjenu apejiene ji yebacacure, ñaibi ñ, arejame Jesúre.

Ëi que aiyede, “Ijiéde cõjeipõecubu mu” aiyucu barejaquemavu Jesúre.

<sup>10</sup> Que ayure jápiarĩ, pare dápiarejame Jesús. Aru jári ina nuivure ñi yóboi, arejame:

—Jáve coyuyubu mujare: Eabevu cãreja majacacure, Israecacure, me ju ayure yure yópe ñai churaravai jabocupe. <sup>11</sup> Coyuyubu mujare: Darãjarama põeva cainoa joborõacavu, yure ju aipõeva. Dobarãjarama tuoiva yebai, ñarajivu Jûmenijicui jaboteinoi ñi põevaque, Abrahãque, Isaaque, aru Jacoque mãre. <sup>12</sup> Ëbenita obedivu mujacavu, judíova, ina cújurorivu bácavu noi, jaruvaimara marajárama ñeminoita, ne ju abe boje yure, ne coatenajiyepe ayu yure jaruvarĩ. Chõioivu orĩ mautenajarama nore. Aru jararĩ cõpi cûrajarama na, arejame Jesús.

<sup>13</sup> Dinumu ñai jabocure arejame Jesús:

—Copainujacu mu mi cûrami. Jave ñacavu yu yópe mi jënaiyepe. Jave mi yebacacure meadavu yu, mi ju aiye boje yure, arejame Jesús.

Aru dinumumareca meatedejamedã ñ.

#### **Jesús ñi meadaino Simón Pedroi vácore**

(Mr 1.29-31; Lc 4.38-39)

<sup>14</sup> Jesús nurejamedã Simón Pedroi cûrami. Ecoyu bácu noi, járejamedã Pedroi vácore, moimo paraðore. <sup>15</sup> Õi yebai nûri, õre tuorejamedã Jesús ñi puruque. Aru dajocarejavûya moino õre. Dinumumia nacajari, ñiyede meadarĩ jídejacoda ina noi curivure.

#### **Jesús ñi meadaino obedivu ijimarare**

(Mr 1.32-34; Lc 4.40-41)

<sup>16</sup> Dinainumica ñamijie baji, jabuóvaijãravu vaiyede, ina ñmarocavu nuvarejaimada Jesús yebai obedivu abujuva ne ñmararare. Ina abujuvare yávarĩ jaetovarejamedã Jesús. Aru caivu ina ijimarare mãre meadarejamedã. <sup>17</sup> Caiye iye nópe vaidéjavûya cûináturu Jûmenijicui coyucõjeiye báquepedeca ñi yávaiyede coyucãipõecu bácu, Isaías âmicucu, ñi aiye báquede Jûmenijicui epequimura: “Ërecabe maja parubevure meadayu, aru majare ijiéde jaruvayu”, arejaquemavu Isaías bácu Jesúrã.

#### **Apevu Jesúque ne nuivurĩduino**

(Lc 9.57-62)

<sup>18</sup> Jesús ina obedivu põevare jáñu ñi yebai, jataicõjenejame ñi bueimarare.

—Járica, macajitabu urabu apeduvei nurevu, arejame Jesús.

<sup>19</sup> Dinumu cûinácu Jûmenijicui yávaie báquede bueipõecu ñi yebai nûri, arejame:

—Mu, bueipõecu, múque nuquijivu yu caino mi nuinoita, arejame Jesúre.

<sup>20</sup> Aru Jesús arejame úre:

—Macayavimiva cuvama ne cobeá. Aru mjína cuvama ne juaiboa. Ëbenita yu, Jūmenijicui daroimu mácu ũmupe, ji curō cuvabevu, arejame Jesús.

<sup>21</sup> Apecu, ũi bueimu, arejame úre:

—Mu, ji jabocu, mamarumure jaruvaquijivu cäreja jipacure cūracobei, ũi yayiede. No yóboi múque nuquijivu, arejame Jesúre.

<sup>22</sup> Ëbenita Jesúcapūravu arejame:

—Dajacu yúque. Ina yaivu bācavupe paivu, ne jápiabe boje Jūmenijicui jaboteinoque yāvayiede, jaruvajarāri ina yaivu bācavure, arejame Jesús.

### **Jesús ũmevure ũi bjáraino**

(Mr 4.35-41; Lc 8.22-25)

<sup>23</sup> Jesús jatuyu jiadocūi, ñujare ũi bueimara máre jaturejacrā. <sup>24</sup> No macajitabu urabure jataivure japurejavū ũmevu parurō baju. Aru pācaiboa coiyede jiadocūi, buidéjavū dicūre oco. <sup>25</sup> Ëbenita Jesús cāñu marejáme. Que baru ũi yebai nuri, yópe arī, coedavarejacrā úre:

—¡Mu, ñuje jabocu, meadajacu ñujare! ¡Coivubu maja! ¡Bjárājivubu maja! arejacrā ñuja.

<sup>26</sup> Aru Jesús arejame ñujare:

—¿Aipe teni jidurivurū muja? ¿Aipe teni “Jesús meadacuyume ñujare”, abevurū muja? arejame ñujare Jesús.

Dinumure nacajari, jararejame ũmevure. Iboá uraboa pācaiboa bįjarejavū. Aru cārijimene ðarejame ũ. <sup>27</sup> Cuecumari, urarō dāpiarejacrā. Aru arejacrā ñuje bajumia:

—¿Yécuba ñai, yópe cōjeñu ũmevure aru macajitabure máre ju aimu? arejacrā ñuja.

### **Jesús ũi meadaino ũmuva abujuva ne imamarare**

(Mr 5.1-20; Lc 8.26-39)

<sup>28</sup> No macajitabu urabure jatarī nuri, apeduvei Gadara āmicurōi earejacrā ñuja. Ñuje maiyede jiadocūre jocarī, pucarā ũmuva, abujuva ne imamara, Jesúre copu nurejaima. Cūracobeai, pōeva ne yaivu bācavure jaruvainoi, curivu barejaquémavu na. Ne pare jijecue boje, pōeva ye oabedejaquemavu vaivu nore. <sup>29</sup> Aru bujié codoboborejaima:

—Mu, Jesús, Jūmenijicui mácu, ¿yéde ucūrū ñujaque? ¿Ñujare ñājine ðacuyurū Jūmenijicui abujuvare ñājiovaquijāravu jipocamia? arejaima.

<sup>30</sup> Joabenoi āivu barejáima obedivu oteivāriva. <sup>31</sup> Aru jēniarejaima ina abujuva Jesúre:

—Ñujare jaetovayu baru, coicōjejacu ina oteivārivara, arejaima.

<sup>32</sup> —Corāñujara nára, arejame Jesús.

Aru etarī, corejaima ina oteivārivara. Cúyarī nuri, turejaima cūracū ěmeinoi, macajitabu urabui. Turī, corī, bįjarejaima na. <sup>33</sup> Aru ina oteivāriva mácavure coreipōeva cúyarī nurejaima, coyurājivu urāimarocavure caiye iye vaiye báquede ina pucarā abujuva ne imamara mácavure. <sup>34</sup> Caivu no imarocavu copu nurejaima Jesúre. Aru úre járī, “Nujacu mu” arī parurōque, etaicōjenejaima úre ne curōre jocarī.

### Jesús ùi cure ðaino nacajaiye majibecure

(Mr 2.1-12; Lc 5.17-26)

**9** <sup>1</sup>No yóboi Jesújā jiādocūi jaturī, macajitabū urabure jatarī, earejaimađa ùi ĩmarore. <sup>2</sup>Apevu ũmuva nuvarejaimađa ùi yebai cūinācu ũmū, nacajaiye majibecure, ùi parainoque. Coreóvayu bācu Jesús náre ju aivure ũre, arejameđa ñai nacajaiye majibecure:

—Mu, ji ũmū, chíomejacū. Mĩ āmeina teiyede jaruvarī, diede ārumeteivu yū, arejameđa Jesús.

<sup>3</sup>Apevu Jūmenijicui yāvaiye báquede bueipōevacavū nore curivū, “Ñai ũmu Jūmenijicui ũbenore ðaibi. Jūmenijicupe páyu teibi ũ”, arī dápiarejaimađa na ne ũmei. <sup>4</sup>Ũbenita Jesús járī, coreóvarī ne dápiayede ũre, jēniari járejameđa náre:

—¿Aipe teni āmeno dápiavurū muja? <sup>5</sup>Maiyójabevū yópe aru apecure, “Mĩ āmeina teiyede jaruvarī, diede ārumeteivu yū”, ji paruéde jáðovame boje, ji que coyuiyede. Ũbenita maiyójarōtamu nacajari cuicōjenu nacajaiye majibecure. Ũre cure ðayu baru, jáðovaquijivū ji paruéde. “Mĩ āmeina teiyede jaruvaivū” ji aiyede, coreóvabevū muja Jūmenijicui ārumeteinore diede. Ũbenita ñai cuvacu Jūmenijicui majié paruéde, ũrame yópe ðarī jáðovaiye majicu. Quécura Jūmenijicuvacari meaðarī majibi ĩjimarare. <sup>6</sup>Que baru muje majinajiyepē ayū Jūmenijicui daroimū mācu ũmupe, yū, paruéde cuvacure ĩjáravure, jaruvacuyū āmeina teiyede, yópe ðaquijivū yū, arejameđa Jesús.

Dinūmu arejameđa nacajaiye majibecure:

—Nacajari, mĩ parainore ĩni, nujacū mĩ cūrami, arejameđa ũre Jesús.

<sup>7</sup>Dinūmūma, yópe Jesús ùi ðaicōjeiypedeca ðarejameđa. <sup>8</sup>Ina obedivū pōeva diede járī, cucumari, mearore jíðejaimađa Jūmenijicure, ùi nópe parure ðaiye boje ũmure.

### Jesús ùi “Dajacu” aino Mateore

(Mt 12.7; Mr 2.13-17; Lc 5.27-32; 15.1-2)

<sup>9</sup>Jesús ùi vaiyede járejame yure, Mateore, dobacure ji memeitucubui, pōeva ne Roma āmicurō jaboteino bojedainoi. Aru arejame yure, “Dajacu yúque”. Que baru nacajari, nurejacacu ũque. <sup>10</sup>No yóboi, Jesús ùi ācunuiyede ji cūrami, obedivū jabovare tāutura ĩcaipōeva, āmeno ðaipōeva, aru ùi bueimara máre dobarejaima, ārajivū ũque. <sup>11</sup>Apevu judíova, ðaicōjeiyede ðaiye cōmajivū, fariseo āmicuriyajubocavū, curejaima nore. Ina fariseovacavū, Jūmenijicui yāvaiye báquede bueipōeva, Jesús āñure járejaima ina jabovare tāutura ĩcaipōevaque aru āmeno ðaipōevaque. Aru arejaima ùi bueimarare:

—¿Aipe teni āñuma jabovare tāutura ĩcaipōevaque aru āmeno ðaipōevaque máre? jēniari járejaima ñujare.

<sup>12</sup>Que aivure jápiarī, Jesús arejame:

—Meara pōevare juoipōescu caðateiye jaubevū. Quénora ĩjimarare ũi caðateiye jauvū. <sup>13</sup>Buejarā muja, coreóvarājivū me cūinācu Jūmenijicui yāvaiyede coyūcaipōescu bācu toivaiye báquede. Yópe arī, toivaicōjenejaquemavū Jūmenijicu ũ mācure: “Ũvu yū muje cōmaje āroje járajiyepē ayū apevure, muje yure jícaiye pueno”, arī toivaicōjenejaquemavū.

Dabedejacacu yu ijāravui, cutucuyū mearare ne baju dāpiainore. Quénora darejacacu yu, meadacuyū āmenare, ne chiorajipe ayu ne āmeina teiyede, Jūmenijicui ārumetequiyepa ayu diede, arejame Jesús.

**Pōeva āmevūva āiyede ne jēniaino Jūmenijicuque**

(Mr 2.18-22; Lc 5.33-39)

<sup>14</sup> Dinumu Juan Bautistai bueimara, Jesús yebai nuri, jēniari jārejaima ūre judíova ne dāri cōmajiyede, ne jēniayede Jūmenijicuque āmevūva āiyede:

—¿Aipe teni ñuja aru ina fariseova máre āmevūba āiyede, ūbenita mi bueimara āmevu āmema āiyede? arejaima.

<sup>15</sup> Jesús jēvari coyurī, arejame náre:

—Ina purubūoyū ūi cutuimara ne torojuve tenajipe ayu ūi purubūoiyede, ye chīomenama ūi cuede cāreja náque. Que baru āmevu āmema āiyede. Nopedeca ji bueimara torojurivū ji cuede náque, āmevu āmema āiyede. Ūbenita ji mauva ne nuvarajiyede yure, ji bueimara chīoivū āmenajarama āiyede, arejame Jesús.

<sup>16</sup> Cojedeca Jesús buedejame náre:

—Pōeva jēomema cuitótecaje mamacaje joabecajei javacarōre. Nópe dāru, no jēoicajeva mamacaje jadevajebu javacarōre. Que dāru, pñeno baju jārojebu codeicobe. Quédeca ñame buojabema ju aivu ji bueiye mamaene aru javeque bueiyede máre. <sup>17</sup>Pōeva yuabema vino ūyaicorore mamacorore āimacaje curubū javacacurubūque. Que dāru, codeóvajebu dicurubūre. Yurī bījajebu dicoro. Aru bījajebu dicurubū máre. Ūbenita ne yuaru mamacorore mamacurubūque, bījajebu dicoro aru dicurubū máre. Quédeca ñame buojabema ñaivu yópe ji bueiye mamaepe, ñare nuivū baru yópe ne jave ñaive báquepe, náre arī buedejame Jesús.

**Jesús ūi nacovaino Jairoi máco bácore aru ūi meadaino nomió ñājiñore**

**jiveque**

(Mr 5.21-43; Lc 8.40-56)

<sup>18</sup> Jesús ūi coyuiyede náre, cūinácū maja judíova maje jabovacacu dāri, pueðarī, ñuatutarejame Jesús jipocai. Que teni yópe arejame:

—Carijē yaibíco jímaco. Ūbenita yúque dāri, tuojacu ōre mi purūque, ōi apucojiyepa ayu, arejame Jesúsre.

<sup>19</sup> Ūi que aiyede, Jesús nacajari, nurejame ūque, ñuja ūi bueimaraque.

<sup>20</sup> Ñaje vaivārī nuiyede, obedivū pōeva jēneboi curejaquemavū cūináco nomió, ijimo doce paiñūa baju jive yuiyeque. Jesús yóboi nuri, jēni jārejajemavū ūi doicaje turuvarā. <sup>21</sup> Yópe arī dāpiarejaquemavū ō: “Yu jēni jádo maru ūi doicajede, quénora ūmedacoðomu yu”, arejaquemavū ō.

<sup>22</sup> Ūbenita Jesús copedini, ōre jārī, arejame:

—Mu, ji ūmo, torojujaco. “Ū meadaiye majibi yure”, arī dāpiarebu mu. Que baru mi que arī dāpiaye boje, meadaivu mure, arejame ōre Jesús.

Aru dinñumamareca ico nomió, ijimo máco, meatedejquemavū.

<sup>23</sup> Jesús eayū ñai judíovai jabocui cūrami, pedu japuivure aru obedivū pōeva bujié oivure jārejame. <sup>24</sup> Náre etaicōjeñu arejame:

—Etajarā muja. Ico jueðoco yayió āmemico. Quénora cādotame, arejame Jesús.

Náre nópe arejame Jesús, ùi majié boje ùi nacovaquinore óre yainore jaruvári. Ùi que aiyede, yuridejaima úre. <sup>25</sup> Ùi etavaríburu yóboi ina pōevare, ecorejame Jesús jueđoco bácoi caritucubui. Ó mácoi purure jēnejameđa. Aru nacajarejacoda ō, apuco cojedeca. <sup>26</sup> Aru ùi que đaiye borore jápiarejaimađa caivu pōeva dijaborōcavu.

### **Jesús ùi meadaino pucarā ūmuva jári eabevure**

<sup>27</sup> Jesús ùi dajocarí nuiyede nore jocarí, pucarā ūmuva, jári eabevu, darejaima ùi yóboi. Bujié, yópe arí, codoboborejaima:

—Mu, David bácuí pāramecu, Jūmenijicui daroimu mácu, ñuje jabocu bacuyú, ñujare cōmaje āroje jájacu mu, codoboborí are nurejaima na.

<sup>28</sup> Jesús ùi ecoiyede cūrami, ina pucarā jári eabevu darejaima ùi yebai. Aru jēniari járejame náre:

—¿Dápiavurū muja yure meadaiye majicure? arejame.

—Júju, ñuje jabocu, majivu ñuja mure meadaiye majicure, arejaima na.

<sup>29</sup> Dinumu ne yacoruarā tuorí, arejame:

—Meatejarā muja. Yópe muje ju aiyepe đacaivu yu mujare, arejame Jesús.

<sup>30</sup> Que đayure, járejaima ina jári eabevu bácvu. Parurōreca Jesús apevure coyucōjemenidurejame náre:

—Ñamene coyubejarā iye ji meadaiyede mujare, aridurejame.

<sup>31</sup> Ùbenita cūiná, etavū bácvu diñamine jocarí, coyurejaimađa caivu dijaborōcavure Jesús ùi meadaiye báquede náre.

### **Jesús ùi meadaino yávaiye majibecure**

(Mt 10.25; 12.24; Mr 3.22; Lc 11.15)

<sup>32</sup> Ina pucarā jári eabevu bácvu ne etaiyede, cūináu ūmu, yávaiye majibecure, davarejaima apevu Jesús yebai. Ñai ūmu abujucu ùi ímamu marejaquémavu. <sup>33</sup> Jesús ùi jaetovaríburu yóboi ñai abujucure, yávaiye majidejame ñai abujucu ùi ímamu mácu. Caivu ina obedivu pōeva Jesús ùi nópe đaiyede jáivu bácvu, cucumari, urarō dāpiarí aivu barejáima:

—Javede pu cari járavuita ye jámevu ñuja iyepe paiye đaiyede yore, ñuje joborō, Israel āmicurijoborōi, arejaima.

<sup>34</sup> Ùbenita ina fariseova yópe are curejaima Jesúrā:

—Abujuvai jabocui paruéque jaruvaibi abujuvare, arejaima ùbenina.

### **Jesús ùi cōmaje āroje jáino pōevare**

(Mt 4.23; Mr 1.39; 6.34; Lc 4.44; 10.2)

<sup>35</sup> Jesús bude nurejame cainoa ímaroai aru ímajinoai máre. Judíova ne cōjijíñamiai bueni, coyuyu barejáme iye yávaiye méne Jūmenijicui jaboteiyede pōevare. Aru meadayu barejáme caiye duica ijié coapa aru caino ijinore máre. <sup>36</sup> Ùi jáiyede pōeva chíovure ne ñájiye boje aru ne baju cadateye majibe boje, cōmaje āroje járejame náre, yópe ovejava náre coreipōecu cubevape paivure. <sup>37</sup> Que baru ñuja ùi bueimarare arejame Jesús:

—Obedivu pōeva curivubu, Jūmenijicui yávaiye méne majibevu cāreja, muje buenajimara iye yávaiye méne, ùi meadaquiyepe aivu náre. Ùbenita obebevū memecaivubu Jūmenijicure. <sup>38</sup> Que baru jēniajara úque, ùi bueicōjequiyepe aivu apevure ùi yávaiye méne ina diede coreóvabevure cāreja, arejame ñujare Jesús.

**Jesús ñi beoino ñi yávaiye méne coyucōjeimarava**

(Mr 3.13-19; Lc 6.12-16)

**10** <sup>1</sup>No yóboi Jesús órejarejame doce paivu ñujare ñi bueimarare. Aru parure ðarejame ñujare, ñuje jaetovarājiyepe ayu abujuvare aru ñuje meadarājiyepe ayu caiye duica ijíe coapa aru caino ijinore máre. <sup>2-4</sup>Ñujare beorí epedejame ñi yávaiye méne beorí coyucōjeimarare: Mamarumu Simón, ñi ámidoimu mácu Pedro, aru Andrés, Simón Pedroi yócu; aru Zebedeoi mácu Santiago, aru Santiagai yócu Juan; Felipe aru Bartolomé; Tomás aru yu, Mateo, jabovare tautura ícaipōecu bácu; Santiago, Alfeoi mácu, aru Tadeo; Simón, ámicucu Celote, aru Judas Iscariote máre. Ñai marejáme jēni jícuyu Jesúre ñi mauvare. Ñuja marejacará Jesús ñi yávaiye méne beorí coyucōjeimara.

**Jesús ñi jaroino ñi bueimarare**

(Mt 11.24; Mr 6.7-13; Lc 9.1-6; 10.4-12; Hch 13.51; 1 Co 9.14; 1 Ti 5.18)

<sup>5</sup>Ñuja doce paivure jarocuyu barejáme Jesús, ñuje coyurājiyepe ayu Jūmenijicui jaboteinoquede yávaiye méne. Yópe arí, majicarejame ñujare ñi jaroquie jipocai:

—Judíova ámevu ne joborōai numejara. Aru Samaria ámicuríjoborōque ímaroare ecobejarā muja. <sup>6</sup>Quénora coyurāñujara muja majevure, ina judíova, Israel bácuí páramenare. Jūmenijicui yávaiyede jápiabeni, ñi urōpe ðabeni, úre jaboteicōjemema na. Que baru ovejava mamateivupe paivubu na. <sup>7</sup>Muje nuiyede yópe arí: “Jūmenijicu jabotecuyume pōevare maumejiena”, arí coyujarā náre. Meadajarā ijararare. Nacovajara yaivu bácvure yainore jaruvarí. Meadajarā pojevure. Aru jaetovajarā abujuvare ne ímamarare jocarí. <sup>8</sup>Bojecubeda jívu yu muje paruéva, muje meadarājiyepe ayu pōevare. Que baru meadajarā náre bojecubeda. <sup>9</sup>Nvamejara tauturare muje járióicāvai. Úrure, platare, aru cobrede máre nvamejara. <sup>10</sup>Curubuare máre, muje curānuri cve nvajuroricurubuare, nvamejara muja. Aru pucacajea muje cuitótecajeare, curaidoare, aru tuturiteyoare máre nvamejara muja. Memecapōecure bojedaiye javvu ñi memeinore. Que baru ina muje meadaimara mārājivure jíye javvu mujare javéde.

<sup>11</sup>Ímaroi muje eaiyede, vori eajarā cūinācu pōecure, ne pueðaimure, jápiaiyucure muje coyuiyede. Úque cujarā muja ñi cūrami pu dajocarí nuivuta nore jocarí. <sup>12</sup>Muje ecoiyede cūrami, diñamicavure jacoyujarā muja, jēniacaiyu Jūmenijicunque ñi mearo ðacaquiepe aivu náre. <sup>13</sup>Na meara maru, náre mearo ðacacuyume Jūmenijicu yópe muje jēnaiyepe. Ubenita na ámena maru, náre mearo ðacabecuyume ũ. <sup>14</sup>Apecu ñi copu etabedu mujare, aru muje coyuiyede jápiaiyubedu máre, pupejarā jobore mujare jēiyede muje cuboba cāchinoi ñi jáiyede, muje etaiyede ñi cūramine jocarí, no ímarore jocarí máre. <sup>15</sup>Jāve coyuyubu mujare: Ina Sodomacavu bácvu aru ina Gomorracavu bácvu máre pare ámeina ðaivu barejaquémavu. Ubenita diímarocavu mujare copu etabevu nájinajarama nócvu bácvu pueno bajo, Jūmenijicui nájiovaquijāravu baquinóre pōevare, ne ámeina teiye boje, arejame Jesús, ñujare jaroyu.

**Jesús ñi coyūino úre ju aivu ne nájiyede**

(Mt 9.34; 12.24; 24.9, 13; Mr 3.22; 13.9-13; Lc 6.40; 10.3; 11.15; 12.11-12; 21.12-17; Jn 13.16; 15.20)

<sup>16</sup>Jesús coyure nurejame ñujare, yópe arí:

—Jájara. Jaroivu yu mujare ijáravucavu jêneboi, yópe ovejava nuiyepe aimara jiejecurivu jêneboi. Ávaivubu maja judíova: Áda me majibi, aru jureco jiejecubebico. Que baru ádape me majijará, aru jurecope jiejecubegarã pōevaue, muje coyuiyede náre. <sup>17</sup>Me jájara muja. Mujare jēni nuvarajarama jabova ne ámeina teivure jēniari jáiñami. Jara popenajarama mujare maja judíova maje cójijiñamiai. <sup>18</sup>Aru mujare nuvarajarama cójeipōeva ne jipocai aru jabova ne jipocai máre, yure muje ju aye boje, muje coyurājiyepe aivu ji borore náre aru ina judíova ámevure máre. <sup>19</sup>Ne jēni nuvaiyede mujare ámeina teivure jēniari jáiñami, “¿Aipe coyurājidi náre?” arí cārijimejara muja. Dinumu maquinómareca majinajaramu muje coyurājiye mujare jauéde. <sup>20</sup>Coyujará muja yópe majepacui Espíritu ũi dápiare ñaquiyeye aivu dinumu maquinóre.

<sup>21</sup>Mujare, yure ju aivure, ina yure ju abevu ũbenajarama. Que baru ũmu jēni jícuyume jíbucure o imacure máre, jabova ne boarí jaruvaicōjenajiyeye ayu ũre. Aru nopedeca jípacu jēni jícuyume mamacure. Aru nopedeca nēmara ju abeni nébucuvare maucuvārī boarājarama náre. <sup>22</sup>Caivu mujare, yure muje ju aye boje, jorojīni járajarama cainoa joborōacavu. ũbenita ñai ju ayu yure ũi yainumuíta, ũ macuyúme ji meadaimu. <sup>23</sup>Cūináro imarocavu ne ñájine ñaiyede mujare, dupini nujara muja apeno imaroi. Jáve coyuyubu mujare: Yu, Jūmenijicui daroimu mácu ũmure, copaidacuyumu muje coyurī bubarājiye jipocamia ji yáyaiye méne cainoa maje imaroa, Israeque imaroi.

<sup>24</sup>Ina bueimara ñame majibema náre bueipōecu pueno. Aru ina memecaivu ñame parubema ne jabocu pueno. <sup>25</sup>Ñai bueimure vaiye jauvu caiye iye ũre bueipōecui vaiye báquede. Aru ñai memecayure vaiye jauvu caiye iye ũi jabocu vaiye báquede. Pōeva ámeina yávaivu baru cūrami upacure, pueno baju ámeina yávarājarama ũi cūramicavure. Quédecabu ina yure ju abevu “Abujuvai jabocubu mu” aiyurī yure, ámidoivu Beelzebúre. Que baru mujare majicayubu: Pueno baju ámeina yávarī ñájine ñarājarama mujare, arejame ñujare Jesús.

### **Jesús ũi coyūino pōeva ne jidurājimure**

(Mr 4.22; Lc 8.17; 12.2-7)

<sup>26</sup>Ñujare coyure nurejame Jesús:

—Pōevareca jidubegarã muja. Caiye yaveiye báque jároquiyebu. Aru dupióvaiye báquede máre majinajarama caivu pōeva. <sup>27</sup>Caiye ji coyuiyede mujare ñeminoi, pōeva ne jápiabede, coyujará pōevare miadároi, ne jápiayede. Aru caiye muje jápiayede, pōeva ne jūjuvaiyede, coyujará obedivu pōevare ne cójijinoi. <sup>28</sup>Jidubegarã ina boarí jaruvaivure muje bajure, ũbenita muje ũmene boarí jaruvaivu oabevure. Quénora jidujará Jūmenijicure, ñaine muje bajure aru muje ũmene máre, bíjarorī majicure toabo cūiméboi.

<sup>29</sup>Yócavu bojedaivu pucajína mójina quíjinare cūináturava táuturaturava bojecubeturavaue. ũbenita cūinájicu nácacu turíburu joborōita ũi yaidú, majepacu Jūmenijicu tuicōjeimi ũre. Jūmenijicu ũi tuicōjemenu cūinájicu nácacure joborōita, tubecuyume. <sup>30</sup>Aru caiye iye podamea cuede muje jipobui majibi majepacu Jūmenijicu. <sup>31</sup>Que baru jidubegarã. Muja bojecurivutamu caivu mójina obedivu pueno. Que baru Jūmenijicui cójemenu, ámeno vaibéquiyebu mujare, arejame ñujare Jesús.

### Jesús ja aivure aru ja abevure coyũino

(Lc 12.8-9; 2 Ti 2.12)

<sup>32</sup> Yópe arĩ, coyure nurejame Jesús:

—Caivu ina ja aivure yure pōeva ne jáiyede, yu máre náre ja acuyumu jipacu, cavarō mearocacu, ũi jáinoi. <sup>33</sup> Ũbenita caivu ina ja abevure yure pōeva ne jáiyede, yu máre náre ja abecubu jipacu, cavarō mearocacu, ũi jáinoi, arejame Jesús.

### Jesús ũi coatede ñaino pōevare

(Mt 16.24-25; Mr 8.34-35; Lc 9.23-24; 12.51-53; 14.26-27; 17.33; Jn 12.24-25)

<sup>34</sup> Cojedeca Jesús, yópe arĩ, buedejame ñujare:

—Dápiabejarā muja yu dayu bácuře, cãrijimene ñacuyu ijãravucavure. Dabedejacacu yu ijãravui, cãrijimene ñacuyu mujare. Quénora darejacacu yu, pōevare coatede ñacuyu, apevu yure ne ja aiye boje ũbenita apevu yure ne ja abe boje. <sup>35</sup> Ji daiye báque boje, mamacu maucuvacuyume jipacure, aru mamaco maucuvacodome jipacore, aru mamacui márepaco maucuvacodome ôi vácore máre. <sup>36</sup> Que baru pōecu ũi cūramicavuvacaribu ũi mauva mǎrajivu.

<sup>37</sup> Ácu pōecu jipacure o jipacore ucu baru ji pueno, ũ buojabebi jícu bacuyú. Ácu pōecu mamacure o mamacore ucu baru ji pueno, ũ buojabebi jícu bacuyú. <sup>38</sup> Ácu pōecu daiyucu yúque, dajocajacurĩ pōeva ne mearo jáiyede ũre, cuyebejacurĩ yure yóvayede, aru jidubejacurĩ ũi ñájiquiyede. Nópe ñabecu baru, ũ buojabebi jícu bacuyú. <sup>39</sup> Ñai pōecu ũi baju urōpe ñarĩ, meadaiyucu baru ũi bajure, coatecuyume ũi bajure Jūmenijicure jaruvarĩ, yópe yaivyú bácupe ũi ũmei. Ũbenita ñai pōecu, “Ye baju ñmevu, ji yaidú Cristore boje” ayu, ũi baju urōpe ñabecuva quénora ji urōpe ñarĩ, ũrecabe ji meadaquimu, cucuyu Jūmenijicuque cainumua, ñujare arĩ buedejame Jesús.

### Pōeva bojedaimara ne baju ñaiyepe

(Mr 9.37, 41; Lc 9.48; 10.16; Jn 13.20)

<sup>40</sup> Jesús buedejame ñujare cojedeca:

—Ñai pōecu copu etayu baru mujare muje coyurãnuiyede ji yávaiye méne, yure máre copu etaibi ũ. Aru ñai pōecu copu etayu baru yure, copu etaibi ñai yure daroyure máre. <sup>41</sup> Ñame copu etaivu cūinácu Jūmenijicui yávaiyede coyucaipōecure, Jūmenijicu bojedacuyume náre yópe ũi bojedaiyepedeca ñai ũi yávaiyede coyucaipōecure. Aru ñame copu etaivu cūinácu ũmu meacure, Jūmenijicu bojedacuyume náre yópe ũi bojedaiyepedeca ñai ũmu meacure. <sup>42</sup> Jáve coyuyubu mujare: Ñai pōecu jíyu cūináru jororure ocoque, cadatecuyu cūinácu ji bueimaracacure, parubecureca ũi yóvaiye boje yure, jáve bíjabecuyume ũ Jūmenijicui bojedaiyede ũre, arĩ buedejame Jesús.

### Juan Bautista ũi jaroimara Jesús yebai

(Mt 17.10-13; Mr 9.11-13; Lc 7.18-35; 16.16)

**11** <sup>1</sup> Jesús ñuja doce paivu ũi bueimarare majicarĩ buojayu bácu, nore jocarĩ nurejame dijaborõcaĩmaroai, pōevare buescuyu aru coyucuyu ũi yávaiye méne.

<sup>2</sup> Dinumure Juan Bautista ñai jabocu Herodes ñi buoimu marejamedá. Curejamedá ámeina teivure jëni jacoĩnami jívui. Noi cücü, jápiarejamedá Cristo ñi ñaiye borore. Que baru jarorejamedá apecu ñi bueimarare Jesús yebai. <sup>3</sup> Jëniari jáicõjenezamedá náre yópe:

—¿Jáveneca múru Juan Bautista “Ji yóboi dacuyume apecu coyupõescu” arĩ, ñi buevacamu? ¿Ëi que arĩ buevacamu ámenu, coreñajidi ñuja apecure? aicõjenezamedá náre Juan Bautista.

<sup>4</sup> Ne que arĩburu yóboi, Jesús ju ayu arejame náre:

—Nuri coyujarã Juan Bautistare muje jáiyede aru muje jápiayede caride:

<sup>5</sup> Ina jári eabevu bávavu jári eadama aru ina cuiye majibevu bávavu cuyama caride. Ina pojeivu bávavu meama aru ina jápiabevu bávavu jápiadama caride. Ina yaivu bávavu nacovaimara yainore jaruvari apuma cojedeca caride. Aru cõmaje ãrojarivure coyuyubu iye yávaiye méne, Jümenijicui meadaiyede põevare. <sup>6</sup> Aru torojubi ñai ju arĩ dajocabecu yure, arejame náre Jesús.

<sup>7</sup> Ina daroimara ne nuriburu yóboi, Jesús Juan Bautistai borore yávari búyu arejame ina obedivu põevare noi curivure:

—Jáve járanumeteavũ muja cõriäre ümevu japuiyede põecubenoĩ.

<sup>8</sup> Aru jáve járanumeteavũ muja põecu cuitótecaje meacajede doyure máre põecubenoĩ. Majivu muja ina doivure cuitótecajea meacajeare curivure cainumua jabovai cüramiai. <sup>9</sup> Quénora jáve járanuvu muja cüinácü Jümenijicui yávaiyede coyucapõescu. Jáve coyuyubu mujare: Jáquemavu muja Jümenijicui yávaiyede coyucapõescu püeno meacu bajure. <sup>10</sup> Juan Bautistabe ñai Jümenijicui toivaicõjeimu mácu ñre coyucapõescu bácu:

Jaroivu yure coyucapõescu mi jipocai, ñi meadaquiepe ayu põevare, ne copu etarãjiyepe ayu mure, nopedeca põeva ne meadaiyepe cuimare ñai ümu, ne puedaimu, ñi daquiepe jipocai, arĩ coyucõjenezajquemavu Jümenijicu.

<sup>11</sup> Jáve coyuyubu mujare: Cübebi apecu Jümenijicui yávaiyede coyucapõescu meacu baju Juan Bautista püeno, ina ijãravure põeteivu jëneboi. Übenita caivu Jümenijicui jaboteimara ñi mearo ñacaimaramu Juan Bautista püeno. Aru nácacu übeni cücü máre Jümenijicui mearo ñacaimume Juan Bautista püeno, arejame Jesús.

<sup>12</sup> Aru yópe arĩ, buede nurejame:

—Ñijãravu bácarõ Juan Bautista Jümenijicui yávaiyede ñi coyurĩ buijãravumata pu caride máre, obedivu põeva parurõ ñadama, ecoiyurivu Jümenijicui jaboteinore. Aru põeva Jümenijicure ju abevu parurõ ñadamatedama, cüiné ñaiyurivu ñi jaboteinore. <sup>13</sup> Juan Bautista ñi curinumure curejaquemavu Jümenijicui ñaicõjeiye Moisés bácu toivaicõjeni bueiye báque aru ina Jümenijicui yávaiyede coyucapõeva mácvu toivari bueiye báque Jümenijicu jabotecuyure ñi põevare. <sup>14</sup> Aru ji coyuiyede muje ju aiyuru, coyuyubu mujare: Juan Bautistarecabe ñai Jümenijicui yávaiyede coyucapõescu Elíape páyu dacuyu Jümenijicui epequimu ñi daquiepe jipocamia. <sup>15</sup> Me jápiajarã muja iye ji bueiyede, arejame Jesús.

<sup>16</sup> Aru yópe arĩ, buede nurejame:

—¿Yéque jëvari coyuji ina põeva ijãravucavure? ¿Aipe ãrojari na? Juedova tãibui dobarivupebu, yajurãjivu nácavunque. Aru yópe aivupebu: <sup>17</sup> “Japuvu

ñuja yuriainore. Ñbenita upabetevu muja. Yuriavu ñuja chiore ðaiyede. Ñbenita obetevu muja”. Aru nópe ijáravucavu máre cãrijijnama na. <sup>18</sup>Que baru Juan Bautista ñi ðaiyede, ñ ámeni aru ùcumeni teiyede, “Abujucure cuvabi”, éra ñbenina aivubu muja. <sup>19</sup>Aru Jñmenijicui daroimu mácu ùmupe, ji ðaiyede, ári aru ùcuri teiyede yópe caivu apevupe, “Ñai ùmu urarõ ári ñi vainí tuiyeta, aru urarõ ùcuri ñi pacoteiyeta, yóvaibi ámenare aru jabovare táutara ícaipõevare máre”, yurá ñbenina aivubu muja. Que baru muja máre, ijáravucavupedeca cãrijivubu. Ñbenita Jñmenijicui majiéde pøeva jáðama ére ju aivunque, arejame Jesús.

### **Apeímaroacavu ne ju abeno Jñmenijicure**

(Mt 10.15; Lc 10.12-15)

<sup>20</sup>Apeímaroai ure pøeva ne ðarí majibede ðarejame Jesús. Ñbenita nócavu chiõmeni ne ámeina teiyede, oatuvabedejaima ne ðaiyede. Que baru Jesús, yópe arí, jijatani búrejame ina ímaroacavure:

<sup>21</sup>—¡Muja, judíova, Corazícavu, ámeno ñájinajaramu muja! ¡Aru muja, judíova, Betsaidacavu máre, ámeno ñájinajaramu muja! Pøecu ñi ðaru pøeva ne ðarí majibede yópe ji ðaiyepe muje jáiyede, judíova ámevu Tirocavu aru Sidóçavu máre ne jáiyede, nócavu jave chiõri ne ámeina teiyede, oatuvajebu ne ðaiyede. Ñeminicajeare dorí, úapenare tuorí ne jipobui, jáðovajebu ne chiõri dápiayede. <sup>22</sup>Ñbenita yu coyuyubu mujare: Muja ñájinajaramu Tirocavu aru Sidóçavu pñeno baju, Jñmenijicui ñájiovaquijáravu baquinóre pøevare, ne ámeina teiye boje. <sup>23</sup>Aru muja, judíova, Capernaucavu, jáve numenajaramu muja cavarõ mearo Jñmenijicui cãrõí. Quénora muja nñarajaramu toabo cüméboi. Ina Sodomacavu bácvu ámena bajuvacari, jáivu bácvu baru pøeva ne ðarí majibede, yópe ji ðaiye báquepe Capernaui, chiõri ne ámeina teiyede, oatuvajebu ne ðaiyede. Aru na mácvure bíjare ðabejebu Jñmenijicu. <sup>24</sup>Ñbenita yu coyuyubu mujare: Ina Sodomacavu bácvu pare ámeina teivureca, ne pñeno ñájinajaramu muja, Jñmenijicui ñájiovaquijáravu baquinóre pøevare, ne ámeina teiye boje, arejame Jesús.

### **Jesús ñi jabuóvare ðaiyue pøevare**

(Lc 10.21-22; Jn 1.18; 3.35; 10.15)

<sup>25</sup>Dinumumareca Jesús, yópe arí, coyurejame Jñmenijicure:

—Mu, jipacu, cavarõ mearocavu ne jabocu aru ijáravucavu ne jabocu máre, mearore jívu mure, mi jáðovame boje caiye iye ji coyuiyede ina majidivure aru mi jáðovaiye boje caiye iyede ina majibevure. <sup>26</sup>Mu, jipacu, mearore jívu mure mi nópe ðaiye boje, arejame Jesús.

<sup>27</sup>Jñmenijicure coyurí buojarí, Jesús arejame ñujare, éque curivure:

—Jipacu Jñmenijicu yure majide ðaibi caiyede, aru parure ðaibi máre. Ñame majibema yure, quénora majibi jipacvu. Ñame majibema jipacure quénora majivu yu, aru na máre ina ji majide ðaimara. <sup>28</sup>Caivu muja uetivuvu muje ðariduiye boje yópe Jñmenijicui ðaicõjeiyepe, ðajará ji yebai. Jabuóvare ðaquijivu mujare diede jocarí, muje cãrijimenajiyeyepe ayu. <sup>29</sup>Ju ajará yure aru ji coyuiyede máre. Buejará yúque ji bueiye. Majicaicõjejara mujare yure, ðarãjivu ji ðaiyepe. Yu cõmaje ároje jáñumu pøevare. “¿Meacu bária yu?” arí dápiabevu. Que baru yu jabuóvare ðaquijivu mujare muje ùmene.

<sup>30</sup> Jā arī yure, ji coyuiyede máre, maiyójabevu mujare. Muje daiye majibede daicōjemevu mujare, arejame Jesús.

**Jesúi bueimara ne puyoino oteiyede jabuóvaijāravui**

(Mt 9.13; Mr 2.23-28; Lc 6.1-5)

**12** <sup>1</sup> Apejāravu, judíovai jabuóvaijāravu sábadoi, űja Jesújā vaidéjacrā oteiyede curōi. űja űi bueimarare āvué ijidejavū. Que baru die oteiyede jēni puyorī ārejacarā űja. <sup>2</sup> Aru apevu fariseovacavu űje nōpe daiyede jāri, arejaima Jesúre:

— Jājacu. Mi bueimara maja judíova maje daicōjemenope đarī, āmeno đavubu jabuóvaijāravure, arejaima.

<sup>3</sup> űbenita Jesús, űi dāpiaie boje űja āmeno đabevure, arejame náre:

— Jāve ārumetenaru muja yo David bācu đaino mácārōre āvué ijidé űre aru űque curivure máre? <sup>4</sup> ű mácu ecorejaquemavu Jūmenijicui cūrami. Aru ārejaquemavu pāure, Jūmenijicure jíye báquede, ina sacerdoteva ne āiyede, sacerdote āmecu bācuvacari. Aru jídejaquemavu űque curivure máre, sacerdoteva āmevu bācavureca. űbenita Jūmenijicu űājine đabedejaquemavu na mácavure. <sup>5</sup> Jāru jāve ārumetenaru muja Jūmenijicui daicōjeiyede sacerdotevare űi toivaicōjeiye báquede Moisés bācure? Ina sacerdoteva memeivuvacari Jūmenijicui cūrami jabuóvaijāravure, āmeno đabema na. <sup>6</sup> Yū coyuyubu mujare: Ji cuede muje jēneboi mearotamu mujare, muje Jūmenijicui cūramine cuvae pueno. <sup>7</sup> Muja ji bueimarara “Āmeno đavubu” abejebu, majidivu bācavu baru aipe aiyurōre iye Jūmenijicui yāvaiyede toivaicōjeiye báquede: “űvu yu muje cōmaje āroje jārājipepe ayu apevure, muje yure jícaiye pueno”, arī toivaicōjenejaquemavu Jūmenijicu. <sup>8</sup> Yū, Jūmenijicui daroimu mácū űmpe, jabocubu yu. Que baru daicōjeni buojaivu yu pōevare ne daiyede caijāravure aru jabuóvaijāravure máre, arejame Jesús.

**Jesús űi meadaino űmu āmuve jiacubecure**

(Mr 3.1-6; Lc 6.6-11; 14.5)

<sup>9</sup> Nore jocarī nurejacarā űja, Jesújā. Aru cūinādami judíovai cōjijiűami ecorejacarā. Noi carejame cūinācu űmu, āmuve cūinápūravu jiacubecu.

<sup>10</sup> Apevu fariseovacavu jēniari jārejaima Jesúre:

— Jāmi dāpiaru, meadaicōjeini Jūmenijicu jabuóvaijāravu sábadoi? arejaima na.

Nōpe arejaima, boro coyurī adaiyurīduivu űre.

<sup>11</sup> Jesús arejame náre:

— Jācu mujacacu űi oveja turu cobe jívu, cūinā jēni ĩmeje bārica űre judíovai jabuóvaijāravu, mujare memeicōjemejāravure? Įpōecu bojecucutame oveja pueno! <sup>12</sup> Que baru Jūmenijicu mearore daicōjeimi pōevare jabuóvaijāravu sábadoi. Aru yu meadayu baru űai űmure caride, mearo đajebu yu, arejame Jesús.

<sup>13</sup> Nōpe ayuva, űai űmu āmuve jiacubecure arejame:

— Jabióvacu mi āmuvede, arejame.

űi jabióvaiyede, meatedejavū űi āmuve, yōpe apepūravucaāmuvepe. <sup>14</sup> Que teni ina fariseova etavū bācavu cōjijidejaimada. “Boarī jaruvārājavu”, arī dāpiaivu barejaimada Jesúre.

### Isaías bácuí coyucaimu Jesús

<sup>15</sup> Jesús coreóvayū ina fariseova ne boarí jaruvaiyuede úre, náre dajocarí nurejame nore jocarí. Obedivū pōeva cujurejaima ūi yóboi. Aru caivū nácavū iijimarare meadarejame Jesús. <sup>16</sup> Yávaicōjemenidurejame náre apevure, ne coreóvabenajiyeye ayū ūi đaiyede. <sup>17</sup> Caiye iye nópe vaidéjavū cūináturu Jūmenijicūi coyucōjeiye báquepedeca ñai Isaías āmicucu ūi yávaiyede coyucaipōecu bácuire. Yópe arí, toivaicōjenejaquemavū ūi mácure Jūmenijicu:

<sup>18</sup> Jápiajarā. Ñaime yure memecayū, ji beoimū mácū. Úrecabe ji umū. Úque torojuvū yū ji ūmei. Úre darocuyumu ji Espíriture, ūi cōjequiyeye ayū yure memecayū ūi dápiaiye, ūi coyuiyede, aru ūi đaiyede máre. Que baru coyucuyume yure memecayū judíova āmevure aipe đarí buojaivure, boropatebenajivūva ji jáinore. <sup>19</sup> Úrecabe ādamatebecū, codobobobecu mái, aru órejabecu imaroacarō tāibui. <sup>20</sup> Napiñū cadatecuyume ina parubevure. Aru cōmaje āroje jáñū meadacuyume ina iijimara yaijurorivure. Nópe đacuyume pu ūi vainí turíburu yóboita āmenore jaruvarí, ūi jaboteiyeta. <sup>21</sup> Úrecabe pōevare meadarí buojayū. Que baru úre napini corenajarama ina judíova āmevū, ūi meadaquiyeye aivū náre, arí toivaicōjenejaquemavū Isaías bácuire Jūmenijicu.

**“Abujuvai jabocui paruéde cuvabi ū” arí, ne boro coyurí adaríduino Jesúre**

(Mt 9.34; 10.25; Mr 3.20-30; 9.40; Lc 11.14-23; 12.10)

<sup>22</sup> Dinūmure apevū davarejaima cūinácū ūmure, abujucu ūi ímamure, Jesús yebai. Ñai ūmū jári eabecu aru yávaie majibecu barejáame. Aru úre meadarejame Jesús. <sup>23</sup> Ūi que đaiyede, caivū ina pōeva, nócavū, cucumari arejaima:

—¿David bácuí pāramecu, Jūmenijicūi epeimū mácū maje jabocu bacuyú bárica ñai? jēniari járejaima ne bajumia.

<sup>24</sup> Ūbenita ina fariseova, jápiaivū pōeva nópe ne coyuiyede, yópe arejaima:

—Ñai ūmū cuvabi Beelzebúre. Que baru abujuvai jabocui paruéque jaetovaibi abujuvare, arejaima na.

<sup>25</sup> Jesús coreóvayū ne dápiaiye, arejame náre:

—Cūináro jaborōcavū ādamateivū baru ne bajumia, ina jaborōcavū cūinájarama na. Aru nopedeca cūináro ímarocavū o cūinádami cūramicavū máre ādamateivū baru ne bajumia, diímarocavū o diñamicavū máre cūinájarama na. <sup>26</sup> Aru nopedeca bájebu ñai abujuvai jabocu, jaetovayū baru abujuvai jabocure. Ádamateyū bájebu ūi bajuma. Aru jaetovayū baru abujuvare, joe parucu cubejebu ū. <sup>27</sup> ¿Ji jaetovaru abujuvare ne jabocui paruéque, ñamei paruéque jaetovaidi mujacavū abujuvare? Que baru mujacavū, abujuvare jaetovaivū, jáđovađama mujare muje borocuede yure ūbenina. <sup>28</sup> Ūbenita Jūmenijicūi Espíritu Santo ūi paruéque jaetovayubu yū abujuvare. Que baru jáđovaivū yū Jūmenijicu jaboteyure mujare.

<sup>29</sup> Ūbenita buojaino āmevū ecoivū ñai ūmū parucu cūramine, ñavarajivū ūi cavaede. Mamaramure úre buorí, que đaiyū bācavūta buojaivū ñavaivū ūi cavaede, arejame Jesús.

Nópe ayū, Jesús yópe aiyucu barejaquémavū: Úvacari parubi abujuvai jabocu pueno, ūi jaetovaiye boje abujuvare pōevare jocarí.

<sup>30</sup> Aru Jesús arejame:

—Ñai yóvabecu maucuvabi yure. Aru ñai apevure yóvare ðabebi yure, náre maucuvare ðaibi yure.

<sup>31</sup> 'Que baru coyuyubu mujare: Jūmenijicu ārumetecuyume caiye iye muje āmeina teiyede, aru caiye iye ūre āmeina yāvaiyede máre. Ūbenita ácu pōecu ūi yávaru āmeina ñai Espiritu Santore, aipinumu Jūmenijicu ārumetebecube ūi āmeina teiyede. Quédata boropatecuyume, b́jácuyu Jūmenijicure jocarí cainumua. <sup>32</sup> Que baru caivu ina āmeina yávaivure yure, Jūmenijicui daroimu mácure ūmupe, Jūmenijicu ārumetecuyume ne āmeina teiyede. Ūbenita ina āmeina yávaivure ñaine, Espiritu Santore, Jūmenijicu ārumetebecube ne āmeina teiyede, ijāravure aru daquijāravu baquinóre máre, arejame Jesús.

**Jesús ūi bueino maje majinore jocucua jēidure**

(Mt 3.7; 7.20; 15.18; 23.33; Lc 3.7; 6.43-45)

<sup>33</sup> Cojedeca Jesús, yópe arí, buedejame:

—Jocucu meacu cuvavu jēidua mearuare. Ūbenita jocucu āmecu, āmeduare cuvavu. Que baru coreóvaivubu iye jocucua dicuá jēiyeque. Nopedeca muja coreóvarí buojaivubu yure ji ðaiyeque. <sup>34</sup> ¡Muja, jajovaivū, āðavape paivubu muja! Mujarecabu dápiaivū āmene. Que baru āme matuiyede yávaivubu muja. Aru méne yávarí buojabevu muja. <sup>35</sup> Ñai pōecu meacu yávayube méne, ūi ūmei mearo cue boje. Aru ñai pōecu āmecu yávayube āmene, ūi ūmei āmeno cue boje. Que baru pōecu yávaibi ūi jijecamuque ūre cuede ūi ūmei. <sup>36</sup> Coyuyubu mujare: Ānijāravu daquijāravu baquinó Jūmenijicui ñájiovaquijāravu baquinóre pōevare, ne āmeina teiye boje, caivu ūbenita yávaivu b́acavure ñájine ðacuyume Jūmenijicu, ne nópe yávaiye báque boje. <sup>37</sup> Muje yávaiyeque j́aðovaivubu aipe muje dápiaiyede. Que baru Jūmenijicu bojedacuyume mujare yópe muje yávaiyepe. Muje ména yávaru, mujare boropatebevupe j́acuyume Jūmenijicu. Ūbenita muje āmeina yávaru, mujare boropateivupe j́acuyume ū, arí buedejame Jesús.

**Pōeva ne ðarí majibenore Jesúre ðaicōjeniduino**

(Mt 16.1, 4; Mr 8.11-12; Lc 11.16, 29-32)

<sup>38</sup> Dinumure apevu ina Jūmenijicui yávaiye báquede bueipōevacavu aru apevu fariseovacavu máre yópe aríðurejaima Jesúre:

—Mu, bueipōecu, Jūmenijicui majiéque ðarí j́aðovajacu pōeva ne ðarí majibenore, aríðurejaima.

<sup>39</sup> Ūbenita Jesúcapūravu yópe arejame náre:

—Āmena bajutamu muja. Jūmenijicure dajocaiyurivubu muja yópe nomió āmeco ōi dajocaiyepe j́marepacure jocarí. Que baru j́eniariduivubu ji j́aðovaquiyupe aivu Jūmenijicui majiéque ðainore, pōeva ne ðarí majibenore. Ūbenita j́āmenamu apenore Jūmenijicui ðainore mujare, quénora yo Jonás mácure vaino mácarōre. <sup>40</sup> Yópe Jonás mácui cue báquepe moacu uracui yapibu j́ivui yóbecurijāravua aru yóbecuriñamia máre, nopedeca yu, Jūmenijicui daroimu mácu ūmupe, cacyumu joboró j́ivui yóbecurijāravua aru yóbecuriñamia máre.

<sup>41</sup> 'Aru Jūmenijicui ñájiovaquijāravu baquinóre pōevare, ne āmeina teiye boje, ina ūmva mácavu, Nínivecavu b́acavu, nacajarajarama muja

ijāravucavūque, aru āmecororājarama mūjare, yure mūje ju abe boje. Aru ina Nīnivecavū bācavū chīori ne āmeina teiye bāquede oatūvarejaquemavū, jāpiaivū bācavū Jonás mácui coyūiyede Jūmenijicui yāvaiyede. Ūbenita Jonás mácui majié pūeno baju bueyūbu yū. <sup>42</sup> Aru Jūmenijicui nājiovaquijāravū baquinóre pōevare, ne āmeina teiye boje, ico jaboco, aviá daino cācopūravucaco báco, nacajacodome mūja ijāravucavūque aru āmecorocodome mūjare, yure mūje ju abe boje. Ō mácō darejaquemavū joarō joboróre jocarī, jāpiacodo nāi Salomón mácui coyūiye bāquede ūi majiéque. Ūbenita Salomón mácui majié pūeno baju bueyūbu yū, arejame Jesús.

### **Jesús ūi coyūino abujucui copainore**

(Lc 11.24-26)

<sup>43</sup> Bedióva cojedeca Jesús, yópe arī, buedejame:

—Abujucu etayu bācu ūmure jocarī, voibi ūi jabuóvaino penenoi, pōecubenoī. <sup>44</sup> Ūbenita jabuóvaino eabecu baru, copaiyūbi nāi ūmu, ūi etaimu mácurecata. Aru copaini dayu, eaibi nāi ūmu meacure, yópe cūrami oeni meadaiñamipe páyure. <sup>45</sup> Que teni nuñu, nūvaimi apevu siete paivū abujuva ūi pūeno āmenare. Aru ne ecoiyede nāi ūmure, āmedadama ūre pūeno baju. Nopedeca vaiquīyebu ijāravucavū āmenare. Nājinajarama yóbocajārvūare ne mamarumu nājiye bāque pūeno, arejame Jesús.

### **Jesús ū jina ne voino ūre**

(Mr 3.31-35; Lc 8.19-21)

<sup>46</sup> Jesús ūi coyūiyede ina pōevare, jípaco aru ūi yóva máre ūque boroteiyurivū edarejaimada ūi curōi. Ūbenita jedevamia mautedejaimada na. <sup>47</sup> Aru cūinācu nore cucu arejame Jesúre:

—Mipaco aru mýova máre, mure járadaivū, jedevai núma, arejame.

<sup>48</sup> Ūbenita Jesúcapūravū arejame ūre coyūyu bácu:

—¿Namema jipaco aru jýova? jēniari járejame ū.

<sup>49</sup> Aru ūi purure jabióvarī jádovacūñu nūjare, ūi bueimarare, arejame:

—Yuibu jipacope paivū aru jýovape paivū máre. <sup>50</sup> Que baru caivū ina daivū jipacu, cavarō mearocacu, ūi urōpe, nárecabu jýocupe páyū, jýocope pádo, aru jipacope pádo máre, arejame Jesús.

### **“Oteipōecure” jári dāpiarī ne darājiyepe aino**

(Mr 4.1-9; Lc 5.1-3; 8.4-8)

**13** <sup>1</sup> Dijārvūmareca cūramine etarī, macajitabū urabū ēcarui nūri, dobarejame Jesús. <sup>2</sup> Obedivū pōeva cójijidejaima ūi yebai. Que baru jiadocū ēcaru joabenoī curicūre jári, jaturī, dobarejame dicūra, buecuyū pōevare. Aru caivū ina pōeva cūrejaima macajitabū urabū ēcarui. <sup>3</sup> Jesús buedejame nūjare jári dāpiarī nūje darājiyepe ayū caijiē apejiene. Yópe arī, buedejame:

—Yui oteipōecu otecunūquemavū. <sup>4</sup> Ūi oteiyede, ape oteiye tuquemavū ma ēcarui. Aru mījina darī, āradaquemavū caiye iye oteiyede. <sup>5</sup> Ape oteiye tuquemavū joborō edubenoī, cūraboā pūenoī. Nore joborō yaurijīe cūbeniburu, maumejiena pīarī etaquemavū. <sup>6</sup> Ūbenita aviá ūi boiyede, ēquemavū. Aru nuomua ūmujurimua cūbeni, yaiquémavū. <sup>7</sup> Ape oteiye

tuquemavu miucua jēneboi. Aru yóboi miucua bucurī, chíoquemavu iye oteiyede. <sup>8</sup> Aru ape oteiyē tuquemavu mearo joborōi. Aru die jēquemavu, apeñu jēñu cien paivua, apeñu jēñu sesenta paivua, aru apeñu jēñu treinta paivua, caiye oteiyabea coapa. <sup>9</sup> Me jápiajarā muja iye ji bueiyede, arejame Jesús.

**Aipe aiyurōre Jesús ũi jári dápiarī ne đarājiyepe aino**

(Mt 25.29; Mr 4.10-12, 25; Lc 8.9-10, 18; 10.23-24; 19.26)

<sup>10</sup> Dinumure ñuja, ũi bueimara, ũi yebai nuri, jēniari járejacarā Jesúre:

—¿Aipe teni bueyurū mu jári dápiarī ñuje đarājiyepe ayu mi coyuiyeque? arejacarā.

<sup>11</sup> Aru Jesús coyurejame ñujare, yópe arī:

—Mujare coyurī majide đayubu iye Jūmenijicu ũi coyucōjeme máquede. Ũ jaboteibi mujare, ũi pōevare. Ũbenita ina apevu, iyede majibevure, quéda jári dápiarī ne đarājiyepe ayu, bueyubu yu náre. <sup>12</sup> Nopedeca ina jápiaivure Jūmenijicui yávaiyede, Jūmenijicu pueno baju majide đacuyume náre. Ũbenita ina jápiabevure Jūmenijicui yávaiyede, iye ne quíjino majiéde, Jūmenijicu náre ícuyume. <sup>13</sup> Jáivuvacari ji đaiyede, coreóvaivubema yure. Aru jápiaivuvacari ji coyuiyede, ju aiyubema yure. Yéde majibema na ji yávaiyede. Que baru jári dápiarī ne đarājiyeque coyuyubu yu náre. <sup>14</sup> Ne đaiye nópe vaidéjaquemavu cūináturu Jūmenijicui coyucōjeiye báquepedeca ñai Isafas ámicucu ũi yávaiyede coyucaipōecu bácure. Yópe arī, toivaicōjenejaquemavu ũi mácure:

Jāve jápiarīdurājaramu muja. Ũbenita ye jápiarī eabenajaramu.

Jāve járidurājaramu muja. Ũbenita ye jári eabenajaramu. <sup>15</sup> Muja coreóvaivubevu, muje yávaiyede jāvene jápiarī eaiyube boje. Muja jápiabevu, muje yávaiyede jāvene jápiaiyube boje. Muja bieivu muje yacoruaque, muje jāvene jáiyube boje. Yure jári coreóvaivu baru muje yacoruaque, ju ajebu muja. Yure jápiaivu baru muje cá mucobeaque, ju ajebu muja. Yure jápiarī adaivu baru muje ũmeque, ju ajebu muja. Que đaivure, meadajebu yu mujare, toivaicōjenejaquemavu Jūmenijicu Isafas bácure.

<sup>16</sup> Ũbenita torojurājaramu muja, ji bueimara. Ji đaiyede jári coreóvaivubu muje jáiyede. Aru ji coyuiyede jápiarī, ju aivubu diede. Que baru Jūmenijicui mearo đacaimaramu muja. <sup>17</sup> Jāve coyuyubu mujare: Obedivu Jūmenijicui yávaiyede coyucaipōeva aru meara pōeva máre jáiyurīduquemavu caiye iye muje jáiyede. Ũbenita jámetequemavu. Aru jápiaiyurīduquemavu caiye iye muje jápiaiyede. Ũbenita jápiabetequemavu, arī coyurejame ñujare Jesús.

**Jesús ũi coyuiño aipe aiyurōre “oteipōecure” jári dápiarī ne đarājiyepe aino**

(Mr 4.13-20; Lc 8.11-15)

<sup>18</sup> Yópe arī, Jesús coyurejame ñuja ũi bueimarare:

—Yo jári dápiarī muje đarājiyepe ayu ji aino mácārō yópe coyuiyurōmu mujare: Iye oteiyē Jūmenijicui yávaiyepe paiyebu ũi jaboteinoque yávaiye. Aru ñai oteipōecu Jūmenijicui yávaiyede bueipōecupe páyube. <sup>19</sup> Aru inamu ma écarui oteiyē turīduiye báquepe paivu. Náre coyuiyede Jūmenijicui

yávaiyede jápiadama, ũbenita coreóvarĩ eabevuva. Que baru ne jápiarĩburu yóboi, ñai abujuvai jabocu dari, ārūmetede ñabi Jūmenijicui yávaiyede, ne jápaiye báquede. <sup>20</sup>Aru inamu joborō edubenoĩ, cūraboa puenoĩ, oteiye turĩduiye báquepe paivũ. Jūmenijicui yávaiyede jápiarĩ, torojuma me. <sup>21</sup>Ūbenita diede ju arĩduyama na. Que baru quĩjino yóboi, pōeva ne cārĩjovaru aru ñájine ñaru náre, ne ju aiyē boje, maumena dajocadama ne ju aiyede Jūmenijicui yávaiyede. Que teni ju abema na. <sup>22</sup>Aru inamu miucua jēneboi oteiye turĩduiye báquepe paivũ. Na máre jápiaivũ Jūmenijicui yávaiyede, ũbenita cārĩjiñama ijāravuquede. Aru torojuma tāturaque. Que baru dápiadama caiye diede. Ūbenita dápiabema Jūmenijicui yávaiyede. Que baru Jūmenijicu cadatebebi náre ũi yávaiyeque yópe ũi urōpe. <sup>23</sup>Ūbenita inamu mearo joborōi oteiye tuiye báquepe paivũ. Jūmenijicui yávaiyede jápiadama. Aru diede jápiarĩ coreóvadama. Nárecabu ju are ñaivũ apevũ pōevare, apevũ cien paivure, aru apevũ sesenta paivure, aru apevũ treinta paivure, arĩ buedejame Jesús ñuĵa ũi bueimarare.

**“Āmecōria oteiye jēneboi” jári dápiarĩ ne ñarājiyepe aino**

<sup>24</sup>Apeno jári dápiarĩ ñuĵe ñarājiyepe ainoque buedejame Jesús:

—Jūmenijicui jaboteino yópe painomu. Cūinácũ ũmũ ũi oteiye mēne, trigo āmicuede, otequemavũ jioi. <sup>25</sup>Ūbenita ñami, pōeva ne cāiyede, ũi maucũ dupini dari, otequemavũ āmecōriare ũi oteiye jēneboi. Aru que ñarĩ buojarĩ, nuquemavũ ñai ũi maucũ. <sup>26</sup>Que baru oteiye me pĩarĩ bucuiyede, āmecōria máre pĩarĩ bucuquemavũ. <sup>27</sup>Dinũmũre ñai jio upacũ ũre memecaivũ ũi yebai nuri, aquemavũ: “Mũ, ñuĵe jabocu, űotebetecurũ oteiye mēne jioi? Jájacu. Mi oteiyeque āmecōria máre cuvũ”, arĩ coyucuemavũ. <sup>28</sup>Ñai jio upacũ náre coyuyũ: “Ji maucũ que ñayũme”, aquemavũ. ũre memecaivũ jēniari jáquemavũ: “¿Iye āmecōriare ĩnajidi ñuĵa?” aquemavũ. <sup>29</sup>Ūbenita ñai jio upacũ aquemavũ: “Bítamu. Muĵe ĩyede āmene, mēne máre ĩnajichuvũ muĵa. <sup>30</sup>Bucũicōjejara caiyede, oteiye mēne aru āmecōriare máre, pũ jēijāravũ eaiyeta. Jēijāravũ eaiyede, yópe coyucuyũmu yũ ji oteiye ñcaipōevare: ‘Mamarũmũ ijara muĵa iye āmecōriare. ĩni, tóroa ñarĩ, ditoroa coapa buorĩ, juajarã muĵa. Ūbenita iye oteiye mēne trigo āmicuede ĩnĩburu, epejarã ji epeiñami jĩvũ’, coyucuyũmu náre”, aquemavũ ñai jio upacũ, arĩ buedejame Jesús.

**“Oteiyabe mostazare” jári dápiarĩ ne ñarājiyepe aino**

(Mr 4.30-32; Lc 13.18-19)

<sup>31</sup>Apeno jári dápiarĩ ñuĵe ñarājiyepe ainoque buedejame Jesús:

—Coyuquĩjivũ muĵare aipe ārōjarore yo Jūmenijicui jaboteinore. Yópe mostaza āmicuriyabe oteiyabepebu. Cūinácũ ũmũ diyabede ĩni, oteibi ũi jioi. <sup>32</sup>Diyabedecabu oteiyabe quĩjiyabe caiye oteiye pueno. Ūbenita ũi oteniburu yóboi, bucurĩ muivũ uracu ape oteiye pueno. Aru dicũ cavabũa uracavabũa nuivũ, dicũ taino cāchinoi mĩjina ne juaiboa ñadama, arejame Jesús.

Nopedeca mamarũmũre Jūmenijicui jaboteino quĩjĩnotamu, pōeva obebevũ ne cūe boje noi. Ūbenita Jūmenijicui yávaiye mēne coyurĩburu yóboi, urarōtamu no Jūmenijicui jaboteino, obedivũ pōeva ne cūe boje noi.

**“Páure bućure đaiyede” jári dápíarĩ ne đarājiyepe aino**

*(Lc 13.20-21)*

<sup>33</sup> Bedióva diede buedejame Jesús apeno jári dápíarĩ ñuje đarājiyepe ainoque, yópe arĩ:

—Jūmenijicui jaboteino yópebu nomió ōi páure bućure đaiyepe. Diede adarĩ jivaiyepebu yóbecuricurubua páu đaicurubware. Aru caino jivaibore bućuóvainopebu, arejame Jesús.

**Aipe teni Jesús ūi bueino jári dápíarĩ ne đarājiyepe aiyede**

*(Mr 4.33-34)*

<sup>34</sup> Caiye iye jári dápíarĩ ne đarājiyepe aiyede coyurejame Jesús ina obedivũ pōevare. Coyure curejame cainumua jári dápíarĩ ne đarājiyepe aiyequē ūi bueinore. <sup>35</sup> Nópe vaidéjavũ cūináturu Jūmenijicui coyucōjeiye báquedepedeca cūinácũ ūi yávaiyede coyucaipōecu bácure. Yópe arĩ, toivaicōjenejaquemavũ ūi mácure Jūmenijicu:

Jári dápíarĩ ne đarājiyepe ainoque coyucuyumu yũ pōevare. Iye yávaiye jádovame máquede Jūmenijicui jāravure cuedaquiye jipocamata coyucuyumu yũ náre, arĩ toivaicōjenejaquemavũ.

**Jesús ūi coyũino aipe aiyurōre “āmecōria oteiye jēneboi” jári dápíarĩ ne đarājiyepe aino**

<sup>36</sup> Dinumu ina obedivũ pōevare dajocarĩ, cūrami ecorejame Jesús. Aru noi ñuja, ūi bueimara, ūi yebai nuri, yópe arejacarā ūre:

—Mu, bueipōecu, coyujacu ñujare aipe aiyurōre yo jári dápíarĩ ñuje đarājiyepe ayũ mi aino mácārōre, āmecōria oteiye jēneboi, arejacarā.

<sup>37</sup> Yópe arĩ, coyurejame ñujare Jesús:

—Nai jio upacũ oteiye méne oteicōjeñupe páyũbu yũ, Jūmenijicui daroimũ mácũ ūmũpe. <sup>38</sup> Ūi jio ijāravũpe painomu. Iye trigo āmicue oteiye bu Jūmenijicui jaboteimarape paivũ. Aru iye āmecōriamũ abujuvai jabocui jaboteimarape paivũ. <sup>39</sup> Nai jio upacui maucube, āmecōriare oteyũ, abujuvai jabocupe páyũ. No jāravũ oteiye jējāravũ ijāravũ cūiqujāravũpe painomu. Aru ina oteiyede icaipōevamũ ángelevape paivũ. <sup>40</sup> Yópe ne ini juaiyepe toaque iye āmecōriare, nopedeca vaiquýyebu ijāravũ cūiyede.

<sup>41</sup> Yũ, Jūmenijicui daroimũ mácũ ūmũpe, darocuyumu ji ángelevare ji jaboteimara yebai. Ina ángeleva inajarama caivũ ina ji jaboteimara jēneboi āmeina đavure aru apevure āmeina đare đavure máre. <sup>42</sup> Náre ini jarorājarama toabo cūiméboi. Chōivũ orĩ curājarama nore. Aru jararĩ cōpi cūrajarama na. <sup>43</sup> Dinumu maquinóre ina pōeva meara, ina đavũ yópe Jūmenijicui urōpe, curājarama majepacu Jūmenijicui jaboteinoi, miadáre đavũpe yópe avia ūi boiyepe. Me jápiajarā muja iye ji bueiyede, arejame Jesús.

**“Bojecue yaveiyede” jári dápíarĩ ne đarājiyepe aino**

<sup>44</sup> Apeno jári dápíarĩ ñuje đarājiyepe ainoque buedejame Jesús:

—Jūmenijicui jaboteinomũ yópe bojecuede yaveiye báquepe jioi. Cūinácũ ūmũ memēñũ, ūi ūiyede joborō jívui eayũ baru bojecuede yaveiye báquede

noi, epeni yaveyube diede cojedeca. Aru jiore copainuri, caiye ùi cùvaede jìni bojedari, no jiore bojedayube, cùvacuyù iye bojecuede, arejame Jesús.

**“Perla àmicurijìbo cùrajibo pare bojecurijìbore”  
járì dápìarì ne ðaràjiyepe aino**

<sup>45</sup>Apeno járì dápìarì ñuje ðaràjiyepe ainoque buedejame Jesús:

—Jùmenijicui jaboteinomu yópe bojedaipòecui voiyepe cùrajiboa perla àmicurijìboa bojecurijìboare. <sup>46</sup>Ñai ùmu eayù baru cùinájìbo perla àmicurijìbo cùrajibore, bojecurijìbo caiboa apeboa pùeno, caiye ùi cùvaede jìni bojedacùnñume, ìni bojedacuyù nijibore, arejame Jesús.

**“Pápìcu uracure” járì dápìarì ne ðaràjiyepe aino**

<sup>47</sup>Apeno járì dápìarì ñuje ðaràjiyepe ainoque buedejame Jesús:

—Jùmenijicui jaboteinomu yópe papìcu uracu ne jaboáicu jia uradaì, obedivù moa ne coiyepe dicui. <sup>48</sup>Dicu buiyede, ina moa boaipòeva dicure nùvari, jabuborì écarùita, noi dobarì, járì beorì adaivubu caivù ina moa mearare ne pùeá jívui. Aru caivù ina àmenare jarùvaivubu na. <sup>49</sup>Nopedeca vaiquýebu ijàravù cùiyede. Ina ángeleva darì, járì beorì ìnajarama ina pòeva àmenare ina meara jèneboi. <sup>50</sup>Ina àmenare jaroràjarama toabo cùiméboi. Chioivù orì curàjarama nore. Aru jararì còpi cùajarama na, arejame Jesús.

**Bueiye mamae aru javeque máre**

<sup>51</sup>Yópe arì, jèniari járejame ñujare Jesús:

—¿Caiye iye jì coyuiyede mujare jápiarì eaivurù muja? arejame ñujare.

Aru arejacadà ùre:

—Jápiarì eaivubu ñuja, arejacadà.

<sup>52</sup>Que arì, Jesús arejame ñujare:

—Caivù ina Jùmenijicui yávaiye báquede bueipòeva bueivù baru Jùmenijicui jaboteiyede ùi pòevare yópe jì coyuiyepe, buenì buojaràjarama Jùmenijicui yávaiye báque javede aru Jùmenijicui yávaiye mamaene máre, cadatenajivù ina jápiaivure, ne majinajiyeye aivù aipe ðaiye jauròre. Nopedeca cùrami upacu davaibi ùi cùvae javequede aru mamaene máre ùi epeiye báquede ùi cùrami jívui, cadatecuyù diñamicavure ne ðaiyede, arejame Jesús.

**Jesús Nazarei ùi nùino**

(Mr 6.1-6; Lc 4.16-30; Jn 4.44)

<sup>53</sup>Caiye iye járì dápìarì ne ðaràjiyepe aiyede coyurìburu yóboi, nùrejame Jesús nore jocarì. <sup>54</sup>Copainùrejame ùi joboròi. Aru judíovai cójijiñami buedejame pòevare. Ùre jápiaivù cùcumari arejaima:

—¿Aroqueba caiye iye ùi majié aru iye ùi ðaiye pòeva ne ðarì majibede?

<sup>55</sup>¿Ñai àmeni jocure memeipòecui mácu? ¿Ico María àmicuco àmeni jípaco? ¿Ùi yóva àmeni Santiago, José, Simón, aru Judas máre? <sup>56</sup>¿Aru ùi yóròmiva máre cubedi majaque yui? Que baru, ¿ároqueba caiye iye ùi ðaiye ñai ùmu, majape páyù? jèniari járejaima na.

<sup>57</sup>Que arì, àmeina járejaima ùre. Ùbenita Jesúcapùravù náre arejame, ne ju abe boje ùre:

—Cubebi Jūmenijicui yávaivede coyucaipōecu ne pueðaimu ũi joborōcavu aru ũi cūramicavu máre, arejame.

<sup>58</sup> Aru obebejīe pōeva ne ðarī majibede ðarejame nore, ne ju abe boje ũre.

**Juan Bautista bácu ũi yaino**

(Mr 6.14-29; Lc 3.19-20; 9.7-9)

**14** <sup>1</sup> Dinumu ñai Herodes, ñuja Galilea āmicurijoborōcavu ñuje jabocu, jápiarejameða Jesúi borore. <sup>2</sup> Jápiayu, ũre memecaivre arejameða: —Ñaime Juan Bautista. Nacajacube yainore jaruvarī. Que baru yópe paruðube ũ, ũbenina arejameða.

<sup>3</sup> Nópe dápiarejameða Herodes, Juan Bautista bácu apūcure cāreja, ũi yaiquíye jipocai, Herodes ũi buoicōjeiye báque boje ũre. Aru buoicōjenejameða, jacocūyu āmeina teivure jēni jacoĩnami, yópe Herodei márepaco Herodíai urōpe. Nópe urejacoda, ōi jorojīye boje ũi āmecoroīye báquede Herodede, ũi cūvae boje ōre, ĩmacu Felipei márepacore. <sup>4</sup> Javede Juan Bautista bácu ávarejameða Herodede: “Jūmenijicui ðaicōjeiye Moisés bácu ũi coyūiye báque cūvaicōjemevu mure apēcui márepacore”, ávarejameða ũre.

<sup>5</sup> Herodecapūravu Juan Bautista bácu boarī jaruvaiyucuvacari, jidurejameða ina obedivu pōevare, “Jūmenijicui yávaivede coyucaipōecube Juan Bautista”, arī dápiaivre. <sup>6</sup> Ūbenita cūinájāravu ũi ārurijāravu eaiyede, Herodei pōetejāravu bácarōre, torojuve teino ðarejameða ũ. Dijāravure Herodíai máco nuri, uparejacoda caivu ina Herodei cutuimara ne jáiyede. Que teni Herodede pare cojuyarejacoda ō. <sup>7</sup> Que baru paruéque arejameða ōre:

—Jíquijivu mure yēde mī urōre. Yure ñājine ðajacurī Jūmenijicu, ji ðabedu yópe ji ainope, arejameða.

<sup>8</sup> Jípaco jēniaicōjenejacoda ōre. Aru ico nomió bojuyo arejacoda Herodede:

—Jíjacu yure carijīe Juan Bautistai jipobure jororuque, arejacoda ō.

<sup>9</sup> Ōi jēniainore jápiarī, chīorejameða ñai jabocu. Ūbenita ũi aiye báque boje paruéque ũi cutuimara ne jápiaiyede, jícaicōjenejameða ōre. <sup>10</sup> Boaipōecure jarorejameða āmeina teivure jēni jacoĩnami jívui, ũi burarī jaruvaquiyeye ayu Juan Bautistai jipobure. <sup>11</sup> Burarī buojarī, jororuque nuvari, jídejameða ico nomió bojuyore. Aru jídejacoda jípacore, ōi majicojiyepe ado Juan Bautista bácu jāve yaíyú bácu. <sup>12</sup> Aru Juan Bautista bácu bueimara nuvarejaimaða ũi baju bácarōre, jaruvarājivu cūracobe jívui. Que teniburu yóboi, coyurānurejaimaða Jesúre die borore.

**Jesús ũi āre ðaino cūinápūrupe paimil baju ũmūvare**

(Mr 6.30-44; Lc 9.10-17; Jn 6.1-14)

<sup>13</sup> Jesús diede jápiayu bácu, nore jocarī nurejame jiaðocūi, ina pōeva obedivure ðajocarī, pu pōecubenoita. Ūbenita nuñure majidejaimaða na. Aru mái ũi yóboi nurejaima na, obedivu ĩmaroacavu. <sup>14</sup> Ūi jataiyede, ēcarui mari, ina obedivu pōevare cōmaje āroje járejame Jesús. Nácavu ĩjimarare meaðarejame ũ. <sup>15</sup> Nainúta ñuja ũi bueimara ũi yebai nuri, coyurejacará ũre:

—Nainútamu majare yui pōecubenoī. Pōeva ne ārajiyede bojedarānuicōjeyacu mu. Noi ĩmajinoai jarorī, náre “Āranujara” ajacu mu, arīdurejacará Jesúre.

<sup>16</sup>Ñujare arejame:

—Ne ārājyede bojedārānuiye jaubevu náre. Jíjarā mǝja ne ārājyede, arejame ñujare.

<sup>17</sup>Ūre arejacarā:

—Páuboa cūinápurupe paiboa aru moa pucarā cǝvavu ñuja, arejacarā Jesúre.

<sup>18</sup>—Diede davajarā ji yebai, arejame Jesús.

<sup>19</sup>Dinumure cōriá puenora pōevare dobaicōjenejame Jesús. Aru die páuboa cūinápurupe paiboa aru moa pucarāre jēni, cavarōi jáñu, torojuede jídejame Jūmenijicure. Ūi cotavarīburu yóboi páuboare, ñuja ūi bueimara jídejarā diede ina pōevare, yópe Jesús ūi jícōjeiye báquipedeca ñujare. <sup>20</sup>Aru caivu āri, yapidejaima na. Āri bubarīburu yóboi, iye cotavaiye báquede, ne āri oabede, ĩni, meadarī, puebua doce paibua, judíovai puebuare, buivárejarā ñuja. <sup>21</sup>Aru ina āivu bácvu ūmva cūinápurupe paimil baju barejáima. Apevu, nomiva aru jueđova máre, ārejaima na.

### **Jesús ūi cuino oco puenora**

(Mr 6.45-52; Jn 6.16-21)

<sup>22</sup>Dinumu Jesús jatucōjenejame ñuja ūi bueimarare jiadocūi, ñuje nurajiyepa ayu ūi jipocai macajitabu urabu apeduvei. Que teni copaicōjenejameđa ina pōevare ne cūramiai. <sup>23</sup>Ne nuriburu yóboi, Jūmenijicure coyucunurejameđa cūinácva cūracūi. Noi ūi coyuiyede Jūmenijicunque, ñami marejávuya. <sup>24</sup>Dicū, ñuje jiadocū, macajitabu urabu coricai curejavū. Pācaiboa uraboa jarururejavū dicūre. Aru ūmevu cobarejavū ñujare. <sup>25</sup>Aru jāravucapūravui aviá ūi daquiye jipocai, Jesús curī macajitabu urabu puenora darejame ñuje yebai. <sup>26</sup>Ūbenita ñuja jáivu ū cuyure macajitabu urabu puenora, jidurivu baju codoboborejarā:

—¡Pōe decocu bácutame! arī codoboborejarā ñuja, jidurivu.

<sup>27</sup>Ūbenita maumena ñujare coyurī, arejame Jesús:

—Paruéque dápiajarā. Yútamu Jesús. Jidubejarā mǝja, arejame ū.

<sup>28</sup>Dinumuma Pedro arejame ūre:

—Mǝ, ji jabocu, jāve mǝ maru, yure daicōjejacu mi yebai, oco puenora, arejame ū.

<sup>29</sup>Aru Jesús arejame ūre:

—Dajacu, arejame.

Que jápiayu, Pedro etarejame dicūre jocarī. Aru vaivárejame oco puenora, nuriducuyu Jesús yebai. <sup>30</sup>Ūbenita ūmevu pare japuiyede jári, jidurejameđa ū. Jiducu, corī búrejame. Que baru codoboborejame:

—¡Mǝ, ji jabocu, cadatejacu yure! arejame.

<sup>31</sup>Maumejiena Jesús jabióvarejame Pedore ūi purui. Aru arejame ūre:

—¿Aipe teni jiducurū mǝ? ¿Aipe teni “Jesús meadacuyume yure”, abecurū mǝ? arejame Pedore.

<sup>32</sup>Ne jatuiyede dicū jiadocūi, ūmevu bíjarejavū. <sup>33</sup>Aru ñuja dicūi curivu mearore jídejarā Jesúre.

—Jāve mútamu Jūmenijicui mǝcu, arejacarā ūre.

### Jesús ũi meadaino Genesarecavu ijimarare

(Mr 6.53-56)

<sup>34</sup> Jatarĩburu yóboi, earejacadã Genesaret amicurijoborõi. <sup>35</sup> Aru dicũre jocarĩ etaiũu bacadũre, obedivu pœva coreovarejaima Jesũre. Que baru ũi borore jarorejaimada caino ne imaroai, ne davarãjiyepe aivu ijimarare. <sup>36</sup> Ũre jeniarejaima, jeni jãrajivu ũi cuitotecaje turuvarã. Aru caivu jeni jãivu meateivu barejãima na, ijimara mãcavu.

### Iye pœvare ãmeina tede ãaiye

(Mt 12.34; Mr 7.1-23; Lc 6.39)

**15** <sup>1</sup> Dinũmu fariseovacavu apevu Jũmenijicui yãvaiye báquede bueipœvauque, Jerusalén amicuriimarore jocarĩ daivu bacadũ, jãradarejaima Jesũre. Aru ũre yópe arĩ, jeniari jãrejaima:

<sup>2</sup> —¿Aipe teni mi bueimara ne puruãre cojabedi ne ãrajiye jipocai, Jũmenijicui me jãquiyepe aivu náre? Yópe ne ãiyede, majeñecuva mãcavu ne ãaicõjeiye báquede vainĩ tuyama na, arejaima.

<sup>3</sup> Jesús náre yópe arĩ, coyurejame:

—¿Mũja máre, aipe teni vainĩ tuivurũ Jũmenijicui ãaicõjeiyede, ãarãjivu yópe mijeñecuva mãcavu ne ãaicõjeiye báquede? <sup>4</sup> Jũmenijicu yópe aicõjenejaquemavu: “Mipacũre aru mipacore máre urĩ, ju ajarã. Ũbenita ñaine ameno coyũyũre jĩpacũre o jĩpacore máre, mije jabova boarĩ jarũvajarãri ũre”, arejaquemavu Jũmenijicu, ũi ne boje pœva ne cadatequiyepe ayũ nebucũvare. <sup>5</sup> Ũbenita mũja bueivubu yópe: “Cũinãcu pœcu jĩpacũre o jĩpacore ayũ baru, ‘Mũre cadateyu buojabevũ. Jĩ tãutũrare, mije jacopũjũroede, javeita jĩcacũ yũ Jũmenijicure’, ayũ bãjebu ũ. <sup>6</sup> Ñai pœcũre cadateiye jabevũ ũi bucũvare”, aivubu mũja. Que baru mije ãaiye boje yópe mijeñecuva mãcavu ne ãaicõjeiye báquede, Jũmenijicui yãvaiyede bojecũbede ãaivubu mũja. <sup>7</sup> Mũja, jũjovaivu, jãve Jũmenijicu, yópe arĩ, coyũcaicõjenejaquemavu ũi yãvaiyede Isãas bácuere mũjara:

<sup>8</sup> Ina pœva yũre ju adama ne jijecamunque. Ũbenita ãabema yópe jĩ urõpe. <sup>9</sup> Bojecubenoque mearore jĩniduyama yũre. Bueniduyama pœva ne bueinore Jũmenijicui yãvaiyepe, arejaquemavu.

Que arejame Jesús ina fariseovare aru ina Jũmenijicui yãvaiye báquede bueipœvare.

<sup>10</sup> Jesús orejarejame ina pœvare ũi yebai. Aru arejame náre:

—Caivu yũre jãpiaivu dãpiajarã. <sup>11</sup> Caiye iye ecoiye pœva ne jijecamui jedevauque amaina tede ãabevũ náre. Ũbenita caiye iye etaiye pœva ne jijecamure jocarĩ ne ũmeque amaina tede ãaivu náre, arejame Jesús.

<sup>12</sup> Dinũmũre ñũja, ũi bueimara, ũi yebai nũri, arejacadã Jesũre:

—Ina fariseova jorojĩñama mũre, ne jãpiaiyede mi coyũiyede, arejacadã ũre.

<sup>13</sup> Yópe arĩ, coyurejame ñũjare:

—Yópe jio upacui ñi jarũvaiyepe caiye amene bucũiyede ũi jioi, ũi oteiye báque amene, nopedeca jĩpacũ, cavarõ mearocacũ, ñi jarũvacũyũme ũre jocarĩ caivu ina ũre coyũcaipœvape teivũre ũbenina. <sup>14</sup> Náre cãrijovaicõjemejara mũja. Nãmu jãri eabevũpe paivu jipocateiyurivũ apevũre,

ubenita jāve ņamene caḁateni majibevu. Cūinācu jārī eabecu buojabebi nuñu mái apesu jārī eabecuque. Que baru caipucarā jārī eabevu baru, tujebu na cobei, arejame Jesús.

<sup>15</sup> Pedrocāpūravu arejame ūre:

—Coyuḁacu ñujare aipe aiyurōre yo jārī dāpiarī ñuje ḁarājiyepe ainore, arejame ū.

<sup>16</sup> Aru arejame:

—¿Muja máre jāpiarī coreóvabenaru? <sup>17</sup> ¿Coreóvabenaru caiye iye ecoiyede pōeva ne jijecamui jedevaque, ne yapibui earī etaiyede ne bajure jocarī? <sup>18</sup> Ubenita caiye iye etaiye pōeva ne jijecamure jocarī ne ūmeque, diedecabu, ne dāpiaye, āmeina tede ḁaiye náre. <sup>19</sup> Ne ūmei āmeina dāpiadama apevure. Boarī jaruvadama pōevare. Nomicurivuvacari apecoque cuma. O nomiva máre ūmucurivuvacari apecuque cuma. Nomicubevu, aru ūmucubevu máre, ḁadama caiyede āmeina ḁaiyede apevuque. Ņavadama apevu ne cūvaede. Borocuma apevui borore. Aru coyuyama āmenore apevui borore caivu ne jāpiayede. <sup>20</sup> Caiye iye āmene etaiye pōeva ne ūme jívūquede, āmeūme cūre ḁaivu náre. Ubenita ne āiyede ne puruáre cojabevuva, ḁabevu yópe mujeñecuva mácvu ne ḁaicōjeiye báquepe, āmeina tede ḁabevu náre, arejame Jesús.

### **Cūināco nomió, judíova āmevucaco, ōi ju aino Jesúre**

(Mr 7.24-30)

<sup>21</sup> Diīmarore jocarī, Jesús nurejame apejoborōi, Tiro aru Sidón āmicuriīmaroa yebai. <sup>22</sup> Aru cūināco nócaco, judíova āmevucaco, Canaán āmicuriyajubocaco, ūi yebai darī, yópe arī, codoboborejaco:

—Mu, ji jabocu, David bācui pāramecu, judíovai jabocu bacuyú, cōmaje āroje jājacu yure. Jímacobe abujucu ūi īmamo. Pare nājiñome ō, arejaco ō.

<sup>23</sup> Ubenita Jesúcapūravu bi ayu, yéde coyubedejame ōre. Aru ñuja ūi bueimaracapūravu Jesús yebai nuri, ūre jaroicōjenidurejacarā ōre.

—Maje yóboi codoboborī daibico ō. Que baru ōre copainure ḁajacu mu, arīdurejacarā.

<sup>24</sup> Jesús arejame:

—Jipacu Jūmenijicu daroibi yure, ji caḁatequiyepe ayu ñuja Israecavure quévura. Námu yópe ovejava mamateivupe paivu, náre coreipōecu cūvabevupe, arejame Jesús.

<sup>25</sup> Ubenita ō darī, ñuatutarī ūi jipocai, puedacodo ūre, arejaco:

—Mu, ji jabocu, caḁatejacu yure, arejaco.

<sup>26</sup> Jesúcapūravu arejame ōre:

—Meamevu īnu jueḁova ne āiyede, jínajivu yavimivare, arejame ū.

Que arī, aiyucu barejaquémavu judíovare Jūmenijicui mārāpe aru judíova āmevure yavimivape.

<sup>27</sup> Aru ōcapūravu arejaco:

—Mu, ji jabocu, jāve coyuvu mu. Ubenita yavimiva máre āḁama náre upacu jivu ne āri jaruvaiye tuiye báquede tuoivare jocarī, arejaco Jesúre.

<sup>28</sup> Jesús arejame:

—Mu, ji ūmo, urarō ju aḁobu yure. Que baru ḁacaivu mure yópe mi urōpe, arejame ōre Jesús.

Aru cūinā meatedejaquemavu ōi máco.

### **Jesús ūi meadaino obedivū ijimarare**

<sup>29</sup> Jesús nurejame nore jocarī. Vaidėjame macajitabū ūrabū Galilea āmicurijitabū ēcarūi. Aru cūracū ūracūi mūri nūriburu yóboi, dicū puenoi dobarejame ū. <sup>30</sup> Noi dobacūre, obedivū pōeva darejaima ūi yebai. Davarejaima cuiye majibevure, járī eabevure, pūru ijimarare, yávaiye majibevure, aru apevure máre. Náre jūarejaima Jesúi cūboba yebai. Aru náre meadarejame ū. <sup>31</sup> Que teni caivū ina obedivū pōeva cuicumarejaima ne jáiyede ina yávaiye majibevū bācavū yávaivure, ina ijimara māvavū meadaimarare, ina cuiye majibevū bācavū vaiváivure, aru ina járī eabevū bācavū jáivure. Aru caivū ina pōeva mearore jídejaima Jūmenijicure, maja Israecavū maje mearore jímure.

### **Jesús ūi āre đaino yóvaicuvaimil baju ūmūvare**

(Mr 8.1-10)

<sup>32</sup> Dinūmū Jesús órejurejame űūja ūi bueimarare ūi yebai. Aru arejame:

—Cōmaje āroje jáivū yū ina pōevare. Ina obedivū cuma yúque yóbecurijārvūa. Aru āiyede cuvabema. Apevū ne cūramia joarōtamu. Que baru copaicōjeiyubevū yū náre. Mái nūri, mamađajebu, ne āvūé űájiye boje, arejame Jesús.

<sup>33</sup> űūjacapūravū jēniari jářejacarā ūre:

—¿Ari earājidica űūja āiyede yui pōecūbenoi, jínajivū caivū ina obedivū pōevare? arejararā űūja.

<sup>34</sup> Jesúcapūravū jēniari jářejame űūjare:

—¿Aipino páuboare cuvarārū muja? arejame ū.

Aru arejararā:

—Siete paiboabu. Aru obebejīna moajinare máre cuvavū, arejararā.

<sup>35</sup> Que aiyede, ina pōevare dobaicōjenejame joborōi. <sup>36</sup> Diboá páuboa siete paiboare ĩni, aru ina moajinare máre ĩni, torojuede jídejame Jūmenijicure. Ūi cotāvarīburu yóboi páuboare, űūja ūi bueimara jídejacarā diede ina pōevare, yópe Jesús ūi jícōjeiye báquepedeca űūjare. <sup>37</sup> Que đaiyede, āri yapidejaima caivū. Aru āri bubarīburu yóboi, iye cotāvaiye báque páu aru moa máre, pōeva ne āri oabede ĩni, meadarī, pueá siete paipuea, judíova āmevū ne pueáre, buivářejacarā űūja. <sup>38</sup> Ina āivu bācavū ūmūva yóvaicuvaimil baju barejāima na. Aru apevū, nomiva aru jueđova máre, ārejaima na. <sup>39</sup> Jesús ūi copaicōjeniburu yóboi ina pōevare ne cūramiai, jiadocūi jaturī, nūřejacarā ūque apejoborōi, Magadān āmicurijoborōita.

### **Fariseovacavū aru saduceovacavū ne jēniaino pōeva ne đarī majibede**

(Mt 12.38-39; Mr 8.11-13; Lc 11.16, 29; 12.54-56)

**16** <sup>1</sup> Apevū fariseovacavū aru saduceovacavū máre jujovaiyurādjarejaima Jesús yebai. Jēniarejaima ūi jáđovaquiyepe aivu náre pōeva ne đarī majibede, cavarō mearo Jūmenijicūi cūrōquede. <sup>2</sup> Jesús, yópe arī, coyurejame náre:

—Aviá ūi doiyede, “Ocopenibobu jūaripenibo. Que baru javena meajārvū baquiyébu”, aiyavū muja. <sup>3</sup> Aru aviá ūi cōaiyede, “Ocopenibobu

jüaripenibo. Que baru cari jāravü ocaquiyebu”, aiyavü müja. Cavarôquede coreóvaivüvacari, übenita pare coreóvabevübu müja ijāravüi vaiyede. <sup>4</sup>Müja ämena bajutamu, dajocaiyüriü Jümenijicüre yópe nomió ämeço öi dajocaiyepe jímarepacüre jocarí. Müjarecabu jëniariduivü jádovaiye põeva ne ðarí majibede. Übenita jámenamu müja apenore Jümenijicüi ðainore müjare, quénora yo Jonás mácüre vaino mácaröre, arejame Jesús.

Que arí, náre dajocarí nürejame ü.

### **Fariseova ne ämeno dápiaye**

(Mt 14.17-21; 15.34-38; Mr 8.14-21; Lc 12.1)

<sup>5</sup>Jataivü bácvü macajitabü urabü apedüveita, nüja Jesüi bueimara coreóvarejacadá ärumeteivü bácvü páure. <sup>6</sup>Jesús arejame nüjare:

—Me ðajará. Me jájara ina fariseova aru ina saduceova máre ne páure bucúovare ðaiyede, arejame ü.

<sup>7</sup>Que teni yávarejacadá nüje bajumia:

—Ü yópe aibi, maje páure cuvabe boje, arejacadá.

<sup>8</sup>Übenita Jesús coreóvarejaquemavü nüje yávainore. Que baru arejame:

—¿Aipe teni yure ju abenaru müja? ¿Aipe teni coyüivürü müja, “Páure cuvabevü maja” aivü? <sup>9</sup>¿Coreóvabenaru müja? ¿Aru ärumenaru müja? ¿Ji cotüvacaiye báquede cüinápürupe paiboa páuboare ina cüinápürupe paimil baju ümüvare, doce paibua puebua baju cotüvaiye báqueque imetecarärü müja? <sup>10</sup>¿Aru ji cotüvacaiye báquede siete paiboare ina yóvaicüvaimil baju ümüvare, siete paipüea baju cotüvaiye báqueque imetecarärü müja? <sup>11</sup>Que baru müjare jauéde, müje ärajiyede, jíyü majivü yü. Übenita, “Me jájara ina fariseova aru ina saduceova máre ne páure bucúovare ðaiyede” ji ainore, coyübetevü yü páure. Quénora coyüyübu yü ne dápiayede. Que baru me jájara, müje dápiabenajiyeye aivü yópe ne dápiayeye, arejame nüjare Jesús.

<sup>12</sup>Dinümü coreóvarejacadá coyüyüre ina fariseova aru ina saduceova máre ne bueiyede. Yópe páure bucüre ðaiye jívaiyepe, caiye iye páu ðaiyede, nopedeca ne bueiye jáve ämeque jujovaðama obedivü põevare, arejame Jesús.

### **Pedro üi “Cristobu mü” aino**

(Mt 14.1-2; 18.18; Mr 6.14-15; 8.27-30; Lc 9.7-8, 18-21; Jn 6.68-69; 20.23)

<sup>13</sup>Jesús, üi caiyede Cesarea de Filipo ämicüröi, nüja üi bueimarare jëniari járejame:

—¿Aipe aidi põeva yure, Jümenijicüi daroimü mácüre ümüpe? arejame ü.

<sup>14</sup>Üre arejacadá:

—Apevü aðama, “Juan Bautistabe”. Aru apevü aðama, “Elíabe”. Aru apevü aðama, “Jeremíame”. Aru apevü aðama, “Cüinácü Jümenijicüi yávaiyede coyücaipöecube ü”, arejacadá üre.

<sup>15</sup>Aru arejame nüjare:

—¿Übenita aipe aivürü müja yure? arejame Jesús.

<sup>16</sup>Aru Simón Pedro arejame üre:

—Mü Jümenijicüi daroimü mácvü, nüjare jabotecüyü. Cristobu mü. Jümenijicu apücvü mácvü mü, arejame Pedro Jesúre.

<sup>17</sup>Aru Jesúcapüravü, yópe arí, coyürejame Pedrorre:

—Му, Симón, Jonái mácu, torojucnyumu мѹ. Jūmenijicui mearo đacaimumu мѹ. Pōecu cubebi coreóvare đayū mure diede. Quénora jipacu, cavarō mearocacurecabe coreóvare đayū mure diede. <sup>18</sup> Соууѹбу мѹре: Ми āmiámu Pedro. No āmiá cūravacarō aiyūrōmu. Mi соуѹѹебу уѹре уóре cūrava űrava parurivape paiye cūrami cāchinoi. Caivu ju aivure уѹре, aru caivu ju arājivure уѹре máre, соуѹѹе јавуу уѹре ми соуѹѹеје је paiye. Aru caivu ina yaibénajarama ne űmei. Que baru coatebenajarama Jūmenijicure јаруварѹ. <sup>19</sup> Уóре ѱаѹ cūvacu cūramine voainore, llavede, űi ecoicōjeiyepe pōevare diñamine, nopedeca соуѹicōjeivu мѹре јѹ yávaiye méne pōevare, ne ecorājiyepe аѹ Jūmenijicui јаботеиноре, diede ne ju aru. Mi јасоѹбемараре јјаравѹ јасоѹбесѹѹме Jūmenijicu cavarō mearo űi cūrōi. Aru mi јасоѹѹмараре јјаравѹ јасоѹѹсѹѹме Jūmenijicu cavarō mearo űi cūrōi, arejame Jesús.

<sup>20</sup> Aru paruéque ѱјаре “Jesúbe ѱаѹ Cristo, Jūmenijicui daroimu mácu”, аѹ соуѹicōjemenejame apevure.

### Jesús űi соуѹино űi yaiquínore

(Mt 10.38-39; 25.31; Mr 8.31–9.1; Lc 9.22-27; 14.27; 17.33; Jn 12.24-25; Ro 2.6)

<sup>21</sup> Dinumumata Jesús јáđovari búrejame ѱја űi bueimarare ѱájicunucyure Jerusalén āmicurīmaroi. Yópe аѹ, buedejame ѱјаре:

—Јавуу уѹре űrarō јѹ ѱájiquino. Ina judíova bucūva, aru sacerdotevare јаботеѹpōeva, aru Jūmenijicui yávaiye báquede bueipōeva máre уѹре ѱájine đarājarama. Yure boarī јаруварājarama. Aru yóbescuјјаравѹа yóboi nacajacnyumu уѹ yainore јаруварѹ, аѹ соуѹрејаме ѱјаре.

<sup>22</sup> Pedro űre űvarejame apevu ѱјаре јосарѹ. Aru yópe аѹ, јарарѹdurejame Jesúre:

—ѹМу, јѹ јабосѹ, ми que aiyepe vaicōjemejacurī мѹре Jūmenijicu! arejame Pedro.

<sup>23</sup> Ŭbenita Jesús copedini, arejame Pedrore:

—Му, Satanás, јујоварѹdubejacu уѹре. Њјасѹ му уѹре јосарѹ. Мѹrecabu маусѹvacu уѹре ми nópe айеque. Dápiavū мѹ pōevape. Aru dápiabevū мѹ Jūmenijicu јiede, arejame Jesús.

<sup>24</sup> No yóboi Jesús, yópe аѹ, соуѹрејаме ѱја űi bueimarare:

—Ácu pōecu daiyucu yúque, dajocajacurī pōeva ne mearo јáiyede űre, сѹејејасѹѹѹ уѹре yóvaiyede, aru јidubejacurī űi ѱájiquiyede. Nópe đabecu baru, ű buojabebi јѹcu bacuyú. <sup>25</sup> Њаѹ pōecu űi јаву űrōpe đarī, meadaiyucu baru űi јажуре, coatecyume űi јажуре Jūmenijicure јаруварѹ, уópe yaiyú bácupe űi űmei. Ŭbenita ѱаѹ pōecu, “Ye јаву āmevu, јѹ yaidú Cristore boje” аѹ, űi јаву űrōpe đabecuva quénora јѹ űrōpe đarī, űrecabe јѹ meadaquimu, сѹсѹѹ Jūmenijicuque cainumua. <sup>26</sup> Њаѹ pōecu сѹvacu baru caiye јјаравѹquede, űbenita бјјаву baru űi űmene, ѱájicuyume cainumua toabo cūiméboi. <sup>27</sup> Que teni уѹ, Jūmenijicui daroimu mácu űmupe, meacu јаву dacyumu јѹpacu mearoque aru јѹ ángelevaque, боједасѹѹ caivu pōevare уópe ne đaiyepe. <sup>28</sup> Јáve соуѹѹбу мјјаре: Ареву сѹрѹвѹ yui, ne yainájiye јѹпосаѹ јárajarama уѹре, Jūmenijicui daroimu mácupe űmupe, јаботеуѹре, arejame ѱјаре Jesús.

### Jesús ñi baju oatuvaino

(Mt 3.17; 11.14; 12.18; Mr 1.11; 9.2-13; Lc 3.22; 9.28-36; 2 P 1.17-18)

**17** <sup>1</sup>Seis pajjáravua yóboi, Jesús ñavarejameđa Pedroke, aru Santiagore, ñmacu Jüare máre. Jipocatedejameđa náre cüracü ñmujuricü puenoi, apevure jocarí. <sup>2</sup>Aru na járejaimađa ñi oatuvaiye me bajure. Ñi jiva pëorejavüya, yópe avia ñi pëoiyepe. Ñi cuitótecaje máre pëorejavüya, pare boricaje yópe miadárope. <sup>3</sup>Aru járorejaimađa Elías Moisémaque. Núrejaimađa boroteivu Jesúque. <sup>4</sup>Aru Pedro arejameđa Jesúre:

—Mu, ji jabocu, mearotamu ñuje curu yui. Mi uru, ñacaquijivu yu yóbecuriñamia cüramia quíjñamia maquiyéde. Cünáðami mĩñami maquinóre, aru apedãmi maquinóre Moiséde, aru apedãmi maquinóre Elíare ñacaquijivu yu, arejameđa Pedro.

<sup>5</sup>Ñi coyuiyedeca, ocopenibo miadáripenibo ñmeni, taorejavüya náre. Aru jápiarejaimađa apeno yávainore, ocopeniboi etaiyede: “Ñaime jímacu, ji umu. Me torojuvu yu ñre. Que baru jápiajarã ñi coyuiyede”, arejaquemavu Jümenijicu.

<sup>6</sup>Ina yóbecurã Jesúi bueimara ne jápiaiyede diede, jidurí, mori turejaimađa jaborói. <sup>7</sup>Ñbenita Jesús ne yebai nuri, náre tuorí, arejameđa:

—Nacajajara muja. Jidubejarã, arejameđa Jesús.

<sup>8</sup>Ne jáiyede, járejaimađa Jesúre cünácura. <sup>9</sup>Aru ñmeni daiyede dicü cüracüre jocarí, Jesús apevure coyucójemenejameđa náre ne jáino mácaröre. Yópe arejameđa:

—Me jápiajarã muja. Coyubejarã apevure no muje jáino mácaröre cüracü ñmujuricü puenoi pu ji nacajariburu yóboita yainore jaruvarí. Yábu Jümenijicui daroimu mácu ñmupe, arejameđa náre Jesús.

<sup>10</sup>Aru ina ñi bueimara, coreóvaivu ñre Jümenijicui daroimu mácu, ñre jëniari járejaimađa:

—¿Aipe teni aivuba ina Jümenijicui yávaiye báquede bueipöeva, “Mamarumu Elías dacuyume, ñai Jümenijicui daroimu ñi daquiye jipocai”? arejaimađa na.

<sup>11</sup>Aru Jesús arejameđa náre:

—Jãve Elíarecabe meadacudacuyu caiyede, Jümenijicui daroimu ñi daquiye jipocai. <sup>12</sup>Jave dáme Elías, ayubu yu mujare. Ñbenita pöeva ñre coreóvabeteima na. Quéнора ne uröpe ñaima ñre. Quédecabu yure, Jümenijicui daroimu mácu ñmupe. Yure máre pöeva ñáñine ñarãjarama, arejameđa Jesús.

<sup>13</sup>Dinũmure ina ñi bueimara coreóvarejaimađa ñi coyuiyede náre Juan Bautista bácu.

### Jesús ñi meadaino juedocure, abujucu ñi ñmamure

(Mt 21.21; Mr 9.14-29; 11.23; Lc 9.37-43; 1 Co 13.2)

<sup>14</sup>Jesúja ne eaiyede obedivu pöeva yebai, cünácu ñmu nurejame Jesús yebai. Ñuatutari ñi jipocai, pueðacuyu ñre, arejame:

<sup>15</sup>—Mu, ji jabocu, cõmaje ñroje jájacu jímacure. Bidini, aru aburi etarí ñi jijecamure, pare ñájimi ñ. Apenumua tuibi toaboi. Aru apenumua jiai turí coibi ñ. <sup>16</sup>Ñre davavu yu mi bueimara yebai, ñbenita meadaiye majibetema na, arejame Jesúre.

<sup>17</sup> Jesús arejame:

—Muja, ijāravucavu, Jūmenijicure ju abevu aru āmeina teivū märe, ¿aipijāravua cuquidi yu mujaque? ¿Aru aipijāravua ñājiquidi yu mujaque, muje ju arājiyepe ayu ji coyuiyede? Davajacu mīmacure ji yebai, arejame Jesús.

<sup>18</sup> Que teni Jesús ñai abujucure jararī, jaetovarejame juedocure jocarī. Aru maumejiena meatedejame ũ.

<sup>19</sup> Que ñarīburu yóboi, ñuja ũi bueimara jēniari járe nurejacadā Jesúre cūinácura, yópe arī:

—¿Aipe teni ñuja jaetovarī majibetedi ñai abujucure? arejacadā ñuja.

<sup>20</sup> Aru Jesús arejame ñujare:

—Quíjino muje ju aipe boje yure, que baru jaetovarī majibetevu muja. Jáve coyuyubu mujare: Oteiyabe mostaza āmicuriyabe quíjiyabetamu. Ũbenita pīarīburu yóboi, jocucu uracutam. Nopedeca muje ju aru yure quíjino, nópe quíjiyabe oteiyabepe, Jūmenijicu urarō mearore ñajebu mujare. Muja me ju aivu Jūmenijicure muje cōjenu icū cūracū uracūre yópe: “Ñujacū yore jocarī pu ānoita”, dicū ju ajebu muje cōjeiyede. Jáve ju aivu baru yure, caiye ñajeyede majinajaramu muja. <sup>21</sup> Jūmenijicure jēniaiye jaevu āmevua āiyede, abujucu ñaipe páyure muje jaetovarājiyepe aivu, arejame ñujare Jesús.

### **Jesús ũi coyuiño cojedeca ũi yaiquínore**

(Mr 9.30-32; Lc 9.43-45)

<sup>22-23</sup> Ñuje cōjijiyedeca Galilea āmicurijoborōi, Jesús, yópe arī, buedejame ñujare:

—Yure, Jūmenijicui daroimu mácure ũmupe, jēni jínajivubu ji mauvare, ne boarī jaruvārājiyepe ayu yure. Aru yóbecurijāravua yóboi, Jūmenijicu nacovacuyume yure yainore jaruvārī, arejame Jesús.

Ũi nópe aiyede, pare cārijivu barejacará ñuja.

### **Jūmenijicui cūramine coreivu ne pōevare jīcaicōjeino tāuturare**

<sup>24</sup> Ñuje copaidaiyede Capernaum āmicurīmaroi, Pedro yebai darejaimada ina Jūmenijicui cūramine tāutura ícaipōeva. Ũre jēniari járejaimada, yópe arī:

—¿Jíbedi ñai mi bueipōecu tāuturatavare, Jūmenijicui cūramine meadaiye boje? arejaimada.

<sup>25</sup> Aru Pedro ju arejamedā náre:

—Jájū, jíbi ũ, arejamedā.

Aru cūrami copaiyede, mamarumure Jesús jēniari járejamedā ũre, yópe arī:

—Mu, Simón, ¿aipe dápiayurū mu? ¿Ñamene jocarī tāuturare ñi ijāravucavu jabova? ¿Ñi ne jaboteimarare jocarī o ajevure jocarī? arejamedā Jesús.

<sup>26</sup> Pedro arejamedā:

—Tāuturare ñnama ajevure jocarī, arejamedā.

Jesús arejamedā:

—Que baru ne jaboteimarare jíye jaubevu tāuturare ne jabovare. Quédeca tāuturare jíye jaubevu yure, Jūmenijicui mácure, ne meadarājiyepe jipacui

cūramine. <sup>27</sup>Ūbenita ne jorojīmenajiyeye majare, jajovacūñjascu mū macajitabu űrabu ěcarui. Ñai mamarūmū mi ĩmū moacu űi jijecamure voarī, eacuyūmu mū cūināturava tāuturaturavare, jīcacuyū yure aru mure märe. Diturava cūināturu baquiyébu maja pucarā majare jíye jaué Jūmenijicui cūramine meadaiyede, arejamedā Jesús.

Aru yópe Jesús űi ñaicōjeiyepe ñarejamedā Pedro.

### **¿Ñamema parucu maje jēnebore?**

(Mr 9.33-37; 10.15; Lc 9.46-48; 18.17; 22.24)

**18** <sup>1</sup>Dinūmure ñuja, űi bueimara, nurejacadā Jesús yebai. Aru jēniari járejacadā űre:

—¿Ñamema parucu apecu pueno Jūmenijicui jaboteinore? arejacadā.

<sup>2</sup>Jesús őrejarejame cūinācu juedocure. Nūvarejame űre ñuje coricai. <sup>3</sup>Aru arejame:

—Jāve coyuyūbu mujare: Juedova “¿Meara mārīca ñuja?” arī dāpiabevūpe dāpiajarā muja. Oatuvabevū baru muje dāpiayede, Jūmenijicui jaboteimara teivū buojabenajaramu muja. <sup>4</sup>Ācu pōescu “¿Meacu bārīca yū?” abecu baru, yópe ñai juedocupe, űrecabe parucu apecu pueno Jūmenijicui jaboteinore. <sup>5</sup>Cūinācu pōescu copu etayu baru cūinācu juedocure ji āmiái, ji cōjeiyepe, que ñayu copu etaibi yure, arejame Jesús.

### **Jidojarō maje āmeina teino**

(Mt 5.29-30; Mr 9.42-48; Lc 17.1-2)

<sup>6</sup>Ñujare yópe arī, buede nurejame Jesús:

—Ācu pōescu űi āmeina tede ñaru apecu yure ju ayure parubecureca, űi dajocaquiyeye ayū űi ju aiyede yure, meajebu űre jarūvaru űi ñamemui buorī cūinābo cūrabo űraboque jia űrañai. <sup>7</sup>Chīorī āmeno ñājīnajarāma ina ijaravūcavū jujovaiyū apecure, ne āmeno ñarājiyepe aivū. Jāve jujovarājarāma mujare. Ūbenita ñai jujovare ñayu apecure chīorī āmeno ñājīcuyūme ű. <sup>8</sup>Aru mū āmeno ñayu baru mi purūque o mi cubobaque, burarī jarūvajacu dipurure o dibare. Meaquiyebu mure, mi earu Jūmenijicui curōi cūināpurūque o cūināba cubobaque. Ūbenita meamequiyebu mure, mi nuru toabo cūiméboi caipūcapūruaque o caipūcaba cubobaque. <sup>9</sup>Aru mū āmeno ñayu baru mi yacoruque, ĩni jarūvajacu didure. Meaquiyebu mure, mi earu Jūmenijicui curōi cūināru yacoruque. Ūbenita meamequiyebu mure, mi nuru toabo cūiméboi caipūcarua yacoruque, majicarī arejame Jesús.

### **“Oveja mamateyure” jári dāpiarī ne ñarājiyepe aino**

(Lc 15.3-7; 19.10)

<sup>10</sup>Jesús, yópe arī, buedejame bedióva cojedeca juedovarā:

—Cavarō mearo Jūmenijicui curōi ina ángeleva juedovare coreivū cuma cainūmua Jūmenijicui jivateinoi. Que baru cūinājicu ina juedovacacure ye āmeina jāmejara muja. Yéde āmeina ñabejarā cūinājicure. <sup>11</sup>Yū, Jūmenijicui daroimū mācu űmūpe, meadacūdaivū ina bījare ñaivure Jūmenijicure jocarī. <sup>12</sup>¿Aipe dāpiaivurū muja iye ji coyūquiyede mujare? Cūinācu űmū, ovejavare coreipōescu, cuvacu baru cien paivū ovejavare, aru cūinācu nācacu űi mamatedu, ñai dajocajebu ina noventa y nueve paivū ovejavare cūracūai,

vocuñu ñai bíjayu bácare. <sup>13</sup>Aru jáve coyuñubu mujare: Eayn baru ñai mamateyu bácare, torojubeu éque ina noventa y nueve paivu mamatebevu pueno. <sup>14</sup>Quédeca cūinájicu ina quíjinacacu ñi bíjaiyede ñbebi jipacu cavarō mearocacu, arejame Jesús.

**Aipe ārumeteiye jaurō majecu ñi āmeina ñaiyede**

(Mt 16.19; Lc 17.3-4; Jn 20.23)

<sup>15</sup>Yópe arī, buedejame ñujare Jesús:

—Apecu ñi āmeina ñaru mure, apevu ne jápiabenoí coyuñacu ére ñi āmeina ñaiyede. Mi coyuñyede jápiaru, ārumetejacu ñi āmeina ñaiyede. Aru cārijimene ñajarā mña. <sup>16</sup>Ūbenita mi coyuñyede jápaiyubedu, ñavajacu ñi yebai cūinácu mujecure, ñi majiquiyepe ayu, o pucarā mujevure, ne majinaiyepe ayu, aipe mi coyuñyede ére aru aipe ñi coyuñyede mure máre, ne majicarājiyepe ayu ére. <sup>17</sup>Ne coyuñyede máre jápaiyubedu, coyuñacu ñi āmeina ñaiyede caivu ina yure ju aivure ne cójijinoi. Aru ne coyuñyede máre jápaiyubedu, ñajacu ére yópe mi ñaiyepe ina judíova āmevure aru ina jabovare tāutura ícaipōevare. <sup>18</sup>Jāve coyuñubu mujare: Caivu mña jacopubemarare ijāravui jacopubecuyume Jūmenijicu cavarō mearo ñi curōi. Aru caivu mña jacopuimarare ijāravui jacopucuyume Jūmenijicu cavarō mearo ñi curōi.

<sup>19</sup>Bedíova cojedeca coyuñubu mujare: Pucarā mujacavu cūináturu baru mña ūmei, mña jēniaiyede jipacu cavarō mearocacure, ūcapūravu ñacuyume yópe mña jēniaiyepe. <sup>20</sup>Pucarā o yóbecurā ne cójijidu, jēniarajivu ji āmiái, ji paruéque, yávacari cuvū ne jēneboi, arī buedejame Jesús.

<sup>21</sup>Dinūmure Pedro jēniari járejame Jesúsre:

—Mu, ji jabocu, ñaiyiye baju majecu ñi āmeina ñaiyede yure ārumeteji? ¿Siete baju ñi āmeina ñaiyede ārumeteji? arejame Pedro.

<sup>22</sup>Aru Jesús arejame ére:

—Siete baju abevū yu. Quénora corevabecuva ārumetejacu ñi āmeina ñaiyede cainumua, arejame Jesús.

**“Memecaipōecu ārumeteiyubecure apecu ñi āmeina ñaiyede” jári dápíarī ne ñarājiyepe aino**

<sup>23</sup>Yópe arī, buedejame Jesús, jári dápíarī ne ñarājiyepe ayu, pōeva ne ārumetenaiyepe ayu apevure ne āmeina ñaiyede:

—Jūmenijicui jaboteino yópebu cūinácu jabocu meadaiyucu ére memecaivu ne bojecube ñaiyede. <sup>24</sup>Ūi corevarī buiyede, apevu davaquemavu ñi yebai cūinácu ére memecaipōecure, bojecube ñayure obedimillones tāuturare. <sup>25</sup>Ūi bojecube ñaiyede ye bojedayu buojabetequemavu. Que baru ñai jabocu, yebacavupe teni, bojedaicōjequemavu ére, aru jímarepacore, aru némarare máre. Caiye ne cūvaede máre bojedaicōjequemavu, ícuyū ñi bojecube ñaiyede. <sup>26</sup>Ñai memecaipōecu pueðarī ñai jabocure, ñuatutaquemavu ñi jipocai. “Mu, ji jabocu, napijacu yure. Aru caiyede bojedacuyumu mure”, aquemavu. <sup>27</sup>Que baru ñai jabocu, cōmaje āroje jári, ārumetequemavu caiye iye ure bojecube ñaiyede. Aru jodeicōjequemavu ére.

<sup>28</sup>Ūbenita ñai memecaipōecu etayu bácu, apecu memecaipōecu ñi yóvaimure copuquemavu. Ñai ñi copuimu majiéda bojecube ñaiquemavu

úre, obebecentenares tauturare. Ñai ñi copuimure ñi ñamemui jēni, yaiváiyuríduquemavu úre. “¡Mi bojecube daiyede jįjacu yure!” aquemavu. <sup>29</sup>Que ðayure, apecu ñuatutaquemavu ñi jipocai. “Napijacu yure. Caiyede bojedacuyumu mure”, aquemavu. <sup>30</sup>Ubenita apecu jįpiaiyubetequemavu úre. Quénora jaruvaicōjequemavu úre ãmeina teivure jēni jacoĩnami jįvui, pu ñi bojedaiyeta caiye iye bojecube daiyede. <sup>31</sup>Apecu ñai jabocure memecaivũ ñi daiyede jįri, chĩori, coyurānuquemavu diede ne jabocure. <sup>32</sup>Ne coyuiyede ñi jįpiarĩburu yóboi, ñai jabocu órejaicōjequemavu ñai ñi ārūmeteimũ mácure. Aru aquemavu: “¡Āmecũ bajutamu mũ! Yúcapūravu ārūmetevũ caiye iye mi bojecube daiye báque urarō bajure, mi jēniaiye báque boje yure. <sup>33</sup>Que baru mure máre, cōmaje āroje jįiye jaũvũ mícure, yópe ji cōmaje āroje jįiyepe mure”, aquemavu. <sup>34</sup>Pare jarayũ, ñai jabocu ãmeina teivure jēni jacoĩnami coreipōevare nuvaicōjequemavu úre, ñi nįjiquiyepe ayũ, pu ñi bojedaiyeta caiye iye bojecube daiyede, arejame Jesús.

<sup>35</sup>Aru arejame Jesús:

—Quédeca ðacuyume mujare jįpacu, cavarō mearocacu, muje ārūmetebedu mujecure ñi ãmeina daiyede, arejame ñujare, majicayũ Jesús.

### Jesús ñi bueino nomi jaruvainore

(Mt 5.31-32; Mr 10.1-12; Lc 16.18; 1 Co 7.10-11)

**19** <sup>1</sup>Jesús caiye iyede coyurĩ buojari, nurejame Galilea āmicurijoborōre jocarĩ. Aru ecorejame Judea āmicurijoborōi, Jordán āmicuriya jia apeduvei. <sup>2</sup>Obedivũ pōeva darejaima ñi yóboi. Aru noi ijimarare meadarejame. <sup>3</sup>Fariseovacavũ máre nurejaima ñi yebai. Úre jujovaiyurivũ, jēniari jįrejaima:

—¿Cũinācu ũmu jaruvayũ baru jįmarepacore, apejĩ ōi ðaiye boje, ðaidi yópe maje ðaicōjeiyepe? arejaima na.

<sup>4</sup>Jesús arejame náre:

—Jāve buedavũ muja. Mamarumure Jūmenijicu cuedarejaquemavu caiyede, “Ūmu macuyúre aru nomió macodóre máre ðarejaquemavu Jūmenijicu”. <sup>5</sup>Aru arejaquemavu: “Que baru caride ácu pōecu, jįmarepaco bacodó cuvacyũ, ñi bucuvare dajocacyume. Aru jįmarepacore cuvari, ómaque cūinávupetamu na Jūmenijicui jįinore”. <sup>6</sup>Que baru pucarā āmema. Quénora cūinávupetamu na. Que baru pōecu Jūmenijicui cójijovaimara mácavure coavabejacurĩ ũ, arĩ buedejame Jesús.

<sup>7</sup>Jesúre jēniari jįrejaima na:

—¿Aipe teni Moisés bácu jįcōjenejaquemari jįmarepacure cūináyoca, “Mure jaruvayubu yũ” aiyocare, jįmarepacore? arejaima.

<sup>8</sup>Aru Jesús arejame náre:

—Moisés bácu jaruvaicōjenejaquemavu mujare mujemarepacore, muje Jūmenijicui ðaicōjeiyede jįpiaiyube boje. Ubenita mamarumumata nópe āmenejaquemavu. <sup>9</sup>Aru yúcapūravu coyuyubu mujare: Ácu pōecu jįmarepacore ãmeina ðabecoreca jaruvarĩburu yóboi purubuoyn baru apecoque, ãmeina ðaibi óre ñi mamarumucacore jaruvari, arejame Jesús.

Nópe ayũ, “Nomi jaruvainore ubevũ yũ”, aiyucũ barejaquémavu Jesús.

<sup>10</sup>Que ayure, ñuja ñi bueimara arejacrā úre:

—Nópe mi coyuiyepe baru, meamequiyebe purubuoie majare, arejacrā.

<sup>11</sup> Ëbenita ñujare yópe arí, coyurejame Jesús:

—Caivu pōeva cūin ácu va curivu majibema. Quénora na quévura Jūmenijicui torojure ðaimara curivu cūinácva coapa majima na. <sup>12</sup> Apevu pōeva nomicurí, ãmucurí máre, buojabema, ne nópe pōeteiye báque boje. Que baru purubuoabema na. Aru apevu pōeva ne baju buraicōjeiye boje, nomicurí buojabema na. Que baru purubuoabema na. Aru apevu pōeva ne baju burabevuacari, buraivu bácuve paivu tedama na, ne memecarājiye boje Jūmenijicure cainumua ñi jaboteinore. Que baru na máre purubuoabema, ne baju nópe ðaiyue boje. Ácu pōecu Jūmenijicure torojure ðaimu cūcu cūinácva, que ðajacurí ñi, arí buedejame Jesús.

**Jesús ñi mearore jino jueðovare Jūmenijicue**

(Mr 10.13-16; Lc 18.15-17)

<sup>13</sup> Pōeva davare cuivu barejáima némarare Jesús yebai, ñi tuoquiyepa aivu náre ñi puruáque, ñi jēniayede Jūmenijicue náre boje. Que teni ñuja ñi bueimara davaicōjemenidurejacarā némarare. <sup>14</sup> Ëbenita Jesús arejame:

—Ina jueðova dajarāri ji yebai. Jūmenijicu jabotecuyume pōevare nápe paivure. Que baru, “Davabejarā jueðovare”, abejarā náre, arejame Jesús.

<sup>15</sup> Aru náre coapa tuorí ñi puruáque, jēniarejame Jūmenijicue náre boje. Que teniburu yóboi, nurejacarā ñuja, Jesúja.

**Cūinácu bojuyo cuve cuvacu Jesúmaque ne boroteino**

(Mt 20.16; 25.31; Mr 10.17-31; Lc 13.30; 18.18-30; 22.30)

<sup>16</sup> Cūinácu bojuyo, Jesús yebai nuri, jēniari járejame:

—Mu, bueipōecu meacu, ¿aipe ðaiye me jauri yure, cuvacuyu járavu cūiméjáravu baquinóre cavarō mearo Jūmenijicui curí? arejame ñi.

<sup>17</sup> Jesús arejame ñre:

—¿Aipe teni jēniari jáñuru mu yure ðaiye ména? Cūinácuvabe meacu baju. Jūmenijicuvacari. Cuvaiyucu baru járavu cūiméjáravu baquinóre, ðajacu yópe Jūmenijicui ðaicōjeiye, arejame Jesús.

<sup>18</sup> —¿Ádeba ðaicōjeiye? jēniari járejame.

Aru Jesús arejame:

—Pōevare boarí jaruvabecacu. Cuvabecacu apcore mimarepacore jaruvarí. Ñavamejacu apacu ñi cuvaede. Borodabecacu apcore. <sup>19</sup> Ju ajacu mipacure aru mipacore máre. Aru micure, mi bajure jecuépedeca, ñre máre jecujacu mu, arejame Jesús.

<sup>20</sup> Que ayure, ñai bojuyo arejame:

—Ñavu caiye iye mi coyuiyede. ¿Ároma yure jaurō cāreja? arejame.

<sup>21</sup> Jesús ñre arejame:

—Jaubecva cuiyucu baru Jūmenijicui jáinore, nujacu aru jini bojedajacu mi cuvede. Aru mi iquiyede jíjacu ina cōmaje ñrojarivure. Que teni cuvacuyumu mu mi boje méne cavarō mearo Jūmenijicui curí. Aru ðajacu yáque, arejame Jesús.

<sup>22</sup> Ëbenita iyede jápiari, urarōreca chōorejame, ðajocaiyubecu ñi ure cuvede. <sup>23</sup> Que baru Jesús arejame ñuja ñi bueimarare:

—Jāve coyuyubu mujare: Ina pōeva cuve cuvarivure pare maiyójavu ne ju aye Jūmenijicure, ñi meadaquiyepa aivu náre aru ne ecorājiyepa aivu ñi

jaboteinore, cavarō mearo ũi cūrōre. <sup>24</sup>Bediōva cojedeca coyuyubu mujare: Cūinācu āimacu uracu, camello āmicacu, ũi ecoru aviyo cobei, maiyójajebu ũre. Aru pueno maiyójavu cūve cūvacure ũi ecoquino Jūmenijicui jaboteinore, arejame Jesús.

<sup>25</sup>Que ayure jápiaivu ñuja, cūcumarejacař pare. Aru arejacařa:

—¿Name buojarī ecorājidica Jūmenijicui jaboteinore, cūvarājivu jāravu cūimējāravu baquinóre? jēniari jārejacař Jesúsre.

<sup>26</sup>Ūcapūravu ñujare jāri, arejame:

—Pōeva ne đarī majibenno maiyójabevu Jūmenijicure. Ū cūinācura buojarī meadayube pōevare, arejame Jesús.

<sup>27</sup>Aru Pedro arejame:

—Dajocacařa ñuja caiye ñuje cūvaede, ñuje daiye boje múque. ¿Yéde earājidica ñuja? arejame Pedro.

<sup>28</sup>Aru ñujare arejame Jesús:

—Jāve coyuyubu mujare: Mamajāravu daquijāravu baquinó yu, Jūmenijicui daroimu mácu ũmpe, dobacuyumu jabocui dobarō mearoi, jabotecuyu pōevare. Aru muja máre, daivu bācavu yáque, dobarājaramu doce painoa jabovai dobarōa mearoa coapa, coyurājivu ina doce paüyajuboacavu Israecavure méne o āmene ne đaiyede. <sup>29</sup>Ácu pōescu dajocayu baru ũi cūramine, o jībūrāre, ĩmarare, jípacure, jípacore, mamarare, o ũi joborōre máre ji āmiá boje, ũi daiye boje yáque, memecacuyu yure, eacuyume pueno baju mearo bajure. Aru cūvacuyume jāravu cūimējāravu baquinóre. <sup>30</sup>Ūbenita dinumu maquinóre apevu, jaboteivu bācavu ijāravure, jabotebenajarama na Jūmenijicui jabotequiyede. Aru apevu, mujapedeca, jabotebevu bācavu ijāravure, jabotenajarama na Jūmenijicui jabotequiyede, arī buedejame Jesús.

### **“Memeipōevare” jāri dāpiarī ne đarājiyepe aino**

(Mt 19.30; Mr 10.31; Lc 13.30)

**20** <sup>1</sup>Jesús, yópe arī, buedejame:

—Jūmenijicui jaboteinomu yópe jio upacui memeipōevare vorī, earī bojedaiyepe náre ne memeiyede. Javejīnara, seis baji, ñai jio upacu tāibui vocunquemavu memeipōevare, ne jēnajiyepe ayu ũyaiboare ũi jioi. <sup>2</sup>Náre earī, “Cūináturava tāuturatuturava, cūinájāravu memeiye bojedaituturavare jíquijivu mujare coapa”, aquemavu ũ. Aru ũi nópe aiyede, ju aquemavu na coapa. Ne ju arīburu yóboi, ñai jio upacu náre jaroquemavu jioi. <sup>3</sup>Yóbecuriora vainīburu yóboi, nueve baji, bediōva tāibui nuquemavu ñai jio upacu. Noi jáquemavu apevu memeipōevare, ne memeino cūvabevure. <sup>4</sup>Aru náre máre, “Memenanujara muja ji jioi. Aru bojedacuyumu mujare me, yópe jauépe”, aquemavu ũ. Que baru memenanquemavu na. <sup>5</sup>No yóboi, jāravu corica baji, aru no yóboi tres baji máre, nopedeca đaquemavu ũ. <sup>6</sup>Bediōva cojedeca, cinco baji, cūināora ne memeiora jauéde cāreja, nuquemavu ñai jio upacu tāibui. Noi jáquemavu apevu memeipōevare, ne memeino cūvabevure. Náre jēniari jáquemavu, “¿Aipe teni cūrivurū muja yui caijāravu mememevūva?” aquemavu. <sup>7</sup>Ūre aquemavu na, “Pōescu cūbebi memeicōjeñu ñujare”, aquemavu. Náre máre “Memenanujara ji jioi”, aquemavu.

<sup>8</sup>Aviá ũi doiyede, ñai jio upacu yópe arī, coyunquejavu ũi cūramine corecaipōecure: “Ina memeipōevare órejarī bojedajacu náre. Ina memeni

buivu bácvui yóbocavure bojedajacu mamarumu. Aru no yóboi ina mamarumu memeni buivu bácvure bojedajacu mu”, aquemavu. <sup>9</sup>Ina cūináora memei vu bácvu ne daiyede, cūináturava tātutaturava, cūinájāravu memeiye bojedaituravare jacopuquemavu na coapa. <sup>10</sup>Diede jári, ina javejīnara memeni buivu bácvu dāpiarīduquemavu ne baju jacopurājivupe pūeno baju ne bojedaiyede. Ūbenita na máre quédaca, cūináturava tātutaturava, cūinájāravu memeiye bojedaituravare jacopuquemavu na coapa. <sup>11</sup>Ne jacopuiyede, jaraqumavu űai jio upacure. <sup>12</sup>Ūre aquemavu, “Nācapūravu cūináora quénora memema. Aru űajacapūravu memevu caijāravu. Avia űi boiyede űājivu űuja. Ūbenita űājimevu bácvureca, náre bojedaivu mu cūináturureca mi bojedaiyepe űujare, űājivu bácvure”, aquemavu ina javejīnara memeni buivu bácvu. <sup>13</sup>Ūbenita űai jio upacu aquemavu cūinācu nācacure, “Pacomá, mre āmeno đabevu yu. Múcapūravu ju avu yure, ‘Cūinájāravu memeiye bojedaituravare jīquijivu mre’, ji aiyede. <sup>14</sup>Que baru ijacu iye mi bojede aru űujacu mu. Cūináturu iye ji jīyepe mre, jīyuvu yu űai cūináora memecayure. <sup>15</sup>¿Yure jícōjemeniduyurū ji cūvaequede yópe ji urópe? Āmeina jámejacu yure, ji cadatequiepe ayu pōevare, ji mearo đaiye boje”, aquemavu űai jio upacu, arejame Jesús.

<sup>16</sup>Pōeva ne jári dāpiabede yópe maje jabocu Jūmenijicui jári dāpiaiyepe arī coyurejame Jesús:

—Apevu jabotebevu bácvu ijāravure jabotenajarama na Jūmenijicui jabotequiyede. Aru apevu jaboteivu bácvu ijāravure jabotebenajarama na Jūmenijicui jabotequiyede, arī buedejame Jesús.

### **Jesús űi coyūino bediōva cojedeca űi yaiquínore**

(Mr 10.32-34; Lc 18.31-34)

<sup>17</sup>Mái nuri, cuivu barejacará Jerusalén āmicurīmaroi. űuje nuiyede, űuja űi bueimare nūvarejame apavure jocarī. Aru yópe arī, coyurejame Jesús:

<sup>18</sup>—Jerusaléi nuivubu. Nore curī, yure, Jūmenijicui daroimu mácure űmpe, ji maucu jēni jīquijibi sacerdotevare jaboteipōevare aru Jūmenijicui yāvaiye báquede buaipōevare máre. Ina pōeva arājivubu: “¡Boarī jaruvaicōjejara űre! ¡Yaijácūrī!” <sup>19</sup>Que arī, jīnāvivubu yure ina judiōva ānevure. Que teni ina pōeva yūrināvivubu yure. Jara popenāvivubu yure. Aru yure pēvari jocucujaravena, boarī jarūvarāvivubu. Ūbenita yóbecurijārvu yóboi, jipacu, Jūmenijicu, nacovacuyume yure yainore jarūvarī, arejame Jesús.

### **Santiago aru Juan népaco űi jēniaino Jesúre**

(Mt 23.11; Mr 9.35; 10.35-45; Lc 22.25-27; Jn 13.12-15)

<sup>20</sup>No yóboi Zebedeoi mārāi paco nūrejacođa Jesús yebai mamaraque, Santiago aru Jūaque máre. Ūi jipocai űuatutarejacođa, űi jēniaiyue boje apejīene űre. <sup>21</sup>Aru Jesús jēniari jārejameđa űre:

—¿Yéde đacaji mre? arejameđa.

Ūre arejacođa:

—Dobaićojecacu ina jīmara pucarāre mi yebai, cūinācure meapūravui aru apacure cācopūravui, mi jabotequinumu maquinóre, arejacođa ű.

<sup>22</sup> Ëbenita Jesúcapūravu arejamedá:

—Mi jēniaiyede coreóvabevu mu. Pōecu dobaiyucu baru yáque ji jabotequinumu maquinóre, mamarumu ñájiye jaunu ére yáque. ¿Úcuri buojarájídica muja ji úcuinore? arejamedá náre Jesús.

Aru ju arejaimada ére:

—Buojaivubu ñuja, arejaimada.

<sup>23</sup> Aru Jesús arejamedá náre:

—Ji úcuinore úcurajivubu muja. Ji que aiyede, yópe ayubu: Ji ñájiyepedeca ñájinajivubu muja. Ëbenita yúvacari beobevu náre, dobarājivure ji meapūravui aru ji cācopūravui máre. Quénora dobarājarama nore ina jipacui beoimara mácavu, javeta ñi meadaimara mácavu, arejamedá Jesús.

<sup>24</sup> No yóboi, jápiarejacadá ne borore apevu ñuja caipucapuruape paivu Jesúi bueimara. Que baru jararejacadá inare. <sup>25</sup> Dinumu Jesús órearejame ñujare ñi yebai. Aru arejame ñujare:

—Muja majivu ina jaboteivure judíova ámevure ne ñaiyede. Paruéque cōjeivubu ina ne jaborōcavure, ne ñacarājiyepe aivu náre ne urōpe.

<sup>26</sup> Ëbenita nápe ñabejará muja. Ñai mujacacu parucu baiyucu baru, memecajacurí mujare. <sup>27</sup> Aru nopedeca ñai mujacacu jabocu baiyucu baru, yebacatejacurí caivure. <sup>28</sup> Nopedeca Jūmenijicui daroimu mácu ũmupe, yu, dabedejacacu, pōeva ne memecarājiyepe ayu yure. Quénora darejacacu yu, memecacuyu apevure aru boarí jaruvaicōjecuyu ji bajure, meadacuyu obedivu pōevare, ji yaiquíyede náre boje, arejame ñujare Jesús.

### **Jesús ñi meadaino pucarā jári eabevure**

*(Mr 10.46-52; Lc 18.35-43)*

<sup>29</sup> Jericó ámicuríimarore etarejacadá ñuja, Jesújā. Obedivu pōeva darejaima ñuje yóboi. <sup>30</sup> Aru pucarā ũmuva, jári eabevu, ma écarui dobarejaima. Pōeva “Jesús Nazarecacube ũ”, aivure jápiaivu, coðoboborejaima na, jári eabevu:

—Mu, David bácuí pāramecu, Jūmenijicui daroimu mácu, ñuje jabocu bacuyú, cōmaje ároje jájacu ñujare, arejaima na.

<sup>31</sup> Ina obedivu pōeva náre aridurejaima:

—Bi ajará muja, aridurejaima.

Ëbenita pueno baju coðoboborejaima cojedeca:

—Mu, ñuje jabocu, David bácuí pāramecu, cōmaje ároje jájacu ñujare, arejaima na.

<sup>32</sup> Que teni ére coðoboboivure jápiayu Jesús, dajocarejame. Aru apevure cutuicōjenejame ina pucarā jári eabevure ñi yebai. Eaivure, Jesús jēniari járejame náre:

—¿Aipe ñacaji yu mujare? arejame ũ.

<sup>33</sup> Ére arejaima na:

—Mu, ñuje jabocu, jári eabevubu ñuja. Urarō jáiyurivubu ñuja, arejaima.

<sup>34</sup> Jesús cōmaje ároje jáñu, ne yacorure tuorejame ũ. Aru cūiná járejaima na, jári eabevu bácavu. Que teni Jesúre yóvarí nurejaima na máre.

### Jesús Jerusaléi ũi ecoino

(Mr 11.1-11; Lc 19.28-40; Jn 12.12-19)

**21** <sup>1</sup> Jerusalén āmicurīimaro joabejīnoi curī, Betfajé āmicurīimajino baji, no cūrācū Olivocū āmicuricū ēmeino baji, earejācarā űja, Jesújā. Nore earī, pucarā űja ũi bueimaracavure yópe arī, jarorejame Jesús:

<sup>2</sup>—No cōchinoi curīimajino űjara mja. Cūiná earājaramu mja pōevare ũmaīāmacure, burra āmicuco, mamacuque, nācacui buoimarare. Náre buoimeare jođeni, davajārā yure. <sup>3</sup>Aru, “¿Aipe teni ina āimarare náre buoimeare jođeni, náre nuyāivurū mja?” ne aruta, yópe ajarā: “űjare ĩcōjeni darobi maje jabocu. Ũre ũmacayū āimacu jaubi ũ. Carijīeneca mjaare jacopaiyovacuyume cojedeca”, ajarā, arejame Jesús.

<sup>4</sup> Caiye iye nópe vaidéjavū cūināturu Jūmenijicui coyucōjeiye báquepedeca cūinācu ũi yāvaiyede coyucaipōecu bácare. Yópe arī, toivaicōjenejaquemavu ũ mácure Jūmenijicu:

<sup>5</sup> Coyujacu ina Jerusalén āmicurīimarocavure. Jájara. Muje jabocu bacuyū mjaare dacuyume. “¿Meacu bárica yu?” abecuabe. Burrore tubarī dacuyume. Burro bojuyovacari bacuyúme ũi tubamu macuyú, arī toivaicōjenejaquemavu Jūmenijicu.

<sup>6</sup> Jesúi daroimara nurejaima. Aru đarejaimada yópe ũi aiye báquepedeca náre. <sup>7</sup> Davacarejaima Jesúre ico burrare mamacuque. Aru űje doicajea puenocacajeare burrare aru mamacure máre tūorejācarā. Mamacure tubarejame Jesús. <sup>8</sup> Dinmuma ina obedivū pōeva, űjāque curivū, ne puenocacajeare jūarejaima mára. Aru apevu jocucu cavabua yoca curicavabuaare burarī, jūarejaima mára, Jesúre meadaiyurivū, ne pueđarī jacoyurājiyepe aivu. <sup>9</sup> Ũre jipocateivu aru ũi yóbocavu máre cođoboborejaima na:

—David bácuī pāramecu, maje jabocu bacuyúre torojue bajađeni. Jūmenijicu mearo đacaimume ũ, Jūmenijicui daroimu mácū. Cari jabocu bacuyúre ména borotenajarevu, cođoboborī arejācarā űja caivu.

<sup>10</sup> Jesús ũi eaiyede Jerusalén āmicurīimaroi, caivu nócavu etarī, jārī, jēniari jārejaima na, “¿űamema űai?” <sup>11</sup> Aru ina pōeva űjare yóvaivu arejaima náre:

—Ũtame űai Jūmenijicui yāvaiyede coyucaipōecu, Jesús Nazarecacu, Galileacarōcacu, arejaima ina pōeva.

### Jesús ũi meadaino Jūmenijicui cūramine

(Mr 11.15-19; Lc 19.45-48; Jn 2.13-22)

<sup>12</sup> Jesús edarī Jūmenijicui cūrami yebai, diñami tāibu uratāibui ecorejame ũ. Aru nore diñami curivū bojeđaipōevare jarūvarejame Jesús. Tātura oatvāipōeva ne jādovaivare moari najuárejame ũ. Aru jurevare bojeđaipōeva ne dobarōare máre moari najuárejame. <sup>13</sup> Náre yópe arejame Jesús:

—Yópe arī toivaicōjenejaquemavu Jūmenijicu ũi yāvaiyede: “Ji cūrami caivu pōeva ne yure, Jūmenijicure, coyuiñamimu”, arī toivaicōjenejaquemavu. Ũbenita diñamine tatorī ĩvu ne dupiñamipe đaquemavu mja, muje pueno urarō tātura ĩye boje pōevare jocarī, ne bojeđaiyede muje cūvaede, arejame náre Jesús.

<sup>14</sup> Jārī eabevu darī, aru cuiye majibevu máre daivu barejájaima ũi yebai no Jūmenijicui cūrami. Náre coapa meadarejame Jesús. <sup>15</sup> Apevu fariseova aru

Jūmenijicui yávaiye báquede bueipõeva caiye iye pøeva ne ðarĩ majibede Jesús ũi ðaiyede járejaima. Aru ina juedova noi curivu, “David bácu pãramecu, maje jabocu bacuyúre torojue bajaðeni”, ne arĩ coðoboboyede jápiarejaima ina fariseovajã. Que baru jorojĩnejaima ũre. <sup>16</sup> Aru arĩdurejaima: —¿Jápiabecurũ mu ne aiyede? arĩdurejaima.

Ŭbenita Jesús arejame náre:

—Jápiavũ yũ. ¿Arumetenaru muja? Jūmenijicu ũi yávaiye báquede toivaicõjenejaquemavu cūinácu ũi yávaiyede coyucaipõecu bácure yópe arĩ yurã: Mu, ñuje jabocu, juedovare aru juedojĩnare máre mearore jícõjeivu mure, arĩ toivaicõjenejaquemavu Jūmenijicu, arejame Jesús.

<sup>17</sup> Que arĩburu yóboi, náre dajocarĩ etarejagarã ñuja, Jesujã, diĩmarore jocarĩ. Cãranũrejagarã Betania ãmicurĩĩmajinoi.

### **Jesús ũi ãmecoroino higeracu jẽidua cubecure**

(Mt 17.20; Mr 11.12-14, 20-26; 1 Co 13.2)

<sup>18</sup> Cõmiáijãravũ javejĩnara copainũrejagarã Jerusalén ãmicurĩĩmaroita. Aru ãvũé ijidejavũya Jesúre. <sup>19</sup> Que baru ũi jáiyede cūinácu jocucu higuera ãmicuricure ma êcarui, jẽidua vocunuridurejame dicu yebai. Ŭbenita yoca matuiyeda earejame. Aru arejame dicure:

—Cainumua jẽmejaðeni mi jẽidua cojedeca, arejame ũ.

Aru cūiná dicu yaidéjavũ. <sup>20</sup> Ñuja ũi bueimara diede jári, cucumarejagarã. Aru arejagarã:

—¿Aipe teni cūiná yaidí dicu higeracu? arejagarã.

<sup>21</sup> Aru Jesús, yópe arĩ, coyurejame ñujare:

—Jãve coyuyũbu mujare: Muja me ju aivu baru Jūmenijicure, aru “Jūmenijicu iye ðaiyede majibebi” arĩ ðápiabevũ baru, muja máre ðarĩ buojarãjaramu yópe ji ðaiye báquepe dicu higeracure. Aru pũeno baju ðarĩ buojarãjaramu muja. Icũ cũracũre “Nujacũ yore jocarĩ pu jia uradaita, cocunujacũ” muje aru, nópe ðaquiye bu dicũ. <sup>22</sup> Caiye iye muje Jūmenijicure jẽniaiyede, “Jãve Jūmenijicu jícuyume yure” arĩ ðápiaru, Jūmenijicu jícuyume mujare muje uede, arĩ buedejame ñujare Jesús.

### **Jesús ũi parué**

(Mr 11.27-33; Lc 20.1-8)

<sup>23</sup> Diede coyuyũ báciu, Jesús Jūmenijicui cũrami ecorejame cojedeca. Noi pøevare bueyure, sacerdotevare jaboteipøeva aru judiõva bucua máre ũi yebai nũrejaima. Aru jẽniari járejaima ũre:

—¿Ye paruéque ðayurũ mu iye mi ðaiyede? ¿Ñame jídi mure iye paruéde mi nópe ðaiyede? arejaima na.

<sup>24</sup> Jesús arejame náre:

—Yũ máre jẽniari jáquijivũ mujare cūináro jẽniari jáinore. Yure coyuru, yũ máre coyquijivũ mujare ji paruéque ji ðaiyede. <sup>25</sup> ¿Juan Bautista bácu jáðovaquemari pøevare Jūmenijicu ũi paruéque o pøeva ne paruéque? Coyujarã yure, arejame náre Jesús.

Ŭi que aiyede, ne bajumia boroteivũ arejaimaða yópe:

—Maje aru “Jūmenijicueque”, ũ aquiibi “¿Aipe teni ju abetecarãru ũre?”

<sup>26</sup> Ŭbenita maje aru “pøevaque”, jidué javũ majare. Ina obedivũ pøeva

coreónadama Juan Bautista bácu Jūmenijicui yávaiyede coyucaipōecu bácu. Que baru nácapūravu āmedajebu majare, arejaima. <sup>27</sup>Que baru arejaima Jesúre:

—Majibevu ñuĵa, arejaima.

Dinamure Jesús arejame náre:

—Yu máre coyubevu mujare ñamei paruéque ji daiyede, arejame Jesús.

**“Pucarā mamarare” jári dápíarī ne đarājiyepe aino**

(Lc 3.12; 7.29-30)

<sup>28</sup>Bedióna yópe arī, budejame Jesús:

—¿Aipe dápíaiŋrū muĵa iye ji coyūquiyede mujare? Cūinácu ūmū pucarā mamarare cuvacu yópe aquemavu cūinácure: “Mu, bucu, memecunujacu úyaimu jioi cari járavu”, aquemavu jípacu. <sup>29</sup>Ūbenita ūcapūravu “Nuiyubevu”, aquemavu jípacure. Ūbenita nópe arīburu yóboi, chíori dápíaquemavu ūi ju abe báquede jípacure. Aru jioi nuquemavu ū, mamacu. <sup>30</sup>Népacu ñai mamacure ūi coyurīburu yóboi, apescu mamacure quédeca arīduquemavu. Aru ñai mamacucapūravu “Báyū, memecunññmu yū”, ju arīduyuvacari, ūbenita ye numetequemavu ū, arejame Jesús.

<sup>31</sup>Náre jēniari járejame Jesús:

—¿Ácuba ina pucarā mamaracacu jípacui urōpe đayū bácu? arejame Jesús. Arejaima Jesúre:

—Ūi mamarumu jēniaimu mácu ūi urōpe đaquemavu, arejaima.

Aru Jesús arejame náre:

—Jāve coyuyubu mujare: Ina jabovare tāutura ĩcaipōeva aru ina nomiva āmena ne bajure bojedaivu ecorājarama Jūmenijicui jaboteinore muĵe jipocai.

<sup>32</sup>Quédeca Juan Bautista bácu buecudame mujare aipe đarī Jūmenijicu jáñure pōevare boropatebevupe. Ūbenita mujacapūravu ū mácu ju abetequemavu. Quénora ina jabovare tāutura ĩcaipōeva aru ina nomiva āmena ne bajure bojedaivu ū mácu ju aquemavu, arejame náre Jesús.

**“Āmena memecaipōevare” jári dápíarī ne đarājiyepe aino**

(Mr 12.1-12; Lc 20.9-19)

<sup>33</sup>Jesús, yópe arī, buede nurejame náre:

—Apeno jári dápíarī muĵe đarājiyepe aino ji coyūquiyede jápiajarā muĵa. Cūinácu cūrami upacu doaicōjequemavu jiore úyaimuque. Doarī buojarī, đaicōjequemavu biaidore jio turuvai. Aru ūicōjequemavu cobede úyai pipoicobede. Aru đaicōjequemavu ūmujuriñami cūramine, jiore coreipōecu ūi jáquĩamine máre. Caiye iyede meadarī buojarī, vorī earī jiore memeipōevare, epequemavu náre, ne memecarājiyepe ayū úre. Ina memecaipōeva ĩnajivu batequémavu apeboa úyaiboare, ne memeie boje. Aru nuquemavu ñai jio upacu apeno joborōi. <sup>34</sup>Úyai jējīaravu yóboi, ñai jio upacu jarorīduquemavu apenū ūi yebacavure memecaipōeva yebai, ne ĩnajiyepe ayū apeboa úyaiboare, ñai jio upacu jiede. <sup>35</sup>Ūbenita ina memecaipōeva ina yebacavū eavure jēni, cūinácure jara popequemavu, aru apescure boarī jaruvaquemavu, aru apescure cūraboaque đuvarī boarī jaruvaquemavu máre. <sup>36</sup>Ñai jio upacu jarorīduquemavu apenū yebacavure. Ūbenita náre quédeca đaquemavu ina memecaipōeva.

<sup>37</sup>No yóboi, ñai jio upacu jarorĩduquemavu mamacure memecaipõeva yebai. “Jímacure jáivu pueðarājichuma na”, arĩ dápíarĩ, que ðarĩduquemavu. <sup>38</sup>Ëbenita ina memecaipõeva jáivu ñai jio upacui mácure, aquemavu ne bajumia, “Ñai ñuje jabocu bacuyúme. Jípacu ñi yainĩburu yóboi, cūvacuyume caiye ñi cūvaede. Járíca, boarĩ jarūvarājarevu úre, maja cūvaburĩ caiye ñi cūvaede”, aquemavu na. <sup>39</sup>Que arĩ, úre jēni jaetovaquemavu jiore jocarĩ. Aru boarĩ jarūvaquemavu úre, arejame Jesús.

<sup>40</sup>Na ñi coyuiyede jápiaivure jēniari járejame Jesús:

—¿Ñai jio upacu copaini dayu, aipe ðaquidi ina memecaipõevare? arejame ñ.

<sup>41</sup>Úre jápiaivu arejaima:

—Ina ámenare pare nájine ðarĩ boarĩ jarūvaicōjecuyume ñ. Aru epecuyume apevu memecaipõevare noi, ñi jioi, úre jínajivure ñi jēiduare jēijāravu eaiyeta, arejaima na.

<sup>42</sup>Jesús arejame náre:

—¿Árumetenaru mija iye Jūmenijicui yávaiye ñi toivaicōjeiye báquede? Yópe toivarejaquemavu yurā, Cristo ji borore:

Iva cūravare cūramine ðaipõeva ũbeni jarūvaquemavu. Caride iva cūrava caiva apeva pūeno parūrivabu. Nópe ðaino mácarõre ðaquemavu Jūmenijicu. Que baru pare mearotamu majare, maje dápíaru, arĩ toivarejaquemavu.

<sup>43</sup>Que baru coyuyubu mujare: Mija judíova muje ðabe boje mearore yópe Jūmenijicui urõpe ñi jaboteimarare ðaiye janépe, apevu põeva, judíova ámevu, mearore ðaivu yópe Jūmenijicui urõpe, ñi jaboteimara marajárama na muje pūeno. <sup>44</sup>Ácu pōecu tūyu baru divarā, turĩ yavacuyume ñi bajure. Aru diva taiva baru pōecu pūenora chítoquiyebu úre, arejame náre Jesús.

Yópe aiyurõtamu no: Põeva “Ámecube ñ”, arĩdurājarama Jesúu borore. Ëbenita meacu bajube ñ, Jesús, caivu apevu pūeno.

<sup>45</sup>Ina sacerdotevare jaboteipõeva aru ina fariseova jápiaivu bácanu Jesús ñi jári dápíarĩ ne ðarājiyepe aiyede, coreóvarejaima ða coyuyure nára, “Mija judíova muje ðabe boje mearore yópe Jūmenijicui urõpe, judíova ámevu ñi jaboteimara marajárama muje pūeno” ñi aye báque boje. Que baru jēni nūvayurĩdurejaima. <sup>46</sup>Ëbenita ne jēiyurĩduiyede úre, obedivu põeva “Jesúbe Jūmenijicui yávaiyede coyucaipōecu” arĩ dápíavure jidurejaima ða.

**“Purubuoivu ne torojuve teinore” jári dápíarĩ ne ðarājiyepe aino**

(Mt 8.12; 25.30; Lc 13.28; 14.15-24)

**22** <sup>1</sup>Bedióva cojedeca Jesús, yópe arĩ, buedejame náre apeno jári dápíarĩ ne ðarājiyepe ainoque:

<sup>2</sup>—Jūmenijicui jaboteinomou yópe cūinácu jabocu mácu purubuooyure torojuve tede ðainope. <sup>3</sup>Ñai torojuve teino upacu jarorĩ, “Nujara” aicōjeniduquemavu ñi yebacavure ñi cutuimarare. Ëbenita ina cutuimaracapūravu nūiyubetequemavu. <sup>4</sup>Bedióva cojedeca jarorĩ, aicōjeniduquemavu apevu ñi yebacavure yópe: “Coyujarā ina ji cutuimarare yópe: ‘Ji torojuve teinore meaðaivu yu. Boaicōjeivu oteivecava urarāre aru ina mamara jiacurivure máre. Caiyede meaðaivu yu. Que baru āranujara carĩ, ajarā ji cutuimarare”, aquemavu ñai jabocu. <sup>5</sup>Ëbenita ina cutuimara ñai

jabocure âmeina jári, yurini, numetequemavu ùi torojuve teinore. Cûinácû memecûnuquemavu ùi jioi. Apecû memecûnuquemavu ùi bojedaitucubui. <sup>6</sup>Aru apecû ina yebacavure jêni, cûyojarô ðarî, boarî jarûvaquemavu náre. <sup>7</sup>Diede jápiarî, ñai jabocu jaraquemavu. Churaravare jaroquemavu, ne boarî jarûvarâjiyepe ayû ina boarî jarûvaivû bácavure ùi yebacavure aru ne juarâjiyepe ayû ne îmarore.

<sup>8</sup>'Dinûmure ñai jabocu aquemavu apecû ùi yebacavure, "Jímacû ùi purûbuoie torojuve teino meadârî buojainomu. Ëbenita ina ji cutuimara mácavû âmena bajure daiye jaubetedebe. <sup>9</sup>Que baru ma uramai nûjara mûja. Nore caivû mûje eaimarare cutujarâ, ne darâjiyepe aivû ji torojuve teinoi", aquemavu ñai jabocu. <sup>10</sup>Ëi que arîburu yóboi, ina yebacavû mái nûri cójijovaquemavu caivû ne eaimarare, mearare aru âmenare máre, ne torojuve teitucubû buiquíyepe aivû. <sup>11</sup>Ëbenita ñai jabocu jácunûri ina ùi cutuimare no torojuve teitucubûi, jáquemavu cûinácû pôecure purûbuoino doiyede dobecûva. <sup>12</sup>Que baru êre jêniari jáquemavu, "Pacomá, ¿aípe teni ecoyû buojacurû yore purûbuoino doiyede dobecûva?" aquemavu. Ëbenita ñai cutuimûcapûravû bi aquemavu. <sup>13</sup>Dinûmure ñai jabocu êre cadateipôevare yópe aquemavu, "Ëi purûáre, ùi cubobare máre buorî, jarûvajarâ êre joai, ñeminoi, ùi ja abe boje yure, ùi coatequiyepe aivû yure jarûvarî. Chioivû orî curâjarama pôeva nore. Aru jararî cópi curâjarama na, aquemavu ñai jabocu", arejame Jesús.

<sup>14</sup>Jesús, yópe arî, bude nurejame:

—Obedivû pôevatamû i na Jûmenijicû ùi cuturîduimara. Ëbenita obebejînatamû ina ùi beoimara, ùi jaboteimara mârâjivû, arejame Jesús.

### **Jesús ùi coyûino jabovare bojedainore**

*(Mr 12.13-17; Lc 20.20-26)*

<sup>15</sup>No yóboi apecû fariseova ne bajumia borotedejaimada aipe ðarî ne jûjovarî jacotûjuroede Jesúre ùi coyûiequede. <sup>16</sup>Apecû ne bueimarare apecû Herodecavûque jarorejaimada na. Ëi yebai edarî, êre yópe arejaima, mamadaiyurivû:

—Mû, bueipôecu, mure coreóvaivûbu nûja. Nurié yávaivû mû. Jâveneca bueivû mû pôevare, ne ðarâjiyepe ayû mearore yópe Jûmenijicûi ðaicôjeiyepe. Caivure cûinácamuara yávaivû mû. Coyûbevû mû pôevare yópe ne ðaiyepe. Quénora jidûbecûva coyûivû mû náre yópe ne dâpiaiyepe. <sup>17</sup>Que baru coyûjacû yéde mi dâpiaiyede iye ñûje jêniayede mure caride. ¿Maje jabocu César ùi ícôjejuroede, ùi jaboteiye boje, maje bojedaru, mearica die? ¿O bojedabejeba maja? arejaima na, êre jûjovaiyurîduivû.

<sup>18</sup>Ëbenita ne êre âmeina dájuroede majini, yópe arejame Jesús:

—Mûja, jûjovaiivû, ¿aípe teni yure jûjovaiyurîdurârû mûja? <sup>19</sup>Jáðovajara yure tãuturatûravare, arejame Jesús.

Que ayure, nácacû cûinátûrava tãuturatûravare davarejame êre. <sup>20</sup>Êre ùi davarî jiyede, arejame Jesús:

—¿Ñamema ñai, ditûravare jêñû? ¿Aru ñamei âmiá curitûravaba ditûrava? arejame náre Jesús.

<sup>21</sup>—Ñai jabocu Césai decocu aru ùi âmiá máre curitûravatamû, arejaima Jesúre.

Que aivure arejame Jesús:

—César jiede úre jacopaiyovajarā muja. Jíjarā úre tāutura yópe ũi bojedaicōjeiyepe mujare. Aru Jūmenijicu jiede úre jacopaiyovajarā muja. Đajarā yópe ũi urōpe, arejame náre, jēniari jāradaivure, Jesús.

<sup>22</sup> Ũi que aiyede jápiarī, pare dápiarī cuecumarejaimađa ina úre jujoвайуrīduivу bácvu. Que baru úre đajocarī etarī nurejaima na.

### **Saduceova ne jēniari jáino Jesúre yainore jaruvarī nacajainore**

(Mr 12.18-27; Lc 20.27-40; Hch 23.8)

<sup>23</sup> Dijāravumareca apevu saduceova darejaima Jesús yebai. Saduceo āmicuriyajubobu judiovacavu ne yajubo cūináyajubo. Caivu saduceova “Yainore jaruvarī nacajaiye cubevu”, adama na. Jesúre jēniari jārējaima ina saduceova yópe arī:

<sup>24</sup> —Mu, bueipōecu, Jūmenijicu cōjeiyede Moisés bácu coyurejaquemavu: “Cūinácu nēmamicu yaidú, jueđocuvabecvu, yaiyú bácu yócure purubuoie javvu nomiópecoque, jueđocuvacuy. Aru ina jueđova bárājivu yaiyú bácu āmiáre cavarājarama na”, coyicōjenejaquemavu Moisés bácu Jūmenijicu.

<sup>25</sup> Javede cūtequemavu siete paivu ũmuva űujacavu. Cūinácu ũmui mára matequémavu na. Aru nēmamicu purubuoquemavu. No yóboi yaiquémavu ũ mácu, jueđocuvabecvu. <sup>26</sup> Que baru apecu, nēmamicu bácu rā cutuy, purubuoquemavu jībucu bácu márepacoque. Aru jībucu bácu pedeca, yaiquémavu ũ mácu máre, jueđocuvabecvu. Aru apecu, ũ mácu rā cutuy máre, nopedeca, aru caivu ina siete paivu bácvu óque purubuo rī, yaiquémavu na mácvu caivu jueđocuvabevvu. <sup>27</sup> Caivu ne yóboi, ico nomió máco máre yaiquémavu. <sup>28</sup> ¿Aru yainore jaruvarī nacajajāravu baquinóre, űamei márepaco bacodóba ico? Jāravui caivu ina siete paivu cuvatequemavu óre, arejaima na Jesúre.

<sup>29</sup> Ũbenita Jesús arejame ina saduceovare:

—Mamateivubu muja, muje majibe boje Jūmenijicu yávaiyede. Aru Jūmenijicu paruéde máre majibevubu muja. <sup>30</sup> Yainore jaruvarī nacajajāravu baquinóre purububenajarama. Aru jíbenajarama nēmaromivare, ne purubuo rājiyepe aivu. Quénora ángeleva, ina purubuo bevū, cavarō mearo Jūmenijicu curōcavu peivu, barājarama ina yainore jaruvarī nacajarajivu.

<sup>31</sup> ¿Iye yainore jaruvarī nacajaiyede, jápiarī eabenaru muja iye Jūmenijicu coyuiye báquede Moisés bácu? <sup>32</sup> “Yátamu Jūmenijicu. Abraham, Isaac, aru Jacob ne mearore jímumu yu”, arejaquemavu Jūmenijicu. Que arī, yaivu bácvu ne mearore jímū āmemi Jūmenijicu. Quénora apurivu ne mearore jímútame ũ, arī coyurejame náre Jesús.

<sup>33</sup> Ina obedivu pōeva Jesús ũi nópe coyuiyede jápiaivu, pare dápiarī cuecumarejaimađa, ũi nópe aije boje.

### **Đaicōjeiye parué caiye pueno**

(Mr 12.28-34; Lc 10.25-28)

<sup>34</sup> Apevu fariseova ne jápiaiyede Jesús vainí tuyu bácu ina saduceovare, bi are đayū bácu náre, cōjijidejaima ũi yebai. <sup>35</sup> Aru cūinácu nácacu, Jūmenijicu đaicōjeiyede majicu, Jesúre jujovarī jacotuiyurīduyū jēniari jārējame yópe:

<sup>36</sup>—Мѹ, бueipōecѹ, љāroma majare Jūmenijicui đaicōjeino pueno parurō cōjeino? arejame ũ.

<sup>37</sup>Jesús arejame ũre:

—“Ћjacѹ mi jabocѹ Jūmenijicure caino mi ũmeduque, caino mi ũmeque, aru caino mi majiéque”. <sup>38</sup>Nótamu Jūmenijicui đaicōjeino pueno parurō, pueno mearo máre. <sup>39</sup>Aru no yóbo cāchijino parurō đaicōjeinotamu mamaro cōjeinope paino. “Mi bajure mi jecuépedeca jecujacѹ mícure máre”. <sup>40</sup>Caiye Jūmenijicui đaicōjeiye ũi coyuiye báquede Moisés bácure, aru caiye ina Jūmenijicui yáva iyede coyucaipōeva mácavѹ ne bueiye báquede máre coyuiyetamu cūináturura iye pūque đaicōjeiyeque. Pōevare ũe jāvѹ majepacѹ Jūmenijicure aru jecué jāvѹ apevѹ pōevare máre, arī buedejame Jesús.

### **Cristo ñai jabocѹ David bácui pāramecѹ**

(Mr 12.35-37; Lc 20.41-44)

<sup>41</sup>Ina fariseovacavѹ cōjijivureca cāreja Jesús yebai, náre yópe arī, jēniari járejame Jesús:

<sup>42</sup>—¿Aipe dápiaivurū muja ñai Cristore? ¿Ñamei mácuba ñai? arejame.

Ŭre arejaima:

—David bácui pāramecube ũ, arejaima.

<sup>43</sup>Náre arejame Jesús:

—Que baru, ¿aipe teni David bácuvacari Espíritu Santoi paruéque coyucōjeimѹ marejaquémari “mѹ, ji jabocѹ” Cristorā? David bácѹ, yópe arī, coyurejaquemavѹ Cristorā:

<sup>44</sup>Jūmenijicu aquemavѹ ji jabocure, “Dobajacѹ ji meapūravui, mi cuvae boje paruéde yūpedeca. Aru yѹ epecuyumu mi mauvare mi cuboba cāchinoi. Que teni mure vainí jaruvare đacuyumu yѹ náre, mi jabotequiyepe ayѹ náre”, arī toivarejaquemavѹ David bácѹ Cristorā.

<sup>45</sup>David bácuvacari Cristoi borore arejaquemavѹ, “Ŭrecabe ji jabocѹ”. Que baru, ¿aipe teni David bácui pāramecuba ũ? arejame Jesús.

<sup>46</sup>Name buojari cūiná coyubeteima ũre. Dijāravumata ñame yéde jēniari jámenejaima Jesúre bediōva cojedeca.

### **Jesús ũi boro coyurī adaino fariseovare aru Jūmenijicui yáva iye báquede bueipōevare**

(Mt 3.7; 5.34; 6.1; 12.34; 20.26-27; Mr 9.35; 10.43-44; 12.38-40;

Lc 3.7; 11.37-54; 14.7-14; 18.14; 20.45-47; 22.26; Hch 23.3)

**23** <sup>1</sup>No yóboi Jesús, yópe arī, coyurejame ina obedivѹ pōevare aru ñuja ũi bueimarare máre:

<sup>2</sup>—Jūmenijicui yáva iye báquede bueipōeva aru fariseova buedama mujare Jūmenijicui đaicōjeiyede ũi coyuiye báquede Moisés bácure. Jūmenijicui yáva iye jāvene buedama na. Que baru đajarā muja yópe ne bueiypedeca. <sup>3</sup>Ŭbenita návacari đabenama yópe ne bueiyepe. Que baru đabejarā muja yópe ne đaiyepe. <sup>4</sup>Ne baju dápiaiyepe đaicōjedama pōevare. Ŭbenita yópe Jūmenijicui yáva iye báquepe dápia benama na. Maiyójaebu iye đaicōjeiye ne baju dápiaiye báque. Návacari caiye iyede ye đabenama na. Aru ne đaicōjeimarare ye cadatebenama, ne đarājiyepe aivѹ die maiyójae đaiyede.

<sup>5</sup> Caiye ne ðaiyede ðaðama apevure jáicōjenajivu, “¿Meara máríca na?” ne arí ðápiarājiyepe aivu. Que baru Jūmenijicui yávaiyequede ne toivaino mácarō yocarā, ne aðaino mácarō quíjitōcua jívui buoðama na. Ditōcuare ne buoiyede ne tūtva coapa aru ne āmuve cācopūravūcāāmuve coapa, uramea buoimeaque buoðama na, jáicōjenajivu apevure. Aru ne cuitótecajea coapa nareicōjeðama turavacajea uracajeare, jáicōjenajivu apevure. Que teni apevure dápiare ðaiyuriduyama mearore jívaivure Jūmenijicure aru ju ávaivure máre. Ūbenita nópe dápiajebu pōeva náre ūbenina. <sup>6</sup> Torojave teinore cuiyuma na ñai torojave teino upacu yebai, apevu ne pueðarājiyepe aivu náre. Judíovai cójijiñamiare ūma na ne dobae mearoa baji, apevu ne járajíyepe aivu náre parurivupe. <sup>7</sup> Aru ūma na pōeva pueðarí ne jacoyuinore táibui aru “mu, bueipōecu” ne ainore máre náre.

<sup>8</sup> Ūbenita mujacapuravu “mu, bueipōecu” aicōjemejara apevure muja coapa, muje dápiaiye boje meara apevu pueno. Yu cūinácuratamu muje bueipōecu. Aru cūináturubu muja, caivu cūinávupe paivu. <sup>9</sup> Aru ijáravucacu cubebi “mu, ñujepacu, ñuje jabocu” muje aimu. Nópe abejarā pōecure. Majepacu cūinácuratame cavarō mearocacu. <sup>10</sup> Aru “mu, jabocu” aicōjemejara apevure muja coapa. Yu, Cristo, cūinácuratamu muje jabocu. <sup>11</sup> Que baru ñai mujacacu parucu baiyucu baru, memecajacurí mujare. <sup>12</sup> Ñai cuiyucu me apevu pueno, parubecuyume pueno baju. Aru ñai parubede ðaiyucu ūi baju apevu cāchino, me cucuyume pueno baju, Jūmenijicui mearo ðacaquiye boje ūre, arí buedejame ñujare Jesús.

<sup>13</sup> Aru yópe arí, coyure nurejame ū:

—Muja, Jūmenijicui yávaiye báquede bueipōeva, aru muja, fariseova, jujovaivu, chíorajaramu muja. Jūmenijicu ñájine ðacuyume mujare. Muja ðaðavū yópe pōecu ūi bieiyepa cūramine, apevu ne ecobenajíyepe ayu, aru ū máre ecobecuyu. Muja coreóvaðavū Jūmenijicui yávaiyede. Ūbenita diede ju are ðabevu apevure, ne ecobenajíyepe aivu Jūmenijicui jaboteinore, aru muja máre ju abevu. Que baru ecobenajaramu nore.

<sup>14</sup> Muja, Jūmenijicui yávaiye báquede bueipōeva, aru muja, fariseova, jujovaivu, chíorajaramu muja. Jūmenijicu ñájine ðacuyume mujare. Jujovarí ñavaðavu ina nomiópeva ne apejiene. Aru jēniavavu joe Jūmenijicuque, pōeva ne dápiarājiyepe aivu ūbenina muja me Jūmenijicure ju aivupe. Caiye iyede muje ðaiye boje, pueno urarō ñájinajaramu muja, muje āmeina teiye boje.

<sup>15</sup> Muja, Jūmenijicui yávaiye báquede bueipōeva, aru muja, fariseova, jujovaivu, chíorajaramu muja. Jūmenijicu ñájine ðacuyume mujare. Joai curānuñavu muja jia uraðai aru joborōi máre. Cūinácu pōecure vorānuñavu, oatuvārājivu ūi dápiaiyede, ūi dápiaquiyepe aivu muje dápiaiyepe. Aru ūi ðaiyede máre oatuvaðavū muja, ūi ðaquiyepe aivu pueno āmenore, ūi ñájiquiyepe aivu toabo cūiméboi muje pueno.

<sup>16</sup> Muja, Jūmenijicui yávaiye báquede bueipōeva, aru muja, fariseova, jujovaivu, chíorajaramu muja. Jūmenijicu ñájine ðacuyume mujare. “Jūmenijicui yávaiye báquede buení buojavubu ñuja”, aðavū muja pōevare ūbenina. Yópe jári eabevu ne jipocateiyepe pōevare, muja Jūmenijicui yávaiye báquede buení buojabenamu. Yópe ūbenina buedaðavū muja: “Pōecu ayu baru ‘Ji aiyepa ðacuyumu yu, Jūmenijicui cūrami cue boje’, ðaiye jaubevu ūre.

Ūbenita aɣu baru ‘Ji aiyepe ɗacɣuɣu yu, úru cue boje Jūmenijicui cūrami jívui’, ɗaiye jauvu úre”, ɗavū muja. <sup>17</sup>Mujatamu jári eabevupe paivu muje ūmei. Mujatamu āramevu. Coreóvabevu muja Jūmenijicui cūramine pueno parurōre caiye iye úru pueno. Iye úrubu pueno me, die cue boje Jūmenijicui cūrami jívui. <sup>18</sup>Aru yópe ūbenina buedavū muja: “Pōecu aɣu baru ‘Ji aiyepe ɗacɣuɣu yu, Jūmenijicure jícayede jícáva cue boje ūi cūrami jívui’, ɗaiye jaubevu úre. Ūbenita aɣu baru ‘Ji aiyepe ɗacɣuɣu yu, Jūmenijicure jícaye boje jícáva puenora ūi cūrami jívui’, ɗaiye jauvu úre”, ɗavū muja. <sup>19</sup>Mujatamu jári eabevupe paivu muje ūmei. Coreóvabevu muja Jūmenijicure jícavare pueno parurōre caiye iye jícaye pueno. Iye jícaye bu pueno me, die cue boje Jūmenijicure jícáva puenora. <sup>20</sup>Que baru pōecu aɣu baru “Ji aiyepe ɗacɣuɣu yu, Jūmenijicure jícáva cue boje ūi cūrami jívui”, jáve aiyurō “Jūmenijicure jícáva aru caiye Jūmenijicure jícaye diva puenora”, aiyubi ū. <sup>21</sup>Aru pōecu aɣu baru “Ji aiyepe ɗacɣuɣu yu, Jūmenijicui cūrami cue boje”, jáve aiyurō “Jūmenijicui cūrami aru ñai cucu noi”, aiyubi ū. <sup>22</sup>Aru pōecu aɣu baru “Ji aiyepe ɗacɣuɣu yu, cavarō mearo cue boje”, jáve aiyurō “Jūmenijicui dobarō mearo aru ñai dobacu nore”, aiyubi ū, arejame Jesús.

Ūi que aiyede, Jesús yópe aiyucu barejaquémavu: Cainumua ɗaiye jauvu pōevare yópe ne aye báquedepeda.

<sup>23</sup>Aru yópe arī, coyure nurejame Jesús:

—Muja, Jūmenijicui yávaiye báquede bueipōeva, aru muja, fariseova, jujovaiɣu, chīorajaramu muja. Jūmenijicu ñájine ɗacɣuɣu me mujare. Caiye muje oteiyoca, quíjiyoca bojecubeyoca, caipucapuruape paiyocare cavarivɣu, cūináyocare jýavū Jūmenijicure. Ūbenita mearo ɗavure apevure, cōmaje āroje jáivure apevure, aru ju ávure Jūmenijicure máre āramevu muja. Caipucapuruape paiye muje cavaede jocarī, cūinārore Jūmenijicure jýe jauvu mujare. Ūbenita pueno baju jauvu mujare muje mearo ɗaiye apevure, muje cōmaje āroje jáiye apevure, aru muje ju aye Jūmenijicure máre. <sup>24</sup>Muja ɗavavū yópe jári eabevu ne jipocateiyepe pōevare. Iye parubede dápiavavū muja. Que teni ɗavavū yópe pōecu ūi íyepe jujicure ūi ūcuidore jocarī, ūbenita ūi járúoiyepe camello āmicucu āimacu uracure.

<sup>25</sup>Muja, Jūmenijicui yávaiye báquede bueipōeva, aru muja, fariseova, jujovaiɣu, chīorajaramu muja. Jūmenijicu ñájine ɗacɣuɣu me mujare. Muja joavavū muje ūcuidoare aru jororware máre puenomia, pōeva ne jáinore. Ūbenita mujavacari tatoiyurivubu apevu ne cavaede. Que teni āmeno baju ɗavavū muja. Que baru mearo ɗaiye apevure mearotamu joare ɗaicōjeiye pueno. <sup>26</sup>Muja, fariseova, ɗavavū yópe jári eabevupe paivu ne ūmei. Muje joraru mamarumure ūcuido jívui aru jororu jívui eabevupe paivu ne ūmei. Muje jororu pueno máre docucubequiyebu. Quédeca dápiavɣu baru me, ɗarājaramu me máre.

<sup>27</sup>Muja, Jūmenijicui yávaiye báquede bueipōeva, aru muja, fariseova, jujovaiɣu, chīorajaramu muja. Jūmenijicu ñájine ɗacɣuɣu me mujare. Mujatamu yópe yaivu bácvu ne epeñamia boriñamiape paivu. Diñamiare pōeva ne járú jedevai, meadamiape ārojariñamiamu. Ūbenita diñamia jívui, buidíñamiamu yaivu bácvu ne cūaɗoque, aru docucueque máre. <sup>28</sup>Quédeca pōeva ne járú mujare, mearape aru mearore ɗavupe ārojariɣubu muja ne jáiyede. Ūbenita muje ūmei dápiavavū jujovaiɣupe paivu aru āmenore ɗavupe paivu máre.

<sup>29</sup> 'Muja, Jūmenijicui yávaiye báquede bueipōeva, aru muja, fariseova, jujoaivū, chīorajaramu muja. Jūmenijicu nājine đacuyume mujare. Muja đadavū meadāmia cūramiare ina Jūmenijicui yávaiyede coyūcaipōeva mácavū ne jobocobea báque puenoi. Aru muja meadađavū ārūriñāmia cūramiare ina meara mácavure. <sup>30</sup> Yópe borocurī adavū muja: "Majeñecua mácavū ne curinūmu curivū baru maja, ne boarí jarūvaiye báquede ina Jūmenijicui yávaiyede coyūcaipōeva mácavure cadatebejebu maja", adavū muja. <sup>31</sup> Ūbenita mujavacari jádovadavū ina Jūmenijicui yávaiyede coyūcaipōeva mácavure boarí jarūvaivū bācavure paivure. <sup>32</sup> Maumejiena iye āmeina đaiyede mujeñecua mácavū ne buiye báquede bubajarā muja, muje boarí jarūvarājiyede yure, Jūmenijicui daroimū mácure.

<sup>33</sup> 'iMuja, jujoaivū, āđavape paivubu muja! Muje toabo cūiméboi nājinajiyede jocarī, dupini nuivū buojabenamu muja. <sup>34</sup> Que baru yū daroquijivū muje yebai Jūmenijicui yávaiyede coyūcaipōevare aru ūmūva majidivure, aru Jūmenijicui yávaiye báquede bueipōevare máre. Apevū nācavure boarí jarūvarājaramu muja. Apevure jocūcujaravena pēvari, boarí jarūvarājaramu. Apevure jara popenajaramu maja judíova maje cōjjiñāmiai. Aru apevure cujurājaramu muja ĩmaroa coapa. <sup>35</sup> Que baru Jūmenijicu nājine đacuyume mujare, caivū meara mácavū ne yaiye báque boje ijarāvure, apecū ūi boarí jarūvaiye báque boje nāi Abel bācure, aru apevū ne boarí jarūvaiye báque boje caivū Abel bācui yóbocavū bācavure máre, pū Zacarías bācu bajita, Berequías bācui mācu bācure, nāi mujacavū bācavū ne boarí jarūvaimū mácure Jūmenijicui cūrami tāibū coricai. <sup>36</sup> Jāve coyuyubu mujare: Muja ijarāvucavū nājinajaramu, muje āmeina đaiye boje, arī buedejame Jesús.

### **Jesús ūi oino, Jerusalécavure jecucu**

(Lc 13.34-35)

<sup>37</sup> Yópe arejame Jesús:

—iMuja, Jerusalécavū, mujeñecua mácavū boarí jarūvarejaquemavū ina Jūmenijicui yávaiyede coyūcaipōeva mácavure! Cūraboaque đavarī boarí jarūvarejaquemavū ina Jūmenijicui daroimara mácavure ne yebai. Obedinūmua cōjijovaiyurīduvū yū mujare ji yebai, yópe cáyuco ōi cōjijovaiyepē mamarare ōi caveba cāchinoi. Ūbenita ūbeteavū muja. <sup>38</sup> Jájara. Dinūmu maquinó muje cūrōre Jūmenijicu dajocarī jarūvacuyume. <sup>39</sup> Aru coyuyubu mujare: Yure jámenajaramu muja cojedeca pū jádovacūdayure meacu bajure jáivūta. Dinūmu maquinóre arājaramu yópe: "Torojue bajeđeni nāi dayure Jūmenijicui āmiái, ūi parūéque", arejame Jesús.

### **Jesús ūi coyūino "Jūmenijicui cūrami tuquiyebu" arī**

(Mr 13.1-2; Lc 21.5-6)

**24** <sup>1</sup> Jesús etayū bācu Jūmenijicui cūramine jocarī, nūja ūi bueimara ūi yebai nuri, jádovarejagarā diñāmia cūramiare, Jūmenijicui cūramicađāmiare. <sup>2</sup> Aru nūjare arejame:

—Caiñāmia diñāmia uradāmia cūramiare jáivubu muja. Jāve coyuyubu mujare: Cūináva cūrava mautebequiyebu apeva puenora. Caiye iva cūrava tuquiyebu, arejame Jesús.

### Jáðovaiye járavũ cũiquíye jipocai

(Mt 10.22; Mr 13.3-23; Lc 17.22-24, 31, 37; 21.7-24; Ap 7.14)

<sup>3</sup> Jesús dobarejame cŭracũ Olivocũ ámicuricũ puenoi. Ẽi dobaede noi, ñũa, ẃi bueimara, jēniari járējacarā ẃre yavenina, pōevare jocarĩ:

—Coyŭjacũ ñũjare: ¿Aipiyede tuquidi caiye iye cŭramia ẃradámia? ¿Aipe ðarĩ coreóvarājidica ñũa mi copaidaquíyede? ¿Aipe ðarĩ majinajidica ñũa jįravũ cũiquíyede? jēniari járējacarā ẃre.

<sup>4</sup> Ñũjare yópe arĩ, coyŭrejame Jesús:

—Me járara apecũ ẃjovaiyũcũre mũjare. <sup>5</sup> Obedivũ ẃmũva ðarĩ arājarama “Cristobũ yũ”, ẃjovarājivũ obedivũ pōevare. <sup>6</sup> Aru “Pōeva boadáma apecũ pōevaque” ne borore jápiarĩ, aru “Pōeva boarājarama apecũ pōevaque” ne borore máre jápiarĩ, jidubejár mũja. Que baru caiye iye vaiye jaũvũ, járavũ cũiquíye jipocai. Ẽbenita cũiímẽbu cãreja. <sup>7</sup> Cũiináyubũ pōeyajubocavũ áðamatenajarama apecyubũ pōeyajubocavũque. Aru cũiináro jaboteinocavũ áðamatenajarama apeno jaboteinocavũque. Joborõ cũiquíyebũ obedicũrõare. Ñájinajarama ávũena. <sup>8</sup> Iye ñájiye baquíyẽbu yópe ẃeðocũ pōeteyũre ñájiyepe. Yópe búquíyebũ caiye iye ámeina ñájinajiye.

<sup>9</sup> Mũjare jēni jįnajarama, mũje ñájinajiyepe aivũ. Aru mũjare boarĩ jarũvarājarama na. Mũjare cainoa jaborõacavũ jorojĩni járajarama, yũre mũje ẃũ aiyẽ boje. <sup>10</sup> Dinũmũ maquinóre obedivũ yũre ẃũ aivũ bácvũ dajocarājarama ne yũre ẃũ aiyẽ báquede. Obedivũ jēni jįnajarama névũre ne mauvare. Aru obedivũ jorojĩni járajarama névũre máre. <sup>11</sup> Obedivũ borocũrivũ “Jũmenijicũ yávaiyede coyũcaipõecũbũ yũ” arĩ, ẃbenina coyũcarĩduivũ, pōevare ẃjovarãðarājarama. <sup>12</sup> Dinũmũ maquinóre obedivũ pōeva ẃrarõ baju ámenore ðarājarama. Que baru obedivũ pōeva ẃbenajarama apecũ pōevare. <sup>13</sup> Ẽbenita ñai ẃũ yũre ẃi yainũmũita, ẃ macũyũme ji meaðaimũ. <sup>14</sup> Mamarũmũre yávaiye méne Jũmenijicũ jaboteinora coyũiye jaũvũ cainoa joborõacavũre, ne jápiarājiiyepe aivũ diede. Que baru cainoa joborõacavũ iye yávaiye méne coreóvaivũ barājarama. No yóboi járavũ cũiquíyebũ.

<sup>15</sup> Ẽbenita iye vaiquíye jipocai, ñai ẃmũ pare ámecũ núcũyũme nore, Jũmenijicũ cuiçõjemenore ẃre, yópe Daniel ámicũcũ Jũmenijicũ yávaiyede coyũcaipõecũ bácvũ ẃi coyũiye báquepedeca. Caivũ járĩ boroteivũ iye toivaiyede me dápiajarãri caiye iyede. Ñai ẃmũre járajaramũ mũja. <sup>16</sup> Judeacavũ dupini mũjarari cŭracũai, ne jidũe boje ñai ẃmũre. <sup>17</sup> Aru ñai cŭrami pũenora cũcũyũ, ẃi dupini nuiyede, ẽmeni, ðarĩ, ñũvariducũyũ ẃi apejiene, ecobejacurĩ ẃi cŭrami. <sup>18</sup> Aru ñai jiore memecũyũ, ẃi dupini nuiyede, copainũmejacurĩ, ñiducũyũ ẃi cuitótecaje puenocacajede. <sup>19</sup> ¡Cõmajẽ árojarajarama ina nomiva micava bárãjivũ dijãravũ baquíyẽde! ¡Aru ina nomiva némajina nuri dajocabevũre cũvarãjivũ máre pare ñájinajarama dijãravũ baquíyẽde! <sup>20</sup> Jēniajara Jũmenijicũque iye vaibéquíyepe aivũ ocorũmũre aru jabũóvãjįravũ sábadore máre.

<sup>21</sup> Dijãravũ baquíyẽde pōeva ẃrarõ ñájinajarama. Nópe paiye cũbevũ cãreja, mamarũmũmata Jũmenijicũ ẃi cũeðarĩ buinũmũre pũ caride máre. Aru cainũmũ cũbequíyebũ. <sup>22</sup> Jũmenijicũ ẃi javaiyobedu dijãravũ ñájiovaquíjįravũ baquíyẽde, caivũ yaijẽbu. Meaðaimara cũbejebũ. Ẽbenita

Jūmenijicu javaiyocuyume dijāravua nājiovaquijāravua baquiyéde, ũi beoimara mácavure boje.

<sup>23</sup> 'Dijāravua baquiyéde apecu ũi aru mujare yópe, "Jájara. ¡Ñainecabe Cristo!" o apecu ũi aru mujare, "¡Ññurecabe Cristo!" náre ju abejarā. <sup>24</sup> Que teni obedivu borocurivu darī, coyurājarama "Cristobu yu". Aru apecu máre Jūmenijicui yávaiyede coyucaridurājarama. Ūbenita Jūmenijicui yávaiyede coyucaipōeva baju āmenajarama na. Ūrarō pōeva ne jámene aru ne darī majibede máre darājarama, jujovaliyuriduivu Jūmenijicui beoimara mácavure. <sup>25</sup> Ūbenita me jájara muja. Coyuyubu mujare ne borore, muje majinajiyeye ayu, ne darājiye jipocai. <sup>26</sup> Que baru apecu ne aru "Jájara. Ūnai Cristo cubi pōecubenoī", nūmejara muja nore. Aru apecu ne aru "Jájara. Ūnai Cristo cubi tucubu jívui", ju abejarā ne nōpe coyuiyede.

<sup>27</sup> 'Jūmenijicui daroimu mácū ũmūpe, yaroinope nuquiyebu ji copaidaquijāravu baquinóre. Yópe no yaroino pēoiyeye cavarōi, aviá dainocapūravure jocarī pu aviá doinocapūravuita, caivu pōeva ne járajaiyeye ayu nore, nopedeca copaidacuyumu yu. Aru caivu pōeva járajarama ji copaidaquiyede ijāravui. <sup>28</sup> Āri yayiú bácui curōi, noi cójjinajarama cavava. Nopedeca caiye iye ji coyuiyede jáivu, majinajaramu muja ji copidaquino joabenore, ji nājiovaquinore pōevare, ne āmeina teiye boje, arī buedejame Jesús.

#### **Jūmenijicui daroimu mácū ũmūpe ũi copidaquino**

(Mr 13.24-37; Lc 12.39-40; 17.26-30, 34-36; 21.25-33; Ap 1.7; 6.12-13)

<sup>29</sup> Bediōva cojedeca Jesús, yópe arī, coyurejame ñujare:

—Cūinājāravu dijāravuacajāravu baquinói, iye ūrarō ñājiniburu yóboi, aviá ñemitēcuyume. Aru aviá ñamicacu máre pēomēcuyume. Na abiácova turājarama cavarōre jocarī. Aru caivu ina parurivu curivu cavarōi cújinajarama. <sup>30</sup> Dinumu maquinóre Jūmenijicui daroimu mácū ũmūpe ji copaidaquiyede jádovaiye jároquiyebu cavarōi. Aru caivu pōeyajubocavū ijāravucavū chīori orājarama. Dinumu maquinóre járajarama yure, Jūmenijicui daroimu mácure ũmūpe, dayure ocopeniboai, ūrarō paruéque, jádovañure meacu bajure. <sup>31</sup> Que teni trompeta āmicuriyo japuiyore japuiye pare bujiéque, ji ángelevare darocuyumu yu. Nácapūravu cójjiovarājarama Jūmenijicui beoimara mácavure, caivu aviá dainocavure aru caivu aviá doinocavure máre, cainoa joborōacavure.

<sup>32</sup> 'Majijarā yo muje jáinore. Icu jocucu higeracu āmicuricure yoca yuiyede, majivu muja ũjurūmu joabenore. <sup>33</sup> Nopedeca jáivu caiye iye teiyede, majinajaramu muja jāravu cūino joabenore. <sup>34</sup> Jáve coyuyubu mujare: Apecu ijāravui curivu yaibédeca cāreja, vaiquiyebu caiye iye yópe ji coyuiyeye. <sup>35</sup> Caino cavarō, aru caino joborō máre cūiquiyebu. Yópe ji yávaiyepedeca jáve vaiquiyebu.

<sup>36</sup> Ūbenita dijāravu baquinóre aru diora baquinóre ñame majibema. Ángeleva, ina curivu Jūmenijicūque cavarō mearoi, aru yu, Jūmenijicui mácū máre, majibevu ñuja. Quénora jipacu majibi dijāravu baquinóre.

<sup>37</sup> 'Dijāravua baquiyéde, Jūmenijicui daroimu mácū ũmūpe ji copaidaquijāravu jipocai, cuquiyebu nōpe ānijāravua Noé mácui curijāravua báquepe. <sup>38</sup> Ānijāravua báquede, muiváibo daquiyé jipocai, caivu pōeva

āivū barejaquémavū, aru ūcuivū barejaquémavū. Ūmūva purubuoivū barejaquémavū. Aru jīvū barejaquémavū nēmaromivare, ne purubuoarājiyepe aivū. Nópe tedejaquemavū, Noé mácui jiādocū ūracūre ecoijāravū bácarōita. <sup>39</sup> Ūbenita ne bíjarājiyede coreóvabedejaquemavū, pū muiváibo daiyeta. Aru caivū ina pōeva corí bíjarejaquemavū na mácavū. Nopedeca baquiyébu Jūmenijicui daroimū mácū ūmūpe ji copaidaquiyede. <sup>40</sup> Dinūmū maquinóre pūcarā ūmūva memenajarama ne jioi. Cūinácū nūvaimū macūyáme, yure ūi jū aiyē boje. Aru apēcū mautečūyume, yure ūi jū abe boje. <sup>41</sup> Pūcarā nomiva jīorajarama ne cūrami jīvūi. Cūináco nūvaimo macodóme, yure ōi jū aiyē boje. Aru apēco mautečodóme, yure ōi jū abe boje.

<sup>42</sup> 'Que baru me jājara mūja. Mūja majibevū ji copaidaquijāravūre, ji jabotequiyede mujare. <sup>43</sup> Ūai cūrami upacū majibebi aipiyede űnavaipōēcū dacūyure. Majicū baru űnavaipōēcū ūi daiyede, coreni, ecoicōjemēni, űnavaicōjemejebu ūi cūramiquede. <sup>44</sup> Aru mujare máre meadaiye javū. Que baru yū máre, Jūmenijicui daroimū mácū ūmūpe, dacūyumu mūje corebeorai yure, arī buedejame Jesús.

**“Memecaipōēcū jū ayūre aru memecaipōēcū jū abecūre” jāri dāpiarī ne darājiyepe aino**  
(Lc 12.41-48)

<sup>45</sup> Bediόva jāri dāpiarī űnje darājiyepe arī, buedejame Jesús:

—Coyūquijivū mujare ūi borore űnai memecaipōēcūre jū ayūre ūi jabocūre aru majicūre máre. Ūai cūrami upacū coreicōjecūyūbe űnai memecaipōēcū majicūre, ūi jīquiyēpe ayū yebacavūre ne ārajīyeva caijāravūa. <sup>46</sup> Ūai cūrami upacū copaini dayū earū ūre memecaipōēcūre dayūre yópe ūi cōjeinope, torojūcūyūbe űnai memecaipōēcū, cūrami upacū ūi jīquiyē boje ūre bojedaino mearore. <sup>47</sup> Jāve coyūyūbu mujare: Ūai cūrami upacū coreicōjecūyūbe űnai memecaipōēcūre caiye ūi cūvaede. <sup>48-49</sup> Ūbenita űnai memecaipōēcū, jū abecū baru ūi jabocūre, “Ji jabocū maume dabecūbe” arī, aru āmeina dayū baru ūi yebacavūre aru yebacarōmivare máre, ūrarō āri aru ūcuri pacotecūyūbe ū. <sup>50</sup> Que teiyede ūi jabocū dacūyūbe űnai memecaipōēcū ūi corebejāravū baquinói aru ūi majibeora baquinói máre. <sup>51</sup> Aru űnai jabocū jarūvaicōjecūyūbe ūre jūjovaivūre ne jarūvainoi, ūi űjāquiyēpe ayū noi. Nore chōioivū orī, curājarama pōeva. Aru jararī cōpi cūrajarama na, arī buedejame Jesús.

**“Cairūcapūruape paivū bojurōmivare” jāri dāpiarī ne darājiyepe aino**  
(Lc 12.35; 13.25)

**25** <sup>1</sup> Yópe arī, jāri dāpiarī űnje darājiyepe ainoque buedejame Jesús:

—Dijāravū baquinói, ji copaidaquijāravūi, Jūmenijicui jaboteino yópe baquiyébu cairūcapūruape paivū bojurōmiva ne daiye báquepe. Ina bojurōmiva, ne pēoibūare náre coapa īni, copū etaquemavū űnai purubuoayūre ūi daiyede. <sup>2</sup> Cūinápūruape paivū nácavū majibevū batequémavū. Aru apēvū cūinápūruape paivū nácavū majidivū batequémavū. <sup>3</sup> Ina majibevū, ne nūvaiyede ne pēoibūare, neore nūvametequemavū. <sup>4</sup> Ūbenita ina majidivū, ne nūvaiyede ne pēoibūare, nūvaquemavū ne neobūare máre neoque. <sup>5</sup> Ūai purubuoayū ūi dabe boje cāreja, caivū ina bojurōmiva cāquemavū.

<sup>6</sup> Ëbenita ñami corica baji codoboboïyede jápiaquemavu na. “Jájara. Ñai purubuoyu daibi. Ëre copu etajarā muja”. <sup>7</sup> Diede jápiarī, caivu ina bojurōmiva coedaquemavu. Aru ne pëoibũare meadaquemavu na. <sup>8</sup> Que teni ina majibevũ, yópe arī, jëniariduquemavu ina majidivũre, “Ñũje pëoibũa codaibuatamu. Que baru jjárā ñujare majióvarijĩno muje neoquede”, arīduquemavu na. <sup>9</sup> Ëbenita ina majidivũ, yópe arī, coyũquemavu náre, “Bi, jíbevũ mujare. Neo eabequiyebu ñujare aru mujare máre. Quénora neore bojedainoi bojedarāñujara muja, inajivu mujeva”, aquemavu na. <sup>10</sup> Ne neore bojedarāñuiyede, ñai purubuoyu daquemavu. Ina bojurōmiva meadaivu bácavu ecoquemavu ãque, ārajivu torojuve teinoi. Aru no cūrami jedevacobede biequemavu. <sup>11</sup> No yóboi ina bojurōmiva meadabevũ bácavu edaque mavu torojuve teĩnamĩ máre. Aru yópe arī, “Mu, ñũje jabocu, voacajacu ñujare”, jëniariduquemavu. <sup>12</sup> Ëbenita ñai purubuoyu yópe aquemavu náre: “Jãve coyuyubu mujare: Jívu ãmevu muja. Mujare coreóvabevu yu”, aquemavu ñi ina bojurōmiva majibevũre, arejame Jesús.

<sup>13</sup> Aru buede nurejame Jesús:

—Que baru meadaimara mājara muja, muje majibe boje ye jāravũre aru ye órare máre ji copaidaquiyede, mujare meadaiye jauquinore, arejame Jesús.

**“Tãuturare” jári dápíarī ne ñarãjiyepe aino**

(Mt 8.12; 13.12; 22.13; Mr 4.25; Lc 8.18; 13.28; 19.11-27)

<sup>14</sup> Yópe arī, jári dápíarī ñũje ñarãjiyepe ainoque buedejame Jesús:

—Dijāravũ, ji copaidaquijāravũ baquinói, Jũmenijicui jaboteino yópe baquiyébu cūnácũ ãmu apenõ jaborõi nucũyu ñi ñaiye báquepe. Ëi nuquiyi jipocai, órejaquemavu ãre memecaipõevare, epecũyu ñi cuvaede náque, ne jári coreñajiyepe ayu diede. <sup>15</sup> Cūinácũ nácacũre epequemavu cūinápũrũpe paimil turava tãuturatũravare. Apecũ nácacũre epequemavu pũcamil turava tãuturatũravare. Aru apecũre epequemavu cūinámil turava tãuturatũravare. Ne majiépe epequemavu náre coapa. Caiye iyede epeniburu yóboi, nuquemavu ñai ãmu. <sup>16</sup> Ñai memecaipõecũ jacopũyu bácũ cūinápũrũpe paimil turava tãuturatũravare bojedacũnuquemavu dieque. Aru eaquemavu ape cūinápũrũpe paimil turava tãuturatũravare. <sup>17</sup> Quédeca ñai memecaipõecũ jacopũyu bácũ pũcamil turava tãuturatũravare bojedacũnuquema vu dieque. Aru eaquemavu ape pũcamil turava tãuturatũravare. <sup>18</sup> Ëbenita ñai memecaipõecũ jacopũyu bácũ cūinámil turava tãuturatũravare ãcũnuquemavu joborõi, yavecũyu diturava, ñi jabocui tãuturatũravare.

<sup>19</sup> Obedijāravũ yóboi, ñai jabocu copaidaquemavu. Corevacudaquemavu ne bojedaiyede ñi epeiye báqueque náre. <sup>20</sup> Ñai jacopũyu bácũ cūinápũrũpe paimil turava tãuturatũravare nuquemavu ñi jabocu yebai. Nuvaquemavu caipũcapũrũape paimil turava tãuturatũravare. Aru aquemavu, “Mu, ji jabocu, mu epeávũ cūinápũrũpe paimil turava tãuturatũravare yure. Diede bojedarī, ívu yu ape cūinápũrũpe paimil turava tãuturatũravare”, aquemavu ñi. <sup>21</sup> Que baru ñai jabocu aquemavu ãre, “Mearo ñarebu mu. Memecaipõecũ meacũbu mu. Daivu mu yópe ñaiye jauépe. Mi mearo ñaiye boje quĩjinoque, epequijivu mure pũeno baju. Caride torojucũyũmu mu, yópe ji torojuepe”, aquemavu ñai jabocu. <sup>22</sup> Aru ñai jacopũyu bácũ pũcamil turava

tăuturaturavare nuquemavu ũi jabocu yebai. Ũi jabocure aquemavu, “Mu, ji jabocu, mu epeávũ pucamil turava tăuturaturavare yure. Diede bojedari, ívũ yũ ape pucamil turava tăuturaturavare”, aquemavu ũ. <sup>23</sup>Que baru ñai jabocu aquemavu ũre máre, “Mearo darebu mu. Memecaipõescu meacubu mu. Ðaivu mu yópe ðaiye jauépe. Mi mearo ðaiye boje quíjinoque, epequijivu mure pũeno baju. Caride torojucuyumu mu, yópe ji torojuepe”, aquemavu ñai jabocu.

<sup>24</sup>Ũbenita ñai jacopuyũ bácu cūinámil turava tăuturaturavare nuquemavu ũi jabocu yebai. Ũi jabocure aquemavu, “Mu, ji jabocu, jidojacubu mu. Mu ñĩũmu apescu ũi epeiye báquede. Aru mu jẽũũmu apescu ũi oteiye báquede. <sup>25</sup>Que baru jiduvũ yũ mure. Aru yavecacu mi tăuturare joborõ jívũ. Yui cuvavu mi tăuturare”, aquemavu ũ. <sup>26-27</sup>Ũbenita ñai jabocu aquemavu ũre, “Mu, memecaipõescu amecubu. Jũracucubu mu. Yũ ñĩũre apescu ũi epeiye báquede aru jẽũũre apescu ũi oteiye báquede majicuvacari, epecunũri jauřĩdurebu mure ji tăuturare tăutũra epeiĩami. Mi que ðaru, copaini dayũ jacopũjebu yũ ji tăuturare pũeno baju, diĩamicavu ne bojedaiye báque cojióri”, aquemavu ñai jabocu. <sup>28</sup>Que baru ñai jabocu apẽvũre ícõjeni aquemavu, “Íjara ũre jocarĩ yo cūinámil turava tăuturaturavare. Aru jĩjarã ñai caipũcarũgũape paimil turava cuvacure. <sup>29</sup>Caivu cuvãrĩvũ jacopũrãjarama pũeno baju, cuvãrãjĩvũ urarõ baju. Ũbenita caivu dãpiaivũre cuvãrĩvũpe apẽvũ pũeno, caiyede náre ícũyumu yũ. <sup>30</sup>Aru ñai memecaipõescu yure cadatebecure jaetovajarã joai ñeminoi, ũi ju abe boje yure, ũi coatequiyẽpe aivũ yure jarũvarĩ. Noi põeva chĩoivũ orĩ, curãjarama. Aru jararĩ, cõpi curãjarama na”, arĩ buedejame Jesús.

### **Jesús ũi bojedaino caivũre yópe ne ðaiye báquepe**

(Mt 16.27; 19.28; 1 Co 8.12; He 13.3)

<sup>31</sup>Yópe arĩ, coyũrejame Jesús:

—Yũ, Jũmenijicui daroimũ mácu ũmũpe, meacu baju dacũyumu ijãravũ. Aru caivũ ina ángeleva darãjarama yáque. Edarĩburu yóboi, dobacũyumu jabocui dobarõ mearora. <sup>32</sup>Ji jipocai cójijĩnãjarama caivũ ijãravũ joborõacavu. Yópe oteiãimarare coreipõescu ũi beoiyẽpe ovejavare ñĩi cabravare jocarĩ, nopedeca beocũyumu yũ ina põevare. <sup>33</sup>Yópe ũi epeiyepe ina ovejavare ũi meapũravũ aru ina cabravare ũi cãcopũravũ, nopedeca beorĩ epecũyumu yũ ina põevare.

<sup>34</sup>Beorĩburu yóboi, acũyumu yũ, caivũ ne jabocu, ina põeva meara ji meapũravũi curĩvũre, “Dajarã muja. Mujamu jipacui mearo ðacaimara. Ji jaboteimara mãjara muja. Jipacu Jũmenijicu ũi cuedaiye báquedata caiyede, meadacarejaquemavu yo jaboteinore mujare boje. <sup>35</sup>Yũre ávũé ijiteavũ. Aru ãiyede jĩavũ muja yũre. Yũre cūĩnóavũ. Aru ũcuiyede jĩavũ muja yũre. Joai cucũdacacu muje yebai. Aru yũre copũ etavũ muja. <sup>36</sup>Cuitótẽcaje cuvãbetecacu yũ. Aru ji doiyeve jĩavũ muja yũre. Ijĩmu matecácu yũ. Aru ji yebai curãdavũ muja. Jabova ne bũoimũ matecácu yũ ámeina teivũre jẽni jacoĩnami jívũ. Aru yũre jãradavũ muja noi”, acũyumu mujare. <sup>37</sup>Que ayũre, ina põeva meara, ji meapũravũcavu, yópe arãjarama yũre: “Mu, ñũje jabocu, ¿aipiye mure áuyaiyũre jãri, ãiyede jiarĩ ñũja? ¿Aipiye mure cūĩnóimũre jãri, ũcuiyede jiarĩ ñũja? <sup>38</sup>¿Aipiye mure joai cucũdayũre jãri,

copu etarí ñuja? ¿Aipiyede mure cuitótecaje cuvabecure jári, mi doiyeve jiarí ñuja? <sup>39</sup> ¿Aipiyede mure ijimure aru mure ne buoimure jári, járadarí ñuja?” arājarama yure. <sup>40</sup> Aru yu, caivu ne jabocu, acuyumu náre: “Jāve coyuyubu mujare: Muje cadateiyede cūinájicu ina jívucacure parubecureca, yure muje cadateiyepebu”, acuyumu yu.

<sup>41</sup> Dinumu maquinóre ina pōeva āmenare, ji cācopūravui curivure yópe acuyumu yu: “Ñujara muja yure jocarí. Mujamu jipacui āmedaimara. Ñujara muja toabo cūiméboi. No meadaino mácaróre abujuvai jabocui curóre ũi ángelevaque. <sup>42</sup> Yure āvúé ijiteavũ. Ūbenita āiyede jíbeteavũ muja yure. Yure cūiñóavũ. Ūbenita ũcuiyede jíbeteavũ muja yure. <sup>43</sup> Joai cucudacacu muje yebai. Ūbenita yure copu etabeteavũ muja. Cuitótecaje cuvabeteacacu yu. Ūbenita ji doiyeve jíbeteavũ muja yure. Ijimu matecácu yu. Aru jabova ne buoimu matecácu yu āmeina teivure jēni jacoĩnami jívui. Ūbenita yure járadabeteavũ muja”, acuyumu yu. <sup>44</sup> Que ayure, ina pōeva āmena, ji cācopūravucavu, yópe arājarama yure: “Mu, ñuje jabocu, ¿aipiyede mure āuyaiyure, o cūiñóimure, o joai cucudayure, o cuitótecaje cuvabecure, o ijimure, o jabova ne buoimure jári, ũbenita mure cadatebetearí ñuja?” arājarama na. <sup>45</sup> Aru yu acuyumu náre: “Jāve coyuyubu mujare: Muje cadatebede cūinájicu ina jívucacure parubecureca, yure muje cadatebepedecabu”, acuyumu yu. <sup>46</sup> Aru nácapūravu nurajarama toabo cūiméboi, ñájinajivu cainumua. Ūbenita ina meara ecorājarama ji jaboteinore, me curājivu cainumua, arí coyurejame Jesús.

#### Jesús ũi coyũino ne jēnainore ũre yóboimia

(Mr 14.1-2; Lc 22.1-2; Jn 11.45-53)

**26** <sup>1</sup> Caiye iyede Jesús coyurí buojarí, yópe arejame ñuja ũi bueimarare: <sup>2</sup> —Majivu muja. Pascua āmicurijāravu aru páure bucure ñaiye cube āiye torojuve teinumu pucajāravua jipocai barejávũ cāreja. Aru dinumu maquinóre yure, Jūmenijicui daroimu mácure ũmure, jēni jínajarama ji mauvare, ji yaquíyepe aivu jocucujaravena, arejame Jesús.

<sup>3</sup> Dinumure sacerdotevare jaboteipōecu Caifás āmicurejame. Apevu sacerdotevare jaboteipōeva aru judíova bucuvu cójijidejaimada ñai Caifás ũi cūrami. <sup>4</sup> Cójijivu, ne bajumia majicarejaimada Jesúre jujovarí jēni, boarí jaravarājivu yavenina. <sup>5</sup> Ne bajumia arejaimada:

—Torojuve teinumu ũre jēmenajarevu maja. Ũre jēnu torojuve teinumu, pōevacapūravu jorojĩni, majare boarí jaruvaiyujebu, arejaimada ina judíovai jabova.

#### Cūináco nomió ōi mumijue yuaino Jesúre

(Mr 14.3-9; Lc 7.37-38; Jn 12.1-8)

<sup>6-7</sup> Dinumure Jesús ũi cuede Betania āmicuríimajinoi, Simón pojeyu bácu cūrami tuoiva yebai āivu barejacará ñuja. Que teni cūináco nomió darejaco Jesús yebai. Ico nomió davarejaco cūinábu ũmujaribu boribure, mumijaricoro curibure. Iye mumijue, nardo āmicue, pare mearo corajurejavũ. Aru pare bojecue barejávũya. Que ñari ico nomió yuarejaco caiye iye mumijuede Jesúni jipoburã. <sup>8</sup> Ūbenita ñuja Jesúni bueimara ōi nópe ñaiyede jári, jorojĩni arejacadã:

—¿Aipe teni iye mumijuede jaruvadoba ò? <sup>9</sup>Diede bojedari, urarò boje ini, jiye jawebu òre cùve cùvabevure, arejacadà ñuja.

<sup>10</sup>Ëbenita Jesús, diede coreóvayü, arejame ñujare:

—¿Aipe teni ico nomióre càrijovaivurü muja? Òi ðaiye yure mearotamu.

<sup>11</sup>Cainumua ina cùve cùvabevü curàjarama mujaque. Ëbenita yu cubecubu mujaque cainumua. <sup>12</sup>Òi yuaiyede dicorore yurà, meadacaibico ji bajure, ne jaravaràjiyepe ado. <sup>13</sup>Que baru jàve coyuyubu mujaque: Cainoa joboròai ijàravui pòeva ne coyuiyede iye yávaie méne ji meadaiyede pòevare, iye òi yure ðacaiyede máre coyuràjarama, ne àruràjiyepe aivü òre, arejame Jesús.

### **Judas üi jèni jino Jesúre**

(Mr 14.10-11; Lc 22.3-6)

<sup>14</sup>No yóboi cùinácü ñujacacü, doce paivü Jesúi bueimaracacü, üi àmià Judas Iscariote, nurejameda ina sacerdotevare jaboteipòeva yebai. <sup>15</sup>Ñai Judas náre jèniari járejameda:

—¿Ji Jesúre jèni jídu mujaque, aipino jínajivurü muja yure? arejameda ü.

Aru treinta paiturava plataque ðaiturava tauturatavare jídejaimada úre.

<sup>16</sup>Que baru dinumumata Judas jári, coreni búrejameda yavenina, jèni jícyu Jesúre.

### **Jesús üi áino üi bueimaraque**

(Mr 14.12-25; Lc 22.7-23; Jn 13.21-30; 1 Co 11.23-26)

<sup>17</sup>Páure bucure ðaiye cube áie torojuve teinumu mamabuijàravu barejávü. Aru dijàravure Jesús yebai nuri, jèniari járejacadà ñuja, üi bueimara:

—¿Ari nuri, mure maje Pascua jàravuque áiyede meadacaràjídica ñuja? arejacadà úre.

<sup>18</sup>Aru arejame Jesús:

—Jerusaléi nuri, ñai ümu, ji aimu mácu, üi cùrami nuja muja. Úre yópe ajarà muja, “Maje bueipòecu aibi, ‘Joabèjìnotamu ji yaiquíno. Que baru mi cùrami àquijivü yu Pascua jàravuquede ji bueimaraque’, aibi maje bueipòecu”, ajarà muja, ñujare arejame Jesús.

<sup>19</sup>Úre ju arí, ìmaroi nuri, ðarejacadà ñuja yópe Jesús üi aie báquepedeca. Noi Pascua jàravuque áiyede meadarejacadà ñuja. <sup>20</sup>Que teni meadarí bujarí, nainú bají, avià üi dorìburu yóboi, darí dobarejame Jesús tuoiva yebai, ñuja üi bueimara doce paivüque. <sup>21</sup>Ñuje áiyedeca, Jesús arejame ñujare:

—Jàve coyuyubu mujaque: Mujaacacü cùinácü yure ji mauvare jèni jícyume ü, arejame Jesús.

<sup>22</sup>Que baru chíoiü barejacadà. Aru ñuja coapa yópe arí búrejacadà Jesúre:

—¡Mu, ji jabocu, que ðabecubu yu! ¿Múcarí? arejacadà ñuja coapa.

<sup>23</sup>Que arí, Jesús arejame ñujare:

—Cùinácü mujaacacü jóyu páure jororúmica yúque, ü macuyúme ji mauvare yure jèni jíyu. <sup>24</sup>Yu, Jümenijicui daroimu mácu ümupe ijàravui, ji yaijàravui nucuyumu yu, yópe Jümenijicui toivaicòjeiye báquepedeca üi yávaieyede. Ëbenita àmeno vaicáyume ü, ñai yure jèni jíyu bacuyú. Ñai nópe ðacuyü, üi pòtebedu meajebu, arejame Jesús.

<sup>25</sup>Judas, úre jèni jícyu, arejame úre:

—Mu, bueipõecu, yu ãmevu mi coyũimu nópe. ¿Múcarĩ? arejame Judas. Úre arejame Jesús:

—Mútamũ ji coyũimu nópe, arejame Jesús.

<sup>26</sup> Ñũje ãiyedeca, páure ñni, Jũmenijicũre torojuede jídejame Jesús. No yóboi, páure cotũvarejame. Aru ñũjare coapa jídejame.

—Páure ãjara muja. Diedecabu ji bajupe, jádovaiye ji yaiquínore mũjare boje, arejame ñũjare Jesús.

Aru ãrejacarã ñũja.

<sup>27</sup> Ũcuidore máre ñni, torojuede jĩni Jũmenijicũre, ñũjare jídejame Jesús, yópe arĩ:

—Jēni, ũcũri, veorĩ, ũcũjara caivũ muja coapa. <sup>28</sup> Diedecabu ji jivepe, jádovaiye ji yaiquínore mũjare boje, Jũmenijicũi ãrumetequiyepẽ ayũ mũje ãmeina teiyede. Jũmenijicũ “Yópe ãjara muja, boropatebenajivũ ji jáinoi”, ãi yóbocarõ coyũino mácarõre põevare ãrurajaramu muja, mũje ũcuiyede diede. <sup>29</sup> Coyũyũbu mũjare: Quénora vino úyaicorore ũcuũũmu yu ijãravure. Ũbenita ãnijãravũ, jipacũi jabotequinũmu maquinóre, bediõva cojedeca ũcũri jácũyũmu yu, arejame Jesús ñũja ãi bueimarare.

Aru ũcurejacarã ñũja.

#### **Jesús ãi coyũino Pedrorẽ ãi “Jesũre yu coreóvabevũ” aquinore**

(Mt 28.16; Mr 14.26-31; Lc 22.31-34; Jn 13.36-38)

<sup>30</sup> Ñũje ãriburu yóboi, Salmos ãmicũe yũriaiyede yũriarejacarã ñũja. Yũriarĩ buõjarĩ, no cãracũ Olivocũ ãmicũricũi nũrejacarã ñũja, Jesújã. <sup>31</sup> Mái nũri, arejame Jesús:

—Yũre dajocarĩ nũrajaramu muja. Yũre vaiquíyede Jũmenijicũ toivaicõjenejaquemavũ, yópe arĩ: “Ovejavare coreipõecũre boarĩ jarũvacũyũmu yu. Aru coateni nũrajarama na, ovejava”, arĩ toivaicõjenejaquemavũ. <sup>32</sup> Ũbenita ji yainĩburu yóboi, Jũmenijicũ ãi nacovaiyede yũre yainore jarũvarĩ, mũje jipocai nũcũyũmu Galileai, arejame Jesús.

<sup>33</sup> Que ayũre, Pedrocãpũravũ arĩdurejame úre:

—Caivũ apevũ ne dajocarĩ nũiyedeca, yúcapũravũ mũre jocarĩ nũmecũbu yu, arĩdurejame.

<sup>34</sup> Aru Jesús arejame úre:

—Jãve coyũyũbu mũre: Cari ñami cáyu ãi órejaquiye jipocai, yóbecũe baju “Jesũre yu coreóvabevũ” acũyũmu mũ, arejame Pedrorẽ Jesús.

<sup>35</sup> Ũbenita Pedrocãpũravũ copũ ayũ barĩdurejame:

—Múque yũre ne boarĩ jarũvaruta, “Jesũre yu coreóvabevũ” abecũbu yu, arĩdurejame Pedro.

Aru ñũja coapa nópe arĩdurejacarã.

#### **Jesús Getsemanĩ ãi jēniaino Jũmenijicũque**

(Mr 14.32-42; Lc 22.39-46)

<sup>36</sup> No yóboi Jesús nũrejame ñũja ãi bueimaraque Getsemanĩ ãmicũrõi. Nore earĩ, arejame ñũjare:

—Yui dobarĩ corejarã muja ji Jũmenijicũque boroteiyede ãnoi, arejame Jesús.

<sup>37</sup> Ñujacavu Pedrore aru ina pucarā Zebedeoi mārare máre nuvarejame Jesús. Chioñu baju ámeno vaidéjamedá. <sup>38</sup> Que teni arejamedá náre:

—Yu ámeno chíori dápiaivu ji yaiquínore. Yui mauteni, jári capujarā muja, arejamedá ñi.

<sup>39</sup> Jipojica báque nuñu Jesús, ñuatutarí, mori turejamedá joborōita. Aru Jūmenijicuque boroteyu barejamedá ñi:

—Mu, jipacu, yure cari vaiquíye vaibéjadeni. Caiyede ðaiye majicutamu mu. Ñbenita ji urōpe ðabejacu. Quénora mi urōpe ðajacu mu, arejamedá jipacure Jesús.

<sup>40</sup> Ina ñi bueimara yóbecurā ne yebai copainuri, náre cáivure earejamedá Jesús. Aru arejamedá Pedrore:

—¿Cūináorajíe cámevava coreiye majibenaru muja yúque? arejamedá Pedrore.

<sup>41</sup> Caivu náre arejamedá:

—Coreni, Jūmenijicuque borotejarā muja, abujuvai jabocu mujare jujovarí, ámeina tede ðabequiepe aivu. Muje ñme ñe parurō mariduivu. Ñbenita muje baju ðaiye bajure parubevu muja, arejamedá náre Jesús.

<sup>42</sup> Cojedeca Jūmenijicuque borotecunurejamedá, yópe arí:

—Mu, jipacu, yure cari vaiquíye jauru, mi urōpe ðajacu mu, arejamedá Jesús.

<sup>43</sup> Ñi bueimara yóbecurā ne yebai copainuri, náre cáivure earejamedá Jesús cojedeca. Ámei vno ijidejavūya náre. <sup>44</sup> Que baru Jūmenijicuque ñi boroteiye báquepedeca bediōva borotecunurejamedá, yóbecue borotecuñu. <sup>45</sup> Boroteni buojarí, ne yebai copainuri, arejamedá náre:

—¿Cáivurū muja cáreja? Jede, quénoramu. Iora jave eaivu. Ijāravui dayu bácu, Jūmenijicui daroimu mácu ñmupe, ámeina teivu ne jēni jínajimumu yu. <sup>46</sup> Nacajajara muja. Copu nurajarevu. Yure ji mauvare jēni jícuyu daibi, arejamedá Jesús.

### Jesúre jēni ne nuvaino

(Mr 14.43-50; Lc 19.47; 21.37; 22.47-53; Jn 18.2-11)

<sup>47</sup> Jesús ñi boroteiyedeca, edarejame Judas, ñujacacu, doce paivucacu. Obedivu pōeva úque darí, boaicarovea aru boaidua ðururí edarejaima, sacerdotevare jaboteipōeva aru judiōva bucava máre ne daroimara. <sup>48</sup> Judas, ñai Jesúre jēni jícuyu, ñi edaquie jipocamia nore, javeta Jesúre boarí jaruvaiyurivure coyurejamedá yópe: “Ji jacoyurí jiva nuimu macuyáme muje jēnajimu. Úre jējara”, arejamedá náre Judas. <sup>49</sup> Jesús yebai nuri, cūiná Judas úre earí, arejame:

—Aru, bueipōecu, arejame Jesúre Judas.

Que arí, úre jiva nuri jacoyurejame. <sup>50</sup> Que teni Jesúcapūravu jēniari járejame Judare:

—Mu, jícu, ¿aipe teni dacurū mu? arejame Jesús.

Que teiyede, Judaque edaivu bácvu Jesúre jēnejaima na. <sup>51</sup> Nópe teiyede jáinata, ñujacacu cūinácu, Jesúque curivucacu, ñi boaicarovede tatorí, duarí, ñni, sacerdotevare jaboteipōecu ñi yebacacure juijórí, najuárejame ñi cámuicare.

<sup>52</sup> Nópe dayure jári, Jesús arejame úre:

—Mi boaicarovede meadajacu m̃. Caivu boaicarovede ini, p̃evare boarájivu, yainájarama na boaicarovequedeca. <sup>53</sup> ¿Coreóvabenaru muja yure jipacu cadateni buojayure? Ji jēniaru jipacure, cūinā darojebu yure doce paiyajuboa ángeleva obedivu ne yajuboare, ne cadatenajipe ayu yure. <sup>54</sup> Ëbenita ji nópe daru, vaibéjebu yópe Jūmenijicui toivaicōjeiye báquepe ũi yávaivede, arejame ñujare Jesús.

<sup>55</sup> Dinumure Jesús arejame ina obedivu p̃evare:

—¿Tatorĩ ñavaip̃ocure jēivupe yure boaicaroveaque aru boaiduaque jēni jacorādaivurū muja? Jārvua coapa muje jēneboi Jūmenijicui cūrami bueyu batecácu yu. Apurĩ mujaque cucure, yure jēni jacobeteavū muja. <sup>56</sup> Ëbenita caiye iye vaivu yópe Jūmenijicui toivaicōjeiye báquepedeca ina ũi yávaivede coyucap̃ovea mácavure, arejame náre Jesús.

Que tedurata ñuja ũi bueimara ũre jocarĩ, dupini ñrejacarā ñuja.

### **Jesúre ne nuvaino judíovai jabova cójijivu yebai**

(Mr 14.53-65; Lc 22.54-55, 63-71; Jn 2.19; 18.12-14, 19-24)

<sup>57</sup> Jesúre Caifás yebai, ñai sacerdotevare jaboteip̃ocui yebai, ñvarejaimada na, ũre jēivu b́acavu. Nore ina Jūmenijicui yávaive báquede buaip̃ovea aru judíova bucúva ne baju cójijini borotenañrejaimada ne jabova baju. <sup>58</sup> Aru Pedrocapūravu joajienata Jesús yóboi nure nuñu mácú, sacerdotevare jaboteip̃ocui táibui ecorejaimada ũ. Nore ecorĩ, Jūmenijicui cūramine coreip̃oveaque dobarejaimada ũ, jácuy aipe vaiquíyede Jesúre.

<sup>59</sup> Na sacerdotevare jaboteip̃ovea aru caivu ne cójijinocavu Jesúre ãmecororájivure voridurejaimada, ũre boarĩ jaruvaiyurivu. <sup>60</sup> Ëbenita obedivu Jesúre borocurĩ, ãmecororidivureca, eabedejaimada na. No yóboi, pucarā darĩ, borocurĩ ãmecororejaimada Jesúre:

<sup>61</sup> —Ñai p̃ocui yópe arĩ coyuyure jápiacarā ñuja: “Iñami Jūmenijicui cūramine jaruvarĩ majivu yu. Yóbecurijārvua jaruvarĩburu yóboi apedāmi dacuyumu”, áme Jesús, arejaimada na.

<sup>62</sup> Que teni ñai sacerdotevare jaboteip̃ocui nacajari, arejaimada Jesúre:

—¿Coyurĩ majibecurū m̃? ¿Ne nópe ãmecoroiyede, aipe ayurū m̃? arejaimada Jesúre.

<sup>63</sup> Ëbenita Jesúcapūravu bi arejaimada. Dinumu arejaimada Jesúre sacerdotevare jaboteip̃ocui:

—Yu coyucōjeivu mure Jūmenijicu apucu cue boje. ¿Múru ñai Cristo, Jūmenijicui mácú? Coyujacu ñujare, arejaimada ũ.

<sup>64</sup> Aru Jesús ju ayu arejaimada ũre:

—Quédeca mi aimutamu yu. Ëbenita yúcapūravu coyuyubu mujare: Jūmenijicui daroimu mácure ũmupe, yure, járajaramu muja, Jūmenijicu parucui meapūravui dobacure. Aru ji oopeniboai jōdari ěmeiyede máre járajaramu muja, arejaimada náre Jesús.

<sup>65</sup> Que ayure, ñai sacerdotevare jaboteip̃ocui jorojĩni, ũi baju doiyede tatorĩ, jadevarĩ, arejaimada:

—Ñai ũmu Jūmenijicure copu ãmeina yávaibi. Quénora ũi ãmeina teiyede coyujarā muja. Apevu ne coyuiye jaubevu. Javeta muja jápiadavū. Jūmenijicu ubebi ñai yópe yávayure. <sup>66</sup> ¿Aipe adarāru muja? arejaimada ũ.

Aru arejaimada na:

—Boarí jaruvaimu macuyáme ũ, arejaimada na caivu, úre boarí jaruvaicōjeivu.

<sup>67</sup>Que arí, ũi jivarã jēcututurajaimada na. Úre jara popedejaimada. Aru pēvavarejaimada máre úre. <sup>68</sup>Aru arejaimada:

—Mu, Cristo, coyujacu ñujare. ¿Ñame matedí pēvañu mure? úre pēvavaivu arejaimada na.

Ubenita Jesúcapūravu ye coyubedejaimada.

**“Jesúre yu coreóvabevu” arí, Pedro ũi coyūino**

(Mr 14.66-72; Lc 22.56-62; Jn 18.15-18, 25-27)

<sup>69</sup>Pedro sacerdotevare jaboteipōecui tāibui dobacu barejaimada. Ũi noi dobaedeca, yebacarōmivacaco cūināco ũi yebai earejaimada. Aru arejacoda:

—Mu máre ñai Jesús Galileacacūque cútevu mu, arejacoda úre.

<sup>70</sup>Ubenita caivu ne jápiaiyede, Pedrocapūravu ju abedejaimada óre:

—¡Nácacu āmevu! Jesúre yu coreóvabevu. ¿Aipe arí, mu que adorū? arejaimada.

<sup>71</sup>Que arí, tāibui etarí, jedevai nūtenevei nūrejaimada Pedro. Aru apeco yebacarōmivacaco úre jári, arejacoda náre, nore curivure coyuyo:

—Ñai cútebi Jesús Nazarecacūque, arejacoda.

<sup>72</sup>Aru bediōva cojedeca Pedrocapūravu ju abedejaimada:

—¡Nácacu āmevu! Jesúre yu coreóvabevu. Jūmenijicu majibi jāve coyuyure, arejaimada.

<sup>73</sup>No yójiḃoi ina nore curivu Pedro yebai nūri, arejaimada úre:

—Jāve mu máre nácacubu mu. Mi yávaiyeque majivu Galileacacure mure, arejaimada na.

<sup>74</sup>Dinūmuma jāve ayupe, náre pare baju arí, coyurejaimada Pedro:

—¡Jāveneca Jūmenijicui jáinoi yu mujare coyuyutamu! ¡Jāve ji coyubedu, Jūmenijicu āmedajacurí yure! Jesúre yu coreóvabevu, arejaimada.

Ũi que aipe bajure, órejarejaimada cáyu. <sup>75</sup>Ũi órejaiyede, ārurejaimada Pedro Jesús ũi coyuiye báquede: “Cáyu ũi órejauiye jipocai, yóbecue baju ‘Jesúre yu coreóvabevu’, acuyumu mu”, arí coyuiye báquede ārurejaimada. Aru ārucu, cūiná etarí, pare chíori orejaimada ũ.

**Jesúre ne nūvaino Pilato yebai**

(Mr 15.1; Lc 23.1-2; Jn 18.28-32)

**27** <sup>1</sup>Aviá ũi tucumuiyede, caivu ina sacerdotevare jaboteipōeva aru judiōva bucūva cójiidejaimada na, ne bajumia boroteni majicarājivu aipe ne boarí jaruvārājiyede Jesúre. <sup>2</sup>Boroteni buojari, Jesúre buorí, nūvari, jabocu ũi āmiá Pilato yebai jacorānurejaimada na.

**Jesúre jēni jiyu bácu ũi yaino**

(Hch 1.18-19)

<sup>3</sup>Judas, Jesúre jēni jiyu bácu ũi mauvare, coreóvayu ne boarí jaruvārājiyede Jesúre, chíonū marejaimada ũ. Chíori dāpiari, oatuvaiyuridurejaimada ũi dāiye báquede. Que baru iye tāuturatūrava treinta paitūrava plataque daitūravare nūvarejaimada ina sacerdotevare jaboteipōeva aru ina judiōva bucūva ne yebai. Diede náre nūvari jacopaiyovacūnuridurejaimada Judas. <sup>4</sup>Ne yebai earí, arejaimada:

—Yurecabu ãmeina teyu bácu. Jēni jívũ mujare pōecu meacure, ãmeina ðabecure. Que baru muje tãuturare, muje jíye báquede yure jēni jíye bojede, jacopaiyovaquijívũ mujare caride, arejameða Judas.

Ëbenita nácapūravũ arejaimaða ũre:

—Ye baquiyé ãmevũ; míyetamura die, arejaimaða na.

<sup>5</sup>Que aivure, Judacapūravũ iye tãuturare ðuvarĩ jaruvarejameða Jūmenijicui cūrami jívui. Aru etarĩ, nuri, ũi ñamemure buorĩ, jocucu cavabui yuyurĩ boarĩ jaruvarejameða ũi baju. <sup>6</sup>Die tãuturare ñi, ina sacerdotevare jaboteipōeva arejaimaða ne bajumia:

—Maje ðaicōjeiyepe iye tãuturare epeicōjememaramu maja Jūmenijicure jícaiyeque. Diedecabu bojedarĩ jíye báque pōecure ũi boarĩ jaruvare ðaiyede apecu pōecure. Que baru diede jíye jaubevu majare Jūmenijicure, arejaimaða na.

<sup>7</sup>Que arĩ, ne baju boroteni majicarejaimaða. Boroteni bujarĩ, iye tãuturacure jíni, jiore bojedarejaimaða. No jio joroðaipōecui jio bácarō marejávũya. “Apenocavu yaivu bácvure yore, ne yuarĩ jaruvarejainomu” arĩ, no jiore bojedarejaimaða. <sup>8</sup>No jiore bojedarejaimaða tãuturacure, pōecu ũi jíye báque, apecu pōecure boarĩ jaruvaicōjecuyũ. Que baru aivubu maja “Jivecurō” no jiore, pu caride máre. <sup>9</sup>Nópe vaidéjavũya cūináturu Jūmenijicui coyucōjeiye báquepedeca ñai Jeremías ãmicucu ũi yávaiyede coyucaipōecu bácare. Yópe arĩ, toivaicōjenejaquemavu ũi mácare Jūmenijicu:

Ñnama iye tãuturaturava treinta paiturava plataque ðaituravare. Apevu Israecavu bojeðaicōjenejaquemavu nópe paiye bojede ũre boje. <sup>10</sup>Iye tãuturacure jíni bojeðadama no jiore, joroðaipōecui jio bácarōre. Que teni yópe Jūmenijicui ðaicōjeino mácarōpedeca yure, ðadama na, arĩ toivaicōjenejaquemavu Jūmenijicu.

### **Pilato ũi jēniari jáino Jesúre**

(Mr 15.2-5; Lc 23.3-5; Jn 18.33-38)

<sup>11</sup>Jesús ũi eaiyede ñai jabocu Pilato yebai, núrejameða ũi jipocai. Ñai jabocu jēniari járejameða ũre:

—¿Múru judíovai jabocu? arejameða.

Jesúcapūravũ arejameða:

—Quédeca mi aimurecabu yu, arejameða.

<sup>12</sup>Ëbenita ina sacerdotevare jaboteipōeva aru ina judíova bucvu ne ãmecoroiyede ũre, náre coyubedejameða Jesús. <sup>13</sup>Dinumure Pilatocapūravũ arejameða ũre:

—¿Jápiabecurũ caiye ne ãmecoroiyede mure? arejameða.

<sup>14</sup>Ëbenita bi arejameða Jesús. Caiye ne ãmecoroiyede ye coyubedejameða ũ. Aru ũi que yávabede cuezumañũ urarō dápiarejameða Pilato.

### **Pōeva ne boarĩ jaruvaicōjeino Jesúre**

(Mr 15.6-20; Lc 23.13-25; Jn 18.38-19.16)

<sup>15</sup>No torojuve teinumure, ñai jabocu Pilatocapūravũ ujuá coapa etavavarejameða cūinácu jacoimu mácare, pōeva ne etavaicōjeimure.

<sup>16</sup>Dinumure, cūinácu ũi buoimaracacu, caivu ne coreóvaimu marejameða, Barrabás ãmicucu. <sup>17</sup>Que baru pōeva obedivu ne cójijiyede Pilato yebai, náre yópe arĩ, jēniari járejameða Pilato:

—¿Ñamene etavaji yu? ¿Barrabáre urivurū muja? ¿O Jesúre, Cristo ne aimure, urivurū muja? arejamedá ũ.

<sup>18</sup>Ina sacerdotevare jaboteipõeva Jesúre ne jorojĩyede majini, obedivu põeva ne Ƴe boje úre, nópe náre jēniari járejamedá Pilato. <sup>19</sup>Pilato dobarejamedá nore, coyucuyũ ina põevare ñamene ũi etavaquimure. Coyubecu cāreja, ũi dobaedeca, jímarepaco úre yópe arĩ, boro jarorejacoda: “Ñai ũmu Jesúre āmedabejacu mu. Úrecabe meacu baju. Cari ñami marede decoboavu yu úre. Aru pare urarō cārijivũ yu, iye decoboaiye báque boje. Que baru me đajacu mu” arĩ, boro jarorĩ majicarejacoda jímarepaco Pilatore.

<sup>20</sup>Ina sacerdotevare jaboteipõeva aru ina judíoƳa bucũva máre ina obedivu põevare jēniaicōjenejaimada Pilatore, ũi etavaquiyepa aivũ Barrabáre aru ũi boarĩ jaruvaquiyepa aivũ Jesúre. <sup>21</sup>Bediõva cojedeca ñai jabocu Pilato jēniari járejamedá ina põevare:

—¿Ñamene ina pucarā buoimaracacure jaetovaji? arejamedá.

Aru arejaimada:

—Barrabáre jaetovajacu mu, arejaimada na.

<sup>22</sup>Ne que coyurĩburu, arejamedá náre Pilato:

—¿Dinũmu ñai Jesús, Cristo ne aimure, aipe đaji yu? arejamedá.

Caivũ ina põeva arejaimada:

—¡Úre jocucujaravena pēvari boarĩ jaruvaicōjejacu mu! arejaimada ñai jabocure.

<sup>23</sup>—¿Yéde āmeina tearĩ ñai? jēniari járejamedá náre Pilato.

Ubenita pueno baju cođoboborĩ, arejaimada na:

—¡Úre jocucujaravena pēvari boarĩ jaruvaicōjejacu mu! arĩ, cođoboborejaimada na.

<sup>24</sup>Ne que aiyede, Pilato coreóvarejamedá úre ju abevure. Quédata pueno cārijovari búrejaimada na. Que baru ocoque joarejamedá ũi puruáre, yópe judíoƳa ne đaiyepe, ne jáđovaraiyepe ayũ boropatebevure. Ũi joaiyedeca arejamedá:

—Yúvacari boropatebecubu, muje boarĩ jaruvavu ñai Jesúre, ũmu meacure ji jáinoi. Mujemu die, arejamedá Pilato.

<sup>25</sup>Aru caivũ ina põeva arejaimada:

—Jau, ñujavacari aru ñujemara máre boropatenajivũbu ñai ũmu ũi yaiye boje, arejaimada na.

<sup>26</sup>Ne que arĩburu yóboi, Barrabáre etavarĩ darorejamedá Pilato. Aru Jesúre jara popeicōjenejamedá. No yóboi, ina churaravare Jesúre jocucujaravena pēvaicōjenejamedá Pilato.

<sup>27</sup>Que teni ina churarava Jesúre ĩni, nũvari, ecovarejaimada ñai jabocu Pilatoĩ cūrami. Nore covarĩ, apevũ churarava caivũre cójijovarejaimada Jesús jipocai. <sup>28</sup>Ũi cuitótecajeare úre duarejaimada. Jesúre puenocacaje, jabocui doicajepe paicaje ñemijuaricajede doarejaimada na. <sup>29</sup>Doarĩ buojarĩ, miumua cāteni, cainitarabu đarĩ, ũi jipoburā ditarabure tuorejaimada na. Aru jocũyo, jabocui cōjeiyo paioye, durure đarejaimada Jesúre ũi meapũravũcapurui, yópe jabocui jēiyepe. Ne que teimure yurivũ, jacoyũrejaimada na:

—Ména cucacu mu, judiõvai jabocu, arejaimada churarava Jesúre, ũbenita úre yurivũ.

<sup>30</sup>Ūra jēcututuivū barejáimada. Aru ūre jipoburā iyo jocuyoque jādovaivū barejáimada na. <sup>31</sup>Que teni ūre yurini buojari, ūre ne doicaje űemijuaricaje bácarōre, no jabocui doicajepe paicajede ĩni, duarĩ, űi doicaje bácarōre bediōva ūre doarejaimada cojedeca. Que teni, buojari, ūre nuvari, jocucujaravena ūre pēvari jēoranurejaimada na, churarava.

### **Jesúre ne pēvari yuyaino jocucujaravena**

(Mt 26.61; Mr 15.21-32; Lc 23.26-43; Jn 2.19; 19.17-27)

<sup>32</sup>Ina churarava Jesúque nuivū, jocucujaravede ture nuñu maridurejame Jesús. Nuri, çopurejaima cūinácu űmure, Cirene āmicuriĩmarocacure, űi āmiá Simón. Ūre Jesús űi jocucujaravede tuino mácarōre tuicōjenejaima na, churarava.

<sup>33</sup>Ina churarava nuvarejaima Jesúre cūracū Gólgota āmicuricūi. Pōe jipobucū aiyurōmu no. <sup>34</sup>Noi űcuiye upiáteiye báque curijororū curejavū vino űyaicoro mirra āmicue jocucu cuidóque, churarava ne nuvaiye báquede. Die űcuiyede jínidurejaima Jesúre, ūre ĩjibequiyepa aivū. Ūbenita ű űcuri jári, űbecū, űcumenejame. <sup>35</sup>Que teni ūre jocucujaravena pēvari jēorejaima. Aru ne yajuiyede duvarejaima. Cainijidua etaiyede jári, Jesús űi doiyede náre coapa ĩnejaima na, ūre pēvaivū bácaivū. <sup>36</sup>Que teniburu yóboi, dobarejaima, jári capurājivū ūre. <sup>37</sup>Jocucujaravena űi jipobu puenoi toivaino jēnejavū, apevū ne majinaiyepa aino Jesúre boarĩ jaruvaivū ne dápiainore, “¿Aipe teni ūre boarĩ jaruvārāma na?” ne aino. Yópe aiyurejavū no toivaino: “Ñaime Jesús, judíovai jabocu”.

<sup>38</sup>Ūque máre pēvari boarĩ jaruvarejaima pucarā tatorĩ ñavaipōevare, ape pucarōa jocucujaravearā. Cūinácu Jesús űi meapūravui aru apecū űi cācopūravui carejaima. <sup>39-40</sup>Ina vainánuraivū jári, ne jipobuare cújiovai, āmeina yávarejaima ūre, yópe ari:

—Mū, Jūmenijicui cūramine jaruvaiyuvacacu aru yóbecurijārvua yóboi diñamine meadaiyuvacacu, mi bajure meadajacu mū. Mū Jūmenijicui mácu baru, caride jocucujaravede dajocarĩ, ĩmeni, dajacu mū, arejaima Jesúre ina vainánuraivū.

<sup>41</sup>Nopedeca ina sacerdotevare jaboteipōeva, ina Jūmenijicui yávaiye báquede bueipōevaque, aru ina judíova bucūvaque máre, ne baju yurivū Jesúre, yópe arejaima:

<sup>42</sup>—Apevure meadavacacuvacari, űbenita űi bajure meadarĩ majibebi ű. Cristo, maja Israecavu maje jabocu baru, jocucujaravede dajocarĩ ĩmeni dajacurĩ ű. Que daru, maja ju arājaramu ūre. <sup>43</sup>Ū “Yúbu Jūmenijicui mácu”, ayu bateáme. Ūrecabe ju ayu Jūmenijicure aru “Jūmenijicu yure cađatecyume”, ari dápiayū. Que baru Jūmenijicu, ūre űcu baru, cađatejacurĩ caride, arejaima na.

<sup>44</sup>Aru ina pucarā tatorĩ ñavaipōeva pēvaimara mácaivū máre űque, nopedeca āmeina yávarejaima ūre.

### **Jesús űi yaino**

(Mr 15.33-41; Lc 8.2-3; 23.44-49; Jn 19.28-30; He 10.20)

<sup>45</sup>Jāravū corica baji űemié turĩ darejavū caino joborōi. Pu yóbecuriora yóboita vaidéjavū. <sup>46</sup>Aru yóbecuriora bajita, iye űemié tuiyede dajocaiyede pare bujié cođoboborĩ, yávarĩ darorejame Jesús:

—Elí, Elí, ¿lama sabactani? Nópe aino: “Mũ, ji mearore jímũ, mũ, Jümenijicũ, ¿aípe teni yũre dajocarĩ, nuñũrũ mũ?” aiyurõ marejávũ.

<sup>47</sup>Que ayure, apevũ nore núrivucavũ úre jápiarĩ, ũbenita jápiarĩ eabeni, arejaima:

—Jápiararã. Elíare órejaibi ũ, arejaima na.

<sup>48</sup>Dinumure maumena nácacũ cúyarĩ, jaubore ĩni, uyovarejame vino úyaicoro upiáricoroque. Aru dijaúbore abodorã buorĩ, jëori, jarũrũrejame Jesús ũi úcuquiyepẽ ayũ. <sup>49</sup>Ũbenita apevũ arejaima:

—Corejarã. Járarevũ Elías jõdavacũdayũre úre, arejaima na.

<sup>50</sup>Cojedeca Jesús pare bujié codoboborĩ, yaidéjame ũ. <sup>51</sup>Dinumũ ũi yaitũvabomica Jümenijicũ cüamicacaje uracaje coricõpavaicaje bácarõ quẽda corica baji jadeni nurejavũya, puenocaturũvai búri pũ cãchinocaturũvaita. Joborõ cújidejavũ. Aru cüraboa uraboa pãrejavũ máre. <sup>52</sup>Yaivũ bácvũ ne jaruvainoa voarejavũya. Obedivũ Jümenijicũ põeva yaivũ bácvũ nacovaimara marejáimađa na, apurãjivũ bediõva cojedeca. <sup>53</sup>Aru ina nacovaimara mácvũ ne jaruvainoare jocarĩ etarejaimađa, Jesús ũi nacajariburu yõboi. Etarĩ buojarĩ, Jerusalén ãmicurĩmaroi ecorejaimađa. Obedivũ põeva járejaimađa náre, yaivũ bácvũ nacovaimara mácvũre. <sup>54</sup>Nore Jesús bácvũre cocorĩ núrivũ barejáima apevũ churarava ne jabocuque. No joborõ cújinore jári, aru caiye iye vaiye jidojaede máre, pare dápiaivũ cucumarejaima. Aru arejaima:

—Jãveneca Jümenijicũ mácvũ baju batecũbe ñai, arejaima na.

<sup>55-56</sup>Obedivũ nomiva máre cocorĩ núrivũ joajĩemia cürejaima. Ne jẽneboi cürejaima cüinácõ nomió, Magdala ãmicurĩmarocaco, õi ãmiá María, aru apeco nomió, õi ãmiá María máre, ico Santiago aru José népaco, aru apeco máre, Zebedeoi mǎrai paco. Jesús ũi cuede Galilea ãmicurõĩ cadateivũ barejáima úre. Aru apevũ nomiva, ina daivũ bácvũ úque Jerusalén ãmicurĩmaroi, cürejaima nore.

#### **Jesús bácvũ jaruvaimũ ne põẽ jaruvainoi**

(Mr 15.42-47; Lc 23.50-56; Jn 19.38-42)

<sup>57</sup>Dijaravũ bácarõ, nainũ, aviá ũi dorĩburu yõboi, cüinácũ ũmũ nurejameđa Pilato yebai. Ũ marejáimeđa cũve cũvacũ, Arimatea ãmicurĩmarocacũ, ũi ãmiá José. Ũ máre Jesús bácvũ bueimaracacũ barejáimeđa ũ. <sup>58</sup>Pilato yebai nuri, Jesús bácvũ baju bácarõre jëniacũnurejameđa ũ. Ũi jëniaiyede Pilato churaravacavũre jícõjenejameđa Jesús bácvũ baju bácarõre úre. <sup>59</sup>Aru Jesús bácvũre jocucũjaravede jõdavari, ĩni, meacaje docucubecaje lino ãmicuricajeque ũ mácvũre cümarejaimađa Joséjã. <sup>60</sup>Ũ mácvũre nuvari, cüracobe mamacobe, José jicobei, Jesús bácvũre jaruvarejaimađa Joséjã. Nore jaruvarĩburu yõboi, apeturava cüraturavare ĩni, jãturuvãri, dicobede biidejaimađa. Aru bieniburu yõboi, nurejaimađa na. <sup>61</sup>Ne Jesús bácvũre jaruvaiyede cürejaimađa nore María Magdalacaco aru apeco María máre, dobarivũ dicobe jipocai.

#### **Churarava ne jári coreniduino Jesús bácvũ baju bácarõre ne jaruvainore**

(Mt 16.21; 17.23; 20.19; Mr 8.31; 9.31; 10.33-34; Lc 9.22; 18.31-33)

<sup>62</sup>Dijaravũ yõbocajãravũ, maja judiõva maje jabuõvãijãravũ sábadoi, ina sacerdotevare jaboteipõeva aru fariseovacavũ cójjijidejaimađa Pilato yebai.

<sup>63</sup>Aru úre arejaimađa:

—Mu, ñuje jabocu, ārurivubu ñuja ñai jujovayu bácu ñi aiyede apucu cãreja, yópe arí: “Yóbecurijāravua ji yainíburu yóboi nacajacuyumu yu yainore jaruvarí”, ayu bateáme. <sup>64</sup>Que baru churaravare me jári coreicōjejacu mu Jesús bácu baju bácarōre ne jaruvainore yóbecurijāravua vaiyeta. Nópe ñajacu, ñi bueimara ne ñavamenajiyepa ayu ñi mácu baju bácarōre ñamine. Ñi mácu baju bácarōre ñavaivu baru, “Jesús nacajaimi yainore jaruvarí”, arí coyurājarama pōevare. Nópe ñaivu baru, ñamei jujovajebu pōevare ne mamarumu jujovaiye báque pueno. Ñi mácu “Nacajacuyumu” ñi aye báqueque pōevare jujovaríduame. Ñbenita “Nacajaimi” ne ájuroeque, pōevare jáve jujovajebu, arejaimada na Pilatore.

<sup>65</sup>Pilatocapūravu arejameđa náre:

—Churaravare cuvavu muja. Náre jarorí me coreicōjejara Jesús bácu baju bácarōre ne jaruvainore, arejameđa Pilato.

<sup>66</sup>Que baru churaravare jarorí, cūratuava uraturava Jesús bácu jaruvaicobede bieituravare me jājare ñaicōjenejaimada na. Aru dituravare jājare ñaríburu yóboi, no ne jaruvainore me jári coreicōjenidurejaimada churaravare.

### Jesús ñi nacajaino yainore jaruvarí

(Mr 16.1-8; Lc 24.1-12; Jn 20.1-10)

**28** <sup>1</sup>No judíovai jabuóvaíjāravu sábadu yóbocajāravu, sumana buíjāravu, domingo, miadae tuquiye jipocai, María Magdalacaco apoco Maríamaque járanurejaimada Jesús bácu baju bácarōre ne jaruvainore. <sup>2</sup>Aru urarō baju joborō cújidejavūya, ángele ñi ěmeni daíye boje cavarō mearo Jūmenijicui curōre jocarí. Ñai ángele, Jūmenijicui daroimu, ěmeni, ñarí jāturuvarameđa diva cūrava uravare, no cūracobede bieiturava bácarōre. Dituravare ñi jāturuvariburu yóboi, dobarejameđa diturava puenora. <sup>3</sup>Ñai ángele pēoñupe páyu ārojacu barejameđa, yópe yaroinope. Ñi cuitótecaje boricaje baju barejávūya. <sup>4</sup>Ñe jáivu, ina churarava dicobede jári coreniduivu jidurivu bididejaimada, ne jidué boje. Bidini, turejaimada joborōi, yópe yaivu bácuve. <sup>5</sup>Aru ñai ángele arejameđa ina nomivare:

—Jidubejarā muja. Coreóvaivu yu voivure Jesúre, ne jocucujaravena pēvaimu mácu. <sup>6</sup>Yore cubebi ñi. Javeta nacajami, yópe ñi aye báquepedeca. Dajarā. Járíide apa. Ñi baju bácarōre ne jaruvaino mácarōre jājara muja. <sup>7</sup>Maumena nujara muja. Yópe arí, coyujarā ñi bueimarare: “Jesús nacajaimi yainore jaruvarí. Nucuyume muje jipocai Galilea ámicurijoborōi. Noi járajaramu muja ěre”, coyujarā. Jede, quénoramu ji coyuno mujare, arejameđa náre.

<sup>8</sup>Que aríburu yóboi, maumejiena dicobede etarí, nurejaimada ina nomiva, jidurivu ñbenita pare torojurivu. Cúyarí coyurānurejaimada iye borore ñi bueimarare. <sup>9</sup>Ne nuiyede, Jesúvacari náre copurejameđa. Aru náre jacoyurejameđa. Ñi yebai nuri, mori turejaimada joborōi ñi jipocai. Aru ñi cubobare jēni, mearore jídejaimada ěre, yópe judíova ne ñarí cōmajiyepa.

<sup>10</sup>Que teni Jesús arejameđa náre:

—Jidubejarā muja. Jívure yópe arí, coyurānujara muja, “Galileai nuri, noi yure járanujara muja, aibi Jesús”, náre ajarā muja, arejameđa dinomivare Jesús.

**Churarava Jesús bácuí baju bácarõre jári  
corenidiuvu bácvu ne coyũino borocurõ**

<sup>11</sup>Ina nomiva ne nuiyedeca, apevu ina churarava, Jesús bácuí baju bácarõre jári corenidiuvu bácvu, Jerusalén ámicurĩĩmaroi nurejaimada. Coyurãnurejaimada ina sacerdotevare jaboteipõevare caiye iye vaiye báquede náre. <sup>12</sup>Ina churarava ne coyuiyede jápiaivu bácvu, ina sacerdotevare jaboteipõeva ina judíova bucuvaque cójijidejaimada, majicarãjivu ne bajumia. Cójijini buojari, urarõ tãuturare jídejaimada ina churaravare. <sup>13</sup>Aru yópe arĩ, borocucõjenejaimada náre:

—Yópe ajarã muja põevare, “Jesús bácuí bueimara ñamine darĩ, ñuje cáiyede, ñavarama ñi mácuí baju bácarõre”, ajarã muja. <sup>14</sup>Aru ñai jabocu ñi jápiaru diede, “Ina churarava boropateivubu ne jári corebe boje” arĩ dápiaru, ñujavacari meadarãjaramu caiyede úque, ñi ñájine ñabequiyepa aivu mujare, arejaimada ina judíovai jabova.

<sup>15</sup>Que baru iye tãuturare ñi, borocurĩ coyurejaimada ina churarava, yópe ina sacerdotevare jaboteipõeva ne coyucõjeiye báquepe. Aru no coyũino borocurõre coyuvavubu judíova ne bajumia pu caride máre.

**Jesús ñi coyucõjeino ñi yávaiye méne**

(Mt 26.32; Mr 14.28; 16.14-18; Lc 24.36-49; Jn 20.19-23; Hch 1.8)

<sup>16</sup>Ñuja once paivu Jesúi bueimara Galilea ámicurĩjiborõĩ nurejacarã. Yópe Jesús ñi nucõjeiye báquepe, cãracũĩ nurejacarã ñuja. <sup>17</sup>Noi úre jári, mearore jídejacarã. Ubenita apevu ñujacavu, “Jesús ámemi” arĩ, ju abedejaima. <sup>18</sup>Aru Jesús arejame ñujare:

—Caiye paruéde cuvavu yu. Jipacu Jũmenijicu parure ñaibi yure, ji cõjequiyepa ayu caivu cavarõ mearocavure aru caivu ijãravucavure máre.

<sup>19</sup>Que baru jaroivu yu mujare. Buenanujara caivu ijãravucavure ji yávaiye méne, ne ju arãjiyepa aivu diede, aru ne ñarãjiyepa aivu ji urõre. Ocoque jádovajara ina ju aivure jipacu Jũmenijicure; aru yure, Jũmenijicui mácure; aru ñai Espiritu Santore máre. <sup>20</sup>Buejarã náre, ne ñarãjiyepa aivu caiyede yópe ji ñaicõjeiye báquepe mujare. Aru yãvacari cucuyumu mujaque cainumua, pu ijãravu buojaiyeta, arejame ñujare Jesús.

Quénoramu.

# San Marcos

Mamabuinore coyuiyebu Marcos bácu ũi toivaiye báquede Jesucristorā. Marcos bácu barejaquemavu judíovacacu, Bernabé bácu chimacu (Hch 5:36, Col 4:10). Jípaco bácu, María ámicuco, ōi cūrami cójijivarejaquemavu Jesúre ju aipōeva (Hch 12:12). Juan ámicucu barejaquemavu Marcos bácu. Cucunurejaquemavu Pablo bácuque aru Bernabé bácuque (Hch 12:25, 15:37-39). Majidivu ne dápiayepe, iye coyuiyede Jesucristorā toivarejaquemavu ũ mácu cucu bácu Roma ámicurīmaroi. Marcos bácu, Jesúque cubecu bácuvacari, majidejaquemavu Jesúi borore Simón Pedro bácu, ñai Jesús ũi yávaiye méne beorī coyucōjeimu, ũi coyuiye báque boje ũ mácu Jesús. Pōecu cubebi majicu ye uju ũi toivaiju bácarōre diede. Ūbenita obedivu majidivu ne dápiayepe Marcos bácu toivarejaquemavu Mateo bácu, Lucas bácu, aru Juan mácu ne toivarājiye jipocare, āniujua báquede 57-63 d.C. baji.

Marcos bácu jádovarejaquemavu Jesúre yópe memecaipōecu. Judío bácuvacari, toivarejaquemavu judíova ámevure, ne majinajiyeye ayu Jesús paracure caivu pueno, ũi daiye boje pōeva ne darī majibede, ũi cōjeiye boje abujuvare, aru ũi jaruvaiye boje pōeva ne ámeina teiyede. Coyurī búrejaquemavu Jesús ũmureca, ũi buiyede ũi memecaiyede, Juan Bautista bácu ũi jádovaiye báquede úre Jūmenijicure ocoque.

## Juan Bautista ũi coyūino Jūmenijicui yávaiyede pōecubenoí

(Mt 3.1-12; Lc 3.1-9; Jn 1.19-28)

**1** <sup>1</sup>Yópeda teni búrejaquemavu iye yávaiye me Jesucristo Jūmenijicui mácurā coyuiye.

<sup>2</sup>Javede toivarejaquemavu Jūmenijicui yávaiyede coyucaipōecu bácu ũi āmiá Isaías, yópe Jūmenijicui aye báquede mamacure:

Jaroivu yure coyucaipōecure mi jipocai, mi cuimare meadaquiyepe ayu.

<sup>3</sup>Jūmenijicure coyucaipōecu cođoboboyure jápiarājarama pōecubenoí:

“Meadajarā muje ũmene copu etaburī maje jabocure, nopedeca muje meadaiyepe daimare ñai ũmu, muje puedaimu, ũi daquiye jipocai”, arejaquemavu Jūmenijicu, arī toivarejaquemavu Isaías bácu.

<sup>4</sup>Nópe Jūmenijicui yávaiyede coyucayu, Isaías bácu, ũi aye báquopedeca tedejaquemavu Juan Bautista pōecubenoí. Pōeva vaivure coyure curejamedá nore. Ocoque jáđovacayu pōevare Jūmenijicuque, coyucu barejamedá pōevare, ne chīori dápiarājiyepe ayu ne ámeina teiyede, Jūmenijicui ārumetequiyepe ayu diede.

<sup>5</sup>Obedivu pōeva Judea ámicurijoborōcavu aru Jerusalén ámicurīmarocavu máre jápiarānurejaimada Juan Bautista yebai. Aru na coapa “Ámecubu yu” ne arīburu yóboi Jūmenijicure, ne chīori dápiayepo boje ne ámeina teiyede, jáđovarejamedá náre Jūmenijicuque Jordán ámicuriya jiai.

<sup>6</sup>Juan Bautista dorejamedá áimacu camello ámicucui podaqué daicajede ũi cuitótecaje. Aru ũi jārīóicāva máre áimacajeque daicāva marejávūya. Ū

äre curejamedá mujuñuvare aru mumicorore máre, yópe apevu nócavu cüve cüvabevüre. <sup>7</sup>Yópe arí, coyurejamedá pöevare:

—Dacuyume ji yóboi cüinácu, ji püeno paracu. Que baru caivu püeno meacu bajube ñ. Buojabevu yu oarí nacachini duayu ñi curaidoa buoimeare. <sup>8</sup>Yu ocoque jádovaivu mujare Jümenijicüre. Ubenita ñ macuyume jádovañu mujare Jümenijicüque, daroyu Espiritu Santore, arejamedá Juan Bautista.

**Juan Bautista ñi jádovaino Jesúre Jümenijicüque**

(Mt 3.13-17; 12.18; Mr 9.7; Lc 3.21-22)

<sup>9</sup>Dijárvuái Jesús nürejamedá Nazaret ämicuriimarore jocarí, etacuyu Galilea ämicurijoboröre jocarí, nüñu Juan Bautista yebai. Aru Juan Bautista jádovarejamedá üre Jümenijicüque Jordán ämicuriya jiai. <sup>10</sup>Maumena ñi maiyede jiare jocarí, Jesús járejamedá cavarö mearo vorí nuinore. Aru ñai Espiritu Santo jurecope ëmeni darejamedá ñi püenora. <sup>11</sup>Aru jápiarejamedá apeno yávainore, cavarö mearo Jümenijicüi curöque aiyede yópe: “Mu, jímacu, ji umu, me torojuvu yu müre”, arejamedá Jesúre Jümenijicu.

**Abujuvai jabocu Jesúre ñi jujovaríduino**

(Mt 4.1-11; Lc 4.1-13)

<sup>12</sup>No yóboi ñai Espiritu Santo nüvarejamedá Jesúre pöecubenoí. <sup>13</sup>Cuarenta pajíárvuái Jesús curejamedá nore, äimara jijecurivu ne jëneboí. Que teni ñai abujuvai jabocu, Satanás ämicucu, jujovaiyürídjurejamedá üre. Aru ángeleva coreni cadatedejaimada Jesúre.

**Jesús Galileai ñi bueni buino**

(Mt 3.2; 4.12-17; Lc 4.14-15)

<sup>14</sup>Dinümüre Herodes ämicucu jabocu buorejamedá Juan Bautistare. Üre buoríburu yóboi, Jesús nürejamedá Galilea ämicurijoboröi, coyucuyu iye yávaíye méne, Jümenijicüi coyucöjeiyede üre. <sup>15</sup>Que teni arejamedá pöevare:

—Jave caivu dijárvu. Maumena Jümenijicu mujare jabotecuyume. Que baru chiojara müje ämeina teiyede. Oatuvajarā müje ðaiyede. Aru ju ajarā iye yávaíye méne, Jümenijicüi coyucaiyede mujare, arejamedá Jesús.

**Jesús ñi “Dajarā” aino yóvaicüvaivu moa boaipöevare**

(Mt 4.18-22; Lc 5.1-11)

<sup>16</sup>No yóboi Jesús cuyu macajitabu urabu Galilea ämicurijitabu ëcarui, járejamedá Simóre aru Andrés imacumaquevüre. Moa boarí bojedaipöeva marejáimada na. Que baru ðuvaivu barejáimada ne pápicüre no macajitabui.

<sup>17</sup>Ne que teiyede, Jesús arejamedá náre:

—Dajarā yúque. Aru epequijivu mujare, müje davarājiyepe pöevare ji yebai, yópe müje moare davaíyepe pápicüque, ji meadaquíyepe náre, arejamedá Jesús.

<sup>18</sup>Que ayure jápiarí, dajocarejaimada ne pápicuare, nurajivu Jesúque.

<sup>19</sup>Aru cuyu cäreja, jipocai járejamedá Zebedeoí mārare, ne ämiá Santiago aru imacu Juan. Imarejaimada ne jiaðocüi, meadaivu ne pápicuare.

<sup>20</sup>Járina cuturejamedá náre. Quénora cüiná dajocarejaimada népacüre üre memecaipöevaque jiaðocüi, nurajivu Jesúque.

### **Abujucu ñi ĩmamũ Jesũre ñi copũino**

(Mt 7.28-29; Lc 4.31-37)

<sup>21</sup> Jesũs ñi bueimaraque earejaimađa Capernaum ãmicurĩĩmaroi judĩovai jabũovaijãravũ sãbadoi. Judĩovai cõjijiĩnami ecorĩ, Jesũs buedejameđa ina põeva noi curivũre. <sup>22</sup> Ina Jũmenijicui yãvaiye báquede bueipõeva pueno buedejameđa náre, yópe parũcũpe. Que baru ina jápiaivũ ñi bueiyede torojurĩ cucumarejaimađa. <sup>23</sup> Aru curejameđa judĩovai cõjijiĩnami cũinácũ ñmũ, abujucu ñi ĩmamũ. <sup>24</sup> Codoboborĩ arejameđa Jesũre:

—Mũ, Jesũs Nazarecacũ, ¿yẽde ucũrũ mũ ñũjaque? ¿Jarũvacũdayũ dacũrũ mũ ñũjare? Coreóvaivũ yũ mure. Jũmenijicui mácu meacu bajubu mũ, arĩ codoboborejameđa.

<sup>25</sup> ðbenita Jesũs bi aicõjenejameđa ĩre:

—Mũ, bída etajacu ñai ĩmũre jocarĩ, arejameđa Jesũs.

<sup>26</sup> Que baru abujucu bidiõvarejameđa pare ñai ĩmũre. Codoboborĩ pare, etarejameđa ĩre jocarĩ. <sup>27</sup> Aru cucumari jáivũ ina põeva, arejaimađa ne bajumia:

—¿Yẽba yo? ¿Ye bueiye mamaema iye? Ñi yãvaiye parũéque jarũvaibi abujuvare. Aru nácapũravũ ju adama ĩre, arejaimađa na.

<sup>28</sup> Aru maumejiena majidejaimađa Jesũi borore caino Galilea ãmicurijoborõcavũ caivũ.

### **Jesũs ñi meadaino Simõn Pedroi vácore**

(Mt 8.14-15; Lc 4.38-39)

<sup>29</sup> Etaivũ bácvũ judĩovai cõjijiĩnamine jocarĩ, ecorãnurejaimađa maumena ne cũrami ina Simõn aru Andrẽs máre. Santiago aru Juan máre yõvarejaimađa náre. <sup>30</sup> Ico Simõi váco moimo pararejacođa. Aru cũiná coyurejaimađa Jesũre õi borore. <sup>31</sup> Que baru Jesũs nurejameđa õi yebai. Jẽni õi pũrũre, óre nacovarejameđa. Aru maumejiena dajocarejavũya moino óre. Dinumũia ãiyede meadarĩ jídejacođa náre.

### **Jesũs ñi meadaino obedivũ ijimarare**

(Mt 8.16-17; Lc 4.40-41)

<sup>32</sup> Dinainumica ñamijie baji aviá ñi dorĩburu yóboi, jabũovaijãravũ vaiyede, ina ĩmarocavũ nũvarejaimađa Jesũs yebai caivũ ijimarare, aru abujuva ne ĩmararare máre. <sup>33</sup> Que teni caivũ ina ĩmarocavũ cõjijidejaimađa jedevacobena. <sup>34</sup> Jesũs meadarejameđa obedivũ ijimarare. Caiye ijíede jarũvarejameđa. Jarorejameđa náre jocarĩ ina abujuvare máre. Aru yãvare đabedejameđa, ne coreóvaiye boje ĩre.

### **Jesũs Galileai ñi bueino**

(Mt 4.23; 9.35; Lc 4.42-44)

<sup>35</sup> Jesũs coedarĩ nacajari ñeminomia, aviá ñi cõaquiye jipocai, nurejameđa põecubenoĩ. Jẽniare cuyũ barejameđa Jũmenijicũque. <sup>36</sup> Miadãe tuiyede Simõn ĩcavũque vorejaimađa Jesũre. <sup>37</sup> Vorĩ earĩ, arejaimađa ĩre:

—Caivũ põeva vođama mure, arejaimađa Jesũre.

<sup>38</sup> Náre arejameđa:

—Járica, apenoa ĩmaroa joabenoai nurevũ, coyurãjivũ Jũmenijicui yáviyede noi. Que baru daivũ yũ, coyucudayũ diede, arejamedã Jesús.

<sup>39</sup> Coyurejamedã Jũmenijicui yáviyede caino Galilea ãmicurijoborõi judíovai cójijĩnamiai. Aru jaetovarejamedã abujuvare máre.

### **Jesús ãi meadaino pojeyure**

(Mt 8.1-4; Lc 5.12-16)

<sup>40</sup> Cũinácũ pojeyũ nurejamedã Jesús yebai. Aru ñuatutarĩ, arejamedã ũre:

—Mũ ucũ baru, meadajacũ ji pojeiyede. Bũojaivũ mũ meadayũ yure, arejamedã.

<sup>41</sup> Que ayũre jápiarĩ, Jesús cõmaje ãroje jári, ãi purũque jabióvarĩ tũoyũ, arejamedã ũre:

—Ŭvũ yũ. Caride meatejacũ mũ, arejamedã Jesús.

<sup>42</sup> Maumejiena Jesús ãi que aiyeda vaidéjavũya ũre. Meatedejamedã ũ.

<sup>43</sup> Ŭbenita Jesús majicarejamedã parurõreca, “Nũjacũ” ayũ ũre, arejamedã majicarĩduyũ:

<sup>44</sup> —Coyũbejacũ apevũre. Cũiná nũri, jáðovajacũ sacerdotede. Aru jĩjacũ mi meateiye boje, yópe Jũmenijicui ðaicõjeiyede ãi coyuiye báquepe Moisés bácurẽ, põeva ne coreóvarãjiyepe ayũ mi meateinore, arejamedã ũre Jesús.

<sup>45</sup> Ŭbenita coyure nurejamedã Jesúsĩ borore. Que baru ecorĩ majibedejamedã Jesús põeva ne jáĩnore. Quénora curejamedã põecũbenoi. Aru nurejaimadã põeva, cainoa ĩmaroacavũ, ãi yebai.

### **Jesús ãi cure ðaino nacajaiye majibecure**

(Mt 9.1-8; Lc 5.17-26)

**2** <sup>1</sup> Ecorejamedã Jesús cojedeca Capernaum ãmicurĩĩmaroi obedijãravũa yóboi. Jápiarejaimadã cũcure cũrami. <sup>2</sup> Que baru cójijidejaimadã obedivũ põeva. Buinĩ jajidejaimadã jedevacobeita. Aru Jesús coyurejamedã Jũmenijicui yáviyede náre. <sup>3</sup> Dinũmũ yóvaicũvaivũ ũmũva nũvarejaimadã ãi yebai cũinácũ ũmũ nacajaiye majibecure. <sup>4</sup> Ŭbenita ecoivũ bũojabedejaimadã Jesús yebai, põeva obedivũ ne cũe boje. Que baru muri nũri cũrami pũenora, voarejaimadã diede, ěmeóvarajivũ ñai nacajaiye majibecure ãi parainoque Jesús yebai. <sup>5</sup> Náre coreóvayũ jũ aivũre, Jesús arejamedã ñai nacajaiye majibecure:

—Mũ, ji umũ, mi ãmeina teiyede jarũvarĩ ãrũmeteivũ yũ, arejamedã Jesús.

<sup>6-7</sup> Noi dobarejaimadã obebevũ Jũmenijicui yáviaye báquede bueipõeva, dápiaivũ ne ðaiyurõre: “¿Aipe teni que yávayũba ñai? Jũmenijicui ũbenore ðaibi ũ. ¿Namema bũojarĩ jarũvayũ ãmeina teiyede, ãrũmeteni diede? Quénora cũinácũrabe Jũmenijicũ jarũvayũ diede” arĩ, dápiaiejaimadã na.

<sup>8</sup> Jesús jári coreóvarĩ maumejiena ne baju ne dápiaiyede, jĩniari járejamedã náre:

—¿Aipe teni que arĩ dápiaivũrũ mũja? <sup>9</sup> Maiyójabevũ yópe aru apecure, “Mi ãmeina teiyede jarũvarĩ ãrũmeteivũ yũ”, ji parũéde jáðovame boje, ji que coyuiyede. Ŭbenita maiyójarõtamu nacajari cuicõjenu nacajaiye majibecure. ũre cure ðayũ baru, jáðovaquijivũ ji parũéde. “Mi ãmeina teiyede jarũvaivũ” ji aiyede, coreóvabevũ mũja Jũmenijicui ãrũmeteinore diede. Ŭbenita ñai cũvacũ Jũmenijicui majié parũéde, ũrame yópe ðarĩ jáðovaiye majicũ.

Quécura Jūmenijicuvacari meadarī majibi iijimarare. <sup>10-11</sup>Que baru muje majinajiyeye ayu Jūmenijicui daroimu mácu ūmupe, yu, paruède cuvacure ijāravure, jaruvacuyu āmeina teiyede, yópe ñaquijivu yu, arejameđa Jesús.

Dinumu arejameđa nacajaiye majibecure:

—Yópe aivu yu mure, nacajari, mi parainore ĩni, nujacu mi cūrami, arejameđa ūre Jesús.

<sup>12</sup>Di numuma nacajari maumejiena, ūi parainore ĩni, etarejameđa ne jēneboi. Caivu cuicumari, mearore jídejaimađa Jūmenijicure. Aru, “Aipinumu jámeteavū maja yópe painore”, arejaimađa na.

### **Jesús ūi “Dajarā” aino Levíde**

(Mt 9.9-13; Lc 5.27-32)

<sup>13</sup>No yóboi Jesús nurejameđa cojedeca macajitabu urabu ēcarui. Caivu pōeva nurejaimađa ūi yebai. Aru bueyu barejámeđa náre. <sup>14</sup>Dinumure vaini nuñu járejameđa Levíde, Alfeoi mácure, dobacure ūi memeitucubui, pōeva ne Roma āmicurō jaboteino bojedainoi. Aru arejameđa ūre:

—Dajacu yúque, arejameđa Jesús.

<sup>15</sup>Nacajari nurejameđa Jesúque. Aru obedivu pōeva nurejaimađa ūi yóboi. Que teni Jesús ūi ācunuiyede Leví cūrami, obedivu jabovare tātura ĩcaipōeva, āmeno ñaipōeva, aru ūi bueimara máre dobarejaimađa, ārajivu Jesúque. <sup>16</sup>Apevu judíova, ñaicōjeiyede ñaiye cōmajivu, fariseo āmicuriyajibocavu, curejaimađa nore. Ina fariseovacavu, Jūmenijicui yávaiye báquede bueipōeva, Jesús āñure jári, ina jabovare tātura ĩcaipōeva que aru āmeno ñaipōeva que máre, arejaimađa ūi bueimarare:

—¿Aipe teni āñuma jabovare tātura ĩcaipōeva que aru āmeno ñaipōeva que máre? jēniari járejaimađa náre.

<sup>17</sup>Que aivure jāpiari, Jesús arejameđa:

—Meara pōevare juoipōecui cadateiye jaubevu. Quénora iijimarare ūi cadateiye jauvu. Dabedejacacu yu ijāravui, cutucuyu mearare ne baju dāpiainore. Quénora darejacacu yu, meadacuyu āmenare, ne chīorajiyeye ayu ne āmeina teiyede, Jūmenijicui ārumetequiyeye ayu diede, arejameđa Jesús.

### **Pōeva āmevva āiyede ne jēniaino Jūmenijicue**

(Mt 9.14-17; Lc 5.33-39)

<sup>18</sup>Dinumu Juan Bautistai bueimara aru fariseovai bueimara máre ne jēniayede Jūmenijicue āmenejaimađa āiyede. Aru pōeva eari, jēniari járejaimađa Jesúre:

—¿Aipe teni Juan Bautistai bueimara aru fariseovai bueimara máre āmevva āiyede, ūbenita mi bueimara āmevu āmema āiyede? arejaimađa.

<sup>19</sup>Jesús arejameđa náre:

—Ina purubuoyu ūi cutuimara, ne torojuve tenajiyeye ayu ūi purubuoiyede, ye āmevu āmema āiyede ūi cuede cāreja náque. Nopedeca ji bueimara torojurivu ji cuede náque, āmevu āmema āiyede. <sup>20</sup>Ūbenita ji mauva ne nuvarajiyede yure, ji bueimara chīoivu āmenajarama āiyede, arejameđa Jesús.

<sup>21</sup>Cojedeca Jesús buedejameđa náre:

—Põeva jëomema cuitótecaje mamacaje joabecajei javecarõre. Nópe ðaru, no jëoicajeva mamacaje jaðevajebu javecarõre. Que ðaru, pueno baju járojebu codeicobe. Quédeca ñame buojabema ju aivu ji bueiye mamaene aru javeque bueiye de máre. <sup>22</sup>Põeva yuabema vino úyaicorore mamacorore áimacaje curubu javecacurubuque. Que ðaru, codeóvajebu dicurubure. Yuri bíjajebu dicoro. Aru bíjajebu dicurubu máre. Ëbenita ne yuaru mamacorore mamacurubuque bíjajebu dicoro. Quédeca ñame buojabema ðaivu yópe ji bueiye mamaepe, ðare nuivu baru yópe ne jave ðaiye báquepe, náre arí buedejameða Jesús.

**Jesús bueimara ne puyoino oteiyede jabuóvairavui**

(Mt 12.1-8; Lc 6.1-5)

<sup>23</sup>Apejáravu, judíovai jabuóvairavavu sábadoi, Jesús vaidéjameða oteiyede curói ñi bueimaraque. Aru ñi bueimara jënejaimaða iye oteiyede. <sup>24</sup>Apevu fariseova jëniari járejaimaða úre:

—Jájacu. ¿Aipe teni mi bueimara ðaivuba ámeno, maja judíova maje ðaicójemeno, jabuóvairavure? arejaimaða na.

<sup>25</sup>Ëbenita Jesús, ñi dápiaye boje ñi bueimara ámeno ðabevure, arejameða náre:

—¿Jáve árumetenaru muja yo David bácu ðaino mácarõre, úre jauéde aru ávué ijíede úre, úque curivure máre? <sup>26</sup>Ë mácu ecorejaquemavu Jümenijicui cürami, Abiatar bácu ñi sacerdotevare jaboteiye báquede. Aru árejaquemavu páure, Jümenijicure jíye báquede, ina sacerdoteva ne áiyede, sacerdote ámecu bácuvacari. Aru jídejaquemavu úque curivure máre, sacerdoteva ámevu bácuwareca. Ëbenita Jümenijicu ñájine ðabedejaquemavu na mácuware, arejameða Jesús.

<sup>27</sup>Cojedeca Jesús arí buedejameða:

—Jümenijicu epedejaquemavu jabuóvairavure põevare boje. Ëbenita epebedejaquemavu põevare dijárvure boje. <sup>28</sup>Yu, Jümenijicui daroimu mácu úmupe, jabocubu yu. Que baru ðaicójeni buojaivu yu põevare ne ðaiyede caijárvure aru jabuóvairavure máre, arejameða Jesús.

**Jesús ñi meadaino úmu ámuve jiacubecure**

(Mt 12.9-14; Lc 6.6-11)

**3** <sup>1</sup>Bedióva Jesús ecorejameða cojedeca judíovai cójijiñami. Noi curejameða cüinácu úmu, ámuve cüinápüravu jiacubecu. <sup>2</sup>Aru fariseovacavu Jesúre coreni járejaimaða. Jesús ñi meadaru ñai úmure, ámuve jiacubecure, judíovai jabuóvairavavu sábadoi, jáiyurivu, boro coyurí aðaiyuríduivu barejáimaða úre. <sup>3</sup>Dinumu Jesús arejameða ñai úmu ámuve jiacubecure:

—Nacajari nújacu põeva jëneboi, arejameða Jesús.

<sup>4</sup>Aru arejameða apevu noi curivure:

—Jëniari jáquijivu cüináro mujare. ¿Yéde ðaicójeini Jümenijicu jabuóvairavure, mearore o ámenore; meadaru põevare o boarí jaravaru náre? arejameða Jesús.

Ëbenita bi arejaimaða na. <sup>5</sup>Que baru Jesús jararí chïorejameða, ne coreóvabe boje. Aru arejameða ñai úmu ámuve jiacubecure:

—Jabióvajacu mi ámuvede, arejamedá Jesús.

Ëi jabióvayiede meatedejavüya ñi ámuve. <sup>6</sup>Que teni ina fariseova etaivu bácvu cójijidejaimada Herodede cadateipõevasive. “Boarí jarúvarãjarevü”, arí dápiaivu barejáimada Jesúre.

**Jesús ñi meadaino obedivu pøevare macajitabu urabu êcarui**

(Mr 4.1; Lc 5.1-3)

<sup>7-8</sup> Jes ús apevüre dajocarí nurejamedá macajitabu urabu êcarui ñi bueimaraque. Obedivu pøeva cujurejaimada ñi yóboi, Galilea aru Judea ámicurijoborôacavü, Jerusalén ámicuríimarocavü, Idumea ámicurijoborôcavü, aru Jordán ámicuriya jia apedüvecavü: Tiro aru Sidón ámicuríimaroacavü máre. Obediyajuboa pøeyajuboa nurejaimada ñi yebai, jápiaivu dayure urarô pøeva ne darí majibede. <sup>9</sup>Aru Jesús arejamedá ñi bueimarare:

—Meadarí corejará jiadocüre, pøeva obedivu ne daríburu, jatujivarí, ne chítomenajiyepe yüre, arejamedá Jesús.

<sup>10</sup>Obedivüre ñi meadaiye báque boje, apevü ijimara ére chítorejaimada, tñoyuríduivu ére. <sup>11</sup>Aru ina abujuva ne ímamara máre Jesúre jári, mori turí codoboborejaimada ére:

—Murecabu Jümenijicui mácu, arí codoboborejaimada.

<sup>12</sup>Ëb eni ta Jesús yávaicøjemenejamedá parurøque, apevü ne coreóvabenajiyepe ayu ñi daiyede.

**Jesús ñi beoíno ñi yávaiye méne coyucøjeimarava**

(Mt 10.1-4; Lc 6.12-16)

<sup>13</sup>No yóboi Jesús muri nurejamedá cüracüi. Aru órejurejamedá ñi úmarare. <sup>14-15</sup>Beorejamedá doce paivüre. Aru epedejamedá náre ñi yávaiye méne beorí coyucøjeimarare, ne yóvarãjiyeppe ayu ére aru jarocuyü náre ne coyurãjiyeppe ayu Jümenijicui yávaiyede. Paruéde jídejamedá náre, ne jaetovarãjiyeppe ayu abujuvare. <sup>16</sup>Jesús epedejamedá ina doce paivüre: Simón ámicucu bácvüre ámidorejamedá Pedro. <sup>17</sup>Zebedeoí mácu Santiago, aru Santiagoí yócu Juan máre, ámidorejamedá náre Boanerges, ôpo tuínoí mára ayu. <sup>18-19</sup>Apevüre máre beorejamedá Jesús: Andrés, Felipe, Bartolomé, Mateo, Tomás, Alfeoi mácu Santiago, Tadeo, Simón ámicucu Celote, aru Judas Iscariote máre. Ñai marejamedá jëni jícuyü Jesúre ñi mauvare. Que teniburu yóboi, Jesús ecorejamedá cürami.

**“Abujuvai jabocui paruéde cuvabi ñ” arí, ne boro coyurí adaríduino Jesúre**

(Mt 9.34; 10.25; 12.22-32; Lc 11.14-23; 12.10)

<sup>20</sup>Bedióva cójijidejaimada obedivu pøeva. Aru áicøjemenejaimada Jesúre, ñi bueimarare máre. <sup>21</sup>Pøeva “Árumemi” ne are cuiye boje ére, ñ jivü jápiarí, nurejaimada, ére jënanuivu. <sup>22</sup>Ëbenita ina Jümenijicui yávaiye báquede bueipøeva, émeni daivu bácvu Jerusalén ámicuríimaroore jocarí, arejaimada:

—Cuvabi Beelzebúre. Que baru abujuvai jabocui paruéque jaetovaibi abujuvare, arejaimada.

<sup>23</sup>Jesús náre órejayu bácu ñi yebai, yópe coyurejamedá:

—¿Aipe teni buojaidica abujuvai jabocu jaetovayü ñi baju? <sup>24</sup>Cüináro jaborôcavü ádamateivu baru ne bajumia, ina jaborôcavü cüinájarama

na. <sup>25</sup> Aru nopedeca cūinádami cūramicavū ādamateivū baru ne bajumia, diñamicavū cūinájarama na. <sup>26</sup> Aru nopedeca bájebu ñai abujuvai jabocu, jaetovayū baru abujuvai jabocure. Ādamateyū bájebu ũi bajuma. Aru jaetovayū baru abujuvare, joe parucu cubejebu ũ.

<sup>27</sup> Ūbenita buojaino āmevū ecoivū ñai ũmū parucui cūramine, ñavarajivū ũi cuvaede. Mamarumure ũre buorī, que ñaivū bācavuta buojaivū ñavaivū ũi cuvaede, arejameđa Jesús.

Nópe ayū, Jesús yópe aiyucu barejaquémavū: Ūvacari parubi abujuvai jabocu pueno, ũi jaetovaiye boje abujuvare pōevare jocarī.

<sup>28</sup> Aru Jesús arejameđa:

—Jāve coyuyubu mujare: Jūmenijicu ārumetecuyume caiye iye mje āmeina teiyede, aru caiye iye Jūmenijicure āmeina yávaiyede máre. <sup>29</sup> Ūbenita ácu pōecu ũi yávaru āmeina ñai Espiritu Santore, aipinumu Jūmenijicu ārumetebecube ũi āmeina teiyede. Quédata boropatecuyume, bíjacuyū Jūmenijicure jocarī cainumua, náre arī buedejameđa Jesús.

<sup>30</sup> Nópe arejameđa Jesús, ina Jūmenijicui yávaiye báquede bueipōeva “Ñai ũmū cuvabi abujucure”, ne borocurī yávaiye boje ũi borore.

### **Jesús ũ jina ne voino ũre**

(Mt 12.46-50; Lc 8.19-21)

<sup>31</sup> Din ũmure Jesúi yóva aru jípaco máre earī, jedevamia mauteni órejaicōjeneja imada ũre. <sup>32</sup> Aru ina pōeva obedivū dobarivū ũi curōi arejaimada ũre:

—Mipaco aru mýova máre jedevai cuma. Aru vodama mure, arejaimada ũre.

<sup>33</sup> Aru Jesús arejameđa:

—¿Ñamema jípaco aru jýova? jēniari járejameđa Jesús.

<sup>34</sup> Ina pōeva obedivū dobarivū ũi curōi jári, arejameđa:

—Yuibu jipaco aru jýova máre. <sup>35</sup> Que baru caivū ina ñaivū Jūmenijicui urōpe, nárecabu jýocupe páyū, aru jýocope pádo, aru jipacope pádo máre, arejameđa náre Jesús.

### **“Oteipōecure” jári dápiarī ne ñarājiyepe aino**

(Mt 13.1-9; Lc 5.1-3; 8.4-8)

**4** <sup>1</sup> Apejāravū Jesús buedejameđa cojedeca macajitabu urabu ēcarui. Aru obedivū pōeva cójijidejaimada ũi yebai. Que baru jiađocu ēcaru joabenoi curicure jári, jaturī dobarejameđa dicūra, buecuyū pōevare. Aru caivū ina pōeva curejaimada macajitabu urabu ēcarui. <sup>2</sup> Náre buedejameđa jári dápiarī ne ñarājiyepe ayū caijē apejiēne. Aru arejameđa ũi bueiyeque:

<sup>3</sup> —Jápijarā. Yui oteipōecu otecunūquemavū. <sup>4</sup> Ūi oteiyede ape oteiye tuquemavū ma ēcarui. Aru mýjina darī, āradaquemavū caiye iye oteiyede. <sup>5</sup> Ape oteiye tuquemavū joborō edubeno cūrabo puenoi. Nore joborō yaurijē cubeniburu, maumejiena pīarī etaquemavū. <sup>6</sup> Ūbenita avia ũi boiyede ēquemavū. Aru nuomua ũmujurimua cubeni, yaíquémavū. <sup>7</sup> Ape oteiye tuquemavū miucua jēneboi. Aru yóboi miucua bucūrī, muiní, chíoiyede, jēiye jēmetequemavū. <sup>8</sup> Aru ape oteiye tuquemavū mearo joborōi. Aru jēiye jēquemavū, apeñū jēiñū treinta paivua, aru apeñū jēiñū sesenta paivua, aru apeñū jēiñū cien paivua, caiye oteiyabea coapa, náre arī buedejameđa Jesús.

<sup>9</sup>Dinũmũ Jesús arejamedã náre:

—Me jápiajarã muja iye ji bueiye, arejamedã Jesús.

**Aipe aiyurõre Jesús ãi jári dápiarĩ ne ñarãjiyepe aino**

(Mt 13.10-17; Lc 8.9-10)

<sup>10</sup>Jesús ãi cuedẽ cüinácua, apevũ ãi yebai joabenoi curivũ aru ãi bueimara máre jẽniari járejaimada ãre:

—¿Aipe teni bueyurũ mu jári dápiarĩ ñũje ñarãjiyepe ayũ mi coyũieque? arejaimada.

<sup>11-12</sup>Jesús arejamedã náre:

—Mujare coyurĩ majide ñayũbu yũ Jũmenijicũ ãi coyũicõjeme máquede. ã jaboteibi mujare, ãi põevare. ãbenita ina ãi jaboteimara ãmevũ, yópe jedevai curivũpe, diede majibema. Quéda jári dápiarĩ ne ñarãjiyepe ayũ bueyũbu yũ náre, jáivũreca, ne jári majibenajiyẽpe ayũ aipe aiyurõre ne jáiyede, aru jápiaivũreca, ne jápiarĩ majibenajiyẽpe ayũ aipe aiyurõre ne jápiaiyede. Na majidivũ baru, chĩori oatũvajebu ne ñaiyede. Jũmenijicũre ju aru, ãrumetejebu ã ne ãmeina teiyede, arejamedã Jesús.

**Jesús ãi coyũino aipe aiyurõre “oteipõecure” jári dápiarĩ ne ñarãjiyepe aino**

(Mt 13.18-23; Lc 8.11-15)

<sup>13</sup>Yópe arĩ, Jesús coyũrejamedã ãi bueimarare:

—¿Majibenarũ yo jári dápiarĩ muje ñarãjiyepe ayũ ji ainore? ¿Aipe ñari majinajivurũ caiye ji jári dápiarĩ muje ñarãjiyepe ayũ arĩ bueiye? <sup>14</sup>Iye oteiye Jũmenijicũ yávaiepe paivyẽbu. Aru ñai oteipõecu Jũmenijicũ yávaiepe coyũipõecure páyũbe. <sup>15</sup>Aru inamu ma ñcarui oteiye turĩduiye báquepe paivũ. Náre coyũiyede Jũmenijicũ yávaiepe jápiadama, ãbenita coreóvarĩ eabevũva. Que baru ne jápiarĩburu yóboi, ñai abujuvai jabocu ñari, ãrumetede ñaibi Jũmenijicũ yávaiepe, ne jápiaie báquede. <sup>16</sup>Aru inamu joborõ edubenoĩ, cũraboã puenoĩ, oteiye turĩduiye báquepe paivũ. Jũmenijicũ yávaiepe jápiarĩ, torojũma me. <sup>17</sup>ãbenita Jũmenijicũ yávaiepe ju arĩduyama. Que baru quĩjino yóboi, põeva ne cãrijovaru aru ñãjine ñaru náre, ne ju aie boje, maumena ñajocadama ne ju aiyede Jũmenijicũ yávaiepe. Que teni ju abema na. <sup>18-19</sup>Aru inamu miucua jẽneboi oteiye turĩduiye báquepe paivũ. Na máre jápiaivũ Jũmenijicũ yávaiepe, ãbenita cãrijĩñama ijaravũquede. Torojũma tãutũraque. Aru cãvayũma cãijĩe apejĩene. Que baru ñapiadama caiye diede. ãbenita ñapiabema Jũmenijicũ yávaiepe. Que baru Jũmenijicũ cadatebebi náre ãi yávaieque yópe ãi urõpe. <sup>20</sup>ãbenita inamu mearo joborõĩ oteiye tuiye báquepe paivũ. Jũmenijicũ yávaiepe jápiadama. Aru diede ju adama. Nárecabu ju are ñaivũ apevũ põevare, apevũ treinta paivũre, apevũ sesenta paivũre, aru apevũ cien paivũre, arĩ buedejamedã Jesús.

**“Põoibure” jári dápiarĩ ne ñarãjiyepe aino**

(Mt 5.15; 7.2; 10.26; 13.12; 25.29; Lc 6.38; 8.16-18; 11.33; 12.2; 19.26)

<sup>21</sup>Cojedeca Jesús, yópe arĩ, buedejamedã náre:

—¿Põecu davaidi põoibure, ñõcũyũ dibure puebũ cãchinoĩ o paraino cãchinoĩ? Bi, quẽnora tuoibi dibure jocũve puenora. <sup>22</sup>Que baru caiye yaveiye

báque jároquiyebu. Aru dupióvaiye báquede máre járajarama caivu pōeva.

<sup>23</sup> Me jápiajarā mūja iye ji bueiyede, arejameđa Jesús.

<sup>24</sup> Aru cojedeca, yópe arī, buedejameđa náre:

—Me dápiajarā mūje jápiaiyede ji bueiyede. Yópe pōeva adama: “Mi corevacaru apecure cūinárū jororūque, didūmica Jūmenijicu corevacacūyume mure. Aru jícūyume pueno baju”. <sup>25</sup> Nopedeca ñai jápiayure Jūmenijicui yáviyede Jūmenijicu pueno baju ūi majiéquede jícūyume ūre. Ūbenita ñai jápiabecure Jūmenijicui yáviyede, iye ūi quíjino majiéde Jūmenijicu ūre icūyume, arejameđa Jesús.

### **“Oteiyé bucunore” jári dápiarī ne đarājiyepe aino**

<sup>26-27</sup> Cojedeca Jesús arī coyurejameđa:

—Jūmenijicui jaboteino yópe painotamu. Cūinácū ūmū ūi oteiyé epeiye joborōi, otenī buojarī cāimi ū ñamiá coapa aru coedaibi jāravūa coapa. Que tenī ārumemi diede, oteiyé báquede. Ūi oteiyé bucuivū, ūbenita ūi majibedeca. <sup>28</sup> No joborō bućure đavū no bajumia. Mamarūmū etaivū cainiñū. No yóboi etaivū yoca. No yóbo baji etaivū diñū jēiyoa. <sup>29</sup> Aru jēijāravū eaiyede, jēiyoa coboiyede, pōeva jēñaima divuáre, arejameđa Jesús.

### **“Oteiyabe mostazare” jári dápiarī ne đarājiyepe aino**

(Mt 13.31-32; Lc 13.18-19)

<sup>30</sup> Jesús arejameđa:

—¿Yépe ārojari yo Jūmenijicui jaboteino? ¿Yéque jári coyurājidi maja nore? <sup>31</sup> Yópe mostaza āmicuriyabe oteiyabepebu. Cūinácū ūmū diyabede ĩni, oteibi joborōi. Diyabedecabu oteiyabe quíjiyabe caiye oteiyé pueno. <sup>32</sup> Ūbenita ūi oteniburu yóboi, bućurī muivū uracū ape oteiyé pueno. Aru dicū cavabua uracavabua nuivū. Dicū taino cāchinoi, mǵina ne juaiboa đadama, arejameđa Jesús.

Nopedeca mamarūmure Jūmenijicui jaboteino quíjinotamu, pōeva obebevū ne cue boje noi. Ūbenita Jūmenijicui yáviye méne coyurīburu yóboi, urarótamu no Jūmenijicui jaboteino, obedivū pōeva ne cue boje noi.

### **Aipe teni Jesús ūi bueino jári dápiarī ne đarājiyepe aiyede**

(Mt 13.34-35)

<sup>33</sup> Yópe arī, buedejameđa Jesús Jūmenijicui yáviyede jári dápiarī ne đarājiyepe ayū. Ne jápiarī coreóvarājiyepe ayū buedejameđa náre cainumua.

<sup>34</sup> Coyure curejameđa cainumua jári dápiarī ne đarājiyepe aiyéque ūi bueinore. Ūbenita coyurejameđa ūi bueimarare aipe aiyuede iye jári dápiarī ne đarājiyepe aiyede.

### **Jesús ūmevure ūi bíjaroino**

(Mt 8.23-27; Lc 8.22-25)

<sup>35</sup> Dījāravūmica nainújie baji Jesús arejameđa ūi bueimarare:

—Járica, macajitabū urabū apeduvei nurevū, arejameđa náre.

<sup>36</sup> Quénora dajocarī nurejaimađa, nuvaivū Jesúre pōevare jocarī jiadocūi. Apevū pōeva nurejaimađa jiadocūai, náre coapa yóvaivū náre. <sup>37</sup> Aru jataivure japurejavūya ūmevū parurō baju. Pācaiboa coiye boje jiadocūi,

buidéjavūya dicūre oco. <sup>38</sup> Ūbenita Jesús cāñu marejámeda japuvaino yebai. Tūorejameda jabuóvaiboi. Aru coedavarī, arejaimada ūre:

—¿Mu jidubecurū maje corājinore? arejaimada.

<sup>39</sup> Jesús coedarī jararejameda ūmevure. Aru arejameda macajitabure:

—Quénora, pācamejabu, arejameda Jesús.

Que aiyede, ūmevu bījacunuri, pācamenejavūya dibu macajitabu. <sup>40</sup> Que teni Jesús arejameda ūi bueimaraire:

—¿Aipe teni jidurivurū muja? ¿Aipe teni “Jesús meadacuyume ñujare”, abevurū muja? arejameda.

<sup>41</sup> Jesús ūi que aiyede, cuicumari arejaimada ne bajumia:

—¿Yécuba ñai yópe ñayū, ūmevu aru macajitabu máre ju aimu? arejaimada na.

### **Jesús ūi meadaino ūmu abujuva ne imamure**

(Mt 8.28-34; Lc 8.26-39)

**5** <sup>1</sup> No macajitabu urabure jatarī nuri, apeduvei jatarejameda Jesús ūi bueimaraque. Diduvei cūrejaimada na, Gerasa āmicurōcavu. <sup>2</sup> Aru Jesús ūi maiyede jiadocūre jocarī, maumejena copu nurejameda cūinācu ūmu, abujuva ne imamu. Yaivu bācavu ne baju bācarōre jauvainore jocarī etarejameda. <sup>3</sup> Cucu barejámeda noi. Aru ñame buojabedejaimada buoivu ūre tāumeaque. <sup>4</sup> Cainumua ūre ūi āraðoare aru ūi āmuveare máre tāumeaque buorīdurejaimada. Ūbenita die ūi āmuveare ne buoiyede cobururū burarī, die ūi āraðoare ne buoiyede máre pēvari buravarejameda ū. Tuijībua ñarī dajocavarejameda ñai abujuva ne imamu. Aru pōeva ūre jēivu parubedejaimada na. <sup>5</sup> Jāravua aru ñamiá coapa cuyu barejámeda codoboborī cūracūai aru pōeva ne yaivu bācavure jaruvainoi. Ūi bajure jādodovari, churiá teni, jive copidejameda. <sup>6</sup> Ūbenita Jesúre joai jári, cúyarī nuri, ñuatutarejameda ūi yebai. <sup>7</sup> Aru bujié codoboborī, arejameda:

—Mu, Jesús, Jūmenijicui mácū, caivu pueno parucui mácū, ¿yéde ucūrū yáque? Jēniaivu mure Jūmenijicuque, ñājine ñabejacu yure, arī codoboborejameda Jesúre.

<sup>8</sup> Nópe arejameda, Jesús ūi aye bāque boje jipocamia: “Muja, abujuva, etajarā ñai ūmure jocarī”, ayu barejámeda Jesús. <sup>9</sup> Aru Jesús jēniari járejameda:

—¿Yécu āmicucurū mu? arejameda.

Ju arī arejameda:

—Obedivubu ñuja. Que baru Obecu āmicuvu yu, arejameda.

<sup>10</sup> Pare jēniarejameda Jesús ūi jarobequiepe ayu náre ne curōre jocarī.

<sup>11</sup> Cūrejaimada noi cūracū yebai obedivu oteivāri, āre cuivu. <sup>12</sup> Aru jēniarejaimada ina abujuva Jesúre:

—Jarojacu ñujare ina oteivāri, ñuje corājiyepe nára, arejaimada na.

<sup>13</sup> Dinumuma nuicōjenejameda náre Jesús.

—Ñujara, arejameda.

Aru ina abujuva etarī, corejaimada ina oteivāri. Na marejáimada pucamil paivu baju. Cúyarī nuri, turejaimada cūracū ēmeinoi, macajitabu urabui. Turī, corī bījarejaimada na. <sup>14</sup> Diede jári, ina oteivāri māvure coreipōeva cúyarī nurejaimada, coyūvu urāimaroai aru imaro curōvaquede

máre. Que baru obedivü pöeva, “¿Aipe tenama?” arí, járanurejaimada. <sup>15</sup> Jesús yebai nuivü, járejaimada ñai ümu abujuva ne ñájiñe ñaimü mácu dobacure, cuitótecajede doyure, meacure cari. Aru jidurejaimada úre. <sup>16</sup> Coyurejaimada ina jáivü bácvü Jesúí ñaiye báquede aru aipe vaino mácaröre ñai ümu abujuva ne ímamü mácvü, ina oteivárivare máre. <sup>17</sup> Quénora “Nujacu”, arejaimada Jesúre paruróque. Etaicójenejaimada úre ne curöre jocarí.

<sup>18</sup> Aru Jesús üi jatuiyede jiadocüi, jaturídurejaimada ñai ümu abujuva ne ímamü mácu. Jëniaridurejaimada paruróreca cuiyucu úque. <sup>19</sup> Ëbenita Jesús yóvaicójemecu arejaimada úre:

—Nujacu mi cürami, mívü yebai. Aru coyujacu caiye iye urarõ Jümenijicu üi ñaiyede múque, aru aipe üi cõmaje ároje jáinore müre, arejaimada Jesús.

<sup>20</sup> Nuri, coyurí búrejaimada Decápolis ámicuríjoborócaímaroai caiye iye Jesús üi ñaiye báquede úre. Aru caivü cuccumarejaimada jápiaivü üi que ainore.

**Jesús üi nacovaino Jairoi máco bácore aru üi meadaino nomió ñájiñore  
jiveque**

(Mt 9.18-26; Lc 8.40-56)

<sup>21</sup> No macajitabü urabü Jesús jatayü bácu cojedeca apeduvei jiadocüi, cójjijidejaimada obedivü pöeva üi yebai. Aru üi curejaimada macajitabü urabü écarui. <sup>22</sup> Üi yebai earejaimada cüinácu judóvái cójjijíñamine coreipöecu, Jairo ámicucu. Aru maumejie járina ñuatutarejaimada Jesúí cuboba yebai.

<sup>23</sup> Uraróreca jëniari, arejaimada Jesúre:

—Jímaco yaiyóta tebico õ. Yáque darí, tvojacu óre mi puruque, õi yaibécojiyepe ayu. Aru cucodome õ, arejaimada Jesúre.

<sup>24</sup> Üi que aiyede, Jesús nurejaimada úque. Cujurejaimada náre obedivü pöeva. Aru cojivare nurejaimada Jesúre. <sup>25</sup> Ne jëneboi cüináco nomió curejacoda. Doce paiujua baju ijimo marejácoda jive yuiyeque. <sup>26</sup> Pare ñájiño mácore, obedivü juoipöeva juorídurejaimada óre. Aru bojedarí jaruvarejacoda caiye õi cuvae báquede, bojedacodo ina juoipöevare. Ëbenita ye meatebedejavüya. Quédata pueno baju ijino nurejavüya óre. <sup>27</sup> Jesús üi pöevare ümedavaiyede borore jápiado báco, nurejacoda üi yóboi obedivü pöeva jëneboi. Aru jëni járejacoda üi doicajena. <sup>28</sup> Yópe arí dápiarejacoda õ: “Yü jëni jádo maru üi doicajede, quénora ümedacodomu yu”, arejacoda õ.

<sup>29</sup> Maumejiena õi jëni jáiyede, bíjarejavüya õi jive yuino mácarõ. Aru dápiarejacoda caino õi baju meateni nuinore. <sup>30</sup> Ëbenita Jesús majicu üi baju üi paruécaröre etaiyede úre jocarí, copedini, ina obedivü pöevare arejaimada: —¿Ñame matedí yure jëni jádo ji cuitótecajede? jëniari járejaimada Jesús.

<sup>31</sup> Üi bueimara arejaimada Jesúre:

—¿Obedivü pöeva cojivare daivure jáñuvacari, “¿Ñame matedí yure jëni jádo?” ayurü mü? arejaimada na Jesúre.

<sup>32</sup> Ëbenita járidurejaimada caino üi curövare, jáiyucu ñame jëni jádo mácore úre. <sup>33</sup> Que teni ico nomió bidini jiduco, majico Jesús üi ümedavaino mácaröre óre, nuri ñuatutarejacoda üi jipocai. Aru coyurejacoda jáve õi ñaino mácaröre. <sup>34</sup> Jesúcapüravü arejaimada óre:

—Mü, ji umo, “Ë meadaiye majibi yure”, arí dápiarebu mü. Que baru mi que arí dápiaye boje, meadaivü müre. Ména nuri cujaco mü. Caride meateivü, arejaimada óre.

<sup>35</sup> Ëi boroteiyede óque, earejaimada ina judíovai cójijĩnamine coreipõecui cūramicavu. Jairore arejaimada na:

—Javeta mímaco yaibíco ò. Quénora cārijovamejacu bueipõecure, arejaimada.

<sup>36</sup> Ëbenita Jesús jápiayũ bácu ne yávainore, jápiabecupe teni, arejamedã Jairore:

—Jidubejacu mu. Quénora ju ajacu ji coyuinore, arejamedã Jesús.

<sup>37</sup> Aru apevure nuicõjemeni, nuvarejamedã Pedrore, Santiagore, aru Jũare, Santiagoi yócure máre. <sup>38-39</sup> Nurejaimada Jairoi cūrami. Cójijivure jári, aru codoboborĩ oivure jári, aru cõmaje āroje teivure máre jári, ecorĩ arejamedã Jesús:

—¿Aipe teni cójijini bujiéque oivurũ muja? Ò yaiyó āmemico. Quénora cādotame, arejamedã.

Nāre nópe arejamedã Jesús, ñi majié boje ñi nacovaquinore óre yainore jarũvarĩ. <sup>40</sup> Ëi que aiyede, yuridejaimada ĩre. Ëbenita Jesúcapũravũ náre etavarĩ, jarorejamedã jedevai. Jípacure ĩni, aru jípacore ĩni, aru ĩque curivure máre ĩni, ecorejamedã jueđoco bácoi curitucubui.

<sup>41</sup> Ò mácoi purure jēni, “Talita cumi”, arejamedã óre Jesús. “Jueđoco, nacajajaco”, ayũ barejamedã, óre que ayũ.

<sup>42</sup> Cũinã ico jueđoco, doce paĩjua cuvaco, nacajari, vaivárejacoda. Aru ina jáivũ bácvũ pare cucumari dápiarejaimada. <sup>43</sup> Ëbenita Jesús apevure coyucõjemenejamedã náre iye ñi ñaiye báquede. Aru “Āiyede jíjarã óre”, arejamedã Jesús.

#### **Jesús Nazarei ñi nuino**

(Mt 13.53-58; Lc 4.16-30; Jn 4.44)

**6** <sup>1</sup> Jesús nurejamedã nore jocarĩ, copainũũ ñi joborõĩ ñi bueimaraque. <sup>2</sup> Aru judíovai jabuóvairavũ sábadoi buenĩ búrejamedã judíovai cójijĩnami. Ina obedivũ põeva ĩre jápiaivũ cucumari arejaimada:

—¿Āroqueba caiye iye ñaiye? ¿Yéba iye ĩre majide ñaiye, aru iye ñaiye põeva ne ñarĩ majibede? <sup>3</sup> ¿Ñai āmeni jocure memeipõecui mácu? ¿Ñai āmeni Maríai mácu? ¿Santiago, José, Judas, aru Simón máre námamicũ āmeni? ¿Ëi yórõmiva máre cubedi majaque yui? arejaimada na.

Que arĩ, āmeina járejaimada ĩre. <sup>4</sup> Ëbenita Jesúcapũravũ arejamedã náre, ne ju abe boje:

—Cubebi Jũmenijicui yáviyede coyucaipõecu ne puedaimũ ñi jivũ aru ñi cūramicavu máre ñi joborõĩ, arejamedã.

<sup>5</sup> Que baru ñabedejamedã põeva ne ñarĩ majibede nore. Quénora obebevũ ijimarare ñi puruque tuorĩ meadarejamedã. <sup>6</sup> Chĩori dápiarejamedã pare ne ju abe boje ĩre.

#### **Jesús ñi jaroino ñi bueimarare**

(Mt 10.5-15; Lc 9.1-6; 10.4-11; Hch 13.51; Stg 5.14)

Jesús buede nurejamedã cainoa ĩmaroa coapa. <sup>7</sup> Cũinájāravũ ina doce paivũ ñi bueimarare órejarejamedã ñi yebai. Jídejamedã ne parũeva, ne jaetovarājiyepẽ ayũ abujuvare. Aru jarorejamedã pũcarã matuiyeda, ne coyurājiyepẽ ayũ Jũmenijicui jaboteinoque yávaiye méne.

<sup>8</sup>Nuvaicōjemenejameđa apeiĵene ne nuĩnore, páũboare, aru curubũare, aru tăutũrare mãre ne jãrióicãvai. Quénora nuvaicōjenejameđa ne tuturiteiyoava ne nuĩnoi. <sup>9</sup>Aru doicōjenejameđa ne curaidoare. Ũbenita nuvaicōjemenejameđa náre pucacajea cuitótecajeare. <sup>10</sup>Que baru arejameđa náre:

—Ári muja ecoivũre ĩmaroi, cujarã cũinãcu cũrami upacuque pu dajocarĩ nuivũta nore jocarĩ. <sup>11</sup>Aru apenoi ne copũ etabedu mujare, aru ne jápiaiyũbedu iye yãvaiye méne, etarĩ mujara. Aru pupejarã jobore mujare jẽiyede muje cuboba cãchinoi ne jáiyede, ne jápiaiyũbe boje. Que teni diĩmarocavũ coreóvarãjarama ju abevũre Jũmenijicũre aru mujare mãre, arejameđa Jesús.

<sup>12</sup>Que arĩburu yóboi, etarĩ nũrejaimađa ũi bueimara, yópe arĩ coyũrãjivũ põevare: “Chĩori dápĩarĩ dajocajarã muje ãmeina teiyede, Jũmenijicũi ãrumetequiyepe aivũ diede”. <sup>13</sup>Jaetovarejaimađa obedivũ abujuvare. Aru obedivũ ĩjimarare olivo ãmicuricũ jẽidua córoque yuarĩ meadarejaimađa na.

### Juan Bautista bácu ũi yaino

(Mt 14.1-12; 16.14; Mr 8.28; Lc 3.19-20; 9.7-9, 19)

<sup>14</sup>Dinũmũ ñai jabocu Herodes jápiarejameđa Jesúi borore, cainoacavũ ne yãvaiye boje ũre. Aru arejameđa:

—Juan Bautista, yaiyũ bácu, nacajacube yainore jaruvãrĩ. Que baru yópe parucube ũ, ũbenina arejameđa Herodes.

<sup>15</sup>Apevũ arejaimađa: “Ũrecabe Elías”. Aru apevũ arejaimađa: “Jũmenijicũi yãvaiyede coyũcaipõecube. Jũmenijicũi yãvaiyede coyũcaipõeva mácavũpe páyũbe ũ”, ávarejaimađa põeva Jesúi borore. <sup>16</sup>Ũbenita Herodes, jápiaiyũ Jesúi borore, arejameđa:

—Ñaime Juan Bautista, ji buravacamũ ũi jipobũre, nacajañũ mácũ yainore jaruvãrĩ, ũbenina arejameđa.

<sup>17</sup>Nópe dápĩarejaquemavũ Herodes, Juan Bautistare, apucũre cãreja, ũi yaiquĩye jipocai, Herodei buoicōjeiye báque boje ũre. Buoicōjenejameđa, jacocũyũ ãmeina teivũre jẽni jacoĩnãmi, yópe Herodei márepaco Herodíai urõpe. Nópe urejacođa, õi jorojĩye boje, ũi ãmecoroĩye báquede Herodede, ũi cuvae boje õre, ĩmacũ Felipei márepacore. <sup>18</sup>Javede Juan Bautista bácu ávarejameđa Herodede: “Jũmenijicũi ãaicōjeiye ũi coyũiye báque Moisés bácuře cuvaicōjemevũ mure apecũi márepacore”, ávarejameđa ũre.

<sup>19</sup>Que baru Herodías jararĩ pare ubedejacođa Juan Bautistare, apucũre cãreja. ũre boarĩ jarũvaiyũrĩdurejacođa. Ũbenita majibedejacođa õ. <sup>20</sup>Aru Herodes jidũre curejameđa Juan Bautistare, apucũre cãreja, ũi majié boje meacũre aru mearo ãayũre. Herodes cãrijiñũ mácũvacarĩ Juan Bautistai coyũiye báque boje, torojurĩ jápiarejameđa ũre. Aru meadarejameđa ũre, apucũre cãreja. <sup>21</sup>Ũbenita cũinãjãravũ, ũi ãrũrĩjãravũ eaiyede, Herodei põetejãravũ bácarõre torojuve teino ãarejameđa ũ. Cuturejameđa caivũ ina jabovare, churara jabovare, aru Galilea ãmicũrijoborõcavũ parũrivũre mãre. Dijãravũ Herodías coreóvarejaquemavũ aipe boarĩ jaruvãrĩ buojacodore Juan Bautistare. <sup>22</sup>Herodíai máco nũri, uparĩ, coyũyarejacođa Herodede aru ũi cutuimarare mãre. Que baru Herodes arejameđa õre:

—Jĩquijivũ mure mi urõre, arejameđa.

<sup>23</sup> Aru paruéque arejamedá óre:

—Jíquijivü mure yéde mi uróre. Yüre ñájine ñajacurí Jümenijicu, ji ñabedu yöpe ji ainope. Coricaita ji jaboteni cavaróre jíquijivü mure, arejamedá cojedeca.

<sup>24</sup> Náre jocarí, etarí nuri, jëniari járejacoða jípacore:

—¿Yéde jëniayi úre? arejacoda.

Aru jípacó jëniaicõjenajacoða óre:

—Juan Bautistai jipobure jëniajaco, arejacoda.

<sup>25</sup> Maumena copainuri ñai jabocu yebai, arejacoda:

—Jíjacu yüre carijíe Juan Bautistai jipobure jororúque, arejacoda ó Herode.

<sup>26</sup> Ói jëniainore jápiarí, chïorejamedá pare. Ubenita üi aye báque boje paruéque, aru üi cutuimarare cayeni, ju abeni majibedejamedá ü. <sup>27</sup> Que baru maumena boaipöcure jarorejamedá, üi davaquiyepé ayü Juan Bautista bácu jipobure. <sup>28</sup> Ñameina teivure jëni jacoíñami nuri, burarí buojarí nüvarejamedá Juan Bautista bácu jipobure jororúque. Jídejamedá ico nomió bojuyore. Aru jídejacoða jípacore, ói majicojiyepé ado Juan Bautista bácu jáve yayíú bácu.

<sup>29</sup> Aru cüiná jápiaivüva iyede, Juan Bautista bácu bueimara nüvarejaimada üi baju bácaróre, jaravaräjivü cüracobe jívüi.

### **Jesús üi áre ñaino cüinápurupe paimil baju ümuvare**

(Mt 9.36; 14.13-21; Lc 9.10-17; Jn 6.1-14)

<sup>30</sup> Dinümü Jesús üi daroimara mácavü copainurejaimada üi yebai. Aru úre coyurejaimada caino ne ñaino mácaróre aru ne bueino mácaróre máre.

<sup>31</sup> Aru obedivü pöeva Jesújäre nuri, jári, copainurejaimada. Que baru ina pöevacapüravü áicõjemenejaimada Jesújäre. Que teni Jesús arejamedá üi bueimarare:

—Járica, majapeda jabuóvarānurajarevü ne cārijovamenoi, arejamedá.

<sup>32</sup> Que teni jiadocüi jaturí, nuri pöecubenoi, nuridurejaimada na, Jesújā, pöevare jocarí nuivü. <sup>33</sup> Ubenita náre nuivure járejaimada pöeva obedivü. Nuivure jári, náre coreóvarí arejaimada: “Jesújāmu”. Que arí, cúyarí nuri, Jesújā ne earājinoi ne jipocai ëmeni, coredejaimada na macajitabu urabu écarui cüríimaroacavü obedivü. <sup>34</sup> Aru ü jatayü bácu, écarui mañü, ina obedivü pöevare jáñü, náre cōmaje āroje járejamedá Jesús. “Ovejave ne coreipöecu cubevüpebebu ina” arí, bueni búrejamedá náre Jesús. <sup>35</sup> Uraró coyurí budejamedá náre Jesús. Náre bueni, nainúta marejávüya. Que baru coyurāerejaimada na, üi bueimara.

—Javeta nainútamü. Aru yo pöecubenotamü. <sup>36</sup> Mü, bueipöecu, pöevare ne ārajiye bojedāicõjejacu mü. Écarucavü ne cūramia coapa aru noi imajinoai máre náre jarorí, “Áranujara” ajacu mü, aridurejaimada Jesúre üi bueimara.

<sup>37</sup> —Muja náre āiyede jíjarā, arejamedá Jesús.

Üi bueimara arejaimada úre:

—Doscientos pajjāravüa memeyi báque bojeque obedivure ne ārajiye páuboare ne bojedārānuru, eabequiyebu iye náre coapa, arejaimada.

<sup>38</sup> Arejamedá náre:

—¿Aipiboa páuboare cvarārü muja? Járanurijide apa, arejamedá.

Aru na majidivü bácvü arejaimada, úre coyüivü:

—Páuboa cūinápurupe paiboa aru moa pucarã cūvavũ ñuĵa, arejaimada na.

<sup>39</sup>Dinũmure cōriá puenora pōevare dobaicōjenejameda Jesús. Yajuboa teni, náre dobaicōjenejameda ũ. <sup>40</sup>Ũi dobaicōjeiyede, dobarejaimada ina pōevacapūravũ. Dobarĩ, yajuboa teni, cainimea teni, dobarejaimada na. Cincuenta paivũ cūriyajuboa aru cien paivũ cūriyajuboa dobarejaimada na. <sup>41</sup>Aru die páuboa cūinápurupe paiboare aru moa pucarãre jēni, cavarōi jáñũ, torojuede jidejameda Jūmenijicure. Torojuede jini buojarĩ, páuboare cotuvarĩ jebeni, pōevare jicōjenejameda Jesús ũi bueimare. Aru moare máre quédeca pōevare cotuvarejameda Jesús. <sup>42</sup>Aru caivũ ãri yapidejaimada na. <sup>43</sup>Āri bubarĩburu iye cotuvaiye báque páu aru moa máre pōeva ne ãri oabede ĩni, meadarĩ, puebua doce paibuare, judíovai puebuare, buivárejaimada ũi bueimara. <sup>44</sup>Aru ina ãivu bácavũ ũmũva cūinápurupe paimil baju barejáimada na.

### **Jesús ũi cuino oco puenora**

(Mt 14.22-27; Jn 6.16-21)

<sup>45</sup>Maumejiena Jesús jatuicōjenejameda ũi bueimare jiadocũi, ne nũrajipepe ayũ ũi jipocai apeduvei, Betsaida āmicurĩmaroi. Que teni copaicōjenejameda ina pōevare. <sup>46</sup>Ne nũriburu yóboi, Jūmenijicure coyũcũnurejameda cūracũi. <sup>47</sup>Ñami marejávũya. Ne jiadocũ macajitabũ ũrabũ coricai cūrejavũya. Aru Jesús cūracũi cūrejameda. <sup>48</sup>Nore cūcũ, járejameda ũmevũ cobainore náre. Que baru jatabedejaimada apeduvei. Pare doarĩ ñājinejaimada. Aru jāravũcapūravui aviá ũi daquiye jipocai, Jesús curĩ macajitabũ ũrabũ puenora nũrejameda ne yebai. Vaivárejameda náre jocarĩ vaiyũpe. <sup>49</sup>Ũbenita ũ cuyure macajitabũ ũrabũ puenora jári, jidurivũ codoboborejaimada na:

—¿Pōe decocũ bácũ bária? codoboborĩ arejaimada na.

<sup>50</sup>Caivũ ina ũre jári, pare cūcumarejaimada. Ũbenita maumena náre coyũyũ arejameda:

—Paruèque dápiajarã. Yútamu Jesús. Jidubejarã muĵa, arejameda náre Jesús.

<sup>51</sup>Que arĩ, jaturejameda ne yebai jiadocũi. Aru ũmevũ bĩjarejavũya. Que teni cūcumari pare dápiarejaimada. <sup>52</sup>Coreóvabedejaimada iye Jesús ũi ðaiye báquede páuboaque, ũi ãre ðaiye báquede ina cūinápurupe paimil baju ũmũvare. Que baru ye coreóvarĩ majibedejaquemavũ na.

### **Jesús ũi meadaino Genesarecavũ ijimarare**

(Mt 14.34-36)

<sup>53</sup>Jatarĩburu yóboi, earejaimada Genesaret āmicurijoborōi. Aru buorejaimada ne jiadocũre ĕcarui. <sup>54</sup>Dicũre jocarĩ etaivure, obedivũ pōeva coreóvarejaimada Jesúre. <sup>55</sup>Que baru cúyarejaimada caino ne ĩmaroi, nũvarajivũ ijimarare ne parainoi, caino curōai, ne jápiaiyede Jesús cūcũre. <sup>56</sup>Caino Jesús ũi nũino, ĩmaroi, aru ĩmajinoai, aru curóvaquei máre, ijimarare nũvari epedejaimada tãibui. ũre jēniarejaimada, ũi jēni jáicōjequiyepes aivũ ũi cuitótecaje tũrũvarã. Aru caivũ jēni jáivũ meateivũ barejáimada na, ijimara mácavũ.

## Iye pōevare āmeina tede daiye

(Mt 15.1-20)

**7** <sup>1</sup> Dinumu fariseovacavu apevu Jūmenijicui yāvaiye báquede bueipōevaque Jerusalén āmicuriīmarore jocarī etaivu bācavu earī, cójijidejaimada Jesús yebai. <sup>2</sup> Aru járejaimada ūi bueimaracavure āivure ne puruāre cojabevuva. Ina fariseova dāpiarejaimada caivure ne cojaiye jauéde ne ārajiye jipocai, Jūmenijicui mearo jáquiyeye aivu náre. <sup>3</sup> Que baru ina fariseova āmeina járejaimada náre. Caivu fariseova aru caivu apevu judíova máre cainumua cojavarejaimada, ne ārajiye jipocai. Nópe dārejaimada űujeñecuva māvavu ne daicōjeiye báquepe. <sup>4</sup> Aru āiye bojedainore jocarī copaivu bācavu cainumua cuyavarejaimada ne bajure, ne ārajiye jipocai. Aru ape urarō űujeñecuva māvavu ne daicōjeiye báquede dārejaimada na. Quédeca joavarejaimada ne jororuare, ne cōaiñuare, ne tāucōaiñuare, aru ne paraiboare máre. <sup>5</sup> Que baru ina fariseova aru Jūmenijicui yāvaiye báquede bueipōeva jēniari járejaimada űre:

—¿Aipe teni mi bueimara ne puruāre cojabedi ne ārajiye jipocai? Yópe āri majeñecuva māvavu ne daicōjeiye báquepe dābema na, arejaimada na.

<sup>6</sup> Jesúcapūravu arejameda náre:

—Jāve Isafas bācu Jūmenijicui yāvaiyede coyucarejaquemavu mujare, jujovaiyure. Yópe arī, Jūmenijicu toivaicōjenejaquemavu ū māvure:

Ina pōeva yure ju adama ne jījecamuque. Ūbenita dābema yópe ji urōpe. <sup>7</sup> Bojecubenoque mearore jíniduyama yure. Bueniduyama pōeva ne bueinore Jūmenijicui yāvaiyepe, arī toivarejaquemavu.

<sup>8</sup> Muja dajocarī jaruvaivubu Jūmenijicui daicōjeiyede. Ūbenita ju arī daivubu muja pōeva ne daicōjeiyede, arejameda Jesús.

<sup>9</sup> Aru náre arejameda cojedeca:

—Jāve dajocarī jaruvaivubu muja Jūmenijicui daicōjeiyede, dārājivu yópe mujeñecuva māvavu ne daicōjeiye báquepe. <sup>10</sup> Que baru Jūmenijicu coyurejaquemavu Moisés bācure, ūi toivaquiyeye ayu yópe: “Mipacure aru mipacore máre urī, ju ajarā. Ūbenita űaine āmeno coyuyure jīpacure o jīpacore máre, muje jabova boarī jaruvajarāri űre”, arejaquemavu. <sup>11</sup> Ūbenita muja bueivubu yópe, “Cūinācu pōecu jīpacure o jīpacore ayu baru, ‘Mure cadateyu buojabevu. Mu jacopujebu ji tāuturare. Ūbenita jave jīcacu yu Jūmenijicure ji tāuturare’, ayu bājebu ű”, aivubu muja. <sup>12</sup> Muja űre cadateicōjemevu bājebu jīpacure o jīpacore máre. <sup>13</sup> Que teni Jūmenijicui yāvaiyede bojecubepe darī, cōmajivubu mujeñecuva māvavu ne daicōjeiye báquepe daivu, ne bueiye báque Jūmenijicui yāvaiye pūeno. Aru daivubu muja cainumua iyepe paiyede, arejameda náre Jesús.

<sup>14</sup> Cojedeca Jesús órejarejameda ina pōevare. Aru arejameda náre:

—Caivu yure jápiarī dāpiajarā. <sup>15</sup> Caiye iye ecoiye pōevare jedevaque āmeina tede dābevū náre. Ūbenita caiye iye etaie pōeva ne űmene āmeina tede daivu náre. <sup>16</sup> Me jápijarā muja iye ji bueiyede, arejameda Jesús.

<sup>17</sup> Que arī, dajocarī nuri ina pōevare jocarī, ecorejameda cūrami. Ūi bueimara yore ūi coyūino mācarōre jēniari járejaimada űre. <sup>18</sup> Aru náre arejameda:

—¿Muja máre jápiarī eabenaru? ¿Coreóvabenaru? Caiye iye ecoiye pōevare jedevaque āmeina tede dābevū náre. <sup>19</sup> Ecobevu ne űmei. Ūbenita ne yapibu jīvui earī etaivu bajure jocarī, arejameda.

Caiye iye maje āiye métamu aiyucu barejaquémanu Jesús. <sup>20</sup> Cojedeca arejameda:

—Ūbenita caiye iye etaiye pōevare jocarī, ne dāpiaye, āmeina tede ðaivu náre. <sup>21</sup> Ne ūmei āmeina dāpiadama apevure. Ðadama āmeina ðaiyede apevūque, nēmarebucūva āmevūque. Ñavadama apevu ne cūvaede. Boarī jaruvadama pōevare. <sup>22</sup> Nomicūrivūvacari apecoque cuma aru nomiva máre ūmucūrivūvacari apecūque cuma nēmarebucūvare jaruvārī. Cūvaiyuma apevu ne cūvaede. Āmeina ðaiyūrī dāpiadama. Jūjovadama apevure. Ne baju āmeno ðadama. Jorojīñama. Coyuyama āmenore apevū borore caivu ne jápiayede. “¿Meara márica?” adama. Aru ārūmevūpe āmeina ðadama, coreóvaivūvacari ñájinajivure ne que ðaiye boje. <sup>23</sup> Caiye iye āmene etaiye pōeva ne ūme jívūquede, āmeūme cure ðaivu náre, arī budejameda Jesús.

### **Cūináco nomió, judíova āmevucaco, ōi ju aino Jesúre**

(Mt 15.21-28)

<sup>24</sup> Diīmarore jocarī Jesús nūrejameda apejororōi, Tiro aru Sidón āmicurīīmaroa yebai. Noi cūinádami cūrami ecorejameda. Aru apevu ne majinore ūbedejameda cūcure noi. Ūbenita dupini oabedejameda. <sup>25</sup> Maumejie cūináco nomió ūi borore jápiarī, nuri ūi yebai, ñuatutarejacoða ūi cuboba yebai. Cūvarejacoða mamacore abujucu ūi īmamore. <sup>26</sup> Aru ō nomió judíovacaco āmenejacoða. Sirofenicia āmicurījororōi pōetedejacoða ō. Jesúre jēniarejacoða, ūi etavaquiyepa ado abujucure ōi mácore jocarī.

<sup>27</sup> Jesús arejameda ōre:

—Meamevu īnu juedova ne āiyede, jínajivu yavimivare. Que baru juedova ājararī mamarumure, arejameda Jesús.

Que arī, aiyucu barejaquémanu judíovare Jūmenijicui mārapi aru judíova āmevure yavimivape.

<sup>28</sup> Aru arejacoða ūre:

—Mu, ji jabocu, jāve coyūivu mu. Ūbenita yavimiva máre tuoiva cāchinoi curivu, juedova ne āri jaruvaiyede ādama na, arejacoða Jesúre.

<sup>29</sup> Aru arejameda ōre:

—Me copainujaco, mi que aipe boje. Abujucu jave etayume mímacore jocarī, arejameda ōre Jesús.

<sup>30</sup> Cūrami copainuri, earī, járejacoða ōi mácore ōi parainoi meacore. Aru abujucu cubedejameda ōque.

### **Jesús ūi meadaino jápiabeni yávabecure**

<sup>31</sup> No yóboi copainurejameda Tiro āmicurīīmaro curijororōre jocarī. Aru vaidējameda Sidón āmicurīīmarore aru Decápolis āmicurījororōre máre, pu earīta macajitabu urabu Galilea āmicurījitabure. <sup>32</sup> Noi ūi cuede, nūvarejaimada ūi yebai cūinácu ūmure, ñai jápiabecure aru yávarī majibecure. Aru jēniarejaimada Jesúre, ūi purūque tuoquiyepa aivu ūre.

<sup>33</sup> Que baru Jesús nūvarejameda ūre joajīmaque apevure jocarī. Doarejameda ūi āmuyoare ñai ūmu ūi cāmucobea jívui. Aru ūi āmuyoare jēcutori tuorejameda ñai ūmu ūi jemedore. <sup>34</sup> Cavarōre jári, ūme dapurī, arejameda: “Efata”. “Efata” aino, vojarō aiyurōtamu no.

<sup>35</sup>Que arĩ, Jesús ñai jápiabecu bácare jápiare ñarĩ, ñai yávabecu bácare yávare ñarejameña. <sup>36</sup>Que teniburu Jesús apévare coyucōjemenejameña náre pare, ne majibenajiyepa ayu. Ñbenita cainumua ñi coyurĩduiyedeca yóboi, cainumua coyurejaima ñi borore pueno baju. <sup>37</sup>Aru pare cucumari arejaima ñre:

—Ñ ñaibi cainumua méne. Jápiare ñayube jápiabecu bácare. Aru yávare ñayube yávabecu bácare máre, arejaima na.

**Jesús ñi ñre ñaino yóvaicuvaimil baju ñmuvare**

(Mt 15.32-39)

**8** <sup>1</sup>Apejāravui bediōva cōjijidejaima obedivu pōeva Jesús yebai. Aru ñiyede cuvabedejaima na. Que baru Jesús orejarejameña ñi bueimare ñi yebai. Aru arejameña náre:

<sup>2</sup>—Cōmaje ñroje jáivu yu ina pōevare. Ina obedivu cuma yúque yóbecurĩjāravua. Aru ñiyede cuvabema. <sup>3</sup>Apevu ne cūramia joarōtamu. Que baru ji copaicōjenu náre ne cūramiai, mái nurĩ mamañajebu, ne ñvúé ñájiye boje, arejameña Jesús.

<sup>4</sup>Ñi bueimara jēniari járejaima ñre:

—¿Ñbenita aipe ñarĩ jínajidi ñiyede caivu ina pōevare, ne ñarajiyepa yui pōecubenoĩ? arejaima na.

<sup>5</sup>Jesús jēniari járejameña náre:

—¿Aipiboa páuboare cuvarāru muja? arejameña.

Aru arejaima:

—Siete paiboabu, arejaima.

<sup>6</sup>Que aiyede, ina pōevare dobaicōjenejameña joborōi. Aru diboá páuboa siete paiboare ñi, torojuede jīni Jūmenijicure, diboáre cotuvarĩ jidejameña ñi bueimare, ne jínajiyepa ayu pōevare. Aru nópe ñarĩ jidejaima na. <sup>7</sup>Obebejina moajinare máre cuvarejaima. Jūmenijicure torojuede jíniburu yóboi, jícōjenejameña náre máre. <sup>8</sup>Que ñaiyede, ñi yapidejaima caivu. Ñi bubarĩburu yóboi, iye cotuvaiye báque páu aru moa máre, pōeva ne ñi oabede ñi, meñarĩ, pueá siete paipueare, judiōva ñmēvu ne pueáre, buivarejaima na. <sup>9</sup>Aru ina ñivu bácvu pōeva yóvaicuvaimil baju barejaima na. <sup>10</sup>Jesús copaicōjenejameña náre, ñre jocarĩ. No yóboi, maumejina jaturejameña jiañocūi ñi buimaraque. Aru ñurejaima apejorōi, Dalmanúta ñmicurijorōita.

**Fariseovacavu ne jēniaino pōeva ne ñarĩ majibede**

(Mt 12.38-39; 16.1-4; Lc 11.16, 29; 12.54-56)

<sup>11</sup>Apevu fariseovacavu ñurejaima Jesús yebai. Aru ñmeina boro coyurĩ búrejaima ñre. Jáiyurejaima ñi jáñovaiyede cavarō mearo Jūmenijicui curōquede, jujovarĩdurājivu ñre. Yópe arĩ, pōeva ne ñarĩ majibede ñaicōjenidurejaima ñre:

—Mñ, Jesús, jáñovajacu ñujare apede mi ñaiyede Jūmenijicui parúque, ñuje majinajiyepa aivu jáve mure Jūmenijicui daroimũ mácare, arĩdurejaima Jesúsre.

Nópe arĩ, ñre jujovaiyurejaima na. <sup>12</sup>Aru chĩori, ñme dapurĩ pare, arejameña:

—¿Aipe teni ijāravucavū jādovaiyede jāiyuri? Jāve coyuyubu mujare: Ijāravucavū jāmenajarama jādovaiye cavarō mearo Jāmenijicui curōquede, arejamedā Jesús.

<sup>13</sup> Que arī, nāre dajocarī, jiadocūi jaturī cojedeca, jatarī nūrejamedā apeduvei.

### Fariseova ne āmeno dāpiyaiye

(Mt 16.5-12; Mr 4.12; Lc 12.1)

<sup>14</sup> Jesūi bueimara ārumeteivū bācavū pāure, quénora cuvarejaimada cūinābo pāubore náque jiadocūi. <sup>15</sup> Aru Jesús cōjeñū arejamedā nāre:

—Me đajarā. Me jājara ina fariseova aru ñai Herodes máre ne pāure bucúovare đaiyede, arejamedā Jesús.

<sup>16</sup> Ūi que aiyede, arejaimada ne bajumia:

—Ū yópe aibi, maje pāure cuvabe boje, arejaimada na.

<sup>17</sup> Ūbenita Jesús coreóvarejamedā ne yāvainore. Que baru arejamedā nāre:

—¿Aipe teni coyuvurū muja “Pāure cuvabevū ñuĵa” aivū? ¿Coreóvabenarū cāreja? ¿Majibenarū cāreja? ¿Dāpiabeni coreóvabenarū muĵa? <sup>18</sup> ¿Yacorua cuvativuvacari, jāmenarū? ¿Aru cá mucoba cuvativuvacari, jāpiabenarū?

<sup>19</sup> ¿Aru ārumenarū? ¿Yū cotuvacavū cūināpurupe paiboa pāuboare ina cūināpurupe paimil baju ūmuvare, aipipuebua cotuvaiye báqueque ícanarū muĵa? arejamedā nāre Jesús.

Na ju arejaimada ūre:

—Doce paibua puebua baju ícarā ñuĵa, arejaimada na.

<sup>20</sup> Jesús arejamedā nāre cojedeca:

—¿Aru yū cotuvacavū siete paiboare ina yóvaicuvaimil baju ūmuvare, aipipuea cotuvaiye báqueque ícanarū muĵa? arejamedā.

Aru na ju arejaimada ūre:

—Siete paipuea baju ícarā ñuĵa, arejaimada na.

<sup>21</sup> Dinumure arejamedā nāre:

—¿Aipe teni majibenarū cāreja? Coyuyubu mujare: Me jājara ina fariseova aru Herodes máre ne dāpiyaiyede, muĵe dāpiabenajiyepē ne dāpiainope, arejamedā nāre Jesús.

### Jesús ūi meadaino jāri eabecure Betsaidai

<sup>22</sup> No yóboi earejaimada Betsaida āmicuriimaroi. Apevū pōeva nūvarejaimada Jesús yebai cūinācu ūmū, jāri eabecure. Aru Jesūre jēniarejaimada, ūi puruque tuoquiyepē aivū ñai ūmure. <sup>23</sup> Que teni jāri eabecu ūi purure jēni, nūvarejamedā ūre diimarore jocarī. Aru jēcutori ūi yacoruarā, ūre tuorī ūi puruáque, jēniari jārejamedā ūre:

—¿Apejēne jāñuru cari? arejamedā Jesús.

<sup>24</sup> Quĩjino jāri, arejamedā:

—Jāivu yū ūmuvare. Ūbenita jocucuae ārojama cuivū, arejamedā Jesūre.

<sup>25</sup> Cojedeca Jesús tuorejamedā ūi yacoruarā. Que teni ñai ūmū cocorejamedā me. Jāri earejamedā cojedeca. Aru me jārejamedā caiyede.

<sup>26</sup> Jesús copaicōjenejamedā ūre ūi cūrami, yópe arī:

—Diimaroi ecobejacu mū, arejamedā ūre Jesús.

**Pedro ñi “Cristobu mu” aino**

(Mt 16.13-20; Mr 6.14-15; Lc 9.7-8, 18-21; Jn 6.68-69)

<sup>27</sup> Jesús nurejameđa ñi bueimaraque ñmaroai Cesarea de Filipo ãmicuriĩmaro joabejĩnoi. Aru mái nure nuiyede jẽniari járejameđa ñi bueimarare yópe:

—¿Aipe aidi põeva yure? ¿“Yécubebu”, aidi yure? arejameđa Jesús.

<sup>28</sup> Arejaimada úre:

—Apevu adama, “Juan Bautistabe”. Aru apevu adama, “Elíabe”. Aru apevu adama, “Jũmenijicui yávaiyede coyucaipõecube ñ”, adama mure, arejaimada na.

<sup>29</sup> Aru jẽniari járejameđa náre:

—¿Ûbenita aipe aivurũ muja yure? arejameđa Jesús.

Aru Pedro arejameđa úre:

—Mu Jũmenijicui daroimu mácbu. Ñujare jabotecuyumu mu, arejameđa Pedro Jesúre.

<sup>30</sup> Aru náre coyucõjemenejameđa apevure ñi borore.

**Jesús ñi coyũino ñi yaiquĩnore**

(Mt 10.38-39; 16.21-28; Lc 9.22-27; 14.27; 17.33; Jn 12.24-25)

<sup>31</sup> Jesús, yópe arĩ, bueni búrejameđa náre:

—Jauvu yure, Jũmenijicui daroimu mácure ãmupe, urarõ ji ñájiquino. Ina judíova bucũva, aru sacerdotevare jaboteipõeva, aru Jũmenijicui yávaiye báquede bueipõeva máre yure boarĩ jaruvarãjarama. Aru yóbecurijãravua yóboi nacajacuyumu yu yainore jaruvarĩ, arejameđa Jesús.

<sup>32</sup> Caiye iyede coyurejameđa náre. Aru ñi coyuiye báque maiyójabedejavũya náre, ne jápiarĩ earãjiyepe aipe. Dinũmure Pedro nuvarejameđa úre apevu ina bueimarare jocarĩ. Aru parurõque jararĩ búridurejameđa Jesúre. <sup>33</sup> Ûbenita Jesús, copedini járejameđa apevu ñi bueimarare. Aru Pedro curejameđa ñi yóboi. Que teni jararĩ arejameđa úre:

—Mu, Satanás, jujovarĩdubecayu yure. Nujacu yure jocarĩ. Dápiavũ mu põevape. Aru dápiabevũ mu Jũmenijicu jiede, arejameđa Pedrore.

<sup>34</sup> Jesús orejarejameđa ñi yebai obedivu põevare ñi bueimaraque. Aru arejameđa náre:

—Ácu põecu daiyucu yúque, dajocajacurĩ põeva ne mearo jáiyede úre, cuyebecurĩ yure yóvayede, aru jidubecurĩ ñi ñájiquiyede. Nópe ñabecu baru, ñ buojabebi jĩcu bacuyú. <sup>35</sup> Ñai põecu ñi baju urõpe ñarĩ, meadaiyucu baru ñi bajure, coatecuyume ñi bajure Jũmenijicure jaruvarĩ, yópe yaiyú bácupe ñi ãmei. Ûbenita ñai põecu, “Ye baju ãnevũ, ji yaidú Cristore boje” ayu, ñi baju urõpe ñabecũva quẽnora ji urõpe ñarĩ, úrecabe ji meadaquimu, cuscuyu Jũmenijicucue cainumua. <sup>36-37</sup> Ñai põecu cuvacu baru caiye ijãravuquede, ñbenita bĩjayu baru ñi ãmene, ñájiucuyume cainumua toabo cũiméboi. <sup>38</sup> Aru ñai põecui cuyedu yure aru ji yávaiyede máre ijãravucavu ãmeina teivu ne jáiyede, yu, Jũmenijicui daroimu mácu ãmupe, máre cuyeni dápiacuyumu úre ji jádovaiyede jipacu meacu baju ñi mearore ji daiyede ina ángeleva mearaque máre, arejameđa Jesús.

**9**

<sup>1</sup> Aru arejameđa náre cojedeca:

—Jãve coyuyubu mujare: Apevu curivu yui, ne yainájiye jipocai járajarama Jũmenijicui jaboteino curõre paruéque, ji jaboteiyede põevare, arejameđa Jesús.

### Jesús ñi baju oatuvaino

(Mt 3.17; 11.14; 17.1-13; Mr 1.11; Lc 3.22; 9.28-36; 2 P 1.17-18)

<sup>2</sup> Seis pajjāravua yóboi, Jesús ñvarejamedā Pedrore, Santiagore, aru Jūare máre. Jipocatedejamedā náre cūracū ñmujuricū puenoi, apevure jocarī. Aru na járejaimada ñi oatuvaiye me bajure. <sup>3</sup> Yópe barejávūya. Ñi cuitótecaje pēorejavūya, pare boricaje ñi cuitótecaje. Ijārvure joaipōecu yópe boricaje đarī majibebi. <sup>4</sup> Aru járorejaimada Elías Moisémaque, boroteivū Jesúque. <sup>5</sup> Dinumū Pedro arejamedā Jesúre:

—Mu, bueipōecu, me arotamu ññje cūru yui. Que baru đarājivūbu ññja yóbecuriñamia cūramia quíjññamia maquiyéde, cūinádami míñami maquinóre, apedāmi maquinóre Moiséde, aru apedāmi maquinóre Elíare, arejamedā Pedro.

<sup>6</sup> Pare cucumarejaimada na. Que baru Pedro majibedejamedā aipe ñi ainore.

<sup>7</sup> Dinumuma oopenibo ěmeni taorejavūya náre. Aru jápiarejaimada apeno yávainore oopeniboi etaiyede: “Ñaime jímacu, ji umu. Que baru jápijarā úre”, arejamedā Jūmenijicu.

<sup>8</sup> Aru yávariburu yóboi, járejaimada Jesúre cūinácura.

<sup>9</sup> Ne ěmeni daiyede dicū cūracūre jocarī, Jesús apevure coyucōjemenejamedā náre ne jáino mácarōre. Yópe arejamedā:

—Me jápijarā muja. Coyubejarā apevure no muje jáino mácarōre cūracū ñmujuricū puenoi, ji nacajariburu yóboita yainore jaruvārī. Yūbu Jūmenijicui daroimu mácu ñmupe, arejamedā náre Jesús.

<sup>10</sup> Que baru ju aivu úre, coyubedejaimada apevure no ne jáino mácarōre. Aru jēniari járejaimada ne bajumia, “¿Aipe aiyucūba yo ñi aino nacajainore yainore jaruvārī?” arejaimada na. <sup>11</sup> Que teni jēniari járejaimada úre:

—¿Aipe teni aivuba ina Jūmenijicui yávaiye báquede bueipōeva, “Mamarumu Elías dacuyume, ñai Jūmenijicui daroimu ñi daquiye jipocai”? arejaimada na.

<sup>12</sup> Aru arejamedā náre:

—Jāve Elías dacuyume Jūmenijicui daroimu ñi daquiye jipocai, meadacūdayu caiyede. Toivarejaquemavu yópe yure, Jūmenijicui daroimu mácupe ñmupe: “Pare ñájine đarājarama pōeva úre. Aru ũbenama úre”, arī toivarejaquemavu. <sup>13</sup> Ũbenita jave dāme Elías, ayubu yu mujare. Aru pōeva ne ũrōpe đaima úre, yópe Jūmenijicui toivaicōjeiye báquepedeca úre, arī buedejamedā náre Jesús.

### Jesús ñi meadaino jueđocure, abujucu ñi imamure

(Mt 17.14-21; Lc 9.37-43)

<sup>14</sup> Apevu Jesúi bueimara yebai earī, járejaimada ina bueimarare obedivu pōeva jēneboi. Aru Jūmenijicui yávaiye báquede bueipōeva jararī yávorejaimada náque. <sup>15</sup> Jesús ñi eaiyede, ina pōeva úre jári, torojurī cúyarejaimada ñi yebai, úre jacoyurāñivū. <sup>16</sup> Jesús jēniari járejamedā náre:

—¿Yéde yávaivurū muja náque? arejamedā náre.

<sup>17</sup> Cūinácu pōecu pōeyajubo jēneboi arejamedā úre:

—Mu, bueipōecu, jímacure abujucu imami. Aru yávaicōjememi úre. Que baru úre davarīduvu yu mi yebai. <sup>18</sup> Ñai abujucu cainumua bidióvarī

ture ďávabi ĩre joborĩ. Aru aburi etavavu ĩre. Cĩpi cĩvabi ĩ. Aru ĩi baju jĵatevabi ĩ. Que baru yu jĩniariduvu mi bueimarare, ne jaetovarĵiyepe ayu ĩai abujucure. Ŭbenita na ĩaine jaruvarĩ majibema, arejamedā Jesũre.

<sup>19</sup> Aru Jesũs arejamedā nāre:

—Muĵa, iĵaravucavu, Jũmenijicure ju abevu, ĵaipijĵaravua cuquidi yu muĵaque? ĴAru aipijĵaravua ĩĵiĵuidi yu muĵaque, muĵe ju arĵiyepe ayu ĵi coyuiyede? Davajarā ĩai juedocure ĵi yebai, arejamedā Jesũs.

<sup>20</sup> Nuĵarejaimada juedocure Jesũs yebai. Aru ĩai abujucu Jesũre ĵĵri, juedocure bidiĩvarĩ, ture ďarejamedā joborĩ. Joborĩ turĩ, ĩai juedocu jĵatururejamedā. Aru aburi etarejavũya ĩre.

<sup>21</sup> Jesũs jĩniari ĵĵrejamedā ĵipacure yĩpe:

—ĴAipinumua baju abujucu ĩmari ĩre? arejamedā Jesũs.

Aru ĵipacu ju arejamedā:

—Javeita, quĩĵicurata. <sup>22</sup> Aru apenumua ĩre bidiĩvarĩ, ture ďarĩ toaboi aru ĵiai, boarĩ jaruvarĩduvabi ĩre. Ŭbenita buojayu baru cĩmaje ĵroĵe ĵĵri, caďatejacu ĩũĵare, arejamedā Jesũre.

<sup>23</sup> Jesũs arejamedā ĩre:

—ĴBuojayu baru, ayurũ mu? Yu caiyede ďacarĩ majivu mure, yure mi ju aru, arejamedā ĩre Jesũs.

<sup>24</sup> Maumeĵie ĩai juedocui pacu codoboborejamedā:

—Mure ju aivu yu. Caďatejacu yure ĵi ju aipe paruė baquiyėpe, arejamedā Jesũre.

<sup>25</sup> Dinũmure Jesũs ĵĵri obedivu pĩeva cĩyaivure ĩi yebai, paruėque etaicĩjenezamedā abujucure. Arejamedā:

—Mu, abujucu, ĩai juedocure yĵvaicĩĵemecu aru ĵĵpiaicĩĵemecu, yu cĩĵeivu mure. Etajacu ĩre jocarĩ. Aru ĩmamejacu ĩre coĵedeca, arejamedā Jesũs.

<sup>26</sup> Que ayu Jesũs, ĩai abujucu codoboborĩ aru pare bidiĩvarĩ, ture ďarĩ juedocure, etarejamedā ĩre jocarĩ. Que teni ĩai juedocu yaĩyũ bĵcupe pararejamedā. Que baru ina pĩeva obedivu “Jave yaĩbĩ ĩ”, arĩdurejaimada na. <sup>27</sup> Ŭbenita Jesũs, ĩi purure ĵĩni, nacovarejamedā ĩre. Aru ĩai juedocu nacajarejamedā. <sup>28</sup> Que ďarĩburu yĩboi, Jesũs ecorejamedā cĩrami. Nore ĩi bueimara ĵĩniari ĵĵrejaimada ĩre cĩĩnĵcura, yĩpe arĩ:

—ĴAipe teni ĩũĵa jaetovarĩ majibetedi ĩai abujucure? arejaimada na.

<sup>29</sup> Nāre arejamedā:

—Jũmenijicure ĵĩniaiye ĵauvu ĵnevuvu ĵiyede, abujucu ĩaipe pĵyure muĵe jaetovarĵiyepe aivu, arejamedā nāre Jesũs.

### **Jesũs ĩi coyũino coĵedeca ĩi yaĩquĩnore**

(Mt 17.22-23; Lc 9.43-45)

<sup>30</sup> Nore jocarĩ nuĩvu, Jesũĵā vaidėĵaimada Galilea ĵmicurĩjoborĩre. Aru pĩeva ne majĩede ubedejamedā Jesũs. <sup>31</sup> Ŭ bueyu bareĵamedā ĩi bueimarare. Que baru apevu pĩeva ne caiyede ĩi yebai ubedejamedā Jesũs. Yĩpe arĩ, buedejamedā ĩi bueimarare:

—Yure, Jũmenijicui daroĩmu mĵcure ĵmũpe, ĵĩni ĵĩnĵivubu ĵi mauvare, ne boarĩ jaruvarĵiyepe ayu yure. Aru yĩbecurĩĵaravua yĩboi, nacajacũũmu yu ĵainore jaruvarĩ, arejamedā nāre Jesũs.

<sup>32</sup> Ëbenita jápiarĩ eabedejaimada ùi coyũino mácarõre. Aru jidurivũ jēniari jáiyubedejaimada ùre.

**¿Namema parũcu maje jēnebore?**

(Mt 10.40; 18.1-5; 20.26-27; 23.11; Mr 10.43-44;

Lc 9.46-48; 10.16; 22.24, 26; Jn 13.20)

<sup>33</sup> Jesújã earejaimada Capernaum ãmicurĩĩmaroi. Aru ecorejaimada cūrami. Cūrami jívui curivũ, Jesús jēniari járejameda ùi bueimarare yópe:

—¿Ye batedí muje borotede daiye mái? arejameda náre Jesús.

<sup>34</sup> Ëbenita coyubedejaimada ùre, ne borotede daiye báque boje ñamene parũcure ne jēneboi apevũ pũeno. <sup>35</sup> Dinũmure Jesús dobacũnũrejameda, buecũyũ. Orejarejameda ina doce paivũ ùi bueimarare. Aru arejameda náre:

—Ñai pōecu ùi cōjeiyuru apevũre, dápaiye javũ ùre yópe parũbecupe. Aru caivũ ne yebacacupe bacũyũme ù. Apevũre bojecube memecaiye javũ ùre, arejameda Jesús.

<sup>36</sup> Que arĩburu, Jesús jēnejameda cūinácũ juedocure. Aru núvari ùre ne coricai, dururĩ ùre ùi ãmuveaque, arejameda náre:

<sup>37</sup>—Cūinácũ pōecu copũ etayũ baru cūinácũ juedocure ji ãmiái, ji cōjeiyepe, que ñayũ nopedeca copũ etaibi yure. Aru cūinácũ pōecu copũ etayũ baru yure, copũ etaibi ñai yure daroyure máre, arejameda Jesús.

**Majare jarabecu, majacacube**

(Mt 10.42; 12.30; Lc 9.49-50; 11.23)

<sup>38</sup> Juan arejameda Jesúre:

—Mu, bueipōecu, jácarã ñũja cūinácũ ùmũ abujuvare jaetovayure mi ãmiái, mi parũéque. Ëbenita ñũjaque ùi cube boje, “Dabejacũ” acarã ñũja ùre, arejameda Juan.

<sup>39</sup> Ëbenita Jesús arejameda náre:

—Ñai ñayũ pōeva ne ñarĩ majibede ji ãmiái, ji parũéque, no yóboi ãmeina yávabecube yure. Que baru nópe abejarã muja ùre. <sup>40</sup> Ñai pōecu maucũvabecu majare quénora majacacube ù. <sup>41</sup> Que baru jáve coyũyũbu mujare: Ácu pōecu jíyũ baru cūinárũ jororure ocoque, cadatecũyũ cūinácũ ji bueimaracacure, ùi yóvaiye boje yure, jáve bíjabecũyũme Jūmenijicũ me bojedaiyede ùre, arejameda Jesús.

**Jidojarõ maje ãmeina teino**

(Mt 5.13, 29-30; 18.6-9; Lc 14.34-35; 17.1-2)

<sup>42</sup> Bedióva buedejameda Jesús, yópe arĩ:

—Ácu pōecu ùi vainĩ tũre ñaru apecũ yure ju ayũre parũbecureca, ùi dajocaquiyepe ayũ ùi ju aiyede yure, meajebu ùre jarũvaru jia uradai ùi ñamemui buorĩ cūinábũ cūrabo uraboque. <sup>43-44</sup> Aru mu ãmeina teyũ baru mi parũque, burarĩ jarũvajacu dipurure. Meaquiye bu mure, mi earu cavarõ mearo Jūmenijicũ curõĩ cūinápũrũque. Ëbenita meamequiye bu mure, mi nũru toabo cūiméboi caipũcapũrũque. <sup>45-46</sup> Aru mu ãmeina teyũ baru mi cubobaque, burarĩ jarũvajacu dibare. Meaquiye bu mure, mi earu cavarõ mearo Jūmenijicũ curõĩ cūinába cubobaque. Ëbenita meamequiye bu mure, mi nũru toabo cūiméboi caipũcaba cubobaque. <sup>47</sup> Aru mu ãmeina teyũ baru

mi yacoruaque, ñi jaruvajacu didure. Meaquiye bu mure, mi ecoru Jūmenijicui jaboteinore cūināru yacoruaque. Ūbenita meamequiye bu mure, mi naru toabo cūiméboi pucarua yacoruaque. <sup>48</sup>Nore toabo cūiméboi curōi cuma júva yaibévu. Que baru pōeva nore nuivu baru cainumua ñájinajarama na, toabore aru júvare máre.

<sup>49</sup>Meadaivu maje āiyede yuquiraque. Nopedeca ñájiye meadaivu pōevare. <sup>50</sup>Yuquira maje āiyede meadaivu. Ūbenita yuquira vaijue bíjaru, āiyede meadaíye buojabévu. Aru muja máre yuquirape bájarā. Nōpe yuquira meadaíyepedeca maje āiyede, cađatejarā mujevure. Aru cārijimene đarī, me cujarā mujevuaque, arejameđa Jesús.

### Jesús ũi bueino nomi jaruvainore

(Mt 5.31-32; 19.1-12; Lc 16.18; 1 Co 7.10-11)

**10** <sup>1</sup>Bueniburu yóboi, Jesús etarejameđa ne ĩmarore jocarī. Aru nurejameđa Judea āmicurijoborōi aru Jordán āmicuriya ĩa apeduvei máre. Bedióva cojedeca obedivu pōeva cójijidejaimađa ũi yebai. Aru ũi đarī cōmajipepe, bueyu barejámeđa náre. <sup>2</sup>Fariseovacavu máre nurejaimađa ũi yebai, jujovaiyurivu ũre, jēniari járejaimađa:

—¿Cūinācu ũmu jaruvayu baru ĩmarepacore, đaidi yópe maje đaicōjeipepe? arejaimađa na.

<sup>3</sup>Náre arejameđa Jesús:

—¿Aipe đaicōjenejaquemari Jūmenijicu, ũi toivaicōjeipe báquede Moisés bácuere? arejameđa.

<sup>4</sup>Aru arejaimađa:

—Moisés bácu ĩcōjenejaquemavu pōecure cūináyoca “Mure jaruvayubu yu” aiyocare ĩmarepacore, arejaimađa na.

<sup>5</sup>Aru Jesús arejameđa:

—Moisés bácu jaruvaicōjenejaquemavu mujare mujemarepacore, muje Jūmenijicui đaicōjeiyede jápaiyube boje. <sup>6</sup>Ūbenita mamarumure, Jūmenijicu cuedarejaquemavu caiyede. “Ūmu macuyáre aru nomió macodóre máre đarejaquemavu Jūmenijicu”. <sup>7</sup>Aru, “Que baru caride ácu pōecu ĩmarepaco bacođo cuvacyu, ũi bucuvare đajocacyume. <sup>8</sup>Aru ĩmarepacore cuvārī, ómaque cūinávupetamu na Jūmenijicui jáĩnore”. <sup>9</sup>Que baru pucarā āmema. Quénora cūinávupetamu na. Que baru pōecu Jūmenijicui cójijovaimara macavure coavabejacurī ũ, arī buedejameđa Jesús.

<sup>10</sup>No yóboi, cūrami júvui ina ũi bueimara jēniari járejaimađa ũre cojedeca aipe iye ũi coyuipe báquede. <sup>11</sup>Náre arejameđa:

—Ácu pōecu ĩmarepacore jaruvārīburu yóboi purubuyu baru apecoque, nomicucuvacarī apecoque cucu baru, āmeina đabi óre ũi mamarumucacore jaruvārī. <sup>12</sup>Aru áco pōeco ĩmarepacure jaruvārīburu yóboi purubuođo baru apecuque, ũmucucovacarī apecuque cucu baru, āmeina đabico ũre ōi mamarumucacure jaruvārī, arī buedejameđa náre Jesús.

### Jesús ũi mearore jino juedovare Jūmenijicuque

(Mt 18.3; 19.13-15; Lc 18.15-17)

<sup>13</sup>Pōeva nuvare cuivu barejáimada némarare Jesús yebai, ũi tuoquiyepe aivu náre ũi puruáque. Que teni ũi bueimara nuvaicōjemenidurejaimađa

némarare. <sup>14</sup> Ûbenita Jesús járejamedá náre ne que ðaiyede. Pare cojubedejavýya úre. Que baru arejamedá náre:

—Ina juedova dajarári ji yebai. Jūmenijicu jabotecuyume pōevare nápe paivure. Que baru, “Davabejarā juedovare”, abejarā náre. <sup>15</sup> Jáve coyuyubu mujare: Ácu pōecu copu etabecu baru Jūmenijicure jaboteyure úre, yópe juedocu ũi copu etaiyepe, ecobecuyume ũi jaboteinore, arejamedá Jesús.

<sup>16</sup> Que arí, Jesús ĩni durarejamedá ina juedovare ũi ámuveaque. Náre coapa durarí, tuorí ũi puruáque, mearore jídejamedá náre Jūmenijicue.

**Cūinácu ũmu cuve cuvacu Jesúmaque ne boroteino**

(Mt 19.16-30; 20.16; Lc 13.30; 18.18-30)

<sup>17</sup> Jesús ũi nuiyede cojedeca, cūinácu ũmu cúyarí nuatutarejamedá ũi yebai. Aru jēniari járejamedá úre:

—Mu, buiepōecu meacu, ¿aípe ðaji yu, cuvacuyu járavu cūiméjáravu baquinóre? arejamedá ũ.

<sup>18</sup> Jesús arejamedá úre:

—¿Aípe teni “Meacubu mu”, ayurū yure? Jūmenijicu cūinácure meacu baju. <sup>19</sup> Majivura mu Jūmenijicui ðaicōjeiyede ũi coyuiye báquede Moisés bácu: “Pōevare boarí jaruvabejacu. Cuvabejacu apecore mimarepacore jaruvarí. Návamejacu apecu ũi cuvaede. Borodabecacu apecure. Borocurí ĩmecacu apecu ũi cuvede. Ju ajacu mipacure aru mipacore máre”, arejamedá Jesús.

<sup>20</sup> Que teni arejamedá Jesúre:

—Mu, buiepōecu, ðacacu caiye iye mi coyuiyede juedocu cāreja yu, aru caride máre, arejamedá.

<sup>21</sup> Jesús úre jári, urejamedá. Aru arejamedá úre:

—Cūináro javu mure cāreja. Nujacu aru jini bojedajacu mi cuvede. Aru mi ĩquiyede jíjacu ina cōmaje ārojarivure. Que teni cuvacuyumu mu boje méne cavarō mearo Jūmenijicui curōi. Aru dajacu yáque, arejamedá Jesús.

<sup>22</sup> Iyede jápiarí, nai ũmu cojubeteni aru urarō baju chíori nurejamedá Jesúre jogarí, ðajocaiyubecu ũi ure cuvede. <sup>23</sup> Que teni Jesús ũi buemarare jári, arejamedá náre:

—Ina pōeva cuve cuvarivure pare maiyójavu ne ju aye Jūmenijicure, ũi meadaquiyupe aivu náre aru ne ecorājiyepa aivu ũi jaboteinore, cavarō mearo ũi curōre, arejamedá náre Jesús.

<sup>24</sup> Iye ũi coyuiyede jápiaivu bácvu ũi buemara, cucumarejaimada. Aru Jesús arejamedá náre cojedeca:

—¡Mujá, ji umara, pare maiyójavu cuve cuvarivure ecoiyurivure Jūmenijicui jaboteinore! <sup>25</sup> Cūinácu áimacu uracu, camello ámicacu, ũi ecoru aviyo cobei, maiyójajebu úre. Aru pueno maiyójavu cuve cuvacre ũi ecoquino Jūmenijicui jaboteinore, arejamedá Jesús.

<sup>26</sup> Urarōreca cucumaivu, arejaimada úre:

—¿Name buojarí ecorājídica Jūmenijicui jaboteinore, cuvarājivu járavu cūiméjáravu baquinóre? arejaimada na.

<sup>27</sup> Jesúcapūravu náre jári, arejamedá:

—Pōeva ne ðarí majibeno maiyójabevu Jūmenijicure. Ũ cūinácura buojarí meadayube pōevare, arejamedá Jesús.

<sup>28</sup> Aru Pedro arejamedá ére:

—Dajocacarã ñuja caiye ñuje cūvaede, ñuje daiye boje múque, arejamedá Pedro.

<sup>29-30</sup> Jesús arejamedá:

—Jāve coyuyubu mujare: Ácu pōecu dajocayū baru ũi cūramine, o jībūrāre, ĩmarare, jīpacore, jīpacure, mamarare, o ũi joborōre märe, ũi daiye boje yúque, aru Jūmenijicui yávaie méne coyuiye boje märe, eacuyume pūeno baju caride ijāravui cūramiare, aru jībūrāre, ĩmarare, jībucurōmivare, mamarare, aru ũi joborōare märe apevu ñájine ðaivureca ére, daquijāravu baquinói cūvacuyume jāravu cūiméjāravu baquinóre. <sup>31</sup> Dinumure apevu jaboteivu bācavu ijāravure, jabotebenajarama na Jūmenijicui jabotequiyede. Aru apevu jabotebevu bācavu ijāravure, jabotenajarama na Jūmenijicui jabotequiyede, náre arī budejamedá Jesús.

### **Jesús ũi coyuiño bedióva cojedeca ũi yaiquínore**

(Mt 20.17-19; Lc 18.31-34)

<sup>32</sup> Máí nūre nuivu barejáimada Jerusalén āmicuriĩmaroi. Jesús nūrejamedá ne jipocai. Ũi bueimara cūcumarejaimada. Aru apevu märe, náre cujuivu, jidūrejaimada. Cojedeca Jesús nūvarejamedá ina doce paivure apevure jocarī. Aru coyurī būrejamedá náre pōeva ne ðarājīyede ére. <sup>33</sup> Coyurī arejamedá yópe:

—Jerusaléi nuivubu. Nore curī, yure, Jūmenijicui daroimu mácure ũmūpe, ji maucu jēni jīquijibi sacerdotevare jaboteipōevare aru Jūmenijicui yávaie báquede bueipōevare märe. Ina pōeva arājīvubu: “¡Boarī jaruvajarā ére! ¡Yaijācurī!” Que arī, jīnāvivubu yure ina judíova ānevure. <sup>34</sup> Que teni ina pōeva yurināvivubu yure. Jēcututurāvivubu yure. Jara popenāvivubu yure. Aru boarī jaruvārājīvubu yure. Ũbenita yóbecurijāravua yóboi, jīpacu, Jūmenijicu, nacovacuyume yure yainore jaruvarī, arejamedá Jesús.

### **Santiago aru Juan ne jēniaino Jesúsre**

(Mt 20.20-28; 23.11; Mr 9.35; Lc 12.50; 22.25-27; Jn 13.12-15)

<sup>35</sup> Santiago aru Juan märe, Zebedei mára eare nūrejaimada Jesús yebai. Aru arejaimada ére:

—Mu, bueipōecu, ðajacu ñuje urōre, ñuje jēniarajiyede mure, arejaimada na.

<sup>36</sup> Jesús jēniari járejamedá náre:

—¿Yéde ðacaji mujare? arejamedá ũ.

<sup>37</sup> Aru arejaimada ére:

—Dobaicōjejacu ñujare mi yebai, cūinācu meapūravui aru apecu cācopūravui, mi jabotequinumu maquinóre, arejaimada na.

<sup>38</sup> Ũbenita Jesúcapūravu arejamedá náre:

—Muje jēniayede coreóvabevubu muja. Dobaiyūrivu baru yúque ji jabotequinumu maquinóre, mamarumu ñájiye javvu mujare yúque. ¿Ũcuri buojarājīdica muja ji ũcūinore? ¿Aru jáðovari buojarājīdica muja yópe ji jáðovainope Jūmenijicuque? arejamedá náre Jesús.

<sup>39</sup> Na ju arejaimada ére:

—Buojaivubu ñuja, arejaimada.

Aru Jesús arejameda náre:

—Ji úcuinore úcurajivubu muja. Que teni ji ñájiyepedeca ñájinajivubu muja. Aru ji Jūmenijicuque jáðovaiyepedeca jáðovarajivubu muja. Que teni ji ðaiyepedeca ðarājivubu muja Jūmenijicui urōre. <sup>40</sup>Ūbenita yávacari beobevu náre, dobarājivure ji meapūravui aru ji cācopūravui máre. Quénora dobarājarama nore ina jipacui beoimara mácavu, javeta ũi meadaimara mácavu, arejameda Jesús.

<sup>41</sup>No yóboi, jápiarejaimada ne borore apavu caipucapurūape paivu Jesúi bueimara. Que baru jararejaimada inare, Santiagore aru Júare máre.

<sup>42</sup>Dinumu Jesús órearejameda ũi bueimarare ũi yebai. Aru arejameda náre:

—Muja majivu ina jaboteivure judíova ámevure ne ðaiyede. Paruéque cōjeivubu ina ne jaborōcavure, ne ðacarājiyepe aivu náre ne urōpe. <sup>43</sup>Ūbenita nápe ðabejarā muja. Nai mujacacu parucu baiyucu baru, memecajacurí mujare. <sup>44</sup>Aru nopedeca ñai mujacacu jabocu baiyucu baru, yebacatejacurí caivure. <sup>45</sup>Nopedeca Jūmenijicui daroimu mácu ũmupe, yu, dabedejacacu, pōeva ne memecarājiyepe ayu yure. Quénora darejacacu yu, memecacuyū apévure aru boarí jaruvaicōjecuyū ji bajure, meadacuyū obedivu pōevare, ji yaiquíyede náre boje, arejameda Jesús.

### **Jesús ũi meadaino Bartimeore, jári eabecure**

(Mt 20.29-34; Lc 18.35-43)

<sup>46</sup>Jericó ámicuríimaro earejaimada na Jesújā. Nore curíduivu bācavu nurejaimada na cojedeca. Jesús ũi bueimaraque, obedivu pōeva máre yóvarí nurejaimada. Ne nuimai, no ma écarui, Bartimeo, Timeoi mácu, dobarejameda. Jári eabecu barejameda. Que baru táuturare jēniavarejameda. <sup>47</sup>Aru pōeva “Jesús Nazarecacube ũ”, aivure jápiayu, coðoboborejameda Bartimeo:

—Mu, Jesús, David bácu pāramecu, Jūmenijicui daroimu mácu, ñuje jabocu bacuyú, yure cōmaje āroje jájacu mu, arejameda ũ.

<sup>48</sup>—Bi ajacu mu, aríðurejaimada Jesújāque nuivu.

Ūbenita pūeno baju coðoboborejameda ũ cojedeca:

—Mu, David bácu pāramecu, Jūmenijicui daroimu mácu, ñuje jabocu bacuyú, yure cōmaje āroje jájacu mu, arejameda ũ.

<sup>49</sup>Que teni ũre coðoboboyure jápiayu Jesús, dajocarejameda. Aru ũque nuivure cutuicōjenejameda.

—“Dajacurí”, aibi mure Jesús. Torojujacu mu, arejaimada Bartimeore.

<sup>50</sup>Aru cūiná nacajari, ũi puenocacajede quédada durí jaruvarí, Jesús yebai earejameda ũ.

<sup>51</sup>—¿Aipe ðacaji yu mure? jēniari járejameda ũre Jesús.

—Mu, bueipōecu, jári eabevu yu. Ūrarō jáiyuvu yu, arejameda Jesúre.

<sup>52</sup>—Dinumu meavu. Ména nujacu. “Yure meadacuyume Jesús”, arí dápiarebu mu. Que baru mi jári eabede meadacaivu yu caride, arejameda ũre Jesús.

Aru cūiná járejameda ũ, jári eabecu bácu. Que teni Jesúre yóvarí nurejameda ũ máre, Bartimeo.

### **Jesús Jerusaléi ũi ecoino**

(Mt 21.1-11; Lc 19.28-40; Jn 12.12-19)

**11** <sup>1</sup>Jerusalén ámicuríimaro joabejīnoi nuri, Betfajé aru Betania ámicuríimajinoa bají, no cūracu Olivocū ámicuricū ēmeino bají,

earejaimada na, Jesús ũi bueimaraque. Nore earĩ ũi bueimaracavu pucaräre jarorejaimada Jesús.

<sup>2</sup>Näre yópe arĩ:

—No cõchinoi c urĩ ĩmajinoi nujara muja. Ma ĩmeinoi põevare ũmaiāimacure, burrore, earājaramu muja, nócacu ũi buoimure. Põeva ne tubabemutame cäreja. Ũbenita ũi buoimene jodeni, ũre davacajarā yure. <sup>3</sup>Aru, “¿Aipe teni burrore ũi buoimene jodeni, ũre nũvaivurũ muja?” ne aruta, yópe ajarā: “Ñujare ĩcõjeni darobi maje jabocu. ũre ũmacayu āimacu jaubi ũ. Carijĩneca mujare jacopaiyovacuyume cojedeca”. Nópe ajarā, arejaimada Jesús.

<sup>4</sup>Na ju arĩ ĩcarānurejaimada. Nuri, burrore earejaimada na. Cũrami jedevai, ma ĩcarui, buoimu núrejaimada ũ, tubamu. Aru ũi buoimene jodendurejaimada na. Dinumuma ina burro yebai núrivu arejaimada:

<sup>5</sup>—¿Aipe teni jodeivurũ muja ũi buoimene? arejaimada tubamure ĩcaivure Jesúre.

<sup>6</sup>Jesús ũi aipe báquepedeca náre, nore núrivure coyurejaimada tubamure ĩvũ. <sup>7</sup>Coyurĩ buojari, nũvaicõjenejaimada náre nócavu. Nũvari Jesúre burrore nũvacarejaimada ina pucarā. Ne doicajea, ne puenocacajeare tubamura tuorĩ, Jesúĩ tubaquinore ñarejaimada ũi bueimara. Aru burrore tubarejaimada Jesús. <sup>8</sup>Dinumuma ne puenocacajeare jũarejaimada ina obedivu põeva mára. Aru apevu jocucu cavabua yoca curicavabuaare burarĩ, jũarejaimada mára, Jesúre meadaiyurivu ne pueðarĩ jacoyurājiyepe aivu.

<sup>9</sup>ũre jipocateivu aru ũi yóbocavu máre codoboborejaimada na:

—Jũmenijicure torojue bajadéni. Jũmenijicu mearo ñacaimume ũ, Jũmenijicui daroimu mácu. <sup>10</sup>Majeñecu mácu, David bácu jaboteino mácarõpedeca, cari jabotecuyume. ũi jabotequino meaquiyeu. Cari jabocu bacuyúre ména borotenajarevu. Jũmenijicure torojue bajadéni, codoboborĩ arejaimada na.

<sup>11</sup>Aru Jesús Jerusalén āmicurĩmaroi earĩ, Jũmenijicui cũrami nurejaimada. Nore earĩ, ecorejaimada Jesús. Nore cocorĩ járidurejaimada Jesús. Ũbenita nainúta marejávũya. Que baru ũi bueimara doce paivũque Betania āmicurĩmajinoi nurejaimada Jesús.

### **Jesús ũi āmecoroino higueracu jẽidua cubecure**

(Mt 21.18-19)

<sup>12</sup>Cõmiájjaravu javejĩnara, Jesújã ne etaiyede Betania āmicurĩmajinore jocarĩ, āvué ĩjidejavũya Jesúre. <sup>13</sup>Jãrejaimada joai cũinácu jocucu higueracure yoca curicure. Que baru jẽidua vocunuridurejaimada dicu yebai. Ũbenita nore earĩ, yoca matuiyeda járejaimada. Jẽidua cubedejavũya, jẽidua higo āmicuridua jẽijjaravu eabe boje. <sup>14</sup>Aru arejaimada dicure:

—Cainumua āmejarari põeva mi jẽidua cojedeca, arejaimada Jesús.

Aru nópe ũi aiyede jápiarejaimada ina ũi bueimara.

### **Jesús ũi meadaino Jũmenijicui cũramine**

(Mt 21.12-17; Lc 19.45-48; Jn 2.13-22)

<sup>15</sup>Bedióva Jerusalén āmicurĩmaroi earejaimada na Jesújã, Betania āmicurõĩ nũvu bácvu. Earĩ, Jũmenijicui cũrami nuri, diñami taiĩbui

ecorejameđa Jesús. Nore diñami curivu bojeđaipõevare jaruvarĩ jarorejameđa Jesús. Tãutura oatuvaipõeva ne jáđovaivare moari najuárejameđa ũ. Aru jurevare bojeđaipõeva ne dobarõare máre moari najuárejameđa. <sup>16</sup> Diñami tãibui nuvari jatajurorivure ye apejĩe paiyede nuvaicõjemenejameđa Jesús. <sup>17</sup> Nãre bueyu, yópe arejameđa ũ:

—Yópe arĩ, toivaicõjenejaquemavu Jũmenijicu ũi yávaiyede: “Ji cũrami caivu põeva ne yure, Jũmenijicure, coyuiñamimu”, arĩ toivaicõjenejaquemavu. Ũbenita diñamine tatorĩ ívu ne dupiñamipe đaquemavu muja, muje pueno urarõ tãutura íye boje põevare jocarĩ, ne bojeđaiyede muje cuvaede, arejameđa nãre Jesús.

<sup>18</sup> Sacerdotevare jaboteipõeva aru ina Jũmenijicui yávaiye báquede bueipõeva diede, Jesús ũi đaiye báquede, jápiarĩ, ũre boarĩ jaruvaiyurĩdurejaimađa na. Ũbenita ina põevacapũravu Jesús ũi bueiyede jápiarĩ, urarõ dápiařejaimađa na. Que baru jidurĩ, ũre ne boarĩ jaruvarãjiyede borotedejaimađa ina sacerdotevare jaboteipõeva ina Jũmenijicui yávaiye báquede bueipõevaque. <sup>19</sup> Aru nainĩburu yóboi diĩmarore jocarĩ, nũrejaimađa Jesũjã.

#### Higueracu yaicu

(Mt 6.14-15; 17.20; 21.20-22; 1 Co 13.2)

<sup>20</sup> Cõmiájãravu javejĩnara vainãnuivu dicu higueracu yebai jářejaimađa. Aru caicu dicu aru caiye nuo máre yaidéjavũya. <sup>21</sup> Dinũmũma Pedro, Jesús ũi yávaino mãcarõre dicure ārũri, arejameđa ũre:

—¡Mũ, bueipõecu, jájacu! Dicu, mi ěnoare ãmecorovaricu, yaidébu, arejameđa Jesũre.

<sup>22</sup> Aru Jesús arejameđa nãre:

—Ju ajarã muja Jũmenijicure, ũi cadatequiyepe aivu mujare. <sup>23</sup> Jãve coyũyũbu mujare: Ácu põecu icũ cũracũre ũi aru yópe: “Nũjacũ yore jocarĩ pu jia uradaita, cocũnũjacũ”, nópe đaquiyebu dicũ. Ácu põecu ũi me ju aru Jũmenijicure aru “Jũmenijicu iye đaiyede majibebi”, arĩ dápiabedu, caiye ũi cũracũre cõjeiyepe tequiyebu. <sup>24</sup> Que baru coyũyũbu mujare: Caiye iye muje Jũmenijicure jẽniaiyede, dápiajarã yópe: “Jãve Jũmenijicu jĩcũyũme yure”, arĩ dápiajarã muja. Yópe dápiaaru, Jũmenijicu jĩcũyũme mujare muje uede. <sup>25</sup> Aru cainũmũa muje jẽniaiyede majepacuque, jaraivu baru o chõioivu baru apecu ũi ãmeina teiyede, ārũmetejarã diede. Cãrijimene đajarã ũque, majepacu cavarõ mearocacu ũi ārũmetequiyepe aivu muje ãmeina teiyede máre. <sup>26</sup> Ũbenita apecu ũi ãmeina teiyede mũaque ārũru, majepacu cavarõ mearocacu ārũmetebecube muje ãmeina teiyede máre, nãre arĩ buedejameđa Jesús.

#### Jesús ũi parué

(Mt 21.23-27; Lc 20.1-8)

<sup>27</sup> Bediõva cojedeca earejaimađa Jerusalén ãmicurĩĩmaroi. Nore Jũmenijicui cũrami tãibui cuyũ barejámeđa Jesús. Sacerdotevare jaboteipõeva, aru Jũmenijicui yávaiye báquede bueipõeva, aru judiõva bucũva máre nũrejaimađa ũi yebai. <sup>28</sup> Jẽniari jářejaimađa ũre:

—¿Ye paruéque đayũrũ mu iye mi đaiyede? ¿Ñame jĩdi mure iye paruéde mi nópe đaiyede? arejaimađa Jesũre.

<sup>29</sup> Jesús arejameđa náre:

—Yũ máre jëniari jáquijivũ mujare cüináro jëniari jáinore. Coyujarã yure. Yure mujë coyuiyede, yũ máre coyũquijivũ mujare ji paruéque ji ðaiyede. <sup>30</sup> ¿Juan Bautista bácu jáðovarejaquemari pøevare Jũmenijicũ ñi paruéque o pøeva ne paruéque? Coyujarã yure, arejameđa náre Jesús.

<sup>31</sup> Ñi que aiyede, borotedejaimađa ne bajumia yópe:

—Maje aru “Jũmenijicũque”, ñi aquíjibi “¿Aipe teni jũ abetecarãrũ ñre?”

<sup>32</sup> Ñbenita “pøevaque” aye jaubevũ majare, ne bajumia arejaimađa.

Caivũ ina obedivũ pøeva coreðvarejaimađa Juan Bautista bácu Jũmenijicũ yáviyede coyũcaipøecũ bajure. Que baru ina jabova jidøvejaimađa náre.

<sup>33</sup> Arejaimađa Jesúre:

—Majibe vũ ñuja, arejaimađa.

Dinũmure Jesús arejameđa náre:

—Yũ máre coyubevũ mujare ñamei paruéque ji ðaiyede, arejameđa Jesús.

“Ámena memecaipøevare” jári dápiarĩ ne ðarãjiyepe aino

(Mt 21.33-46; Lc 20.9-19)

**12** <sup>1</sup> Dinũmure Jesús coyurĩ búrejameđa náre jári dápiarĩ ne ðarãjiyepe ainoque, yópe arĩ:

—Cüinácu ñmũ doaicøjequemavũ jiore ýyaimuque. Doarĩ buojarĩ, ðaicøjequemavũ biadore jio tũruvai. Aru ñicøjequemavũ cobede ýyai pipicobede. Aru ðaicøjequemavũ ñmũjuriñami cũramine, jiore coreipøecũ ñi jáquiñamine máre. Caiye iyede meaðarĩ buojarĩ, vorĩ earĩ jiore memeipøevare, epequemavũ náre ne memecarãjiyepe ayũ ñre. Ina memecaipøeva ñnájivũ batequémavũ apeboa ýyaiboare, ne memeiye boje. Aru ñuquemavũ ñai ñmũ apeno joborõi. <sup>2</sup> Ýyai jëjãravũ yóboi, ñai ñmũ jarorĩduquemavũ cüinácu ñi yebacacure memecaipøeva yebai, ñi ñiquiyepe ayũ apeboa ýyaiboare, ñai jabocu jiede. <sup>3</sup> Ñbenita ñai yebacacu ñi eaiyede nore, ina memecaipøeva ñre jëni, pare boarĩ, copaide ðaquemavũ ñre quédada. <sup>4</sup> Cojedeca ñai ñmũ, jio upacu, jarorĩduquemavũ apecu ñi yebacacure memecaipøeva yebai. Ñbenita churiá ðaquemavũ ñre ñi jipobui. Aru cũyojarø ðaquemavũ ñre máre. <sup>5</sup> Cojedeca ñai ñmũ, jio upacu, jarorĩduquemavũ apecu ñi yebacacure nore, memecaipøeva yebai. Ñbenita boarĩ jarũvaquemavũ ñre. Apevũre jio upacu ñi jaroimarare máre boaquémavũ. Aru apevũre boarĩ jarũvaquemavũ na.

<sup>6</sup> No yóboi, mautequemavũ ñai jio upacure cüinácu ñi mácu cüinácuva, pare ñi ñmũ. Quénora jarorĩduquemavũ mamacure. “Ñre jáivũ, pueðarãjichuma” ayũ, que dápiaquemavũ ñ. <sup>7</sup> Ñbenita ina memecaipøeva jáivũ ñai jio upacui mácu, aquemavũ ne bajumia, “Ñai ñũje jabocu bacuyũme. Jípacu ñi yainíburu yóboi, cuvacyũme caiye ñi cuvade. Járica, boarĩ jarũvarãjarevũ ñre, maja cuvaburĩ caiye ñi cuvade”. <sup>8</sup> Que arĩ, ñre jëni, boarĩ jarũvaquemavũ. Aru ñi baju bácarøre jaetovaquemavũ jiore jocarĩ, arejameđa Jesús.

<sup>9</sup> Na ñi coyuiyede jápiaivure jëniari járejameđa Jesús:

—¿Aipe ðaquidi ñai jio upacu náre? Ñ boarĩ jarũvacũnũcyũme ina memecaipøevare. Aru epecũyũme apecũ memecaipøevare noi, ñi jioi. <sup>10</sup> ¿Jári borotebenarũ muja iye Jũmenijicũ yáviaye ñi toivaicøjeiye báquede? Yópe toivarejaquemavũ yurã, Cristo ji borore:

Iva cūravare cūramine ðaipōeva ũbeni jarūvaquemavū. Caride iva cūrava caiva apeva pueno parurivabu. <sup>11</sup>Nōpe ðaino mácarōre ðaquemavū Jūmenijicu. Que baru pare mearotamu majare, maje dápíaru, arī toivarejaquemavū, arejameða Jesús.

Yópe aiyurōtamu no: Pōeva “Āmecube ũ”, arīdurājarama Jesúi borore. Ũbenita meacu bajube ũ, Jesús, caivu apevu pueno.

<sup>12</sup>Que aiyede, Jesúre jēni, nuvaiyurīdurejaimaða, ũi coyuiye boje nára no járī dápíarī ne ðarājiyepe ainore. Ũbenita jidurejaimaða ina obedivu pōevare. Que baru ũre ðajocarī etarī nurejaimaða.

### **Jesús ũi coyuiño jabovare bojedainore**

(Mt 22.15-22; Lc 20.20-26)

<sup>13</sup>Fariseova aru Herodecavu jarorejaimaða nácavure Jesús yebai, ũre jujovarī, jacotujurorivure. <sup>14</sup>Ũi yebai earī, ũre yópe arejaimaða na, mamadaiyurivu:

—Mu, bueipōecu, mure coreóvaivubu ñuǵa. Nurié yávaivu mu. Caivure cūinácamuara yávaivu mu. Coyubevu mu pōevare yópe ne ðaiyepe. Quénora jidubecuva coyuivu mu náre yópe ne dápíaiyepe. Jāveneca bueivu mu pōevare, ne ðarājiyepe ayu mearore yópe Jūmenijicui ðaicōjeiyepe. ¿Maje jabocu César ũi ícōjejuroede, ũi jaboteiye boje, maje bojedaru, mearica ðie? ¿O bojedabejeba maja? ¿Bojedaje bárica maja? ¿O bojedaicōjeino āmeni? arejaimaða Jesúre ina fariseova aru ina Herodecavu.

<sup>15</sup>Ũbenita ne jujovajuroede majicu, náre yópe arejameða Jesús:

—¿Aipe teni yure jujovaiyurīdurī vainí tuiyurāru muǵa? Yure tātuturavara, ji jáquituravare, ðavajacurī muǵacacu, arejameða náre Jesús.

<sup>16</sup>ũre tātuturavare nuvarejameða nácacu. ũre nuvari jiyede, arejameða Jesús:

—¿Ũamema ñai, ðituravare jēñu? ¿Aru ñamei āmiá curituravaba ðiturava? arejameða náre Jesús.

ũre arejaimaða:

—Ũai jabocu Césarī decocu aru ũi āmiá máre curituravatamu, arejaimaða.

<sup>17</sup>Que aivure arejameða Jesús:

—César jiede ũre jacopaiyovajarā muǵa. Jíjarā ũre tātutara yópe ũi bojedaicōjeiyepe muǵare. Aru Jūmenijicu jiede ũre jacopaiyovajarā muǵa. Ðajarā yópe ũi urōpe, arejameða náre, jēniari járadaivure, Jesús.

Aru jujovaiyurīduivu bácvu Jesúre ũi que aiyede, urarō dápíarejaimaða ina fariseova aru ina Herodecavu máre.

### **Saduceova ne jēniari jáino Jesúre yainore jarūvarī nacajainore**

(Mt 22.23-33; Lc 20.27-40; Hch 23.8)

<sup>18</sup>Apevu saduceova nurejaimaða Jesús yebai. Saduceo āmicuriyajibobu judíovacavu ne yajubo cūináyajubo. Caivu saduceova “Yainore jarūvarī nacajaiye cubevu”, adama na. Jesúre jēniari járejaimaða ina saduceova yópe:

<sup>19</sup>—Mu, bueipōecu, Jūmenijicui ðaicōjeiyede Moisés bácu toivarejaquemavū yópe: Cūinácu némamicu yaidú, jímarepacore jocarī juedocuvabecova, yaiyú bácu yócure purubuoie javvu óque, juedocuvacuyū. Aru ina juedova bárājivu yaiyú bácu āmiáre cūvarājarama na. Que arī, toivarejaquemavū Moisés bácu.

<sup>20</sup> Javede cútequemavũ siete paivũ ãmũva. Cũinácũ ãmũi mára matequémavũ na. Némamicũ purũbuoquemavũ. No yóboi, yaiquémavũ ã mácu, jueducuvabecũva. <sup>21-22</sup> Que baru apescu, ã mácurã cutuyũ, purũbuoquemavũ jíbucũ bácuĩ márepacoque. Aru jíbucũ bácupedeca, yaiquémavũ ã mácu máre, jueducuvabecũva. Aru apescu, ã mácurã cutuyũ máre, nopedeca, aru caivũ ina siete paivũ bácvũ óque purũbuorĩ, yaiquémavũ, jueducuvabevũva. Caivũ ne yóboi, ico nomió máco máre yaiquémavũ. <sup>23</sup> ¿Yainore jarũvarĩ nacajaijãravũ baquinóre, ñamei márepaco bacoðóba ico? Ijãravũ caivũ ina siete paivũ cuvatequemavũ óre, arejaimaða na Jesúre.

<sup>24</sup> Aru Jesús arejameða ina saduceovare:

—Mamateivũbu muja muje majibe boje Jũmenijicui yávaiyede. Aru Jũmenijicui paruéde máre majibevũbu muja. <sup>25</sup> Yainore jarũvarĩ nacajaijãravũ baquinóre purũbuobenajarama. Aru jĩbenajarama nẽmaromivare, ne purũbuorãjjiyepe aivũ. Quénora ángeleva, ina purũbuobevũ, cavarõ mearo Jũmenijicui curõcavũpe paivũ barãjãrama ina yainore jarũvarĩ nacajarajivũ. <sup>26</sup> ¿Iye yainore jarũvarĩ nacajaiyede, jápiarĩ eabenarũ muja iye Jũmenijicui coyũie báquede Moisés bácu ãi toivaiye báquede, jocujĩcu uruijĩcure coyũrĩ? “Yũtamu Jũmenijicu. Abraham, Isaac, aru Jacob ne mearore jĩmũmu yũ”, arejaquemavũ Jũmenijicu Moisés bácu. <sup>27</sup> Que arĩ, yaivũ bácvũ ne mearore jĩmũ ãmemi Jũmenijicu. Quénora apurivũ ne mearore jĩmutame ã. Que baru ina majeñecũva apũrivũbu. Que baru pare mamateivũbu muja, arejameða náre Jesús.

#### **Daicõjeiye parué caiye pũeno**

(Mt 22.34-40; Lc 10.25-28)

<sup>28</sup> Cũinácũ Jũmenijicui yávaiye báquede buaipõecu Jesús yebai earĩ, jápiarejameða Jesús apenvũque ne copũ boroteiyede. Jesús náre ãi copũ aiyede cojurejavũya ãre. Dinũmũma Jesúre yópe jẽniari járejameða Jũmenijicui yávaiye báquede buaipõecu:

—¿Ároma majare Jũmenijicui daicõjeino mácarõ pũeno parũrõ cõjeino? arejameða.

<sup>29</sup> Aru Jesús ju arejameða ãre:

—Pũeno parũrõ daicõjeinotamu yo: “Jápijarã muja, Israecavũ. Maje jabocu Jũmenijicu cũinácũratame. <sup>30</sup> Ujacu mi jabocu Jũmenijicure caino mi ãmedũque, caino mi ãmeque, caino mi majiéque, aru caino mi baju paruéque máre”. <sup>31</sup> Aru no yóbo cãchijino parũrõ daicõjeino yópe ainomu: “Mi bajure mi jecuépedeca jecujacu micure máre”. Iye daicõjeiyebu pũeno parué. Apeno daicõjeino pũeno parũrõ cubevũ, arejameða Jesús.

<sup>32</sup> Arejameða Jesúre:

—Mũ, buaipõecu, jávetamu. Mũ jáve arĩ coyũivũ mũ. Jũmenijicu cũinácũrabe ã. Apescu cubebi. <sup>33</sup> Maje ãimacu caicure toaque juarĩ, Jũmenijicure jíye o maje ape pa iyede Jũmenijicure jíye meavũ. Ubenita Jũmenijicure caiye maje ãmedũque, caiye maje majiéque, aru caiye maje paruéque máre jecué aru majecure maje bajure jecurõpe máre jecué, pũeno mearotamu, arejameða Jesúre ã.

<sup>34</sup> Jesús ãi jápaiyede mearo ãi ju aiyede, yópe arejameða:

—Quíjino baju jaurĩdurebu mi eaquino Jūmenijicui jaboteinore, arejameđa Jesús.

Que arĩburu jidurĩ, Jesúre ye jēniari jámenejaimađa na caivu.

**Cristo ñai jabocu David bácuĩ pāramecu**

(Mt 22.41-46; Lc 20.41-44)

<sup>35</sup> Jesús buede curejameđa Jūmenijicui cūrami. Aru arejameđa:

—¿Aipe teni “Cristobe David bácuĩ pāramecu”, aivuba Jūmenijicui yávaiye báquede bueipōeva? <sup>36</sup>David bácuĩvacari Espíritu Santoi paruēque coyucōjeimu arejaquemavu ũ mácu:

Jūmenijicu aquemavu ji jabocu, “Dobajacu ji meapūravui, mi cūvae boje paruēde yupeđeca. Aru yu epecuyumu mi mauvare mi cuboba cāchinoi. Que teni mure vainĩ jaruvare đacuyumu yu náre, mi jabotequiyepa ayu náre”, arejaquemavu David bácu Cristorā.

<sup>37</sup>David bácuĩvacari Cristoi borore “Ũrecabe ji jabocu”, arejaquemavu. Que baru, ¿aipe teni David bácuĩ pāramecuba ũ? arejameđa Jesús.

Aru caivu ina obedivu pōeva torojurĩ jápiarejaimađa Jesúre.

**Jesús ũi boro coyurĩ adaino Jūmenijicui yávaiye báquede bueipōevare**

(Mt 23.1-36; Lc 11.37-54; 20.45-47)

<sup>38</sup> Jesús bueyu bácu arejameđa:

—Me đajarā ina Jūmenijicui yávaiye báquede bueipōevare. Námu cuiyurivu cuitótecajea ũmujuricajeaque. Aru ũma na pōeva pueđarĩ ne jacoyuinore náre tãibui. <sup>39</sup>Judíovai cójijiñamiare ne dobae méne ũma na, pōeva ne járājiyepa aivu náre. Aru torojuve teinore, cuiyuma na ñai torojuve teino upacu yebai. <sup>40</sup>Ũbenita jujovarĩ ñavađama ina nomiópēvare ne apejēne. Aru jēniadama joe urarō Jūmenijicuque, pōeva ne dápiarājiyepa aivu Jūmenijicui yávaiye báquede bueipōeva me Jūmenijicu ju aivupe. Caiye iyede ne đaiye boje, pueno urarō ñájinajarama na, ne āmeina teiye boje, arejameđa Jesús.

**Nomiópeco cūve cūvabeco ōi tātutura jáno Jūmenijicu**

(Lc 21.1-4)

<sup>41</sup>Nore, Jūmenijicui cūrami, Jesús dobarejameđa joabejĩnoi cūinátōcu pōeva ne Jūmenijicu tātutura jíye epeitōcu yebai. Ditōcu curejavūya ũi jipocai. Noi dobarĩ, pōeva obedivu ne ure tātuturare ditōcu jĩni tuoivure jáñu marejámeđa Jesús. Aru obedivu cūve cūvarivu tuorejaimađa ure tātuturare. <sup>42</sup>Que teiyede cūináco nomiópeco, cūve cūvabeco, ditōcu yebai earĩ, tuorejacoda pucaturava tātuturaturavare, me bojecubeturavare. <sup>43</sup>Ōi que đaiyede jáñu Jesús, órejarejameđa ũi bueimarare ũi yebai. Aru arejameđa náre:

—Jāve coyuyubu mujare: Ico nomiópeco cūve cūvabeco, Jūmenijicu jíbico apevu ne jíye pueno baju, ōi jíye boje ōi cūvarō cainore. Ũbenita nácupūravu quénora quíjino ne cūvarōcarōre jíyama. <sup>44</sup>Caivu ina pōeva ne urarō cūvaecarōre jíyama Jūmenijicu náre jaubede. Ũbenita ico nomió ōi quíjino cūvarijĩno mácarōre cainore jíbico Jūmenijicu. Caiye ōi ijaravui cūvajuroede jíbico ō Jūmenijicu, arejameđa náre Jesús.

**Jesús ũi coyũino “Jũmenijicũi cũrami tuquiyebu” arĩ**

(Mt 24.1-2; Lc 21.5-6)

**13** <sup>1</sup>No yóboi Jesús etayu bácure Jũmenijicũi cũramine jocarĩ, cũinácu ũi bueimaracacu arejamedá ũre:

—Mu, bueipõecu, jájacu. ¡Pare meavabu iva cũrava! ¡Aru pare meadamiamu iñamia cũramia! arejamedá Jesúre.

<sup>2</sup>Ũi que aiyede, Jesús arejamedá ũre:

—¿Jáñuru mu iñamia uradãmia cũramiare? Cũináva cũrava mautebequiyebu apeva puenora. Caiye iva cũravare najuárajarama. Que teni cũiquiyebu, arejamedá Jesús.

**Jáðovaiye járavu cũiquíye jipocai**

(Mt 10.17-20, 22; 24.3-28; Lc 12.11-12; 17.22-24, 31; 21.7-24; Ap 7.14)

<sup>3</sup>Jesús dobarejamedá cũracũ Olivocũ ámicuricũ puenoi, Jũmenijicũi cũrami ũi jipocai jáñu mácu. Ũi dobaede noi Pedro, Santiago, Juan, aru Andrés máre jeniari járejaimada ũre yavenina, põevare jocarĩ:

<sup>4</sup>—Coyujacu ñujare: ¿Aipiyede tuquidi caiye iye cũramia uradãmia? ¿Aipe ðarĩ coreóvarãjídica ñuja caiye iye buojaquiyede? arejaimada na.

<sup>5</sup>Aru Jesús arĩ búrejamedá náre:

—Me jájara apecu ñujovaiyucure mujare. <sup>6</sup>Darãjarama obedivũ ãmuva. Aru arãjarama “Cristobu yu”. Ñujovarãjarama obedivũ põevare.

<sup>7</sup>Muje jápiaiyede boaino borore aru boaquĩno borore máre, jidubejarã. Caiye iye vaiquiyebu járavu cũiquíye jipocai. Ũbenita cũimébu cãreja. <sup>8</sup>Cũináyajubo põeyajubocavu ãdamatenajarama apeyajubo põeyajubocavuque. Aru cũináro jaboteinocavu ãdamatenajarama apeno jaboteinocavuque. Joborõ cújiquiyebu obedicũrõare. Ñájinajarama ávuéna. Iye ñájiye baquiyébu yópe ñuedocu põeteyure ñájiyepe. Yópe búquiyebu caiye iye ámeina ñájinajiye.

<sup>9</sup>Ũbenita mujacápũravu me jári me ðajarã. Mujare jeni jínajarama ne jabovare. Mujare jara popenajarama judíovai cójijĩñamiai. Aru muja núrajaramu cõjeipõeva ne jipocai aru jabova ne jipocai máre, yure muje ju aiye boje, coyurãjivũ ji borore. <sup>10</sup>Mamarumure yávaiye méne Jũmenijicũi jaboteinora coyuiye jauvu, cainoa joborõacavu ne jápiarãjiyepe aivu diede. <sup>11</sup>Ne jeni nuvaiyede mujare jabova ne ámeina teivure jeniari jáĩñami, “¿Aipe arĩ coyurãjidi náre?” arĩ, cãrijimejara muja. Ũbenita coyujarã muja yópe ñai Espíritu Santo ũi dápiare ðaquiyepe dinumu maquinóre. <sup>12</sup>Que teni ãmu jeni jícuyume jĩbucure o imacure máre, jabova ne boarĩ jaruvarãjiyepe ayu ũre. Nopedeca jĩpacu jeni jícuyume mamacure. Aru nopedeca nẽmara nẽbucũvare ju abeni jeni jínajarama, boarĩ jaruvaicõjenajivũ náre. <sup>13</sup>Caivu mujare muje yure ju aiye boje jorojĩni járajarama. Ũbenita ñai ju ayu yure pu ũi yainũmũta, ũ macuyume ji meadaimu, arejamedá Jesús.

<sup>14</sup>Aru Jesús buedejamedá náre, ũi bueimarare, cojedeca:

—Ñai ãmu pare ámecu nũcuyume nore, Jũmenijicũi cũicõjemenore ũre. Caivu iye toivaiyede jári boroteivu me dápiarãrari caiye iyede. Ñai ãmure járajaramu muja. Judeacavu dupini ñujarari cũracũai. <sup>15</sup>Ñai cũrami puenora cũcuyũ, ũi dupini nuiyede, ėmeni ðarĩ, ñavariducuyũ ũi apejĩene, ecobejacurĩ ũi cũrami.

<sup>16</sup> Aru ñai jiore memecuy, ñi dupini ñuiyede, copainumejacurí iniducuy ñi cuitótecaje pñenocajede. <sup>17</sup> ¡Cõmaje ãrojarajarama ina nomiva micava bárãjivu dijãravua baquiyéde! ¡Aru ina nomiva nẽmajina nuri dajocabevure cãvarãjivu mãre pare ñãjinajarama dijãravua baquiyéde! <sup>18</sup> Jẽniajara Jũmenijicuque iye vaibẽquiyepẽ aivu ocõrũmure. <sup>19</sup> Dijãravua baquiyéde põeva urarõ ñãjinajarama. Nõpe paiye cubevu cãreja, mamarumumata Jũmenijicu ñi cuedarĩ buinumure, pũ caride mãre. Aru cainumua cubequiyebu. <sup>20</sup> Jũmenijicu ñi javaiyobedu dijãravua ñãjiovaquijãravua baquiyéde, caivu yaijẽbu. Meadaimara cubejebu. Ñbenita Jũmenijicu javaiyocuyume dijãravua ñãjiovaquijãravua baquiyéde, ñi beoimara mãcavure boje.

<sup>21</sup> 'Dijãravua baquiyéde apesu ñi aru mujare yõpe, "Jãjara. ¡Ñainecabe Cristo!" o apesu ñi aru mujare, "¡Ãñurecabe Cristo!" nãre jũ abejarã. <sup>22</sup> Que teni obedivu borocurivu darĩ coyurãjarama "Cristobu yũ". Aru apesu mãre Jũmenijicu yãvaiyede coyucaridurãjarama. Ñbenita Jũmenijicu yãvaiyede coyucãipõeva baju ãmenajarama na. Urarõ jãðovaiye aru põeva ne darĩ majibede mãre darãjarama, jũjovarĩduivu Jũmenijicu beoimara mãcavure. <sup>23</sup> Ñbenita me jãjara muja. Coyuyubu mujare ne borore, muje majinajiyepẽ ayũ, ne darãjiye jipocai, arejameđa Jesús.

#### **Jũmenijicu daroimu mãcu ãmupe ñi copaidaquino**

(Mt 24.29-36; 42, 44; Lc 12.36-38; 21.25-36; Ap 1.7; 6.12-13)

<sup>24</sup> Bediõva cojedeca Jesús coyurejameđa nãre:

—Cũinãjavũ dijãravuacãjavũ baquinõĩ, iye urarõ ñãjiniburu yõboi, aviã ñemitecuyume. Aru aviã ñamicacu mãre pẽomecuyume. <sup>25</sup> Na abiãcova turãjarama cavarõre jocarĩ. Aru caivu ina parũẽque curivu cavarõĩ cújinajarama. <sup>26</sup> Dinumu maquinõre jãrajarama yure, Jũmenijicu daroimu mãcure ãmupe, dayure ocopeniboai, urarõ parũẽque, jãðovãñure meacu bajure. <sup>27</sup> Que teni ina ãngelevare darocuyumu yũ. Nãcapũravũ cójjovarãjarama Jũmenijicu beoimara mãcavure, caivu aviã dainocavure aru caivu aviã doinocavure mãre, cainoa joborõacavure.

<sup>28</sup> 'Majijarã yo muje jãĩnore. Icu jocucu higuercure yoca yuiyede, majivu muja ujũrũmu joabenore. <sup>29</sup> Nopedeca jãivu caiye iye teiyede, majinajaramu muja jãravũ cũino joabenore. <sup>30</sup> Jãve coyuyubu mujare: Apevu ijãravũ curivu yaibẽdeca cãreja, vaiquĩyebu caiye iye yõpe ji coyũiyepẽ. <sup>31</sup> Caino cavarõ, aru caino joborõ mãre cũiquĩyebu. Yõpe ji yãvaiyepedeca jãve vaiquĩyebu.

<sup>32</sup> 'Ñbenita dijãravũ baquinõre aru diora baquinõre ñame majibema. ãngeleva, ina curivu Jũmenijicuque cavarõ mearoi, aru yũ, Jũmenijicu mãcu mãre majibevũ ñũja. Quẽnora jipacu majibi dijãravũ baquinõre, ji aijãravure.

<sup>33</sup> Que baru me jãjara muja. ãrujara. Muja majibevũ ji copaidaquijãravure.

<sup>34</sup> Jẽvari coyũquijivu ji copaidaquinore yõpe cũinãcu ãmu ñi cucũnuquiyepẽ apejoborõĩ. Ñi etaquiyẽ jipocai ñi cũramine, memecõjeimi ñi yebacavure nãre coapa. Aru jedevacobede coreipõecure mãre coreicõjeimi cãmecũva.

<sup>35</sup> Quẽdeca memeni corejarã muja, cãmevũva. Muja majibevũ cũrami upacu ñi copaidaquinore. Daquijichũbi nainũre, o ñami coricai, o cãyu ñi õrejaiyede, o javejĩnare. <sup>36</sup> Ñi copaidaru maumejiena aru mujare cãivure earu, meamejebu mujare. <sup>37</sup> Nopedeca ji coyũĩnore mujare, coyuyubu quẽdeca caivure: Cãmevũva memeni corejarãri, arĩ buedejameđa nãre Jesús.

**Jesús ñi coyũino ne jēnainore úre yóboimia**

(Mt 26.1-5; Lc 22.1-2; Jn 11.45-53)

**14** <sup>1</sup>Pascua āmicurijāravu aru páure bucure ðaiye cube āiye torojuve teinumu pucajāravua jipocai barejávūya cāreja. Yavenina Jesúre jujovarī jēni, boarī jaruvaiyurejaimada sacerdotevare jaboteipōeva aru Jūmenijicui yávaiye báquede bueipōeva máre. <sup>2</sup>Ne bajumia arejaimada:

—Torojuve teinumu úre jēmenajarevu maja. Úre jēnu torojuve teinumu, pōevacapūravu majare jorojīni, majare boarī jaruvaiyujebu, arejaimada ina judíovai jabova.

**Cūináco nomió ði mumijue yuaino Jesúre**

(Mt 26.6-13; Lc 7.37-38; Jn 12.1-8)

<sup>3</sup>Jesús ñi cuede Betania āmicurīmajinoi, Simón pojeyu bácuī cūrami tuoiva yebai āivu barejaimada na, Jesújā. Que teni cūináco nomió earejacoda Jesús yebai. Ico nomió nūvarejacoda cūinábu ūmujuribu boribu mumijuricoroque. Iye mumijue nardo āmicue pare mearo corajurejavūya. Aru pare bojecue barejávūya. Ico nomió earī, dibure cobarī yuarejacoda caiye iye mumijuede Jesúi jipoburā. <sup>4</sup>Ūbenita nore curivu apevu, jorojīni, ne bajumia arejaimada:

<sup>5</sup>—¿Aipe teni iye mumijuede jaruvaðoba ð? Diede bojedarī, urarō boje ĩni, cūinácu memeipōecu cūináju ñi memeno bojede ĩni, jīye jaujebu óre cūve cūvabevure, arejaimada na.

Que baru jararejaimada óre. <sup>6</sup>Ūbenita Jesús arejameda:

—Yávabejarā āmeno óre. ¿Aipe teni cārijovaivurū óre? Ōi ðaiye yure mearotamu. <sup>7</sup>Cainumua ina cūve cūvabevu curājarama mūjaque. Que baru mūja cadateiyurivu cainumua náre buoiaivu. Ūbenita yu cubecubu mūjaque cainumua. <sup>8</sup>Ō ðacaibico yure ði oainope. Ō meadacaibico ji bajure, ne yure jaruvārājiye jipocai. <sup>9</sup>Que baru jāve coyuyubu mūjare: Cainoa joborōai ijāravui pōeva ne coyuiyede iye yávaiye méne ji meadaiyede pōevare, iye ði yure ðacaiyede máre coyurājarama, ne ārurājiyepe aivu óre, arejameda Jesús.

**Judas ñi jēni jíno Jesúre**

(Mt 26.14-16; Lc 22.3-6)

<sup>10</sup>No yóboi Judas Iscariote, cūinácu doce paivu Jesúi bueimaracacu, nūrejameda ina sacerdotevare jaboteipōeva yebai, náre jēni jiyurejameda Jesúre. <sup>11</sup>Ūi ðaiyuede jāpiarī, torojurejaimada na. Que baru arejaimada úre:

—Ñūja jínajivubu mure tāuturare, mi yavenina jēni jīye boje úre, arejaimada na Judare.

Que baru Judas jāri coreni búrejameda yavenina, jēni jícuyu Jesúre.

**Jesús ñi āino ñi bueimaraque**

(Mt 26.17-29; Lc 22.7-23; Jn 13.21-30; 1 Co 11.23-26)

<sup>12</sup>Páure bucure ðaiye cube āiye torojuve teinumu mamabuijāravu barejávūya. Pascua jāravucacure, ovejajícure, boarī, toaque juarī, ávarejaimada dijāravure. Aru dijāravure arejaimada Jesúre ñi bueimara:

—¿Ári nuri mre maje Pascua járavuque áiyede meadacarājídica ñuja? arejaimada na.

<sup>13</sup>Aru nácavu pucarā jarorī, arejaimada Jesús:

—Īmaroi nuri, ěmeni, nócacure oco tuyure copurājaramu muja.  
<sup>14</sup>Úque nuri, cūramine ũi ecoiyede cūináturu muja máre ecojarā. Diñami upacure yópe ajarā muja: “¿Átucubaba ji bueimaraque ji Pascua járavure ji áquitucubu?” aibi bueipōecu”, ajarā muja. <sup>15</sup>Diñami upacucapūravu puenocatucubu jave majare jauéde meadaitucubu bácarōre mujare jádovacuyume ũ. Noi ditucubui majare maje ārajiyede meadajarā muja, arejaimada náre Jesús.

<sup>16</sup>Ūre ju arī, nuri, ĩmaroi earejaimada. Earī, nore Jesús ũi aiye báquepedeca ũi aitucubure earejaimada na. Noi Pascua járavuque áiyede meadarejaimada na pucarā.

<sup>17</sup>Que teni meadarī buojarī, nainú baji, avía ũi dorīburu yóboi, ũi bueimara ina doce paivuque no ditucubure earejaimada Jesús. <sup>18</sup>Nore earī, dobarī áivure, Jesús arejaimada ũi bueimarare:

—Jave coyuyubu mujare: Cūinácū mujacacu yure ji mauvare jēni jícuyume ũ. Nai yure nópe dacuyu, yúque caride añume ũ, arejaimada náre Jesús.

<sup>19</sup>Que baru chiorejaimada. Aru na coapa yópe arejaimada Jesúre:

—¡Que dabecubu yu! ¿Múcarī? arejaimada na coapa.

<sup>20</sup>Que arī, Jesús arejaimada náre:

—Cūinácū mujacacu, jóyu páure jororumica yúque, ũ macuyúme ji mauvare yure jēni jíyu. <sup>21</sup>Yu, Jūmenijicui daroimu mácu ũmpe ijāravui, ji yaijāravui nucuyumu yu, yópe Jūmenijicui toivaicōjeiye báquepedeca ũi yáviyede. Ūbenita ámeno vaicáyume ũ, ñai yure jēni jíyu bacuyú. Nai nópe dacuyu, ũi pōtebedu meajebu, arejaimada ũi bueimarare Jesús.

<sup>22</sup>Ne áiyedeca, páure ĩni, Jūmenijicure torojuede jídejaimada Jesús. Torojuede jíni buojarī, páure cotuvarejaimada. Cotuvarī buojarī, náre coapa jídejaimada. Aru arejaimada:

—Páure ājara muja. Diedecabu ji bajupe, jádovaiye ji yaiquínore mujare boje, arejaimada náre Jesús.

<sup>23</sup>Ūcuidore máre ĩni, torojuede jíni Jūmenijicure, náre jídejaimada Jesús. Didore jēni, ũcuri, veorī, ũcurejaimada na coapa. <sup>24</sup>Aru Jesús arejaimada náre:

—Dicorore ũcujara muja. Diedecabu ji jivepe, jádovaiye ji yaiquínore mujare boje, Jūmenijicui ārametequiepe ayu muje āmeina teiyede. Jūmenijicu “Yópe đajarā muja, boropatebenajivu ji jáinoi”, ũi yóbocarō coyūno mácarōre pōevare ārurajaramu muja, muje ũcuiyede diede. <sup>25</sup>Jave coyuyubu mujare: Quénora vino úyaicorore ũcuñumu yu ijāravure. Ūbenita ānijāravu baquinói, Jūmenijicui jabotequinumu maquinóre, bedióva cojedeca ũcuri jácuyumu yu, arejaimada ũi bueimarare Jesús.

**Jesús ũi coyūno Pedrore ũi “Jesúre yu coreónabevu” aquinore**

(Mt 26.30-35; 28.16; Lc 22.31-34; Jn 13.36-38)

<sup>26</sup>Ne āriburu yóboi, Salmos āmicue yuriaiye yuriarejaimada. Yuriarī buojarī, no cūracū Olivocū āmicuricūi nurejaimada na, Jesújā. <sup>27</sup>Mái nuri, arejaimada Jesús:

—Yüre dajocarĩ nưajaramu mưja. Yüre vaiquĩyede Jũmenijicu toivaicõjenejaquemavu, yópe arĩ: “Ovejavare coreipõecure boarĩ jaruvacuymu yũ. Aru coateni nưajarama na, ovejava”, arĩ toivarejaquemavu. <sup>28</sup> Ûbenita ji yainĩburu yóboi, Jũmenijicu ãi nacovaiyede yüre yainore jaruvarĩ, mưje jipocai nưacuymu Galileai, arejamede Jesús.

<sup>29</sup> Que ayüre, Pedrocapũravu arĩdurejamede ũre:

—Caivu apevu ne dajocarĩ jocarĩ nuiyedeca, yũcapũravu mure jocarĩ nưmecubu yũ, arĩdurejamede.

<sup>30</sup> Aru Jesús arejamede ũre:

—Jãve coyũyubu mure: Cari ñami pũque cáyu ãi órejaquiye jipocai, yóbecue baju “Jesũre yũ coreóvabevu” acũyumu mu, arejamede Pedrore Jesús.

<sup>31</sup> Ûbenita Pedrocapũravu copũ ayũ barĩdurejamede:

—Mũque yüre ne boarĩ jaruvavuta, “Jesũre yũ coreóvabevu”, abecubu yũ, arĩdurejamede Pedro.

Aru na coapa nópe arĩdurejaimada, Jesũi bueimara.

### **Jesús Getsemanĩ ãi jẽniaino Jũmenijicuque**

(Mt 26.36-46; Lc 22.39-46)

<sup>32</sup> Getsemanĩ ãmicurõi nurejaimada Jesũjã. Nore earĩ, arejamede ãi bueimarare Jesús:

—Yui dobarĩ corejarã mưja ji Jũmenijicuque boroteiyede ãnoi, arejamede Jesús.

<sup>33</sup> Nuvarejamede ũque Pedrore, Santiagore, aru Jũare máre. Aru urarõ ñájiũ ãi dápiaino, ãmeno vaidéjamede Jesús.

<sup>34</sup> Que tenĩ arĩdurejamede náre:

—Yũ ãmeno chĩori dápiaivu ji yaiquĩnore. Yui mauteni, jãri capujarã mưja, arĩdurejamede ã.

<sup>35</sup> Jipojica báque nuũ Jesús, ñuatutarĩ, mori turejamede joborõita. Aru Jũmenijicuque boroteyu barejamede ã:

—Mu, jipacu, yüre cari vaiquĩye vaibéjadeni. Caiyede ãaiye majicutamu mu. <sup>36</sup> Ûbenita ji urõpe ãbejacu. Quénora mi urõpe ãajacu mu, arejamede jípacure Jesús.

<sup>37</sup> Ûi bueimara yebai copainuri, náre cãivure earejamede Jesús. Aru arejamede Pedrore:

—Simón, ¿cãñutarũ mu? ¿Cũináorajĩ cãmecuva coreiye majibecurũ mu? arejamede Jesús.

<sup>38</sup> Caivu ãi bueimarare arĩdurejamede cojedeca:

—Coreni, Jũmenijicuque borotejarã mưja, abujuvai jabocu mưjare jũjovarĩ, ãmeina tede ãbequiyepa aivu. Mưje ũme ue parurõ mariduvu. Ûbenita mưje baju ãaiye bajure parũbevũ mưja, arĩdurejamede náre Jesús.

<sup>39</sup> Cojedeca Jũmenijicuque borotecunurejamede Jesús. Ûi Jũmenijicuque boroteiye báquepedeca bediõva borotecunurejamede ã. <sup>40</sup> Ûi bueimara yebai copainuri, náre cãivure earejamede Jesús cojedeca. ãmei vuo ijidejavãya náre. Aru ũre ju aiyẽ majibedejaimada na. <sup>41</sup> Bediõva Jũmenijicuque borotecunuri, yóbecue borotecuũ. Boroteni buojarĩ, ne yebai copainuri, arejamede náre:

—¿Cäivurũ muja cäreja? Jede, quénoramu. Iora jave eaiũa. Ijāravui dayu bācu, Jūmenijicui daroimu mācu ūmũpe, āmeina teivure ne jēni jīnajimũmu yu. <sup>42</sup>Nacajajara muja. Copu nurajarevũ. Yure ji mauvare jēni jícuyũ daibi, arejamedā Jesús.

### Jesúre jēni ne nuvaino

(Mt 26.47-56; Lc 19.47; 21.37; 22.47-53; Jn 18.2-11)

<sup>43</sup>Jesús ũi boroteiyedecata earejamedā Judas, nācacu, doce paivucacu. Obedivũ pōeva ũque earĩ, boaicarovea aru boaidua dururĩ earejaimada, sacerdotevare jaboteipōeva, aru Jūmenijicui yāvaiye báquede buaipōeva, aru judíova bucũva máre ne daroimara. <sup>44</sup>Judas, ñai Jesúre jēni jícuyũ, ũi eaquiyē jipocamia, javeta Jesúre boarĩ jarũvaiyurivũ coyurejamedā yópe: “Ji jacoyurĩ jiva nuimu macuyũme muje jēnajimũ. Ũre jējara. Ũre jēni, ména ũre jārĩ capurĩ nuvajara muja”, arejamedā náre Judas. <sup>45</sup>Jesús yebai nuri, cūiná Judas ũre earĩ, arejamedā:

—Aru, buaipōecu, arejamedā Jesúre Judas.

Que arĩ, ũre jiva nuri jacoyurejamedā. <sup>46</sup>Que teni ina pōeva ũre jēnejaimada na. <sup>47</sup>Nópe teiyede jārĩ, cūinácu Jesúi bueimaracacu ũi boaicarovede tatorĩ, duarĩ, ĩni, sacerdotevare jaboteipōecu yebacacure juijórĩ najuārejamedā ũi cámuca.

<sup>48</sup>Ũre jēnaeaiure arejamedā Jesús:

—¿Tatorĩ ñavaipōecure jēivũpe yure boaicaroveaque aru boaiduaque jēni jacorādaivurũ muja? <sup>49</sup>Jāravũa coapa muje jēneboi Jūmenijicui cūrami bueyũ batecācu yu. Apurĩ mujaque cucure, yure jēni jacobeteavũ muja. Ũbenita yópe Jūmenijicui toivaicōjeiye báquedepedeca, caiye iye vaivũ, náre arejamedā Jesús.

<sup>50</sup>Que tedurata ũi bueimara ũre jocarĩ, dupini nurejaimada na.

<sup>51</sup>Cūinácu bojũyo, nore cucu, Jesús yóboi nuñũ, dorejamedā quénora cūinácaje doicaje meacajede, lino āmicuricajede. Jesúre jēivũ bācavũ jēnidurejaimada ñai bojũyore máre, ũi doicajede jēni. <sup>52</sup>Ũbenita dajocayũ dicajede ne puruái, cýarĩ, dupini nurejamedā cuitótecaje cubecũva.

### Jesúre ne nuvaino judíovai jabova cójijivũ yebai

(Mt 26.57-68; Lc 22.54-55, 63-71; Jn 2.19; 18.12-14, 19-24)

<sup>53</sup>Jesúre nuvarejaimada sacerdotevare jaboteipōecu yebai na, ũre jēivũ bācavũ. Nore ina sacerdotevare jaboteipōeva, aru ina judíova bucũva, aru ina Jūmenijicui yāvaiye báquede buaipōeva máre ne baju cójijini borotenanurejaimada ne jabova baju ne cójijini. <sup>54</sup>Aru Pedro joajienata Jesús yóboi nure nuñũ mācu, sacerdotevare jaboteipōecu tãibui ecorejamedā ũ. Nore ecorĩ, Jūmenijicui cūramine coreipōevaque toaboĩ cuocarĩ dobarejamedā ũ.

<sup>55</sup>Na sacerdotevare jaboteipōeva aru caivũ ne cójijinocavũ Jesúre āmecororājivũ vorĩdurejaimada, ũre boarĩ jarũvaiyurivũ. Ũbenita eabedejaimada na. <sup>56</sup>Obedivũ Jesúre borocurĩ āmecororĩdurejaimada. Ũbenita cūináurũ boro coyubedejaimada na. <sup>57</sup>Apevũ ne jēneboi curivũ nacajari, núrĩ, borocurĩ āmecororejaimada Jesúre, yópe arĩ:

<sup>58</sup>—Ũi yópe arĩ coyuiyede jápiacarã ñuã: “Iñami Jūmenijicui cūrami, pōevai ñaiñamine, jarũvacuyũmu yu. Yóbecurijāravũ ji jarũvarĩburu yóboi,

apedāmi đacuyumu yu. Ûbenita ji puruáque đabecubu yu”, áme Jesús, arejaimada na.

<sup>59</sup> Ûbenita yópe ne ámecororđuiyedeca cūináturu abedejaimada na.

<sup>60</sup> Dinumure ñai sacerdotevare jaboteipōecu nacajari ne coricai núri, arejamedā Jesúre:

—¿Coyurĩ majibecurũ mu? ¿Ne nópe ámecoroiyede, aipe ayurũ mu? arejamedā Jesúre.

<sup>61</sup> Ûbenita Jesúcapūravu bi arejamedā. Dinumu bedióva cojedeca arejamedā Jesúre sacerdotevare jaboteipōecu:

—¿Mu Cristo ámecurũ mu? ¿Jūmenijicu meacui mácurũ mu? arejamedā ũ.

<sup>62</sup> Aru Jesús arejamedā ũre:

—Quédeca mi aimutamu yu. Jūmenijicui daroimu mácure ũmupe, yure, járajaramu muja, Jūmenijicu parucui meapūravui dobacure. Aru ji oopeniboai jōdari ěmeiyede máre járajaramu muja, arejamedā náre Jesús.

<sup>63</sup> Que ayure, ñai sacerdotevare jaboteipōecu jorojini, ũi doiyede tatorĩ, jadevarĩ, arejamedā:

—Apevu ne coyuiye jaubevu. <sup>64</sup> Javeta muja jápiadavũ. Jūmenijicu ubebi ñai nópe yávayure. ¿Aipe adarāru muja? arejamedā ũ.

—Boarĩ jaruvaimu macuyúme ũ, arejaimada na caivu, ũre boarĩ jaruvaicōjeivu.

<sup>65</sup> Que arĩ, ũra jēcututurejaimada na. Aru ũi jivare moari, ũre pēvavarejaimada na. Aru arejaimada:

—Coyujacu mu. ¿Ñame matedĩ mure pēvañu? ũre pēvavaivu arejaimada na.

Ina Jūmenijicui cūramine coreipōeva máre ũre totarejaimada na.

**“Jesúre yu coreóvabevu” arĩ, Pedro ũi coyuino**

(Mt 26.69-75; Lc 22.56-62; Jn 18.15-18, 25-29)

<sup>66</sup> Pedro ũi cuedeca tāibui, sacerdotevare jaboteipōecui yebacarōmivacaco cūináco nore earejacoda ō. <sup>67</sup> Û cuocayure jári, ũre me cocorejacoda ō. Aru arejacoda:

—Mu máre ñai Jesús Nazarecacuque cútevu mu, arejacoda ũre.

<sup>68</sup> Ûbenita Pedrocapūravu arejamedā ōre:

—¡Nácacu ámevu! Jesúre yu coreóvabevu. ¿Aipe arĩ, mu que adorũ? arejamedā.

Que arĩ, tāibui etarĩ, jedevai nuitenevei nurejamedā Pedro. Dinumu cáyu órearejamedā. <sup>69</sup> Aru bedióva cojedeca ũre jári, arejacoda ico yebacaco náre, nore curivure coyuyo:

—Ñai nácacube ũ, arejacoda.

<sup>70</sup> Aru Pedrocapūravu arejamedā cojedeca:

—¡Nácacu ámevu! Jesúre yu coreóvabevu, arejamedā.

No yóji boi ina nore curivu Pedrore jári, cocorĩ, arejaimada ũre cojedeca:

—Mu máre nácacubu mu. Galileacacutamu mu, arejaimada na.

<sup>71</sup> Dinumuma jáve ayupe, náre pare baju arĩ coyurejamedā Pedro:

—Jāveneca Jūmenijicui jáinoi yu mujare coyuyutamu! ¡Jāve ji coyubedu, Jūmenijicu ámedajacurĩ yure! Muje aimure ye majibecutamu yu. Jesúre yu coreóvabevu, arejamedā.

<sup>72</sup> Ëi que aiye bajure, bedióva cojedeca órejarejamedá cáyu. Ëi órejaiyede, Pedro áreujamedá Jesús Ëi coyuiye báquede: “Cáyu Ëi puaque órejaquie jipocai, yóbecue baju, ‘Jesúre yu coreóvabevu’, acuyumu mu”, arí coyuiye báquede áreujamedá. Aru árucu, cūiná orejamedá Ë.

### Jesúre ne nuvaino Pilato yebai

(Mt 27.1-2, 11-14; Lc 23.1-5; Jn 18.28-38)

**15** <sup>1</sup>Aviá Ëi tucumuiyede ina sacerdotevare jaboteipóeva, judíova bucúvaque, Jūmenijicui yávaiye báquede bueipóevaque, aru caivu ne cójijinocavu diede boroteni cójijidejaimada na. Boroteni buojari, Jesúre buori, nuvari jabocu Ëi ámiá Pilato yebai jacorānurejaimada na. <sup>2</sup>Ne nuvaiyede úre, Pilato arejamedá Jesúre:

—¿Múru judíovai jabocu? arejamedá.

Jesúcapūravu arejamedá:

—Quédeca, mi aimurecabu yu, arejamedá.

<sup>3</sup>Dinūmuma Jesúre caijīe āmene āmecororejaimada na. <sup>4</sup>Aru Pilatocapūravu arejamedá Jesúre:

—¿Copu náre ju abecurū mu? ¿Jápiabecurū caijīe ne āmecoroiyede mure? arejamedá.

<sup>5</sup>Ubenita ye yávabedejamedá Jesús. Ëi yávabe boje, urarō dāpiarejamedá Pilato.

### Póeva ne boarí jaruvaicójeino Jesúre

(Mt 27.15-31; Lc 23.13-25; Jn 18.38–19.16)

<sup>6</sup>No torojuve teinūmure Pilatocapūravu jacoimu mácure póeva ne etavaicójeimure etavavarejamedá. <sup>7</sup>Roma āmicurō jaboteinore boainūmure, póevare boarí jaruvaivu bācavu jacoimara marejáimada. Nācacu cūinácu Barrabás āmicurejamedá. <sup>8</sup>Obedivu póeva Pilato yebai muri nuri, jēniari jāranurejaimada Pilatore:

—Mi đarí cōmajipe đacajacu caride, arejaimada na.

<sup>9</sup>Ne jēniari jáiyede arejamedá náre Pilato:

—¿Dinūmu muje jabocure jaetovaji yu? arīdurejamedá.

<sup>10</sup>Ina sacerdotevare jaboteipóeva Jesúre ne jorojīyede majini, obedivu póeva ne ue boje úre, nópe náre jēniari járejamedá Pilato. <sup>11</sup>Ubenita ina póevare majicari, aicójenejaimada sacerdotevare jaboteipóeva yópe:

—“Barrabáre jaetovajacu mu”, arí coyujarā muja Pilatore, arejaimada sacerdotevare jaboteipóeva.

Que baru ina póeva náre ju arī, que arejaimada Pilatore. <sup>12</sup>Ne que coyuriburu yóboi, arejamedá náre Pilato:

—¿Dinūmu nai judíovai jabocu, muje aimure, aipe đaji yu? arejamedá.

<sup>13</sup>—¿Úre jocucujaravena pēvari, boarí jaruvaicójejacu mu! codoboborī arejaimada.

<sup>14</sup>—¿Yéde āmeina tearī nai? jēniari járejamedá náre Pilato.

Ubenita pūeno baju codoboborī arejaimada na:

—¿Úre jocucujaravena pēvari, boarí jaruvaicójejacu mu! arí codoboborejaimada na.

<sup>15</sup> Que teiyede Barrabáre jaetovarejameđa Pilato, náre ne urõpe ðaiyucu. Aru Jesúre jara popeicõjenejameđa. No yóboi churaravare Jesúre jocucujaravena pëvaicõjenejameđa ù, Pilato.

<sup>16</sup> Que teni ina churarava Jesúre ìni, nuvari jabocuì cùrami, ùre ecovarejaimađa ðiñami taiñui. Nore ecovarì, cõjijicõjenejaimađa caivu apevu churaravare. <sup>17</sup> Jesúre puenocacaje, jabocuì doicajepe paicaje ñemijuaricajede doarejaimađa na. Doarì buojarì, miumua càteni, cainitarabure ðarì, ùi jipoburà ðitarabure tuorejaimađa na. <sup>18</sup> Que ðarì ùre jacoyurejaimađa na:

—Ména cujacu mu, judíovai jabocu, arejaimađa churarava Jesúre, ùbenita ùre yurivu.

<sup>19</sup> Ùre jipoburà jocuyoque jãdorì, ùra jëcututuri, ùre jabocure jacoyuivupe ñuaturì tedejaimađa na coapa. <sup>20</sup> Ùre yurini buojarì, ùre ne doicaje ñemijuaricaje bácarõre, no jabocuì doicajepe paicajede ìni, duarì, ùi doicaje bácarõre bediõva ùre doarejaimađa cojedeca. Que teni buojarì, ùre nuvari, jocucujaravena ùre pëvari jëoranurejaimađa na, churarava.

#### **Jesúre ne pëvari yuyaino jocucujaravena**

(Mt 27.32-44; Mr 14.58; Lc 23.26-43; Jn 2.19; 19.17-27; Ro 16.13)

<sup>21</sup> Jesús jocucujaravede ture nuñu maridurejameđa. Aru cuyu bácu ìmaroi earejameđa Simón, Cirene àmicurìimarocacu. Alejandro aru Rufo népacu barejameđa ù, Simón. Nore vaiyùre, ùre Jesús ùi jocucujaravede tuino mácarõre tuicõjenejaimađa na, churarava.

<sup>22</sup> Ina churarava nuvarejaimađa Jesúre cùracù Gólgota àmicuricù, Põe jipobucù aiyurõmu. <sup>23</sup> Noi ùcuiye upiáteiye báque curijororu curejavüya, vino ùyaicoro mirra àmicue jocucu cuidóque. Die ùcuiyede jñidurejaimađa Jesúre, ùre ijibequiyepa aivu. Ùbenita ù ùcuri jãri, ubeçu, ùcumenejameđa. <sup>24</sup> Que teni ùre jocucujaravena pëvari jëorejaimađa. Aru ne yajuiyede cainijiduare ðuvarejaimađa. Diduá etaiyede jãri, majidejaimađa ácu nácacu ìcyure Jesús ùi doiye báque coapa. Que teni yajurì, coavarì Jesús ùi doiye báquede, ìnejaimađa ùre pëvaivu bácaçu.

<sup>25</sup> Javejina nueve bajì, pëvari jëorejaimađa ùre. <sup>26</sup> Jocucujaravena, ùi jipobu puenoi, toivaino jënejavüya, apevu ne majinajiyepa aino Jesúre boarì jaruvaiçu ne dápiainore, “¿Aipe teni ùre boarì jaruvarãma na?” ne aino. Yópe aiyurejavüya no toivaino: “Judíovai jabocube”. <sup>27</sup> Ùque máre pëvari jëorejaimađa pucarã tatorì ñavaipõevare, ape pucarõa jocucujaravearã. Cùináçu Jesús ùi meapùravui aru apecu ùi càcopùravui curejaimađa. <sup>28</sup> Que teni ðarejaimađa ina yópe Jñunenijicu ùi toivaicõjeiye báquedeca ùi yáva iyede: “Põe va ùre ðarãjarama yópe ne ðaiyepa àmeina teivure”, toivaicõjenejaquemavu.

<sup>29-30</sup> Ina vainánuraivu jãri, ne jipobuare cújiovarì, àmeina yávarejaimađa ùre, yópe arì:

—Mu, Jñunenijicui cùramine jaruvaiyuvacacu aru yóbecurijãravua yóboi ðiñamine meadaiyuvacacu, caride jocucujaravede ðajocarì, èmeni, mi bajure meadajacu mu, arejaimađa Jesúre ina vainánuraivu.

<sup>31</sup> Nopedeca ina sacerdotevare jaboteipõeva aru Jñunenijicui yáva iye báquede bueipõeva que máre, ne baju yurivu Jesúre, yópe arejaimađa:

—Apevure meadavacacuvacari, ùbenita ùi bajure meadari majibebi ù.

<sup>32</sup> Cristo, Israecavu ne jabocu, jocucujaravede ðajocarì, èmeni, ðajacurì ù. Que ðaru, maja ju arãjaramu ùre, arejaimađa na.

Aru ina pucarā pēvaimara mácavu máre úque, nopedeca ámeina yávarejaimada úre.

### Jesús úi yaino

(Mt 27.45-56; Lc 8.2-3; 23.44-49; Jn 19.28-30; He 10.20)

<sup>33</sup> Jāravu corica baji ñemié turī darejavūya caino joborōi. Pū yóbecuriora yóboita vaidéjavūya. <sup>34</sup> Aru yóbecuriora bajita, iye ñemié tuiyede dajocaiyede, pare bujié codoboborī, yávarī darorejaimada Jesús:

—Eloi, Eloi, ¿lama sabactani?

Nópe aino: “Mu, ji mearore jímū, mū, Jūmenijicū, ¿aipe teni yure dajocarī nuñū mū?” aiyurō marejávūya.

<sup>35</sup> Que ayure, apevu nore nūrivucavu úre jápiarī, ubenita jápiarī eabeni, arejaimada:

—Jápijarā. Elíare órejaibi ũ, arejaimada na.

<sup>36</sup> Dinumure cūinácū nácacū cúyarī, jaubore ĩni, uyovarejaimada vino úyaicoro upiáricoroque aru dijaúbore abodorā buorī, jēori, jarururejaimada Jesús ũi ũcuquiyupe ayū. Aru arejaimada:

—Corejarā. Járarevu Elías jōdavacudayure úre, arejaimada ũ.

<sup>37-38</sup> Cojedeca Jesús pare bujié codoboborī, “Quénoramu” arī, yaidéjaimada ũ. Ũi yaiyeda, Jūmenijicūi cūamicacaje uracaje coricōpavaicaje bácarō quéda corica baji jađeni nūrejavūya, puenocatūruvai búrī pū cāchinocatūruvaita. <sup>39</sup> Nore Jesús bácuře cocorī núcū barejámeđa churaravai jabocū. Jesús yaiyure jári, arejaimada ñai:

—Jāveneca Jūmenijicūi mácū baju batecúbe ñai, arejaimada churaravai jabocū.

<sup>40</sup> Nomiva máre cocorī nūrivū joajiemia curejaimada. Ne jēneboi curejaimada cūinácō nomió, Magdala āmicurīimarocaco, ōi āmiá María, aru apeco ōi āmiá Salomé, aru apeco ōi āmiá María máre, ico Santiago aru José népaco. Ñai Santiago bojuyo barejámeđa. Apecū Santiago bucūcū ũi cāchinocacū barejámeđa ũ, Maríai mácū. <sup>41</sup> Na Jesús ũi cuede Galilea āmicurōi cadateivu barejaimada úre. Aru apevu nomiva, ina eaivu bácvu úque Jerusalén āmicurīimarōi, curejaimada nore.

### Jesús bácu jaruvaimū ne pōe jaruvainoi

(Mt 27.57-61; Lc 23.50-56; Jn 19.38-42)

<sup>42</sup> Dijāravū, nainū, torojuve teijāravū baquinóre meadaijāravū barejávūya. Sábado baquinó jipocacajāravū barejávūya. <sup>43</sup> Pilato yebai nurejaimada José, Arimatea āmicurīimarocacu. Sacerdotevai cójijinore coyupōevacacū barejámeđa ũ. Ne pueđaimū marejámeđa José. Ũ máre Jūmenijicūi jabotequinūmū maquinóre napini coreyū barejámeđa. Jidurō cubeno, parurīūme curī, Pilato yebai nuri, Jesús bácuī baju bácarōre jēniacūnurejaimada ũ. José ũi jēniayede, Pilato cuturejaimada churaravai jabocūre. Aru jēniari járejaimada úre:

<sup>44</sup> —¿Jave yaidíca ũ? ¿Aipiye bajure yaidí? arejaimada.

<sup>45</sup> Aru churaravai jabocū ju arejaimada:

—Jave yaibí ũ mácū, arejaimada.

Aru aiyeta, Jesús bácuī baju bácarōre ícōjenejaimada Pilato, Joséde ícōjeñū.

<sup>46</sup> Meacaje boricaje, lino āmicuricajede bojedarī, Jesús bácuře jocūcujaravede

jōdavari, ini, dicajeque, ũ mácure cūmari buorejaimada Josējā. Ũ mácure nuvari cūracobei, Jesús bácure jaruvarejaimada na. Nore ne jaruvariburu yóboi, apeturava cūratravare ini, jāturuvari, dicobede bidejaimada. <sup>47</sup>Aru Jesús bácure jaruvainore járejaimada na, Maríá Magdalacaco aru Maríá, Joséi paco máre.

**Jesús ũi nacajaino yainore jaruvarí**

(Mt 26.32; 28.1-10; Mr 14.28; Lc 24.1-12; Jn 20.1-10)

**16** <sup>1</sup>No judíovai jabuóvairavá sábado, nainú vaiyede, Maríá Magdalacaco, aru Salomé, aru Santiagai paco mumijuribure ini bojedarejaimada na. Jesús bácure ne jaruvainoi nuri, die mumijueque ũ mácui baju bácarōre yuarānuiva barejáimada na. <sup>2</sup>No sumana buijāravu domingo javejīnara, aviá ũi tucumiyede, Jesús bácure ne jaruvainoi nurejaimada ina nomiva.

<sup>3</sup>Ne bajumia borotede nurejaimada, yópe arí:

—¿Ñame majare cūracobe bieituravare jāturuvari, cadatenajidica na? arejaimada dinomiva.

<sup>4</sup>Ne eaiyede nore, dicobe biebecobede járejaimada na. Diturava bieiturava bácarō uraturava baju barejávūya. Ũbenita joajīeneca dituravare jári earejaimada na. <sup>5</sup>Dicobede ecoivu nore meapūravui dobacure, bojuvare járejaimada ina nomiva. Boricajede, ũmujuricajede doyu barejámeđa ũ. Aru dinomiva cuicumarejaimada na.

<sup>6</sup>Náre arejameđa:

—Jidubejarā muja. Jesús Nazarecacure, ne jocucujaravena pēvaimu mácure, voríduivubu muja. Yore cūbebi ũ. Javeta nacajami. Járijide apa. Ũi bajure ne jaruvaino mácārōre jájara muja. <sup>7</sup>Pedrore aru Jesúi bueimara mácavu apevure yópe coyurānujara muja: “Muje jipocai Galileai nucuyume Jesús. Nore mujare ũi ávarepe ũre járajaramu muja”, ajarā, arejameđa náre.

<sup>8</sup>Aru dicobede etarí, cúyarí nurejaimada ina nomiva. Jidurí bididejaimada na. Nuri, ne copuimarare ye abedejaimada dinomiva, cuicumaiyu.

**Jesús ũi cueteino Maríá Magdalacacore**

(Jn 20.11-18)

<sup>9</sup>Jesús nacajañu mácui yainore jaruvarí, sumana buijāravu domingo javejīnara, cuetedejameđa mamarumure Maríá Magdalacacore, ico ũi jaruvaimo máco siete paivu abujuvare. <sup>10</sup>Ō nuri, majide ðarejacoda ina ũque curivu bácvure, chīori oivure. <sup>11</sup>Aru na jápiaivu nacajañure yainore jaruvarí, aru ōi jáino mácārōre máre jápiarí, “Jāve majuvú”, abedejaimada na.

**Jesús ũi cueteino pucarā ũi bueimarare**

(Lc 24.13-35)

<sup>12</sup>No yóboi cuetedejameđa apocupeda ina pucarā ũi bueimaracavure ne nuyede mái imarore jocarí. <sup>13</sup>Na nuri coyuridurejaimada nácavure. Ũbenita ju abedejaimada náre máre.

**Jesús ũi coyucōjeino ũi yávaiye méne**

(Mt 28.16-20; Lc 24.36-49; Jn 20.19-23; Hch 1.8)

<sup>14</sup>Yóbo baju Jesús cuetedejameđa caivu once paivu ũi bueimarare ne dobaede tuoiva yebai. Ju abevu barejáimada ina jáivu bácvu Jesúre,

nacajañu mácuŕe yainore jaruvarĩ, ne coyuiyede úra. Que baru jararejamedá ne ju abenore aru ne jápiarĩ coreóvabede máre. <sup>15</sup> Arejamedá náre:

—Buenanujara caivu ijāravucavure iye yávaiye méne. <sup>16</sup> Nácavu ne ju arĩ jádovaru Jūmenijicure ocoque meadacuyumu yu. Ubenita nácavu ju abevu baru bíjarājarama na. <sup>17</sup> Ina yure ju aivu pōeva ne đarĩ majibede đarājarama. Ji āmiái, ji paruéque, jaetovarājarama abujuvare. Yávarājarama apecamua yávaicamuare ne majibecamuare. <sup>18</sup> Đururājarama āđavare. Ne ũcuiyede ijede ye āmedabequiyebu náre. Ijimarare tuorājarama, aru meatenajarama na, arejamedá Jesús.

**Jesús ũi muino cavarō mearo Jūmenijicui curōi**

*(Lc 24.50-53; Hch 1.9-11)*

<sup>19</sup> Jesús y ávayu bācu náre, muri nurejaquemavu ijāravure jocarĩ. Nurejaquemavu cavar ō mearo Jūmenijicui curōi. Dobarejaquemavu Jūmenijicui meapūravui. <sup>20</sup> Aru ũi bueimara mácavu coyurānurejaimada iye yávaiye méne pōevare cainoai. Que baru cainumua Jesús cadatedejamedá ũi pōevare, ne coyurājiyepe ayu Jūmenijicui yávaiyede pōeva ne đarĩ majibede đaiyeque. Quénoramu.

# San Lucas

Mamabuĩnore coyũiyebu Lucas bácu ũi toivaiye báquede Jesucristorã. Lucas bácu jũoipõescu barejaquémavu. Apevu bueipõeva ne dápiaru, ũ mácu judío ãmenejaquemavu (Col 4:11-14). Cucunurejaquemavu Pablo bácuque (Hch 16:10). Áro ũi cuede ũi toivaiyede iye coyũiyede Jesucristorã caivu majibevu. Apevu ne dápiaru Roma ãmicuriĩmaroi, apevu ne dápiaru Cesarea ãmicuriĩmaroi, aru apevu ne dápiaru Acaya ãmicuriĩjororõi curejaquemavu. Majidivu ne dápiayepu Lucas bácu toivarejaquemavu Marcos bácu ũi toivarĩburu yóboi ũi coyũiyede Jesucristorã, ãniũjua báquede 60-65 d.C. baji. Que baru Lucas bácu Jesúque cubecu bácuvacari, majidejaquemavu Jesúi borore, ũi jári boroteiye báque boje Marcos bácu ũi toivaiye báquede.

Lucas bácu jádovarejaquemavu Jesúre, Jũmenijicu bajureca, yópe põescu. Coyurejaquemavu Jesús ũi jipocavau bácvure pu Adán mácuta, aru Juan Bautista bácu ũi põeteiyede, aru Jesús ũi põeteiyede, aru Jesús juedocure. Coyurejaquemavu jẽniayede Jũmenijicuque (3:2; 5:16; 6:12; 9:18, 29; 11:5-13; 18:1-8; 22:32; 23:40), nomivare (Juan Bautista bácu paco bácore aru Jesúi paco bácore: 2:36; 7:11, 37; 8:2; 10:38-42; 13:11; 15:8; 18:1; 21:1; 23:27), aru apevu cõmaje ãrojarivure, inape juedovare, cuve cuvabevure, aru jabovare tãutura ãcaipõevare. Lucas bácu toivarejaquemavu Jesús ũi ãaiyede, mamabuĩnoque búri pu buojainoque jebeni, cũináro, cũináro coapa. Toivarejaquemavu ñai ũmu Teófilo bácvure aru apevu judíova ãmevure, ne majinajiyepu ayu “jãveneca iye coyũie” ne jápiayede Jesúrã (1:4). Que baru toivarejaquemavu, ne majinajiyepu ayu Jesús caivu põevare meadaipõescu, judíovare aru judíova ãmevure máre.

## Mamabuĩno

(Hch 1.1)

**1** <sup>1</sup>Mũ, Teófilo, obedivu põeva toivarĩ búquemavu caiye iye Jesúi ãaiye báquede maje jẽneboi coyũĩnore. <sup>2</sup>Yópe ina mamarũmure jáivu bácvu caiye Jesúi ãaiye báquede aru Jũmenijicu yãvayede ũi toivaicõjeiye báquede coyũivu bácvu majare toivaquemavu. Návacari ũque curejaquemavu ũi mamabuĩjãravui pu ũi jebeĩjãravuita. <sup>3</sup>Aru yu máre jãve jári coreóvacacu joe báque caiye iye ãaiye báquede. Que baru dápiavu yu yópe, “Ji toivaru coyũĩnore iye teiye báquepe Teófilore, meajebu áre”, arĩ dápiavu yu. <sup>4</sup>Que baru toivaivu mũre, mi majiquiyepe ayu jãveneca iye coyũie mi jápiayede báquede.

## Juan Bautista ũi põetequinore cũinácu ángele ũi coyũino

<sup>5</sup>Ãnijãravua báquei Herodes bácu Judea ãmicuriĩjororõcvu ne jabocu baede, curejameđa cũinácu sacerdote, ũi ãmiá Zacarías. Abías ãmicuriyabocacu barejámeđa ũ. Jímarepaco máre Aarón ãmicucu bácu

sacerdote bácuí pārameco barejácođa, ōi āmiá Isabel. <sup>6</sup>Ina pucarā meara marejáimađa Jūmenijicui jáinore. Aru đarejaimađa iye Jūmenijicui đaicōjeiyede ūi coyuiye báquede Moisés bácuře. <sup>7</sup>Ūbenita Isabel juedoeabedejacoda. Aru ina pucarā bucujīna marejáimađa. Que baru juedocuvabedejaimađa na.

<sup>8</sup>Cūinájāravu Zacaríai yajubo, sacerdotevacavui yajubo, ne memejāravu Jūmenijicui cūrami jívui barejávūya. <sup>9</sup>Aru Zacaríare ne beoiye boje, ūi juacunuino marejávūya. Que baru sacerdoteva ne đarī cōmajiyepedeca đaiye jaurejavūya ūře. Mumijuede juacucorejameđa ū Jūmenijicui cūrami. <sup>10</sup>Que teni obedivū pōeva jēniarejaimađa Jūmenijicure ūi cūrami jedevacobei diora, mumijuede juaiorai. <sup>11</sup>Zacarías mumijuede juayu bácu, ūře cūetedejameđa cūinācu ángele, Jūmenijicui daroimu, nūcu meapūravui ne juaino yebai. <sup>12</sup>Aru ūře jārī, cucumarejameđa Zacarías. Jiducu barejameđa ū. <sup>13</sup>Ūbenita űai ángele arejameđa ūře:

—Mu, Zacarías, jidubejacu mu. Jūmenijicu jápiaibi mi jēniaye báquede. Aru caride Jūmenijicu cadatecuyme mure. Mimarepaco juedocuvacodome. Aru Juan āmidojacu mu ū macuyúre. <sup>14</sup>Torojucuyumu mu mímacu bacuyúre boje. Aru obedivū pōeva torojurājarama ūi pōteiyede. <sup>15</sup>Mímacu bacuyú parucu bacuyúme Jūmenijicui jáinore. Jūmenijicui Espírиту Santo ūque cūcuyme jípacoí yapibu jívumiareca. Que baru vino áyaicoro boqueicorore ūcūmecuyume ū. Aru apecoro boqueicorore máre ūcūmecuyume ū. <sup>16</sup>űai mímacu bacuyú obedivū pōeva Israel bácuí pāramena mārājivure, ūi coyūquiyede náre Jūmenijicui yávaiye méne, chīore đarī ju arājarama ne jabocu Jūmenijicure. <sup>17</sup>Jūmenijicu nópe đare đacuyume mímacu bacuyúre. Aru jipocatede đacuyume mímacu bacuyúre maje jabocure ūi Espírítuque, ūi paruēque. Nopedeca Jūmenijicu parure đarejaquemavu ūi yávaiyede coyūaipōecu bácuře máre, ūi āmiá Elías, ūi Espírítuque, ina bucūva ne ju arī jipocatenajiyepa ayu nēmarare ne cārījimene đarājiyepa ayu náque, aru ina ju abevu ne dāpiarājiyepa ayu ju aivu ne majiépedeca. Caiye iye đacuyume mímacu bacuyú pōevare meadarī, ne jacopurājiyepa ayu maje jabocure, Jūmenijicui daroquimure, arejameđa űai ángele Zacaríare.

<sup>18</sup>űai ángele ūi arīburu yóboi, Zacarías jēniari jārejameđa ūře:

—¿Aipe đarī coreóvaji yu jimarepaco juedocuvacodore? Bucucubu yu. Aru jimarepaco máre bucucobe ō, arejameđa Zacarías.

<sup>19</sup>Aru űai ángele arejameđa ūře:

—Yūbu Gabriel. Yu nūcubu cainūmua Jūmenijicu yebai, memecayu ūře. Jūmenijicui daroimūmu yu. Mure coyucudayubu yu iye yávaiye méne. <sup>20</sup>Ūbenita caride yávarī majibecubu mu. Aru yávabecuyumu mu mímacu bacuyú ūi pōteiyeta, mi ju abe boje ji coyuiyede. Caiye vaiquíyebu yópe ji coyuiyepa mure cari, arejameđa űai ángele.

<sup>21</sup>Aru ina nópe coyūivu, caivu ina obedivū pōeva Zacaríai etaiyede coredejaimađa na. Ūrarō coreni ūře, pare dāpiarejaimađa, “¿Aipe teni Zacarías etabedi Jūmenijicui cūramine jocarī?” aivu. <sup>22</sup>Buojarī, etarejameđa Zacarías Jūmenijicui cūramine jocarī. Etayu bácu, yávarī majibedejameđa náre. Que baru ina pōeva coreóvarejaimađa Zacarías jáñu mácure yópe decoboainope apūcure diñami Jūmenijicui cūrami jívui. Zacaríacapuravu yaredejameđa ūi puruque náre. Ūbenita yávarī majibecu mautedejameđa ū.

<sup>23</sup>No yóboi, apejáravũ ùi yajubo, sacerdotevacavũ yajubo, ne Jũmenijicũ cũrami memejãravũ yóboi, Zacarías copainurejameđa ùi cũrami. <sup>24</sup>Aru dijãravũ yóboi jĩmarepaco jũedoearejacođa ô. Que teni cũinãpũrũpe paiaviavare mautedejacođa ô cũrami jĩvũ. Aru arejacođa:

<sup>25</sup>—Yopedeca đacaquemavũ Jũmenijicũ yũre. Cõmaje ãroje jãri yũre, ãame ji cuyeno mãcarõre. Aru đacaibi yũre põeva ne cõenĩmenajiyepẽ ayũ, arejacođa ô, Isabel.

### **Jesús ùi põetequinore cũinãcũ ángele ùi coyũino**

(Mt 1.18, 21)

<sup>26</sup>Isabel ôi seis paiaviava micaco baedata, dinũmũita bediõva cojedeca ñai ángele Gabriele darorejameđa Jũmenijicũ, Galilea ãmicurõi, Nazaret ãmicurĩĩmaroi. <sup>27</sup>Diĩmaroi cũinãco nomiõ curejacođa, María ãmicũco. Ô marejãcođa David bãcui pãramecũ Josẽi mãrepaco bacodó. Ô ye cubedejacođa ùmũque cãreja. Ôi yebai darorejameđa Jũmenijicũ ñai ángelede. <sup>28</sup>Ôi yebai earĩ, yópe arejameđa Marĩare ñai ángele:

—¿Me cũcorũ mu? Mu Jũmenijicũ beoimomu. Mũque cubi Jũmenijicũ, arejameđa Marĩare.

<sup>29</sup>Ûbenita ñai ángele ùi nõpe aiyede cuecumari, “¿Aipe ayũ bãrica ù yũre?” arĩ dãpiarejacođa. <sup>30</sup>Aru ñai ángele arejameđa ôre:

—Ji coyũiyede jidũbejaco mu, Marĩa. Jũmenijicũ mũre jecubi. <sup>31</sup>Micateni, jũedocũvacodomu mu. Mi jũedocũvacojimu Jesús ãmicũcuyũme ù macuyũ. <sup>32</sup>Jabocũ parũcũ bacuyũme mĩmacũ bacuyũ. Aru põeva arãjarama ùi borore, “Jũmenijicũ parũcui mãcũbe ù”. Ûi ñecu mãcũ, David bãcũpe, jabotede đacuyũme Jũmenijicũ mĩmacũ bacuyũre. <sup>33</sup>Israel bãcui pãramena ne jabocũ bacuyũme. Mĩmacũ bacuyũ ùi jaboteiye ye cũimẽquiyebu, arejameđa Marĩare.

<sup>34</sup>Marĩacapũravũ arejacođa ùre:

—¿Aipe ayũrũ mu, nõpe ayũ? Yu ye ùmũque cubecotamu yũ, arejacođa ô.

<sup>35</sup>Ñai ángelecapũravũ arejameđa ôre:

—Mũre dacuyũme Jũmenijicũ Espĩritu Santo. Aru Jũmenijicũ caivu pũeno parũcũ ùi parũé cũquiyebu mũque. Que baru mi jũedocũvacojimu meacũ baju bacuyũme ù. Jũmenijicũ mãcũ bacuyũme ù. <sup>36</sup>Aru miparĩmo Isabel, bũcũcovacari, micacobe ô mãre. Caride “jũedoeabeco”, ne aimo mãco javeta seis paiaviava micacotameđa. <sup>37</sup>Jũmenijicũ caiyede đaiye majibi. Que baru ye cubevũ ùi đabeno, arejameđa Marĩare ñai ángele.

<sup>38</sup>Aru arejacođa Marĩacapũravũ:

—Jũmenijicũ yebacacotamu yũ. Mi aiyepẽ bajarõri yũre, arejacođa ô. Coyũrĩ buojarĩ, nurejameđa ñai ángele ôre jocarĩ.

### **María ôi jãconũino Isabede**

<sup>39</sup>Dijãravũai Marĩa nurejacođa maumejie cũinãĩmaroi, cũracũai, Judea ãmicurĩjiborõi. <sup>40</sup>ĩmaroi earĩ, Zacarĩai cũrami ecorejacođa ô. Aru ecorĩ jacoyũrejacođa Isabede. <sup>41</sup>Ôi jãpiaiyede Marĩai jacoyũiyede, ôi mãcũ cũjidejameđa ôi yapibũ. Aru Espĩritu Santo dãpiaicõjenejameđa Isabede. <sup>42</sup>Que baru Isabel, yópe arĩ, codoboborejacođa Marĩare:

—¿Jũmenijicũ mũre me jãri, mearo đacaquemavũ mũre caivu nomiva pũeno! ¿Jũmenijicũ me jãri, mearo đacacuyũme mĩmacũ bacuyũre mãre

püeno baju! <sup>43</sup> Cüecumari dápiaivu yu ji jabocui paco ji yebai ôi cucodaiyede. <sup>44</sup> Ji jápiaiyede mi jacoyuiyede, jímacu torojucu cújibi ji yapibui. <sup>45</sup> Mu ju arebu ángele üi coyuiye báquede müre. Mu dápiarebu Jümenijicu ñacuyure müre üi aye báquepedeca. Que baru Jümenijicu me teyübe müre. Torojuvu mu, arejacoda ô.

<sup>46</sup> Aru María arejacoda:

Ji ümei coreóvaivu ji jabocui paruéde. <sup>47</sup> Aru ji decocui torojuvu Jümenijicure, yure meadaipöecure, boje. <sup>48</sup> Jümenijicu cômaje äroje jáquemavu yure, üi yebacacore. Que baru caivu ijāravucavu “Jümenijicui torojure ñaimome ô”, arājarama yure. <sup>49</sup> Ñai parucu baju ñayübe yure mearo uraröre. Aru meacu bajube. Caivu apevu püeno meacube ü. <sup>50</sup> Cômaje äroje jáñume caivu ina püedaivure üre, javede aru caride máre. <sup>51</sup> Üi ñaiyeque jádovañume üi paruéde. Ina pöeva ne baju me dápiaivure, apevu püeno meara dápiaivure, coavayübe. <sup>52</sup> Ina jabova parurivure ne paruéde iñume náre jocarí. Aru ina cômaje ärojarivure mearo ñacayübe ü. <sup>53</sup> Ina äuyavure yapide ñayübe me äiyeque. Aru ina cüve cüvarivure jaroyübe cüve cüvabevüva. <sup>54</sup> Cadateyube üi pöevare, maja Israecavure, üi cômaje äroje jári ärué boje. <sup>55</sup> Cüináturu yávarejaquemavu majeñecüva mácvure, Abraham mácvure aru üi páramenare máre, cainumua, arejacoda María.

<sup>56</sup> Cürejacoda Isabeque yóbecurā aviáva. Aru no yóboi copainurejacoda ôi cūrami.

### Juan Bautista üi pöeteino

<sup>57</sup> Dinumuai Isabel jueducüvarejacoda ümu jue DOJicure. <sup>58</sup> Aru ôi cadajēcavu, ô jivu máre, ne jápiaiyede ôi borore Jümenijicu cômaje äroje jáñure öre, torojurejaimada öque. <sup>59</sup> Ocho paijāravua pöeteniburu yóboi, sacerdoteva ôi mácu cajede buraicöjeni judíova ne ñarí cômajiyepé, ñarēarejaimada na. Aru amidorājivu barídurejaimada üre Zacarías, jípacupe. <sup>60</sup> Übenita jípaco arejacoda:

—Bi, Zacarías ämemi. Ü ämicucuyume Juan, arejacoda ô.

<sup>61</sup> Que teni ina pöeva arejaimada öre:

—Cübebi apecu mívu jēnebore Juan ämicucu, arejaimada na.

<sup>62</sup> Aru ina pöeva yaredejaimada ne puruque jípacure, jēniari jáivu üre, “¿Yécu amidocuyurü üre?” <sup>63</sup> Que teni Zacarías jabióvarí jēniarejameña toivaivede. Aru toivarejameña yöpe: “Juan ämicubi ü”. Que baru caivu pare dápiarejaimada caiye iyede. <sup>64</sup> Aru cüinā yávarí bári, torojurí, mearore jidejameña Jümenijicure Zacarías. <sup>65</sup> Que baru caivu ina pöeva, üi cadajēcavu, cüecumarejaimada na. Caiye iye borore borotedejaimada caivu caino dijaborói, Judea ämicurijaboröcacüa cūracüai. <sup>66</sup> Aru caivu ina jápiaivu, me dápiarí arejaimada:

—¿Yécu baquidíca ñai jue docu? arejaimada na.

Aru Jümenijicu cadatedejaquemavu üre.

### Zacarías üi yávaino Jümenijicure

<sup>67</sup> Dinumure Espíritu Santo dápiaicöjenezameña Zacaríare. Que baru Jümenijicui yávaiyede coyurejameña:

<sup>68</sup> Torojuvũ yũ Jũmenijicuque. Que baru mearore jĩvũ yũ maje jabocure, Israecavũ maje mearore jĩmure. Cõmaje ãroje jãrĩ ãi põevare, meadaibi majare abujuvai jabocui parũede jarũvarĩ. <sup>69</sup> Jũmenijicu daroyube majare cũinãcu meadaipõecure, ãi põecu David bãcui pãamecure. <sup>70</sup> Javede Jũmenijicui yãvaiyede coyũcaipõeva mãcavũ, yõpe arĩ, coyurejaimada: “Jũmenijicu darocũyũme meadaipõecure, ãi põevare meadaquiyepẽ ayũ”. <sup>71</sup> Majare meadaipõecu meadacũyũme majare maucũvarivũ ne parũede jarũvarĩ. <sup>72</sup> Que ãacũyũme ãi cõmaje ãroje jãiyẽ bãque boje maje jipocacavũ bãcavũre aru ãi ãrũmetebe boje “Yõpe ãarãjarevũ”, ãi aino mãcarõpedeca na mãcavũre. <sup>73</sup> Jãve ãacacũyũme majare yõpe ãi aiyẽ bãquepedeca majeñecu mãcu Abraham mãcure. <sup>74-75</sup> Meadacũyũme majare maucũvarivũre jarũvarĩ, maje memecarãjiyepẽ ayũ Jũmenijicui jaboteinore jidubevũva maja, mearore dãpiari aru mearore ãari Jũmenijicui jãiyede cainũmũa, caride pũ maje yainũmũita, arejamedã Jũmenijicure.

<sup>76</sup> Aru mamacũre mãre arejamedã Zacarĩas:

Mũ, jĩmacũ, coreõvarãjarama mure Jũmenijicui yãvaiyede coyũcaipõecure caivũ pũeno parũcure. Que baru mũ nũcũyũtu maje jabocu jipocai. Coyũcũyũtu Jũmenijicui yãvaiyẽ mẽne põeva chĩori ne ãmeina teiyede, ne oatũvarãjiyepẽ ayũ ne ãaiyede ãi daquiyẽ jipocai. <sup>77</sup> Coreõvare ãacũyũtu mũ ãi põevare, ne majinajiyepẽ ayũ meadaquiyede nãre. Òrecabe ãrũmetecũyũ ne ãmeina teiyede. <sup>78</sup> Nõpe ãacũyũtu mũ Jũmenijicui cõmaje ãroje jãiyẽ boje põevare ãnijãravũ, majare meadaipõecu bacuyũ ãi daquijãravũ baquinõĩ. Yõpe mamajãravũ miadãepe baquiyẽbu majare. <sup>79</sup> ãnijãravũ baquinõre yãvaiyede jãvene majide ãacũyũme põevare majare meadaipõecu bacuyũ, yõpe pẽoiyẽ jãre ãaiyepẽ ina ñeminoi dobarivũre, ina yainore jidũrivũre. Yõpe mãre pẽori maje cuiyepẽ, nopedeca cure ãacũyũme majare cãrijimenoque. Jũmenijicu majide ãacũyũme caivũ ina coreõvabevũre ãi yãvaiyede jãvene. Aru caivũ majare cure ãacũyũme cãrijimevũva, arejamedã Zacarĩas.

<sup>80</sup> Bũcurejamedã Zacarĩai mãcu. Parũriũme curejamedã. Aru macarõĩ, põecũbenoi, curejamedã, ãi coyurĩ buijãravũ baquinõ eaiyeta Israel bãcui pãamenare.

### Jesús ãi põeteino

(Mt 1.18-25)

**2** <sup>1</sup> Dinũmure ãi jabodaimarare corevaicõjenezamedã Cãsar Augusto. <sup>2</sup> No mamarũtu ne ãmiãre toivaicõjeinũmure Siria ãmicurijoborõcavũre cõjeipõecu barejãmedã Cirenio. <sup>3</sup> Que baru caivũ corevaimara mãrajivũ ne bucũva bãcavũ ne cue bãquei copaidejaimada. <sup>4</sup> Aru Josẽ mãre Galileacarõ ãmaro, Nazaret ãmicurĩĩmaroĩ cucũ bãcu, Judea ãmicurõĩ nũrejamedã ã. Noi nũri, Belãn ãmicurĩĩmaro, ãi ñecu mãcui curõ mãcarõĩ earejamedã Josẽ, David bãcui pãamecu. Que baru nũrejamedã Josẽ noi. <sup>5</sup> Nũri, jĩmarepaco bacoðore nũvarejamedã Josẽ. Ne ãmiãre toivarĩ ãcõjenanũrejaimada na. Aru dinũmure micacota barejãcoda õ. <sup>6</sup> Noi earĩ, curĩ, jũedocũvarejacoda

María, ũmu juedojĩcu, mama juedocure. <sup>7</sup>Cuipõeva ne cãĩnami buidĩĩnami marejavũya. Que baru ne cãjurořõ eabeni, oteiĩmara ne curĩĩnami curĩ, juedocuvarejacoda María. Juedocuvariĩ, mamacure pavaicajaeque cũmari, oteiĩmara ne ãitõcui tuorejacoda ĩre María, ũi cãquiyepa ado.

### **Ángeleva Jesúi põeteinore ne coyũino ovejavare coreipõevare**

<sup>8</sup>Nore ovejavare coreipõeva curejaimada dáre ñami, ne oteiĩmarare coreivũ. <sup>9</sup>Cũiná, Jũmenijicui daroimu, ángele, nore ĩmenejameda ũ nára. Cojié nurejavũya. Jũmenijicui cojino pare cojidejavũya. Nára pẽorejavũya. Āmei jidurejaimada ina oteiĩmarare coreipõeva. <sup>10</sup>Ūbenita ñai ángele arejameda náre:

—Jidubejarã muja. Mujare yávaie méne davayutamu yu. Mujare aru caivure muje torojurãjiyede davayubu yu. <sup>11</sup>Cari ñami David bácu curĩĩmaro mácarõĩ põeteibi muje ĩmeina téjuroede meadacuyũ, Jũmenijicui epeimu, Cristo, muje jabocu bacuyũ. Jãvetamu. <sup>12</sup>Mujare ji coyũimure noi earãjaramu muja, cũmaimure. Oteiĩmara ne ãitõcui paraibi, arejameda ñai ángele.

<sup>13</sup>Coyurĩ buojariĩ, obedivũ Jũmenijicui daroimara, ángeleva, járorejaimada ñai ángeleque. Jũmenijicure torojurĩ mearore jídejaimada ina ángeleva.

<sup>14</sup>Mearore jínajarevũ Jũmenijicure, cavarõ mearocacure, caivũ pueno parucure. Aru ijãravucavure, ijborõcavure, Jũmenijicure ju aivure, meaquiyebu, arejaimada na.

<sup>15</sup>Que arĩ buojariĩ, cavarõ mearo Jũmenijicui curõĩ copaidejaimada ina ángeleva. Ne nurĩburu yóboita, ina oteiĩmarare coreipõeva arejaimada ne bajumia:

—Jãrica, Beléi nuri, Jũmenijicui cari coyũiyede jãranurajarevũ, arejaimada na.

<sup>16</sup>Que arĩ, cũiná nurejaimada. Nuri pu Joséde aru Marĩare earejaimada na. Aru Marĩai mácure máre, parayure, oteiĩmara ne ãitõcui earejaimada na. <sup>17</sup>Que teni juedojĩcure jãri, Jũmenijicui coyũie báquede náre coyurejaimada ina oteiĩmarare coreipõeva. <sup>18</sup>Ne coyũiyede jápiaivũ bácvũ cuecumari dápiarejaimada na. <sup>19</sup>Aru Marĩacapuravũ die caiyede jápiarĩ, me dápiarejacoda õi ũmei. <sup>20</sup>Que teni ne curõre copainurejaimada ina oteiĩmarare coreipõeva. Nópe ne jápiaie báquepe, ñai ángele ũi coyũie báquepedeca, járejaimada na. Que baru torojurĩ arejaimada ina oteiĩmarare coreipõeva:

—¡Mu, Jũmenijicu, meacu bajutamu mu! are nurejaimada na.

### **Ne nuvaino Jesúre Jũmenijicui cũrami**

(Lc 1.31)

<sup>21</sup>Ocho paijãravũ ũi põeteniburu yóboi, sacerdotevare Marĩai mácuĩ cajede buraicõjenejaimada, judíoia ne ñarĩ cõmajiyepa. Aru ĩmidorejaimada ĩre Jesús, yópe ñai ángele ũi coyũie báquepe Jesúi põetequiyepa jipocai. <sup>22</sup>No yóboi náre ñaie jauéde nópe Jũmenijicui ñaicõjeiyede ũi coyũie báquepe Moisés bácu, ne meara marajiyepa ayũ Jũmenijicui jãĩnora, Jesúi bucva, ĩre nuvari, muri nurejaimada Jerusalén ĩmicurĩĩmaroi, jínajivũ ĩre Jũmenijicure. <sup>23</sup>Nópe ñarĩ, ñarejaimada yópe Jũmenijicui ñaicõjeiyede ũi toivaicõjeiyepa báquepe: “Caivũ ina ũmu juedova népacore mamarumũ põeteivũ, Jũmenijicui

beoimara mǎrajivubu. Que baru náre jǐjárǎ Jūmenijicure”. <sup>24</sup> Jūmenijicui cūrami nurejaimada. Aru mǐjinare jídejaimada Jūmenijicure, ne boarǐ juarǎjiyepe aivu yópe Jūmenijicui daicōjeiyepe mamarumu pōteyu boje: “Pucarǎ jurevare o pucarǎ cōriájurevare jǐjárǎ Jūmenijicure”.

<sup>25</sup> Dinumure cūinácu ũmu curejamedá Jerusalén āmicurǐmaroi, ũi āmiá Simeón. Nai Simeón meacu barejamedá. Jūmenijicure urǐ, ũi daicōjeiyepe dare nurejamedá cainumua. Napini coreni vore nurejamedá Israecavure cadatecuyure. Aru nai Espǐritu Santo ũque curejamedá. <sup>26</sup> Nai Espǐritu Santo ũre coreóvare darejamedá yaibécuyure jipocamia jámecuva nai Jūmenijicui epeimu, Cristore. <sup>27-28</sup> Que baru nai Espǐritu Santo ecore darejamedá ũre Jūmenijicui cūrami. Aru ina bucva ne nuvaiyede diñami nēmacu Jesúre, ne darǎjiyepe ayu yópe Jūmenijicui daicōjeiyepe, ũre dururejamedá Simeón ũi āmuveai. Aru torojurǐ mearore jǐyu Jūmenijicure arejamedá:

<sup>29</sup> Mũ, jǐ jabocu, caride yu, mǐ pōecu, yaiquijivu cǎrijimecva, yópe mi coyuiye báquepe. <sup>30</sup> Jáivu yu jǐ baju nai mi daroimu mácuve, caivure meadaipōecure. <sup>31</sup> Mũ daroivu ũre caivu pōeva ne meatenajiyepe ayu abujuvai jabocui paruéde jaruvarǐ. <sup>32</sup> Ũ macuyáme pēoinope caivure ina pōeva judfova āmevure, ne majinajiyepe ayu Jūmenijicure. Aru davacuyume mearore mi pōevare, Israecavure, arejamedá Simeón.

<sup>33</sup> Caiye iye ũi yáva iyede Jesúi borore jápiarǐ, Jesúi bucva cuicumari dǎpiarejaimada. <sup>34</sup> Aru Simeón torojurǐ mearore jǐyu Jūmenijicure náre boje, yópe arejamedá Marfare, Jesúi pacore:

—Nai juedocu Jūmenijicui epeimame. Obedivu Israecavu bǐjarǎjarama, ne ube boje ũre. Aru obedivu Israecavu meadaimara marǎjarama, ne ue boje ũre. Ũ coreóvare dacuyume obedivu pōevare Jūmenijicui dǎpiainore. Ũbenita obedivu pōeva ũre ju abeni ubenajarama. <sup>35</sup> Caiye iye pōeva ne darǎjiye mǐmacure nǎjine daquiye bu mure yópe cūináve tǎuve mi ũmene burarǐ cotuvaiyepe. Que teni caivu majinajarama obedivu pōeva ne dǎpiainore ne ũmei, arejamedá Simeón Marfare.

<sup>36</sup> Aru diñamine máre curejacoda cūinácu Jūmenijicui yáva iyede coyucaipōeco, ōi āmiá Ana, Fanuel bácuí máco, Aser bácuí yajubocaco. Pare bucvo barejácoda ō. Bojyō cǎreja, purubuoŋo báco siete paijuua curejacoda jǐmarepacu bácuque. <sup>37</sup> Aru nomiópeco barejácoda ō ochenta y cuatro paijuaita cǎreja. Jūmenijicui cūramine etabeni, nore curǐ cainumua jǐyo mearore Jūmenijicure, āmecova āiyede jēniarejacoda ũre jǎravure aru ñamine máre. <sup>38</sup> Dinumumia reca Jesús yebai nuri, jídejacoda mearore Jūmenijicure. Aru Jesúi borore coyurejacoda caivu ina napini coreni vore cuivure Jūmenijicui meadaquiyede Jerusalén āmicurǐmarocavure.

### **Jesúi bucva Nazarei ne copaino**

(Mt 2.23)

<sup>39</sup> Jesúi bucva daivu bácvu caiye iye Jūmenijicui daicōjeiyepe, copainurejaimada Galileacarō ĩmaro Nazaret āmicurǐmaroi. <sup>40</sup> Aru nēmacu me bucurejamedá. Parucu barejamedá. Ũrarō majidejamedá ũ. Aru Jūmenijicu me járejamedá ũre máre.

### **Jesús ũi majicaino majidipōevare**

<sup>41</sup> Ũjuá coapa Pascua āmicurǐjǎravure aru páure bucure daiye cube āiye torojuve teinumure, Jesúi bucva muri nurejaimada Jerusalén

amicuriĩmaroi. <sup>42</sup> Que baru Jesúí covaede doce paĩjua nũvarejaimada úre noi, ðarājivũ yópe ne ðaiyepe ujuá coapa. <sup>43</sup> Torojuve teniburu yóboi, obedivũ ina pœva copainũvũ barejáimada Jerusalén amicuriĩmarore jocarĩ. Ubenita ñai jueðocu Jesús mautedejaimada noi. Aru ùi bucva coreóvabedejaimada. Dápiarĩ arĩdurejaimada ne baju yópe: <sup>44</sup> “Obedivũ pœva mái nuñama. Que baru Jesús nuñame apevuque”, arĩdurejaimada na. Que dápiarĩ, nurejaimada cüinájárovũ baju. Aru yóboi vorĩdurejaimada Jesúre névũ jẽneboi. <sup>45</sup> Ubenita úre eabedejaimada. Que baru Jerusalén amicuriĩmaroi copaini vorãnurejaimada úre.

<sup>46</sup> Pare vore curejaimada na. Yóbecuriĩjárovua yóboita, úre earejaimada Jũmenijicui cũrami, dobacure buaipœva majidivũ jẽneboi. Náre jápiayu aru jẽniari jáñũ marejámea ù, Jesús. <sup>47</sup> Caivũ ina jápiaivũ úre pare dápiarejaimada, ùi majié boje aru ùi yávaiye boje máre. <sup>48</sup> ùi bucva jáivũ úre noi, pare dápiarejaimada. Que teni jípaco arejacoda úre:

—Bucu, ¿aipe teni que ðayurũ ñujare? Jájacu, mipacu aru yu máre chĩori voivubu ñuja mure, arejacoda õ.

<sup>49</sup> Jesús arejaimada náre:

—¿Aipe teni vodarãru yure? ¿Majibenaru muja jaurõre yure memecayure jipacure? arejaimada Jesús.

<sup>50</sup> Ubenita coreóvabedejaimada na iye ùi aiyede náre.

<sup>51</sup> Náre yóvarĩ emenejaimada Nazaret amicuriĩmaroi. Aru náre ju arĩ, yópe ne urõpe ðayu barejámea. Jípaco caiye iyede me dápiarĩ, ãrurejacoda ùi yávaiye báquede aru ùi ðaiye báquede máre. <sup>52</sup> Jesús me bucurejaimada ùi baju aru Jũmenijicui majiéque máre. Jũmenijicu aru pœva máre úque torojurejaimada.

### **Juan Bautista ùi coyũino Jũmenijicui yávaiyede pœcubenoĩ**

(Mt 3.1-12; 7.19; 12.34; 14.3-4; 23.33; Mr 1.1-8; 6.17-18; Lc 7.29; Jn 1.19-28; 8.33)

**3** <sup>1</sup> No yóboi Roma amicurõ jaboteino jabocu curejaimada, ùi ãmiá Tiberius César. ùi jaboteiyede quince paĩjua baju, Poncio Pilato jaboteyũ barejámea Judea amicuriĩborõcavure. Aru Herodes jaboteyũ barejámea Galilea amicuriĩborõcavure. Herodei yócu, Felipe, jaboteyũ barejámea Iturea aru Traconite amicuriĩborõcavure. Aru Lisanias jaboteyũ barejámea Abilinia amicuriĩborõcavure. <sup>2</sup> Anás aru Caifás máre sacerdotevare jaboteipœva marejáimada na. Dinũmure Jũmenijicu yávarejaimada Juan Bautistare, Zacarías bácu mácure, pœcubenoĩ. Pœva vaivure coyure curejaimada nore. <sup>3</sup> ù nurejaimada caino Jordán amicuriya jia yebai. Coyuyũ barejámea pœvare, ne Jũmenijicure jáðovarajiyepẽ ayũ ocoque, ne chĩori dápiarãjiyepẽ ayũ ne ãmeina teiyede. Aru ne oatvarãjiyepẽ ayũ ne ðaiyede, “Jũmenijicu ãrumetecuyume” ayũ barejámea diede. <sup>4</sup> Yópe toivarejaquemavũ javede ñai Jũmenijicui yávaiyede coyũcaipœcu bácu, ùi ãmiá Isaías:

Jũmenijicure coyũcaipœcu coðoboboyure jápiarãjarama pœcubenoĩ:

“Meaðajarã muje ùmene copũ etaburĩ maje jabocure, nopedeca muje meaðaiyepẽ ðaimare, ñai ùmu, muje pueðaimu, ùi ðaquiye jipocai.

Que ðarĩ ðajocajarã muje ãmeina teiyede, Jũmenijicui ðaroĩmu macuyú ùi ðaquiye jipocai, Jũmenijicui copũ etaquiyepe ayũ mujare.

<sup>5</sup> Caino ěmeino buiquíyebu. Aru caiye cūrácūa jōdaquiyebu. Ma nurimema nuritequiyebu. Aru ma yaribema máre yaritequiyebu. Jabovare aru jabova āmevure máre dajocarí ne āmeina teiyede oatuvaiye jauvu náre ñai Jūmenijicui daroimu macuyú ũi daquiyepipocai. <sup>6</sup>Caivu ijāravucavu jārarama Jūmenijicui daroquimure, pōevare meadaipōecure”, arí toivarejaquemavu Isaiás bácu.

<sup>7</sup>Obedivu pōeva earejaimada Juan Bautista yebai, ũi jádovaquiyepa aivu náre Jūmenijicuque jiai. Ũi yebai eaivure, náre arejaimada:

—¡Muja, jujovaivubu, muje daiye boje mearape! ¡Aru ādavape paivubu muja, muje āmedaiye boje ajevure! Jūmenijicui jorojiquijāravu edaiyede, jáve dupini buojabenamu muja. <sup>8</sup>Đajarā muja yópe pōeva chīoivu ne āmeina teiyede, oatuvaiyu ne daiyepe. Muje baju abejarā: “Majeñecu Abraham mácu barejaquémavu. Jūmenijicu yōvarejaquemavu ũi mácu. Que baru meara bajutamu maja Jūmenijicui jáinore”, abejarā muja. Jáve coyuyubu mujare: Jūmenijicu buojaibi oatuvayu cūraboare Abraham mácu pāramena mārājivure dacuyū, ne darājīyepe ayu yópe ũi ũrópe. <sup>9</sup>Yópe jiore memepōecu ũi jáiyede jocucua jēidua mearua cubecure ũi jioi, ũi jaruvajuroepe dicuáre toaboi, nopedeca Jūmenijicu jáñu mujare mearo đabevure, jaruvacuyume mujare toabo cūiméboi, arejaimada Juan Bautista.

<sup>10</sup>Que teni ina obedivu pōeva jēniari járejaimada Juan Bautistare:

—¿Aipe darājidi ñuja? arejaimada.

<sup>11</sup>Juan Bautista arejaimada náre:

—Pucacajea cuitótecajia cuvacu baru, jíjacu ñai cuvabecure. Aru āino cuvacu baru máre, jíjacu ñai āino cuvabecure, arejaimada.

<sup>12</sup>Ina jabovare tātura Icaipōeva Juan Bautista yebai nurejaimada, ũi jádovaquiyepa aivu náre Jūmenijicuque jiai. Aru arejaimada ũre:

—Mu, buepōecu, ¿aipe darājidi ñuja? arejaimada.

<sup>13</sup>Ũ arejaimada náre:

—Ímejara pñeno baju yo muje jabocui cōjeinore mujare. arejaimada.

<sup>14</sup>Apevu churarava máre jēniari járejaimada ũre:

—¿Aipe darājidi ñuja? arejaimada.

Ũ arejaimada náre:

—Tatobekarā apevu ne cūvaede. Boarí jaruvaiyubejarā náre. Aru borocubejarā ũbenina ne đabedeca, ne jínajīyepe aivu mujare tāuturare, muje borocubenajīyepe aivu. Torojurā muje memeni cūvae boje, arejaimada ũ.

<sup>15</sup>Obedivu pōeva coreivu barejaimada Jūmenijicui epequimure. Que baru Juan Bautista ũi que aipe boje, caivu ina pōeva dápīarí ne ũmei jēniari járejaimada ne bajumia: “¿Cristo, Jūmenijicui epeimu, márica ñai?”

<sup>16</sup>Ũbenita Juan Bautista arejaimada náre:

—Yu jáve mujare jádovaivu Jūmenijicure ocoque, muje chīori dápīaiye boje muje āmeina teiyede. Ũbenita dacuyume ji yóboi cūinácū, ji pñeno parucū. Ũ macuyume jádovañu mujare Jūmenijicuque Espíritu Santoque, ũi cuquiyepa ayu mujaque aru ũi cadatequiyepa ayu mujare máre. Aru ũ macuyume jádovañu mujare Jūmenijicuque toaque máre, muje meara tenajīyepe ayu yópe pōeva ne meadaīyepe tāure toaque, aru ũi nājīne đaquiyepa ayu mujare, meara tebedu. Que baru caivu pñeno meacu bajube ũ. Yúcapūravu pare ũi cāchinocacubu. Que baru ũre cadateni buojabevu yu. Pu oarí buojabevu

yü duayü üi curaidoa buoimeare. <sup>17</sup>Yópe oteiye memepöecu üi veoiyepe jaraboque, oteiye de epecüyu üi epeiñami jívui, aru oteiye cajeáre juacüyu, nopedeca Jümenijicu üre ju aivure epecüyume üi jaboteinoi aru üre ju abevure jarüvacüyume toabo cüiméboi, arí budejamedá Juan Bautista.

<sup>18</sup>Nópe coyurejamedá Jümenijicui yávaiye méne meadaipöecüre, darocüyure ina pöevare, náre mearo ñaicöjeñu, ne ñájimenajiyeye ayu toabo cüiméboi. <sup>19</sup>Aru Galilea ámicurijoboröcavu ne jabocu Herodede jararejamedá Juan Bautista, üi cüvae boje ímacui márepacore, öi ámiá Herodías, aru caiye ape üi ámeina teiye boje máre. <sup>20</sup>Übenita Herodes Juan Bautistare jápiayübecu, jarüvaicöjenezamedá üre ámeina teivure jëni jacoñami.

### **Juan Bautista üi jádovaino Jesúre Jümenijicüque**

(Mt 3.13-17; Mr 1.9-11; Lc 9.35)

<sup>21</sup>Juan Bautista jádovañu marejamedá Jümenijicüque jiai caivu ina obedivu pöevare. Aru Jesús máre nurejamedá üi yebai, üi jádovaquiyeye ayu üre Jümenijicüque jiai. Üi jádovariburu yóboi, Jesús jëniañu marejamedá Jümenijicüre. Dinumure cavarö mearo Jümenijicui curö vorí nurejavüya. <sup>22</sup>Que teni jurecope Espíritu Santo émeni darejamedá üi puenora. Aru jápiarejaimada apeno yávainore cavarö mearo Jümenijicui curöque aiyede yópe: “Mü, jímacu, ji umu, me torojavu yu mure”, arejamedá Jesúre Jümenijicu.

### **Jesucristo üi jipocacavu bácvure coyüino**

(Mt 1.1-17)

<sup>23</sup>Jesús treinta paijua cüvacu mamarumu buení búrejamedá pöevare. Ina marejáimada Jesúi bucüva: Pöeva dápiarejaimada üre Joséi mácupe. Aru José Elí bácuí mácu barejaquémavu. <sup>24</sup>Aru Elí bácu Matat bácuí mácu barejaquémavu. Matat bácu Leví bácuí mácu barejaquémavu. Leví bácu Melqui bácuí mácu barejaquémavu. Melqui bácu Jana bácuí mácu barejaquémavu. Jana bácu José bácuí mácu barejaquémavu. <sup>25</sup>Aru José bácu Matatías bácuí mácu barejaquémavu. Matatías bácu Amós bácuí mácu barejaquémavu. Amós bácu Nahúm bácuí mácu barejaquémavu. Nahúm bácu Esli bácuí mácu barejaquémavu. Esli bácu Nagai bácuí mácu barejaquémavu. <sup>26</sup>Aru Nagai bácu Maat bácuí mácu barejaquémavu. Maat bácu Matatías bácuí mácu barejaquémavu. Matatías bácu Semei bácuí mácu barejaquémavu. Semei bácu Josec bácuí mácu barejaquémavu. Josec bácu Judá bácuí mácu barejaquémavu. <sup>27</sup>Aru Judá bácu Joanán bácuí mácu barejaquémavu. Joanán bácu Resa bácuí mácu barejaquémavu. Resa bácu Zorobabel bácuí mácu barejaquémavu. Zorobabel bácu Salatiel bácuí mácu barejaquémavu. Salatiel bácu Neri bácuí mácu barejaquémavu. <sup>28</sup>Aru Neri bácu Melqui bácuí mácu barejaquémavu. Melqui bácu Adi bácuí mácu barejaquémavu. Adi bácu Cosam bácuí mácu barejaquémavu. Cosam bácu Elmadam bácuí mácu barejaquémavu. Elmadam bácu Er bácuí mácu barejaquémavu. <sup>29</sup>Aru Er bácu Josué bácuí mácu barejaquémavu. Josué bácu Eliezer bácuí mácu barejaquémavu. Eliezer bácu Jorim bácuí mácu barejaquémavu. Jorim bácu Matat bácuí mácu barejaquémavu. <sup>30</sup>Aru Matat bácu Leví bácuí mácu barejaquémavu. Leví bácu Simeón bácuí

mácu barejaquémavu. Simeón mácu Judá bácu mácu barejaquémavu. Judá bácu José bácu mácu barejaquémavu. José bácu Jonam mácu mácu barejaquémavu. Jonam mácu Eliaquim mácu mácu barejaquémavu. <sup>31</sup>Aru Eliaquim mácu Melea bácu mácu barejaquémavu. Melea bácu Mena mácu mácu barejaquémavu. Mena mácu Matata bácu mácu barejaquémavu. Matata bácu Natán mácu mácu barejaquémavu. <sup>32</sup>Aru Natán mácu David bácu mácu barejaquémavu. David bácu Isaí bácu mácu barejaquémavu. Isaí bácu Obed bácu mácu barejaquémavu. Obed bácu Booz bácu mácu barejaquémavu. Booz bácu Sala bácu mácu barejaquémavu. Sala bácu Naasón mácu mácu barejaquémavu. <sup>33</sup>Aru Naasón mácu Aminadab bácu mácu barejaquémavu. Aminadab bácu Admin mácu mácu barejaquémavu. Admin mácu Arni mácu mácu barejaquémavu. Arni mácu Esrom mácu mácu barejaquémavu. Esrom mácu Fares bácu mácu barejaquémavu. Fares bácu Judá bácu mácu barejaquémavu. <sup>34</sup>Aru Judá bácu Jacob bácu mácu barejaquémavu. Jacob bácu Isaac bácu mácu barejaquémavu. Isaac bácu Abraham mácu mácu barejaquémavu. Abraham mácu Taré bácu mácu barejaquémavu. Taré bácu Nacor bácu mácu barejaquémavu. <sup>35</sup>Aru Nacor bácu Serug bácu mácu barejaquémavu. Serug bácu Ragau bácu mácu barejaquémavu. Ragau bácu Peleg bácu mácu barejaquémavu. Peleg bácu Heber bácu mácu barejaquémavu. Heber bácu Sala bácu mácu barejaquémavu. <sup>36</sup>Aru Sala bácu Cainán mácu mácu barejaquémavu. Cainán mácu Arfaxad bácu mácu barejaquémavu. Arfaxad bácu Sem mácu mácu barejaquémavu. Sem mácu Noé mácu mácu barejaquémavu. Noé mácu Lamec bácu mácu barejaquémavu. <sup>37</sup>Aru Lamec bácu Matusalén mácu mácu barejaquémavu. Matusalén mácu Enoc, ñai yaibécu, ñi mácu barejaquémavu. Enoc Jared bácu mácu barejaquémavu. Jared bácu Mahalaleel bácu mácu barejaquémavu. Mahalaleel bácu Cainán mácu mácu barejaquémavu. <sup>38</sup>Aru Cainán mácu Enós bácu mácu barejaquémavu. Enós bácu Set bácu mácu barejaquémavu. Set bácu Adán mácu mácu barejaquémavu. Aru Adán mácu Jümenijicui mácu barejaquémavu.

#### Abujuvai jabocu Jesúre ñi jujovarĩduino

(Mt 4.1-11; Mr 1.12-13)

**4** <sup>1</sup>Jesús, Espíritu Santoi ñaicõjeimu, copaidejameña Jordán ãmicuriya jiare jocarĩ. Ñai Espíritu Santo ñuvarejameña úre põecubenoĩ. <sup>2</sup>Jesús curejameña nore cuarenta paijãravua. Yéde ãmenejameña noi ñi curijãravuare. Aru abujuvai jabocu, Satanás ãmicucu, jujovaiyurĩdurejameña úre. Que baru no yõboi ãvué ijidejavũya úre.

<sup>3</sup>Que baru ñai abujuvai jabocu arejameña Jesúre:

—Jãveneca Jümenijicui mácu baru, ãiye ñajacu ibo cõrabore, arejameña.

<sup>4</sup>Jesús arejameña ñai abujuvai jabocure:

—Mi aiyepẽ ñabevu yu. Jümenijicui yãvaiye ñi toivaicõjeiye báque coyũvũ yõpe: “Põeva cubenama ne ãiye matũiyeda. Quénora curãjarama caiye Jümenijicui yãvaiyeque mãre”, arejameña Jesús.

<sup>5</sup>Que arĩburu yõboi, ñai abujuvai jabocu ñuvarejameña Jesúre cõracũ ãmujuricũ puenoi. Jãðovarejameña maumena caiye ijãravucarõa ãmaroare.

<sup>6</sup>Aru arejameña úre:

—Yũ jíquijivũ mure ji jaboteinore aru caiye die cãve méne máre, mi jabotequiyeye ayũ diede ji paruéque. Jíyebu caiye iye ijáravũque. Que baru bũojaivũ jíyũ ji umure. <sup>7</sup>Jíquijivũ mure caiye ijáravũquede, mi ñuatutari mearore jídu yure, arejamedã ñai abujuvai jabocu Jesúre.

<sup>8</sup>Aru Jesúcapũravũ arejamedã úre:

—Mi aiyeye ñabevũ yũ. Jũmenijicui yávaiye ñi toivaicõjeiye báque coyũivũ yópe: “Mearore jíjacu mi jabocu Jũmenijicure aru cũinácura memecajacu ñi urõpe”, arejamedã Jesús.

<sup>9</sup>Que teniburu yóboi, ñai abujuvai jabocucapũravũ nũvarejamedã Jesúre Jerusalén amicuriĩmaroi. Úre muri nure ñarejamedã Jũmenijicui cũrami pñenora. Aru arejamedã úre:

—Jãve Jũmenijicui mácu baru, turĩ nujacu yore jocarĩ pũ joborõita.

<sup>10</sup>Jũmenijicui yávaiye ñi toivaicõjeiye báque coyũivũ mi borore yópe: “Jũmenijicu jaro cuyũme ñi ángelevare, ne corenajiyepe ayũ mure.

<sup>11</sup>Jãmũorajarama mure ne pũruáque, mi ijíe tebequiyeye aivũ mi cũbobare ibo cũraboque”, arĩ toivarejaquemavũ. Que baru mi turĩ nũru, yũ jãñũ bũojacuyũmu Jũmenijicu ñayure yópe ñi aiyeye báquepedeca, arejamedã Jesúre ñai abujuvai jabocu.

<sup>12</sup>Jesúcapũravũ arejamedã úre:

—Mi aiyeye ñabevũ yũ. Nopedeca Jũmenijicui yávaiye ñi toivaicõjeiye báque coyũivũ yóp e: “Jũjovabejacu mi jabocu Jũmenijicure. Jãdovaicõjemejacu ñi paruéde”, arĩ toivarejaquemavũ. Que baru yéde ñabevũ yũ, jãdovaicõjeyurocu ñi paruéde. Majivũ yũ parucure, arejamedã Jesús.

<sup>13</sup>Nópe ñariduyũ ñai abujuvai jabocu jũjovari majibedejamedã Jesúre. Que baru nurejamedã Jesúre jocarĩ apenũmuita.

### **Jesús Galileai ñi bueni buino**

(Mt 4.12-17; Mr 1.14-15)

<sup>14</sup>Jesús ñi copaiyede Galilea amicurijoborõi Espiritu Santoi ñaicõjeiye paruéde cãvacu barejamedã. Aru põeva yávorejaimada ñi borore caino ijoborõcarõi. <sup>15</sup>Jesús buedejamedã ne judíovai cójijĩñamiai imaroa coapa. Aru caivũ torojurejaimada úre.

### **Jesús Nazarei ñi nuino**

(Mt 13.53-58; Mr 6.1-6; Jn 4.44)

<sup>16</sup>Jesús nurejamedã Nazaret amicuriĩmaroi, ñi bucuiĩmaro mácarõi. Ecorejamedã judíovai cójijĩñami ne jabuóvairáravũ sábadoi, yópe ñi ñaiyepe cainũmua. Aru nacajari járĩ borotedejamedã Jũmenijicui yávaiyede. <sup>17</sup>Jídejaimada úre Jũmenijicui yávaiyede coyũcaipõecũ Isaías bácu toivaiye báquede. Aru voari jãñũ earejamedã yópe arĩ toivaino mácarõre:

<sup>18</sup>Ji jabocu Jũmenijicu ñi Espiritu cubi yáque. Que baru ñi epeimũmu yũ, coyũcuyũ ñi yávaiye méne ina cõmaje árojarivure. Daroibi yure, ji meadaquiyeye ayũ ina chíovure ne ñmei. Aru coyũicõjeimi yure, ji jodequiyeye ayũ ina buoimarape paivure ne ñmeina teiye boje. Járe ñacuyũmu ina járĩ eabevure. Jodede ñacuyũmu ina ñmeina ñaimarare máre. <sup>19</sup>Coyũcuyũmu ne coreóvaino eainore ne jabocuĩ meadaquinore náre, járĩ borotedejamedã Jesús.

<sup>20</sup> Jári boroteni buojari, Jesús iye toivaiye báquede bieni, jídejamedá judíovai cójijiñami cadateipöecure. Aru dobacúnrejamedá, buecuyú ina pöevare. Que teiyede járejaimada úre pare caivú ina curivú judíovai cójijiñami jívui. <sup>21</sup> Jesús yávarí báyu, arejamedá yópe:

—Caride yu dayubu muje jëneboi yópe iye Isaías bácuí toivaiye báquepe javede, arejamedá Jesús.

<sup>22</sup> Caivú coyurejaimada mearo Jesúí borore. Aru pare dápiarejaimada mearo úi coyuiyede jápiari. Aru jëniari járejaimada ne baju:

—¿Joséi mácu ámeni ñai? arejaimada.

<sup>23</sup> Náre arejamedá Jesús:

—Jáveneca arājaramu muja yópe: “Mu, juoipöecu, juojacu mi bajuma, jádovacuyú pöevare juorí majicure”. Aru arājaramu muja yure: “Ñuje jápiaiyede mi ðaiye báquede Capernaui, nopedeca ðajacu yore, mi joboró bajure”, arejamedá.

<sup>24</sup> Aru yávare nurejamedá:

—Jáve coyuyubu mujare: Ácu Jümenijicui yávaiyede coyucaipöecu cübebi ne me copu etaimu úi joboröre. <sup>25</sup> Que baru jáve coyuyubu mujare: Cürejaquemavú obedivú nomiópeva Israecavú bácvu Elíai curijárvu báquede. (Nai Elíare Jümenijicu núvarejaquemavú Paraíso ámicurí apucura.) Aru ocabedejaquemavú yóbecuriyua corica baji. Que baru ávuéne ñájinejaquemavú caino joboröre. <sup>26</sup> Ëbenita Elías cadatecunumenejaquemavú ina nomiópeva bácvu yebai. Quénora nurejaquemavú cüináco nomiópeco báco yebai, Sarepta ámicurímaroi, Sidón ámicurímaro joabenoí cüco bácore. <sup>27</sup> Nopedeca cürejaquemavú obedivú pojeivú Israecavú bácvu Eliseo bácuí curijárvu báquede. Ëbenita Eliseo bácu meadabedejaquemavú ina caivure. Cüinácurata meadarejaquemavú, Naamán ámicure, Siria ámicuríjoborócacu bácore. Aru ina pucará, ico nomiópeco báco aru Naamán mácu máre, judíova ámenejaquemavú na, arejamedá Jesús.

<sup>28</sup> Ne jápiaiyede iye úi coyuiyede, caivú ina judíovai cójijiñami curivú jorojinejaimada pare Jesúre. <sup>29</sup> Nacajari jabuborí núvarejaimada Jesúre ímarore jocarí. Úre núvarejaimada cüracú puenoi, jaruvarájivu dicú túrobú cächinoi. <sup>30</sup> Ëbenita Jesús vaicúnurejamedá ne jëneboi, náre jocarí.

### **Abujucu úi ímamú Jesúre úi copuino**

(Mt 7.28-29; Mr 1.21-28)

<sup>31</sup> Jesús ëmeni nurejamedá Galileacaró ímaroi, Capernaum ámicurímaroi. Aru noi buedejamedá pöevare judíovai jabúovaijárvu sábadoi. <sup>32</sup> Ina jápiaivú úi bueiye, torojurí cucumarejaimada úi bueiye, úi yávaiye boje paruéque. <sup>33</sup> Aru cürejamedá judíovai cójijiñami cüinácu úmu, abujucu úi ímamú. Codoboborí arejamedá Jesúre:

<sup>34</sup> —Mu, Jesús Nazarecacú, cārijovamejacú ñujare. ¿Yéde ucürú mu ñujaque? ¿Jaruvacudayú dacürú mu ñujare? Coreóvaivú yu müre. Jümenijicui mácu meacu bajubu mu, arí codoboborejamedá.

<sup>35</sup> Ëbenita Jesús bi aicöjenejamedá úre:

—Mu, bída, etajacu ñai úmure jocarí, arejamedá Jesús.

Que baru ñai abujucu türe ðarejamedá úi ímamüre joboró ne jëneboi. Etarejamedá úre jocarí, ámeno ðabecuva ñai úmure. <sup>36</sup> Aru cucumari jáivú ina pöeva, arejaimada ne baju:

—Paruéque yávaibi ñai ũmu. Ñi yávaiye paruéque jaruvaibi abujuvare. Aru etadama ména, arejaimada.

<sup>37</sup>Que baru yávarejaimada Jesúí borore caino Galilea ámicurijoboröi.

### **Jesús ũi meadaino Simón Pedroi vácore**

(Mt 8.14-15; Mr 1.29-31)

<sup>38</sup>Dinumu Jesús etarejamedá judíovai cójijĩñamine jocarĩ. Aru ecorejamedá Simón Pedroi cūrami. Ico Simón Pedroi váco moimo marejácoda pare. Coyurejaimada Jesúre õi borore. <sup>39</sup>Que baru Jesús õi yebai nacachini, dajocaicõjenezamedá moinore õre jocarĩ. Maumejiena dajocarejavũya moino õre. Dinumumia nacajari, áiyede meadarĩ jídejácoda náre.

### **Jesús ũi meadaino obedivũ ijimarare**

(Mt 8.16-17; Mr 1.32-34)

<sup>40</sup>Dinainumica ñamijie baji aviá ũi dorĩburu yóboi, jabuóvairavũ vaiyede, nuvarejaimada Jesús yebai obedivũ ijimarare. Aru tuorejamedá Jesús ũi puruque náre coapa. Que darĩ meadarejamedá náre. <sup>41</sup>Aru etarejaimada ijimarare jocarĩ abujuva, codoboborĩ arejaimada Jesúre:

—Murecabu Jūmenijicui mácu, arejaimada Jesúre.

Ũbenita Jesús bi aicõjenezamedá náre, ne majié boje Jūmenijicui daroimu mácu Cristore.

### **Jesús Galileai ũi bueino**

(Mr 1.35-39)

<sup>42</sup>Miadáe tuiyede Jesús nurejamedá pōcubenoĩ. Ũbenita pōeva vorĩ earejaimada ũre. Ñi yebai earĩ, jēniarejaimada ũre, ũi nūmequiepe aivũ náre jocarĩ. <sup>43</sup>Ũbenita Jesús arejamedá náre:

—Nuiye jauvũ yure, coyucuyũ apenoa ĩmaroare máre Jūmenijicui jaboteiyede pōevare. Que baru daivũ yũ, coyucudayũ diede, arejamedá Jesús.

<sup>44</sup>Que arĩ, coyure nurejamedá judíovai cójijĩñamiai caino Galilea ámicurijoboröi.

### **Jesús ũi bueimarare urarõ moare boaré ðaino**

(Mt 4.18-22; 13.1-2; Mr 1.16-20; 3.9-10; 4.1; Jn 21.3, 6)

**5** <sup>1</sup>Pōeva obedivũ nuivũ Jesús yebai, ũi cuede macajitabũ urabũ Genesaret ámicurijitabũ écarui, pare copiporejaimada ũre, jápiaiyurivũ Jūmenijicui yávaiyede. <sup>2</sup>Jesús járejamedá pucácia jiaðocũare macajitabũ urabũ écarũ yebai. Dicũái moa boaipōeva núrejaimada dicũá yebai, joaivũ ne pápicuare. <sup>3</sup>Jesús jatuyũ bácu cūinácũ jiaðocũui, Simón Pedro jicũui, jaroicõjenezamedá joajĩemaque écarure jocarĩ. Aru dobacu dicũui, bueni búrejamedá ina obedivũ pōevare. <sup>4</sup>Yávarĩ buojayũ bácu arejamedá Simón Pedore:

—Nuvajacu mi jiaðocũre macajitabũ ũmujurõ baji. Aru noi jaboájara mũje pápicuare, moa boarájivũ, arejamedá Jesús.

<sup>5</sup>Simón Pedro ju ayũ, arejamedá Jesúre:

—Mũ, bueipōecu, caiñami memeniduvũ ñuja. Ũbenita ye boabétevũ. Ũbenita mi cõjeie boje, jaboáquijivũ ji pápicure, arejamedá.

<sup>6</sup>Que teni ðaivũ b́acavũ ýope Jeśui coyuiyepe, j́enejaimaða obedivũ moare. Codedejaimaða ne ṕapicure. <sup>7</sup>Dinũmu “Yareni dajarã”, arejaimaða ne ýovaimarare, apecũ jiaðocũcavure, ne caðatenaearãjiyepe aivũ. Aru earĩ, buiv́arejaimaða caipucacũa jiaðocũare coicũa baju. <sup>8</sup>Ýope teiyede j́ari, Simón Pedro ñuatutarĩ Jeśus yebai, arejameða úre:

—Mũ, ji jabocu, ñujacu yure jocarĩ, ji ãmeina teiye boje, arejameða Jeśure.

<sup>9</sup>Que baru Simón Pedro aru úcavũ máre cuicumarejaimaða, urarõ ne moa boaiye boje. <sup>10</sup>Santiago aru Juan máre, Zebedeo mára, Simón Pedroi ýovaimara ma rejáimaða. Cuicumarejaimaða na máre. Ubenita Jeśus arejameða Simón Pedroe:

—Jidubejacũ. Caride epequijivũ mure, mi davaquiyeye ṕõevare ji yebai ýope mi moare davaiyepe ṕapicucue, ji meadaquiyeye náre, arejameða Jeśus.

<sup>11</sup>Que teni jiaðocũa eaiyede êcarui, dajocaivũ b́acavũ caiyede ñurejaimaða Jeśucue.

### **Jeśus ãi meaðaino pojeyure**

(Mt 8.1-4; Mr 1.40-45)

<sup>12</sup>Jeśus ãi cuede ćuináro ĩmaroi, ãi yebai ñurejameða ćuinácu pojeyũ. Aru Jeśure j́ari, ñuatutarejameða joborõi, pueðacuyũ úre. Aru j́eniarejameða:

—Mũ, ji jabocu, ucũ baru, meaðajacu ji pojeyiede. Buojaivũ mũ meaðayũ yure, arejameða.

<sup>13</sup>Dinũmure Jeśus, ãi pũruque jabióvarĩ tuoyũ, arejameða úre:

—Uvũ yũ. Caride meatejacũ mũ, arejameða Jeśus.

Ýope ãi aiyede vaidéjavũya úre. <sup>14</sup>Jeśus, coyucõjemecũ apevure, arejameða:

—Ćuiná nuri, j́aðovajacu sacerdotede. Aru j́ijacu mi meateiye boje, ýope J́umenijicui ðaicõjeiyede ãi coyuiye báquepe Moisés b́acure, ṕõeva ne coreóvarãjiyepe ayũ mi meateinore, arejameða úre Jeśus.

<sup>15</sup>Ubenita pũeno baju coyũivũ barejáimaða Jeśui borore. Obedivũ ṕõeva cõjijidejaimaða j́apiaivũ, aru úre meaðaicõjeiyurivũ náre ijiéde. <sup>16</sup>Que baru ina obedivũ cue boje, Jeśus ñurejameða ṕõecubenoĩ, j́eniacyũ J́umenijicucue.

### **Jeśus ãi cure ðaino nacajaiye majibecure**

(Mt 9.1-8; Mr 2.1-12)

<sup>17</sup>Ćuinájãravũ Jeśus ãi bueiye ṕõevare, dobarejaimaða noi fariseovacavũ, ina J́umenijicui ðaicõjeiyeye ðaivũ, aru J́umenijicui yávaie báquede buiepõevacavũ máre, eaivũ b́acavũ cainoa ĩmaroa Galilea ãmicurõre, Judea ãmicurõre, aru Jerusalén ãmicuriĩmarore jocarĩ máre. J́umenijicui paruéde curejameða Jeśus, meaðacuyũ ĩjimarare. <sup>18</sup>Dinũmu apevũ ãmũva ñvarejaimaða ãi yebai ćuinácu ãmũ, nacajaiye majibecure, ãi parainoque. Ecoiyurejaimaða ćurami j́ivui Jeśus yebai. <sup>19</sup>Ubenita eabedejaimaða ne ecorãjino, obedivũ ṕõeva cue boje. Que baru muri nuri ćurami pũenora, voarĩ diede, êmeóvarejaimaða ĩjimure ãi parainoque ṕõeva j́eneboi Jeśus yebai. <sup>20</sup>Náre coreóvayũ jũ aivure, Jeśus arejameða ñai nacajaiye majibecure:

—Mũ, ji umũ, mi ãmeina teiyede jaruvarĩ, ãrumeteivũ yũ diede, arejameða Jeśus.

<sup>21</sup> Dinumu ina Jūmenijicui yávaiye báquede bueipōeva aru fariseova máre dápíarī búrejaimada yópe: “¿Yécuba ñai ūmu āmeina yávayū Jūmenijicure? Ñame buojabema jaruvaiyu āmeina teiyede. Quénora cūinácurebe Jūmenijicu buojarī jaruvayū diede”, arī dápíarejaimada.

<sup>22</sup> Aru Jesús, jári coreóvarī ne baju ne dápíaiyede, arejamedā náre:

<sup>23</sup> —¿Aipe teni que arī dápíaiyurū muja? Maiyójabevu yópe aru apecure: “Mi āmeina teiyede jaruvarī, ārūmeteivū yu”, ji paruéde jádovame boje ji que çoyuiyede. Ūbenita maiyójarótamu nacajari cuicōjenu nacajaiye majibecure. Ūre cure ðayū baru, jádovaquijivū ji paruéde. “Mi āmeina teiyede jaruvaiyu”, ji aiyede, coreóvabevu muja Jūmenijicui ārūmeteinore diede. Ūbenita ñai cūvacu Jūmenijicui majié paruéde, ūrame yópe ðarī jádovaiye majicu. Quécura Jūmenijicuvacari meadarī majibi iijimarare. <sup>24</sup> Que baru muje majinajiyepē ayū Jūmenijicui daroimu mácu ūmupe, yu, paruéde cūvacure ijāravure jaruvacuyū āmeina teiyede, yópe ðaquijivū yu, arejamedā Jesús.

Dinumu arejamedā nacajaiye majibecure:

—Yópe aivu yu mure: Nacajari, mi parainore ñni, nujacu mi cūrami, arejamedā Jesús.

<sup>25</sup> Dinumuma nacajari, ūi parainore ñni, etarejamedā obedivu jēneboi. Aru mearore jídejamedā Jūmenijicure. <sup>26</sup> Caivu ina pōeva máre, pare dápíaiyu, mearore jídejaimada Jūmenijicure.

### **Jesús ūi “Dajacu” aino Levíde**

(Mt 9.9-13; Mr 2.13-17; Lc 15.1-2)

<sup>27</sup> No yóboi, Jesús etarī nuñu járejamedā cūinácū judíovacacu, Roma āmicurō jaboteino jabovare tāutura ĩcaipōecu, ūi āmiá Leví, dobacure ne bojedainoi. Aru arejamedā ūre:

—Dajacu yúque, arejamedā Jesús.

<sup>28</sup> Aru nacajari, dajocayū caiyede, nurejamedā Jesúque.

<sup>29</sup> Que teniburu yóboi, Leví torojūve tedejamedā āino ūrarōque ūi cūrami, pueðacuyū Jesúre. Aru obedivu jabovare tāutura ĩcaipōeva aru apevu pōeva máre dobarejaimada Levíque aru Jesúque máre. <sup>30</sup> Ūbenita Jūmenijicui yávaiye báquede bueipōevacavū aru fariseovacavū máre āmeina yávarī búrejaimada Jesúi bueimarare. Arejaimada:

—¿Aipe teni āri, ūcuri teivurū muja ina jabovare tāutura ĩcaipōeva que aru āmeno ðaipōeva que máre? arejaimada náre.

<sup>31</sup> Jesús ju ayū, arejamedā náre:

—Meara pōevare juoipōecui cadateiye jaubevu. Quénora iijimarare ūi cadateiye jauvu. <sup>32</sup> Dabedejacacu yu ijāravui, cutucuyū mearare ne baju dápíaiu. Quénora darejacacu yu, meaðacuyū āmenare, ne chīorajiyepē ayū ne āmeina teiyede, Jūmenijicui ārūmetequiyepe ayū diede, arejamedā Jesús.

### **Pōeva āmevūva āiyede ne jēniaino Jūmenijicūque**

(Mt 9.14-17; Mr 2.18-22)

<sup>33</sup> Dinumure jēniari járejaimada Jesúre ina fariseova:

—¿Aipe teni Juan Bautistai bueimara aru ñūje bueimara máre āmevūba āiyede, ūbenita mi bueimara āmevū āmema āiyede? arejaimada.

<sup>34</sup> Jesús arejameđa náre:

—Ina purubuoŷu ũi cutuimara ne torojuve tenajipepe ayu ũi purubuoŷiyeđe, ye ámevu ámemá áŷiyeđe ũi cuede cáreja náque. Nopedeca ji bueimara torojurivu ji cuede náque, ámevu ámemá áŷiyeđe. <sup>35</sup> Ũbenita ji mauva ne nuvarajiyede yure, ji bueimara chioivu ámenajarama áŷiyeđe, arejameđa Jesús.

<sup>36</sup> Jēvari coyurejameđa náre:

—Ñame buojabema buraivu cūinájeve cuitótecaje mamacajede, jēorajivu cuitótecaje javacarōre. Nópe đaru, ámedajebu cuitótecaje mamarore. Aru mamajeve jēmejebu cuitótecaje javacarōre. Quédeca ñame buojabema ju aivu ji bueiye mamaene aru javeque bueiyeđe máre. <sup>37</sup> Nopedeca buojabema yuaivu vino úyaicorore mamacorore áimacaje curubu javcacurubūque. Que đaru, codeóvajebu dicurubure. Aru yurí bíljajebu dicoro. Bíljajebu dicurubū máre. <sup>38</sup> Ũbenita ne yuaru vino úyaicorore mamacorore mamacurubūque, bíljajebū dicoro. Quédeca ñame buojabema đáivu yópe ji bueiye mamaepe, đare nuivu baru yópe ne jave đaiye báquepe. <sup>39</sup> Aru ñai ũcuñu mácu icoro mamaboqueicorore ũcuiyūbecu mamaene ajebu yópe: “Javequetamu me baju”. Nopedeca apevu pōeva jápiaiyubevu Jūmenijicui yávaiye mamaene, ne dápiaiye boje javeque yávaiye pueno me bajure, arí buedejameđa náre Jesús.

### **Jesúi bueimara ne puyoino oteiyede jabuóvairavui**

(Mt 12.1-8; Mr 2.23-28)

**6** <sup>1</sup> Apejáravu, judíovai jabuóvairavavu sábadoi, Jesús ũi vaiyede oteiye curói, ũi bueimara diede jēni, puruáque cōjuñori, árejaimada. <sup>2</sup> Aru apevu fariseovacavu jēniari járejaimada náre:

—¿Aipe teni ámeno đáivurū muja, maja judíova maje đaicōjemenope, jabuóvairavure? arejaimada náre.

<sup>3</sup> Ũbenita Jesús, ũi dápiaiye boje ũi bueimara ámeno đabevure, arejameđa náre:

—¿Jáve árumetenaru muja yo David bácuí đaino mácarōre ávué ijiéde úre aru úque curivure máre? <sup>4</sup> Ũ mácu ecorejaquemavu Jūmenijicui cūrami. Aru árejaquemavu páure, Jūmenijicure jīye báquede ina sacerdoteva ne áŷiyeđe, sacerdote ámecu bácuvacari. Aru jídejaquemavu úque curivure máre, sacerdoteva ámevu bácvureca. Ũbenita Jūmenijicu ñájine đabedejaquemavu na mácvure, arejameđa Jesús.

<sup>5</sup> Cojedeca Jesús arí buedejameđa:

—Yu, Jūmenijicui daroimu mácu ũmupe, jabocubu yu. Que baru đaicōjeni buojaivu yu pōevare ne đaiyede caijáravure aru jabuóvairavure máre, arejameđa Jesús.

### **Jesús ũi meadaino ũmu ámuve jiacubecure**

(Mt 12.9-14; Mr 3.1-6)

<sup>6</sup> Apejáravui cojedeca, judíovai jabuóvairavavu sábadoi, Jesús ecorejameđa ne cōjijĩnami. Aru buení búrejameđa pōevare. Noi curejameđa cūinácu ũmu, ámuve meapūravucaámuve jiacubecu. <sup>7</sup> Jūmenijicui yávaiye báquede bueipōeva aru fariseova máre nore curivu coreni járejaimada Jesúre. Jáiyurivu barejaimada meadayure úre ne jabuóvairavui, boro coyurí

adaiyuriduivũ Jesúre. <sup>8</sup> Ûbenita ù, majicu ne dápiayede, arejamedã ñai ùmu ãmuve jiacubecure:

—Nacajari nújacu pœva jêneboi, arejamedã Jesús.

Jesús ùi que aiyede, ñai ùmu nacajari núrejamedã. <sup>9</sup> Dinumũma Jesús arejamedã náre:

—Jêniari jáquijivũ cûináro mujare. ¿Yéde ðaicôjeini Jûmenijicu jabuóvãijãravure, mearore o âmenore; meadaru pœvare o boarí jaruvãru náre? arejamedã Jesús.

Ûbenita bi arejaimada na.

<sup>10</sup> Que baru Jesús, jáñũ ina curivure ùi yebai, arejamedã ñai ùmu ãmuve jiacubecure:

—Jabióvajacu mi ãmuvede, arejamedã Jesús.

Ûi jabióvayede, meatedejavũya ùi ãmuve. <sup>11</sup> Ûbenita apevũ, jorojini pare, jêniari járejaimada ne bajumia:

—¿Aipe ðarãjidica maja ñaine? arejaimada na.

### **Jesús ùi beoino ùi yávaiye méne coyucôjeimarava**

(Mt 10.1-4; Mr 3.13-19)

<sup>12</sup> Cûinájãravũ Jesús núrejamedã cûracûai, jêniacũũ. Aru noi jêniarejamedã Jûmenijicuque caiñami. <sup>13</sup> Míadãe tuiyede órejarejamedã ùi bueimarare. Aru doce paivure beorí epedejamedã ùi yávaiye méne beorí coyucôjeimarare. <sup>14-16</sup> Na marejáimada Simón, ùi âmidoimu mácu Pedro; Andrés, Simón Pedroi yócu; Santiago, Juan, Felipe, Bartolomé, Mateo, Tomás; Santiago, Alfeoi mácu; Simón, âmicucu Celote; Judas, Santiagoi mácu; aru Judas Iscariote. Nai marejáimada jêni jícuyũ Jesúre ùi mauvare.

### **Jesús ùi bueino obedivũ pœvare**

(Mt 4.23-25)

<sup>17</sup> Jesús êmeñũ mácu cûracûare jocarí, mautedejamedã dáí ùi bueimaraque. Aru obedivũ pœva curejaimada. Judea âmicurijoborôcavũ, Jerusalén âmicuriĩmarocavũ, aru macajitabũ urabũ êcarui ĩmarocavũ máre: Tiro aru Sidón âmicuriĩmarocavũ máre curejaimada. Ina earejaimada, jápiayurivũ Jesúre aru ùi meadaquiyupe aivũ náre ijiéde. <sup>18</sup> Ina abujuva ne ñájine ðaimarare máre Jesús meadarejamedã. <sup>19</sup> Caivũ pœva tuoiyurejaimada Jesúre, ùi meadaiye boje ùi paruéque. Aru meadarejamedã ina caivure.

### **Jesús ùi bueino torojurôre aru chõoinore máre**

(Mt 5.1-12; Hch 7.52; 1 P 4.14)

<sup>20</sup> Dinumũre Jesús, jáñũ ùi bueimarare, arejamedã:

—Muja cõmaje ãrojarivũ, mujarecabu Jûmenijicui jaboteimara. Que baru torojurãjaramu muja. <sup>21</sup> Muja ãvué yaivũ caride, yapinajaramu. Que baru torojurãjaramu muja. Muja caride oivũ yurinajaramu. Que baru torojurãjaramu muja.

<sup>22</sup> Torojurãjaramu muja pœva Jûmenijicure ju abevũ ne âmeina jáiye boje mujare aru ne jaruvaiye boje mujare máre, muxe yóvaiye boje yure, Jûmenijicui daroimu mácure ùmũpe. Torojurãjaramu muja, pœva Jûmenijicure ju abevũ ne jaraiye boje mujare aru ne ube boje mujare

máre, muje yóvaiye boje yure, Jūmenijicui daroimũ mácvure ũmupe. <sup>23</sup>Torojurājaramu muja dijārvure. Aru cūvarājaramu muje boje ũrarō cavarō mearo Jūmenijicui curōi. Nopedeca ānina javecavu bācavu, mujeñecuva mácavu máre, āmeina đarejaquemavu ānina Jūmenijicui yáva iyede coyucaipōeva mácvure.

<sup>24</sup>Ūbenita muja cūve cūvarivũ ijārvure torojurĩ cūvu muja. Que baru āmeno nājino cūvarājaramu muja. <sup>25</sup>Muja yapivũ caride āno ũrarōque, āmei āvūe yainājaramu muja. Que baru āmeno nājino cūvarājaramu muja. Muja yūrivũ caride chīori orājaramu muja. Que baru āmeno nājino cūvarājaramu muja. <sup>26</sup>Āmeno nājino cūvarājaramu muja, pōeva ne me yáva iyede mujare. Nopedeca ānina javecavu bācavu, mujeñecuva mácavu máre, me yāvarejaquemavu ānina borocūrivũ Jūmenijicui yáva iyede coyucaipōevape tenidivũ bācvure, arĩ budejamedā náre Jesús.

### **Jesús ũi bueino maje ũrōre maje mauvare**

(Mt 5.38-48; 7.12)

<sup>27</sup>Jesús, yópe arĩ, budejamedā náre cojedeca:

—Ūbenita coyuyubu mujare, jápiaivure ji coyuiyede. Ūjarā muje mauvare. Me đajarā náre ina āmeina jáivure mujare. <sup>28</sup>Torojurĩ mearore jījarā náre ina āmeina yávaivure mujare. Jēniajara Jūmenijicuque ina borocūri yávaivure mujare. <sup>29</sup>Cūinācu pōecu ũi pēvaru mi cūināpūravucavibure, copedini pēvaicōjecacu apepūravure máre. Aru cūinācu pōecu ũi ĩnu mi cuitótecaje pñenocacajede, jījacu mi camisare máre. <sup>30</sup>Jījacu caivure ne jēniainore mure. Aru ne tatoru mīyede, jēniamejacu cojedeca. <sup>31</sup>Đajarā apevure yópe muje ũepe đavure mujaque.

<sup>32</sup>Muje ũru náre, ina ũrivure mujare, Jūmenijicu bojedabecube pōevare ne que đaiyede. Nopedeca ina āmeina teivũ máre ũma ũrivure náre. <sup>33</sup>Muje mearore đaru náre, ina mearore đavure mujare, Jūmenijicu bojedabecube pōevare ne que đaiyede. Nopedeca ina āmeina teivũ máre đadama nópe. <sup>34</sup>Muje jīdu náre, ina jacopaiyovarājivure mujare, Jūmenijicu bojedabecube pōevare ne que đaiyede. Nopedeca ina āmeina teivũ máre jīyama apevu āmeina teivure, ne jacopaiyovarājīyepe aivũ cojedeca. <sup>35</sup>Ūbenita ũjarā muje mauvare. Me đajarā náre. Aru jījarā jacopaiyovaiyede corebevũva no boje. Nópe đaru, ũrarō meaquiyebe muje boje jēino. Aru Jūmenijicui mára marajáramu muja. Que baru ũ meacube náque ina jībevure mearore ũre aru ina jīyubevure apevure máre. <sup>36</sup>Cōmaje āroje jājara muja apevure, ĩnai majepacu Jūmenijicu ũi cōmaje āroje jáiyepedeca, náre arĩ budejamedā Jesús.

### **Jesús ũi pōevare apevure āmecoroicōjemeno**

(Mt 7.1-5; 10.24-25; 15.14; Jn 13.16; 15.20)

<sup>37</sup>Jesús, yópe arĩ, budejamedā náre cojedeca:

—“Āmenatamu” arĩ, āmecorobejarā muja apevure. Muje nópe aru, majepacu Jūmenijicu āmecororĩ, “Āmenatamu muja”, acuyume mujare. Jaruvabejarā muja apevure. Muje jaruvabedu, Jūmenijicu jaruvabecube mujare. Ārumetejarā muja apevure ne āmene. Muje ārumetedu, Jūmenijicu máre ārumetecuyume muje āmeina teiyede. <sup>38</sup>Jījarā muja apevure. Aru

Jūmenijicu jícuyame mujare. Jícuyame muje pueá buidíruea, doairuea, aru jayuirueare. Nopedeca muje apevure jíyepedeca Jūmenijicu jícuyame mujare, arejameđa náre Jesús.

<sup>39</sup> Aru yópe arĩ, jēvari coyurejameđa Jesús:

—Cūinácũ jári eabecu buojabebi nuñũ mái apescu jári eabecuque. Que baru caipucarã jári eabevu baru tujebu na cobei. <sup>40</sup> Bueimara ñame baju majibema ne bueipõescu pñeno. Ūbenita bueni buojaivu baru, ne bueipõescu tenajarama.

<sup>41</sup> Me jáivubu muja mujecui docujĩe curõre ũi yacorui. Ūbenita jámevu muja muje urarõ docucurõre muje yacorui. <sup>42</sup> Aru jámevuvacari muja urarõ docucurõre muje yacorui, mujecure “¿Mi docujĩene ñajĩ mi cavaede mi yacorui?” arĩ buojabevu muja. ¡Jujovaivutamu muja! Mamarũmu ijara muja muje urarõ docucurõre muje yacorure. No yóboi, mearo jáivuta, ijara mujecui docujĩene ũi cavaede ũi yacorui, arĩ buedejameđa náre Jesús.

Yópe aiyurõtamu iye Jesúi aye báque: Põescu ũi urarõ ámenore ðaru, “Dajocajacu mi ámeina teiyede” arĩ, coyuiye jaubevu ũre apescure, quĩjino ámenore ðayure. Quénora mamarũmu ñai urarõ ámenore ðayure dajocaiye javu ũi baju ámeina teiyede cãreja.

#### **Jesús ũi bueino maje majinore jocucua jēidure**

(Mt 7.17-20; 12.33-35)

<sup>43</sup> Cojedeca Jesús arĩ buedejameđa náre, ne majinajiyere ayu aipe árojarivure põevare:

—Cubevu jocucu meacu jēiye ámene jícũ. Aru cubevu jocucu ámecũ jēiye méne jícũ. <sup>44</sup> Que baru coreóvaivubu jocucure dicuá jēiyeque. Miuñua jēmevu higo ámicuridure. Nopedeca jēmevu áyai miuñuara. <sup>45</sup> Ñai põescu meacu yávayube méne, ũi ũmei mearo cue boje. Aru ñai põescu ámecũ yávayube ámene, ũi ũmei ámeno cue boje. Que baru põescu yávaibi ũi jijecamuque ũre cuede ũi ũmei, arĩ buedejameđa Jesús.

#### **Jesús ũi coyũino pucadãmia cūramia ðaivu b́acavure**

(Mt 7.24-27)

<sup>46</sup> Cojedeca Jesús arĩ buedejameđa náre:

—¿Aipe teni aivurũ yure “ñũje jabocu”, ũbenita ðabevuvacari ji coyuiyede? <sup>47</sup> Coyuquijivu mujare ñamepe árojacure ñai yure darĩ jápiayure aru ðayure yópe ji coyuiyepe. <sup>48</sup> Ðaibi yópe ñai põescu ũi ðaiye báquepe ũi cūrami jājaroi. Aru jia yaboiyede, oco eavũya diñamine. Ūbenita cújibeteavũya diñami, jājaro núe boje. <sup>49</sup> Ūbenita ñai jápiayuvacari yure, ðabecu baru yópe ji coyuiyepe, ñai põescu ũpebe ñai ðayu bácupe ũi cūramine jājamenoi. Aru jia yaboiyede, oco eavũya diñamine. Aru tuavũya diñami. Urarõ mateávũya diñami b́jaino, arĩ buedejameđa Jesús.

#### **Jesús ũi meadaino churaravai jabocui yebacacure**

(Mt 8.5-13)

**7** <sup>1</sup> Jesús yávarĩ dajocayu b́acu põevare, nurejameđa Capernaum ámicurĩmaroi. <sup>2</sup> Noi curejameđa cien paivu churarava ne jabocu, cuvacu ũi yebacacure pare ũi umu. Ijimu baju barejameđa ñai yebacacu.

<sup>3</sup> Ñai churaravai jabocu jápiayũ bácu yávaivure Jesúi borore, jarorejamedã apevu judiova bucuvare, ne órejarãjiyepe ayũ Jesúre, ñi meadaquiyepẽ ayũ ñai yebacacure. <sup>4-5</sup> Jesús yebai eaiyu, pare nuicõjenezaimada úre. Arejaimada:

—Ñai jabocu meacube ñ. Que baru mi cadateiye jauvu úre, ñi ne boje maje curijaborõre. Ûvacari ñaicõjeame cûinádami maje cõjijĩnamiva, arejaimada na Jesúre.

<sup>6</sup> Dinũmũmia Jesús nurejamedã náque. Ûbenita joabenoi ne tuvaiyede ñi cûrami yebai, ñai jabocu jarorejamedã ñi yóvaimarare, yópe arãnuivũ Jesúre:

—Mũ, ji jabocu, cãrijimejacũ. Meacubu mũ. Ûbenita yácapũravũ ãmecutamũ. Que baru darĩ ecobejacũ ji cûrami. <sup>7</sup> Bũojari vocunumetevũ yũ mure ji baju. Quénora coyujacu mi cõjeinore. Aru ji yebacacu meatecũyũme.

<sup>8</sup> Yurecabu cücü ne cõjeiyeque ina ji jabova. Aru cuvavũ churaravare, ji cõjeimarare. Nácacu cûinácure “Nujacu” ji arĩburu, nuimi ñ. Aru “Dajacu” ji arĩburu, daibi ñ. Aru ji ñaicõjenu apejĩene ji yebacacure, ñaibi ñ. Nópe aicõjemi ñujare daroyũ, cien paivũ churarava ne jabocu, arejamedã Jesúre ñai jabocui jaroimaracacu.

Ûi que aiyede, “Ijĩede cõjeipõecubu mũ” aiyucũ barejaquémavũ Jesúre.

<sup>9</sup> Que ayure jápiari, pare dápiarejamedã Jesús. Aru jári ina põeva nuivure ñi yóboi, arejamedã:

—Jãve coyuyubu mujare: Eabevũ cãreja majacacure, Israecacure, me ju ayure yure yópe ñai churaravai jabocupe, arejamedã Jesús.

<sup>10</sup> Aru ne copaiyede jabovai cûrami, earejaimada ñai yebacacure meacuta.

### **Jesús ñi meadaino nomiópecoi mácure**

<sup>11</sup> No yóboi, Jesús nurejamedã Nain ãmicurĩĩmaroi. Ûque nurejaimada ñi bueimara aru apevu põeva máre, obedivũ. <sup>12</sup> Ûi eaiyede imaro joabenoi, járejamedã nuvaivure yaiyũ bácare, jarũvarãnuivũ. Jípaco, nomiópeco caride, cûinácũ ñi mácu bácu barejamedã. Aru obedivũ põeva diĩmarocavũ yóvarejaimada náre. <sup>13</sup> Jesús cõmaje ãroje jári, arejamedã óre:

—Obejaco, arejamedã ñ.

<sup>14</sup> Joabejĩnoi nuri, icađava paraicađava, yaiyũ bácu paraicađavare, tuorejamedã Jesús ñi puruque. Ina nuvaivũ bácvũ dicađavare mautedejaimada. Dinũmũma Jesús arejamedã yaiyũ bácare:

—Mũ, bojuyo, coyuyubu mure: Nacajajacu, arejamedã Jesús.

<sup>15</sup> Quénora ñai yaiyũ bácu dobarĩ, yávari búrejamedã. Aru Jesús jídejamedã úre jípacore. <sup>16</sup> Yópe dayure jáivũ, cucumarejaimada caivũ. Aru torojurĩ, jívũ mearore Jũmenijicure arejaimada:

—Jũmenijicui yávaivede coyũaipõecu parucũ edaibi maje jẽneboi. Jũmenijicu daibi, cadatecudayũ ñi põevare, arejaimada na.

<sup>17</sup> Que teni Jesúi boro earejavũya caino Judea ãmicurijoborõi aru caiye curõaquede máre. Jápiarejaimada caivũ Jesúi ñaiye báquede.

### **Juan Bautista ñi jaroimara Jesús yebai**

(Mt 11.2-19; 21.32; Lc 3.12)

<sup>18</sup> Juan Bautistai bueimara, ñi yebai nuri, coyurejaimada úre caiye Jesúi ñaiye báquede. Aru órejarejamedã Juan Bautista pũcarã ñi bueimarare.

<sup>19</sup> Jesús yebai jarorĩ, jẽniari jáicõjenezaimada náre yópe:

—¿Jāveneca mǫrũ Juan Bautista “Ji yóboi dacũyũme apescu coũipõescu” arĩ, ũi buevacamũ? ¿Ũi que arĩ buevacamũ āmenu, corenajidi ñũja apescure? aicõjenezameda náre Juan Bautista.

<sup>20</sup>Ina daroimara, Jesús yebai earĩ, arejaimada ũre:

—Juan Bautista darobi ñũjare jēniari jáicõjeñũ: “¿Jāveneca mǫrũ Jũmenijicui daroimũ, ‘Ji yóboi dacũyũme apescu coũipõescu’ arĩ, ũi buevacamũ? ¿Ũi que arĩ buevacamũ āmenu, corenajidi ñũja apescure?” arejaimada Jesús.

<sup>21</sup>Aru dinũmũmareca Jesús meadare cuyũ barejámada obedivũ põevare: ijimarare, ñájivũre, aru abujuva ne ĩmamarare máre. Aru obedivũ jári eabevũre cõmaje āroje jári meadarejameda.

<sup>22</sup>Que teni Jesús ju ayũ, arejameda Juan Bautistai daroimarare:

—Nũri coyũjarã Juan Bautistare mũje jápiayede aru mũje jáiyede máre: Ina jári eabevũ bǎcavũ jári eadama caride, aru ina cuiye majibevũ bǎcavũ cuyama caride. Ina pojeivũ bǎcavũ meama aru ina jápiabevũ bǎcavũ jápiadama caride. Ina yaivũ bǎcavũ, nacovaimara yainore jarũvarĩ, apũma cojedeca caride. Aru cõmaje ārojarivũre coyũyũbu iye yávaiye méne, Jũmenijicui meadaiyede põevare. <sup>23</sup>Torojubi ñai ju arĩ dajocabescu yure, arejameda náre Jesús.

<sup>24</sup>Ina daroimara ne nũriburu yóboi, Jesús Juan Bautistai borore yávarĩ búyũ, arejameda ina põevare:

—Jāve járanũmeteavũ mũja cõriäre ũmevũ japuiyede põescũbenoi.

<sup>25</sup>Aru jāve járanũmeteavũ mũja põescu cuitótecaje meacajede doyũre máre põescũbenoi. Majivũ mũja ina doivũre cuitótecajea meacajeare curivũre torojũve teni cainũmũ jabovai cũramiai. <sup>26</sup>Quénora jāve járanũmũ mũja cũĩnácũ Jũmenijicui yávaiyede coyũcaipõescure. Jāve coyũyũbu mũjare: Jáquemavũ mũja Jũmenijicui yávaiyede coyũcaipõescu pũeno meacu bajure. <sup>27</sup>Juan Bautistabe ñai Jũmenijicui toivaicõjeimũ mácu ũre coyũcaipõescu bǎcure:

Jaroivũ yure coyũcaipõescure mi jipocai, ũi meadaquiyepe ayũ põevare, ne corũ etarājiiyepe ayũ mure, nopedeca põeva ne meadaiyepe cuimare ñai ũmũ, ne pueďaimũ, ũi daquiye jipocai, arĩ coyũicõjenezajquemavũ Jũmenijicũ.

<sup>28</sup>Jāve coyũyũbu mũjare: Cũbebi apescu Jũmenijicui yávaiyede coyũcaipõescu meacu baju Juan Bautista pũeno ina ijǎravũĩ põeteivũ jēneboi. Ũbenita ñai ũbeni cucũ Jũmenijicui jaboteinore Jũmenijicui mearo ďacaimũme Juan Bautista pũeno, arejameda Jesús.

<sup>29</sup>Ũi que ayede Juan Bautistai borore jápiarĩ, obedivũ põeva aru ina jabovare tǎutũra ĩcaipõeva máre coreóvarejaimada Jũmenijicure jāve ayũre. Que baru Juan Bautistare jáďovaicõjenezajaimada náre Jũmenijicũque.

<sup>30</sup>Ũbenita ina fariseova aru Jũmenijicui yávaiye báquede bueipõeva máre ũbedejaimada Jũmenijicui ďaiyũrõre náre boje. Que baru Juan Bautistare jáďovaicõjemenezajaimada náre Jũmenijicũque.

<sup>31</sup>Que teni Jesús arejameda náre:

—¿Yéque jēvari coyũji ina põeva ijǎravũcavũre? ¿Aipe ārojari na?

<sup>32</sup>Jueďova tǎibui dobarivũpebu, yajurājivũ nǎcavũque. Aru yópe aivũpebu: “Japuvũ ñũja yurĩainore. Ũbenita upabetevũ mũja. Yurĩavũ ñũja chĩore

daiyede. Ubenita obetevu muja". Aru nópe ijáravucavu máre cãrijiñama na. <sup>33</sup>Que baru Juan Bautista ùi daiyede, ù àmeni aru ùcumeni teiyede, "Abujucure cãvabi", ùra ubenina aivubu muja. <sup>34</sup>Aru Jãmenijicui daroimũ mácu ùmupe, ji daiyede, àri aru ùcuri teiyede yópe caivũ apevũpe, "Ñai ùmu urarõ àri ùi vaini tuiyeta, aru urarõ ùcuri ùi pacoteiyeta, yóvaibi àmenare aru jabovare tãutura ìcaipõevare máre", yurã ubenina aivubu muja. <sup>35</sup>Ubenita Jãmenijicui majiède pøeva jãdama ùre ju aivũque, arejameda Jesús.

### Jesús ùi cue fariseovacacu Simói cãrami

(Mt 26.7; Mr 14.3)

<sup>36</sup>Cũinácu fariseovacacu cuturejameda Jesúre, "Árevu" ayũ, ùi cãrami. Aru Jesús ju arĩ, ecorĩ, dobarejameda tuoiva yebai. <sup>37</sup>Aru cũináco nomió, diimarocaco, àmeina teipõeco, majico Jesús dobacure ñai fariseoi cãrami, nvarejacoða cũinábu ùmujuribu boribu mumijue curibure. <sup>38</sup>Orĩ earejacoða Jesúi cuboba yebai. Aru òi orique ãnuvarejacoða ùi cubobare. Que teni povovarejacoða òi pøaque. Aru nuri ùi cubobare, òi pueðaiye boje ùre, yuarejacoða iye mumijuede ùi cuboba puenoi. <sup>39</sup>Que teni ñai fariseo, Jesúre cutuyũ bácu, "Árevu" arĩ ùre, yópe teinore jãri, dápiarejameda ùi baju: "Ñai ùmu Jãmenijicui yãvaiyede coyũcaipõecu baru, majijebu yéco pøeco ico jëni jãðore ùre. Pøeco àmeina teipõecobe ò", arĩ dápiarejameda. <sup>40</sup>Quénora Jesús arejameda ñai fariseore:

—Mu, Simón, apejĩno coyũiyuvu mure, arejameda Jesús.

Ñai fariseo ju arejameda ùre:

—Mu, bucipõecu, coyujacu yure, arejameda Simón.

<sup>41</sup>Ùi nópe aiyede, Jesús yópe arĩ coyurejameda ùre:

—Pucarã ùmuva bojecube ðaquemavu tãuturare cũinácu tãutura jípõecure. Cũinácu bojecube ðaquemavu pũcaujua memeiye bojede. Aru apecu bojecube ðaquemavu pũcarã aviáva memeiye bojede. <sup>42</sup>Na yéque buojarĩ ne bojedabe boje, ñai tãutura jípõecu ãrumetequemavu ina pũcarã ne bojecube ðaiyede. Coyujacu yure. ¿Ácu pøecu ina pũcarãcacu pueno baju urĩ ùre? arejameda Jesús.

<sup>43</sup>Aru Simón ju arejameda:

—Dápiavũ ucure pare ùre ñai ùi ãrumeteimũ mácu pueno bojecube ðayure, arejameda.

Jesús arejameda ùre:

—Jãve coyũvu mu, arejameda.

<sup>44</sup>Jesús copedini, jãñũ ico nomióre, arejameda Simóre:

—Jãjacu ico nomióre. Ecovũ yũ mi cãrami, aru jĩbetevũ mu oco, joaquiye ji cubobare. Ubenita ico nomió ãnuvaimico ji cubobare òi orique aru povovaibico òi pøaque. <sup>45</sup>Jacoyubetevũ mu yure. Ubenita ico dajocabebico pueðado yure, ji cubobare nuño. <sup>46</sup>Yuabetevũ mu mumijueque ji jipobure. Ubenita ò yuarĩ mumijue ðaibico ji cubobare. <sup>47</sup>Que baru aivũ yũ, òi àmeina teiye urede Jãmenijicui ãrumeteiye báque boje, urarõ òi urõre jãðovaimico ò. Ubenita ñai ùi àmeina teiye obebeda Jãmenijicui ãrumetedu, quĩjino ùi urõre jãðovaimi ù, arejameda Jesús.

<sup>48</sup>Aru arejameda ico nomióre:

—Mi àmeina teiyede ãrumeteivũ yũ, arejameda Jesús.

<sup>49</sup>Ina Simói cutuimara, dobarivũ úque, yávarĩ búrejaimada ne bajumia:

—¿Yécu bárica ñai umu ámeina teiyede árumetede ñayu? arejaimada na.

<sup>50</sup>Aru Jesús arejaimada ico nomióre:

—Mi ju aye boje, meateivũ mũ. Que baru me nujaco cãrijimecova, arejaimada óre Jesús.

### Nomiva Jesúre ne cadateino

(Mt 27.55-56; Mr 15.40-41; Lc 23.49)

**8** <sup>1</sup>No yóboi, Jesús coyucũnurejaimada ĩmaroai aru ĩmajinoa coapa, pœva ne majinaiyepe ayũ Jũmenijicũ jaboteinoque borore. Aru ina doce paivũ ũi bueimara yóvarejaimada úre. <sup>2</sup>Apevũ nomiva máre yóvarejaimada náre, Jesúĩ meadainomiva mácavũ. Apevũre ina nomivare Jesús javei jaetovarejaimada abujuvare. Aru apevũre javei meadarejaimada ũ. Cũináco Magdala ámicurĩĩmarocaco barejácoða, ōĩ ámiá María. Jipocamia Jesús jaetovarejaimada siete paivũ abujuvare óre jocarĩ. <sup>3</sup>Apeco barejácoða, ōĩ ámiá Juana. Ñai jabocu Herodes ũi cũramine coreipœcũĩ márepaco barejácoða ō, ũi ámiá Chuza. Aru apeco barejácoða, ōĩ ámiá Susana. Apevũ obedivũ nomiva, Jesúĩ meadainomiva mácavũ máre yóvarejaimada úre. Ina nomiva Jesújãre jauéde jídejaimada.

### “Oteipœcure” jári dápiarĩ ne ñarãjiyepe aino

(Mt 13.1-9; Mr 4.1-9)

<sup>4</sup>Obedivũ pœva cójjivũ Jesús yebai ĩmaroa coapacavũ. Que teni Jesús buedejaimada náre jári dápiarĩ ne ñarãjiyepe ainoque, yópe arĩ:

<sup>5</sup>—Cũinácu oteipœcu otecũnuquemavũ ũi oteiyede. Ũi oteiyede ape oteiyetũquemavũ ma êcarũĩ. Aru ne cũraiyepe ina cuivũ noi, mĩjina vũivũ darĩ, áradacquemavũ caiye iye oteiyede. <sup>6</sup>Ape oteiyetũquemavũ joborõ edubenoĩ cũraboia pũenoĩ. Aru yóboi pĩarĩ etaquemavũ. Ũbenita yaiquémavũ, no oco cube boje. <sup>7</sup>Ape oteiyetũquemavũ miucua jêneboi. Aru miucua bucũrĩ chĩoiyede, jẽiye jẽmetetũquemavũ. <sup>8</sup>Ape oteiyetũquemavũ mearo joborõĩ. Aru bucũquemavũ. Aru jẽquemavũ jẽĩñũ cien paivũa caiye oteiyabea coapa, arejaimada Jesús.

Que yávayũ bácu, Jesús pare bujino yávarĩ, arejaimada náre:

—Me jápiajarã muja iye ji bueiyede, arejaimada Jesús.

### Aipe aiyurõre Jesús ũi jári dápiarĩ ne ñarãjiyepe aino

(Mt 13.10-17; Mr 4.10-12)

<sup>9</sup>Jesúĩ bueimara jẽniari járejaimada úre:

—¿Aipe teni bueyurũ mũ jári dápiarĩ ñũje ñarãjiyepe ayũ mi coyũieque? arejaimada.

<sup>10</sup>Aru Jesús arejaimada náre:

—Mujare coyurĩ majide ñayũbu iye Jũmenijicu ũi coyucĩcõjeme máquede. Ũ jaboteibi mujare, ũi pœvare. Ũbenita ina apevũ iyede majibevũre quẽda jári dápiarĩ ne ñarãjiyepe ayũ bueyũbu yũ náre, jáivũreca ne jári majibenaijiyepe ayũ aipe aiyurõre ne jáiyede, aru jápiaivũreca ne jápiarĩ majibenaijiyepe ayũ aipe aiyurõre ne jápiaiyede, arejaimada Jesús.

**Jesús ñi coyũino aipe aiyurõre “oteipõecure” jári dápiarĩ ne ñarãjiyepe aino**  
(Mt 13.18-23; Mr 4.13-20)

<sup>11</sup>Yópe arĩ, Jesús coyurejamedã ñi bueimarare:

—Yo jári dápiarĩ muje ñarãjiyepe ayũ ji aino yópe coyuiyurõmu mujare: Iye oteiye Jũmenijicui yávaiepe paiyebu. <sup>12</sup>Aru inamu ma ěcarui oteiye turĩduiye báquepe paivũ. Náre coyuiyede Jũmenijicui yávaiepe jápiadama, ũbenita coreóvarĩ eabevũva. Que baru ne jápiarĩburu yóboi, ñai abujuvai jabocu darĩ, ģrumetede ñaibi Jũmenijicui yávaie ne jápiaie báquede, ne ju abeni majibenajiyeye ayũ, meatebenajivũ. <sup>13</sup>Aru inamu joborõ edubenoĩ, cũraboã pũenoĩ, oteiye turĩduiye báquepe paivũ. Jũmenijicui yávaiepe jápiarĩ, torojuma me. Ŭbenita Jũmenijicui yávaiepe ju arĩduyama na. Que baru quĩjino yóboi, põeva ne cãrijovaru náre, ne ju aie boje, maumena ñajocadama ne ju aiyede Jũmenijicui yávaiepe. Que teni ju abema na. <sup>14</sup>Aru inamu miucua jẽneboi oteiye turĩduiye báquepe paivũ. Na máre jápiaivũ Jũmenijicui yávaiepe, ũbenita cãrijĩñama ijãravũquede. Torojuma tãutũraque. Aru caiye iye ne torojuve teiye ijãravũque cojvũ náre. Que baru Jũmenijicu cañatebebi náre ñi yávaieque yópe ñi urõpe. <sup>15</sup>Ŭbenita inamu mearo joborõĩ oteiye tuiye báquepe paivũ. Jũmenijicui yávaiepe jápiaivũ, ju adama jãve diede. Aru me ģrũma ñajocabevũva. Que baru nárecabu ñaivũ Jũmenijicui urõpe cãrijimevũva, arejamedã Jesús.

**“Põoibure” jári dápiarĩ ne ñarãjiyepe aino**  
(Mt 5.15; 10.26; 25.29; Mr 4.21-25; Lc 11.33; 12.2; 19.26)

<sup>16</sup>Cojedeca Jesús, yópe arĩ, buedejamedã náre:

—Põecu cubebi pẽoibure pẽoriburu yóboi moañũ dibure cõañũque o ñõñũ paraino cãchinoĩ. Quénora tuoibi jocuve pũenora, pẽoquiyeye ayũ caivũ ecoivure nore. <sup>17</sup>Que baru caiye yaveie báque jároquiyebu. Aru dupiówaiye báquede máre járajarama caivũ põeva.

<sup>18</sup>Que baru me dápiarã muje jápiaiyede ji bueiyede. Aru ñajarã yópe ji coyuiyepe. Nope-deca ñai jápiayure Jũmenijicui yávaiepe, Jũmenijicu pũeno baju ñi majiéque jícuyume ģre. Ŭbenita ñai jápiabecure Jũmenijicui yávaiepe, iye ñi quĩjino majiéde dápiayũ cuvaede, Jũmenijicu ģre ģcuyume diede, arejamedã Jesús.

**Jesús ñi jina ne voino ģre**  
(Mt 12.46-50; Mr 3.31-35)

<sup>19</sup>Dinu mure Jesúi paco aru ñi yóva earejaimada ñi curõĩ. Ŭbenita ģre eabedejaimada, obedivũ põeva ne cue boje. <sup>20</sup>Que baru apevũ arejaimada Jesúre: —Mipaco aru mýyova máre jedevai núrivũ, mure járadadama, arejaimada.

<sup>21</sup>Ŭbenita Jesús arejamedã náre:

—Caivũ ina Jũmenijicui yávaiepe jápiaivũ aru Jũmenijicui urõpe ñaivũ, nárecabu jipacope pádo aru jýyovape paivũ máre, arejamedã Jesús.

**Jesús ũmevure ñi bĩjaroino**  
(Mt 8.23-27; Mr 4.35-41)

<sup>22</sup>Cũinãjãravũ Jesús, jatuyũ jiãdocũĩ ñi bueimaraque, arejamedã náre:

—Járica, macajitabu urabu apeduvei nurevu, arejamedá náre.

Que baru nurejaimada na. <sup>23</sup>Ne jataiyede, Jesús cärejamedá. Japurejavüya ümevu parurõ baju. Aru pâcaiboa.ecorejavüya jiadocüre. Que baru dicü buidéjavüya. Pare jidojarejavüya no. <sup>24</sup>Que teni Jesús yebai nuri, yópe arí, coedavarejaimada üre:

—¡Mu, bueipöecu, coivubu maja! ¡Bíjaräjivubu maja! arejaimada na.

Jesús coedarí, jararejamedá ümevure. Iboá uraboa pâcaiboa bíjarejavüya. Aru cârijimene ðarejavüya. <sup>25</sup>Que teni Jesús arejamedá üi bueimarare:

—¿Aipe teni “Jesús meadacuyume ñujare”, abevurü muja? arejamedá.

Que aiyede, cucumari urarõ dâpiarejaimada. Aru arejaimada ne bajumia:

—¿Yécuba ñai, yópe cõjeñu ümevure aru macajitabure máre ju aimu? arejaimada na.

### **Jesús üi meadaino ümu abujuva ne imamure**

*(Mt 8.28-34; Mr 5.1-20)*

<sup>26</sup>Jesújã jatarejaimada no macajitabu urabure apeduvei. Aru curejaimada na Gerasa ámicurõcavu, Galilea ámicurõ cõchinois. <sup>27</sup>Jesús üi maiyede jiadocüre jocarí, copu nurejamedá cüinácu imarocacu, abujuva ne imamu. Joe baju cuitótecajede dobedejamedá. Aru cürami cubedejamedá ü. Quénora pôeva ne yaivu bácvure jaruvainoi cucu barejamedá. <sup>28</sup>Jesúre jári, üi yebai nuri, ñuatutarí bujié coðoboborí, arejamedá:

—Mu, Jesús, Jümenijicui mácu, caivu pueno parucui mácu, ¿yéde ucürü yáque? Jëniaivu mure, ñájine ðabecacu yure, arí coðoboborejamedá.

<sup>29</sup>Nópe arejamedá Jesús üi etaicõjeiye báque boje jipocamia ina abujuvare ñai ümure jocarí.

Apenumua abujuva üre imarejaimada. Que baru nócvu üre coreni buorídurejaimada táumeaque, buoimeaque máre. Übenita coburururí buravarejamedá dimeäre. Aru ina abujuva jarorejaimada üre pöecubenoí.

<sup>30</sup>Dinumure Jesús jëniari járejamedá üre:

—¿Yécu ámicucurü mu? arejamedá.

Ju arí arejamedá:

—Obecu ámicuvu yu, arejamedá.

Nópe arejamedá, obedivu abujuva ne imae boje. <sup>31</sup>Ina abujuva pare jëniarejaimada, üi jarobequiyepa aivu náre ümujuricobei, abujuva ne ñájinoi. <sup>32</sup>Curejaimada noi cüracü yebai obedivu oteiväriva, äre cuivu. Aru jëniarejaimada ina abujuva Jesúre:

—Jarojacu ñujare oteivärivara, ñuje coräjiiyepa nára, arejaimada.

Dinumuma, nuicõjenezamedá náre Jesús:

—Nujara, arejamedá.

<sup>33</sup>Aru ina abujuva etarí, corejaimada oteivärivara. Cúyarí nuri turejaimada cüracü ëmeinoi, macajitabu urabui. Turí corí bíjarejaimada na. <sup>34</sup>Aru ina oteiväriva mácvure coreipõeva cúyarí nurejaimada, coyüivu uraïmaroai aru imaro curõvaquede máre. <sup>35</sup>Que baru obedivu pôeva “¿Aipe tenama?” arí, járanurejaimada. Nuivu Jesús yebai, járejaimada ñai ümu abujuva ne ñájine ðaimu mácu dobacure, cuitótecajede doypure, meacure cari. Aru jidurejaimada üre. <sup>36</sup>Coyurejaimada ina jáivu bácvu Jesús meadaiye báquede ñai ümu, abujuva ne imamu mácvure. <sup>37</sup>Quénora

“Nujacu”, arejaimada Jesúre parurôque caivu Gerasa âmicurôcavu, ne jiduê boje.

<sup>38</sup> Jiadocûi jaturî, Jesús copainurejameđa. Ûbenita ùi copaiquiye jipocamia ñai ùmu, abujuva ne ìmamù mácu, jêniarejameđa parurôreca cuiyucu úque. Ûbenita Jesús yóvaicôjemecu arejameđa úre:

<sup>39</sup> —Copainujacu mi cûrami. Aru coyujacu caiye iye urarô Jûmenijicu ùi ðaiyede múque, arejameđa Jesús.

Nuri, coyuyu barejámeđa caivu ìmarocavure caiye iye Jesús ùi ðaiye báquede úre.

**Jesús ùi nacovaino Jairoi máco bácore aru ùi meadaino nomiô ñájiñore  
jiveque**

(Mt 9.18-26; Mr 5.21-43)

<sup>40</sup> Jesús copaiyu bácore, obedivu pôeva coreivu barejáimada úre. Que baru cójijidejaimada ùi yebai, úre jacoyuivu. <sup>41</sup> Aru earejameđa cûinácu judíovai cójijiñamine coreipôecu, Jairo âmicucu. Járina ñuatutarejameđa Jesúi cuboba yebai. Urarôreca jêniáñu arejameđa Jesúre:

—Mu, bueipôecu, dajacu ji cûrami, arejameđa.

<sup>42</sup> Cûinácova ùi máco, doce paiujua cuvacore, cuvarejameđa Jairo. Aru yaidé nuño marejácođa ô. Que baru Jesús nurejameđa úque. Cujurejaimada náre obedivu pôeva. Aru cojivare nurejaimada Jesúre.

<sup>43</sup> Ne jêneboi cûináco nomiô curejacoda. Doce paiujua baju ijimo marejácođa jive yuiyeque. Aru pôecu cubedejameđa jûoiye majicu ôre. <sup>44</sup> Nurejacoda ùi yóboi obedivu pôeva jêneboi. Aru jêni járejacoda ùi doicaje turavarâ. Cûiná ôi jêni jáiyede, bíjarejavûya ôi jive yuino mácarô.

<sup>45</sup> Dinumu Jesús arejameđa:

—¿Ñame matedí yure jêni jádo? arejameđa.

Caivu “Yu âmevu” ne aiyede, Pedro arejameđa:

—¡Mu, bueipôecu, obedivu pôeva cojivare daivubu mure! arejameđa.

<sup>46</sup> Ûbenita Jesús arejameđa:

—Cûináco nomiô jêni jácobe yure. Que baru majivu yu. Ji baju ji majiéque meadaivu yu ôre caride, arejameđa Jesús.

<sup>47</sup> Ûi que aiyede, ico nomiô ôi baju dupini majibe boje, bidini jiduco, nuri ñuatutarejacoda ùi cuboba yebai. Coyurejacoda caivu ina pôeva ne jáiyede ôi jêni jáinore úre aru cûiná ôi meateinore. <sup>48</sup> Aru Jesús arejameđa ôre:

—Mu, ji umo, “Û meadaie majibi yure”, arí dápiarebu mu. Que baru mi que arí dápiaye boje, meadaivu mure. Ména nuri kujaco mu, arejameđa Jesús.

<sup>49</sup> Ûi boroteiyede ôque, cûinácu ñai judíovai cójijiñamine coreipôecu cûramicacu earí, arejameđa Jaiore:

—Javeta mímaco yaibíco ô. Quénora cãrijovamejacu bueipôecure, arejameđa.

<sup>50</sup> Ûbenita Jesús, jápiayu bácu ùi yávainore, arejameđa Jaiore:

—Jidubejacu mu. Quénora ju ajacu ji coyuinore, aru meatecodome ô, arejameđa Jesús.

<sup>51</sup> Jesús ùi eaiyede Jairoi cûrami, apevure ecoicôjemeni úque, nuvarejameđa Pedroré, Jûare, Santiagore, aru ico jueđoco bácoi pacure

aru pacore máre. <sup>52</sup>Caivu pōeva nócavu ōre oivu aru cōmaje āroje jáivu barejáimada. Ūbenita Jesús arejamedá:

—Obejarā. Ō yaiyó āmemico. Quénora cādotame, arejamedá.

Náre nópe arejamedá Jesús, ũi majié boje ũi nacovaquinore ōre yainore jaruvārī. <sup>53</sup>Ūi que aiyede, yuridejaimada ūre, ne majié boje yaiyó bácore.

<sup>54</sup>Dinumú Jesús ecorejamedá jueđoco bácoi caritucubui aru ōi purure jēni, bujié yávarejamedá ōre:

—Mu, jueđoco, nacajajaco, arejamedá Jesús.

<sup>55</sup>Aru ūmedarejacoda ō. Que baru cūiná nacajarejacoda. Aru, “Āiyede jįjarā ōre”, arejamedá Jesús. <sup>56</sup>Ōi bucava cuecumari pare dápiarejaimada. Ūbenita Jesús apevure coyucōjemenejamedá náre iye ũi đaiye báquede.

### **Jesús ũi jaroino ũi bueimarare**

(Mt 10.5-15; Mr 6.7-13; Lc 10.4-11; Hch 13.51)

**9** <sup>1</sup>Órejarī ina doce paivu ũi bueimarare ũi yebai, Jesús jíđejamedá ne paruéva, ne jaetovarājiyepe ayu abujuvare aru ne meadarājiyepe ayu ijimarare. <sup>2</sup>Aru jarorejamedá náre, ne coyurājiyepe ayu Jūmenijicui jaboteinoque yávaiye méne aru ne meadarājiyepe ayu pōevare. <sup>3</sup>Jesús arejamedá náre:

—Nuvamejara muja apejiene muje nuinore. Tuturiteyoava nuvamejara, curubware máre, āiyede máre, aru tāuturare máre. Nujara muje cuitótecaje doino cueda. <sup>4</sup>Āri muja ecoivu ĩmaroi, cujarā cūinácu cūrami upacuque pu dajocarī nuivuta nore jocarī. <sup>5</sup>Apenoi ne copu etabedu mujare, aru ne jápiaiyubedu iye yávaiye méne, etarī nujara. Aru pupejarā jobore mujare jēiyede muje cuboba cāchinoi ne jáiyede, ne jápiaiyube boje. Que teni diimarocavu coreóvarājarama ju abevure Jūmenijicure aru mujare máre, arejamedá Jesús.

<sup>6</sup>Que arīburu yóboi, etarī nurejaimada ĩmaroai aru ĩmajinoa coapa. Coyurejaimada Jūmenijicui yávaiye méne aru meadarejaimada pōevare caino.

### **Juan Bautista bácu ũi yaino**

(Mt 14.1-12; 16.14; Mr 6.14-29; 8.28; Lc 9.19)

<sup>7</sup>Dinumú ñai jabocu Herodes jápiarejamedá Jesúi borore, caiye ũi đaiyede. Aru cārijinejamedá, pōeva ne yávaiye boje. Apevu arejaimada, “Juan Bautista bácu nacajacube yainore jaruvārī”. <sup>8</sup>Apevu arejaimada, “Elías járocube cojedeca”. Aru apevu arejaimada, “Cūinácu Jūmenijicui yávaiyede coyucaipōecu bácu nacajacube yainore jaruvārī”. <sup>9</sup>Herodecapūravu arejamedá: “Juan Bautista bácu jipobure buraicōjecacu yu. Que baru, ğnamema ñai ũi borore ji jápiaimu?” arejamedá. Aru pare jáiyurejamedá Jesúre ñai jabocu Herodes.

### **Jesús ũi āre đaino cūinápurupe paimil baju ũmuvare**

(Mt 14.13-21; Mr 6.30-44; Jn 6.1-14)

<sup>10</sup>Dinumú Jesúi daroimara mácavu copainurejaimada ũi yebai. Ūre coyurejaimada caino ne đaino mácarōre. Aru Jesús náre nuvaridurejamedá pōevare jocarī cūináĩmaro joabenoi, Betsaida āmicurōi. <sup>11</sup>Ūbenita náre

nuivure majidejaimada pœva obedivũ. Aru Jesújãre cujurejaimada na. Jesúcapûravũ torojacũ jacoyurejaimada náre. Coyurejaimada Jũmenijicui jaboteinoque yáviyede. Aru meadarejaimada nácvũ ijimarare máre.

<sup>12</sup> Aru nainú tuvaino marejávũya. Que baru coyurẽarejaimada ina doce paivũ ãi bueimara. Arejaimada ãre:

—Pœcubenotamu yo. Que baru nuicõjejacũ ina pœvare, ne vorãjiyepe ayũ ne jabuõvarãjiyede aru ne bojedarãjiyepe ayũ ne ãrajyede imaro joabenoĩ aru no curõvaquei, arejaimada Jesúre.

<sup>13</sup> Ûbenita Jesús arejaimada náre:

—Muja náre ãiyede jíjarã, arejaimada.

Na arejaimada ãre:

—Páuboa cûinápurũpe paiboa aru moa pucarã quénora cuvavũ ñuja. ¿Ñuja bojedacarãnurajidi ãiyede, jínajivũ caivũ ina pœvare? arejaimada na.

<sup>14</sup> Aru nácvũ ãmũva cûinápurũpe paimil baju barejáimada na. Jesús arejaimada ãi bueimarare:

—Dobaicõjejara muja ina pœvare yajuboa teni, cainimea teni, cincuenta paivũ curiyajuboa, arejaimada Jesús.

<sup>15</sup> Ûi aye báquepedeca darejaimada na. Que teni dobaicõjenejaimada náre.

<sup>16</sup> Aru die páuboa cûinápurũpe paiboa aru moa pucarãre jẽni, cavarõĩ jáñũ, torojuede jídejaimada Jũmenijicure. Torojuede jĩni buojari, páuboare aru moare máre cotũvarĩ jebeni, pœvare jícõjenejaimada Jesús ãi bueimarare.

<sup>17</sup> Aru caivũ ãri yapidejaimada na. ãri bubarĩburu yóboi, iye cotũvaiye báque páu aru moa máre pœva ne ãri oabede ãni, meadarĩ, puebua doce paibũare, judíova ne puebũare, buivãrejaimada ãi bueimara cojedeca.

#### **Pedro ãi “Cristobu mu” aino**

(Mt 14.1-2; 16.13-19; Mr 6.14-15; 8.27-29; Lc 9.7-8; Jn 6.68-69)

<sup>18</sup> Jesús coyuyũ barejáimada Jũmenijicure cûinácvũ. Aru ãi bueimara curẽejaimada ãque. Dinũmure jẽniari járejaimada náre yópe:

—¿Aipe aidi pœva yure? ¿“Yécubebu”, aidi na? arejaimada Jesús.

<sup>19</sup> Arejaimada ãre:

—Apevũ adama, “Juan Bautistabe”. Aru apevũ adama, “Elíabe”. Aru apevũ adama, “Cûinácvũ Jũmenijicui yáviyede coyũcaipœecu bácvũ nacajañũ mácvũ”, adama mure, arejaimada na.

<sup>20</sup> Aru Jesús jẽniari járejaimada náre:

—¿Ûbenita aipe aivurũ muja yure? arejaimada Jesús.

Pedro ju arejaimada ãre:

—Mu Jũmenijicui daroimũ mácvũ. Ñujare jabotecũyũmu mu, arejaimada Pedro Jesúre.

#### **Jesús ãi coyũino ãi yaiquínore**

(Mt 10.38-39; 16.20-28; Mr 8.30-9.1; Lc 14.27; 17.33; Jn 12.24-25)

<sup>21</sup> Ûbenita ãi borore apevũre coyũicõjemenejaimada náre, yópe arĩ:

<sup>22</sup> —Javũ yure, Jũmenijicui daroimũ mácvũre ãmũpe, urarõ ji ñãjiquino. Ina judíova bucũva, aru sacerdotevare jaboteipœeva, aru Jũmenijicui yáviaye báquede bueipœeva máre yure boarĩ jarũvarãjarama. Aru yóbecurijãravua yóboi nacajacũyũmu yũ yainore jarũvarĩ, arejaimada Jesús.

<sup>23</sup> Aru caivure arejamedá Jesús:

—Ácu pōecu daiyucu yáque, dajocajacurĩ pōeva ne mearo jáiyede úre, cayebejacurĩ yure yóvayede, aru jidubejacurĩ ũi nájiquiyede. Nōpe đabecu baru, ũ buojabebi jícū bacuyú. <sup>24</sup> Nái pōecu ũi baju urōpe đarĩ, meadaiyucu baru ũi bajure, coatecuyume ũi bajure Jūmenijicure jaruvārĩ, yōpe yaiyú bácupe ũi ũmei. Ūbenita nái pōecu, “Ye baju āmevu, ji yaidú Cristore boje” ayu, ũi baju urōpe đabecuva quénora ji urōpe đarĩ, úrecabe ji meadaquimu, cūcuyu Jūmenijicuque cainumua. <sup>25</sup> Nái pōecu cuvacu baru caiye ijāravuquede, ũbenita bíjayu baru ũi ũmene, nájicuyume cainumua toabo cūiméboi. <sup>26</sup> Aru nái pōecu cūedu yure aru ji yávayede máre, yu, Jūmenijicui daroimu mácu ũmūpe, máre cūyeni dāpiacuyumu úre ji jádovayede ji mearore, aru jipacu meacu baju ũi mearore, aru ina ángeleva meara ne mearore máre, ji daquijāravu baquínói. <sup>27</sup> Jāve coyuyubu mujare: Apevu curivu yui, ne yainájiye jipocai járajarama Jūmenijicui jaboteino curōre, ji jaboteiyede pōevare, arejamedá Jesús.

#### **Jesús ũi baju oatuvaino**

(Mt 3.17; 12.18; 17.1-8; Mr 1.11; 9.2-8; Lc 3.22; 2 P 1.17-18)

<sup>28</sup> Ocho paijāravua yóboi, Jesús nuvarejamedá Pedrore, Jūare, aru Santiagore máre, jēniarajivu Jūmenijicuque cūracūi. <sup>29</sup> Ūi jēniaiyedeca, ũi jiva oatuvarejavūya. Aru ũi cuitótecaje boricaje pōorejavūya. <sup>30</sup> Pucarā ũmūva járorejaimada, boroteivu úque. Na marejáimada Moisés aru Elías. <sup>31</sup> Caino ne curō miadári jajavu tedejavūya. Borotedejaimada Jesús ũi copaiquinore ijāravure jocarĩ aru úre vaiquínore máre Jerusalén āmicuriĩmaroi. <sup>32</sup> Pedro aru úcavu máre vuocurivuvacari, cāmenejaimada. Quénora apurivu járejaimada Jesús meacu bajure aru náre máre, ina pucarā ũmūva curivure úque. <sup>33</sup> Moisés aru Elías ne dajocaiyede Jesúre, Pedro arejamedá:

—Mu, bueipōecu, mearotamu ñuje curu yui. Que baru đarājivubu ñuja yóbecuriñamia cūramia quíjiñamia maquiyéde, cūinádami maquinóre mĩñami, aru apedāmi maquinóre Moiséde, aru apedāmi maquinóre Elíare, arejamedá Pedro.

<sup>34</sup> Ūbenita majibedejamedá ũi que ainore. Ūi coyuiyedeca, oopenibo ēmeni taorejavūya náre. Que baru jidurejaimada pare. <sup>35</sup> Aru oopenibo taoiyede náre, jápiarejaimada apeno yávainore oopeniboi etaiyede: “Naipe jímacu, ji beoimu. Que baru jápiajarā úre”, arejamedá Jūmenijicu.

<sup>36</sup> Aru yávarĩburu yóboi, járejaimada Jesúre cūinácua. Ūbenita ne jáino mácārōre bi arĩ coyubedejaimada apevu pōevare.

#### **Jesús ũi meadaino juedocure abujucu ũi imamure**

(Mt 17.14-21; Mr 9.14-29)

<sup>37</sup> Cōmiájāravu, ēmeivu bácvu dicū cūracūre jocarĩ, obedivu pōeva copu nurejaimada Jesúre. <sup>38</sup> Aru cūinácu pōecu pōeyajubo jēneboi, yōpe arĩ, codoboborejamedá:

—Mu, bueipōecu, jēniaivu mure. Jájacu jímacure, cūinácua, ji cuvamure. <sup>39</sup> Abujucu cainumua bidióvarĩ ture đávabi úre joborōi. Ūre nájine đarĩ, codobobore đávabi. Aburi etavavu úre. Aru nái abujucu

dajocaiyubevabi úre. <sup>40</sup>Yu jëniariduvu mi bueimmarare, ne jaetovarãjiyepe ayu ñai abujucure. Æbenita ñaine jaetovarĩ majibema na, arejamedã Jesúre.

<sup>41</sup> Jesús arejamedã:

—Muja, ijãravucavu, Jũmenijicure ju abevu aru ãmeina teivu máre, ¿aipijãravua cuquidi yu mujaque? ¿Aru aipijãravua ñãjiquidi yu mujaque, muje ju arãjiyepe ayu ji coyuiyede? Davajacu mímacure ji yebai, arejamedã Jesús.

<sup>42</sup> Aru ñai juedocu ñi eaiyedeca Jesús yebai, ñai abujucu bidióvarĩ ture ñarejamedã úre. Æbenita Jesús jararĩ abujucure, jaetovarejamedã úre ñai juedocure jocarĩ. Que ñari meadarejamedã úre. Aru jacopaiyovarejamedã jipacure. <sup>43</sup> Aru caivu cuicumarejaimada Jũmenijicu ñi urarõ paruéde.

### **Jesús ñi coyũno cojedeca ñi yaiquĩnore**

*(Mt 17.22-23; Mr 9.30-32)*

Põeva ne urarõ dãpiaiyede caiye ñi ñaiye báquede, Jesús arejamedã ñi bueimmarare:

<sup>44</sup> —Me jápiajarã caiye iye ji coyuiyede mujare. Ærumetebejarã. Yure, Jũmenijicui daroimu mácure ãmũpe, jëni jĩnajivũbu ji mauvare, Jesús arejamedã náre.

<sup>45</sup> Jũmenijicu jápiarĩ eaicõjemenejamedã náre iye Jesús ñi coyuiyede. Que baru jápiarĩ coreóvabedejaimada. Aru jidurivu jëniari jáiyubedejaimada úre iye ñi coyũno mácarõre náre.

### **¿Ñamema parucu maje jënebore?**

*(Mt 10.40; 18.1-5; Mr 9.33-37; Lc 10.16; 22.24; Jn 13.20)*

<sup>46</sup> Jesúi bueimara jararĩ búrejaimada ne bajumia ñamene parucure ne jëneboi apevu pũeno. <sup>47-48</sup> Æbenita Jesús coreóvayu bácu ne dãpiaiyede ne ãmei, jënejamedã cüinácu juedocure. Aru úre núvari ñi yebai, arejamedã náre:

—Cüinácu põecu copu etayu baru ñai juedocure ji ãmiái, ji cõjeiyepe, que ñayu nopedeca copu etaibi yure. Aru ñai copu etayu baru yure, copu etaibi ñai yure daroyure máre. Que baru ñai mujacacu parubecu caivu pũeno, ñai cadateiyucu apevure, úrecabe jáve parucu Jũmenijicui jáinore. Põeva parurivũbu, cadateivu baru apevure Jũmenijicui jáinore. Æbenita ina jaboteiyurivu apevure, aru ñaicõjeiyurivu náre máre, parubevũbu Jũmenijicui jáinore, arĩ buedejamedã Jesús.

### **Majare jarabecu, majacacube**

*(Mr 9.38-40)*

<sup>49</sup> Juan arejamedã Jesúre:

—Mu, bueipõecu, jácarã ñuã cüinácu ãmu abujuvare jaetovayure mi ãmiái, mi paruéque. Æbenita ñuãque ñi cube boje, “Ñabejacu” acarã ñuã úre, arejamedã Juan.

<sup>50</sup> Æbenita Jesús arejamedã:

—Ácu põecu maucuvabecu baru majare, majacacube ñi. Que baru úre nópe aye jaubeteavũ mujare, arejamedã náre Jesús.

### Jesús Santiagore aru Jüare máre ñi jaraino

<sup>51</sup> Joabejño marejávũya ñi muri nuquijãravu baquinó cavarõ mearo Jümenijicui curõita. Que baru Jesús, paruéque dápiarĩ, búrejamedã ñi nuiyede Jerusalén amicuriĩmaroi. <sup>52</sup> Ñi jipocai jarorejamedã ñre boro nuvacaipõevare. Aru ina nuri ecorejaimada Samaria amicurijoborõcaĩmaroi. Noi Jesús ñi equinore meadarãnuridurejaimada na. <sup>53</sup> Ñbenita ina Samariacavu copu etaiyubedejaimada Jesúre, ñi nuiye boje Jerusalén amicuriĩmaroita, ne ube boje diĩmarocavure. <sup>54</sup> Ñi bueimara pucarã, Santiago aru Juan, diede jáivu bácvu, jëniari járejaimada Jesúre:

—Mu, ññje jabocu, ¿jõdaicõjenajidi ñña toabore cavarõ mearo Jümenijicui curõquede, ne énajiyepa aivu? arejaimada na.

<sup>55</sup> Ñbenita Jesús copedini jararejamedã náre. <sup>56</sup> Aru nurejaimada apeno ñmaroi.

### Apevu Jesúque ne nuĩurĩduino

(Mt 8.19-22)

<sup>57</sup> Jesújã mái nuiyede, cüinácu ñmu arejamedã Jesúre:

—Múque nuquijivũ yu caino mi nuinoita, arejamedã.

<sup>58</sup> Aru Jesús arejamedã ñre:

—Macayavimiva cuvama ne cobeá. Aru mĩjina cuvama ne juaiboa. Ñbenita yu, Jümenijicui daroimu mácu ñmupe, ji curõ cuvabevu, arejamedã Jesús.

<sup>59</sup> Aru apecure arejamedã:

—Dajacu yáque, arejamedã.

Ñbenita arejamedã Jesúre:

—Mu, ji jabocu, mamarumure jaruvaquijivũ cãreja jipacure cãracobei, ñi yayiede, arejamedã.

<sup>60</sup> Ñbenita Jesúcapũravu arejamedã:

—Ina yaivu bácvupe paivu, ne jápiabe boje Jümenijicui jaboteinoque yáviayede, jaruvajarãri ina yaivu bácvure. Ñbenita múcapũravu coyucunujacu Jümenijicui jaboteinoque yáviayede, arejamedã Jesús.

<sup>61</sup> Aru apecu máre arejamedã Jesúre:

—Mu, ji jabocu, múque nuquijivũ yu. Ñbenita mamarumure, “Nuñũmu” aicõjejacu yure ji cãramicavure, arejamedã.

<sup>62</sup> Jesúcapũravu arejamedã ñre:

—Põecu ñaiyucu baru ji urõre aru ñi baju urõre máre, buojabebi memecayũ yure. Põeva ñpe paivure Jümenijicu jabotebecube, arĩ buedejamedã náre Jesús.

### Jesús ñi bueicõjeni jaraino setenta y dos paivure

(Mt 9.37-38; 10.7-16; 11.24; Mr 6.8-11; Lc 9.3-5; Hch 13.51; 1 Co 9.14; 1 Ti 5.18)

**10** <sup>1</sup>No yóboi Jesús beorejamedã apevure setenta y dos paivure. Náre jarorejamedã ñi jipocai pucarã matuiyeda cainoa ñmaroi ñi nuquinoai. <sup>2</sup>Aru jaroyu, arejamedã náre:

—Obedivu põeva curivu, Jümenijicui yáviaye méne majibema na cãreja, muje buenajimara iye yáviaye méne, Jümenijicui meadarãñiyepa aivu náre, ne ju aiyede diede. Ñbenita obebevubu memecaivu Jümenijicure. Que baru

jénijara úre, úi daroquiyepa aivú apevú buenajivure ina pöevare. <sup>3</sup>Nuri jájara muja. Jaroivú mujare ijáravucavú jéneboi yópe ovejavai núiyepa áimara jijecurivú jéneboi. <sup>4</sup>Nuvamejara muja táuturare, curubúare, aru curaidoare máre. Borotede númejara muje mái copuimaraque. <sup>5</sup>Ári muja ecoivú cúnádami cūramine, mamarumú ajará yópe: “Iñamicavú, mearo cujará muja”. <sup>6</sup>Aru diñamicavú mearoque ne curu, nópe ajará náre. Ubenita mearoque ne cubedu, “Mearo cujará muja”, abejará náre. <sup>7</sup>Cujará cūinádámima. Que teni ári aru úcuri tejará ne jíyede mujare, muje náre cadateiye boje. Muja memecaivupebu. Aru memecaipöecure bojedaiye javuvú úi memeinore. Ubenita númejara cūramia coapa.

<sup>8</sup>Ecoivú baru muja ímaroi, aru ina ímarocavú ne copu etaru mujare me, ájara apejéne ne jíyede mujare. <sup>9</sup>Meadajará íjimarare. Aru coyujará náre yópe: “Jūmenijicú jabotecuyume pöevare maumejiena”. <sup>10</sup>Ubenita ecoivú baru muja ímaroi, ne copu etabenoi mujare diímarocavú pöeva, cuímai nuri, ajará yópe: <sup>11</sup>“Muje jobore ñujare jéiyede ñuje cuboba cāchinoi pupeivubu ñuja, muje copu etabe boje aru muje jápiabe boje ñujare. Ubenita majijará iyede: Jūmenijicú jabotecuyume pöevare maumejiena”, ajará. <sup>12</sup>Coyuyubu mujare: Ina Sodomacavú bácvu pare ámeina tedejaimada. Ubenita diímarocavú, mujare copu etabevú bácvu, ñájinajarama ina Sodomacavú bácvu pueno baju Jūmenijicú ñájiovaquijárvu baquinóre pöevare, ne ámeina teiye boje, arí buedejaimada náre Jesús.

#### **Apeímarocavú ne ju abeno Jūmenijicure**

(Mt 10.40; 11.20-24; Mr 9.37; Lc 9.48; Jn 13.20)

<sup>13</sup>Jesús arejaimeda cojedeca:

—¡Muja, judíova, Corazícavú, ámeno ñájinajaramu muja! ¡Muja, judíova, Betsaidacavú máre, ámeno ñájinajaramu muja! Pöecu úi daru pöeva ne ñari majibede yópe ji ñaiyepa muje jáiyede Tirocavú aru Sidócvu máre ne jáiyede, jave chíori ne ámeina teiyede, oatuvajebu ne ñaiyede. <sup>14</sup>Ubenita muja ñájinajaramu Tirocavú aru Sidócvu pueno baju, Jūmenijicú ñájiovaquijárvu baquinóre pöevare, ne ámeina teiye boje. <sup>15</sup>Aru muja, judíova, Capernaucavú, jave numenajaramu muja cavaró mearo Jūmenijicú curói. Quénora muja nurajaramu toabo cūiméboi, arejaimeda Jesús.

<sup>16</sup>Jesús arejaimeda úi bueimarare cojedeca:

—Ñai pöecu jápiayú baru mujare, jápiaibi yure máre. Ñai pöecu ubeçu baru mujare, ubebi yure máre. Aru ñai pöecu ubeçu baru yure, ubebi ñai yure daroyú bácvu, Jūmenijicure máre, arejaimeda Jesús.

#### **Setenta y dos paivú ne copaini daino**

<sup>17</sup>Ina setenta y dos paivú, Jesúi jaroimara mácvu, copaidejaimada torojurivú Jesús yebai. Aru yópe arejaimada úre:

—¡Mu, ñuje jabocu, abujuva máre ju ama ñuje cōjeiyede náre mi ámiái, mi paruéque! arejaimada na.

<sup>18</sup>Aru Jesús arejaimeda náre:

—Jávu yu ñai abujuvai jabocure, úi ámiá Satanás, tuyure cavaróre jocarí yópe yaroino tuiyepa. <sup>19</sup>Mujare parure ñaivú yu, muje járu ádavare aru murivare máre, muje curarájiyepa ayu náre. Aru muja parurivutamu ñai muje

maucu, abujucu pueno. Que baru ámeno ðabenama mujare áðava aru muriva máre. <sup>20</sup> Ëbenita mja, torojurivú ina abujuva ne ju aiye boje mujare, pueno baju torojurá muje ámiá toivaino cue boje cavarô mearo Jümenijicui curô. Que baru mja cavarâjaramu járavu cüiméjáravu baquinóre, arejamedá náre Jesús.

### **Jesús torojucu**

(Mt 11.25-27; 13.16-17; Jn 3.35; 10.15)

<sup>21</sup> Dinumümiareca Jesús, torojurí üi ümei Espíritu Santoi paruéque, yópe arí, coyurejamedá Jümenijicure:

—Mu, jipacu, cavarô mearocacu aru ijáravu jabocu máre, mearore jívú mure, mi jáðovame boje caiye iye ji coyuiyede ina majidivure, aru mi jáðovaiye boje caiye iyede ina majibevure. Mu, jipacu, jívú mure mearore mi nópe ðaiye boje, arejamedá Jesús.

<sup>22</sup> Jümenijicure coyurí buojari, Jesús arejamedá ina éque curivure:

—Jipacu Jümenijicu jíbi yure caiye ji majiéde aru caiye ji paruéde máre. Ñame majibema yure. Quénora majibi jipacu. Ñame majibema jipacure. Quénora majivu yu, aru na máre ina ji coyumara, arejamedá Jesús.

<sup>23</sup> Dinumu ajevure ðajocarí, Jesús arejamedá üi bueimarare:

—¡Torojuma ina pôeva jáivu caiye iye muje jáiyede! <sup>24</sup> Coyuyubu mujare: Obedivu Jümenijicui yávaiyede coyucaipôeva aru jabova máre jáiyuríduquemavu caiye iye muje jáiyede. Ëbenita jámetequemavu. Aru jápiayuríduquemavu muje jápiaiyede. Ëbenita jápiabetequemavu, arejamedá Jesús.

### **“Samariacacure” jári dápiarí ne ðarâjiiyepe aino**

(Mt 22.35-40; Mr 12.28-34)

<sup>25</sup> Cüinácu pôecu, Jümenijicui ðaicôjeiyede majicu, Jesús majiéde majiyucu, nacajari, jëniari járejamedá úre:

—Mu, bueipôecu, ¿aipe ðaquidi yu, cuvacyu járavu cüiméjáravu baquinóre? arejamedá ü Jesúsre.

<sup>26</sup> Jesús arejamedá úre:

—¿Aipe Jümenijicu toivaicôjenejaquemari üi ðaicôjeiyede Moisés bá cure javede? ¿Aipe majicurú iye mi bueiyede? arejamedá Jesús.

<sup>27</sup> Ju ayu arejamedá úre:

—Ëjacu mi jabocu Jümenijicure caino mi ümeduque, caino mi ümeque, caino mi baju paruéque, aru caino mi majiéque máre. Aru újacu mícure yópe mi ñepe mi baju, arejamedá Jesúsre.

<sup>28</sup> Que teni Jesús arejamedá úre:

—Meavu mi ju aino. Ðajacu yópe mi coyuinope, cuvacyu járavu cüiméjáravu baquinóre, arejamedá Jesús.

<sup>29</sup> Ëbenita ñai ümu, ajevure ne me járajiiyepe ayu úre, jëniari járejamedá Jesúsre:

—¿Ñamema ñai jícu? arejamedá ü.

<sup>30</sup> Jesús ju ayu, arejamedá úre:

—Cüinácu ümu ëmeni nuquemavu Jerusalén ámicurímarore jocarí, nuñu Jericó ámicurímaroi. Que teni ñavacurivu jëquemavu úre, tatorájivu üi

cávaede. Ìquemavu ùi cuitótecajede aru caiye ùi apejiene máre. Aru jara popequemavu úre. Pare churiá ðaquemavu. Que teni dajocaquemavu úre, “¿Yaiyú bárica?” arí ðápiavú. <sup>31</sup>Nópe teniburu yóboi, cùinácu sacerdote émeni nuquemavu dimamica. Aru jáquemavu ñai parayure joborói, ma écarui. Ëbenita úre jári, vaiquéstavu. <sup>32</sup>Nopedeca cùinácu Jümenijicui cüramine memeipöescu, levita ámicuriyajubocacu, eaquemavu joabenoí ñai parayu yebai. Ëbenita úre jári, vaiquéstavu.

<sup>33</sup>No yóboi, cùinácu apenocacu, Samaria ámicurijoboröcacu, nuñu dimamica, eaquemavu ñai parayu yebai. Aru cõmaje ároje jáquemavu úre. <sup>34</sup>Ëi yebai nuri, ùi churiáre yuaquemavu olivo ámicuricu jéidua córore aru vino úyaicorore máre. Aru cuitótecajecávaque buorí juoquemavu úre. Que teni nacovari ñóquemavu ùi tubamara. Aru nuvaquemavu úre cuipöeva ne cáñami, meadacuyu úre. <sup>35</sup>Cõmiájáravu jíquemavu táuturaturavare ñai cáñami upacure, bojedacuyu ùi meadaquiyede ñai tatoimu mácure. Aru aquemavu úre: “Meadajacu ñai ùmure me. Que teni ji copainumuta bojedaquijivu mure caiye mi jíye báquede úre”, aquemavu ñai Samariacacu, arejameda Jesús.

<sup>36</sup>Coyurí buojari, ñai majicure Jümenijicui ðaicöjeiyede ùi coyuiye báquede Moisés bácare jëniari járejameda Jesús:

—¿Ácu pöescu ina yóbecurá ùmuvacacu batequémari cadateyu ñai ùmure, ñavacurivu ne tatoimu mácure? arejameda Jesús.

<sup>37</sup>Ë ju ayu arejameda Jesúre:

—Ñai cõmaje ároje jári, cadateyu bácube úre, arejameda.

Jesús arejameda úre:

—Caride nuri ðajacu ùi ðaiye báquepe. Cõmaje ároje jári, cadatejacu mu apevure, arejameda Jesús.

### **Jesús ùi jácunuino Marta aru María yebai**

(Jn 11.1)

<sup>38</sup>Jesús nurejameda mái ùi bueimaraque. Aru ìmajinoi ecoiyede, cùináco nomió, òi ámiá Marta, copu etarejacoda Jesúre òi cürami. <sup>39</sup>Martai yóco máre curejacoda, òi ámiá María. Ico dobaco Jesúi cuboba yebai, nópe ina judíovai ðarí cõmajiyeye ne buenajiyeye aivu, jápiado barejacoda ùi bueiyede. <sup>40</sup>Ëbenita Marta pare cárijinejacoda, òi áiyede memeie boje. Que baru Jesús yebai nuri, arejacoda úre:

—Mu, ji jabocu, ¿ye baju ámeni jíyocoi dajocaino yure, cùinácona memeivu yu? Cadateicöjejacu óre yure, arejacoda ò Jesúre.

<sup>41</sup>Ëbenita Jesús arejameda óre:

—Mu, Marta, cárijivu mu caijé apejé boje. <sup>42</sup>Ëbenita cùinárona javvu mure. Yópe María òi ðaiyepe paino mearotamu. Òi jápiaie ji bueiyede mearotamu. Que baru pöescu cubebi ícuyu òi ðaiyuröre, arejameda Jesús.

### **Jesús ùi bueino Jümenijicue jëniainore**

(Mt 6.9-15; 7.7-11; Jn 14.13-14; 15.7, 16; 16.23-24; 1 Jn 3.21-22; 5.14-15)

**11** <sup>1</sup>Cùinájáravu Jesús jëniañu marejameda jípacu Jümenijicue. Aru ùi jëniariburu yóboi, cùinácu ùi bueimaracacu arejameda úre:

—Juan Bautista bácu Jümenijicue jëniainore buequemavu ùi bueimarare. Que baru mu máre buejacu ñujare Jümenijicue jëniainore, arejaimada na.

<sup>2</sup> Aru Jesús arejamedá náre:

Muja jëniaivu Jümenijicüque yópe ajarā: “Mu, ñujepacu, meacu bajubu mu. Que baru caivu pōeva müre pueðarī mearore jįjarāri. Báre ðajacu mu mi jabotequiyede pōevare. <sup>3</sup> Jįjacu ñujare jāravua coapa ñuje āiyeva. <sup>4</sup> Aru ārūmetejacu ñuje āmeina teiyede yópe ñuja máre ñuje ārūmeteyepe caiye apevu ne āmeina ðaiyede ñujaque. Nai abujuvai jabocui jujovajuroede ñujare vainí tuicōjemejacu ñujare, ñuje ðabenajipepe āmenore”, arejamedá náre Jesús.

<sup>5-7</sup> Aru Jesús coyurejamedá náre yópe:

—Pōecu ũi nūru cūinācu ũi yóvaimu yebai, acuyū ũre yópe: “Yúcacu, jįjacu yure yóbecuriboa páubore. Apecu ji yóvaimu edaibi ji cūrami cuyū. Aru āiye cubevu yure. Que baru jįquiye ũre eabevu yu” ayure, ñai ũi yóvaimu, ũi cūrami cucu, ju abejebu ũre yópe: “Cārijovamejacu yure. Jave bievu yu ji cūramine. Aru jįmara jave cāivutamu. Que baru müre nacajari jįyu buojabevu yu”. ũi yóvaimu abejebu ũre yópe. <sup>8</sup> Coyuyubu mujare: ũi yóvaiye boje jįbecube ũre. Quénora ũi cārijovaiye boje, nacajari jįcuyume caiye iye jauéde ũre. <sup>9</sup> Que baru coyuyubu mujare: Jēniare nujara Jümenijicure, aru jįcuyume muje jēniainore ũre. Vore nujara ũre, aru earājaramu. Aru muje órejare nuiyede jedevacobei, Jümenijicu voacacuyume mujare. <sup>10</sup> Que baru caivu jēniaivu Jümenijicure cuvama ne jēniainore. Aru caivu voivu eadama ne voimure. Aru caivu órejaivure jedevacobei voaibi, arejamedá Jesús, náre bueyu.

<sup>11</sup> Cojedeca Jesús, yópe arī, buedejamedá náre:

—Muja juedocuvavivū, ¿mujemacu ũi jēniaru mujare páubore, jįje bārīca muja ũre cūrabore? ¿Aru mujemacu ũi jēniaru mujare moacure, jįje bārīca muja ũre āðare? <sup>12</sup> ¿Aru mujemacu ũi jēniaru mujare jįðure, jįje bārīca muja ũre murine? Nópe ðabenamu muja. <sup>13</sup> Que baru muja āmena méne cuvade jįni majiépedeca mujemare, majepacu Jümenijicu çavarō mearocacu pueno méne cūvaede jįni majibi muja jēniaivure ũque. ũvacari darocuyume ñai Espírītu Santore caivu jēniaivure ũre, arejamedá Jesús.

**“Abujuvai jabocui paruéde cuvabi ũ” arī, ne boro coyurī aðarīduino Jesúre**

(Mt 9.34; 10.25; 12.22-30, 38; 16.1; Mr 3.20-27; 8.11; 9.40)

<sup>14</sup> Dinumure Jesús jaetovayū barejámedá abujucu yávabecure cūinācu ũmure jocarī. Aru ñai abujucu ũi etarīburu yóboi, ñai ũmu yávabecu bácu yávarejamedá. Que baru ina pōeva jáivu bācavu, pare dápiaivu, cucumarejaimada. <sup>15</sup> ũbenita apevu ina pōevacavu arejaimada:

—Beelzebú, abujuvai jabocu, imamume ũ. Que baru ũi paruéque jarūvaibi abujuvare, boro coyurī aðarīdurejaimada Jesúre.

<sup>16</sup> Aru apevu jujovaiyurivū barejáimada ũre, ne majinajipepe aivu jāve ũi ðaru ũi ðaiyede Jümenijicui paruéque. Que baru jēniarejaimada ũi jádovaquiyepe aivu pōeva ne ðarī majibenore. <sup>17</sup> ũbenita Jesús coreóvayū ne dápiayede, “Beelzebú ũi imamu” aivure, arejamedá náre:

—Cūináro jaborōcavu āðamateivū baru ne bajumia, ina jaborōcavu cūinájarama na. Nopedeca cūináðami cūramicavu āðamateivū baru ne bajumia, diñamicavu cūinájarama na. <sup>18</sup> Nopedeca bájebu ñai abujuvai jabocu, jaetovayū baru abujuvai jabocure. Áðamateyu bájebu ũi bajuma.

Aru jaetovayũ baru abujuvare, joe parũcu cubejebu ũ. “Abujuvai jabocu parũque jaetovaibi abujuvare”, muje aiye boje yure, yópe coyuyubu mujare: <sup>19</sup> ¿Ji jaetovaru abujuvare abujuvai jabocu parũque, ñamei parũque jaetovaidi mujacavũ abujuvare? Que baru mujacavũ abujuvare jaetovaivũ jáðovaðama mujare muje borocuede yure ũbenina. <sup>20</sup> ũbenita Jũmenijicui parũque jaetovayubu yũ abujuvare. Que baru jáðovaivũ yũ Jũmenijicui jaboteyure mujare, arejameða Jesús.

<sup>21</sup> Dinumure Jesús coyurejameða náre yo jári dápiarĩ ne ðarãjiyepe ainore, ne majinajiyepe ayũ parũcure abujuvai jabocu pũeno.

—Ŭmu parũcu jári coreyũ ũi cũramine ũi boaiyeque, me meadaquemavũ ũi cũaede. <sup>22</sup> ũbenita apescu ũi pũeno parũcu earĩ, boarĩ tatoquemavũ ũre. Ŭi boaiyede, aru ũi cũaede nuvari, coavaquemavũ diede apevũ ũi yóvaimaraque. <sup>23</sup> Que baru ñai yóvabecu maucũaibi yure. Aru ñai apevure yóvare ðabebi yure, náre maucũvare ðaibi yure, arĩ buedejameða Jesús.

### **Jesús ũi coyũino abujucui copaino**

(Mt 12.43-45)

<sup>24</sup> Bedióva cojedeca Jesús buedejameða náre:

—Abujucu etayũ bácu ũmure jocarĩ, voibi ũi jabuóvaino penenoi. ũbenita jabuóvaino eabecu baru, copaiyubi ñai ũmu, ũi etaimũ mácurecata. <sup>25</sup> Aru copaini nuñũ, eaibi ñai ũmu meacure, yópe cũrami oeni meaðaĩñamipe páyure. <sup>26</sup> Que baru apevũ siete paivũ abujuva ũi pũeno ámenare vorĩ earĩ, nuvaimi ũque. Aru ina ðaicõjeivũ ñai ũmure, ámeðaðama ũre pũeno baju, arĩ buedejameða Jesús.

### **Jesús ũi coyũino torojuede**

<sup>27</sup> Jesús ũi yávaiedeca, cũináco nomió ina obedivũ põeva jẽneboi codoboborĩ arejacoda ũre:

—Mure juedocũvaco báco, aru mure bucũóvado báco mearo torojujacorĩ õ, arejacoda õ.

<sup>28</sup> ũbenita Jesús arejameða óre:

—Ŭi pũeno torojurãjarama ina põeva Jũmenijicui yávaiede ju arĩ, ðaivũ yópe die coyũinope, arejameða Jesús.

### **Põeva ne ðarĩ majibenore Jesúre ðaicõjeniduino**

(Mt 12.38-42; 16.4; Mr 8.12)

<sup>29</sup> Obedivũ põeva ne cójjiyede Jesús yebai, yávarĩ búrejameða náre:

—Ijãravũcavũ ámena jáiyuriduyama põeva ne ðarĩ majibenore. ũbenita jámenama apenore Jũmenijicui ðainore náre, quénora yo Jonás mácure vaino mácarõre. <sup>30</sup> Yópe Jũmenijicui ũi jaroie báquepe Jonás mácure, ũi coyũcaquiyepẽ ayũ ũi yávaiede nócvũ, Nínive ámicurĩmarocavũ bácvure, nopedeca Jũmenijicui darorejame yure, ũi daroimũ mácure ũmure, ji coyũcaquiyepẽ ayũ ũi yávaiede ijãravũcavũ. Aru yópe Jonás mácu cẽe báquepe moacu uracui yapibũ jívui yóbecurijãravũ aru yóbecurĩnamia máre, nopedeca yũ, Jũmenijicui daroimũ mácu ũmure, cũcũyũmu joborõ jívui yóbecurijãravũ aru yóbecurĩnamia máre. <sup>31</sup> Jũmenijicui ñãjiovaquijãravũ baquinóre põevare, ne ámeina teiye boje, ico jaboco

aviá daino cācopūravucaco báco nacajacodome ina pōeva ijāravucavunque aru āmecorocodome náre, ne yure ju abe boje. Ō máco darejaquemavu joarō joborōre jocarī, jápiacodo ñai Salomón mácuī coyuiye báquede majiéque. Ūbenita Salomón mácuī majié pueno baju bueyubu yu. <sup>32</sup> Aru Jūmenijicui ñájiovaquijāravu baquinóre pōevare, ne āmeina teiye boje, ina ūmva mácavu, Nínivecavu bācavu, nacajarajarama ijāravucavunque aru āmecororājarama náre, ne yure ju abe boje. Ina Nínivecavu bācavu chíori ne āmeina teiye báquede oatuvarejaquemavu, jápiaivu bācavu Jonás mácuī coyuiye báquede Jūmenijicui yávaivede. Ūbenita Jonás mácuī majié pueno baju bueyubu yu, arejameđa Jesús.

**Jesús ũi bueino pōeva ne ďainore ne ďápiainope**

(Mt 5.15; 6.22-23; Mr 4.21; Lc 8.16)

<sup>33</sup> Cojedeca Jesús budejameđa ina ũque curivure:

—Pōecu pēoibure pēoriburu yóboi, ñómemi dibure cobe jívui aru puebu cāchinoi máre. Quénora ñoimi dibure jocuve puenora, ina ecoivu nore ne járajipeye ayu. <sup>34</sup> Pōeva ne yacorua, pēoinope, járe ďaivu náre, ne memenajipeye aino aru ne majinajipeye aino ári ne nuiyede. Pōeva ne yacorua ijetedu náre o ne jáiye bíjaru náre, ye ne memeiyede aru ne nuiyede máre majibenama. Aru pōeva ne ũme, yacoruape paino, pēore ďaivu ne ďápiayede. <sup>35</sup> Que baru pōecu cainumua ďápiayu baru ijāravuquede, ijetede ďaibi ũi ũmene, ũi ďápiabe boje cavarō mearo Jūmenijicui curōquede. Aru ñai pōecu ũi ũmene bíjacuyume. <sup>36</sup> Que baru pōeva ne jámenu ne yacoruaque āmenotamu. Ūbenita pueno āmenotamu ne ũme ñemino maru, arī budejameđa Jesús.

**Jesús ũi boro coyurī adaino fariseovare aru Jūmenijicui yávaive báquede bueipōevare**

(Mt 23.1-36; Mr 12.38-40; Lc 20.45-47)

<sup>37</sup> Jesús ũi yávariburu yóboi, cūinácu fariseovacacu “Ācudajacu” ayu, órejarejameđa ũre ũi cūrami. Que baru Jesús ecorī, dobarejameđa tuoiva yebai. <sup>38</sup> Aru ñai fariseo āmeina járejameđa ũre, ũi cojabe boje ũi áquiye jipocai. <sup>39</sup> Aru Jesús arejameđa ũre:

—Muja fariseova joaivubu muje ũcuidoare, aru jororuare máre puenomia, pōeva ne jáiyede. Ūbenita muja tatoiyurivubu apevu ne cūvaede. Que teni āmeno baju ďaivubu muja. Mearo ďaiye apevure mearotamu joare ďaicōjeiye pueno. <sup>40</sup> ¡Ārumevu muja! Ñai Jūmenijicu cuedayu maje baju puenocarōre cuedarejaquemavu jívucarōre, maje ũmene máre. <sup>41</sup> Ūbenita muje cūvaede jívunqueďe jíjarā cōmaje ārojarivure. Nópe ďaivu mearo ďápiarī curājaramu muja. Que baru mearo baju ďaivubu muja.

<sup>42</sup> ¡Muja, fariseova, āmeno ñájino cūvarājaramu muja! Caiye muje oteiyoa, quíjiyoa, bojecubeyoca, caipucapuruaape paiyocare cūvarivu, cūináyocare jíyavū Jūmenijicure. Ūbenita mearo ďaivure apevure aru jecuéde Jūmenijicure máre ārumevu muja. Caipucapuruaape paiye muje cūvede jocarī, cūinárore Jūmenijicure jíye jaavu mujare. Ūbenita pueno baju jaavu mujare muje mearo ďaiye apevure aru muje jecué Jūmenijicure máre. Que ďaru me cojuquiyebu Jūmenijicure.

<sup>43</sup> 'iMuja, fariseova, ámeno ñáino cvarājaramu muja! Muje ue boje dobae mearoa baji judíovai cójijiñamiare aru muje ue boje pōeva ne jacoyuiyede mujare tãibui, ñájinajaramu muja. Ñájinajaramu muje ue boje apevure ne dápiayede mujare mearape apevu pueno.

<sup>44</sup> 'iÁmeno ñáino cvarājaramu muja! Yaivu bácavu ne jobocobeape paivu. Pōeva cuivubu dicobea puenora, jámevava. Que baru ne cuiyede jaruvaino puenora majibema na. Nopedeca pōeva cuivubu muje yóboi, ũbenita muje ũmene jámevava. Que baru muje ámeina dápiayede majibema na, arejamedá Jesús, náre bueyu.

<sup>45</sup> Aru cūinácū pōecu, Jūmenijicui daicōjeiyede majicu, arejamedá Jesúre:

—Mu, bueipōecu, mi que aye ámecoroivu ñujare máre, arejamedá Jesúre.

<sup>46</sup> Aru Jesús arejamedá náre:

—Muja, Jūmenijicui daicōjeiyede majidivu máre ámeno ñáino cvarājaramu muja, muje daicōjeiye boje apevure ne ñaivu buojabede. Ũbenita mujavacari ye cadatebevu náre. Que baru muja máre ñájinajaramu.

<sup>47</sup> 'iÁmeno ñáino cvarājaramu muja! Muja ñaivubu meadamia cūramiare ina Jūmenijicui yávaiyede coyucaipōeva mácavu ne jobocobea báque puenoi, pueðarājivu na mácavure. Ũbenita mujeñecuva mácavu boarí jaruvarejaquemavu na mácavure. <sup>48</sup> Muje ñaiyede diñamiare, jádovaivubu ju aivure ne ámeina teiye báquede, ne boarí jaruvaiye báquede Jūmenijicui yávaiyede coyucaipōeva mácavure.

<sup>49</sup> 'Que baru Jūmenijicu ũi majiéque arejaquemavu yópe: “Jarocuyumu yure yávaiyede coyucaipōevare aru ji yávaiye méne beorí coyucōjeimarare máre. Apevu ina yure yávaiyede coyucaipōevacavure aru ina ji yávaiye méne beorí coyucōjeimaracavure máre ámeina ñarí, boarí jaruvarājarama náre”, arejaquemavu Jūmenijicu. <sup>50</sup> Ne nópe ñaiye boje, Jūmenijicu yaicōjecuyume ijāravucavure ijāravure ñarí buiyedata. <sup>51</sup> Apecu ũi boarí jaruvaiye báque boje ñai Abel bácure, aru apevu ne boarí jaruvaiye báque boje caivu Abel bácui yóbocavu bácavure máre pu Zacarías bácū bajita, ñai ne boarí jaruvaimu mácū Jūmenijicui cūrami tãibu coricai, jáve coyuyubu mujare: Ijāravucavu ñájinajarama ne boarí jaruvaiye báque boje.

<sup>52</sup> 'iMuja, Jūmenijicui daicōjeiyede majidivu, ámeno ñáino cvarājaramu muja! Jūmenijicui majiéde bueivuvacari, coyuyubevubu muja apevure, ne majibenajiyeye aivu. Jáve Jūmenijicui majiéde majibevu, majidivupe teivuvacari, apevure máre majicōjemevubu, arí buedejamedá náre Jesús.

<sup>53-54</sup> Jesús ũi yávaríburu yóboi nurejamedá nore jocarí. Aru no yóboi ina Jūmenijicui yávaiye báquede bueipōeva aru ina fariseova máre pare cárijovari jēniari járejaimada ũre, boro coyurí adaiyuríduivu ũi yávaiye boje.

**Jesús ũi coyuíno borocurí majiéde**

(Mt 16.6; Mr 4.22; 8.15; Lc 8.17)

**12** <sup>1</sup> Dinñutma obedivu pōeva cójijivu ne baju curarayede, Jesús, yópe arí, coyurí búrejamedá ũi bueimarare:

—Me ñajarā. Me jájara, muje dápiabenajiyeye yópe ina fariseova ne dápiayeye. Nácapūravu dápiavaivubu aipe ñarí jujovarājivu apevure. <sup>2</sup> Caiye jáðovame máque jároquiyebu. Aru dupiówaiye báquede máre majinajarama caivu pōeva. <sup>3</sup> Que baru caiye muje aye báquede ñeminoi, jápiarājarama

caivu pōeva Jūmenijicu coyure dayure diede miadároi. Caiye muje jūjuvaiye báquede máre tucubua jívui ajevure jocarí, jápiarājarama caivu pōeva Jūmenijicu coyure dayure diede ne cójijinoi, arejamedá Jesús.

**Jesús ũi coyũino pōeva ne jidurājimure**

(Mt 10.26-31)

<sup>4</sup>Jesús coyurejamedá náre cojedeca:

—Muja, ji yóvaimarare, coyuyubu mujare yópe: Jidubejarā ina boarí jaruvaivure muje bajure aru apeno đarí buojabevure. <sup>5</sup>Ūbenita coyūquijivu mujare muje jidurājimure: Jidujarā Jūmenijicure, ñaine muje baju yainíburu yóboi jaravarí buojayure toabo cūiméboi. Jáve coyuyubu mujare: ¡Jidujarā ũre! arejamedá Jesús.

<sup>6</sup>Aru cojedeca Jesús arejamedá náre:

—Yócavu bojedáivu cūinápurupe paivu mǵina quíjinare pucaturava tātutaturava bojecubeturavaque. Aru Jūmenijicu ārūmetebebi caivu ina mǵinare. <sup>7</sup>Jūmenijicu majibi caiye podamea cuede muje jipobui máre. Que baru jidubejarā. Muja bojecurivutamu caivu mǵina obedivu pueno, muje ũme yaibé boje, arí buedejamedá náre Jesús.

**Jesús ũi coyũino ũre ju aivure aru ju abevure**

(Mt 10.19-20, 32-33; 12.32; Mr 3.29; 13.11; Lc 21.14-15)

<sup>8</sup>Bedióva cojedeca Jesús, yópe arí, coyurejamedá ina ũque curivure:

—Coyuyubu mujare: Caivu ina ju aivure yure pōeva ne jáiyede, yu máre, Jūmenijicui daroimu mácu ũmupe, náre ju acuyamu Jūmenijicui ángeleva ne jáiyede. <sup>9</sup>Ūbenita caivu ina ju abevure yure pōeva ne jáiyede, yu máre náre ju abecubu Jūmenijicui ángeleva ne jáiyede.

<sup>10</sup>‘Caivu ina ámeina yávaivure yure, Jūmenijicui daroimu mácure ũmupe, Jūmenijicu ārūmeteibi ne ámeina teiyede. Ūbenita ina ámeina yávaivure ñai Espíritu Santore, Jūmenijicu ārūmetebebi ne ámeina teiyede.

<sup>11</sup>‘Aru ne jēni nuvaiyede mujare judíovai cójijiñamia yebai, aru ámeina teivure jēniari jáipōeva jipocai, aru jabova jipocai máre, “¿Aipe coyurājidi náre?” arí cārijimejara muja. <sup>12</sup>Dinumu maquinómareca ñai Espíritu Santo majicacuyume mujare iye muje coyurājiyede náre, arejamedá Jesús.

**Jesús ũi coyũino apejĩe ũrarō cūvaru jidojarōre**

<sup>13</sup>Cūinácú ina pōevacacu arejamedá Jesúre:

—Mu, bueipōecu, ñujepacu yaiyú bácu, ũi cūvaede dajocame. Aru jimamicu ñame caiye diede. Que baru coavaicōjejacu jimamicure die ũi cūvaede yúque, arejamedá Jesúre.

<sup>14</sup>Ūbenita Jesús arejamedá ũre:

—¿Name yure epedi ámeina teivure jēniari jáipōecupe o coavaipōecupe mujare? arejamedá Jesús.

<sup>15</sup>Aru arejamedá ina obedivu pōevare:

—¡Me jájara! Āujimejara muja. Pōecu ũi apué ámevu ũi ũrarō cūvaeque, arejamedá Jesús.

<sup>16</sup>Que baru ne jápiarí earājiyepe ayu, yópe arí, jári dápíarí ne đarājiyepe ainore coyurejamedá Jesús:

—Cūinácū ūmū cūve cūvacū ūrarō oteiyede iquemavū ūi jiore. <sup>17</sup>Que teni dápiquemavū ūi baju: “¿Aipe đaji yū? Caiye iye ji ūrarō oteiyede epeiñami cūvabevū yū”. <sup>18</sup>Que dápiarī, ūi baju yópe arī dápiquemavū cojedeca: “Tūvarī jarūvaicōjequijivū ji cūramia epeiñamiare. Aru tūvarī jarūvarīburu yóboi, đaicōjequijivū apedāmia pūeno ūradāmiare. Aru ūradāmia jīvui epeicōjequijivū caiye ji oteiyede aru caiye ji apejēne máre. <sup>19-20</sup>Aru ji baju dápiarī aquijivū yópe: ‘Ūrarō cūvaede cūvavū yū. Yure apure đaiyede cūvavū yū obediujaqueva. Que baru jabuóvarī, āri, ūcurī, torojave tequijivū yū dieque’, aquemavū”. Ūbenita Jūmenijicū aquemavū ūre: “¡Mū, ārumecu, cari ñamimareca yaiquijivū mū! Que teni caiye iye mi cūvae bījaquiyebu mure”, aquemavū ūre Jūmenijicū. <sup>21</sup>Nopedeca vaivū ūre, ñai pōecu jēñure ū jieva ūrarō cūvaede. Ūbenita Jūmenijicūi jáinoi ye cūvabebi ū, arī coyurejamedā Jesús.

### **Jesús ūi bueino Jūmenijicūi coreiyede ūi pōevare**

(Mt 6.25-34)

<sup>22</sup>No yóboi Jesús arejamedā ūi bueimarare:

—Coyuyubu mujare: Cārijimejara mūja apurivū mūje ārajyede, aru mūje bajure, mūje dorājyede. <sup>23</sup>Mūje apurō āiye pūeno bojecurōtamu. Aru mūje baju máre doiye pūeno bojecurōtamu, mūje ūme yaibé boje. <sup>24</sup>Jārijide apa ina mījinare. Na otebevureca, aru oteiyede máre imevureca, aru ne oteiyede epeiñamine máre cūvabevureca, ūbenita Jūmenijicū jībi náre ne āiyeva. Aru caivū mījina obedivū pūeno mūja bojecurivutamu, Jūmenijicūi pūeno ūe boje mujare. <sup>25</sup>Aru mujacacū cārijīñu maru cūināora cure đaiye majibebi ūi cuede ijaravui. Que baru cārijiyē meamevū mujare. <sup>26</sup>¿Buojarī đabevūvacari maiyójabenore, aipe teni cārijivurū mūja mūje đaiye majibede?

<sup>27</sup>Jārijide apa mūja iye cóvūare. Die bucuiyavū, mememevacari, aru ne cuitótecajeare máre naremevacari. Ūbenita coyuyubu mujare: Iye cóvua métamu, caiye icaje ñai jabocu bácu Salomón mácu cuitótecajea bojecuricajea pūeno. <sup>28</sup>¡Mūja pare quījino ju aivubu Jūmenijicure! Jūmenijicū nópe mearo đaibi iye cōriáre, caride dái cuede aru javenare pōeva ne juarājyede. Nopedeca Jūmenijicū jícuyume mujare mūje cuitótecajea meacajeare caiye iye cóvua pūeno. <sup>29</sup>Que baru cārijini vobejarā mūje ārajyede aru mūje ūcurajyede máre. <sup>30</sup>Ina Jūmenijicure ju abevū cārijini vođama caiye iyede, ne ārajyede, aru ne ūcurajyede máre. Ūbenita majepacu Jūmenijicū majibi caiye iye mujare jauéde. <sup>31</sup>Ūbenita vojarā mūja Jūmenijicūi jaboteinoquede, mūje đaiyue boje mearore yópe ūi đaicōjeiyepe. Aru Jūmenijicū jícuyume mūje ārajyede, mūje ūcurajyede, aru cuitótecajeare máre, arī buedejamedā náre Jesús.

### **Jesús ūi bueino maje cūvarājyede mearo bajure cavarō mearoita**

(Mt 6.19-21)

<sup>32</sup>Cojedeca yópe arī, buedejamedā Jesús:

—Mūja, jīvū, obebejinavacari jidubejarā. Majepacu Jūmenijicū, ūi me boje, epecuyume mujare jabovava ūi jaboteinumure. <sup>33</sup>Jíni bojedajarā mūje cūvaede aru tāturare ĩniburu, jījarā cūve cūvabevure. Que teni cūvarājaramu cainumua mūje cūvae me cūiméne cavarō mearo

Jūmenijicui cūrōi, ñavaipōeva ne ĩmenoi aru bocomiva ne āmenoi. <sup>34</sup> Que baru mʼje cʼvae cūrōre dāpiarājaramu mʼje ũmeque mʼre, arejamedā Jesús.

### Jesúre meateni coreino

(Mt 24.43-44; 25.1-13; Mr 13.34-36)

<sup>35</sup> Jesús, yópe arĩ, budejamedā ina ũque cʼrivure:

—Meatejarā mʼja yópe pōeva ne memenajiye jipocamia ne meateiyepe. Buojarā mʼje jārīóicāvare aru pōjara mʼje pōibure. <sup>36</sup> Dajará yópe ina memecaipōeva ne ðaiyepe coreivʼ ne jabocure, voarājivʼ maumena ũi copaiyede purubʼorĩ torojʼve teinore jocarĩ. <sup>37</sup> Nai jabocʼ darĩ earu ina ũre memecaipōeva coreivʼre, torojʼrājarama na. Jāve coyuyʼbu mʼjare: Nai jabocʼ buocuyʼme ũi jārīóicāvare. Aru náre dobaicōjenĩ tuoiva yebai, jícuyʼme ne ārajīyeva. <sup>38</sup> Que teni ñai jabocʼ ũi ðaiyede ñami coricai o miadāe tuyede, ina memecaipōeva coreivʼ baru ũre, me torojʼrājarama na, ũi mearo ðacaquiye boje náre. <sup>39</sup> Me dāpiarā iyede: Ñai cūrami upacʼ majibebi aipiyede ñavaipōecʼ dacuyʼre. Majicʼ baru ñavaipōecui daquiyede, coreni, ecoicōjemeni, ñavaicōjemejebu ũi cūramiquede. <sup>40</sup> Yʼ mʼre, Jūmenijicui daroimʼ mácʼ ũmʼpe, dacuyʼmu yʼre mʼje corebenumʼre. Que baru meateiye jāvʼ mʼjare mʼre, arejamedā Jesús.

**“Memecaipōecʼ jʼ ayʼre aru memecaipōecʼ jʼ abecure” jārĩ dāpiarĩ ne ðarājīyepe aino**

(Mt 24.45-51)

<sup>41</sup> Pedro jēniari jārejamedā Jesúre:

—Mu, ñʼje jabocʼ, ¿coyucacurʼ mu yo jārĩ dāpiarĩ pōeva ne ðarājīyepe aino mácʼrōre ñʼjare? ¿O coyucacurʼ yore caivʼre? arejamedā Jesúre.

<sup>42</sup> Aru Jesús arejamedā ũre:

—Coyuqijivʼ mʼjare ũi borore ñai memecaipōecure jʼ ayʼre ũi jabocure aru majicure mʼre. Nai cūrami upacʼ coreicōjecuyʼbe ñai memecaipōecʼ majicure, ũi jíquiyepʼ ayʼ yebacavʼre ne ārajīyeva caijāravʼna. <sup>43</sup> Nai cūrami upacʼ copaini dayʼ, earu ũre memecaipōecure ðayʼre yópe ũi cōjeinope, torojʼucuyʼbe ñai memecaipōecʼ, cūrami upacʼ ũi jíquiyepʼ boje ũre bojedaino mearore. <sup>44</sup> Jāve coyuyʼbu mʼjare: Ñai cūrami upacʼ coreicōjecuyʼbe ñai memecaipōecure caiye ũi cʼvaede. <sup>45</sup> Ũbenita apesʼ memecaipōecʼ, ñai jʼ abecʼ ũi jabocure, “Ji jabocʼ maume dabecube” arĩ, āmeina ðayʼ baru ũi yebacavʼre aru yebacarōmivare mʼre, urarō āri aru ũcʼuri pacotecuyʼbe ũ. <sup>46</sup> Que teiyede, ũi jabocʼ dacuyʼbe ñai memecaipōecʼ ũi corebejāravʼ baquinói aru ũi majibeora baquinói mʼre. Aru jaruvaicōjecuyʼbe ũre noi, Jūmenijicure jʼ abevʼre ne jaruvainoi, ũi ñájiquiyepʼ ayʼ.

<sup>47</sup> Que baru ñai memecaipōecʼ majicureca ũi jabocui urōre, ũbenita ũi mememenu, aru jʼ abedu ũre, ñai jabocʼ pare jara popeicōjecuyʼbe ũre. <sup>48</sup> Ũbenita ñai memecaipōecui majibedu ũi jabocui urōre, aru āmenore ðaru, majiédā jara popeicōjecuyʼbe ũre. Ñai majicure ũi jabocui urōre ðaiye jāvʼ ũi majiépʼ. Aru ñai pōeva ne jímʼ mácure urarō, jacopaiyovaiye jāvʼ náre coapa cojedeca, arejamedā Jesús, náre bueyʼ.

### Jesús ñi coatede ðaino pœvare

(Mt 10.34-36; Mr 10.38)

<sup>49</sup> Cojedeca Jesús coyurejameða náre:

—Darejacacu yu ijāravui, Espíritu Santo ñi daquiyepa ayu ijāravucavure. Aru pare uvu yu ñi daquiyede ñi ure paruéque. <sup>50</sup> Ubenita mamarumu urarõ ñájiye jauquiyebu yure. Nájivu yu caride, aru ñájiqijivu ji ñájiye buojaiyeta. <sup>51</sup> ¿Dápiavurũ muja yu dayu bácuve cārijimene ðacuyu ijāravucavure? Jáve coyuyubu mujare: Ji daiye báque boje ijāravui, pœva coatenajarama ne baju. <sup>52</sup> Que baru cūinápurupe paivu cūináðami cūramicavu maucuvārājivubu ne baju yure boje. Pucarā ādamatenajivubu apevu yóbecurāque. <sup>53</sup> Apevu nácavu ju arājivubu yure. Ubenita apevu nácavu ju abenajivubu yure. Que baru népacu ādamatequijibi mamacuque. Aru mamacu ādamatequijibi jípacuque. Népacu ādamatecojibico mamacoque. Aru mamaco ādamatecojibico jípacoque. Mamacui márepaco ādamatecojibico õi vácoque. Aru õi vácore ādamatecojibico óque, arejameða Jesús.

### Jesús ñi coyuno meajāravure aru āmejāravure

(Mt 16.1-4; Mr 8.11-13)

<sup>54</sup> Jesús arejameða ina obedivu pœvare:

—Muja jáivu ocopenibo nacajainore aviá doinoi, cūiná aiyavũ muja “Ocaquiyebu”. Aru nopedeca ocaiyavũ no. <sup>55</sup> Aru muja jáivu ũmevu japuinoe aviá daino cācopūravure jocarĩ, aiyavũ muja “Pare bo daivu. Meajāravũ daivu”. Aru nopedeca boiyavũ no. <sup>56</sup> ¡Muja, jujovaivutamu! Joborõquede aru cavarõquede máre coreóvaivavacari, ubenita pare coreóvabevubu muja ijāravui vaiyede, arejameða Jesús.

### Mauvare mearo maje ðaino

(Mt 5.25-26)

<sup>57</sup> Jesús arejameða náre cojedeca:

—¿Aipe teni meadabenaru muje ðaiyede caride muje majinomia? Meadajarā muje ðaiyede caride yópe muje majinope. <sup>58</sup> Mujacacu nuñu maru ũre āmecoroyuque jabova ne āmeina teivure jēniari jáiñami, “Meadarājarevu” ajacurĩ ũre, ñi nuvamequiyepa ayu ũre jabova ne āmeina teivure jēniari jáipœcuve, aru ñi jēni jíbequiyepa ayu ũre churaravare, aru ne jaruvabenajiyepa ayu ũre āmeina teivure jēni jacoĩnami jívui. <sup>59</sup> Coyuyubu mujare: Ne buoru ũre āmeina teivure jēni jacoĩnami jívui, etabecube pu bojedayuta caiye iye ñi bojecube ðaiyede, arejameða náre Jesús.

### Muje āmeina ðaiyede chíoino méne oatuvaino

**13** <sup>1</sup> Dinumu apevu pœva, Jesús yebai járanuri, ũre coyurejaimaða ñai jabocu Pilato āmicucu ñi boarĩ jaruvaiyede apevu Galilea āmicurijoborõcavure aru ñi jívaino mácarõre ne jivede āimara jiveque, diede jauicõjenĩ pueðarĩducuyu Jūmenijicure. <sup>2</sup> Aru Jesús arejameða náre:

—¿Dápiavurũ muja ina Galileacavure, Pilatoi boarĩ jaruvaimara mácavu, āmena mácavu bajure apevu Galileacavu pueno? <sup>3</sup> Coyuyubu mujare: ¡Que āmevu! Muja chíori dápiarĩ muje āmeina teiyede jaruvarĩ oatuvabevu baru,

napedeca ñájinajaramu muja. <sup>4</sup>¿Aru dápiaivurũ muja ina dieciocho paivu tuimara mácavure cūrami ũmujuriñami Siloé āmicurōcadāmi āmena mácavu bajure caivu apevu Jerusalécavu pueno? <sup>5</sup>Coyuyubu mujare: ¡Que āmevu! Muja chīori dápiarĩ muje āmeina teiyede jaruvarĩ oatuvabevu baru, napedeca ñájinajaramu muja, arejamedā Jesús.

**“Higueracure” jári dápiarĩ ne ñarājiyepe aino**

<sup>6</sup>Apeno jári dápiarĩ ne ñarājiyepe ainoque, yópe arĩ, buedejamedā Jesús:

—Cūinācu ũmu cūva tequemavu higuera āmicuricure ũi jioi. Aru cūinájāravu nuri vorĩduquemavu dicu jēidure. Ũbenita eabetequemavu diduare. <sup>7</sup>Que teni aquemavu jiore memecaipōecure yópe: “Jájacu. Yōbecuriñua coapa vocudarĩduivu yu jēidure icu jocucure. Ũbenita cainumua eabevu yu. Jēidua cubevu dicu. Que baru icu higueracure coenĩ jaruvajacu mu. ¿Aipe teni bñaji yu ji joborōre icu āmecu boje?” aquemavu ñai jabocu memecaipōecure. <sup>8</sup>Ũbenita ñai memecaipōecu aquemavu ũre: “Mu, ji jabocu, dajocajacu icu higueracure iñu bajure cāreja. Ũiyuvu yu icu yebai. Aru etejuede máre epeiyuvu yu dicure. <sup>9</sup>Que teni apeñu jēidua bucuro, meaquiyebu. Ũbenita apeñu jēidua bucubedu, coenĩ jaruvaicōjecacu icu higueracure”, aquemavu ñai memecaipōecu, arejamedā Jesús.

**Jesús ũi meadaino tūjidu ijinore judíova ne jabuóvairāravui**

<sup>10</sup>Dinumu Jesús bueyu barejámedā cūinādami judíovai cójijiñami jívui ne jabuóvairāravu sábadoi. <sup>11</sup>Aru nore carejacođa cūināco nomió abujucu ũi ijide ñaimo. Ñai abujucure curejacođa ō dieciocho paiñua baju. Ō tūjidu barejácođa. Nurié núco oabedejacođa ō. <sup>12</sup>Jesús ōre jáñu, cuturejamedā ōre ũi yebai. Aru arejamedā:

—Mu, nomió, meadaimomu mu mi ijinore, arejamedā Jesús.

<sup>13</sup>Que arĩ, tuorejamedā ōre ũi puruáque. Aru cūiná nurié núrejacođa ō. Que baru torojuede jídejacođa Jūmenijicure. <sup>14</sup>Ũbenita ñai judíovai cójijiñamine coreipōecu Jesúre jarayu, ũi meadaiye boje jabuóvairāravui, arejamedā ina pōevare:

—Seis paijārvua cūvu, muje memeijārvua. Memeijārvuai meatenadajarā muja. Ũbenita jabuóvairāravui meatenadabejarā, arejamedā ũi.

<sup>15</sup>Aru Jesús arejamedā ũre:

—¡Muja jujoavutamu! Caivu muja muje oteivecure o muje burrore máre ũi āitōcure jodenĩ jocarĩ, ocore jínanuvaiyavu muja jabuóvairāravui. <sup>16</sup>Quédecā i co nomióre, Abraham mácuĩ pāramenacacore, abujuvai jabocu ũi ñaicōjeimo mácore dieciocho paiñua baju, meadaiye javvu ōre jabuóvairāravui, arejamedā Jesús.

<sup>17</sup>Ũ que ayure, caivu ũi mauva cūyoje tedejaimada na. Aru caivu ina obedivu pōeva pare torojurejaimada caiye iye ũi ñarĩ majibede ñaiye boje.

**“Oteiyabe mostazare” jári dápiarĩ ne ñarājiyepe aino**

(Mt 13.31-32; Mr 4.30-32)

<sup>18</sup>Bedíova Jesús arejamedā:

—Coyuquijivu mujare aipe ārojarore yo Jūmenijicui jaboteinore. Jári dápiarĩ muje ñarājiyepe ainore coyuquijivu mujare, muje majinajiyeye ayu.

<sup>19</sup>Yópe mostaza ámicuriyabe oteiyabepebu. Cúinácu ùmu diyabede ìni oteibi ùi jioi. Aru bucürí muivú jocucupe. Dicú cavabua uracavabua nuivú. Aru dicú taino cãchinois mĩjina ne juaiboa ðaðama, arejamedá Jesús.

Nopedeca mamaramure Jũmenijicui jaboteino quĩjinetamu, pœva obebevu ne cue boje noi. Ûbenita Jũmenijicui yávaie méne coyurĩburu yóboi urarótamu no Jũmenijicui jaboteino, obedivú pœva ne cue boje noi.

**“Páure bucure ðaiyede” jári dápiarĩ ne ðarãjiyepe aino**

(Mt 13.33)

<sup>20</sup>Bedióva cojedeca Jesús arejamedá:

—Jári dápiarĩ muje ðarãjiyepe ainore coyquijivú yo Jũmenijicui jaboteinore. Yópebu nomió ôi páure bucure ðaiyepe. <sup>21</sup>Diede adarĩ jĩvaiyepebu yóbecuricrubua páu ðaicurubua. Aru caino jĩvaibore bucúóvainopebu, arejamedá Jesús.

**Jesús ùi bueino jedevacobe quĩjicobede**

(Mt 7.13-14, 21-23; 8.11-12; 19.30; 20.16; 22.13; 25.30; Mr 10.31)

<sup>22</sup>Jesús ùi nuiyede Jerusalén ámicuriĩmaroi, ùi vaiyede ĩmaroare aru ĩmajinoare máre, buedejamedá nócvare. <sup>23</sup>Aru cúinácu pœcu jēniari járejamedá ũre:

—Mu, ñuje jabocu, ¿obebevu bárãjidica na, Jũmenijicui meadaimara márajivú? Jesúre arejamedá.

Aru Jesús arejamedá caivú ina pœvare:

<sup>24</sup>—Ecojarã muja jedevacobe quĩjicobei. Norecabu Jũmenijicui jaboteino. Coyuyubu mujare: Obedivú ecoiyurĩdurãjarama nore. Ûbenita buojabenajarama. <sup>25</sup>Cúinácu cũrami upacu bieniburu yóboi ùi jedevacobede ñamine, voaiyubebi dicobede cojedeca. Nopedeca Jũmenijicui ùi jaboteino ecoiyede bieniburu yóboi, voabecuyume muja núrivure jedevai. Órejarãjaramu ũre pare: “Mu, ñuje jabocu, voajacu ñujare”. Ûbenita Jũmenijicui acuyume mujare: “Jívu ãmevu muja. Muje dainore majibevú yu”, acuyume ũ. <sup>26</sup>Dinũmure yópe arĩ búrãjaramu muja: “Ñuja ãri aru ũcuri tecarã múque aru ñuje ĩmaroa ma êcarui bueávũ mu ñujare”, arãjaramu. <sup>27</sup>Ûbenita ũ acuyume: “Coyuyubu mujare: Jívu ãmevu muja. Muje dainore majibevú yu. ¡Que baru caivú muja ãmeina teivú nujara yure jogarĩ!” acuyume ũ. <sup>28</sup>Chĩoiuvú orĩ curãjaramu muja nore. Aru jararĩ cõpi cũrajaramu muja jáivú náre; Abrahãre, Isaare, Jacore, aru caivú ina Jũmenijicui yávaie coyucaipœvare máre, curivure Jũmenijicui jaboteinoi. Ûbenita mujacapũravú mautenajaramu jedevai. <sup>29</sup>Aru ðarãjarama pœva, cainoa joborõacavú. Dobarãjarama ùi tuoiva yebai, ãrajivú ùi torojave teinũmure Jũmenijicui jaboteinoi. <sup>30</sup>Dinũmu maquinóre apevu jabotebevu bácvu ĩjãravure jabotenajarama Jũmenijicui jaboteino edaiyede. Aru apevu jaboteivú bácvu ĩjãravure jabotebenajarama Jũmenijicui jaboteino edaiyede, arejamedá Jesús.

**Jesús ùi oino, Jerusalécavure jecucu**

(Mt 23.37-39)

<sup>31</sup>Dinũmu apevu ina fariseovacavú nurejaimada Jesús yebai. Aru arejaimada ũre:

—Herodes boarí yaiváiyubi mure. Que baru dupini nujacu mu yore jocarí, arejaimada na.

<sup>32</sup> Ëbenita Jesús arejamedá náre:

—Yópe arãnujara añu borocucure: “Jesús ñujare aicõjeimi mure yópe, ‘Abujuvare jaruvaivu yu aru pœvare meadaivu yu caride aru javenare máre. Aru yóbecurijárovua yóboi ji ðaiyede buojaquijivu. <sup>33</sup> Ëbenita mái nuiye javu yure caride, javenare, aru javena cõmiáijárovure máre. Cũinácu Jũmenijicui yávaiyede coyucaipõecu yaini bujabecube Jerusaléne jocarí. Que baru nuquijivu yu Jerusaléi, ina Jũmenijicui yávaiyede coyucaipõeva mácavure ne boarí jaruvainoi, pœva ne boarí jaruvarájiyepe ayu yure’, ajarã Herode”, náre aicõjenejamedá Jesús.

<sup>34</sup> Aru arejamedá Jesús:

—¡Muja, Jerusalécavu, mujeñecuva mácavu boarí jaruvarejaquemavu ina Jũmenijicui yávaiyede coyucaipõeva mácavure! Cũraboaque ðuvarí boarí jaruvarejaquemavu ina Jũmenijicui daroimara mácavure. Aipiye baju cójijovaiyuriduvu yu mujare ji yebai, yópe cáyucu õi cójijovaiyepe mamarare õi caveba cãchinoi. Ëbenita ðbeteavũ muja. <sup>35</sup> Jájara. Dinũmu maquinóre muje curõre Jũmenijicu dajocarí jaruvacuyume. Aru coyuyubu mujare: Yure jámenajaramu muja cojedeca pu jáðovacudayure meacu bajure jáivuta. Dinũmu maquinóre arãjaramu yópe: “Torõje bajadéni ñai dayure Jũmenijicui ãmiái, ñi paruéque”, arejamedá Jesús.

#### Jesús ñi meadaino cocoroyure

(Mt 12.11)

**14** <sup>1</sup> Cũinájárovu, judíovai jabuóvaijárovu sábadõi, Jesús ãcunurejamedá cũinácu jabocu, fariseovacacui cũrami. Ina jabova nore curivu cocorejaimada ãre, ñi ãmeina tedu, boro coyurí adarãjivu ãre. <sup>2</sup> Aru cũinácu ãmu pare ijimu járorejamedá nore, ñi ãmuvea aru ñi ãraðoa máre pare cocororejávũya ãre. <sup>3</sup> Ëre jáñu Jesús, jẽniari járejamedá ina Jũmenijicui yávaiye báquede bueipõevare aru ina fariseovare máre, noi curivure, yópe arí:

—¿Meadaiye jauri pœvare judíovai jabuóvaijárovu sábadõi? arejamedá Jesús.

<sup>4</sup> Ëbenita bi arejaimada na. Dinũmuma Jesús ñai ijimure jẽni meadarejamedá. Ëi meadarĩburu yóboi, nuicõjenejamedá ãre. <sup>5</sup> Aru Jesús arejamedá náre:

—¿Ácu mujacacu mamacu o ñi oteivecu máre turu cobe ãmujuricobe jívui, cũiná ñeje bárica ãre judíovai jabuóvaijárovure? arejamedá Jesús.

<sup>6</sup> Ëbenita bi arejaimada na.

#### “Cutuimara torõjeve teinoi” jári dápiarí ne ðarãjiyepe aino

(Mt 23.12; Lc 18.14)

<sup>7</sup> Dinũmure Jesús járejamedá ina cutuimara voivure apevu pũeno ne dobarõ mearova. Que baru coyurejamedá náre yo jári dápiarí ne ðarãjiyepe ainore:

<sup>8-9</sup> —Apecu ñi cuturu mure ñi torõjeve teinoi, apevu pũeno dobabejacu dobarõ mearoi. Que ðaru, ñai torõjeve teino upacu cutuyu baru apecu ãmure,

mi pueno ne majimure, acuyume mure: “Jíjacu mi dobaröre ñai ñmure”. Que teni cuyoje teni dobacunujebu mu turuvaita. <sup>10</sup> Ñbenita apecu ñi cuturu mure ñi torojuve teinoi, dobajacu turuvai. Que ñaru, dacuyume mi yebai ñai cutuyu bácu aru acuyume mure: “Jícu, nujacu puenomaque. Vojacu mi dobarō mearova”. Que teni torojurí járajarama mure caivu dobarivu múque tuoiva yebai. <sup>11</sup> Que baru ñai cuiyucu me apecu pueno, parubescuyume pueno baju. Aru ñai parubede ñaiyucu ñi baju apecu cāchino, me sucuyume pueno baju, Jūmenijicui mearo ñacaquiye boje ñre, arejameña Jesús.

<sup>12</sup> Aru ñai ñre cutuyu bácu máre arejameña Jesús:

—Mi torojuve teinumu, cutubejacu mu mi yóvaimarare, aru mívure, aru mi ñadajēcavu cūve cūvarivure máre. Que ñaivu baru, nácapūravu ne cuturājiyede mure máre ne torojuve tenajiyede, cūvacuyumu mu mi bojeva. <sup>13</sup> Ñbenita mi torojuve teinumu cutujacu ina cōmaje ārojarivure: cūve cūvabevure, iijimarare, cuiye majibevure, aru jári eabevure máre. <sup>14</sup> Aru torojucuyumu mu. Nácapūravu buojabenama bojeñaivu mure. Ñbenita eacuyumu mu mi bojeva ina boropatebevū ne nacajarajijāravu baquinóre yainore jaruvarí, arejameña Jesús.

### “Urarō ñinore” jári dápiarí ne ñarājiyepe aino

(Mt 22.1-10)

<sup>15</sup> Cūinācu ñque curivucacu, Jesús ñi que aiyede jápiayū bácu, arejameña Jesúsre:

—¡Torojucuyume ñai ācuyū Jūmenijicui jaboteinore! arejameña ñ.

<sup>16</sup> Jesús, ñre buescuyū, arejameña:

—Apenumu cūinācu ñmu torojuve teinore meadaquemavu. Aru cutuquemavu obedivu pōevare. <sup>17</sup> Que teni ne āiora joabejinoi ñai torojuve teino upacu ñi yebacacure jaroyū, aicōjequemavu ñi cutuimarare yópe: “Jave meadacavu caiyede mujare, que baru ‘Áradajará’ aibi ji jabocu”, ajacu, aquemavu ñ. <sup>18</sup> Ñbenita ina ñi cutuimara coapa coyurí búquemavu nuiyubevū ñi torojuve teinore. Cūinācu ñi cutuimaracacu aquemavu: “Mamajiore bojeñavu yū. Que baru jácunuiye jañvu yure no jiore. Que baru coyujacu mi jabocure, ñi corebequiyepe yure”, aquemavu ñ. <sup>19</sup> Aru apecu aquemavu: “Caipucapūruape paivu oteivecūvare bojeñavu yū. Que baru jácunuiye jañvu yure náre. Que baru coyujacu mi jabocure, ñi corebequiyepe yure”, aquemavu ñ. <sup>20</sup> Aru apecu aquemavu: “Pūrubuonvū yū. Que baru daiye majibevū yu mi jabocui torojuve teinoi”, aquemavu ñ. <sup>21</sup> Que teni ñai ñi yebacacu copaini coyūquemavu caiye iyede ñi jabocure.

Ñi coyuiyede jápiayū bácu ñai jabocu, jararí dápiayū, aquemavu ñi yebacacure: “Maumejiena nujacu ímarocama uramai aru quíjimai máre. Aru ñavajacu ina cōmaje ārojarivure: cūve cūvabevure, iijimarare, jári eabevure, aru cuiye majibevure máre”, aquemavu ñai jabocu. <sup>22</sup> Ñai yebacacu ñi copaiyede, aquemavu ñi jabocure: “Mu, ji jabocu, yópe mi cōjeiyepe ñavu yū. Ñbenita mi āitucubu buibévū cāreja”, aquemavu ñai yebacacu. <sup>23</sup> Aru ñai jabocu aquemavu ñi yebacacure: “Ímarore jocarí nujacu mu. Ma nūimai nujacu aru ñaicōjejacu pōevare ji torojuve teinoi, ji cūrami buiquíyepe. <sup>24</sup> Coyuyubu mure: Caivu ina ji cutuimara mácavu āmenajarama ji torojuve teinoque āiyede”, aquemavu ñai jabocu, arejameña Jesús.

### Jesúque nuru ñájiiovaino

(Mt 10.37-38; 16.24; Mr 8.34; Lc 9.23; Jn 12.24)

<sup>25</sup> Mái nuiyede obedivu pōeva yóvarejaimađa Jesúre. Aru ñ copedini, jári, arejameđa náre:

<sup>26</sup>—Ácu pōescu ñi daru ji yebai, ji bueimaraćacu bacuyú, yure jecué jaunu úre caivu pñeno baju. Que baru ućacurí yure jípacu, jípaco, jímarepaco, mamara, jíbura, imara, aru ñi baju máre pñeno baju. <sup>27</sup> Ácu pōescu daiyucu yúque, dajocajacurí pōeva ne mearo jáiyede úre, cuyebejacurí yure yóvayede, aru jidubejacurí ñi ñájiquiyede. Nópe đabecu baru, ñ buojabebi jícú bacuyú. <sup>28</sup> Ácu mućacacu cūrami urađami daiyucu baru, dápiarí dobajebu, corevacuynu aipino bojecuróre diñamine aru ñi buojaquinore máre. <sup>29-30</sup> Inamine đarí búrĩburu yóboi, ñai cūramine đayú ñi buojabedu, caivu ina jáivu úre yurinajarama yópe aivu: “Ñai űmu cūramine đarí búcube. Ubenita buojabebi caride”. <sup>31</sup> Aru ácu jabocu dápiarí dobajebu, ñ jina caipucapũuape paimil baju churaravaque boaiyucu baru apescu jabocu veinte mil paivu baju churarava cuvacuque ádamatećuđayú úre. <sup>32</sup> Aru boarí buojaiyubecu baru ñi boro nuvaipōevare coyuurí jarocuyume ñi maucu joai cuedeca cāreja, “Boaiyubevu yu” arí jaroyu. <sup>33</sup> Que baru me dápiaye jaunu mućare jipocamia, ji bueimara mārājivu baru. Muća dajocabevu baru muće cūvaede, ji bueimara teivu buojabenamu muća, arejameđa Jesús.

### “Yuquirare” jári dápiarí ne đarājiyepe aino

(Mt 5.13; Mr 9.50)

<sup>34</sup> Bediova cojedeca arí buedejameđa Jesús náre:

—Meađaivu maje āiyede yuquiraque. Nopedeca ñájiye meađaivu pōevare. Yuquira maje āiyede meađaivu. Ubenita yuquira vaijue bįjaru, āiyede meađaiye buojabevu. <sup>35</sup> Joboróre aru oteiye űrojuróre máre meađaiye buojabevu. Quédata pōeva jaruvađama iye yuquira meamene. Nopedeca Jūmenijicui pōeva ñi urópe đarí dajocaivu baru, meađarí buojabenama ijaravucavure. Me jápiajarā muća iye ji bueiyeđe, arejameđa Jesús.

### “Oveja mamateyure” jári dápiarí ne đarājiyepe aino

(Mt 18.10-14; Lc 5.29-30; Jn 10.1-16; He 13.20)

**15** <sup>1</sup> Apenũmu earejaimađa Jesús yebai obedivu Roma āmicuró jaboteino jabovare tautura ícaipōeva aru āmeno đaipōeva máre, jápiarāeaiyu úre. <sup>2</sup> Fariseova aru Jūmenijicui yávaiee báquede bueiōeva máre borotedejaimađa, ne bajumia aivu:

—Ñai űmu copũ etaibi āmeno đaipōevare aru āimi náque, arejaimađa na.

<sup>3</sup> Ne que aiye boje, Jesús coyuerejameđa náre yo jári dápiarí ne đarājiyepe ainore:

<sup>4</sup>—Mućacacu ovejavare coreipōescu cuvacu baru cien paivu ovejavare, aru cūinácú nácacu ñi mamatedu, ñai dajocajebu ina noventa y nueve paivu ovejavare pōecubenoí, vocuñu ñai bįjayu bācure úre earíta. <sup>5</sup> Aru úre earí, ini, aru boi tuorí, torojurí nuvajebu ñai ovejare ñi cūramita. <sup>6</sup> Cūrami earí, órejajebu ñi yóvaimarare aru ñi cađajēcavure máre. Aru ajebu náre yópe: “Torojujarā yúque, ji oveja bįjayu bācure ji eaiye boje”, ajebu. <sup>7</sup> Nopedeca coyuũbu mućare:

Ina cavarō me aro Jūmenijicui curōcavū torojurājarama cūinācu āmeno daipōecu chīori, oatūvaru ūi daiyede, apevu noventa y nueve paivu pueno, ina “Chīori oatūvaiye jaubevu yure”, arī dāpiaivu, arī buedejamedā Jesús.

**“Tāutaturavare” jāri dāpiarī ne darājiyepe aino**

<sup>8</sup> Cojedeca Jesús coyurejamedā apeno jāri dāpiarī ne darājiyepe ainore, nāre buecu:

—Cūināco nomiō cuvaco baru pucapurape paiturava tāutaturavare aru cūinaturava bījaru ōre, ico nomiō pēoibure pēori, ōi cūramine oeni, vojebu pu dituravare earīta. <sup>9</sup> Dituravare earī, īni, epeni, torojurī ōrejajebu ōi yōvaimarare aru ōi cadaīecavure märe. Aru ajebu nāre yōpe: “Torojurā yūque, ji tāutaturava bījaino mācarōre ji eaiye boje”, ajebu. <sup>10</sup> Nopedeca coyuyubu mujare: Ina Jūmenijicui āngeleva torojurājarama cūinācu āmeno daipōecu chīori, oatūvaru ūi daiyede, arī buedejamedā Jesús.

**“Mamacu mamateyure” jāri dāpiarī ne darājiyepe aino**

<sup>11</sup> Cojedeca Jesús coyurejamedā apeno jāri dāpiarī ne darājiyepe ainore, nāre buecu:

—Cūinācu ūmu cuvatequemavu pucarā mamara. <sup>12</sup> Aru űai īmacucapūravu pue dabecu jīpacure aquemavu: “Mū, jīpacu, jījacu yure, ‘Mīye baquiyēbu’, mi aiye báquede yure”, aquemavu. (Mamacu nōpe ayu jīpacure, “Mi yaiquínore uvu yu”, ayube ū.) Dinumma népacu jíquemavu diede nāre coapa. <sup>13</sup> Obebejāravua yóboi, űai īmacu caiye ūi apejīene meadarī, īni, nuquemavu joai, apeno joborōi. Aru noi jarūvaquemavu caiye ūi cūvaede ūi urōpe darī. <sup>14</sup> Aru ūi jarūvarīburu yóboi caiye ūi cūvae báquede, āvué daquemavu caino no ūi curijoborōre. Que baru ū urarō űajíquemavu āvuéna. <sup>15</sup> Nuri, memeno voquemavu apesu ūmu, dijoborōcacure. Que teni űai jaroquemavu ūre, coreicōjeñu oteivārivare. <sup>16</sup> Aru āiyutequemavu oteivāri va ne āinore. Ūbenita űame jībetequemavu ūre. <sup>17</sup> Aruri earī, dāpiarī aquemavu ūi baju: “Caivu ina jīpacure memecaivu cūvarāma urarō ne āiye mēne aru pūpiye märe. Ūbenita yu yaiyūtamū āvuéna. <sup>18</sup> Caride copaiquijivu jīpacu yebai. Coyuquijivu ūre yōpe: ‘Mū, jīpacu, āmeno davu yu Jūmenijicure aru mure märe. <sup>19</sup> Que baru “jīmacu”, abejacu yure caride. Jājacu yure yōpe mi jāiyepe cūinācu memecayure mure’”, arī dāpiaquemavu ū.

<sup>20</sup> Que teni nacajari nuquemavu jīpacu yebai. Aru jīpacu dayure jāri joamica, cōmaje āroje jāquemavu ūre. Que baru cūyarī, copu nuri, ūre nariōquemavu. Aru ūi vioburā nuquemavu mamacure. <sup>21</sup> Aru mamacu aquemavu ūre: “Mū, jīpacu, āmeno davu yu Jūmenijicure aru mure märe. Que baru ‘jīmacu’, abejacu mū yure caride”, aquemavu jīpacure. <sup>22</sup> Ūbenita jīpacu aquemavu ūre memecaivure: “Davacajarā maumejiēna ūre meacaje cuitótēcajede. Doajarā ūre. Adajarā āmuyo adaitarabure märe. Aru curaidoare märe doajarā ūre. <sup>23</sup> Davajarā űai oteivecu mamacu me jīacucure. Boajārā, āmuri, torojuve tenajivu caivu īmarocavu. <sup>24</sup> űai jīmacu yaiyū bácupe páyu ūmedayupebe cojedeca. Javede bījame yure jocarī. Ūbenita eaiyu ūre cojedeca”, aquemavu jīpacu. Aru torojuve teni búquemavu na.

<sup>25</sup> Que teiyedeca, jībucu memeñu matequémavu jioi. Copaini cūrami, joabejīnoi jāpiaquemavu ne upaiyede. <sup>26</sup> Aru cūinācu memecaipōecure

órejarī, jēniari jáquemavū úre, “¿Aipe teni upaivúba na?” <sup>27</sup> Ju aquemavū úre: “Míyocu copaini dacube. Que baru mipacu boaicōjemi ñai oteivecū me jiacsucure, mamacu meacure copu etaiye boje”, aquemavū úre. <sup>28</sup> Ubenita ñai jíbucu jarayū, torojuve teinoi ecoiyubetequemavū. Que baru jípacu, etarī ũi yebai, jēniaquemavū úre: “Mū, bucū, ecorī, ājacū”. <sup>29</sup> Ubenita aquemavū jípacure: “Obediūjua memecaivū mure yebacacure. Aru cainūmua ju aivū mure aru mi cōjeiyede ðaivū. Ubenita yure mū jíbavu cūinájieneca cūinācu oteiāimajicure, ñuje ārajiiyepe ji yóvaimaraque torojuve teinoi. <sup>30</sup> Ubenita ñai mímacu ũi eaiyede, mi jíye báquede úre jaruvayū bácareca nomiva āmenaue, boacáicōjenebu mū úre oteivecū me jiacsucure”, aquemavū ũ. <sup>31</sup> Aru jípacu aquemavū úre: “Mū, bucū, mū cūvū yáque cainūmua. Aru caiye ji cūvae míyetamu. <sup>32</sup> Ñai míyocu yaiyú bácupe páyu apucupebe cojedeca. Ñai bíjayū bácu eaimūme caride. Que baru torojuve teiye javūvū majare”, aquemavū népacū, arī coyurejameda Jesús.

“Ñai memepōēvare coreyū vainí tuyure” jári dápiaiī ne ðarājiyepe aino

(Mt 6.24; 25.21; Lc 19.17)

**16** <sup>1</sup> Jesús coyurejameda ũi bueimarare, yópe arī: —Cútequemavū cūinācu ũmū cūve cūvacū. Cuvatequemavū cūinācu ũi cūvaede coreyure. Aru apevū coyūquemavū ñai cūve cūvacure yópe: “Ñai mi coreipōecu jaruvavaibi caiye mi cūvaede”, aquemavū na. <sup>2</sup> Que baru ñai cūve cūvacū órejaicōjeni ñai coreipōecure ũi yebai, aquemavū úre: “¿Aipe jápiayúba yū mi borore? Jáðovajacu yure mi toivarī cūvarōre, ji majiquiyepe aipino mi jacopuiyede aru aipino mi jíyede ji cūvede. Caride memecabecūyumu mū yure cojedeca”, aquemavū ñai jabocū. <sup>3</sup> Que baru ñai coreipōecu ũi baju dápiaiī aquemavū: “¿Aipe tequidi yu? Ji jabocū ími yure ji memeinore jaruvarī. Joborōre ũri buojabevū yū, ji parube boje. Aru tāuturare jēniari cūyevū yū. <sup>4</sup> Jave majivū yū ji ðaquinore, cūvacuyū pōeva ne copu etarājiyepe ayū yure ne cūramiai ji memeiño cūvabede”, arī dápiaquemavū ñai coreipōecu.

<sup>5</sup> Que baru ñai coreipōecu órejaquemavū náre coapa ina bojecube ðaivure ũi jabocure, coreóvabevureca úre memeiño cūvabecure. Aru ñai mamarumure ũi órejaimure jēniari jáquemavū: “¿Aipino bojecube ðayurū mū ji jabocure?” aquemavū. <sup>6</sup> Ju aquemavū ũ: “Cien paibua jocubua olivocu āmicuricu jēidure pipoicorore bojecube ðaivū yū úre”, aquemavū. Aru ñai coreipōecu aquemavū úre: “Ūju, jējacu mi bojecube ðaino curiyocare. Maumejiena dobarī oatūvarī toivajacu iyede: ‘Cincuenta paibua bajura’”, aquemavū. <sup>7</sup> Dinūmuma ñai coreipōecu jēniari jáquemavū apecu bojecube ðayure: “¿Aipino bojecube ðayurū mū ji jabocure?” aquemavū. Ju aquemavū ũ: “Cien paipuea trigo āmicue oteiyede bojecube ðaivū yū úre”, aquemavū. Aru ñai coreipōecu aquemavū úre: “Ūju, jējacu mi bojecube ðaino curiyocare. Aru oatūvarī, toivajacu iyede: ‘Ochenta paipuea bajura’”, aquemavū. <sup>8</sup> Aru ñai jabocū, jáñū ũi borocurī majinore, aquemavū ñai coreipōecu borore: “Ñai ũmū borocūcūvacari me majibi ũ”, aquemavū. Ina ijāravūcavū Jūmenijicure ubevū, ne cūvae méne aru ne me cuede máre ĩni majima, aru me bajura ne tāuturare earī majima ina Jūmenijicure ju aivū pueno, arejameda Jesús.

<sup>9</sup> Jesús arī buedejameda náre cojedeca:

—Muje covaede jýyede cõmaje ãrojarivure, na pueðarãjarama mujare. Muje nópe ðaru, Jũmenijicu jícũyũme mujare muje curõ cũimẽnore, arejameða Jesús.

<sup>10</sup>Bediõva cojedeca Jesús coyũrejemæda ina põevare:

—Ñai mearo ðarĩ epeyu baru quĩjinore, dinũmure mearo ðarĩ epecũyũme urarõre mãre. Aru ñai quĩjino ùi cũvarõque borocucu baru, urarõ ùi cũvarõque mãre borocucũyũme ù. <sup>11</sup>Que baru ijãravũ curivũ mearo ðabevũbu mũa muje covaede. Que ðaivũ, mujare Jũmenijicui jýyede mearo ðabenamu mũa. <sup>12</sup>Que baru apecui jýyede mearo ðabedu, ñame buõjarĩ jĩbenama mujeneca. <sup>13</sup>Cũinãcu Jũmenijicure ãrucu baru, pare ãrumemi tãuturare. Aru tãuturare pare ãrucu baru, ãrumemi Jũmenijicure. Que baru Jũmenijicure aru tãuturare mãre ãrumejara mũa. Ñai tãuturare ucũ baru, Jũmenijicure ubeccũyũme ù, arejameða Jesús.

<sup>14</sup>Ina fariseova tãuturare pare urejaimada na. Que baru iye Jesús ùi coyũyie báquede jãpiaivũ bácvũ ùre yuridejaimada. <sup>15</sup>Ubenita Jesús arejameða náre:

—Põeva ne jãiyede mearape paivũbu mũa. Ubenita Jũmenijicu majibi muje ðãpiainore. Põeva ne mearo jãiyede Jũmenijicu ubebi, arejameða Jesús.

#### **Majare cõjeiye aru Jũmenijicui jaboteino**

*(Mt 5.18; 11.12-13)*

<sup>16</sup>Jesús, yõpe arĩ, buedejameða náre cojedeca:

—Juan Bautista bácu ùi curinũmũ mácarõ baji cãrejaquemavũ Jũmenijicui ðaicõjeiye Moisés bácuve toivaicõjeni bueiye báque aru ina Jũmenijicui yãvaiyede coyũcaipõeva mácvũ toivarĩ bueiye báque mãre. Dinũmũ mácarõre Juan Bautista bácu coyũame Jũmenijicui jaboteinoquede aru ùi yõbore mãre coyũvũbu iye yãvaiye méne. Aru caivũ põeva pare tedama ecoiyurivũ Jũmenijicui jaboteinore.

<sup>17</sup>Caino cavarõ aru caino joborõ mãre cũiye maiyõjavevũ. Ubenita caiye iye Jũmenijicui ðaicõjeiye cũiye maiyõjavũ. Quénora caiye jãve vaiquĩyebu yõpe Jũmenijicui ðaicõjeiyepe, arejameða Jesús.

#### **Jesús ùi bueino nomi jarũvainore**

*(Mt 5.32; 19.1-12; Mr 10.1-12; 1 Co 7.10-11)*

<sup>18</sup>Bediõva cojedeca Jesús arĩ buedejameða ina põevare:

—Ácu põecu jĩmarepacore jarũvarĩburu yõboi purũbuoyũ baru apecoque, nomicũcũvacari apecoque cucu baru, ãmeina ðaibi õre ùi mamarũmũcãcore jarũvarĩ. Aru ácu põecu purũbuoyũ baru cũinãco nomiõ jĩmarepacu mamarũmũcacu ùi jarũvaimore ãmeina ðaibi õque, arejameða Jesús.

#### **Jesús ùi coyũino cũve cũvacure aru Lázaro**

<sup>19</sup>Jesús coyũrejemæda ina põevare cojedeca:

—Cũinãcu ùmũ cũve cũvacu cũtequemavũ. Pare meacaje cuitõtecajede dorĩ torõjuve teni, javatequemavũ jãravũa coapa. <sup>20</sup>Aru apecu ùmũ cũve cũvabecu cũtequemavũ, ùi ãmiã Lázaro. Û pátequemavũ ñai cũve cũvacu ùi cũrami jeevacobe yebai. Churiã ijie cũtequemavũ ñai Lázaro. <sup>21</sup>Ãiyurĩduquemavũ ãiye tuiye báquede ñai ùmũ cũve cũvacu ùi tuoivare jocarĩ. Aru yavimiva

darī nenequemavū ũi churiáre. <sup>22</sup> Cūinájāravū ñai cūve cūvabecu, Lázaro bácu, yaiquémavū. Aru ángeleva nūvaquemavū úre Abraham yebai. Ñai cūve cūvacu bácu máre yaiquémavū. Aru ũi bajure jarūvaquemavū cūracobei. <sup>23</sup> Nūquemavū ũ toabo cūiméboi.

’Noi pare ñájīñū, jáquemavū joai Abrahāre aru Lázarore máre. <sup>24</sup> Que baru órejaquemavū, ayū yópe: “Mū, jícū, Abraham, cōmaje āroje jájacu yure. Darojacu Lázarore ji yebai ũi ocoque jórī neneóvaquiyeye āmuyoque ji jemedore, cojūjovacūyū yure. Pare ñájivū yū yo toaboi”, aquemavū. <sup>25</sup> Ūbenita Abraham aquemavū úre: “Mū, jícū, ārujacu mū caiye iye méne mi cūvavaquede apūcu cāreja. Aru Lázaro apūcu cāreja ñájiquemavū ũrarō āmenore. Ūbenita caride torojūbi ũ yore, aru ñájivū mū. <sup>26</sup> Maje coricai cūvū ũrarō tūrobū. Que baru ñūjacavū jataiyurivū buojabema nuivū nore. Nopedeca nócavū máre jataiyurivū buojabema daivū yore”, aquemavū Abraham.

<sup>27-28</sup> ’Dinūmūma aquemavū ñai cūve cūvacu: “Mū, jícū, jēniaivū mure. Jarojacu Lázarore jipacu bácuī cūrami, ũi coyūquiyeye ayū jýova cūinápūrupē paivure, ne ñájimenajiyeye ayū yore”, aquemavū. <sup>29</sup> Ūbenita Abraham aquemavū yópe: “Jūmenijicūi daicōjeiyede ũi toivaicōjeiye báquede Moisés bácuī aru ina Jūmenijicūi yávaiyede coyūcaipōeva mácavū ne toivaiye báquede máre cūvama na. Que baru mýova jápiajarāri diede”, aquemavū Abraham. <sup>30</sup> Ūbenita aquemavū ñai cūve cūvacu: “Mū, jícū, Abraham, ina jápiabevūvacari iye Jūmenijicūi yávaiyede, cūinácū yainore jarūvarī copainūru náre, chīori oatūvarājarama ne ðaiyede”, aquemavū Abrahāre. <sup>31</sup> Aru Abraham aquemavū úre: “Ina pōeva jápiabevū baru Jūmenijicūi daicōjeiyede ũi toivaicōjeiye báquede Moisés bácuī aru ina Jūmenijicūi yávaiyede coyūcaipōeva mácavū ne toivaiye báquede máre, jápiabenama cūinácū nacajañūreca yainore jarūvarī”, aquemavū Abraham, arī coyurejamedā Jesús.

#### Jidojarō maje āmeina teino

(Mt 18.6-7, 15, 21-22; Mr 9.42)

**17** <sup>1</sup> Jesús buedejamedā ũi bueimarare, yópe arī:

—Jāve jujovarājarama mujare. Ūbenita ñai jujovare ðayū apēvure chīori āmeno ñájicūyūme ũ. <sup>2</sup> Ñai pōecu ũi vainí ture ðaru apēcu yure ju ayure parūbecūreca, ũi dajocaquiyeye ayū ũi ju aiyede yure, meajebu úre jarūvarū jia uradaī ũi ñamemui buorī cūinábo cūrabo ũraboque. <sup>3</sup> Me jájara muja. Me dápijarā muje ðarājiyede. Apēcu ũi āmeno ðaru mure, majicajacu úre ména. Aru ũi chīori oatūvarū ũi ðaiyede, ārumetejacu iye ũi āmeno ðaiye báquede mure. <sup>4</sup> Aru ũi āmeno ðaru mure siete paiye baju cūinájāravure aru siete paiye bajureca, “Chīoivū yū ji āmeno ðaiye báquede mure” ũi aru, ũi āmeno ðaiyede ārumetejacu mū, arejamedā Jesús.

#### Jūmenijicure ārure ðaino majare

<sup>5</sup> Ina Jesús ũi yávaiye méne beorī coyūicōjeimara arejaimada Jesúre yópe: —¡Cadatejacu ñūjare, ñūje ju arājiyeye mure pūeno baju! úre arejaimada na.

<sup>6</sup> Aru Jesús arejamedā:

—Oteiey mostaza āmicue oteiey quíjietamu. Ûbenita pīaríburu yóboi jocucu uracutamu. Nopedeca muje ju aru yure quíjino, nópe quíjie oteiepe, Jūmenijicu urarō mearore ðajebu mujare. Muja me ju arī Jūmenijicure, muje aru icu jocucu uracure yópe: “Nujacu caiye mi nuoque. Aru nuri nujacu jia uradaí”, dicu ju ajebu muje cōjeinore, arejamedā Jesús.

### **Memecaipōecu ũi ðaino**

<sup>7</sup>Jesús arī buedejamedā cojedeca:

—Mujare memeni coreyure jiore o coreyure āimarare ũi copaidaiyede cūrami, “Maumena ðarī, ācudajacu”, abevu muja ũre. <sup>8</sup>Quédāta, “Meadajacu ji āquiyede. Oatavajacu mi doiyede. Aru corejacu ji āiyede cāreja. Ji āriburu yóboita mu máre āri ũcujacu”, aivubu muja ũre. <sup>9</sup>Aru ñai jabocu jāve abecube ũi yebacacure, “Meavu mi memecaino yure”, ũi ðaicōjeiye báquepe ðaiye boje. <sup>10</sup>Nopedeca muja máre, caiye iye ðaicōjeiye báquepe mujare ðarī buoiaivu, ajarā muje baju yópe: “Bojecubevubu maja. Quénora ðaivubu maja yópe Jūmenijicui ðaicōjeiyepe majare”, náre arī buedejamedā Jesús.

### **Jesús ũi meadaino caipucapuruape paivu pojeivure**

<sup>11</sup>Jesús nuññ Jerusalén āmicurīmaroi, vaidējamedā Samaria aru Galilea āmicurijoborōa turuvare. <sup>12</sup>Cūináro ĩmajinoi ecoiyede, copu nurejaimada ũre caipucapuruape paivu ũmuvu pojeivu. Núrejaimada joai Jesúre jocarī. <sup>13</sup>Aru codoboborejaimada na:

—Mu, Jesús, bueipōecu, cōmaje āroje jājacu ñujare, arejaimada na.

<sup>14</sup>Náre jári, arejamedā Jesús:

—Nuri jáðovajara sacerdotevare, arejamedā.

Nópe arejamedā, judfova ne ðaiye boje Jūmenijicui ðaicōjeiyepe. Aru ne nuyledeca mái, meatedejaimada ne pojeiyede. <sup>15</sup>Que teni cūinácū nácacu jári coreóvarī meateyu ũi baju, copaini nuri codoboborī torojurejamedā Jūmenijicure. <sup>16</sup>Mori turejamedā joborōi Jesús jipocai, jíyu mearore ũre. Aru Samaria āmicurijoborōcacu barejaquémavu ñai ũmu. <sup>17</sup>Que teni Jesús arejamedā:

—Caipucapuruape paivu meatevu muja. ¿Árima apevu, ina nueve paivu?

<sup>18</sup>Apevu cubema ina jínadajurorivu mearore Jūmenijicure. Quénora ñai ðacube, apeno joborōcacuvacari, arejamedā Jesús.

<sup>19</sup>Aru Jesús arejamedā ũre:

—Nacajari nujacu mu. “Û yure meadaie majibi”, arī dápiarebu mu yure. Que baru, mi que dápiaye boje, meadaivu mure, arejamedā ũre Jesús.

### **Jūmenijicui jaboteino aipe edaquinore**

(Mt 10.39; 16.25; 24.17-18, 23-28, 36-41; Mr 8.35; 13.15-16; Lc 9.24; Jn 12.25)

<sup>20</sup>Cūinájāravu apevu fariseovacavu jēniari járejaimada Jesúre, yópe arī:

—¿Aipiyede edaquidica yo Jūmenijicui jaboteino maquinó? arejaimada na. Jesús arejamedā náre:

—Jūmenijicui jaboteinore jári majibevu muja. <sup>21</sup>Que baru abenajarama yópe: “¡Jājacu, yui cuvñ!” Aru abenajarama yópe: “¡Jājacu, noi cuvñ!” Quédāta jave Jūmenijicu jaboteyube muje jēneboi, arejamedā Jesús.

<sup>22</sup>Dinumure Jesús arejamedā ũi bueimarare:

—Jāravna cūquiebu muje jāiyurijāravna yure, Jūmenijicui daroimu mácure ūmure, cūinājāravura. Ūbenita jāmenajaramu muja. <sup>23</sup>Aru arājarama mujare yópe: “¡Jájara noi!” Aru arājarama yópe: “¡Jájara yui!” Ūbenita numejara muja. Numejara ne yóboi. <sup>24</sup>Jūmenijicui daroimu mácū ūmure yaroinope nūquiebu ji copaidaquijāravu baquinó. Yópe no yaroino pēoiyepe cavarōre cūinápūravu pū aperiūravuita, caivu pōeva ne jārājiyepe nore, nopedeca copaidacūyumu yū. Aru caivu pōeva jārājarama ji copaidaiyede ijāravui. <sup>25</sup>Ūbenita mamarūmu urarō nājiye jauvu yure. Aru ijāravucavu ju abenajarama yure.

<sup>26</sup>‘Dijāravna baquiyéi, Jūmenijicui daroimu mácū ūmure, ji copaidaquijāravu jipocai, cūquiebu nópe ānijāravna Noé mácui curijāravna báquepe. <sup>27</sup>Dinūmu mácārōre caivu pōeva āivu barejaquémavu, aru ūciūvu barejaquémavu. Ūmūva pūrubuoivu barejaquémavu. Aru jídejaquémavu nēmaromivare, ne pūrubuorājiyepe aivu, Noé mácui jiadocū uracūre ecoijāravuita. Muiváibo darejaquémavu. Aru caivu ina pōeva corī bíjarejaquémavu na mácavu. <sup>28</sup>Nopedeca cūrejaquémavu Lot bācui curijāravna báquede máre. Caivu pōeva āivu barejaquémavu, aru ūciūvu barejaquémavu. Bojedaivu barejaquémavu. Oteivu barejaquémavu. Aru cūramiare daivu barejaquémavu máre. <sup>29</sup>Ūbenita ānijāravu bācarō, Lot bācui etaiyede Sodomare jocarī, Jūmenijicu maumena darorejaquémavu toabore aru cūraboā uruiboare máre. Ocainope tūrejaquémavu cavarōre jocarī. Aru caivu ina diīmarocavu bācavu yaidéjaquémavu na mácavu. <sup>30</sup>Nopedeca baquiyébu Jūmenijicui daroimu mácū ūmure, ji copaidaquijāravu baquinóre. Maumena, pōeva yure ne corebede, copaidacūyumu yū ijāravui cojedeca.

<sup>31</sup>‘Dijāravu baquinói nai cūrami pūenora cūcu bacūyú ēmeni dabejacurī, nūvacūyū ūi aperiēne. Ecobejacurī ūi cūrami. Aru nai jiore memēnu macūyú copainumejacurī ūi cūrami. <sup>32</sup>Ārūjara muja iye Lot bācui mārepaco bācore vaiye báquede. Ō mácui ju abe boje Jūmenijicui cōjeiye báquede, yuquiraru cainidu tedejaquémavu ō máco. <sup>33</sup>Nai pōecu ūi baju urōpe đarī, meadaiyūcu baru ūi bajure, coatecūyume ūi bajure Jūmenijicure jarūvarī, yópe yaiyú bácupe ūi ūmei. Ūbenita nai pōecu, “Ye baju āmevu ji yaidú Cristore boje” ayū, ūi baju urōpe đabecūva quénora ji urōpe đarī, ūrecabe ji meadaquimu, cūcūyū Jūmenijicūque cainūma.

<sup>34</sup>‘Coyūyūbu mujare, ji copaidaquijāravu baquinói pūcarā ūmūva cārajarama ne cūrami jīvui nāmine. Cūinācu nūvaimu macūyūme, yure ūi ju aiye boje. Aru apecu mautecūyume, yure ūi ju abe boje. <sup>35</sup>Aru pūcarā nomiva jiorajarama ne cūrami jīvui. Cūināco nūvaimo macođóme, yure ōi ju aiye boje. Aru apeco mautecođóme, yure ōi ju abe boje. <sup>36</sup>Aru pūcarā ūmūva memenajarama ne jioi. Cūinācu nūvaimu macūyūme, yure ūi ju aiye boje. Aru apecu mautecūyume, yure ūi ju abe boje, arejamedā Jesús, náre bueyū.

<sup>37</sup>Aru jēniari jārejaimada ūre:

—Mu, nūje jabocu, žāri yópe vaiquídī caiye iye? arejaimada Jesúre.

Aru arejamedā náre majidivū ne aino mácārōque yópe:

—Āri yaiyú bācui curōi, noi cójijinajarama cavava. Caiye iye ji coyuiyede jāivu, majinajaramu muja ji copaidaquino joabenore, ji nājiovaquinore pōevare, ne āmeina teiye boje, arejamedā Jesús.

**“Āmeina teivure jēniari jáipōecure aru nomiōpecore”  
jári dāpiarī ne đarājiyepe aino**

**18** <sup>1</sup> Jesús buedejamedā pōevare jári dāpiarī ne đarājiyepe ainoque ne jēniarajiyepe ayu Jūmenijicuque cainumua dajocabevu. <sup>2</sup> Aru arejamedā:

—Cūināimaroi cātequemavu cūinācu jabocu, āmeina teivure jēniari jáipōecu. Nāi jabocu puedabetequemavu Jūmenijicure. Aru puedabetequemavu pōevare máre. <sup>3</sup> Dīimaromiareca cātequemavu cūināco nomiōpeco máre. Ō nuri, yāvare nurejaquemavu ūre: “Cadatejacu yure, ji maucu ūi nājine đabequiyeye yure”, aquemavu ō. <sup>4-5</sup> Obedijārvuare nāi jabocu jápiabetequemavu ōre. Ūbenita no yóboi arī dāpiaquemavu ūi baju: “Yu puedabecuvacari Jūmenijicure aru puedabecuvacari pōevare máre, ico nomiō, ji yebai dado jāravua coapa, ōi pare cārijovaiye boje yure, cadatequijivu ōre, ōi ūeture đabecojiyepe yure”, aquemavu ū, arejamedā Jesús.

<sup>6</sup> Aru Jesús arejamedā:

—Jápiajarā nāi ūmu āmecu ūi aiyē báquede. <sup>7</sup> Aru jāve cadatecuyme Jūmenijicu ina ūi beoimarare jēniavure ūre, ūi cadatequiyeye aivu náre jāravure aru nāmine máre. Corede đabecube ū joe baju, cadatecuyme náre. <sup>8</sup> Coyuyubu mujare: Maumejiena cadatequijibi náre. Ūbenita yu, Jūmenijicui daroimu mācu ūmure, ji copaidaiyede ijaravui, jāve obebejīna pōeva ju aivure Jūmenijicure pararīūmeque eacuyumu, arejamedā Jesús.

**“Pucarā ūmuva ne jēniaino Jūmenijicuque” jári dāpiarī ne đarājiyepe aino  
(Mt 23.12; Lc 14.11)**

<sup>9</sup> Bediōva Jesús buedejamedā náre jári dāpiarī ne đarājiyepe ainoque. Coyurejamedā ina pōevare “¿Meara márica?” arī dāpiaivure ne baju apevu pueno. Arejamedā:

<sup>10</sup> —Pucarā ūmuva Jūmenijicuque jēniaranuquemavu Jūmenijicui cūrami. Cūinācu fariseovacacu batequémavu. Aru apecu jabovare tāutura ĩcaipōecu batequémavu. <sup>11</sup> Nāi fariseo nūri jēniari dāpiaquemavu ūi baju yópe: “Mu, ji mearore jīmu, torojuede jīvu mure, ji āmedabe boje. Yu apevure đabevu. Apevure jujovarī ĩmevu yu ne cūvaede. Āmeno đabevu yu apevure. Nomicucu, apecoque cubevu yu. Aru nāi jabovare tāutura ĩcaipōecupe đabevu yu. <sup>12</sup> Pucajārvuana sumana coapa āmecuva āiyede jēniavaiyu yu mure. Aru caiye ji cūvaede caipucapuruape paiyede cūvarī, cūináro jīvavu yu mure”, aquemavu nāi fariseo. <sup>13</sup> Ūbenita nāi jabovare tāutura ĩcaipōecu joai nūri, jāiyubecu cavarōre, totaquemavu ūi nārebare, ūi chīoiye boje. Aru aquemavu: “Mu, ji mearore jīmu, cōmaje āroje jájacu yure, āmeina teyure”, aquemavu nāi jabovare tāutura ĩcaipōecu. <sup>14</sup> Coyuyubu mujare: Jūmenijicu ārumetequemavu nāi ūmu ūi āmeina teiye báquede. Ūbenita ārumetebetequemavu nāi fariseo ūi āmeina teiye báquede. Que baru nāi cuiyucu me apevu pueno, parubecuyme pueno baju. Aru nāi parubede đaiyucu ūi baju apevu cāchino, me cūcuyme pueno baju, arejamedā Jesús.

**Jesús ñi mearore jino juedovare Jūmenijicuque**

(Mt 19.13-15; Mr 10.13-16)

<sup>15</sup> Pōeva nuvare cuivu barejáimada nēmarare Jesús yebai, ñi tuoquiyepa aivu náre ñi puruáque. Que teni Jesúi bueimara náre jáivu, nuvaicōjemenejaimada nēmarare. <sup>16</sup> Ñbenita Jesús órejarejameda náre ñi yebai. Aru arejameda:

—Ina juedova dajarāri ji yebai. Jūmenijicu jabotecuyume pōevare nápe paivure. Que baru, “Davabejarā juedovare”, abejarā náre. <sup>17</sup> Jáve coyuyubu mujare: Ácu pōecu copu etabecu baru Jūmenijicure jaboteyure ũre, yópe juedocu ñi copu etaiyepe, ecobecuyume ñi jaboteinore, arejameda Jesús.

**Cūinácū ũmu cūve cūvacu Jesúmaque ne boroteino**

(Mt 19.16-30; Mr 10.17-31)

<sup>18</sup> Cūinácū jabocu jēniari járejameda Jesúre:

—Mu, bueipōecu meacu, ¿aípe ñaji yu, cūvacuyu járavu cūiméjāravu baquinóre? arejameda Jesúre.

<sup>19</sup> Jesús arejameda ũre:

—¿Aípe teni “Meacubu mu”, ayurū yure? Jūmenijicu cūinácūrabe meacu baju. <sup>20</sup> Majivura mu Jūmenijicui ñaicōjeiyede ñi coyuiye báquede Moisés bácu: “Cuvabejacu apcore mimarepacore jaruvārī. Pōevare boarí jaruvabejacu. Ñavamejacu apacu ñi cūvaede. Borodabejacu apacure. Ju ajacu mipacure aru mipacore máre”, arejameda Jesús.

<sup>21</sup> Que teni arejameda Jesúre:

—Ñacacu caiye iye mi coyuiyede juedocu cāreja yu, aru caride máre, arejameda.

<sup>22</sup> Ñi ju aiyede jápiayu bácu Jesús, arejameda ũre:

—Cūináro javu mure cāreja. Jíni bojedajacu mi cūvede. Aru mi ñquiyede jíjacu ina cōmaje ārojarivure. Que teni cūvacuyumu mu boje méne cavarō mearo Jūmenijicui curōi. Aru dajacu yáque, arejameda Jesús.

<sup>23</sup> Ñbenita iyede jápiarī urarōreca chīorejameda, dajocaiyubecu ñi ure cūvede. <sup>24</sup> Que teni Jesús ũre jári, arejameda:

—Ina pōeva cūve cūvarivure pare maiyójavu ne ju aye Jūmenijicure, ñi meadaquiyepa aivu náre aru ne ecorājiyepa aivu ñi jaboteinore cavarō mearo ñi curōre. <sup>25</sup> Cūinácū āmacu uracu, camello āmicacu, ñi ecoru aviyo cobei, maiyójajebu ũre. Aru pūeno maiyójavu cūve cūvacure ñi ecoquino Jūmenijicui jaboteinore, arejameda Jesús.

<sup>26</sup> Ina ũre jápiaivu bácvu arejaimada:

—¿Ñame buojarī ecorājidica Jūmenijicui jaboteinore, cūvarājivu járavu cūiméjāravu baquinóre? arejaimada na.

<sup>27</sup> Jesúcapūravu arejameda náre:

—Pōeva ne ñarī majibeno maiyójabevu Jūmenijicure. Ñ cūinácūra buojarī meadayube pōevare, arejameda Jesús.

<sup>28</sup> Aru Pedro arejameda:

—Dajocacarā ñuja caiye ñuje cūvaede, ñuje daiye boje múque, arejameda Pedro.

<sup>29-30</sup> Aru Jesús arejameda náre:

—Jāve coyuyubu mujare: Ácu pōecu dajocayu baru ūi cūramine, o jímarepacore, jíbūrāre, imarare, ūi bucuvare, o ūi mārare mārē, Jūmenijicui jaboteino boje, űai pōecu eacuyume pueno baju caride ijāravui. Aru daquijāravu baquinói cuvacyume jāravu cūimējāravu baquinóre, arejamedā Jesús.

**Jesús ūi coyūino bediōva cojedeca ūi yaiquínore**

(Mt 20.17-19; Mr 10.32-34)

<sup>31</sup> Jesús nuvarejamedā ina doce paivure. Aru yópe arī, coyurejamedā náre:

—Jerusalēi nuivubu. Nore darājivubu na yure, Jūmenijicui daroimu mácure ūmupe, caiye iye Jūmenijicui yávaiyede coyucaipōeva mácavu ne toivaiye báquepe. <sup>32</sup> Jínajivubu yure ina judiōva āmevure. <sup>33</sup> Que teni ina pōeva yurinajivubu yure. Cuyoje darājivubu yure. Jēcututurajivubu yure. Jara popenajivubu yure. Aru boarí jaruvarājivubu yure. Ūbenita yóbecurijāravu yóboi jipacu, Jūmenijicu, nacovacyume yure yainore jaruvarī, arejamedā Jesús.

<sup>34</sup> Ūbenita caiye iyede jápiarī eabedejaimada na, ūi bueimara. Coreóvabedejaimada aipe aiyurō iye Jesús ūi coyuiye báquede náre. Que baru majibedejaimada ūi coyuiyede.

**Jesús ūi meadaino jári eabecure, Jericócacure**

(Mt 20.29-34; Mr 10.46-52)

<sup>35</sup> Jericó āmicurīimaroi joabeno earejamedā Jesús. No ma ēcarui cūinācu ūmu, jári eabecu, tāuturare jēniañu dobarejamedā. <sup>36</sup> Ū jápiayu bācu obedivu pōeva vaivure mái, jēniari járejamedā:

—¿Aipe teidi? arejamedā.

<sup>37</sup> Aru apevu arejaimada ūre:

—Jesús Nazarecacu mái nuimi, arejaimada.

<sup>38</sup> űai jári eabecu codoboborejamedā:

—Mu, Jesús, David bácu pāramecu, Jūmenijicui daroimu mácū, űuje jabocu bacuyú, yure cōmaje āroje jájacu, arejamedā ū.

<sup>39</sup> Aru ina ūi jipocai nuivu, ūre jaraivu, aridurejaimada:

—¡Bi ajacu mu! aridurejaimada.

Ūbenita pueno baju codoboborejamedā ū cojedeca:

—Mu, David bácu pāramecu, Jūmenijicui daroimu mácū, űuje jabocu bacuyú, yure cōmaje āroje jájacu mu, arejamedā ū.

<sup>40</sup> Que teni ūre codoboboyure jápiayu Jesús, dajocarejamedā. Aru arejamedā:

—Davajarā ūre ji yebai, arejamedā.

űai jári eabecu ūi eaiyede, Jesús jēniari járejamedā ūre:

<sup>41</sup> —¿Aipe đacaji yu mure? arejamedā Jesús.

űai jári eabecu arejamedā:

—Mu, ji jabocu, jári eabevu yu. Ūrarō jáiyuvu yu, arejamedā Jesúre.

<sup>42</sup> Jesús ju arejamedā ūre:

—Dinumu meavu. Jájacu mu cari. “Yure meadacuyume Jesús”, arī dāpiarebu mu. Que baru mi jári eabede meadacaivu yu caride, arejamedā ūre Jesús.

<sup>43</sup>Aru cūiná járejamedá ũ, jári eabecu bácu. Que teni Jesúre yóvarí nurejamedá ũ máre, mearore jýy Jūmenijicure. Que baru caivu ina pōeva máre, ũre jári, mearore jídejaimada Jūmenijicure.

### Jesús ũi copuino Zaqueo

(Mt 18.11)

**19** <sup>1</sup>Jericó āmicurīmaroi Jesús ecorí vaiyú barejamedá. <sup>2</sup>Noi cūinácu ũmu curejamedá, ũi āmiá Zaqueo. Ũ jabovare tāutura ícaipōeva ne jabocu barejamedá. Aru cuve cuvacu barejamedá ũ. <sup>3</sup>Obedivu pōeva Jesúre jáiyurí copurejaimada. Zaqueo máre jáiyuridurejamedá ũre. Ũbenita ñai Zaqueo ũmujubecu, aru obedivu pōeva ne nuiye boje ũi jipocai, jámenejamedá ũ Jesúre. <sup>4</sup>Que baru cúyarí apevu jipocai, jocucu sicómoro āmicuricui mūri, Jesúre jácunurejamedá ũ. <sup>5</sup>Que teni Jesús mái vaiyú jocucu yebai, jáñu Zaqueo jocucui tubacure, arejamedá ũre:

—Mu, Zaqueo, jōdajacu maumena. Mi cūrami maute��uyubu yu caride, arejamedá ũre Jesús.

<sup>6</sup>Que teni Zaqueo maumena jōdari, torojurí jacoyurejamedá Jesúre. <sup>7</sup>Aru caivu ina pōeva jáivu iyede, āmeina yávarejaimada.

—Ñai Jesús maute��unūimi āmeina teipōecui cūrami, arejaimada na.

<sup>8</sup>Ũi cūrami ecorīburu yóboi, Zaqueo núri, yávayu arejamedá Jesúre:

—Mu, ji jabocu, coricai ji cuvaede jíquijivu yu cōmaje ārojarivure. Aru jacopaiyovaquijivu yu ina ji jujovaimara mácavure yóvaicuvaiye pueno baju ji íno mácarōre náre jocarí, arejamedá Zaqueo.

<sup>9</sup>Que ayure, Jesús arejamedá ũre:

—Mu máre Abraham mácuí pāramecubu. Que baru caride iñami cūramicavu meadaimaramu muja. Jūmenijicu meadarejaquemavu Abraham mácure, ũi ju aiye báque boje ũre. Nopedeca Jūmenijicu meadaibi mure aru mi cūramicavure, muje ju aiye boje ũre. <sup>10</sup>Yu, Jūmenijicui daroimu mácu ũmure, vocudaivu ina bíjavure, meadacuyu náre, arejamedá Jesús.

### “Tāuturare” jári dápíarí ne đarājiyepe aino

(Mt 13.12; 25.14-30; Mr 4.25; Lc 8.18)

<sup>11</sup>Diede pōeva ne jápiarīburu yóboi, Jesús bueni búrejamedá náre jári dápíarí ne đarājiyepe ainoque, ũi Jerusalén āmicurīmaro joabejīnoi cue boje, aru ne dápíaiye boje caivu pōeva járajivure Jūmenijicui jaboteiyede pōevare maumejiena. <sup>12</sup>Que baru Jesús arejamedá:

—Cūinácu ũmu, jabova jicu, nucuyu batequémavu apeno joarōcaborōi, ne epenajipepe ayu ũre jabocuva. <sup>13</sup>Ñai jabocu bacuyú órejaquemavu caipucapuruape paivu ũre memecaipōevare. Aru náre coapa tāuturare jýy, caivure cūináturu, “Bojedajarā muja iye tāuturaque ji copaidaiyeta”, aquemavu náre ñai jabocu. Que teni ñai jabocu útequemavu ne ínajiyepe ayu tāuturare pueno baju. <sup>14</sup>Coyurí buojarí, ñai jabocu nuquemavu apeno joarōcaborōi. Ũbenita ũi jaborōcavu baju pare ubetequemavu ũre. Que baru jaroquemavu boro nūvacaipōevare ũi yóboi, ne jēniarajiyepe aivu ānijaborō jabocure, ũi epebequiyeye aivu ñai ũmure ne jabocuva. “Ũbevu ñuje jabocuva ñai ũmure”, arīduquemavu na. <sup>15</sup>Ũbenita ñai ũmu copaiyu jabocu batequémavu ũ.

'Aru órejaicōjequemavu ina ére memecaipōevare, ũi tāuturare jímara mácvure, majiyucu ne bojedari íno mácarō borore. <sup>16</sup> Que teni cūinacu ina memecaipōevacacu ñai jabocu yebai nuri, aquemavu: "Mu, ji jabocu, mi jýe báqueque bojedacacu yu. Que teni caride caipucapuruape paiturava cuvavu", aquemavu ñai jabocu. <sup>17</sup> Aru ñai jabocu aquemavu ére: "Mearo darebu mu. Memecaipōecu meacubu mu. Mi mearo daiye boje quíjinoque, jíquijivu yu mure caipucapuruape paiimaroare, mi jabotequiyupe diimaroacavure", aquemavu ñai jabocu ére. <sup>18</sup> Aru apesu ina memecaipōevacacu ñai jabocu yebai nuri, aquemavu: "Mu, ji jabocu, mi jýe báqueque bojedacacu yu. Que teni caride cūinápurupe paiturava cuvavu", aquemavu ñai jabocu. <sup>19</sup> Aru ñai jabocu aquemavu ére: "Mure máre jíquijivu yu cūinápurupe paiimaroare, mi jabotequiyupe diimaroacavure", aquemavu ñai jabocu ére.

<sup>20</sup> Ūbenita apesu ina memecaipōevacacu ñai jabocu yebai nuri, aquemavu: "Mu, ji jabocu, yui cuvavu mi tāuturare, mi jýe báquede yure. Epecacu yu diede cuitótecajeque, meadayu diede. <sup>21</sup> Jidojacubu mu. Mu íñumu apesu ũi epeiye báquede. Aru mu jēñumu apesu ũi oteiye báquede. Que baru jidutevu yu mure", aquemavu ñai jabocu. <sup>22-23</sup> Aru ñai jabocu aquemavu ére: "Mu, memecaipōecu amecubu. Mi que aye boje amecoroimu macuyumu mu. Yu jidojacure majicuvacari, aru yu íñure apesu ũi epeiye aru jēñure apesu ũi oteiye majicuvacari, epebetequemavu mu ji tāuturare tāutura epeñami. Mi que daru, copaini dayu jacopujebu yu ji tāuturare pueno baju, diñamicavu ne bojedaiye báque cojióri", aquemavu ñai jabocu.

<sup>24</sup> Que baru ñai jabocu aquemavu ina núrivre nore: "Íjara ére jocarí yo cūináturava tāuturatavare. Aru jíjarā ñai caipucapuruape paiturava cuvavure", aquemavu. <sup>25</sup> Aru aquemavu na: "Mu, ñuje jabocu, ũ jave cuvabi caipucapuruape paiturava tāuturatavare", aquemavu. <sup>26</sup> Ūbenita ñai jabocu aquemavu: "Coyuyubu mujare: Caivu cuvarivu jacopurājarama pueno baju. Ūbenita caivu dápiaivre cuvarivupe apevu pueno, caiyede náre ícuyumu yu. <sup>27</sup> Aru ina ji mavure, ji jaboteinore ubevure, davajarā náre yui. Aru boarí jaruvajarā náre ji jáinoi", aquemavu ñai jabocu, arejameda Jesús.

### Jesús Jerusaléi ũi ecoino

(Mt 21.1-11; Mr 11.1-11; Jn 12.12-19)

<sup>28</sup> Jesús ũi coyuriburu yóboi, nuñu cojedeca muri nurejameda Jerusalén amicuriimaroí nuimai. <sup>29</sup> Aru Jerusalén amicuriimaro joabejinoi nuri, Betfajé aru Betania amicuriimajinoa baji, no cūracū Olivocū amicuricū emeino baji, earejameda Jesús. Noi earí ũi buimara pucaräre, yópe arí, jarorejameda Jesús:

<sup>30</sup> — No cōchino curiimajinoi nujara muja. Ma emeinoi pōevare ũmaiāmacure, burrore, earājaramu muja, nōcacui buoimure. Pōeva ne tubabemutame cāreja. Ūbenita ũi buoimene jodeni, ére davacajarā yure. <sup>31</sup> Aru, "¿Aipe teni burrore ũi buoimene jodeni, ére nuvaivurū muja?" ne aruta, yópe ajarā muja: "Ñujare ícōjeni darobi maje jabocu. Ére ũmacayu aimacu jaubi ũ", arejameda náre Jesús.

<sup>32</sup> Ina ũi daroimara nurejaimada. Aru vaidéjavüya náre nópe Jesús ũi ayei báquepedeca. <sup>33</sup> Ne jodeiyede burrore, ére uparivu arejaimada náre:

—¿Aipe teni jodeivurū muja ũi buoimene? arejaimada na. <sup>34</sup> Aru arejaimada ina Jesúi buemara:

—Maje jabocure ũmacayu ãimacu jaubi ũ, arejaimada.

<sup>35</sup> Ne ju aiyede náre, nãvarejaimada burrore Jesúre. Ne doicajea puenocacajeare burrorã tuorĩ, Jesúu tubaquinore ðarejaimada ũi bueimara. <sup>36</sup> Ũi nuiyedeca ina obedivu pœva ma êcarui núrivu jũarejaimada ne puenocacajeare mára Jesús jipocai, pueðarãjivu ũre. <sup>37</sup> Aru Jerusalén ãmicurĩĩmaro joabejĩnoi, Jesús ũi êmeiyede cûracũ Olivocũ ãmicuricũre jocarĩ, caivu ina obedivu pœva, Jesúu bueimara, torojurivu Jũmenijicure mearore jĩni búrejaimada, ne jáiye báque boje ũi ðaiye báquede caiye iye pœva ne ðarĩ majibede. <sup>38</sup> Aru parurõreca arejaimada:

—Jũmenijicure torojue bajadéni. Jũmenijicui mearo ðacaimume ñai jabocu Jũmenijicui daroimu mácu. Cãrijimena cujarãri cavarõ mearocavu. Jũmenijicure mearo majaróri. Jũmenijicure torojue bajadéni, arejaimada na.

<sup>39</sup> Apevu fariseovacavu curivu nore arĩdurejaimada Jesúre:

—Mu, bueipœcu, bi aicõjeyacu mi bueimarare, arĩdurejaimada na.

<sup>40</sup> Ũbenita Jesús arejaimada:

—Coyuyubu mujare: Na bi aru, iboá cûraboavareca coðobobojebu, arejaimada náre Jesús.

<sup>41</sup> Jerusalén ãmicurĩĩmaro joabejĩnoi eayu Jesús, diĩmarore jáñu, orejaimada, ũi Jerusalén ãmicurĩĩmarocavure cõmaje ãroje jáiye boje. <sup>42</sup> Aru arejaimada:

—Mujã, Jerusalécavu, muje coreóvaru cãrijimene ðaiyede, meajebu mujare. Ũbenita coreóvarĩ majibevu mujã diede. Jũmenijicu majide ðabebi mujare diede cãreja. <sup>43</sup> Apejãravua baquiyéi járajaramu muje mauva edaivure muje ĩmaro turuvai. Epenajarama jobore cûracũape. Etaino cubequiyebu mujare. Bienajaramu mujare ĩmaro jí vuĩ, muje dupibenajiyeye aivu. <sup>44</sup> Jaruvãrãjarama muje cûramiare. Aru ye mautebequiyebu cûináva cûrava apeva cûrava puenora. Boarĩ jaruvãrãjarama mujare aru mujemarare máre. Caiye diede ñãjinajaramu mujã, muje coreóvabe boje cari jãravure, Jũmenijicu ũi daroiyede yure, ji meadaquiyeye ayu mujare, muje numenajiyeye arĩduyu toabo cũiméboi, arejaimada Jesús.

#### **Jesús ũi meadaino Jũmenijicui cûramine**

(Mt 21.12-17; Mr 11.15-19; Lc 21.37; Jn 2.13-22)

<sup>45</sup> No yóboi Jesús earejaimada Jerusalén ãmicurĩĩmaroi. Jũmenijicui cûrami tãibui ecorejaimada. Aru jaetovarejaimada ina bojedaipœva curivure nore jocarĩ. Arejaimada náre:

<sup>46</sup> —Yópe arĩ, toivaicõjenejaquemavu Jũmenijicu ũi yávaiyede: “Ji cûrami caivu pœva ne yure, Jũmenijicure, coyuiĩamimu”, arĩ toivaicõjenejaquemavu. Ũbenita diĩamine tatorĩ ĩvu ne dupiĩamipe ðaquemavu mujã, muje pueno urarõ tãutura ĩye boje pœvare jocarĩ, ne bojedaide muje cãvaede, arejaimada náre Jesús.

<sup>47</sup> Caijãravua Jesús bueyu barejãmeda Jũmenijicui cûrami jívuĩ. Ina sacerdotevare jaboteipœva, aru Jũmenijicui yávaiye báquede bueipœva, aru ina judíova jabova máre boarĩ jaruvaiyurivu barĩdurejaimada Jesúre.

<sup>48</sup> Ũbenita caivu ina obedivu pœvacapũravu torojurĩ jápiaiyurejaimada Jesús ũi bueiyede. Que baru ũre boarĩ jaruvãrĩ buojabedejaimada na, ũi mauva.

#### **Jesús ũi parué**

(Mt 21.23-27; Mr 11.27-33)

20

<sup>1-2</sup> Cũinãjãravu Jesús bueyu barejãmeda ina pœvare, Jũmenijicui cûrami curivure. Coyuyu barejãmeda Jũmenijicui yávaiye méne, ũi

meadaquiyede pöevare. Sacerdotevare jaboteipöeva, aru Jümenijicui yávaie báquede bueipöeva, aru judíova búcuva máre üi yebai nuri, arejaimada úre:

—Coyujacu ñujare. ¿Ye paruéque dayurü mu iye mi ñaiyede? ¿Ñame jidi mure iye paruéde mi nópe ñaiyede? arejaimada Jesúre.

<sup>3</sup> Jesús arejaimada náre:

—Yu máre jëniari jáquijivu mujare cünáro jëniari jáinore. Coyujarã yure. Aru yure coyuiyede, yu máre coyuiquijivu mujare ji paruéde ji ñaiyede.

<sup>4</sup> Juan Bautista bácu jádovaquemari pöevare Jümenijicu üi paruéque o pöeva ne paruéque? arejaimada náre Jesús.

<sup>5</sup> Üi que aiye, ne bajumia boroteivu arejaimada yópe: “Maje aru ‘Jümenijicue’, ü aquijibi ‘¿Aipe teni ju abetecarã úre?’” <sup>6</sup> Übenita maje aru ‘pöevae’, caivu ina pöeva cüraboare duvarí boarí jaruvãrãjarama majare, ne majié boje Juan Bautista bácu Jümenijicui yávaie coyucaipöecu bácu jãve”, arejaimada ne bajumia. <sup>7</sup> Que baru arejaimada Jesúre:

—Majibevu ñuja, arejaimada na.

<sup>8</sup> Dinumre Jesús arejaimada náre:

—Yu máre coyubevu mujare ñamei paruéque ji ñaiyede, arejaimada Jesús.

### “Ámena memecaipöevare” jári dápiarí ne ñarãjiyepe aino

(Mt 21.33-44; Mr 12.1-11)

<sup>9</sup> No yóboi Jesús coyurí búrejaimada ina úque curivure jári dápiarí ne ñarãjiyepe ainoque, yópe arí:

—Cünácu ümu doaicöjequemavu jiore úyaimuque. Aru epequemavu apevu úre memecaipöevare noi. Ina memecaipöeva ñajivu batequémavu apeboa úyaiboare, ne memeiye boje. Aru nuquemavu apeno joboró. Joe cucuyu batequémavu ü. <sup>10</sup> Úyai jëijãravu yóboi, ñai jio upacu jaroríduquemavu cünácu üi yebacacure memecaipöeva yebai, üi ñiquiyepe ayu apeboa úyaiboare, ñai upacu jiede. Übenita ñai yebacacu üi eaiyede nore, ina memecaipöeva úre jëni, pare boarí copaide ñaquemavu úre quédada. <sup>11</sup> Cojedeca ñai jio upacu jaroríduquemavu apecu üi yebacacure memecaipöeva yebai. Übenita úre máre boaquémavu. Aru cüyjaró ñarí, copaide ñaquemavu úre máre quédada. <sup>12</sup> Cojedeca ñai jio upacu jaroríduquemavu apecu üi yebacacure nore memecaipöeva yebai. Übenita churiá ñarí, jaetovaquemavu úre nore jocarí.

<sup>13</sup> Dinumu ñai jio upacu aquemavu yópe: “¿Aipe ñai yu? Jave majivu yu ji ñaiyede. Jaroquijivu jímacu, ji umure. Úre jáivu pueðarãjichuma na’ ayu”. Que aquemavu ü. <sup>14</sup> Übenita ina memecaipöeva jáivu ñai jio upacui mácu, aquemavu ne bajumia: “Ñai ñuje jabocu bacuyúme. Jípacu üi yainíburu yóboi, cuvacyume caiye üi cüvaede. Járica, boarí jaruvãrãjavu úre, maja cuvaburí caiye üi cüvaede”, aquemavu na. <sup>15</sup> Que arí, úre jëni jaetovaquemavu jiore jocarí. Aru boarí jaruvãquemavu úre, arejaimada Jesús.

Coyuríburu yóboi, Jesús yópe arí, jëniari járejaimada ina jápiaivure úre:

—¿Aipe ñaqui ñai jio upacu náre? <sup>16</sup> Ü boarí jaruvacyuncuyume ina memecaipöevare. Aru epecuyume apevu memecaipöevare üi jioi, arejaimada Jesús.

Diede jápiaivu arejaimada:

—¡Que ámevu no! arejaimada.

<sup>17</sup> Ëbenita Jesús, jáñu náre, arejamedá:

—¿Aipe aiyuri iye Jūmenijicui toivaicōjeiye báquede ñi yávaiye?

Iva cūravare cūramine ðaipōeva ñbeni jaruñvaquemavu. Caride iva cūrava caiva apeva pueno parurivabu, arí toivaicōjenejaquemavu.

<sup>18</sup> Ácu pōecu tuyu baru divarā, turí yavacuyume ñi bajure. Aru diva tuiva baru pōecu puenora, chitoquiyeu úre, arejamedá náre Jesús.

Yópe aiyurōtamu no: Pōeva “Ámecube ñ”, aridurājarama Jesúi borore. Ëbenita meacu bajube ñ, Jesús, caivu apevu pueno.

<sup>19</sup> Ina Jūmenijicui yávaiye báquede bueipōeva aru ina sacerdotevare jaboteipōeva máre jēni nuvaiyuridurejaimada Jesúre dinumumia, ñi coyuiye boje no jári dápiari ne ðarājiyepe ainore, cūravare coyuiño mácarōre, nára. Ëbenita jidurejaimada ina obedivu pōevare.

### **Jesús ñi coyuiño jabovare bojedainore**

(Mt 22.15-22; Mr 12.13-17)

<sup>20</sup> Ina judíovai jabova cocorejaimada Jesúre, meajāravui coreivu ne jēni jínajinore úre ñai jabocu Pilatore. Que baru ārojamená jarorejaimada jujovavure, ðavure mearape, ne earidurājiyepe aivu ñi āmeina tedu aru ñi borocuru apevure. <sup>21</sup> Que baru jēniari járejaimada Jesúre:

—Mu, bueipōecu, mure coreóvaivubu ñña. Nurié yávaivu mu. Caivure cūinácamuara yávaivu mu. Coyubevu mu pōevare yópe ne ðaiyepe. Quénora jidubecuva coyuivu mu náre yópe ne dápiaiyepe. Jāveneca bueivu mu pōevare, ne ðarājiyepe ayu mearore yópe Jūmenijicui ðaicōjeiyepe. <sup>22</sup> ¿Maje jabocu César ñi ícōjejuroede, ñi jaboteiye boje, maje bojedaru, mearica die? arejaimada Jesúre.

<sup>23</sup> Ëbenita ne jujovajuroede majicu, nácacure arejamedá Jesús:

<sup>24</sup> —Jáðovajacu yure táuturatavare. ¿Ñamema ñai, dituravare jēñu? ¿Aru ñamei āmiá curituravaba diturava? arejamedá náre Jesús.

—Césai decocu aru ñi āmiá máre curituravatamu, arejaimada Jesúre.

<sup>25</sup> —César jiede úre jacopaiyovajarā muja. Jíjarā úre táutura yópe ñi bojedaicōjeiyepe mujare. Aru Jūmenijicu jiede úre jacopaiyovajarā muja. Ðajarā yópe ñi urōpe, arejamedá náre, jēniari járadaivure, Jesús.

<sup>26</sup> Ina jujovaiyuriduivu bácvu Jesúre ñi que aiyede urarō dápiarejaimada ñi coyuiyede. Aru bi arejaimada na.

### **Saduceova ne jēniari jáino Jesúre yainore jaruvarí nacajainore**

(Mt 22.23-33; Mr 12.18-27; Hch 23.8)

<sup>27</sup> Apevu saduceova nurejaimada Jesús yebai. Saduceo āmicuriyajibobu judíovacavu ne yajubo cūináyajubo. Caivu saduceova “Yainore jaruvarí nacajaiye cubevu”, adama na. <sup>28</sup> Jesúre jēniari járejaimada ina saduceova yópe:

—Mu, bueipōecu, Jūmenijicui ðaicōjeiyede Moisés bácu toivarejaquemavu yópe: Cūinácu ñmu yaidú, jímarepacore jocarí jueðocuvabecova, yaiyú bácu yócure purubuoie javu óque, jueðocuvacuy. Aru ina jueðova bárājivu yaiyú bácu āmiāre cvarājarama na. <sup>29</sup> Javede cútequemavu siete paivu ñmava. Cūinácu ñmui mára matequémavu na. Némamicu purubuoquemavu. No yóboi yaiquémavu ñ mácu, jueðocuvabecova. <sup>30</sup> Que baru apecu, ñ mácuñā

cutuyū, pūrubuquemavū jíbucū bácuí márepacoque. Aru jíbucū bácupedeca yaiquéamavū, jueducuvabecūva. <sup>31</sup> Aru apecū, ũ mácurā cutuyū, máre nopedeca, aru caivū ina siete paivū bácvū óque pūrubuorĩ, yaiquéamavū, jueducuvabevūva. <sup>32</sup> Caivū ne yóboi, ico nomió máco máre yaiquéamavū. <sup>33</sup> ¿Yainore jaruvarĩ nacajaijārvū baquinóre, ñamei márepaco bacodóba ico? Ijārvure caivū ina siete paivū cuvatequemavū óre, arejaimada na Jesúre.

<sup>34</sup> Aru Jesús arejamedā ina saduceovare:

—Ijārvūcvavū pūrubuodāma aru némaromivare jíyama, ne pūrubuorājiyepe aivū. <sup>35</sup> Ūbenita ānijārvūcvavū yaibénama na. Que baru Jūmenijicūi yainore jaruvarĩ nacajaicōjeimara mārājivū, pūrububenajarama. <sup>36</sup> Ānijārvūcvavū ángelevape ārojarajarama na. Que baru Jūmenijicūi mārātatu na, ne yainore jaruvarĩ nacajaiye boje. <sup>37</sup> ¿Iye yainore jaruvarĩ nacajaiyede, jápiarĩ eabenarū mja Jūmenijicūi coyuiye báquede, Moisés bácu ũi toivaiye báquede, jocujicu uruijicure coyurĩ? “Yútamu Jūmenijicu. Abraham, Isaac, aru Jacob ne mearore jímumu yū”, arejaquemavū Jūmenijicu Moisés bácvure. <sup>38</sup> Yaivū bácvū ne mearore jímū āmemi Jūmenijicu. Quénora apūrivū ne mearore jímūtame ũ. Que baru ina majeñecuva apūrivūbu. Caivū Jūmenijicūi beoimara apūrivūbu na, arejamedā náre Jesús.

<sup>39</sup> Aru apecū, Jūmenijicūi yávaiye báquede bueipōevacavū, ju arejaimada áre:

—Mū, bueipōecu, me yávaivū mū, arejaimada na.

<sup>40</sup> Que baru jidūrivū jēniari jáiyubedejaimada áre bedióva cojedeca, ũi me ju aiyē boje ina áre jujovaiyūrĩduivū bácvure.

### **Cristo ñai jabocu David bácuí pāramecu**

(Mt 22.41-46; Mr 12.35-37)

<sup>41</sup> Ūbenita Jesús jēniari járejamedā náre:

—¿Aipe teni “Cristobe David bácuí pāramecu” aivūba? <sup>42</sup> David bácvacari Espíritu Santoi paruéque coyucōjeimū toivarejaquemavū Salmos āmicūriyoca cāriáiyocarā yópe arĩ:

Jūmenijicu aquemavū ji jabocure, “Dobajacu ji meapūravūi, mi cūvae boje paruéde yupedeca. <sup>43</sup> Aru yū epecuyūmu mi mauvare mi cūboba cāchinoi. Que teni mure vainĩ jarūvare dacuyūmu yū náre, mi jabotequiyēpe ayū náre”, arĩ tojivarejaquemavū David bácu Cristorā.

<sup>44</sup> David bácvacari Cristoi borore “Ūrecabe ji jabocu”, arejaquemavū. Que baru, ¿aipe teni David bácuí pāramecuba ũ? arejamedā náre Jesús.

### **Jesús ũi boro coyurĩ adaino Jūmenijicūi yávaiye báquede bueipōevare**

(Mt 23.1-36; Mr 12.38-40; Lc 11.37-54)

<sup>45</sup> Caivū ina pōeva ne jápiaiyede, Jesús arejamedā ũi bueimarare:

<sup>46</sup> —Me đajarā ina Jūmenijicūi yávaiye báquede bueipōevare. Námu cuiyūrivū cuitótecajea ũmujuricajeaque. Aru ũma na pōeva pueđarĩ ne jacoyūinore náre tãibūi. Judíovai cójijĩñamiare ne dobae méne ũma na. Aru torojūve teinore cuiyūma na ñai torojūve teino upacu yebai. Caiye iyede ũma na, pōeva ne mearo járajīyepe aivū náre. <sup>47</sup> Ūbenita jujovarĩ ñavađama ina nomiópevare ne apejēne. Aru jēniadama joe urarō Jūmenijicūque, pōeva ne dāpiarājiyepe aivū Jūmenijicūi yávaiye báquede bueipōeva me Jūmenijicure

ju aivupe. Caiye diede ne daiye boje, pueno ʋrarō nájinajarama na, ne ámeina teiye boje, arejameđa Jesús.

### Nomiópeco cʋve cʋvabeco ʋi táutura jíno Jūmenijicure

(Mr 12.41-44)

**21** <sup>1</sup> Jesús jáñu marejámeđa ina pōeva cʋve cʋvarivure ne ʋre táuturare Jūmenijicui cūrami táutura jíye epeitōcui jini tuoivure. <sup>2</sup> Járejameđa cūináco nomiópecore cʋve cʋvabecore, pʋcaturava táuturatʋravare, me bojecʋbeturavare tuodore. <sup>3</sup> Aru arejameđa:

—Jáve coyuyʋbu mujare: Ico nomiópeco cʋve cʋvabeco Jūmenijicure jíbico apevʋ ne jíye pueno baju, ʋi jíye boje ʋi cʋvarō cainore. Ūbenita nácapūravʋ quénora quíjino ne cʋvarōcarōre jíyama. <sup>4</sup> Caivʋ ina pōeva ne ʋrarō cʋvaecarōre jíyama Jūmenijicure náre jaubede. Ūbenita ico nomió ʋi quíjino cʋvarijino mácarōre jíbico cainore Jūmenijicure. Caiye ʋi ijāravui cʋvajuroede jíbico ō Jūmenijicure, arejameđa Jesús.

### Jesús ūi coyūino “Jūmenijicui cūrami tuquiyebu” arí

(Mt 24.1-2; Mr 13.1-2)

<sup>5</sup> Apevʋ, Jūmenijicui cūramine jári, arejaimađa:

—¡Pare meavabu iva cūrava! ¡Aru pare meadamiamu iñamia cūramia! ¡Aru pare mearomu pōeva ne jino mácarōre, coyuyarājivʋ diñamiare! arejaimađa na.

<sup>6</sup> Ne que aiyede, Jesús arejameđa:

—Apejāravʋ cuquiyebu cūiné đaijāravʋ baquinó caiye iye muje jáiyede. Cūináva cūrava mautebequiyebu apeva puenora. Caiye iva cūravare tuvarājarama. Que teni cūiquiyebu die, arejameđa Jesús.

### Jáđovaiye jāravʋ cūiquíye jipocai

(Mt 24.3-28; Mr 13.3-23; Lc 12.11-12)

<sup>7</sup> Jesúi bueimara jēniari járejaimađa ūre:

—Mu, bueipōecu, ¿aipyede tuquidi caiye iye cūramia ʋradámia? ¿Aipe đarí coreóvarājidica ñuja caiye iye buojaquiyede? arejaimađa na.

<sup>8</sup> Aru Jesús arejameđa náre:

—Me jájara apecu juvojaiyucure mujare. Darājarama obedivʋ ūmuva. Aru arājarama “Cristobu yʋ” aru “Cristoi daquijāravʋ baquinó joabejīnotamu”. Náre ju abejarā. Aru náque ñumejara. <sup>9</sup> Muje jápiaiyede boaino borore aru boaquíno borore máre, jidubejarā. Caiye iye vaiquiyebu jāravʋ cūiquíye jipocai. Ūbenita cūimébu cāreja, arejameđa náre Jesús.

<sup>10</sup> Dinumu arejameđa náre:

—Cūináyajubo pōeyajubocavʋ áđamatenajarama apeyajubo pōeyajubocavʋque. Aru cūináro jaboteinocavʋ áđamatenajarama apeno jaboteinocavʋque. <sup>11</sup> Ūrarō joborō cújiquiyebu obedicūrōare. Nájinajarama ávʋéna aru duica ijiéde máre, yainájivʋ. Aru járajarama ʋrarō jáđovaino jidojarōre cavarōi.

<sup>12</sup> Ūbenita iye vaiquíye jipocai pōeva jēnajarama mujare. Ámeno đarājarama mujare. Jēni jinajarama mujare ina judíovai cójijiñamine coreipōevare aru ina ámeina teivure jēni jacoñamine coreipōevare máre.

Nuvarajarama mujare, muje núrajipepe aivu cõjeipõeva ne jáinoi aru jabova ne jáinoi máre, yure muje ju aipe boje. <sup>13</sup> Dinumuma muja coyurajaramu ji borore. <sup>14</sup> Que baru muje baju majijarã, dápiabenajivu aipe muje arãjinore. <sup>15</sup> Que teni yávacari majide dacuyumu mujare, muje coyurãjiyepe ayu méne. Que baru caivu ina muje mauva mujare copu yávarí aru mujare majibevepe jádovari buojabenajarama. <sup>16</sup> Mujebucava máre, mujemamina, mujevũ, aru muje yóvaimara máre jēni jínajarama mujare, jabovare ne boarí jaruvarãjiyepe aivu mujacavure. <sup>17</sup> Aru caivu mujare, muje ju aipe boje yure, jorojĩni járajarama. <sup>18</sup> Ũbenita cūinájiyo muje podado bíjabequiyebu. Que baru ye āmeno đabenajarama mujare. <sup>19</sup> Muja ju aivu baru yure, muje yainumũta, earajaramu muja jãravu cūimējãravu baquinóre.

<sup>20</sup> Ũbenita muje jáiyede ina muje mauva churarava jacoturãdaivure Jerusalēne, majinajaramu joabenore diimaro bíjaquinore. <sup>21</sup> Dinumuma ina Judeacavu dupini nujarari cūracūai. Aru ina ĩmarocavu cūyarí etajarãri ĩmarore jocarĩ. Aru ina jioi curivu ecobejarãri ĩmarore. <sup>22</sup> Dijãravua Jũmenijicui ñãjiovaquijãravua baquiyébu, equiyepe ayu caiye iye toivaiye báquede ãnijãravua baquiyéde. <sup>23</sup> Cõmaje ãrojarajarama ina nomiva micava bárãjivu! ¡Aru ina nomiva némajina nuri dajocabevure cuvarãjivu máre, pare ñãjinajarama na! Dijãravua baquiyéde urarõ āmeno edaquiyebu ĩjaborõre. Aru ĩjãravucavu ñãjinajarama urarõ baju. <sup>24</sup> Ne mauva boarí jaruvarãjarama nãcavure. Aru buorĩ apevure, nuvarajarama náre cainoa joborõai. Aru bíjarorãjarama Jerusalēne ina judíova āmevu ne jaboteinumũ buojaiyeta, arĩ buedejameđa náre Jesús.

**Jũmenijicui daroimu mácu ũmupe ũi copaidaquino**

(Mt 24.29-35, 42-44; Mr 13.24-37; Lc 19.47; Ap 1.7; 6.12-13)

<sup>25</sup> Jesús buede nurejameđa, yópe arĩ:

—Jũmenijicu jádovacuyume ũi paruéde aviáque, aru aviá ñamicacunque, aru abiácovaque máre. ĩjãravucavu, cainoa joborõacavu, jidurivu cãrijinajarama jia urada pãcaiye pare bujié boje. <sup>26</sup> Aru põeva cuedumarajarama, ne jidué boje, dápiaivu caino no āmeno vaiquĩnore ĩjãravucavure. Que baru caivu ina paruéque curivuvacari cavarõ cūjinajarama. <sup>27</sup> Dinumu járajarama yure, Jũmenijicui daroimu mácu ũmupe. Dacuyumu ocopeniboi, urarõ paruéque, jádovacuyu meacu bajure. <sup>28</sup> Que baru caiye iye buiyede yópe ji coyuiyepe, jidubejarã. Dinumu maquinóre maumena Jũmenijicu meadaquijibi mujare, arejameđa náre Jesús.

<sup>29</sup> Aru Jesús coyurejameđa náre jári dápíari ne đarãjiyepe ayu:

—Jájara icu jocucu higueracure aru apecua jocucure máre. <sup>30</sup> Yoca yuiyede majivu muja ujurũmu joabenore. <sup>31</sup> Nopedeca jáivu caiye iye teiyede, majinajaramu muja Jũmenijicui jabotequinumu joabenore.

<sup>32</sup> Jáve coyuyubu mujare: Apevu ĩjãravui curivu yaibédeca cãreja, vaiquiyebu caiye iye yópe ji coyuiyepe. <sup>33</sup> Caino cavarõ aru caino joborõ máre cūiquiyebu. Yópe ji yávaiyepedeca jáve vaiquiyebu.

<sup>34</sup> Cãrijovamejara muje torojuve teiyeque, aru āiyeque, aru ũcuiyeque muje pacoteiyede, aru caiye ĩjãravu đaiyeque máre. Me jájara muja, ãnijãravu, ji copaidaquijãravu baquinó, edabequiyepes muje muje corebede, yópe doriñu jēiyepe moacure. <sup>35</sup> Ānijãravu baquinó edaquiyebu caivu ĩjãravucavure

maumejiena. <sup>36</sup> Ëbenita ārūjara cainumua. Muje vaiyede caiye iye nājiyede, jēniajara Jūmenijicure, ūi jīquiyeye aivū mujare ūi paruēde, nūrajivū jidubevūva aru cyebevūva märe Jūmenijicui daroimū mácū ūmure, ji jáinoi, arejameda náre Jesús.

<sup>37</sup> Caijārvua Jesús bueyū barejameda Jūmenijicui cūrami. Ëbenita nainiburu yóboi, ĩmarore jocarī nuri, Jesújā cāranuvarejaimada cūracū Olivocū āmicuricūi. <sup>38</sup> Aru javejina coapa ĩmaroi copaini, Jūmenijicui cūrami ecovarejameda cojedeca Jesús. Aru obedivū pōeva ūre jápiarānurejaimada ūi yebai nore.

### Jesús ūi coyūino ne jēnainore ūre yóboimia

(Mt 26.1-5, 14-16; Mr 14.1-2, 10-11; Jn 11.45-53)

**22** <sup>1</sup> Pascua āmicurijārvū, páure bucure daiye cube āiye torojuve teinumū joabeno marejāvūya. <sup>2</sup> Ina sacerdotevare jaboteipōeva aru Jūmenijicui yāvaiye báquede bueipōeva jūjovarī jēni, boarī jarūvayurejaimada Jesúre. Ëbenita jidurejaimada ina obedivū pōevare.

<sup>3</sup> Dinūmure nāi abujuvai jabocū, Satanás, đaicōjenejaquemavū Judas Iscariotede, nāi cūinácū ina doce paivū Jesúi bueimaracacure. <sup>4</sup> Que teni nāi Judas coyūcūnurejameda ina sacerdotevare jaboteipōevare aru ina Jūmenijicui cūramine coreipōevare märe. Náre jēni jýurejameda Jesúre. <sup>5</sup> Ūi daiyuede jápiarī, torojurejaimada na. Que baru arejaimada ūre: “Ūjūa jínajivūbu mure tāuturare, űjare mi jēni jýe boje ūre yavenina”, arejaimada Judare. <sup>6</sup> Judas jū arejameda náre. Que baru jári coreni búrejameda, jēni jícuyū Jesúre yavenina, ina obedivū pōeva ne jámenoi.

### Jesús ūi āino ūi bueimaraque

(Mt 26.17-29; Mr 14.12-25; Jn 13.21-30; 1 Co 11.23-26)

<sup>7</sup> Páure bucure daiye cube āiye torojuve teijārvū barejāvūya. Pascua jārāvūcacure, ovejajicure, boarī, toaque juarī, ávarejaimada dijārvure. <sup>8</sup> Que baru Jesús, Pedrore aru Jūare märe jarorī, arejameda náre:

—Meadarānūjara maje Pascua jārāvūque āiyede maje ārājiyede, arejameda náre Jesús.

<sup>9</sup> Aru jēniari járejaimada Jesúre:

—¿Ári nuri meadacarājidica űjūa diede? arejaimada na.

<sup>10</sup> Ū arejameda náre:

—Muja ecoivū bācavū ĩmarore, ĩmeni, nócacure oco tuyure copurājaramu muja. Ūque nuri, cūramine ūi ecoiyede cūináturu muja märe ecojarā.

<sup>11</sup> Diñami upacure yópe ajarā muja: “ ¿Átucubūa ji bueimaraque ji Pascua jārāvure ji āquitucubū? ” aibi bueipōecu”, ajarā muja. <sup>12</sup> Diñami upacūcapūrvū puenocatucubū uratucubū jave majare jauēde meadaitucubū bācarōre mujare jádovacūyume ū. Noi ditucubūi majare maje ārājiyede meadajarā muja, arejameda náre Jesús.

<sup>13</sup> Ūre jū arī, nuri, ĩmaroi earejaimada na. Earī, nore Jesús ūi aiye báquepedeca ūi aitucubure earejaimada. Noi Pascua jārāvūque āiyede meadarejaimada na pūcarā.

<sup>14</sup> Que teni ne Pascua āiora barejāvūya. Jesús earī, dobarejameda tuoiva yebai ūi yāvaiye méne beorī coyūcōjeimaraque. <sup>15</sup> Aru arejameda náre:

—Pare áiyuvu yu iye Pascua áiyede mujaque ji nájiquiye jipocai. <sup>16</sup>Que baru coyuyubu mujare: Ámecubu yu Pascua jaravúque áiyede cojedeca, pu Jümenijicui jaboteino eaiyeta, arejamedá Jesús.

<sup>17</sup>Ücuidore ñni, Jümenijicure torojuede jíniburu yóboi, arejamedá:

—Ûju, coapavajarā dicorore muje baju. <sup>18</sup>Que baru coyuyubu mujare: Quénora vino úyaicorore úcuñamu yu ijāravure. Ücumećubu dicorore cojedeca, pu Jümenijicui jaboteinuñuñu, arejamedá üi bueimarare Jesús.

<sup>19</sup>Ne áiyedeca, páure ñni, Jümenijicure torojuede jidejamedá Jesús. Torojuede jñni buojari, páure cotavarejamedá. Cotavari buojari, náre coapa jñni, arejamedá:

—Dápijarā iye páure yópe muje dápiaiyepe ji bajure. Jíquijivu yu ji bajure, ne boarí jaravarájiyepe yure, mujare ji meadaquiye boje. Que baru muje áiyede iye páure, árujara yure, arejamedá náre Jesús.

<sup>20</sup>Aru nopedeca ücuidore ñni, ne ári bubariburu yóboi, Jesús arejamedá:

—Dápijarā iye ücuiyede yópe muje dápiaiyepe ji jivede. Jíquijivu yu ji jivede, ne boarí jaravarájiyepe yure, mujare ji meadaquiye boje. Que baru yure mequiyepe ji jive obedivure boje. Jümenijicu “Yópe đajarā muja, boropatebenajivu ji jáinoi”, üi yóbocarō coyüino mácarōre pöevare árujararamu muja, muje ücuiyede diede. <sup>21</sup>Übenita jájara. Nai ümu jñni jícuy yure ji mavare cubi yui tuoiva yebai yúque. <sup>22</sup>Yu, Jümenijicui daroimu mácu ümupe ijāravui, ji yaijāravui nacuyamu yu, yópe Jümenijicui toivaicōjeiye báquepedeca üi yáviyede. Übenita ámeno vaicúyume ü, ñai yure jñni jíyu bacuyú, arejamedá Jesús.

<sup>23</sup>Que baru jñniari jári búrejaimada ne bajumia:

—¿Name maquidí jñni jíyu Jesúre üi mavare? arejaimada na.

### **¿Namema parucu maje jēnebore?**

(Mt 18.1; 19.28; 20.25-28; 23.11; Mr 9.34-35; 10.42-45; Lc 9.46; Jn 13.12-15)

<sup>24</sup>Jesúi bueimara yópe yávarējaimada ne bajumia:

—¿Namema majacacu parucu apevu pueno? arejaimada.

<sup>25</sup>Jesús arejamedá náre:

—Ina judíova ámevu ne jabova parúque cōjeivubu ne jaborōcavure, ne đacarājiyepe aivu náre ne urōpe. Aru ina jaborōcavu, “Ñujare cadateipöevatamu”, aivubu ne jabovare. <sup>26</sup>Übenita nápe đabejarā muja. Nai mujacacu parucu baiyucu baru, mujeyocupe memecajacurí mujare. <sup>27</sup>Apevu dobarivubu tuoiva yebai. Aru apevu, ne yebacavu, jíyama ina dobarivure ne áiyede. ¿Namema parucu apevu pueno? ¿Nai dobacu tuoiva yebai o ñai yebacacu pueno parucuba? Jáve ñai dobacu tuoiva yebai pueno parucube. Übenita yu cuva muje jēneboi yebacacupe.

<sup>28</sup>Muja dajocabevu yure ji nájiyede, quénora nájivu muja cūináturu yúque. <sup>29-30</sup>Yópe jipacu üi jíyepe yure ji jabotequinore, nopedeca yu máre jívu mujare muje jabotenajinore, muje dobarājiyepe ayu ji tuoiva yebai ji jabotequiyede, árajivu aru úcurajivu yúque, aru muje dobarājiyepe ayu jabovai dobarōa mearoara, coyurājivu mearare o ámenare ina doce paiyajuboa Israecavure, arejamedá Jesús üi bueimarare.

### **Jesús üi coyüino Pedrorre üi “Jesúre yu coreóvabevu” aquinore**

(Mt 26.31-35; Mr 14.27-31; Jn 13.36-38)

<sup>31</sup>Jesús arejamedá Simón Pedrorre:

—Mu, Simón, ñai abujuvai jabocu Satanáre Jūmenijicu ñujovaicōjeimi mujare, yópe pō eva ne jajūbiyepe matore. <sup>32</sup> Ëbenita yu jēniavū Jūmenijicuque, mi dajocabequiyepe ayu mi ju aiyede úre. Ñai abujuvai jabocu mure ñujovarīburu yóboi, mi me cuquiyepe Jūmenijicuque cojedeca, cadatejacu apevu úre ju aivure, mi yóvaimarare, arejamedā Jesús.

<sup>33</sup> Aru Simón Pedro arīdurejamedā Jesúre:

—Mu, ji jabocu, ámeina teivure jēni jacoñami máque nuñu buojaivu yu. Aru máque yayiú máre buojaivu yu, arīdurejamedā Jesúre.

<sup>34</sup> Ëbenita Jesús arejamedā úre:

—Mu, Pedro, coyuyubu mure: “Jesúre yu coreóvabevu”, acuyumu mu cari ñami, cáyu ñi órejaquiye jipocai. Aru yóbecue nópe acuyumu mu, arejamedā Pedroré Jesús.

### Jesúre ne jēnaino joabenoi

(Mt 10.9-10; Mr 6.8-9; Lc 9.3; 10.4)

<sup>35</sup> Jesús arejamedā náre, ñi bueimarare:

—Javede ji jaroiyede mujare nuvameteavū muja tātuturare, aru curubure, aru curaidoare máre. ¿Ye jautearī mujare? arejamedā náre Jesús.

Aru ju arejaimada úre:

—Jaubeteavū ñujare, arejaimada na.

<sup>36</sup> Ë arejamedā náre cojedeca:

—Ëbenita caride ñai tātuturare cuvacu baru, nuvajacurī diede. Aru ñai curubure máre cuvacu baru, nuvajacurī dicurubure. Aru ñai boaicarovede cuvabecu baru, ñi puenocacaje doicajede jíjacurī, bojedacuyu boaicarovede.

<sup>37</sup> Coyuyubu mujare: Javede Jūmenijicui yāvaiyede coyucaipōecu bácu, yópe arī, toivarejaquemavu yurā: “Pōeva úre ñarājarama yópe ne ñaiyepe ámeina teivure”, arī toivarejaquemavu. Aru ji mauva ñarājarama yure nópe iye toivaiye báque coyuiyepe, arejamedā Jesús.

<sup>38</sup> Arejaimada na:

—Mu, ñuje jabocu, jájacu. Yuibu pucavea boaicarovea, maje boarājivea, arejaimada.

Aru Jesús ju arejamedā náre:

—Quénora meaquiye, arejamedā Jesús.

### Jesús Getsemaní ñi jēniaino Jūmenijicuque

(Mt 26.36-46; Mr 14.32-42)

<sup>39</sup> No yóboi Jesús etarejamedā ne Pascua áitucubure jocarī. Aru ñi ñari cōmajiyepé nurejamedā cūracū Olivocū ámicuricūi. Ë bueimara máre yóvarejaimada úre. <sup>40</sup> Ne eaiyede ñi nuiyurō mácarōi, Jesús arīdurejamedā náre:

—Jūmenijicuque borotejarā muja, abujuvai jabocui mujare ñujovarī, ámeina tede ñabequiyepe aivu, arīdurejamedā náre Jesús.

<sup>41</sup> Que ayu bácu, náre jocarī nurejamedā, yópe pōecu cūrabore ñuvarī jaroinope paino baji. Aru ñuatutarī joborōi borotedejamedā Jūmenijicuque.

<sup>42</sup> —Mu, jipacu, yure cari vaiquíye vaibéjadeni. Caiyede ñaiye majicutamu mu. Ëbenita ji urōpe ñabejacu. Quénora mi urōpe ñajacu mu, arejamedā jípacure Jesús.

<sup>43</sup> Dinumure cūinācu ángele, cavarō mearo Jūmenijicui curōcacu, járorejamedā ūi yebai, cadatecudayu earejamedā. <sup>44</sup> Jesús ūi urredō nājiye boje, pueno parurō borotedejamedā Jūmenijicue. Que teni ijove darī, jivepe turejavūya joborōi.

<sup>45</sup> Aru boroteni buojari, nacajari copainurejamedā, ūi bueimara yebai. Earejamedā náre cāivure, uetivure, ne chōiye boje. <sup>46</sup> Dinumu Jesús arejamedā náre:

—¿Aipe teni cāivurū mija? Nacajara. Jūmenijicue borotejarā mija, abujuvai jabocui mujare jujovari, āmeina tede dabequiepe aivu, arejamedā náre Jesús.

### **Jesúre jēni ne nuvaino**

(Mt 26.47-56; Mr 14.43-50; Lc 19.47; 21.37; Jn 18.2-11)

<sup>47</sup> Jesús ūi boroteiyedecata earejaimada obedivu pōeva. Judas, ina doce paivucacu, jipocatedejamedā náre. Jesús yebai nuri, ūre jiva nuri jacoyurejamedā. <sup>48</sup> Ūbenita Jesús arejamedā ūre:

—Mu, Judas, ¿jiva nuri jacoyuyurū mu yure, Jūmenijicui daroimu mácure ūmupe, jēni jícuyū yure ji mauvare? arejamedā Jesús ūre.

<sup>49</sup> Ina Jesúi yóvaimara, jáivu iyede vaiyede, jēniari járidurejaimada Jesúre:

—Mu, űuje jabocu, ¿boarájidi űuja náre iveá boaicaroveaque? arīdurejaimada na.

<sup>50</sup> Dinumuma cūinācu Jesúi yóvaimaracacu ūi boaicarovede tatorī, duarī, īni, sacerdotevare jaboteipōecui yebacacure juijóri najuárejamedā ū, ūi meapūravucacamucare. <sup>51</sup> Ūbenita Jesús arejamedā:

—Dajocajarā diede quénora, arejamedā.

Que ayuva, ūi cāmucare tuorī, ūre meadarejamedā Jesús. <sup>52</sup> Dinumure Jesús arejamedā ina sacerdotevare jaboteipōevare, aru ina Jūmenijicui cūramine coreipōevare, aru ina judíova bucuvare máre:

—¿Tatorī űavaipōecure jēivupe yure boaicaroveaque aru boaiduaque jēni jacorādaivurū mija? <sup>53</sup> Jāravua coapa mijaque Jūmenijicui cūrami cútecacu yu. Apurī mijaque cūcure, yure jēni jacobeteavū mija. Ūbenita caride Jūmenijicu mujare daicōjeñume mije urōpe yáque. Aru caride abujuvai jabocu āmeno dare daibi yure, yópe mije urōpe, arejamedā Jesús.

### **“Jesúre yu coreóvabevu” arī, Pedro ūi coyūino**

(Mt 26.57-58, 69-75; Mr 14.53-54, 66-72; Jn 18.12-18, 25-27)

<sup>54</sup> Que arurata Jesúre jēni, sacerdotevare jaboteipōecui cūrami nuvarejaimada ūre. Aru Pedro joajienata ūi yóboi nure nuñu mácū, sacerdotevare jaboteipōecui tāibui ecorejamedā ū. <sup>55</sup> Apevu Jesúre nuvaivu bācavucavu toabore dacuvarīburu yóboi, dobarejaimada toabo ēcarui nore tāibu coricai. Aru Pedro máre dobarejamedā ne jēneboi. <sup>56</sup> Ūi noi dobaedeca, yebacarōmivacaco cūināco járejacoda Pedrore, toabo pēoiyede ūi jivare. Ūre me cocorī, arejacoda:

—űai ūmu máre cútebi Jesúque, arejacoda ō.

<sup>57</sup> Ūbenita Pedro ju abedejamedā ōi yávaiyede:

—Jesúre yu coreóvabevu, arejamedā.

<sup>58</sup> Que arīburu yóji boi, apecu, Pedrore jáñu, arejamedā:

—Mu máre nácacubu, arejamedá.

Ûbenita Pedrocapūravu arejamedá cojedeca:

—¡Nácacu ámevu! Jesúre yu coreóvabevu, arejamedá.

<sup>59</sup> Cūináora yóboi, apecu máre arejamedá parurōreca:

—Jāve ñai ũmu cútebi Jesúque. Û máre Galileacacutame ũ, arejamedá.

<sup>60</sup> Ûbenita Pedrocapūravu jāve ayupe, pare baju arejamedá cojedeca:

—¡Jāveneca Jūmenijicui jāinoi yu mure coyuyutamu! ¡Jāve ji coyubedu, Jūmenijicu ámedajacurī yure! Mi aimure ye majibecutamu yu. Nai Jesúre yu coreóvabevu, arejamedá.

Dinūmūma, ũi que aye bajure, órejurejamedá cáyu. <sup>61</sup> Que teiyedata, Jesús copedini járejamedá Pedrorre. Aru ũ ārurejamedá Jesús ũi coyuiye báquede: “Carī ñami, cáyu ũi órejaquiye jipocai, yóbecue baju ‘Jesúre yu coreóvabevu’, acuyumu mu”, arī coyuiye báquede ārurejamedá Pedro. <sup>62</sup> Aru ārucu, cūiná etarī, pare chiori orejamedá ũ.

#### Jesúre ne yávarī yurino

(Mt 26.67-68; Mr 14.65)

<sup>63</sup> Ina Jesúre coreipōeva yuridejaimada ũre. Aru totatarejaimada ũre. <sup>64</sup> Ûi yacoruare moari, ũre pēvavari, arejaimada:

—Coyujacu mu. ¿Name matedí mure pēvañu? arejaimada na.

<sup>65</sup> Aru urarō yávarī, āmeina yávarejaimada ũre.

#### Jesúre ne nūvaino judíovai jabova cójijivu yebai

(Mt 26.59-66; Mr 14.55-64; Jn 18.19-24)

<sup>66</sup> Avia ũi tucumuiyede, ina judíova bucūva, aru ina sacerdoteware jaboteipōeva, aru ina Jūmenijicui yávaiye báquede bueipōeva máre cójijidejaimada na. Nūvarejaimada Jesúre ne cójijinoi. Aru arejaimada ũre:

<sup>67</sup> —Mu Cristo baru, coyujacu ñujare, arejaimada na.

Aru Jesús arejamedá náre:

—Ji coyuru, muja ju abenajaramu yure. <sup>68</sup> Aru ji jēniari járu, ju abenajaramu muja yure. <sup>69</sup> Ûbenita yure, Jūmenijicui daroimu mácure ũmure, járajaramu muja caride pu cainūmua Jūmenijicu parucuī meapūravui dobacure, arejamedá.

<sup>70</sup> Dinūmu caivu ina jēniari járejaimada:

—¿Jūmenijicui mácurū mu? arejaimada.

Jesús ju ayu náre arejamedá:

—Quédeca, muje aimurecabu yu, arejamedá ũ.

<sup>71</sup> Nácapūravu arejaimada:

—Apevu ne coyuiye jaubevu. Javeta jápiadavū maja ũi coyuiyede ũi baju āmeina teyure, jorojīni arejaimada na.

#### Jesúre ne nūvaino Pilato yebai

(Mt 27.1-2, 11-14; Mr 15.1-5; Jn 18.28-38)

**23** <sup>1</sup> No yóboi caivu ina judíovai cójijinocavu nacajari, Jesúre nūvari, jabocu ũi āmiá Pilato yebai jacorānurejaimada na. <sup>2</sup> Aru āmecororī búrejaimada Jesúre.

—Ñuĵa eavũ ña i ù mure jaruvarĩduyũre maje jaborõre, aru bojedaicõjemecure ñujare tauturare maje jabocu Césare, aru ayũre ùi baju “Cristobu yũ” aru jabocu máre, arejaimađa na Pilatore.

<sup>3</sup>Ne que aiyede, Pilato jēniari járejameđa Jesúre:

—¿Múru judíovai jabocu? arejameđa.

Jesús ju arejameđa:

—Quédeca, mi aimurecabu yũ, arejameđa.

<sup>4</sup>Pilato arejameđa ina sacerdotevare jaboteipõevare aru caivũ ina obedivũ põevare:

—Ămeina tebecutame ù ji járu, arejameđa.

<sup>5</sup>Ūbenita parurõreca arejaimađa bediõva cojedeca:

—Ñai cãrijovaimi caivũ Judeacavũre ùi bueiyeque. Bueni búquemavũ Galileai. Aru edaibi yuita, jorojĩvũ arejaimađa na.

### **Jesúre ne nuvaino Herodes yebai**

<sup>6</sup>Ne nópe ãmecoroyede jápiarĩ Pilato, jēniari járejameđa:

—¿Galileacacuba ù? arejameđa.

<sup>7</sup>Ina Jesúre ãmecoroivũ ne ju aiyede, Pilato majicũ Jesúre Galileacacure, jarorejameđa ùre Galileacavũ ne jabocu Herodes yebai. Dinũmu ñai Herodes Jerusalén ãmicuriĩmaroĩ curejameđa. <sup>8</sup>Jesúre jári, torojũrejameđa Herodes, ùi jápiaiyẽ báque boje Jesúĩ ðaiye báque borore. Que baru ùre pare jáiyũcũ barejámeđa. Jesús põeva ne ðarĩ majibede ðayũre pare jáiyũrejameđa Herodes. <sup>9</sup>Jesúre caijiene jēniari járidurejameđa Herodes. Ūbenita Jesúcapũravũ bi arejameđa ùre. <sup>10</sup>Herodes ùi jēniari jáiyede Jesúre, pare ãmecoroivũ barejáimeđa ina sacerdotevare jaboteipõeva aru Jũmenijicui yávaiye báquede buaipõeva máre. <sup>11</sup>Dinumuma Jesúre yurini, ãmeno baju ùre ðarejaimađa na, Herodes ùi churaravaque. Doicaje meacajede Jesúre doarĩ, ùre yurini, Pilato yebai jacopaiyovarĩ jarorejameđa Herodes. <sup>12</sup>Jipocare ina jabova pũcarã maucũvarejaimađa ne baju. Ūbenita ne que teijãravũ, dijãravũ baji, boroteni, meadarejaimađa ne baju, Herodes Pilatomaque.

### **Põeva ne boarĩ jarũvaicõjeino Jesúre**

(Mt 27.15-26; Mr 15.6-15; Jn 18.39-19.16)

<sup>13</sup>No yóboi Pilato cójijovarejameđa ina sacerdotevare jaboteipõevare aru apevũ judíova cójijinocavũre máre. <sup>14</sup>Ne cójijiyede ùi yebai, arejameđa náre:

—Ñai ùmure davaivũbu muja ji yebai. Ūre boro coyurĩ adarĩ, “Ū jaruvarĩduibi maje jaborõre”, aivũbu yure. Ūbenita muje jáinoi yũvacari jēniari jáivũ ùre ùi ðaiye báquede. Aru ùi coyuiyede jápiarĩburu, coyũyũbu mujare: Ămeina tebecutame ù ji járu. <sup>15</sup>Herodes máre Jesús ùi ãmeina teiyede eabetcube. Que baru jacopaiyovacube ùre ñũje yebai cojedeca. Jápiarã. Coreóvaivũbu muja. Ūi ãmeno ðaru, ùre boarĩ jarũvaicõjejebu yũ. <sup>16</sup>Que baru jara popeicõjeniburu yóboi, jaetovaquijivũ ùre, arejameđa náre Pilato.

<sup>17</sup>Nópe ðayũ Pilato, ùi ðarĩ cõmajiye boje ujuá coapa no torojũve teinumure, cũinácũ jacoimũ mácure, põeva ne etavaicõjeimure, jaetovavarejameđa ù. <sup>18</sup>Ūbenita caivũ ina põeva coðoboborejaimađa cũináturũ, boarĩ jarũvaicõjeivũ Jesúre.

—¡Ñaine boarí jaruvaicōjejacu mu! Barrabáre jaetovajacu mu, arí codoboborejaimada na.

<sup>19</sup>Nai Barrabás ámicucure jacorejaimada ámeina teivure jēni jacoĩnami ũi boarí jaruvaiyue boje Romacavure, ne jaboteiye boje Jerusalén ámicurĩmarore, aru pōevare ũi boarí jaruvaiye báque boje máre. <sup>20</sup>Ūbenita Pilatocapūravu jaetovaiyurejaimada Jesúre. Que baru bediōva cojedeca coyuridurejaimada ina pōevare. <sup>21</sup>Ūbenita cojedeca codoboborejaimada ina pōevacapūravu, boarí jaruvaicōjeivu Jesúre.

—¡Ūre jocucujaravena pēvari boarí jaruvaicōjejacu mu! arí codoboborejaimada Pilatore.

<sup>22</sup>Bediōva cojedeca Pilatocapūravu arĩdurejaimada náre:

—¿Yéde ámeina tearĩ ñai? Coreóvaivubu muja. Ūi ámeno đaru, ũre boarí jaruvaicōjejebu yu. Que baru jara popeicōjeniburu yóboi, jaetovaquijivu ũre, arĩdurejaimada Pilato náre.

<sup>23</sup>Ūbenita ina pōevacapūravu parurōreca codoboborĩ bujiéque boarí jaruvaicōjenejaimada Jesúre. Que baru Pilato ju arejaimada náre. <sup>24</sup>Boarí jaruvaicōjenejaimada ũre ina pōeva ne urōpe. <sup>25</sup>Pilato jaetovarejaimada ñai boarí jaruvayu bácare, ámeina teivure jēni jacoĩnamicacure, ne jēniaimure. Ūbenita jĩdejaimada Jesúre náre, ne đarājiyepe ayu ũre yópe ne urōpe.

### **Jesúre ne pēvari yuyaino jocucujaravena**

(Mt 27.32-44; Mr 15.21-32; Jn 19.17-27; Ap 6.16)

<sup>26</sup>Jesúre nūvarejaimada. Jocucujaravede ture nuñu maridurejaimada ũ. Aru cuyu bácu ĩmaroi earejaimada Simón, Cirene ámicurĩmarocacu. Nore vaiyúre, ũre Jesús ũi jocucujaravede tuino mácarōre tuicōjenejaimada na, churarava, Jesús yóboi.

<sup>27</sup>Obedivu pōeva nurejaimada ũi yóboi. Aru nácavu nomiva orejaimada pare, ne chĩoiye boje. <sup>28</sup>Ūbenita Jesús copedini, náre jári, arejaimada:

—Muja, Jerusalécavu, obejarā yure. Quénora ojarā muje bajure, mujemarare máre. <sup>29</sup>Apejāravua baquiyéde pōeva arājarama yópe: “Torojurājarama ina juedocuvabevu, aru ina juedoeabevu máre”.

<sup>30</sup>Arājarama cūracūa uracūare: “Tujacūari ñujare”. Aru arājarama cūracūare: “Yavejacūari ñujare”. <sup>31</sup>Muja jáivu ne đaiyede yure, meacure, jocucupe páyure. Que baru jāve pueno ámeno đarājarama mujare, ámenare, yópe pecacupe paivure, arejaimada náre Jesús.

<sup>32</sup>Aru pucarā ámeina teivure máre nūvarejaimada ina churarava, Jesúque ne boarí jaruvarājimarare. <sup>33</sup>Pōe jipobucū ámicuricū cūracūi eaiyu, Jesúre jocucujaravena pēvari jēorejaimada na. Aru ina pucarāre máre ne jocucujaravea coapa pēvari jēorejaimada na, cūinácure meapūravui, apēcure cācopūravui, aru Jesúre ne coricai. <sup>34</sup>Ūbenita Jesús arejaimada:

—Mu, jipacu, ne ámeina teiyede ārumetejacu mu. Coreóvabema ne đainore, arejaimada Jesús jípacure.

Churarava ne yajuiyede đavarĩ, cainijidua etaiyede jári, Jesús ũi doiyede náre coapa ĩnejaimada na, ũre pēvaivu bácvu. <sup>35</sup>Pōeva nore cocoivu barejaimada. Aru nácavu judiōvai jabova, Jesúre yurivu, yópe arejaimada na:

—Apevure meadavacacu. Caride jāve Jūmenijicui beoimu maru, Cristo baju baru, ũi bajure meadajacurĩ ũ, arejaimada na.

<sup>36</sup>Ina churarava máre ére yurivú barejáimada na. Ëi yebai nuri, úcuiye upíateiye báquede ére jínidurejaimada na, ére ijibequiyeye aivú. Aru arejaimada ére:

<sup>37</sup>—Mu judíovai jabocu baru, mi baju mi yaiquínore meadajacu, arejaimada Jesúre ina churarava.

<sup>38</sup>Jocucujaravena, ñi puenoi, toivaino jēnevavūya. “Judíovai jabocube”, aiyurejavūya no toivaino. Griegova ne yávaicamuaque, Romacavú ne yávaicamuaque, aru judíova ne yávaicamuaque máre toivarejaimada nore.

<sup>39</sup>Aru cūinácu ina āmeina teivucacu, jocucujaravena ne pēvaimu mácu, Jesúre āmeina yávorejamedá ũ máre.

—Mu, ¿Cristo āmecurū mu? Cristo baju baru, mi baju mi yaiquínore meadarī, ñujare máre ñuje yainájiyede meadacajacu mu, arejamedá Jesúre.

<sup>40</sup>Ëbenita apēcucapūravu Jesúre āmeina ayure jári, jararejamedá:

—¿Jūmenijicure jidubecurū mu? Maja yaivutamu, maje āmeina teiye báque boje. <sup>41</sup>Que baru āmeno vaivú majare. Ëbenita ñai āmeina tebecutame ũ. Majacapūravu maje āmeina teiye báquede bojedaivutamu maja, arejamedá.

<sup>42</sup>Que ayuva, arejamedá Jesúre:

—Mu, Jesús, jabocu bacuyú, ārujacu yure, arejamedá.

<sup>43</sup>Aru Jesús ju arejamedá ére:

—Jāve coyuyubu mure: Cari jāravumica Paraíso āmicurōi yáque cucuyumu mu, arejamedá Jesús ñai chīōñure ñi āmeina teiye báquede.

#### **Jesús ũi yaino**

(Mt 27.45-56; Mr 15.33-41; Lc 8.2-3; Jn 19.28-30; Hch 7.59; He 10.20)

<sup>44</sup>Jāravú corica baji ñemié turī darejavūya caino joborōi. Pu yóbecuriora yóboita vaidéjavūya. <sup>45</sup>Que baru yóbecuriora baju ye aviá pēomenejamedá. Aru Jūmenijicui cūramicacaje uracaje coricōpavaicaje bácarō quéda corica baji jađeni nurejavūya. <sup>46</sup>Dinumure pare bujié codoborī, yávarī darorejamedá Jesús:

—Mu, jipacu, ji ũmene mure jýyubu yu, arejamedá Jūmenijicure.

Que ayuva, yaidéjamedá ũ.

<sup>47</sup>Nore Jesús bácuře cocorī núcu barejamedá churaravai jabocu. Jesús yaiyúre jári, mearore jídejamedá Jūmenijicure.

—¿Jāveneca ñai ũmu āmeina tebecu batecúbe! arejamedá churaravai jabocu.

<sup>48</sup>Aru caivú ina obedivú pōeva cójijivú bácvu nore, Jesús yaiyú bácuře jáivú, copainurejaimada ne cūramia coapa, totaivú ne ñarebare, ne chīoiye boje. <sup>49</sup>Caivú Jesús bácu coreóvaimara, aru ina nomiva, Galilea āmicurōre jocarī daivú bácvu éque, na máre cocorī núrejaimada joajīemia.

#### **Jesús bácu jaruvaimu ne pōe jaruvaino**

(Mt 27.57-61; Mr 15.42-47; Jn 19.38-42)

<sup>50</sup>Cūinácu ũmu curejamedá, ñi āmiá José, Arimatea āmicurīmarocacu. Sacerdotevai cójijinore coyupōevacacu barejamedá ũ. Ñai José meacu aru āmeina tebecu barejamedá ũ. <sup>51</sup>Que baru ju abedejamedá ina judíovai cójijinocavú ne đaiye báquede Jesúre. Ë máre Jūmenijicui jabotequinumu maquinóre napini coreyu barejamedá ũ. <sup>52</sup>Pilato yebai nuri, Jesús bácu

baju bácarõre jëniacũnurejamedã ã. <sup>53</sup> Pilato ãi jëniayede ju arĩburu yóboi, Jesús bácare jocũcũjaravede jõdãvari, ãni, meacaje boricaje lino ãmicuricajeque cũmari nũvarejaimada ã mãcare cũracobei. Põeva ne yaivũ bácvũ ne ãmamecobe barejávũya dicobe. Aru dicobei Josějã jarũvarejaimada Jesús bácare. <sup>54</sup> Dijãravũ, nainú, torojũve teijãravũ baquinóre meadaijãravũ barejávũya. Sábado baquinó jipocacajãravũ barejávũya.

<sup>55</sup> Ina nomiva Jesúque eaivũ bácvũ Galilea ãmicurõre jocarĩ, Josějã yóboi nuri, jãrejaimada dicobede aru ne jarũvayede Jesús bácvũ baju bácarõre nore.

<sup>56</sup> Jãri buojari, copainurejaimada na, meadarãjivũ mumijuede aru jĩjovayede mãre, ne nũvarajiyede sábado jãravũ yóboi, meadarãjivũ Jesús bácvũ baju bácarõre dieque. Aru judĩovai jabuóvajãravũ sábadoi, jabuóvarejaimada na yópe Jũmenijicui daicõjeiye báquepe.

### Jesús ãi nacajaino yainore jarũvari

(Mt 16.21; 17.22-23; 20.18-19; 28.1-10; Mr 8.31; 9.31;

10.33-34; 16.1-8; Lc 9.22; 18.31-33; Jn 20.1-10)

**24** <sup>1</sup> No sumana buijãravũ domingo javejĩnara, aviã ãi tucũmuyede, ina nomiva nurejaimada Jesús bácare ne jarũvainoi, nũvaivũ mumijuede, ne meadaiye báquede, yuarãjivũ diede Jesús bácvũ baju bácarõre.

<sup>2</sup> Dicobe cũracobede curejavũya bieiturava cũraturava uraturava. Dinomiva ne eaiyede ã mãcare ne jarũvainore, earejaimada dicobe biebecobede.

<sup>3</sup> Õbenita ne ecoiyede dicobei, Jesús bácvũ baju bácarõre eabedejaimada.

<sup>4</sup> Cãrijini dãpiaivũ, “¿Ari curi Jesús bácvũ baju bácarõ?” arejaimada ne bajumia. Ne nõpe dãpiaiyedeca, jãrorejaimada pucarã õmũva, nũrivũ ne yebai. Aru ne doicajea boricajea pare pẽorejavũya. <sup>5</sup> Que baru ina nomiva, cucumaivũ, doco jãrejaimada na, ne jidué boje. Aru ina õmũva arejaimada náre:

—¿Aipe teni voivũrũ mũa apũcare yaivũ bácvũre ne jarũvainoi? <sup>6</sup> Jesús jave nacajami yainore jarũvari. Que baru cubebi yore. ¿Arũmetenaru mũa ãi coyũiye báquede mũjare nore Galileai? <sup>7</sup> Coyũquemavũ mũjare yópe: “Jãvũ yũre, Jũmenijicui daroimũ mãcare õmũpe, ji urarõ ñãjiquino. Jëni jĩnãjarama yũre ina ãmeina teivũre, ne pẽvari boarĩ jarũvarãjiyepẽ yũre. Aru yóbecurijãravũ yóboi yainore jarũvari nacajacũyũmu yũ”, aquemavũ mũjare Jesús, arejaimada na nomivare.

<sup>8</sup> Ne que aiyede, ina nomiva ãrũrejaimada Jesús ãi coyũiye báquede náre.

<sup>9</sup> Copainũriburu yóboi Jesús bácare ne jarũvaino mãcarõre jocarĩ, caiye ne jãiyẽ báquede coyũrejaimada ina once paivũre aru apẽvũ Jesúĩ yóvaimarare mãre. <sup>10</sup> Iye borore coyũivũ bácvũ barejãimada María Magdalacaco, aru Juana, aru apeco María, Santiagoi paco mãre, aru apẽvũ nomiva náque cũrivũ. Ina coyũrĩdurejaimada ne jãino mãcarõre Jesús ãi yãvaiye mène beorĩ coyũicõjeimarare. <sup>11</sup> Õbenita nácapũravũ ju abedejaimada ina nomiva ne coyũiyede. “¿Õbeni mãrica?” arĩ dãpiarejaimada.

<sup>12</sup> Õbenita Pedro nacajari, cúyarĩ, earejamedã Jesús bácare ne jarũvaino mãcarõ yebai. Dicobei nacachini, jãrejamedã Jesúĩ cũmaicajea báquede, lino ãmicuricajea paraicajearẽ cũinãroma. Que teni Pedro, pare dãpiayũ, cũrami copainurejamedã.

### Jesús ñi cueteino Emaús ma nuimai

(Mr 16.12-13)

<sup>13</sup> Dijāravumica Jesúi bueimaracavũ pucarã Emaús ãmicurĩĩmaroi nuivũ barejãimada na, Jerusalén ãmicurĩĩmaroi curivũ bācavũ. Jerusalén joabeĩnoi, once paikilometros baju barejāvũya diĩmaro. <sup>14</sup> Nũre nuivũvacari boroteivũ barejãimada na, yo Jesús bācui baju bācarõ bĩjaino mācarõre. <sup>15</sup> Diede boroteivũ ne yāvare nuĩyede ca mái, Jesús ñi baju nára earejameđa ñ. Náque vaivārĩ nũrejameđa Jesús. <sup>16</sup> Vaivārĩ nuñũreca náque, ñre coreóvabedejaimada na.

<sup>17</sup> Aru náre arejameđa Jesús:

—¿Aipe arĩ boroteivurũ muja, mái nuivũ? ¿Aipe teni chĩoivurũ muja? arejameđa.

Ñi que aiyede, dajocarĩ, núranũrejaimada na, chĩoivũ. <sup>18</sup> Aru nācacũ cūinācũ, Cleofas ãmicũcũ, arejameđa Jesúre:

—¿Mũ máre Jerusaléi cūcũvacari, caiye vaiye báquede majibecurũ mũ? arejameđa ñ.

<sup>19</sup> —¿Yéde? jēniari járejameđa náre Jesús.

Aru arejaimada:

—¿Jesús Nazarecacũ bācũre vaiye báquede jápiabetecurũ? Jũmenijicui yāvaiyede coyũcaipõecu bācũ baju bateáme ñ. Jũmenijicui jáĩnoi aru põeva ne jáiyede máre caiye ñi ñaiye báque aru caiye ñi coyũiyē báque máre me mateávũ. Coyũrĩ parucũ bateáme ñ mācũ. <sup>20</sup> Aru ñre boarĩ jarũvaicõjeni, ñre jocũcũjaravena pēvaicõjeima na sacerdotevare jaboteipõeva ina maje jabovaque. <sup>21</sup> Ñbenita, “Ñ majubĩ Israecavũre meadaipõecu bacũyũ”, aivũ bateávũ ñũja. Carĩ jāravũque yóbecurĩjāravũa nuivũ ñi yainĩburu yóboi. <sup>22</sup> Ñũjacavũ nomiva ñũjare cuavama caride. Carĩ jāravũ javejĩnara ñ mācũre ne jarũvainoi numada na, ñũje nomiva. <sup>23</sup> Ñbenita ñ mācui baju bācarõ cubetevũya. Eabetemada na. Aru yópe arĩ, ñũjare coyũrãedama na nomiva: “Ángelevare jávũ ñũja. ‘Apũbi ñ Jesús’, ama na”, ama ñũjare dinomiva. <sup>24</sup> Dinũmũma ñũjacavũ apevũ, “¿Jāve mārĩca no?” arĩ, járanũma na nomicata. Nomiva ne aiyē báquepedeca jámada na máre. Ñbenita ñre, Jesúre, jámetemada na, arĩ coyũrejaimada ina pucarã mái nuipõeva.

<sup>25</sup> Náre arejameđa Jesús:

—Dápiabevũtamu muja. Coreóvabeni curivũtamu muja. Jũmenijicui yāvaiyede coyũcaipõeva mācavũ ne toivaiye báque caiyede jápiarĩ coreóvabevũbu muja. <sup>26</sup> Nópe ãmeno vaijēbu Cristo. Aru no yóboi, ãmeno vaiyũ bācũ, caiyede jaubeda jebeyũ bācũ, meacu baju ñũjebu cavarõ mearo Jũmenijicui curõĩ, arĩ coyũrejameđa náre Jesús.

<sup>27</sup> Aru coyũrĩ búrĩ Jũmenijicui ñaicõjeiyede ñi toivaicõjeiye báquede Moisés bācũre, aru ina Jũmenijicui yāvaiyede coyũcaipõeva mācavũ ne toivaiye báquede coyũrĩ jebedejameđa náre Jesús caiye ñi borore.

<sup>28</sup> Īmaro ne earãjino joabeĩnoi eaiyede, nuñũpe tedejameđa Jesúcapũravũ.

<sup>29</sup> Ñbenita ne yebai mauteicõjenejaimada na:

—Yũĩ ñũjaque cũjacũ mũ. Jájacũ, jave nainũtamu. Jave ñemiē tũinotamu, arejaimada Jesúre.

Que teni ne yebai nũrejameđa Jesús. <sup>30</sup> Náque curĩ, dobarejameđa Jesús, ãcũyũ náque. Páũre ĩni, Jũmenijicũre torojuede jĩni, páũre cotũvarĩ, náre

jídejameđa Jesús. <sup>31</sup> Ǽi páure cotǽvarĩ jĩye bajure, ǽre coreóvarejaimađa na. Ne coreóvaiye bajure cūiná náre bíjarejameđa Jesús. <sup>32</sup> Que teiyede, arejaimađa na, ne bajumia boroteivũ:

—Jǽvemu. Ǽi boroteiyede majare mái Jǽmenijicui yǽvaiyede coyũyũ, maja meaũme cǽtevũ, arejaimađa na, Jesús ǽi bíjarĩburu yóboi.

<sup>33</sup> Que teninata, cūiná Jerusalén ámicuriĩmaroi copainurejaimađa na. Nore eaivũ, ina Jesúi bueimara mácavũ once paivũ baju, aru ajevũ náque curivũ, cūinároi cójijivure earejaimađa na. <sup>34</sup> Aru ina Jesúi bueimara mácavũ once paivũcapũravũ arejaimađa ina pũcarǽ copaivũ bǽcavure yópe:

—Jǽve bajubu. Maje jabocu yaiyũ bǽcu bediówá cojedeca apũbiya ǽ. Simón Pedro ǽre jámiya, arejaimađa na.

<sup>35</sup> Dinumuma ina copaivũ bǽcavũ náre vaiye báque caiyede coyurejaimađa ina once paivure. Ǽi coyuiye báquede náre mái coyurejaimađa na.

—Pǽure ǽi cotǽvaiye bajure ǽre coreóvavũ ñuđa, arĩ coyurejaimađa na.

### Jesús ǽi cueteino ǽi bueimarare

(Mt 28.16-20; Mr 16.14-18; Jn 20.19-23; Hch 1.4)

<sup>36</sup> Ne nópe coyuiyedeca, Jesúvacari cuetedejameđa ne jēneboi. Aru yópe arĩ, jacoyurejameđa náre:

—¿Ména curǽru muja? arejameđa Jesús.

<sup>37</sup> Ǽbenita na cucumari jidurivũ, yópe arĩ dápiarejaimađa: “¿Pōe decocu bǽcu bárica?” arejaimađa na. <sup>38</sup> Ǽbenita Jesús arejameđa náre:

—¿Aipe teni jidurivurũ muja? ¿Aipe teni pũcǽmea curivurũ muja? ¿Aipe teni “¿Namema ñai?” aivurũ muja? <sup>39</sup> Jájara ji puruǽre, ji cubobare máre. Jǽve yurecabu. Jēni jájara yure. Aru jájara yure máre. Que baru jiarũ aru cǽado máre cuvũ. Pōe decocu yópe cubebi, arejameđa Jesús.

<sup>40</sup> Que ayuva, jáđovarejameđa náre ǽi puruǽre aru ǽi cubobare máre.

<sup>41</sup> Ǽbenita ju abedejaimađa cǽreja, ne urred torojue boje, aru ne pare dápiayie boje máre. Jesús jēniari járejameđa náre:

—¿Aiyede cuvabenaru muja yore? arejameđa náre.

<sup>42</sup> Ju arĩ, jídejaimađa ǽre cūinátuibu moacu joaimure, aru mumicorore máre. <sup>43</sup> Aru dituibure ñni, aru mumicorore máre ñni, ǽrejameđa ne jáinore.

<sup>44</sup> Dinumu arejameđa náre:

—Jave yũ coyucacu mujare caiye iyede ji cuede mujaque. Coyucacu mujare ðaiye jaavũ caiye iye Jǽmenijicui ðaicójeiyede ǽi toivaicójeiye báquepe Moisés bǽcure, aru Jǽmenijicui yǽvaiyede coyucaipōeva mácavũ ne toivaiye báquepe, aru iye Salmos ámicue toivaiye báquepe máre, arejameđa náre Jesús.

<sup>45</sup> Que ayuva, Jǽmenijicui yǽvaiyede coyurĩ majicarejameđa náre, ne me majinajiyepẽ ayũ iye Jǽmenijicui yǽvaiyede. <sup>46</sup> Aru coyurĩ buojarĩ, arejameđa náre:

—Yópe toivainotamu: “Cristore ǽi urred nájiye jaavũ ǽre. Aru yóbecurijǽravua ǽi yainĩburu yóboi nacajacuyume yainore jarũvarĩ”.

<sup>47</sup> Aru, “Coyuiye jaavũ pōevare ne ámeina teiyede chíori, ne oatũvarǽjiyepẽ aivũ, Jǽmenijicui árumetequiyepẽ aivũ náre ne ámeina teiyede. Cristoi ámiái, ǽi paruéque, coyuiye jaavũ náre caivũ ijǽravũcavure, mamarumure Jerusalécavure aru yóboi caivũ ajevure máre”, arejameđa Jesús, Jǽmenijicui yǽvaiyede majicayũ ǽi bueimarare.

<sup>48</sup> Bedióva cojedeca Jesús coyurejameđa náre:

—Mujavacari jáivu bávavubu caiye iyede. Que baru coyuiye jávuvu mujare apevure, ne majinajiyepe aivu. <sup>49</sup>Yu daroquijivu mujare ñaine, jipacui daroquimure, Espíritu Santore. Que baru mautejarã muja cãreja yui ímaroi, pu muje jacopuiyeta Jūmenijicui paruéde, cavarō mearoquede, arī ðaicōjenejameđa Jesús ũi bueimarare.

**Jesús ũi muino cavarō mearo Jūmenijicui curōi**

*(Mr 16.19-20; Hch 1.9-11)*

<sup>50</sup>Ũi que arīburu yóboi, Jesús jipocatedejameđa ũi bueimarare pu Betania āmicuriīmajinoita. Nore ũi puruáre jarururī, “Jūmenijicui jáinoi me tejarã muja”, arejameđa náre. <sup>51</sup>Nópe ayuvacari, muri nurejaquemavu náre jocarī pu cavarō mearo Jūmenijicui curōita. <sup>52</sup>No yóboi, ñuatutarī mearore jídejaimađa ũre. Aru torojurivu copainurejaimađa Jerusalén āmicuriīmaroi. <sup>53</sup>Nore Jūmenijicui cūrami jívui mautenī cainumua, mearore jídejaimađa Jūmenijicure. Quénoramu.

# San Juan

Mamabuinore coyuiyebu Juan mácu ũi toivaiye báquede Jesucristorã. Juan mácu barejaquémanu judíovacacu, Galilea ámicurijoborôcacu, aru Jesús ũi yávaiye méne beorí coyúicôjeimaracacu. Ũi mamicu Santiago bácuque moa boaipôecu bácu barejaquémanu, Jesús ũi órejaquiye jipocare ũi mácure. Lucas bácu coyurejaquemavu Juan mácu borore Hch 3:1-4:22. Majidivu ne dápiaiyepe, iye coyuiyede Jesucristorã toivarejaquemavu ũi mácu cucu bácu Éfeso ámicuriĩmaroi. Pôecu cubebi majicu ye ũju ũi toivaiju bácarôre diede, ũbenita obedivu majidivu ne dápiaiyepe ániũjua báquede 85-98 d.C. baji, Marcos bácu, Lucas bácu, aru Mateo bácu ne toivarĩburu yóbore. Juan mácu toivarejaquemavu yóbecuriyoca ũi paperayocare ũi toivaiyepe jipocare iye coyuiyede Jesucristorã. Aru toivarejaquemavu Jesucristo ũi jádovaiye báquede ũi mácure ũi toivarĩburu yóbore iye coyuiyede Jesucristorã.

Juan mácu jádovarejaquemavu Jesúre, pôecu bajureca, yópe Jūmenijicupe. Ũi coyuiye boje judíova ne cōmajiyē dāiyede, judíova ámevure toivarejaquemavu, ne majinaiyepe ayu “Jesucristobe Jūmenijicui daroimu mácu. Jūmenijicui mácube Jesús” (20:31). Que baru Juan mácu búbedejaquemavu ũi coyuiyede Jesúrã ũi pôeteino mácarôre coyuiyeque. Quénora búrejaquemavu ũi coyuiyede Jesús ũi cuedaiye báquede caiyede coyuiyeque. Juan mácu apevu pueno coyurejaquemavu Jesús ũi bueiyepe jēvari coyuiyeque: Jūmenijicui ovejajicupe (cap. 1); cure daiocope (caps. 4, 7); apure dāri áiyēpe (cap. 6); pēoinope (cap. 8); ovejavare coreipôecu meacupe (cap. 10); aru oteĩyaimupe (cap. 15). Apevu pueno coyurejaquemavu Jesús ũi coyuiyede aru ũi dāiyede ániñami ũi yaiqufjāravu jipocacañamine (caps. 13-17), aru ũi dāiyede ũi nacajariburu yóboi yainore jaruvarĩ (caps. 20-21).

## Jūmenijicui yávaiye pôeteino

(Mt 3.1; 11.27; Mr 1.4; Lc 3.1-2; 10.22; Col 1.15-17; He 1.2; 1 Jn 1.1-2; Ap 19.13)

**1** <sup>1</sup>Mamarũmure cãreja jāravure cuedaquiye jipocai, curejaquemavu majare Jūmenijicui dāpiainore coyucuedacuyũ. Jūmenijicuque curejaquemavu. Aru Jūmenijicu baju barejaquémanu ũ. <sup>2</sup>Mamarũmumiata jāravure cuedaquiye jipocamiata, Cristorecabe cucu bácu Jūmenijicuque. <sup>3</sup>Ũrecabe Jūmenijicui caiyede cuedare daimũ mácu. Ũre pôevare, áimarare, aru caijē coapa cuedare darejaquemavu Jūmenijicu. Ũi cuedabedu, ye cubejebu. <sup>4</sup>Ũrecabe cure dayũ bácu pôevare apurivure, ũi dāicôjeimarare. Yópe pēoiye járe dāiyēpe pôevare, nopedeca Cristo pôevare coreóvare darejaquemavu jáve baju. <sup>5</sup>Yópe ñami jámene dāiyēpe pôevare, nopedeca ijāravucavu ne ámeno dāiyēque jávene coreóvabede daimaramu. Ũbenita Cristo, pēoinope, darejaquemavu ijāravũ, ñeminitucubupe, ámecurijāravũ, coreóvare dacuyũ pôevare jáve bajure. Aru pēoiyede codavainope teino coyuiye jávene vainĩ turĩduyama ijāravucavu ámeno dāivũ. Ũbenita ũi coyuiye jávene vainĩ tuiye majibenama.

<sup>6-7</sup>Põevare Jūmenijicui dāpiainore coyucuedacuyure Cristore jáđovaiyucu, Juan Bautistare coyucōjenezamedā Jūmenijicu. Juan Bautista coyucudarejaquemavu ijāravui iye coyuiyede, Jūmenijicui coreóvare đaiye báquede úre Cristorā, caivu pōevare ne jápiarī ju arājiyepe ayu iye yávaiye méne. <sup>8</sup>Nai Juan Bautista Jūmenijicui dāpiainore coyucuedacuyu baju, Cristo baju, āmenezamedā ũ. Quéda Cristorā, Jūmenijicui dāpiainore coyucuedacuyu bajura, coyucudayu barejamedā ũ. <sup>9</sup>Cristorecabe dayu bācu ijāravui coreóvarī buojare đacuyu caivu pōevare Jūmenijicui dāpiainore jāve bajure.

<sup>10</sup>Cristo curidurejamedā ijāravui. Jūmenijicui cuedare đaimu mácuvacari ijāravure, úre coreóvabedejaquemavu ijāravucavu. <sup>11</sup>Ũ jino dijāravu ũi cuedaino mácarōi, daridurejaquemavu ũ. Ūbenita úre jacopubedejaimada obedivu ũ jina mariduivuvacari. <sup>12</sup>Ūbenita apevu nácavu jāve coreóvarī jacopurī úre ju aivure Jūmenijicui mára teicōjenezjaquemavu Cristo. <sup>13</sup>“Yure jápiarī ju aivu Jūmenijicui mára tejarāri na”, ũi que aino, maja pōeva maje juedocvurōpe āmevu no. Aru maja pōeva, “Jūmenijicui mára teiyurī, ũi mára tenajaramu”, maje aiyepē āmevu no. Aru nomiói márepacui juedocvuiyuepe máre āmevu no. Quénora “Yure jāve baju jápiarī ju aivu Jūmenijicui mára tejarāri na. Jūmenijicui mára baju tejarāri na”, arejaquemavu ũ.

<sup>14</sup>Majare Jūmenijicui dāpiainore coyucuedacuyu pōetedejaquemavu dijāravui. Majaque curejame ũ, pōecupe páyu. Ūrarō baju urī majare, đacaibi méne. Aru ávacari jáđovarejame majare aipe ārojacure Jūmenijicure jāve matuiyede. Meacu bajube ũ. Jūmenijicu ũi paruéde jimu mácui paruéde járejacarā űuja. Cūinácube Jūmenijicui mácui baju. Cūinácure ũ. <sup>15</sup>Juan Bautista coyurejame ũi borore úre járriburu yóboi. Yópe arī, codoboborejame pōevare:

—űaime mujare ji coyuvaimu ji ávaiyepē: “Ji yóboi dacuyume ũ. Ūbenita ji pōetequiye jipocamiata curejaquemavu ũ, ji mujare ji coyuvaimu. Ji jipocacacube ũ. Yure vainī tuibi ũ. Caiyede cuedaquiye jipocai curejaquemavu ũ”, acacu yu mujare, arejame Juan Bautista.

<sup>16</sup>Ūrarō ũi ue boje, mearo đacaibi caivu majare. Obedinũmua ména cure đabi majare. Obedinũmua bediōva mearo đacavaibi, cadatecuyu majare. <sup>17</sup>Jūmenijicui coyurīburu yóboi Moisés bācure ũi đaicōjeiyede pōevare, ména cure đaicōjeino majare buenidurejaquemavu Moisés bācu. Ūbenita Jesucristo barejame majare Jūmenijicui uede jáđovañu. Majare aipe ārojacure Jūmenijicure jāve jáđovarejame Jesús. <sup>18</sup>Jáimu āmemi Jūmenijicu. Ūbenita Jūmenijicui mácui cūinácura, ávacari Jūmenijicu baju, majepacuque cūcu, majare coreóvare đacudarejame ũ Jūmenijicure. Edarī, jīpacu jiede coyucuedarejame ũ.

#### Juan Bautista ũi memecaino Jesucristore

(Mt 3.11-12; Mr 1.7-8; Lc 3.15-17)

<sup>19</sup>Ina judiōva Jerusalén āmicurīmarocavu jēniari jáicōjeni jarorejaimada Juan Bautistare. Sacerdotevacavu aru Jūmenijicui cūramine memeipōevacavu, levita āmicuriyabocavu, jarorejaimada ina jabova, “¿űamenũ mu?” ne arī jēniari járājiyepē aivu úre. Que arī, yécu pōecupe páyure majiyurejaquemavu na. <sup>20</sup>Juan Bautistacapūravu nuriéna coyurī jebedejame náre.

—Cristo ãmevu yu. Jũmenijicui epeimu, jabocu bacuyú, ãmevu yu, arejame náre.

<sup>21</sup>—¿Dinumu ñamenu mu? Cristo ãmevu mu. ¿Elíarũ mu? arejaima ina sacerdoteva.

—Û ãmevu yu, arejame.

—¿Nai Jũmenijicui yávaiyede coyũcaipõescu bacuyú, majeñecuva mácavu “edacuyu”, ne ávaimuru mu? arejaima ùre cojedeca.

—Û ãmevu yu, arejame náre.

<sup>22</sup>—¿Dinumu ácupe páyurũ mu? Ñujare cũiná coyujacu mu, ñujare jẽniari jáicõjeivure ñuje coyurãjiyepe. ¿Aipe ayurũ mu? ¿Yécurũ mu? arejaima ùre ina sacerdoteva.

<sup>23</sup>Ûcapũravu coyurejame náre yópe arĩ, ñai Jũmenijicui yávaiyede coyũcaipõescu bácu, Isafas ámicucu bácu ùi toivaiye báqueque:

—Yurecabu Isafas bácu ùi toivaimu mácu: “Jũmenijicure coyũcaipõescu coðoboboyure jápiarãjarama põescu benoi: ‘Meaðajarã muje ùmene, copu etaburĩ maje jabocure, nopedeca muje meadaiyepe daimare, ñai ùmu, muje pueðaimu, ùi daquiye jipocai. Que ðarĩ dajocajarã muje ãmeina teiyede, Jũmenijicui daroimu macuyú ùi daquiye jipocai, Jũmenijicu ùi copu etaquiyepe aivu mujare’ ”, arejame náre Juan Bautista.

<sup>24</sup>Ina fariseovai jaroimara Juan Bautistare are nuri jẽniari járejaima:

<sup>25</sup>—Mu Cristo ãmevu. Elías ãmevu mu. Aru ñai Jũmenijicui yávaiyede coyũcaipõescu bacuyú ãmevu mu. ¿Dinumu aipe teni põevare Jũmenijicuque jáðovañuru mu ocoque? arejaima ina fariseovai jaroimara.

<sup>26</sup>Juan Bautista arejame náre:

—Yurecabu põevare jáðovañu Jũmenijicure ocoque. Ûbenita cũinácu cubi muje jẽneboi, muje coreóvabemu. <sup>27</sup>Ji yóboi dacuyume ù. Ûbenita ji pueno paruçu bacuyume. Caivu pueno meacu bajube ù. Yúcapũravu pare ùi cãchinocacubu. Que baru ùre cadateni buojabevu yu. Pu oarĩ buojabevu yu duayu ùi cãraidoa buoimeare, arejame náre.

<sup>28</sup>Caiye iye vaidéjavũ Betania ámicurõĩ, Jordán ámicuriya jia avia daidave êcarui, Juan Bautista ùi jáðovare cuiyede põevare Jũmenijicuque ocoi nore.

**Jesús Jũmenijicui daroimu mácu ovejajicupe,  
jaruvacuyu põeva ne ãmeina teiyede**

<sup>29</sup>Cõmiájãravui yópe barejávũ. Juan Bautista járejame Jesúre dayure ùi yebai. ùre jári, arejame ñujare:

—Jájara muja. Ûrecabe Jũmenijicui daroimu mácu ijãravui, jaruvacuyu põeva ne ãmeina teiyede. Yópe sacerdoteva ne boaiyepe ovejajinare, jínajivu Jũmenijicure ùi árumetequiyepe aivu põeva ne ãmeina teiyede, nopedeca ñai Jũmenijicui daroimu mácu boarĩ jaruvãrãjarama põevare boje, Jũmenijicu árumetequiyepe aivu põeva ne ãmeina teiyede. Que baru põeva ne ãmeina teiyede meadaipõecube ù. <sup>30</sup>Ñaime mujare ji coyuvaimume ji ávaiyepe: “Û ji yóboi dacuyume. Ûbenita ji põetequiye jipocamiata curejaquemavu. Que baru yure vainĩ tuibi ù. Caiyede cuedaquiye jipocamiata curejaquemavu”, mujare acacu yu. <sup>31</sup>Mamarumure yu máre coreóvabetcacu ùre Jũmenijicui mácu. Ûbenita põevare Jũmenijicuque jáðovacudacacu yu ocoque, Israecavu ne coreóvarãjiyepe ayu ùre, Jũmenijicui mácu, arejame ñujare, úcavure, Israecavure, Juan Bautista.

<sup>32-33</sup> Yópe arí, ùi majiéde coyurejame ù:

—Yú máre úre coreóvabecu cäreja, “Jümenijicui daroimu mácu bajubí ù”, abetecacu yu. Ùbenita Jümenijicu, yure jádovaicōjeñu mácu pōeva Jümenijicu jina teiyurivure úre ocoque, yópe arí coyúáme yure: “Jácuyumu mü ji Espíritu Santo tubacuēmeñure cūinácu ùmura aru cūcure úque. Ñai ùmu, úrecabe pōeva jina teiyurivure yure jádovacuyu Espíritu Santoque”, áme yure Jümenijicu. Quédeca ùi aiye báquepe, Jesúrā ñai Espíritu Santo tubacuēmeñure jurecope cavarō mearo Jümenijicui cūrōre jocarí jácacu yu. Aru ñai Espíritu Santo cáteame úque. <sup>34</sup> Yúcapūravu majivu, ji jáiye báque boje. Que baru coyuyubu mujare. Ñai ùmu, mujare ji coyuvacamü, Jümenijicui mácube ù, arejame Juan Bautista.

### **Jesús ùi mamarumu bueimara**

<sup>35</sup> Cōmiájāravui Juan Bautista curejame nore cojedeca ñuja pucarā ùi bueimaraque. <sup>36</sup> Que teni Jesús noi vaiyúre jári, arejame ñujare:

—Úre jájara muja. Úrecabe Jümenijicui daroimu mácu. Yópe sacerdoteva ne boaiyepe ovejajinare, jínajivu Jümenijicure, nopedeca ñai Jümenijicui daroimu mácure boarí jaruvarājarama pōevare boje, arejame ñujare Juan Bautista.

<sup>37</sup> Ùi que aiyede jápiaivu, Jesúque nurejacarā ñuja. <sup>38</sup> Jesús núcunuri, copedini, ñujare jēniari járejame:

—¿Aru muja yéde voivurū? arejame Jesús.

—Mü, bueipōecu, ¿jári cūcūrū mü? arejacarā ñuja Jesúre.

<sup>39</sup> —Yúque járadajarā muja, arejame ñujare Jesús.

Ñuje nuiyede úque, yóvaicvairora nainú marejávü. Úque nuri, ùi cūrōi jári, curejacarā úque dijāravu joarō.

<sup>40</sup> Cūinácu ñuja pucarā Juan Bautistare jápiaivu bávacuacu aru Jesúque nuivu bávacuacu Andrés āmicucu barejáme, Simón Pedroi yócu. <sup>41</sup> Cūiná, Andrés vocunurejame ùi mamicu Simóre. Eayü bácu, arejamedá úre:

—Mesíare, Jümenijicui epeimure, pōevare meadaipōecure, eayü ñuja, arejamedá Andrés.

Mesías aino, Cristo aiyurōtamu. <sup>42</sup> No yóboi Andrés jíbucure nuvarejamedá Jesús yebai. Jesús, Simóre jári, yópe arí coyurejame:

—Simómu mü. Mipacu āmicubi Juan. Ùbenita Cefas āmidoimu macuyámu mü, arejame Jesús.

Cefas aino, Pedro ainotamu. Aru nóvacari cūrabo aiyurōtamu.

### **Jesús ùi “Dajarā” aino Felipe, Natanaene máre**

(Mt 16.15; Mr 8.29; Lc 9.20)

<sup>43</sup> Cōmiájāravui Galilea āmicurijoborōi nucuyü barejáme Jesús. Nuñu, Felipe copurejame ù:

—Yúque dajacu mü, arejame Felipe Jesús.

<sup>44</sup> Betsaida āmicuriimarocacu barejáme Felipe. Andrés aru Pedro ne ĩmarocacu barejáme. <sup>45</sup> Dinumure Natanaene vocunurejamedá Felipe. Úre eayü, coyurejamedá:

—Ñaine, Moisés bácu aru ina Jümenijicui yávaiyede coyucaipōeva mávacu ne toivarí coyuvaimure eayü ñuja. Moisés bácu ùi toivaiye báquede

Jūmenijicui daicōjeiyede toivarejaquemavu ūra. Ūtame Jesús Nazarecacu, Joséi mácu, arejamedá Natanaene Felipe.

<sup>46</sup> Natanaecapūravu arejamedá:

—No ĩmaro Nazarede pōeva meara, apevure cadateivu, cubema na, arejamedá Natanael.

—Dinumu jácudajacu mu mi baju, arejamedá ūre Felipe.

Járadarejaima ina pucarā. <sup>47</sup>Náre edaivure jári Jesús, yópe arejame Natanaena:

—Majecu, israevacacu baju, edaibi ũ. Borocubecu bajube ũ, arejame Jesús, Natanaene jáñu.

<sup>48</sup> —¿Aipe teni yure majitecurū mu? arejame Jesúre Natanael.

—Mure Felipe ũi cutubede cāreja jávu yu. Higueracu cāchinoi dobatevu mu, arejame Natanaene Jesús.

<sup>49</sup> —Mũ, bueipōecu, Jūmenijicui mácubu mu. Ñuja Israecavu ñuje jabocubu mu, arejame Jesúre Natanael.

<sup>50</sup> Quénora Jesúcapūravu arejame ūre:

—“Jocucu cāchinoi mure jávu” ji aiyede, “Jūmenijicui mácubu mu”, ayurū yure? Pueno ji apejīe parué ji daquiyede jácuyumu mu. <sup>51</sup> Jáve coyuyubu mujare: Cavarō mearo Jūmenijicui curō vorī nuinore járajaramu muja. Nore Jūmenijicui ángeleva, jōdaivure aru muivure járajaramu muja. Aru ne coricai cuscuyumu yu, Jūmenijicui daroimu mácu ũmure, arejame ñujare Jesús.

### **Jesús ũi buino pōeva ne đarī majibede**

(Mt 4.13)

**2** <sup>1</sup> Pucajārvua yóboi, Galilea āmicurōi, Caná āmicurīmaroi, purubuoivu ne torojuve teino marejávũ. Aru Jesúi paco curejaco noi. <sup>2</sup> Jesús aru ñuja ũi bueimara ina purubuoivu ne cutuimaracavu barejacárã. <sup>3</sup> Ñuje āiye bajure ũcuiye cūinéjavūya. Jesúre coyucodarejaco jípaco:

—Bucucu, javeta ũcuiye, vino ũyaicoro, cūivú die, arejaco Jesúre.

<sup>4</sup> —Báco, ¿aipe teni yure que adorū? Ji memeinumu eabevũ cāreja, arejame jípacore Jesús.

Āniñami cūramicavu ne yebacavu yebai nuri, yópe arejacoda ō:

<sup>5</sup> —Jímacui cōjeiyepe đajarã muja, arejacoda Jesúi paco.

<sup>6</sup> Nore curejavũ seis paibua jorobua, cūrajorobua. Urabua jorobua baju, cūinábũ cincuenta o setenta pailtros baju eaibu barejávũ. Dibuí ocoque buiváibuare cūvarejarã ñuja judíova, ñuje cojarājiyepe aivu, ñuje nópe teni cōmajinope Jūmenijicui me jáquiyepa aivu ñujare. Que teni ĩñamicavu máre cūvarejaima dibuáre.

<sup>7</sup> —Ocore ĩni, davarĩ, dibuáre buivájarã muja, arejame nócacui yebacavure Jesús.

Na ju arĩ, dibuáre yuyeni, buivárejaima.

<sup>8</sup> —Que đarĩ quĩjinora doarĩ, torojuve teino upacure nuvajara muja. Ũi ũcuri dápiaquiyepa arĩ, jínanuajara, arejame ina yebacavure.

Ju arĩ, ñai torojuve teino upacure diede nuvari, jídejaima.

<sup>9</sup> Die oco báquede Jesús oatavarĩ, vino ũyaicoro tede đarejame. Ñai torojuve teino upacu die ũcuiyede ũcuri járejame. Ūcapūravu majibedejame ároi ne ĩye báquede diede. Ūbenita ina yebacavucapūravu, ina ocoque dibuáre

yuyeivũ b́acavũ, me majidejaima. Ũcuri j́arı, pũrubuoyure cuturejame ñai torojuve teino upacu. <sup>10</sup>Dayũ b́acure yópe arejame ñai torojuve teino upacu:

—Mamarũmure ũcuiye me bajure j́yavũ maja maje cutuimarare. Aru yóbota, na ũcuri vainí tuivure j́arı, majiéda meacorore náre j́yavũ maja. Que ðabetevura mũ. Mamarũmure meacorore yavedebu mũ. Aru yóbota, méne ũcuiyede j́ivu mũ, arejame pũrubuoyure ñai torojuve teino upacu.

<sup>11</sup>Que teni pœva ne ðarı majibenore ðarejame Jesús, jáðovacũyũ ũi majiéde. Galilea ámicurõĩ, Caná ámicurĩĩmaroi, ũi ocore oatuvainoque, Jesús búrejame pœva ne ðarı majibede ũi ðaiyede. “Jũmenijicui epeimume ũ”, pœvare are ðayũ, nópe náre jáðovarejame Jesús. Aru “Cristo bajube ũ” arĩ, me ja arejacařá ñũa ũi bueimara.

<sup>12</sup>No yóboi Capernaum ámicurĩĩmaroi nurejame Jesús. Ũre yóvarãnurejacařá j́ipaco, ũi yóva, aru ñũa ũi bueimara. Nore obebejáravũa curejacařá.

### **Jesús ũi meadaino Jũmenijicui cŭramine**

(Mt 21.12-13; 26.61; 27.40; Mr 11.15-18; 14.58; 15.29; Lc 19.45-46)

<sup>13</sup>Pascua ámicurij́aravũ torojuve teij́aravũ baquinó eare nuino marejávũ. Ñũa judíova ñuje torojuve teinũmũ marejávũ no, Jũmenijicui etavaiye báque boje ñujeñecuva mácavure Egipto ámicurijoborõre jocarĩ. Dinũmure Jerusalén ámicurĩĩmaroi nurejaima obedivũ judíova. Que baru Jesús máre muri nurejame. <sup>14</sup>Muri nuri, earĩ, Jũmenijicui cŭramine jácũnurejame Jesús. Diñami táiburã earĩ, ecorĩ oteivecũva, ovejava, aru jurevare bojedaivure járejame. Nácapũravũ pœvare urarõ ne táuturare ñejaima. Apenoa joborðacavũ ne táuturare oatuvaipœva dobarivure máre járejame nore. <sup>15</sup>Que baru cainimea ñni, ũi jara boaquímene cãriárejame. Cãriári buojarĩ, dimeque jara popeni, diñami curivure jaetovarejame Jesús ina táibui curĩ bojedaivure ne áimaraque. Táuturare oatuvaivure máre jarařĩ, ne jáðovaivure jarũporĩ, moari najuárejame, jarũvacũyũ ne táuturatavare joborõĩ. <sup>16</sup>Jurevare bojedaivure yópe arejame:

—Ñujara muja, muje bojedaçuromarare ñni. Jipacure mearore j́ĩnamimu yo. Bojedaiñami ðabejarã jipacui cŭramine, arejame náre Jesús.

<sup>17</sup>Jesús ũi que aiyede, Jũmenijicui yáva iyede ũi toivaicõjeiye báquede ářurejacařá ñũa, ũi bueimara. “Mũ, Jũmenijicu, apevũ ámeina ðarãjivũbu yure. Que baru mi cŭramine jecurĩ vaivũ yũ”, apecũ b́acũ ũi aiyede báquede toivaicõjenejaquemavũ Jũmenijicu.

<sup>18</sup>Ina judíova ñuje jabova yávarãðarejaima Jesúre:

—Jũmenijicui mure que ðaicõjenu, ñujare jáðovajacu pœva ne ðarı majibede mi ðainore, arejaima ina jabova.

<sup>19</sup>Jesús arejame náre:

—Iñamine bíjarorĩ jarũvajarã muja. Iñamine muje jarũvarĩburu yóbecurij́aravũa yóboi, muje jarũvaiñami mácarõre meadacũyũmu yũ, arejame Jesús.

<sup>20</sup>Ina judíova arejaima ũre:

—Cuarenta y seis paiũjua baju diñamine núvari ñájiquemavũ memeipœva. ¿Aru mũ yóbecurij́aravũa memeni, diñamine meadayũ buojaje b́arica mũ? arejaima ñuje jabova Jesúre.

<sup>21</sup> Ëbenita diñami bajure ayu ãmenejame Jesús. Ëi bajure cūramipe ayu barejáme ù. Ëbenita majibedejaquemavu na, jabovacapūravu. <sup>22</sup> Majibenidurejacaṛā ñuja máre, Jesús ùi que aiyede. Ëbenita ùi nacajariburu yóboi yainore jaruvārī, ùi que aiye báquede dápiarī, āṛurejacaṛā ñuja, ùi bueimara. Āṛurivū ùi coyuiye báquede aru Jūmenijicui yávaiye báquede máre ju arejacaṛā ñuja ùi bueimara.

### Jesús ùi majiéde pōeva ne dápiayede

<sup>23</sup> Pascua torojuve teinumu, Jesús ùi cuedeca Jerusalén āmicurīimaroi, ĩṛe ju arīdurejaima pōeva obedivu. Ne jáiye boje ùi jáḍovaiyede pōeva ne ḍarī majibede, “Jūmenijicui epeimu Cristobe ũ”, arejaima na.

<sup>24</sup> Ëbenita Jesúcapūravu náre coreóvarī, “Jāve abema na”, arī dápiarejameḍa. Me baju pōevare coreóvarejaquemavu ù. <sup>25</sup> ĩṛe jaubevū apacu ùi coyuiye aipe ārojaene pōevare. Me majidejaquemavu pōeva ne dápiayede. Quénora ùi baju coreóvarejaquemavu náre.

### Jesús Nicodemomaque ne boroteino

(Jn 8.28; 12.32-34; 18.32; 1 P 1.3, 23)

**3** <sup>1</sup> Cūinācu ũmu Nicodemo āmicucu barejáme, ñuja judíoḃa ñuje jabovacacu. Fariseo āmicuriyajubocacu barejáme Nicodemo.

<sup>2</sup> Cūināñami Jesúre borotecuearejameḍa.

—Mu, bueipōecu, coreóvaivubu ñuja mure Jūmenijicui daroimu mácre, buecuṃṃre ũ jiede. Que baru ácu pōecu Jūmenijicui paruéde cuvabecu baru, ḍaiye majibebi yópe pōeva ne ḍarī majibede mi ḍaiyepe. Que baru máque cubi Jūmenijicu, arejameḍa Nicodemo Jesúre.

<sup>3</sup> —Jāve coyuyubu mure: Ácu pōecu bedióḃa cojedeca ùi pōtebedu mamaūmeque, ĩṛe jabotebecuṃṃme Jūmenijicu, arejameḍa Jesús.

<sup>4</sup> —¿Aipe teni? ¿Bedióḃa cojedeca juedocupe pōteieye majidi bucucu? Jāve bucucu jīpacoī yapiburā ĩmari, pōteyū buojabebi, arejameḍa Nicodemo.

<sup>5</sup> ĩṛe arejameḍa Jesús:

—Jāve coyuyubu mure: Ácu pōecu ùi pōtebedu ocoque aru Espiritu Santoque máre, ĩṛe jabotebecuṃṃme Jūmenijicu. <sup>6</sup> Pōevai mára pōevatamu. Ëbenita ñai Espiritu Santoi pōḍaimara mamaūmeque epeimaratamu na. Que baru Jūmenijicui maramu. <sup>7</sup> “Ácu pōecu bedióḃa cojedeca ùi pōtebedu mamaūmeque, ĩṛe jabotebecuṃṃme Jūmenijicu”, ji aiyede mure urarō baju dápiabecacu mu. <sup>8</sup> ũmebo darī japuinopebu no. Āri japurī nuiyurō nuquiyebu. ũmebo japuinoṛe maja quēḍa jápiḍavū. Jáino āmevu no. Quédecabu Espiritu Santoi pōḍaimara mamaūmeque. Jári majino āmevu no, arejameḍa Jesús.

<sup>9</sup> —¿Aipe aiyurō márica no, mi que aino? arejameḍa Jesúre Nicodemo.

<sup>10</sup> ĩṛe arejameḍa Jesús:

—Murecabu judíoḃa ne bueipōeva me majidivucacu. ¿Jápiarī eabecurū mu iye ji mure coyuiyede? <sup>11</sup> Jāve coyuyubu mure: Ñuje majiéde mujare coyurīduyavū ñuja. Ñuje jáiye bajure coyurīduyavū. Ëbenita ju abevū muja ñuje coyurīduiyede. <sup>12</sup> Ijāravuquede coyurīduvu yu. Ëbenita ji coyuiyede ju abevū muja. Ijāravuquede coyuiyede ju abevū baru, cavarō mearo Jūmenijicui curōquede ji coyuiquiyede ju abenajaramu muja. <sup>13</sup> Cavarō mearo Jūmenijicui curōi muri nuri, cojedeca ijāravui ĩmeni dayu bácu cubebi. Que

baru ácu ijāravucacu cavarō mearoque de coyuiyede coyubebi. Yurecabu Jūmenijicui daroimu mácu ūmupe. Cavarō mearo Jūmenijicui curōi cūcu bácu ijāravui darejacacu yu. Que baru cavarō mearo Jūmenijicui curōque de coyuiyede coyuiye majivu yu. <sup>14</sup>Yópe Moisés bácu daiye báquepe, ūi cuede cāreja pōecubenoī, ādape paino bronce āmicurō tāuque daino mārārōque, nopedeca vaiquýebu yure. Ūi daimu mácupe jocuyo ūmujuriyorā jēori, jāmuōrejaquemavu Moisés bácu. Nopedeca yure, Jūmenijicui daroimu mácupe ūmupe, jocucurā jēori, jāmuōrajarama pōeva. <sup>15</sup>Yure yópe daivure jāri, caivu pōeva yure ju aivu baru, cūvarājarama jāravu cūimējāravu baquinóre cavarō mearoi, arejameđa Jesús.

**Jesús ūi coyuiño Jūmenijicu ūi uede caivu pōevare**

<sup>16</sup>Coyure nurejameđa Jesús:

—Quécara, cūinacurabu yu Jūmenijicui mácu. Pare baju ijāravucavure ūcu, yure darorejame Jūmenijicu yore. Jaurabeda toabo cūiméboi ne nūmenajiyepē ayu, yure ju aivure jāravu cūimējāravu baquinóre cure daibi Jūmenijicu cavarō mearoi. <sup>17</sup>Jūmenijicu darobedejame yure, ji nājine daquiyepē ayu ijāravucavure ne āmeina teiye boje. Quénora darorejame yure, ji meadaquiyepē ayu náre. <sup>18</sup>Yure ju aivu bácvure nājine dabecuyume Jūmenijicu. Ūbenita yure ju abevure nājine dacuyume Jūmenijicu, ne ju abe boje yure, Jūmenijicui mácu cūinácara. <sup>19</sup>Yópe darī Jūmenijicu apevure “Boropatebevū muja ji jāinoī”, aru apevure “Boropateivūbu muja ji jāinoī”, coyuyube. Ji daiye boje ijāravui, pōevare majide daivu Jūmenijicui yávaiyede jāvene, yópe pēoino jāre daiyepē náre. Aru ijāravucavu ne āmeina teiye nēminopebu. Pōeva yure ūbema. Quénora ne āmeina teiyede ūma na. Nárecabu Jūmenijicu “Nājinajaramu muja”, ūi arī coyuiмара, ne ūbe boje yure. <sup>20</sup>Caivu ina āmeina teivu yure jádovaicōjeiyubema ne āmeina teiyede. Que baru yure pēoñupe, ne āmeina teiyede jádovañure, jāiyubema. <sup>21</sup>Ūbenita caivu ina ju aivu Jūmenijicure, nāi ayure jāvene, yaveiyubema ne daiyede. Quénora jádovađama ne daiye caiyede yópe Jūmenijicui urōpe. Que baru yure pēoñure vodama, arejameđa Jesús.

**Juan Bautista ūi coyuiño Jesús ūi paruéde**

(Mt 14.3; Mr 6.17; Lc 3.19-20; Jn 1.20)

<sup>22</sup>No yóboi Judea āmicurijoborōi nurejame Jesús, nūja ūi bueimaraque. Nore curejacarā nūja obedijāravua. Nōcavure Jūmenijicuque jádovaivu barejacará ocoque. <sup>23</sup>Aru Enón āmicurīimaro baji, Salim āmicurō joabejino, curejameđa Juan Bautista máre. Pōeva ūre eaivure Jūmenijicuque jádovañu marejameđa, oco urarō cue boje nore. <sup>24</sup>Dinūmure cāreja Juan Bautistare jēni, nūvari, buobedejaimađa nūje jabova.

<sup>25</sup>Juan Bautista ūi bueimaracavu copu yávarī būrejaimađa cūinácū judíoque, nūje darī cōmajiyede Jūmenijicui me jáquiyepē aivu nūjare.

<sup>26</sup>Que teni yávarī buojari, Juan Bautistare coyurāearejaimađa ina ūi bueimaracavu:

—Mu, buepōecu, nāi múque cúvacacu Jordáđa āniduvei, mi coyuvacamū Jūmenijicui majiéque, ūvacari pōevare Jūmenijicuque jádovaimi ocoque. Obedivu nūñama ūque caride, arejaimađa.

<sup>27</sup>Yópe arí, náre coyurejameđa Juan Bautista:

—Pöecu cubebi ũi ďaiyepe ďarí buojayu, Jūmenijicui ěre parure ďabedu. <sup>28</sup>Mujavacari jápiadavũ ji coyurĩduiye báquede. “Cristo āmevu yu”, acacu yu mujare. Quéda ěre coyurĩ jipocateicōjeimumu yu. <sup>29</sup>Yópebu yu Cristoque. Pũrubuocũyu nomicũcũyume. Aru ũi yóvaimũ, ñai meadayũ bācu ne pũrubuoiyede, torojubi ũi jápiaiyede ñai pũrubuocũyu ũi yāvainore. Ñai yóvaimũ ũi teinope teyubu yu. Que baru pōeva Jesúque nuivure jáñũ, urarō torojavu yu ji ũmei. <sup>30</sup>Pũeno parucu nũcũyume Jesús. Ũbenita parubecu nũcũyumu yu. Pōeva ne pueďaimũ macũyũme ũ. Ũbenita pueďabejarāri yure, arejameđa Juan Bautista.

**Cavarō mearo Jūmenijicui curōi cucu bācure coyũno**

(Mt 11.27; Lc 10.22)

<sup>31</sup>Coyure nurejameđa Juan Bautista:

—Cavarō mearo Jūmenijicui curōi cucu bācu, ijāravũ ěmeni ďarí, caivu ijāravucavu maje pũeno majibi. Ijāravucacu yócacube. Que baru majibi yóque majiéde. Ũbenita cavarō mearore ěmeni dayũ bācu yócvũ maje pũeno majibi. <sup>32</sup>Ñai cavarō mearo Jūmenijicui curōi cucu bācu ũi jáiye báquede coyurĩduibi. Ũbenita ũi coyuiyede ju abema obedivũ yócvũ. <sup>33</sup>Que baru ácu pōecu ju ayũ baru ũi coyuiyede, Jūmenijicui jāve aiyede, “Jāvemu”, ayũtame ũ. <sup>34</sup>Jecubecũva Jūmenijicu ũi Espíritu Santore cure ďaibi Cristoque. Que baru Cristo, Jūmenijicui daroimũ mácu ijāravũ, Jūmenijicu jiede coyũibi. <sup>35</sup>Mamacure pare ũbi majepacu Jūmenijicu. Caiyede aru caivure pũrucũvaicōjeimi ũ mamacure. <sup>36</sup>Caivu ju aivu mamacure, Cristore, jāravũ cūimējāravũ baquinóre cavarō mearoi cuvama na. Ũbenita caivu jápiabevũ ěre, Cristore, jāravũ cūimējāravũ baquinóre cavarō mearoi cuvabema na. Quénora ne jápiaiyube báque boje, náre urarō ñājine ďacũyume Jūmenijicu, arejameđa Juan Bautista.

**Jesús Samariacacoque ne boroteino**

(Jn 7.37-39)

**4** <sup>1-2</sup>Obedivu ũi bueimara cuvarejameđa Juan Bautista. Ũbenita pũeno obedivu ũi bueimara cuvarejame Jesús. Aru Jesúi Jūmenijicure jáďovaimara mácvũ ocoque obedivu barejáima Juan Bautista ũi Jūmenijicure ocoque jáďovaimara mácvũ pũeno. Ũbenita Jesúcapũravũ pōevare Jūmenijicure jáďovamenejame ocoque. Quénora ñũja, ũi yāvaiye méne beorĩ coyũicōjeimarare jáďovaicōjenejame náre ocoque. Ina fariseo āmicurijabocavu, pōeva “Jesús obedivu ũi bueimara cuvabi Juan Bautista pũeno”, ne arí boroteiyede jápiarejaimađa. <sup>3</sup>Jesús jápiayũ bācu ina fariseova ne coreóvaiyede iye borore ěra, Judea āmicuróre dajocarĩ nuri, Galilea āmicurijoborōi nurejame. Aru ěque nurejararā ñũja.

<sup>4</sup>Ñũje nuiyede Galileai, Samaria āmicurijoborōi vaiye jaurejavũ ñũjare. <sup>5</sup>Vaidé nuri, Samariacarō ĩmaro, Sicar āmicurĩmaroi ěmenejararā ñũja. Sicar bajita curejaquemavu no joborō, ñũjeñecu mácu Jacob bācu ũi jĩno mácarō ũi mácu, José bācure. <sup>6</sup>Nore cuvũ ne oco doaicobe, Jacob bācu oco doaicobe. Jāravũ corica baji barejávũ. Joa baju mari, ďarí, ueturejame Jesús. Que baru no oco doaicobe ěcarui dobarejame, jabuóvacũyu.

<sup>7-8</sup> Ë i jabuóvaiyede, ímaroi ĕmeni nurejacadā ñuja, ñuje ārajiyede bojedārāñuiv. Ñuje nuriburu yóboi, oco doainore ĕmeni earejacođa cūināco Samariacaco. Oco doacodađo barejácoda.

—Oco, ji ũcuquiye jįjaco yure, arejameđa oco doacodađore Jesús.

<sup>9</sup> Ëbenita Samariacavure judíoiva ne pųque ũbe boje, cuezumari dápiaiŕi yópe arejacođa Jesúre:

—Judíobu mu. Aru yu Samariacacobu. ¿Aipe teni yure ũcuiye jĕniañuru mu? arejacođa.

<sup>10</sup> Óre arejameđa Jesús:

—Jūmenijicu mure jįjuroede majibevu mu. Yu mure ocore jĕniañure, majibevu mu. Yure majico baru, “Ocore jįjacu”, yure ajebu mu. Aru nópe jĕniadore apure daicore mure jįjebu yu, arejameđa óre Jesús.

<sup>11</sup> Jesúre arejacođa:

—¿Aipe ayurū mu yure? Ėmujuricobebu yo. Aru mi oco doaquino cuvabevu mu. ¿Āri apure daicore, mi ocore, ĩcuyurū mu? <sup>12</sup> Dicobede jįdejaquemavu majeñecu mácu, Jacob bácu. Javede ũ mácu aru ĩi mára mácavu yore ocore ĩni ũcurejaquemavu. Aru jįdejaquemavu ne oteiāimara mácavure. ¿Jacob bácu pųeno parucurū mu? arejacođa ũre.

<sup>13</sup> Óre arejameđa Jesús:

—Ácu pōecu ũcuñure oco dicobequede, bedióa cojedeca cūiñóquiyebu ũre. <sup>14</sup> Ëbenita ácu pōecu iye ocore, ji jįquicore, ũcuñu mácure cūinára, ye cūiñómequiyebu ũre cojedeca. Ji jįquicore oco pįpóinope teni, jāravu cūimėjāravu baquinóre cuvacyume ji jįquicore ũcuñu mácu, arejameđa Jesús.

<sup>15</sup> Ico nomió arejacođa:

—Jede, mi aicore, iye ocore, jįjacu yure caride. Ji ũcucojiye jįjacu yure, bedióa cojedeca cūiñómequiyepu ayu yure aru ji oco doacodađecojiyepu ayu yore jāravua coapa, arejacođa ō.

<sup>16</sup> Ōi que arįburuta, óre yávarejameđa Jesús:

—Mimarepacure cutuconųjaco mu. ũre davajaco yure, arejameđa óre.

<sup>17</sup> —Jimarepacu cubebi, arejacođa ō.

—Jāve adobu mu. Mimarepacu baju cubebi. <sup>18</sup> Cūinápųrųpe paivu ũmava curįduavū mu. Aru caricacu mi yóvaimu, mimarepacu baju āmemi ũ. Jāve baju adobu mu, arejameđa óre Jesús.

<sup>19</sup> —Yure Jūmenijicui yávaiyede coyucaipōecu batedébu mu. <sup>20</sup> Yore, yócacū cūrácure Jūmenijicure mearore jįdejaquemavu ñujeñecuva mácavu. Ëbenita “Jerusalėvacari Jūmenijicure mearore jįye jauvu”, adavū muja judíoiva, arejacođa ō.

<sup>21</sup> Jesús arejameđa:

—Ji coyuiyede me jápiajaco. Jāvetamu ji coyuiye. Apejāravua daquijāravua baquiyé pōeva Jūmenijicure mearore jįnanumenajarama Jerusalėi aru dicū cūrácui máre. <sup>22</sup> Muja Samariacavu muje mearore jįmure majibevu muja. Ëbenita ñuja judíoiva majivu. Jūmenijicu ĩi daroimu mácu pōevare meadaipōecu ñujecube. Que baru majininea Jūmenijicure mearore jįvubu ñuja judíoiva. <sup>23</sup> Ji aįjāravua daquijāravua baquiyé jave eare nuivu. Dinumu maquinóre pōevare mearore jįde đacuyume ñai Espřitu Santo Jūmenijicure yópe jāve coyuiyepu. Pōeva nápe paivu quėvura ũre mearore jįyurivure

ubi Jūmenijicu. <sup>24</sup> Jūmenijicurecabe cure dayu caivure. Pōeva mearore jīni majidivubu ūre, yōpe jāve coyuiyepe ñai Espiritu Santo ūi nōpe majide ðaiyede, ūi nāre cure ðaiyeque mamaūmeque, arejamedā Jesús.

<sup>25</sup> Ūre arejacoða:

—Majivu yu Mesīare, Jūmenijicui epeimure, pōeva ne aimure Cristo, dacuyure. Aru ūi daquiyede, caiyede majare coyurī jebecuyume, arejacoða.

<sup>26</sup> —Yábu Cristo, mure boroteyu, arejamedā ōre Jesús.

<sup>27</sup> Ico nomiōre ūi que coyuiye bajure copaidarejacarā ñuja, ĩmaroi cuivu bācavu. Pare dāpiaivu ñuje jāiye boje ūre boroteyure nomiōque, “¿Aipe teni ōque boroteyurū mu?” ájurorivu barejacará ñuja. Ūbenita ūre jēniari jāmenejacarā. <sup>28</sup> Ōcapūravu ōi oco doaibure noi nōri, copainurejacoða ōi curīmaroi. Noi nuri, earī, nōcavure coyurejacoða:

<sup>29</sup> —Járadajará muja. ¿Yure ji teiye báque caiyede coyuyu, Cristo bārīca ū? arejacoða nāre.

<sup>30</sup> Ōi que arīburu yóboi, ōque járadarejaquemavu diīmarocavu.

<sup>31</sup> ĩmarocavu ne edabede cāreja, ñuje bojedaiye báque āiyede Jesúre āicōjenidurejacarā ñuja.

—Mu, bueipōecu, āiyede ājacu mu, arīdurejacarā Jesúre.

<sup>32</sup> —Muje majibede āiye cuvavu yu, arejame ñujare Jesús.

<sup>33</sup> Aru ñuje bajumica boroteivu, jēniari járejacarā:

—¿Ūre āiye davarāma apevu? arejacarā.

<sup>34</sup> Aru Jesús arejamedā:

—Maja āiyede āri buojarīburu ūmedaivu maja. Quédeca yu dayu yōpe yure daroyu bācu ūi urōpe aru buojayu iye ðaiyede ūi ðaicōjeiye báquede yure, ūmedaivu yu. <sup>35</sup> “Yóvaicuvaivu aviáva bucūquiyebu maje āiye”, majidivu ne coyūino mácarōpe aiyavū muja. Ūbenita yu coyuyubu mujare. Āiye jēinumu jave eaivu. Ānina majare edaivure jájara muja. Āiyede jēiyepebu na. Vea cobiyyede jári, íye jauvu no. Quédecabu ānina, majare edaivu. Vea cobiyyepedeca javeta yure ju aivu barājárama na. <sup>36</sup> Pōevare yure ju are dayu bācu āiyede jēnu mácupedeca torojubi. Ūi memeiye boje, yure ūi ju are ðaimarare torojubi. Pōevare járavu cūiméjaravu baquinóre cuvare ðaibi. Que baru torojubi ū. Jūmenijicui yávaiyede coyurī báyu bācure, oteipōecupe páyu, cadateibi pōevare yure ju are ðaipōecu. Aru pōeva ne ju aiyede torojuma ina pucarā. <sup>37</sup> Majidivu ne coyūino mácarōpe, “Cūinācu oteibi aru apēcūta āiyede ĩmi”, jāvetamu no caride. <sup>38</sup> Āiyede jēivupe paivure mujare jaroyutamū yu, pōeva yure ne ju arājīyepe ayu. Ūbenita muja āmeteavū mamarumū Jūmenijicui yávaiyede coyurī buivu nāre. Muje jipocai Jūmenijicui yávaiyede coyurī búquemavu apevu. Apevu ne coyūimara mácavure yure ju are ðajará muja caride. Jūmenijicui yávaiyede jápiarīduivu bācavu yure ju ajarāri na, arejame Jesús ñujare majicayū.

Ūi que aiyedata edarejaima ĩmarocavu, Jesúque borotedo bácoi cutuimara mácavu. <sup>39</sup> Ōi aiyē boje Jesúrā, “Ji teiye báque caiyede coyūibi”, obedivu Samariacavu ju arejaquemavu ūre. <sup>40</sup> Que baru ne edaiyede ūi yebai, “Ñujaque cūjacu cāreja”, arejaima Jesúre ina Samariacavu. Dinumu pūcajārvava náque curejame Jesús, nāre bueyu ne ĩmaroi. <sup>41</sup> Jesúque borotedo báco ōi coyuiye boje nāre, ūre ju arejaquemavu apevu. Ūbenita ūque boroteivu obedivu baju barejáima ūre ju aivu.

<sup>42</sup> Que baru Jesúque borotedo bácore ôi cuturí davaimara mácvu arejaima:

—Caride úre ju aivu ámevu ñuja mi coyuiye báque boje. Quénora úre ju aivubu ñuje baju jápiaye báque boje ñi coyuiyede. Me majivu ñuja Jesúre caivu pœvare meadaipœcure, arejaima na.

### **Jesús ñi meadaino jabocui mácvure**

(Mt 13.57; Mr 6.4; Lc 4.24; Jn 2.1-11, 23)

<sup>43</sup> Pucajárvava náque curíburu yóboi, Galilea ámicurói nurejacarã ñuja cojedeca, Jesúque nuívu. <sup>44</sup> Javede úvacari arejame ñujare: “Cúbebi Jñmenijicui yáva iyede coyucaipœcu ñi joborôcvu ne puedaimu”, arejame ñujare Jesús. <sup>45</sup> Jipocamia, Pascua torojuve teinũmure, apevu Galileacavu nurejaquemavu Jerusalén ámicurímaroi. Nore Jesúre pœva ne ñari majibede ñayure jáivu bácvu barejáima. Que baru Jesús ñi eaiyede ne joborói cojedeca, úre torojurívu copu etarejaima nócvu.

<sup>46</sup> Oco báquede Jesús ñi ucuiye ñaino mácarói Caná ámicurímaro, Galileacarói, copainurejacarã ñuja Jesújã cojedeca. Nore, Canái, curejame cūinácu jabovacacu. Aru Capernaum ámicurímaroi curejame ñi mácu, pare ijete yu. <sup>47</sup> Que baru ñai jabocu jápiayu bácu Jesúi copaiyede Galileaita, Judeare jocarí, jácvu arejame ñi yebai. Jesús yebai edarí, yópe arí jēniarejame Jesúre:

—Jímacu pare baju ijete yube ñi. Maumejieneca yaiquíjibi. Úre jácvunuri, úre meadacajacu yure, arejame Jesúre ñai jabocu.

<sup>48</sup> —Yure pœva ne ñari majibede ñayure jámevu baru, yure ye ju abenajaramu muja, arejame úre Jesús.

<sup>49</sup> Ūbenita Jesúre nuicōjenidurejame ñai jabocu.

—Maumena dajacu. Yúque jácvudajacu mu, jímacui yaiquíye jipocai. Yaiécube cãreja jímacu, aridurejame Jesúre.

<sup>50</sup> Aru Jesús arejame úre:

—Meaquiye bu. Mi curói copainujacu mu caride. Mímacu yaiécube, arejame.

Jesús ñi coyuiyede ju arí, cūiná copainurejame ñai jabocu. <sup>51</sup> Ūi curói eare nuñure copurejaima ñi memecaivu.

—Mímacu ūmedabi ñi, arejaima ñi.

<sup>52</sup> —¿Aipiye bajure ūmedari ñi? jēniari járejame ñi memecaivure.

—Ēnoa marede, járvu corica yóji boi moino buruvu úre, arejaima.

<sup>53</sup> Ne que aiye ñi, ñai jabocu coreóvarejame. Jesús “Mímacu meacube caride”, ñi aiora bácarore ñai jabocui mácu ūmedarejame. Dinũmure ñai jabocu aru caivu ñi cūramicavu máre Jesúre ju arejaima.

<sup>54</sup> Judea ámicurói cucu bácu, Galilea ámicurói edarí, cucu, pœva ne ñari majibenore ñarejame Jesús. Jabocui mácvure ūmedavainoque, puque pœva ne ñari majibe bajure ñari jácvu arejame Jesús.

### **Jesús ñi meadaino nacajaiye majibecure**

(Jn 10.30-38)

**5** <sup>1</sup> No yóboi Jerusalén ámicurímaroi ñuja judíova ñuje torojuve teino cūináro curejavu cojedeca. Que baru ñuja Jesújã máre no ímaroi jácvunurejacarã. <sup>2</sup> Diímaro biaido jedevacobe bajita, ovejava ne ecoicobe

jedevacobena curejavū cūinábũ cuyaibũ. Judíova ñũje yávaiyeque dibu ámicurejavū Betesda. Dibu êcaruĩ pœva ne earĩ curājĩnore cūinápũrũpe painoa jabuóvainoa curejavū. <sup>3-4</sup>Die jabuóvaiyena obedivũ ijimara paraivũ barejáima. Jári eabevũ, cuiye majibevũ, nacajaiye majibevũ máre, ijimara coapa noi curejaima. Apenũmua pãcarejavū dibu. Dibu oco pãcaiye coredejaima ina ijimara. Apenũmua nore cūinácũ ángele cavarō mearo Jūmenijicui curõre jocarĩ êmeni darĩ, dibu ocore pãcovarejaquemavũ. Ñi ocore pãcovaie bajure dibure cuyarãemejurorivũ barejáima ina ijimara. Mamarũmucacũ pãcovaie bajure dibure cuyacuẽmeñũ, cūiná ũmedarejame, áde ijiéde cuvacu bácvacari. <sup>5</sup>Ijimaracacũ cūinácũ treinta y ocho paiũjua baju corenidurejame, nore parayũ. <sup>6</sup>Nomicata Jesús earĩ, ñai parayũre jári, coreóvarejame, joe baju nore cucure. Que baru ũre borotecũnurejame.

—¿Ūmedaiyucurũ mũ? arejame Jesús.

<sup>7</sup>Ñai ijimũ arejame Jesũre:

—Jápijacũ. Cainũmua pãcovaie, ji cuyacuẽmejuroede, ji jipocai apescapũravũ nore êmeni, turĩ cóvaibi. Yũre ocore êmevacayũ cubebi, arejame Jesũre.

<sup>8</sup>—Nacajacũ mũ, aru mi parainore cututurĩ, ñni, vaivárĩ ñujacũ mũ, arejame ũre Jesús.

<sup>9</sup>Quénora cūiná ũmedarejame ñai ijimũ mácu. Ñi parainore cututurĩ, ñni, vaivárĩ nurejame ũ. Jesús ũi nópe ðaijãravũ ñũja judíova ñũje jabuóvaijãravũ barejãvũ. <sup>10</sup>Que baru ũre, ijimũ mácu, coyũrãearejaima, judíovai jabovacavũ:

—¿Aipe ðayurũ mũ, mi parainore nópe ñuvañũ? Cari jãravũ maje jabuóvaijãravũ. Parainore ñuvaicõjemenotamu, arejaima, ũre ina jabova.

<sup>11</sup>—Ñbenita yũre meadaipeocũ yópe abi: “Mi parainore cututurĩ, ñni, vaivárĩ ñujacũ mũ”, abi yũre. Que barureca yũ ñuvañũmu, arejame, ñai ijimũ mácu.

<sup>12</sup>—¿Ñame matedĩ mure que ayũ? arĩ jēniari jãrejaima na.

<sup>13</sup>Ñbenita coyuiye majibedejame náre. ũre meadarĩ buojarinata, pœva ne jēneboi bĩjacũnurejame Jesús, obedivũ pœva ne cue boje nore. Que baru Jesũre coreóvabedejame ñai ijimũ mácu. <sup>14</sup>No yóboi, Jūmenijicui cūramita ijimũ mácu copurĩ, yópe arĩ, coyũrejame Jesús:

—Meabajũ cucutamũ mũ. Caride mi ãmeina teiye báquede ðajocajacũ. Cojedeca mũ ãmeina ðayũ baru, pũeno ãmeno ñãjicuyũmu mũ, arejame ũre Jesús.

<sup>15</sup>Jesús ũi que arĩburũ yóboi, ũre coreóvarejame ñai ijimũ mácu. Cūiná, jabovare coyũcũnurejame:

—Yũre meadayũ bácu Jesũbe, arĩ coyũrejame náre.

<sup>16</sup>Que teni Jesũre pare cãrijovari búrejaima ñũje jabova, ũre ñãjine ðãjurorivũ ũi meadaiye báque boje ijimũ mácu ñũje jabuóvaijãravũ.

<sup>17</sup>Ne ñãjine ðãjuroede ũre, Jesús náre yópe arĩ, coyũrejame:

—Jipacũ jabuóvabebi. Quénora cainũmua caðatevaibi pœvare. Que baru yũ máre caðateyũbu náre, arejame Jesús.

<sup>18</sup>Jesús ũi que aie boje, pũeno ũre boarĩ jarũvaiyũrejaima ñũje judíova ñũje jabova. Ñi ðabe boje ne ðaicõjeiyepe jabuóvaijãravũ, ũre boarĩ jarũvaiyũrejaima. Ñbenita pare boarĩ jarũvaiyũrejaima ũre, “Jipacube

Jūmenijicu”, ũi aije boje. Ne dápiaru, ũi que aino, “Jūmenijicupe majicubu yu”, ayu barejáme Jesús.

**Jesúre Jūmenijicu ũi purucuvaicōjeino**

(Mt 3.17; Mr 1.11; Lc 3.22; Jn 1.19-27; 3.27-30)

<sup>19</sup> Jesús, yópe arī, coyurejame náre:

—Jāve coyuyubu mujare: Yu, Jūmenijicu mácu, ji baju jipacu coyubenore jaurabeda dayu buojabevu. Quénora jipacu Jūmenijicupe jánu, ũi daiyepedeca dayubu yu. Caiye iye jipacu daiyede yu, mamacu, máre daivu diede. <sup>20</sup> Pare ũbi yure jipacu. Ũi daiye caiyede majicaibi yure. Pueno paruéde ji daquiyede jádovacuyume yure jipacu. Mujavacari urarō cuezumarajaramu yure, jádovaicōjecuyure jipacu. <sup>21</sup> Yópe yaivu bācavure jipacu nacovaiyepe yainore jaruvārī, nopedeca yu, mamacu, cure dayubu ina ji umarare. <sup>22</sup> Jipacu āmemi coyucuyu pōevare áde ne bojede ne daiye boje ijāravui. Quénora yure, mamacure, coyucōjeimi diede náre. <sup>23</sup> Ũ que cōjeimi, caivu pōeva ne puedarājiyepe ayu yure ne puedaiyepedeca jipacure. Ácu pōecu puedabecu yure, mamacure, puedabebi jipacure máre, yure daroyu bācure ijāravui, arejame Jesús.

<sup>24</sup> Náre coyure nurejame Jesús:

—Jāve coyuyubu mujare: Ácu pōecu ji coyuiyede jápiayu baru aru yure daroyu bācure ju ayu baru, jāravu cūimējāravu baquinóre cuvabi ũ. Coatejurocu bācuvacari Jūmenijicupe jaruvārī, nājiñu macuyú āmemi. Javeta jāravu cūimējāravu baquinóre cuvabi ũ. <sup>25</sup> Jāve coyuyubu mujare: Cūinājāravu daquiājāravu baquinó jave eare nuinotamu ina coateivu Jūmenijicupe jaruvārī ne jápiarājiyede ji coyuiyede. Ina coateivu Jūmenijicupe jaruvārī yaivu bācavure paivutamu ne ũmei. Ũbenita ne jápiaiyede yure, Jūmenijicu mácure, ju aivu baru ji coyuiyede, curājarama na. <sup>26</sup> Yópe jipacu apure daiyepe pōevare, nopedeca yure, mamacure, apure daicōjeimi pōevare. <sup>27</sup> Yurecabu Jūmenijicu daroimu mácu ũmure. Que baru Jūmenijicu purucuvaicōjeimi yure, ji coyuiyepede ayu caivu pōevare áde ne bojede ne daiye boje ijāravui. <sup>28</sup> Cuezumamejara muja. Apejāravu baquinó eare nuinoi, caivu ina yaivu bācavu jápiarājarama ji coyuiyede. <sup>29</sup> Aru nacajarajarama yainore jaruvārī. Ina meara māvavu nacajari, jāravu cūimējāravu baquinóre cvarājarama na cavarō mearo Jūmenijicu curōi. Ũbenita ina āmeina teivu bācavu nacajari, nājinajarama cainumua toabo cūiméboi, arejame Jesús.

<sup>30</sup> Náre coyure nurejame Jesús:

—Ji baju jipacu coyubenore jaurabeda dayu buojabevu. Quénora jipacu Jūmenijicupe jápiayu, ũi coyuiyepeda coyuyubu yu pōevare áde ne bojede ne daiye boje ijāravui. Que baru ji coyuiyede nurié coyuyubu yu. Ji nópe coyuiye nuriétamu, ji daiyube boje yópe ji baju urōpe. Quénora jipacu, nai daroyu bācu yure ijāravui, ũi urōpe dayubu yu. <sup>31</sup> Ji baju “Meacubu yu”, abevu. Ji que aru, “Ũbeni que ayube ũ”, ajebu muja. <sup>32</sup> Ũbenita yure apēcucapūravu “Meacu bajutame Jesús”, aibi. Jāvetamu ũi que aino.

<sup>33</sup> Mujavacari muje daroimaraque jēniari jáicōjenidudemavu Juan Bautista yebai, yure majiyurīduivu. Aru Juan Bautista náre jāve coyudemavu. <sup>34</sup> Meavu no ũi coyuiño. Ũbenita yure coyucaipōecu jaubevui, ji jádovaquiyepede ayu nāmene yure. Juan Bautista ũi coyuiño mārārōre coyuyū batevú yu, muje

majinajipepe ayu ñamene yure, ji meadaquiyepe ayu mujare. <sup>35</sup> Yópe pëoibu járe ðaiyepe pëevare, nopedeca yávaiede jávene majide ðáme Juan Bautista. Nurinimare pëoibu pëoinope jáðovariduame. Ëi que teiyede torojuteavũ muja mamarumure cãreja. <sup>36</sup> Ëbenita ji baju ðaiyeque jáðovaivu ñamene yure. Yútamu jáðovañu Juan Bautista Ëi jáðovaino mácarõ pueno.

‘Jipacui ðaicõjeiyepe ða yure, diedecabu ji ðaiye. Iye ðaiye jáðovaiyetamu yure jáve jipacui daroimu mácuere. <sup>37</sup> Aru jipacuvacari, ñai daroyu bácu yure, coyui bi borore jáve. Ëbenita jipacure jámevu muja. Aru jápiabevu muja. <sup>38</sup> Yure, Jümenijicui daroimu mácuere, ju abevu muja. “Jümenijicure coyucapëocubu mu”, yure aiyubevu muja. Que baru Ëi yávaiede cuvabevu muja muje ðmei. <sup>39</sup> Jümenijicui yávaiede Ëi toivaicõjeiye báquede pare bueniduyavũ muja. “¿Jümenijicui yávaiede Ëi toivaicõjeiye báquede buevin, aipe ðari járavu cüiméjāravu baquinóre earājidi maja?” ariduyavũ muja. Aru diemiareca muje bueiyeque ji borore jáve toivaiebu. <sup>40</sup> Ëbenita yure jëniayubevu ji cuvare ðaquiyepe aivu mujare járavu cüiméjāravu baquinóre, arejame náre Jesús.

<sup>41</sup> Náre coyure nurejame Jesús:

—Pëeva ne mearore jíyede yure vobevu yu. <sup>42</sup> Mujare me majivu yu. Coreóvaivu mujare Jümenijicure ubevure muje ðmei. <sup>43</sup> Yore coyucõjeni darorejame yure jipacu. Ëbenita yure ubeni, copu etabevu muja. Ëbenita apesu Ëi coyucudaru Ëi baju, jaurabeda ðre copu etadarāmu muja. ðre jápiadarāmu. Ëbenita yure ye jápiaiyubevu muja. <sup>44</sup> Muje baju copu mearore jíyurivubu muja. Muje bajumia mearore jíyede vore cuivubu muja. Ëbenita ye vobevu muja ñai Jümenijicu cüinácura Ëi jíquiyepe aivu mearore mujare. Muje nópe ðaiye boje, ji coyuiyede jáve ju arí buojabevu muja. <sup>45</sup> Ëbenita ðápiabejarā muja ubenina. Yúvacari ámevu boro coyurí adacuyu mujare jipacui jáinore. Moisés bácu, ñai muje coreimu cadatecuyure, ðrecabe boro coyurí adayu mujare, muje jápiabeni ju abe boje iye borore, Ëi toivaino mácarõre. <sup>46</sup> Moisés bácu ji borore toivarejaquemavu. Que baru muja jáve ju aivu baru ð mácuere, yure máre ju ajebu muja. <sup>47</sup> Ëbenita muje ju abe boje Ëi toivarí coyuiye báquede, ji coyuiyede máre ju abevu muja, arejame náre Jesús.

### Jesús Ëi áre ðaino cüinápurupe paimil baju ðmuvare

(Mt 14.13-21; Mr 6.30-44; Lc 9.10-17)

**6** <sup>1</sup> No yóboi jiadocüi jaturí, macajitabu urabu Galilea ámicurijitabure jatarí nurejara ñu Jesús já pu apeduveita. Dibuvacari Tiberias máre ámicuvu. <sup>2</sup> Ñu jataivúque darejaima pëeva obedivu. Ne ijimarare meadayure jáiye báque boje, pëeva ne ðari majibede jáðovaiyede jáivu bácvu Jesúsque darejaima. <sup>3</sup> Macajitabu urabure jataivu bácvu, cüracü puenoi mürí dobacunurejame Jesús, ñu Ëi bueimaraque. <sup>4</sup> Pascua ámicurijāravu baquinó, ñu judíova ñu torojave teinumu maquinó eare nuino marejāvũ. <sup>5</sup> Dicü puenoi dobacu, pëeva obedivure ára mure ðaivure járejame Jesús.

—Que pëeva obedivu dare ðaivu jároma. ¿Ne árajiyede ári bojeðarājidica maja? jëniari járejame Felipe Jesús.

<sup>6</sup> Que arejame Felipe. Aipe árojae Ëi ju ainore jápiaiyucu barejame, áre que ayu. Felipe Ëi jëniari jáquiye jipocamiata, jáve majidejaquemavu Jesús aipe Ëi ðaquiye. <sup>7</sup> Felipe arejame:

—Tāuturaque doscientos paijāravua memeiye báque bojeque ne ārajiye quíjie baju páure bojedari buojabevu maja, arejame Felipe Jesúre.

<sup>8</sup>Апесу ñujacacu, Jesúi bueimaracacu, Simón Pedroi yócu Andrés, arejame Jesúre:

<sup>9</sup>—Pōevaque dayu bácu jueđocu páuboa cūinápurupe paiboa cebada āmicue oteieque ne ñaiboa báquede aru moajina pucajina ne joaimara mácvure cuvabi ũ. Ũbenita pōeva obedivure eabequiyebu āru, arejame Jesúre Andrés.

<sup>10</sup>—Pōevare dobaicōjevara muja, arejame Jesús ñuja ũi bueimarare.

Cōriá meacōria curejavũ nore. Que baru cōriá puenora dobrejaima na. Nácavu ũmuvacari cūinápurupe paimil baju barejáima. Aru nomiva, jueđova máre, obedivu curejaima. <sup>11</sup>Pōeva ne dobarĩburu yóboi, Jesús páuboare jēni, torojuede jidejame Jūmenijicure. Torojuede jini buojari, páuboare cotuvari jebeni, ina dobarivure jicōjenejame Jesús ñujare, ũi bueimarare. Aru moajinare máre quédeca ñarejacařa ñuja. Ne urōpe ārejaima ina pōeva. <sup>12</sup>Ne āriburu yóboi, Jesús arejame ñujare, ũi bueimarare:

—Pōeva ne āri oabede ĩjara muja, maje bíjare ñabenajipepe aivu āiyede, arejame Jesús.

<sup>13</sup>Que baru ĩni, meadarĩ iye cebadaque ne ñaiboa báque páuboajeveare pōeva ne āri oabe báquede puebua doce paibure buivárejacařa. <sup>14</sup>Ina pōeva jáivu bácvu no pōeva ne ñari majibenore, Jesús ũi ñaiyede, yópe arī búrejaima ne bajumia:

—Jāve ñaime Jūmenijicui yávaiyede coyñacipōescu bacnyú, edacnyu me ĩjārayure ne ávaimu, aivu barejáima na.

<sup>15</sup>Ũre que aivure majidejaquemavu Jesús. Aru ne jēni jabojaoyede máre majidejaquemavu ũ. Que baru náre jocarĩ cūinácva muri nurejameđa cūracũ puenoi, dupiyu náre.

#### **Jesús ũi cuino oco puenora**

(Mt 14.22-27; Mr 6.45-52)

<sup>16</sup>Ñemié tuiyede macajitabu urabui ĩmenejacařa ñuja, Jesúi bueimara. <sup>17</sup>Nore ĩađocũ jaturĩ nuri, macajitabure jatarĩdurejacařa, Capernaum āmicurĩmaroi nujurorivu. Que teicavure nainéjavũ. Aru Jesús dabedejame cāreja ñuje yebai. <sup>18</sup>Ũmevu ñujare edarĩ, japurejavũ. Pare pācarejavũ macajitabu urabu ñujare, jatajurorivure. <sup>19</sup>Ñuja pare doarĩ, ñājini, cūinápurupe paikilometros baju nuri, macajitabu urabu puenora vaivári ñarejame Jesús, ñuje yebai dayu. Ũre jári, urarō jidurejacařa ñuja. <sup>20</sup>Que teivure jári, ñujare yávarejame Jesús:

—Yu Jesútamu. Jidubejara muja, arejame ñujare.

<sup>21</sup>Ũi que arīburu, torojurĩ “Jatujacu”, arejacařa. Ũi jatuiyedata ĩcarui ñuje earājinore cūiná datuórāearejacařa ñuja.

#### **Pōeva ne voino Jesúre**

<sup>22</sup>Cōmiáĩjāravu Jesúre vorĩdurejaimađa na macajitabu urabu ĩcarui mauteivu bácvu, ũi āoimara mácvu. Majidejaimađa ĩađocũ cūinácva nore curicũ mácarōre no ĩpocacajāravure. Aru majidejaimađa ñuja ũi bueimaraque ñumecu bácvure máre. Que baru apesũ ũi jatajuroricũ cubedejavũya. <sup>23</sup>Ne

voiyede apevu jataivu b́acavu Tiberias ámicuríimarocavu paránurejaimada. Jesús J́umenijicure torojuede j́niburu yóboi ṕeovare páuboa ne árajíboa j́no mácarō joabej́inoi tuijarejaimada. <sup>24</sup> Jesúre aru ñujare ũi bueimarare máre eabeni, edaicúa máquede jaturejaimada ina écaboi curivu b́acavu. Macajitabu urabure jatarí nuri, Capernaum ámicuríimaroi earejaima na, Jesúre voivu.

### Jesús ũi coyũino ṕeovare apure darí áiyepe

<sup>25</sup> Dibure jataivu b́acavu Jesúre earí, j́eniari j́arejaima ére:

—Mu, bueipóecu, ¿aiyiye bajure iduvei jatacurú mu? arejaima.

<sup>26</sup> Jesúcapũravu, yópe arí, coyurejame náre:

—J́ave coyũyubu mujare: Yure vorádabevu muja, muje j́apiarí eaiye boje ji j́ádovaiyede ṕeova ne darí majibede ji daieque. Quénora yure vorádadavũ muja, muje ári yapiye báque boje. <sup>27</sup> Yóque áiye pojeiye bu. Die matuiyeda memeni vobejará muja. Quénora iye áiye cure daiyede j́aravu cūiméj́aravu baquinóre pare vojará muja. Diedecabu yu, J́umenijicui daroimu mácu ũmupe, ji j́íquiye mujare, jipacu J́umenijicu ũi j́ádovaiye boje ũi mearo j́áiyede yure, arejame Jesús.

<sup>28</sup> Ére j́eniari j́arejaima:

—¿Aipe daie jauri ñujare, ñuje darájiyepe aivu yópe J́umenijicui urópe? arejaima.

<sup>29</sup> Jesús arejame:

—Yo cūináro daie jauvu mujare, darájivu yópe J́umenijicui urópe. Ju ajará yure, ũi daroimu mácure, arejame.

<sup>30</sup> Ére arejaima:

—¿Yéde ṕeova ne darí majibede dacuyurú mu, ñuje j́ariburu yóboi ñuje majinajiyeye ayu j́avene mi coyuiyede? ¿Ádepe paiyeba mi daie? <sup>31</sup> Majeñecuva mácavu ne cuede ṕecubenoí maná ámicue áiyede árejaquemavu na mácavu. Que darejaquemavu yópe J́umenijicui toivaicójeiye báquepe ũi yávaiyede: “Cavarō mearo J́umenijicui curóre jocarí áiyede j́odavari darorí j́dejaquemavu náre”, arí toivaicójenejaquemavu J́umenijicu, arejaima Jesúre.

<sup>32</sup> Aru Jesús ju ayu arejame náre:

—J́ave coyũyubu mujare: Moisés b́acu ámenejaquemavu ñai j́odavari daroyu b́acu áiyede cavarō mearo J́umenijicui curóquede. Quénora jipacurecabe ñai j́odavari daroyu b́acu áiye bajure cavarō mearoquede.

<sup>33</sup> Cavarō mearoque áiye J́umenijicu ũi daroiye me bajutam. Iyetamu ṕeovare cure daie j́aravu cūiméj́aravu baquinóre, arí coyurejame Jesús.

<sup>34</sup> —Ñuje jabocu, iye áiyede j́jacu ñujare cainumua, arejaima ére.

<sup>35</sup> Jesús arejame náre:

—Yurecabu iye áiye. Áiyepe ṕeovare j́ave cure dayubu yu j́aravu cūiméj́aravu baquinóre. Yópe ṕecui ári buojarí, ére ávne íjibepe, nopedeca ácu ṕescu yure yóvacudayu baru, ére ye jaubequiye bu cainumua ũi ũmei. Aru yópe ṕecui ũcuri buojarí, ére cūiñómepe, nopedeca ácu ṕescu yure ju ayu baru, ére jaubequiye bu cainumua ũi ũmei. <sup>36</sup> ũbenita yópe ji mujare ávarepe, yure j́áivuvacari ju abevu muja.

<sup>37</sup> Yure jipacu ũi ju are daimara coapa yure yóvarí curájarama. Aru j́ave náre coapa ju arí jacopũcuyumu yu. <sup>38</sup> Cavarō mearo J́umenijicui curóí cscu

bácu yore ĕmecudarejacacu yu, ďacuyu jipacu, yure daroyu bácu, űi urőpe. Ji urőpeda ďacuyu āmenejacacu yu. <sup>39</sup>Yőpe űbi űai yure daroyu bácu: Caivu ina yure űi ju are ďaimarare coreiye jauvu yure, ne bĳabenajiyeye ayu, aru ji nacovaquiyeye ayu náre coapa yainore jaruvarĳi ānijāravu buojaquijāravu baquinóre. Que ďainore űbi űai daroyu bácu yure. <sup>40</sup>Jipacu űbi caivu pőeva yure jári, coreóvarĳi, ju aivure ne cavarājiyeye ayu jāravu cūimėjāravu baquinóre. Aru yúvacari náre nacovacuyumu yainore jaruvarĳi ānijāravu buojaquijāravu baquinó, arejame Jesús.

<sup>41</sup>“Cavarő mearoque āiye bajutamu yu”, űi aiyede jápiarĳi, Jesúre joroĳĳinejaimada nócavu judĳova, ne bajumia jūjuvaivure űra.

<sup>42</sup>—űai Jesús José bácu mácutame. Aru jĳacore máre coreóvadavū maja. āAipe teni, “Cavarő mearo Jūmenijicui cūrőre jocarĳi ĕmeni darejacacu yu”, arĳi buojaidi ű? arejaimada na, ne bajumia boroteivū.

<sup>43</sup>Quénomia Jesús arejame náre:

—Muje bajumia joroĳĳini āmeina yávabejarā yure. <sup>44</sup>űName dabename ne baju yure yóvarādaivu jipacu, yure daroyu bácu náre daicőjemenu. Jipacurecabe yure darocaipőecu, ji nacovaquiyeye ayu ina pőevare yainore jaruvarĳi buojaquijāravu baquinóre. <sup>45</sup>Javede Jūmenijicu toivaicőjenejaquemavu ina űi yávaiyede coyucaipőeva mácavure yópe arĳi: “Pőeva caivure buecuyume Jūmenijicu”, arĳi toivaicőjenejaquemavu. Que baru caivu ina jipacui bueiye de jápiarĳi adarĳi, ju aivu, yure yóvarādaivubu na, arejame Jesús.

<sup>46</sup>Náre coyure nurejame ű:

—Ji nópe aiyequē, “Jūmenijicure jáďaima pőeva”, aiyucu āmevu yu. Yurecavu Jūmenijicu yebai cucu bácu, űi daroimu mácu, cūnácura űre jáĳu mácu. <sup>47</sup>Jāve coyuyubu mujare: Caivu pőeva ju aivu yure jāravu cūimėjāravu baquinóre cavarājarama. <sup>48</sup>Yútamu āiyepe páyu. Jāve pőevare cure ďayubu yu jāravu cūimėjāravu baquinóre. <sup>49</sup>Mujeĳecuva mácavu ne cuede pőecubenoĳi ávarejaquemavu manáre. Aru diede āivu bácauvacari bucuteni yaidėjaquemavu. <sup>50</sup>űBenita ji coyuvare āiye bu, cavarő mearo Jūmenijicui cūrőĳi ĕmeni daiye āiye. Ącu pőecu ji coyuvare āiyede āru, űi űme yaibėquiyebu. Coatebecuyume Jūmenijicure jaruvarĳi. <sup>51</sup>Yútamu iye cavarő mearore ĕmeni daiye báque āiye. Ącu pőecu iye āiyede āĳu maru, cucuyume cainumua. Iye āiye ji jĳquiyē ji bajubu. Ji bajure jĳcuyumu caivu pőevare boje, ne cūrājiyeye ayu mamaūmeque, arejame Jesús.

<sup>52</sup>Jesús űi que aiyede, ina judĳova ne bajumia boroteni búrejaima, űre jaraivu, űi nópe aiyē boje.

—āAipe ďarĳi majare űi bajure āicőjeni buojaquidica űai? arejaima.

<sup>53</sup>Yőpe arĳi, jėvari coyurejame náre Jesús:

—Jāve coyuyubu mujare: Yúbu Jūmenijicui daroimu mácu űmure. Ji jiarure āmevu baru muja, aru ji jivede máre űcumevu baru, cubenajaramu muja mamaūmeque. <sup>54</sup>Ącu pőecu ji jiarure āĳu mácu aru ji jivede máre űcuĳu mácu jāravu cūimėjāravu baquinóre cūvacuyume. Aru yúvacarĳi űre nacovacuyumu yainore jaruvarĳi ānijāravu buojaquijāravu baquinóre. <sup>55</sup>Ąiye bajutamu ji jia. Aru ji jive máre űcuīye bajutamu. <sup>56</sup>Ącu pőecu ji jiarure āĳu mácu aru ji jivede űcuĳu mácu cubi yúque, aru űque cūvu yu máre. Cūnávure cūvu űĳa. <sup>57</sup>Jipacu, űai pőevare apure ďayu mamaūmeque,

darorejame yure aru apure ðarejame. Nopedeca ácu pōescu yure añu mácure, úre apure ðacuyumu yu. <sup>58</sup> Iye ji coyuvare áiyebu cavarō mearo Jūmenijicui curōi ĕmeni daiye báque áíye. Mũjeñecuva mácavu ne áíye báquepe paiye ámevu die. Na mácavu áivu bácavuvacari bucuteni yaidéjaquemavu. Ubenita ácu pōescu añu ji cari coyuvare áiyede cuscuyume cainumua, arejame Jesús.

<sup>59</sup> Capernaum ámicurīmaroi cucu, judfovai cójijiñami pōevare bueyu, nópe coyurejame Jesús.

### Jesús ũi bueino jāravu cūiméjāravu baquinóre

(Mt 16.16; Mr 8.29; Lc 9.20)

<sup>60</sup> Jesús ũi nópe bueiyede maiyójeda dápiarī, yópe arejaima ũi bueimara obedivu.

—Maiyójarō baju bueibi. Nore jápiarī coreóvabevu ñuja, arejaima na Jesúre buejurorivu ne bajumia.

<sup>61</sup> Jesús, coreóvayu jorojívure ne bajumia jūjuvaivure úra, jēniari járejame náre:

—¿Cari mǽjare ji bueiye boje ámeina jáivurū yure? <sup>62</sup> ¿Yure, Jūmenijicui daroimu mácure ũmpe, ji curō mácari ji muiyede jáivu baru, aipe dápieje bárica mǽja? <sup>63</sup> Jūmenijicui Espíriturecabe pōevare cure ðayu jāravu cūiméjāravu baquinóre. Pōeva ne baju apevu pōevare cure ðaiye majibema. Iye cari ji coyuiyeque, yurecabu mǽjare cuvare ðayu Jūmenijicui Espíriture, ñai pōevare cure ðayure mamaŭmeque ne ju aiyede yure. <sup>64</sup> Ubenita apevu mǽjacavu yure ju abema cāreja, arejame náre Jesús.

Ūi bueni buijāravu bácarōre jipocamiata, Jesús coreóvarejamedá ñame úre ju abenajívure aru ácu pōecure úre jēne ðacuyure ũi mauvare máre.

<sup>65</sup> Jesús arejame náre cojedeca:

—Caivu ámevu mǽja ju aivu yure. Que baru coyuyubu mǽjare: Ácu pōescu cubebi ũi baju yóvacuðayu yure, ju acuyu jipacui úre daicōjemenu. Jipacurecabe pōevare ji yebai darorī ju are ðayu, arejame.

<sup>66</sup> Dinumumia Jesúque buejurorivu bácavu úre dajocarejaima. Quénora úque cubedejaima. <sup>67</sup> Que teiyede jári, ñujare, ũi bueimarare, ñuja doce paivu bajure, yópe jēniari járejame:

—¿Mǽja máre yure dajocaiyurivurū? arejame ñujare Jesús.

<sup>68</sup> Yópe arī darorejame Jesúre ñujacacu Simón Pedro:

—Mu, ñuje jabocu, mǽtamu ñujare jáve baju bueiyede coyuyu. Mi coyuiyeque ñujare cure ðaivu mu jāravu cūiméjāravu baquinóre. <sup>69</sup> Javeta mure ju aðavū ñuja. Mure coreóvaivubu Jūmenijicui mác meacu bajure, arejame Pedro Jesúre.

<sup>70</sup> Jesús arejame ñujare:

—Mǽjare doce paivure beocacu yu. Ubenita cūinácu mǽjacacu abujuvai jabocu cōjeimume ũ, arejame ñujare ũi bueimarare.

<sup>71</sup> Jesús que ayu, Judas, Simón Iscariotei mác, ũi ðaquinore coyuyu barejáme. Judas Jesúi bueimu mácuvacari, Jesúre jēne ðacuyu barejáme ũi mauvare.

### Jesúi yóva úre ne ju abeno

**7** <sup>1</sup> No yóboi Galilea ámicurōcarōa ĩmaroa coapa cuscñu marejáme Jesús. Ubenita Judea ámicurōi nuiyubedejame, nócavu judfova ñuje jabova

jorojĩni ne boaiyue boje ére. <sup>2</sup>Ñuja judíova ñuje torojuve teinumu, úcua ðainumu, eare nuino marejávũ.

<sup>3</sup>Que baru Jesúre nuicõjeivu, ñi yóva arejaimada:

—Yui mautebejacu mu. Quénora ñujacu Judeaita, ina nócvare mi bueimara máre ne járajipe aivu mi ðaiyede. <sup>4</sup>Põecu ucu baru apevu ne coreóva iyede ére, ñi ðaiyede ðabebi yavenina. Que baru na caivare mi parnéque mi ðaiyede jádovacunujacu mu, ãmiyó, arí coyurejaimada ñi yóva.

<sup>5</sup>Dinumure ñi yóva Jesúre, “Jūmenijicui mácvu mu”, abedejaimada. Que barureca Jesúre nópe arejaimada.

<sup>6</sup>Náre, yópe arí, coyurejameða Jesús:

—Yure ji nuino eabevu cáreja. Ubenita mujare, muje nuivyurinu mu nuru, meavu. <sup>7</sup>Mujare cõenímema ina Jūmenijicure ju abevu. Ubenita yure jáiyubema Jūmenijicure ju abe pøeva. Náre ne ãmeina teiyena coyuvu yu. Que baru yure jáiyubema. <sup>8</sup>Mujavacari torojuve teiyede járanujara. Yu numevu cáreja, ji nuquino eabe boje, arejameða Jesús.

<sup>9</sup>Nópe arí coyuyu bácu ñi yóvare, Jesúcupūravu mautedejame apejārvava no Galilea ãmicurōmia.

### Jesús ñi coyuiño judíovai úcua ðaino ne torojuve teinoi

(Jn 5.9)

<sup>10</sup>Ñi yóva ne torojuve teiyede járanuriburu yóbore, Jesús máre nore jácunurejame. Aru ārojamejiena earejame ñ. <sup>11</sup>Torojuve teinumure Jesúre pare voridurejaimada ñuja judíova ñuje jabova.

—¿Arí curi ñai? arejaimada na.

<sup>12</sup>Ubenita ina pøevacupūravu ne bajumia boroteivu barejáimada ñi borore:

—Meacube ñ. Pøevare cadateibi, arejaimada.

Ubenita apevu pøeva:

—Āmecube ñ. Jūjovaibi majare, arejaimada na.

<sup>13</sup>Ñuje jabovare jidurina, bídeca nuri, borotedejaimada na.

<sup>14</sup>Torojuve teino corica tavaiye bajure, Jūmenijicui cūrami nurejame Jesús. Nore ecorí, pøevare bueni búrejame ñ.

<sup>15</sup>Ére jápiaivu, ñuje jabova cucumari arejaima:

—¿Buebecu bácvacari, aipe teni caiye iye jaubeda majidi ñai? arejaima.

<sup>16</sup>Jesús náre yópe arí, coyurejame:

—Ji buieyede ji bajuma majibevu yu. Quénora yure daroyu bácvu yure majide ðay. U jiede bueyubu yu. <sup>17</sup>Ácu pøecu Jūmenijicui urøpe ðaiyucu baru, coreóvacuyume ároque ji buieyede. Ji buedu Jūmenijicui majiéque o ji baju majiéque, coreóvacuyume. <sup>18</sup>Ácu pøecu ñi baju majiéque yávyu voriduibi pøeva ne pueðarājiyepa ayu ére. Ubenita ácu pøecu voyu pøeva ne pueðarājiyepa ayu ére daroyu bácvu, úrecabe coyuyu jāve, ye borocubecva.

<sup>19</sup>Moisés bácu barejaquémavu mujare Jūmenijicui ðaicõjeiyede coyuyu. Ubenita ácu mujacacu ñi toivarí epeiye báquepe ju arí ðay cubebi. ¿Aipe teni yure boarí jaruvaiyurivurū muja? arejame Jesús ñuje jabovare.

<sup>20</sup>—Abujucu cubi máque. ¿Namema boaiyurivv mure? arejaima ina pøeva obedivu.

<sup>21</sup>Jesús arejame náre:

—Cūinájāravu muje jabuóvaujāravui cūináro ji daino mácarōre muje đarí majibenore cucumavu muja. <sup>22</sup> Muja buraicōjevaivubu mujemara ūmu juedovare ne cajede jabuóvaujāravui, ocho pajāravua baru ne pōeteniburu yóbore, yópe Moisés bácu ūi đaicōjeiye báquepe. Ūbenita Moisés bácu āmenejaquemavu buraicōjeni búy. Quénora majeñecuva mácvu, Moisés bácu ĩ necuva mácvu barejaquémavu ūmuvai cajede buraicōjeni buiv. <sup>23</sup> Muja máre buraicōjeiv mujemara ūmu juedovai cajede muje jabuóvaujāravui, đarājiv yópe Moisés bácu ūi đaicōjeiyepe. ¿Dinumu aipe teni jorojivurū yure ji meadaie báque boje cūinácu ijimu mácu bajure maje jabuóvaujāravui? <sup>24</sup> Coyurí đajocajarā muja apecu meacure o āmecure ūi ārojae bojeda. Quénora dápiajarā apecu meacure o āmecure ūi jāve đaiye boje, arejame Jesús.

### Jesús ūi coyūino ūi daino mácarōre

<sup>25</sup> Jesús nópe ayure jápiaiv, Jerusalén āmicurīimarocavu arejaima:

—¿Nai āmeni maje jabova pare ne vóvaimu boarí jaruvaiyurīduiv? <sup>26</sup> Jārijide apa. Maje coricai majare bueyube ū. Ūbenita aipe abema maje jabova. “Cristo, Jūmenijicui epeimu bajube ū”, adarāma na.

<sup>27</sup> Cristoi daiyede ĩame majibenajarama ārocacure. Ūbenita nai Jesús ūi curō mácarōre majiv muja, arejaima ĩmarocavu.

<sup>28</sup> Ne que aiyede coreóvay Jesús, bueyvacarí Jūmenijicui cūrami, yópe arí darorejame bujié:

—Yure aru ji daino mácarōre majiv muja. Ūbenita ji bajuma ji majiéque dabedejacacu y. Quénora darejacacu y apecu ūi daroimu mácu. Ūtame borocubecu. Ūrecabe muje coreóvabemu máre. <sup>29</sup> Ūtame daroy bácu yure, úque cucu bácu. Que baru yurecabu úre me coreóvay, arejame Jesús.

<sup>30</sup> Dinumure Jesúre jēni jacojūroriv barīdurejaima ĩuje jabova. Ūbenita úre ne jēnaujāravu āmenejaquemavu cāreja. Que baru Jesúre ĩame jēmenejaima. <sup>31</sup> Obediv ina pōevacavu Jesúre ju aiv, yópe arí, coyūiv barejaima:

—Cristo, Jūmenijicui daroimu macuyú, ūi daquiyede jāve pōeva ne đarí majibede jádovañ buojabejebu Jesús pueno. ¿Múcarí? arejaima ina pōeva obediv.

### Jesúre fariseova ne jēni jacoicōjeniduino

<sup>32</sup> Ne que aiyede Jesúi borore jápiarí fariseovacavu, ina fariseova aru sacerdotevare jaboteipōeva máre Jūmenijicui cūramine coreipōevacavure jēni jacoicōjenidurejaima Jesúre. <sup>33</sup> Dinumure Jesús yávay, pōevare arejame:

—Majióvarō bajura cucuyumu mujaque. Quíjino bajura javu yure ji copaini nuquino yure daroy bácu yebai. <sup>34</sup> Dinumu maquinóre pare vorājaramu muja yure. Ūbenita ji nuquinore nuiye majibev muja. Que baru eabenajaramu yure, arejame náre Jesús.

<sup>35</sup> Que ayure, ina judíova ĩuje jabova ne bajumia yávaiv arejaima:

—¿Ári nuquidica nai, ĩuje eabenajiyeye ayú úre? ¿Apeno joborōi, majevu ne curānuĩmaro mácarōi, cucunuquidica ū, buecuy nócavu judíova ānevure? <sup>36</sup> “Yure pare vorīdurājaramu muja. Ūbenita ji nuquinore nuiye majibev muja”, aibi. ¿Aipe aiyurō mārca no ūi que aino? arejaima ne baju.

**Jiape cure ðaiocore Jesús ùi j́icaquinore ùi coyũino**

*(Jn 4.10-14)*

<sup>37</sup>No torojuve teino buojaijāravu pueno meajāravu barejāvũ. Dijāravure Jesús nacajari núcu, yópe arí darorejame buj́ié:

—Ácu pōecu pare cuvaiyucu baru jāravu cūiméjāravu baquinóre yópe pōecu cūiñóimu ùi pare ũcuiyepe ocore, ju ajacurí yure. Aru yópe ji j́ijũroepe ocore cūiñóimure, nopedeca úre cure ðacuyumu yu jāravu cūiméjāravu baquinóre. <sup>38</sup>Yópe arí, toivaicōjenejaquemavu Jũmenijicu ùi yávaiyede: “Ácu pōecu yure ju ayu bācure cure ðacuyumu yu mamaũmeque yópe cure ðaioco ṕiapóri daiyepe”, arejame Jesús.

<sup>39</sup>Nópe ayu, Esṕritu Santo ùi borore ayu barejáme Jesús. Caivu Jesúre ju aivu jacopuivu barājárama ñai Esṕritu Santore. Dinũmure Jũmenijicu Esṕritu Santore darobedejaquemavu cāreja, Jesús ùi muri nume boje cāreja, mearore cuvacyu cavarō mearo Jũmenijicui curói.

**Jesúre judíova ne cūináturura yávabeno**

<sup>40</sup>Apevu ina obedivu pōeva ne jápiarĩburu yóboi Jesús ùi que aiyede, ne bajumia boroteivu arejaima:

—Jāve ñaime Jũmenijicui yávaiyede coyucaipōecu bacuyú, “edacyu” ne ávaimu, arejaima apevu.

<sup>41</sup>Apevu nácavu arejaima:

—Ñai Jũmenijicui daroimu mácube Cristo baju, arejaima.

Ŭbenita apevu nácavu arejaima:

—Cristo baju Galileacacu āmecuyume. <sup>42</sup>David bācui pāramecu bacuyúme Cristo baju. Belén āmicuriĩmarocacu, David bācui curiĩmaro mácarōcacu bacuyúme Cristo. Que arí, toivaicōjenejaquemavu Jũmenijicu ùi yávaiyede, arejaima apevu pōeva.

<sup>43</sup>Que baru Jesúre cūináturura yávabedejaima pōeva. Cūináturu āmenejavũ ne ũme. <sup>44</sup>Jesúre jēni jacoiyurejaima apevu nácavu. Ŭbenita ñame úre jēmenejaima.

**Jesúre judíovai jabova ne ju abeno**

*(Jn 3.1-2)*

<sup>45</sup>Que teiyede Jũmenijicui cūramine coreipōevacavu Jesúre jēni jacoicōjenidumara mácavu copainurejaimada fariseova aru sacerdotevare jaboteipōeva yebai.

—¿Aipe teni Jesúre jēmetenaru muja? arejaimada náre ina fariseova aru sacerdotevare jaboteipōeva.

<sup>46</sup>—Ŭi buieyepe coyuyure ñuja ye jápiabevu. Que baru úre jēni davabetevu ñuja, arejaimada ina coreipōeva.

<sup>47</sup>Quénomia ina fariseova arejaimada:

—Muja máre ùi jujoaiyede ju arebu muja. <sup>48</sup>Ñuja fariseova aru ina jabova máre ye ju abevu Jesúre. Ye ñujacacu cūinácũ úre ju abebi. <sup>49</sup>Ŭbenita pōevacapũravu Jũmenijicui ðaicōjeiyede ùi toivaicōjeiye bāquede Moisés bācure majibema na. Ne majibe boje, Jũmenijicui ñājine ðaimara marajárama na toabo cūiméboi, arejaimada ina fariseova.

<sup>50</sup> Fariseovacacü Nicodemo, Jesúre boroteyü bácu jipocamia, curejamedá náque. Aru apevü nore curivure arejamedá ü:

<sup>51</sup> — Jesús üi boro bajure coyübebi cäreja. Nópe páyure pöecure ñájine ñaicöjemevü Jümenijicüi ñaicöjeiye üi toivaicöjeiye báque majare. Üi baju coyüiyede jápiaiye javvü majare, maje majinajiyeye aivü yéde üi ñaiyede, aridurejamedá Nicodemo.

<sup>52</sup> Üre arejaimada na:

— ¿Mü máre Galileacacurü? Jümenijicüi yávaie üi toivaicöjeiye báquede me buejacü mü, majicuyü. Ácu Galileacacü Jümenijicüi yávaiyede coyüaipöecu cubevaibi ü, arejaimada Nicodemore ina fariseova.

<sup>53</sup> Que arí, ne cüramia coapa copainurejaimada na.

### Cüináco nomió cüco bácore apecuque jímarepacure jaruvarí

**8** <sup>1</sup> Pöevare coyurí bubarí cüracü Olivocü ámicuricüi mürí nurejame Jesús. <sup>2</sup> Cömiájárvavü javejína, Jümenijicüi cüramine copainurejame Jesús. Üi yebai darejaima obedivü pöeva. Que baru dobarí, üre edaivure bueni búrejame Jesús. <sup>3</sup> Üi bueiyede, Jümenijicüi yávaie báquede bueipöevacavü aru fariseovacavü máre cüináco nomió ne eaimo máco cücore apecuque, jímarepacure jaruvarí, davarejaima Jesús yebai. Öre núicöjenejaima ina obedivü pöeva ne coricai.

<sup>4</sup> Aru arejaima Jesúre:

— Mü, bueipöecu, ico nomió jímarepacure jaruvarí apecuque cücore eavü ñüja. <sup>5</sup> Moisés bácu öpe pádore cüрабоaque ñureni boarí jaruvaicöjenejaquemavü, yópe Jümenijicüi ñaicöjeiyepe. ¿Aru múcapüravü aipe ayurü mü öre? arejaima Jesúre.

<sup>6</sup> Que aivü üre jujovaridurejaima, boro coyurí adaiyuridurájivü üre, üi vainí tújuroede ne ñaicöjeiyede. Übenita Jesús nacachini, joboröi ámuoyoque toivarejame. <sup>7</sup> Üi que ñaiyede, Jesúre jëniari járanurejaima na. Ne que teiyede nacajari, núri, arejame náre:

— Jede, mujacacü ámeina tebecu bácu bajacurí mamarümü ñureni báyu öre cüрабоaque, arejame Jesús.

<sup>8</sup> Que arí, bedióva cojedeca nacachini, joboröi toivarejame. <sup>9</sup> Nópe üi aiyede jápiaivüva, cüinácu, cüinácu etarí nurejaima na, Jümenijicüi yávaie báquede bueipöeva aru fariseova máre. Ne püeno bucucu mamarümü aru üi cáchinocavü üi yóbo etarí nurejaima. Pü mautedejacará ñüja, Jesújá, ico nomióque. <sup>10</sup> Cojedeca nacajari, núri, arejame öre Jesús:

— ¿Müre boro coyurí adariduivü ári curi na? ¿Mi ámenore ñaiye boje, pöecu cubedi müre ñájine ñayu? arejame öre.

<sup>11</sup> — Cubebi, ji jabocu, arejaco ö.

— Yü máre müre ñájine ñabevü. Nujaco mü caride. Aru ámeina ñabejaco cojedeca, arejame öre Jesús.

### Jesús pëoinope pöevare coreóvare ñayu majepacüi dápiaie jävene

(Mt 5.14; Jn 5.31; 9.5)

<sup>12</sup> Bedióva cojedeca pöevare yávarejame Jesús:

— Yurecabu pëoinope páyu ijárvavüvure ne ümei, coreóvare ñacuyü Jümenijicüi dápiaie jävene ji bueiyeque. Ácu pöecu yure yóvacudayü,

úrecabe cavaçuy iye pëoiye apure ðaiyede. Que baru mamaümene cavaçuyame ü. Úrecabe cavaçuy yópe miadároi cuyupe, cainumua ñeminoi cubecay. Ubenita pöeva coreóvabevu Jümenijicui dápiaiye jávene curivabu yópe ñeminoi cuivupe, ne majibe boje üi dápiaiye jávene, arejame náre Jesús.

<sup>13</sup>Fariseovacavü arejaima úre:

—Murecabu mi borore coyuyü mi baju. Que baru ubenina que ayubu. Bojecubevu mi que coyuiye, arejaima úre.

<sup>14</sup>Yópe arí, coyurejame Jesús:

—Ji borore ji coyuiyevacari bojecuetamu. Yúvacari coreóvaivü ji curō mácarōre aru ji nuquinore máre. Que baru ji coyuiye jávetamu. Ubenita ji curō mácarōre aru ji nuquinore máre ye coreóvabevubu muja.

<sup>15</sup>Mujacapuravu apévure ñájine dávaivubu pöevare muje coyuiyeque. Ubenita yúcapūravü ñamene ñájine dabecubu. <sup>16</sup>Ubenita pöevare ji ñájine daru, ji nópe ðaiye jáve májebu. Quénora cūinácu ji baju nópe ðabejebu yu. Quénora jipacu, ñai daroyu bácu yure yui, nópe ðajebu yúque. <sup>17</sup>Muje ðaicōjeiyede yópe arí, toivaicōjenejaquemavü Jümenijicu: “Pucarā cūináture ne coyuru ne jáiye báquede, bojecuvü ne que coyuiye”, arí toivaicōjenejaquemavü. <sup>18</sup>Yúvacari ji borore coyuyubu. Aru jipacu, ñai daroyu bácu yure, ü máre coyucaibi ji borore, arejame Jesús.

<sup>19</sup>—¿Mipacu ári curi ü? jēniari járejaima Jesúsre fariseova.

—Yure coreóvabevubu muja. Aru jipacure máre coreóvabevubu muja. Yure coreóvaivü baru, jipacure máre coreóvajebu muja, arejame Jesús náre.

<sup>20</sup>Caiye iyede coyurejame Jesús üi buiyede pöevare Jümenijicui cūrami, Jümenijicure táutura jíye epeitōcua yebai. Ubenita pöecu cubedejame jēni jacocuyü úre, üi mauva úre ne jēnajjāravu baquinó eabe boje cāreja.

### Jesús “Ji nuquinoi nuri buojabenajaramu muja” üi aino

<sup>21</sup>Bedióva cojedeca pöevare yávarejame Jesús:

—Yurecabu nucuyü. Yure voridurājaramu muja. Ubenita yainājaramu muja boropateivü, muje ámeina ðaiyede dajocabe boje aru “Jesúbe Jümenijicui mácu aru majare meadaipöecu”, muje abe boje. Ji nuquinore nuri buojabenajaramu muja, arejame Jesús.

<sup>22</sup>Que ayure, ina judíova ñuje jabova ne bajumia yávaivü arejaima:

—¿Ñujare “Ji nuquinore nuri buojabenajaramu muja” üi ainoque, jáve üi baju boarí jaruvacuyuba? arejaima ne bajumia.

<sup>23</sup>Náre arejame Jesús:

—Mujacapūra vü ijoborōcavubu muja. Ubenita yurecabu ümucacu, cavarō mearo Jümenijicui curōcacu. Mujacapuravu ijāravucavubu muja. Ubenita yúcapūravü ijāravucacu ámevü yu. <sup>24</sup>Que baru “Yainājaramu muja boropateivü, muje ámeina ðaiyede dajocabe boje, ‘Jesúbe Jümenijicui mácu aru majare meadaipöecu’, muje abe boje”, avu mujare. Muje ju abe boje ji ávarede ji baju, “Jümenijicui mácubu yu, caivure meadaipöecu”, ji arí coyuvarede, yainājaramu muja boropateivü, muje ámeina ðaiyede dajocabe boje, “Jesúbe Jümenijicui mácu aru majare meadaipöecu”, muje abe boje, arejame náre Jesús.

<sup>25</sup>—¿Yécurü mu? jēniari járejaima úre.

—Mamarumü ji buiyede aru carita ji coyuvacatumü yu. <sup>26</sup>Mujare ji coyujuroe urarō cuvavü. Aru urarō mujare ji ñájine dájuroe máre cuvavü.

Ūbenita ñai daroyu bácu yure borocubecube aru jãve yávayube ñ. Que baru ñi coyucōjeino mǎcarōpeda muja ijāravucavure coyuvu yu, arejame Jesús.

<sup>27</sup>Ūbenita “yure daroyu bácu”, ñi aiyede, “jipacu”, ayure majibedejaquemavu na.

<sup>28</sup>Que baru yópe arī, coyurejame Jesús náre:

—Muje jocucurā jēori jāmuórajyede yure, Jūmenijicui daroimu mǎcure űmure, majinajaramu jãvene ji ávarede ji baju, “Jūmenijicui mǎcubu yu, caivure meadaipōecu”, ji arī coyuvarede. Dinumu maquinóre majinajaramu muja. Ji baju jipacui coyubenore ðayu buojabevu. Quénora jipacu, Jūmenijicu, ñi coyuiyepedata, yópe ñi coyucōjeiye báquepe yure, coyuyubu yu. <sup>29</sup>Ñai daroyu bácu yure cubi yúque. Yure cūinácura jocarī nūmecube jipacu, ji ðaiye boje ñi urōpe cainumua, arejame Jesús.

<sup>30</sup>Jesús nópe ayure jápiarī, ju arejaima űre obedivu pōeva.

**Jūmenijicui mǎra aru cōjeimarape paivu ne āmeina ðaiyue boje**

(Mt 3.9; Lc 3.8; Gá 5.1, 13)

<sup>31</sup>Ina judíova Jesús yebai cójijivure, űre ju aivu bácvure yópe arī, coyurejame Jesús:

—Muja ju aivu baru ji bueiye, ji bueimara baju barājáramu muja. <sup>32</sup>Ji bueiye jãve bajure majinajaramu muja. Aru que baru apescu cōjeimarape āmenajaramu muja, arejame Jesús.

<sup>33</sup>Ūre arejaima ina judíovacavu:

—Ñuja Abraham mǎcui pāramenatamu. Que baru cainumua apescu cōjeimara āmevu ñuja. ¿Aipe teni “Apecui cōjeimarape āmenajaramu muja”, ayurū mu ñujare? arejaima Jesúsre.

<sup>34</sup>Náre ju ayu arejame Jesús:

—Jãve coyuyubu mujare: Yópe cōjeimara ne baju urōpe ðabevu, quénora apescu urōpe ðaivu, nopedeca caivu ina āmeina ðaivu cōjeimarapebu, ne āmeina ðaiyue boje. <sup>35</sup>Cūrami upacui mǎrape āmema ñi cōjeimara. Mamara memeivu ne ue boje népacure. Ūbenita cōjeimara memeivu ne jabocui cōjeiye boje náre. Quénora űbenina curivutamu ina cōjeimara. Jabocui mǎrape cainumua ména cubema ñi cōjeimara. Ūbenita jīvu bajutamu mamara baju. Que baru me cuima népacuque cainumua. Aru yávacari Jūmenijicui mǎcu bajubu.

<sup>36</sup>Que baru yu, Jūmenijicui mǎcu, mujare cōjeimarape āmevure ji ðaru, jãve bajureca cōjeimarape āmevu barājáramu muja. Ðarājaramu muje ðaiyede muje ue boje majepacu Jūmenijicure. Ðabenajaramu muje ðaiyede apescu ñi cōjeiye boje mujare. <sup>37</sup>Coreóvaivu yu mujare Abraham mǎcui pāramenare. Ūbenita ji bueiye jãve ayubevubu muja. Que baru yure boarī jaruvaiyurivubu muja. <sup>38</sup>Yúcapūravu coyuyubu jipacui jáðovaiye báquede yure. Ūbenita mujacapūravu ðaivubu yópe mujepacui coyuiye báquepe mujare, arejame náre Jesús.

<sup>39</sup>—Ñujeñecu mǎcu barejaquémavu Abraham mǎcu, arejaima na.

Ūbenita Jesús arejame náre:

—Abraham mǎcui pāramena baju baru, ñi ðaiye báquepedeca ðajebu muja. <sup>40</sup>Ūbenita iye yávaiye jãvene Jūmenijicui bueiye báquede yure coyuyu bácvureca mujare, mujacapūravu boarī jaruvaiyurivubu yure. Que ðabedejaquemavu Abraham mǎcu. <sup>41</sup>Muje que ðaiyueque, yópe mujepacui ðaiyepedeca ðaiyurivubu muja, arejame náre Jesús.

Nácapūravu arejaima úre:

—Ñuja ũbenina eaimara ámevu. Jūmenijicuvacaribe cūinácu ñujepacu baju, arejaima.

<sup>42</sup>Náre, yópe arī, coyurejame Jesús:

—Jūmenijicui curōi cucu bácu yore ēmeni darejacacu yu. Aru cūvu caride yui. Que baru Jūmenijicu mujepacu baju baru, yure ũjebu mija. Ji bajuma ji majiéque dabedejacacu yu. Quénora Jūmenijicui daroimu mácubu yu. <sup>43</sup>¿Aipe teni ji coyuiyede jápiarī eabenaru mija? Yure ji coyuiyede jápiaiyubevubu mija. Que baru jápiarī eabevubu mija. <sup>44</sup>Mujepacube abujuvai jabocu. Ũpe paivubu mija. Ũi ũrópe daiyurivubu mija. Mamarumure aru caride máre, pōevare boarī jaruvaipōecube ũ. Jūmenijicui yáva iyede jávene jápiaiyubebi ũ. Aru cainumua yáva iyede jávene coyubebi ũ. Ũi borocuede coyuyube ũ, “¿Jáve márica?” pōeva ne arājiyepe ayu. Aru mamarumucacu borocucube ũ. <sup>45</sup>Ũbenita yúcapūravu coyuyubu yáva iyede jávene. Mujacapūravu ji coyuiyede ju abevubu. <sup>46</sup>Ñame mujacacu ji ámeina daíyede jádovañu buojabebi, ji boropatebe boje. Jávetamu ji coyuiye. ¿Dinumu aipe teni diede ju abenaru mija? <sup>47</sup>Jūmenijicu jicu jápiaibi ũi yáva iyede. Ũbenita mujacapūravu Jūmenijicu jina ámevu. Que baru ũi yáva iyede jápiaiyubevubu mija, arejame náre Jesús.

### **Jesús ũi cuede Abraham mácu pōtequiyee jipocai**

*(Jn 8.24; 10.30-33; 13.19)*

<sup>48</sup>Dinumu ina judíova arejaima Jesúre:

—Jáve coyuiyubu ñuja: Samariacacubu mu. Aru abujucu cubi múque, arejaima na.

<sup>49</sup>Náre arejame Jesús:

—Abujucu cubebi yáque. Jipacure pueðaivu yu. Ũbenita yure pueðabevu mija. <sup>50</sup>Yure mearore jívure vobevu yu. Ũbenita jipacu ũbi pōevare ne jínajiyepa ayu mearore yure. Aru úrecabe coyuyu pōevare ne daíye báque méne aru ámene máre. <sup>51</sup>Jáve coyuyubu mujare: Ácu pōecu ju ayu ji coyuiyede yaibécuyume, arejame Jesús.

Que ayu, pōecui yaibéde ũi ũmei aiycu barejaquémavu Jesús.

<sup>52</sup>Arejaima na:

—Caride jáve coreóvaivubu ñuja. Abujucu cubi múque. Javede Abraham mácu aru ina Jūmenijicui yáva iyede coyucaipōeva mácavu máre yaidéjaquemavu. Ũbenita “Ácu pōecu ju ayu ji coyuiyede yaibécuyume”, mu ayubu. <sup>53</sup>Majeñecu Abraham mácu yaidéjaquemavu. ¿Ũi pueno parucurū mu? Jūmenijicui yáva iyede coyucaipōeva mácavu máre yaidéjaquemavu. ¿Yécupe páyurū mu, mi dápiaru? arejaima na.

<sup>54</sup>Que aivure, yópe arejame Jesús:

—Ji baju “Meacutamu yu” jī aru, bojecubejebu no. Ũbenita jipacurecabe “Meacutamu mu” ayu yure. Ũrecabe “ñujepacu Jūmenijicu”, muje aimu. <sup>55</sup>Mujacapūravu úre ye coreóvabevubu. Ũbenita yurecabu coreóvayu. “Ũre coreóvabevu yu” ayu baru, mujapedeca borocujebu yu. Ũbenita úre coreóvaivu yu. Ũi coyuiyede me ju aivu yu. <sup>56</sup>Aru dápiayu bácu ji edaquiye de ijārvui, torojurejaquemavu majeñecu Abraham mácu. Que teyu, ji edaiyede jáñu mácu, yure torojurejame ũ mácu, arejame náre Jesús.

<sup>57</sup>Ina judíova arejaima úre:

—Cincuenta paíjua cuvabevu mu. Aru Abraham mácu javeita yaidéjaquemavu. ¿Aipe teni “Járejacacu ũ mácu”, ayurũ mu? arejaima Jesúre na.

<sup>58</sup>—Jáve coyuyubu mujare: Abraham mácu ũi pōtequiye jipocai curejacacu yu, arejame Jesús.

<sup>59</sup>Ũi que aiyede, Jesúre jorojĩvu, ina judíova boarĩ jaruvaiyurivũ úre ĩnejaima cūraboare, durenajivũ úre. Ũbenita Jūmenijicui cūramine jocarĩ etarĩ, dupini nurejame Jesús.

**Jesús ũi járe đaino jári eabecu pōteyu bácure**

(Mt 5.14; Jn 8.12)

**9** <sup>1</sup>No yóboi, Jesús ũi cuiyede, járejame cūinácu ũmu, jári eabecure. Nópe pōtedejamedã ñai jári eabecu. <sup>2</sup>Ñuja Jesúi bueimara jēniari járejarã úre:

—Bueipōecu, ¿aipe teni jári eabecu pōtedejauemari ñai? ¿Ũi baju āmeina đaiye boje nópe pōtedejauemari? ¿O ũi bucũva ne āmeina đaiye boje nópe pōtedejauemari? arejarã ñuja Jesúre.

<sup>3</sup>Ñujare, yópe arĩ, coyurejame:

—Ũi baju āmeina đaiye boje āmevu aru ũi bucũva ne āmeina đaiye boje máre āmevu nópe pōteyu báciu ũ jári eabecu. Jūmenijicui parúede jáđovaquiepe ayu, nópe pōtedejauemavu ũ. <sup>4</sup>Jāravure pōeva memeivũ buojadama. Ũbenita ñemié tuyede memeivũ buojabema. Quédeca majare máre đaiye jaũvu yũre daroyu báciu đaicōjeiyede jāravure cāreja. Ũbenita ji yainĩburu yóboi quénora đarĩ buojabecubu yu. <sup>5</sup>Ji cuede cāreja ĩjāravui, pēoinope páyu Jūmenijicui đápiaye jāvene majide đaiyu ĩjāravucavure, arejame Jesús.

<sup>6</sup>Que ayu báciu, yebarã jēcuturi, najuári joboque jĩvarejame. Ũi jĩvaiye báquede ĩni, jári eabecui yacorũare jobo jĩjovarejame.

<sup>7</sup>Jĩjovañũ mácu úre arejame Jesús:

—Siloé āmicuriocobui mi yacorũare joacũujacu mu, arejame jári eabecure Jesús.

Siloé aino, “Jaroicobe” aiyurōtamu. Dibui nuri, ocoque ũi yacorũare joarejame. Joarĩ buojarĩ, ũi cūrami copainurejame, jáñuta. <sup>8</sup>Úre, tātuturare jēñañure jipocamia, jáivũ báciu arejaima ne bajumia:

—Járijide apa. ¿Jári eabecu báciu tātuturare jēniari dobavayũ báciu āmeni ñai? arejaima ũi curōcavu.

<sup>9</sup>—Jũju, ũi baju apa, arejaima nácavu.

—Ũ āmemi. Úreca páyube. Ũbenita jári eabecu báciu āmemi ũ, arejaima apevu.

Ne que aiyede, ũi bajumareca arejame:

—Jári eabecu báciu yu, arejame, náre coyuyũ.

<sup>10</sup>Dinumu úre jēniari járejaima ũi curōcavu:

—¿Aipe đarĩ jári eayurũ mu? arejaima.

<sup>11</sup>—Jesús āmicũcu yebarã jēcuturi, joboque jĩvacube. Die ũi joboque jĩvaiye báqueque ji yacorũare jĩjovami ũ. “Siloé āmicuriocobui joacũujacu mu”, abi yure. Que đacũũvu yu. Diede joayũ báciu, jávu yu, arĩ coyurejame ũi curōcavure jári eabecu báciu.

<sup>12</sup>—¿Mi aimu ári curi ũ caride? arejaima úre ũi curōcavu.

—Aídica, majibevu yu, arejame náre jári eabecu bácu.

**Jári eabecu bácu re fariseovacavu ne jēniari jápaiino**

<sup>13</sup> Dinumure jári eabecu bácu re nūvarejaimada ũi curōcavu fariseova yebai. <sup>14</sup> Dijāravu, Jesúi joboque jījovari meadaijāravu bácarō jári eabecu bácu re ñuja judíova ñuje jabuóvaujāravu sábadō barejávū. <sup>15</sup> Ina fariseova jári eabecu bácu re jēniari járejaimada:

—¿Aipe teni jári eayurū mu? arejaimada.

—Jobo ũi jīvaiye báqueque ji yacorure jījovame. Joacunuvu, ũi cōjeiyepe. Que teyu bácu jáivu caride, arejamedā náre.

<sup>16</sup> —Jūmenijicui daroimu mácu āmecube ũ, mure meadayu bácu, ũi memeiye boje maje jabuóvaujāravure, arejaimada apevu ina fariseovacavu.

Ūbenita apevu arejaimada:

—¿Āmeina ñayū baru, aipe teni pōeva ne ñari majibede jáðovaiye majidi ũ? arejaimada nácavu.

Que arī ne bajumia cūináturura yávabedejaimada. Aru cūináturū āmenejavūya ne ũme. <sup>17</sup> Bedióva cojedeca ina fariseova jēniari járejaimada úre:

—¿Ñai mure meadayu bácu mi aimu, mi dápiaru, ye pōecu páyu bárica ũ? arejaimada.

—Ji dápiaru, Jūmenijicui yávaiyede coyucaipōecube ũ, arejamedā.

<sup>18</sup> Ūbenita ñuje jabova judíova “Jári eabecu bácu re jáñu”, abedejaimada cāreja. Que baru ũi bucvare cutuicōjenejaimada, ne darājiyepe aivu ne yebai. Ne eaiyede fariseova jēniari járejaimada:

<sup>19</sup> —¿Mujemacuba ñai? ¿Aru mujemacu baru, jári eabecu pōetedejarī ũ? ¿Nópe pōeteyu bácvacari, aipe teni jáñuma caride? arejaimada jári eabecu bácu bucvare ina fariseova.

<sup>20</sup> —Ñujemacu bajube ñai. Jári eabecu pōetedejame. <sup>21</sup> Aru caride jári eaibi. Aipe teni jáñu mácu re majibevubu ñuja. Úre meadayu bácu re coreóvabevubu. Jēniari jájara ñujemacure. Bucucube ũ. Ūi baju coyucuyume mujare, arejaimada ũi bucvu.

<sup>22</sup> Nópe arejaimada, ne jidué boje ñuja judíova ñuje jabovare. Jipocamia yópe arī, coyurejaimada ina fariseova: “Ácu pōecu ‘Jesúbe Jūmenijicui daroimu mácu ũ’ ayure, ñuje cōjijīñamine jaetovarājaramu ñuja, ũi cōjijibequiyepe aivu ñujaque bedióva cojedeca”, aivu barejaimada na jipocamia. <sup>23</sup> Que baru, “Bucucube ũ. Úre jēniari jájara muja”, arejaimada ina fariseovare ũi bucvu.

<sup>24</sup> Bedióva cojedeca jári eabecu bácu re cutuicōjenejaimada ina fariseova. Eayū bácu re arejaimada:

—Mure meadayu bácu re majivu ñuja, āmeina teipōecu bajure. Que baru Jūmenijicui jáinore jáve coyujacu mu caride, arejaimada jári eabecu bácu re.

<sup>25</sup> —Āmeina ñayure o mearore majibevu yu. Ūbenita jári eabecu batevū yu. Caride que āmevu. Jáivu yu. No quénoratamu ji majino, arejamedā ina fariseovare jári eabecu bácu.

<sup>26</sup> —¿Aipe ñari ũ mure? ¿Aipe ñayū, mure járe ñari ũ? arī jēniari járejaimada úre cojedeca.

<sup>27</sup>—Mujare coyuvu yu. ¿Jápiabenaru muja? ¿Ëi bueimara teiyurivurü muja? Que barureca burubeda yure jëniari jáivubu muja, arejamedá fariseovare.

<sup>28</sup>Ëre, yópe arī, ámeina yávarejaimada:

—Mútamú ñi bueimu. Moisés bácuí bueimaramu ñuja. <sup>29</sup>Moisés bácuí yávarejaquemavu Jūmenijicu. Aru Moisés bácuí majivu ñuja. Ëbenita mure meadayu bácuí ye majibevubu ñuja. ¿Árocacuba ñ? arejaimada ina fariseova.

<sup>30</sup>—“¿Árocacuba ñ?” aivubu muja. Ëbenita ji jári eabe báquede meadaibi yure. Mujacápūravu ñi curō mácārōre majibevubu muja. <sup>31</sup>Me majivu maja: Ámeina teivure jápiabebi Jūmenijicu. Quénora Ëre mearore jívure, ñi urōpe ðaivure, jápiaibi ñ. <sup>32</sup>Jári eabecure meadaiyede maja jápiabevubu. Yureca páyu nópe ámepeda pōteyu bácuí meadaipōecu cubebi ñ. <sup>33</sup>Yure meadayu bácu Jūmenijicuí daroimu mácu ámenu, ji jári eabe báquede meadabejebu ñ, ayubu yu mujare, arejamedá náre jári eabecu bácu.

<sup>34</sup>—Mipacoi yapiburā pōtecuyuvacari javeta ámeina ðayu barejaquémavu mu. ¿Quécuvacari ñujare bueyurü mu? arejaimada jári eabecu bácuí ina fariseova.

Que arī, Ëre ne cójijiñamine jaetovarejaimada ina fariseova, ñi cójijibequiyepa aivu náque bedióva cojedeca.

**Jesús ñi coyūino majepacu Jūmenijicure  
coreóvabevu jári eabevupe paivure**

<sup>35</sup>Jári eabecu bácuí ne jaetovaiye báquede coreóvarejaquemavu Jesús. Coreóvayu bácu, jári eabecu bácuí vocunurejame. Aru eayu bácu Ëre, yópe arī, jëniari járejame Jesús:

—¿Mu Jūmenijicuí daroimu mácuí ñmūpe ju ayurü? arejame Jesús.

<sup>36</sup>—Mu, ji jabocu, mi aimure coreóvare ðajacu yure. Ëre majicu, ju acuyumu yu, arejame Jesúre jári eabecu bácu.

<sup>37</sup>—Jave jáivu mu Ëre. Ëmu yu, múque boroteyu caride, arejame Ëre Jesús.

<sup>38</sup>Ëi que aiyeda, ñuatutari Jesúre mearore jídejame jári eabecu bácu:

—Mu, ji jabocu, mure ju aivu yu, arejame Jesúre.

<sup>39</sup>Dinūmure yópe arī, coyurejame Jesús:

—Ijáravui darejacacu yu, beocuyu ju aivure aru ju abevure máre. Pōeva “Majibevubu ñuja Jūmenijicuí dápiaiye jávene” aivu, jári eabevupe paivubu. Nápe paivure meadacudayubu yu, ne majinajiyepa ayu Jūmenijicuí dápiaiye jávene jáivupe. Ëbenita pōeva “Majidivubu ñuja Jūmenijicuí dápiaiye jávene” aivu, jáivupe bariduyama, ne dápíaru. Nópe ne dápiaiye boje, náre meadabecubu yu. Que baru jári eabevupe teni, Jūmenijicuí dápiaiye jávene ye majibenama na, arejame Jesús.

<sup>40</sup>Jesús que ayure jápiarejaima fariseovacavu.

—Que baru, ¿“Jári eabevupe paivubu muja”, ayurü mu ñujare? arejaima Jesúre.

<sup>41</sup>Jesús ju ayu yópe arejame náre:

—Muja jári eabevupe majibevu baru aru muja coreóvaivu baru Jūmenijicuí caðateiyede jauřōre mujare, boropatebejebu muja. Ëbenita “Majidivubu ñuja Jūmenijicuí dápiaiye jávene” aivu, jáivupe paivutamú muja.

Ūbenina dápiadavū muja majini buojaivure Jūmenijicui dápiaiye jāvene ū cadatebecuva mujare. Que baru boropateivū mauteivūbu muja cāreja, arejame nāre.

**Jesús ūi coyūino ovejavare coreipōecure**

(Lc 15.4-5; He 13.20)

**10** <sup>1</sup>Dinūmure nāre yópe arī, coyūrejame Jesús:

—Jāve coyūyūbu mujare: Nāi pōecu ovejavare biaido jedevacobei ecobecu, quénora biaidore murina ecoyū baru, ūrecabe űnavaipōecu o tatorī ĩpōecu. <sup>2</sup>Ūbenita űnai ecoyū ovejavare biaido jedevacobe bajita, ūrecabe ovejavare coreipōecu aru nāre upacu máre. <sup>3</sup>Ūrecabe biaido jedevacobede coreipōecui voacaimu jedevacobede. Aru ovejavare órejarī daroibi ne āmiá coapa nāre coreipōecu. Ūi órejaiyede jāpiarī, coreóvarī, dadama ūi yebai. Aru nāre nuvaimī ū, āocuyū. <sup>4</sup>Ovejavare etavayū bācu biaidore jocarī, nāre jipocateibi. Aru ūi yóboi cuyuyama na, ne coreóvaiye boje ūi yāvainore. <sup>5</sup>Ūbenita ne coreóvabemuque numema na, ūi órejaiyede. Ūre dupivū cūyanurinata bíjadama na ovejava, ne coreóvabe boje ūi yávaicamure, arejame Jesús.

<sup>6</sup>No jāri dāpiarī ne darājiyepe ainore coyuridurejame nāre Jesús. Ūbenita ye jāpiarī majibedejaima na.

**Jesús ména coreyū pōevare yópe ovejavare coreipōecu meacu ūi coreiyepe ovejavare**

(Mt 11.27; Lc 10.22; 15.4-5; Ef 2.11-22; He 13.20)

<sup>7</sup>Bedióva cojedeca pōevare yāvarejame Jesús:

—Jāve coyūyūbu mujare: Ovejavai biaido jedevacobepe páyutamū yū, pōeva ne earājiyepe ayū Jūmenijicure. <sup>8</sup>Ji edaquiye jipocare apevū, ovejavare coreipōevape teni, edaquemavū. Caivū na űnavacurivūpe paivū aru tatorī ĩpōevape paivū batequémavū. Ūbenita nāre jāpiarī adabetequemavū pōeva. <sup>9</sup>Jedevacobedeca páyutamū yū. Yópe ovejava jedevacobe biaidoi ne ecorī buojaiyepe nāre coreipōecu, ūi meadaquiyepe aivū nāre, nopedeca pōeva yúque earī buojaivūbu Jūmenijicure, ūi meadaquiyepe aivū nāre. Ne āmeina vaijuroede meadacuyūmu yū. Yópe ovejava ecorī, etarī jedevacobei buoimara ānevūpe, nopedeca pōeva yúque curivū jidubevū buoimarape āmema. Yópe ovejava ne āiyede eaiyepe nāre coreipōecuque, nopedeca ina yúque curivū nāre apure daiyede earī, ména curājarama na ne ūmei, arejame Jesús.

<sup>10</sup>Nāre, yópe arī, coyūre nūrejame Jesús:

—űnavaipōecu quénora űnavacudaibi aru pōevare boarī jarūvacudaibi, nāre bíjarocuyū. Ūbenita yúcapūravū apure dacudaivū pōevare mamaūmeque, ne curājiyepe ayū urarō meaūmeque cainūmūa. <sup>11</sup>Ovejavare coreipōecu meacu me baju jāri capuibi ūi ovejavare pu ūi yaiyeta nāre boje. Quédeca tecuyūmu yū máre. Pōevare meadacuyū, yaicúyūmu nāre boje. <sup>12</sup>Ūbenita nópe dabebi ovejava upacure memecaipōecu. Ū ovejavare coreipōecu āmemei. Ū jina āmema na. Que baru āimacu jjecucu, lobo āmicucu, ūi edaiyede jāñū, cūinā cūyarī dupibi ovejava upacure memecaipōecu, ovejavare jocarī nuñū. Que baru corebemarape ovejavare cuyurī jaroibi űnai lobo. Cūinācure jēniburu, apevū coateni nuñama. <sup>13</sup>Nāi memecaipōecu jecubebi ovejavare. Quénora

ñi jabocui bojedaiyeda ùbi ù. Que baru ovejavare jocarí, dupini ñuimi ù, arejame Jesús.

<sup>14-15</sup> Náre, yópe arí, coyure ñurejame Jesús:

—Yñ mearo coreyubu pōevare yópe ovejavare coreipōecu meacui coreiyepe ovejavare. Jipacu coreóvaibi yure. Aru coreóvaivu yñ úre máre. Quédeca coreóvaivu yñ ji cūvamara coapa. Aru yure coreóvama na máre. Yurecabu meadacuy pōevare. Que baru yaicúyumu náre boje. <sup>16</sup> Yópe apedoa biaidoacavu ovejavai cūepe, nopedeca apevu pōeva, yócavu ãmema, ùbenita jína mǎrajivu cuma nore máre. Náre cuturí, jipocateni davacuyumu yñ. Ji cutuiyede jápiarí ju arājarama na. Náre epecuyumu jívunque cūinávure. Na caivu curājarama yúque. Aru náre corecuyumu yñ. Que teni cūináyaboboep teni, yñ ne coreipōecu cūinácuque curājarama caivu ina jívñ, arejame Jesús.

<sup>17</sup> Náre coyure ñurejame Jesús:

—Ji mauvare boarí jaruvaicōjeiyuvu yñ ji bajure, nacajari yainore jaruvarí cūcuy bedióva cojedeca. Que baru ùbi yure jipacu. <sup>18</sup> Pōecu cūbebi yure boarí jaruvacuy ji ùbedu. Ji mauvare boarí jaruvaicōjecuyumu. Yñ buojaivu boarí jaruvaicōjeñ ji bajure aru nacajari cūcuy bedióva cojedeca máre. Que ñaicōjeimi yure jipacu, arejame Jesús.

<sup>19</sup> Que ayure jápiarí, ina judíova cūináturu ãmevu cojedeca ne ùme, cūináturura yávabema Jesurá.

<sup>20</sup> —Abujucu cūbi úque. Que baru ãrumemi. ¿Aipe teni ùi coyuiyede jápiaivurú muja? arejaima nácavu obedivu.

<sup>21</sup> Ùbenita apevu nácavu arejaima:

—Abujucure cūvacu nópe yávayñ buojabebi. Aru jári eabecure meadaiye buojabebi abujucu. ¿Múcarí? arejaima ina judíova.

### Jesúre judíova ne ùbeni jaruvaino

(Jn 1.28)

<sup>22</sup> Dinumure uracoro ocorūm marejávñ. Aru Jerusalén ãmicuríimaroí torojuve teinumu marejávñ. Jūmenijicui cūramine meadaiye báquede ãrurivu, torojurejacař ñña judíova. <sup>23</sup> Nore Jūmenijicui cūrami Salomón mácu cuino mácarō ãmicurōi vaiváre ñurejame Jesús. <sup>24</sup> Nópe vaiváre nuñure tarabudarí úre, jēniari járejaima judíovacavu:

—Mure urarō chīodavu ñña. ¿Yécurú mñ? Cristo, Jūmenijicui daroimu mácu baru mñ, cūiná coyujacu ññjare. Coreni ñetuyavñ ñña, arejaima Jesúre.

<sup>25</sup> Náre, yópe arí, coyurejame Jesús:

—Jave coyurídivu mujare. Ùbenita ji coyuiyede ju abetevu muja. Muje jáiyede pōeva ne ñarí majibede jipacui cōjeiye bajure ñavu yñ. Ùbenita diede jáivuvacari, yñ Cristore ju abevu muja cǎreja. Yñ, Cristo, jádovaivu jáve ji ñaiyeque. <sup>26</sup> Ùbenita mujacapūravu ji ovejavape paivucavu ãmevu. Ji pōeva ãmevutamu muja. Que baru ji coyuiyede ju abevu muja. <sup>27</sup> Yópe ovejava ne jápiarí, ju arí ñaiyepe náre coreipōecu bajui urōpe, nopedeca ji pōeva yure jápiarí, ju arí ñaivubu yópe ji urōpe. Jívure me coreóvaivu yñ. Yure jápiarí, ju arí cuma yúque. <sup>28</sup> Náre járavu cūiméjaravu baquinóre cūvare ñaivu yñ. Toabo cūiméboi ñumenajarama na cainumua. Ji coreimarare yure tatojurocu cūbebi ù. <sup>29</sup> Yure jipacui jímara bojecurivubu caiye pñeno.

Jipacure tatojurocu náre cubebi ũ. <sup>30</sup>Yu jipacumaque cūinávupebu ñuja, arejame Jesús ina judíovare.

<sup>31</sup>Ũi que aiyede, Jesúre jorojívũ ina judíova, boaiyurivũ úre, ñejaima cūraboare cojedeca, đvarājivũ úre.

<sup>32</sup>Ũbenita Jesúcapūravũ arejame:

—Jipacui ure đaicōjeiyede pōeva ne đarĩ majibede jáđovavũ yũ, cadatecuyũ pōevare. ¿Caiye die muje jáiye báquede, áde boje cūraboare đvarājivurũ yure? arejame náre Jesús.

<sup>33</sup>Jesúre arejaima na:

—Mi đaiyede jáivũ bácavũ cūraboaque đureni, mure boabénamu ñuja. Ũbenita “Jūmenijicuque cūinávupebu ñuja”, avura mũ. Jūmenijicure ámeina yávaivũ mũ, que ayũ. Quénora pōecuratamu mũ. Que baru Jūmenijicure mi ámeina yávaie boje, mure boarājaramu ñuja, arejaima Jesúre ina judíova.

<sup>34</sup>Náre, yópe arĩ, coyurejame Jesús:

—Mujeñecuva mácvũ ne toivarĩ epeiyoa cāriáiyocai yópe arĩ, toivaicōjenejaquemavũ Jūmenijicu ũi yáva iyede: “Jūmenijinape paivubu muja”, arejaquemavũ Jūmenijicu. <sup>35</sup>Me coreóvaivubu maja Jūmenijicui yávaie ũi toivaicōjeie báque jáve bajure cainumua. Ũi yávaino mácarōre oatuvaino cubevũ no. Aru Jūmenijicuvacari, “Jūmenijinape paivubu muja”, arejaquemavũ ina javecavũ ũi yáva iyede coyumara mácvure.

<sup>36</sup>Yurecabu Jūmenijicui beoimu mácvũ, memecacuyũ úre. Yure darorĩ epei bi ijāravui. Que baru, ¿“Jūmenijicui mácvu yũ” ji aiyede, aipe teni yure “Jūmenijicure ámeina yávaivũ mũ”, aivurũ muja? <sup>37</sup>Jipacui đaicōjeiyede ji đabedu, yure ju abejarã muja. <sup>38</sup>Ũbenita pōeva ne đarĩ majibede jipacui đaicōjeiyede ji đaru, nópe đayure muje jári coreóvaie boje, ju ajarã muja. Yure ju abevureca, ji đaiyede ju aie javu mujare, muje cūiná majinaiyepe ayũ jáve jipacu cūcure yúque aru yũ cūcure úque máre cūinávupe, arejame náre Jesús.

<sup>39</sup>Bedióva cojedeca Jesúre jēni jacoiyurĩdurejaima na. Ũbenita náre dupidejame ũ.

<sup>40</sup>Náre dupiyũ bācvũ Jordán āmicuriya jia āniduvei, Juan Bautista bācvũ ũi pōevare Jūmenijicuque ocoi jáđovaino mácarō yebai nurejame Jesús cojedeca. Noi cūcunũũ, úque nurejara ñuja ũi bueimara. <sup>41</sup>Nore ñuje cuede pōeva obedivũ Jesúre járadarejaima. Ne bajumia yópe arĩ, borotedejaima:

—Pōeva ne đarĩ majibede đabeteame Juan Bautista bācvũ. Ũbenita caino ũi coyũino mácarō Jesúi borore jáve baju batequémavũ, arejaima ina Jesúre járadaivũ bācvũ.

<sup>42</sup>Aru nore cūcure, Jesúre ju arejaima obedivũ pōeva.

#### Lázaro bācvũ yaino

(Lc 10.38-39; Jn 12.3)

**11** <sup>1</sup>Dinũmure cūinácvũ ũmũ ũi āmiá Lázaro ijete yũ barejámeda. Jíburōmivaque Betania āmicuriĩmajinoi curejame ũ. Marta aru María āmicurejaima na, jíburōmiva. <sup>2</sup>Ico María Lázaroĩ mamico barejácođa Jesúre mumijue yuádo bacodó ũi cubobare aru ōi yuarĩburu yóboi ōi pođaque tũredo macodó máre. <sup>3</sup>Jesúre boro jarorejaimađa na, Lázaroĩ mamĩnomiva:

—Ñuje jabocu, mi yóvaimũ, pare mi jecuvamũ, ijeteibi ũ, arĩ boro jarorejaimađa Jesúre dinomiva.

<sup>4</sup>Ne que aino mácarõre jápiayũ bácu, yópe arejame Jesús:

—Ijeteuyvacari ya ibé cube Lázaro. Quénora Jümenijicui paruéde jádovaquiyepa ayũ pōevare ijeteibi ñ. Ñi ijeteiye boje pōeva járajarama yũ, Jümenijicui mácu, ji paruéde, arejame Jesús.

<sup>5</sup>Martare, Maríare, aru néyocu Lázaro pare jecurejaquemavũ Jesús.

<sup>6</sup>Ijimure jápiayũ bácuvacari, nomicata pucajāravũ mautedejame cāreja.

<sup>7</sup>Pucajāravũa yóboi, Jesús arejame ñujare ñi bueimarare:

—Járica, Judeai nurajarevũ maja cojedeca, arejame ñujare.

<sup>8</sup>—Mũ, bueipōecu, javejieneca cūraboaque ñureni, mñre boajñorivũ batemá nōcavũ. ¿Nore nūcuyũrũ mñ cojedeca? arejacañ Jesús.

<sup>9</sup>“Ji ñájuroede buojajebu yũ” ayũ, yópe arĩ coyurejame Jesús:

—Jāravũa coapa doce paioa cāvũ. Ñai cuyũ jāravũre, aviá ñi boiyede, tobebi ñ, aviá ñi boino cue boje jāravũre. <sup>10</sup>Ñbenita ñai cuyũ ñamine, torĩ yavaibi ñ, aviá ñi miadāre ñaino cube boje, arejame Jesús.

Que ayũre Jesús, yópe aiyũrõ marejaquémavũ: Jāravũa cūrejaquemavũ ñre cāreja, ñi buojaquiyepa ayũ ñre ñaiye jaurõre.

<sup>11</sup>Que coyũriburu yójĩboi, yópe arĩ coyurejame Jesús cojedeca:

—Maje yóvaimũ Lázaro cāñume. Ñre coedavacũñũmũ yũ, arejame ñujare.

<sup>12</sup>—Mũ, ñuje jabocu, jāve cāru, dinũmũ meaquiyebu. Meatecuyũme, arejacañ ñuja.

<sup>13</sup>Jesús ñi nōpe aiyede majibedejacañ ñuja. Ñbenita “Cāñũmebu”, arĩ dāpiarejacañ ñuja. <sup>14</sup>Ñuje que dāpiaiyede, yópe arejame Jesús yavebecũva:

—Jave yaicũbe Lázaro bácu. <sup>15</sup>Ji cube báque boje ñque, torojũvũ yũ. Caride yũre me baju coreóvarĩ ju arājaramu mña, ji ñaiquiyede jāivũ. Járica, Lázaro bácu yebai nurajarevũ maja, arejame Jesús.

<sup>16</sup>Ñujacacu Tomás, pējacu ñuje aimũ, arejame ñujare:

—Járica, Jesúsque yainānurajarevũ maja máre, arejame.

**Jesús ñi pōevare apure ñaino cojedeca, ñi nacovariburu náre yainore jarũvarĩ**

(Ro 6.4-5; Col 2.12; 3.1)

<sup>17</sup>Jāranurejacañ ñuja, Jesújā. Earāñũivũ bajure Lázaro bácu yaino mácarõre coyũrādarejaima nōcavũ. Javeta Jesús ñi eaquiyepa jipocamia, yóvaicũvaujāravũa jipocamiata, ñi mácure jarũvarejaima cūracobei, pōe jarũvaicobei. <sup>18</sup>Lázaro bácu curĩĩmaro, Betania āmicurĩĩmajino, joabejĩnoi yóbecurĩkilometros baji curejavũ Jerusalén āmicurĩĩmaro. <sup>19</sup>Que baru Martare aru Maríare máre, yaiyũ bácu maminomivare, jāranurejaima Jerusalécavũ judíoia obedivũ. Na chĩoiũque orāñurejaima. <sup>20</sup>Jesús edayũre majini, ñre copũ darejaco Marta. Ñbenita Maríacapũravũ dabedejaco. Quédato cūrāmimĩa cūrejaquemavũ. <sup>21</sup>Jesúre copũyo, yópe arejaco Marta:

—Mũ, ji jabocu, yui mi cũru, jĩyocu bácu yaibéjebu. <sup>22</sup>Ñbenita coreóvaivũ yũ Jümenijicu ñayũre caiyede yópe mi jēñaiyepa ñre, arejaco Jesús.

<sup>23</sup>—Mĩyocu bácu nacajacuyũme yainore jarũvarĩ, arejame Martare.

<sup>24</sup>—Jāvemũ no. Nore majivũ yũ. Jāravũ cūiyeta, nacajacuyũme jĩyocu bácu yainore jarũvarĩ, arejaco ñ cojedeca.

<sup>25</sup> Dinumure Jesús arejame:

—Yábu yaivu bácvure nacovañu yainore jaruvari. Jáve yaivu bácvure cainumua cure dayubu yu. Põecu yaiyú bácvacari, yure ju ayu bácu baru, bediõva cojedeca apucuyume. <sup>26</sup> Yure ju ayu, ji nacovaquimu, apucuyume cainumua. Ye numecuyume toabo cūiméboi. ¿Iye ji coyuiyede ju adorū mu? arejame Martare Jesús.

<sup>27</sup> Aru arejaco:

—Mu, ji jabocu, ju aivu yu. Mu Cristobu, Jūmenijicui mácu baju. Jūmenijicu ũi epeimu mácu yore ũi daroimu mácu bu mu, arejaco Jesúre Marta.

### Lázaro bácvure Jesús ũi oino

<sup>28</sup> Ére que ado báco copainuri, imacore, Maríare, cutuconurejaco Marta. Yavenijiena cuturejacoda Maríare, apevu ne jápiabenajiyepe ado:

—Bueipõecu dare daibi. “Dajacori”, aibi mure, arejacoda Maríare Marta.

<sup>29</sup> Ju arí, cūiná nacajari, Jesús yebai copu nurejacoda María. <sup>30</sup> Imaro bajure eabedejacarā ñuja cāreja. Martare ñuje copuino mácarõmiata curejacarā cāreja. <sup>31</sup> Jūjujiena nuñore jáivu, Maríare yóvarādarejaima ina judiõva. Óque orádaivu baridurejaimada. “Yaiyú bácvure ne jaruvaino mácarõi oconuñome õ”, arí dāpiaridurejaimada na.

<sup>32</sup> María ñuje yebai edarína, Jesús yebamiata ñuatutarí, arejaco ére:

—Mu, ji jabocu, yui mi curu, jýocu bácu yaibéjebu ũ, arejaco Jesúre María.

<sup>33</sup> María oðore jáñu, aru óque edaivu oivure jáñu, óre cõmaje ároje jári, urarõ chõorejame Jesús.

<sup>34</sup> —¿Ári yaiyú bácvure jaruvarāru muja? arejame Jesús.

—Mu, ñuje jabocu, jácudajacu, arejaima Jesúre.

<sup>35</sup> Dinumu orejame Jesús máre.

<sup>36</sup> —Urarõ yaiyú bácvure úteame Jesús, arejaima ne bajumia ére jáivu bácvu.

<sup>37</sup> Apevu nácavu arejaima:

—Jári eabecure meadame Jesús. ¿Aipe teni Lázaro bácvure meadabetedi ũ, ũi yaibéquiyepe ayu? arejaima na, ne bajumia yávaiva.

### Lázaro bácu ũi nacajaino yainore jaruvari

<sup>38</sup> Yaiyú bácvure jaruvaino mácarõre eare nuiye bajure bediõva cojedeca orejame Jesús, pare chioñu. Que teni ũ mácvure ne jaruvaino mácarõre earejacarā ñuja, Jesúque daivu. Cūracobe, cainituravaque ne bieicobe barejávū Lázaro bácvure ne jajuidorí adaicobe bácarõ.

<sup>39</sup> —Cainituravare veojarā muja, arejame náre Jesús.

—Mu, ji jabocu, yóvaicuvaijāravua vaivu yaiyú bácvure ñuje jaruvarĩburu yóbo. Javeta ũrojucube ũ mácu, arejaco Jesúre Marta, yaiyú bácu mamico.

<sup>40</sup> —Javede coyuvu mure. Mu yure ju ado baru, yure Jūmenijicui paruède cūvacure jácõdomu mu, avu yu mure, arejame Martare Jesús.

<sup>41</sup> Dinumu dicobede bieituravare veorí ñejaima apevu. Ne que ñarĩburu yóboi, nore núcu, cavarõi jáñu, arejame Jesús:

—Mu, jipacu, yure jápiaivu mu cainumua. Que baru mure torojuede jívū yu. <sup>42</sup> Yu me coreóvaivu jápiayure yure cainumua. Ubenita yore yúque curivu

ne majinajipeye ayu, mure que aivu yu. Ne “Jümenijicui daroimu mácube Jesús”, ne aräjipeye ayu, nópe mure yávaivu yu, arejame Jesús.

<sup>43</sup> Jípacuque yávayü bácu codoboborí, órejurejame Jesús:

—Lázaro, etarí dajacu mü, arejame.

<sup>44</sup> Jesús üi que aiyedata, etarí darejame ü yaiyü bácu. Cuitótecajeaque üi cuboba, üi puruá, aru üi jipobu máre, caicu ne cümaimu mácu, Lázaro etarí darejame.

—Cuitótecajea úre cümaicajeare jodeni jaruvajarä müja, cürami üi copaiquipeye aivu, arejame náre Jesús.

### **Jesús üi coyüino ne jénajinore úre yóbmia**

(Mt 26.1-5; Mr 14.1-2; Lc 22.1-2)

<sup>45</sup> Obedivu ina Maríaque yaiyü bácu ore orádaivu bácuvcavu, Jesúre nópe dayure jáivu bácu, úre ju arejaimada. <sup>46</sup> Übenita fariseovacavure coyuræarejaimada apevu. Caiye Jesús üi daiye báquede náre coyurejaimada.

<sup>47-48</sup> Que teni sacerdotevare jaboteipöevaque cójijidejaimada nüja judíoiva nüje jabova, ina fariseova. Aru arejaimada, ne bajumia boroteivu:

—Pöeva ne darí majibede ure daibi Jesús. Que dayu, parucu nuñume ü. Jesúre nópe nüje dare nuicöjenu, caivu pöeva úque nüjebu. Úque pöeva ne nuru, meamejebu majare. Úre ju arí, jabojaoyuma. Aru ne jabojaoru úre, majare boarádaicöjebu churaravare ina Romacavu, maje jabova baju. Jesúre jabojaorurivure jáivu baru, Romacavui jaboçu vainí tuivupe majare jájebu nócu. Dinumita maje Jümenijicui cüramine vaivéní jaruvarí, maje joboröre máre tatorí ijebu ina Romacavu. Que baru, ¿aípe darájdica maja? arejaimada nüje jabova.

<sup>49</sup> Übenita cüinácu nácu üi ámiá Caifás, sacerdotevai jaboçu baju diujure, arejamedá:

—Müja, jivu, jápiajarä. Majibevü müja nópe yávaivu. <sup>50</sup> ¿Coreóvabenaru müja? Cüinácuva yaidú, majare meavu. Que teni caivu yainí bíjabejebu maja, arejamedá jabovare Caifás.

<sup>51</sup> Ü cüinácu nópe abedejaquemavu Caifás. Sacerdotevai jaboçu baju boje, úre nópe are darejaquemavu Jümenijicu, Jesús üi yaiquiyede judíoivare boje coyuyü.

<sup>52</sup> Übenita náre quévü bojeda yaicúyu ámenejame Jesús. Quénora cainoa joboröacavure boje máre, yaicúyu barejáme Jesús, obedivu Jümenijicui mára marajivure cüináyajuboçe dacuyü.

<sup>53</sup> Sacerdotevare jaboteipöeva aru fariseova máre, “Dinumu Jesúre boarí jaruvarajarevu maja”, arí búrejaimada na dijárovü, Caifás üi nópe coyujárovümia.

<sup>54</sup> Nore majicu Jesús, uráimaroai cubedejame. Judeacavure dupini nuñu, ne joboröre jocarí, pöecubenoí nurejame Jesús. Nüjare üi bueimarare máre nuvari, Efraín ámicuríimajinoi curánuřejacarä nüja.

<sup>55</sup> Nüja judíoiva nüje torojuve teijárovü, Pascua ámicurijárovü baquinó eare nuño marejávü. Que baru Jerusalén ámicuríimaroi obedivu pöeva, cainoa imaroacavu, murí nurejaima na, darájivu ne torojuve tenajiye jipocai yópe Jümenijicui daicöjeipeye üi coyüye báquede Moisés bácu, meara marajivu Jümenijicui jáinore. <sup>56</sup> Que teivu, Jesúre vore cuivu barejáimada ina pöeva. Cójijivu Jümenijicui cürami, ne bajumia boroteivu jénari járejaimada:

—¿Muje dápiaru, Jesús máre edaquidica ũ? arejaimada.

<sup>57</sup> Jipocamia ina sacerdotevare jaboteipõeva aru ina fariseova máre caivure, yópe arĩ, coyucõjenejaimada:

—Jesúi curõre majidivũ baru, cūiná ñujare coyuradajarã muja, ñuje jēni jacorãjiyepe aivũ ũre, arejaimada ñuje jabova.

#### María õi mumijue yuaino

(Mt 26.6-13; Mr 14.3-9; Lc 7.37-38)

**12** <sup>1</sup> Seis paijãravũ Pascua ãmicurĩjaravũ jipocai, Betania ãmicurĩmajinoi nurejacaã ñuja Jesúque cojedeca. Lázaro, yaiyú bácuere Jesúi nacovaimũ mácu curĩmaroi nurejacaã. <sup>2</sup> Ñuja edaivure urarõ ãiye tuorejaima apevũ nócavũ, pueðarãjivũ Jesúre. ãiyede tuodo barejáco Marta. Aru Lázaro máre curejame tuoiva yebai apevũ dobarivũque. <sup>3</sup> ãñure, María davarejaco trescientos paigramos baju mumijuricorore Jesús yebai. Iye mumijue nardo ãmicue pare mearo corajue barejávũ. Aru pare bojecue barejávũya máre. Die mumijuricorore yuarejaco Jesúi cubobarã. Yuado báco, õi poðaque tũrenejaco Jesúi cubobare. Aru caiñami cũramine mumijurejavũ die. <sup>4</sup> Dinũmure jararejame Judas Iscariote, ñuja Jesúi bueimaracacũ, ũre jēne ðacuyũ. Ore jararĩ, yópe arejame ũ:

<sup>5</sup> —¿Iye õi jarũvaicorore, aipe teni apevure bojedabetedĩ ò? Tãutura urarõ, trescientos paijãravũare memeiye boje jíye jarũridurebu òre. Diede boje ñni, cuve cuvabevure caðatejebu maja, arejame Judas.

<sup>6</sup> Ñbenina que ayũ barejáme Judas. Cuve cuvabevure cõmaje ãroje jáñũ ãmenejame, que ayũ. Quénora ñavacũcu barejáme. Ñ marejáme ñujare tãutura ñavacaipõecu. Iyede ñuje tãutura corecayũ, ñi urõmia ñni, ñuje tãuturare ñavavarejaquemavũ ũ.

<sup>7</sup> Ñbenita Jesús arejame:

—ãmeno yávabecacũ òre. Ñ que ðaibico, meaðacodo ji bajure ne jarũvarãjiyede cũracobeita. <sup>8</sup> Cainũmua ina cuve cuvabevũ curãjarama mujaque. Ñbenita yũ cubecubũ mujaque cainũmua, arejame Jesús.

#### Sacerdotevare jaboteipõeva ne Lázaro boarĩ jarũvaiyurõ

<sup>9</sup> Dinũmure Jesús Betania ãmicurĩmajinoi ñi cuede boro jápiarejaimada obedivũ judíovacavũ. Que baru Jesúre járadarejaima, aru Lázaro máre, Jesúi nacovaimũ mácuere yainore jarũvarĩ. <sup>10</sup> Lázaro máre boarĩ jarũvaiyurejaimada ina sacerdotevare jaboteipõeva.

<sup>11</sup> Náre jocarĩ nurejaima obedivũ judíovacavũ, Jesúre ju arãjivũ ñi nacovaiye báque boje Lázaro yainore jarũvarĩ. Que baru Lázaro máre boarĩ jarũvaiyurejaimada na.

#### Jesús Jerusaléi ñi ecoino

(Mt 21.1-11; Mr 11.1-11; Lc 19.28-40)

<sup>12</sup> Apejãravũ, Lázaroque Jesús ñi ãijãravũ bácarõ yóbocajãravũ, Jesús Jerusaléi ñi edaquiyede jápiarejaquemavũ na, Pascua torojũve teijãravure járadaivũ. <sup>13</sup> Diede jápiarĩ, yapoporũare burarĩ ñni, ñuja Jesújare copũ darejaima obedivũ põeva. “Jũmenijicure torojue bajadēni. Jũmenijicui mearo ðacaimũme ñi daroimũ mácu, maja judíova maje jabocu bacuyú”, arĩ coðoboborejaima ina judíova Jesúque ñuivũ.

<sup>14</sup> Põevare ùmaiäimacu, burro ämicucure eari, ùre tubari nurejame Jesús. Nópe teyu, yópe Jümenijicui yávaivede üi toivaicõjeiye báquepe, teyu barejame Jesús:

<sup>15</sup> Muja Jerusalén ämicuriimarocavu, jidubejarã muja. Jájara muje jabocu bacuyú dacuyure, burrojicurã tubari dacuyure, arí toivaicõjenejaquemavu Jümenijicu.

<sup>16</sup> Que teinore majibedecarã ñuja Jesúi bueimara. Ëbenita üi yaini, nacajari, aru muri nuriburu yóboi cavarõ mearo Jümenijicui curõ, arurejacarã ñuja. Dinumu maquinó “Jümenijicui toivaicõjeino mácarõpedeca Jesúre tequemavu maja, maje mearore jíyede ùre burrojicurã tubari dayure”, aräjivu barejacarã ñuja. <sup>17</sup> Ina põeva, Jesúque curivu bácapu üi orejaiye báquede Lázare üi etaquiepe ayu cûracobede jocarí apucu cojedeca, coyure cuivu barejaimada iye ne jáiye báquede. <sup>18</sup> Ne nópe coyuiye boje no Jestúi jádovaino mácarõre põeva ne ðari majibede, Jesúre copurådarejaima caivu ina obedivu põeva. <sup>19</sup> Que baru ina fariseova ne bajumia arejaimada:

—Coyurí oabevu maja. Majare jápiabema ina põeva. Quédata Jesúque yóvarãnuñama caivu, arejaimada na, ne bajumia yávaivu.

#### **Apevu Greciacavu Jesúre ne voino**

(Mt 10.38-39; 16.24-25; Mr 8.34-35; Lc 9.23-24; 17.33)

<sup>20</sup> Apevu judíova ämevu, Jümenijicure mearore jívaivu, ina obedivu põeva jêneboi Jümenijicure mearore jínanurejaimada Jerusalén ämicuriimarocita Pascua torojuve teinumure. <sup>21</sup> Na Felipe de borotenanurejaimada. Galilea ämicurijoborõcarõ imaro Betsaida ämicuriimarocacu barejame Felipe.

—Jesúque boroteiyuriduivubu ñuja, arejaimada Felipe.

<sup>22</sup> Andrés yebai nuri, coyurejameða Felipe ne borore. No yóboi, ina pucarã nuri, coyuræarejaimada Jesúre ina judíova ämevu ne borore.

<sup>23</sup> Yópe arí, coyurejame ñujare Jesús:

—Dijaravu ji ávairavu eavuvu. Caride jipacu Jümenijicu jáðovacuyume yure, üi daroimu mácure ùmure, meacu bajure. <sup>24</sup> Jáve coyuyubu mujare: Jauvu yure ji yaiquínore. Jëvari coyurí coyuiquijivu. Yópe cûináyabe oteiabede maje otebedu, quénora cûinápora mauteinomu no. Ëbenita iyabe oteiabede maje otedu, joborõ jívui cuede cáreja, yainope teni, píarí cûpururí nuivavu. Nopedeca ji yaidú, obedivu põeva mamaüme curivu bujarãjarama, ji yaiye boje. <sup>25</sup> Nai põecu üi baju jecucu baru, bíjacuyume ü. Ëbenita nai põecu jecubecu baru üi baju ijäravure, järavu cûiméjäravu baquinóre cuvacyume ü. <sup>26</sup> Äcu põecu yure memecaiyucu baru, yure üi ju aye jauvu ùre. Que baru yáque ji curõi cuvacyume ü. Aru äcu põecu yure memecaru, ùre pueðacyume jipacu, arejame Jesús.

#### **Jesús üi coyüino üi yaiquínore**

<sup>27</sup> Náre coyure nurejame Jesús:

—Caride urarõ chiõivu yu ji ümei. ¿Aipe ajeba yu jipacure? ¿Yure ñájino vaijãrõri no, ajeba yu jipacure? Apevu yu nópe. Ñájinore vaicýu darejacacu yu ijäravui, arejame Jesús ñujare, üi bueimarare.

<sup>28</sup> Ñujare nópe coyurí bujarí, arejame jípacure Jesús:

—Mu, jipacu, põevare jáðovajacu mi baju meacu bajure, arejame jípacure.

Dinunuma cavarō mearo Jūmenijicui curōre jocarī yávarī darorejavū: “Meavū mī que aino. Que đacacu javeta. Aru que đacuyumu yu cojedeca”, arejavū no yávarī daroino.

<sup>29</sup>Ina obedivū pōeva ñjaque curivū no bujinore jápiarejaima.

—Ōpo tuinomebu, arejaima nácavū.

—Que āmevū. Cūinácū ángele yávarī daroyubebu úre, arejaima apevū.

<sup>30</sup>Ūbenita Jesús arejame:

—No yávarī daroino yure boje āmevū. Quénora mujare bojetamu no yávarī daroino. <sup>31</sup>Caride ijāravucavure ne āmene jáđovari, coreóvare đacuyume Jūmenijicu caivū yure ju abevū ñájinajivure cūinájāravū. Caride ijāravucavū ne jabocure, ñai abujuvai jabocure, jaruvacuyume Jūmenijicu. <sup>32</sup>Ūbenita yu ne jocucurā pēvari jēori jāmúórajimū, yurecabu obedivū pōevare ju are đacuyū yure, arejame Jesús.

<sup>33</sup>Nópe arī coyuyū, aipe ārojae teni ũi yaiquínore coyuyū barejáme Jesús.

<sup>34</sup>Ūi que aiyede, yópe arejaima úre jápiaivū:

—Jūmenijicu ũi yávaiyede toivaicōjenejaquemavū, ñuje majinajiyeye ayū ũi daroquimure yaiβécū bacuyúre cainumua. ¿Aipe teni “Jūmenijicui daroimū mácu ũmure ne jocucurā pēvari jēori jāmúóimū macuyúmu yu”, ayurū mu? ¿Yécū páyurū mu? ¿Ŋamema Jūmenijicui daroimū mácu ũmure? arejaima Jesúsre.

<sup>35</sup>Náre yávarejame cojedeca Jesús:

—Ŋai cucunuiyucure jāravure, aviá ũi boiyede, cuiye jaavū úre. Que baru ñemié tuiyede, majibebi ári ũi nuínore. Quédeca quíjino baju cucuyumu yu mjaque pēoipōescupe, jáđovañū Jūmenijicui jāvene. Mujare majide đaivū Jūmenijicui dápiaiye jāvene ji bueiyeque. Que baru mja diede majibevū baru caride, ji cuede mje jēneboi cāreja, ji nariburu yóbore apa ñeminoi cuivape paivū barājáramu mja. <sup>36</sup>Que baru ji cūepe cāreja mje jēneboi, ji bueiyede ju ajarā mja. Yúcvū tenajaramu mja, ji bueiyede ju aivū baru, arejame náre Jesús.

Nópe ayū bācu, náre dupini nūrejame. <sup>37</sup>Pōeva ne jáiyede ure ne đarī majibede đayureca Jesús, úre ju abedejaima na.

### **Jesúre obedivū judíova ne ju abeno**

(Mr 4.12; Lc 8.10)

<sup>38</sup>Caiye iye vaidéjavū yópe ñai Jūmenijicui yávaiyede coyucaipōescu Isaías bācu “Yópe tequiyebe” arī, ũi toivaino mácarōpedeca.

Mu, ji jabocū, obebejīna baju ju adama ñuje yávaiyede. Jūmenijicu ũi paruéde jáđovaimi obebejīna bajure, arī toivaicōjenejaquemavū Jūmenijicu Isaías bācure.

<sup>39</sup>Que baru nácápūravū ju aivū buojabedejaima. Bedióva cojedeca Jūmenijicu, yópe arī, toivaicōjenejaquemavū Isaías bācure:

<sup>40</sup>Jári eabevure đaibi náre Jūmenijicu, ne jámenajiyeye ayū. Aru dápiaiī majibede đaibi náre, ne jápiarī eabenajiyeye ayū. Aru Jūmenijicu yópe arī, coyuiβi: “Nópe đaivū yu, ne chíori oatvabenajiyeye ayū ne đaiyede. Que baru náre meadabecuyumu”, arī toivaicōjenejaquemavū Isaías bācure Jūmenijicu.

<sup>41</sup>Nópe arejaquemavū Isaías bācu ũi jáiye báque boje Jesucristoi mearore Jūmenijicui jáđovaiye báquede nore aru ũi coyuiye báque boje úra.

<sup>42</sup> Ëbenita obedivũ pœva ne jabovacavũ Jesúre majini, jũ arejaima úre. Ëbenita fariseovare jidurĩ, “Jesúque nuivubu ñũja”, abedejaima ne jápiaiyede. Jipocamia “ ‘Jesúbe Jũmenijicui daroimũ mácu Cristo’, aivure maje cójijĩñamine jaetovarãjaramu ñũja, ne cójijibenajiyepe aivũ ñũjaque bedióva cojedeca”, arejaimada ina fariseova. Que baru fariseovare jidurivũ, bi arejaima na Jesúre jũ aivũ. <sup>43</sup> Jũmenijicui mearo jáiyede náre ubeni, pueno baju vorejaima pœva ne mearo jáiyede náre.

#### Pœva ne ñájinajino Jesús ùi yávaie boje

<sup>44</sup> Yópe arĩ, bujino yávarĩ darorejame Jesús:

—Ácu pœcu yure jũ ayũ baru, yure daroyũ bácu máre jũ aibi ù. <sup>45</sup> Aru quédecabu. Ácu pœcu yure jáñũ maru, yure daroyũ bácu máre jáimi ù. <sup>46</sup> Ijãravũ darejacacu yũ. Pœva ne majinajiyepe ayũ Jũmenijicure, yũ pœõũpe teyu buecudarejacacu náre. Yure que teyure jũ aivũ, ñeminoi ne mautebenajiyepe ayũ yópe Jũmenijicure majibevũpe, darejacacu yũ. <sup>47</sup> Ëbenita ácu pœcu ji coyuiyede jápiauyvacari jũ abedu, yũ úre ñáline ðabecubu ùi ámeina teiye boje caride. Pœvare ne ámeina teiye boje ñáline ðacuyũ dabedejacacu. Quénora pœva bíjajurorivure meadacudayũ darejacacu yũ. <sup>48</sup> Ácu pœcu yure ubecu baru aru ji coyuiyede máre jũ abecu baru, úrecabe jáve ñáicuyũ. Ëi jũ abe boje ji coyuiyede, ñáicuyũme buoiaquijãravũ baquinói. <sup>49</sup> Ji baju ji majiéque coyubevũ yũ. Quénora jipacu, yure daroyũ bácu, yure coyucójeimi ji coyuiye caiyede. Que baru pœva ñájinajarama, ne jũ abe boje ji coyuiyede. <sup>50</sup> Coreóvaivũ yũ iyede: Pœva yure jũ aivũ baru yópe jipacui ðaicójeiyepe náre, cuvarãjarama jãravũ cüiméjãravũ baquinóre. Que baru yópe jipacui coyucójeiyepe coyuyubu mujare, arejame Jesús.

#### Jesús ùi bueimarare ne cubobare ùi joaino

(Mt 10.24, 40; 20.28; Mr 9.37; 10.45; Lc 6.40; 9.48; 10.16; 22.27; Jn 15.20)

**13** <sup>1</sup> Pascua torojũve teijãravũ jipocacajãravũ barejãvũ. Coreóvarejaquemavũ Jesús dijãravũ eainore ùi nuquinore ijãravure jocarĩ, copaicuyũ jipacu yebai. Ina ijãravucavure ù jinare cainumua jecubi ù. Que teni ñujare jecurejaquemavũ ùi yaiyeta.

<sup>2</sup> Nainú baju ñũja ùi bueimaraque ãñũ marejáme Jesús. Javeta ñujacacu Judas, Simón Iscariotei mácu yópe arĩ, “Jesúre ùi mauvare jeni jíquijivũ yũ”, dápiare ðarejaquemavũ ñai abujuvai jabocu, ùi jeni jíquiyupe ayũ Jesúre ùi mauvare. <sup>3</sup> Jesús coreóvarejaquemavũ majepacu Jũmenijicure caiyede aru caivure purucuaicójeñũ mácu úre paruéque. Aru coreóvarejaquemavũ ùi baju Jũmenijicui daroimũ mácu aru copaicuyũ ùi yebai. <sup>4</sup> Que baru coreóvayũ, ñũje áiyedeca nacajari, ùi puenocacajede durĩ, epeni, tũreicajede ñni, jãrióri jëori buorejame. <sup>5</sup> Que teyu bácu oco doaibure yuarĩ buivárejame, ñũje cubobare joacuyũ. Ñũje cubobare joarĩ búrejame. Ñujacacu cünácuure joarĩburu yóboi, tũreicaje ùi buoicajeque tũrenejame. <sup>6</sup> Joarĩ tũreni ñujare coapa, Simón Pedrore eacunãrejame Jesús. Aru Pedro arejame úre:

—Mu, ji jabocu, ¿yure ji cubobare joacuyurũ mu? arejame.

<sup>7</sup> Jesús arejame:

—Ji cari ðaiyede coreóvabevũ mu. Ëbenita no yóboi coreóvacuyũmu, arejame.

<sup>8</sup> Pedro arejame Jesúre:

—Yüre ji cubobare ye joaicōjemevu mure, arejame.

Aru Jesús arejame ũre:

—Dinumu yure joaicōjemecu baru, yúcacu ãmecuyumu mu, arejame.

<sup>9</sup> Pedro arejame:

—Mu, ji jabocu, ji cuboba matuinora joarĩ dajocabejacu mu. Ji jipobure aru ji puruáre máre joajacu mu, arejame.

<sup>10</sup> Aru Jesús arejame ñujare:

—Caibaju joaimu mácure bedióva cojedeca caibaju joaiye jaubevu. Quénora cubobare joaiye jauvu, docucuru. Javeta caibaju joaimara mácavure paivutamu muja, Jūmenijicui ãrumeteiye báque boje muje ãmeina teiyede muje chĩori dápíarĩ, diede jaruvarĩ, ju aye báquede yure. Ũbenita mujacacu cūinácu caibaju joaimu mácupe ãmemi ũ, ũi chĩomeni jaruvaivyube boje ũi ãmeina teiyede, arejame ñujare Jesús.

<sup>11</sup> Ũre jēne ñacuyure coreóvarejaquemavu Jesús. Que baru “Mujacacu caibaju joaimu mácu ãmemi ũ”, arejame ũ.

<sup>12</sup> Que teni ñuje cubobare joarĩ buojarĩ, ũi puenocacajede bedióva cojedeca ĩni, dorejame Jesús. Dorĩ buojarĩ, ãivarā dobacudarĩ, yópe ñujare arĩ coyurejame:

—¿Ji cari ñaiye báquede, coreóvadarāru muja? <sup>13</sup> Yüre “bueipōecu” aru “ñuje jabocu” máre aivubu muja. Muje nópe aye meavu yure. Quédecabu yu. Mujare bueipōecubu. Aru muje jabocubu yu. <sup>14</sup> Yu muje jabocuvacari aru muje bueipōecuvacari yebacacupe muje cubobare joaivu yu. Que baru quédeca ñajarā muja. Apevu yure ju aipōeva ne cubobare joaiye jauvu mujare coapa. <sup>15</sup> Que ñaivu yu mujare jãdovacuyu aipe ñaiye jauvōre mujare. Que barureca ji ñaiyepedeca ñajarā muja mujevure. <sup>16</sup> Jãve coyuyubu mujare: Yebacacu cubebi ũi jabocure vainĩ tuyu. Aru daroimu cubebi ũre daroyure vainĩ tuyu máre. <sup>17</sup> Iye cari coyuiyede coreóvaivubu muja caride. Que baru nopedeca ñaivu baru, torojurājaramu muja.

<sup>18</sup> Ũbenita ji beoimara mácavure coreóvaivu yu. Que baru “Torojurājaramu”, ji aiyede muja caivure abevu yu. Yópe Jūmenijicui yáva iyede ũi toivaicōjeiye báquipedeca vaiquíye jauvu yure: “Ñai ãñu mácu yáque, yure boaiyubi”, arĩ toivaicōjenejaquemavu Jūmenijicu. <sup>19</sup> Iye vaiquíye jipocamia nópe coyuiyu mujare, muje ju arãjiyepa ayu jãvene “Jūmenijicui mácu yu” ji aino mácarōre. Ji coyuiño mácarōpe vainĩburu yóboi, coreóvarājaramu muja. <sup>20</sup> Jãve coyuyubu mujare: Ácu pōecu ji jaroimarare me jacopuyu baru, yure máre me jacopuibi ũ. Ácu pōecu yure me jacopuyu baru, yure daroyu bácu máre me jacopuibi ũ.

Que arĩ, coyurejame Jesús ñuja ũi bueimarare.

**Jesús ũi coyuiño Judas ũi jēni jíquinore ũi mauvare**

(Mt 26.20-25; Mr 14.17-21; Lc 22.21-23)

<sup>21</sup> Nópe arĩ coyuyu bácu urarō chĩorejame Jesús ũi ũmei. Chĩori, ñujare yópe yávarĩ darorejame cojedeca ye yavebecuva:

—Jãve coyuyubu mujare: Cūinácu mujacacu yure ji mauvare jēni jícuyme ũ, arejame Jesús.

<sup>22</sup> Ũi que aiyede ñuje bajumia jãrejacarā ñuja, cuezumaivu. Ácu ñujacacu ũi aimure majibedejacarā ñuja. <sup>23</sup> Cūinácu ñujacacu pare Jesús ũi jecumu

Jesús yebai ñi tucavai dobarejacacu yu. <sup>24</sup>Yure ñi puru jabióvarĩ, jēniari jáicōjenejame Simón Pedro:

—“¿Ácuba mure jēni jícuyu?” arĩ, Jesúre jēniari jájacu mu, arejame yure Pedro. Ñi puruque nópe arejame.

<sup>25</sup>Nópe dayure jáñu, Jesúre pñeno cađajē nuri, jēniari járejacacu yu yavenijiena:

—Mu, ji jabocu, ¿ácuba ñ, mure jēni jícuyu? arejacacu yu.

<sup>26</sup>Ji nópe arura, ju arejame Jesús:

—Ji páujevede jórĩ, ji jímũ, ñ macuyúme yure jēni jíyu ji mauvare, arejame Jesús.

Que arĩ, páure cōpavari ĩni, jórĩ, Judare, Simón Iscariotei mácre, jídejame. <sup>27</sup>Dinũmĩareca Judas diede ĩñva, cūiná Satanás daicōjeni búrejaquemavu ĩre. Aru ĩre arejame Jesús:

—Maumena mi daiyuede dacunujacu mu, arejame Judare Jesús.

<sup>28</sup>Ūbenita ñña náque dobarivu tuoiva yebai aipe teni Jesús ñi que ainore Judare coreóvabedecarã cãreja. <sup>29</sup>Judas ñi cuae boje ññe tãuturare, ññacavu, “Ññe ārariyede torojave teinũmu bojedaicōjeñũme Jesús Judare”, arĩ dápiarejaquemavu. Aru apevu ññacavu, “Cũve cuvabevure tãuturare jícunũicōjeñũme Jesús ĩre”, arĩ dápiarejaquemavu. <sup>30</sup>Iye páure ĩñu mácu, cūiná etarĩ nurejame Judas. Ñami marejávũ ñi etarĩ nuiyede.

### **Jesús ñi daicōjeino yóbocarō**

(Jn 7.34; 15.12-17; 1 Jn 2.7; 3.23; 2 Jn 5)

<sup>31</sup>Judas ñi etarĩburu yóboi, ññare yópe arĩ, yávorejame Jesús:

—Caride pōeva járajivabu Jũmenijicui daroimu mácu ñmũpe meacu bajure. Caride yu, Jũmenijicui daroimu mácu ñmũpe, pōevare járe daquijivu Jũmenijicu meacu bajure. <sup>32</sup>Jũmenijicui daroimu mácu ñmũpe ji jáđovaru Jũmenijicu meacu bajure, Jũmenijicuvacari pōevare jáđovacuyũme ñi daroimu mácu meacu bajure. Aru maumejeneca que dacuyũme Jũmenijicu.

<sup>33</sup>Muja, jímajinape paivu, majióvarō bajura cuscuyũmu mujaque. Yure vorājaramu muja. Ūbenita yópe ji coyũino mácarōpe maje jabovare, mujare máre coyuyubu yu: Ji nuquinore nuiye majibevu muja. <sup>34</sup>Caride daicōjeino yóbocarōre daicōjequijivu yu: Muje bajumia űjarã muja yópe ji űepedeca mujare. Muje bajumia jecujarã muja. <sup>35</sup>Que daivure muje bajumia űrivure jáivu, majinajarama caivu ji bueimara bajure mujare, arejame ññare Jesús.

### **Jesús ñi coyũino Pedrorre ñi “Jesúre yu coreóvabevu” aquinore**

(Mt 26.31-35; Mr 14.27-31; Lc 22.31-34)

<sup>36</sup>Jesús que ayure, yópe arejame Simón Pedro:

—Mu, ji jabocu, ¿ĩri nuñũmu mu? arejame.

Jesús arejame:

—Ji nuquinore caride nuri buojabevu mu. Ūbenita ji nuriburu yóboi, mu máre nucuyũmu, arejame.

<sup>37</sup>Pedro arejame:

—Mu, ji jabocu, ¿aipe teni caride múque nuri buojabedi yu? Jaũru, mure cađateni, yaiquĩjivu yu, arejame.

<sup>38</sup>Aru Jesús arejame Pedrorre:

—¿“Mure boje yaiqujivü yu”, ayurü mü? Jáve coyuyubu mure: “Jesúre yu coreóvabevü” asuyümu mü cari ñami, cáyu üi órejaquiye jipocai. Aru yóbesue nóre asuyümu mü, arejame Pedrore Jesús.

**Jesús pöevare üi eare ñainore Jümenijicu yebai**

(Mt 7.7-11; 11.27; Lc 11.9-13; Jn 1.18; 6.46; 15.7, 16;

16.23-24; Hch 4.12; 1 Jn 3.21-22; 5.14-15)

**14** <sup>1</sup>Que ayu bácu, ñujare yópe coyurejame Jesús:

—Chíomejara müja. Jümenijicure ju ajarä müja. Üre ju arí, yure máre ju ajarä müja. <sup>2</sup>Jipacüi curöi tucubua ure cuvü. Que ámenu, yópe arí mujare coyubejebu yu. Nore müje curäjiyede meadacacüncüyümu yu. <sup>3</sup>Nore nuri, meadaríburu yóboi, copaidacuyümu yu cojedeca, mujare ñi nüvacüdacuyü, müje curäjiyepe ayu yúque. <sup>4</sup>Ji nüquinore majivü müja, yópe pöeva ne majiépe ma nuimare, arejame Jesús, ñujare coyuyü.

<sup>5</sup>Tomás arejame Jesúre:

—Mü, ji jabocu, mi nüquinore ye majibevü ñuja. ¿Aipe ayurü mü, “Ji nüquinore majivü müja” ayu? arejame.

<sup>6</sup>Jesús arejame:

—Yurecabu pöevare eare ñayü Jümenijicu yebai yópe ma nüinope cavarö mearöi. Yurecabu pöevare majide ñayü Jümenijicüi dápiaye jávene aru cure ñayü mamaümeque máre. Name eabenama jipacu yebare, ji nüvamenü náre. <sup>7</sup>Müja yure jáve coreóvaivu baru, jipacure máre coreóvajebu müja. Caride jáve üre coreóvaivubu müja cainümu. Aru üre jádavü müja máre, arí coyurejame ñujare Jesús.

<sup>8</sup>Üi que aiyede, Felipe arejame Jesúre:

—Mü, ji jabocu, majepacure jádovajacu mü. Qué Nora meaquiye bu ñujare, arejame ü.

<sup>9</sup>Üre ju ayu arejame Jesús:

—Mü, Felipe, ¿que joede müjaque ji cuedeca, yure coreóvabecurü cáreja? Ácu pöecu jáñu yure, jáimi jipacure máre. Que baru, ¿aipe teni “Majepacure jádovajacu”, ayurü mü yure? <sup>10</sup>Yu cuvü jipacüque. Aru jipacu cubi yúque cüinávure. ¿Iye ji coyüiyede, ju ayurü mü? Iye mujare ji coyüiye ji bajuma ji dápiaino ánevü. Qué Nora jipacurecabe, ñai cücü yúque cainümu, yure coyure ñayü yópe üi uröpe. Aru ji ñaiyede máre ji bajuma ñayü ánevü. Qué Nora jipacurecabe yure ñaicöjeñü. <sup>11</sup>Ji coyüino mácaröre, “Cuvü yu jipacüque aru jipacu cubi yúque cüinávure”, ju ajarä müja. Übenita ju abevü baru ji coyüino mácaröre, qué Nora ju ajarä yure ji ñaiye báque boje. <sup>12</sup>Jáve coyuyubu mujare: Ácu pöecu yure ju ayu, ji ñaiye báquepe paiyede ñacuyüme ü. Aru ape paiye me püeno paruéde ñacuyüme, ji nüquiye boje jipacu yebai. <sup>13</sup>Caiye müje jëniayede yure ji ámiái ñacacuyümu. Yópe müje jëniayepedeca ñacacuyümu yu, jádovacuyü jipacu meacu bajure. <sup>14</sup>Áde müje jëniarajiyede yure ji ámiái, ji paruéque, mujare ñacacuyümu yu, arejame Jesús.

**Jesús “Jipacu Espíritu Santore darocuyüme mujare” arí, üi coyüino**

<sup>15</sup>Ñujare coyure nürejame Jesús:

—Müja urivü baru yure, caiye ji ñaicöjeiyepe ñaräjaramu müja. <sup>16</sup>Yurecabu jipacure jëniacuyü mujare boje, üi daroquiyepe ayu apescu caáteipöecure.

Ë cainumua cuscuyume mjaque, jipacui daroquimu. <sup>17</sup>Ërecabe Jümenijicui Espiritu pöevare coreóvare dacuyü Jümenijicui dápaiye jävene. Ijāravucavü Jümenijicure ju abevü ére jacopuivü buojabenama, ne járī eabe boje üi daíyede aru ne coreóvayie majibe boje aipe ārojacure ére. Ëbenita mjaçapūravü coreóvarājaramu aipe ārojacure ére, üi mautequie boje mjaque. Mjaque curī, dajocabescuyume mjure cainumua. <sup>18</sup>Tēumarape dabecubu yu mjure. Mjure jocarī nūmecubu yu. Bediōva cojedeca copaidacuyumu, cuscuyü mjaque.

<sup>19</sup>Quíjino baju yure jámenajarama ijāravucavü yure ju abevü. Ëbenita mjaçapūravü yure járāaramu. Bediōva cojedeca apuscuyumu yu. Que baru mja máre cainumua apurivü barājāramu mja mamaūmeque. <sup>20</sup>Ānijāravü, maje copurājijāravü baquinóre, jipacūque ji cuede majinajaramu mja, aru yúque mje cuede, aru mjaque ji cuede máre. Maja cūinávure curājaramu maja. <sup>21</sup>Ācu pōescu ji daicōjeiye caiyede ju arī ðayü, érecabe yure uscü. Aru ñai yure uscü, érecabe jipacui uquimu. Yu máre ére, yure ucure, uscuyumu. Aru ji bajure jádovacuyumu ére, arejame ñjare Jesús.

<sup>22</sup>Ëi que arīburu yóboi, cūinácü ñjacadü, üi āmiá Judas, jēniari járējame Jesúre. (Judas Iscariote āmenejame. Apecü Judas barejáme ü.) Yópe arī, jēniari járējame Jesúre:

—Mu, ji jabocu, çaipe ðarī ñja, mure urivü, mi bajure jádovacuyurü, ïbenita apevure, ijāravucavü mure ju abevure, mi bajure jádovamecuyurü mü? arejame Judas.

<sup>23</sup>Jesús, yópe arī, coyurejame:

—Ācu pōescu yure uscü, ji coyuiyede ju ascuyume. Érecabe jipacui uquimu. Yu aru jipacumaque üi yebai nuri, úque curājaramu ñja. <sup>24</sup>Ācu pōescu yure ïbecü, ji coyuiyede ju abebi. Ji coyuiye ji bajuma ji dápaiño āmevü. Quénora jipacu, yure daroyü bácu, jiede coyuyutamu yu. <sup>25</sup>Que arī, coyuiyu yu mjure, ji cuede cāreja mjaque. <sup>26</sup>Ëbenita mjaque ji cubenūmure ñai Espiritu Santore, cadateipōescure, darocuyume mjure jipacu ji paruéque. Érecabe caiyede mjure buescuyü. Aru ji coyuiye báque caiyede mjure ārure ðacuyume ü.

<sup>27</sup>Mjure, meaūme cārījimeūme curivure, epecuyumu yu. Ji cārījimeūmene mjure jíquijivü. Ijāravucavü mjure ji jýepe paiyede jíye majibema. Que baru cārījimevüva chíomejara aru jidubejarā mja, ayubu yu. <sup>28</sup>Mjure ji coyuiño mácarōre, “Yu nucuyumu. Ëbenita mje yebai copaidacuyumu yu” ainore, jápiadavü mja. Yure urivü baru, ji nuquiyede jipacu yebai torojuebu mja. Jipacu ji pūeno parucube. Que baru üi yebai nucuyumu yu. Aru torojue javü mjure. <sup>29</sup>Nópe coyuiyu mjure caride, iye vaiquíye jipocamia, mje coreóvarājiiyepē ayü jävene ji coyuiño mácarōre. <sup>30</sup>Caride ijāravucavü ne jabocu, ñai abujuvai jabocu, ðaibi. Que baru urarō baju mjure coyubequijivü yu. É yure üi daicōjeiye parué cuvabecureca nucuyumu yu. <sup>31</sup>Vaiquíyebu yure yópe ji aiye báquepedeca, ijāravucavü ne coreóvarājiiyepē ayü ji ñede jipacure. Que baru caiye jipacui daicōjeiyede ðaivü yu. Járica, etarevü, arejame ñjare Jesús.

**Jesús “Oteiyaimu yobedope páyubu” arī üi coyuiño**

(Jn 13.34; 15.17; 1 Jn 3.23; 2 Jn 5)

**15** <sup>1</sup>Ñja üi buemarare, yópe arī, coyure ñurejame Jesús:

—Yurecabu oteiyaimu yobedope páyü. Aru jipacurecabe dimure coreipōescu, oteipōescureca páyü. <sup>2</sup>Aru dimu cavajībuape paivutamu

mujá. Āmecavabua, jēmecavabuare burarī jaruvaibi jipacu. Meacavabua, jēicavabuare majié burarī, meadaibi jipacu, oteipōecu ūi daiyepe dayu. Que teni jēicavabuare urarō jēne daibi jipacu. <sup>3</sup>Muje ju aiye boje ji coyuiyede, javeta mujare meadacacu yu. Que baru jipacu ūi meadaimaramu mujá. <sup>4</sup>Yúque cūjarā mujá. Aru yu mujaque cūcuyumu. Cūinávūpe curājaramu maja. Cavabu cubedu dimure, cainidua jēmevu. Quédecabu mujare. Yúque cubevu baru, Jūmenijicui urōpe dabename. Yúque mautebevū baru, mearore, yópe ji memeiyepe, dabejebu mujá. Pōeva mearore dabevubu, yópe cavabua jēidua cubepe.

<sup>5</sup>Oteiyaimu yobedope páyubu yu. Aru dimu cavabuape paivubu mujá. Ácu pōecu cūcu baru yúque aru ji cūru máre úque cūinávūpe, úrecabe urarō mearore dacuyu yópe Jūmenijicui urōpe. Ūbenita yúque cubecu baru, Jūmenijicui urōpe daiye majibebi ū. <sup>6</sup>Yúque mautebecu, oteipōecu ūi burarī jaruvaicavabūpe paicavabube ū. Dicavabu yaicavabu jaruvaquicavabure apescu jevaiyame meadayu. Dicavabure jevarī, pecatoro đarī, nuvaiyame ū nore jocarī, juarī jaruvacuñu.

<sup>7</sup>Muja yure dajocabevu baru, aru ji coyuiyede ju are nuivu baru, áde muje jēniaiyede muje urōpe cūvarājaramu mujá. <sup>8</sup>Muje urarō mearo daiyede jāve ji bueimara đarī jádovaivubu mujá. Pōeva mujare nópe đaivure jáivu, jipacure mearore jínajarama na. <sup>9</sup>Yure jipacui űepedeca nu yu mujare. Que baru ji űmarape mautejarā mujá. <sup>10</sup>Ji đaicōjeiye caiyede ju arī đaivu baru, ji űmara mautenajaramu mujá. Nopedeca jipacui đaicōjeiye caiyede ju arī dayu, ūi űnu mauteivu yu.

<sup>11</sup>Que arī, coyuivu yu mujare, muje torojurājiyepe ayu ji torojuepedeca, aru muje buojarājiyepe ayu torojurivu muje űme jaubevūva. <sup>12</sup>Ji đaicōjeino mujare yópe ainotamu: Muje bajumia űjarā muja yópe mujare ji űepedeca. <sup>13</sup>Pōecu ūi yaidú ūi yóvaimarare boje, ape ūi daiye cubevu, ūi jádovaquiyepe náre űcure. <sup>14</sup>Ji đaicōjeiyede ju arī đaivu baru, ji űmaramu mujá. <sup>15</sup>Caride “yure memecaivu” abecubu mujare. Quéhora “ji yóvaimara” acuyumu mujare. Pōecure memecaivu ne jabocuí dápíainore majibema na. Ūbenita pōecuí yóvaimara ūi dápíainore majima. Aru yure jipacui jápiadovaiye báquede mujare coyuiye jebeivu yu. <sup>16</sup>Yure vobeteavū mujá. Yu batecácu mujare vorī beoyu. Jipacui urōpe muje đarājiyepe ayu, mujare beorī epecacu. Ji epeimaramu mujá, urarō mearore đarājivu yópe Jūmenijicui urōpe. Aru muje đarājiye bíjabequiyebe. Quéhora mautequiyebe. Que baru áde muje jēniaiyede jipacure ji ámiái, đacacuyame ū yópe muje jēniaiyepedeca. <sup>17</sup>Que baru yópe arī, coyuvubu yu mujare cojedeca: Muje bajumia űjarā muja, arī coyurejame Jesús, ñujare bueyu.

**Jesús ū jinaque ijāravucavu ne űbemara**

(Mt 10.24; Lc 6.40; Jn 13.16; 17.14-18)

<sup>18</sup>Yópe arī, coyure nurejame Jesús:

—Ijāravucavu Jūmenijicure ju abevu mujare űbenajarama. Ūbenita coreóvajarā iyede: Mujare ne űbenajiye jipocai, yure űbeteima na. <sup>19</sup>Muja ijāravucavu baju baru, mujare űjebu ijāravucavu Jūmenijicure ju abevu, yópe ne űepedeca ne bajumia. Ūbenita yúvacari mujare beorī epecacu jivu barājiyepe ayu ijāravucavure jocarī. Que baru náque curivuvacari, nácavu

āmevū mūja. Que baru mūjare ūbema na. <sup>20</sup> Ji coyūvarede me ārūjara mūja. Yebacacū cubebi ūi jabocure vainī tūyū. Apevū nājine đaima yure. Que baru mūjare märe nājine đarājarama. Ūbenita apēvū ji coyūiyede ju aima. Que baru mūjare märe ju arājarama. <sup>21</sup> Yūcavūbu mūja. Aru ina ijāravūcavū yure daroyū bācure majibema na. Que baru mūjare märe nājine đarājarama na.

<sup>22</sup> 'Näre ji coyūcudabedu, boropatebejebu ne āmeina teiye boje. Ūbenita ji coyūcudaiye bāque boje ijāravūcavūre, ye bojedabemarava cūma na ne āmeina teiyede. <sup>23</sup> Ācū pōecu ūbecū yure, jipacure märe ūbebi ū. <sup>24</sup> Pōeva ne đarī majibe bajure jādovacacū yū yōcavūre. Apecū cubebi ji đaiyepe paiyede đarī majicū. Ji que đabedu ne jāiyede, boropatebejebu ne āmeina teiye boje. Ūbenita ji nōpe đaiyede jādama na. Aru jāivūvacari, yure ūbenī, jipacure märe ūbema na. <sup>25</sup> Caiye iye vaivū yōpe Jūmenijicūi toivaicōjeiye bāquepedeca ūi yāvaiyede: "Jaurabeda yure ūbema", arī toivaicōjenejaquemavū Jūmenijicū.

<sup>26</sup> Ūbenita nāi Espiritu Santo, mūjare cadateipōecu, dacūyume mūje yebai. Ūrecabe pōevare coreóvare đacūyū Jūmenijicūi dāpaiye jāvene. Ūre jipacūi cūrōre jocarī darocūyumu yū mūje yebai. Ūi edarīburi yóboi, ūrecabe coyūcūyū ji borore ūi jāiye bāque boje. <sup>27</sup> Aru mūja mamarūmure ji bueni būinūmure yūque cūteavū mūja. Pū caride märe carivūbu yūque. Que baru mūja märe coyurājivūbu ji borore mūje jāiye bāque boje, arejame Jesús.

**16** <sup>1</sup> Yōpe arī, coyure nūrejame Jesús:

—Nōpe coyūivū yū mūjare, mūje dajocabenajiyēpe ayū mūje ju aiyede yure. <sup>2</sup> Judíovai jabova jaetovaicōjenajarama mūjare ne cōjjiñamiare jocarī. Apejāravūa daquijāravūa baquiyé pōeva ne boarī jarūvarājiyede mūjare, "Nōpe đarī Jūmenijicure memecaivūbu maja", arī dāpiarājarama ina mūjare boarājivū. <sup>3</sup> Que đarājarama, yure aru jipacure märe ne coreóvabe boje. <sup>4</sup> Nōpe coyūivū yū mūjare, mūje ārurajiyēpe ayū iye ji coyūiye báquede ānijāravūa, ne nōpe đarājijāravūa baquiyéde mūjare, arī coyurejame Jesús.

#### Jesús ūi coyūino Espiritu Santoi đaquinore

Yōpe arī, coyure nūrejame Jesús:

—Ji bueni būinūmure caiye iye ji cari coyūiyede mūjare coyūbetecacū yū, ji cūe boje mūjaque. <sup>5</sup> Ūbenita caride yure daroyū bācū yebai nūcūyumu yū. Nūcūyureca mūjacacū cubebi, "¿Ārī nūcūyūrū mū?" arī jēniari jāñū yure. <sup>6</sup> Quénora ūrarō chíoivūbu mūja mūje ūmei ji nōpe arī coyūiye boje. <sup>7</sup> Ūbenita yūcapūravū mūjare yāvaiyede jāvene coyūyūbu yū. Ji nūquino meaquiye bu mūjare. Ji nūmenu, mūjare cadateyū bacūyū dabejebu. Ūbenita yū nūñ mācū darocūyumu ūre mūjare.

<sup>8</sup> 'Dacūyū edayū bācū ijāravūcavū boropateivūre ne āmeina teiye boje coreóvare đacūyume. Yure boropatebecure Jūmenijicūi jāinore coreóvare đacūyume. Jūmenijicū nājine đacūyure pōevare ne āmeina teiye boje märe coreóvare đacūyume ū, ji daroquimū. <sup>9</sup> Näre coreóvare đacūyume āmeina teivū boropateivūre ne ju abe boje yure. <sup>10</sup> Näre coreóvare đacūyume yure boropatebecure Jūmenijicūi jāinore, ji nūquiye boje jipacū yebai. Que baru yure jāmenajaramu mūja. <sup>11</sup> Aru näre coreóvare đacūyume Jūmenijicū nājine đacūyure pōevare ne āmeina teiye boje, Jūmenijicūi "Nājicūyumu mū", ūi jave coyūiye bāque boje ijāravūcavū ne jabocure, nāi abujuvai jabocure.

<sup>12</sup> 'Urarō mujare ji coyujuroe cuvavu. Ubenita cūiná caiyede jápaiye majibevubu muja. <sup>13</sup> Ubenita ñai Espíritu Santo dacuyume, pœvare coreóvare đacuyu Jūmenijicui yávaiyede jávene. Úrecabe coreóvare đacuyu mujare caiye Jūmenijicui yávaiyede jávene. Aru iye vaiquíyede coyucuyume mujare. Ũi baju majiéque coyubecube. <sup>14</sup> Ji majié matuiyede jápaiyu bácũ, diede mujare coreóvare đacuyume. Que baru yure mearore jícuyume. <sup>15</sup> Caiye jipacui majiéde majivu yũ. Que baru "Ñai Espíritu Santo ji majié matuiyede mujare coreóvare đacuyume", avũ yũ mujare, arejame Jesús.

**Jesús bueimara ne chioriburu yóboi ne torojuede**

(Mt 7.7-11; Stg 1.5-6)

<sup>16</sup> Yópe arĩ, coyure nurejame Jesús:

— Quíjino baju yure jámenajaramu muja. Ubenita apeno quíjino baju yójiŋboi bedióva cojedeca yure járajaramu muja, arejame Jesús ñuŋa ũi bueimarare.

<sup>17</sup> Ũi que aiyede, ñujacavu yópe arĩ, jēniari járejaima ne baju:

— ¿Aipe ayũ bárica, "Quíjino baju yure jámenajaramu muja. Ubenita apeno quíjino baju yójiŋboi bedióva cojedeca yure járajaramu muja" ayũ? ¿Aru, "Jipacu yebai nũcuyumu yũ" ayũ, aipe ayũba ũ? <sup>18</sup> ¿Carijieneca ũi ayeque aipe ayũba Jesús? "Maiyójavu majare. Majino ámevu ũi que coyũino", arejaima ñujacavu ne bajumia boroteivũ.

<sup>19</sup> Ñuŋe jēniari jáiyede úre coreóvayu, ñujare yópe arĩ, coyurejame Jesús:

— ¿Ji aiyede, "Quíjino baju yure jámenajaramu muja. Ubenita apeno quíjino yójiŋboi bedióva cojedeca yure járajaramu muja" jēniari jáivurũ muja, muŋe bajumia boroteivũ? <sup>20</sup> Jáve coyuyubu mujare: Mujacapūravu urarō chiori orājaramu. Ubenita ijāravucavu Jūmenijicure ju abevucapūravu torojurājarama na. Ubenita muja chōioivũvacari, no yóboi chōioivũ bācavu torojurājaramu muja. <sup>21</sup> Maje nomiva juedocuvativũ ámeno ñájiñama na. Ijiébu náre. Ubenita juedocuvativũ yóboi, ijino mácaróre ārūmenama juedocuvativũ bācavu. Némajicure jári torojurivũ, no mácarō ámeno ne ñájiye báquede ārūmenama na. <sup>22</sup> Nópebu mujare. Caride urarō ñájinajaramu. Ubenita mujare jácudacuyumu cojedeca. Dinumu maquinóre urarō torojurājaramu muja muŋe ũmei. Aru mujare ñame chōire đaivu buojabenama cainũma.

<sup>23</sup> 'Dinumu maquinóre quénora yure ye apejīene jēniari jámenajaramu muja. Jáve coyuyubu mujare: Áde muŋe jēniarajiyede jipacure ji ámiái, đacacuyume yópe muŋe jēniayepedeca úre. <sup>24</sup> Javede pu carita ye apejīene jēniamevu muja cāreja ji ámiái. Jūmenijicure jēniajara cari. Muŋe jēniaru, muŋe jēniayepedeca đacacuyume Jūmenijicu, muŋe buojarājīyepere ayũ torojurivũ muŋe ũmei jaubevũva, arejame Jesús ñujare.

**Jesús ũi vainĩ tuino ijāravuque ámene**

(Ro 8.37; 2 Co 2.14; Ap 3.21; 5.5)

<sup>25</sup> Yópe arĩ, coyure nurejame Jesús:

— Nópe coyũivũ yũ mujare apejīene jēvari maiyójepeda. Ubenita apejārvuŋa daquijārvuŋa baquiyéde apejīene jēvari coyubecuyumu mujare cojedeca. Quénora mujare coyucuyumu nuriéne jipacui borore yavebecũva.

<sup>26</sup> Dinumtu maquinóre mujavacari úre jëniarajaramu ji ámiái, ji paruéque. Que baru, “Jipacure jëniacacuyumu mujare”, abevu yu. <sup>27</sup> Jipacuvacari ubi mujare. Mujare ubi, muje ue boje yure. Mujare ubi, muje ju aiye boje yure, úi daroimu mácure. Que baru muje baju jëniayede úre jápiacuyume jipacu. <sup>28</sup> Jipacunque cücü bácu, úi curóre jocarí etarejacacu, émeni dacuyu yore ijáravui. Aru caride yore cücü, ijáravure jocarí dajocacuyumu, cojedeca núcuyu jipacu yebai, arejame Jesús.

<sup>29</sup> Dinumure ñuja úi bueimara arejacañ Jesúsre:

—Caride me coyuivu mu ñujare, apejlene jëvamecuvu. <sup>30</sup> Caride mu caiyede coreóvayure majivu ñuja. Mure jëniari jáiye ye jaubevu. Que baru mure, Jümenijicui daroimu mácu bajure, ju aivubu ñuja, arejacañ ñuja Jesúsre.

<sup>31</sup> Ñujare arejame Jesús:

—¿Jáve “Ju aivubu mure”, aivurü muja? <sup>32</sup> Járijide apa. Ánijáravu daquijáravu baquinó jave eare nuinotamu no. Carijieneca yure jocarí nurajaramu muja muje curóai coapa. Cüinácuvu mautecuyumu yu. Ubenita jipacu yúque cubi cainumua. Que baru cüinácu bajuva ámevu yu. <sup>33</sup> Caiye iyede mujare coyuivu yu, muje cãrijimenajiyeye ayu, muje cue boje yúque cüinávure. Mujare ñájine darájarama ijáravucavu Jümenijicure ju abevu. Ubenita jidubejará muja. Ijáravunque ámene jave vainí tuivu yu. Que baru ju ajará yure, arejame ñujare Jesús.

### Jesús úi jëniaino úi bueimarare Jümenijicunque

(Jn 13.18)

**17** <sup>1</sup> Que aríburu yóboi cavaróí jáñu, yópe arejame Jümenijicure Jesús. —Mu, jipacu, ji meminumtu jave caivu yure. Pöevare yure mímacu meacu bajure jádovajacu mu, ji jádovaquiyeye ayu mure meacu bajure. <sup>2</sup> Yure jaboteicójeivu mu caivu pöevare, ji cuvare daquiyeye ayu járavu cüiméjáravu baquinóre caivu ina mi ju are ñaimarare yure. <sup>3</sup> Múvacari Jümenijicu cüinácuvu jávetamu mu. Aru yu, Jesucristo, mi daroimu mácvu yu. Ina majare coreóvaivu, nárecabu cvarájivu járavu cüiméjáravu baquinóre, ne coreóvaiye boje majare. <sup>4</sup> Iye mi ñaicójeiye báquede yure ñarí buojaivu yu. Que baru mure meacu bajure jádovaiyu yu yore ijáravui. <sup>5</sup> Mamarumure maje caiyede cuedarãjiye jipocai, meacu baju barejacácu mi yebare. Caride bedióva yure meacu bajure epejacu mi yebai cojedeca, yópe ji mamarumure cue báquepedeca, arejame Jesús.

<sup>6</sup> Yópe arí, coyure nurejame Jesús jipacure:

—Ijáravucavu mure ju abevure jaruvári, beorí, ñni, coatede dávü mu ina yure ju arãjivure. Mamarumurata mívu bãrãjivu barejáima na. Aru náre yure ju are ñaivu mu. Nárecabu mure ji coyumara, majinajivu aipe ñrojacure mure. Aru mi yávaiyede jápiarí ju adama na. <sup>7</sup> Caride caiye iye mi majié cuvare ñaiyede yure jáve míyede coreóvaivubu na. <sup>8</sup> Iye mi coyucójevarede yure, náre coyuivu yu. Aru na ju adama diede. Yure, mi daroimu mácure, jáve coreóvaivubu. Aru mu yure daroyu bácvu ju adama.

<sup>9</sup> Ijáravucavu mure ju abevure jëniacabevu yu múque. Quénora ina mi yure ju are ñaimarare jëniacaivu yu múque, ne mívu bae boje. <sup>10</sup> Caivu yúcvu mívubu na. Aru caivu múcavu jívubu na. Aru yu meacu bajure jádovadama na.

<sup>11</sup>Yñ mautebecubu ijāravure caride. Quénora maumejieneca dacuyumu mi yebai, cuscuy múque. Ubenita nácapūravu mautenajivubu ijāravure. Mñ, jipacu bajutamu mñ. Que baru ina yore mautenajivure corejacu mñ mi paruéque, iye parué mi cuvare ðaiye báqueque yure. Corejacu náre, cūinávupeda ne tenajiyeye ayu yópe majapedeca. <sup>12</sup>Yore cuscú baju coreivu yu náre mi paruéque, iye parué mi cuvare ðaiyeque yure. Náre meadaivu yu. Aru bñjabema na. Cūinácú quécura, ñai bñjacuy ñi ámeina teiye boje, yure bñjaibi ñ, vaiquíyepe ayu yópe mi yávaiyede mi toivaicōjeiye báquepedeca.

<sup>13</sup>Caride mi yebai dacuyumu yu. Nópe coyuvu yu ji cuede cāreja ijāravure ne jápiainoi, ne buōjarājiyepe ayu torojurivu ne ũmei jaubevūva, yópe ji torojuepedeca ji ũmei. <sup>14</sup>Iye mi coyucōjevarede yure, náre coyuvu yu. Na yúpe dāpiaivubu carí. Yópe ijāravucavu mure ju abevu ne dāpiaiyeye dāpiabema na. Que baru náre ubema ijāravucavu. <sup>15</sup>“Ina mi yure ju are ðaimarare ñi nuvajacu ijāravure jocarí”, arí jēniamevu yu mure. Quénora “Náre jári corejacu me, abujuvai jabocu ñi ámeina ðare ðabequiyeye ayu náre”, arí jēniaivu yu mure. <sup>16</sup>Yu dāpiabevu yópe ijāravucavu mure ju abevu ne dāpiaiyeye. Quédeca ina mi yure ju are ðaimara máre ijāravucavu mure ju abevu ne dāpiaiyeye dāpiabema na. <sup>17</sup>Ijāravuque ámene jaruvarí náre coavarí, epejacu múcavure, ne memecarājiyepe ayu mure. Que ðajacu mi yávaiyeque. Jāvetamu mi yávaiye. <sup>18</sup>Mñ darorejavū yure, ji buequiyeye ayu ijāravucavure. Nopedeca yu máre jarovū náre, ne buenajiyeye ayu ijāravucavure. <sup>19</sup>Ji baju epeivu yu, memecacuy mure yópe mi urōpe. Que ðaivu náre boje, na máre ne epenajiyeye ayu ne baju, memecarājivu mure yópe mi urōpe. Que ðarājivubu, ne majié boje jāvene mi yávaiyede.

<sup>20</sup>Ina mi yure ju are ðaimara, ji bueimara, mure jēniacaivu yu. Aru apevure máre, yure ju aivu bárājivure, ji bueimara ne bueiye boje náre, jēniacaivu yu mure. <sup>21</sup>Mure jēniaivu yu, ne curājiyepe ayu cūinávure. Mñ cuvū yúque aru yu cuvū múque cūinávure. Quédeca na mārājivu máre cujarāri majaque cūinávure. Que teivure jáivu, yure, mi daroimu mácure, ju arājarama ijāravucavu. <sup>22</sup>Yópe mi meadaíye báquepe yure, quédeca yu máre meadaivu náre, ne curājiyepe ayu cūinávure yópe maje cupepedeca cūinávure. <sup>23</sup>Náque cuvū yu aru yúque cuvū mñ, ne curājiyepe aivu majaque cūinávupeda. Que baru yu mi daroimu mácure aru na mi umarare cūináturu yure mi uepedeca ucure coreóvarājarama ijāravucavu.

<sup>24</sup>Mñ, jipacu, mi yure ju are ðaimara mārāvivure, ne curājiyepe yúque ji cuquinore uvu yu, ne járajiyeye ayu yure meacu bajure, múpe páyure. Mamarumure maje caiyede cuedarājiye jipocai, yure urejavū mñ. Que baru yu meacu bajure, múpe páyure, jádovaivu mñ. <sup>25</sup>Mñ, jipacu, meacu baju, boropatebevū mñ. Mure coreóvabema ijāravucavu mure ju abevu. Ubenita yúcapūravu coreóvaivu mure. Aru ina mi ju are ðaimara yure, mi daroimu mácure, coreóvādama na. <sup>26</sup>Mñ aipe ārojacure coreóvare ðaivu yu náre. Aru mure ne coreóvaino pñeno náre coreóvare dacuyumu yu, ne urājiyepe ayu apevure yópe mi uepedeca yure. Que teni yúvacari náque cuscuyumu cūinávure. Que arí, jipacure coyurejame Jesús.

#### Jesúre jēni ne nuvaino

(Mt 26.39, 47-56; Mr 14.36, 43-50; Lc 22.42, 47-53)

**18** <sup>1</sup>Nópe coyuriburū yóboi jipacūque, Jesús aru ññja ñi bueimara etarí, nuri jiajiya Cedrón āmicuriyare jatarejacaṛā. Nore eaiivu

oteiye cūrōi, ecorejacadā ñuja. <sup>2</sup>No oteiye cūrōi ñuje nuinore javede Jesúque núvarejacadā ñuja doce paivũ ñi bueimara. Que baru noi ñuje nuiyede majidejaquemavũ Judas, ñai Jesúre jēni jícuyũ ñi mauvare. <sup>3</sup>Majicũ, no oteiye cūrōre darejame Judas. Jipocateyũ barejáme Jūmenijicũ cūramine coreipōevacavũre, sacerdotevare jaboteipōeva aru fariseova ne jaroimarare úque, aru churaravare máre. Ina ñi jipocateimara ne boarájiyede duruivũ barejáima. Pēoibuaque aru cāmaveaque máre darejaima na. <sup>4</sup>Úre vaiquíyede majicũ, náre eaivũre, copũ nuri yópe arĩ, jēniari järejame Jesús:

—¿Namene voivurũ muja? arejame náre.

<sup>5</sup>—Jesús Nazarecacũre vorādaivũbu ñuja, arejaima na.

—Yúbu, arejame náre Jesús.

Ne nópe boroteiyede, ne coricai núrejame Judas, Jesúre jēni jíyũ ñi mauvare.

<sup>6</sup>Jesús ñi que aiyede, daruíni yebamia puaréva turejaima na, Jesúre jēnadaivũ. <sup>7</sup>Bedióva cojedeca náre jēniari järejame Jesús:

—¿Namene voivurũ muja? arejame náre.

—Jesús Nazarecacũre voivũbu ñuja, arejaima na.

<sup>8</sup>—Javeta mujare “Yúbu”, avũ. Yure voivũ baru, dinumũ ji yóvaimarare nuicōjeara, arejame úre voivũre Jesús.

<sup>9</sup>Que arejame Jesús yópe ñi aino mácarōpedeca vaiquíyepa ayũ, “Mu, jipacũ, ina mi yure ju are ñaimaracacũ ye cūinácũ bíjacabebi yure”, ñi aino mácarōpe.

<sup>10</sup>Dinumũre Simón Pedro ñi boaicarovede tatorĩ, ñni, duarĩ, sacerdotevare jaboteipōecũ ñi yebacacũre, Malco āmicucũre, juijórĩ najuárejame ñi meapūravūcacamucare.

<sup>11</sup>Nópe ñayũre járĩ, Jesús arejame úre:

—Mi boaicarovede meadajacũ mu. Āmenore yure jipacũ ñi vaidé ñaquiyyede jāve vaicúyumu yũ, arejame Pedroro Jesús.

### **Jesúre ne nuvaino Anás yebai**

(Mt 26.57-58; Mr 14.53-54; Lc 22.54; Jn 11.49-50)

<sup>12</sup>Dinumũ ina churarava aru ina Jūmenijicũ cūramine coreipōeva máre, Jesúre jēni, ñi puruáre buorĩ buojarĩ, nuvarejaima. <sup>13</sup>Úre nuvarejaima mamarumũ Anás āmicucũ yebai. Caifás barejáme ñi vácũ. Aru ñai Caifás sacerdotevare jaboteipōecũ barejáme diujũre.

<sup>14</sup>Ñai Caifárecabe, “Cūinácũva yaidú, majare meajebu. Que teni caivũ yainĩ bíjabejebu maja”, ayũ bácũ barejámeda apevũ judíovai jabovare.

### **“Jesúre yũ coreóvabevũ” arĩ, Pedro ñi coyũino**

(Mt 26.69-70; Mr 14.66-68; Lc 22.55-57)

<sup>15</sup>Jesúre ne jēni nuvaiyede, ne yójĩboi nũre nũrejacadā ñuja, yũ aru Simón Pedro. Sacerdotevare jaboteipōecũ coreóvaimũ marejacácũ yũ. Que baru ñi cūrami tãibũre Jesúre ne ecovaiyede, yũre máre ecoicōjenejaima. <sup>16</sup>Ubenita tãibucarō biaido jedevai mautedejame Pedro. Que baru ecoinore coreipōecoque borotecunurejacacũ, õi ecoicōjecojiyepa ayũ úre máre.

<sup>17</sup>Pedro ecoyũ bácũre, jedevacobede coreipōeco jēniari järejaco úre:

—¿Jesús ñi bueimaracacũ āmecurũ mu? arejaco.

—¡Nácacu ámevu! arejame óre Pedro.

<sup>18</sup> Diñami ámei jujurejavũ. Que baru nócacui yebacavu ina coreipõevaque nore toabore dacuvarĩ, cuocarejaima. Aru Pedro máre náque cuocarejame.

**Jesúre sacerdotevare jaboteipõecu ũi jēniari jápiaino**

(Mt 26.59-66; Mr 14.55-64; Lc 22.66-71)

<sup>19</sup> Sacerdotevare jaboteipõecu Jesús ũi bueiye de aru ñu ja ũi bueimarare máre jēniari járejamedá Jesúre. <sup>20</sup> Ũi jēniari jáiyede, Jesúcapũravu, yópe arĩ, coyurejamedá ũre:

—Yu caivu ne jápiaiyede buecacu yavebecuva. Maja judíova maje cójijiñamiai aru Jūmenijicui cūrami máre bueyu batecacu yu. Põeva ne cójijiñoai buecacu yu cainumua. Ye yavenina buebetecacu yu. <sup>21</sup> Que baru, ¿aípe teni yure jēniari jáñuru mu? Yure jápiaivu bācavure jēniari jájacu. Náta ji coyuiye báque caiyede majidivũ coyurājarama mure, arejamedá Jesús.

<sup>22</sup> Jesús ũi que aiyede, cūinācu ina coreipõevacacu ũi jījecamure puruque pēvari, yópe arejamedá Jesúre:

—Maje jabocure nópe arĩ, abejacu mu, arejamedá.

<sup>23</sup> Aru Jesús arejamedá:

—Ámene ji que aru, yure coyujacu mu caride, caivu ne jápiaiyede. ¿Ũbenita méne ji que aru, aípe teni yure pēvacurũ? Pēvaiye jaubevũ mure, arejamedá ũre Jesús.

<sup>24</sup> Dinumure Anás Jesúre buoimure jarorejamedá Caifás, sacerdotevare jaboteipõecu yebai.

**“Jesúre yu coreóvabevũ” arĩ, Pedro bediáva ũi coyũino**

(Mt 26.71-75; Mr 14.69-72; Lc 22.58-62; Jn 3.14; 12.32)

<sup>25</sup> Nore toabo ēcarui cuocayu barejáme Pedro cāreja. Apevu nore curivũ ũre jēniari járejaima:

—¿Mu máre Jesú bueimaracacu ámecurũ mu? arejaima ũre.

—¡Nácacu ámevu yu! arejame náre.

<sup>26</sup> Dinumure sacerdotevare jaboteipõecui yebacavucacu, Pedro ũi boaicaroveque ũi buraimu mácu jicu, Pedore arejame:

—Cari ñami marede oteíye curõi Jesúque mure jávu yu, arejame.

<sup>27</sup> —¡Nácacu ámevu yu! Jesúre yu coreóvabevũ, arejame Pedro cojedeca. Ũi que aiyé bajure, cáyu óre jarejame.

**Jesúre ne nuvaino Pilato yebai**

(Mt 27.1-2, 11-14; Mr 15.1-5; Lc 22.1-5)

<sup>28</sup> Avia ũi tucumuiyede, Caifái cūramine jocarĩ pu jabocui cūramita Jesúre nuvarejaima. Ñai jabocu, Roma ámicurõ jaboteino jabocui epeimu marejáme, jabotecuyu ina judíovare. Judío ámenejame ñai jabocu, Pilato ámicucu. Ũi cūrami ecoivu baru, Pascua torojuve teinoque áiyede áicõjememara májebu judíova. Que baru iye áiyede áiyurivũ, diñamine corĩ numenejaima ina judíova, Jesúre nuvaivu, Jūmenijicui jámequiyepa aivu náre ámenape. <sup>29</sup> Que baru náre jēniari jácuetarejame Pilato.

—¿Ye ámenore boro coyurĩ adaivurũ mu ja ñai ũmure? arejame.

<sup>30</sup> Ina judíova arejaima:

—Ëi âmeno dâbedu, ùre davabejebu ñuja mi yebai, arejaima.

<sup>31</sup> Pilato arejame nâre:

—Dinumu ùre nûvari, majijarâ muje baju. Muje ðaicôjeiyepedeca coyujarâ ùre aipe ñâjicuyure, ùi bojedâquiyeye aivu ùi âmeno ðaiye bâquede, arejame. Nâcapûravu arejaima:

—Muja Romacavu ñuja judíovare boarí jaruvaicôjemevu pôevare. Que baru ùre boarí jaruvaivu buojabevu ñuja, arejaima.

<sup>32</sup> Nôpe vaidéjavû, “Yôpe vaiquíyebu” Jesús ùi aiyé bâquepedeca javede aipe ârojae jocucujaravena ùi mauva ne pêvaimu ùi yaiquínore.

<sup>33</sup> Ëi cûramine corí nûri, Jesúre cutuicôjenejamedâ Pilato. Ëi eaiyede ùi yebai ùre jêniari járejamedâ:

—¿Mûru judíovai jabocu? arejamedâ Jesúre.

<sup>34</sup> Jesúcapûravu arejamedâ:

—¿Mu mi baju majini, yôpe jêniari jáñuru mu, que ayu? ¿O apevu ne coyuiyede jápiarí, yôpe jêniari jáñuru mu? arejamedâ.

<sup>35</sup> Pilatocapûravu arejamedâ:

—¿Judíovacacu bárica yu, mi que aiyede? Mi joborôcavu aru sacerdotevare jaboteipôeva mure boro coyurí adarâdama na. ¿Aipe ðacurû mu, ne que âmecoroiyede? arejamedâ.

<sup>36</sup> Jesús ju arejamedâ:

—Ijâravucarô âmevu ji jaboteino. Yore ji jabotedu, âðamatejebu ji yóvaimara, ji mauva ne jêni jíbenaiyeye aivu yure ina judíovai jabovare. Ijâravucarô âmevu ji jaboteino, arejamedâ.

<sup>37</sup> Dinumu jêniari járejamedâ Pilato:

—¿Jâve “Jabocubu yu”, ayurû mu? arejamedâ.

Ju arejamedâ Jesús:

—Quédeca mi aimûrecabu yu. Jabocubu yu. Que barureca ijâravui edarí, pôetedejaquemavu yu, jabotecuyu aru coyucuyu yáva iyede jâve bajure. Yáva iyede jâve bajure majiyurivu, yure jápiarí adarâjarama na, arejamedâ Jesús.

<sup>38</sup> Aru Pilato jêniari járejamedâ:

—¿Yéba yáva iyede jâve baju? arejamedâ ù.

### Pôeva ne boarí jaruvaicôjeino Jesúre

(Mt 27.15-31; Mr 15.6-20; Lc 23.13-25)

Que ayu bácu Jesúre, jedevai etarí, pôevare borotecunurejame Pilato cojedeca:

—Âmeina tebecutame ñai ùmu ji járû. <sup>39</sup> Ëbenita Pascua jâravui ji ðarí cômajiyepedeca ðaquijivu yu. Mujacacu ji buoimaracacu cûinâcure jaetovaquijivu. ¿Ñai muje jabocure jaetovaji yu? arîdurejame judíovare Pilato.

<sup>40</sup> Pilato ùi que aiyede cûiná jorojîni, codoboborejaima:

—Bi, ùre jaetovabecacu mu. Barrabâre jaetovarí, darojacu mu, arejaima Pilatore ina judíova.

Ñavacacu barejâme ñai Barrabás.

**19** <sup>1</sup> Dinumure ina judíova ne que aiyede, churaravare jara popeicôjenejamedâ Pilato Jesúre. <sup>2</sup> Aru ùre puenocacaje, jabocu doicajeye paicaje ñemijuaricajede doarejaimada na. Jesúre que teivu,

miumua cāteni, cainitarabure đarĩ, ũi jipoburā ditarabure tuorejaimada ina churarava. <sup>3</sup>Que đarĩ Jesúre jacoyurejaimada:

—Ména cujacu mu, judíovai jabocu, arejaimada churarava, úre yurivu.

Que teivu, úre pēvavarejaimada ũi jivai ne puruáque.

<sup>4</sup>Jesúre ne yuriniburu yóboi, jedevai etarejame Pilato cojedeca.

—Jájara. Jaetovaiyu yu úre, muje coreóvarājiyepe ayu: Ámeina tebecu bajube ũ ji járu, arejame.

<sup>5</sup>Pilato ũi que arĩburuta, etarĩ darejame Jesús. Jabocui doicajepe paicaje ñemijuaricajeque ne doaimu mácu, ne jipoburā miumua cāteni jacoimu mácu etarĩ darejame.

—Jede, úre jájara caride, arejame Pilato.

<sup>6</sup>Cūiná Jesúre ne jáiyede, cođoboborejaima ina sacerdotevare jaboteipōeva aru Jūmenijicui cūramine coreipōeva máre:

—Úre jocuc uja ravena pēvari boarĩ jaruvaicōjecacu mu, arĩ cođoboborejaima.

Pilato arejame:

—Muje baju úre nuvari, jocucujaravena pēvari boarĩ jaruvajarā. Yure ji járu ámeina tebecutame, arejame.

<sup>7</sup>Arejaima Pilatore:

—“Yu Jūmenijicui mácubu yu”, ávaibi Jesús. Que baru yópe cūináro ñujare đaicōjeinope ñaípe páyure boarĩ jaruvaiye jaunu ñujare, arejaima.

<sup>8</sup>Ne que aiyede jápiayu, pueno baju cuenumarejaquemavu Pilato. <sup>9</sup>Diñami ecorĩ cojedeca, Jesúre jēniari járejamedá:

—¿Árocacurū mu? arĩdurejamedá Jesúre Pilato.

Ūbenita Jesúcapūravu bi arejamedá.

<sup>10</sup>Dinumuma Pilato arejamedá úre:

—¿Yure coyui yub ecurū mu? ¿Ji jaboede majibecurū mu? Mure jocucujaravena pēvaicōjeiyucu baru, jocucujaravena mure pēvaicōjecuyumu yu. O mure jaetovaiyucu baru, mure jaetovacuyumu yu. ¿Majicurū mu diede? arejamedá.

<sup>11</sup>Jesús arejamedá úre:

—Jūmenijicu mure jaboteicōjeimi ũ. Ũi que đabedu, yure yópe đabejebu mu. Que baru ñai yure jēne đayu bácu mure mi pueno boropateibi, ũi ámeina teiye boje, arejamedá.

<sup>12</sup>Jesús ũi nópe coyuiyede, pueno baju úre jaetovaiyurĩdurejamedá Pilato. Ūbenita yópe arĩ, cođoboborejaima ina judíova:

—Jesúre jaetovayu baru, ñai jabocu ijaravucacu pueno baju parucu, César maje aimu, ũi yóvaimu ámejebu mu. Ácu pōecu “Jabocubu yu” ayu, ñai jabocu ijaravucacu pueno baju parucure, César maje aimure, maucvaibi ũ, arejaima ina judíova Pilatore.

<sup>13</sup>Que aivure jápiarĩ, ũi dobariborā dobacunurejame Pilato. Noi dobacu, Jesúre davaicōjenejame, boarĩ jaruvaicōjecuyu úre. Pilato ũi dobaribo curiva, cūraboque ne tuoiva, ne meadaiva ñuja judíova ñuje yávaicamuai Gabata ámicurejavū. <sup>14</sup>Pascua ámicurijāravu baquinó jipocacajāravu barejāvū, jāravu corica baji. Ina obedivu judíovare, Jesúre ũbevure, yávarĩ darorejame Pilato:

—Jede, jájara caride muje jabocure, arejame.

<sup>15</sup> Ina judíovacapūravu ʔrarō cođoboborejaima:

—¡Yaijácuri! ¡Yaijácuri! ¡Jocucujaravena pēvari boarí jaruvaicōjejacu ʔre! arejaima na.

Pilato arejame:

—¿Muje jabocure boarí jaruvaji yu, muje dápiaru? arejame.

Ina sacerdotevare jaboteipōeva arejaima:

—Cūinácurebe űuje jabocu, űai jabocu ijāravucacu pueno baju parucu, César maje aimu, arejaima.

<sup>16</sup> Que baru ne ʔrōpe đarí, jocucujaravena Jesúre pēvari, boarí jaruvaicōjenejame Pilato.

### **Jesúre ne pēvari yuyaino jocucujaravena**

(Mt 27.32-44; Mr 15.21-32; Lc 23.26-43)

Que baru Jesúre űni, ne pēvarajinoi nuvarejaima churarava.

<sup>17</sup> Jesúvacari turí nurejame dijaravede Pōe jipobucū űuje aicū cūracūita, Gólgota ʔmicuricū űuje yávaicamuaque. <sup>18</sup> Dicūre eaivu, jocucujaravena pēvari jēorejaima na. ʔque apejaravearā apen pucarāre máre pēvari jēorejaima, cūinácure Jesú meapūravui, aru apecure Jesú cācopūravui, aru Jesúre ne coricai. <sup>19</sup> Yópe arí, “Jesús Nazarecacube judíovai jabocu”, toivaicōjenejameđa Pilato jocuvena, ne jēorajiyepe ayu diveđe Jesú jocucujaravena. <sup>20</sup> Jerusalén ʔmicuríimaro joabejīnoi Jesúre jocucujaravena jēorejaima. Que baru obedivu pōeva nore járadaivu no toivaino mácarōre járí borotedejaima. Yóbecuricamua yávaicamuaque toivaicōjenejaquemavu Pilato. űuje yávaicamuaque, Romacavu ne yávaicamuaque, aru griegova ne yávaicamuaque máre toivaicōjenejaquemavu Pilato. Que baru caivu diveđe járí majidejacarā űuja. <sup>21</sup> Pilato űi nópe toivaicōjeiyede űbení, sacerdotevare jaboteipōeva coyurānurejaimađa ʔre:

—Nópe mi toivaicōjeino mácarōpe toivaicōjemejacu mu. Quénora “Judíovai jabocubu yu, ʔbi ʔ”, arí toivarí jēojacu mu cojedeca, aríđurejaimađa Pilatore sacerdotevacavu.

<sup>22</sup> ʔbenita Pilato arejameđa náre:

—Ji toivaicōjeino mácarō nópeda bajaróri no. Oatvabecubu yu, arejameđa.

<sup>23</sup> Jesúre jocucujaravena pēvari jēori bubaríburu yóboi, űi doiye báquede coapa űnejaima ʔre pēvaivu bácavu. Yóvaicuvaiyu barejáima na. Que baru náre coapa űnejaima. ʔbenita dicaje puenocacaje nareimea cubecajede coapavaiyubedejaima na.

<sup>24</sup> Cūinácu nácacu arejame:

—Dicaje nareimea cubecajede jadevarí, coapa űnu, meamejebu. Yópe đarājarevu. Đuvarí yajuiyupe tenajarevu maja. ʔcu majacacu majare yajurí vainí tuyu, dicajede ícuyume ʔ, arejame.

Na “jede” arí, nópe yajurejaima na. Ne nópe coapavaiye vaidéjavū yópe Jūmenijicui toivaicōjeiye báquedepedeca űi yáva iyede: “Ji doiye báquede űni, coapavarājarama na. Aru đuvarí yajurí vainí tuyu apecajede, ji puenocacajede ícuyume nácacu”, arí toivaicōjenejaquemavu Jūmenijicu. Quédeca tedejaima ina Jesúre jocucujaravena pēvaivu bácavu.

<sup>25</sup> Jesús űi jocucujarave joabejīnoi núrejaima jípacu, jípacoi mamico Cleofai márepaco María ʔmicuco, aru María Magdalacaco máre. <sup>26</sup> Jípacu nore

núcore aru nijinói yure máre, pare ùi jecumure, járejame ù. Aru yópe arí, yávorejame jípacore:

—Jájaco. Mímacureca páyube ù, arejame jípacore Jesús.

<sup>27</sup>Yure máre yópe arejame Jesús:

—Jájacu. Mipacoreca pádobe ò, arejame yure.

Que teni ji cūramine òre nuvari epeni, cuvarejacacu yu òre jípacope.

### **Jesús ùi yaino**

(Mt 27.45-56; Mr 15.33-41; Lc 23.44-49)

<sup>28</sup>No yóboi, caiye iye Jūmenijicui ðaicōjevarede ðarí bubayu bácu coreóvarejaquemavu Jesús. Que baru yópe Jūmenijicui yávaiyede ùi toivaicōjeiye báquedepeda vaiquíyepe ayu, yópe arejame Jesús:

—Cūñóivu yure, arejame Jesús.

<sup>29</sup>Nore jorobu, vino úyaicoro upiáricoroque jorobu curejavū. Diede jauborā uyovarí hisopo ámicuricu jocujicu cavañibui jēori jarururejame cūinācu ina churaravacacu. Jesúre ùi jijecamura jījovarejame ù. <sup>30</sup>Die upiáteiye báquede neneniburu yóboi, yópe arejame Jesús:

—Quénoramu, arejame Jesús.

Que arí, ùi jipobu mori turí, yuyurí, yaidéjame.

### **Jesús bácore churara ùi totarí cōajaroino**

(1 Co 5.7; Ap 1.7)

<sup>31</sup>Dijāravu torojuve teijāravu baquinóre meadaijāravu barejávū. Sábado, Pascua ámicurijāravu, judíovai pueno meajāravu, pueadaijāravu baquinó jípacacajāravu barejávū. Que baru dijāravu baquinóre ne pēvaimara mácavu jocucujaravearā ne mautebenajiyeye aivu, Pilatore coyurānurejaimada ñuja judíova ñuje jabovacavu. Ére jēniarejaimada, ùi boarí puyoiçōjequiyeye aivu ina jocucujaravearā jēivu ne āradoare, ne yainájiyepe aivu maumena, jōðavari inajivu ne bajuá báquede torojuve teijāravu baquinó jípacai. <sup>32</sup>Que baru Pilato ùi cōjeniburu yóboi, ina jocucujaravearā yuyuivure ne āradoare boarí, puyorānurejaima churaravacavu. Mamarumucacure earí, ùi āradoare boarí puyorí, apecure máre quédeca boarí puyorejaima ina churarava, Jesúque jocucujaravearā pēvaimara mácavure boaiyu. <sup>33</sup>Ubenita Jesús yebai eaiyu, jave yaiyú bácore járejaima. Que baru yaiyú bácore jári, ùi āradoare boarí puyobedejaima.

<sup>34</sup>Ubenita quédeca cūinācu churaravacacu Jesúi tépenaba cāchinói ùi tāutedorūque totarí cōajarorejame ù. Jive ocoque jivaiye etarejavū dicobede, ùi totarí cōajaroiyede. <sup>35</sup>Yūvacari járejacacu. Que barureca ji jáiye báquede toivarí epeyubu yu, muje ju arājiyepe ayu Jesúre. Ji majié jāve bajure coyuyubu yu.

<sup>36</sup>Que vaidéjavū. Yópe Jūmenijicui yávaiyede ùi toivaicōjeiye báquedepeda vaino marejávū: “Úi cūadoare ye cūinādo puyobenajarama na”, arí toivaicōjenejaquemavu Jūmenijicu. <sup>37</sup>Aru apeno Jūmenijicui toivaicōjeino mácarō aiypedeca vaidéjavū: “Ne totaimu mácore járajarama pōeva”, arí toivaicōjenejaquemavu Jūmenijicu.

### Jesús bácu jaruvaimu ne pœ jaruvainoi

(Mt 27.57-61; Mr 15.42-47; Lc 23.50-56; Jn 3.1-2)

<sup>38</sup> Jesús ũi yainíburu yóboi, ũ mácu baju bácarõre meadaiyucu, Pilatore jëniacunurejamedá José Arimateacacu. Jesús bácu ũi bueimu mácu barí durejame. Ubenita sacerdotevare pare jidurejamedá. Que baru “Jesúcacubu yu”, arí coyubedejamedá José. Pilato Joséde ju arejamedá. Que baru Jesús bácu baju bácarõre ñni, nuvarejaimada Joséjá. <sup>39</sup> Joséde cadatecunurejamedá Nicodemo, ñai mamarumure ñami Jesús bácu borotecunñu mácu. Jesús bácu baju bácarõre meadacuyu, Nicodemo me mumijuripenauque jivaiyede nuvarejamedá. Jocucu cuidó mirra amicuricu yoca aru vecujichíabo jëicucoro máre, treinta paikilos ñni nuvarejamedá.

<sup>40</sup> Jesús bácu baju bácarõre ñni, nuvari, meadarejaimada na. Meacaje lino amicuricajeque aru iye mumijueque ũ mácu baju bácarõre cūmarejaimada. Ñuja judíova ñuje darí cōmajiyeye yaiyú bácu ñuje jaruvarājiye jipocai meadarejaimada Joséjá. <sup>41</sup> Jesús bácu ne pēvari jëoino mácarō joabejino oteiyē curōi ũ bácu nuvarejaimada. Nore pœ jaruvaicobe mamacobe curejavū. Cūracobei Jesús bácu nuvarejaimada. Pœva ne yaivu bácu ne imamecobe barejavū dicobe. Nore Jesús bácu jaruvarānurejaimada Joséjá. <sup>42</sup> Jabuóvairavu baquinó jipojica barejavū no. Aru dicobe joabejino marejavū. Que baru maumepeda Jesús bácu baju bácarõre meadarí, nore jaruvarānurejaimada.

### Jesús ũi nacajaino yainore jaruvarí

(Mt 28.1-10; Mr 16.1-8; Lc 24.1-12)

**20** <sup>1</sup>No sumana buijārvu domingo javejīnara, aviá ũi tucumquiyē jipocai, Jesús bácu ne jaruvainoi jáconurejacoda María Magdalacaco. Nore earí, no cūratūrava uratūrava dicobede bieitūrava bácarō javeta veoitūrava bácarō marejavūya ecoicobede jocarí. <sup>2</sup>Nópe járí, cūiná cūyarí darí, Simón Pedrore aru yure máre coyucocarejaco María. Ñujare edarí, yópe arí, coyurejaco:

—Maje jabocu bácu baju bácarõre dicobede jocarí ñni, nuvari, apenoi epenama apevu. Ne nuvari epeinore majibevu ñuja, arejaco ñujare María.

<sup>3</sup>Ōi que aiyede, imarore jocarí nurejacařā ñuja, Pedromaue, Jesús bácu ne jaruvainore járanuivū. <sup>4</sup>Cūyarí nurejacařā ñuja. Ubenita Pedrore jocarí nuri, ũi jipocai earejacacu yu. <sup>5</sup>Ūi jipocai earí, dicobe jivui nacachini járidurejacacu yu. Nore Jesús bácu ne cūmaicajea báquede, nore paraicajeare, járejacacu. Ubenita dicobede ecorí numenejacacu yu. <sup>6</sup>Jí yóbo earí, dicobei cūiná ecorí nurejame Pedro. Dicajeare nore paraicajeare járejamedá ũ máre. <sup>7</sup>Aru yaiyú bácu ne jipobure moaicaje bácarõre jícua tubaricaje pēpejeicajede máre járejamedá Pedro. <sup>8</sup>Dinumū dicobede mamarumure eayū bácu nore ecorí nurejacacu yu máre. Nore ecorí, yu máre caiyede járejacacu.

—Jāve bajubu. Jave nacajacube Jesús yainore jaruvarí, arí dápiarejacacu.

<sup>9</sup>Jūmenijicui toivaicōjeiye báque jipocaquede, Cristo nacajacuyure yainore jaruvarí majibenidurejacařā ñuja cāreja. <sup>10</sup>Dinumuma, járiduivū bácu, ñuje cūrami copainurejacařā ñuja pucarā.

### Jesús ũi cueteino María Magdalacacore

(Mr 16.9-11)

<sup>11</sup> María Magdalacaco copainuri Jesús bácore ne jaruvainoi, dicobe jedeva bajita núco barejácoda, odo. Orĩ, nacachini, dicobe jívui járejácoda. <sup>12</sup> Nore pucarã ángelevare, Jūmenijicu daroimarare, járejácoda María. Boricajeare doivu dobarejaimada na Jesús bácu paraino mácarõ, cūinácu ũi jipobu bácarõ aru apescu ũi cuboba bácarõ. <sup>13</sup> Aru arejaimada óre:

—Mu, nomió, ¿aipe teni odorũ mu? arejaimada na.

Õ arejácoda:

—Ji jabocu bácu baju bácarõre nũvarama apenv. Ári ne nũvainore majibevu yu, arejácoda.

<sup>14</sup> Que adova, copedĩni, nore núcore Jesúre járidurejácoda. Ŭbenita ũre coreóvabedejácoda. <sup>15</sup> Óre arejamedá:

—Mu, nomió, ¿aipe teni odorũ mu? ¿Namene vodorũ mu? arejamedá.

Ŭbenita, “Yo re oteiye curõre coreipõescu bajubí ũ, que ayu”, arĩ dápíarĩdurejácoda õ.

—Mu, ũmu, ũ mácore nũvañu mácu baru, mi epeinore coyujacu yure. Yu bácojivu ũre iconũño, arejácoda õ.

<sup>16</sup> Jesús arejamedá óre:

—María, arejamedá.

Cūiná copedini õ, hebreo âmicuricamua yávaicamuaque:

—Rabuni, arejácoda Jesúre.

Rabuni aiyurõ, bueipõescu aiyurõtamu.

<sup>17</sup> Yópe arĩ, coyure nurejamedá Jesús.

—Jipacu yebai nũmevu yu cãreja. Que baru yure jēni jámejaco mu. Quéhora jívure yópe coyucacopujaco yure: “Jipacu yebai, ji mearore jímũ yebai, nũñutamu yu. Aru jipacu mujepacube ũ. Muje mearore jímũme ũ jipacu”, yópe arĩ, náre coyucajaco yure, arejamedá Maríare Jesús.

<sup>18</sup> Que arĩburu yóboi, ñũja ũi bueimarare coyucodarejaco María:

—Maje jabocure jávu yu, arejaco ñũjare.

Que arĩ, ũi aye báquede coyurejaco õ ñũjare.

### Jesús ũi cueteino ũi bueimarare

(Mt 16.19; 18.18; 28.16-20; Mr 16.14-18; Lc 24.36-49)

<sup>19</sup> Dijāravũ, sumana buijāravũmica ñamine, ñũje cūramine bienina cũrejacarã ñũja, Jesúi bueimara, diñami jívui, ñũje jidué boje ñũja judíova ñũje jabovare. Que jidurivure ñũje coricai cuetedejame Jesús.

—¿Ména curāru muja? arejame ñũjare Jesús, jacoyuyũ.

<sup>20</sup> Que ayuva, ũi puruáre aru ũi tépenaba cāchinoi ũi churiá báquede jádovarejame Jesús. Ñũje jabocure jáivu, urarõ torojurejacarã ñũja. <sup>21</sup> Bediõva cojedeca ñũjare arejame Jesús:

—¡Cujarã muja cãrijimena! Yópe yure jipacu ũi daroiye báquepedeca caivure bueicõjenĩ, nopedeca yu máre mujare jaroyutamũ yu, arejame ñũjare Jesús.

<sup>22</sup> Que arĩ, ñũjare ũme japurejame. Aru arejame:

—Espíritu Santore jacopujarã muja. <sup>23</sup> Namene “Jūmenijicu ārumemi muje āmeina teiyede” muje aru, jáve diede ārumemi Jūmenijicu. Ŭbenita

ñamene “Jūmenijicu ārūmetebebi muje āmeina teiyede” muje aru, jāve diede ārūmetebebi Jūmenijicu, arejame ñujare Jesús.

### Tomás ũi jáino Jesúre nacajañu mácuŕe yainore jaruvarĩ

<sup>24</sup> Je sús ũi edaiyede ñujacacu Tomás, pējacu ñuje aimu, ñujaque cubedejame ũ. <sup>25</sup> Que baru Jesús ũi nuriburu yóbo, Tomáre coyurĩdurejacaŕa Jesúre jáivu b́acavũ:

—Maje jabocuŕe jávu ñuja, arejacaŕa ñuja.

Aru Tomás arejame:

—Jāve āmevu. Ũ baju āmeteyume. Ũi puruáre ne pēvaiye báquede yu ji baju jáñu maru, “jāve” acuyumu yu. Ne pēvaiyoa coiye báquede ji āmuyoque yu ji baju doarĩ jáñu maru máre, “jāve” acuyumu yu. Aru ũi tépenabacachuri bácarõre yu ji baju doarĩ jacyu baru, “Jāvetame ñai” acuyumu, arejame ñujare Tomás.

<sup>26</sup> Ocho paijāravua yóboi, nomica ñuje cūramine bienina cūrejacaŕa ñuja cojedeca. Dinumure ñujaque cūrejame Tomás máre. Diñami bieñamineca ecorĩ, ñuje coricai cūtedejame Jesús cojedeca. Aru arejame ñujare:

—¿Ména curāru muja? arejame.

<sup>27</sup> Dinumure arejame Tomáre:

—Mu, Tomás, mi āmuyoque ji puruáre mu mi baju doarĩ jácudajacu. Aru ji tépenabacachuri bácarõre máre mu mi baju doarĩ jájacu. Ju abecu tebejacu mu. “Jāvemu” arĩ, ju ayu tejacu, arejame Tomáre Jesús.

<sup>28</sup> Tomás, ũi churiá báquede jári majicu, arejame:

—Ji jabocu bajubu mu. Yure Jūmenijicu bajubu mu, arejame.

<sup>29</sup> Aru Jesús arejame:

—Yure jáivu mu mi baju. Que baru mu yure ju aivu. Torojurivubu na jámevua yure ju aivu, arejame Jesús.

### Juan ũi toivaino pōeva ne ju arājiyepe ayu Jesúre

<sup>30</sup> Pōeva ne ñarĩ majibede ure ñarejame Jesús ñuje jáiyede. Yore ijāravui ũi ñaiye báque caiyede corevarĩ toivabevu yu. <sup>31</sup> Ũbenita diede toivacaivu yu, Jesúre muje ju arājiyepe ayu. “Jesucristobe Jūmenijicuĩ ñaroimu mácu. Jūmenijicuĩ mácube Jesús” muje arājiyepe ayu, iyede toivacaivu. Muje majini ju arājiyepe ayu ũre, iyede toivacaivu yu. Jesúre ju arĩ, mamaũme cūvarājaramu muja. Que baru mujare, yópe arĩ, toivacaivu yu.

### Jesús ũi cūeteino siete paivu ũi bueimarare

(Lc 5.5-6)

**21** <sup>1</sup> No yóboi bediõva cojedeca ñujare cūeteni, jádovarejame Jesús macajitabu Tiberias āmicurijitabu ēcarui. Yópe barejávũ Jesús ũi cūeteino mácarõ. <sup>2</sup> Simón Pedro; Tomás, pējacu ñuje aimu; Natanael, Galileacarõ ĩmarocacu, Canácacu; Zebedeoi mára pucarā, jimamicu aru yu; aru apevu pucarā Jesúi bueimara quévua cūrejacaŕa ñuja nore.

<sup>3</sup> Simón Pedro arejame ñujare:

—Yu moa boacúñumu, arejame.

Aru ñuja arejacaŕa:

—Jede, ñuja máre ñaivubu, arejacaŕa.

Que arī, jiađocūi jaturānurejacaṛā ñuĵa. Jave nainúta marejávũ. Ñami joarō pápi boarídurejacaṛā ñuĵa. Ŭbenita boabédejacarā. Ye cūinájicu cuvabedejacarā. <sup>4</sup>Javejīna miadāe tuiyede, dibu ěcarui cucudarejaquemavũ Jesús. Ŭbenita ñuĵa moa boaríduivu ũre nore núcure jári coreóvabedejacarā.

<sup>5</sup>Ñujare órejurejame, yópe arī:

—¿Moa boabénaru muĵa? arī jēniari járejame ñujare.

—Bítamu. Moa boabévũ, arejacarā.

<sup>6</sup>Jesús arejame ñujare:

—Jiađocūi meapūravui đuvarī, jaboájarā muĵa. Que đaivu boarájaramu muĵa, arejame.

Ŭi que aiyede, meapūravui đuvarī, jaboárī, dabuborī, ĩnidurejacaṛā. Moa pucajínare boaréjacarā. Dabuborī oabedejacarā. <sup>7</sup>Yu, Jesúi pare jecumu, arejacacu Pedroke:

—Maje jabocuvacaribe ñai, que ayu, arejacacu Pedroke.

Simón Pedro ĵi que aiyede ũi puenocacajede duyũ bácu ũi moa boarī memeiye boje, dorī, jārīóri, dibui biarārī corī Jesús yebai tarī nurejame.

<sup>8</sup>Ŭi yóboi jiađocūi darejacaṛā ñuĵa. Dicũ pápicure moa buiní vaidéjaima na. Que baru dicure ĩni, adaiyvũ oabedejacarā. Quéda jabuborī, ěcarui mavaranurejacaṛā. Joabejino cien paimetros baju barejávũ. <sup>9</sup>Ěcarui eaiyvũ, jiađocure datuóri, mari nurejacaṛā pu Jesús yebai. Toaboi moa joayú barejáme ũ. Aru páure máre cuvarejame Jesús.

<sup>10</sup>Dinumure Jesús ñujare arejame:

—Muĵe boaimara mácavũ obebevure davajarā, arejame.

<sup>11</sup>Que arī, jiađocūi jatucunurejame Simón Pedro cojedeca. Pápicure jabuborī, ěpacūi ĵuarejame. Ŭrarā marejáima ñuĵe boaimara mácavũ. Ciento cincuenta y tres baju barejáima. Obedivuvacarī dicũ pápicure codebedejaima na.

<sup>12</sup>Jesús arejame ñujare:

—Āradajarā, arejame.

Aru “¿Namenũ mu?” abedejacarā ñuĵa Jesúre. Ŭre majidejacarā. <sup>13</sup>Ñujare tuorejame Jesús ñuĵe āiyede. Páure jīni aru moa ũi joaimara mácavure máre ñujare jídejame Jesús.

<sup>14</sup>Nóque yóbecue ñuĵa ũi bueimarare cuetedejame Jesús ũi nacajariburu yóboi yainore jaruvarī.

### Jesús Simón Pedromaque ne boroteino

<sup>15</sup>Ñuĵe āri buojarīburu yóboi, Simón Pedroke jēniari járejame Jesús:

—Mu, Simón, Ĵūai mácu, ĵucurũ mu yure ĩna apevũ ne ũe pueno? arejame. Aru Pedro ĵu arejame:

—Mu, ĵi jabocu, mure uvũ yu. Ĵi ũede mure majivu mu, arejame.

Ŭi que aiyede, Jesús arejame:

—Dinumũ yure ĵu aivure, parubevure cāreja ne ũmei, meadacajacu yure. Mi coreiye ĩnare jaũvũ yópe ovejava mamajinare coreiye jauépe. Ĵi coyũiye báquede buenī, náre yure ĵu aríduivure ĵu are đajacu, arejame Pedroke.

<sup>16</sup>Bedióva cojedeca ũre quédeca jēniari járejame Jesús:

—Mu, Simón, Ĵūai mácu, ĵyure ucũrũ mu? arejame.

Ĵu arejame Jesúre cojedeca:

—Mu, ji jabocu, mure uvu yu. Ji uede mure majivu mu, arejame.

Ëi que aiyede, Jesús arejame:

—Yópe ovejavare coreipõecu ñi meadaiyepe ovejavare, nopedeca yure ju aivure meadacajacu yure. Ëi ñoiyepe ovejavare, ji coyuiye báquede buejacu mu yure ju aivure, arejame Pedroro.

<sup>17</sup>Que arí, bedióva cojedeca jēniari járejame úre Jesús:

—Mu, Simón, Jūai mácu, ¿yure ucūrū mu? arejame.

Yóbecue Jesús ñi que aiyede, urarō chiorejame Pedro. Que baru arejame:

—Mu, ji jabocu, caiye jaubeda majivura mu. Mure uvu yu. Majivura mu, arejame.

Jesús arejame Simón Pedroro:

—Yure ju aivure meadacajacu yure. Ovejavape paivubu na. Ji coyuiye báquede náre majicajacu mu. <sup>18</sup>Jāve coyuyubu mure: Mu mi bojūrūma doie mi uede dori, ári nuiyucu mu, nuquemavu mu. Ëbenita bucucuta mure buorí nūvacuyume apesu. Mí āmuveare dabuborí, buorí, đacuyume mure. Dinumu maquinó mi nuiyubenoí mure nūvacuyume, arejame.

<sup>19</sup>Nópe ayu, Pedro ñi yaiquínore coyuyū barejaquémavu Jesús. “Mí yaiquínore mi đaiye boje ji urópe jári, Jūmenijicure mearore jínajarama pōeva”, ayu barejaquémavu Jesús, Pedroro que ayu. Dinumu arejame Pedroro:

—Ji bueimu májacu mu, arejame Jesús.

### **Jesúí bueimu pare ñi jecumu**

(Jn 13.25)

<sup>20</sup>Pedro copedini yure ñi yóboi dayure járejame. Yu barejacácu, Jesúí bueimu ñi pare jecumu, ñi yebai ñi tucavai dobacu bácu ñuje ñino mácarōre. “Mu, ji jabocu, ¿ñame maquidí mure jēne đacuyu mi mauvare?” jēniari jáñu mácu barejacácu Jesúre. <sup>21</sup>Ne yóboi dayure yure jári, yópe arejame Jesúre Pedro:

—Mu, ji jabocu, ¿ñaine aipe vaiquídica? jēniari járidurejame Jesúre.

<sup>22</sup>Jesús arejame Pedroro:

—Ji uru, bedióva cojedeca ji copaidaiyeta yaibécuva cūjebu ñ. Ñaine vaiquíye míye āmevu. Cārijovamejacu úre vaiquíyede. Múcapūravu quéda ji bueimu májacu mu, arejame.

<sup>23</sup>Que teni Jesús ñi aie báque boro nūrejaquemavu ñi bueimara jēneboi: “Jesúí bueimu pare ñi jecumu yaibécuyume ñ”. No aino boro nūrejaquemavu yurā. Que aridurejaima Jesúcavu. Ëbenita nópe ayu āmenejame Jesús. “Ye yaibécuyume ñ”, ayu āmenejame Jesús. Quénora “Ji uru, bedióva cojedeca ji copaidaiyeta yaibécuva ñi curu, míye āmevu”, arejame Jesús.

<sup>24</sup>Jesús ñi que aimumu yu. Que barureca nuriéna coyuyubu yu. Iye caiye ji toivarí epeiye báque jāvetamu. Ji toivarí epeiye báque ñuja majivu jāvene.

<sup>25</sup>Jesús ñi đaiye báque caiye cuvū. Ëbenita caiye yore toivabevu yu. Caiye ñi teiye báquede paperare toivarí jēoru, paperatucuboa ure baju ñujebu. Caiye iye toivajūroede epeino cūbejebu ijāravui. Quénoramu.

# Jesús ñi yávaiye méne beorĩ coyucõjeimara ne ðaiye Espíritu Santoi paruéque

## Los hechos de los apóstoles

Mamabuĩnore coyuiyebu Lucas bácu ñi toivaiye báquede Jesús ñi yávaiye méne beorĩ coyucõjeimara ne ðaiye báquede Espíritu Santoi paruéque. Lucas bácu, judío ãmenejaquemavu. Jũoipõescu barejaquémavu (Col 4:11-14). Cucanũrejaquemavu Pablo bácuque (Hch 16:10). Diede toivarejaquemavu, buojacuyũ ñi toivaino mácarõre ñi buiye báquede ñi coyuiyeque Jesucristorã. Que baru Lc 24:50-53 aru Hch 1:1-11 máre coyurejaquemavu Jesús ñi muri nuĩno mácarõre cavarõ mearoi. Majidivũ ne dápiayipe maumena ñi jebeniburu yóboi ñi toivaino mácarõre Jesucristorã, toivarejaquemavu Jesús ñi yávaiye méne beorĩ coyucõjeimara ne ðaiye báquede Espíritu Santoi paruéque, añiũjua báquede 62-65 d.C. Ari ñi cuede ñi toivaiyede diede caivũ majibevũ.

Toivarejaquemavu ñai ãmu Teófilo bácuare aru apevũ judíoiva ãmevure, ne majinajiyipe ayũ aipe ina Jesús ñi yávaiye méne beorĩ coyucõjeimara mácavu ne coyuiyede, aipe judíoiva ne ju abede iye coyuiyede, aipe judíoiva ãmevũ ne ju aiyede diede, aru aipe jabova ne ðaiyede ina Jesús ñi yávaiye méne beorĩ coyucõjeimara mácavure. Yópe Jesús ñi coyucõjeiyepe ñi yávaiye méne “Jerusalécavure, Judeacavure, Samariacavure, aru pu caino joborõcavure máre” (1:8) nopedeca coavaiye buojaivũ iye toivaiye báquede: (1) ne coyuiyede Jerusalén ãmicuriĩmarocavure (1:1-6:7); (2) ne coyuiyede Judea aru Samaria ãmicurijoborõcavure (6:8-9:31); (3) aru ne coyuiyede apenoa joborõcavure máre (9:32-28:31), ina Antioquía ãmicuriĩmarocavure (9:32-12:24), ina Asia ãmicurijoborõcavure (12:25-16:5), ina Egeo ãmicuriya jia urada ĕcarucavure (16:6-19:20), aru ina Roma ãmicuriĩmarocavure máre (19:21-28:31).

### Espíritu Santo ñi daquino

(Mt 3.11; Mr 1.8; Lc 3.16; 24.49; Jn 1.33)

**1** <sup>1-2</sup> Mu, Teófilo, ji mamarũmu toivaiye báquede toivacacu yũ, mi majiquiyipe ayũ caiye iye Jesús ñi ðaiye báquede aru caiye iye ñi buiye báquede máre. Majicacacu yũ mure caiyede Jesús ñi memeni buijãravure, aru pu ñi cavarõ mearo Jũmenijicui curõĩ mujãravũita máre, jipacu Jũmenijicu ñi jacopaiyovaiyede ũre cavarõ mearo ñi curõĩ. Aru ñi muri nuquiyie jipocai, Jesús ðaicõjenejameða ñi yávaiye méne beorĩ coyucõjeimara ñi beoimara mácavure, Espíritu Santoi paruéque. <sup>3</sup> Aru caiye cuarenta pajãravua Jesús ñi yainfburu yóboi, ina ñi yávaiye méne beorĩ coyucõjeimara jávarejaimaða ũre cainũmu. Que baru jáve majidejaimaða na Jesús apũcure cojedeca,

nacajañu mácuire yainore jaruvarí. Ére járejaimada. Aru coyurejaimada náre Jūmenijicui jabotequiyede ūi pōevare.

<sup>4</sup> Jesús cūcu bácu náque cāreja, yópe arí, cōjenejaimada náre:

—Numejara muja Jerusaléne jocarí cāreja. Quéda corejarā ñaine, jipacui daroquimure mujare. <sup>5</sup> Juan Bautista bácu jádovame mujare Jūmenijicure ocoque. Ūbenita yu jádovacuyubu mujare Jūmenijicure pueno mearo baju obebejārvua yóboi. Darocuyubu mujare ñai Espiritu Santore, arejaimada náre Jesús.

**Jesús ūi muino ūmūi, cavarō mearo Jūmenijicui curōi**

(Mt 28.19; Mr 16.15, 19; Lc 24.47-48, 50-51)

<sup>6</sup> No yóboi, Jesús ūi yávaiye méne beorí coyucōjeimara cójijidejaimada ūque cūracū Olivocū āmicuricū puenoi. Aru jēniari járejaimada ūre:

—Mu, ñūje jabocu, ¿caride jaboteicōjequidica mu cojedeca majacavu, Israecavure? arejaimada na.

<sup>7</sup> Jesús arejaimada náre:

—Jipacu, ūi caivure jaboteiye boje, majibi aipijārvua vaiquíye jauřore. Ūbenita ū majicōjememi mujare iyede. <sup>8</sup> Jūmenijicu darocuyube ñai Espiritu Santore, ūi ñaicōjequiyepa ayu mujare. Que baru muja coyurājaramu ji yávaiye méne. Coyurājaramu muje jáiyede ji ñaiye báquede aru muje jáipaiyede ji coyuiye báquede máre. Coyurājaramu caivu ijārvucavure: Jerusalécavure, Judeacavure, Samariacavure, aru pu caino joborōcavure máre, arejaimada Jesús.

<sup>9</sup> Que arí yávaiyeda, Jesúre jacopaiyovarejaquemavu Jūmenijicu náre jocarí, cavarō mearo ūi curōita. Ūi muivedeca ocopenibo darí, ūre taorejavūya. Quénora jámenejaimada ūre. <sup>10</sup> Ne járiduiyedeca cavarōre Jesús muri bíjayure, cūinā, pucarā ūmūva doivu boricajea cuitótecajeare núrejaimada ne yebai. <sup>11</sup> Ina pucarā ángeleva jēniari járejaimada náre:

—Muja, Galileacavu, ¿aipe teni yui núri jáivurū muja cavarōre? Ñai Jesús muñu mácu mujare jocarí cavarō mearo Jūmenijicui curōi copaidacuyube cojedeca ijārvui cavarō mearore jocarí yópe ūi muipenedeca, arejaimada.

**Matíare ne beoino Judas bácu ūi yaiye boje**

(Mt 3.16; 10.2-4; 27.3-8; Mr 1.9; 3.16, 19; 16.19; Lc 3.21; 6.14-16; 24.51)

<sup>12</sup> No yóboi, Jesús ūi yávaiye méne beorí coyucōjeimara copainurejaimada cūracū Olivocū āmicuricūre jocarí Jerusalén āmicurīmaroi. Cūinākilometro vaivárejaimada na. Yópe judíova ne jabuóvaujārvui nuicōjeiyepe vaivárejaimada na. <sup>13</sup> Ne eaiyede diimaroi, ecorí, nurí cūinādami cūramí, ūmucatucubuita, ne curitucubui, ecorejaimada na: Pedro, aru Juan, Santiago, Andrés, Felipe, Tomás, Bartolomé, Mateo; apecu Santiago, Alfeoi mácu; Simón āmicucu Celote, aru Judas, apecu Santiago jicu máre. <sup>14</sup> Obedijārvua Jūmenijicue jēniari, cójijivu barejáimada na nore. Jesúi yóva, María, Jesúi paco, aru apevu nomiva máre, caivu ina cūináturu ne ūme Jūmenijicue jēniarejaimada na.

<sup>15</sup> Obebejārvua yóboi, Jesúre ju aipōeva cójijidejaimada. Ciento veinte paivu baju barejáimada na. Aru Pedro nacajari arejaimada náre:

<sup>16</sup> —Muja, jívu, jave vaivú yópe Jūmenijicui toivaicōjeiye báquepe David bácuire Espiritu Santoi paruéque. Judas bácu jēni jiame Jesúre ūi mauvare.

<sup>17</sup>Ë mácu, majacacu bácu, yóvayu bateáme majare. Que baru ñ mácu máre Jesús ñi beoimú mácu bateáme, ñi memequiyepé ayu majaque, arejamedá náre Pedro.

<sup>18</sup>Jesúre ñi jēni jíquiye jipocai, Judas bácu jacopurejamedá tātuturare, ñi Jesúre jēni jíye boje, ñi ámeina teiye boje. Iye tātuturaque apevu bojedarejaimada cūináro joboróre. No joboróre ñi baju boarí jaravaiyucu, ñmúi turí darí ñi baju bíjarejamedá Judas bácu. Aru ñi curabo etarejavūya joboróita. <sup>19</sup>Caivu Jerusalén ámicuríimarocavu jápiarejaimada ñ mácu borore. Que baru ne yávaicamuaque ámidorejaimada no joboróre Acéldama ámicuró, Jivecuró aiyuró. <sup>20</sup>Pedro are ñurejamedá ina Jesúre ju aipōevare yópe:

—Jave toivarejaquemavu iye toivaiye báque Salmos ámicurói yópe Judas bácu borore:

Ëi curó mácaró pōecubeno majaróri. Ñame cubejarári nore, arí toivarejaquemavu.

'Aru yópe toivarejaquemavu apeno Salmoi:

Apecu ñajacurí ñi memeino mácaróre, arí toivarejaquemavu.

<sup>21-22</sup>'Que baru apecu yóvajacurí ñujare, ñ máre coyucuyu pōevare ñujape: "Majivu yu Jesús apucure. Ëre jácacu yu, nacajañure yainore jaravari", arí coyucuyume ñ. Ë majacurí cūinácu nácacu ina ñujaque curivu bácvu jaravua coapa Jesús ñi cuiyede ñujaque, Juan Bautista bácu ñi jádovari buiyede pōevare Jūmenijicure ocoque, aru pu Jesús ñi mujāravuita cavaró mearo Jūmenijicui curói, arí coyurejamedá náre Pedro.

<sup>23</sup>Ëi coyuríburu yóboi, ina pōeva jádovarejaimada pucarā ñmuvare, nácavure, cūinácu ñi ámiá José, ne ámidoimú Barsabás aru apenumua ne ámidoimú Justo, aru apecu máre, ñi ámiá Matías. <sup>24-25</sup>Yópe arí, jēniarejaimada ina Jesúre ju aipōeva Jūmenijicure:

—Mu, ñuje jabocu, me majivu mu caivu pōeva ne dápaiyede. Que baru jēniavubu mure. Majide ñajacu ñujare ñamene ina pucarā ñmuvare mi beoimure, ñi memecaquiyepé cūináturu ñujaque mi yávaie méne beorí coyucōjeimaraque. Judas bácu ñajocame mi yávaie méne coyuinore, ñi ñuiyede toabo cūiméboi, ñi ámeina teiye báque boje. Que baru apecu mi yávaie méne beorí coyucōjeimú jaubi, arí jēniarejaimada na.

<sup>26</sup>Ne jēniariburu yóboi, ñuvarejaimada cūrayabeare, ina pucarā ñmuva ne ámiáque. Aru turejavūya diyabe Matías ñi ámiáque. Que baru ñ máre, apevu once paivuque, Jesús ñi yávaie méne beorí coyucōjeimú tedejamedá Matías.

#### **Espíritu Santo ñi edaino Jesúre ju aipōevare**

**2** <sup>1</sup>Pentecostés ámicuríjaravu eaiyede, caivu ina Jesúre ju aipōeva cójijidejaimada cūinádami cūrami jívui. <sup>2</sup>Cūiná jápiarejaimada uraró bujinore yópe ñmēvu paruró japuinope. No bujino darejavūya cavaróre jocarí. Aru caivu ina dobarivu ñiñami jívui jápiarejaimada no bujinore. <sup>3</sup>No yóboi, járejaimada ñre toa qujino uruino yópe jemedope. Tubarejavūya caivure, náre coapa. <sup>4</sup>Caivu ina pōeva cuvarejaimada ñai Espiritu Santore. Náre yávaicōjenejamedá. Aru yávarejaimada apecamua yávaicamua ne majibecamua, yópe ñai Espiritu Santo yávare ñaiyepé náre coapa.

<sup>5</sup>Nore Jerusalén ámicuríimaroi judíova caino joborōcavu curejaimada dijāravuare. Ina judíova cainumua jídejaimada mearore Jūmenijicure.

<sup>6</sup>Ne já pia iyede iye vaiyede, obedivũ ina judíova cójijidejaimada. Aru jápiarejai mađa caivũ na coapa Jesúre ju aipõeva yávaivure ne yávaicamuaque. Que baru pare cuecumarejaimada na. <sup>7</sup>Cuecumari, pare dápiaivũ arejaimada na:

—Járijide apa. ¿Galileacavũ ámeni caivũ ina yávaivũ? <sup>8</sup>¿Aipe teni caivũ ñuja jápiaivuba náre yávaivure ñuje yávaicamua coapa? <sup>9-10</sup>Yui curivubu apevũ Partiacavũ, aru apevũ Mediacavũ, apevũ Elācavũ, apevũ Mesopotamiacavũ, apevũ Judeacavũ, apevũ Capadociacavũ, apevũ Pontocavũ, apevũ Asiacavũ, apevũ Frigiavũ, apevũ Panfiliacavũ, apevũ Egiptocavũ, apevũ Áfricavũ, aru apevũ Cirenecavũ máre. Aru apevũ Romacavũ máre curivubu yui. Apevũ majacavũ judíovabu, ne põeteiye báque boje nópe, ne cuvæ boje nébucvũ judíova. Aru apevũ majacavũ judíova ámevũ, ũbenita ju aivubu judíovai bueiye. <sup>11</sup>Curivubu apevũ Cretacavũ aru apevũ Arabiacavũ máre. ũBenita maja jápiaivubu náre yávaivure maje yávaicamua coapa. Coyũivubu majare Jũmenijicui urarõ mearo ñainore ũi paruéque, arejaimada ne bajumia.

<sup>12</sup>Cuecumaivũ aru jápiarĩ eabevũ cãreja, jẽniari járe cuivũ barejáimada ne bajumia:

—¿Aipe ñarĩ jápiarĩ earãjidica maja caiye iyede? arejaimada na.

<sup>13</sup>Ŭbenita apevũ yurivũ arejaimada ina Jesúre ju aipõevare:

—¡Ina ũmũva pacovatamu! arejaimada.

#### **Pedro ũi yávaino põevare**

(Mt 22.44; 27.35; 28.5-6; Mr 12.36; 15.24; 16.6; Lc 20.42-43; 23.33; 24.5; Jn 19.18; 1 Co 15.25; He 1.13)

<sup>14</sup>Dinũmũma Pedro nacajari, núri apevũ once paivũ Jesús ũi yávaiye méne beorĩ coyũicõjeimaraque parurõreca coyũrejameđa caivũ ina obedivũ põevare, ne jápiarĩ earãjiyepe ayũ iye ne jáiye báquede aru ne jápiaiye báquede máre.

—Muja, judíova, jívũ, caivũ muja Jerusalécavũ, caride coreóvajarã diede, ñuje majiéde. Jápiajarã yũre. Aru me jápiarĩ adajarã ji coyũquiyede mujare. <sup>15</sup>“Pacovabebu”, arĩ dápiaivubu apevũ mujacavũ ñujare. Ŭbenita javejĩnamu, nueve bajĩ caride. Que baru pacova ámevũ ñuja. <sup>16</sup>“Pacovabebu”, arĩ dápiabejarã muja ñujare. Que baru põecu cubebi pacoteyũ javejĩnare. Quénora ñuje ñaiyede yópe coyũcarejaquemavũ Jũmenijicui yávaiyede coyũcaipõecu bácu, ũi ámiá Joel.

<sup>17</sup>Jũmenijicu arejaquemavũ: “Yópe ñacũyũmu yũ añijãravũa buojaquijãravũa baquiyéna. Darocũyũmu ji Espĩriture caivũ põevare. Mujemara, aru mujemaromiva máre, Jũmenijicui yávaiyede coyũcarãjarama. Mujacavũ ũmũva bojũvũ apurivure yópe decoboainope majide ñacũyũmu yũ. Aru mujacavũ ũmũva bucũvare majide ñacũyũmu yũ decoboainoque. <sup>18</sup>Jãve añijãravũa baquiyéna darocũyũmu ji Espĩriture yũre memecaipõevare, ũmũvare aru nomivare máre, ne coyũcarãjiyepe ayũ ji yávaiyede. <sup>19</sup>Ñacũyũmu yũ põeva ne jámene cavarõĩ aru ne ñarĩ majibede joborõĩ. Aru põeva járajarama jivede, toare, aru bicore máre, caino jidojarõ, ji jáđovaquiyẽ jipocare náre. <sup>20</sup>Jũmenijicui ñãjiovaquijãravũ baquinó

jipocare pōevare, ne āmeina teiye boje, ñai aviá pēomecuyume. Quédata ñemitecuyume ũ. Aru aviá ñamicacu máre jūatecuyume yópe jivepe. Yópe vaiquýebu maje jabocu Cristo ũi daquijāravu baquinó jipocare. Pōeva járājarama űrarō ne ñarī majibede. Aru ne jáiyede diede pare cūcumarajarama na. <sup>21</sup> Dijāravua baquiyéna meadacuyumu caivu ina órejavure yure ji cadatequiyepa aivure náre. Ícuyumu náre abujuvai jabocu paruéde jocarī”, arejaquemavu Jūmenijicu, coyucarejaquemavu Joel bácu.

<sup>22</sup> Muja, Israecavu, me jápiajarā ji coyūquiyede mujare. Jūmenijicu jāve jádovaquemavu mujare ũi daroimu mácure, ũi me jáimure, Jesús Nazarecacure. Que baru Jesús dáme ũi ñaiye báquede Jūmenijicu paruéque, pōeva ne jámene, aru ne ñarī majibede, aru ape paruéque ñaiyede máre muje jēneboi. Que baru mujavacari majidivubu caiye iye jāvene. <sup>23</sup> Ñai Jesús Jūmenijicu javede jēni jicōjenejaquemavu, yópe ũi űrōpe aru ũi majiéque máre. Que baru jēni jíquemavu űre mujare. Aru muja boarī jaruvaicōjeavu űre, āmeina teivure ne pēvarajiyepa aivu űre jocucjaravena. <sup>24</sup> Ūbenita Jūmenijicu nacovaquemavu űre yainore jaruvārī. Jesús yaiyú bácuvacari, mautebeteame yaiyú bácupe. Que baru Jūmenijicu jebequemavu ũi ñájiye báquede ũi yainore. <sup>25</sup> Javede ñai jabocu David bácu, yópe arī, Jūmenijicu yáviyede coyucarejaquemavu Jesúrā:

Cainumua jácacu yu ji jabocure ji jipocai. Ū cūbi ji yebai. Que baru apevu cārijovari buojabenama yure. <sup>26-27</sup> Mu, Jūmenijicu, dajocabecubu mu ji ũmene ina yaivu bácuva ne curōi. Pojeicōjemecubu mu ji bajure, ji meacu baju boje, aru ji memecaiye boje mure. Que baru torojvu yu ji ũmei. Aru torojurī yáviavu yu. Caivu pōevape páyu, yu máre yaicúyumu. Ūbenita apucu jabuóvaivu yu, ji coreiye boje mi mearo ñacaquiyede yure. <sup>28</sup> Mu jádovaivu yure ye ñaiye jaurōre cūcuyure múque. Aru mi cue boje yúque cainumua, űrarō torojvu yu mure, arī coyucarejaquemavu David bácu Jesús ũi coyuiye báquede Jūmenijicure.

<sup>29</sup> Muja, jivu, jāve coyuiyavu mujare majeñecu mácū David bácu borore. Ū mácū yaidéjaquemavu. Aru jaruvarejaquemavu ũi baju bácarōre cūracobei. Maja cari curivubu joabenoí dicobede. <sup>30</sup> Ñai David bácu apucu cāreja, Jūmenijicu yáviyede coyucaipōecu barejaquéma. Majidejaquemavu Jūmenijicu jāve ñacuyure yópe ũi aiye báquepedeca űre. Jūmenijicu coyurejaquemavu David bácu, “Yópe jāve ñacuyumu” arī: “Mu, David, yópe mearo ñacacuyumu yu mure. Cūinacu mipāramenacacure jaboteicōjecuyumu yu, yópe ji jaboteicōjeiyepedeca mure”, arejaquemavu Jūmenijicu David bácu. <sup>31</sup> David bácu Jūmenijicu yáviyede coyucaipōecu barejaquéma. Que baru majidejaquemavu Jūmenijicu ñaiyede. Die majiéque coyurejaquemavu ñai Cristoi borore, yópe arī: “Jūmenijicu dajocabecube űre yaivu bácuva ne curōi. Ū bajure máre pojeicōjemecube űre”, arī coyucarejaquemavu Jūmenijicu yáviyede David bácu. <sup>32</sup> Ñaineca Jesús Jūmenijicu nacovaquemavu yainore jaruvārī. Aru caivu ñuja űre jácarā apucure cojedeca ũi yainiburu yóbore. <sup>33</sup> Jūmenijicu nacovari Jesús epequemavu űre ũi meapūravui. Ñai meapūravui cūcu paruéde cūvabi. Aru jípacu Jūmenijicu daroquemavu űre ñai Espiritu Santore, yópe ũi aiye

báquepedeca. “Darocuyumu mure ñai Espíritu Santore”, jipocamia aquemavu Jūmenijicu Jesúre. Aru Jūmenijicu Jesúre daroicōjeimi ñai Espíritu Santore ñujare máre. Que baru Jesús ñaibi caiye iye muje jáiyede, muje jápiayede máre cari járavure. <sup>34</sup> Ñbenita David bácu muri numenejaquemavu cāreja cavarō mearo Jūmenijicui curōi yópe Jesús ñi muiye báquepe. Que baru David bácu arejaquemavu yópe:

Jūmenijicu aquemavu ji jabocure: “Dobajacu ji meapūravui mi cūvae boje paruéde yūpedeca. <sup>35</sup> Aru yu epecuyumu mi mauvare mi cuboba cāchinoi. Que teni mure vainí jaruvare ñacuyumu yu náre, mi jabotequiyeye ayu náre”, arejaquemavu David bácu Cristorā.

<sup>36</sup> Caivu muja Israecavu jáve majijarā iyede: Ñai Jesúvacaribe muje jocusujaravena pēvaicōjeimu mácu, ji coyuiumu mujare. Ñbenita Jūmenijicu epei ñai Jesúre maje jabocuva. Ñrecabe Jūmenijicui daroimu mácu, arejameda Pedro ina pōevare.

<sup>37</sup> Aru ina pōeva, ne jápiayede caiye ñi coyuiyede náre, cārijinejaimada. Que baru arejaimada Pedrojāre:

—Muja, ñujevu, ¿aibe ñarājidi ñuja? arejaimada na.

<sup>38</sup> Pedro arejameda náre:

—Caivu muja jaruvajarā muje āmeina teiyede. Aru oatuvajarā muje ñaiyede. Jáðovajara Jūmenijicure ocoque muje Jesúre ju aye boje, Jūmenijicu ñi ārumetequiyeye aivu muje āmeina teiyede, aru ñi daroquiyeye aivu mujare ñai Espíritu Santore. <sup>39</sup> Mujare, mujemarare, mujepāramenare máre, aru caivu ina joai curivure máre darocuyume cāreja Jūmenijicu ñai Espíritu Santore yópe ñi aye báquepedeca. Caivu ñi cutuiyumarare meadacuyume ñi, arejameda Pedro.

<sup>40</sup> Aru Pedro coyure ñurejameda náre parurōreca, urarō ñi coyuiyede, ne ju arājiyeye ayu Jesúre.

—Ina āmeina teivu pare ñájinajarama. Jūmenijicu meadajacurī mujare, muje ñájimenajiyeye ayu ne ñájinajiyeye, arī coyurejameda Pedro.

<sup>41</sup> Que ayure jápiarī, obedivu ina pōevacavu ju arejaimada iye ñi coyuiyede. Aru Pedrojā jáðovarejaimada náre Jūmenijicure ocoque. Que teni, dijāravure cójjijidejaimada apevu yóbecurimil paivu baju Jesúre ju aipōevaque.

<sup>42</sup> Yópe ñare cuivu barejáimada járavua coapa. Jesús ñi yávaiye méne beorī coyucōjeimara bueivu barejáimada náre. Cadateivu barejáimada ne bajumia. Ne cūvaede jívū barejáimada ne bajumia. Caivu āivu barejáimada cūināromia. Aru caivu jēniaivu barejáimada Jūmenijicunque máre cūináturu.

### **Jesúre ju aipōeva mamarumucavu ne ñaino**

(Hch 4.32-35)

<sup>43</sup> Jesús ñi yávaiye méne beorī coyucōjeimara ñare cuivu barejáimada ñare pōeva ne jámene, ne ñarī majibede máre. Aru iye ne jáðovaiyede jári, caivu cūcumarejaimada pare. <sup>44</sup> Caivu ina Jesúre ju aipōeva, cūináturu ne ũme, cadateivu barejáimada ne bajumia. Nácavu cūve cūvarivu jívū barejáimada apevu nácavure jauéde, cubenajiyeye aivu cōmaje ārojarivu ne jēneboi. <sup>45</sup> Cūinácū nácacure jauu, apevu nácavu bojedarī ne cūvaede, jívarejaimada ñai cūvabecure jauéde. <sup>46</sup> Caijāravua cójjijivarejaimada Jūmenijicui cūrami. Aru cójjijivarejaimada ne cūramia coapa, ārajivu. Torojurī ávarejaimada na

ne ñme méque. <sup>47</sup>Jíwarejaimada mearore Jūmenijicure. Que baru caivũ apevũ pōeva me járejaimada náre. Pudearejaimada náre, ina Jesúre ju aipōevare. Aru caijāravua Jūmenijicu cójijovarejaquemavũ apevũ ñi meadaimarare.

### Pedro aru Juan ne meadaino cuiye majibecure

**3** <sup>1</sup>Cūinájāravũ, tres baji nainú, Pedro Jūamaque muri nuivũ barejáimada Jūmenijicui cūrami. Dora cūináora judíova ne Jūmenijicuque jēniaiora barejávũya. <sup>2</sup>Cūinácobe Jūmenijicui cūrami jedevacobe yebai, Meacobe āmicurijedevacobe yebai, curejamedá cūinácu ũmu, cuiye majibecu. Ñai ũmu pōetedejamedá cuiye majibecu. Caijāravua apevũ ũre nuvari epevarejaimada yo jedevacobe yebai, ñi jēniaquiyeye aivũ tātuturare ina Jūmenijicui cūrami ecoivure. <sup>3</sup>Ū jāñũ mácu Pedroro aru Jūare máre ecoivure, jēniaridurejamedá tātuturare náre. <sup>4</sup>Ūbenita ina pucarā pare járejaimada. Aru Pedro arejamedá ũre:

—Jájacu ñujare, arejamedá.

<sup>5</sup>Ūi que aiyede, ñai ũmu járejamedá náre, “Jínajivubu yure”, arĩ dāpiarĩduyũ. <sup>6</sup>Dinũmu Pedro arejamedá ũre:

—Tātuturare cuvabevũ yu. Ūbenita jíquijivũ mure ji majié cuvade. Jesús Nazarecacu ñi āmiái, ñi paruéque, nacajari cuicōjeivũ mure, arejamedá Pedro.

<sup>7</sup>Que ayũva, ñi purũ meapūravure jēni, Pedro nacovarejamedá ũre. Cūiná ñi cuboba, ñi cubochiārũa máre, tututedejavũya. <sup>8</sup>Maumejiena biarārĩ, nūri ñi cubobare, vaivārĩ būrejamedá ũ, cuiye majibecu bácu. Ecorejamedá Jūmenijicui cūrami náque. Vaiváyu barejámedá. Biaráyu barejámedá. Aru yópe arĩ, mearore jíyu barejámedá Jūmenijicure: “Jūmenijicu meacu bajube”, ayũ barejámedá ñai cuiye majibecu bácu. <sup>9</sup>Obedivũ pōeva járejaimada ũre vaivávyure. Aru jápiarejaimada ũre, “Jūmenijicu meacu bajube”, ayũre. <sup>10</sup>Ne coreóvayiede ũre ñai tātuturare jēniari dobacu bácu Jūmenijicui cūrami jedevacobe yebai, pare cucumarejaimada na, ñai ũmu ñi meateiye boje.

### Pedro ñi yávaino pōevare Salomón mácuĩ cuinoi

(Mt 22.32; 27.15-23; Mr 15.6-14; Lc 23.13-23;

Jn 19.12-25; Hch 7.37; Gá 3.8; Fil 2.7-9)

<sup>11</sup>Ñai ũmu jēiyede Pedroro aru Jūare máre, ina obedivũ pōeva cucumaivũ cūyarejaimada ne yebai Jūmenijicui cūramiacuino, Salomón mácuĩ cuino āmicurói. <sup>12</sup>Pedro jāñũ mácu ina pōevare, arejamedá náre:

—Muja, Israecavũ, ¿aipe teni cucumaivurũ muja? ¿Aipe teni jáivurũ ñujare? ¿Dāpiaivurũ cure ñavure ñai ũmure ñuje paruéque, o ñuje me boje Jūmenijicui jáinore? <sup>13</sup>Abraham mácu, Isaac bácu, aru Jacob bácu máre, majeñecuva mácavũ ne ju aimũ, Jūmenijicu, jádovaimi ũre memecaipōecu Jesús ñi paruéde. Ñai Jesúrecabe muje jēni jícaimũ mácu muje jabovare, ne boarĩ jaruvārājiyeye aivũ ũre. Aru ñai jabocu Pilato ñi jaetovaiyuede, ũbeteavũ mujavacari. <sup>14</sup>Ñai Jesús cainumua memecayũ bateáme Jūmenijicure. Aru cainumua ñayũ bateáme mearore Jūmenijicui jáinore. Ūbenita muja ũbeteavũ ũre. Quénora muja jēniavũ Pilatore, ñi jaetovacaquiyeye aivũ mujare ñai boaipōecure, Jesúre jaruvarĩ. <sup>15</sup>Que teni mujavacari boarĩ jaruvaicōjeavũ ñai jíyure pōevare jāravũ cūimējāravũ

baquinóre. Ëbenita Jūmenijicucapūravu nacovaquemavu ũre yainore jaruvārī. Ñjavacari jácara ũre apucure cojedeca, ũi yainĩburu yóbore. <sup>16</sup> Jesúvacari, ũi paruéque, meadacube ñai cuiye majibecu bácare. Caride muja jári majidivubu caiye iye vaiyede ũre, ũi dápiaye boje, yópe arī: “Jesús meadayu majibi”, arī dápiacube ũ. Aru ũi ju aiye boje Jesúre, meateibi ñai ũmu muje jáiyede.

<sup>17</sup> Muja, jívũ, majívũ yũ. Muje ðaiye báquede aru muje jabova ne ðaiye báquede Jesúre boarī jaruvaivu coreóvabeteavũ muja diede. <sup>18</sup> Javede caivu ina Jūmenijicui yávaivede coyucaipōeva mácavu coyurejaimada ũra, pōeva ne coreóvarājiyepe aivu ũi daroimu mácu Cristoi urarō ñájiqiyede. Aru nópe ne coyuiye báquepedeca vaiávũ Jesúre. <sup>19</sup> Que baru chōjara muja muje ãmeina teiyede. Aru oatuvajarā muje ðaiyede. Vojarā Jūmenijicure, ũi jaruvaquiyeyepe aivu muje ãmeina teiyede, aru diede máre ũi ãrumetequiyeyepe aivu. <sup>20</sup> Muje yópe ðaru, Jūmenijicu parure ðacuyume mujare muje ũmei. Aru darocuyume mujare Jesúre, ñai ũi beoimu mácare, mujare meadacuyure. <sup>21</sup> Jesús ũi mauteino javvu cavarō mearo Jūmenijicui curōi pu dijāravu baquinói, Jūmenijicui caiyede mamaene cuedaquijāravuita bediōva cojedeca. Javede Jūmenijicui yávaivede coyucaipōeva mácavu, Jūmenijicure cūinácũra memecaivu, coyucarejaimada Jūmenijicure, pōeva ne majinajiyeyepe aivu diede. <sup>22</sup> Nopedeca, Moisés bácu arejaquemavu: “Jūmenijicu, muje jabocu, darocuyume mujare cūinácu ũi yávaivede coyucaipōecure, yópe ũi daroiyeyepe yure. Ë macuyũme cūinácu mujacacu. Judío bacuyũme ũ. Me jápiajarā ũre. Ðajarā yópe ũi coyuiyeye. <sup>23</sup> Ácu pōecu ũi jápiabedu ũre, Jūmenijicu coavacuyume ũre ũi pōevare jaruvārī”, arejaquemavu Moisés bácu.

<sup>24</sup> Sa muel bácu aru ũi yóbocavu bácvũ, aru apevu Jūmenijicui yávaivede coyucaipōeva mácavu máre coyurejaquemavu iye vaquiyede añjāravua baquiyéde. <sup>25</sup> Jūmenijicu coyucōjenajaquemavu ũi yávaivede coyucaipōeva mácvure, yópe arī: “Yũ, Jūmenijicu, mearo ðacacuyumu mujare”. Aru “mujare” ayũ Jūmenijicu, majeñecuva mácvure aru majare máre ayũ barejaquemavu. Jūmenijicu “Yũ mearo ðacacuyumu mujare” ũi aiyede apecu oatuvārī buojabebi diede. Aru Jūmenijicu baju oatuvabebi ũi que aiyede. Que baru mujavacari jáve jacopurājaramu Jūmenijicui mearo ðacaquiyede. Mearo ðacacuyume mujare máre. Nopedeca arejaquemavu ũ Abraham mácare: “Mipāramena māravivure mearo ðacacuyumu yũ. Mure mearo ðacaiye báquepedeca ijāravucavu apevu caivure máre mearo ðacacuyumu yũ”, arejaquemavu Jūmenijicu. <sup>26</sup> Aru beorejaquemavu Jesúre, ũre memecaipōecure. ũre nacovariburu yóboi, daroquemavu maje yebai mamarumure. Que ðarī Jūmenijicu mearo ðacaquemavu majare, ũi jaruvaicōjeiye boje majare maje ãmeina teiyede, arejameda Pedro ina pōevare.

**Pedro aru Jūamaque ne boroteino jabova yebai**

(Mt 21.42; Mr 12.20-22; Lc 20.17; Jn 14.6; 1 P 2.7)

**4** <sup>1</sup> Pedro aru Juan máre yópe yávaivedeca ina pōevare, apevu sacerdotevacavu, aru Jūmenijicui cūramine coreipōevai jabocu, aru saduceovacavu máre nurejaimada ne yebai. Saduceo ãmicuriyajubo judíovacavu barejáimada na. Dápiarejaimada nacajaino cubenore yainore jaruvārī. <sup>2</sup> Jararejaimada Pedrojäre ne bueiye boje. Pedrojā arī buedejaimada:

—Jesús nacajaquemavu yainore jaruvarí. Aru maja máre nacajarajaramu yainore jaruvarí, arejaimada Pedrojá.

<sup>3</sup> Jaraiavu Pedrojáre, ina saduceovajá náre jēni, āmeina teivure jēni jacoñami nuvaicōjenejaimada churaravare. Jave nainú marejávūya. Que baru cōmiáijāravuita jabova ne āmeina teivure jēniari jáñami nuvarajivu barejáimada náre. <sup>4</sup> Ūbenita obedivu pōeva, ne bueiye de jápiaivucavu bācavu, ju arejaimada Jesúre. Ina pōeva mamarumu ju aivu Jesúre dijāravure cūinápurupe paimil paivu baju ūmuva marejáimada na. Obedivu nomiva máre ju arejaimada ūre.

<sup>5</sup> Cōmiáijāravu ina judíovai jabova, aru bucava, aru Jūmenijicu yávaiye de buiepōeva máre cōjijidejaimada Jerusalén āmicuríimaroí. <sup>6</sup> Apevu ina jabovacavu barejáimada sacerdotevare jaboteipōecu ūi āmiá Anás, aru Caifás, Juan, Alejandro, aru apevu Anás jinacavu. <sup>7</sup> Cōjijivu bācavu, dāvaicōjenejaimada Pedrojáre ne yebai aru núicōjenejaimada náre ne coricai. Que teni cūinācu nācacu jēniari járejamedā Pedrojáre:

—¿Namei paruéque meadarāru muja ñai cuiye majibecu bācure? arejamedā náre.

<sup>8</sup> Dinumu ñai Espíritu Santo Pedore dāicōjeñu, yávaicōjenejamedā ūre ūi ju aiyede náre.

<sup>9</sup> —Muja jabova, muja bucava máre, caride muja jēniari jáivu ñujare ñuje meadacaino mácarōre ñai cuiye majibecu bācure. Muja majiyuvu aipe darí meadaimu mácure. <sup>10</sup> Que baru coyuyubu mujare, muje majinajiyupe ayu, aru caivu Israecavu máre, ne majinajiyupe ayu. Jesús Nazarecavu ūi parué boje, ñai ūmu númi yui muje jáinoi, meacu baju. Nainecabe Jesús muje pēvari boarí jaruvaimu mácu. Ūbenita Jūmenijicu nacovaquemavu ūre yainore jaruvarí. <sup>11</sup> Aru Jūmenijicu toivaicōjenejaquemavu ūi yávaiye de yópe Jesúí borore: “Iva cūravare cūramine dāipōeva ūbeni jaruvaquemavu. Caride iva cūrava caiva apeva pueno parurivabu”, arejaquemavu Jūmenijicu. Nopedeca Jesús, muje ūbemū mácu, Jūmenijicu epeimume. Apevu pueno jabocu parucube ñai Jesús. <sup>12</sup> Que baru ūrecabe cūinācu pōevare meadāipōecu. Ijāravure apecu cubebi. Quécura Jesús, Jūmenijicu epeimū, pōevare meadayu buojai bi, ne ñājimenajiyupe ayu ne āmeina teiye boje, arejamedā Pedro cōjijinocavure.

<sup>13</sup> Ūre jápiaivu bācavu, ina cōjijinocavu cucumarejaimada, ne jáiyede Pedore aru Jūare máre yávaivure jidubevūva, ne coreóvaiye boje náre ūbeni curivure aru buebevū bācavure máre. Ūbenita majidejaimada Jesúí yóvaimara mácavure. <sup>14</sup> Járejaimada ñai ūmu meadaimu mácure ne jēneboi Pedro aru Jūaque máre. Que baru coyurí majibeni, bi arejaimada na. <sup>15</sup> Dinumu etaicōjenejaimada Pedrojáre ne cōjijitucubure jocarí. Ne etaríburu yóboi, ina jabova yávaivu barejáimada ne bajumia, yópe arí, jēniari járejaimada:

<sup>16</sup> —¿Aipe darājídica maja náre? Darāma na urarō pōeva ne darí majibede. Caivu Jerusalécavu majima ne dāiye báquede. Que baru maja ju abeni majibevū. <sup>17</sup> Ūbenita ne buebenajiyupe aivu apévure ne bueiye de, aru ne dābenajiyupe aivu pōeva ne darí majibede cojedeca, yávaicōjemenajarevu cojedeca Jesúí borore, arejaimada ina cōjijinocavu, ne bajumia yávaivu.

<sup>18</sup> Ne yávaríburu yóboi, órejaicōjenejaimada Pedore aru Jūare máre ne cōjijitucubui cojedeca. Aru parurōreca yávaicōjemenidurejaimada náre Jesúí borore.

—Bediôva cojedeca buebejarã muja Jesúi borore, arĩdurejaimada na Pedrojãre.

<sup>19</sup>Ubenita Pedrojãcapûravu arejaimada ina judíovai jabovare:

—Dápiarĩ majijarã muja. ¿Jûmenijicui jáinoi, ju arãjidi ñuja muje ãaicõjeiyede o Jûmenijicui ãaicõjeiyede? <sup>20</sup>Jave dápiarĩ majivu ñuja aipe ãaiye jaurõre ñujare. Ju aipe javuvu ñujare Jûmenijicui ãaicõjeiyede. Que baru apenore ãaiye majibevu ñuja. Quénora ãavubu yópe iye ñuje jáiye báquepe, aru yópe ñuje jápiaiye báquepe máre, arejaimada.

<sup>21</sup>Ina cójijinocavûcapûravu cojedeca yávaicõjemenidurejaimada náre parurõreca.

—Jesúi borore muje buedu, ñájine ãarãjivubu mujare, arejaimada Pedrojãre.

Ina pœvacapûravu torojurĩ mearore jídejaimada Jûmenijicure, Pedrojã ne ãaiye báque boje. Que baru ina cójijinocavu, yávaicõjemeniduvu, jaetovarejaimada náre. <sup>22</sup>Aru ñai ãmu, ne meadaimu mácu pœva ne ãarĩ majibeno ãaiyeque, cuarenta paivûa pûeno baju bucucu barejãmeda ñ.

**Jesúre ju aipœva ne jêniaino paruéde Jûmenijicucue**

(Mt 27.1-2; Mr 15.1; Lc 23.1, 7-11; Jn 18.28-29; Fil 2.7)

<sup>23</sup>Maumejiena etarĩburu yóboi cójijinore jocarĩ, Pedro aru Jûamaque copainurejaimada ne yóvaimara yebai. Aru coyurejaimada náre caiye ina sacerdotevare jaboteipœva aru ina judíova bucuvu máre ne coyuiye báquede náre. <sup>24</sup>Ina Jesúre ju aipœva jápiaivu bácvu Pedrojã borore, cûnáturu yópe arĩ, coyurejaimada Jûmenijicure:

—Mu, ñuje jabocu, caivu jabova pûeno meacu, cuedarejaquemavu mu cavarõre, aru joborõre, aru jia uradare máre, aru caivu nócvure, aru noi cuede máre. <sup>25</sup>Mu yávaicõjenejaquemavu ñujeñecu David bácvure, mure memecaipœcu bácvure, mi Espíritu Santo majiéque. Que teni David bácu arejaquemavu:

Judíova ãmevu jorojĩnajarama. Pœva dápiarãjarama ubenina ne ãarãjiyede. <sup>26</sup>Ijavûcvu jabova meadãrãjarama na ne baju. Aru ina ãmaroare cõjeipœva cójijinajarama, maucuvarãjivu Jûmenijicure aru ñi epeimu Cristore máre, arejaquemavu David bácu.

<sup>27</sup>Yópe David bácu ñi Jûmenijicui yávaiyede coyucaiye báquepe ãaiyede jávu ñuja. Yo ãmaroi ina jabova Herodes aru Poncio Pilato cójijiquemavu judíova ãmevucue aru apevu Israecavucue máre, maucuvarãjivu Jesúre, mure memecaipœcu meacu bajure, ñai mi epeimu Cristore. <sup>28</sup>Cójijiquemavu, ãarãjivu yópe “Dãrãjarama”, mi aino mácarõpe, mi majiéque, nópe arĩ, yãvarejaquemavu mu.

<sup>29</sup>Aru mu, ñuje jabocu, cõmaje ãroje jájacu ñujare, ne ñájine ãaiyue boje ñujare. Jidubevûva yãvare ãajacu ñujare Jesús ñi yávaie méne. <sup>30</sup>Ijimarare meadajacu náre coapa. Parure ãajacu ñujare ñuje ãmei, ñuje ãarãjiyepe ayu pœva ne jámene, ne ãarĩ majibede máre, mure memecaipœcu Jesús ñi ãmiái, ñi paruéque, arĩ jêniarejaimada Jûmenijicure na, Jesúre ju aipœva.

<sup>31</sup>Jêniari buojaiyede, ne curõ cújidejavûya pare Jûmenijicui paruéque. Aru ñai Espíritu Santo ãaicõjeñu, yávaicõjenejaquemavu náre. Que teni jidubevûva coyurejaimada Jûmenijicui yávaie méne.

**Caivũ ne cũave ne coavaino**

(Hch 2.44-45)

<sup>32</sup> Caivũ Jesúre ju aipõeva ne ũme aru ne dápiaye máre cũináturu barejáimada na. Nácacu cubedejameda “Yo jínomu” ayũ. Quénora caiye ne cũavede “Majemu”, arejaimada na, Jesúre ju aipõeva. <sup>33</sup> Jesús ũi yáviaye méne beorĩ coyucõjeimara parurõreca coyurejaimada apegũre: “Jácarã ñũja Jesúre nacajañũre yainore jaruvãrĩ”, arejaimada. Aru Jũmenijicu mearo ñacarejameda náre pare. <sup>34-35</sup> Nácacu cubedejameda jaũmu ũre apegĩe. Apevu ina joborõre cuvarivũ, cũramiare cuvarivũ máre, bojedaiyvũ barejáimada nẽnore. Aru ne bojedainore nuvari, jĩvũ barejáimada Jesús ũi yáviaye méne beorĩ coyucõjeimarare, ne coavarãjiyepe aivũ ina apegĩe jaumarare náre jaurõpe. <sup>36</sup> Cũinácũ nácacu yõpe ñarejameda, ũi ãmiá José. Ñai José levita ãmicuriyajibocacu barejáimada. Aru põetedejameda Chipre ãmicurijivui. Jesús ũi yáviaye méne beorĩ coyucõjeimara ãmidorejaimada ũre Bernabé, “cadateipõecu” aivũ. <sup>37</sup> Ë cũavacũ bácu joborõre, aru cũináro ũi joborõre bojedarejameda ũ, Bernabé. Bojedarĩburu yóboi, bojedainore nuvari, jĩdejameda diede Jesús ũi yáviaye méne beorĩ coyucõjeimarare, ne coavarãjiyepe ayũ. Que ñarejameda Bernabé.

**Ananías jímarepacomaque ne borocurõ**

**5** <sup>1</sup> Apevu curejaimada, ũi ãmiá Ananías, aru jímarepaco máre, õi ãmiá Safira. Ñai bojedarĩ jĩdejameda ũi joborõre. <sup>2</sup> Ne bojedainore ñni, apede ne bojedainoquede yaveni epedejameda nẽnova. Que teni apede ne bojedainoquede jĩdejameda Jesús ũi yáviaye méne beorĩ coyucõjeimarare.

—Ëju, yo caino ñũje joborõ mácarõ bojetamu, ũbenina arejameda Ananías Pedrojãre.

Jipocamia jímarepaco majidejacoða caiye iye ũi ñaquiye. <sup>3</sup> Ë jíniburu yóboi, Pedro arejameda ũre:

—Mu, Ananías, ñaibe teni abujuvai jabocu dápiaicõjeni mure yõpe mi ñainore, mi jujovãrĩduquiyepe ayũ ñai Espĩritu Santore mi yaveni epeiye apede yo bojedainoquede? <sup>4</sup> Mi joborõre bojedarĩ jĩquiye jipocai, mĩno cátevũ dijaborõ. Aru bojedarĩburu yóboi, iye tãutura máre mĩye batevũ. Que baru, ñaibe teni dápiacurũ mu mi ũmei iye ãmeina teiyede? Borocubevũ mu põevare quẽvũ. Quénora borocuvũ mu Jũmenijicure, arejameda Pedro ũre.

<sup>5</sup> Cũiná Ananías jãpiayũ bácu iye Pedro ũi coyuiyede, yainĩ turejameda joborõ. Aru caivũ ina jãpiaivũ ũi borore jidurejaimada pare. <sup>6</sup> Dinũmu apegũ bojuvũ earĩ, yaiyũ bácuĩ baju bácarõre cũmarĩ, nuvari, jaruvarejaimada ũ mácure cũracobei.

<sup>7</sup> Yóbecuriora yóboi, Ananías bácuĩ márepaco nurejacoða Pedrojã yebai. Ëbenita majibedejacoða cãreja jímarepacũ bácare jave yaiyũre. <sup>8</sup> Pedro jẽniari jãrejameda õre:

—Coyujaco yure. Ñyeba caiye tãutura muje bojedaino joborõ mácarõ boje? arejameda Pedro.

Õ ju arejacoða ũre:

—Jũju, quénora bojecuvũ, ũbenina arejacoða õ.

<sup>9</sup> Õi que aiyede, Pedro arejameda õre:

—¿Aipe teni borocuridurāru muja Jūmenijicui Espiritu Santore? Jājaco daivure ina mimarepacu bācure jaruvaivu bācavu, curivure jedevacobei caride. Mure märe nuvari, jaruvarājivubu, arejameđa Pedro.

<sup>10</sup> Aru cūinā ō märe yaini turejacoda joborōi Pedro ūi cuboba yebai. Ina bojovu ecori, yaiyō bācore jāri, ō mācore märe nuvari, jaruwarejaimađa jīmarepacu bācu yebai. <sup>11</sup> Que teni caivu ina Jesúre ju aipōeva aru apevu märe, ne jāpiaiyede Ananías bācu aru Safira bāco ne borore, pare jidurejaimađa na.

### Ūre pōeva ne đarī majibeno aru ne jāmeno märe

<sup>12</sup> Jesús ūi yāvaiye méne beorī coyucōjeimara đare nuivu barejaimađa ūre pōeva ne jāmene, ne đarī majibede märe. Aru caivu ina Jesúre ju aipōeva cójijide nuivu barejaimađa Jūmenijicui cūrami jīvui, Salomón mācui cuino āmicurōi. <sup>13</sup> Caivu ina Jesúre ju abevu cójijibedejaimađa ina ju aipōeva, ne jidué boje. Ūbenita caivu ina ju abevu me jāivu aru me yāvaiyu barejaimađa ina Jesúre ju aivure, nāre ne pueđaiye boje. <sup>14</sup> Apevu obedivu pōeva, ūmuva aru nomiva märe, ju arī Jesús ūi yāvaiye méne, cójijide nuivu barejaimađa Jesúre ju aipōeva. <sup>15</sup> Jesús ūi yāvaiye méne beorī coyucōjeimara, ne đaiye boje pōeva ne đarī majibede, obedivu pōeva nuvare nuivu barejaimađa ijimarare ne parainoi, jūarajivu nāre tāibuai, Pedro nore vaiyú, ūi decocuque ūi taoquiepe aivu apevu ijimaracavure, ne meatenajiepe aivu. <sup>16</sup> Aru apeno īmajinoacavu obedivu eare nuivu barejaimađa Jerusalén āmicurīmaroi. Na märe ijimarare, aru abujuva ne īmamarare märe, nuvare nuivu barejaimađa. Aru caivu ne nuvaimara mācavu meadaimara marejaimađa na.

### Jabova ne nājine đaino Pedrojäre

(Mt 27.25; Jn 11.25; 14.6; Ro 6.4)

<sup>17</sup> Dinumu nai sacerdotevare jaboteipōecu aru ūre cadateipōeva, caivu ina saduceo āmicuriyabucavu, pare jorojinejaimađa Jesús ūi yāvaiye méne beorī coyucōjeimarare. Que baru ina saduceovacavu maucavari būrejaimađa nāre. <sup>18</sup> Nāre jēicōjeni, buorejaimađa āmeina teivure jēni jacoĩnami. <sup>19</sup> Ūbenita diñamimiareca cūinācu Jūmenijicui daroimu, āngele eari ne yebai, voacarī nāre diñami jedevacobede, jipocateđameđa nāre nore jocarī. Que teni arejameđa nāre:

<sup>20</sup> —Jūmenijicui cūrami nuvara muja. Aru coyujarā pōevare nore caiye iye yāvaiye méne jāravu cūimējāravu baquinóre, arejameđa nai āngele nāre.

<sup>21</sup> Ūre ju arī, miadāe tuiyede Jūmenijicui cūrami ecori, bueni būrejaimađa.

Dinumumia nai sacerdotevare jaboteipōecu ūre cadateipōeva que őrejaicōjenejaimađa caivu judíova bucavare, ne cójijnajiepe aivu caivure. Que teniburu, apevu ne coreipōevacavure davaicōjenidurejaimađa Jesús ūi yāvaiye méne beorī coyucōjeimarare āmeina teivure jēni jacoĩnamine jocarī ne cójijinoita. <sup>22</sup> Ūbenita ina coreipōeva ne eaiyede āmeina teivure jēni jacoĩnami, nore eabedejaimađa ina Jesús ūi yāvaiye méne beorī coyucōjeimarare. Que teni cójijinoi copainuri, yópe arī, coyurejaimađa ina cójijnocavure:

<sup>23</sup> —Ñuje eaiyede āmeina teivure jēni jacoĩnami, jedevacobe me bieicobede eavu nūja. Aru churarava nūrivu jedevacobe yebai coreivure märe eavu

ñuĵa. Ŭbenita jedevacobede ne voaiyede, eabeteĵu ina buoimara mácavure, arejaimada ina coreipõeva.

<sup>24</sup> Ne coyuiyede jápiaivũ bácavũ Jũmenijicui cũramine coreipõevai jabocu aru sacerdotevare jaboteipõeva máre pare cãrijini, “¿Aipe tedica na cari?” arĩ dápiairejaimada. <sup>25</sup> Dinũmũmia cũinácũ ũmũ ecorĩ ne cójijitucubui arejameda:

—Jápiajarã yũre. Ina muĵe ěnoare buoimara mácavũ caride Jũmenijicui cũrami jĩvui nũri bueivũbu põevare noi, arejameda.

<sup>26</sup> Aru coreóvarĩ ári curivure, ñai jabocu nũrejameda Jũmenijicui cũrami ina coreipõevaque, ne nũvarajiyepẽ ayũ Jesús ũi yávaiye méne beorĩ coyũicõjeimarare cójijinoi. Ŭbenita náre ámeno đabevũva nũvarejaimada, põevare ne jidũe boje. “Ñuĵe ámeno đaru náre, põeva cũraboaque đavari boarǵarama ñũjare”, arĩ dápiairejaimada na. <sup>27</sup> Ne eaiyede ne cójijitucubui, nũcójenejaimada ne buoimarare ina cójijinocavũ ne coricai. Sacerdotevare jaboteipõecu, yópe arĩ, jararejameda náre:

<sup>28</sup> —Ñũjavacari parũrõreca bueicõjemeniduvũ muĵare ãñũ ũmũ ũi borore. ¡Ŭbenita muĵa ju abevũ ñũjare! Bueivũbu muĵa muĵe bueiyede obedivure, caino Jerusalécavure. Náre coyuiyvũ muĵa, “Sacerdoteva boarĩ jarũvaicõjema Jesũre”, aivũbu muĵa, põeva ne ámeina járajyepẽ aivũ ñũjare, arejameda sacerdotevare jaboteipõecu.

<sup>29</sup> Pedrocupũravũ apevũ Jesús ũi yávaiye méne beorĩ coyũicõjeimaraque arejaimada ěre:

—Ju aiyẽ jaũvũ ñũjare Jũmenijicu ũi đaicõjeiyede põeva ne đaicõjeiye pũeno. <sup>30</sup> Muĵavacari Jesũre pẽvari boarĩ jarũvaicõjeavũ jocucũjaravena. Ŭbenita Jũmenijicucapũravũ, majeñecuva mácavũ ne jabocu, nacovaquemavũ ěre yainore jarũvari. <sup>31</sup> Aru nacovariburu yóboi, Jũmenijicu epequemavũ ěre ũi meapũravui. Ñai meapũravui cucũ parũede cuvabi. Que baru Jesũrecabe maje jabocu aru majare meadaipõecu máre, Israecavũ chĩori ne ámeina teiyede, oatũvari buojarǵiyepẽ ayũ ne đaiyede, aru Jũmenijicu ũi árumetequiyepẽ ayũ ne ámeina teiyede. <sup>32</sup> Ñuĵe jáiyẽ báque boje Jũmenijicu ũi đaiye báquede Jesũre, coyũvũbu muĵare iyede. Ñai Espĩritu Santo máre coyũyube Jũmenijicui đaiye báquede. Aru Jũmenijicu đaroyube ñai Espĩritu Santore caivũ ina ju aivure ěre, arejaimada Pedrojã.

<sup>33</sup> Ne coyuiyede jápiaivũ ina cójijinocavũ, pare jararejaimada Jesús ũi yávaiye méne beorĩ coyũicõjeimarare. Ne náre pare jaraiye boje, “Boarĩ jarũvaicõjenajarevũ náre”, arejaimada ina cójijinocavũ ne bajumia. <sup>34</sup> Ŭbenita cũinácũ cójijinocacu, fariseovacacu, ũi ámiã Gamaliel, nacajari, coreipõevare nũvaicõjenejameda Pedrojãre cójijitucubũre jocarĩ. Caivũ põeva me pũedarejaimada ěre, Gamaliède. <sup>35</sup> Pedrojã ne etarĩburu yóboi, Gamaliel yópe arĩ, coyũrejameda apevũ cójijinocavure:

—Muĵa, jĩvũ, Israecavũ, me dápiajarã muĵe đaiyvũde ina ũmũvare. <sup>36</sup> Áruĵara muĵa ãñũ Teudas bácu ũi đaino mácarrõre obediũva jipocai. “Parucũbu yũ. Me jabotequijivũ muĵare”, arejameda ũ mácũ põevare. Aru cuatrocientos paivũ ũmũva baju nũrejaimada ěque. Ŭbenita ne boarĩ jarũvaiyede ũ mácure, ěque nũivũ bácavũ coateni nũrejaimada na. Que teni ũ mácui đaiye báque bĩjarejavũya. <sup>37</sup> No yóboi, nopedecabu apecũ ũi đaino mácarrõ, ãñũ Galileacacu bácu, ũi ámiã Judas. Jabocui toivaicõjenuũmũ põevare ne ámiãre, corevayucũ náre, obedivũ põeva nũrejaimada ěque

máre. Aru úre máre ne boarí jaruvaiyede, úque nuivu bácvu coateni nurejaimada na. <sup>38</sup>Nopedecabu caride ina úmvaque. Coyuyubu mujare: Dabejará ámeno náre. Cārijovamejara náre. Pōeva ne daicōjenu iye ne daiyue aru ne bueiye máre, bījaquiyebu die. <sup>39</sup>Ūbenita Jūmenijicu ūi daicōjenu iye ne daiyue aru ne bueiye máre, bījabequiyebu die. Mūja maucuvavivu baru náre, maucuvajebu Jūmenijicure máre, arejamedā Gamaliel.

Aru ina cójijinocavu ju arejaimada ūi coyuiyede. <sup>40</sup>Que arī, ina coreipōevare davaicōjenejaimada Jesús ūi yávaiye méne beorī coyucōjeimarare cójijitucubui cojedeca. Ne eaiyede, ina coreipōevare jara popeicōjenejaimada náre, Pedrojāre. Aru jara popeniburu yóboi, ina jabova yávaicōjemenidurejaimada Pedrojāre cojedeca Jesúi borore. Que teniburu yóboi, jaetovarejaimada náre. <sup>41</sup>Aru Jesús ūi yávaiye méne beorī coyucōjeimaracapuravu torojurivu baju etarejaimada cójijinare jocarī. Torojurejaimada ne cuyoje teni nájiye boje, ne ju aiyē boje Jesúre. <sup>42</sup>Aru caijārvua Jūmenijicui cūrami aru ne cūramiai máre buede nuivu barejáimada, aru coyure nuivu barejáimada na iye yávaiye méne Jesúrā, Jūmenijicui epeimu mácūrā.

#### Siete paivu caateipōevare ne beoino

**6** <sup>1</sup>No yóboi, apevu obedivu Jesúre ju aipōeva jararī jūjuvaivu barejáimada ne bajumia. Nácavu griego ámicuricamuare yávaivu aru apevu nácavu hebreo ámicuricamuare yávaivu jaraivu barejáimada ne baju. Ina judíova griegore yávaivu arejaimada:

—Ñujacavu nomíopeva jacopubema mūje coavaiyede jārvua coapa. Que baru, “Mūja coapavabevu”, chíoiyu arejaimada.

<sup>2</sup>Que baru ina doce paivu Jesús ūi yávaiye méne beorī coyucōjeimara órejarī caivu ina Jesúre ju aipōevare ne yebai arejaimada:

—Ñuje dajocarū Jūmenijicui yávaiye méne coyuiyede, jínajivu nomíopevare aru apevu cōmaje ārojarivure máre náre jauéde, meamejebu no. <sup>3</sup>Que baru mūja, ñujevu, beojarā siete paivu mujacavure. Yópe bajarāri na: Pōeva ne pueðaimara, Espírītu Santo ūi daicōjeimara, aru majiéde cuvarivu bajarāri. Ñuja náre coapavaicōjenajivubu cōmaje ārojarivure. <sup>4</sup>Que teni ñujacapuravu cūináturu ñuje ūme jēniarajivubu Jūmenijicūque aru coyurājivubu ūi yávaiye méne, arejaimada na, Pedrojā.

<sup>5</sup>Ne coyuiye cojurejavūya caivu ina Jesúre ju aipōevare. Que baru beorejaimada Estebāre. Ū parurōreca ju ayu barejámeda Jesúre. Aru ñai Espírītu Santo daicōjenejamedā úre. Beorejaimada apevure máre: Felipe, Prócorore, Nicanore, Timóre, Parmenare, aru Nicoláre máre. Ñai Nicolás Antioquía ámicuriimarocacu barejámeda. Ū judío ámenejamedā. Ūbenita jipocamia ju arejamedā ina judíova ne bueiyede. <sup>6</sup>Náre beorī buojarī, nūvarejaimada náre Jesús ūi yávaiye méne coyucōjeimara yebai, ne jēniacarājiyepe aivu náre Jūmenijicūque, tuorī puruáque ne jipoburā náre coapa yópe judíova ne ðarī cōmajiyēpe, jāðovarajivu ne memeino buiyede.

<sup>7</sup>Aru apevu pōeva obedivu Jūmenijicui yávaiye méne coyuiyede jápiarī, ju arejaimada diede. Caijārvua apevu ne ju aiyede pueno baju obedivu ju aivu nurejaimada Jerusalén ámicuriimaroi. Aru apevu ina sacerdoteva máre ju arejaimada Jesús ūi yávaiye méne.

### Estebãre apevu ne jëino

<sup>8</sup> Esteban Jūmenijicui mearo đacaimu marejámeđa. Jūmenijicu me járejaquemavu úre. Que baru parure đarejaquemavu úre. Aru majide đarejaquemavu úre máre. Esteban đare cuyu barejámeđa urred pōeva ne jámen e, ne đarī majibede máre, pōeva jēneboi. <sup>9</sup> Ūbenita apevu ūmuva maucuvarejaimađa úre. Ina cūinádami judíovai cójijiňamicavu barejámeđa na. Ina Estebāi mauva marejámeđa Cirene aru Alejandría āmicuriĩmaroacavu, aru apevu Cilicia aru Asia āmicurijoborōacavu máre. Caivu ina judíova barejámeđa na. Esteban yebai nuri, jaraivu yávarī búrejaimađa na úque. <sup>10</sup> Ūbenita Esteban yávorejameđa urred majiéque, űai Espíritu Santoi paruéde űi cuvae boje. Que baru ina űi mauva ju arī majibedejaimađa na úre. <sup>11</sup> Que baru Estebāi mauva bojedarejaimađa apevu borocurivure. Aru ina borocurivu arejaimađa yópe:

—Esteban āmeina yávabi Moisés bácuře aru Jūmenijicure máre. Jápiaivubu űuja, űbenina arejaimađa.

<sup>12</sup> Yópe đarī jorovarejaimađa obedivu pōevare, judíova bucuvare aru Jūmenijicui yávaiyede coyui pōevare máre. Ina Esteban yebai nuri, úre jēni, jaruporejaimađa judíovai cójijiňami. <sup>13</sup> Dinumu davarejaimađa apevu borocurivure. Aru borocurī arejaimađa na:

—űai űmu cainumua āmeina ávaibi Jūmenijicui cūramine aru Jūmenijicui đaicōjeiyede űi coyuiye báquede Moisés bácuře máre. <sup>14</sup> űjavacari jápiaivubu ű ayure yópe ānu Jesús Nazarecacui borore: “Jesús jaruvacuyume diňami Jūmenijicui cūramine aru oatuvacuyume caiye maje đarī cōmajiyede yópe Jūmenijicui đaicōjeiyede űi coyuiye báquede Moisés bácuře”. Que abi űai Esteban, ina borocurivu arejaimađa cójijinocavure.

<sup>15</sup> Aru caivu nore curivu me cocorī Estebãre járejaimađa űi jivare yópe ángelei jivape árojarore.

### Esteban űi yávaino úre ne boarájiye jipocai

(Mt 22.32; Hch 3.22)

**7** <sup>1</sup> Dinumu űai sacerdotevare jaboteipōecu jēniari járejameđa Estebãre: —¿Jávema yo ne coyui no mi borore? arejameđa.

<sup>2</sup> Aru Esteban, yópe arī, coyurejameđa cójijinocavure:

—Muja, jívu aru jíbucuva máre, jápiajarā ji coyuiyede. Javede Jūmenijicu meacu baju cuetedejaquemavu majeñecu Abraham mácu yebai űi cuedeca cãreja Mesopotamia āmicurijoborōi, űi nuquiye jipocamia Harán āmicuriĩmaroi. <sup>3</sup> Jūmenijicu arejaquemavu úre: “Mu, Abraham, mi curōre jocarī űujacu mu. Aru mi curōcavure máre jocarī űujacu. Jáđovacuyumu yu mure mi apeno curō, mi cuquinore”, arejaquemavu Abraham mácuře Jūmenijicu. <sup>4</sup> Ju arī Jūmenijicure, Abraham mácu etarejaquemavu Caldea āmicurijoborōre jocarī, cucunucuy Harán āmicuriĩmaroi. (Mesopotamia āmicurijoborōi cuvū Caldea.) Abraham mácu paci bácu űi yainíburu yóboi, Jūmenijicu nuicōjenejaquemavu úre yore, muje carī curōre.

<sup>5</sup> Dinumu Abraham mácu eaiyede yore, Jūmenijicu jíbbedejacquemavu joborōre űi mácuře. Ye joborō quíjinore máre cūinácubobareca űi epeino jacopubedejaquemavu Abraham mácu cãreja. Ūbenita, “Yo curō mi

cuquinore jícuyumu yu mure”, Jūmenijicu arejaquemavu ũ mácure. “Yo joborõre jícuyumu yu mure aru mipāramena mārājivure märe. Yo joborõ mujeno maquiyébu”, arejaquemavu Jūmenijicu ũ mácure. Aru Jūmenijicu ũi que aiyede, Abraham mácu juedocuvabecu barejaqué mavu cāreja. <sup>6</sup>Yópe arí, coyurejaquemavu Jūmenijicu ũ mácure: “Mipāramena mārājivu apejoborõi nuri, cuatrocientos paíjua baju nore curājarama na mārājivu. Aru nore curí, mipāramena mārājivure pare memecōjenajarama nócavu, ne eaijoborōcavu. Yebacavure memecarājarama mipāramena mārājivu. Näre jara popeni, memecaicōjenajarama nócavu. <sup>7</sup>Ūbenita näre, dijoborōcavure, ñājine ñacuyumu yu ne āmeina ñaiye báque boje mipāramena mārājivure. No yóboi, yore copaidarājarama mipāramena mārājivu dijoborõre jocarí. Aru yure mearore jínajarama yui”, arejaquemavu Abraham mácure Jūmenijicu.

<sup>8</sup>No yóboi, bediõva Jūmenijicu “Yópe ñarājare”, arí yāvarejaquemavu Abraham mácure. “Mu ju aru ji coyuiye báquede, yópe ñarí jādovajara muja. Mu aru mívu ũmva aru mi yebacavu ũmvaque märe muje cajede burajarā muja, ārurivu ji coyuiye báquede mujare”, arejaquemavu Jūmenijicu. Abraham mácu ju arejaquemavu ũre. Que baru cajede burarejaquemavu mamacu Isaac bácu re ocho paíjārvua ũi pōeteniburu yóboi. Aru nopedeca ñarejaquemavu Isaac bácu mamacu Jacob bácu re. Aru nopedeca ñarejaquemavu Jacob bácu doce paivu mamarare, majeñecuva mácavure.

<sup>9</sup>Caipuca puruape paivu ina Jacob bácu mára, majeñecuvacavu bácu, pare jorojīnejaquemavu néyocu bácu re, ũi āmiá José. Que baru bojedarejaquemavu ũ mácure apavure, ũ mácure nūvari bojedarājiyepe aivu Egipto āmicu rijoborōcacure yebacacupe. Ūbenita Jūmenijicu cadatedejaquemavu ũ mácure. <sup>10</sup>Ū mácui cuede Egipto āmicurijoborõi apenumu ñājiñu marejaqué mavu ũ, José bácu. Ūbenita cainumua Jūmenijicu cadatedejaquemavu ũ mácure, ũi etaquiyepe meacu ayu. Ūrarõ majide ñarejaquemavu ũ mácure. Que baru Egiptocavu ne jabocu bácu, Faraón ne aimu, me järejaquemavu José bácu re, ũi mearo ñaiye boje aru ũi majié boje märe. Jaboteicōjenajaquemavu José bácu re caivu ũi cūramicavure aru caivu Egiptocavure märe. Aru coreicōjenajaquemavu ũ mácure caiye ũi cūvaede.

<sup>11</sup>’Di numu āmeno baju vaidéjaquemavu no āiye cubenore caivu Egipto āmicurijoborōcavu aru Canaán āmicurijoborōcavu märe. Que baru majeñecuv a mácavu, Canaán āmicurijoborõi curivu, ye āiye cuvabedejaquemavu na mácavu. <sup>12</sup>Jacob bácu jápiay “Āiye curõre Egiptore”, ñarejaquemavu caipucapuruape paivu mamarare, majeñecuva mácavure, mamarumu ne nuri ñajiyeye ayu āiyede. <sup>13</sup>Ne copaiyede nore bediõva cojedeca, José bácu “Yu Josébu”, arejaquemavu jíbura mácavure. Faraón mácu José bácu jivure coreóvarejaquemavu. <sup>14</sup>José bácu jarorejaquemavu jíbura mácavure aru ĩmacu bácu re märe népacu Jacob bácu yebai, ñaicōjeñu caivu ũ jivure ũi yebai, Egipto āmicurijoborõi. Aru setenta y cinco paivu baju barejaqué mavu na mácavu. <sup>15</sup>Jacob bácu ñarejaquemavu Egipto āmicurijoborõi. Ū mácui aru caivu mamara märe, majeñecuva mácavu, yaidéjaquemavu dijoborõi. <sup>16</sup>Yóbore népāramena mácavu nūvarejaquemavu ne bajuá báquede, jaruvārājivu cūracobei Siquem āmicurĩmaroi. No ne yaivu bácu re jaruvārājinore Abraham mácu bojedarí ñejaquemavu jipocamia Hamor bácu mārare. Na mácavure jídejaquemavu tāuturare Abraham mácu.

<sup>17</sup>Aru ānijāravū, Jūmenijicui Abraham mácure, “Yópe đacacuyūmu mure”, ūi aijāravū bācarō joabede, obedivū majeñecuva mácavū curejaquemavū Egipto āmicurijoborōi. <sup>18</sup>Dinūmu jaboteyū barejaquemavū Egiptocavure apescu jabocu bācu. Ū mácū coreóvabedejaquemavū José bācure. <sup>19</sup>Ū mácū borocurī āmeina đarejaquemavū majeñecuva mácavure. Nájine đarejaquemavū na mácavure. Ū mácū dajocaicōjenejaquemavū nēmara quijinare jedevai, ne yainájiyepe ayū. <sup>20</sup>Dinūmumia pōetedejaquemavū majeñecu mácū, ūi āmiá Moisés. Juedocu meacu baju barejaquemavū. Ū mácui bucūva bācavū bucúóvarejaquemavū ū mácure yóbecurā aviáva ne cūrami jívui. <sup>21</sup>Ne dajocaiyede ū mácure jedevai, Faraón mácui máco bāco Moisés bācure earī, nūvari ōi cūrami, bucúóvarejaquemavū mamacu bajupe. <sup>22</sup>Ina Egiptocavū bācavui majiède buedejaquemavū Moisés bācure. Que teni bucucu cari yávarejaquemavū aru đarejaquemavū urarō parúéque.

<sup>23</sup>‘Cuarenta paiujua cuvacu Moisés bācu, jácunurejaquemavū apēvū ū jivure, Israecavure. <sup>24</sup>Járejaquemavū cūinācu Egiptocacu bācure jara boayūre cūinācu Israecacu bācure. Ū jicu bācure cadateiyūcu, āñū Egiptocacu bācure boarī jarūvarejaquemavū Moisés bācu yavenina. <sup>25</sup>Ū mácū yópe arī dāpiaridurejaquemavū: “Ina jívū majinajarama Jūmenijicu yure nūvaicōjecuyure náre ne yebacateinore jocarī”, aridurejaquemavū. Ūbenita majibedejaquemavū na mácavū.

<sup>26</sup>‘Cōmiáijāravū Moisés bācu járejaquemavū pucarā ūmūva Israecavū bācavure āđamateivure ne bajumia. Que teni cārijovamene đaridurejaquemavū ū mácū na mácavure. Yópe arejaquemavū: “Muja cūinávutamu. Que baru, ¿aipe teni āmeina đaivurū muja muje baju?” arejaquemavū Moisés bācu. <sup>27</sup>Ūbenita cūinācu nācacū bācu jarūporejaquemavū Moisés bācure. Aru jēniari járejaquemavū ū mácure: “¿Name jaboteicōjeni mure nūjare? ¿Name jēniari jáipōecupe epedi mure? <sup>28</sup>¿Yure máre boarī jarūvaiyūcurū, yópe mi boavarepe āñū Egiptocacu bācure ēnoare?” arejaquemavū. <sup>29</sup>Ū mácui que aiyede jápiayū Moisés bācu, dupini nurejaquemavū Egipto āmicurijoborōre jocarī. Apeno joborō, Madián āmicurijoborōi, earī curejaquemavū. Jímarepaco bāco, dijoborōcaco, juedocuvarejaquemavū pucarā ūmūvare.

<sup>30</sup>‘Aru Moisés bācu nore curejaquemavū cuarenta paiujua. Dinūmu cūinācu Jūmenijicui daroimū mácū, ángele, cūetedejaquemavū ū mácure pōecubenoj joabējīnoj Sinaí āmicuricū cūracūre. Áñū ángele cūetedejaquemavū cūinācu jocuījū uruijūcū jēneboi. <sup>31-32</sup>Moisés bācu cūecumañū ūi jáiyede, joabenoj nurejaquemavū, me jácuyū. Que teni jápiarejaquemavū Jūmenijicui yávainore, yópe aiyede: “Yútamu Jūmenijicu. Míñecuva Abraham, Isaac, aru Jacob ne ju aimūmu yū”, arejaquemavū Jūmenijicu. Diede jápiarī, Moisés bācu jidūcu, bidini jáiyubedejaquemavū. <sup>33</sup>Cojedeca Jūmenijicu arī yávarejaquemavū ū mácure: “Mū nūvū caride joborō mearo baji, ji cue boje yui. Aru yūbu meacu baju caivū pūeno. Que baru dujacū mū mi curaidoare, pūeđacuyū yure. <sup>34</sup>Yū jáivū ji pōeva urarō nájivure no joborō Egiptoī. Yū jápiaivū ne oiyede. Que baru đaivū yū, meadacūdayū náre. Nūjacū cari. Jacopaiyovaquijivū mure Egiptoita”, arejaquemavū Jūmenijicu Moisés bācure.

<sup>35</sup>‘Áñū Moisés bācure Israecavū bācavū ūbeni jarūvaiyuridurejaquemavū. Yópe arī, “¿Name jaboteicōjeni mure nūjare? ¿Name jēniari jáipōecupe epedi

mure?” jēniari járejaquemavu na mácvu. Ūbenita na mácvu ū mácvure jaruvaiyuriduivureca, Jūmenijicu jarorejaquemavu Moisés bácvure ne yebai, ūi jaboteni meadaquiepe ayu na mácvure. Aru āñu ángele, ūi jáimu mácu jocujicu uruijicui, cadateyu barejaquémvu ū mácvure.

<sup>36</sup> Moisés bácvuacari nūvarejaquemavu ānina Israecavu bácvure Egipto āmicurijoborōre jocarī. Darejaquemavu pōeva ne jámene aru ne darī majibede máre ūre Egipto āmicurijoborōi, ne etarājiye jipocare, aru jia urada yebai, aru na mácvui cuede máre pōecubenoī cuarenta paiujua baju. <sup>37</sup> Āñu Moisés bácvuacari arejaquemavu Israecavu bácvure: “Jūmenijicu darocuyume mujare apesu ūi yáviyede coyucaipōecure nopedeca ūi daroiyepe yure. Mujacacu bacuyūme ū. Ju ajarā ūre”, arejaquemavu ū mácu. <sup>38</sup> Āñu Moisés bácvuacari curejaquemavu Israecavu bácvuque, majeñecuva mácvuque, ne cójijiyede pōecubenoī. Aru curejaquemavu āñu ángele ūre yávayu bácvuque Sinaí āmicuricū cūracūi. Āñu Moisés bácvuacari jacopurejaquemavu Jūmenijicui yáviyede, majide đacuyū majare, maje majinajiepe ayu aipe đaiye jauřōre, maje cūvarājiyepe ayu jāravu cūimějāravu baquinóre.

<sup>39</sup> Ūbenita majeñecuva mácvu ju abedejaquemavu Moisés bácvure. Ūbedejaquemavu ū mácvure. Aru, “Egiptoi copaiyurivubu űja”, arīdurejaquemavu na mácvu. <sup>40</sup> Que teni yópe arī, jēniarejaquemavu Aarón mácu, Moisés bácvui yócu bácvure: “Đacajacu űjare apesu pēpeimarare, maje nūvarajiepe maje jipocai. Majibevu maja aipe vainore űai Moiséde, majare davavacure Egiptore jocarī”, arejaquemavu na mácvu. <sup>41</sup> Que arī, đarejaquemavu ne pēpeimure yópe oteivecujicupe. Que darī bujarī, āimarare boarī, juarejaquemavu, ne pēpeimure jīvu. Aru torojurejaquemavu, mearore jīvu ne baju puřuáque ne đaiye báquede. <sup>42</sup> Que teni ne Jūmenijicure jaruvaiye boje, Jūmenijicu máre jaruvarejaquemavu na mácvure, mearore jícōjeñu abíacovare. Nópe darī, đarejaquemavu na mácvu yópe cūinácu Jūmenijicui yáviyede coyucaipōevacacu bácu ūi toivaiye báquedepedeca:

Muja, Israecavu, cainumua no cuarenta paiujua muje cuede pōecubenoī, yure āimarare boarī, juarī, jībeteavū muja. Aru ape jīyede máre jībeteavū muja yure. <sup>43</sup> űai jūmenijicu, ūi āmiá Moloc, ūi cūramine, āimacajeaque đaiñamine, nūvavu muja. Aru űai jūmenijicu, ūi āmiá Refán, ūi pēpeimure yópe abíacorupe páyure máre nūvavu muja. Dinumure iye muje pēpeimarare đaiye báque boje, aru muje mearore jīye boje náre, muje mauvare nūvaicōjecuyumu yu mujare muje joborōre jocarī pu Babilonia āmicurō ānipūravuita, arejaquemavu Jūmenijicu, arī toivarī, ūi yávaiyede coyucarejaquemavu.

<sup>44</sup> Majeñecuva mácvu ne cuede pōecubenoī cūvarejaquemavu náque diñami cūrami ne āimacajeaque đaiñami mácarōre, iveá cūravea báqueque Jūmenijicui đaicōjeiye ūi coyuiye báquede Moisés bácvure toivainoque curiñami mácarōre. Diñami mácarōre đarejaquemavu na mácvu nópe Jūmenijicui jáđovaino mácarōpe jipocamia Moisés bácvure ūi cuede cūracūi.

<sup>45</sup> Obediujua yóboi, Josué bácu jabotedejaquemavu majeñecuva mácvure, diñami mácarōre đaipōeva mácvui pāramena mácvure. Jipocamia na mácvu jacopurejaquemavu diñami mácarōre néñecuva mácvui jīno mácarōre náre. Josué bácvuque nūri, Jūmenijicui etaviyede apesu judíova

ãmevure ijoborõre jocarĩ, majeñecuva mácavũ ñejaquemavũ yo jaborõre. Na mácavũ mãre nũvarejaquemavũ diñami mácarõre dinũmũmia. Aru nẽpãramena mácavũ mãre jacopũvarejaquemavũ diñamine, nẽbucũva bÁCavui jĩno mÁCarõre na mÁCavũre pũ David bÁCui jaboteiyeta.

<sup>46</sup> 'Aru David bÁCũ ñaiyũrejaquemavũ Jũmenijicui urõpe. Que baru Jũmenijicu me jãrejaquemavũ ñ mÁCure. Aru David bÁCũ ñacaiyũrĩdurejaquemavũ cũramine, põeva ne jẽniaĩñamine Jũmenijicure. <sup>47</sup> Ñbenita David bÁCui mÁCũ bÁCũ, ñi ãmiã Salomõn, ñacarejaquemavũ diñami mÁCarõre Jũmenijicure. <sup>48</sup> Ñbenita Jũmenijicu, parũcũ caivũ apevũ pũeno, cubebi põeva ne ñaiñamia jĩvui. Que teni cũinãcũ Jũmenijicui yáviyede coyũcaipõecũ bÁCũ yõpe toivarejaquemavũ Jũmenijicui yáviyede:

<sup>49</sup> Cavarõ mearomu yõpe ji dobarõ mearo. Caiyede ñaicõjeivũ yũ nore dobacũ. Aru ijãravũbu yõpe ji cuboba epeinope. Que baru ji cũramiva ñarĩ majibevũ muja. Jũmenijicui curõre ji jabũvãĩñamine ñarĩ majibevũ muja. <sup>50</sup> Yávacari caiyede cuedarejacacũ yũ, arejaquemavũ Jũmenijicu.

<sup>51</sup> 'Yũ coyũyũbu mujare: ¡Ñbenita jãpiaiyũbevũ muja! Dãpiaivũbu muja yõpe Jũmenijicure ju abevũ ne dãpiaiyẽpe. Jãpiaiyũbevũ muja Jũmenijicui yáviyede. Mujeñecuva mÁCavũre paivũbu muja. Na mÁCavũpedeca mujavacari mãre cainũmũ jãpiabevũ ñai Espĩritu Santore. <sup>52</sup> Mujeñecuva mÁCavũ ñãjĩne ñarejaquemavũ caivũ ãnina Jũmenijicui yáviyede coyũcaipõeva mÁCavũre. Mujeñecuva mÁCavũcapũravũ boarĩ jarũvarejaquemavũ Jũmenijicui daroimara mÁCavũre, ñi yáviyede coyũcaipõeva mÁCavũre, ãnina javede "Jũmenijicure memecaipõecũ meacũ baju dacũyme", arĩ coyũivũ bÁCavũre. Aru ñi daiyede mujacapũravũ jẽni jĩni ùre ñi mavũre, boarĩ jarũvaicõjeavũ ùre. <sup>53</sup> Mujavacari jacopũrejaquemavũ Jũmenijicui ñaicõjeiyede ñi toivaicõjeiye báquede. Ñ yávarejaquemavũ ángelevare. Aru ina ángeleva yávarejaquemavũ Moisés bÁCure. Aru ñ mÁCũ toivarejaquemavũ diede, muje majinajiyẽpe ayũ. Ñbenita mujacapũravũ ye ju abevũ iye Jũmenijicui ñaicõjeiyede ñi toivaicõjeiye báquede, arejamedã Esteban cõjijnocavũre.

### Estebãre cũraboaque ne boaino

(Lc 23.34, 46)

<sup>54</sup> Esteban ñi coyũiyedeca jãpiaivũ ina cõjijnocavũ, pare jararejaimada ùre. Que baru cũrejaimada ne cõpiãre, pare ne jaraiye boje. <sup>55</sup> Ñbenita ñai Espĩritu Santo ñaicõjeñũ marejãmedã Estebãre. Que teni Esteban, cavarõre cocorĩ jãrejamedã Jũmenijicui mearo miadãrore, aru Jesũre mãre nũcure Jũmenijicui meapũravũ parũéque. <sup>56</sup> Aru Esteban arejamedã:

—Jãjara. No cavarõ voainore jãivũ yũ. Aru ñai Jũmenijicui daroimu mÁCure ñmupe mãre, nũcure Jũmenijicui meapũravũ yebai jãivũ yũ, arejamedã.

<sup>57</sup> Ñi que aiyede, codoboborĩ biedejaimada na ne cá mucobeare ne pũruáque. Cũinátũrũ nacajarĩ, cúyarĩ nurĩ ñi yebai, ùre jẽni, nũvarejaimada nore jocarĩ. <sup>58</sup> Jabũborĩ jaetovarejaimada ùre ñmarore jocarĩ. Aru cũraboaque ñuvarĩ búrejaimada na Estebãre. Ina ùre boro coyũrĩ ađavũ bÁCavũ barejãimada cũraboaque ñuvarĩ buivũ. Ne ñuvarãjiye jipocamia, epedejaimada ne

puenocacajeare cüinácu ũmu yebai, ũi ámiá Saulo. <sup>59</sup>Ne ðureiyedeca cûraboaque, Estebâcapûravu jêniañu marejâmeda Jesúre.

—Mu, ji jabocu, Jesús, caride ijacu ji ũmene, arejâmeda Esteban.

<sup>60</sup>Que arî, ñuatutari joboroi, coðoboborejâmeda:

—Mu, ji jabocu, ârumetejacu iye ne âmeina teiyede, arejâmeda.

Nópe ayu bácu, Esteban mácu yaidéjâmeda.

**8** <sup>1</sup>Aru ñai Saulo torojârejâmeda ne boarî jaruvaiyede Esteban mácre.

### **Saulo ũi ñájiñe ðaino Jesúre ju aipôevare**

(Hch 2.2, 4-5; 26.9-11)

Dijâravumareca Jesúre ju aipôeva Jerusalén âmicurîimaroi curivu ñájiñi búrejâmeda pare, náre apevu ne âmeina ðaiye boje. Caivu ina Jesúre ju aipôevare dupini nure ðarejâmeda caino Judea âmicurijoboroi, aru caino Samaria âmicurijoboroi máre. Ũbenita Jesús ũi yávaiye méne beorî coyucôjeimara dupini numenejâmeda. <sup>2</sup>Apevu ũmuva, Jûmenijicure urivu, nuvarejâmeda Esteban mácu baju bácarôre, jaruvârâjivu ũi mácre cûracobei. Ũrarô chioivu coðoboborî bujiéque orejâmeda ũi mácre. <sup>3</sup>Ũbenita Saulocapûravu bíjaroivyarejâmeda caivu Jesúre ju aipôevare. Que baru nuñu cûramia coapa, ina ju aipôevare jêni jabuborî buoicôjeñu marejâmeda âmeina teivure jêni jacoñami jívui. Ũmuvare aru nomivare máre ñájiñe ðarejâmeda ñai Saulo.

### **Felipe Samariai ũi coyuíno Jesús ũi yávaiye méne**

<sup>4</sup>Ina Jesúre ju aipôeva dupini nuivu Jerusalén âmicurîimarore jocarî, Jesús ũi yávaiye méne coyurânurejâmeda caino joboroi. <sup>5</sup>Cüinácu nácacu, Felipe âmicucu, nurejâmeda Samaria âmicurîimaroi. Aru coyuyu barejâmeda Jesús ũi yávaiye méne nócvure. <sup>6</sup>Obedivu pôeva ũi coyuiyede jápiaivu aru ũi ðaiyede pôeva ne ðarî majibede jáivu, me jápiarejâmeda ũre. <sup>7</sup>Felipe etaicôjenejâmeda abujuvare obedivu pôevare jocarî. Coðoboborî etarejâmeda na. Aru meadarejâmeda obedivu nacajaiye majibevure, cuiye majibevure máre. <sup>8</sup>Que baru obedivu Samaria âmicurîimarocavu pare torojâjivu barejâmeda na.

<sup>9</sup>Ũbenita diimaroi cüinácu ũmu curejâmeda, ũi ámiá Simón. Joe baju cacu bácu noi, yaviéde ðayu barejâmeda ũi. Caivu nócvu cucumarejâmeda ũi yaviéde. “Parucubu yu”, arejâmeda ũi. <sup>10</sup>Que baru caivu diimarocavu, jâbova aru apevu máre, me jápiarejâmeda ũi coyuiyede. “Ñai Simón parucube apevu pueno. Jûmenijicui paruéde cuvabi ũi. Ũrecabe Jûmenijicu baju”, arejâmeda caivu.

<sup>11</sup>Joe baju Simón pare cuavarejâmeda ina pôevare. Que baru me jápiarejâmeda caiye ũi coyuiyede. <sup>12</sup>Ũbenita ina pôeva ne ju aiyede Felipei coyuiyede, jápiaivu bácvu iye yávaiye méne Jûmenijicui jaboteinore aru Jesúre, Jûmenijicui epeimu mácre máre, jáðovarejâmeda Jûmenijicure ocoque, ũmuva aru nomiva máre. <sup>13</sup>Simón máre ju arejâmeda Jesúre. Aru jáðovarejâmeda Jûmenijicure ocoque. Ũi jáðovariburu yóboi, Simón yóvarejâmeda Felipe. Ũvacari cucumarejâmeda ũi jáñu mácu caiye iye Felipe ũi ðaiyede pôeva ne jámene aru ne ðarî majibede.

<sup>14</sup>Aru Jesús ũi yávaiye méne beorî coyucôjeimara Jerusalén âmicurîimaroi curivu, jápiarejâmeda ina Samariacavure ne ju aiyede Jûmenijicui

yávaiye méne. Que baru jarorejaimada Pedroke aru Jüare máre Samaria ámicuriimaroí. <sup>15</sup>Nore Pedrojá earí, jëniacarejaimada Jümenijicure, üi daroquiepe aivü Espiritu Santore ina pöeva mamarumu ju aivüre Jesúre dijárvuare. <sup>16</sup>Jave jádovarejaimada Jümenijicure ocoque Jesúi ámiái. Übenita ñai Espiritu Santore cuvabedejaimada na cáreja. <sup>17</sup>Ne jëniariburu yóboi, Pedro aru Juan máre tuorejaimada ne puruáque náre coapa ne jipoburá. Que teni caivü ina cuvarejaimada ñai Espiritu Santore.

<sup>18</sup>Aru Simón járejamedá Pedrojá ne tuoiyede Jümenijicu daroyüre Espiritu Santo pöevare. Que baru jývurejamedá táuturare Pedrojáre, cuvaiyucu Jümenijicui majiéde nápe.

<sup>19</sup>—Jíjará yüre máre iye Jümenijicui majiéde. Yü máre jývuvü Espiritu Santo ina ji tuoimarare ji puruáque, Simón arejamedá Pedrojáre.

<sup>20</sup>Übenita Pedrocápüvü jarayü arejamedá üre:

—Yü uvü Jümenijicui ñájine daquiepe mure mi táuturaque toabo cüiméboi, mi dápiaye boje bojedainore üre iye majiéde Espiritu Santo jýyede pöevare.

<sup>21</sup>Mü Jümenijicui jáinore ámecü bajutamu mü mi üme. Que baru mü jáve ñujacacü ámevü. Ñuje memeinore dabevü mü. <sup>22</sup>Caride chíõñ oatuvajacü mü mi dáiyede. Dajocajacü mi ámeina dápiainore. Aru jëniajacü Jümenijicuque, üi árumetequiepe mi nópe dápiainore. <sup>23</sup>Jáivü yu mure pare jorojññare. Aru buoimupe páyubu mü, mi ámeina teiye boje, arejamedá Pedro üre.

<sup>24</sup>Nópe ayüre, Simón ju arejamedá:

—Jëniaivü mujare. Jëniacajará yüre Jümenijicuque, vaibéquiepe yópe mi coyuiyepe, arí jëniarejamedá Simón.

<sup>25</sup>No yóboi Pedro aru Juan, Jesúre coreóvaivü, coyurejaimada caivü ina pöevare Jümenijicui yávaiye méne. Coyurí buojarí, etarejaimada diimare jocarí, copainurajivü Jerusalén ámicuriimaroí. Aru máí nurí coyurejaimada Jümenijicui yávaiye méne obedivü imaroacavüre Samaria ámicurijoboróí.

### Felipe üi bueino Etiopíacacure

<sup>26</sup>Dinumu Jümenijicui daroimü, cüinácu ángele, nuicójenejamedá Felipe.

—Caride aviaí daino cácopüvü ñujacü, Jerusalén ámicuriimaro yebai nuimai ñujacü, Gaza ámicuriimaroí nuimai, arejamedá.

Caride pöeva cubema dimare. <sup>27</sup>Ju arí, Felipe nurejamedá. Dinumu dimai cüinácu ümu eunuco, Etiopía ámicurijoborócacü, copainuñu marejamedá Jerusalén ámicuriimarore jocarí üi joboróí. Ñai ümu jabocu parucu barejamedá. Üi joboró jabocoi táuturare coreipöecu barejamedá. Aru ico jabocore pöeva arejaimada Candace. Ñai ümu copainuñu marejamedá ü, torojuede jývü bácu Jümenijicure Jerusalén ámicuriimaroí. <sup>28</sup>Jäturuicüi dobacu nuñu cabalovaque, aru üi nuiyedeca Jümenijicui yávaiyede jári boroteyü barejamedá. Ñai Jümenijicui yávaiyede coyucaipöecu bácu, üi ámiá Isaiás, üi toivaiye báque barejávüya üi jáiye. <sup>29</sup>Aru Felipei jáiyede ñai ümure, Espiritu Santo arejamedá üre:

—Jäturuicü yebai ñujacü mü. Mautejacü mü ñai ümuque, arejamedá.

<sup>30</sup>Ju arí, cüyari, üi yebai earí, Felipe jápiarejamedá üi jári boroteiyede Isaiás bácu toivaiye báquede. Que teni Felipe jëniari járejamedá üre:

—¿Dápiarí eayurü mü aipe aiyuröre yo mi jári boroteinore? arejamedá Felipe.

<sup>31</sup> Aru ñai Etiopíacacu arejameđa Felipede:

—Bi, dápiarí eabevu yu yo ji jári boroteinore. Pöecu majicu jaubi yure, majicacuyu aipe ayuröre yo ji jári boroteinore. Jatujacu. Dobajacu ji yebai. Majicajacu yure yore, arejameđa ñai ñmu Felipede.

<sup>32</sup> Iye toivaiye báquede jári boroteyu barejámeđa yópe:

Nuvarajarama úre boarí jaruvarājivü, yópe ne nuvaiyepe ovejare boarí jaruvainoi. Aru bi acuyume ü, yópe ovejajicu obepe üi podare buraiyedeca. Abecuyume ü. <sup>33</sup> Cuyoje tede darājarama úre. Aru yávarí cadateipöecu cubecuyume. Que baru āmeno darājarama úre. Cūiquíyebu ijaravure üi curō. Que baru üi pāramena majurōrivu cubenajarama. Aru na majurōrivure coyubenajarama ne borore, jári borotedejameđa ñai Etiopíacacu.

<sup>34</sup> Aru jēniari jārejameđa Felipede:

—Coyujacu yure. ¿Ñamene Jūmenijicui yávaiyede coyucarejaquemari iyede? ¿Coyurejaquemari üi baju o apecure? arejameđa.

<sup>35</sup> Ju arí úre, iye toivaiye báqueque búri, Felipe coyurejameđa úre caiye iye Jesús üi yávaiye méne. <sup>36</sup> Ne nuiyedeca mái earejaimađa oco curijitabure. Aru ñai jabocu arejameđa Felipede:

—Jájacu. Yuibu oco curijitabü. ¿Ji jádovaiyuede Jūmenijicure ocoque, apecu jádovaicōjemecu buojaidi yure? arejameđa.

<sup>37</sup> Felipe arejameđa úre:

—Mu ju ayu baru Jesúre, jádovari buojaivu mu Jūmenijicure ocoque, arejameđa.

Nai jabocu, yópe arí, ju arejameđa úre:

—Yu ju ayubu Jesúre. Majivu yu úre Jūmenijicui mácure, Jūmenijicui daroimu mácure, arejameđa ñai jabocu.

<sup>38</sup> Que arí, nuicōjemenejameđa caballovare, icü jāturuicü mautequiepe ayu. Aru ina pucarā, Felipe úmaque, etarí dicüre jocarí, ēmeni oco curijitabui, Felipe jádovarejameđa úre Jūmenijicue noi. <sup>39</sup> Aru ne maiyede oco curijitabure jocarí, cūiná Jūmenijicui Espiritu nuwarejameđa Felipede. Nai jabocu jámenejameđa úre cojedeca. Ubenita torojacu mái nurejameđa bedióva. <sup>40</sup> Felipecapūravu járorejameđa Azoto āmicuriīmaroi. Etarí nore jocarí, mái nure nuñu Cesarea āmicuriīmaroi coyurejameđa iye Jesús üi yávaiye méne cainoa īmaroi dimai pu eayuta Cesarea āmicuriīmaroi.

**Saulo Jesucristore jári üi ju aino**

(Hch 22.6-16; 26.12-28)

**9** <sup>1</sup> Que teiyedeca, Saulo cainumua ñájine ñayu barejámeđa Jesúre ju aipöevare, náre yópe arí:

—Boaqujivu mujare muje Jesúre ju aiye boje, jarayu arejameđa Saulo.

<sup>2</sup> Aru ñai sacerdotevare jaboteipöecure jēniacunurejameđa paperayocare Saulo, üi jádovaquiepe ayu diyocare judíoai cójijiñamia coreipöevare Damasco āmicuriīmaroi, ne majinajiepe ayu ñamene ü Saulo aru ye paruéde cūvacure ü, ne cōjeimu mácu. Damasco āmicuriīmaroi nucuyu barejámeđa Saulo, vocunñu Jesúre ju aipöevare. Náre eayu baru, buojebu náre, űmuvare aru nomivare máre, nuvacuyu náre Jerusalén āmicuriīmaroi.

<sup>3</sup> Diyocare ĩni, Saulo nurejameda mái. Damasco āmicurĩĩmaro joabenoĩ eaiyede, maumejiēna cavarōre jocarĩ pēorejavũya yópe yaroĩnope ũi yebai, aru ũrarō miadārejāvũya noi. <sup>4</sup> Que baru cūecumañũ, mori turejameda joborōi. Aru jápiarejameda Jesús ũi yāvainore, yópe ainore:

—Mũ, Saulo, ¿aipe teni maucūvacurũ mu yure? arejameda.

<sup>5</sup> Saulo jēniari járejameda:

—Mũ, ji jabocu, ¿ñamenu mu? jēniari járejameda.

Aru Jesús arejameda:

—Yurecabu Jesús, mi maucūvamũ mácu. Mi maucūvarō yure āmedaivũ mure, arejameda.

<sup>6</sup> Saulo, jiducu, bidini jēniari járejameda Jesúre:

—Mũ, ji jabocu, ¿yéde ji ñainore ucūrũ mu? arejameda Saulo.

Aru Jesús arejameda ũre:

—Nacajajacu. Ecojacu diĩmaroi. Noi apecu majicacūyume mure aipe mi ñaquinore, arejameda Jesús ũre.

<sup>7</sup> Iye pēoiyede, ina ũmũva, nuĩvu bácvũ Sauloque, dajocarejaimada. Aru bi arejaimada na. Iye yāvainore jápiarejaimada na. Ũbenita ñai yāvayure ye jámenejaimada na. <sup>8</sup> Ju arĩ Jesús ũi cōjeiyede, Saulo nacajarejameda. Ũbenita ũi yacorua voaiyede, ye jámenejameda ũ. Jári eabecu barejameda ũ, Saulo. Que baru ũque nuĩvu ũi puruáre jēni, ñvarejaimada ũre pũ Damasco āmicurĩĩmaroita. <sup>9</sup> Yóbecurijāravuare Saulo jári eabedejameda. Āinore ye āmenejameda. Aru ũcūinore máre ũcumenejameda ũ.

<sup>10</sup> Noi, Damasco āmicurĩĩmaroi, cūrejameda cūinācu Jesúre ju aipōevacacu, ũi āmiá Ananías. Ũ apucu járejameda Jesúre decoboainope. Aru Jesús arejameda ũre:

—Mũ, Ananías, ¿cucūrũ mu? arejameda.

Aru Ananías arejameda:

—Mũ, ji jabocu, cuvũ yũ, arejameda.

<sup>11</sup> Jesús arejameda ũre:

—Nujacu Nurinima āmicurĩĩmai. Noi, Judai cūrami nuri, vojacu cūinācu ũmure, Tarso āmicurĩĩmarocacure, ũi āmiá Saulo. Jipacu Jūmenijicure jēniāimi ũ. <sup>12</sup> Jári eabebi ũ caride. Apucu ũ decoboainope jáimi mure tuoyure mi puruáque, járe ñacūyure ũre cojedeca, arejameda Jesús Ananíare.

<sup>13</sup> Nópe ayure jápiarĩ, Ananías arejameda:

—Mũ, ji jabocu, ũ mínare mearare Jerusalécavure āmeno ñabiya ũ. Obedivũ pōeva yávaðama yure. <sup>14</sup> Que baru yo Damascure caivũ ina mure ju aivure buocūdayutame ũ, sacerdotevai jabova ne cōjeimũ mácu, arejameda Ananías Jesúre.

<sup>15</sup> Ũbenita Jesús arejameda ũre:

—Nujacu. Bеоivũ yũ ñai ũmure, ũi coyūquiyupe ayũ ji yāvaiye méne apejoborōacavure, nócavũ ne jabovare máre, aru Israecavure máre. <sup>16</sup> Yũ jáðovaquijivũ ũre ñájiyede yure boje, arejameda Jesús.

<sup>17</sup> Dinũmu Ananías nurejameda cūrami, Sauloi curiñami. Ecoyũ bácu, tuorĩ ũi puruáre Saulorā, arejameda:

—Mũ, jĩcu, Saulo, Jesúvacari ñai mi jáimũ mácu mái dayũ, daroibi yure, mi jáquiyupe ayũ cojedeca aru Espĩritu Santo ũi ñaicōjequiyupe ayũ mure, arejameda Ananías Saulore.

<sup>18</sup> Nópe ùi aiyeda, turejavũya ùi yacorũare jocarĩ moatũchiapẽ paiyede, aru me járejamedã cojedeca. Dinũmũre nacajañũre jádovarejamedã Jũmenijicũre ocoque. <sup>19</sup> No yóboi ãri, parũcu nũrejamedã cojedeca. Aru mautedejamedã obebejãravũã Jesũre ju aipõevaue, Damasco ãmicurĩmaroi curivũque.

#### **Saulo Damascoi ùi coyũino Jesús ùi yávaiye méne**

<sup>20</sup> Maumejiena Saulo coyũrĩ búrejamedã judíovai cójijiñamiai, “Jesũre jáveneca Jũmenijicũi mácube” ayũ. <sup>21</sup> Caivũ ùre jápiaivũ bácvũ cuecumaivũ arejaimada ne baju:

—Ñai Jesũre ju aivũre ãmeno ðayũbe ù. Que baru náre jẽni jícũyũ dacũbe yui, ina sacerdotevai jabova ne buorãjiyepe ayũ náre, arejaimada na.

<sup>22</sup> Ùbenita Saulocapũravũ coyũrejamedã Jesús ùi yávaiye méne, parũeque jádovañũ jáveneca Jũmenijicũi mácube. Ùbenita jápiarĩ coreóvare ðabedejamedã ina judíova curivũre Damasco ãmicurĩmaroi.

#### **Saulo ùi dupino judíovare jocarĩ**

(2 Co 11.32-33)

<sup>23</sup> Obedijãravũã yóboi, judíovacavũ cójijidejaimada, boarĩ jarũvarãjivũ Saulore. <sup>24</sup> Ùbenita ù majidejamedã. Jãravũre aru ñamine máre coreivũ barĩdurejaimada ñmaro jedevacobeai, boarĩ jarũvarãjivũ ùre, ùi etaru nore. <sup>25</sup> Ùbenita Jesũre ju aipõeva epedejaimada Saulore pũe urapũe jívũi. Aru no biaido tarabũ jáicobede ãmeóvarejaimada ùre ñmaro biaido apepũravũi pũ joborõita ñami. Yópe ðarĩ, Saulo dupini nũrejamedã ùi mauvare jocarĩ.

#### **Saulo Jerusaléi ùi curõ**

<sup>26</sup> Saulo eayũ bácvũ Jerusalén ãmicurĩmaroi, cójijiyurĩdurejamedã Jesũre ju aipõevaue. Ùbenita caivũ jidurejaimada, ne dápiaye boje ju abecũre Jesús ùi yávaiye méne. <sup>27</sup> Ùbenita Bernabécapũravũ nũvari yóvare ðarejamedã Jesús ùi yávaiye méne beorĩ coyũicõjeimaraue. Coyũrejamedã aipe teni Saulo ùi jáino mácarõre Jesũre, ùi nuiyede Damasco ãmicurĩmaroi, aru aipe Jesús ùi yávaino mácarõre ùre. Aru Bernabé coyũrejamedã aipe Saulo ùi yávaino mácarõre máre, Damasco ãmicurĩmaroi, coyũyũ jidubecũva caivũ põevare Jesús ùi yávaiye méne.

<sup>28</sup> Yópe arĩburu yóboi, Saulo mautedejamedã Jerusalén ãmicurĩmaroi, cuyũ Jesús ùi yávaiye méne beorĩ coyũicõjeimaraue. <sup>29</sup> Coyũre cuyũ barejámada jidubecũva põevare Jesús ùi yávaiye méne, boroteni coyũvarejamedã pare ina judíova griego ãmicuricamuare yávavũre. Ùbenita boarĩ jarũvayũre curĩduivũ barejámada na. <sup>30</sup> Jesũre ju aipõevare majidivũ boarĩ jarũvayũrivũre, nũvarejaimada Saulore Cesarea ãmicurĩmaroi. Aru nore jocarĩ, jarorejaimada ùre Tarso ãmicurĩmaroita. <sup>31</sup> Yópe teni, Jesũre ju aipõeva caivũ Judea, aru Galilea, aru Samaria ãmicurĩocavũ ñájimenejaimada. Pũeno baju majidivũ barejámada na Jũmenijicũre aru ùi yávaiyede máre, ñai Espĩritu Santo ùi bueiye de náre. Cũrejaimada pũedarĩ Jũmenijicũre Espĩritu Santo ùi cadateinoque. Aru pũeno baju obedivũ tedejaimada Jesús ùi yávaiye méne ju aipõeva.

#### **Pedro ùi meadaino Eneare**

<sup>32</sup> Dinũmũ Pedro coyũre cuyũ barejámada cainoa ñmaroacavũre. Que teni cũinájãravũ jácũnũrejamedã ina põevare, Jũmenijicũre mearore jívũre,

Lida āmicurīīmarocavure. <sup>33</sup>Nore cūinācu ūmu curejameda, ūi āmiā Eneas. Nacajaiye majibecu barejameda ū. Ocho paiūjua joe nacajamenejameda ūi parainore jocarī. <sup>34</sup>Aru Pedro ūi yebai nuri, arejameda ūre:

—Mu, Eneas, caride Jesúvacari meadaibi mure. Nacajajacu. Aru meadajacu mi parainore, arejameda Pedro Eneare.

Maumejiena Eneas nacajarejameda. <sup>35</sup>Que teni caivu ina pōeva Lida āmicurīīmarocavu aru Sarón āmicuridarōcavu máre járejaimada Eneas meateyure. Que baru ju arejaimada Jesúre.

#### **Pedro ūi nacovaino Dorcas yaiyó bácore Jesúí parnéque**

<sup>36</sup>Dinummu Jope āmicurīīmaroi cūināco nomió curejacoda, ōi āmiā Tabita. Ico Tabita Jesúre ju aipōeco barejácoda ō. Ōi āmiā griego āmicuricamua yávaicamuaque Dorcas barejávūya, yo aiyurō űamaco. Cainumma mearo darī cōmajiyo báco apavure aru cadatedo báco cōmaje ārojarivure máre. <sup>37</sup>Dijāravuai ijetenī, yaidéjacoda ō, Tabita báco. Ōi baju bácarōre joarīburu yóboi, epedejaimada puenocatucubui. <sup>38</sup>Jope āmicurīīmaro aru Lida āmicurīīmaro joabeno marejávūya. Que baru ina Jesúre ju aipōeva Jope āmicurīīmarocavu jápiaivu Pedro cucure Lida āmicurīīmaroi, yo borore jarorejaimada ūre pucarā ūmavaque:

—Maume dajacu űuje curōi, arī daicōjenejaimada ūre.

<sup>39</sup>Ju arī, Pedro nurejameda náque. Ne eaiyede, nūvarejaimada ūre yaiyó báco curitucubu puenocatucubui. Ditucubui ecoyu, caivu ina nomiópeva oivu ō mácore chītoivu ūre, jádovaivu barejaimada doicajeare, Dorcas báco ōi nareie báquede apuco cāreja. <sup>40</sup>Ūbenita Pedro etaicōjenejaimada caivu inare ditucubure jocarī. Que teniburu yóboi, űuatutarī jēniarejaimada Jūmenijicuque. Ūi jēniariburu yóboi, copedini, ōi baju bácarōre jári, arejameda:

—Mu, Tabita, nacajajaco, arejameda.

Ōi yacorware voarī, Pedroro jári, nacajari dobarejacoda ō, Tabita. <sup>41</sup>Ōi purure jēni, Pedro nacovarejaimada ōre. Dinumma ōrejarejaimada ina Jesúre ju aipōevare aru ina nomiópevare máre, ne járajipeye ayu ōre apucore cojedeca. <sup>42</sup>Aru ōi borore jápiarejaimada caivu Jope āmicurīīmarocavu. Que baru obedivu pōeva ju arejaimada Jesúre nore. <sup>43</sup>No yóboi, Pedro mautedejaimada diīmaroi obedijāravua. Curejameda apesu Simóque, āimacajeare memeipōecuque, ūi cūrami.

#### **Pedro ūi coyūino Corneliore Jesús ūi yávaiye méne**

(Hch 11.4-18)

**10** <sup>1</sup>Cūinācu ūmu curejameda Cesarea āmicurīīmaroi, ūi āmiā Cornelio. űai Cornelio cien paivu churaravai jabocu barejameda ū. Roma āmicurō jaboteino churaravai yajubo italiano āmicuriyajibocacu barejameda ū. <sup>2</sup>Jāve mearore jīni Jūmenijicure, ū jivu máre mearore jivarejaimada ūre. Cadatede cuyu barejameda ina judíovacavu cōmaje ārojarivure. Aru jēniavarejaimada Jūmenijicuque. <sup>3</sup>Cūinājaravu tres bajī nainú, űai Cornelio apucu járejaimada cūinācu Jūmenijicui daroimu, ángelede, decoboinope. űai ángele ecorī, Cornelio yebai nuri, arejameda ūre:

—Mu, Cornelio, arejameda.

<sup>4</sup> Cornelio, jiducu, ñai ángelede cocorĩ, jēniari járejamedá úre:

—Mu, ji jabocu, ¿yéde ucurũ mu? arejamedá Cornelio.

Ñai ángele ju arĩ, arejamedá úre:

—Jūmenijicu jápiaibi mi jēniaiyede úre. Aru me jáimi mi cadateiyede cōmaje ārojarivure máre. Que baru Jūmenijicu ārumi mure. <sup>5</sup> Caride jarojacu apevu ūmuvare Jope āmicurĩmaroi, ne vorĩ earājiyepe ayu cūinácu ūmure, ūi āmiá Simón Pedro. <sup>6</sup> Apecu Simón, āmacajeare memeipōecu, ūi cūrami cuvabi já urada ēcarui. Aru Simón Pedro cucube ūi cūrami. Úre ne eaiyede, davajarāri mi yebai, arejamedá ñai ángele Corneliore.

<sup>7</sup> Que arĩ, ñai ángele nurejamedá Corneliore jocarĩ. Dinumu Cornelio órejarejamedá pucarā ūi yebacavure aru cūinácu churaravacacure. Ñai máre mearore jýu barejamedá Jūmenijicure. Corneliói me dāpiaimu marejamedá, úre ūi mearo cadateiye boje. <sup>8</sup> Ina yóbecurā ne eaiyede ūi yebai, Cornelio coyurejamedá náre caiye iye ñai ángele ūi coyuiye báquede. Aru nuicōjenezamedá náre Jope āmicurĩmaroi.

<sup>9</sup> Cōmiáijāravu ne mái nuiyedeca, Jope āmicurĩmaro joabenoí, Pedro muri nurejamedá cūrami puenora, jēniacuyu Jūmenijicucue. Jāravu corica barejāvūya. <sup>10</sup> Ūi jēniaiyedeca, āvué ijidejavūya úre. Ūbenita āiyede jatúóbedejaimada cāreja. Ne jatúóiyedeca, Pedro apucu járejamedá yópe decoboinope. <sup>11</sup> Járejamedá no cavarō voainore aru apejīe yópe uracaje cuitóttecajepe jōðarejavūya cavarōre jocarĩ. Jōðarejavūya yópe pōeva ne buorĩ yóvaicuvaitōbua ðarĩ ēmeóvaiyepe dicajede. Jōðarejavūya pu cūrami puenoita Pedro yebai. <sup>12</sup> Dicaje jívui cūrejaimada obedivu āimara yóvaicuvaivu cubobaque cuivu, aru obedivu ādavape papeivu, aru obedivu āimara vuivu máre. <sup>13</sup> Pedro jápiarejamedá apeno yávainore. Aru yópe arejamedá Jūmenijicu úre:

—Mu, Pedro, nacajajacu. Boajácu mi āquinova, arejamedá Jūmenijicu.

<sup>14</sup> Ūbenita Pedro arejamedá:

—Mu, ji jabocu, ¡que āmevu! Cainumua āmevu yu caiye iye Moisés bácuí āicōjemene ñujare, judíovare. Que baru āiyubevu yu diede, arejamedá Pedrocápūravu.

<sup>15</sup> Ūbenita Jūmenijicucapūravu arĩ yávarejamedá Pedrore cojedeca.

—“Āiyubevu yu”, abejacu mu iyede ji āicōjeiyede mure, arejamedá Jūmenijicu.

<sup>16</sup> Yóbecue vaidéjavūya Pedrore yópe paino. Aru no yóboi, dicaje uracaje muri copainurejavūya pu cavarōita cojedeca.

<sup>17</sup> Pedrocápūravu pare arĩ dāpiayu barejamedá. “¿Yéde majicaiyucuba Jūmenijicu yure yo ji jáino mácarōque?” arĩ dāpiarejamedá ū. Que dāpiaiyedeca, ina Corneliói jaroimara mácavu Simói cūramine vorĩ, earĩ, núrejaimada jedevacobei. <sup>18</sup> Aru jēniari járejaimada:

—¿Aru, Simón Pedro curi yui? arejaimada.

<sup>19</sup> Pedrocápūravu coreóvabecu cāreja aipe aiyurō ūi jáino mácarōre dāpiayu baridurejamedá. Que teiyedeca, ñai Espíritu Santo arejamedá Pedrore:

—Jápiajacu. Yóbecurā ūmuva voðama mure. <sup>20</sup> Que baru nacajajacu, jōðajacu, aru nujacu náque. “Nuiyubevu yu náque. Jívui āmema na”, arĩ dāpiabejacu mu. Yurecabu daroyu náre yui, arejamedá ñai Espíritu Santo Pedrore.

<sup>21</sup> Ju arī, nacajari, jōdari ne yebai, jacoyurī náre, Pedro arejamedá:

—Yurecabu muje voimu. ¿Yéde urivurū muja yáque? arejamedá.

<sup>22</sup> Pedrore arejaimada na:

—Ñuje jabocu, ũi āmiá Cornelio, cien paivu churaravai jabocu, darobi ñujare mi yebai. Meacube ũ, aru mearore jýube Jūmenijicure. Caivu judíova me jádama ũre. Piedadama ũre pare. Cūinácu Jūmenijicui daroimu mácu, ángele, yópe abiya ũre: “Cutujacu mu Pedrore mi cūrami, ũi coyūquiepe ayu mure Jūmenijicui yávaie méne”, abiya ñai ángele ñuje jabocure, arejaimada ina Pedrore vorádaivu bácavu.

<sup>23</sup> Ne borore jápiaiyede, Pedro yópe arī, mauteicōjenezamedá náre ũque:

—Ecojarā muja. Cari ñami cūjarā muja yui, arejamedá Pedro náre.

Cōmiájāravu Pedro ũi cavede meadarī, nurejamedá náque. Aru apevu ũmuva, Jesúre ju aipóeva, Jope āmicurīimarocavu yóvarejaimada ũre máre. <sup>24</sup> Earejaimada na Cesarea āmicurīimaroi. Noi Cornelio coredejamedá Pedrore. ũque curivu ũi cūrami apevu ũ jivu aru ũi yóvaimara máre, ũi cutuimara mácavu barejáimada na. <sup>25</sup> Pedro ũi eaiyede Cornelioi cūrami, ñai jabocu ũre jacoyurī, pueдайyucu mori turejamedá Pedrore ũi cuboba yebai. <sup>26</sup> Ūbenita Pedrocapūravu nacajaicōjenezamedá ũre.

—Nacajajacu mu. Yópe ñabejacu mu. Yu máre múpe páyu pōescubu yu, arejamedá Pedro Cornelio.

<sup>27</sup> Ne baju yávaivu ecorejaimada Cornelioi cūrami. Pedro járejamedá caivu ina obedivu pōevare cójijivure noi. <sup>28</sup> Aru arejamedá náre:

—Jave majivu muja, ñuja judíova curāñmevure muja judíova āmevunque aru ñuja yóvabevure máre mujare, ñujare Moisés bācuí ñaicōjeiye boje. Ūbenita Jūmenijicuvacari majicabi yure iye ñaicōjeiye jaubevu yure caride. Āmeina jáicōjememi yure apevure, judíova āmevure. <sup>29</sup> Que baru yure mi órejaiye báquede jápiarī, cūiná ju arī, davu yu mi yebai. Que baru coyujacu yure. ¿Aipe teni ñaicōjecurū mu yure? arejamedá Pedro.

<sup>30</sup> Aru Cornelio arejamedá ũre:

—Yóvaicūvajāravu jipocai yo óra baji, tres baji nainú, yu jēniavu Jūmenijicunque yui ji cūrami. Ji jēniaiyedeca, maumena cūinácu ũmu doicaje pēoicajeque númi ji jipocai. <sup>31</sup> Aru ũ abi yure: “Mu, Cornelio, Jūmenijicu jápiaibi mi jēniaiyede ũre. Aru me jáimi mi cadateiyede cōmaje ārojarivure máre. Que baru Jūmenijicu ārumi mure. <sup>32</sup> Caride jarojacu apevure Jope āmicurīimaroi, ne vorī earājiyepe ayu cūinácu ũmure, ũi āmiá Simón Pedro. Apecu Simón, āmacajeare memeipōecu, cāvabi ũi cūrami jia urada ēcarui. Aru Simón Pedro cūcube ñiñami”. Que abi yure ñai ángele. <sup>33</sup> Que baru cūiná jarovu yu inare, ne ñavarājiyepe ayu mure ji yebai. Aru me ñaivu mu caride. Caivu ñuja cójijivubu yui caride, Jūmenijicui jáinoi. Jápaiayurivubu ñuja caiye iye mi coyuiyede yópe Jūmenijicui coyūcaicōjeiyede mure ñujare, arejamedá Cornelio Pedro.

### Pedro ũi yávaino Cornelioi cūrami

<sup>34</sup> Pedro yávarī býu, yópe arī, coyurejamedá náre:

—Yu coreóvaivu caride jáve Jūmenijicu jáñure caivu pōevare cūináuru.

<sup>35</sup> Jūmenijicu copu etayube caivu ina pueдайvure ũre, ju aivure ũre, aru mearo ñaivure máre. Caivu ina caiyajuboacavu yópe ñaivure Jūmenijicu

copu etayube náre. <sup>36</sup> Mújavacari majivu iye Jümenijicui coyuiye báquede Israel bácuí páramena mácvure üi daroquimu Cristorã. Jümenijicurecabe daroyu bácu Jesucristore, caivu pöeva ne jabocuva, üi coyuyiyepe ayu náre üi yávaiye méne, cárijimene ñacacuyure náre Jümenijicuque. <sup>37</sup> Aru mújavacari majivu no urarõ teino mácarõre Juan Bautista bácu üi coyurí buojari jádovaiye báquede pöevare Jümenijicure. Jesucristo buame üi ñaiyede urarõ pöeva ne ñari majibede Galilea ámicurijoborõi. Diede ñare cuyu bateame pu caino Judea ámicurijoborõi. <sup>38</sup> Aru mújavacari majivu ñai Jesús Nazarecacui borore. Jümenijicu beorejaquemavu úre javede. Que teni daroquemavu úre üi Espiritu Santore. Que baru Jümenijicui paruéde cuvatequemavu ü, Jesús.

<sup>39</sup> Caino üi cuino Jesús cadateame pöevare. Meadame caivu ina pöevare abujuvai jabocui ñájjine ñaimara mácvure, üi cuvae boje Jümenijicui paruéde. <sup>40</sup> Mújavacari jácarã caiye iye üi ñaiyede báquede Jerusalén ámicurímaroi aru caino judíovai joborõi máre. Ubenita úre pëvari jocucjaravena, boarí jaruvaima üi mauva. <sup>41</sup> Ubenita yóbecuríjaravua üi yainíburu yóboi, Jümenijicu nacovaquemavu úre yainore jaruvari. Aru jádovame úre ñujare. <sup>42</sup> Apevu jámetequemavu úre. Quévura ñujavacari, Jümenijicui beoimara mácvu jipocama, jácarã úre, apucure cojedeca. Üi nacajariburu yóboi yainore jaruvari, ñuja úque ácarã aru úcucarã. <sup>43</sup> Úque curivu ñuja, coyucíõjeame ñujare üi yávaiye méne apévure. Aru yópe aicõjeame ñujare máre: “Jáve ijáravu cüiquíyede yávacari jarocuyumu caivure, apurivure aru yaivu bácvure máre, ne curájjinoi. Apevure jarocuyumu cavarõ mearo Jümenijicui curõi. Aru apévure jarocuyumu toabo cüiméboi. Javede Jümenijicu beorejaquemavu yure, yópe jarocuyure caivu pöevare”. Que aicõjeame ñujare Jesús. <sup>44</sup> Aru Jesúvacari ñai caivu Jümenijicui yávaiyede coyucaipöeva mácvui coyumume ü. Na mácvu coyurejaimada üi borore yópe: “Caivu pöeva ne ju aru Jümenijicui daroquimure, Jümenijicu árumetecuyume ne ámeina teiyede”, arí coyucarejaimada na mácvu, arí coyurejaimada Pedro Corneliojäre.

#### Judíova ámevu ne copu etaino Espiritu Santore

<sup>44</sup> Pedro üi coyuiyedeca, ñai Espiritu Santo náre earí ñaicõjenejaimada caivu ina jápiaivure iye yávaiye méne. <sup>45</sup> Que baru ina judíova, Jesucristore ju aivu, Pedroi yóvaimara mácvu, cucumarejaimada ne jáiyede Jümenijicu daroyure ñai Espiritu Santore ina judíova ámevure. <sup>46</sup> Ina judíova jápiaivu ina judíova ámevure yávaivure apecamua yávaicamua ne majibecamuaque, majidejaimada ñai Espiritu Santore ñaicõjeñure náre. Ina pöeva mamarumu ju aivu Jesúre dijárvure mearore jídejaimada Jümenijicure, üi urarõ majié boje, üi urarõ parué boje máre. <sup>47</sup> Dinumu Pedro arejaimada:

—Ina pöeva, ñujape paivu, copu etadama ñai Espiritu Santore. Que baru pöecu cubebi náre jádovaicõjemecu Jümenijicure ocoque, arejaimada Pedro.

<sup>48</sup> Que arí, náre jádovaicõjenejaimada Jümenijicure ocoque, ne Jesucristore ju aiye boje. Dinumu jëniarejaimada Pedrorre, üi mautequiyepa aivu náque apejaravua.

**Pedro ñi coyũino Jerusalécavũ Jesúre jũ aipõevare**

(Hch 1.5; 10.1-48)

**11** <sup>1</sup>Dinũmu Jesús ñi yávaie méne beorĩ coyũicõjeimara aru Jesúre jũ aipõeva caino Judea ãmicurijoborõcavũ máre jápiarejaimada ne borore, apevu judíova ãmevũre jũ aivũre máre Jũmenijicui yávaie méne. <sup>2</sup>Que baru Pedro muri nuñũ mácu Jerusalén ãmicurĩmaroi, apevu judíovacavũ jararĩ yávarejaimada úre. Ina judíova dápíarejaimada caivu ãmũvare Jesúre jũ aivũre ne cajede buraicõjeiye jaũrõre náre, yópe Jũmenijicui daicõjeiyepe ñi coyũie báquede Moisés bácure. Que baru ina judíova jaraivu Pedrora, jẽniari járejaimada úre:

<sup>3</sup>—¿Aipe teni ecocurũ mu judíova ãmevui cũrami? ¿Aipe teni náque dobarĩ ãcurũ mu? arejaimada na Pedrora.

<sup>4</sup>Ne que aiyẽ boje, Pedro coyurejaimada náre caiye iye vaiye báquede úre mamabũino mácarõre pu dijãravũita. <sup>5</sup>Yópe arĩ, coyurejaimada náre:

—Yávacari jẽniañũ matecácu Jũmenijicure Simói cũrami, Jope ãmicurĩmaroi. Ji jẽniaiyedeca, yũ apũcu jácacu yópe decoboinope apejĩene yópe uracaje cuitótecajepe yóvaicũvaitõbuaque buoinope jõdaicajede cavarõre jocarĩ. Emeni darĩ pu ji yebai mauteavũ dicaje. <sup>6</sup>Que teni me cocorĩ dicaje jĩvui jácacu obedivu ãimarare yóvaicũvaivu cũbobaque cuivũre, apevu oteiãimarare aru apevu macarõcavũ jijecurivũre máre; aru obedivu papeivũre; aru obedivu ãimara vuivũre máre. <sup>7</sup>Dinũmu jápiacacu Jũmenijicure yópe ayũre yũre: “Mũ, Pedro, nacajajacu. Boajácu mi ãquinova”, áme yũre. <sup>8</sup>Ubenita acacu yũ úre: “Mũ, ji jabocu, ¡que ãmevu! Cainũmua ãmevu yũ caiye iye Moisés bácu ãicõjemene ñũjare, judíovare. Que baru ãiyũbevũ yũ diede”, acacu yũ. <sup>9</sup>Ubenita Jũmenijicucapũravũ, yópe arĩ, yávame yũre cojedeca cavarõ mearo ñi cũrõre jocarĩ: “Áiyũbevũ yũ, abejacu mũ, iyede ji ãicõjeiyede mure”, áme yũre Jũmenijicu. <sup>10</sup>Aru yóbecue vaiávũ yũre yópe paino. No yóboi, quénora mũri copainũvũ dicaje pu cavarõ cojedeca.

<sup>11</sup>Dinũmũmareca yóbecurã ãmũva edaima diñami ji curiñami. Cũinácu Cesarea ãmicurĩmarocacu ñi daroimara mácavũ bateima na, yũre vorãeavũ.

<sup>12</sup>Aru ñai Espĩritu Santo yópe áme yũre: “Jidubejacu. Náque ñũjacu mũ”, áme yũre. Aru ina seis paivu ãmũva, Jesúre jũ aipõeva, yóvaima yũre. Cesarea ãmicurĩmaroi nuri, yũre orejayũ bácu cũrami earĩ, noi ecocarã ñũja caivu.

<sup>13</sup>Que teni ñai cũrami upacu, yópe arĩ, coyúame ñũjare: “Cũinácu ángele cũetebi yũre. Jávu yũ úre núcure yui ji cũrami jĩvui. Ñ abi yũre: ‘Jarojacu apevũre Jope ãmicurĩmaroi, ne vorĩ earãjiyepe ayũ cũinácu ãmũre, ñi ãmiá Simón Pedro. <sup>14</sup>Ñ coyũcũyũme mure yávaie méne, mũ aru caivu mi cũramicavũ máre, mũje meatenajiyepẽ ayũ, Jũmenijicui ãrũmetequiyepe ayũ mũje ãmeina teiyede’. Que abi ñai ángele yũre”, áme ñai cũrami upacu yũre.

<sup>15</sup>Aru ji yávarĩ buiyede, ñai Espĩritu Santo edaibi náre máre nopedeca ñi edaiyede ñũjare mamarumũre. <sup>16</sup>Dinũmũre ãrũtecacu yũ Jesús ñi coyũie báquede: “Juan Bautista bácu jádovame mũjare Jũmenijicure ocoque. Ubenita yũ jádovacũyũmu mũjare Jũmenijicure pũeno mearo baju. Darocũyũmu mũjare ñai Espĩritu Santore”. Que áme ñũjare Jesús. <sup>17</sup>Jãvemũ. Ñũja judíova ñũje jũ aiyede Jesúre, Jũmenijicu daroáme ñũjare ñai Espĩritu Santore.

Nopedeca ðaibi ina judíova ámevu ne ju aiyede Jesúre. Jūmenijicu daroibi ñai Espíritu Santore náre máre. Que baru, ¿aípe ðaíye jauri yure? Jūmenijicure ũi uróre ðaicōjemecu buojabevu yu, arejameða Pedro ina judíovare.

<sup>18</sup> Aru ina judíova jápiaivu bácvu Pedro ũi coyuiyede, ne jararí yávaiyede úre ðajocarejaimaða. Quénora mearore jídejaimaða Jūmenijicure.

—Jūmenijicu meacu bajube ũ. Ũ ubi judíova ámevure máre, ne ðaiyede oatvavari ne ámeina teiyede chíoiye boje, ũi árumetequiyepe ayu diede, aru ũi cure ðaquiyepe ayu náre jaravu cūiméjaravu baquinóre, arejaimaða na.

### Antioquíacavu ne ju aino Jesúre

(Hch 8.1-4; 21.10)

<sup>19</sup> Esteban mácvure judíovai jabova ne boarí jaravari buru yóboi, Jesúre ju aipóeva dupini nurejaimaða Jerusalén ámicurímarore jocarí apejororóita, judíovai jabova ne ñáji ne ðaíye boje náre. Apevu dupini nurejaimaða joai, pu Fenicia ámicurijororóita, aru Chipre ámicurijavúita, aru Antioquía ámicurímaroita. Ne nuiyedeca coyurejaimaða Jesús ũi yávaiye méne apevu judíovare. Ũbenita coyubedejaimaða cáreja diede judíova ámevure. <sup>20</sup> Ũbenita apevu ũmva, Jesúre ju aipóeva, Chipre ámicurijavucavu aru Cirene ámicurímarocavu máre, nurejaimaða Antioquía ámicurímaroi. Noi coyurejaimaða judíova ámevure máre iye yávaiye méne. “Jesúrecabe caivu póeva ne jabocu”, arí coyurejaimaða na. <sup>21</sup> Jūmenijicu jídejameða náre ũi paruéde. Que teni cadatedejameða náre, ne buenajiyepa ayu me. Aru obedivu póeva ju aivu iye yávaiye méne, chíoiyu ne ámeina teiyede, oatvarejaimaða ne ðaiyede, ju arájiyu Jesúre.

<sup>22</sup> Antioquía ámicurímarocavu ne borore jápiaivu, ina Jerusalén ámicurímarocavu Jesúre ju aipóeva jarorejaimaða Bernabéde ne yebai. <sup>23</sup> Ũi eaiyede Antioquía ámicurímaroi, járejameða Jūmenijicui uraró mearo ðaiyede ina Jesúre ju aivure. Que baru torojurejameða ũ, Bernabé. Parurórea yópe arí, coyurejameða náre:

—Jesúre ju ajará cainumva. Cūináumeque ðajará cainumva caiye iye ũi bueiye báquepe. Cainumva árumetebejará diede, arejameða náre.

<sup>24</sup> Ñai Bernabé parurórea ju ayu barejámeða Jesucristore. Aru ñai Espíritu Santo ðaicōjenejameða úre. Que baru mearo ðayu barejámeða ũ. Aru obedivu nócvu, ũi bueiye ðapiaivu, ju arejaimaða Jesúre.

<sup>25</sup> No yóboi, Bernabé nurejameða Tarso ámicurímaroi, vocuñ Saulore.

<sup>26</sup> Úre vorí earí, nūvarejameða úre Antioquía ámicurímaroi. Noi ina pucará curívu cūináju baju. Cójjiivaivu barejámeða ina Jesúre ju aivūque. Obedivu póeva Jesúre ju aivure buevaivu barejámeða na, Bernabé aru Saulo máre. Noi Antioquía ámicurímaroi mamarumu póeva ámidorejaimaða ina Jesúre ju aipóevare cristianova.

<sup>27</sup> Dijaravuai apevu Jūmenijicui yávaiyede coyucaipóeva emenejaimaða Jerusalén ámicurímarore jocarí. Aru earejaimaða Antioquía ámicurímaroi.

<sup>28</sup> Cūinácu nácacu, ũi ámiá Agabo, yávacunacajarejameða ũ. Ñai Espíritu Santo yávaicōjenejameða úre. Aru Jūmenijicui yávaiyede coyucarejameða ũ, yópe arí: “Caivu Judea ámicurijororócvu ñájinajivubu uraró ávuéna”, arejameða ũ. Aru obebejuva yóboi, Claudio ũi jaboteinumvure, póeva ñáji ne jaimaða uraró ávuéna, nópe ũi coyucaíye báquepedeca.

<sup>29</sup>Iye Jūmenijicui yávaivede coyucaiyede jápiaivũ bávavũ, ina Jesúre ju aipõeva “Cadatenajare nãre, Judeacavũ Jesúre ju aivũre”, arejaimada ne baju. Que aivũ, na coapa davaivũ barejáimada tãuturare ne oainope, ne jínajiye. <sup>30</sup>Ne tãuturare cõjijovarĩburu yóboi, Bernabé Saulomaque nũvarejaimada diede, jínajivũ Judea ãmicurijoborõcavũ Jesúre ju aivũre coreipõevare.

#### Jabova ne boarĩ jaruvaino Santiagore aru ne buoino Pedrore

**12** <sup>1</sup>Dijãravuai ñai jabocu Herodes ñãjine ñarĩ búrejamedã apevũ Jesúre ju aipõevare. <sup>2</sup>Boarĩ jaruvaicõjenejamedã Santiagore, Jūai mamicũre, boaicaroveque. <sup>3</sup>Ëi boarĩ jaruvaiye báque Santiago bácũre cojurejavũya ina judĩovai jabovare. Que baru buicõjenejamedã Pedrore. Dinũmu páure bucũre ñaiye cube ãiye torojũve teinũmu marejãvũya. <sup>4</sup>Pedrore ne jẽniburu yóboi, nũvarejaimada ãre ãmeina teivũre jẽni jacoĩnamĩ. Noi yóvaicũvaiajuboa churarava jãri coreivũ barejáimada ãre. Yóvaicũvaivũ churarava barejáimada yajuboa coapa. Aru ina churarava jãri coredejaimada ãre ne yajuboa coapa. Herodes davaicõjecũyũ barejámedã Pedrore põeva ne jáinoi Pascua ãmicurijãravũ yóboi, acũyũ ãre “Yaicũyũmu mũ”. <sup>5</sup>Que teni ina churarava me coreivũ barejáimada Pedrore ãmeina teivũre jẽni jacoĩnamĩ jívũi. Ëbenita ina Jesúre ju aipõeva parurõreca jẽniaivũ barejáimada Jūmenijicũque ãre jãravũre aru ñamine mãre.

#### Jūmenijicu ãi jaetovaino Pedrore ãmeina teivũre jẽni jacoĩnamine jocarĩ

<sup>6</sup>Cũinãñami, Herodes davaicõjecũyũ Pedrore cõmiãijãravũ jipocacañamine, Pedro cãñũ marejãmedã ãmeina teivũre jẽni jacoĩnamĩ jívũi. Pucarã churarava coricai cãñũ, pucamea tãumeaque buoimũ mãcu; cũinãmeque buoimũ mãcu cũinãcu churarare ãi meapũravũ aru apemeque buoimũ mãcu apecũ churarare ãi cãcopũravũ. Aru apevũ churarava mãre coreivũ barejáimada diñami jedevacobe yebai. <sup>7</sup>Maumejiena ñai Jūmenijicui daroimũ, cũinãcu ángele, cõetedejamedã noi Pedro yebai. Aru miadãrejãvũya diñami jívũi. Ñai ángele jẽni jãñũ marejãmedã ãre cũinãpũravũ, ãre coedavacũyũ, aru arejamedã ãre:

—jMaume coedajacu mũ! arejamedã Pedrore.

Aru cũinã dimeã tãumea voarĩ turejavũya Pedroi ãmuveare jocarĩ. <sup>8</sup>Ñai ángele arejamedã ãre:

—Buojacũ mi jãriõicãvare. Dojacũ mi curaidoare mãre, arejamedã.

Ju arĩ, ãi ñaicõjeiypedeca ñarejamedã Pedro. Aru ñai ángele arejamedã ãre:

—Dojacũ mi puenocacajede. Aru dajacu yáque, arejamedã ãi.

<sup>9</sup>Pedro ãi yóboi nuri, etarejamedã diñami jacoĩnamine jocarĩ. Ëbenita Pedrocapũravũ coreóvabedejamedã ãi ñaiye jãvene. “¿Decoboino mática yo?” arĩ dapiarejamedã Pedro. <sup>10</sup>Nũre nuivũ vaidéjaimada cũinãyajubo churarava coreivũre. Aru vaidéjaimada apeyajubore mãre, churarava coreivũre. Quénora earejaimada na uracobe jedevacobe paruricobe tãuque ñaicobede, nuino imaroi. Dicobe bajumareca vorejavũya, ne etarãjiyepe diñami jacoĩnamine jocarĩ. Nuimai cuivũ barejáimada na. Aru cũinã ñai ángele dajocarejamedã Pedrore cũinãcura. <sup>11</sup>Dinũmũmia Pedro coreóvarejamedã iye ãre vaiye jãvene. Yópe arĩ dapiarejamedã:

“Caride majivu yu caiye iye jävene. Jümenijicu darocube üi ángelede, üi jaetovaquiyeye ayu yure Herodes üi ðaicöjeiyede jaruvarĩ, üi ðabequiyeye ayu yure yópe ina judíovai jabova ne urópe”, arĩ dápiarejamedá Pedro üi baju.

<sup>12</sup>Ü coreóvayu caiye iyede, nurejamedá Maríai cürami. Ico María Jüai paco barejácada. Aru ñai Jüavacari ámicurejamedá Marcos máre. Obedivu pöeva cójjivu diñami jëniaivu barejáimada Jümenijicuque, üi meadaquiyeye aivu Pedrore. <sup>13</sup>Ne jëniaiyedeca, Pedro eayu diñami jedevacobei, órejurejamedá. Aru cüináco ne yebacaco, ôi ámiá Rode, voaconuridurejacoda ô. <sup>14</sup>Übenita Pedrore jápiarĩ, coreóvarĩ, pare torojurejacoda ô. Que baru cúyarĩ copainurejacoda pöevai curitucubui cojedeca, jedevacobede voabecova cäreja. Ina jëniaivure torojuco arejacoda ô:

—Jedevacobei cubi Pedro, arejacoda ô.

Übenita ju abevu óre, arejaimada na:

<sup>15</sup>—Árumecobu mu, arejaimada.

Übenita paruróreca:

—Jävetamu. Jápiararã yure. Jedevacobei cubi Pedro, arejacoda ócapüravu.

Ina cójjivu arejaimada óre:

—Ürecabe Pedro bácuĩ decocu, mi jápiaimu, arejaimada na.

<sup>16</sup>Aru ne nópe yáva iyedeca, Pedrocapüravu dajocabecuva órejayu barejámedá üi cäreja. Quénora apevu nácvu jedevacobede voaivu, Pedrore jáivu, cuecumarejaimada na. <sup>17</sup>Pedro cürami ecorĩ, üi puruque jáðovari, bi aicójeni, coyurejamedá náre caiye iye Jümenijicuĩ ðaie báquede jaetovacuyu üre ámeina teivure jëni jacoĩnamine jocarĩ.

—Iye ji coyuiyede Santiago, Jesuí yócure, máre coyujarã muja, aru caivu apevu Jesúre ju aipöevare máre, arejamedá náre Pedro.

Náre yávarĩ buojarĩ, Pedro etarejamedá diñamine jocarĩ, nucuyu apenoita.

<sup>18</sup>Cómiájjaravu miadáe tuyede ina ámeina teivure jëni jacoĩnami churarava pare jidurivu cãrijinejaimada na. Jëniari jáivu barejáimada ne bajumia:

—¿Ari curi Pedro? ¿Aipe tedica ü? arejaimada.

<sup>19</sup>Herodes churaravare voicöjenidurejamedá Pedrore. Übenita eabedejaimada üre. Que baru Herodes jëniari járejamedá ina churaravare ne majiéde Pedroi borore. Aru boarĩ jaruvaicöjenejamedá náre, Pedro üi dupini nuiye boje náre jocarĩ.

No yóboi, Herodes emenejamedá Judea ámicuróre jocarĩ, cucuyu Cesarea ámicuriĩmaroi.

### Herodes üi yaino

<sup>20</sup>Üi cuede noi, pare jararejamedá ñai Herodes Tiro aru Sidón ámicuriĩmaroacavure máre. Que baru apevu diĩmaroacavu cójjijidejaimada, cãrijimene ðaiyurãjivu Herodede. Diĩmaroacavu ñni bojedaivu barejáimada ne árajiyede Herodei jaboteinoi. Que baru maucuvaiyubedejaimada üre. Mamarumure coyurãnurejaimada Blastore, jëniarajivu üi cadatequinore náre. Ñai Blasto Herodei cüramine coreipöecu barejámedá. Ne coyuiyede jápiayu, ne jëniaiyede ju ayu, cadateiyurejamedá náre. Üi cadateiyequé, cójjijini, nurajivu barejáimada Herodes yebai, jëniarajivu üi cãrijimene

daquiyepa aivü náre. <sup>21</sup>Que baru cüinájäravü, Herodes üi beoijäravui, üi meacaje jabocui doicajede doríburu yóboi, ne cójijinoi nuri, jabocui dobaröra dobarí, yávarejameđa náre joe ñai Herodes. <sup>22</sup>Aru yávaríburu yóboi, caivü ina cójijivü, yópe arí, cođoboboivü barejáimade:

—¡Jümenijicui yávaiyepa yávaibi ü! Yávabebi ümupe. ¡Jümenijicui yávaiyepa yávaibi ü! codoboborí arejaimade na.

<sup>23</sup>Maumejiena Jümenijicui daroimü, cüinácü ángele, pare ijino jídejameđa Herodede, “Yu máre ümurecabu. Jümenijicu ámevü yu” üi arí coyube boje ina pöevare. Que teni júva ne áimü yaidéjameđa ü, Herodes bácu.

<sup>24</sup>Übenita apevü pöeva obedivü Jümenijicui yávaiye méne coyuiyede jápiarí, ju arejaimade diede. Caijäravua apevü ne ju aiyede püeno baju obedivü ju aivü nurejaimade.

<sup>25</sup>Bernabé aru Saulo ne jíniburu yóboi iye táuturare ju aivure coreipöevare, copainurejaimade Jerusalén ámicuriimarore jocarí. Aru Juan Marcove nurejaimade náque Antioquía ámicuriimaroi.

#### Bernabé aru Saulo ne bueni buino Jümenijicui yávaiyede

**13** <sup>1</sup>Antioquía ámicuriimarocavü Jesúre ju aivü jëneboi curejaimade apevü Jümenijicui yávaiyede coyüivü aru pöevare bueivü máre. Na marejáimade Bernabé; aru Simón, ámidoimü mácu ñemicü; aru Lucio, Cirene ámicuriimarocacü; aru Manaén, Herodei bucúövaimü mácu juedocu cäreja; aru Saulo máre. (Ñai Herodes Galileacavü ne jabocu barejaquémavü.) <sup>2</sup>Cüinájäravü ina bueipöeva mearore jívü barejáimade Jümenijicure. Aru ámenejaimade áiyede, ne me jëniarajiyepa aivü úre. Ne nópe ðaiyedeca, ñai Espiritu Santo arejameđa náre:

—Javede beocacü yu Bernabéde aru Saulore máre, ne memecaräjiyepa ayu yure. Que baru caride jarojará náre yure memecaräjivure, arejameđa ñai Espiritu Santo.

<sup>3</sup>Que teni cojedeca jëniarejaimade Jümenijicure ámevüva áiyede. Bernabéde aru Saulore máre ne jipoburá tuoríburu yóboi ne puruáque, jáđovarajivü ne memeno buiyede, jarorejaimade náre.

#### Jesús üi yávaiye méne beorí coyucöjeimara ne bueno Chiprecavure

<sup>4</sup>Ñai Espiritu Santo nuicöjenezameđa ina pucaräre Seleucia ámicuriimaroi. Noi jiađocü uracüi jaturí nurejaimade pu Chipre ámicurijavuita. <sup>5</sup>Earejaimade Salamina ámicuriimaroi. Judíovai cójijíñamiai nuri, ecorí coyurejaimade Jümenijicui yávaiye méne. Aru Juan Marcos náre yóvayü barejámeđa, cađatecyü náre. <sup>6</sup>Caino no jivavure vainí, nuri earejaimade na Pafos ámicuriimaroi. Noi copurejaimade cüinácü judíore, üi ámiá Barjesús.

Ñai Barjesús “Jümenijicui yávaiyede coyucaipöecubu yu”, are cuyü barejámeđa. Übenita borocucu barejámeđa. Quénora yaviéde ðayü barejámeđa ü. <sup>7</sup>Üi yóvaimü marejámeđa no jivavavui jabocu, üi ámiá Sergio Paulo. Ñai jabocu me majicu barejámeđa ü. Jápiayürejameđa Jümenijicui yávaiye méne. Que baru cuturejameđa Bernabéde aru Saulore máre üi yebai, ne coyuräjiyepa ayu diede úre. <sup>8</sup>Übenita ñai yavié ðaipöecu, üi ámiá griego ámicuricamua yávaicamuaque Elimas, maucüvarejameđa náre. Übenidurejameđa ñai jabocure üi ju aiyede Jümenijicui yávaiye

méne. <sup>9</sup>Dinumure Saulo me járejamedá ñai yavié ðaipõecure. Saulovacari barejamedá Pablo ùi ãmiá. Ñai Espíritu Santo ðaicõjenejamedá Pablöre. Que baru ñai yavié ðaipõecure me jári arejamedá úre:

<sup>10</sup>—¡Mu, abujuvai jabocupe ðare cuivu mu! Cainumua maucuvacutam mu ina mearo ðaivure. No mearore ubevu mu. Cainumua ãmecubu mu. Borocucutam mu. Jujovaivu apevure. Cainumua meyuyarí ávaivu mu, “Jãve ãmevu Jũmenijicui yávaie”. Yópe ávaivu mu põevare, ne ju abenajiyeye ayu Jũmenijicui yávaieyede. <sup>11</sup>Jájacu. Caride Jũmenijicu ñáline ðaquiijibi mure mi ãmeina teiye boje. Jári eabequiijivu mu. Apejãravua aviá ùi miadãene jámequiijivu mu, arejamedá Pablo.

Cũiná járe eabedejamedá Elimas. Que baru curĩdurĩ voyu barejamedá apecure, úre nuvacuyu ùi puruque. <sup>12</sup>Aru ñai jabocu iyede jáñu, ju arejamedá Jesús ùi yávaie méne. Que baru pare cucumarejamedá iye ne buieyede Jesúrã.

**Pablo aru Bernabé ne bueno Antioquía Pisidiacarõcavure**

*(Mt 3.11, 17; 10.14; 17.15; 27.22-23, 57-61; Mr 1.4, 7; 6.11; 9.7;*

*15.13-14, 42-47; Lc 3.3, 16, 22; 9.5, 35; 10.11; 23.21-23, 50-56;*

*Jn 1.20, 27; 19.15, 38-42; Hch 1.3; 2.27; He 1.5; 5.5)*

<sup>13</sup>No yóboi, Pablojá jiaðocũ uracũ jaturĩ Pafos ãmicurĩmarore jocarĩ nurejaimada Perge ãmicurĩmaroi jia urada apeduvei, Panfilia ãmicurijoborõi. Dinumu Juan Marcos ðajocarejamedá náre, copainucuyu Jerusalén ãmicurĩmaroi. <sup>14</sup>Ûbenita Pablojá nurejaimada Perge ãmicurĩmarore jocarĩ. Earejaimada Antioquía ãmicurĩmaroi, Pisidia ãmicurijoborõi. Noi judfovai jabovãijãravu sãbadoi, judfovai cójijiñami nuri, ecorĩ, dobarejaimada na, Pablojá. <sup>15</sup>Apecu jári borotodejamedá Jũmenijicui ðaicõjeiyede ùi coyuiye báquede Moisés bácre aru cũinácu Jũmenijicui yávaieyede coyucaipõevacacu bácu ùi toivaiye báquede máre. Ûi jári boroteniburu yóboi, ina cójijiñamine coreipõeva ðarejaimada apecure Pablojá yebai, ùi jẽniari jáquiyeye aivu náre:

—Muja, jĩvu, ¿yávaieurãru muja ina põeva yore curivure, cadatenajivu náre? Yávaieurivu baru, coyujarã caride, arejamedá ne daroimu mácu Pablojáre.

<sup>16</sup>Que baru Pablo nacajari, ùi puruque jáðovari ne bi arãjiyepe ayu, coyurĩ búrejamedá náre.

—Muja, jĩvu, Israecavu, aru judfova ãmevu mearore jĩvu Jũmenijicure máre, jápiajarã ji coyuiyede. <sup>17</sup>Ñai Jũmenijicu, Israecavu maje mearore jĩmu, beorejaquemavu majeñecuva mácavure, judfovare. Obedicũpuruwarejaquemavu na mácavure ne cue báquede apevure apejaborõi, Egipto ãmicurijoborõi. Ûi urarõ paruéque nuwarejaquemavu na mácavure Egipto ãmicurijoborõre jocarĩ. <sup>18</sup>Napinejaquemavu na mácavure cuarenta paiũjua baju ne cuede cãreja põecubenoi. <sup>19</sup>Bíjaroyu bácu siete paiyajuboare, Canaán ãmicurijoborõcavure, jídejaquemavu no joborõre ùi põeva mácavure. <sup>20</sup>Que teni Jũmenijicu jabotede ðarejaquemavu obedivu jabova ùi põeva mácavure cuatrocientos cincuenta paiũjuareca pu ñai ùi yávaieyede coyucaipõecu Samuel bácu ùi jaboteiyeta.

<sup>21</sup>'Aru Israecavu bácvu ne jẽniaiyede Samuel bácre, “Epejacu jabocure ñujare” ne aiyede, Jũmenijicu jabotede ðarejaquemavu Saúl bácre, Cis bácu

mácure, Benjamín mácuí yajubocacure, ñi jabotequiyeye ayu na mácavure. Aru Saúl bácu jabotedejaquemavu na mácavure cuarenta paiñua baju. <sup>22</sup>Dinamumia Jūmenijicu jaboteicōjemenejaquemavu Saúl bácu. Quénora jabotede ñarejaquemavu David bácu. Yópe arejaquemavu Jūmenijicu: “Davique, Isaí mácuque, torojuvu yu. Ji ñaicōjeiypedeca ñacuyume ñ”, arejaquemavu Jūmenijicu.

<sup>23</sup>Aru cūinácu David bácuí pāramenacacure, Jesúre, daroquemavu Jūmenijicu, ñi meadaquiyeye ayu Israecavure. Que teni Jūmenijicu ñaquemavu yópe ñi jipocamia aye báquepedeca. <sup>24</sup>Ubenita Jesús ñi daquiyeye jipocai, Juan Bautista bácu coyúameda caivu Israecavure. “Chñori dápijará muja muje ámeina teiyede. Oatuvajará muje ñaiyede, Jūmenijicu ñi árumetequiyeye aivu diede. Aru jádovajara muja Jūmenijicure ocoque”, ámeda Juan Bautista bácu. <sup>25</sup>Uñi memeinore buojare nuñu, Juan Bautista bácu ámeda pōevare: “Muja dápiavubu yure muje coreimupe, ubenita yu ámevu ñai muje coreimu. Dacuyume ji yóboi cūinácu, ji pueno paracu. Ñrecabe meacu baju caivu pueno. Que baru ñre cadateni buojabevu yu. Buojabevu yu oarí nacachini duayu ñi curaidoa buoimeare”, ámeda Juan Bautista bácu.

<sup>26</sup>Muja, jívu, Abraham mácuí pāramena, aru judíova ámevu mearore jívu Jūmenijicure máre, majareca Jūmenijicu daroibi ñi yávaiye méne, maje meatenajiyeye ayu. <sup>27</sup>Ubenita ina Jerusalén ámicurímarocavu aru ne jabova máre coreónabetequemavu ñai Jesúre náre meadaipōecure. Ne boaicōjeiyede ñre ñaquemavu yópe ina Jūmenijicui yávaiyede coyucaipōeva mácvu ne toivaiye báquepe, diede jári boroteivuvacari ne jabuóvairavuai sábadoa coapa. Ubenita ne boarí jaruvaicōjeiyede Jesúre, vaiquémavu caiye yópe ina Jūmenijicui yávaiyede coyucaipōeva mácvu ne toivaiye báquepedeca. <sup>28</sup>Jesús ñi ámeina teiye cubedeca, quénora Pilatore boarí jaruvaicōjeimada ñre. <sup>29</sup>Aru ñre ñaríburu yóboi yópe ina Jūmenijicui yávaiyede coyucaipōeva mácvu ne toivaiye báquepedeca ñi borore, apevu ñi mácu jocusjaravede jōðavari, ñni, cūracobei jaruvaimada na. <sup>30</sup>Ubenita Jūmenijicu nacovaquemavu ñre yainore jaruvarí. <sup>31</sup>Obedijaravuaire ina ñi yóvaimara mácvu jáimada ñre. Na mateima yóvaivu bácvu ñre jipocamia ñi nu iyede Galilea ámicuríjorborōre jocarí pu Jerusalén ámicurímaroita. Aru caride ina jáivu bácvu coyuvubu Israecavure ne majiéde Jesúre.

<sup>32-33</sup>Aru ñujacapuravu coyurādaivubu mujare iye Jūmenijicui yávaiye méne. Jūmenijicu “Mearo ñacacuyumu yu mujepāramena māravure”, arejaquemavu judíovai ñecuva mácavure. Aru Jūmenijicu nacovañu mácu Jesúre yainore jaruvarí, ñacaquemavu majare, judíova bácvu pāramenare aru judíova ámevure máre, yópe ñi aye báquepedeca. Yópe toivarejaquemavu apeno toivaino mácarō Salmo ámicurí Jūmenijicui coyuiye báquede Jesúrā: “Jímacurecabu mu. Caride caivu ne jápiayede yúvacari jaboteicōjeivu mure”, arejaquemavu Jūmenijicu Jesúre. <sup>34</sup>Apeno toivaino mácarōi Jūmenijicu arí coyurejaquemavu ñi nacovaquiyede Jesúre yainore jaruvarí, ñi bajure pojebequiyeye ayu. “Jāve mearo ñacacuyumu yu mujareca yópe ji aye báquepedeca David bácu”, arejaquemavu Jūmenijicu. <sup>35</sup>Aru apeno toivaino mácarō máre, Salmo ámicurí, ññu toivaipōecu bácu arejaquemavu Jūmenijicure: “Pojeicōjemecubu mu ji bajure, ji meacu baju boje, aru ji memecaiye boje mure”, arejaquemavu. <sup>36</sup>David bácuapuravu

ðarejaquemavu Jūmenijicui urōpe ũi cue báquede ijāravui. Que darī buojari, yaidējaquemavu. Aru jaruvarejaquemavu ũi baju bácarōre ũi necuva mácavu yebai cūracobei, aru ũi baju bácarō pojedejaquemavu. <sup>37</sup>Ūbenita Jesúvacari, Jūmenijicui nacovaimu mácu yainore jaruvari, pojebetequemavu ũ.

<sup>38-39</sup>’Muja, jivu, jāve majijarā muja űuje coyuiyede mujare Jūmenijicui yávaiye méne, ũi ārumetequiyepe aivu āmeina teiyede, Jesús ũi yaiye báque boje majare boje. Majijarā. “Mi āmeina teiye cubevu”, acuyume Jūmenijicu caivu ina ju aivure Jesúre. Ūbenita pōeva ne ðaiyuru Jūmenijicui ðaicōjeiyede ũi coyuiye báquede Moisés bácuere, “Mi āmeina teiye cubevu”, abecuyume náre. <sup>40</sup>Que baru me ðajarā muja, vaibéquiyepe aivu mujare yōpe Jūmenijicui toivaicōjeiye báquepe ũi yávaiyede coyucaipōeva mácavure:

<sup>41</sup>Jájara muja, ju abeni yurivu ji yávaiyede. Yure jārī cōenínajaramu muja. Ji ðaquiye de jidujarā muja. Yainí bíjarājaramu muja. Muje curijārvuare pōeva ne ðarī majibede ðacuyumu yu. Ūbenita ju abejebu muja, apesu ũi coyuru mujare ji ðaiyede. Apesu ũi coyuiyedeca aipe aiyurōre ji ðaiyede, ju abejebu muja cāreja, arejaquemavu Jūmenijicu mujare, arejamedā Pablo náre.

<sup>42</sup>Arī buojari, Pablojā ne etaiyede judíovai cójijīñamine jocarī, judíova āmevucavu jēniarejaimada náre ne copaidarājiyede apesumana judíovai jabuóvaujāravui, ne coyurājiyepe aivu pueno baju iye yávaiye méne.

<sup>43</sup>Obedivu pōeva, judíova aru judíova āmevu mearore jivu Jūmenijicure, ne etaiyede cójijīñamine jocarī cūjurejaimada Pablōre aru Bernabéde máre ne nuiyede. Que teni ina Jesús ũi yávaiye méne beorī coyucōjeimara coyuiyu barejáimada ina pōevare parurōreca, ne ðajocabenajiyepe aivu ne coreinore Jūmenijicui mearo bojecubeno ũi ðacaquiye de náre.

<sup>44</sup>Aru apesumana judíovai jabuóvaujāravu sábadoi, obedivu pōeva diīmarocavu cójijidejaimada, jápiarājivu Jūmenijicui yávaiye méne.

<sup>45</sup>Ūbenita apesu judíovacapūravu, ne jáiyede caivu ina obedivu pōevare cójijivure, pare jorojīnejaimada na. Que baru copu arejaimada Pablo ũi coyuiyede. Aru āmecororejaimada ũre. <sup>46</sup>Ūbenita Pablo aru Bernabécapūravu jidubevuva pueno baju parurōque arejaimada:

—Mamaramure javu űujare űuje coyuiye Jūmenijicui yávaiye méne muja, judíovare. Ūbenita muja jápiaiyubevu diede. Que baru muje cuvaiyube boje jāravu cūiméjāravu baquinóre ðajocaivubu mujare. Caride coyurānuivubu iye yávaiye méne ina judíova āmevure. <sup>47</sup>Que teni ðarājivubu űuja yōpe Jūmenijicui coyuiye báquepe, arejaimada.

Yu jaroivu mure yōpe pēoinope caivu ina pōeva judíova āmevure, ne ju arājiyepe ayu ji yávaiye méne, meadacuyu náre, arejaquemavu Jūmenijicu.

<sup>48</sup>Ina judíova āmevu jápiaivu iyede, torojurivu “Jūmenijicui yávaiye me bajutamu”, arejaimada. Nácavu, Jūmenijicui beoimara mácavu cūvarājivu jāravu cūiméjāravu baquinóre, ju arejaimada na Jesúre. <sup>49</sup>Aru caino dijoborōre apesu pōeva obedivu Jūmenijicui yávaiye méne jápiarī, ju arejaimada diede. Que teni pueno baju obedivu ju aivu nurejaimada. <sup>50</sup>Ūbenita nócavu judíova maucuvare ðarejaimada diīmarocavu, űmuvu parurivure aru nomiva judíova āmevu pōeva ne puedainomivare máre, ne űājine ðarājiyepe aivu Pablōre aru Bernabéde máre. Que baru

jaetovarejaimada náre dijoboróre jocarí. <sup>51</sup>Dinumure Pablojá pupedejaimada jobore náre jëiyede ne cuboba cächinoi ne jáiyede, ina pöeva ne jápiaiyube boje Jümenijicui yávaiye méne. Que teni náre dajocarí nurejaimada na Iconio ámicuriĩmaroi. <sup>52</sup>Ina Antioquía ámicuriĩmarocavü Jesúre ju aipöeva torojurejaimada. Aru ñai Espíritu Santo ñaicöjenezaimada náre coapa.

#### Pablo aru Bernabé ne bueino Iconiocavüre

**14** <sup>1</sup>Iconio ámicuriĩmaroi Pablo Bernabémaque ecorejaimada judíovai cójijiñami, buenajivü nócavüre. Aru buedejaimada majiéque. Que baru obedivü pöeva ju arejaimada Jesúre, apevü judíova aru apevü judíova ámevü máre. <sup>2</sup>Ûbenita nócavü judíova Jesúre ju abevü maucüvare ñarejaimada nócavü judíova ámevüre, ne ámeina dápiaräjiyepe aivü Pablojáre. <sup>3</sup>Que baru Pablojá mautedejaimada noi obedijaravüa. Náre Jesús üi cadateiye boje, jidubevüva coyüivü barejáimada paruéque. Aru Jümenijicu parure ñarejaquemavü náre, ne ñaräjiyepe ayü pöeva ne jámene aru ne ñarí majibede máre. Que baru Jümenijicu jáðovarejaquemavü jáve ne coyüiyede jíyede mearo bojecübenore Jesúre ju aipöevare. <sup>4</sup>Ûbenita cüináturu ne üme dápiabedejaimada na, diĩmarocavü. Apevü ju arejaimada ina judíova ne coyüiyede aru apevü ju arejaimada Jesús üi yávaiye méne beorí coyüicöjeimara ne coyüiyede. <sup>5</sup>Dinumure ina judíova aru apevü judíova ámevü máre coyurejaimada jabovaque, yópe arí: “Ñájine ñaräjarevü Pablojáre”, arejaimada ne bajumia. Que arí, cüraboaque ñavarí boaiyurídurejaimada náre. <sup>6</sup>Pablojá coreóvaivü ne maucüvarí dápiayede náre, dupini nurejaimada apejaboróí. Curejaimada Licaonia ámicurijaborócaĩmaroai, Listra aru Derbe ámicuriĩmaroai, aru no joabenoquei máre. <sup>7</sup>Coyüivü barejáimada Jesús üi yávaiye méne nócavüre.

#### Listracavü ne boaino Pablöre cüraboaque

(Hch 4.24)

<sup>8</sup>Listra ámicuriĩmaroi dobarejaimada cüinácü ümü cuiye majibecü. Üi cuboba jiacubedejavüya. Pöetedejaimada ñai ümü cuiye majibecü. Aru cainumua cubedejaimada ü. <sup>9</sup>Û jápiayü barejáimada Pabloi coyüiyede. Pablo me cocoyü üre, coreóvarejaimada ñai ümü ju ayüre Jesús parüçure, üre meadacuyüre. <sup>10</sup>Que baru Pablo me jáñü üre, arejaimada parurõreca:

—Nacajajacü mi cubobaque nurié, arejaimada Pablo.

Maumejiena biararí, núri, vaivári búrejaimada ü, cuiye majibecü bácu.

<sup>11</sup>Ina obedivü pöeva jáivü Pabloi ñaiye báquede, coðoboborí búrejaimada ne yávaicamuaque, Licaonia ámicurijaboróçavü ne yávaicamuaque. Yópe arí, coðoboboivü barejáimada na:

—Jümenijina ümuvape ärojarivü teni ëmeni ñarí edaðama maje yebail arejaimada na.

<sup>12</sup>Que baru arejaimada Bernabéde, “Ûrecabe ñai jümenijicu üi ámiá Zeus”. Aru arejaimada Pablöre, “Ûrecabe ñai jümenijicu üi ámiá Hermes”. Que arejaimada na Pablo üi yávaiye boje Bernabé püeno. <sup>13</sup>Cüinádami cürami pöeva ne torojuede jíñami ñai Zeure curejavüya diĩmaro turuvai. Aru Zeui sacerdote davarejaimada oteivecüvare aru cóvüare máre diñami jedevacobe yebai. Ü diĩmarocavüque ina oteivecüvare boarí juaiyurídurejaimada

na, mearore jínajivu Bernabéde aru Pablоре máre. <sup>14</sup> Ñbenita Bernabé aru Pablocapūravu jápiaivu pōeva ne ñaiyuede, ne baju doicajeare tatorí jadevarejaimada, pōeva ne majinajiyeye aivu diede ñbevure. Aru pōeva jēneboi cūyarí nuri, codoborejaimada na:

<sup>15</sup>—¡Yópe ñabejarā muja! ¡Jūmenijina āmevu ñuja! Ñuja máre mujape paivu pōevatamu. Coyurādaivubu Jūmenijicui yávaiye méne mujare, muje dajocarājiyeye aivu muje mearore jýyede jūmenijina āmevure aru muje majinajiyeye aivu ñai Jūmenijicu apucu cūinácuva. Ñai Jūmenijicu cuedarejaquemavu cavarōre, joborōre, jia uradare máre, aru caivu nócavure, noi cuede máre. <sup>16</sup> Jipocai judíova āmevu ñaivu bācavureca ne baju urō coapa, Jūmenijicu ñaicōjeñu āmenejaquemavu náre. <sup>17</sup> Ñbenita cainumua Jūmenijicu jádovaimi mujare aipe ārojacu ũi baju ũi ñacaiyede mearore mujare. Que teni Jūmenijicu ocare ñacaibi cavarōre jocarí mujare. Aru bucure ñacaibi muje oteiyede, muje cavarājiyeye ayu āiyede. Yapide ñacaibi mujare āiyeque. Aru torojure ñacaibi muje ũmene, Pablo Bernabémaque arejaimada.

<sup>18</sup> Yópe arejaimada, náre ne torojuede oteivecuvare juarí jýyue boje. Ñbenita maiyójarejavūya náre ne dajocaiyede.

<sup>19</sup> Dinumure apevu judíova, Pisidia āmicurijoborōcaīmaroa Antioquía aru Iconio āmicurīīmaroacavu earejaimada diīmaroi. Obedivu diīmarocavure maucuvare ñarejaimada na Pablojāre. Que teni Pablоре ĩni, cūraboaque ñuvarí ũre, “¿Yaiyú bárica?” arí jabuborí jaruvarejaimada ũi baju bācarōre diīmarore jocarí. <sup>20</sup> Ñbenita no yóboi Jesúre ju aipōeva cójjini nuivu ũi yebai, Pablo nacajari, copainurejaimada diīmaroi. Cōmiájāravure Bernabémaque nurejaimada Derbe āmicurīīmaroi.

<sup>21</sup> Pablojā coyurejaimada Jesús ũi yávaiye méne diīmaroi. Aru obedivu pōeva ju arejaimada diede. No yóboi, copainurejaimada Listra, Iconio, aru Antioquía āmicurīīmaroi, Pisidia āmicurijoborōcarōai. <sup>22</sup> Diīmaroa coapa cañatedejaimada Jesúre ju aipōevare, ne ju arājiyeye aivu pueno baju parurō aru ne dajocabenajiyeye aivu ne Jesúre ju aiyede máre. Arejaimada diīmaroacavure:

—Caivu maja ju aivu Jesúre ñájinajivubu pare ijāravui, maje ecorājiye jipocai Jūmenijicui jaboteinore, arí buedejaimada na.

<sup>23</sup> Diīmaroa coapa apevu ũmuva Jesúre ju aivucavure beorejaimada Pablo aru Bernabé máre, ne corenajiyepe aivu apevu Jesúre ju aipōevare, náque cójjivaivure. Que teni jēniarejaimada Jūmenijicure āmevūva āiyede, ũi corequiyepe aivu ina ũre ju aipōevare, aru ũi cañatequiyepe aivu náre. Que ñarejaimada Pablojā diīmaroa coapa.

#### **Pablo aru Bernabé ne copaino Antioquía Siriacarōi**

<sup>24</sup> Dinumu Pisidia āmicurijoborōre vainí, earejaimada Pablojā Panfilia āmicurijoborōi. <sup>25</sup> Noi Perge āmicurīīmaroi coyurejaimada Jesús ũi yávaiye méne. Coyurí buojari, ēmenejaimada Atalia āmicurīīmaroi. <sup>26</sup> Noi jiañocū uracūi jaturí, earānurejaimada Antioquía āmicurīīmaroi cojedeca, mamarumu ne etaino mācarōi. Ne etarājijāravu jipocamia, Jesúre ju aipōeva diīmarocavu jēniarejaimada Jūmenijicure, ũi corequiyepe aivu ina ũre memecaivure aru ũi cañatequiyepe aivu náre.

Que arejaimada, jēniaivu Jūmenijicure ūi đacaquiepe aivu mearore Pablojāre. Aru ne copaiyede noi cojedeca jave buojarejaimada ne memeinore, Jūmenijicui coreni cađateiye báque boje náre. <sup>27</sup>Que baru Pablojā eaiavu Antioquía āmicurīmaroi, cójjijide đarejaimada caivu Jesúre ju aipōevare, coyurājivu náre caiye iye Jūmenijicui cađateiye báquede náre aru ūi meadaicōjeiye báquede ina judíova āmevure, ju arājivure Jesúre. <sup>28</sup>Aru Pablojā mautedejaimada Jesúre ju aipōevaque noi obedijaravua.

### Jesúre ju aipōeva jabova Jerusaléi ne cójjijino

(Hch 2.4; 10.1-44)

**15** <sup>1</sup>Dinūmure apevu ūmūva ēmenejaimada Judea āmicurijoborōre jocarī Antioquía āmicurīmaroi. Yópe arī, bueni búrejaimada ina Jesúre ju aipōevare:

—Mūja urivu baru Jūmenijicui meadaquiepe aivu mūjare, buraicōjeiye jauvu náre cajede yópe Jūmenijicui đaicōjeiyepe ūi coyuiye báquede Moisés bácare, arī buedejaimada.

<sup>2</sup>Pablo aru Bernabé máre ju abedejaimada iye ne bueiye. Que baru coyurīdurejaimada náre jāve āmene. Ūbenita ina Judeacavu jaraivu jápiaiyubedejaimada Pablojāre. Que baru Jesúre ju aipōeva beorejaimada Pablōre aru Bernabéde, aru apevu Jesúre ju aivure máre, ne mūrī nurājiyepe aivu Jerusalén āmicurīmaroi, jēniari járajivu diede Jesús ūi yávaiye méne beorī coyucōjeimarare aru ju aivure coreipōevare máre. <sup>3</sup>Que baru ina Jesúre ju aivu jarorejaimada náre. Vainí nūri Fenicia aru Samaria āmicurijoborōare, coyure cuivu barejaimada nócavure ĩmaroa coapa apevu judíova āmevu ne ju aiye de Jesúre. Iye borore jápiaivu bácvu nócavu Jesúre ju aipōeva urarō torojurejaimada na.

<sup>4</sup>Pablojā ne eaiyede Jerusalén āmicurīmaroi, ina Jesúre ju aipōeva aru náre coreipōeva, aru Jesús ūi yávaiye méne beorī coyucōjeimara máre jacoyurejaimada náre. Dinūmu Pablojā coyurejaimada náre caiye Jūmenijicui đaiye báquede ne bueiye báquede ūi yávaiye méne. <sup>5</sup>Dinūmure apevu Jesúre ju aivu, fariseo āmicurijabocavu, nacajari arejaimada Pablojāre:

—Ina judíova āmevu ūmūvare ne cajeáre buraicōjeiye jauvu aru đaiye jauvu náre caiye yópe Jūmenijicui đaicōjeiyepe ūi coyuiye báquede Moisés bácare, arejaimada ina fariseova.

<sup>6</sup>Ne que arīburu yóboi, ina Jesús ūi yávaiye méne beorī coyucōjeimara aru ina Jesúre ju aivure coreipōeva máre cójjijidejaimada, majinajivu diede. <sup>7</sup>Ne urarō coyurīburu yóboi, Pedro nacajari arejameđa náre:

—Mūja, jīvu, majivu mūja javede Jūmenijicu beoyu bácare yure mūje jēneboi, ji coyūquiepe ayu ūi yávaiye méne, judíova āmevure, ne jápiarī ju arājiyepe ayu. <sup>8</sup>Aru Jūmenijicu, űai majicu caivu ne dāpiaiyede, jáđovaquemavu náre ūi copu etaimara mácavure ūi daroiyede náre űai Espírītu Santore nopedeca majare ūi daroiye báquepe ūre. <sup>9</sup>Que baru Jūmenijicu copu etaibi caivure cūináturu. Jáimi náre, judíova āmevure, nópe ūi jáiypedeca majare, judíovare. Que baru Jūmenijicu ārūmeteibi ne āmeina teiyede ne ju aiye de Jesúre. <sup>10</sup>¿Aipe teni ūbevurū mūja Jūmenijicui đaiye báquede? Mūja đaicōjeiyurivubu Jūmenijicui jave đaicōjeme máquede. Mūja đaicōjeiyurivubu Jesúre ju aipōeva judíova āmevure pūeno baju. Majeñecuva

mácavu nópe đarĩ buojabedejaquemavu caiye iyede. Aru maja máre đarĩ buojabevu maja caiye iyede. <sup>11</sup>Nópe đabejarā. Maja coreóvaivu Jūmenijicu meadayure majare, Jesús ũi mearo đacaiye báque boje majare. Aru cūináturu Jūmenijicu meadayube judíoiva āmevure máre, arejamedā Pedro.

<sup>12</sup>Caivu ina cójijivu bi arejaimada na. Dinumu Bernabé aru Pablo máre coyurejaimada aipe pōeva ne jámene aru ne đarĩ majibede máre Jūmenijicui dare đaiye báquede náre judíoiva āmevu jēneboi. Aru caivu ina cójijivu me jápiarejaimada ne coyuiyede. <sup>13</sup>Coyurĩburu yóboi, Santiago, Jesúi yócu, yópe arĩ, yávarejamedā:

—Muja, jívũ, jápiajarā ji coyũquiyede. <sup>14</sup>Simón Pedro coyũibi mujare aipe đarĩ Jūmenijicu mearo đacarĩ buino mácarōre judíoiva āmevure, aru aipe đarĩ beoino mácarōre apevu nácavure ũi jina mārājivure. <sup>15</sup>Aru cūináturu iye Pedro ũi coyũiyepe toivarejaquemavu ina Jūmenijicui yávaiyede coyũcaipōeva mácavu. Yópe Jūmenijicu toivaicōjenejaquemavu cūinácu ũi yávaiyede coyũcaipōecu bácure ũi yávaiyede:

<sup>16</sup>Yu Jūmenijicutamu. No yóboi, copaidacũyumu yũ. Pōevare yure mearore jide đacũyumu yũ, yópe ne mearore jíye báquepe yure David bácuĩ jaboteinumũ mácarōre. David bácuĩ pāramena mácavu ne jaboteino cūinotamu, nopedeca cūinádami cūrami tuiñamipe. Ũbenita parure đacũyumu yũ cojedeca cūinácure nēpāramenacacu bacũyũre, ũi jabotequiyepẽ ayũ bediόva yópe pōeva mamađami cūramine ne đaiyepẽ tuiñami mácarōquede. <sup>17</sup>Yópe đacũyumu yũ judíoiva āmevure, ne vorājiyepẽ ayũ yure, ne jabocure. <sup>18</sup>Que teni caivu ji beoimara mácavu jina mārājivutamu, arejaquemavu Jūmenijicu.

<sup>19</sup>Que baru yũ dápiaivu yópe. Cārijovamenajarevu maja ina judíoiva āmevu ju aivure Jūmenijicure. <sup>20</sup>Quénora toivarājarevu paperayocare, đaicōjenajivu náre ne āmenajiyepẽ aivu caiye āiyede pēpeimarare jíye báquede, ne đabenajiyepẽ aivu āmeina đaiyede nēmarebucũva āmevũque, ne āmenajiyepẽ aivu āimajiarua jive cuede, aru ne āmenajiyepẽ aivu jivede máre. <sup>21</sup>Yópe đaiye jaũvu majare. Joe baju cainoa ĩmaroai caisumana coapa jabuóvairavũai, judíoivai cójijiñamia nuri, pōeva jári borotedama Jūmenijicui đaicōjeiyede ũi coyuiye báquede Moisés bácure aru buedama diede. Que baru ina jápiaivu bácavu jave majima na diede, arejamedā Santiago.

#### **Paperayocare ne toivaino judíoiva āmevure**

<sup>22</sup>Caivu ina Jesús ũi yávaiye méne beorĩ coyũicōjeimara, ina Jesúre ju aivure coreipōeva, aru caivu ina Jesúre ju aipōeva máre ju arejaimada Santiago ũi coyuiyede. Que baru beorejaimada ne jēneboi apevu ũmũvare, jarorājivu náre Pablo aru Bernabéque Antioquía āmicũriĩmaroi, ne nũvarajiyepẽ aivu diyoca paperayocare. Que baru beorejaimada pũcarā nácavu jabovare. Cūinácu ũi āmiá Judas, ũvacari Barsabás āmicũrejamedā. Aru apecũ Silas āmicũrejamedā. <sup>23</sup>Ne jaroĩyocaque yópe arejaimada:

“Ñũja, Jesús ũi yávaiye méne beorĩ coyũicōjeimara aru Jesúre ju aivure coreipōeva máre meaicōjeivũbu mujare, ñũjevure, judíoiva āmevu Jesúre ju aipōeva Antioquiacavure, Siriacavure, aru Ciliciacavure. <sup>24</sup>Jápiaivũbu

ñuĵa apevu ñuĵe cójijinocavure nuivure muĵe yebai, ne buenajiyepe aivu muĵare muĵe cajeáre buraicójeiye ĵauróre yópe Jūmenijicui ðaicójeiyepe ũi coyuiye báquede Moisés bácare. Ŭbenita ñuĵa ĵarobetecará náre. Que baru chōivubu ñuĵa ne cārijovaiyede muĵare ne bueiyeque. <sup>25</sup> Que baru cójijivubu ñuĵa cūináturu ñuĵe ũme, beorājivu apevu ñuĵacavure, ne ĵáranurajiyepe aivu muĵare. Dadama ina ñuĵe ĵaroimara Bernabé aru Pabloque máre, maje ũmaraque. <sup>26-27</sup> Pōeva ne boaiyuríduimara ne Jesúre memecaiye boje, aru ñuĵe ĵaroimara, ne āmiá Judas aru Silas máre, coyurāĵarama muĵare nópe ñuĵe toivaiyepedeca diyocare. <sup>28</sup> Jūmenijicui Espiritu Santo ñuĵare toivaicójeimi muĵare. Aru me ĵu aivubu ñuĵa iye ũi cójeiyepe, ðaicójemenajivu urarō maiyóĵarō ðaicójeinore. Quénora yópe ðaicójeivubu muĵare: <sup>29</sup> Caiye āiyede pēpeimara mácavu ne ĵino mácaróre āmejara. Aru jivede āmejara. Āimajiarua jive cuede máre āmejara. Aru ðabeĵarā āmeina ðaiyede apevuque mujemarebucava āmevuque. Nópe ðaivu baru, mearo ðarāĵaramu muĵa. Quénoramu”, arĵi toivareĵaimada na.

<sup>30</sup> Ina ne ĵaroimara mácavu ĕmeneĵaimada Antioquía āmicurīīmaroi. Na eaivu noi, cójijovareĵaimada caivu ina Jesúre ĵu aipōevare. Aru ĵídeĵaimada náre diyoca paperayocare. <sup>31</sup> Ne ĵári boroteiyede diyocare, iye toivaiye báque pare cadatedejavūya náre. Que baru toroĵureĵaimada na. <sup>32</sup> Judas aru Silas máre Jūmenijicui yávaiyede coyuiṑōeva mareĵáimada na. Que baru ina pucarā pare buedeĵaimada nócavure, náre cadatenajivu, aru pueno baju parure ðarājivu náre ne ũmei. <sup>33</sup> Obedijāravua mautedeĵaimada ina pucarā nore. Aru bueniburu yóboi, nócavu Jesúre ĵu aivu ĵacopaiyovarĵi ĵaroreĵaimada ina coyuiṑōevare ne daino mácarōi. “Me nuĵara muĵa cārijimevua”, areĵaimada náre. <sup>34</sup> Ŭbenita Silas mautedeĵaimada noi, Antioquía āmicurīīmaroi. <sup>35</sup> Pablo Bernabémaque máre mautedeĵaimada obedijāravua nore. Bueivu bareĵáimada aru Jesús ũi yávaie méne coyuiṑu bareĵáimada na apevu obedivuque.

**Pablo ũi ĵácunūino cojedeca, coyucuyu Jūmenijicui yávaiyede**

(Hch 13.13)

<sup>36</sup> Obedijāravua yóboi, Pablo areĵaimada Bernabéde:

—Ĵárica, ĵáranurevu cojedeca maje bueimarare ĵmaroa coapa, maje bueino mácarō Jesús ũi yávaie méne, ĵámuri aipe ne cuede Jesúque, areĵaimada Pablo.

<sup>37</sup> Bernabé nuvaiyureĵaimada Juan Marcove máre. <sup>38</sup> Ŭbenita Pablocapūravu ĵu abedeĵaimada ũre. Jipocamia Juan Marcos dajocareĵaimada náre Panfilia āmicurijoborōi. Que teni yóvabedeĵaimada náre pū ne memeinore buojaiyeta. <sup>39</sup> Que baru cūináturu ne ũme cubedeĵaimada na, Pablo Bernabémaque. Que baru coatedeĵaimada ne baju. Bernabé Juan Marcomaque nureĵaimada ĵiādocū uracūque Chipre āmicurijavui. <sup>40</sup> Ŭbenita Pablo beoreĵaimada Silare, nucuyu ũque. Jesúre ĵu aipōeva “Jūmenijicu coreni cadateĵacurĵi muĵare” ne arĵiburu yóboi, nureĵaimada Pablo Silamaque. <sup>41</sup> Aru vaidéĵaimada Siria aru Cilicia āmicurijoborōare. Buede cuivu bareĵáimada Jesúre ĵu aipōevare, pueno baju parure ðarājivu náre ne ũmei.

**Timoteo ũi yóvaino Pablere, Silare máre**

**16** <sup>1</sup> Pabloĵa eareĵaimada Derbe aru Listra āmicurīīmaroi. Nore cureĵaimada cūinácū Jesúre ĵu aipōecū, ũi āmiá Timoteo. Jípaco,

judíovacaco, Je súde ju aipõeco barejácoda õ. Ubenita jípacu judío ãmenejameda ù. <sup>2</sup>Listra aru Iconio ãmicuriĩmarocavu Jesúre ju aipõeva me járejaimada Timoteore. <sup>3</sup>Pablo nuvaiyurejameda úre náque. Ubenita nócapu judíova majidejaimada Timoteoi pacu judío ãmecure. Que baru Pablo buraicõjenejameda Timoteore ùi cajede, yópe judíovai ãaicõjeiyepe. <sup>4</sup>Pablojá ne vaiyede imaroa coapa buede nurejaimada Jesúre ju aipõevare. Coyurejaimada náre Jesús ùi yávaiye méne beorí coyucõjeimara aru Jerusalén ãmicuriĩmarocavu Jesúre ju aivure coreipõeva ne ãaicõjeiyede judíova ãmevure, ne ãarãjiyepe aivu yópe ne cõjeiyepe. <sup>5</sup>Ne nópe teiyede Jesúre ju aipõeva majidejaimada Jesús ùi yávaiyede pueno baju. Aru caijãravua apevu ne ju aiyede pueno baju obedivu ju aivu nurejaimada na.

#### **Pablo ùi jáino decoboayupe Macedoniacacure**

<sup>6</sup>Ñai Espíritu Santo Pablojáre coyucõjemenejameda Jesús ùi yávaiye méne Asia ãmicurijoborõi. Que baru vaidéjaimada na Frigia aru Galacia ãmicurijoborõare. <sup>7</sup>Misia ãmicurijoborõ turuvai ne eaiyede, nuiyuridurejaimada Bitinia ãmicurijoborõi. Ubenita ñai Espíritu Santo nuicõjemenejameda náre nore. <sup>8</sup>Que teni Misia ãmicurijoborõi vainí, êmeni, earejaimada Troas ãmicuriĩmaroi. <sup>9</sup>Diñanimareca Pablo járejameda decoboainope cüinácu ùmu Macedonia ãmicurijoborõcacure, núcure, jëniãñure úre, “Dajacu Macedonai, cadatejacu ñujare”, ayure Pablöre. <sup>10</sup>(Lucas copurejaquemavu Pablojáre Troas ãmicuriĩmaroi.) Que teni coreóvarejacařã Jñmenijicu jarocuyure ñujare, coyurãjivu Macedonia ãmicurijoborõcavure Jesús ùi yávaiye méne. Que baru no decoboinore járiburu yóboi, cüiná meadarejacařã ñuja, nurajivu ne joborõi.

#### **Pablo Silamaque ne bueino Filipocavure**

<sup>11</sup>Etarejacařã jiadocũ uracũque Troas ãmicuriĩmarore jocarĩ. Jatarejacařã nurié pu Samotracia ãmicurijivuita. Cõmiãjãravui jatarejacařã pu Neápolis ãmicuriĩmaroi. <sup>12</sup>Nore jocarĩ, mái nurejacařã pu Filipos ãmicuriĩmaroi. Javede Roma ãmicurõ jaborõcavu barejáimada mamarumu ãaivu diĩmarore. Aru põeva nore curivu Roma ãmicuriĩmarocavupe paivu barejáimada na. Cüinárocarõ joborõcarõ Macedonia ãmicurijoborõcarõ aviã daino turuvacarõ mearjãvũya no imaro urarõ. Obebejãravua curejacařã noi.

<sup>13</sup>Aru judíovai jabuóvãjãravu sãbadoi, nurejacařã imarore jocarĩ tuiipãvai. Judíova cójijini cõmajidejaimada, jëniarajivu Jñmenijicuque noi. Que baru vorãnurejacařã cüináro ne jëniainore. Apevu nomiva cójijivu barejáima tuiipãvai. Náque dobarĩ, coyurejacařã náre Jesús ùi yávaiye méne. <sup>14</sup>Cüináco nãcaco ñuje coyuiyede jápiado, õi ãmiã Lidia, Tiatira ãmicuriĩmarocaco barejácoda. Meacajea ñemijuaricajea cuitótecajeare bojedaipõeco barejácoda õ. Mearore jivarejácoda Jñmenijicure. Que baru Jñmenijicu jápiarĩ adare ãarejaquemavu óre. <sup>15</sup>Que teni õ aru õi cũramicavu máre jádovarejaima Jñmenijicure ocoque. Dinumu yópe arĩ, cuturejaco ñujare õi cũrami:

—Muja dápiaivu baru yure jãve ju adore Jesúre, cãradajarařã ji cũrami, arejaco õ.

Aru pare jecurejaco ñujare. Que baru mautedejacařã ñuja õi cũrami.

<sup>16</sup>Apejãravu ñuje nuiyede bediõva no jëniainoi, copurejaco ñujare cüináco yebacaco, abujucu ùi imamo. Aru õ cãcoé namuódo marejáco ñai abujucu

cue boje óre. Que teni ôi jabova ívu barejáimada urarō tāuturare, ôi cācoé namuóiyē boje pōevare aipe vaiquíyede náre. <sup>17</sup>Ico yebacaco, yópe arí, codoboborí are cuyo barejáo ñujara:

—Ina ũmuvarecabu memecaivu Jūmenijicure, caivu pueno parucu bajure. Coyurādaivu mujare aipe darí Jūmenijicu meadacuyure mujare, ado barejáo ô.

<sup>18</sup>Obedijāravua nopedeca are cuyo barejáo. Ũbenita pare cārijovado marejáo Pablōre. Que baru copedini, arejame ñai abujucure:

—Jesúi parúeque cōjeivu mure, etajacu óre jocarí, arejame.

Aru cūiná etarejaquemavu óre jocarí. <sup>19</sup>Que teni ôi jabova coreóvaivu ne tāutura ímenajinora ôi cācoé namuóiyēque, jēnejaima Pablōre aru Silare máre. Náre jabuborejaima Roma āmicurō jaborōcavui jabova yebai tāibui. <sup>20</sup>Náre davaivu arejaima ina jabovare:

—Ina ũmuva judíovabu. Cārijovadama maje ímarocavure. <sup>21</sup>Bueivabu ne darí cōmajiyede. Ũbenita maja, Romacavu, yópe darí buojabevu. Maje daicōjeiye daicōjemevu majare yópe ne bueiyepe, arejaima na.

<sup>22</sup>Que arí, caivu pōeva tāibui curivu maucuvārí búrejaima Pabljāre. Aru ina Romacavui jabova jadevaicōjenejaima Pabljāre ne doicajeare. Aru jara popeicōjenejaima náre jaradoque. <sup>23</sup>Urarō jara popeniburu yóboi, ina Romacavui jabova nuvaicōjenejaima náre āmeina teivure jēni jacoĩnami. Parurōreca coreicōjenejaima ñai diñamine coreipōecure náre, ne dupini nūmenajiyēpe aivu. <sup>24</sup>Ne cōjeiyede jápiayū, ñai coreipōecu epedejamedā náre jēni jacoĩnami jívu baji. Aru ne cubobare tāiñorejamedā jocuveaque.

<sup>25</sup>Ñami corica joabeno baji Pablo aru Silas máre jēniaivu barejáimada Jūmenijicure. Yuriaivu, mearore jívu barejáimada úre. Aru apevu buoimara náre jápiaivu barejáimada. <sup>26</sup>Cūiná, joborō cújidejavūya pare. Aru diñami āmeina teivure jēni jacoĩnami máre cújidejavūya pare. Que teni cūiná, caicobea diñami jedevacobea bajumareca vorejavūya. Aru caivu ina buoimara ne buoimea tāumea cojodorí turejavūya náre. <sup>27</sup>Ñai coreipōecu coedarí, jedevacobea voaicobeare jári, “Buoimara etarāma”, arí dápiarejamedā ũi baju. Que baru ũi boaicarovede duarí ñni, boacúyu barejámada ũi bajumia. (Buoimu ũi etaru, úre coreyure ñájine daicōjenejaquemavu buoimu mácu ñájinope.) <sup>28</sup>Ũbenita Pablo codoboborí bujiéque arejamedā:

—Boabéjacu mi baju. Jájacu. Caivu ñuja cuvū yui, arejamedā Pablo.

<sup>29</sup>Ñai coreipōecu davaicōjeñu pēoinore, nore ñni, cúyarí, Pabljā yebai ecorí, bidini, mori turejamedā ne cuboba yebai. <sup>30</sup>Nacajari, nuvarejamedā Pablōre aru Silare máre nore jocarí. Aru jēniari járejamedā náre:

—Muja, ji jabova, ¿aípe ñaji yu ji meatequinore? arejamedā ũ.

<sup>31</sup>Pabljā arejaimada úre:

—Jesucristore ju ajacu mu, mu aru mívu máre meadaimara marajiyépe ayū, arejaimada.

<sup>32</sup>Que arí, coyurejaimada Jesús ũi yávaiye méne úre, aru caivu ũi cūramicavure máre. <sup>33</sup>Dioramia, ñamimareca, ñai coreipōecu joarejamedā ne churiáre. Aru cūiná jádovarejaimada úre aru caivu ũ jivure máre Jūmenijicure ocoque. <sup>34</sup>Pablōre aru Silare máre nuvarejamedā ũi cūrami. Jídejamedā āiyede náre. Aru torojurejamedā ũ jivūque, ũi ju aipe boje Jesúre.

<sup>35</sup> Cōmíaijāravure javejīnara ina Romacavui jabova churaravare jaetovaicōjenejaimađa Pablojāre. <sup>36</sup> Que teni ñai coreipōecu arīdurejameđa Pablore:

—Ji jabova yure jaetovaicōjema mujare. Que baru etajarā. Me nujara muja cārijimevūva, arīdurejameđa.

<sup>37</sup> Ūbenita Pablocapūravu arejameđa ina churaravare:

—Iye Roma āmicurō jaboteino daicōjeiye ñājine daicōjemevu Romacavure ne āmeina teiyede jādovaiyeta. Ūjavacari Romacavutamu ñuja. Ūbenita ñuje āmeina teiyede jādovari buojabema ina jabova. Aru jādovamevūva diede, jara popeicōjema ñujare caivu pōeva ne jāiyede. Aru buoma ñujare. Que teniburuta, jaetovaiyuma na ñujare yavenina. ¡Que āmevū! Nāvacari darī jaetovajarāri ñujare yore jocarī, arejameđa Pablo.

<sup>38</sup> Ina churarava ne coyuiyede diede Romacavui jabovare, jidurejaimađa ina jabova, ne coreóvaye boje Pablojā Romacavure. <sup>39</sup> Que baru āmeina teivure jēni jacoĩnami nuri, arejaimađa Pablojāre:

—Chīoivubu ñuja, ñuje āmeina ñaiye báque boje mujare. Jēniaivubu mujare. Ārumetesarā diede, arejaimađa.

Que arī, nūvarejaimađa Pablojāre diñamine jocarī. Aru parurōreca jēniaivu barejaimađa náre, ne etarājiyepe aivu diimarore jocarī.

<sup>40</sup> Que teni Pablo aru Silas máre etarejaimađa. Nurejaimađa Lidiai cūrami. Jāranuri Jesúre ju aipōevare, coyurejaimađa, parure ñarājivu náre ne ūmei. Aru coyurīburu yóboi, etarejaimađa na, Pablo aru Silas máre.

#### Tesalónicacavu ne cārijini jorojīno Jesúre ju aipōevaque

**17** <sup>1</sup> Pablojā vaidējaimađa Anfípolis āmicuriimarore aru Apolonia āmicuriimarore máre. Aru earejaimađa Tesalónica āmicuriimaroi. Diimaroi curejavūya cūinádami judíovai cójijiñami. <sup>2</sup> Noi Pablo nurejameđa yópe ūi darī cōmajiyepa yóbecurisumanareca jabuóvaijāravu sábadoi. Jūmenijicui yáviyeque buedejameđa nócvure. <sup>3</sup> Coyurejameđa náre Cristo ūi ñájiye báquede, aru ūi yaiye báquede, aru ūi nacajaiye báquede máre yainore jaruvārī. Caiye iye vaiye báque Cristore jaurejavūya, yópe Jūmenijicui yáviyede coyuiye báquepe. Aru Pablo arejameđa náre:

—Ñai Jesúvacari, ji coyuiyu, ūrecabe Cristo, Jūmenijicui epeimu, arejameđa ū.

<sup>4</sup> Apevu nācavu judíova aru obedivu judíova āmevu mearore jívu Jūmenijicure, aru apevu máre, obedivu nomiva jabova parurinomiva, ju arejaimađa Jesús ūi yáviye méne. Aru yóvarejaimađa Pablojāre. <sup>5</sup> Ūbenita apevu judíova jorojīnejaimađa Pablojāre. Que baru cójijovarejaimađa obedivu ūmūva āmenare, tāibui nūrivure, mememevure, aru cođoboborī, bujini, cúyarī cārijovarejaimađa caivu diimarocavure, ne maucūvarājiyepe aivu Pablojāre. Ina judíova ne cójijovaimaraque nurejaimađa cūinácū ūmū, ūi āmiá Jasón, ūi cūrami, Pablojā ne mauteiye boje ūque. Voridurī Pablojāre, daviyurejaimađa náre jedevai. Cūramine tatorī voarī, ecorejaimađa na. <sup>6</sup> Aru náre eabenī, jabuborī Jasóre aru apevu Jesúre ju aipōevare máre, davarejaimađa náre diimarocavui jabova yebai. Yópe arī, cođoboborejaimađa:

—Pablojā cārijovadama pōevare caino joborōi. Caride dađama maje imaroi. <sup>7</sup> Aru Jasón cuicōjeimi náre ūi cūrami. Caivu ina pueđabenama ñai

Roma jaboteino jabocu ijāravucacu pueno baju parucure. Ũi đaicōjeiyepe đabenama na. Aru adama, “Apecu jabocu jaboteibi ñujare, ũi amiá Jesús”, arejaimada ina obedivu pōeva ne jabovare.

<sup>8</sup> Apevu obedivu jápiaivu bācavu aru ina jabova máre, ne jápiaiyede diede, cārijini jorojinejaimada na. <sup>9</sup> Jícōjenejaimada tāuturare Jasōjare. Aru tāuturare ne jíniburu yóboi, jaetovarejaimada náre.

#### **Pablo Silamaque ne bueino Bereacavure**

<sup>10</sup> Maumejiena ñemié tuiyede nōcavu Jesúre ju aipōeva jarorejaimada Pablоре aru Silare máre Berea āmicuriīmaroi. Ne eaiyede nore, nurejaimada judíovai cōjijĩñami. <sup>11</sup> Nōcavu judíova Tesalónica āmicuriīmarocavu judíova pueno meara, jápiaiyurejaimada Jesús ũi yāvaiye méne. Jārvua coapa bueivu barejáimada Jūmenijicui yāvaiyede. “¿Jāve mārīca die?” arī majiyurejaimada nōcavu Pablojā ne bueiyede. <sup>12</sup> Que baru obedivu nācavu ju arejaimada Jesús ũi yāvaiye méne. Ne jēneboi cūrejaimada judíova āmevu, nomiva parurinomiva aru ũmūva parurivu máre. <sup>13</sup> Ũbenita Tesalónica āmicuriīmarocavu judíova jápiaivu bācavu Pablo ũi coyuiyede Jūmenijicui yāvaiyede Berea āmicuriīmarocavure, nurejaimada noi, cārijini jorojinajivu obedivu pōeva nōcavure. <sup>14</sup> Maumejiena nōcavu ju aipōeva jarorejaimada Pablojāre jia urađa ēcarui. Ũbenita Silas Timoteomaque mautedejaimada Berea āmicuriīmaroi. <sup>15</sup> Pabloi yóvaimara nurejaimada ũque pu Atenas āmicuriīmaroi. Aru ne copainurajiye jipocai nore jocarī, Pablo náre coyicōjenejaimada Silare aru Timoteore máre, yópe arī: “Đajarāri ji yebai maumena”. No yóboi, copainurejaimada Berea āmicuriīmaroi.

#### **Pablo ũi bueino Atenacavure**

<sup>16</sup> Pablo ũi coreiyedeca Silare aru Timoteore máre ne earājiyede, pare chīorejaimada ũi jáiye boje obedivu pēpeimarare diīmaroi. <sup>17</sup> Que baru yāvare cuyu barejáimada judíovai cōjijĩñami judíovaque aru judíova āmevu Jūmenijicure mearore jívūque, aru ina tāibui cōjijivūque. <sup>18</sup> Apevu bueivu Epicúreo bācui yāvaiye báquede, ne yajubo epicúreo āmicuriyajubo, aru apevu bueivu Zenón mācui yāvaiye báquede, ne yajubo estoico āmicuriyajubo, yávarī búrejaimada na Pabloque. Apevu nācavu arejaimada ne bajumia:

—¿Aipe ayu barīduidi ñai bueipōecu majibecu? arejaimada.

Aru apevu arejaimada:

—Bueyu bajubí apevu ne jūmenijinare, arejaimada.

Yópe arejaimada Pablo ũi bueiye boje Jesús ũi yāvaiye méne aru pōeva ne nacajaiyede yainore jarvvari.

<sup>19</sup> Que teni Pablоре jēni nuvari ne cōjijinoi Areópago āmicurō, arejaimada ũre:

—Majiyuvu ñuja iye boro mamaene mi coyuiyede. <sup>20</sup> Mu bueyubu ñuje majibede cāreja. Que baru coreóvayuvu aipe aino mi bueinore, arejaimada Pablоре.

<sup>21</sup> Que baru caivu ina Atenas āmicuriīmarocavu aru apenoacavu máre nore curivu cainumua cōjijivu barejáimada, borotenajivu apavure ape boro mamaene ne jápiaino mārārōre aru jápiarājivu apavu ne boro mamaene ne jápiabede cāreja. <sup>22</sup> Que teni Pablo núcu Areópago āmicurō cōjijinoi, yópe arī, yávarejaimada ina cōjijinocavure:

—Muja, Atenacavü, jáivu yu mujare mearore jívure obedivu jümenijinare.  
<sup>23</sup> Ji vaiyede muje jümenijina curöi, jávu yu cüináro jümenijinare jícaiye de juainore, yópe toivaiye curöre nora: “Yo jícaiye de juainomu ñai jümenijicu ñuje majibemüre”, arí toivainomu. Ñai jümenijicu muje mearore jímure coreóvabevürecá, úrecabe ji coyümu mujare caride. Jümenijicutame ü.  
<sup>24</sup> Úvacari cuedarejaquemavu ijárovure, caivu yócavure, aru yore cuede máre. Que baru úvacari cavarö mearocavüre jabocu aru ijárovucavüre máre jabocutame ü. Que teni úvacari cubebi cüramia põeva ne ñaíñamia jívui.  
<sup>25</sup> Aru põeva cadateimu ámemi Jümenijicu, úre caiye jaube boje. Quéñora úvacari apure ñayube caivüre, ümene epeyube majare, aru caiye jauéde máre jývube majare.

<sup>26</sup> Mamarüme Jümenijicu cuedarejaquemavu cüinácu põecure aru caivu põeva ijárovucavü, caiyajuboacavü, üi pāramenatamu. Aru cüma na caino joboröi. Jümenijicui cuedaiye baquiyé jipocai, majidejaquemavu ü caiyajuboa põeyajuboa ne curājínore, aru ne põeteijárovure, aru ne yaijárovure máre.  
<sup>27</sup> Jümenijicu cuedarejaquemavu põevare, maje vorí, earí, ju arājíyepe ayü úre. Que baru Jümenijicu cubi joabejínai maje yebai, majare coapa.  
<sup>28</sup> “Úvacari apure ñayube majare, vaiváre ñayube majare, aru cure ñayube majare máre”, arejameña apecu. Aru yópe apevu mujacavü toivaipõeva mácavü arejaimađa: “Jáve caivu maja Jümenijicui cuedaimaramu yópe üi pāramenape”, arí toivarejaquemavu. <sup>29</sup> Que baru maja jáve Jümenijicui pāramenape paivu baru, dápiaye buojabevü maja Jümenijicure ārojacure yópe pēpeimu úruque aru plataque aru cūraboaque ñaimupe, põeva ne ñaimu mácupe ne puruáque aru ne majiéque. Jümenijicu nópe ámemi.

<sup>30</sup> Javede Jümenijicu ñájine ñabedejaquemavu põevare, bojeñayü ne ámeina teiyede, ne ñaiye báquede cāreja majibe boje. Übenita caride caivu põevare caino joboröcavüre ñajocaiçöjeñume maje ámeina teiyede, maje chñori oatuvārājíyepe ayü maje ñaiyede. <sup>31</sup> Jümenijicu beorejaquemavu põeva ne ñarājíyede yópe, üi ñájiovaquijárovü baquinóre náre. Ānijárovü baquinói Jümenijicu ñájine ñacuyume caivu põevare, ne ámeina teiye boje, ü ārumetebecu baru cāreja ne ámeina teiyede. Aru cüinácu ümu, Jümenijicui epeimu mácu, ñacacuyume diede Jümenijicure. Aru Jümenijicu jáve jáðovaquemavu ñai ümure, üi epeimu mácu, caivu põevare, maje majinajíyepe ayü úre Jümenijicui nacovaiye báquede yainore jaruvārí, arejameña Pablo náre.

<sup>32</sup> Ne jápiayede úre coyuyure põecui nacajaiyede yainore jaruvārí, apevu nácavu yuridejaimađa úre. Übenita apevu arejaimađa:

—Ñuja jápiayüvi mi coyuyüide diede bedióva cojedeca apejárovure, arejaimađa.

<sup>33</sup> Que baru Pablo nurejameña cójijinore jocarí. <sup>34</sup> Apevu põeva yóvarejaimađa úre. Aru ju arejaimađa Jesúre. Cüinácu nácacu, üi āmiá Dionisio, Areópago āmicurö cójijinocacu barejameña ü. Apeco máre, Dámaris āmicurejacoda. Aru apevu máre curejaimađa náque.

#### Pablo üi bueino Corintocavüre

**18** <sup>1</sup>No yóboi, Pablo etarejameña Atenas āmicuriimarore jocarí. Aru nurejameña Corinto āmicuriimaroi. <sup>2</sup>Noi copurejameña cüinácu

judíore, ùi ãmiá Aquila. Roma ãmicurijaborôcavure jabocu ijãravucacu pueno baju parucu, ùi ãmiá Claudio, jipocamia nuicôjenezamedã caivu judíovare Roma ãmicuriimarore jocarí. Que baru Aquila etarejamedã nore jocarí, Italia ãmicurijaborôre jocarí, jímarepacomaque, ôi ãmiá Priscila. Aquila Ponto ãmicurijaborôcacu barejamedã ù. Mamarumure earejaimada na Corinto ãmicuriimaroí. Aru Pablo jácunurejamedã náre ne yebai. <sup>3</sup>Aquilajã ãimara cajeáque cûramiare nareni, ðarí, bojedarí memenejaimada na. Aru Pablo máre nopedeca memenezamedã ù. Que baru náque curejamedã. <sup>4</sup>Caisumana coapa judíovai jabuóvãijãravu sãbadoi, Pablo bueyu barejamedã judíovai cójijiñami jívui. Jáðovaiyurejamedã judíovare aru judíova ãmevure máre ùi bueiyede jáve, ne ju arãjiyepe ayu diede.

<sup>5</sup>Aru Silas Timoteomaque ne eaiyede Pablo yebai, Macedonia ãmicurijaborôre jocarí, Pablo dajocarejamedã ùi memeinore. Quénora coyure cuyu barejamedã iye yávaiye me matuiyeda, yópe arí judíovare:

—Jesúvacari Cristobe. Êrecabe Jûmenijicui daroimu mácu, arejamedã ù.

<sup>6</sup>Na ùi yávaiyede ju abevu, aru êre maucavarivu, aru ãmeina ne yávaiye êre máre, ne nópe ðaiye boje, Pablo pupedezamedã ùi doicajede, ne majinaiyepe ayu dajocacuyu náre. Aru arejamedã:

—Coyuyubu yu Jûmenijicui yávaiye méne mujare. Ëbenita mujavacari jápiabevu. Jûmenijicui daroimu mácu, meadãipôecure, ju abevu muja. Que baru Jûmenijicu ãrumetebecuyume muje ãmeina teiyede. Que baru mujavacari muje bajuma bíjaivu muja jãravu cûmējãravu baquinóre. Quénora ñájinajaramu toabo cûiméboi. Yácapûravu cadateni buojabevu mujare. Que baru dajocayubu mujare caride. Coyucunquijivu iye yávaiye méne judíova ãmevure, arejamedã Pablo ina judíovare.

<sup>7</sup>Que arí, dajocarejamedã náre. Dîimaroí curejamedã cûinácu ùmu, judíova ãmevucacu, ùi ãmiá Tito Justo. Ju ayu barejamedã Jûmenijicure. Êi cûrami judíovai cójijiñami tucavai curejavûya. Aru Pablo cucunurejamedã ùi cûrami. <sup>8</sup>Apecu máre curejamedã, cûinácu judío, ùi ãmiá Crispo. Judíovai cójijiñamine coreipôecu barejamedã ù. Ñai ùmu ù jivunque aru apevu obedivu Corinto ãmicuriimarocavu Jesús ùi yávaiye méne jápiare cuivu, ju arí diede, jáðovarejaimada Jûmenijicure ocoque.

<sup>9</sup>Cûinámine Jûmenijicu coyurejamedã Pablöre yópe decoboinope. Arejamedã êre:

—Jidubejacu ina ùmuvare. Bueni dajocabejacu ji yávaiye méne. Bi abejacu mu. <sup>10</sup>Yúvacari cadateivu mure. Ñame ãmeno ðabenama mure, ji cuvae boje obedivu pœvare dîimaroí, arejamedã Jûmenijicu Pablöre.

<sup>11</sup>Que baru Pablo mautedejamedã noi cûináju coricai, buede cuyu nócvure Jesús ùi yávaiye méne.

<sup>12</sup>Êi bueiyedeca noi, Acaya ãmicurijaborôre jabotedejamedã Galión. Aru caivu nócvu judíova maucuvarejaimada Pablöre. Que teni apevu nácvu êre jêni nuvarejaimada jabocu yebai. <sup>13</sup>Aru arejaimada ñai jabocure:

—Ñai ùmu bueibi pœvare, ne mearore jínaiyede Jûmenijicure yópe ðaicôjemepe, arejaimada.

<sup>14</sup>Pablo yávacuyu barejamedã. Ëbenita Galión arejamedã ina judíovare:

—Muja, judíova, cãriovamejara yure. Ñai ùmu jaboteino ðaicôjeiyepe ùi ðabedu o ãmeina tedu, yu jápiajebu muje coyuiyede. <sup>15</sup>Ëbenita muja

jorójivubu ñai ùmure, ùi bueiye boje aru ùi ðabe boje muje ðaicōjeiyede. Que baru mujavacari meadajarā diede. Yúcapūravu ñājine ðabecuyumu úre, arejamedā ina judíovare.

<sup>16</sup> Que arī, jaetovarejamedā náre nore jocarī. <sup>17</sup> Que teni ina judíova āmevu jēnejaimada Sóstenene, judíovai cójijiñamine coreipōecure. Jara popedejaimada úre ñai jabocu ùi jáinoi. Ùbenita Galiócapūravu jámecupeda yéde ðabedejamedā ù.

**Pablo ùi copaino Antioquíai aru ùi jácunūino bedíova  
cojedeca, coyucuyu Jūmenijicui yávaiyede**

<sup>18</sup> Obedijāravua Pablo mautedejamedā Corinto āmicurīimaroi Jesúre ju aipōevaque. Ùi etaiyede nore jocarī, Priscila aru Aquila máre yóvarejaimada úre. Nurejaimada Cencrea āmicurīimaroi. Nore Pablo buraicōjenejamedā ùi poðare, jáðovacuyu ùi jebeiye ðe “Yópe ðacacuyumu yu” ùi aino mácarōre Jūmenijicure. No yóboi Pablo, Priscila, aru Aquila máre jiadocū uracūi jaturī, etarejaimada Cencrea āmicurīimarore jocarī. Dicū nuquicū marejávūya pu Siria āmicurijoborōita. <sup>19</sup> Ùbenita Pablojā jatarejaimada pu Éfeso āmicurīimaroi. Ne eaiyede noi, Pablo dajocarī Priscilare aru Aquilare máre, cūinácva nuri, ecorī judíovai cójijiñami, coyurejamedā nócavu judíovare. <sup>20</sup> Aru nácavu jēniarejaimada úre, ùi mautequiyepa aivu náque obedijāravua. Ùbenita Pablo ju abedejamedā náre. <sup>21</sup> Quénora ùi etaiyede náre jocarī arejamedā:

—Nuquijivu Jerusalén āmicurīimaroi torojave teinumure. Ùbenita yure Jūmenijicu ùi daroru, copaidacuyumu yu muje yebai cojedeca, arejamedā náre Pablo.

Que arī, jiadocū uracūi jaturī, nurejamedā Éfeso āmicurīimarore jocarī.

<sup>22</sup> Jatarī pu Cesarea āmicurīimaroi, nore jocarī mái mari nurejamedā pu Jerusalén āmicurīimaroi, jacoyucuyu Jesúre ju aipōevare noi. Aru nore jocarī, ēmeni nurejamedā pu Antioquíā āmicurīimaroi cojedeca. <sup>23</sup> Apejāravuare curejamedā nore. Ù etayu bácu nore jocarī, vaidéjamedā caino Galacia aru Frigia āmicurijoborōai. Ímaroa coapa vaidé nuri, Jesúre ju aipōevare coyure cuyu barejamedā ù, parure ðacuyu náre ne ūmei.

**Apolos ùi coyūino Éfesocavure**

<sup>24</sup> Cūinácū ūmu judíovacacu, Alejandría āmicurīimarocacu, ùi āmiá Apolos, earejamedā Éfeso āmicurīimaroi. Me coyurejamedā pōevare. Aru me majidejamedā Jūmenijicui yávaiyede máre. <sup>25</sup> Ùetubecva buedejamedā me Jesús ùi yávaiye méne. Ùbenita quénora Juan Bautista bácu ùi bueiyede aru ùi jáðovaiyede pōevare Jūmenijicure ocoque majidejamedā. <sup>26</sup> Jidubecu coyurī búrejamedā parurōreca judíovai cójijiñami jívui. Priscila aru Aquila máre jápiaivu ùi coyuiyede, nuvarejaimada úre pōevare jocarī, buenajivu úre caiye Jūmenijicui yávaiye méne. <sup>27-28</sup> No yóboi, Apolos jatarī nuiyurejamedā Acaya āmicurijoborōi. Que baru ina Éfeso āmicurīimarocavu Jesúre ju aivu Apolore cadateiyurivu, nácacu toivarejamedā paperayocare ina Acaya āmicurijoborōcavu Jesúre ju aivure, ne jacopurājiyepa aivu Apolore ùi eaiyede ne yebai. Aru ùi eaiyede noi, caivu pōeva ne jáinoi parurōreca coyurejamedā judíovare. Jáve jáðovarejamedā náre Jūmenijicui yávaiyeque Jesúreca Cristore, Jūmenijicui epeimu mácure.

**Pablo ñi bueino Éfesocavure**

(Mt 3.11; Mr 1.4, 7-8; Lc 3.4, 16; Jn 1.26-27)

**19** <sup>1</sup>Apolos ñi cuede Corinto ãmicuriĩmaroi, Pablocapũravu mái nuri, cũracũare jatarĩ vainĩ, earejameđa cojedeca Éfeso ãmicuriĩmaroi. Noi copurejameđa apevu Jesũre ju aipõevare. <sup>2</sup>Náre yópe arĩ jẽniari járejameđa: —¿Jesũre mamarumu muje ju aiyede, Espĩritu Santore jacopuraru muja? arejameđa Pablo.

—Ñũja ye jápiabevu ñai Espĩritu Santo cucure, arejaimađa na.

<sup>3</sup>Ne que arĩburu, Pablo jẽniari járejameđa náre:

—¿Ye batearĩ muje jáđovaiye báque Jũmenijicure ocoque? arejameđa Pablo.

—Juan Bautista bácu ñi jáđovaiye báquepe jáđovaima Jũmenijicure ñũjare ocoque, arejaimađa Pablore.

<sup>4</sup>Aru Pablo arejameđa náre:

—Juan Bautista bácu jáđovaquemavu ina põeva chĩovure ne ãmeina teiye boje ne ãaiyede oatũvaivure. Aru náre coyũquemavu, yópe arĩ: “Dacũyume ji yóboi cũinácu, ji pũeno parucu, Jũmenijicui daroquimu. Ju ajarã úre”, aquemavu Juan Bautista bácu. Aru Jesũreca batequémavu dacũyũ ñai Juan Bautista bácu yóboi, arejameđa Pablo náre.

<sup>5</sup>Diede jápiaivu bácvu, jáđovarejaimađa Jũmenijicure ocoque, ne Jesũre ju aiyede boje, ñ jina mǎrajivu. <sup>6</sup>Dinumuma Pablo ñi tuiyede ñi puruáque náre coapa ne jipoburã, jacopurejaimađa ñai Espĩritu Santore. Que teni yávorejaimađa apacamua yávaicamua ne majibecamuaque. Aru Jũmenijicui yávaiyede coyucarejaimađa na. <sup>7</sup>Doce paivu ãmũva marejáimada na.

<sup>8</sup>Yóbecurã aviáva baju Pablo núvarejameđa ne judíovai cójijiĩnami. Jidubecũva coyũyũ barejámeđa parurõreca, ne majinajiyepe ayũ jáve ñi coyũiyede Jũmenijicui jaboteino borore. <sup>9</sup>Ubenita apevu, ñi yávaiyede jápiaiyubevu aru ju aiyubevu, ãmeina yávorejaimađa Jesũi bueicõjeiyede caivu ina judíova cójijivu ne jáiyede. Que baru Pablo dajocarejameđa náre. Aru núvarejameđa ina Jesũre ju aipõevare úque. Caijãrvua coyũyũ barejámeđa põevare apedãmi, Tirano ãmicucu ñi bueiĩnami. <sup>10</sup>Nópe ãayũ barejámeđa pũcaũjua baju. Que teni caivu põeva Asia ãmicurijoborõcavu, judíova aru judíova ãmevu máre, jápiarejaimađa Jũmenijicui yávaiye méne.

<sup>11</sup>Jũmenijicu Pablore ãare ãarejameđa urarõ põeva ne ãarĩ majibede. <sup>12</sup>Que baru ñi doicajeare núvaivu barejáimada ijimarare. Aru ne tuiyede dicajeare meatedejaimada na. Abujuva máre etarejaimada náre jocarĩ.

<sup>13</sup>Apevu judíova, yaviéde ãaivu, cuivu iĩmaroa coapa jaetovaivũ barejáimada abujuvare põevare jocarĩ. Jaetovaiyurĩdurejaimada abujuvare Jesũi paruéque máre. Que teni arejaimađa cũinácu abujucure:

—Đaicõjeivũ mure, Pabloi coyũimu Jesũs ñi paruéque, etajacu mu ñai ãmure jocarĩ, arejaimađa.

<sup>14</sup>Ina yaviéde ãaivu siete paivu ãmũva, cũinácu ãmũi mǎra marejáimada na. Népacu cũinácu judíovai sacerdotevare jaboteipõecu barejámeđa, ñi ãmiã Esceva. <sup>15</sup>Ubenita ñai abujucu arejameđa náre:

—Jesũre majivu yũ. Aru Pablore máre majivu yũ. Ubenita mujare ye majibevu yũ, arejameđa náre ñai abujucu.

<sup>16</sup>Que arī, ñai ūmū, abujucū ūi īmamū, jījecucū ne puenoi biarārī, jara popeni, ne cuitótecajeare jadevarī, jaetovarejameda náre cūramine jocarī. Que teni cúyarejaimada cūramine jocarī na coapa, churiá curivū aru cuitótecajea cubevūva. <sup>17</sup>Aru caivū Ēfeso āmicurīīmarocavū, judíoiva aru judíoiva āmevū märe, jápiarejaimada iye Escevai mării borore. Que baru pare jidurejaimada ina caivū. Aru pueno baju mearore jídejaimada Jesúre, ūi parué boje.

<sup>18</sup>Obedivū pōeva, Jesúre ju aivū caride, caivū ne jáiyede coyurēarejaimada ne āmeina teiye báquede, Jesúre ne ju arājiye jipocai. <sup>19</sup>Obedivū nácavū, yaviéde ðaivū bácavū ne yaviéde bueitucuboare davarī, juarejaimada caiye ditucuboare caivū pōeva ne jáiyede. Aru ne corevayede aipino bojecurō ditucuboa ne éitucuboa báquede, cincuenta mil paiturava táuturatavava me bojecuritavava bojecurōpe baju bojecurejavūya. (Cūináturubu quince paivū memeipōeva ne memeiye boje caipucapuruae paivūjare.)

<sup>20</sup>Yópe parurōque caijārvava ðarī jáðovaiyede apevū obedivū pōeva jápiaivū Jūmenijicui yávaiye méne, ne ju aiyede pueno baju obedivū ju aivū nūrejaimada na.

<sup>21</sup>Que teniburu yóboi, Pablo arī dāpiarejameda: “Vainí nuquijivū Macedoniare aru Acayare märe. Que teni nuquijivū Jerusalēne. Aru no yóboi, nuiye javū yure Romai”, arī dāpiarejameda Pablo. <sup>22</sup>Que baru jarorejameda pucarā ūi yóvaimarare, Timoteore aru Erastore märe, ne nurajiyepe ayū ūi jipocai Macedonia āmicurījororōi, ūi mauteiyedeca apejārvavare Asia āmicurījororōi.

### Ēfesocavū ne cārijini jorojīno Jesúre ju aipōevaque

<sup>23</sup>Dinūmureca obedivū Ēfeso āmicurīīmarocavū jararejaimada Pablöre, ūi bueiye boje pōeva ne ðarājiyede yópe Jesúi urōpe. <sup>24</sup>Cūinácū ūmū, nócacū, ūi āmiá Demetrio, tāure memeipōecu barejámada ū. ðarejameda tāuque quíjīñamia cūramiare yópe ico jūmenijico ōi āmiá Artemisa ōi cūrami uradāmiye paiñami, ðarī bojedacuyū diñamiare pōevare. Urarō tāuturare ĩnejameda ū diñamia boje. Aru apevū Demetriore memecaipōeva märe urarō tāuturare ĩnejaimada na, ne memeiye boje. <sup>25</sup>Que baru Demetrio cójijovarejameda caivū ĩre memecaivure aru caivū apevū nócavū märe ne memeiyepe paiyede ðaivure. Cójijivū caivū, Demetrio arejameda náre:

—Muja, ji yóvaimara, mujavacari majivū maje me curōre maja coapa iyede maje memeiye boje. <sup>26</sup>Nai Pablöre jári jápiaivubu muja. Buede cuibi pōevare, yópe arī: “Pēpeimara pōeva ne ðaimara jūmenijina āmema”, arī bueibi ū. Obedivū pōeva yui, Ēfesocavū, aru caino Asiacavū märe, ju adama ūi bueiyede. <sup>27</sup>Yópe ne ju aino jidojavū majare. Maje memeino bíjaquijichuvū. Aru iñami jūmenijico Artemisai cūrami märe diñamine yávaino mácarō, bíjaquijichuvū. Nópe vaidú, pueðarī dajocarājarama óre, aru āmeina járajarama ōi paruéde caivū Asiacavū aru cainoa joborōacavū märe, arejameda Demetrio.

<sup>28</sup>Ūi yávaiyede jápiaivū, ina obedivū pōeva jaraivū coðobororī búrejaimada:

—Artemisa, ñuja Ēfesocavure jūmenijico meaco bajube ō, coðobororī arejaimada na.

<sup>29</sup>Que teni obedivü pöeva, caivü ïmarocavü, cãrijini jorojïneajaimada. Cúyarí nuri, pucarã Pablo üi mái darí yóvaimara mácavüre, ne ãmiã Gayo aru Aristarco máre, Macedoniacavüre, jëni jabuborí ecovarejaimada ïmarocavüi cójijino urarõ curõ. <sup>30</sup>Pablocapûravü coyucunuridurejaimada no cójijinoi. Ùbenita nócavü Jesúre ju aipöeva nuicõjemenejaimada úre. <sup>31</sup>Aru apevü máre, Asia ãmicurõ jabova, Pabloi yóvaimara, boro jarorejaimada, jëniarajivü úre üi nûmequiepe aivü no cójijinoi. <sup>32</sup>Que teiyedeca, apevü ina cójijinocavü coðoboboivü barejáimada. Cünáyajubo apeí ne aiyede, apeyajubo máre apeita ávarejaimada na. Que teni ina cójijivü coreóvabevü obedivü jëniari járejaimada ne baju, “¿Aipe teni dari maja yui?” arejaimada na, majibevü. <sup>33</sup>Ùbenita ina judíova coyurejaimada Alejandro aipe vaiyede. Aru núvarejaimada úre caivü ne jáinoi, üi coyucuiyepa aivü náre, “Caiye iyede jacotucuyumu judíovare”. Que teni Alejandro üi puruque jáðovarejaimada, ne bi arãjiyepa aríduyu. <sup>34</sup>Ùbenita na majidivü üi máre judíore, pucaora baju coðoboboivü barejáimada na cojedeca:

—Artemisa, ñuja Éfesocavüre jûmenijico meaco bajube õ, coðoboborí arejaimada na.

<sup>35</sup>Quénora Éfeso ãmicuriïmarocavüre jabocu bi aicõjenejaimada ina pöevare. Aru arejaimada náre:

—Muja, Éfesocavü, jápijarã ji yávaquiyede. Maja, Éfesocavü, jári coreivübu ico jûmenijico Artemisa, meaco baju, õi cûramine aru õi cûraborre máre, cavarõre jocarí tuibo bácarõre, caivü pöeva ne mearore jíbore. Aru caivü pöeva majima diede. <sup>36</sup>Pöecu cubebi buojarí ju abecu diede. Que baru mujacapûravü bi ajarã muja. Dabejarã ãrumevüpe. <sup>37</sup>Muja davaðavü ina pucarã ãmuvare yui. Ùbenita jûmenijina cûramia cuvede ñavamema na. Aru ãmeina yávabema maje jûmenijicore máre. <sup>38</sup>Que baru Demetriojá boro coyurí adaiyurivü baru, boro coyurí adarãnujararí na jabova ne ãmeina teivüre jëniari jáiñami. Noi ãmeina teivüre jëniari jáipöecu cubi ü. Üi jáinoi boro coyurí adajararí na. <sup>39</sup>Muja apejène urivü baru, coyuiye javvü noi, ïmarocavü ne cójijinoi yópe maje ðaicõjeiyepe. <sup>40</sup>Me ðajarã. Jidojavü majare ina Romacavüi jabova coyurí adarí yávarãjivüre majare yópe maucuvurivüpe, maje coyurí majibe boje aipe teni buinore yo maje urarõ coðoboboinore, arejaimada ñai jabocu ina pöevare.

<sup>41</sup>Que yávaríburu yóboi, “Quénoramu. Nujara muja muje cûramia coapa”, arejaimada náre.

#### Pablo üi nuño Macedoniai, Greciai máre

**20** <sup>1</sup>No coðoboboino mácarõ cüiyede, Pablo ðaicõjenejaimada üi yebai ina Jesúre ju aipöevare, majicacuyü náre. Aru “Nuñumu” arí, dajocarejaimada náre, nucuyü Macedonia ãmicurijoborõ. <sup>2</sup>Ü vaiváyü no joborõre bueyü barejáimada nócavüre, cadatecuyü náre. Que teyü, earejaimada Grecia ãmicurijoborõ. <sup>3</sup>Mautedejaimada noi yóbecurã aviáva baju. Jatacuyü barejáimada Siria ãmicurijoborõ. Ùbenita coreóvarejaimada úre üi nuquiyedeca jiadocü uracüque apevü judíova boarí jaruvãrãjivüre úre. Que baru jatubedejaimada dicüi. Quénora mái nuri, vaidéjaimada Macedonia ãmicurijoborõi bediáva cojedeca. <sup>4</sup>Aru apevü yóvarejaimada úre, ne ãmiã Sópater, Pirroi mácu, Berea ãmicuriïmarocacu; Aristarco aru Segundo máre,

Tesalónica āmicuriīmarocavū; Gayo, Derbe āmicuriīmarocacū; Timoteo; aru Tíquico, Tróximo máre, Asia āmicuriījoborōcavū. <sup>5</sup>Ina Jesúre ju aipōeva ñuje jipocai nuri, coredejaima ñujare Troas āmicuriīmaroi. <sup>6</sup>Páure bucure ñaiye cube āiye torojuve teinūmu yóboi, ñuja jatuivu jiadocū uracūi etarejacadā Filipos āmicuriīmarore jocarī aru cūinápūrupe pajjārvua yóboi tuijarejacadā Troas āmicuriīmaroi. Aru curejacadā nore cūinásamana.

#### **Pablo ũi jácunūino Troacavure**

<sup>7</sup>Domingo jāravui Jesúre ju aipōeva cójijidejacadā, āri ũcurajivu, ārurajivu Jesúi yaiye bá que de. Aru etarājivu barejacadā cōmiájijārvure. Que baru Pablo coyuyū barejame náre joe ñami corica bajita. <sup>8</sup>Cójijidejacadā puenocatucubu jívui aru ure pēoibua pēorejavū. <sup>9</sup>Cūinācu bojuyo, ũi āmiá Eutico, dobarejame jāicobei. Pablo ũi ũrarō coyuiyedeca, vuo ijidejavū ñai Euticore. Cāri nurejame ũ. Aru cāñu, turejame jāicobede jocarī pu joborōita. Yóbecuriva curaivare vainí turejame ũ. Apevu ũre jēnejaima, jave yaiyú bācuta. <sup>10</sup>Ūbenita Pablo jōdari yaiyú bācui baju bācarōre tucunuri, narióñu arejame apevure:

—Cuecumamejara. Apucube cojedeca, arejame Pablo.

<sup>11-12</sup>Dinūmu Pablo copaini muri nurejame puenocatucubui cojedeca. Ñai bojuyore nūvarejaima apucure. Aru torojurejaima, ũre meadaíye boje. Pablojā páure cotuvarī, ārejacadā. Āri buojarī Pablo borotedejame náque joe baju miadāe tuiyeta, ñuje etaiyeta. Que teniburu yóboi, nurejacadā ñuja.

#### **Pablo ũi nūino Miletoi, Troare jocarī**

<sup>13</sup>Pablo nuicōjenejame ñujare jiadocū uracūque Aso āmicuriīmaroi ũi jipocai. Ūcapūravu mái nucuyū barejame, copucuyū ñujare noi. <sup>14</sup>Que teni ñuje copuiyede Aso āmicuriīmaroi, Pablo jatujarejame ñujaque. Aru nurejacadā Mitilene āmicuriīmaroi. <sup>15</sup>Cōmiájijārvui Mitilene īmarore jocarī, jatarī nuri earejacadā Quío āmicuriījavu cōchinoi. Bedióva cōmiájijārvui jatarī nuri, tuijarejacadā Samos āmicuriījavu tuiipāvai. Jatarī nuri Troguilio āmicuriīmaroi, jabuóvarejacadā noi. Aru cōmiájijārvui jatarī nuri, earejacadā Mileto āmicuriīmaroi. <sup>16</sup>Pablo eaiyurejame Jerusalén āmicuriīmaroi Pentecostés torojuve teijārvu jipocai. Que baru jatarī nuri, vaidéjacadā Éfeso āmicuriīmarore jocarī, Pablo ũi mauteiyube boje Asia āmicuriījoborōi.

#### **Pablo ũi yávaino Éfesocavu ju aivure coreipōevare**

(2 Ti 4.7)

<sup>17</sup>Ūi cuede Mileto āmicuriīmaroi, Pablo boro jarorejame Jesúre ju aivure coreipōevare Éfeso āmicuriīmarocavure, ne darājiyepe ayū ũi yebai. <sup>18</sup>Ne edaiyede ũi yebai, arejame náre:

—Mujavacari coreóvaivubu aipe cucure yu muje jēneboi mamarūmure ji daiyede Asiai pu caride máre. <sup>19</sup>Cainūmua cútecacu yu muje jēneboi Jesúre memecayū, dápiabecu ji baju apevu pueno meacupe, aru oyū ji ñājiyede judío va ne āmedaiyue boje yure. <sup>20</sup>Jidubecu coyuyū batecācu mujare caiyede, cadatecuyū mujare. Bueyu batecācu Jesús ũi yávaiye méne muje cójijiñamiai aru muje cūramia coapa. <sup>21</sup>Parūrōreca coyuyū batecācu judíovare aru judío va ānevure máre: “Chíojava muje āmeina teiyede. Oatuvajarā muje ñaiyede. Aru

ju ajarā Jesús ũi yávaiye méne”, arī coyuyū batecācu yū. <sup>22</sup> Aru caride, ñai Espíritu Santo nuicōjeimi yure Jerusalēi. Majibevū yū aipe yure vaiqufyede noi. <sup>23</sup> Quénora ñai Espíritu Santo majide ðaibi yure yópe: Cainoa ímaroai ji nuquinoai pōeva coreðama yure. Ñájine darājarama yure. Aru apenūmua buorājarama yure āmeina teivure jēni jacoīñami. <sup>24</sup> Ūbenita ye baquinó āmevū yure cucure ijāravure. Quénora ðaiyuvū mearo iye memeiyede, Jesús ũi ðaicōjeiyede yure pū ji buojaiyeta diede. Coyuiyuvū caivure iye yávaiye méne Jūmenijicui urarō mearo ðacaiyede pōevare, ũi meaðaquiyepe ayu náre.

<sup>25</sup> Jápiajarā. Coyucunucacu iye yávaiye méne Jūmenijicui jaboteinore muje jēneboi. Ūbenita coreóvaivū yū muja jámenajivure yure cojedeca ijāravure. <sup>26</sup> Que baru coyuiyū yū mujare caride yópe: Mujavacari muje bajuma bjárū jāravū cūimējāravū baquinóre, yūcapūravū cadateni buojabevū mujare. Jave ðacavū yū mujare caino ji oainope. <sup>27</sup> Jidubecu buenī buojacacu yū mujare me caiye iye Jūmenijicui yávaiyede. Ye ārumetebevu yū caiye diede. <sup>28</sup> Me ðajarā muja. Ñai Espíritu Santo mujare jári corede ðaibi caivū Jesúre ju aipōevare. Que baru me corejarā náre yópe ovejavare coreipōecu ũi coreiyepe. Caivū Jesúre ju aipōeva Jūmenijicu jinatamu na, Jūmenijicui mácu, Jesús, ũi yaicáiye báque boje náre. <sup>29</sup> Coreóvaivū yū ji etarīburu yóboi mujare jocarī, apevū darājivure muje jēneboi yópe āimara macarōcavū jjecurivū ne ðaiyepe ovejava jēneboi. Borocurājarama mujare, muje dajocarājiyepe aivū muje ju aiyede Jesúre. <sup>30</sup> Aru apevū mujacavūvacari borocurivū buebenajarama jāvene. Quénora jujovarājarama Jesúre ju aipōevare, muje dajocarājiyepe aivū muje ju aiyede Jesúre aru muje yóvarājiyepe aivū náre. <sup>31</sup> Que baru me jájara muja. Ārūjara iye yóbecuriyua jāravure aru ñamine máre urarō ji orī majicavaquede caivū mujare.

<sup>32</sup> Yū jēniañūmu Jūmenijicure, ũi jári corequiyepe ayu mujare. Aru yávaiye me urarō mearo ðacaiye cadatequiyebevu mujare. Que baru parure ðaquiyebevu mujare muje ũmei ũi yávaiye paruéque, muje ju arājiyepe Jesúre cainūmua. Aru Jūmenijicu epecuyūme mujare muje curājino caivū apevūque, ina ũi meaðaimaraque, ne Jesúre ju aipe boje. <sup>33</sup> Yū íyubevū jíyeva apecu ũi tāuturare aru ũi cuitótecajeare máre. <sup>34</sup> Mujavacari coreóvaivūbu aipe memeñure yure, bojedari ícuyū yure jauéde aru ina ji yóvaimarare jauéde máre. <sup>35</sup> Cainūmua yū jáðovaivū mujare yópe urarō memeino jaurōre mujare, muje cadatenajiyepe ayu ina cōmaje ārojarivure. Aru dápiajarā cainūmua yópe Jesús ũi aipe báquepe: “Ñai jíyū apecure torojucutame ñai jacopuyū pūeno”, arejame Pablo.

<sup>36</sup> Que arīburu yóboi, Pablo ñuatutari jēniarejame Jūmenijicure caivūque. <sup>37</sup> Aru caivū orī narióri Pablōre, nuivū barejáima ũi jivare, yópe ne ðari cōmajiyeye névū ne nurajiye jipocai. <sup>38</sup> Urarō chōivū barejáima, “Yure jámenajivūbu muja cojedeca ijāravūi” ũi aipe báque boje jipocamia. Aru ũre yóvarejaima mái, jia uraða écarui nuri jáðocū uracū yebaita.

**Pablo ũi nuino Jerusalēi**

(Hch 6.5; 8.5; 11.28)

**21**

<sup>1</sup> Ñuje etaiyede náre jocarī, jaturejacařā jiadocū uracūi. Jatarejacařā nurié pū Cos āmicuriyavuita. Cōmiájījāravūi jatarejacařā nurié

Rodas āmicurījiavui aru Pátara āmicurīmaroi máre. <sup>2</sup>Noi vorī earejacadā apecū uracūre, Fenicia āmicurījaborōi nuquicūre. Que teni jaturī nurejacadā dijiávure jocarī. <sup>3</sup>Chipre āmicurījiavure vaidējacadā dijiávū cācopūravui. Aru nurejacadā pū Siria āmicurījaborōi.

Tuijarejacadā Tiro āmicurīīmaro ēcarui, dicūre memecaipōeva, ne mavarajiyepe dicū davaiyede. <sup>4</sup>Que baru dicūre jocarī etarī, mari, īmaroi nūri, vorī copurejacadā diīmarocavū Jesūre ju aipōevare. Náque mautedejacadā cūinásamana. Nai Espírītu Santo náre majide đarejaquemavū aipe vaiquýede Pablore Jerusalén āmicurīīmaroi. Que baru “Nūmejacu Jerusaléi”, arejaima ūre. <sup>5</sup>Ūje etaijáravū eaiyede, mái nurejacadā, jatarājivū cojedeca. Caivū ina Jesūre ju aipōeva, nēmarebucūvaque, nēmaraque máre, yóvarejaima űjare mái ne īmarore jocarī pū tuipāvai jia urada ēcarui. Noi űuatutarī ēpacūi jēniarejacadā Jūmenijicūque. Aru jēniari buojarī, “űuivūbu” arejacadā náre. <sup>6</sup>Que arī, dicū uracūi jaturejacadā. Aru ina Jesūre ju aipōeva copainurejaima ne cūramiai na coapa.

<sup>7</sup>Etarī Tiro āmicurīīmarore jocarī, earejacadā Tolemaida āmicurīīmaroi. Jacoyurejacadā diīmarocavū Jesūre ju aipōevare. Aru mautedejacadā náque cūinájāravū. <sup>8</sup>Cōmiájāravui etaivū diīmarore jocarī, earejacadā Cesarea āmicurīīmaroi. Aru nurejacadā Felipei cūrami. Felipe Jesús űi yávaiye méne coyūipōecu barejáme. Cūinācu ina siete paivū Jesús űi yávaiye méne beorī coyūicōjeimarare cadateipōevacacu barejámeda ű. <sup>9</sup>Yóvaicūvaivū űi máromiva, űmucūbevū, Jūmenijicūi yávaiyede coyūcaivū barejáima na. <sup>10</sup>Ūje mauteiyedeca náque apejāravūa, nai Jūmenijicūi yávaiyede coyūcaipōecu, űi āmiá Agabo, ēmenejaquemavū Judea āmicurījaborōre jocarī. <sup>11</sup>Darī űje yebai, jēni Pabloi jārióicāvare, buorejame űi baju űi puruáre aru űi cubobare máre dicāvaque. Aru arejame:

—Yópe aibi nai Espírītu Santo: “Jerusalécavū judíova buorājivūbu dicāva jārióicāva upacūre yópe. Aru jínajivūbu ūre judíova āmevure”, arejame Agabo.

<sup>12</sup>Ūja jápiaivū diede, űja aru nócavū máre jēniaivū barejacadā Pablore parurōreca, űi muri nūmequiyepe aivū Jerusalén āmicurīīmaroi. <sup>13</sup>Ūbenita Pablocapūravū arejame űjare:

—¿Aipe teni oivurū űja? Chīore đabejarā yure. Yúvacari jūracūbevū Jerusalécavū yure ne buoru, aru yure ne boarī jarūvaru máre, ji coyūiye boje Jesús űi yávaiye méne, arejame Pablo.

<sup>14</sup>Ūja ūre ju are đarī buojabedejacadā. Que baru jēniari dajocarejacadā ūre. Quénora:

—Jūmenijicū đajacurī űi urōpe, arejacadā űja.

<sup>15</sup>No yóboi, meadarejacadā űje cūvede. Aru muri nurejacadā Jerusalén āmicurīīmaroi. <sup>16</sup>Apevū Cesarea āmicurīīmarocavū Jesūre ju aipōeva yóvarejaima űjare. Nūvarejaima űjare Mnasóī cūrami. Nai Mnasón Chipre āmicurījiavūcacu barejámeda. Aru javeita ju arejameda Jesūre. Ūque curājivū barejacadā űja.

#### Pablo űi jácunūino Santiagore

<sup>17</sup>Ūje eaiyede Jerusalén āmicurīīmaroi, Jesūre ju aipōeva torojurī me jacoyurejaima űjare. <sup>18</sup>Cōmiájāravui nurejacadā Pabloque Santiago yebai,

úre járanuivũ. Caivũ ina Jesúre ju aivure coreipõeva cójijidejaima úque. <sup>19</sup>Pablo náre jacoyurĩ buojari, coyurejame caiye Jūmenijicui ðare ðaiye báquede úre judíova ámevu jēneboi. <sup>20</sup>Ūi coyuiyede jápiaivũ bácvũ, caivũ mearore jídejaima Jūmenijicure. Aru arejaima Pablöre:

—Mu, ñujecu, járijide apa. Obedivũ judíovacavũ ju aivũbu Jesúre. <sup>21</sup>Aru caivũ ina ðadama cainũmua yópe Jūmenijicui ðaicõjeiyede ũi coyuiye báquepe Moisés bácvure. Apevu borocurivũ, yópe arĩ, coyumada náre: “Pablo bueibi judíovare judíova ámevu ne joborõai curivure, ne ðabenajiyepe ayũ yópe Jūmenijicui ðaicõjeiyede ũi coyuiye báquepe Moisés bácvure”, aimada na. Aru apenore, yópe arĩ, coyumada: “Pablo judíovare buraicõjememi nēmarare ne cajede yópe Jūmenijicui ðaicõjeiyede ũi coyuiye báquepe Moisés bácvure. Aru ðaicõjememi náre yópe majeñecuva mácvũ ne ðarĩ cōmajiyē báquepe”, aimada. <sup>22</sup>Ina judíova Jesúre ju aipõeva jápiarajarama mi borore edayure. Que baru, ¿aipe ðarājidi maja? <sup>23</sup>Ðajacu yópe ñuje ðaicõjeiyepē. Ñujacavũ yóvaicũvaivũ Jesúre ju aivũ “Yópe ðacacũyũ yũ” aima na Jūmenijicure. Ūbenita nópe ðarĩ buojabema na cāreja. <sup>24</sup>Que baru ñuvajacu náre múque. Náque ðajacu mu máre yópe Jūmenijicui ðaicõjeiyede ũi coyuiye báquepe Moisés bácvure, mñje meara marajiyépe aivũ Jūmenijicui jáinoi. Aru bojedacajacu mu náre coapa, caiye ne poðare ne yuvarājiyepē ayũ yópe Jūmenijicui ðaicõjeiyede ũi coyuiye báquepe Moisés bácvure, ne bubarājiyepē ayũ “Ðacacũyũ Jūmenijicure”, ne aiye báquede. Mi yópe ðaru, caivũ ina judíova majinajarama jáve ámevu ne jápiaiyē báquede mi borore. Návacari járajarama mure ðayure yópe Jūmenijicui ðaicõjeiyede ũi coyuiye báquepe Moisés bácvure. <sup>25</sup>Ūbenita ñujavacari toivacarā no paperayocare ina judíova ámevu Jesúre ju aipõevare, ne majinajiyepē aivũ maje dápiaiye. Yópe arĩ, toivacarā náre: “Caiye aiyede pēpeimara mácvũ ne jĩno mácarõre ámejara. Aru jivede ámejara. Áimajiarua jive cuede máre ámejara. Aru ðabejarā ámeina ðaiyede apevuque mñjemarebucũva ámevuque”, arĩ toivacarā ñuja náre, arejaima Pablöre Jesúre ju aivure coreipõeva.

### **Churarava ne jěino Pablöre Jūmenijicui cūrami jívui**

(Hch 15.29; 20.4)

<sup>26</sup>Dinũmu Pablo yóvarejamedã ina yóvaicũvaivũ ũmũvare. Cōmiájjaravui ðarejamedã ũ yópe Jūmenijicui ðaicõjeiyede ũi coyuiye báquepe Moisés bácvure náque, ne meara marajiyépe ayũ Jūmenijicui jáinoi. Ecorejamedã Jūmenijicui cūrami, coyũcũyũ sacerdotevare ájaravũ ne jebeijaravure, ne jĩnajiyepe ayũ ne jĩcaiye Jūmenijicure na coapa.

<sup>27</sup>Yópe Jūmenijicui ðaicõjeiyede ũi coyuiye báquepe Moisés bácvure ðarejaimada siete pajjaravua baju. Dijjaravua cuiquiyē jipojĩcai, apevu judíova ðaivũ bácvũ Asia ámicurijoborõre jocarĩ járejaimada Pablöre Jūmenijicui cūrami jívui. Obedivũ põevare jarare ðarejaimada Pablöre. <sup>28</sup>Ūre jēni, codoboborĩ arejaimada:

—¡Muja, Israecavũ, cadatejarā ñujare! Ñai ũmu, úrecabe buecunũũ caino joborõcavure, ne jápiabenajiyepē ayũ maja judíovare, ne ju abenajiyepē ayũ Jūmenijicui ðaicõjeiyede ũi coyuiye báquede Moisés bácvure, aru ne puedabenajiyepē ayũ Jūmenijicui cūramine máre. Aru davacũbe judíova ámevure Jūmenijicui cūrami jívui. Que teni ámeno ðaibi yo curõ Jūmenijicu jĩnore, arejaimada na.

<sup>29</sup> Jipocamia járejaimađa Pablo cuyre Jerusalén amicuriimaroi judíova ámevucacumaque, ũi ámiá Trófimo, Éfeso amicuriimarocacu. Que baru ina judíova “Pablo nuvacube judío ámecure Jūmenijicui cūrami jívui”, arejaimađa na ũbenina. <sup>30</sup> Dinumu caivu diimarocavu jorojivu cūyarī, cójijini, Pablore jēni, jabuborejaimađa Jūmenijicui cūramine jocarī. Cūiná biedejaimeađa caicobea diñami jedevacobeare. <sup>31</sup> Ne boarī jaruvarīduiyedeca ũre, apevu pōeva boro jarorejaimađa ñai churaravai jabocure. “Caivu Jerusalécavu cārijini jorojīvubu”, arejaimađa ũre. <sup>32</sup> Maumejiena cójijovari churaravare aru apevu ne jabovare máre, cūyarī jōdari earejaimađa ina obedivu pōeva yebai. Aru ne jáiyede ñai jabocure aru ina churaravare máre, Pablore jara popeni dajocarejaimađa na. <sup>33</sup> Ne yebai dayu ñai jabocu, buoicōjenejameđa Pablore pucamea táumeaque. Aru jēniari járejameđa:

—¿Namema ñai? ¿Aipe tedi ũ? arejameđa ũ.

<sup>34</sup> Apevu ina cójijinocavu apei arī codoboboiyede, apevu máre apeita codoboborī ávarejaimađa na. Ne pare bujié boje, ñai jabocu coreóvabedejameđa aipe aivure. Que baru churaravare nuvaicōjenejameđa Pablore churaravai cūrami jívui. <sup>35</sup> Nuwarejaimađa ũre quédata muicađavaita. ũbenita ina obedivu pōeva ne jorojiye boje, íyuridurejaimađa Pablore cojedeca churaravare jocarī. Que baru ũre dururejaimađa, pōeva ne imenajiyepe aivu ũre. <sup>36</sup> Que teni ina obedivu pōeva nurejaimađa ũi yóboi aru:

—¡Boarī jaruvajarā ũre! ¡Yaijácurī ũ! arī codoboborejaimađa.

**Pablo “Ámeno đabevu yu” arī, ũi yávaino**

(Hch 5.34-39; 8.3; 26.9-11)

<sup>37</sup> Ne nuvaiyede Pablore buoimupe churaravai cūrami, Pablo arejameđa griego ámicuricamua yávaicamuaque ñai churaravai jabocu pueno paracure:

—Yu mure coyuiyuvu, arejameđa Pablo.

Aru ñai churaravai jabocu arejameđa Pablore:

—¿Mu griegovai yávaiyede majicurū? <sup>38</sup> ¿Dinumu mu ámecurū añu Egiptocacu jaboteni pōevare nuvañu mácu yóvaicuvaimil paivu baju pōecubenoī, pōevare boaré đacuyu, me javejiene aru maucuvare đacuyu jaboteinore máre? arejameđa ñai churaravai jabocu pueno paracu Pablore.

<sup>39</sup> Aru Pablo arejameđa ũre:

—Ñai ámevu yu. Yúvacari judíobu yu. Ciliciacaĩmaro urarō Tarsocacubu yu. Jēniaivu mure. Coyuicōjejacu yure ina obedivu pōevare, arejameđa Pablo ñai jabocure.

<sup>40</sup> Ñai churaravai jabocu pueno paracu coyuicōjenejameđa ũre. Que baru Pablo núri noi muicađavai, ũi puruque jáđovarejameđa, ne bi arājiyepe ayu. Ne bi aiyede, Pablo coyurī búrejameđa ne yávaicamuaque, judíovai yávaicamuaque, yópe arī:

**22** <sup>1</sup>—Muja, jivu aru jíbucuva máre, jápiajarā ji coyuiyede ji đaiye báquede, arejameđa Pablo.

<sup>2</sup> Ne jápiaiyede ũi coyuiyede ne yávaicamuaque, pueno baju bídeca jápiarejaimađa na. Aru Pablo arī coyurejameđa náre:

<sup>3</sup>—Yúvacari judíobu yu. Tarsoi pōetedejaquemavu yu. Que baru Ciliciacacubu yu. ũbenita bucuóvarejaima yure yui Jerusaléi. Aru Gamaliel

buedejame yure me caiye iye Jūmenijicui daicōjeiyede ūi coyuiye báquede Moisés bácure, majeñecuva mácavu ne đarī cōmajiye báquede. Cainumua memecaiyucacu Jūmenijicure ūi urōpe, nopedeca muje đaiyepe caride. <sup>4</sup>Que teni pare ñajine đacacu yu Jesúre ju aipōevare. Náre cujurī, jēni, buocacu yu, ūmuvare aru nomivare máre. Aru apevure boarī jaruvaicōjecacu. <sup>5</sup>Maje sacerdotevare jaboteipōecu aru caivu maje cōjijinocavu máre jáđovari buođadama ji coyuiyede jāve. Na jima yure paperayocare, ji buorī davaquiyep e aivu judíova Damascocavure Jesúre ju aipōevare pu yui Jerusalēi, ñajine đarājivu náre. Que baru etacacu yu, nucuyu Damascoi, arejamedá Pablo.

**Pablo ūi coyuiño Jesús jicu teni buino mácarōre**

(Hch 9.1-19; 26.12-18)

<sup>6</sup>Pablo coyure nurejamedá, yópe arī:

—Mái nuiyede Damasco joabenoi eaiyede jāravu corica baji, maumejiena cavarōre jocarī pēoávū yure urarō miadáro ji núroi. <sup>7</sup>Que teni cuezumañū mori tucacu joborōi. Aru jápiacacu yávainore yópe ainore yure: “Mū, Saulo, ¿aipe teni maucuvacurū mu yure?” jēniari jáme yure. <sup>8</sup>“Mū, ji jabocu, ¿ñamenu mū?” acacu yu. “Yurecabu Jesús Nazarecacu, mi maucuvamu”, áme yure. <sup>9</sup>Aru ina ji yóvaimara no miadárore jáima. Ūbenita ñai yure yávayū bácu ūi yávainore jápiabeteima na. <sup>10</sup>Aru jēniari jácacu ūre: “Mū, ji jabocu, ¿yéde ji đainore ucūrū mū?” acacu yu Jesúre. “Nacajari ecojacu Damascoi. Noi apecu majicacuyume mure aipe mi đaquinore yópe Jūmenijicui urōpe”, áme yure Jesús. <sup>11</sup>No miadáro mácarō yacorū cobovaiye boje, jáñu mácu jári eabetcacu. Que baru apevu ji yóvaimara ji puruáre jēni nūvaima yure Damascoi.

<sup>12</sup>Noi cúteame cūinácu ūmu, ūi āmiá Ananías. Ū mearore jiamē Jūmenijicure jāve aru đayū yópe Jūmenijicui daicōjeiyede ūi coyuiye báquepe Moisés bácure. Aru caivu nócavu judíova ūre pueđarī me yávaquemavu ūra. <sup>13</sup>Ji yebai darī, núri yure áme: “Mū, jicu, Saulo, caride jáquijivu mū cojedeca”, áme yure. Aru cūiná jári eacacu cojedeca. Jácacu ūre. <sup>14</sup>Aru Ananías áme yure cojedeca: “Jūmenijicu, ñai majeñecuva mácavu ne ju aimu ūi beoimumu mū, majicuyū ūi urōre, jácuyū Jūmenijicure, ñai mearore đayure, aru jápiacuyū ūi yávainore máre. <sup>15</sup>Que baru mū coyucuyumu ūi yávaiyede caivu pōevare mi jáiye báquede aru mi jápaiye báquede máre. <sup>16</sup>¿Yéde coreyurū mū caride? Nacajari Jesúi paruéque jaruvajacu mi ámeina teiyede. Aru jáđovajacu Jūmenijicure ocoque”. Que áme Ananías yure, arejamedá Pablo.

**Pablo ūi coyuiño judíova ámevure ūi bueinore**

(Hch 7.58)

<sup>17</sup>Yópe arī, Pablo coyure nurejamedá:

—Ji copaiyede Jerusalēi, nucacu Jūmenijicui cūrami, jēniacuyū Jūmenijicure. Aru ji jēniaiyede, yu apucu jácacu ji jabocure yópe decoboainope. <sup>18</sup>Ū áme yure: “Ina Jerusalécavu ju abenajivubu mi coyuiyede ji yávaiyede. Que baru maumejiena nujacu yore jocarī”, áme ji jabocu yure. <sup>19</sup>Ūbenita acacu yu: “Mū, ji jabocu, návacari majima ji borore,

bñoicōjeñu mácure aru jara popeicōjeñu mácure máre ina mure ju aipōevare ne cójijiñamia coapa. <sup>20</sup> Aru apevu ne boarí jaruvaiyede máre ñai Esteban mácure, mure coyucayu bácure apevure mi yávaiyede, yúvacari núcu, jáñu, ju acacu yu ne ñaiye báquede. Aru ina ñ mácure boarí jaruvaiyu bácavui pñenocacajea doicajeare jári corecacu yu”, arí yávacacu yu ji jabocure. <sup>21</sup> Dinumu ji jabocucapūravu áme yure cojedeca: “Yúvacari jaroquijivu mure joarōi, mi coyquiyere ayu ji yávaiye méne judíova ánevure. Que baru nujacu mu”, áme yure ji jabocu, arejame Pablo ina obedivu pōevare.

**Pablo ñi yávaino churaravai jabocuque**

<sup>22</sup> Ñi nópe aiyede, quénora ye jápiaiyubedejaimada ina pōeva, ñi judíova ánevure coyuiye boje. Yópe arí, codoboborejaimada:

—¡Boarí jaruvajarā úre! ¡Yaijácuri ñ! Jáiyubevu cucure yore, arejaimada na.

<sup>23</sup> Codobobori, jipocatedejaimada na. Pare jorojivu, ne baju doicajeare tatorí jadevaivu aru jobobicore duvaivu barejáimada na. <sup>24</sup> Diede jáñu ñai churaravai jabocu pñeno parucu nuvaicōjenejaimada Pablöre churaravai cūrami jívui. Noi jara popeicōjenejaimada úre áimacajeque ñaimeque. Úre coyure ñaiyurejaimada, majiyucu aipe teni ina pōeva jorojivure úre. <sup>25</sup> Que baru ina churarava buorejaimada Pablöre, meadarí úre ne jara popenajiye jipocai. Ubenita Pablo arejaimada apecu churaravai jabocure, apecu cāchino parucure, núcure ñi yebai:

—Yúbu Roma jaboteinocacu. ¿Yure jara popeicōjeni mure ji ámeina ñaiyede jádovamecūva cāreja? arejaimada Pablo.

<sup>26</sup> Diede jápiayu ñai jabocu, nurejaimada ñi jabocu yebai, ñai Pablöre coyucōjeimū mácū. Aru arejaimada ñai churaravai jabocu pñeno parucure:

—Mu, ji jabocu, me ñajacu mu. Ñai ñmu Roma jaboteinocacube, arejaimada ñ.

<sup>27</sup> Que baru ñai churaravai jabocu pñeno parucu nurejaimada Pablo yebai. Aru arejaimada úre:

—Coyujacu yure. ¿Jāveneca Roma jaboteinocacurū mu? arejaimada.

Pablo arejaimada úre:

—Júju, úrecabu yu, arejaimada.

<sup>28</sup> Ñai jabocu pñeno parucu arejaimada:

—Urarō tāuturare jícacu yu Roma jaboteino jabovare, ne epenajiyepe ayu yure Roma jaboteinocacūva, arejaimada ñ.

Pablo arejaimada:

—Yurecabu Roma jaboteinocacu ji pōteinumūmiareca aru jipacu máre ñi Roma jaboteinocacu bae boje, arejaimada.

<sup>29</sup> Ina úre jara popenajivu bácavu que ayure jápiaivu, cūiná daruíni nurejaimada úre jocarí. Aru ñai churaravai jabocu pñeno parucu máre jidurejaimada, ñi buoiye báque boje Pablöre tāumeaque, yópe Roma ámicurō jaboteino ñaicōjemenope.

**Pablo ñi yávaino judíovai jabovaque**

(Mt 22.23; 23.27; Mr 12.28; Lc 20.27; Hch 26.5; Fil 3.5)

<sup>30</sup> Ñai churaravai jabocu pñeno parucu majiyurejaimada aipe teni ina judíova pare jorojivure Pablöre. Que baru cōmiájāravui cójijicōjenejaimada

caivn ina sacerdotevare jaboteipõevare aru ina judíovai jabova cójijinocavure máre. Churaravare jodeicõjenezameda Pablöre. Aru nũvarejameda úre ne cójijino yebai.

**23** <sup>1</sup>Pablo me jári, ina cójijinocavure arejameda:

—Muja, jívũ, yúvacari cainũma cũvũ yũ, “Boropatebevũ yũ”, arĩ dápíarĩ Jũmenijicui jáinoi, arejameda Pablo.

<sup>2</sup>Úi que aiyeda, ñai sacerdotevare jaboteipõecũ, ùi ãmiá Ananías, ina nũrivure Pablo yebai, jara boaicõjenezameda Pabloi jijecamure. <sup>3</sup>Que teni Pablo arejameda úre:

—Mũ, ñujovayũ, Jũmenijicũ jara boacũyũme mũre. Yui mũ dobavũ, ðacũyũ yópe ðaicõjeiye ainope. ¿Aipe teni mũvacari ðaicõjemecũpe ðayurũ mũ mi jara boaicõjeiye yure? arejameda Pablo.

<sup>4</sup>Apevũ ùi yebai nũrivũ arejaimada Pablöre:

—Mũ ãmeina yávaivũ Jũmenijicui sacerdotevare jaboteipõecure, arejaimada.

<sup>5</sup>Que aivure, Pablo arejameda:

—Muja, jívũ, coreóvabetebevũ yũ úre Jũmenijicui sacerdotevare jaboteipõecure. Yũ majicũ baru, nópe abejebu yũ, Jũmenijicui yávaivede toivaiye báque boje yópe: “Ãmeina yávabejarã muja ñai mujare jaboteyure”, arejameda Pablo.

<sup>6</sup>Aru Pablo coreóvarejameda apevũ ina cójijinocavure saduceovacavure aru apevũ fariseovacavure. Que baru arĩ codoboborejameda:

—Muja, jívũ, fariseovacacũbu yũ. Aru fariseovai mácũbu yũ. Buodama yũre, ji bueiye boje maje coreiyede Jũmenijicui nacovaquiyede caivũ yaivũ bácvare yainore jarũvarĩ, arejameda Pablo.

<sup>7</sup>Ne jápiaiyede ùi coyũiyede, jararĩ búrejaimada na. Ina saduceova ina fariseovaque cũináturu ãmenejavũya ne ùme. <sup>8</sup>Ina saduceova “Yainore jarũvarĩ nacajaino cubevũ, aru ángeleva, decova máre cubema”, ávadama. ðbenita ina fariseova “Yainore jarũvarĩ nacajaino cũvũ, aru ángeleva, decova máre cũma”, ávadama. <sup>9</sup>Ina cójijinocavũ pare jararĩ nũivũ, pũeno baju codoboboivũ barejáimada na. Que teni apevũ fariseovacavũ, Jũmenijicui yávaivede coyũipõeva, nacajari, parũrõeca arejaimada:

—Ñũje járu, ãmeina tebecũ bajube ñai ùmũ. Cũinácũ decocũ o cũinácũ ángele máre coyũichubi úre. Maucuvabenajarevũ maja Jũmenijicure, arejaimada na.

<sup>10</sup>Pũeno baju jaraivũ barejáimada na. Ñai churaravai jabocũ pũeno parũcũ náre jáñũ, arĩ dápíarĩ jidũcũ, “Pablöre ãmeina ðarãjichũma” ayũ, churaravare ina nuicõjenezameda Pablöre cójijinocavure jocarĩ, ne nũvarajiyepẽ ayũ úre churaravai cũrami cojedeca.

<sup>11</sup>Diñanimareca Jesũs cũeteni núcũ Pablo yebai arejameda úre:

—Jidũbejacũ mũ. Nópe mi coyũiyepedeca ji yávaivede Jerusalécavure, coyũcũyũmu Romacavure máre, arejameda Jesũs Pablöre.

#### **Pablöre judíova ne boarĩ jarũvayũrõ**

<sup>12</sup>Cõmiáijãravũ javejĩnara apevũ judíovacavũ cójijivũ yavenina, cũináturu ne ùme, “Yópe ðacarãjaramu Jũmenijicure”, arejaimada na.

—Ñũje boarĩ jarũvabedu Pablöre, Jũmenijicũ jarũvajacurĩ ñũjare toabo cũiméboi. ãmenajivũtamũ aru ùcumenajivũtamũ, ñũje Pablöre boarĩ jarũvarãjiye jipocai, parũrõeca arejaimada na.

<sup>13</sup> Cuarenta paivü püeno baju boaipöeva marejáimada na. <sup>14</sup> Nurejaimada na sacerdotevare jaboteipöeva aru judíova bucüva yebai. Aru arejaimada náre:

—Ñüja parurörecá avü “Yöpe ñacarājaramu Jümenijicure”. Ñüje boarí jaruvabedu Pablöre, Jümenijicu jaruvajacurí ñüjare toabo cüiméboi. Ámenajivutamu aru ücumenajivutamu, ñüje Pablöre boarí jaruvarājiye jipocai. <sup>15</sup> Que baru müjavacari boro jarojarā ñai churaravai jabocu püeno parucure, jëniarajivu üi daroquiyepé aivü Pablöre müje cójijinoi cojedeca. Ajarā úre: “Pablöre jëniari jápiaiyurivübu ñüja bedíova cojedeca”, ajarā. Aru ñüjacapüravü yavenina coreni boarí jaruvarājivübu úre üi edaquiyé jipocai müje yebai, arejaimada na.

<sup>16</sup> Übenita Pabloi yuicu iye borore ne ñarājiyede jápiarejaimada. Que baru churaravai cürami nürí, ecorí, coyurejaimada üi jápiaie báquede Pablöre. <sup>17</sup> Que teni Pablo örejarajaimada üi yebai cüinácu churaravai jabocure. Aru arejaimada úre:

—Nüvajacu ñai bojuyore mi jabocu püeno parucu yebai, üi coyüquiyepé ayü úre üi jápiaie báquede, arejaimada Pablo.

<sup>18</sup> Que baru ñai jabocu nüvarejaimada úre ñai jabocu püeno parucu yebai. Aru arejaimada:

—Ñai buoimü üi ámiá Pablo yure davaicöjeimi ñai bojuyore mi yebai, üi coyüquiyepé ayü müre ape borore, arejaimada ü.

<sup>19</sup> Ñai churaravai jabocu püeno parucu üi ámuvede jëni, úre nüvari apevüre jocarí, yavenina jëniari járejaimada ñai bojuyore:

—¿Yéde coyüyucurü yure? arejaimada ü.

<sup>20</sup> Aru ju arejaimada ñai bojuyo:

—Ina judíovai jabova jëniarajivübu müre, mi jaroquiyepé aivü Pablöre ne yebai javenai, bedíova cojedeca úre jëniari jápiarí übenina teiyurivü.

<sup>21</sup> Übenita apevü, cuarenta paivü, yavenina coreni, jaburājivübu úre. Na “Áiyede ámenajare aru ücuiyede máre ücumenajare”, arāma na Jümenijicüque ne boarí jaruvarājiye jipocai Pablöre. Caride coreivübu mi ju aiyede ne jëniaiyede. Que baru ju abejacu diede, arejaimada Pabloi yuicu.

<sup>22</sup> Aru ñai jabocu püeno parucu ñai bojuyore coyüicöjemenejaimada apevüre iye üi coyüie báquede úre.

—Coyubejacu apevüre iye borore mi coreóvare ñaiyede yure, arejaimada ñai churaravai jabocu püeno parucu.

Que arí, copaicöjenejaimada ñai bojuyore.

### Ne jaroino Pablöre jabocu Félix yebai

<sup>23</sup> Dinumuma ñai jabocu püeno parucu daicöjenejaimada pucarā churara jabovare üi yebai, aru arejaimada náre:

—Meatejarā müja doscientos paivü churarava cuivüre, aru apevü setenta paivü caballovarā tubarivüre, aru apevü doscientos paivü täumüre nüvaivüre máre. Cari ñami nueve bají nüvajara müja Pablöre Cesareita. <sup>24</sup> Meadacajarā Pablöre máre üi caballovare. Me nüvajara úre pü ñai jabocu Félix yebai Cesarei, arejaimada ñai churaravai jabocu püeno parucu.

<sup>25</sup> Aru ü, yöpe arí, toivarejaimada paperayocare:

<sup>26</sup> “Yü, Claudio Lisias, toivacavü müre, ji jabocu Félide. Me cüjacu mü.

<sup>27</sup> Apevü judíova tatorí jëma ñai ümüre, üi ámiá Pablo. Boarí jaruvarājivü

batemá úre ji nuiyede ne yebai churaravaque, ji jápiaie báque boje Pablo Roma jaboteinocacure. Úre ivu ñuja, ne boarí jaruvabenajiyeye aivu. <sup>28</sup> Aru coreóvayucacu yu aipe teni jaraivure úre. Que baru nuvacará úre ne cójijinoi. <sup>29</sup> Jarama úre judíova ne ñaicójeiye boje. Ubenita ñi ñaie báque boje ñi yaquino javevu, úre buorājino máre. <sup>30</sup> Aru ji jápiaiyede apevu jári coreni, boarí jaruvaiyurivure úre yavenina, cūinā jaroivu úre mi yebai. Aru coyucójeivu ñi mauvare mi jipocai, ne boro coyurí adarājiyepe aivu”, arí toivarejameđa ñai churaravai jabocu pueno parucu.

<sup>31</sup> Dinumu ina churarava, ne jabocui ñaicójeiye báquepe, nuvarejaimađa Pablöre ñami pu Antípatris āmicurīmaroita. <sup>32</sup> Cōmiāijāravu ina cuivu copainūrejaimađa churaravai cūrami. Ubenita ina caballovarā tubarivu yóvarejaimađa Pablöre cojedeca. <sup>33</sup> Ne eaiyede Cesarea āmicurīmaroi, ñai jabocu Félix yebai nuri, jidejaimađa úre diyoca paperayocare aru Pablöre máre. <sup>34</sup> Diyocare jári boroteniburu yóboi, ñai jabocu jēniari járejameđa árocacure Pablöre. Aru ñi coreóvayede Cilicia āmicurijoborōcacure, arejameđa úre:

<sup>35</sup> —Jápiakuijivu mi coyuiyede mi mauva ne edaiyede, arejameđa Félix Pablöre.

Que arí, Félix churaravare nuvaicōjenejameđa Pablöre Herodes bácu cūrami, jabovai cūrami, ne jári corenajiyepe ayu úre noi.

**Pablo “Ámeno ñabevu yu” arí, ñi yávaino Félide**

(Hch 21.17-28; 23.6)

**24** <sup>1</sup> Cūinápurupe pajāravua yóboi, ñai sacerdotevare jaboteipōecu, Ananías, earejameđa Cesarea āmicurīmaroi apevu judíova bucuvaque aru Roma jaboteino ñaicójeiyede buiepōecuque, ñi āmiā Tértulo. Tértulo coyucacuyu barejámeđa ina judíovare. Que baru jabova ne āmeina teivure jēniari jáññami nurejaimađa, boro coyurí adarīdurājivu Pablöre ñai jabocu Félix ñi jivateinoi. <sup>2</sup> Churarava ne davaiyede Pablöre noi, Tértulo yópe arí, boro coyurí adarīdurejameđa:

—Mu, ñuje jabocu, meacubu mu, mi majié boje. Mi jaboteiyede obedijāravuai cārijimena cuvū ñuja. Urarō mearore ñacaivu mu caivu ñuje joborōcavure. <sup>3</sup> Que baru caivu ñuje imarocavu torojurí ārvu mure. <sup>4</sup> Ubenita coreóvaivu cōmaje āroje jáññure mu ñujare. Que baru joe baju numequiyepe ayu maje boroteino, jēniaivu mure mi jápiaquiyeye ayu ñuje boro quijinore. <sup>5</sup> Ñai ũmu Pablo pare cārijovaimi ũ. Caino joborōi maucvare ñaibi judíovare ne baju, ñi apede bueiye boje. Apeyajubo, nazareno āmicuriyajubo jabovacacube ũ. <sup>6</sup> Aru āmedarīduame ũ Jūmenijicui cūramine. Ubenita jēcarā ñuja úre. Aru ñājine ñarājivu batecārā úre ñuje ñaicójeiyepe. <sup>7</sup> Ubenita ñai jabocu Lisias darí churaravaque, ñame úre ñujare jocarí parurōque. <sup>8</sup> Aru boro coyurí adaicōjeame ñujare mi yebai. Mu jēniari jápiayu baru úre, majini buojacuyumu caiye ñuje coyuiyede ũra jāvene, arejameđa Tértulo Félide.

<sup>9</sup> Aru ina judíova máre nopedeca boro coyurí adarīdurejaimađa Pablöre, ju arí caiye iye Tértuloi yávaiye báquede. <sup>10</sup> Dinumu ñai jabocu Félix jáðovarejameđa Pablöre, ñi coyucuiyepe ayu ñi borore. Que baru arejameđa:

—Obediujua javede pu caride máre mu jápiaivu ñuje boro coyurí adaiyede ñuje joborōcavure. Que baru torojurí coyuyubu ji borore, mi majiquiyepe

ayu diede. <sup>11</sup> Mu majini buojacuyumu jave ji coyuiyede. Quénora doce paijāravua vaivu caride, ji eaiye báquede Jerusaléi. Nore nucacu yu, mearore jícuyu Jūmenijicure. <sup>12</sup> Yu jarabotecacu apecure. Aru cārijini jorojīmetecacu cójijivure. Jūmenijicui cūrami, aru judíovai cójijiñamiai, aru tāibui máre. Yópe ne boro coyurī adaiyepe dabotecacu yu. <sup>13</sup> Buojabema jádovaivu jave ámeno dayure yure yópe ne coyuiyepe. <sup>14</sup> Ūbenita jāvemu “Pablo ju aibi Jesús Nazarecacu ūi bueiyede”, ne coyuiye yurā. Ju ayubu yu Jūmenijicure, ñujeñecuva mácavu ne mearore jímure. Mearore jýyubu yu Jūmenijicure yópe ina judíova “Apede bueibi”, ne aiyepedeca yurā. Ūbenita ape bueiye ánevū. Ju ayubu yu caiye iye Jūmenijicui daicōjeiyede ūi coyuiye báquede Moisés bácare aru caiye iye Jūmenijicui yávaiyede coyucaipōeva mácavu ne toivaiye báquede máre. <sup>15</sup> Yu coreivu Jūmenijicu nacovacuyure caivu yaivu bácare yainore jaruvarī, mearore aru ámenare máre, yópe judíova ne coyuiyepedeca. <sup>16</sup> Que baru yávacari cainumua daiyuvu yu, “Boropatebevū yu”, arī dāpiarī Jūmenijicui jáinoi aru pōeva ne jáiyede máre.

<sup>17</sup> Obediñua cūtecacu apenoa joborōai. No yóboi, copainucacu Jerusaléi cojedeca, tāuturare jícuyu judíova cōmaje ārojarivure aru ape jícaiye de jícuyu Jūmenijicure máre. <sup>18</sup> Ji Jūmenijicure jíquiye jipocai, dacacu yópe Jūmenijicui daicōjeiyede ūi coyuiye báquepe Moisés bácare meacu bacuyú Jūmenijicui jáinoi. No yóboi, apevu judíova, Asiavavu, jáima yure Jūmenijicui cūrami jívui, jýyure ji jícaiye de Jūmenijicure. Ūbenita cójijivu cubetema ji yebai. Jaraino máre cubeteavū. <sup>19</sup> Que baru boro coyurī adarādararī ina Asiavavavacari yui mi jipocai, na jáivu bácare baru yure ámeina teyure. <sup>20</sup> Aru ne coyubedu, coyujararī ina ūmūva yui curivu, aipe ji ámeina teiyede ne eaiye báquede ji cue báquede judíovai jabova ne cójijinoi. <sup>21</sup> Quénora arājichuma na: “Pablo cucu ñuje cójijinoi, yópe arī codoboboame, ‘Buodama yure, ji bueiye boje maje coreiyede Jūmenijicu nacovacuyure caivu yaivu bácare yainore jaruvarī’”, arājichuma na ji borore, arejamedā Pablo Félix.

<sup>22</sup> Aru Félix, Jesús ūi yávaiye méne coreóvayū me, ūi jápiaiyede diede, dajocaicōjenejamedā ne coyuiyede apejāravuita, yópe arī:

—Ñai jabocu Lisias ūi daiyede, yu coyucuyumu mi ñájinu, arejamedā Pablōre.

<sup>23</sup> Que arī buojarī, Félix coyurejamedā ñai churaravai jabocure, Pablōre davayū bácare. Ūre nuvaicōjenejamedā Pablōre jabovai cūrami cojedeca, churarava ne jári corenajiyepe ayu ūre noi. Ūbenita daicōjenejamedā Pablōre yópe ūi urōpe aru járadaicōjenejamedā ūre ūi yóvaimarare, ne cadatenajiyepe aivu ūre jauéde. <sup>24</sup> Apejāravua yóboi, Félix copaidarejamedā cojedeca jímarepacomaque, judíovacaco, ōi ámiá Drusila. Órejaicōjenejamedā Pablōre ne yebai, ne jápiaiyue boje ūi coyuiyede aipe ñarī pōeva ju aivure Jesús. <sup>25</sup> Que teni Pablo náre coyurejamedā pōevare ne mearo ñaiye jauéde apévure yópe Jūmenijicui daicōjeiyepē, aru pōevare ne curī majié jauéde ne baju coapa, aru Jūmenijicui ñájiñe ñaquiye de pōevare ne ámeina teiye boje máre. Aru iye coyuiyede jápiayū, Félix cucumari arejamedā Pablōre:

—Quénoramu caride. Nujacu mu. Apejāravū órejaquijivū mure cojedeca, arejamedā Pablōre.

<sup>26</sup> Obedijāravuai Félix daicōjenejamedā Pablōre ūi yebai, borotecuyū ūque, ūi coreiye boje ūi jíquiyepe ayu tāuturare. Tāuturare ūi júdu, Félix jaetovajebu

ûre. <sup>27</sup>Ûbenita pũcaũjua yóboi Félix ùi jaboteino cũinéjavũya. Û torojure ðaiyurĩ judíovare, ðajocarejameða Pablore buoimũpe. Aru apecu jaboteni búrejameða, ùi ãmiá Porcio Festo.

#### Pablo ùi yávaino jabocu Festoque

**25** <sup>1</sup>Festo earejameða ðijoborõi aru yóbecurijãravua yóboi muri nũrejameða Cesarea ãmicurĩĩmarore jocarĩ pu Jerusalén ãmicurĩĩmaroi. <sup>2</sup>Noi ina sacerdotevare jaboteipõeva aru apecu judíovai jabova máre ùi yebai earĩ, ãmeno boro coyurĩ ðarãrdurejaimaða Pablore. <sup>3</sup>Jipocamia ina jabova arejaimaða ne baju: “Boaipõevare coreni, jaburĩ boarĩ jarũvaicõjenajarevu Pablore”, arejaimaða yavenina. Que baru parurõque jẽniariduvaivu barejáimaða ñai jabocure, ùi ju aquiyepe aivu náre yópe ne urõpe.

—Copaide ðajacu mu Pablore Jerusaléi, arĩ jẽniaridurejaimaða na.

<sup>4</sup>Ûbenita Festo arejameða náre:

—Pablo buoimu cubi Cesareai. Maumena nuñũmu yu noi. <sup>5</sup>Que baru yóvajarãri yure muje jabova Cesareai, ne boro coyurĩ ðarãrãjiyepe aivu Pablore noi, ùi ãmeina tedu, arejameða Festo.

<sup>6</sup>Pu ocho pajãravua ùi mauteniburu yóboi nore, Festo emenejameða Cesarea ãmicurĩĩmaroi. Aru cõmiãijãravu jabova ne ãmeina teivure jẽniari jãĩñami nuri, dobarejameða, jápiacũyu ne boro coyurĩ ðarãrduiyede. Aru davaicõjenejameða Pablore. <sup>7</sup>Ûi eaiyede, ina judíova Jerusalén ãmicurĩĩmarocavu ðaivu bácvu núrejaimaða ùi yóboi. Urarõ ãmeno boro coyurĩ ðarãrduivu barejáimaða ùi borore. Ûbenita ye buojabedejaimaða jáðovaivu jáve ne borore. <sup>8</sup>Pablocapũravu arejameða:

—Judíova ne ðaicõjeiyede, aru Jũmenijicui cũramine, aru ñai jabocu ijãravucacu pũeno baju parũcure máre, ãmeina ðabevu yu, arejameða Pablo.

<sup>9</sup>Ûbenita Festo judíovare torojure ðaiyurĩ, yópe arĩdurejameða Pablore:

—¿Muri nuiyubecurũ mu Jerusaléi? Noi yúvacari jápiacũyumu cojedeca mi borore, “Ãmeno ðabetequemavu mu” acũyu o “Ñájicũyumu mi ãmeina teiye boje” acũyu, arejameða Festo.

<sup>10</sup>Ûbenita Pablocapũravu arejameða úre:

—Núvu yu caride Roma jaboteino jabova ne ãmeina teivure jẽniari jãĩñami. Yuita meaðaiye javvu yure, etacũyure o ñájicũyure. Múvacari me coreóvaivu. Ye ãmeno ðabeteccacu yu judíovare. <sup>11</sup>Ji ãmeina ðaiye boje, boarĩ jarũvaiye javrõ maru yure, jidubejebu yu ji yaiquínore. Ûbenita ne boro coyuiye jáve ãmenu, põecu cubebi buojarĩ jiyu yure náre. Que baru jẽniaivu mure jarocũyure yure ñai jabocu ijãravucacu pũeno baju parũcu yebai, ùi baju meaðaquiyeye ayu yure, arejameða Pablo.

<sup>12</sup>Dinumu Festocapũravu borotedejameða úre caðateipõevaque. Aru boroteni buojarĩ arejameða Pablore:

—Ñai jabocu ijãravucacu pũeno baju parũcu yebai nuiyuvu mu. Que baru nuũyumu ùi yebai, arejameða Festo.

#### Pablo ùi yávaino jabocu Agripaque

<sup>13</sup>Apejãravua yóboi, ñai jabocu Agripa, jĩbucomaque, õi ãmiá Berenice, earejaimaða Cesarea ãmicurĩĩmaroi. Jacoyurãnũrejaimaða Festore. <sup>14</sup>Aru

obedijāravua mautedejaimada na. Cūinājāravu Festo coyurejameda nāre Pabloi borore.

—Yui cubi cūinācu ūmu, Félix ūi buorī epeimu mācu. <sup>15</sup> Ji cue báquede Jerusaléi, sacerdotevare jaboteipōeva aru judíova bucūva máre āmeno boro coyurī adarādariduima ūre ji yebai. Jēniariduima yure ji nājine daquiepe aivu ūre. <sup>16</sup> Ūbenita yu acacu nāre: “Yópe darī cōmajiyama Romacavui jabova. Mamarumure ina boro coyurī adaivuque copu yāvare darī cōmajiyama nai ne coyurī adaimuque, ū máre ūi coputequiepe aivu nāre. Nūja Romacavui jabova yópe dabevu baru mamarumure, jíbevū pōecure ina boro coyurī adaivure”, acacu yu nāre. <sup>17</sup> Que baru ne edaiyede yui, joe corebecūva, cōmiájāravure dobatecacu jabova ne āmeina teivure jēniari jáiñami jívui. Aru davaicōjecacu nai ūmure. <sup>18</sup> Dápiayu bariducacu ina judíova boro coyurī adarājivure ūre urarō ūi āmeina teiye báquede. Ūbenita coyurī adaivu ye yāvabeteima urarō ūi āmeina teiye báquede yópe ji dápiarīduino mácarōpe. <sup>19</sup> Quénora jorojīma ūre ne bueiye de jēvari Jūmenijicure aru cūinācu Jesús āmicūcu yayiú bācure. Ūbenita Pablocapūravu parurōreca coyuyube nai Jesús apūcure cojedeca. <sup>20</sup> Yúcapūravu ye majibetecacu caiye iye ne borore. Que baru jēniari jácacu Pablore: “¿Muri nuiyubecurū mu Jerusaléi? Noi yu jápiacuyumu cojedeca mi borore”, acacu ūre. <sup>21</sup> Ūbenita úcapūravu jēniame: “Jarojacu yure nai jabocu ijāravucacu pueno baju parucu yebai, ūi jápiaquiepe ayu ji borore”, áme yure. Que baru churaravare coreicōjecacu ūre buoimupe ji jaroiyeta nai jabocu ijāravucacu pueno baju parucu yebai, arejameda Festo Agripare.

<sup>22</sup> Aru Agripa arejameda:

—Yúvacari jápaiyuvu nai ūmure, arejameda.

Que baru Festo ju arejameda:

—Javena ūre jápiacuyumu mu, arejameda.

<sup>23</sup> Cōmiájāravui Agripa Berenicemaque earī cójijiñami uradāmi, ecorejaimada noi pōeva ne urarō pueđaiyede nāre ne ecoiyede. Caivu ina churaravai jabova parurivu, aru caino diīmarocavu parurivu máre ecorejaimada diñami náque. Aru Festo davaicōjenejameda Pablore. <sup>24</sup> Que teni Festo arejameda:

—Mu, judíovai jabocu, aru caivu muja nūjaque curivu máre, jáivubu nai ūmure. Caivu ina judíova Jerusalécavu aru yócvu máre āmeno boro coyurī adariduima ūi borore. Codoborī, “Ūre boarī jaruvajacu”, pueno baju aimana. <sup>25</sup> Ūbenita yúcapūravu ye ūi āmeina teiye de eabevu yu. Ji járu, ūi daiye báque boje boarī jaruvaiye jaubevu ūre. Nai Pablovacari jēniame nai jabocu ijāravucacu pueno baju parucu jápiacuyure ūi borore. Que baru arī dápiacacu: “Jarocuyumu ūre nai jabocu ijāravucacu pueno baju parucu yebai”, acacu yu. <sup>26</sup> Ūbenita yúcapūravu majibevu yéde ji toivaquiyede ūi borore nai jabocure, ūi majiquiepe ayu Pabloi āmeno daiye báquede. Mu, ji jabocu Agripa, que baru daicōjeivu ūre yui muje yebai. Maje ūre jēniari jápiarīburu yóboi, yu majiquijichuvu ūi āmeno daiye báquede, toivacuyu nai jabocu ijāravucacu pueno baju parucure. <sup>27</sup> Buoimure jaroie majibevu yu jabocu yebai, coyubecūva aipe darī ūi āmeno daiye báquede, arejameda Festo nāre.

**26**

<sup>1</sup> Dinumu Agripa arejameda Pablore:

—Caride coyujacu mi borore, arejameda.

Que aiyede, Pablo jabióvarī ũi purure, yávarī búrejamedá, coyuucuy ũi borore:

<sup>2</sup>—Mu, ñuje jabocu Agripa, caride torojuvu yu ji ũme mi jápiaquiyepe ayu ji coyuiyede caiye iye ne ámeno boro coyurī adaiyede yure ina judíova. <sup>3</sup>Múvacari coreóvaivu me judíova ne darī cōmajiyede aru ne bueiye de máre. Que baru jēniaivu mi jápiaquiyepe ayu ji coyuiyede napiyeque, arejamedá Pablo.

**Pablo ũi coyuino ũi ñaiye báquede Jesús jicu tequiye jipocai**

(Hch 23.6; Fil 3.5)

<sup>4</sup>Pablo, yópe arī, coyure nurejamedá:

—Ina judíova coreóvadama aipe cucure yu ne jēneboi juedocu cāreja aru caride máre, mamarumure ji cuede ji imaroi aru no yóboi ji cuede Jerusaléi máre. <sup>5</sup>Joe baju yurecabu cūináyubó fariseo ámicuriyajubocacu. Ñuja fariseova mearore jívubu Jūmenijicure yópe ũi ñaicōjeiyede ũi coyuiye báquepe Moisés bácuere caivu apevu judíova pueno baju. Ina judíova urivu baru, ju ajebu jāve iye ji coyuiyede. <sup>6</sup>Caride núvu yu yui, ne boro coyurī adaimu, ji coreiye boje Jūmenijicui mearo ñacaquiye de ñujare yópe ũi aipe báquepedeca ñujeñecuva mácavure. <sup>7</sup>Aru caivu ñuje doce paiyajubocavu Israecavu máre coređama yópe ji coreiyepe. Que baru mearore jíyama na Jūmenijicure jāravure aru ñamine máre. Aru mu, ñuje jabocu Agripa, ina judíovavacari boro coyurī adaiyubu yure, iye ji coreiye boje. <sup>8</sup>¿Aipe teni “Jūmenijicu nacovañu buojabebi yaivu bácuvere yainore jaruvārī”, arī dápiayurū muja? arejamedá Pablo.

**Pablo ũi coyuino ũi ñájine ñaiye báquede Jesúsre ju aipōevare**

<sup>9</sup>Yópe arī, coyure nurejamedá Pablo:

—Javede yúvacari yópe arī dápiacacu: “Jesús Nazarecacure ju aipōevare maucuvae javu yure”, acacu yu. <sup>10</sup>Yópe ñacacu yu Jerusaléi: Obedivu ina Jesúsre ju aipōevare jēni, buorī, jarocacu yu náre ámeina teivure jēni jacoñamiai, yópe ina sacerdotevare jaboteipōeva ne ñaicōjeiyepe. Aru ne boarī jaruvaiyuede náre, yu máre ju acacu diede. <sup>11</sup>Obedijārvua yu nucacu judíovai cójijñamiai, ñájine ñacuyu ina Jesúsre ju aipōevare. Jesúsre ju abede ñarīducacu yu náre. Aru ji urarō baju jorojīye boje náre, yu cujucacu náre apeñmaroaita, arejamedá Pablo.

**Pablo ũi coyuino cojedeca Jesús jicu teni buino mácarōre**

(Hch 9.1-19; 22.6-16)

<sup>12</sup>Yópe arī, coyure nurejamedá Pablo:

—Cūinájaravu Damasoi nucacu yu ina sacerdotevare jaboteipōevai parúeque, ñacuyu yópe ne ñaicōjeiyepe. <sup>13</sup>Aru mu, ñuje jabocu Agripa, ji nuiyede mái jāravu corica baji jácacu cavarōre jocarī urarō miadárore, avía ũi pueno cojinore. Pēoávu ñuje yebai, yure aru yúque nuivure máre. <sup>14</sup>Que baru cuecumaivu caivu mori tucarā joborōi. Aru jápiacacu apeno yávainore ñuja judíova ñuje yávaicamuaque, yópe ainore: “Mu, Saulo, ¿aipe teni maucuvacurū mu yure? Yópe ñayu, múvacari ñájine ñaiyu mu mi bajuma, yópe cūinácu oteñaimacu uracu ũi ñájine ñaiyepe ũi bajure tátañu

abodo juijóiyore”, áme yure. <sup>15</sup>“Мѹ, ји јабосѹ, љѧменѹ мѹ?” асасѹ ҃н. “҃҃҃recabu Jesús, ѧѧи ми мауѹвѹмѹ. <sup>16</sup>Caride nacajari núјасѹ. ҃н јáđovaivѹ мѹре, ји baju ми memecaquiyеpe а҃н ҃҃҃. Beoivѹ мѹре, ми соу҃quiyеpe а҃н аревѹре ҃ópe ми јáinope ҃҃ре caride. Aru ми јáquiyеde ҃҃ре bedióva соу҃с҃у҃мѹ диеде máre. <sup>17</sup>Que baru jaroquijivѹ мѹре, ми соу҃quiyеpe а҃н ји ҃ávaie méне јудíovare, ару јудíova áмевѹре máre. Aru ҃н јodec҃у҃мѹ мѹре, не áмeно đabenajiyеpe а҃н. <sup>18</sup>Ми соу҃quiyеde јудíova áмевѹре, ҃н јápiari eare đac҃у҃мѹ náre, не đajocarājiyepe а҃н не áмеина teiyеde ҃ópe ѧeminoi cuiyepe, ару не ју arājiyepe а҃н ҃҃ре ҃ópe miadároi cuiyepe. ҃н јаетovac҃у҃мѹ náre ѧѧи abujuvai јабосѹ Satanás ѧи јaboteinore јocarѧ. Aru ecovac҃у҃мѹ náre Ј́мeнијicѹи јaboteinoi. Que teni ҃н á҃҃metec҃у҃мѹ не áмеина teiyеde, не ҃҃ре ју айе boje. Aru Ј́мeнијicѹи п́өваque сүрāјarama na”, áме Jesús ҃҃ре, areјameda Pablo.

**Pablo ѧи соу҃ino ѧи đaiyeде Jesúи đaicójeinore úre decoboainoque**

(Hch 9.20, 28-29; 1 Co 15.20)

<sup>19</sup>҃ópe арѧ, соу҃ре н҃рејameda Pablo:

—Мѹ, н҃҃је јабосѹ Agripa, ѧѧи cavarō mearo Ј́мeнијicѹи сүрōсасѹ ји јáimѹ máс҃ре јáve ју асасѹ ҃н. <sup>20</sup>Que baru соу҃сасѹ mama҃mѹре Damascovure, ару no ҃óboи Jerusalécavure, no ҃óboи caino Judeacavure, ару no ҃óboи јудíova áмевѹре máre. Соу҃сасѹ náre: “Chñojara мѹја мѹје áмеина teiyеde. Aru јaruvajarā диеде. Oatuvajarā мѹје đaiyeде. Aru đajarā ҃ópe Ј́мeнијicѹи н҃rөpe, аревѹ п́өва не majinajiyеpe а҃н јáve мѹја ју айвѹре Ј́мeнијicure”, арѧ соу҃сасѹ náre. <sup>21</sup>Ји н́өpe бueйе boje, ina јудíova ҃҃ре јѧи боарѧ јaruvariduima Ј́мeнијicѹи сүрамѧ јívѹи. <sup>22</sup>Ѓbenita јavede ару caride máre Ј́мeнијicѹи cadateibi ҃҃ре. Que baru ҃н ҃уи núсѹ, соу҃ivѹ ҃ávaйеде јávene caivure, парувѹре ару парубевѹре máre. Quénora соу҃ivѹ ҃н ҃ópe Ј́мeнијicѹи đaicójeiyеде ѧи соу҃iye báquepe Moisés бáс҃ре ару ina Ј́мeнијicѹи ҃ávaйеде соу҃caipөва mácavѹ не toivaiye báquepe не соу҃caiyеде, “҃ópe vaiquýebu. Que а҃҃be Ј́мeнијicѹи”, не айе báquepedeca. <sup>23</sup>҃ópe арѧ, toivareјаquemavѹ na: “Cristore, Ј́мeнијicѹи дароқимѹре, јавѹ ѧи н́áјiquiye, ару ѧи ҃aiquýe, ару ѧи nacajaquiyе yainore јaruvari caivѹ аревѹ јipocai. Que đari ҃ópe п́өino јáре đaiyepe п́өvare, nopedeca Cristo јáđovac҃у҃мѹ јудíovare ару јудíova áмевѹре máre Ј́мeнијicѹи meadaquiyеде náre”, areјаquemavѹ na, areјameda Pablo.

**Pablo “Ју ајасѹ Jesúре” ѧи арíduino јабосѹ Agripare**

<sup>24</sup>Pablo ѧи соу҃iyеде, Festo codoboboreјameda úre:

—Мѹ, Pablo, á҃҃мевѹ мѹ. Ми pare бueйе boje, á҃҃мевѹ мѹ, areјameda úre.

<sup>25</sup>Ѓbenita Pablo areјameda úre:

—Мѹ, н҃҃је јабосѹ Festo, á҃҃мевѹ áмевѹ ҃н. Quénora соу҃ivѹ ҃ávaйеде јávene ји úmei. Ѓbenina а҃н áмевѹ ҃н. <sup>26</sup>Наи јабосѹ Agripa majibi caiye iye ји соу҃iyеде. Que baru ҃н јидубecѹva соу҃ivѹ úre. Yavenina áмeно đaiye áмевѹ iye. Que baru јavede јápiaquemavѹ диеде ѧѧи јабосѹ Agripa, areјameda Pablo.

<sup>27</sup>Que а҃н, Pablo areјameda Agripare:

—Mu, ñuje jabocu Agripa, ina Jūmenijicui yávaiyede coyucaipōeva mácavu ne toivaiye báquede ju aivu mu. Majivu yu mu ju ayure, arejamedá úre.

<sup>28</sup> Agripa arejamedá Pablore:

—Mi coyuiñoque quíjino baju yure ju are ñaríduivu mu Jesúre, arejamedá.

<sup>29</sup> Aru Pablo ju arejamedá úre:

—Quíjino baju meajebu. Urarō baju máre meajebu. Yu Jūmenijicuque jēniacavu caivu mujare, muje ju arājiyepe ayu úre aru muje nurajiyepe ayu yúpe paivu, ũbenita buoimeaque cubevva, arejamedá Pablo.

<sup>30</sup> Dinumu ñai jabocu Agripa, ñai jabocu Festo, Berenice, aru náque dobarivu máre nacajari etarejaimada nore jocarí. <sup>31</sup> Ne etaríburu yóboi, arejaimada ne bajumia:

—Ñai ũmu ũi ñaiye boje yaiquíno jaubevu úre, aru buoino máre. <sup>32</sup> Pablo ũi abedu “Jarojacu yure ñai jabocu ijāravucacu pueno baju parucu yebai, ũi jápiaquiyepe ayu ji borore”, maja buojajebu etaicōjeivu úre. ũbenita ũi nópe jēniayi boje, maja buojabevu etaicōjeivu úre, arejamedá Agripa Festore.

#### Pablore ne jaroino Romai

**27** <sup>1</sup> Ñai jabocu ijāravucacu pueno baju parucu curejamedá Italia āmicurijoborōi. Que baru Pablore aru apevu buoimarare máre Festo coreicōjenejamedá cūinácu churaravai jabocure, ũi āmiá Julio, ũi nūvaquiyepe ayu náre Italia āmicurijoborōi jiadocū uracū ũmevu japuino nuicūque. Ñai Julio cien paivu churaravare jabotedejamedá. Ne yajubo “Augusto jina churaravayajubo” āmicuriyajubo barejávūya. Aru yu máre nucuyū barejacácu. <sup>2</sup> Que teni jaturejacrā cūinácu jiadocū uracūi, Adramitio āmicuriimarore jocarí daicū mácārōi. Dicū etaquicū marejávū, tuijaquicū ĩmaroa coapa Asia āmicurijoborōi jia urada ěcarui. Aru Aristarco máre, Macedonia āmicurijoborōcarō ĩmaro Tesalónica āmicurōcacu, yóvarejame ñujare. <sup>3</sup> ũmevuque nuri, cōmiáijāravui tuijarejacrā Sidón āmicuriĩmaro ěcarui. Julio me járejame Pablore. Que baru maicōjenejame úre ũi yóvaimara nócavu yebai, ne jínajiyepe ayu úre jauéde. <sup>4</sup> Jaturí cojedeca, etarejacrā nore jocarí. No ũmevu japuiye boje ñujare copu, vaidéjacrā Chipre āmicurijavure ñuje cācopūravui. Dijíavu cue boje, ũmevu āmedabedejavū ñujare. <sup>5</sup> Dijíavure vainíburu yóboi, jatari jia uradaí, vainí Cilicia aru Panfilia āmicurijoborōare, earejacrā Licia āmicurijoborōcarōi, Mira āmicuriĩmaroi.

<sup>6</sup> Noi Julio vorí earejame apecū jiadocū uracūre, ũmevu japuino nuicūre, Alejandría āmicuriimarore jocarí daicū mácārōre. Etarí, nuicū tuijaquicū marejávū Italia āmicurijoborōi. Que teni jature ñarejame ñujare dicui. <sup>7</sup> Bediōva ũmevu japuiye boje ñujare copu, duibajieneca nurejacrā obedijāravua. Eabenidurejacrā Gnido āmicuriĩmaroi. Aru ũmevu nuicōjemenejavū ñujare ñuje nurié nuinoi. Que baru eavū Salmócāpido āmicuriĩmaroi, vaidéjacrā Creta āmicurijavure ñuje meapūravui. Dijíavu cue boje, ũmevu āmedabedejavū ñujare. <sup>8</sup> Duibajieneca nuri, tuijarejacrā Mearoa tuipāva āmicuriĩmaroi, Lasea āmicuriĩmaro joabenomia.

<sup>9</sup> Obedijāravua vaidéjavū. Aru judíovai torojuve teijāravū máre, ne ārurijāravū Jūmenijicui ārumeteiyede ne āmeina teiyede, vaidéjavū. Ocorūmu joabe boje, pōeva ne nuino maru jiadocū uracūque, jidojarō marejavū. Que baru Pablo majicarejame náre, ñujaque nuivure:

<sup>10</sup>—Muja jápiajarā. Maje nūru jia ūradai cojedeca cari, meamequiyebu. Ocorūmu boje, b́jaquiyebu dicū, aru caiye maje nūvaiye máre dicūi. Aru maja máre corí b́jarājaramu, arejamedā Pablo, majicayu.

<sup>11</sup>Ūbenita dicū upacu aru dicūre cōjeipōecu máre ju abedejaima Pablore. Aru Julio jápia rejame náre Pablore pūeno. <sup>12</sup>Mauteino meamenejavū ocorūmure dīmaro, Mearoa tuipāvai. Que baru apevu obedivu pōeva dicūcavu etaiyurejaima nore jocarī, nūridurājivu apeno tuipāvai, Fenice āmicurīimaroi. Cor ei yurejaima ocorūmu vaiyede nore. Fenice Creta āmicurījavui cuvū. No tuipāvai curī, jia ūradare aviá ūi darī doinocapūravui, aru aviá ūi darī doino meapūravui máre jáino marejāvū. Que baru jiadocū jorī noi, javaiyorejavū ocorūmure.

### Jia ūrada pācaibo ūrabo daino

<sup>13</sup>Ūme vu japuino oatuvaiyede, dūibajīeneca japuiyede aviá daino cācopūravure jocarī, jiadocū ūracūre memeipōeva jāmuōrejaima dūcuribore, dicūi nūmene dāibore. Nūrejacarā dicūque Creta āmicurījavu ēcarui joabejīnoi. <sup>14</sup>Ūbenita no yóji boi, ūmevu pare parurō japurejavū dijiávū apedūvede jocarī, aviá ūi darī doino cācopūravure daino. <sup>15</sup>Aru no ūmevu pare japurejavū űuje jiadocūre. Que teni ūmevu űuje jipocai japuiye boje, nūri buojabedejacarā. Numenejacarā űuje nuiyurōre. Que baru dicūre copediovarī, ūmevure japūpoi cōj enejacarā ūmevu nūinoi. <sup>16</sup>Vaidéjacarā Cauda āmicurījavure űuje meapūravui. Dijíavu cue boje, ūmevu āmedabedejavū űujare. Aru apecū quíjicūre, ūracūi dabūboicūre, jāmuōiyurejacarā, adarājivu ūracū jívui. Ūbenita nōpe dāivu pare űājinejacarā. <sup>17</sup>Quíjicūre meadarīburu yóboi, ina memeipōeva buorejaima ūracūre buoimea ūramea parurimeaque. Ūracū cāchīnoi dīmeāre epeni, me buorejaima na, dicū copobequiyepe aivu.

No yóboi, ne jidué boje dicū eajuroede Libia āmicurījaborōi, noi ēcaru joabenoi ēpacurō, pare meameno, Sirte āmicurō, jiadocūare jēino, jōdovarejaima ūracaje ūmevu paicajede, ēpacū jēmequiyepe aivu űuje jiadocūre. Que teni ūmevuque nūrejacarā űuja. <sup>18</sup>No ūmevu ye b́jabedejavū. Quénora cainumua pūeno baju japurejavū no. Aru pācaiboa máre ūraboja baju jāriyadedejavū dicūre. Que baru cōmiáijāravui nūvaiyede jarūvarī búrejaima jia ūradai. <sup>19</sup>Cōmiáijāravui jarūvarejacarā apeno dicūcarōre: cajeāre, buoimeare, aru abodoare máre. <sup>20</sup>Obedijāravua jámenejacarā aviāre aru abiācovare máre. No ūmevu, pācaiboa máre ye b́jabedejavū. Quénora cainumua pūeno ūrarō baju nūrejāvū no. Que baru “¿B́jarājivu b́rica jia ūradai?” arī dāpiarejacarā űuje baju.

<sup>21</sup>Obedijāravua ye āmenejaima na. Aru Pablo darī, nūri ne jēneboi arejame náre:

—Muja jápiabetevu yure ji coyurīduiye báquede mujare. “Cretare jocarī nūiye jāubevu majare”, arīduvu yu. Maje dabedu, yópe tede dābejebu majare. Ūbenita maje daiye boje vaivu majare yópe. <sup>22</sup>Yu coyuyubu mujare: Jidūbejarā. Majacacu ye cūinācu b́jabequijibi. Quénora dicū jiadocū ūracū b́jaquiyebu. <sup>23</sup>Nópe majivu yu, cūinācu ángele ūi coyuiye báque boje yure cari űami marede. Jūmenijicu, ji jabocu aru ji mearore jīmū máre, ūi daroimu matecūbe űai ángele. <sup>24</sup>Ji yebai darī, abi yure: “Mu, Pablo, jidūbejacu. Mi nūquiyé boje űai jabocu ijāravūcacu pūeno baju parūcu yebai, Jūmenijicu ūi

me boje, caivũ ina múque jiadocũ uracũi nuivũ yaibénajarama na”, abi yure ñai ángele. <sup>25</sup>Que baru jidubejarã mũa. Jũmenijicure ju aivũ yũ. Que baru majivũ yũ caiye vaiquýede yópe ñai ángele ñi aiye báquepedeca. <sup>26</sup>Ubenita no ùmevũ japuquiyebu maje jiadocũre apedũve jiaivũ êcarũita, arejame Pablo náre.

<sup>27</sup>Pucasumana ùmevũ urarõ japurĩ búriburu yóboi, ñamineca jataivũ barejacará ùmevũ japuiyeque jia urada Adriático ámicuriyare. Nami corica bajĩ dicũre memeipõeva “¿Joborõ joabenoĩ eaivũ bárica?” arĩ dápiajechaquemavũ ne baju. <sup>28</sup>Que baru corevarejaima na aipino ùmujurõ jia urada ne yebai. Aru treinta y seis paimetros ùmujurõ marejávũ noi. Quĩjino no yójiõboi, corevarejaima cojedeca. Aru veintisiete paimetros ùmujurõ marejávũ noi. <sup>29</sup>Que teni jidurejaima, “¿Jãrajidica?” aivũ êcarũi cũraboaque. Que baru êmeóvarejaima yóvaicũvaiboa ducuriboa dicũre numene ðaiboare japuvainocapũravũ jocarĩ. Aru, “Maumejiena miadáe tũjarõri”, arĩ jẽniarejaima na. <sup>30</sup>Dicũre memeipõeva dupini nuiyurejaimada dicũre jocarĩ. Dicũ quĩjicũ buoimeare jodeni, dicũre êmeóvari jia uradaĩ, borocurĩ “Apeboa ducuriboare epenanũivũbu pũraboĩ”, arejaima na, borocurivũ. <sup>31</sup>Ubenita Pablo arejame churaravai jabocure aru churaravare máre:

—Ina dicũre memeipõeva ne nũru jiadocũre jocarĩ, mujavacari yainájaramu, arejame náre Pablo.

<sup>32</sup>Que baru apevũ churarava burarejaima dimeáre, dicũre buorĩ yuyaimeare. Aru dicũ quĩjicũ turĩ jia uradaĩ, corĩ bĩjarejavũ.

<sup>33</sup>Miadáe tuquiyẽ jipocai cãreja, Pablo ãicõjenejame náre.

—Caride pucasumana vaiyede mũa cãrijivũ, coreivũ, ye ámevũ áiyede.

<sup>34</sup>Que baru parũrõreca jẽniaivũ mujare. Ájara, paruburĩ tarãjivũ. Árujara. Caivũ maja yaibénajaramu, arejame Pablo náre.

<sup>35</sup>Que arĩ, Pablo páure jẽni, Jũmenijicure torojuede jíniburu yóboi ne jáinoi, páure cotũvarĩ, ãrejame ñ. <sup>36</sup>Caivũ ina úre ãñũre jáivũva, na máre ãrejaima na. <sup>37</sup>Aru caivũ ñũa dicũi curivũ doscientos setenta y seis paivũ baju barejacará ñũa. <sup>38</sup>Que teni caivũ yapiniburu yóboi, ñũje áiyede pupuiyede, trigo ámicue oteiyede, jaruvarejaima dicũre jocarĩ jia uradaĩ, ducubecũ ðarãjivũ dicũre.

#### Jiadocũ uracũ coino

<sup>39</sup>Miadáe tuiyede yo joborõre ye coreóvabedejaima ina dicũre memeipõeva. Ubenita járejaima tuiipávare êpacũ, cũrabo cubenore. Que baru, “Tuijarãjarevũ noi”, arĩ dápiajechaquemavũ ne baju. <sup>40</sup>Mamarũmure apevũ burarejaima ducuriboa buoimea máquede diboáre, ðajocarãjivũ jia urada jívui. Dinũmuma apevũ duarejaima dicũ jipocateivea buoimeare, diveáre êmeóvari jipocatenajivũ dicũre diveáque. No yóboi, jãmuórejaima uracaje ùmevũ paicajede, eaiyurĩduivũ êpacũi. <sup>41</sup>Ubenita dicũ pũrabo jia urada jívui apecũ êpacũ uracũ curejavũ. Ñũje jiadocũ jãrejavũ êpacũra. Aru pũrabo êpacũi dorĩ jẽnejavũ. Pãcaiboa parũrĩboa jãriyadedejavũ pare ñũje jiadocũre copovaiye japuvainore.

<sup>42</sup>Que baru ina churarava boarĩ jaruvaiyurĩdurejaima ina buoimarare, ne tarĩ dupini numenajiyeye aivũ. <sup>43</sup>Ubenita ñai churaravai jabocu meadaiyurejame Pablõre. Que baru churaravare boarĩ jaruvaicõjemenejame

ũ ina buoimarare. Quénora ina tarĩ majidivure biararĩ coicõjenezame jia uradaĩ mamarumure, ne tarĩ nurajiyepẽ ayũ êcaruĩta. <sup>44</sup>Aru ne yóboi nuicõjenezame apevure jorĩ jocuveai, dicũ mácarõ jaruvaiye. Que teni caivu ñũje baju meadaivu, earejacařã joborõita.

#### Pablo ũi curõ Maltaĩ

**28** <sup>1</sup>Ñũje eaiyede mearava joborõĩ, nócavu “Yo Malta ãmicurijavubu”, coyurejaima ñũjare. <sup>2</sup>Ina dijiávui curivu me járĩ ñũjare, jacoyurejaima na. Ocarĩ buiyede cojedeca ãmei jũjarejavũ ñũjare. Que baru toabore dacuvacarejaima ñũjare. <sup>3</sup>Aru Pablo jevarĩ pecare cūinátoro pecatorore, juarejame ditorore toaborã. Que teni cūinácũ ãda etarejame pecatorore jocarĩ, toaijie boje. Cūri jēnezame Pabloĩ purui. <sup>4</sup>Aru nócavu ne jáiyede ñai ãda jēñure Pabloĩ purui, aridurejaima ne bajumia: “¿Boarĩ jaruvayu bárica pōevare ñai ũmu? Dupini dacube jia uradare jocarĩ. Ŭbenita Jūmenijicu apuicõjememi úre. Que baru caride yaicáyume, ũi ãmeina ãaiye boje”, ũbenina aridurejaima nócavu.

<sup>5</sup>Ŭbenita Pablo pupeni ũi purure, jaruvarĩ davarejame ñai ãdare toaboi. Aru ijibedejavũ úre. <sup>6</sup>Que baru ina pōeva aridurejaima ne bajumia, “Cocoroquiyebu úre”. Aru, “Yainĩ tuquijibi ũ”, aridurejaima na. Ŭbenita joe coreni jáiyede, ye ñájimenezame ũ. Que baru ne dápino oatuvarĩ, “¿Jūmenijicu bárica ũ?” arejaima na.

<sup>7</sup>Aru cūinácũ ũmu, ũi ãmiá Publio, ũi curõ joabeno curejavũ ñũje maino mácarõĩ jia uradare jocarĩ. Nócavui jabocu barejáme ũ. Ñũjare cuturejame ũi cūrami. Aru me copũ etarejame ñũjare noi. Yóbecurijāravua curejacařã úque. Aru mearo ñacarejame ñũjare. <sup>8</sup>Publioĩ pacũ parayu ijimu, morejavũ úre. Aru cođo yaiyũ barejáme ũ. Pablo jácunurejame ũi yebai. Jēniari Jūmenijicuque úre, tuoyũ ũi puruque, meadarejame úre. <sup>9</sup>Apevu nócavu ijimara jápiaivu bácvu Publioĩ pacui borore, darejaima ñũje yebai, Pablo ũi meadaquiyepẽ aivu náre máre. Aru meadaimara marejáima na. <sup>10</sup>Jívu barejáima ñũjare cuvede. Aru ñũje etarājiye jipocai, ñũje jiadocũ jívuĩ adarejaima caijĩe ñũjare jauéde.

#### Pablo ũi eaino Romai

<sup>11</sup>Cūinácũ jiadocũ uracũ, Alejandría ãmicurĩmarore jocarĩ daicũ mácarõ javaiyorejavũ uracorore dijiávũ tuiپāvai. Dicũ Cástor aru Pólux ãmicuricũ aru ina پucarã jūmenijina ne decova curejavũ dicũ پūraboi. Noi curivu bácvu yóbecurã aviáva baju jaturejacařã, nurajivu dijiávure jocarĩ. <sup>12</sup>Tuijarejacařã Siracusa ãmicurĩmaroi. Aru mautedejacařã noi yóbecurijāravua. <sup>13</sup>Etarĩ nore jocarĩ, nurejacařã êcabo cūináturu pu Regio ãmicurĩmaroi. Cūinājāravu yóboi, ũmevu aviá daino cācopūravure jocarĩ japurĩ búrejavũ. Que baru nurejacařã cojedeca. Pucajāravua yóboi, Puteoli ãmicurĩmaroi tuijarejacařã ñũja. <sup>14</sup>Apevu nócavu Jesúre ju aipōevare copurejacařã noi. Cuturejaima ñũjare:

—Cūinásumana mautejarã ñũjaque, arejaima na.

Que baru cūinásumana yóboi, etarejacařã náre jocarĩ, nurajivu Roma ãmicurĩmaroi. <sup>15</sup>Diĩmarocavu Jesúre ju aipōeva jápiaivu bácvu ñũje borore, jacoyurādarejaima ñũjare Apio ãmicurõ cuve bojedaino ãmicurĩmaroi aru

Yóbecuriñamia āmicuriīmaroi máre. Pablo jáñu náre, torojurejame. Aru torojuede jídejame Jūmenijicure. <sup>16</sup>Ñuje eaiyede Roma āmicuriīmaroi, apecu jabocu Pabllore cuicōjenezame ũi cūrami baji cūinácuvu. Ūbenita cūinácu churaravacacure jári coreicōjenezame ũre cainumua, ũi dupini nūmequiyepe ayu.

**Pablo ũi coyūino Jesús ũi yávaiye méne Romacavure**

(Mt 13.14-15; Mr 4.12; Lc 8.10; Jn 12.40; Hch 25.11)

<sup>17</sup>Yóbecurijāravu yóboi, Pablo órejurejamedā ũi yebai nócavu judíovai jabovare. Cójijivu bācavure, Pablo arejamedā náre:

—Mujā, jīvu, yūvacari āmeno đabetecacu judíovare. Aru āmeina yāvabecacu majēneucu māvavu ne darī cōmajiyede máre. Ūbenita apecu majacavu buoima yure Jerusaléi. Aru jīma yure buoimupe Romacavui jabovare. <sup>18</sup>Ne jēniari jáiyede yure, ina Romacavui jabova jaetovaiyuteima yure. Ji borore “Nai ũmu ũi đaiye boje boarī jaruvaiye jaubevu ũre”, aima na. <sup>19</sup>Ūbenita ina judíova jorojīni ju abeteima diede. Que baru jēniacacu yópe: “Nai jabocu ijāravucacu pūeno baju parucu yebai nūquijivu”, acacu yu. Ūbenita ye āmenore boro coyurī adabequijivu yu jīvui borore. <sup>20</sup>Que baru cutuivu mujare, jáiyuvu mujare, aru coyuiyuvu mujare máre. Buoimūmu yu, maje coreiye boje Cristo meadacuyure maja Israecavure, arejamedā Pablo náre.

<sup>21</sup>Aru arejaimada ũre:

—Ina Judeacavu toivabema paperayocare ñujare mi borore. Aru ina majacavu edaivu bācavu yui āmeina yāvabema mure. <sup>22</sup>Ūbenita majivu ñuja īmaroa coapa āmeina jáivure Jesúre ju aipōevare aru āmeina yávaiyure iye bueiye mamaene. Que baru jápiaiyurivubu mi dāpiainore diede, arejaimada Pabllore.

<sup>23</sup>Que baru apejāravu, ne beoijāravu, obedivu ina judíova, Romacavu, nurejaimada Pabloi cūrami. Javejīnare búri pu nainúta Pablo coyurejamedā náre Jūmenijicui đaicōjeiyede ũi coyuiye báquede Moisés bācure. Coyurejamedā náre ina Jūmenijicui yávaiyede coyucaipōeva māvavu ne toivaiye báquede máre. Ju are đaiyurejamedā náre Jesúre, Jūmenijicui daroimu māvure, aru Israecavui coreimu māvure máre. <sup>24</sup>Apecu ju arejaimada ũi coyuiyede. Ūbenita apecu ju abedejaimada diede. <sup>25</sup>Que baru cūináturu āmeni ne ũme, etarī búrejaimada ina judíova. Ūbenita ne etarājiye jipocai, Pablo arejamedā náre:

—Jāve Isaías bācu Espírītu Santoi yávaicōjeiyeque Jūmenijicui yávaiyede coyūcarejaquemavu mujeñecucu māvavure Jūmenijicui yávaiyede:

<sup>26</sup>Nujacu ina pōevare ne yebai. Aru ajacu náre: “Jāve jápiaridurājaramu muja. Ūbenita ye jápiarī eabenajaramu. Jāve járidurājaramu muja. Ūbenita ye jári eabenajaramu. <sup>27</sup>Mujā coreóvayubevu, muje yávaiyede jāvene jápiarī eaiyube boje. Mujā jápiabevu, muje yávaiyede jāvene jápiaiyube boje. Mujā bieivu muje yacoruaque, muje jāvene jáiyube boje. Yure jári coreivu baru yacoruaque, ju ajebu muja. Yure jápiaivu baru cá mucobeaque, ju ajebu muja. Yure jápiarī adaivu baru ũmeque, ju ajebu muja. Que đavure, meadaje bu yu mujare”, arī toivaicōjenezajquemavu Jūmenijicu Isaías bācure, arejamedā Pablo náre.

<sup>28</sup> Aru cojedeca Pablo arejameđa náre:

—Jāve majijarā muja, judíoiva. Caride Jūmenijicu daroibi ũi yāvaiye méne coyūcaipōevare, meadacuyi ina judíoiva āmevure ne āmeina teiyede jarūvarĩ. Aru návacari jápiarājarama, arejameđa Pablo judíovare.

<sup>29</sup> Pablo ũi que aiyede, ina judíoiva etarejaimađa, jorojĩni yávaivu ne bajumia.

<sup>30</sup> Pucaujua baju Pablo curejameđa noi. Bojedarejameđa ũi baju ũi cūramine noi. Aru torojucu jacoyurejameđa caivu ũre járadaivure. <sup>31</sup> Jidūbecuva coyurejameđa Jūmenijicui jaboteinoquede. Aru buedejameđa maje jabocu Jesucristorā máre, jidūbecuva. Aru ñame jecubedejaimađa coyuyure aru bueyure máre. Quénoramu.

# Romanos

Mamabuinore coyuiyebu Pablo bácu ũi toivaicōjeiye báquede paperayocare Roma āmicuriīmarocavū Jesúre ju aipōevare. Pablo bácu judíovacacu bácuvacari, Jesús ũi yávaiye méne beorí coyuićōjeimū marejaquémavū, coyucayū ũi yávaiye méne judíova āmevure, judíova ne ju abe boje ũi coyuiyede. Lucas bácu coyurejaquemavū Pablo bácu borore Hch 7:57-8:1, 9:1-31, 13:1-28:31, aru ũi cuede Roma āmicuriīmaroi Hch 28:14-31. Javede Pablo bácu toivacaipōescu bácu toivaicōjenejaquemavū pucayoca ũi paperayocare Tesalónica āmicuriīmarocavure, aru pucayoca ũi paperayocare Corinto āmicuriīmarocavure, aru ũi paperayocare Galacia āmicuriīborōcavure máre, ũi toivaicōjeiye jipocai Tercio bácu iyoca paperayocare Roma āmicuriīmarocavure (16:22). Pablo bácu coyurejaquemavū ũre toivacaipōescu bácu aipe ũi toivacaquiye báquede diyocare. Toivaicōjenejaquemavū diyocare āniujua báquede 56-57 d.C., yóbecue ũi cucunuiyede, coyucayū Jesús ũi yávaiye méne. Majidivū ne dāpiaiyepē, curejaquemavū Grecia āmicuriīborōi, Corinto āmicuriīmaroi, o apeno īmaro dijaborōcaīmaroi ũi toivaicōjeiyede diyocare.

Diyocaque Pablo bácu coyurejaquemavū caivū pōeva ne boropateiyede Jūmenijicui jáinore, Jesucristoi boropatebede Jūmenijicui jáinore, pōeva ne boropatebede Jūmenijicui jáinore ju aivū baru Jesucristore, aru Jesucristoi boropatebede đaimarare đaiye jaurōre yópe Jūmenijicui urōpe Espiritu Santoi cađateiyequē.

## Pablo ũi meaicōjeino Romacavure

(Mt 1.1; 12.23)

**1** <sup>1</sup>Yū, Pablo, toivaicōjeivū apēcure iyoca paperayocare mūja Roma āmicuriīmarocavure. Jesucristore memecayūbu yū. Jūmenijicu beorí epei bi yure Jesús ũi yávaiye méne beorí coyuićōjeimūre, ji coyūquiyepe ayū ũi yávaiye méne, meadaiyede caivū pōevare.

<sup>2</sup>Javede iye yávaiye méne Jūmenijicu, “Yópe jāve đacacayumu yū pōevare”, arejaquemavū. Aru toivaicōjenejaquemavū ina ũi yávaiyede coyūcaipōeva mácavure diede, ũi yávaiyede. <sup>3</sup>Iye yávaiye méque Jūmenijicu coyūibi mamacui borore. Ũi mácu, nai cucu cainumua, pōetedejaquemavū ũmuvape ijāravui. Jūmenijicui mácu, maje jabocu Jesucristo, nai jabocu David bácu pāramecube ũ. Que baru Jesucristo pōecube, ũi ũmuvape ārojae boje. <sup>4</sup>Ũbenita Jūmenijicu jáđovaimi parurōreca caivū pōevare maje jabocu Jesucristo mamacure. Jūmenijicu jáđovarejaquemavū diede jāveneca ũi nacovaiye báquede Jesucristore yainore jarūvarī. Que baru Jesucristo Jūmenijicui mácube, ũi ũmepe me cue boje. <sup>5</sup>Jūmenijicu Jesucristore epede đai bi nūjare Jesús ũi yávaiye méne beorí coyuićōjeimarare, ũi mearo đacaiye boje bojecubeda, nūje coyūrājiyepe ayū caino joborōcavure, ne ju arājiyepe ayū Jesús ũi yávaiye méne, ne đarājiyepe ayū ũi urōpe, apēvū máre ne jínajiyepē ayū mearore ũre.

<sup>6</sup>Aru mūja máre nácavūbu. Jesucristo ũi beoimaratomu mūja. Ũ jinamu mūja.

<sup>7</sup>Caivũ mujare, Jũmenijicui ɯmarare, Romacavũre, Jũmenijicu beorejaquemavũ mujare ɯ jina mǎrajivũre. Majepacu Jũmenijicu, maje jabocu Jesucristomaque, mearo ɗacajacurĩ mujare bojecubeda ɯi me boje. Aru torojurĩ cure ɗajacurĩ mujare cǎrijimevũva.

**Pablo ɯi jǎcũnuiyurõ Romacavũre**

(Hch 19.21)

<sup>8</sup>Mamarũmure coyuiyũvũ mujare yõpe: Caivũ ijǎravũcavũ jǎpiaivũbu muje borore, muje ju aiyẽ boje Jesucristore. Que baru yũ jýyũbu torojũede Jũmenijicure ñuje baju ɯrõque muje ju aiyẽ boje ɯre. Jesucristobe cadateni, “Pũeno baju meacũbu mũ”, Jũmenijicure yũre are ɗayũ, obedivũ põeva ne jǎpiaiyẽ boje muje ju aiyede Jesucristore. <sup>9</sup>Yũ memecayũbu Jũmenijicure ji ɯmei ji bueiye de põevare ɯi yǎvaiye mène Jesucristorǎ. Cainũmũa ji coyuiyede Jũmenijicuque jẽniacavayũbu mujare. Jũmenijicuvacari majibi jǎve ji coyuiyede. <sup>10</sup>Javemiareca jǎcũnuiyurĩduivũ yũ mujare. Que baru jẽniavayũbu Jũmenijicure, ɯi jǎre ɗacũnure ɗaquiyẽpe ayũ mujare. Aru ɯi ɯrĩburu, jǎcũnũcũyũmu mujare. <sup>11</sup>Pare jǎiyũvũ mujare, cadatecũyũ mujare yõpe ñai Espĩritu Santoi cadateiyẽpe yũre, muje pũeno parũriũme cũvarǎjiyẽpe ayũ muje ju aiyede Jesũre. <sup>12</sup>Yõpe ayũbu yũ: Muja mǎre yũre cadatenajaramu. Aru mujare mǎre yũ cadatecũyũmu. Aru cũinǎturũ torojurivũ cadatenajarevũ maje bajumia.

<sup>13</sup>Muja, jývũ, majijarǎ iyede: Obedinũmũa jǎcũnuiyurĩducacu yũ mujare, buecũyũ mujacavũre mǎre, ne ju arǎjiyẽpe ayũ Jesũre nõpe ji bueiye pedeca apenoa imaroai apeyajuboacavũre, ne ju arǎjiyẽpe ayũ napedeca. Ʋbenita nũri buojabevũ yũ muje yebare cǎreja. <sup>14</sup>Coyuiye jǎvũ yũre Jũmenijicui yǎvaiye mène caivũ põevare, ina yǎvaivũre ñuje yǎvaicamuare aru ina apecamũare yǎvaivũre mǎre, aru majidivũre aru majibevũre mǎre. <sup>15</sup>Que baru yǎcapũravũ ɯetũbevũ bueiyũcu iye yǎvaiye mène mujare, Romacavũre, mǎre.

**Pablo ɯi coyũino Jũmenijicui yǎvaiye me parũede**

(Mr 8.38; 1 Co 1.18; Gǎ 3.11; He 10.35)

<sup>16</sup>Cũyebevũ yũ Jesũs ɯi yǎvaiye mène coyũyũ. Jǎve majivũ yũ caivũ põeva ne jǎpiaru diede, aru ne ju aru Jesũre, Jũmenijicu meadacũyũre nǎre ɯi parũeque. Mamarũmure Jũmenijicu meadaiyũrejaquemavũ judĩovare caivũ jipocamia. Ʋbenita caride ɯ meadaiyũbi judĩova ǎnevũre mǎre. <sup>17</sup>Jũmenijicui yǎvaiye mèque coreõvaivũbu aipe ɗarĩ Jũmenijicu “Boropatebevũ muja ji jǎinore”, ɯi aiyede majare. Jũmenijicu yõpe ɗacaibi ina Jesũre ju aivũre. Cũinǎjǎravũ ne jǎpiaiyede ɯi yǎva iyede ju adama ɯre. Aru no yõboi cǎijǎravũa ju adama ɯre cainũmũa. Javede yõpe arĩ, Jũmenijicu toivaicõjenejaquemavũ ɯi yǎva iyede: “Ina Jũmenijicui boropatebede ɗaimara mǎcavũ ne ju aiyẽ boje ɯre, apũrǎjivũbu cainũmũa. Que baru coatede ɗabemara mǎrajivũbu na Jũmenijicure jarũvarĩ”, toivaicõjenejaquemavũ Jũmenijicu.

**Pablo ɯi coyũino põeva ne ǎmeina ɗaiyede**

(Ef 4.17-18)

<sup>18</sup>Jũmenijicu cavarõ mearocacu jorojĩni jǎimi põevare ne pũedabe boje ɯre aru ne ǎmeina teiye boje apevũque. Que baru Jũmenijicu ñǎjine ɗaibi

náre ne árumetede ðaiye boje ne bajumia Jūmenijicui yávaiyede jāvene. <sup>19</sup>Pōeva coreóvarī buojadama apejīnore aipe ārojacure Jūmenijicure. Ūvacari jáðovaimi náre aipe coreóvarī buojarājivure aipe ārojacure ūre. Que teni cuedaibi náre, ne coreóvarājiyepe ayu ūre. <sup>20</sup>Jūmenijicure űame buojarī jámema. Ūbenita jáinomu űi paruède cūiméne. Que baru Jūmenijicui caiyede cuedaijāravu bácarōmata pu caride máre, caivu pōeva coreóvarī buojadama aipe ārojacure Jūmenijicure aru űi paruède máre, űi cuedaiye boje. Jūmenijicui ðaiye báquede jári, caivu coreóvaivubu ūre. Que baru űi pōevare űájine ðaiyede űame “Jūmenijicure coreóvabetecacu yu” arī buojabenama na.

<sup>21</sup>Pōeva coreóvadama űai Jūmenijicu paruçu baju cūcure. Ūbenita mearore jībenama ūre pūeno baju meacupe. Aru torojuede máre jībenama ūre. “Meacubu mu”, aru “Meavu mi ðacaiyede űujare”, ye abenama ūre. Quénora űbenina dāpiadama na. Aru jápiarī coreóvabenama na. Aru āme matuiye dāpiadama na ārumevupe. <sup>22</sup>“Me coreóvaivubu űuja”, ariduyama na. Ūbenita que aivuvacari ārumevu tede nuñama na. <sup>23</sup>Dajocaðama na ne mearore jīyede Jūmenijicure, űai cainumua cūcure. Quénora mearore jīyama na pēpeimarare, ne puruáque ðaimara mácavure, yópe yainājivure majapedeca, apevu űmuvape, aru apevu mījinape, apevu āmarape, aru apevu papeivupe paivure máre.

<sup>24</sup>Ne Jūmenijicure dajocaiye boje, Jūmenijicu máre dajocaibi náre, ne ðarājiyepe ayu yópe ne āmeina ðaiyuepe. Que teni pōeva cūyojarō vaiye báque boje urarō ijeteðe ðadama na ne bajure. <sup>25</sup>Ju aiyubenama iye yávaiyede jāvene Jūmenijicurā. Quénora ju adama borocuede. Mearore jīyama aru pueðadama Jūmenijicui cuedaiye báquede. Ūbenita Jūmenijicure, caiyede ðayu bácupe, pueðabenī mearore jībenama na. Aru ðarī jáðovamenama ne pueðaiyede ūre. Ūbenita mearore jīye jauvu Jūmenijicure caivu, aru cainumua. Quédecabu.

<sup>26</sup>Que baru Jūmenijicu dajocaibi náre, ne cūvarājiyepe ayu ne āmeina ðaiyuede aru ne cūyojarōre máre ðarājiyepe ayu. Que teni nomiva āmeina ðadama ne bajure. Dajocarī űmuvaque ne ðájuroede, ðadama ne bajumia apevu nomivaque. <sup>27</sup>Aru űmuva máre nopedeca āmeina ðadama ne bajure. Parurōreca űma apevu űmuvare. Dajocarī nomivaque ne ðájuroede, ðadama ne bajumia apevu űmuvaque. Cūyojarō bajubu nópe ne ðaino. Que baru ijeteðe ðadama na ne bajure, ne āmeina ðaiye boje.

<sup>28</sup>Pōeva majibenama Jūmenijicure. Ne Jūmenijicui yávaiyede jāvene coyuiyede jápiaiyube báque boje, Jūmenijicu dajocaibi náre, ne ðarājiyepe ayu yópe ne āmeina pūeno baju ðare nuiye urōpe, āmeno vainājiyepe ayu. <sup>29</sup>Quéðata cainumua āmeina baju ðadama na. Ámeina ðarī, apevure máre ðare ðaiyuma na. Jecuma na pūeno urarō ne cūvaede. Ámeina dāpiadama apevure, ðaiyurivu náre āmenore. Jorojīñama na. Pōevare boarī jaruvadama na. Jararī pare, áðamateiyuma na. Jujo vadama na. Ámeina ārojama ne baju. Yá vadama jápiabenoi āmenore apevui borore. <sup>30</sup>Coyuyama āmenore caivu ne jápiainoi apevui borore. Ámeina jáðama Jūmenijicure, aru Jūmenijicu máre náre āmeina jáimi. Ye baju āmema apevure. Dāpiadama ne baju “¿Meara márica apevu pūeno?” Aru, “Mearatamu űuja apevu pūeno”, adama na. Mamae āmeina teiyede cuedadama na. Ju abenama nébucvare. <sup>31</sup>Jápiarī majibenama na. Ðabenama nópe “Ðarājivu”, ne aipe báquepe. Apevure

jáiyubenama na, aru névu bajure, ne cūramicavure máre ubema na. Apevu ne ámeina ðaiyede náre, pueno bajura ðarí árumeteiyubenama na. Aru apévure máre cōmaje ároje jáiyubenama na. <sup>32</sup> Majima me bajureca Jūmenijicu ñájiçōjeñure ũi ðaicōjeique caivu yópe ámeina ðaivure. Coavacuyume náre ũre jaruvarí, ne ámeina teiye boje. Ubenita pueno urarō ðare nuñama na. Aru torojurivú me jáðama apavu ámeina teivure nápe ámeina ðaivure. Aru, “Me ðaðama”, adama na ne borore.

**Jūmenijicu ũi coyūino pōevare ne ðaiye méne o ámene**

(Mt 7.1; 16.27; Lc 6.37; 2 Ti 4.14)

**2** <sup>1</sup> Mú ayú baru apavu ne borore, “Ñájiye javvu náre ne ámeina teiye boje”, arí buojabevú “Ámeina ðabevú yu. Que baru ñájiye javbevú yure”. Mi coreóvayede apavu ne ámeina teiyede, mú máre pōcurecabu. Que baru napedeca ámeina ðayubu mú. Que baru “Apevure ñájiye javvu” mi aru, “Yure máre ñájiye javvu”, ainopebu no. <sup>2</sup> Majivú maja jáveque Jūmenijicu ñájine ðayure caivu ina nópe ámeina ðaivure. <sup>3</sup> Jūmenijicuí aru apévure “Ñájinajaramu muja muje ámeina teiye boje”, dápiabecacú mú, pōcurepe, mi nápe cūináturu teiyede Jūmenijicu abecuyure mure máre, “Ñájiçuyumu mú mi ámeina teiye boje”. Nópe jáve acuyume mure. Aru, “¿Ñájimecúva vaiquídica?” arí dápiabecacú mú, mi ámeina teiye boje. Jūmenijicu jáve ñájine ðacuyume mure máre. <sup>4</sup> Púedabecupe tebecacú mú Jūmenijicure, ũi pare mearo cūiméno boje. Jūmenijicu cōmaje ároje jáimi mure. Duibajíena napini coreíbi mure. Coreóvacacú mú jáve Jūmenijicu meacure múque, ũi ne boje mi jaruvayiyede mi ámeina teiyede. Mi oatuvaiye boje, mearo ðacacuyume mure. <sup>5</sup> Ubenita mi ámeume boje, ámpedabu mú. Ðaiyubevú mú yópe Jūmenijicuí urōpe. Ũre jápiaiyubevú aru mi ðaiyede máre oatuvaiyubevú mú. Que teni pueno ámeno baju ðayubu mú mi pueno urarō baju ñájiçuiyede Jūmenijicuí ñájiovaquijāravú baquinói pōevare, ne ámeina teiye boje. Dijāravú baquinói caivu pōevare Jūmenijicu jáçuyume cūináturu. Aru jorojīni jári, ñájine ðacuyume náre, ne ámeina teiye boje. <sup>6</sup> Dijāravú baquinói Jūmenijicu bojedacuyume caivu pōevare náre coapa yópe ne ðaiye báquepedeca ijāravure.

<sup>7</sup> Pōeva cainumua mearo ðaivu baru apévure, aru urivú baru Jūmenijicuí ðaquiyepe aivu náre meara baju yópe ũi urōpe, aru urivú baru Jūmenijicuí coyūquiyeyepe aivu náre “Mearo ðaivubu muja” ainore máre, aru urivú baru Jūmenijicuí apure ðaquiyepe aivu náre cainumua, ne coatebenajiyeyepe ayu ũre jaruvarí, nárecabu Jūmenijicuí cure ðaquimara jāravú cūiméjāravú baquinóre ũque. <sup>8</sup> Ubenita pōeva ne urōpe cainumua ðaivu baru Jūmenijicuí urō pueno, aru dápiabevú baru Jūmenijicure, jápiaiyubevú baru ũi yávaiyede jávene, aru ju abevú baru ũre, quéda ðaivu baru ámenore cainumua, ámeina ðarājivú, nárecabu Jūmenijicuí jorojīni ñájine ðaquimara pare. <sup>9</sup> Caivu ina pōeva ámeina ðaivu ñájinajarama aru chīorajarama, judíova mamarumure caivu jipocamia, aru judíova ámevú máre. <sup>10</sup> Ubenita caivu ina pōeva mearare, Jūmenijicu ðacuyume náre coapa meara baju yópe ũi urōpe. Aru coyūçuyume náre, “Mearo ðaivubu muja”. Aru cārijimevúva me cure ðacuyume náre máre, judíovare mamarumure caivu jipocamia, aru judíova ámevure máre.

<sup>11</sup>Que baru Jūmenijicu jáimi cūináturu caivu pōevare. <sup>12</sup>Judíova āmevu, cūvabevu Jūmenijicui đaicōjeiyede ūi coyuiye báquede Moisés bācure, bįjarājarama na coapa ne āmeina teiye boje, die đaicōjeiyede majibevūva. Que teni nācapūravu coatede đaimara mārājivubu Jūmenijicure jaruvārī, ne āmeina teiye boje. Ūbenita judíovare, cūvarivure Jūmenijicui đaicōjeiyede ūi coyuiye báquede Moisés bācure, Jūmenijicu nājine đacuyume náre coapa ne āmeina teiye boje, ne đabe boje yópe iye đaicōjeiye coyuiyepe. Que teni nācapūravu máre coatede đaimara mārājivubu Jūmenijicure jaruvārī, ne āmeina teiye boje. <sup>13</sup>Jūmenijicu abebi “Boropatebevu muja ji jáinore”, ina ūi đaicōjeiye báquede coyuiyede jápiaivu bācavureca đabevūva yópe ūi đaicōjeiye báquepe. Quénora Jūmenijicu ajebu “Boropatebevu muja ji jáinore”, caivu inare yópe ūi đaicōjeiye báquepe đájurorivure.

<sup>14</sup>Ina judíova āmevu cūvabema Jūmenijicui đaicōjeiye ūi coyuiye báquede Moisés bācure. Ūbenita apenumua đadama na yópe Jūmenijicui đaicōjeiye báquepe, Jūmenijicui cūedaiye báque boje náre ne mearo dāpiaiyeque. Que đarī jáđovadama na ne coreóvayede ne ūmei mearore Jūmenijicui jáiyede aru āmenore máre, cūvabevūvacari iye Jūmenijicui đaicōjeiyede ūi coyuiye báquede Moisés bācure. <sup>15</sup>Ne đaiyeque jáđovadama na ne coreóvayede ne ūmei aipe ārojaene Jūmenijicui đaicōjeiyede ūi coyuiye báquede Moisés bācure. Apenumua “Boropatebevu yu” aru apenumua “Boropateivu yu”, ne arī dāpiaiyeque jáđovadama na ne jāve coreóvayede diede. Aru ne dāpiaiyeque máre jáđovadama na diede. Que baru apenumua arī dāpiadama ne baju “Mearore đayubu yu”, aru apenumua “Āmenore đayubu yu”, arī dāpiadama na.

<sup>16</sup>Que teni iye Jūmenijicui bojedaiye pōevare ne đaiye báque boje vaiquýebu yópe ji yávaiye méne coyuiyepe Jūmenijicui nājiovaquijāravu baquinói pōevare, ne āmeina teiye boje. Dijāravu baquinói Jūmenijicu Jesucristore nājine đaicōjecuyume pōevare, ne yaveni āmeina dāpiaiye boje aru ne yaveni āmeina đaiye báque boje máre. Nopedeca coyuyubu yu Jūmenijicui yávaiye méne.

**Judíova ne đaiyurō yópe Jūmenijicui đaicōjeiyede  
ūi coyuiye báquepe Moisés bācure**

<sup>17</sup>Mu jacapūravu adavū “Judíovabu nūja”. Aru, “Jūmenijicu mearo đacacuyube nūjare, nūje cūvae boje ūi đaicōjeiyede ūi coyuiye báquede Moisés bācure”, arī dāpiadavū muja. Aru coyuyavū muja apevure, “Nūjarecabu Jūmenijicu jina. Ūi beoimaratamu nūja”. <sup>18</sup>Aru adavū muja, “Majidivubu Jūmenijicui urōre nūje đarājinore”. Aru adavū muja yópe: “Majidivubu mearore aru āmenore máre pōeva ne đarājinore. Que baru beoiye javu náre mearo bajure. Diede majidivubu, nūje bueiye boje Jūmenijicui đaicōjeiyede ūi coyuiye báquede Moisés bācure”, arī dāpiadavū muja. <sup>19</sup>Muja bueni buojariduyavū bueiyede jāvene ina majibevure, yópe nāi jānu nuvaiyepe jārī eabevure. Yópe arī, coyuyavū muja: “Apevure, majibevure, me majide đaivubu nūja. Náre bueivubu ne coreóvabede, ne jārī eabevupe mautebenaiyepe aivu”. Aru muja cadateni buojariduyavū ina mearore coreóvabevure, ne coreóvarājiyepe aivu diede, nópe nāi pēoinore cūvacu cadateiyepe nēminoi curivure. Yópe arī, coyuyavū muja: “Apevure

coreóvabevure me cadateivubu ñuja. Náre cadateivubu ne ñeminoi curivupe mautebenajiyeye aivu”.<sup>20</sup> Aru muja adavũ yópe: “Ñuja bueivubu ina majiéde eabevure, ne mearore majinajiyeye aivu. Aru bueivubu ina majibevure máre, ne coreóvarājiyeye aivu”, adavũ muja. Muja arĩ dápiadavũ muje cuvae boje Jūmenijicui daicōjeiyede ũi coyuiye báquede Moisés bácare me majidivu caiyede aru caiye muje majiéde jāvene.

<sup>21</sup> ¿Muja bueivu apevure, aipe teni dabevurũ muja yópe muje bueiyepe? Muja “Ñavamejara” aivuvacari apevure, muja máre ñavaðavu muja. <sup>22</sup> Muja “Dabejarã ãmeina mujemarebucuvare jaruvarĩ” aivuvacari apevure, muja máre ðaðav ũ ãmeina mujemarebucuvare jaruvarĩ. Muja ubevuvacari pēpeimarare, muja máre pueðabenamu Jūmenijicure aru ũ jiede máre. <sup>23</sup> “Ñuja judíova mearamu apevu pñeno, ñuje cuvae boje Jūmenijicui daicōjeiyede ũi coyuiye báquede Moisés bácare”, adavũ muja. Ubenita nópe aivuvacari pueðabevu ãmeina yávaðavũ muja Jūmenijicure, ju bevu ũi daicōjeiyede. <sup>24</sup> Javede yópe arĩ, Jūmenijicu toivaicōjenejaquemavu ũi yáva iyede: “Ina pōeva judíova ãmevu ãmeina yávaðama Jūmenijicure, muje ãmeina ðarĩ jáðovaiye boje”, arĩ toivaicōjenejaquemavu.

<sup>25</sup> Muje ju aru Jūmenijicui daicōjeiyede ũi coyuiye báquede Moisés bácare, cadateivu mujare muje ũmuva cajede buraicōjeiye, muje majinajiyeye aivu muja Jūmenijicu jinare. Ubenita muje ju abedu iye Jūmenijicui daicōjeiye báquede, ye cadatebevu mujare iye cajede buraicōjeiye. <sup>26</sup> Ina judíova ãmevu buraicōjemema ne cajede. Ubenita ne ðare yópe Jūmenijicui daicōjeiyede ũi coyuiye báquepe Moisés bácare, majibevuva diede, Jūmenijicu jāve jāimi náre cūnáturu ũi jāiyepe muja judíovare, muje cajede buraicōjeivupedeca. <sup>27</sup> Mujacapūravu cavarivubu iye Jūmenijicui daicōjeiyede ũi coyuiye báquede Moisés bácare, aru buraicōjeivubu máre muje cajede. Ubenita ye ðabevu muja yópe Jūmenijicui daicōjeiyepe. Qué nora ju abevu diede. Que baru apevu, judíova ãmevu, ne cajede buraicōjemevureca, ne ðaiyede yópe Jūmenijicui daicōjeiye ũi coyuiye báquepe Moisés bácare, ne boro coyurĩ aðaimara márajivubu muja, judíova, Jūmenijicui ñájine ðarājiyeye aivu mujare, muje ju abe boje die daicōjeiyede.

<sup>28</sup> Ina pōeva aivu baru “Yábu judíovacacu, mearore jývu Jūmenijicure”, caivu ina judíova baju ãmema na. Aru ina ne cajede buraicōjeivu, Jūmenijicu jina tenajiye boje, caivu ina máre judíova baju ãmeni, Jūmenijicu jina ãmema na. <sup>29</sup> Ubenita ina pōeva mearore jývu Jūmenijicure judíova bajupe ju aðama Jūmenijicure ne ũmei. Ina pōeva Jūmenijicui daicōjeiyepe buraicōjeivu ne cajede, caivu ina judíova baju ãmema na. Ubenita ina pōevare Jūmenijicui Espíritu oatvacayube ne ũmene, ðacuyu náre Jūmenijicu jinava. Nárecabu judíova baju. Que baru nárecabu mearore buojarĩ jývu Jūmenijicure jāve, ũi cadateiye boje. Ne baju ðaiyeque buojobema jývu mearore Jūmenijicure.

**3** <sup>1-2</sup> Aru apecu ũi aru yure: “Caivu majidivubu ina judíovare Jūmenijicui beoimara mácavure. ¿Mi dápiaru, ina judíova meari apevu pñeno aru ne cajede buraicōjeiye cadatebedi náre?” yópe arĩ, coyujebu yu: “Júju. Yópe ayubuicu yu. Pōecu judíovacacu baru, pare meavu ũre. Aru cajede buraicōjeiye pare cadateivu judíovare, ne nópe jáðovaiye boje Jūmenijicu jinare. Mamarumure Jūmenijicu jídejaquemavu judíovare ũi yáva iyede, maje ju arĩ, aru buení apevure, meaðarĩ corenajiyepe ayu diede”. Que

ajebru yu. <sup>3-4</sup> Ëbenita apecu ùi aru yure: “Apevu judíova ju abema Jūmenijicui yáviyede. ¿Ne ju abe boje, ðabecuyuba Jūmenijicu nópe ùi aiyé báquepedeca?” yópe arí, coyujebu yu: “¡Bi, ye que ámevu! ¡Aipinumu vaibéjaróri nópe! Jūmenijicu jáve ðacuyume yópe ùi aiyé báquepedeca. Caivu pōeva ne borocuru, Jūmenijicucapūravu cainumua borocubecube ù”. Javede yópe arí, toivaicōjenejaquemavu Jūmenijicu ùi yáviyede:

Mi ñájine ðaiyede yure ji ju abe boje mure, apevu jáivu aipe ðarí  
ñájine ðayure yure, pueðarí mure arājarama na mi borore:  
“Ðaibi yópe ùi aiyé báquepedeca majare. Borocucu ámemi ù”, arí  
toivaicōjenejaquemavu.

<sup>5</sup> ¿Aru apecu ùi aru yure: “Maja judíova maje ðabede yópe Jūmenijicui ðaicōjeiye báquepe majare, jáðovaivubu Jūmenijicucapūravure pueno meacu bajure ùi jáve ðaiyede yópe ùi aiyé báquepedeca cainumua, mearo ðayure pōeva ne mearo ðabede”, aipe aji yu? ¿Aji yópe apevu pōeva ne aiyepé, “Jūmenijicucapūravu jorojini jári, ñájine ðayu baru majare, judíovare, ùi ñájiovaquijāravu baquinói pōevare, ne ámeina teiye boje, ámenore ðayu bájebu ù”? <sup>6</sup> ¡Bi, ye que ámevu! ¡Aipinumu vaibéjaróri nópe! Jáve maru no, Jūmenijicu ye ñájine ðarí buojabejebu ijāravucacure cūinácura yópe ùi ámeina teiypedeca. <sup>7</sup> Cūinácu pōecu ùi jínouque mearore pēpeimarare ùi coreóvare ðaru pōevare urarō baju Jūmenijicu meacure caivu pueno, jáve Jūmenijicu ñájine ðacuyume úre, ùi que ðaiye boje. <sup>8</sup> Que baru maje ámeina ðaiyede maje coreóvare ðaru Jūmenijicure pueno meacu bajure, apevu pōeva yópe adama: “Ámeina ðarājarevu, Jūmenijicu ùi jáðovaquiepe aivu majare meacu bajure caivu pueno”, adama na. Apevu pōeva boro coyurí adaríduyama yure, ji nópe aiyé boje. Que aivu, borocuma yure. Jūmenijicu ñájine ðacuyume ina borocurivure yópe náre ñájine ðaiye jauépe, ne que aiyé báque boje.

#### **Caivu pōeva maje boropateino maje ámeina teiye boje**

(Gá 2.16)

<sup>9</sup> ¿Mearama maja judíova apevu pueno Jūmenijicui jáinore? ¡Que ámevu! Jave jári coreóvaivubu judíovare aru judíova ámevure máre, caivu cūináturu ámeina teivure. Caivu ijāravucavu maje ámeina ðaiyue boje cōjeimarape curivubu. <sup>10</sup> Yópe arí javede Jūmenijicu toivaicōjenejaquemavu ùi yáviyede: Pōecu cubebi meacu Jūmenijicui jáinore. Ye cūinácu páyu cubebi.

<sup>11</sup> Caivu pōeva coreóvabenama mearore. Aru caivu pōeva Jūmenijicu jina máre teiyubenama. <sup>12</sup> Caivu pōeva ðajocaðama Jūmenijicure, árumeteda úre. Mamatedama caivu cūináturu. Ye cōmaje ároje jámeni apevure caðatebenama náre. Ñame ðabenama mearore. Ye cūinácu páyu cubebi. <sup>13</sup> Ne jijecamu yópe pōetōcu voitōcupebu. Que baru ne yáviyeque jorojine ðaðama Jūmenijicure. Borocurivu yávaðama apevure, jujoarājivu. Ne yáviye yópe áðai jímape paiyebu. Que baru ne yáviyeque ámetede ðaðama apevure. <sup>14</sup> Ámeina ðarí yávaðama apevure, ijivu ne yáviye. <sup>15</sup> Que baru cārijina boarí jaruvaiyurivu pōevare. <sup>16</sup> Ári ne nuinoi ñájine ðaðama pōevare, aru mamatede ðaðama, aru chíore ðaðama náre. <sup>17</sup> Torojure ðabeni aru cārijine ðaðama pōevare.

<sup>18</sup> Ye cūinájino quíjinoreca puedabenama Jūmenijicure máre, arí toivaicōjenejaquemavu.

<sup>19</sup> Majidivubu maja caiye iye Jūmenijicui daicōjeiyede ūi coyuiye báquede Moisés bácure toivacaino mácarōre caivu maja judíovare, maje majinaiyepe ayu majare máre āmeina teivure. Caivu bi arājarama Jūmenijicui jáinoi ūi nájiovaquijāravu baquinói pōevare, ne majié boje nájíye jaurōre náre, ne đabe báque boje yópe Jūmenijicui daicōjeiye báquepe. <sup>20</sup> Iye daicōjeiyeque űame boropatebema Jūmenijicui jáinore. Quénora iye daicōjeiyeque pōeva coreóvaivubu caivure āmena matuiyede.

**Jūmenijicu ūi jáino pōevare boropatebevupe ne ju aiyede Jesucristore**

(Gá 2.16; 3.20)

<sup>21</sup> Ūbenita caride Jūmenijicu coreóvare đabi majare aipe đarí coyurí buojayure pōevare “Boropatebevu muja ji jáinore”, Jesucristoi đaiye báque boje. Aru yópe đacaibi majare ūi daicōjeiye báquede đabecuva. Ūbenita Jūmenijicui daicōjeiyede ūi coyuiye báquede Moisés bácure aru ina Jūmenijicui yávaiyede coyucaipōeva mácavu ne toivaiye báquede máre javede coyurejaquemavu aipe đacuyure Jūmenijicu diede. <sup>22</sup> Jūmenijicu coyuii pōevare “Boropatebevu muja ji jáinore”, ne ju aiyede Jesucristore. Caivu pōeva cūináturutam. Que baru Jūmenijicu nópe coyuii caivure Jesucristore ju aivure.

<sup>23</sup> Maja caivu pōeva āmene đaivubu maja. Que baru nópe đaivure Jūmenijicu “Boropatebevu muja”, abecube majare, maje đabe boje yópe ūi urōpe. <sup>24</sup> Ūbenita Jūmenijicurecabe pueno meacu baju. Que baru jýyube mearore bojecubeda. Que teni coyuii “Boropatebevu muja ji jáinore” caivu majare, maje Jesucristore ju aiyede. Nópe bojecubeno đarí, Jesús nájine đabede đabi majare, maje āmeina teiye boje yópe pōecu ūi yebacacure bojedarí iyepe, ūi dajocaquiyepes ayu ūi memeino āmeno baju b́acarōre.

<sup>25</sup> Jūmenijicu jorojini jáimi maje āmeina teiyede. Que baru dajocacuyy ūi jorojiyede, darorejaquemavu Jesucristore, ūi nájiquiyepes ayu pōeva ne āmeina teiye boje. Que baru Jesucristo yaidéjaquemavu maje yaijuroede. Que teni ūi jiveque bojedarejaquemavu pōevare ne āmeina teiyede. Jesús ūi yaiye báque boje, Jūmenijicucapúravu ārumeteibi maje āmeina teiyede caivu maja Jesucristore ju aivure. Jūmenijicu yópe vaidé đarejaquemavu, jáđovacuyy aipe đarí coyurí buojayy pōevare “Boropatebevu muja ji jáinore”.

Jipocamia Jūmenijicu majidejaquemavu darocuyy Jesucristore, ūi bojedaquiyepes ayu pōeva ne āmeina teiyede. Que baru Jūmenijicu napinejaquemavu pōeva ne āmeina đaiyede. Yópe nájine đabecuyupe vaidéjaquemavu ne āmeina teiyede. <sup>26</sup> Ūbenita caride Jūmenijicu quéda vaibébi pōeva ne āmeina teiyede. Quénora āmeina teiyede bojedaii ū, jáđovacuyy pōevare boropatebevure ūi jáinoi. Que teni Jūmenijicu coreóvare đabi ūi đaino pueno mearo bajure, “Boropatebevu” ayu caivu Jesucristore ju aivure.

<sup>27</sup> ¿Caride “Boropatebevu maja”, arí majidi maja, maje d́apiaru? Nópe arí majibevu maja. ¿Aipe teni diede nópe arí majibedi maja? ¿Jūmenijicui daicōjeiyepe đarí cōmajidu, “Boropatebevu” abecuyuba Jūmenijicu majare? ¡Que āmevu! Maja đarí buojabevu yópe caiye Jūmenijicui daicōjeiyepe

cainumua. Ûbenita pœecu ùi ju aru Jesucristore, Jûmenijicuvacari boropatebede ðacuyme ùre ùi jáinoi. <sup>28</sup> Pœecu cubebi Jûmenijicu “Boropatebecubu mu” ùi aimu, Jûmenijicui ðaicôjeiyede ðaiye boje. Quénora caivu pœeva ju aivure Jesucristore, “Boropatebevû muja ji jáinore” aibi Jûmenijicu. Que baru ácu pœecu cubebi “Meacutamu yu” ayu.

<sup>29</sup> ¿Dápiavurû muja Jûmenijicu ucure judíova quévura ù jinava? Jáve ánevû no. Jûmenijicu ubi judíovare aru judíova ánevure máre ù jinava. <sup>30</sup> Cûinácurebe Jûmenijicu. Que baru Jûmenijicu coyûibi judíovare “Boropatebevû muja ji jáinore”, maje ju aiyede Jesucristore. Aru quédeca coyûibi judíova ánevure máre “Boropatebevû muja ji jáinore”, ne ju aiyede Jesucristore. Que teni Jûmenijicurecabe coyûyu caivu majare “Boropatebevû muja”, maje ju aiyede ùre. <sup>31</sup> Dinumu, ¿coyûivaba maja pœevare ne ðajocarâjiyepe aivu Jûmenijicui ðaicôjeiyede ùi coyûiye báquede Moisés bácare, Jûmenijicui coyûiye boje maja boropatebevure maje ju aiyede Jesucristore? ¡Bi, ye que ánevû! ¡Aipinumu vaibéjarôri nópe! Quénora caride maje ju aye boje Jesucristore pueno baju ðaiyurivûbu maja yópe Jûmenijicui ðaicôjeiye báquepe.

#### Abraham mácu ðarí jáðovaino mácarô

(Gá 3.6)

**4** <sup>1</sup> Caride mujare coyûquijivu yu aipe Jûmenijicui ðaiye báquede javede maja judíova majeñecu mácare, ùi ámiá Abraham. <sup>2</sup> Jûmenijicu ùi coyûru Abraham mácare, “Boropatebecubu mu ji jáinore”, ù mácu mearo ðaiye báque boje, Abraham mácucapûravû coyûyu buojajebu, “Yávacari mearo ðaivu ji bajuma”. Ûbenita ñame nópe arí buojabema Jûmenijicui jáinore. <sup>3</sup> Aru yópe arí, Jûmenijicu toivaicôjenejaquemavu ùi yáva iyede: “Abraham ju arejaquemavu Jûmenijicure. Que baru Jûmenijicu coyûrejaquemavu ùre, ‘Boropatebecubu mu ji jáinore’, ùi ju aye báque boje Jûmenijicure”, arí toivaicôjenejaquemavu.

<sup>4</sup> Nai jabocu ùi bojedaiyede ùre memecaipœecure ùi memecaiye boje, pœecu cubebi “Bojecubeda jínomu no” ayu. Quénora caivu majidivûbu bojedaiye jaurôre nai memecaipœecure. <sup>5</sup> Ûbenita ina pœeva eaiyûbevure boropatebenore Jûmenijicui jáinore ne mearo ðaiyeque, “ ‘Boropatebevû muja’, arí coyûcuyme Jûmenijicu ñujare, ñuje ðaiye boje”, arí dápiabenama na. Quénora “Ñuja ju aivûbu Jûmenijicure, ñai coyûyure pœeva boropatebevure ne ju aiyede ùre”, arí dápiadama. Pœeva nópe dápiavû, ye ne ðabedeca mearore, Jûmenijicucapûravû, pœevare ucu, coyûibi “Boropatebevû muja ji jáinore”, ne ju aiyede ùre.

<sup>6</sup> Nopedeca David bácu arí toivarejaquemavu nai pœecure Jûmenijicui torojure ðainore ðabecureca mearore Jûmenijicu “Boropatebecubu mu ji jáinore”, ùi ainore. Yópe arí, Jûmenijicu David bácare toivaicôjenejaquemavu ùi yáva iyede:

<sup>7</sup> Ina jáve torojurivure, náreca Jûmenijicu árumeteibi caiye ne ju abe báquede ùi ðaicôjeiyepe, aru jámemi ne ámeina teiyede máre. <sup>8</sup> Aru nai jáve torojucure, úreca Jûmenijicu ùi ámeina teiyede coyûrí ñájine ðabecube, arí toivarejaquemavu David bácu.

Que arí, “Jûmenijicu ñájine ðabecuyume náre ne ámeina teiye boje”, aiyurômu.

<sup>9</sup> ¿Aru judíova cūinávava torojurivū buojaidi yópe iye David bácuí coyuiye báquepe? ¡Que ámevu! Judíova ámevu máre nopedeca jáve torojurí buojađama na. Dápiajarā cojedeca Abraham mácure. Jave coyuivu yu mujare iye Jūmenijicui toivaicōjeiye báquede ũi yávaiyede: “Abraham ju arejaquemavu Jūmenijicure. Que baru Jūmenijicu coyurejaquemavu ũre, ‘Boropatebecubu mu ji jáinore’ ”. <sup>10</sup> ¿Aipiyeđe nópe yávarejaquemari Jūmenijicu Abraham mácure? ¿Jave buraicōjenejaquemari Abraham mácu ũi cajede dinumure? Bĩ, ũi mácu buraicōjemenejaquemavu ũi cajede cāreja. Jūmenijicu nópe yávarejaquemavu ũi mácure ũi cajede buraicōjequiye jipocamia. <sup>11</sup> Que baru Jūmenijicu nópe yávarĩburu yóboi, Abraham mácu buraicōjenejaquemavu ũi baju dicajede. Aru ũi yópe buraicōjeiye báque jáđovaiye barejaquémavu ũre, ũi majiquiyepe ayu ũi mácu Jūmenijicui coyuivu mácu boropatebecure ũi jáinoi, Abraham mácu ju aiyē boje Jūmenijicure.

Que teni caivu ne cajede buraicōjemenvava ju aivure Jūmenijicure, ũi coyuiquepe aivu náre boropatebevure ũi jáinoi, Jūmenijicu Abraham mácure tede đarejaquemavu néñecupe páyu. <sup>12</sup> Aru ũi mácu máre majeñecu mácu barejaquémavu maja cajede buraicōjeivu bácvu ju aivure Jūmenijicure. Ũbenita majeñecu mácu ámenejaquemavu, maje cajede buraicōjeiye báque boje. Quénora majeñecu mácu barejaquémavu maje ju aiyē boje Jūmenijicure, nopedeca majeñecu mácu Abraham mácu ũi cūepedeca ju ayu Jūmenijicure ũi cajede buraicōjequiye jipocamia.

**Boropatebeno Jūmenijicu “Yópe đacacuyumu mure”, ũi aino mácarō  
Abraham mácure  
(Gá 3.7, 18, 29)**

<sup>13</sup> Javede Jūmenijicu arejaquemavu Abraham mácure yópe: “Mure aru mipāramena mārājivure mearo đacacuyumu yu. Mipāramena mārājivure jícuyumu yu ijaravure, ne cūvarājiyepe ayu caivu ijaravucavure”, arejaquemavu Jūmenijicu Abraham mácure. Ũbenita Jūmenijicu yópe abedejaquemavu Abraham mácu đaiye báque boje, yópe ũi đaicōjeiyede ũi coyuiye báquepe Moisés bácu. Quénora Jūmenijicu yópe arejaquemavu Abraham mácu ju aiyē báquede ũre, coyucuyu ũi mácure “Boropatebecubu mu ji jáinore”. Que teni Jūmenijicu mearo đacacuyu barejaquémavu ũi mácure aru caivu apenvure máre ũre ju aivure. <sup>14</sup> Ũbenita Jūmenijicui jĩdu ijaravure ina ũi đaicōjeiyede ũi coyuiye báquede Moisés bácu cūvarivure, ne cūvarājiyepe ayu diede, ye baju ámejebu pōeva ne ju aiyē Jūmenijicure aru ye baju ámejebu Jūmenijicu “Yópe mearo đacacuyumu”, ũi aiyē báque máre. <sup>15</sup> Jūmenijicui đaicōjeiye ũi coyuiye báqueque Moisés bácu coyubedejaquemavu “Yópe mearo đacacuyumu”, ũi aiyē báquede. Jūmenijicui đaicōjeiye ũi coyuiye báqueque Moisés bácu jorojĩni jări, nājine đayube pōevare, ne vainĩ turĩ đaiye boje diede. Ũbenita Jūmenijicui đaicōjeiye ũi coyuiye báque Moisés bácu cubedu, iyede vainĩ turĩ đaiye máre cubejebu.

<sup>16</sup> Abraham mácu ju aiyē báquede Jūmenijicure, Jūmenijicu arejaquemavu ũi mácure, “Boropatebecubu mu ji jáinore”. Que teni jáđovarejaquemavu “Yópe mearo đacacuyumu”, ũi aiyē báquede, mearo đacaiye bojecubede jáve, caivu Abraham mácu pāramena mārājivure. Jūmenijicu nópe đarejaquemavu

úi meacu baju boje. Aru Jūmenijicu jāve đacuyume yópe úi aije báquepedeca. Abraham mácuí pāramena mārāživubu Jūmenijicui đaicōjeiyede úi coyuiye báquede Moisés bácure đabevu. Quénora Abraham mácuí pāramena mārāživubu ju aivu Jūmenijicure, yópe Abraham mácuí ju aije báquepedeca úre. Que baru pōeva Jūmenijicui đaicōjeiyede cūvarivure aru pōeva diede cūvabevure máre, caivu maja Jūmenijicure ju aivure, majeñecu mácupe páyu barejaquémavu Abraham mácu. <sup>17</sup>Yópe arī, Jūmenijicu toivaicōjenejaquemavu apecure úi yávaiyede: “Yū obediyauboačavu néñecu macuyúre đacuyumu yu mure”, arejaquemavu Jūmenijicu Abraham mácure. Que baru Jūmenijicui nópe aije boje, ñai Abraham mácuí ju aimu “Yópe đacacuyumu”, úi aino mácārō bojecurōtamu. Jūmenijicu nacovaimi yaivu bācavure yainore jaruvarī, ne apurājiyepe ayu cojedeca. Aru Jūmenijicu cuedaibi úi đaicōjeieque no jipocai cube báquede.

<sup>18</sup>Nópe pōeva ne dāpiayepe, Jūmenijicui aije báque Abraham mácure ye buojabequiye barejaquémavu. Ubenita Abraham mácučapūravu ju arī Jūmenijicure napini coredejaquemavu. Que teni obediyauboačavu néñecu mácupe páyu buojarejaquemavu ũ mácu. Jūmenijicu, yópe arī, toivaicōjenejaquemavu apecure úi yávaiyede: “Obedivu tenajarama na mipāramena mārāživu”, arejaquemavu Jūmenijicu Abraham mácure.

<sup>19</sup>Dinumu Abraham mácu pare bucucu barejaquémavu. Quíjino bajura jaurejavūya cien paiujua úi cūvaquino. Aru úi juedocūvajurorōre juedocūvarī buojabecu úi baju yaiyú bācuí bajupe cūvarejaquemavu Abraham mácu. Aru jímarepaco báco, Sara báco, máre bucūco barejaquémavu. Que baru juedoearī buojabedejaquemavu ō máco. Ubenita Jūmenijicure úi ju aije parubetebedejaquemavu. Quéda cainumua ju arejaquemavu Jūmenijicure. <sup>20</sup>Abraham mácu đajocabedejaquemavu cainumua úi ju aiyede Jūmenijicure. Ye “Úi aije báquepe yure Jūmenijicu đarī buojabecube”, arī dāpiabedejaquemavu ũ mácu. Quénora úi ju aije boje Jūmenijicure, parucu đarejaquemavu ũ mácure, úi juedocūvaquiyepe ayu. Aru parucu teni úi ũmei cainumua, “Parucu bajubu mu”, ávarejaquemavu ũ mácu Jūmenijicure. <sup>21</sup>Que baru úi baju arī dāpiarejaquemavu parurōreca, “Jūmenijicu jāve buojaibi yure đacayu yópe úi aije báquepedeca”, ávarejaquemavu Abraham mácu. <sup>22</sup>Que baru, “Boropatebecubu mu ji jáinore”, arī coyurejaquemavu Jūmenijicu Abraham mácure, úi ju aiyede úre.

<sup>23</sup>Ubenita Jūmenijicu toivaicōjemenejaquemavu “Boropatebecubu mu ji jáinore”, úi aije báquede Abraham mácure boje quécura. <sup>24</sup>Quénora Jūmenijicu toivaicōjenejaquemavu diede majare boje máre. Majare máre Jūmenijicu coyucuyume “Boropatebevu muja ji jáinore”, maje ju aiyede úre, Jesucristore, maje jabocure, nacovaimu mácure yainore jaruvarī. <sup>25</sup>Jūmenijicu yaidé đarejaquemavu Jesucristore majare boje, maje ámeina teiye boje. Aru Jūmenijicu coyurejaquemavu majare “Boropatebevu muja ji jáinore”, úi nacovaiye báque boje Jesúre yainore jaruvarī. Caiye diede ju aivubu maja.

#### Pōeva ne boropatebeno Jūmenijicui jáinore

**5** <sup>1</sup>Jūmenijicu coyuiibi majare “Boropatebevu muja ji jáinore”, maje ju aiyede úre. Aru cārijimevūva cure đaiibi majare maje jabocu

Jesucristo Jūmenijicuque. <sup>2</sup> Maje ju aiye boje Jesucristore, ũ cūvare ðaibi majare Jūmenijicui mearo ðacaiye bojecubede. Aru maja curivubu caride Jūmenijicui mearo ðacaiye bojecubeque. Que baru torojurivubu maja maje ũmei, maje coreóvaiye boje cūinájāravu baquinói Jūmenijicu acuyure majare “Mujarecabu yópe ji ũrópe”. Aru nájine ðabecube majare cojedeca. <sup>3</sup> Aru maja máre torojurivubu maje ũmei maje nájíyede, maje coreóvaiye boje pñeno ũrarō napinajivure maje nájíye boje. <sup>4</sup> Aru torojurivubu maje ũmei maje napiye boje, maje coreóvaiye boje Jūmenijicu cadateyure majare maje nájíyede cainumua. Que baru napini coreivubu Jūmenijicure jidubevuva. <sup>5</sup> Maje napini coreiyede Jūmenijicui mearo ðacaquiyede majare, cūyebenamu maja. Caride coyūquijivū mujare aipe ðarī majidivure cūyebenajivure. Jūmenijicu daroibi ñai Espírītu Santore ũi cūquiyepē ayu maje ũmei, ũi majide ðaquiyepe ayu majare Jūmenijicui ũmarare.

<sup>6</sup> Maja āmeno ðaivu, maje baju mearo ðaiye majibedeca, Cristocapūravu yaidéjaquemavu majare, maje ũbedeca Jūmenijicure. Jūmenijicui beojāravu bácarōi yaidéjaquemavu ũ mácu. <sup>7</sup> Ácu pōecu yayībēbi apēcu pōecure boje, mearo ðayure. Ácu pōecu cūejubi, jidubecūva yayīcū apēcu pōecu meacure boje, apēvure cadateyure. <sup>8</sup> Ūbenita Jūmenijicu jádovaimi majare aipe ũi ũrarō ũede majare, daroyu bácu Cristore, ũi yayīquīyepē ayu majare boje, maje āmeina teiyedeca cāreja. <sup>9</sup> Maja majivu Cristoī mearo ðacaiye báquede majare, yayíyū majare boje. Ūi jive meiyē báque boje, Jūmenijicu coyūibi majare “Boropatebevū muja ji jáinore”. Ūi nópe ũrarō mearo ðacaiye báque boje majare, maje āmeina teiyedeca cāreja, jáve majidivubu maja. Que baru pñeno ũrarō Cristoī mearo ðacaquiyede majare, maje nájímenajíyepē ayu ānijāravu Jūmenijicui nájiovaquijāravu baquinóre pōevare, ne āmeina teiyē boje.

<sup>10</sup> Majacapūravu maucūvarejaquemavu Jūmenijicure. Ūbenita Jūmenijicucapūravu cārijimene ðarejaquemavu majare, daroyu bácu mamacure ũi yayīquīyepē ayu majare boje. Que teni caride Jūmenijicui yóvaimaramu maja. Cristoī ũrarō mearo ðacaiye báque boje majare ũi yayiyede, jáve pñeno ũrarō mearo ðacacūyume majare caride, apūcu cojedeca. Maje cuede cūināvūpe maje jabocu Jesucristoque, meadacūyume majare Jūmenijicui jorojīyede jaruvārī. <sup>11</sup> Aru pñeno baju Jūmenijicu coyure ðaibi majare maje nájíyede, “Jāve torojurivubu maja Jūmenijicui jáinore”, maje jabocu Jesucristoī cārijimene ðaiye báque boje majare Jūmenijicuque. Que baru cūyebenajaramu maja maje napini coreiyede Jūmenijicure.

#### **Pablo ũi coyūino Adán mácu aru Cristo ne borore**

<sup>12</sup> Javede ñai ũmu mácu mamarūmūcacū bácu, ũi āmiá Adán, āmeina tedejaquemavu. Aru coatedejaquemavu ũ mácu Jūmenijicure jaruvārī, āmeina teni. Que baru caivu pōeva máre Adán mácu yóbocavu coatedama Jūmenijicure jaruvārī aru yayíama máre Adán mácu āmeina teiyē báque boje. <sup>13</sup> Que teni Jūmenijicui coyūquiyē jipocai ũi ðaicōjeiyede Moisés bácu, caivu ijāravūcavu āmeina teivū barejaquémavu. Dinūmure cāreja ũi ðaicōjeiyē cubede, Jūmenijicu corevabedejaquemavu pōevare ne āmeina teiyede. <sup>14</sup> Ūbenita caivu ijāravūcavu, Adán mácu yóbocavu coatedama Jūmenijicure jaruvārī, Adán mácu āmeina teiyē báque boje. Adán mácu

ðarejaquemavu Jūmenijicui ðaicōjemenore. Que baru coatedejquemavu Jūmenijicure jaruvarī. Aru caivu ūi yóbocavu, Jūmenijicui ðaicōjeiyede cuvabede ju abevu āmevuvacari, coatedejquemavu Jūmenijicure jaruvarī. Aru Adán mácu ðaiye báquepe páyureca barejaquénavu űai Jesucristo. Pōeva jacopuyama ne ðaiye báque bojede. Caivu pōevare Jūmenijicu jáimi āmeina teivupe, Adán mácu ju abeno mácarō boje. Nopedeca Jūmenijicu jáimi pōevare boropatebevupe, Cristoi ju aino mácarō boje.

<sup>15</sup> Ūbenita ina pucarā ūmva cūináturu āmema. Pōecu mamarumucacu, Adán mácu, ju abecu bácreca Jūmenijicure, Jūmenijicucapūravu urarō mearo ðacaibi pōevare. Jāve caivu pōeva coatedama Jūmenijicure jaruvarī, Adán mácu ju abeno mácarō boje. Ūbenita Jūmenijicu pūeno meacu bajutame. Que baru pūeno urarō mearo ðacaibi obedivu pōevare ūi mearo ðacaino mácarō bojecubenoque daroyu bácu Jesucristore, ūi meadaquiyepe ayu náre. Adán mácu ðaino mácarō āmedaivu pōevare. Ūbenita Cristoi ðaino mácarō meadaivu pōevare. Aru Cristoi ðaino mácarō mearo bajubu Adán mácu ðaino mácarō pūeno.

<sup>16</sup> Que baru Jūmenijicu mearo ðacaibi pōevare bojecubeda, Adán mácu ju abecu bácreca ūre. Adán mácu cūinára ūi ju abe boje, Jūmenijicu arejaquemavu ūi mácre, “Mu aru mipāramena mārjavu máre űájinajaramu, mi ju abe boje yure”. Ūbenita obedivu pōeva ju abevureca cainumua baju, Jūmenijicu aibi majare, “űájinajaramu muja, muje ju abe boje yure”, ūi pūeno meacu baju mearo ðacaiye boje. <sup>17</sup> Jāve cūinácu ūmu, Adán mácu, ūi ju abeno mácarō boje, caivu apevu pōeva máre coatedama Jūmenijicure jaruvarī. Ūbenita jāve baju cūinácu ūmu, Jesucristo, ūi ðaino mácarō boje, obedivu pōeva meatedama Jūmenijicue. Que baru caivu maja jacopūvu bácvu Jūmenijicui mearo ðacaino bojecubenore, maja ūi coyūimara mácavubu, “Boropatebev muja ji jáinore”. Jāravu cūiméjāravu baquinóre cuvārājaramu maja Jūmenijicue, cūinácu ūmu, Jesucristo, ūi ðaino mácarō boje.

<sup>18</sup> Que baru nópe cūinácu ūmu mácu cūinára ūi ju abeno mácarō boje, Jūmenijicure járe ðarejaquemavu caivu pōevare boropateivupe. Nopedeca cūinácu ūmu, Jesucristo, cūinára ūi mearo ðaino mácarō boje, Jūmenijicu jáimi pōevare caiyajuboacavure boropatebevupe, aru me apure ðaibi náre coapa. <sup>19</sup> Aru cūinácu ūmu mácu ūi vainí turī ju abe boje, caivu āmene ðaivu barejaquénavu. Nopedeca cūinácu ūmu, Jesucristo, ūi ðaiye boje yópe Jūmenijicui urōpe, boropatebevupe tede ðaibi obedivu pōevare Jūmenijicui jáinore.

<sup>20</sup> Ūbenita obediujua Adán mácu yóbore aru obediujua Cristoi daquiye jipocai, Jūmenijicu coyurejaquemavu ūi ðaicōjeiyede Moisés bácre, coreóvare ðacuy pōevare urarō āmeno ne ðaiyede. Que teni pūeno urarō ju abede nurejaquemavu na mácavu. Ūbenita pōevacapūravu ne urarō āmeno ðaiyedeca, Jūmenijicucapūravu, cōmaje āroje jáñu, pūeno urarō mearo baju ðacarejaquemavu na mácavure. <sup>21</sup> Que baru pōeva ne āmene ðaiyue parúetamu, ne coateiye boje Jūmenijicure jaruvarī. Nopedeca Jūmenijicui mearo ðacaiye obedivu pōevare pūeno baju parúetamu aru cuvare ðaivu jāravu cūiméjāravu baquinóre ūque, ūi jáiye boje obedivu pōevare boropatebevupe. Aru Jūmenijicu yópe mearo ðacaibi pōevare, maje jabocu Jesucristoi ðacaiye báque boje.

## Põeva ne cue Cristoque cūinávupe

(Gá 2.20; Col 2.12)

**6** <sup>1</sup>¿Maje ju aipe boje diede, aipe darājidi maja caride? ¿Pueno āmenore dare nuiye jauři, Jūmenijicui jáđovaquiyepa aivu ũi pueno urarō mearore? <sup>2</sup>¿Bi, ye que āmevu! ¿Aipinumu vaibéjarōři nópe! Majarecabu boarí jaruvaimara mácvupe paivu. Aru āmeno majare boarí jaruvayu bácvupe painotamu. Que baru āmeina teiye jaubevu majare. Aru “Dare nuivu baru āmenore me curājaramu maja Jūmenijicuque”, arí buojabevu maja. <sup>3</sup>Jāve majidivubu muja aipe teni jáđovaimara mácvu Jūmenijicure ocoque. Maje jáđovaiye báque Jūmenijicure ocoque apevure coreóvare đarejaquemavu maja curivure Jesucristoque cūinávupe. Iye maje nājijuroede maje āmeina teiye boje, Jūmenijicu nājine đarejaquemavu ũre majare boje. Ũre yaidé đayv, Jūmenijicu đajocarejaquemavu ũre cūinácva. <sup>4</sup>Maje jáđovaiyede Jūmenijicure ocoque, yaivu bácvupe barejaquemavu maja, yópe jaruvaimara mácvupe Jesucristoque pōe jaruvainoi, mamabaju cvarājivu ũque. Yópe vaidéjaquemavu Jesucristore. Majepacu Jūmenijicu ũi parué pueno mearoque nacovarejaquemavu ũ mácvure yainore jaruvarí, apucuyure cojedeca, maje ména curājiiyepa ayu caride Jesucristoque cūinávupe.

<sup>5</sup>Que baru maje yaivu bácvupe paiye boje ũque cūinávupe ũi yaiyede, jāve nacovaimaramu maja yainore jaruvarí ũque cūinávupe ũi apué mamaene. <sup>6</sup>Aru majidivubu maja maje cue báquede javede, Jesúsre ju arājiye jipocare. Cristo ũi yaiyede jocucujaravena bjarorejaquemavu maje āmeina đaiyue parué báquede. Jūmenijicu nópe đacarejaquemavu majare, maje đabenaijiyepa ayu maje āmeina đaiyuede yópe yebacavu ne jabocui cōjeiyede đaiyepa. <sup>7</sup>Ũbenita jabocu cubebi cōjeñu yaiyú bácvure. Nopedeca maje yaiye báque boje Cristoque, coatede đarejaquemavu majare, maje āmeina đaiyuede jaruvarí. <sup>8</sup>Maje majié boje maja yaivu bácvupe Cristoque ũi yaiyede, coavaimara mārājivubu maje āmeina đaiyuede jaruvarí. Nopedeca majidivubu maja curājivure me Jesucristoque, maje ju aipe boje Jūmenijicure caride aru cainumua. <sup>9</sup>Maja majidivubu Cristo nacajañu mácvure yainore jaruvarí. Yaibécube ũ cojedeca. Caride yaino buojabevu ũre yaiváino.

<sup>10</sup>Que baru Cristo yaidéjaquemavu cūinára, yaibécuyu cainumua, parubede đacuyu maje āmeina đaiyuede. Aru Jūmenijicui paruéque cubi, đaiyucu yópe Jūmenijicui urōpe. <sup>11</sup>Quédeca dápiajarā muja muje baju yópe: “Āmeina teiye parubebu, Jesucristoi đaiye báque boje. Que baru đaicōjemevu yure caride. Yu yaiyú bácvupe páyubu āmeina teiyeque. Ũbenita yu apucubu Jūmenijicuque, ũi parué boje. Yu cavu đayv yópe Jūmenijicui urōpe, cucu cūinávupe Jesucristoque”, arí dápiajarā muja.

<sup>12</sup>Āmeina đaiyuede đaicōjemejara muje bajure. Đaicōjeivu baru muje āmeina đaiyuede muje bajure, coatenajaramu muja Jūmenijicure jaruvarí. <sup>13</sup>Que baru đaicōjemejara muje āmeina đaiyuede muje bajure aru muje ũmene máre. Quénora đaicōjejara Jūmenijicure muje bajure aru muje ũmene. Nacajaivu bácvupe paivubu yainore jaruvarí, aprājivu cojedeca. Que baru Jūmenijicu matuiyeda cōjejacurí muje dápiaiye aru muje đaiyuede máre, mearore dare đaquiyepa aivu. <sup>14</sup>Muje āmeina đaiyuede đaicōjeiye jaubevu mujare. Jaubevu mujare máre muje đaiye yópe Jūmenijicui đaicōjeiyede ũi

coyuiye báquepe Moisés bácare. Ëbenita muja me curivubu cari, Jūmenijicui cure ðaiye boje mujare cūinávupe Jesucristoque, ũi urōpe ðarī. Nópe ðaibi Jūmenijicu ũi mearo ðacaiye boje bojecubeda.

**Pablo ũi jēvari coyuiño yebacateinora maja mearore ðaicōjeimarare**

<sup>15</sup> ¿Aipe arājidi maja? ¿Ámenore ðarājidi, majare ðaiye jaube boje yópe Jūmenijicui ðaicōjeiyepe ũi coyuiye báquede Moisés bácare? ¿O quéda Jūmenijicu pueno meacu baju ārūmeteidi maje āmeina teiyede? ¡Bi, ye que āmevu! ¡Aipinumu vaibéjarōri nópe! <sup>16</sup> Jāve majidivubu muja iyede. Yebacateivu baru apecure, mujare ju aie jauvu ũre. Quédeca muja ju aiyurivu baru muje āmeina ðaiyuede, maumena ðaiye jauquiyebu mujare diede. Aru coatenajaramu muja Jūmenijicure jaruvārī. Ëbenita muja ju aiyurivu baru Jūmenijicure, pueno baju ju arājaramu ũre. Que teni me curājaramu muja, ðaivu ũi urōpe. <sup>17</sup> Jipocamia muja ju arejaquemavu muje āmeina ðaiyuede yópe yebacavu ne ju aiepe ne jabocure. Ëbenita apejāravure muja ju arejaquemavu muje ũmei iye yāvaiyede jāvene, Jūmenijicui jápiarī eare ðaiyede mujare apevu ne bueiye. Que baru mearore jīnajarevu Jūmenijicure. <sup>18</sup> Ërecabe ðaicōjene ðabecu mujare muje āmeina ðaiyueque. Quénora mujamu ũi yebacavupe paivu, ðarājivu mearore.

<sup>19</sup> Yu coyuyubu mujare yópe muje majiēpe, muje jápiarājiyepe ayu ji bueiye. Jipocare muja yebacavupe barejaquémavu, ðarājivu āmenore. Āmeina ðaivu barejaquémavu muja. Aru ju abeni Jūmenijicui ðaicōjeiyede, ðaivu āmenejaquemavu muja ũi urōpe. Nopedeca caride yebacavupe tejarā muja, ðarājivu mearore. Mujare Jūmenijicui coavaiye boje āmeina ðaiyede jaruvārī, cainumua ðare nujara pueno mearore.

<sup>20</sup> Jipocamia muje āmeina ðaiyueque yebacavupe paivu barejaquémavu muja. Aru mearore ðaivu āmenejaquemavu dinumure. <sup>21</sup> Ye mearore eabedejaquemavu muja iye muje āmeina ðaiye báqueque. “Torøjurājivutamu ñuja”, arī dāpiarīdurejaquemavu. Ëbenita torøjubedejaquemavu muja. Que baru caride cuyevu muja, muje āmeina ðaiye báque boje, coatede ðaiye pōevare Jūmenijicure jaruvārī. <sup>22</sup> Ëbenita Jūmenijicu ðaicōjemene ðaibi mujare muje āmeina ðaiyueque. Quénora epei muja yópe ũi yebacavupe. Que teni cainumua memcayurivubu muja Jūmenijicure. Aru Jūmenijicui coatede ðaiye boje mujare muje āmeina ðaiyuede jaruvārī, pueno mearo ðare nuivubu muja, cuvārājivu jāravu cūiméjāravu baquinóre ũque. <sup>23</sup> Pōeva ne āmeina ðaiye bojebu ne coateino Jūmenijicure jaruvārī. Ëbenita ina curivu Jesucristoque cūinávupe, cuvama ne bojeva, Jūmenijicui mearo ðacaiye boje bojecubeda, ne cuede ũque caride aru cainumua.

**Pablo ũi jēvari coyuiño purubuoinora Jūmenijicui  
coyuiye báquede Moisés bácare**

**7** <sup>1</sup> Muja, jīvu, coreóvaivubu jāve iye ji coyuyuyede mujare caride. Coyuyujivu Jūmenijicui ðaicōjeiyede ũi coyuiye báquede Moisés bácare. Pōeva ðaicōjeimaramu dieque ne cuede cāreja ijārvu pū ne yayeta. <sup>2</sup> Que baru Jūmenijicui ðaicōjeiyede ũi coyuiye báque Moisés bácare yópe cūináco nomió purubuoðope paiyebu, cucodo jímarepacuque ũi yaibéde cāreja ũqueda. Ëbenita ũi yaidú, iye ðaicōjeiyede aipe ðabejebu ō dinumu.

<sup>3</sup>Que baru ico apescuque cūco baru jímarepacure jaruvārī ũi cuede cāreja, āmeina đajebu ō aru “āmeço” ajebu ōre. Ũbenita jímarepacu bācui yainíburu yóbore, cōjeimo āmejebu ō dínũmũ. Que baru purubuođo baru apescuque, āmeina đabejebu ō.

<sup>4</sup>Muja, jívũ, judíova, Jesúre ju aivũ, quédeca vaivũ mujare. Yópe ũmũ ũi cūvaepe jímarepacore, Jūmenijicui đaicōjeiye ũi coyuiye báque Moisés bācure cūvarejaquemavũ mujare. Que baru iye đaicōjeiyeque đaicōjeimara marejaquémavũ muja. Ũbenita Jesucristoi yaiyede, caivũ ina ũre ju arājivũ máre yaidėjaquemavũ ũque Jūmenijicui jáinore. Que teni muja máre yaivũ bācavũpe barejaquémavũ ũque. Que baru iye đaicōjeiyeque đaicōjeimara āmevũ muja caride. Yópe nomió, jímarepacu bācui yainíburu yóbore, ōi purubuoipe apescuque, nopedecca muja máre maje coateniburu yóbo yainore jaruvārī, yópe nacovaimarape paivũ curivũbu Jesucristoque cūinávũpe. Maje cuede Jesucristoque cūinávũpe, yopedecabu majare: Ũ majemarepacupe páyũ pueno mearore đarī nũre đabi majare, maje curājiyepe ayũ pueno mearo ũque. <sup>5</sup>Ũbenita maje curājiye jipocai Jesucristoque, maje āmeina đaiyue bāque boje, coatedejaquemavũ maja Jūmenijicure jaruvārī.

Yopedeca barejaquémavũ majare: Pueno āmenore đare nũrejaquemavũ maja, pueno baju coatenajivũ Jūmenijicure jaruvārī. Jūmenijicu đaicōjeme máque apejiene majare Moisés bācure ũi coyucōjeiye báqueque, yópe pueno ũrarō āmenore đare đarejaquemavũ maje āmeina đaiyuede. Que teni maja maje bajure đaicōjenejaquemavũ aru maje dápiaiyeđe máre, pueno baju āmeina tenajivũ. <sup>6</sup>Ũbenita caride đaicōjememaramu maja Jūmenijicui đaicōjeiye ũi coyuiye báqueque Moisés bācure. Jipocamia yebacavũpe barejaquémavũ maja. Diede ju aiyi jaurejaquemavũ majare. Ũbenita Jūmenijicure memecabevũbu maja javecarōque, yópe ũi đaicōjeiye ũi coyuiye báquepe Moisés bācure. Quénora Jūmenijicure memecavũbu maja mamaroque caride, yópe ñai Espíritu Santoi cure đaiyepe majare apué mamaeque. Que baru đavũbu yópe iye đaicōjeiyepe majare jaué cube boje, quénora maje đaiyue boje.

**Pablo “Āmeina tede đaiye cue ji baju” arī, ũi coyũino**

(Ro 13.9; Gá 5.17)

<sup>7</sup>¿Aipe coyuiye jauri majare caride? ¿Meameni Jūmenijicui đaicōjeiye ũi coyuiye báque Moisés bācure? Meame āmevũ. Nópe dápiaiye jaubevũ. Ũbenita ji đaicōjeiyede coreóvaquiye jipocare, coreóvabedejacacu yũ ji āmeina đaiyue cuede. Cūináro iye đaicōjeiycarō, “Āujimejacu apescu ũi cūvaeđe”, aino cubedu, āujimejebu yũ apevũ ne cūvaeđe. <sup>8</sup>Đaicōjeiye cubedu, maja āmeina đaiyubejebu. Ũbenita Jūmenijicui đaicōjeiye ũi coyuiye báque Moisés bācure coreóvare đarejaquemavũ yũre āujiye jaubede pōevare. Ũbenita no yóboi, ji coreóvaiye boje diede, ũrarōreca dápiaiī búrejacacu āujiyede. Ji āmeina đaiyue boje, jũjovaimũmu yũ. Que baru āujivũ yũ. <sup>9</sup>Apenũmũ iye đaicōjeiyede coreóvabecu, torojucu barejacacu ji baju. Coreóvabedejacacu boropateyũ ji baju. Ũbenita cūinájāravũ ji jápiaiyeđe yo đaicōjeino, “Āujimejara” ainore, ũre āmeina đaiyede búrejacacu yũ. Aru yaiyú bācupe coateyũ barejacacu Jūmenijicure jaruvārī.

<sup>10</sup>Jūmenijicu coyurĩdurejaquemavũ ũi đaicōjeiyede Moisés bācure, pōeva ju arī diede ne curājiyepe ayũ me ũque ijāravũre aru jāravũ

cūiméjāravu baquinóre máre. Ūbenita bíjare đarejaquemavu yure. Ji đabe báque boje yópe Jūmenijicui đaicōjeiyepe, coatede daimu marejacacu yu Jūmenijicure jaruvarī. <sup>11</sup> Ji coreóvaiye báque boje, cūináro ũi đaicōjeiycarō ũi coyuiye báque Moisés bácure, jujovaimupe tedejacacu yu ji ámeina đaiyue boje. Nurié dápibedejacacu yu. Ūbenita ji nópe đaiye báque boje, ju abedejacacu Jūmenijicure. Que teni ji ámeina đaiyue boje, coatedejacacu yu Jūmenijicure jaruvarī yaiyú bácupe no đaicōjeino cūinároque. <sup>12</sup> Que baru ámecubu yu. Ūbenita Jūmenijicui đaicōjeiye ũi coyuiye báque Moisés bácure ámeno cubetamu die. Que baru yo Jūmenijicui đaicōjeino cūináro máre ámeno cubenotamu. Pueno baju mearotamu, yópe Jūmenijicuvacari pueno baju meacupe. Aru pōeva nore mearore đaiyu torojurivabu.

<sup>13</sup> ¿No đaicōjeino mearo aru torojure đaino máre coatede đaidi yure Jūmenijicure jaruvarī yaiyú bácupe? ¡Bi, ye que ámevu! ¡Aipinumu vaibéjarōri nópe! Quénora ji baju ámeina đaiyue boje, coatedejacacu yu Jūmenijicure jaruvarī yaiyú bácupe. Ji ju abede no đaicōjeino mearore, jáđovaivu aipe pueno ámeno baju ji ámeina đaiyuede. Que teni Jūmenijicu coyurejaquemavu no đaicōjeinore, ji majiquiyepe ayu aipe pueno ámeno baju ji ámeina đaiyuede. <sup>14</sup> Maja judíova majidivabu Jūmenijicui đaicōjeiye ũi coyuiye báque Moisés bácure pueno mearo baju Jūmenijicui Espiritu Santoi epeiye báque boje diede aru ũ jie báque boje máre. Ūbenita yúcapūravu đaicōjeimumu ji ámeina đaiyueque. Aru ámecubu yu. Yúvacari đayubu yópe ji ámeina đaiyuepe. Yópe yebacacu, apecui bojedaimupe páyubu yu. Aru ji ámeina đaiyue ñai yebacacui jabocupe painomu. Que baru yurecabu đaicōjeimu ji ámeina đaiyueque.

<sup>15</sup> Jáve coreóvabevu aipe vaiyede yure aru ji đaiyede máre. Yópe ji đaiyuepe đabevu yu. Ūbenita iye bu ji jáiyube ji đaiye. <sup>16</sup> Ji đaiyubede đayu baru, jáđovaivu yu Jūmenijicui đaicōjeiyede méne. <sup>17</sup> Yúvacari đayubu iye áme ji đaiyede. Ūbenita que đabevu ji ue boje. Quénora ji ámeina đaiyue cue boje cāreja ji ũmei, diebu ámeina tede đaiye yure. <sup>18</sup> Yu majivu yure me cubede. Ji ũmei mearo cubevu. Yúvacari đaiyuvu méne. Ūbenita ye buojabevu đayu méne yópe ji urōpe. <sup>19</sup> Iye méne, ji đaiyuede, đabevu yu. Quénora iye ámene, ji đaiyubede, đaiyu yu. <sup>20</sup> Yu đayu baru ji đaiyubede, yu ámevu đayu diede. Quénora ji ámeina đaiyue cue cāreja ji ũmei, diedecabu ámeina tede đaiye yure.

<sup>21</sup> Que baru yu coreóvaivu aipe vaiyede yure cainumua. Méne đaiyuvu yu. Ūbenita quénora ji đaiyeque ámene eaiyu yu. <sup>22</sup> Torojurī uvu Jūmenijicui đaicōjeiyepe ji ũmei. Aru đaiyurīduivu yu diede. <sup>23</sup> Ūbenita ji ámeina đaiyueque đaicōjeimumu yu. Yópe boaipōeva ne maucuvărăđaiyepe ĩmaro jabocure, nopedeca ji ámeina đaiyue maucuvare đaiyu yure.

<sup>24</sup> Que baru jáve yu, pōecu, cōmaje ārojacubu yu. Ūrarōreca jauvu yure meadaipōecure, đaicōjeimu ámequiyepe aivu ji ámeina đaiyueque aru coateimu ámequiyepe aivu Jūmenijicure jaruvarī. <sup>25</sup> Yu mearore jýyubu Jūmenijicu pueno meacu bajure. Ūrecabe maje jabocu Jesucristore cadatede đayu yure. Yópe cuvū yu: Yúvacari Jūmenijicure ju aiyuvu yu. Aru ũre memecaiyuvu yu. Ūbenita nópe ji đaiyuepe đaiye majibevu yu cainumua. Quénora apenumua đaiyu yu yópe ji ámeina đaiyueque.

**Espíritu Santoi cure daino pöevare yópe üi uröpe**

(Mr 14.36; 1 Co 3.16; Gá 3.17-19; 4.5-7)

**8** <sup>1</sup>Caride maja Jesucristoque curivubu cünávupe. Que baru coatebenajaramu maja Jümenijicure jaruvarí, maje ámeina teiye boje. <sup>2</sup>Nai Espíritu Santoi daicöjeiye boje yure caride, cure daibi yure Jesucristoque cünávupe. Que baru jáve cure daibi yure. Que teni nai Espíritu Santo ji ámeina daiyuède daicöjemene daibi yure. Que baru ji baju ámeina daiyue coatede darí buojabevu yure Jümenijicure jaruvarí yaíyú bácupe. <sup>3</sup>Jümenijicuvacari dacarejaquemavu majare iye üi daicöjeiye üi coyuiye báque Moisés bácupe darí buojabede. Pöeva ne ámeina daiyuède üe boje, náva daicöjeiyepe darí buojabedejaquemavu ne majiéque. Que baru iye daicöjeiyeque Jümenijicu meadayu buojabedejaquemavu pöevare ne ámeina teiyede jaruvarí.

Übenita Jümenijicucapüravu darorejaquemavu mamacure, ü jicure, jaruvacacuyu pöeva ne ámeina daiyuède, maje curäjiyepe ayu ámeina daiyubevuva. Nai mamacu darejaquemavu ijärvuvi pöecupe, cuvacu üi baju yópe apevu pöeva, ámeina teivu ne bajupe. Übenita Jesucristocapüravu ye ámeina dabedejaquemavu cainumua. Übenita Jümenijicu nájine darejaquemavu mamacui bajure, üi bojedaquiyepes ayu maje ámeina daiyuède, meadacuyu majare maje ámeina teiyede jaruvarí. <sup>4</sup>Jümenijicu darejaquemavu nópe, dare dacuyu majare caiye üi daicöjeiyepe me. Majarecabu dabevu yópe maje baju uröpe. Übenita majarecabu daivu yópe nai Espíritu Santoi uröpe üi paruéque.

<sup>5</sup>Ina pöeva daivu yópe ne baju daiyue daicöjeiyepe ne majiéque máre, nácapüravu dápiadama ne baju uede. Übenita ina pöeva daivu yópe nai Espíritu Santoi daicöjeiyepe üi majiéque, nácapüravu dápiadama nai Espíritu Santoi uede. <sup>6</sup>Muja dápiarí daivu baru muje ümei uede, mujacapüravu jáve yaivu bácuvepaivubu, coateivu Jümenijicure jaruvarí. Übenita muja dápiarí daivu baru nai Espíritu Santoi uede, mujacapüravu jáve apürivu, cärijimena me curivubu muja Jümenijicuque. <sup>7</sup>Que baru nai pöecu dápiarí dayu baru üi baju uede, maucuvarí ju abebi Jümenijicure. Aru jáve ye daicöjeñu buojabebi Jümenijicure üi bajure máre. <sup>8</sup>Que baru ina pöeva daivu ne baju uede ne majiéque jáve Jümenijicure torojure darí buojabema na.

<sup>9</sup>Übenita mujavacari, nai Espíritu Santoi cue boje mujaque, muja dabevu yópe muje baju uröpe muje majiéque. Quénora daivubu muja yópe nai Espíritu Santoi uröpe üi majiéque. Ácu pöecu cuvabecu baru nai Espíritu Santore üque, Cristo jicu ámemi ü. <sup>10</sup>Übenita mujacapüravu curivubu Jesucristoque cünávupe. Aru nai Espíritu Santo apure daibi mujare. Muje baju coapa yópe yaivu bácuvepa coateivutamu muja muje ámeina daiyue boje. Übenita mujavacari apürivu me curivubu cärijimena Jümenijicuque “Boropatebevü muja ji jáinore”, üi arí coyuiye báque boje Jesucristoi dacaiyede mujare. <sup>11</sup>Aru Jümenijicu nai Espíritu Santore nacovare darejaquemavu Jesucristore yainore jaruvarí. Nai Espíritu Santoi cue boje mujaque, apure dacuyume muje bajuáre, muje cuväräjiyepe ayu mamaüme. Aru iye mamaümeque muja cuväräjaramu paruéde, daräjiyu no mearore yópe muje daiyuepe.

<sup>12</sup>Muja, jívu, que baru daiye javvu majare nai Espíritu Santoi majiéque, yópe üi uröpe. Daiye javbevü majare yópe maje baju uröpe maje majiéque.

<sup>13</sup> Muja ðaivu baru yópe maje baju urópe muje majiéque, jáve coatede ðaimaramu muja Jūmenijicure jaruvarī caride. Aru Jūmenijicu nājine ðacuyume mujare cainumua. Ūbenita muja ðajocaivu baru muje āmeina teiyede caride, aru muja ðaicōjemevu baru muje āmeina ðaiyuede muje bajure, ñai Espíritu Santoi cadateiyeque jáve me curivubu cārijimena Jūmenijicue.

<sup>14</sup> Caivu ina Jūmenijicui mára ðaivubu yópe Espíritu Santoi urópe, ūi jaboteimarape paivu. <sup>15</sup> Javede jidurivu barejaquémavu muja Jūmenijicure. Ūbenita ñai Espíritu Santo, Jūmenijicui daroimu mácu, yebacavupe tede ðabebi mujare yópe muje ðaicōjemenajiyeye ayu bedióva cojedeca muje āmeina ðaiyueque. Que baru jidure ðabebi ū mujare. Muja jidubevu coateiyede Jūmenijicure jaruvarī, muje āmeina teiye boje. Nópe vaibéquiye bu mujare. Quénora ñai Espíritu Santo majide ðaibi mujare, curājivure yópe Jūmenijicui urópe. Que ðayu ñai Espíritu Santo ūi majiéque “mu, jipacu”, arī coyure ðaibi majare Jūmenijicure. <sup>16</sup> Ñai Espíritu Santo cubi maje ūmei, majide ðacuyu majare Jūmenijicui mára jueðojīnape paivure. <sup>17</sup> Jūmenijicui maramu maja. Que baru jacopurājaramu ūre caiye iye Jūmenijicui mearo ðacaiyede, ūi jíquiyede ūi pōevare. Aru jacopurājaramu maja Jesucristoque iye Jūmenijicui jíquiyede ūre. Ūbenita Jesucristope ārojamevu maja cāreja. Que baru nājivubu Jesucristope ijāravui. Aru nājivu baru caride, jáve cūinājāravu baquinó meara baju barājāramu maja yópe Jūmenijicui urópe, Jesucristope. Aru Jūmenijicu “Mearamu muja”, arī coyucuyume majare.

#### **Jūmenijicui jáðovaquino ūi pōeva meara bajure**

(2 Co 5.2-4)

<sup>18</sup> Jáve majivu yu urarō mearore Jūmenijicu ðacacuyure majare, maje torojurājiyepe ayu maje ūmei ūi oatuvaquiyede majare yópe ūi urópe. Que baru ye baju āmevu majare maje nājiyede ijāravure, maje cuede yópe Jūmenijicui urópe ðaiye jaué boje cāreja. <sup>19</sup> Caivu Jūmenijicui cuedaimara napini coreivu, pare jáiyurivubu Jūmenijicui oatuvaquiyede caivu ūi mārare yópe ūi urópe, mamaūmeque meara baju. <sup>20</sup> Caiye iye Jūmenijicui cuedaiye báque “Yópe vaiquiyebu” ūi aiye báquedeca, vaibévu yópe ūi urópe. Caiye bíjare nuivu. Ūbenita ūi cuedaiye báque cūináro ye bíjabevu. Quénora Adán mácuī āmeina teni ūi ju abe báque boje Jūmenijicure, Jūmenijicu bíjaicōjenejaquemavu diede. Ūbenita cainumua āmeniduiyebu yópe. Quénora caivu Jūmenijicui cuedaimara napini coreivubu, Jūmenijicui meadaquiyeye aivu caiye iye ūi cuedaiye báquede yópe ūi aiye báquedeca.

<sup>21</sup> Caiye Jūmenijicui cuedaiye báque bíjare nuiye javvu javde aru caride máre, yópe yebacavure ne ðaiye jauépe ne jabocui ðaicōjeiyede. Ūbenita cūinājāravu baquinó Jūmenijicu ðajocare ðacuyume diede. Aru mamaro mearo ðacuyume ū caiyede. Quédeca urarō meara ðacuyume caivu ūi mārare. <sup>22</sup> Maja majidivubu javde pu caride máre caiye iye cuedaiye báque nājiyede yópe jueðocu pōteyure nājiyepe. <sup>23</sup> Aru maja máre cuvarivubu ñai Espíritu Santore, Jūmenijicui daroimu mácure majare, mamaramure maje ju arī buiyede Jesúre. Que baru majavacari napini coreivubu dijāravure, Jūmenijicui āmeina teiye cubede ðaquijāravu baquinóre majare coapa, maje curājiyepe Jūmenijicui mārava, yópe ūi urópe. <sup>24</sup> Jūmenijicu

meadarejaquemavu majare. Majare napini corede darī ūi daquiyede yópe ūi aiye báquepedeca, meadarejaquemavu majare. Ūbenita jáivu iye maje napini coreiyede, jáve napini coreiye ámevu die. Põecu cubebi napini coreyū iyede ūi jave jáiye báquede. <sup>25</sup>Ūbenita napini coreivu baru iye maje jámene cāreja, napini coreiye jaovu majare.

<sup>26</sup>Quédeca nai Espíritu Santo cadatecudayube majare, parubevure, maje mearore daiye majibe boje. Maje urarō majibe boje, jēniaiye jaurōre Jūmenijicure majibevu maja. Aru aipe darī jēniainore máre majibevu maja. Que baru nai Espíritu Santovacari, maje coyuiyuede majicu, jēniacaibi Jūmenijicure majare boje. Que teni ūme coturī, coyuiibi Jūmenijicure iye maje coyuiyuede, maje yávaiye majibeque. <sup>27</sup>Nai Espíritu Santo jēniacaibi Jūmenijicure parurōreca, cadatecyu Jūmenijicui pōevare yópe Jūmenijicui urōpe. Que baru Jūmenijicu, caivu pōeva ne dápiayede majicu, majibi Espíritu Santoi dápiari daiyuede.

**Cristo ūi cadateino caiye maje daiyede**

*(2 Co 3.18; Gá 4.19; Fil 3.10)*

<sup>28</sup>Maja majidivubu Jūmenijicure urivu baru, Jūmenijicu cadateyure majare cainumua. Jūmenijicu mearo dācaibi majare caiye vaiyede majare, ūi cutuimara mácavure. Aru javede, mamarumure, Jūmenijicu majidejaquemavu aipe ārojarivure dacuyū majare, ūi cutuimara mārājivure.

<sup>29</sup>Jipocamia Jūmenijicu beorejaquemavu ū jina mārājivure. Ūi beoimara mácavure Jūmenijicu epedējaquemavu, ūi mácupe paivu barājiyēpe ayū aru mamacu nēmamicupe páyu baquiyēpe ayū obedivu jēneboi. <sup>30</sup>Aru ūi epeimara mácavure Jūmenijicu cutuibi, ju arājiyēpe ayū ūi cutuiyede ū jina mārājivuva. Aru ūi cutuimara mácavure “Boropatebevu mūja ji jáinore”, arī coyuiibi náre Jūmenijicu. Aru ūi coyuimara mácavu boropatebevure Jūmenijicu cure daibi náre mearava yópe ūi urōpe.

<sup>31</sup>¿Aipe arājidi maja? Jūmenijicui cadateiye boje majare, ye baju ámevu apevu ne maucvarō majare. Põecu cubebi ámedarī buojayū maje ūmene. <sup>32</sup>Jūmenijicu jecubedejaquemavu mamacure, meadacuyū majare. Quénora jēni jicarejaquemavu ūre, ūi urarō nājiquiyēpe ayū majare boje. Que baru maje majié boje jīcayure mamacu cūinácure, ūi umure, majare boje, jáve majidivubu dacacuyure majare máre mearore quéda jecubeda. <sup>33-34</sup>Jūmenijicuvacari “Boropatebevu mūja ji jáinore”, arī coyurejaquemavu jave ūi beoimara mácavure. Que baru pōecu cubebi ámeina boro coyurī adarī buojayū majare. Aru pōecu cubebi coyurī buojayū majare nājiye jaurōre máre. Jesucristo, yaiyú bácu majare boje, nacovaimū mácū yainore jaruvarī, Jūmenijicui meapūravui cubi caride. Nai meapūravui cucu paruéde cuvabi. Nai Jesucristo parurōque jēniaimi Jūmenijicure majare boje. Que baru name ámeina boro coyurī adarī buojabema majare. <sup>35</sup>Ye coatede darī buojabevu majare Cristore, majare ucure, jaruvarī. Maja nājivu baru, aru chīoivu baru, aru ámeina yávaimara maru, aru ávué ijimara maru āiye cubedu, aru cuitótecaje cubedu, aru jidurivu baru jidojae boje, aru boarī jaruvaimara maru máre, caiye iye boje ye coatede daimara ámenajaramu maja Cristore jaruvarī. <sup>36</sup>Aru iye boaiye borore javede Jūmenijicu, yópe arī, toivaicōjenejaquemavu cūinácū ūi yávaiyede coyucaipõecu bácare:

Caijāravua boarí jaruvađama ņujacavure, ņuje mure űe boje.

Dápiadama ņujare curivure ne boarí jaruvarājimarape, yópe ne dápiayipe ovejavare ne nuvaimarare boainoi, arejaquemavu

Jūmenijicui yāvaiyede coyucaipōecu bácu Jūmenijicure.

<sup>37</sup> Ūbenita majacapūravu maje mauva ne āmeina đabemaramu. Quénora Jūmenijicu pueno meare đai bi majare ne āmeina đarīduiyedeca, űi űeque űi jādovaiye báquede Cristoi yaijāravui. Cadatevaibi majare, đacuyu pueno meara mārājivu. <sup>38</sup> Yu jāve majivu iyede: Ye majare coatede đarī buojabevu Jūmenijicure, majare űcure, jaruvarī. Maje yaidú, Jūmenijicu űbi majare. Aru maje curu ijāravure obediűua, Jūmenijicu űbi majare märe. Aru ángeleva, aru jabova, aru cavarōi parurivu märe ye majare coatede đarī buojabema Jūmenijicure jaruvarī. Nopedeca caiye iye cari jāravu vaiye boje, aru caiye iye apejāravua baquiyé vaiquiyē boje märe ye majare coatede đaimara āmenajaramu maja Jūmenijicure, majare űcure, jaruvarī. <sup>39</sup> Aru maja nuivu baru ijāravu puenoi aru jia űrada űmujurō jīvui märe, coatede đaimara āmenajaramu maja Jūmenijicure, majare űcure, jaruvarī. Que baru jāve ye cubenore cuedaino mārārō boje maja coatede đaimara āmenajaramu Jūmenijicure, majare cuedayu bácu, jaruvarī. Majidivubu maja aipe Jūmenijicui urarō űrōre majare, Jesucristoi mearo đacaiye báque boje majare. Que baru curivutamu maja Jesucristo que cūināvure.

#### **Jūmenijicu űi beoino judíovare, Israecavure**

(1 P 2.10)

**9** <sup>1</sup> Yu coyuyubu mujare yāvaiyede jāvene. Yu Cristoi jicubu. Que baru borocubevu yu. Nai Espiritu Santo đaicōjeimi “Boropatebevū yu”, ji arī dápiayique. Que baru majivu yu borocubede iye ji coyuiye. <sup>2</sup> Jāve pare chioivu yu ji űmei, jīvure ne ju abe boje Jesúre. Jāravua coapa chīori űájivu yu ji űme ji űrīduiye boje ina jīñecuva māvavui pāramena ne ju arājiyepe ayu Jesúre. <sup>3</sup> Yu náre cadateni buojayu baru, yūvacari jēniajebu Jūmenijicure űājine đacuyure yure toabo cūiméboi, ne bījabenajiyepe ayu. “Coatede đajacu yure Cristore jaruvarī”, ajebu yu Jūmenijicure. <sup>4</sup> Nāvacarī Israel bácu, űai mamarumu Jacob āmicucu bácu, Jūmenijicui pueno baju mearo đacaimu māvui pāramenamu. Nāvacaribu Jūmenijicui beoimara māvavu, űi epequiyepē ayu náre űi bucúovaimara. Náque cucu, Jūmenijicu jādovarejaquemavu náre űi mearo miadārore, ne majinajiyepe ayu meacu bajure. Jūmenijicu coyurejaquemavu náre: “Yurecabu muje jabocu. Aru mujarecabu ji jaboteimara”. Que arī, Jūmenijicu toivacaicōjenejaquemavu Moisés bácu űi đaicōjeiyede náre. Jūmenijicu buedejaquemavu náre aipe đarī ne jāve mearore jīnajiyepe űre. Jūmenijicu “Yu mearo đacacuyumu mujare”, arī coyurejaquemavu náre. <sup>5</sup> Ina judíovavacari “űujeñecuva māvavubu”, adama Abraham māvure, Isaac bácu, Jacob bácu, aru Jacob bácu doce paivu mamara māvavure märe, ne yajuboare buipōeva māvavure. Aru Cristovacari pōetedejaquemavu yópe ne yajubocacupe, judíovacacupe. Ūbenita me jāpiajarā yure. Jesucristo pōecube. Ūbenita ű märe Jūmenijicu, mearore jīmume, aru ne torojuede jīmume cainumu jāravu cūimējāravu baquinóre. Quédecabu.

<sup>6</sup> Yu coyubevu mujare Jūmenijicui đabede yópe “Mearo đacacuyumu yu mujare”, űi aipe báquepedeca ina Israecavu majeñecuva māvavure. Quénora

yorecabu jāve: Caivu ina Israel bācui pāramena Jūmenijicui beomara māvavu āmema. Que baru caivu ina judiōva baju āmema. <sup>7</sup> Ārujara muja aipe Jūmenijicui jādovaino mārārōre caivu ina Abraham māvui pāramenare ūi pāramena baju āmevure ūi jāinore. Que baru, “Quévura ina Isaai pāramena marajārama mipāramena baju”, arejaquemavu Jūmenijicu Abraham māvure. <sup>8</sup> Nōpe ayu Jūmenijicu, aiyucu barejaquémavu yōpe: Ina Abraham māvui pāramena, pōteivu yōpe caivu apevu juedovape, ūi pāramena baju āmema Jūmenijicui jā in ore. Quénora ina Abraham māvui pāramena pōteivu Jūmenijicu “Yōpe mearo đacacuyumu yu mujare”, ūi aipe báque boje, nārecabu, ūi coyuiyede ju aivu, jāve Abraham māvui pāramena baju. <sup>9</sup> Yōpe arī, Jūmenijicu coyurejaquemavu Abraham māvure: “Yōpe đacacuyumu yu mujare. Cari đaijuvi copaidacuyumu yu. Dinumu maquinóre mimarepaco, Sara, jave juedocuvacodome mamacure”, arejaquemavu Jūmenijicu Abraham māvure.

<sup>10</sup> Ārujara aipe Jūmenijicui jādovaino mārārōre Isaac bācūque caivu ina Isaac bācui pāramenare ūi pāramena baju āmevure Jūmenijicui jāinore, ūi beobe báque boje náre. Majeñecu māvui mārēpaco báco, Rebeca báco, juedoearejaquemavu pucarā mamara pējavare népacu Isaac bācūque. <sup>11-12</sup> Jūmenijicu nōpe vaidé đarejaquemavu, beocuyu cūinācu némacure yōpe ūi urōpe, ūi majié báquepedeca mamarumure. Yōpe arī, Jūmenijicu coyurejaquemavu Rebeca bācore: “Īmacucapūravu jībucu pueno parurō nucuyume. Jībucu memecacuyume ĩmacucapūravure”, arejaquemavu Jūmenijicu Rebeca bācore. Jūmenijicu nōpe arejaquemavu ne pōtenajiye jipocamia. Ūi nōpe aiyede ina pucarā ye đabedejaquemavu cāreja mearore aru āmenore máre. Que baru Jūmenijicu ye beobedejaquemavu nācacure ūi đaiye báque boje. Quénora beorejaquemavu cūinācu nācacure ū jicu bacuyáva ūi cutuquiyē boje ūre. <sup>13</sup> Aru obediujua yóboi, yōpe arī Jūmenijicu toivaicōjenejaquemavu ūi yāvaiyede: “Jacore ūrejacacu yu. Ūbenita Esaúre ūbedejacacu yu”, arejaquemavu Jūmenijicu.

<sup>14</sup> ¿Aipe coyurājidi maja caride diede? ¿Jūmenijicuvacari đabedi mearore cainumua yōpe “Đacuyumu”, ūi aipe báquepedeca? ¡Que āmevu! ¡Aipinumu Jūmenijicu đabecube nōpe! <sup>15</sup> Yōpe arejaquemavu Jūmenijicu Moisés bācore: “Yu cōmaje āroje jāiyucu baru pōecure, ūre cōmaje āroje jácuyumu yu. Aru yu mearo đacaiyucu baru pōecure, ji cōmaje āroje jāiye boje, ūre mearo đacacuyumu yu”, arejaquemavu Jūmenijicu. <sup>16</sup> Que baru Jūmenijicu beobebi pōecure, űai pōecui űe boje. Aru Jūmenijicu beobebi pōecure, űai pōecui đaiye boje. Quénora Jūmenijicu beoibi pōecure, ūi baju cōmaje āroje jāiye boje. <sup>17</sup> Yōpe arī, Jūmenijicu toivaicōjenejaquemavu ūi yāvaiyede ūi daroiye báquede Moisés bācore, ūi coyuyuiyēpe ayu űai Egipto āmicurijoborōcavu ne jabocu bācore, Faraón ne aimure: “Mu jave āmeina teyubu aru pueđabevu mu yure. Aru yu pueno baju āmeina tede nure đaiyu mure, jādovacuyu caivu pōevare aipe vaiquiyede mure ji majiéque. Aru ne jārīburu yóboi diede, ‘Jāve Jūmenijicu majicube caivu pueno’, arājarama na”, arejaquemavu Jūmenijicu. <sup>18</sup> Que baru Jūmenijicu cōmaje āroje jāimi apevure yōpe ūi baju urōpe. Aru pueno baju āmeina tede nure đaiibi apevure máre, ne ūbenajiyepe ayu ūre pueno baju yōpe ūi urōpe.

<sup>19</sup> Que baru cūinācu mujacacu jēniari jácuyume yure: “¿Jāve maru iye mi coyuiye, aipe đarī Jūmenijicu coyuyu buojaidi pōecure, ‘Boropateyubu mu

mi ãmeina teiye boje"? Ñame cubebi buojari vaidé dayu yópe Jūmenijicui ũbenope. Aru ñame cubebi buojari vaibéde dayu máre yópe Jūmenijicui urõpe", acuyume yure. <sup>20</sup> Aru pōcurecabu mu. ¿Aipe teni "Jorojini, copu teni buojayutamu yu", arī dāpiayurū mu Jūmenijicure? Jororu yávarī buojaidu baru pōcurepe, jēniari jámejeba pēpeñure: "¿Aipe teni dacurū mu yure yópe?" ¡Que ãmevu! Jūmenijicu ðarejaquemavu pōevare ũi dāpiainope. Que baru cuedayu bācure jēniari jáiye jaubevu cuedaimara mácavure. <sup>21</sup> Nai jororure pēpeipōecu jāve ðarī buojaibi ũi urõpe joboque. Cūinābu jobobuque ðarī buojaibi pucarua jororuare. Cūināru jororure me ðaibi duibajēneca, pōeva didure járī ne arājiyepe ayu, "Ñai pēpeñu me majibi". Aru apedu jororure maumeijeneca ðaibi ũre jauéde ũre ðaquidu caijāravua.

<sup>22</sup> Aru Jūmenijicu ðaibi pōevare yópe pēpeipōecu jororuare ũi ðaiyepe. Que teni Jūmenijicu napimi urarō ina jorojini ðavure ũre ne ãmeina teiyeque, ina bíjarājivure. Ũbenita apejāravu baquinó Jūmenijicu jádovacuyume ũi jorojīyede pōevare ne ãmeina teiye boje. Aru pōevare majide ðacuyume ũi majiéde, ũi ñājine ðaquiyede náre, ne ãmeina teiye boje. <sup>23</sup> Aru Jūmenijicu máre, yópe pēpeipōecupe páyu, ðaibi yópe ũi urõpe, jádovacuyu ũi baju pueno meacure aru meara ðacuyu majare máre, cōmaje ārojarivure ũi jáinore. Javede Jūmenijicu majidejaquemavu, meadacuyu majare meara baju bárājivure. Que baru Jūmenijicui ðaru yópe ũi urõpe majare, ũi cuedaimara mácavure, ñame "Mearore ðabebi ũ", arī buojabema. <sup>24</sup> Majarecabu Jūmenijicui cutuimara mácavu ũi mára mārājivūva, apedu judíovacavu, aru apedu judíova ãmevucavu máre.

<sup>25</sup> Yópe arī, Jūmenijicu toivaicōjenejaquemavu ũi yávaiyede coyucaipōecu bācure ũi āmiá Oseas:

Ina pōeva, ji pōeva ãmevu bācavure, acuyumu yu, "Ji pōevatamu muja". Aru diyajuboa pōeyajubocavu ji ũbemara mácavure,

"Ji ũmaratamu muja", acuyumu yu, arejaquemavu Jūmenijicu.

<sup>26</sup> Aru no curōi "Mujavacari ji pōeva ãmevutamu", Jūmenijicui aino mácārōmiareca, "Ñai Jūmenijicu apucui mārāmu muja", ũi coyumara marajárama, arī toivarejaquemavu Oseas bācu.

<sup>27</sup> Aru Isaías bācu máre Jūmenijicui yávaiyede coyucarejaquemavu, pōeva ne majinajiyepē ayu Israecavu ne borore: "Ina Israecavu obedivubu, yópe ēpayabea jia ēcarui paraiyepe. Ũbenita obebevu bajura nácavu meadaimara marajárama na. <sup>28</sup> Aru Jūmenijicucapūravu ñājine ðacuyume Israecavure corebecuva aru maumena", arī toivarejaquemavu Isaías bācu. <sup>29</sup> Aru jipocamia Isaías bācuvacari Jūmenijicui yávaiyede coyucarejaquemavu, yópe arī:

Ñai Jūmenijicu, caivu ne jabocu, ũi epebedu apedu majacavure, ne juedocuvārājiyepe ayu, majare máre vaijébu yópe āniimarōa Sodoma aru Gomorracavure vaiye báquepe, caivu ina bíjaivu bācavure, arī Jūmenijicui yávaiyede coyucarejaquemavu Isaías bācu Israecavu bācavui borore.

### Judíova ne jápiaino Jūmenijicui yávaiye méne

(Jn 12.38; Hch 2.21; Gá 3.12; Ef 6.15; 1 P 2.6, 8)

<sup>30</sup> Que baru, ¿aipe coyuiye jauri majare caride? Yópe coyuiye jauvu majare. Ina judíova ãmevu mememevu barejaquémavu, Jūmenijicui jáquiyepē

aivu náre boropatebevupe ne daiye báque boje. Quénora Jūmenijicuvacari “Boropatebevu muja ji jáinore”, arī coyurejaquemavu náre ne ju aiyede Jesucristore. <sup>31</sup> Ëbenita ina judíova, Jūmenijicui beoimara mácvu, ðaivu barejaquémavu Jūmenijicui ðaicōjeiyede ùi coyuiye báquede Moisés bácvre, ðarājivu nópe iye ðaicōjeiyepe, Jūmenijicui jáquiyepe aivu náre boropatebevupe. Ëbenita eabedejaquemavu diede. <sup>32</sup> Vobedejaquemavu Jūmenijicui me jáiyede náre ne ju aiyequ Jesucristore. Quénora voridurejaquemavu Jūmenijicui me jáiyede náre ne mearo daiyeque. Ëbenita yéde eabedejaquemavu na. Que baru vaidéjaquemavu náre yópe pōecui torí tuiyepe cūraborā, ùi me jáme boje dibore, nopedeca Cristo bíjarorejaquemavu ina judíovare ne jápiarī eabe boje úre. <sup>33</sup> Javede Jūmenijicu, yópe arī, toivaicōjenejaquemavu ùi yáva iyede dibo cūrabo borore:

Epeivu yu pōecure Jerusalén ámicurīmaroi. Yópe cūrabo ma coricai dobaribo pōeva toivure ture daiyepe, nopedeca ina pōeva ju abevu ñai pōecure bíjarājarama na. Ëbenita caivu ina úre ju aivu cūyebenajarama na, arejaquemavu Jūmenijicu.

**10** <sup>1</sup> Muja, jívu, parūrōreca uvu yu ji ũmei ina Israecavure, ji yajubocavure, ne ju arājiyepe ayu Jesucristore, Jūmenijicui meadaquiyepe ayu náre, ne coatebenajiyepe ayu úre jaruvarī. Que baru urarōreca jēniavaivu Jūmenijicuque náre boje. <sup>2</sup> Yu jáve mujare coyivv. Nácapūravu urarō memecaiyurīduivubu Jūmenijicure ùi urōpe. Ëbenina “Yópe Jūmenijicui urōpe ðaivubu ñuja”, arī dápiadama na. Ëbenita yéde ðabenama na yópe ùi urōpe. <sup>3</sup> Jápiarī eabenama Jūmenijicu coyuvure “Boropatebevu muja ji jáinore” pōevare, ne ju aiyede úre. Que baru nácapūravu memecarīduivubu Jūmenijicure, “Boropatebevu muja ji jáinore”, ùi arīduquiyepe aivu. Ëbenita úre memecavureca, “Boropatebevu muja ji jáinore”, ye arī coyubebi náre, ne ju abe boje úre. <sup>4</sup> Jūmenijicucapūravu toivaicōjenejaquemavu ùi ðaicōjeiyede ùi coyuiye báquede Moisés bácvre, pōeva ne meatenajiyepe ayu Cristoi daquiye jipocai. Diede ju aicōjenejaquemavu caivu ina ju arājivure Cristore, boropatebevu barājíyépe ayu ùi jáinore.

<sup>5</sup> Aru Jūmenijicu “Boropatebevu muja ji jáinore” arī, ùi coyujuroede pōevare, ne ðájuroe boje yópe ùi ðaicōjeiye ùi coyuiye báquepe Moisés bácvre, die borore Moisés bácvvacari, yópe arī, toivarejaquemavu Jūmenijicui yáva iyede: “Ñai ðarī buojayu caiye iye Jūmenijicui ðaicōjeiyepe cūcūyme ũ. Ëi ðaicōjeiyepe daiye boje coatede ðabemu macuyúme ũ Jūmenijicure jaruvarī”, arejaquemavu Moisés bácu. <sup>6-7</sup> Ëbenita Jūmenijicu “Boropatebevu muja ji jáinore”, ùi arī coyuiyede pōevare ne ju aiyede Jesucristore, die borore Moisés bácu, yópe arī, toivarejaquemavu Jūmenijicui yáva iyede: “Mi baju jēniari jámejacu mi ũmei dápiarī, ‘¿Ñame mārājidi muivu cavarō mearo Jūmenijicui curōi?’ Aru mi baju jēniari jámejacu mi ũmei dápiarī, ‘¿Ñame mārājidi joborō jívui coivu yaivu bácvu ne curōi?’ ” arī toivarejaquemavu Moisés bácu. Yópe aiyurōmu no: ¿Ñame mārājidi ēmeóvarajivu Cristore cavarō mearo Jūmenijicui curōre jocarī? ¿Aru ñame mārājidi nacovarajivu Cristore yainore jaruvarī?

<sup>8</sup> Aru yópe Moisés bácvvacari arī toivarejaquemavu Jūmenijicui yáva iyede: “Jūmenijicui yávaiye me joabenoimu mure. Que baru coyurī ùi yávaiye méne

jijecamuque aru ju arī ūmeque buojaivū mu”, arī toivarejaquemavū. Aru iye yávaie méne cūináturu baju coyūvūbu maja pōevare, ne ju arājiyepe aivū Jesucristore. <sup>9</sup>Mi ju aru Jūmenijicui nacovaiye báquede Jesucristore yainore jarūvarī, aru mi ju arī coyūru mi jijecamuque, “Jesucristo ji jabocūbe”, Jūmenijicu meadacūyume mure, mi coatebequiyepe ayū ūre jarūvarī. <sup>10</sup>Que teni ūmequedeca pōeva ju aivūbu Jesucristore, Jūmenijicu “Boropatebevū mūja ji jáinore”, ūi arī coyūquiyepe aivū náre. Aru jijecamuquedeca pōeva coyūvūbu jávene Jesūrā, ūi meadaquiyepe aivū náre, ne coatebenajiyepe aivū ūre jarūvarī.

<sup>11</sup>Jūmenijicu, yópe arī, toivaicōjenejaquemavū ūi yávaieyede: “Ñai ju ayū Jūmenijicure cūyoje tebecūyūvacaribe”, arejaquemavū. <sup>12</sup>Jūmenijicu que aibi caivū pōevare, judíovare aru judíova āmevūre máre. Caivū pōeva cūináturutamu ūi jáinoi. Jūmenijicu cūinácūrabe. Aru caivū ne jabocūbe ū. Aru ūrarō mearo đacacūyume Jūmenijicu caivū ūre jēniaivūre. <sup>13</sup>Yópe arī, toivaicōjenejaquemavū ūi yávaieyede: “Ácu pōecu ūi jēniaru Jūmenijicure, ‘mu, ji jabocu’ arī, Jūmenijicu meadacūyume ūre”, arī toivaicōjenejaquemavū. <sup>14</sup>Apecu aquíjichūbi yure: Ūbenita pōeva jēniaivū buojabenama Cristore, ūre ju abevū baru. Aru ju aivū buojabenama ūre, jápiabevū baru ūi yávaie méne. Aru jápiaivū buojabenama iye yávaie méne, coyūipōeva ne buebedu náre. <sup>15</sup>Aru ūi yávaie méne coyūipōeva bueivū buojabenama iye yávaie méne, náre jarobedu, aquíjichūbi apecu. Jūmenijicu, yópe arī, toivaicōjenejaquemavū ūi yávaieyede: “Jesús ūi yávaie méne coyūipōeva ne eaiyede pōeva yebai, torojure đavūbu náre ne ūmei”, arī toivaicōjenejaquemavū.

<sup>16</sup>Apecu ūi que aru, yópe arī, coyūjebu yū: Ūbenita ina jápiaivū bācavū obedivū ju abema na iye yávaie méne. Isaías bācūvacarī arejaquemavū Jūmenijicure: “Mu, ji jabocu, obebejīna baju ju adama ñūje borore”, arejaquemavū Isaías bācu Jūmenijicure. <sup>17</sup>Aru cojedeca apecu aquíjichūbi yure: “Pōeva ju adama Cristore ne jápiaie báquede ūi yávaie méne. Aru pōeva jápiadama iye yávaie méne coyūipōeva ne bueiye báque boje náre”, aquíjichūbi apecu.

<sup>18</sup>Ūi que aru, yópe arī, coyūjebu yū: Jēniari jáivu mure: ¿Israecavū jápiarejaq uem arī cāreja Jūmenijicui yávaie méne? Júju, jáve jápiarejaquemavū na diede. Jūmenijicu, yópe arī, toivaicōjenejaquemavū ūi yávaieyede ūi cuedaiye báque borore:

Jáicōjeñu pōevare cavarōre aru ne járū, majide đajebu náre pueno baju meacu Jūmenijicure. Aru ne járū caiye Jūmenijicui cuedaiye báquede járavua coapa aru ñamiá coapa máre, majide đajebu náre Jūmenijicui yávaie jaubeda, arī toivaicōjenejaquemavū.

<sup>19</sup>Aru bedíova cojedeca jēniari jáivu mure: ¿Ina Israecavūvacari coreóvarej aqu emari aipe Jūmenijicu đacūyure? Júju, jáve coreóvarejaquemavū na diede. Mamarūmure apevūre ne jipocai Moisés bācūvacarī, yópe arī, ju arejaquemavū ūi toivaiye báqueque Jūmenijicui yávaieyede: “Tebutede đacūyumu yū mujare apevū pōevare, jáve pōeyajubocavū āmevūque. Aru jorojīne đacūyumu yū mujare pōeyajubocavū ārūmevūque”, arejaquemavū Jūmenijicu Israecavūre. <sup>20</sup>Aru Jūmenijicu toivaicōjenejaquemavū ūi yávaieyede Isaías bācure napimecūva, yópe āri: “Ina

põeva ye vobevu bácvu yure, nárecabu eaivu yure. Aru yu jádovarejacacu ji baju ina põeva ye jēniari jámevu bácvure yure”, arejaquemavu Jūmenijicu. <sup>21</sup> Ëbenita Israecavure ne borore Jūmenijicu arejaquemavu: “Caijāravuare cārijimene daiyurīduivu yu ina põeva ju abevure aru maucvavivure yure”, arejaquemavu Jūmenijicu Isaías bácu toivaiye báquede.

### Jūmenijicu ũi jecurī beoino judíovare

(Fil 3.5)

**11** <sup>1</sup>Que baru, ¿Israecavure Jūmenijicu jaruvaidi ũre jaruvārī? jēniari jáivu yu mujare. ¡Bi, ye que āmevu! ¡Aipinumu vaibéjarōri nópe! Jūmenijicu jáve jaruvabebi náre. Yurecabu Israecacu. Abraham mácu pāramecubu yu. Aru Benjamín āmicurijajubo pōeyajubocacubu yu. <sup>2-3</sup> Israecavu Jūmenijicui beoimaramu. Javede Jūmenijicu beorejaquemavu ñujare ũi põeva mārājivure. Jūmenijicu jaruvabebi ñujare.

Aru muja coreóvaivubu jáve yópe arī toivaiye báquede Jūmenijicui yávaiyede Elíai coyuiye báquede Jūmenijicuque. Elías chíõñu arī jēniarejaquemavu Jūmenijicuque: “Mu, ji jabocu, jave boarī jaruvauquemavu mi yávaiyede coyucaipõeva mácvure. Aru mi āimarare boarī juarī jícavare máre mure jave bñjare ñaquemavu die coapa. Aru yu quécuvabu mi yávaiyede coyucaipõecu apucu cāreja. Que baru yure máre boarī jaruvaiyarivubu na”, arejaquemavu Elías Jūmenijicure. <sup>4</sup> Ëbenita Jūmenijicucapūravu, yópe arī, coyurejaquemavu Elíare: “Siete mil paivu baju ũmava Israecavu curivu cāreja mearore jíbema na pēpeimure ũi āmiá Baal”, arejaquemavu Jūmenijicu Elíare.

<sup>5</sup> Quédecabu caride máre. Obebevu baju curivubu Jūmenijicui beoimara mácvu, ũi cōmaje āroje jáiye boje majare. Jūmenijicu beoibi majare ũi me boje, mearo ñacayū bojecubeda. <sup>6</sup> Beobebi majare maje mearo ñaiye boje. Jūmenijicui beoru pōevare ne mearo ñaiye boje, mearo ñacaiye bojecube cubejebu. Quénora ũre bojedajebu na ne mearo ñaiyede.

<sup>7</sup> ¿Aipe arājidi maja caride? Yópe arājivubu maja: Ina Israecavu vorí durejaquemavu Jūmenijicu “Boropatebevu muja ji jáinore”, ũi coyucuiyepe aivu náre. Ëbenita caivu eabedejaquemavu ne uróre. Obebejina nácavu, Jūmenijicui beoimara mácvu, earejaquemavu diede. Ëbenita Jūmenijicu caivu apevu nácavure jápiaicōjemenejaquemavu ũi cutuiyede náre. <sup>8</sup> Yópe arī, Jūmenijicu toivaicōjenejaquemavu ũi yávaiyede: “Jūmenijicu dāpiabede ñarejaquemavu náre aru coreóvabede ñarejaquemavu náre máre. Javede aru caride máre jámenama na aru jápiabenama na Jūmenijicui ñaiyede aru ũi uróre máre”, arī toivaicōjenejaquemavu. <sup>9</sup> Yópe arī, Jūmenijicu toivaicōjenejaquemavu David bácvure:

Caiye iye meadaíye ññoiboqe baquiyébu. Náre jēni ture ñaquiyebu.

Aru ñājine ñaquiyebu náre. <sup>10</sup> Jūmenijicu jámene ñajacurī náre, ne coreóvabeni ñājinaiyepe ayu cainumua, arī toivarejaquemavu David bácu.

### Jūmenijicu ũi meadaino judíova āmevure

<sup>11</sup> Que baru, ¿ina judíova Jūmenijicure jáiyubeni aru jápiaiyubeni ne vainí tuiye báque boje bñjarorejaquemari náre? jēniari jáivu mujare. ¡Bi, ye

que ãmevu! ¡Aipinumu vaibéjarõri nópe! Ina judíova ju abedejaquemavu Jûmenijicui yávaie méne. Que baru vainí turejaquemavu na Jûmenijicure jaruvarí. Iye ne vainí tuiye báque ãmeina teiye barejaquemavu. Aru iye ne ãmeina teiye boje, ina judíova ãmevu jápiaivre Jûmenijicui yávaie méne aru ju aivre máre, Jûmenijicu meadarejaquemavu náre, ina judíova ne jorojínajipeye ayu. <sup>12</sup>Ina judíova ne ãmeina teiye báque boje, apevu obedivu ijárvucavu eadama urarõ mearore. Aru ina judíova ne baju boropatebevûpe Jûmenijicui jáinore eabe báque boje, ina judíova ãmevu eadama urarõ mearore. Que baru pûeno urarõ mearo baju baquiyébu ãnijárvu baquinóre, caivu judíova Jûmenijicui meadaimara máravûbu ne jápiaiyede Jûmenijicui yávaie méne aru ne ju aiyede Jesucristore.

<sup>13</sup>Ca ride coyûyûbu mujare, judíova ãmevure. Cristovacari yure bueicõjeame ñi yávaie méne mujare. Que baru Jesús ñi yávaie méne beorí coyicõjeimumu yu judíova ãmevure. Dápiavu yu parurõ ji memeinore. <sup>14</sup>Que teiyede, apevu jívu, judíova, jorojínajichuma ji bueiyede mujare. Que baru ju arãjarama Jesucristore aru jápiarãjarama Jûmenijicure máre, mujape, Jûmenijicui meadaquiyeye aivu náre. <sup>15</sup>Jûmenijicui ubede ina judíova jáiyubevure ñre aru jápiaiyubevure máre, apevu ijárvucavu cãrijimenejaquemavu Jûmenijicuque. Que baru urarõ mearo baju baquiyébu ãnijárvu baquinóre, Jûmenijicui copu etaiyede ina judíovare, meadacûyu náre. Yópe yaivu bácvu ne nacajaiye yainore jaruvarí urarõ mearo bajutamu. <sup>16</sup>Páubore mama buraijevede põeva ne jídu Jûmenijicure, caibo dibo máre Jûmenijicu jibobu. Aru jocucu ñuomure máre põeva ne jídu Jûmenijicure, caiye dicu cavabua máre Jûmenijicui cavabuabu. Quédeca Abraham mácu Jûmenijicu jicu barejaquemavu. Que baru ñi pâramenacavu máre Jûmenijicu jinamu.

<sup>17</sup>Jocucu olivo ãmicuricu cûvu jioi. Aru ñûja judíova dicupe paivûbu. Ñûjeñecu mácu, Abraham mácu, dicu ñuomupe páyûbe. Aru apesu cûvu macarõcacu olivo ãmicuricu. Dicupe paivûbu mûja, judíova ãmevu. Olivocu jiocacure cavabuare burarí jaruvaquemavu. Que baru macarõcacu cavabuare ñni, doaquemavu olivocu jiocacure. Que baru ñûja judíova cadateivûbu mujare, judíova ãmevure, nopedeca jocucu ñuoi oco muri cadateiyepe cavabuare. Ñûja meadacaivûbu mujare ñûje jíye boje mujare caiye Jûmenijicui mearo ñacaiyede ñûjare Abraham mácu yóbore. <sup>18</sup>Ûbenita mûjacapûravu ãmeina jámejara ina judíovare, Jûmenijicui ñbemara mácvure, yópe cavabua buraicavabuape. Dápiabejarã mûja mûje baju ne pûeno meara. Mûja máre cavabuape paivûbu. Que baru cavabua ãmevu jíye ocore ñuomuare. Quénora ñuomuamu jíye ocore cavabuare. Nopedeca mûja mearore ñabevu ñûja judíovare, quénora ñûja mearore ñavûbu mujare.

<sup>19</sup>Ûbenita cûinácû mûjacacu acuyume yure, “Yópe jocucure coreipõecui buraiyepe cavabuare jioi curicure, doacûyu apcavabua macarõi curicui cavabuaque, nopedeca Jûmenijicu ñejaquemavu apevu judíovare ñi põevare jocarí, ересуу yure ne yebai”, acuyume yure cûinácû mûjacacu. <sup>20</sup>Jávemu no. Jûmenijicu ñejaquemavu náre, ne ju abe báque boje ñre. Aru cûvu mu dicui mi ju aie boje ñre. Ûbenita dápiabejacu mu mí baju apevu pûeno meacu. Quénora me ñajacu aru me jájacu mu. <sup>21</sup>Yópe jocucure coreipõecui dajocabepe caiye cavabuare jocucu, nopedeca Jûmenijicu caivu judíovare

dajocabedejaquemavu ũi pŕevaue. Ũi íyepedeca ina judíova úre ju abevure, jáve mure máre ícuyume úre mi ju abedu.

<sup>22</sup> Járijide apa. Jūmenijicu mearo đacarĩ buojaibi pŕevare. Aru ñájine đayu máre buojaibi pŕevare. Ñájine đaiibi ina ámeina teivure, ju abeni vaini tuivure úre. Ũbenita mearo đacaibi maja ju aivure úre, đaiyurivure ũi urŕope. Cainumua muje ju aru úre aru đaru yópe ũi urŕope, ũ mearo đacacuyume mujare. Ũbenita muje ju abedu úre, ũ ícuyume mujare máre úre jocarĩ. <sup>23</sup> Aru ina judíova Jūmenijicure ju abevu bácavu, ne ju aru úre aru ne baju dápiaimore oatvuru, Jūmenijicu epecuyume náre máre ũi pŕevaue cojedeca. <sup>24</sup> Muja judíova ámevu jocucu macarŕi curicu cavabũare buraimara mácavũpe paivubu muja. Que baru muje cójjiye báque Jūmenijicui pŕevaue yópe cavabua ne doaiye báquepebu jocucu jioi curicurã. Ũbenita ina judíova jocucu jioi curicu cavabua buraicavabua bácavũpe paivubu. Que baru ne cójjiye baquiyé cojedeca Jūmenijicui pŕevaue yópe cavabũare ne doarãjiyepedecabu dicu jioi curicurã cojedeca. Que baru maiyójabevu no Jūmenijicure ũi epequino náre cojedeca ũi pŕevaue.

### **Jūmenijicu ũi meadaino judíovare**

*(1 Co 2.16; 8.6; Ef 4.6; Col 1.16)*

<sup>25</sup> Muja, jívu, uvu yu muje majinajipepe ayu iye Jūmenijicui jáđovameno mácarrŕe jipocamia ũbenita jáđovainore caride. Diede muja majidivu baru, “Me majidivubu ñja”, arĩ dápiaibenajaramu muja muje ũmei. Jávemu yo: Ina Israecavu Jūmenijicui yávaiye méne jápiaiyubema caride. Ũbenita apejáravu baquinói jápiarĩ ũi yávaiye méne ju arãjarama na diede. Na ju abenama pu caivu ina judíova ámevu Jūmenijicui meadaimara máravivu ne ju aiyeta Jesucristore. Aru no yóboi, ina judíova máre jápiarĩ Jūmenijicui yávaiye méne ju arãjarama diede. <sup>26</sup> Que teni Jūmenijicu meadacuyume caivu ina judíova ju arãjivure úre. Yópe arĩ, Jūmenijicu toivaicŕojenejaquemavu ũi yávaiyede:

Nai meadaipŕecũ dacuyume Jerusalén ámicurĩimarore jocarĩ.

Jaruvacuyume caiye ina Jacob báciu pãramena ne ámeina teiyede.

Aru ārmetecuyume diede. <sup>27</sup> Que teni đacacuyumu yu yópe

“Đacacuyumu mujare”, ji aiye báquepedeca, ji jaruvaiyede ne ámeina teiyede, ārmetecuyu diede, arejaquemavu Jūmenijicu.

<sup>28</sup> Ina judíova Jūmenijicure maucvvarivubu na, ju abevu ũi yávaiye méne. Aru ne que đaiye boje, Jūmenijicu meadaibi apevu mujare, judíova ámevure. Ũbenita ina judíovare Jūmenijicu ubi, ũi beoiye báque boje néñecuva mácavure. <sup>29</sup> Jūmenijicui mearo đacarĩ buiyede pŕevare bojecubeda ũi me boje, aru ũi cutuiyede pŕevare ũ jina máravivure, jáve oatvabebi ũi dápiaimore. Dajocabebi ũi mearo đacaiyede aru ũi cutuiyede máre. Quénora buojaibi iye mearo đaiyede ũi buiye báquede. <sup>30</sup> Aru muja judíova ámevucapũravu javede ju abedejaquemavu Jūmenijicure. Ũbenita caride ina judíova ne ju abede úre, Jūmenijicu cŕomaje ārŕoje jáimi mujare. <sup>31</sup> Nopedeca ina judíovacapũravu caride, Jūmenijicui cŕomaje ārŕoje jáiyede mujare, ju abema úre. Ũbenita ju arãjarama úre ũi cŕomaje ārŕoje jáiyede mujare, ũi mearo đacaquipepe aivu náre máre ũi cŕomaje ārŕoje jáiye boje. <sup>32</sup> Que baru Jūmenijicu đaicŕojemarape đaiibi caivu pŕevare, ne ju abe boje úre, cŕomaje ārŕoje jácuyu náre.

<sup>33</sup> Jāve Jūmenijicu pueno meacu bajutame. Aru ūrarō cōmaje āroje jāimi caivu pōevare. Ūrarōmu ūi cūve cūvae, aru ūi majiē, aru ūi coreóvaiye märe. Ņame coyuiye buojabema ūi dāpiaiyede, ūi me coreóvaiye boje caivu pueno. Aru űame coreóvarī buojabema ūi dāiyede, ūi me majiē boje caivu pueno.

<sup>34</sup> Jūmenijicu, yōpe arī, toivaicōjenejaquemavu ūi yāvaiyede:

Pōecu cubebi Jūmenijicui dāpiaiyede majicu. Aru pōecu cubebi majicarī buojayu Jūmenijicure. <sup>35</sup> Aru pōecu cubebi jīcacu Jūmenijicure apejīene, Jūmenijicui bojecubenore cūvaquiyeye ayu ūre cojedeca, arī toivaicōjenejaquemavu.

<sup>36</sup> Que baru Jūmenijicuvacari cuedarejaquemavu caiyede. Ūi parūēque caivu cūrivūbu aru caiye märe cūvu. Aru ūi cūe boje caivu cūrivūbu aru caiye märe cūvu. Que baru caivu jīnajarevu mearore Jūmenijicure cainūma. Quēdecabu.

### **Cūrājarevu memecarājivu Jūmenijicure**

(1 Co 12.4-12)

**12** <sup>1</sup> Mūja, jīvu, Jūmenijicui pare cōmaje āroje jāiye boje majare, paredeca jēniaivu mūjare, mūje jēniarajiyeye ayu Jūmenijicuque, jāve mūje darājiyeye ayu yōpe ūi ūrōpe, caiyede me matuiyeda cainūma. Yōpe pōeva ne jīcaiyepe āimara boaimara mácavure Jūmenijicure, jījarā mūja mūje bajuāre. Ūbenita apūrivūbu mūja. Mūjavacari epejarā mūje bajuā coapa Jūmenijicure, memecarājivu ūre cūinācure. Yōpe darī coatejarā mūja mūje āmeina teiyede jarūvarī. Aru Jūmenijicu torojurī jācūyme mūjare. Nōpe daivu mūja mearore jīvūbu Jūmenijicure jāve mūje ūmeque. <sup>2</sup> Dabejarā mūja yōpe ijāravūcavu Jūmenijicure ju abevu ne dare űuiyepe. Quēnora Jūmenijicure oatūvaicōjejara mūja, cūvarājivu mamaūmene aru mūje dāpiaino mamarore märe mūja coapa. Que tenī mūja buojarājaramu majidivu Jūmenijicui ūrōre mūje darājiyede. Aru Jūmenijicui ūrō mearomu, torojure daino, aru ye jaubenomu.

<sup>3</sup> Jūmenijicu pueno meacu baju mearo dācaibi yure, jīyu yo jī memeinore, jī memecaquiyeye ayu mūjare. Que baru coyuyūbu mūjare, yōpe arī: “Mearamu űmūja”, arī dāpiabejarā mūja mūje baju. Quēnora “Jūmenijicui cadatebedu yure, apejīene dāiye majibejebu yu”, arī dāpiajarā mūja coapa. <sup>4</sup> Maje baju cūinārovacaribu cūvae ūre cūepe. Ūbenita caiye iye mememevu cūināromia. <sup>5</sup> Quēdeca maja, Jesūre ju aipōeva, obedivūbu. Ūbenita cūinābajupe paivūbu maja Jesūque. Cūināvupe Jūmenijicu cōjijovaiibi majare caivu apevuque. Que tenī cūinābajupe paivūbu maja.

<sup>6</sup> Jūmenijicu pueno meacu baju majide daquemavu majare coapa bojecubeda ūi majiēcarōre, maje cadatenajiyeye ayu apevure. Que baru caivu maja coapa dāiye jauvu majare yōpe ūi majide dāiye báquepe. Jūmenijicui jīdu ūi majiēcarōre maje coyūcarājiyeye ayu ūi yāvaiyede, coyūcarājarevu diede, aipino ūi majare jīno mácārōpe majare coapa. <sup>7</sup> Jūmenijicui jīdu ūi majiēcarōre maje memecarājiyeye ayu apevu Jesūre ju aivure, memecarājarevu nāre. Jūmenijicui jīdu ūi majiēcarōre maje buenajiyeye ayu pōevare, buenajarevu nāre. <sup>8</sup> Jūmenijicui jīdu ūi majiēcarōre maje cadatenajiyeye ayu apevure, cadatenajarevu nāre. Majacavu jīvu baru ne cūvecarōre apevure, jījarāri nāre jecubevūva. Majacavu jaboteivu baru ina ju

aipõevare, urarõ memejarari na. Majacavũ cõmaje äroje jáivu baru apevũre aru mearo ðacaivũ baru náre, torojurivũ náre mearo ðacajarãri na.

**Aipe ðaiye jaurõ Jesúre ju aipõevare**

(Mt 5.44; 19.18-19; 22.21; Mr 12.17; Lc 6.28; 20.25;

2 Co 8.21; Ef 6.11-17; He 10.30; 13.2; 1 P 4.9)

<sup>9</sup>Ujarã apevũre aru me ðajarã náre jáve. Pucaũmea cubevũva cadatejarã náre. Ubejarã ämenore. Cainumua ðajarã mearore. <sup>10</sup>Ujarã muja muje bajumia. Torojurivũ jájara muja coapa apevũre muje puenocavũre aru pueðajarã náre máre.

<sup>11</sup>Jũracubejarã. Quénora pare muje ðaiyueque memejara muja. Memecajarã urarõreca maje jabocũ Jesucristore muje ũmeque.

<sup>12</sup>Napini coreivũbu muja Jũmenijicui mearo ðacaquiyede mujare. Que baru torojujarã muja cainumua. Napijara muja muje ñájiyede. Aru uetubevũva coyujarã Jũmenijicuque cainumua.

<sup>13</sup>Jíjarã muje cuvecarõre aru tãuturare máre ina Jũmenijicui põevacavũre jauéde. Me copũ etajarã ina curãdaivũre muje yebai apenoacavũre.

<sup>14</sup>Jëniajara muja Jũmenijicuque, ũi ämedabequiyepe aivũ ina muje mauvare. Aru mujavacari ämeina yávabejarã náre. Quénora jëniajara Jũmenijicuque, ũi mearo ðacaquiyepe aivũ náre.

<sup>15</sup>Torojujarã muja ina torojurivũque. Aru chĩori ojarã muja ina apevũ chĩori oivũque.

<sup>16</sup>Cãrijimenoque cujarã muja apevũque. Cũináturũ muje ũmei dápiajarã muja. Aru jájara caivũ apevũre cũináturu. Dápiabejarã muja coapa “¿Meara márica?” apevũ pueno. Quénora yóvajarã muja ina cõmaje ärojarivũre. Dápiabejarã muja urarõ me majidivũpe.

<sup>17</sup>Apevũ ne ämeno ðaiyede mujare, copũ ämeno ðabejarã náre. Jipocamia dápiajarã aipe ðaiye jaurõre, apevũ ne járajiyepẽ aivũ muja jujovabevũre.

<sup>18</sup>Mujacapũravũ caiye muje ðaiyeque cãrijimena cure ðajarã muje bajumia.

<sup>19</sup>Muja, ji yóvaimara, cainumua ñájine ðabejarã muja apevũre, ne ñájine ðaiye báque boje mujare. Quénora corejarã Jũmenijicu ñájine ðacuyũre náre. Que baru yópe arĩ, Jũmenijicu toivaicõjenejaquemavũ ũi yávaiyede: “Yurecabu ñájine ðacuyũ ina ämeina ðaivũ bÁCavũre apevũre. Yávacari bojedare ðacuyũmu náre yópe ne ämeno ðaino mácarõpe”, arejaquemavũ maje jabocũ Jũmenijicu. <sup>20</sup>Que baru ðajarã muja yópe Jũmenijicui toivaicõjeiye báquepe ũi yávaiyede: “Muje mauvai ñájinu ävũéna, jíjarã muja náre ne äiyeva. Aru muje mauvai ũcuiyũru, jíjarã muja náre ne ũcuiyeva. Que ðarĩburu yóboi, nácapũravũ chĩomenu mujare ne ñájine ðaiye báquede, pueno urarõ ñájine ðarãjaramu muja Jũmenijicui ñájiovaquijãravũ baquinóre ne maucũvae báque boje mujare, muje mearo ðacaiyedeca náre”, arejaquemavũ Jũmenijicu. <sup>21</sup>Ämenore ðare ðaicõjemejara ina ämeno ðare ðaivũre mujare. Quénora mearo ðacajarã muja caivũre, bíjarorãjivũ muje mauva ne ämenore ðaiyede.

**13** <sup>1</sup>Caivũ ina jabovare Jũmenijicu jaboteicõjeimi ijãravũre. Que baru caivũ põevare ju aipe javũvũ ina jabovare coapa. Aru ina jabova Jũmenijicui epeimaramu. <sup>2</sup>Ácu põescu maucũvacũ baru jabocũre, maucũvaibi Jũmenijicui epeimũ mácsũre. Que teni ñai põescu ñájiycuyũte ũi maucũvae

boje. <sup>3</sup>Ina mearore ðaivu jidubema jabovare. Quénora ina ámenore ðaivu jiduma jabovare. Que baru muja jiduiyubevu baru jabovare, mearo ðajarã. Aru ina jabova me járajarama mujare. <sup>4</sup>Ina jabova Jümenijicui epeimaramu na, me cadatenajivu mujare, aru mujare cadatede ðarãjivu apevure máre. Ubenita muja ámenore ðaivu baru, jidujarã náre. Nájine ðaivu buojadama na. Aru nájine ðadama na ámeno ðaivure. Que teni ina jabova Jümenijicui epeimara nájine ðarãjivubu ámeno ðaivure. <sup>5</sup>Que baru ju aye jaunu mujare ina jabovare, ne nájine ðabenajipe aivu aru “Boropatebevu yu”, muje arī dápjarãjipe aivu máre. <sup>6</sup>Que baru bojedaiyede máre jíye jaunu ina jabova ne tãutura ícõjeiye boje caivu ne jaborõcavure. Jümenijicuvacari üi epeinore memeivubu ina jabova. <sup>7</sup>Bojedajarã muja ina jabovare caino mujare bojedaiye jaurõre. Aru pueðajarã caivu ina jabovare, mujare cõjeivure máre.

<sup>8</sup>Bojecube ðabejarã apevure. Quénora cünárora ðaiye jaunu mujare: Ujarã apevure. Ácu põecu ucu baru apevure, ðaibi caiyede yõpe Jümenijicui ðaicõjeiye coyuiyepe. <sup>9</sup>Yõpe ðaicõjenejaquemavu Jümenijicu põevare: “Cubekarã apevuque mujemarebucvare jaruvári. Boarí jaruvabejarã põevare. Navamejara. Áujimejara apevu ne cüvaede”, arī ðaicõjenejaquemavu. Caiye iye ðaicõjeiye aru caiye ape ðaicõjeiye máre cünáromia yõpe aiyrõmu: “Muja coapa ujarã mujevure, yõpe muje uepedeca muje bajure”, aiyebeu iye. <sup>10</sup>Ácu põecu ucu baru ü jivure, ye ámenore ðabecuyume náre cainuma. Que baru põecu ucu baru ü jivure, nai ðaibi caiyede iye ðaicõjeiye coyuiyepe.

<sup>11</sup>Aru caiye iye ji coyuiyepe ðaiye jaunu mujare, muje majié boje ijãravui vaiyede. Cãivupe paivubu muja. Ubenita coedaiye jaunu mujare. Jesúi copaidaquijãravu, üi nuvaquijãravu baquinó majare cavarõ mearo üi curõi, joabevu caride, maje Jesúre mamarumu ju aijãravu bácarõ pueno. <sup>12</sup>Maje cuede ijãravui yõpe ñamipe painomu. Ubenita joabevu miadãe tuyeipe paino maquinó, Jesúi copaidaquiyede yore. Que baru ðajocaiye jaunu majare caiye iye ámeina teiyede, põeva ne ðare nuiyede ñami, apevu ne járã buojabede náre. Quénora ðaiye jaunu majare caiye iye me teiyede yõpe Jümenijicui urõpe, põeva ne ðare nuiyede jãravu, apevu ne jáiyede náre. Que baru yõpe churara boicarovede ini, üi meateiyepe boacýu üi mauvare, nopedeca Jümenijicui majiéque meateiye jaunu majare, ðabeburí ámenore. <sup>13</sup>Que baru jaunu majare maje ðare nuiye yõpe curivupe jãravu, apevu ne járã buojaiyede náre. “Ücurajare” abeni, urarõ boqueiyede ücumeni, pacotebejarã muja. Aru ámeina ðabejarã muja apevuque mujemarebucva ámevuque. Aru jarabeni jorõjimejara muja apevuque máre. <sup>14</sup>Ubenita maje jabocu Jesucristore jëniajara, üi cadatequiyepa aivu mujare, muje curãjipe aivu yõpe üi urõpe. Aru muje ámeina ðaiyuepe dápiaiye ðajocarí, ðabejarã muje urõ ámenore.

**“Ámenamu”, arī yãvabejarã mujacavure**

(2 Co 5.10; Col 2.16)

**14** <sup>1</sup>Me copu etajarã muja ina Jesúre ju aivu coreóvabevure cãreja aipe ne ju aiyede Jesúre. Aru, “Majibevu muja”, arī yãvabejarã náre. <sup>2</sup>Apevu Jesúre ju aipõeva me coreóvaivu aipe ne ju aiyede Jesúre, ádama áde áiyede. Ubenita apevu Jesúre ju aipõeva coreóvabevu cãreja iye ne ju aiyede Jesúre, ámemã áimajiaruare, ne dápiaiye boje Jümenijicu ubeçure náre áimajiaruare áivure. <sup>3</sup>Muja caijiene áivu ámeina jámejara ina áimajiaruare

ămevure. Quédeca muja aimajiaruare âmevu âmeina yávabejară ina caijiene âivure. Jûmenijicuvacari me jáñu coatebebi ina caijiene âivure ũ jinare jocarî. <sup>4</sup>Jaruvarî buojabevu mu apecu ũmure memecayure. Quéhora ñai ũi memecaimu quécu cûinácûrabe buojarî jaruvayu o mautede dayu ũre. Nópe mi jaruvarî buojabepedeca apecu mûcacure, Jûmenijicuvacari, caivu ne jabocu, jaruvacuyume o mautede dacuyume ũre.

<sup>5</sup>Aru apecu Jesúre ju aipôeva ârurivubu cûinájâravure me apejâravua pueno. Ŭbenita apecu Jesúre ju aipôeva ârurivubu cûináturu jâravua coapa. Majijarâri caivure jávene ne dâpiainore. <sup>6</sup>Majacavu me ârurivu baru cûinájâravure apejâravua pueno ñadama nópe, pueðarâjivu Jûmenijicure. Aru majacavu ârurivu baru cûináturu jâravua coapa ñadama nópe, pueðarâjivu Jûmenijicure. Aru majacavu caijiene âivu nópe ñadama, pueðarâjivu Jûmenijicure, aru torojuede jýyama ũre, ũi jýye boje náre ne âiyeva. Aru majacavu aimajiaruare âmevu máre nópe ñadama, pueðarâjivu Jûmenijicure, aru torojuede jýyama ũre, ũi jýye boje náre ne âiyeva.

<sup>7</sup>Pôecu cubebi majacavu jêneboi jaboteyu ũi baju ũi apuéde cäreja. Jesúre ju aipôecu cubebi cûinácûva. Quédeca pôecu cubebi jaboteyu ũi baju ũi yaiyede máre. Jesúre ju aipôecu yaibébi cûinácûva. <sup>8</sup>Maje apuéde cäreja maje jabocu jinamu maja, pueðarâjivu ũre. Aru maje yaiyede máre maje jabocu jinamu maja, pueðarâjivu ũre. Que teni apurivu baru maja cäreja, Cristo jinamu maja. Aru yaivu bácavu baru máre, Cristo jina mârâjivubu maja. <sup>9</sup>Cristoi yaiye báque boje aru ũi nacajaiye báque boje yainore jaruvarî, jaboteyube ũ caivure, apurivure aru yaivu bécavure máre.

<sup>10</sup>¿Aipe teni apecu mujacavu âmeina yávaivurû apecu Jesúre ju aipôevare, mívupe paivure? ¿Aru aipe teni apecu mujacavu âmeina jáivurû apecu Jesúre ju aipôevare, mívupe paivure? Nópe ñabejară muje baju. Caivu maja núrajaramu Cristoi coyûquiyede maje ñaiye báquede méne o âmene ũi jáinoi.

<sup>11</sup>Yópe arî, Jûmenijicu toivaicôjenejaquemavu ũi yávaiyede:

Yópe aibi maje jabocu: “Ji cainumua cue boje, coyuyubu mujare yópe vaiquiyede jáve. Caivu ijâravucavu ñuatutarî mearore jínajarama yure. Caivu ijâravucavu coyurâjarama yure, ‘Jûmenijicutamu mu.

Ñuje jabocubu mu’, arâjarama caivu”, arejaquemavu Jûmenijicu.

<sup>12</sup>Que baru caivu majavacari coyurâjaramu Jûmenijicure maje borore, caiye maje ñaiye báquede.

### **Ămeno ñare ñabejară mujevure**

(Mt 15.1-20; Mr 7.1-23)

<sup>13</sup>Que baru âmeina yávabenajarevu majevure. Quéhora majijară muje ũme muja âmeina teivure. Que baru mearo ñajară, mujevu ne vainî tubenajiyeye aivu, ne jáiye boje muje âmeina teiyede. <sup>14</sup>Yu jáve coreóvaivu ye âiye cubede yure âmedaiye, yure coavaiye Jûmenijicure jaruvarî. Nópe buedejaquemavu maje jabocu Jesucristo. Ŭbenita apecu “Ămetede ñaivu yure”, ũi arî dâpiaru apejiene, diedecabu âmetede ñaiye ũre. Que baru maja coapa dâpiarî majidivubu âmeina teiyede. <sup>15</sup>Ăiyeque muje chiore ñaru apecu Jesúre ju aipôevare ne ũmei, meamejebu no. Muje nópe ñaiyeque, jáðovajebu muja ubevupe náre. Jesucristo yaidéjaquemavu bojedayu náre máre. Que baru bíjarobejară muja náre, ne coatenajiyeye aivu Jûmenijicure jaruvarî, muje

apejĭene āiyue boje. <sup>16</sup>Que baru muja ðaivu baru apejĭene, mēne muje jāiyede, “Boropatebevu yu”, muje arĭ dāpiaiyede muje ðaiyede diede, aru pōevare cadateiyede märe, ũbenita apecu Jesúre ju aipōecui āmeina járū, o āmeina yávaru diede, dajocajarā muje ðaiyede. Quénora ðabejarā muja diede. <sup>17</sup>Jūmenijicu maje jabocube. Ŭbenita majare jabotebebi maje āri aru ũcuri teiye boje. Quénora cujarā me nurié ðaivu, cārijimena, aru torojurivu, yópe ñai Espiritu Santoi cōjeiyepe majare. Nópe ðaru, Jūmenijicu jaboteibi majare. <sup>18</sup>Aru caivu ina memecaivu Cristore nópe ðaivu, nárecabu me Jūmenijicure torojure ðaivu, aru pōevare märe me járe ðaivu, aru me yávare ðaivu náre.

<sup>19</sup>Que baru cainumua cārijimene ðarājarevu maja apevure. Aru cainumua cadatenajarevu maja apevu majacavure, pueno parurōreca ne ju are nurajiyeye aivu Jesúre aru pueno me ne curājiyeye aivu úque. <sup>20</sup>Jūmenijicu pōevare ju are nure ðaibi pueno parurōreca Jesúre. Que baru mujacapuravu āmedabejarā náre ne ju aiyede Jesúre, muje apejĭene āiyue boje. Āiye cubevu āmedaiye pōevare, náre coavaiye Jūmenijicure jaruvarĭ. Ne āru muje āiyepedeca aru “Āmeina ðaiyebu ñujare”, arĭ dāpiaru, mujacapuravu āmeno ðajebu náre, muje āiye boje. <sup>21</sup>Que baru āmejara muja āimajiaruare, aru ũcumejara boqueiyede märe, aru ðabejarā caiye apejĭene, mujacacu Jesúre ju aipōecu vainĭ turĭ ũi ðabequiyeye aivu āmenore muje ðaiyede járĭ. <sup>22</sup>Muje dāpiainore muje āiyede, muje ũcuiyede, aru muje ðaiyede märe coyubejarā apevure. Quénora Jūmenijicuvacari coreóvacayume diede. Ñai pōecu caiyede ðayu baru, “Boropatebevu yu”, arĭ dāpiarĭ, úrecabe Jūmenijicui torojure ðaimu. <sup>23</sup>Ŭbenita ñai pōecu “Majibevu yu mearore ji āino, ji ũcuino, aru ji ðaino” arĭ dāpiayu baru, úrecabe Jūmenijicui āmeina jáimu. Ŭi nópe ðaiyede, “Majibevu yu Jūmenijicu ũcure diede” arĭ dāpiayu baru, boropateyube ũ Jūmenijicui jáinore. Caiye maje ðaiyede, “Meaquiyebu” arĭ dāpiabevu baru, āmeina teivubu maja.

#### Torojure ðarājarevu majacavure

**15** <sup>1</sup>Maja Jesúre ju aipōeva me coreóvaivubu aipe maje ju aiyede Jesúre. Que baru majare cadateiye jauvu apevure, Jesúre ju aipōeva coreóvabevure cäreja aipe ne ju aiyede Jesúre, ne vainĭ tubenajiyeye aivu āmeina teiyede. Maje urōpe ðaiye jaubevü majare. <sup>2</sup>Quénora ðacaiye jauvu majare apevu Jesúre ju aivure, torojure ðarājivu náre aru parure ðarājivu ne ũmene. Nópe ðaiye jauvu majare, ne pueno urarō majinajiyeye aivu aipe ne ju aiyede Jesúre. <sup>3</sup>Cristovacari ũi baju torojure ðabedejaquemavu. Quénora vaidéjaquemavu ũre yópe Jūmenijicui toivaicōjeiye báquepe ũi yávaiyede: “Pōeva ne āmeina yávaieque mure, āmeina yávadama yure märe”, arejaquemavu Jūmenijicure. <sup>4</sup>Aru caiye iye toivaiye báque Jūmenijicui yávaiyede toivaicōjenejaquemavu, maje buenajiyeye ayu. Maje bueiyede diede, napivubu maje ñājiyede aru torojurivubu. Que baru napini coreivubu Jūmenijicui mearo ðacaquiyede majare. <sup>5</sup>Aru Jūmenijicu napine ðaibi pōevare, aru torojure ðaibi náre märe. Que baru cure ðajacurĭ majare cārijimevüva cūináturu muje ũme, muje ðarājiyeye ayu nópe Jesucristoi ðaiye báquepe. <sup>6</sup>Que teni caivu muja, cūináturu muje ũme aru cūinácamumia, jíjarā mearore Jūmenijicure, maje jabocu Jesucristoi mearore jímmure, jípacure märe.

**Judíova ãmevu ne jápiaino Jũmenijicui yávaiye méne**

<sup>7</sup>Copu etajarã muja mujevũre yópe Jesucristoi copu etaiyepe majare, põeva ne mearore jínajiyepẽ aivu Jũmenijicure. <sup>8</sup>Yu coyũyũbu mujare yópe: Cristo darejaquemavu memecaipõecũpe, judíovare cadatecũyũ. Que ñari, jádovarejaquemavu Jũmenijicure jáve ñayũre yópe “Ðacacũyũtu yũ”, ñi aiyẽ báquepedeca. Cristo jáve darejaquemavu caiye iye Jũmenijicui coyũiyẽ báquepedeca judíovai ñecuva mácvũre. <sup>9</sup>Aru Cristo máre mearore jide darejaquemavu Jũmenijicure ina judíova ãnevũre, Jũmenijicui cõmaje ãroje jáiye boje náre. Yópe arĩ, Jũmenijicu toivaicõjenejaquemavu ñi yávaiyede Cristorã:

Ji cuede judíova ãmevu jẽneboi, mearore jícũyũtu yũ mũre. Aru yũriacũyũtu yũ, torojuede máre jícũyũ mũre, arejaquemavu Jũmenijicure.

<sup>10</sup>Aru yópe arĩ, Jũmenijicu toivaicõjenejaquemavu ñi yávaiyede:

Muja, judíova ãmevu, torojujarã muja Jũmenijicui beoimaraque, arĩ toivaicõjenejaquemavu.

<sup>11</sup>Aru yópe máre arĩ, Jũmenijicu toivaicõjenejaquemavu ñi yávaiyede cojedeca:

Caivu muja judíova ãmevu, mearore jíjarã Jũmenijicure. Muja, caivu põeva, mearore jíjarã ãre, arĩ toivaicõjenejaquemavu.

<sup>12</sup>Aru Jũmenijicu Isaías bácvũre, yópe arĩ, coyũcaicõjenejaquemavu ñi yávaiyede:

Isaí bácvũ pãramenacacu bacũyũ dacũyũme. Jũmenijicu epecũyũme ãre, ñi jabotequiyepẽ ayũ ina judíova ãnevũre. Aru ñi napini corede ñacũyũme ina judíova ãnevũre, arĩ toivarejaquemavu Isaías bácvũ.

<sup>13</sup>Jũmenijicu napini corede ñayũbe mujare. Que baru me torojũre ñajacurĩ mujare me aru cãrijimenoque cure ñajacurĩ mujare, muje ju aiyẽ boje ãre. Nópe ñajacurĩ ñi mujare ñai Espĩritu Santoi parũque.

<sup>14</sup>Muja, jĩvu, yũvacari jáve majivu mujare meara baju cadateivũre aru me majidivũre aipe ñaiye jaurõre mujare, muje majicarãjiyepẽ ayũ mujevũre.

<sup>15</sup>Ubenita iyoca paperayocare apẽcure toivaicõjeivu yũ mujare yavebecũva. Yo ji coyũino diyocaque ãrũre ñaivu aipe ñaiye jaurõre mujare, Jũmenijicui epeiyẽ báque boje yũre Jesús ñi yávaiye méne beorĩ coyũicõjeimũpe, ñi mearo ñacaiye bojecũbeque. <sup>16</sup>Que teni yũrecabu Jesucristore memecaipõecũ, buescũyũ ina judíova ãnevũre. Yópe sacerdote ñi memeyepẽ Jũmenijicui cũrami jĩvũi memẽũmu yũ, cadatecũyũ põevare ne mearore jiyede Jũmenijicure. Coyũyũbu Jũmenijicui yávaiye méne náre, ñi jina marajiyẽ ayũ yópe jĩcaiyepe ãre, torojũquiyepẽ ayũ ne ju aiyede Cristore. Ñai Espĩritu Santo epeyũbe náre, judíova ãnevũre, Jũmenijicu jinava.

<sup>17</sup>Yũrecabu cũcũ Jesucristoque cũinãvũpe. Que baru torojũvũ yũ memecayũ me Jũmenijicure. <sup>18</sup>Yu yávaquijĩvu jidubecũva cũináro ji coyũquinore. Coyũquijĩvu aipe Cristo yũre buede ñayũre aru aipe ju are ñayũre Jũmenijicure ina judíova ãnevũre máre. <sup>19</sup>Ñai Espĩritu Santo parũre ñaibi yũre, ji ñaquiyepẽ ayũ põeva ne jámene aru ne ñari majibede máre, ne coreóvarãjiyepẽ ayũ jáve ji coyũiyede. Que teni cũcũnũri cainoa joborõare Jerusalén ãmicurĩmarore jocarĩ pu Iliria ãmicurĩjoborõita, coyũcacũ caiye

iyē Jesucristoi yávaiye méne ímaroa coapa. <sup>20</sup> Cúináromu ji urō. Coyuiyuvu yu iye yávaiye méne áro ímaro ne jápiabenoí cāreja Cristorā, đabecuyu apevu ne memeni buino mácarōre. <sup>21</sup> Que baru yópe arī, Jūmenijicu toivaicōjenejaquemavu ūi yávaiyede:

Ina coyubemara mácavu ūi borore cāreja járajarama na. Aru ina jápiabevu bācavu ūi borore cāreja jápiarī coreóvarājarama na máre, arejaquemavu Jūmenijicu.

**Pablo ūi jácunuiyurō Romacavure**

(Ro 1.13; 1 Co 9.11; 16.1-4)

<sup>22</sup> Que baru obedinmua jácunuiyurīducacu yu muje yebai. <sup>23-24</sup> Ūbenita caride jave buojavu yu ji memeyede yo joborōre. Que baru obediuja joe jácunuiyurīduyu, napini coreivu yu ji jácunuiquiyede mujare joabējiena. Ji nuquiyede España āmicurijoborōi, mauteiyuvu yu muje yebai obedijārvua, coreóvacuyu mujare coapa aru muje cadatenajiyeye ayu yure ji eaquiyede España āmicurijoborōi, ji curīburu yóboi mujaque.

<sup>25</sup> Ūbenita carijie nuquijivu Jerusalén āmicurīmaroi, cadatecuyu Jesúre ju aipōevare noi. <sup>26</sup> Ina Jesúre ju aipōeva cójijivaivu Macedonia aru Acaya āmicurijoborōacavu máre torojurivu jýuma ne táuturare, cadatenajivu ina Jerusalén āmicurīmarocavu Jesúre ju aivucavu cūve cūvabevure. <sup>27</sup> Name jícōjemema náre. Quénora torojurivu “Jínajarevu, cadatenajivu ina cūve cūvabevure”, aquemavu na. Ūbenita jāve náre cadateiye javu. Cristoi daquiye jipocare maja judíova quévura cūvarejaquemavu Jūmenijicui mearo đacaiyede majare. Aru majarecabu coreóvare đaiyu ina judíova āmevure Jesucristoi yávaiye méne, ne cūvarājiyepe aivu iye Jūmenijicui mearo đacaiyede náre máre. <sup>28</sup> Yu jýu bācu ina Jerusalécavu judíova Jesúre ju aivure caiye iye judíova āmevu ne jýe báquede, ina judíova ne majinajiyeye ayu apevu judíova āmevu jāve ju aivure Jesúre napedeca, etaquijivu nore jocarī nucuy España āmicurijoborōi, aru jácūdaquijivu muje yebai, noi nuñvacari. <sup>29</sup> Aru ji eaiyede muje yebai, majivu yu Jesucristore mearo đacacuyure majare.

<sup>30</sup> Muja, jivu, parurōque jēniaivu mujare, maje ju aiye boje maje jabocu Jesucristore aru űai Espíritu Santoi űede đaiye boje majacavure. Jēniaivu yu mujare, muje jēniacarājiyepe ayu yure Jūmenijicūque parurōreca. <sup>31</sup> Jēniajara űque ina Judea āmicurijoborōcavu Jesúre ju abevu ne āmeina đabenajiyeye aivu yure. Aru jēniajara Jerusalén āmicurīmarocavu Jesúre ju aivu máre ne torojurī jacopurājiyepe aivu ji nūvacauyede náre. <sup>32</sup> Que teni Jūmenijicui urīburu, yu torojucu eacuyumu muje yebai. Aru ji cūe mujaque torojure đaquiyebu yure máre. Caiye diede jēniacajarā yure Jūmenijicūque. <sup>33</sup> Yu jēniaivu Jūmenijicure, űai cārijimenoque cūre đayure pōevare me, űi cuquiyeye ayu caivu mujaque. Quédecabu.

**Pablo ūi meaicōjeino Romacavure**

(Mr 15.21; Hch 16.1; 18.2; 19.29; 1 Co 1.14; 2 Ti 4.20)

**16** <sup>1</sup> Majevucaco űi āmiá Febe ju adobe Jesúre majapedeca. Que baru uvu yu muje me jacopuiyede óre. Ō cadateipēcobe ina Jesúre ju aivu cójijinocavure Cencia āmicurīmarocavure. <sup>2</sup> Me jacopujarā óre, űi Jesúre ju

aiye boje. Nópe daiye jauvu caivu Jesúre ju aipőeva apevu ju aivure. Óvacari me cadateibico obedivu pőevare aru yure máre. Que baru cadatejarā caiye őre jauéde.

<sup>3</sup> Meajarari Prisca aru Aquila máre, ji yóvaimara; memecaivu Jesucristore boje. <sup>4</sup> Ina yainíduima yure boje, ji mauva ne boarí jaruvaríduiyede yure. Que baru urarő pare torojuede jívü yu náre. Aru caivu ina judíova ámevu Jesúre ju aipőeva máre torojuede jívübu náre. <sup>5</sup> Aru quédeca meajarari caivu ina Jesúre ju aipőeva cójijivaivu ne cūrami jívüi.

Meajacurí ñai ji umu Epeneto. Ū ju áme Jesúre caivu apevu Asia ámicurijoborőcavu jipocai. <sup>6</sup> Meajacorí ico María. Pare urarő memecaibicođa ő mujare. <sup>7</sup> Meajarari ina Andrónico aru Junias máre. Ina yúpe paivu judíovabu. Ámeina teivure jēni jacoĩnami cūteima na yúque. Apevu ina Jesúre ju aivu ne daroimara coyurájivu Jesús űi yávaiye méne me pueďadama náre. Aru Jesúre ju arejaquemavu na ji jipocai.

<sup>8</sup> Meajacurí ñai Ampliato, ji umu. Ū ji yóvaimume Jesucristoque cūinávure. <sup>9</sup> Meajacurí ñai Urbano, maje yóvaimu memecayü Cristore. Aru meajacurí ñai Estaquis, apecu ji umu. <sup>10</sup> Meajacurí ñai Apeles. Ū jáďovaimi jáve űi ju aiyede Jesúre. Meajarari ina Aristóbulo cūramicavu. <sup>11</sup> Meajacurí ñai Herodión. Ū máre judíovacacube. Aru meajarari ina Narciso cūramicavu Jesúre ju aivu máre. <sup>12</sup> Meajarari ina pucarā nomiva Trifena aru Trifosa máre. Ūrarőreca memecaďama na maje jabocu Jesúre. Aru meajacorí maje umo Pérsida. Ő máre pare memecaibico maje jabocu Jesúre.

<sup>13</sup> Meajacurí ñai Rufo. Caivu majidivübu űre me ju ayure maje jabocu Jesúre. Aru meajacorí Rufoi paco máre. Ő me cadateibico yure yópe jipacope baju.

<sup>14</sup> Meajarari ina Asíncrito, Flegonte, Hermes, Patrobas, Hermas, aru caivu ina Jesúre ju aipőeva náque curivu máre. <sup>15</sup> Meajarari ina Filólogo aru Julia máre, Nereo aru űi yóco Olimpas, aru caivu ina Jūmenijicui pőeva náque curivu máre.

<sup>16</sup> Me jacoyurārā muja mujevure, muje jivare nuri, muje Jūmenijicu jina mae boje. Caivu Jesúre ju aipőeva cójijinocavu meaicőeďama mujare.

<sup>17</sup> Muja, jívü, yu parurőque jēniaivu mujare yópe: Me jájara ina maucvure ďaivure apevure. Me jájara ina vainí ture ďaríďuivure apevure, ďajocare ďaiyuríďuivure náre ne ju aiyede Jesúre. Me jájara ina bueivure apeno bueinore muje bueiye báquede jaruvarí. Yóvabejarā náre. <sup>18</sup> Ina pőeva ďápiabenama aipe memecaiye jaurőre náre maje jabocu Jesucristore. Quénora ďápiadama na ne ārariyede. Ūbenina yáďadama yávaiye jávepe painore. Ūbenita jujoďadama na ina majibevure.

<sup>19</sup> Caivu pőeva jápiaivübu muje borore, paruėque ju aivure Jesús űi yávaiye méne. Que baru torojurí āravu yu mujare. Yu uvu mujare me majidivure mearo ďaiyede, muje cadatenajiyepe ayu apevure. Ūbenita yu uvu ye majibevure mujare ámeno ďaiyede, muje ámeina ďabenajiyepe ayu apevure. <sup>20</sup> Aru Jūmenijicu, ñai majare cārijimenoque me cure ďayü, maumejiena mujare bíjarocuyume ñai abujuvai jabocure, űi ámiá Satanás. Maje jabocu Jesucristo me cadatejacurí mujare cainumua, űi me boje.

<sup>21</sup> Timoteo, yúque memeu memecayü Jesúre, meaicőejimi mujare. Aru apevu judíova máre, Lucio, Jasón, aru Sosípater máre meaicőeďama mujare.

<sup>22</sup> Yu, Tercio, toivacayü Pablöre űi coyuiyede mujare iyoca paperayocare, mujape páyu yu máre ju ayu Jesúre, meaicőejivu mujare.

<sup>23</sup> Үң, Pablo, сыву Gayoi сўрами. Aru ўи сўрами Jesўre жу айпўевай сўжииўнамиму. Ёай Gayo meaicўjeimi мўжаре. Aru Erasto, yo їмарочаву не тўтўраре coreipўecu мўре, meaicўjeimi мўжаре. Aru Cuarto мўре, аpecу majecu, Jesўre жу аыву, meaicўjeimi мўжаре.

<sup>24</sup> Maje jabocu Jesucristo me cadatejacurї мўжаре cainumua, ўи me boje.

#### **Pablo ўи јїно мearore Јўменижичуре**

<sup>25</sup> Mearore јїжарїри Јўменижичуре caivu cainumua. Јўменижичу паруре дари бўожаибн мўжаре мўје жу айеде Jesus ўи yāvaiye мёне. Iye yāvaiye мёне coyuyubu yu. Jesucristoi borore Јўменижичу јўдовамено мўкарўре јipocamia ўbenita јўдовайноре caride coyuyubu yu. <sup>26</sup> Ъbenita cari ina Јўменижичу yāvaiyede coyucaipўeva мўcavu не toivaiye бўке boje, iye Јўменижичу yāvaiyede јўвене majidivu бўожадама caivu пўева. Javede аpecу пўева majidejaquemavu iye yāvaiyede. Aru Јўменижичу, cainumua аpecу, coreўvaicўjeimi дeде caivu пўеyajuboacavu, не жу арўжйеpe аыву Јўменижичуре, не дарижйеpe аыву ўи ўрўpe. <sup>27</sup> Јўменижичу cўнўcурabe ў. Aru caiyede majibi ў. Cainumua пўева мearore јїжарїри ўре, Jesucristoi дайе boje. Quёdecabu. Quёnoramu.

# 1 Corintios

Mamabuinore coyuiyebu Pablo bácu ũi toivaicōjeiye báquede mamayoca paperayocare Corinto āmicuriīmarocavū Jesúre ju aipōevare. Pablo bácu judíovacacu bácuvacari, Jesús ũi yávaiye méne beorī coyūicōjeimū marejaquémavū, coyucuyū ũi yávaiye méne judíova āmevure, judíova ne ju abe boje ũi coyuiyede. Lucas bácu coyurejaquemavū Pablo bácuī borore Hch 7:57-8:1, 9:1-31, 13:1-28:31, aru ũi cuede Corinto āmicuriīmaroi 18:1-18. Javede Pablo bácuī toivacaipōecu bácuī toivaicōjenejaquemavū pucayoca ũi paperayocare Tesalónica āmicuriīmarocavure. Pablo bácu coyurejaquemavū ũre toivacaipōecu bácuī aipe ũi toivacaquiye báquede diyocare. Toivaicōjenejaquemavū diyocare āniūjua báquede 54-55 d.C., yóbecue ũi cucunuiyede, coyucuyū Jesús ũi yávaiye méne. Curejaquemavū Éfeso āmicuriīmaroi ũi toivaicōjeiye diyocare (16:8, Hch 19).

Diyocaque Pablo bácu coyurejaquemavū aipe daiye jaurōre Jesúre ju aipōevare. Coyurejaquemavū Corintocavū ne jēniari jāiye báquede ũre ne paperayocaque purubuiyede (cap. 7), āiyede pōeva ne jīye báquede pēpeimarare (cap. 8), Espiritu Santo majide daiyede Jesúre ju aipōevare ũi majiécārōque (caps. 12-14), aru ne jínaiyede ina Jesúre ju aipōeva Jerusalén āmicuriīmarocavū cūve cūvabevure (cap. 16). Aru jararejaquemavū Corintocavure ne yajuboa tede daiyede (caps. 1-3), ne ñājine dabe boje nácacu āmeina ñaipōecure (cap. 5), ne coyuiye boje ne jaraiyede ne bajumia āmeina teivure jēniari jāipōeva Jūmenijicure coreóvabevū ne jivateinoi (cap. 6), aru ne āmeina teiyede ne cōjijivaiyede (cap. 11). Jáðovarejaquemavū aipe daiye jaurōre Jesúre ju aipōevare ũi coyuiyeque Jesúī daroimarare coyurājivure ũi yávaiye méne (cap. 4), ũi baju daiyede (cap. 9), aru Israecavū bácuī ne daiye báquede (cap. 10). Aru ārure ñarejaquemavū náre Jesús ũi yávaiye méne (cap. 15).

## Pablo ũi meaicōjeino Corintocavure

(Hch 18.1)

**1** <sup>1-2</sup> Yū, Pablo, toivaicōjeivū apecure iyoca paperayocare. Meaicōjeivū mūja cōjijivaiyū Corinto āmicuriīmarocavū Jūmenijicūī pōevare. Jūmenijicū beorī epeiī yūre Jesucristoi yávaiye méne beorī coyūicōjeimaracacure. Sóstenes máre, majecu ũi ju aipe boje Jesúre majapedeca, meaicōjeimi mūjare. Caiyū mūjarecabu Jūmenijicūī cutuimara mácavū ũ jinava meara baju. Mūjarecabu curivū Jesucristoque cūinávape, yópe çavū pōeva cainoa joborōacavupe mearore jívū maje jabocu Jesucristore. Ũrecabe ne jabocu aru maje jabocu máre. <sup>3</sup> Majepacu Jūmenijicū, maje jabocu Jesucristomaque, mearo ñacajacurī mūjare bojecubeda ũi me boje. Aru torojurī cure ñajacurī mūjare cārijimevūva.

## Cristo ũi mearo ñacaiyede ũre ju aivure

<sup>4</sup> Cainumua Jūmenijicure torojuede jívaivū, ji mearore jímure, mūjare boje. Jūmenijicū Jesucristore mearo ñacare ñaibi mūjare bojecubeda. Que baru ũre

torojuede jíyubu. <sup>5</sup> Muje cue boje Jesucristoque cūinávupe, Jūmenijicu mearo đacaibi mujare urarō baju. Caiye ũ jiede coreóvare đaiibi mujare. Aru diede mujare me coyure đaiibi majiéque apevure máre. <sup>6</sup> Pueno baju muje coreóvare nuiyede Jūmenijicui yávaiyede jăvene Cristoră, pueno baju oatuvaibi mujare, muje mearo đarăjiyepe ayu. <sup>7</sup> Que baru caride muje napini coreiyede maje jabocu Jesucristoi copaidaquiyede, ye jaubevu mujare cūinájino Jūmenijicui majiécărō iye ũi majide đaiye ũi pōevare Espíritu Santoque, ne cadatenajiyepe ayu apevure. <sup>8</sup> Jūmenijicu parure đacuyume mujare muje ũmei pū ijaravu cūiyeta, ñame ne buojabenajiyepe ayu boropadaivu mujare maje jabocu Jesucristoi copaidaquijăravu baquinóre. <sup>9</sup> Jūmenijicu đaiibi cainumua yópe ũi aiye báquepedeca. Ũrecabe mujare cuturī epeyu maje jabocu Jesucristoque cūinávupe, “Yóvajarări na jımacu Jesucristoque”, ũi aiye báquepedeca.

**Corintocavu Jesúre ju aivu ne yajuboa tede đaino**

(Hch 18.8, 24; 19.29; Ro 16.23; 1 Co 16.15)

<sup>10</sup> Muja, jívu, maje jabocu Jesucristo yópe coyucōjeimi yure. Parurōreca jēniaivu mujare, muje dăpiarăjiyepe ayu cūináturu muje ũmei. Yajuboa tede đabejară muje jēneboi. Cărijımenoque cujară muja. Cūináturu bajađeni muje ũme, muje dăpiaino máre. <sup>11</sup> Muja, jívu, nōpe coyuyubu mujare ico Cloé ōi cūramicavu, ne coyuiye boje yure muje jaraiyede muje baju. <sup>12</sup> Muja dăpiabevuya cūináturu muje ũmei. Quénora apevu mujacavu, “Ñujamu Pabloi bueimara”, adama. Aru apevu mujacavu, “Ñujamu Apoloi bueimara”, adama. Apevu mujacavu, “Ñujamu Pedroi bueimara”, adama. Aru apevu mujacavu, “Ñujamu Cristoi bueimara”, adama. <sup>13</sup> ¿Aipe teni nōpe dăpiaivurū muja, yajuboa tede đaiivu? Caivu Jesúre ju aipōeva curıvubu ũque cūinávupe. Jăve âmevu muje ũbenina arı dăpiaiyede apevu ũre ju aivu curıvure ũque cūinávupe, ũbenita apevu ũque cubevure. Aru yu âmevu ñai ne pēvari jēoımu măcu jocucujaravena mujare boje. Aru ocoque muje jăđovaiyede Jūmenijicunque, “Yu Pablora ju aivu”, abeteavū muja. Quénora “Jesucristore ju aivu”, ávū muja.

<sup>14-15</sup> Mujacavu obebejinare ocoque jăđovacacu yu Jūmenijicunque. Crispore aru Gayore máre quévura Jūmenijicunque jăđovacacu yu ocoque. Jūmenijicunque ji jăđovaru obedıvu pōevare ocoque, “Pabloi bueımaramu ñuja”, arăjıchuma na. Que baru torojuede jívu Jūmenijicure, ji jăđovame boje ocoque obedıvu mujare ũque. <sup>16</sup> Estėfanare ũ jıvuque ārıvu yu caride. Năre máre Jūmenijicunque jăđovacacu yu ocoque. Ārumetevu yu apevu ji jăđovaimara măcavure, curıvu baru. <sup>17</sup> Cristo jarobeteame yure, ji jăđovaquiyepa ayu pōevare Jūmenijicunque ocoque. Quénora jaroáme yure, ji coyuyuiyepa ayu iye yávaiye méne ũi meadacaiyede pōevare ne âmeına teiyede jarıvarı. Ũbenita yu coyubevu iye yávaiye méne pōeva ne majiéque aru me yávaiyeque máre. Ũbevı yu ne ju aiye yu yávaiye méne, die me jăpurae boje. Quénora uvı yu ne ju aiye diede Cristoi yaiye báque boje jocucujaravena. Que baru bojecube tede đaiyubevu yu ũi yaiye báquede ji coyuiyeque.

**Jūmenijicu ũi jăđovaino ũi parúede aru ũi majiėde Cristoque**

(Ro 1.16; 2 Co 10.17)

<sup>18</sup> Ina pōeva bıjare nuıvu Jūmenijicure jocarı toabo cūıméboi ne jăpiaiyede iye yávaiye méne Cristoi meadacaiyena pōevare ũi yaiye báque boje

jocucujaravena, “¿Ubeni márica?” arī dāpiadama na. Ārumevure jādama caivu coyuvure iye yávaiye méne Cristorā. Que baru ju abema úre. Ubenita majacapuravu meadare nuivubu cavarō mearo Jūmenijicui curōi ūi oatuvare đaiye boje majare iye yávaiye méque Cristorā. Coreóvare đaiibi majare ūi paruéde iye yávaiye méque. <sup>19</sup>Yópe arī, toivaicōjenejaquemavu Jūmenijicu ūi yávaiyede ina Cristore ju abevu ne borore:

Ina majidivu ne majiéde jaruvacuyumu yu. Aru ina coreóvaivu ne

coreóva iyede bojecube tede đacuyumu yu, arejaquemavu Jūmenijicu.

<sup>20</sup>Que baru ye baquinó ámevu ina majinidivuvu ne majié ijaravunque, aru ina buenidivuvu ne majié ijaravunque, aru ina majicaridivuvu apévure máre ne majié ijaravunque. Caiye iye ne majiniduiyede ubenina bojecube tede đaiibi Jūmenijicu. <sup>21</sup>Jāve caiyede majibi ū. Aru, “Ijaravucavu ne majiémia ye coreóvaivu bujabema yure”, arejaquemavu ū. Quénora, “Ina pōeva ju aivu ji yávaiye méne Cristorā ji meadacaimara mārājivubu”, arejaquemavu Jūmenijicu. Iye yávaiye ménecabu Cristorā, ūi meada iyede pōevare, ñuje coyuiye.

Ubenita, “¿Ubeni márica?” arī dāpiadama ñuje coyuiyena ijaravucavu Jūmenijicure ju abevu. Que baru iye ñuje coyuiye bojecubevu, ne dāpiaru.

<sup>22</sup>Ina judiova jáiyurivubu pōeva ne đarī majibede, ne ju arājiye jipocai apesu ūi coyuiyede náre. Aru ina griegova jápiaiyurivubu pōescu ūi coyuiyede ijaravunque majiéde, ju arājivu ūi coyuiyede. <sup>23</sup>Ubenita ñujacapuravu quéda cūináne coyuvubu. “Cristo jabovai pēvari jēoimu mácū jocucujaravena yaidéjaquemavu, bojedacuyu maje ámeina teiyede, jaruvacuyu diede”, arī coyuvubu ñuja. Ubenita ina judiova jorojĩnama ne jápiaiyede iye ñuje coyuiyede, ñai jabotejurocure náre. Aru ina judiova ámevu ne jápiaiyede diede, “¿Ubeni márica?” arī, bojecubepeda dāpiadama iye ñuje coyuiyede.

<sup>24</sup>Ubenita majacapuravu coreóvaivubu Cristo Jūmenijicui paruéde cuvacure aru Jūmenijicui majiéde máre cuvacure, ūi meadaquiyepe aivu pōevare. Majarecabu Jūmenijicui cuturī epeimara ū jinava, judiova aru judiova ámevu máre, Cristoi meadaimara. <sup>25</sup>Pōeva aivu baru “Jūmenijicu majibebi”, nárecabu majibevu. Jūmenijicu majicutame caivu pueno, majibecupe páyuvacari pōeva ne jáiyede. Pōeva aivu baru “Jūmenijicu parubebi”, nácapuravu ye majibema. Jūmenijicu parucutame caivu pueno parubecupe páyuvacari pōeva ne jáiyede.

<sup>26</sup>Muja, jivu, ārūjara iyede. Jūmenijicui cutuquiye jipocamia mujare, obebejina mujacavu majitequemavu ijaravunque majiéde, obebejina parurivure cojequemavu apavu pōevare, aru obebejina cuvatequemavu mujebucava parurivu ne jabovava. <sup>27</sup>Que baru Jūmenijicu beorī epeibi ū jinava pōeva majibevure ijaravunque majiéde, cūyoje tede đacuyu ina pōeva “¿Majidivuvu bárica ñuja?” ariduivure. Aru Jūmenijicu beorī epeibi ū jinava pōeva parubevure ijaravunque paruéde, cūyoje tede đacuyu ina pōeva “¿Parurivuvu bárica ñuja?” ariduivure. <sup>28</sup>Jūmenijicu beorī epeibi ū jinava jabova ámevure, ijaravucavu ne ubemarare, aru parubevure caivu ne cāchinocavure. Majarecabu Cristoi meadaimara. Que teni Jūmenijicu cūiné đacuyume caivu ina “Parurivubu ñuja”, aivure ubenina. <sup>29</sup>Que baru ñame “¿Meara márica?” aivu bujabema Jūmenijicui jáinore. <sup>30</sup>Jūmenijicurecabe cure đayu majare cūinávure Jesucristoque. Aru Cristoque majide đaiibi majare ūi buei yede

jāvene. Jesucristo boropatebevūpe daibi majare Jūmenijicui jāinore. Coatede daibi majare āmenore jarūvarī, maje darājiyepe ayu yópe Jūmenijicui ūrōpe. Aru bojedaibi majare maje āmeina teiyede jarūvarī. <sup>31</sup> Que baru yópe arī, toivaicōjenejaquemavū Jūmenijicu ūi yāvaiyede: “Nai pōecu ‘¿Meacu bārica?’ arī coyūiyacu baru, ūi bajuma nōpe arī coyūbejacurī. Quénora ‘Meacu bajube maje jabocu cavarō mearocacu’, arī coyūjacurī ū”, arī toivaicōjenejaquemavū Jūmenijicu.

**Cristo jabova ne pēvari jēoimu mácure coyūino**

(Hch 18.9)

**2** <sup>1</sup> Mūja, jīvū, ji jācūnūiye báquede mūje yebai, coyūcūyū Jūmenijicui yāvaiyede, coyūbetecacu yū yópe ina ijāravūcavū majidivū ne coyūiyepe. Mūjare coyūcacu iye Jūmenijicui yāvaiyede, jādovameno mácārōre jipocamia ūbenita jādovainore caride, mūje coreóvabejuroede apesu ūi coyūbedu diede mūjare. Ūbenita majidivū ne yávaicamuaque coyūbetecacu yū. Aru maiyójae yávaicamuaque máre coyūbetecacu yū. <sup>2</sup> Mūje me coreóvarājiyepe ayū iye Jūmenijicui yāvaiyede, “Cūináene quénora coyūquijivū ina Corintocavūre”, arī dāpiacacu yū, ji buequiye jipocamia mūjare. Que baru, “Jesucristo, jabova ne pēvaimū mácū jocūcujaravena, yaidējaquemavū majare boje, jarūvacūyū maje āmeina teiyede”, arī coyūcacu yū mūjare. Yū ūre quécūra coreóvare daiyutecacu mūjare. <sup>3</sup> Jidūcū ji yāvaiyeque eacacu yū mūje yebai. “Jūmenijicui yāvaiyede me coyūrī buojabequijichūvū yū”, ji arī dāpiaiye boje, jidūrī bidicacu yū. <sup>4</sup> Ji coyūiye báquede mūjare Jūmenijicui yāvaiyede yópe ina ijāravūcavū majidivū ne coyūiyepe coyūbetecacu yū. Majidivū ne yávaicamuare aru maiyójae yávaicamuare máre coyūbetecacu yū, mūje ju abenājiyepe ayū ji coyūiyepe iye jāpurae boje me. Quénora ji coyūiye báqueque mūjare jādovacacu Espíritu Santoi paruéde. Aru ūi paruéde majide dāme mūjare iye yāvaiye méne. <sup>5</sup> Que baru mūja ju aivūbu Jūmenijicui yāvaiye méne Cristorā, Jūmenijicui jādovaiye boje ūi paruéde. Ūbenita pōeva ne majié boje, mūja ju aivū āmevū.

**Jūmenijicui majiéde ūi coreóvare daino Espíritu Santoque**

(Ro 11.34)

<sup>6</sup> Yū máre coyūivū majiéque. Ūbenita ijāravūcavū ne majiépe āmevū. Aru ijāravūcavū ne jabova ne majiépe āmevū. Iye ne majié ijāravūque cūinē nūivū. Quénora iye majié ji coyūiyeque coyūivū yū ina Jesúre ju aipōeva parūre nūivūre ne ju ayeque ye jāubevūva ne coreóvaiyede Jesúre. <sup>7</sup> Iye majié ji coyūiyebu Jūmenijicui majié. Javede ūi cūedaquiye jipocamia ijāravūre, majidejaquemavū meadacūyū majare, maje curājiyepe ayū meara baju ūque cainūmūa. Cristoi daquiye jipocamia ijāravūi, Jūmenijicu jādovamenejaquemavū iye ūi majiéde, ūi daquiyepe. Ūbenita diede jādovaimi caride. <sup>8</sup> Ijāravūcavū ne jabova caivū ye coreóvabedejaquemavū iye Jūmenijicui majiéde. Ina jabova coreóvaivū baru, pēvari jēomejebu maje jabocu cavarō mearocacure meacu bajure jocūcujaravena. <sup>9</sup> Aru iye ūi mearo daquiyepe ūi meadaiyede, yópe arī, toivaicōjenejaquemavū Jūmenijicu ūi yāvaiyede:

Jūmenijicu meadaibi ūi mearo daquiyepe ina pōevare ūre ūrivūre, yópe pōeva ne jāmene, aru ne jāpiabede, ne dāpiabede máre, arī toivaicōjenejaquemavū Jūmenijicu.

<sup>10</sup>Iye ñi mearo ñacaquiyede ñi Espiritu Santoque coreóvare ñaibi majare. Ñai Espiritu Santorecabe majicu caiyede. Pñ caiye iye Jūmenijicui urarō majiéde majibi ñ.

<sup>11</sup>Põecu cubebi coreóvayñ apescu põecui dápiayede. Quécura ñai põecu coreóvaibi ñi baju dápiayede. Quédecabu Jūmenijicu jie máre. Põecu cubebi coreóvayñ Jūmenijicui dápiayede. Ñai Espiritu Santo quécura coreóvaibi diede. <sup>12</sup>Ñai Espiritu Jūmenijicui daroimñ majare põeva ne majiéde coreóvare ñabebi majare. Quénora Jūmenijicui majiéde coreóvare ñaibi majare, maje coreóvarājiyepe ayñ iye Jūmenijicui mearore ñacaiyede majare bojecubeda. <sup>13</sup>Que baru ji coyuiyede Jūmenijicui yávaiyede, coyubevñ yñ põeva ne bueiye yure o ji baju dápiayede. Quénora coyuiñ yñ ñai Espiritu Santoi bueiye yure. Que teni bueiñ yñ ina cvarivure Espiritu Santore iye yávaiyede ñai Espiritu Santoi coreóvare ñaiyede yure.

<sup>14</sup>Ûbenita ina Espiritu Santore cuvabevñ coreóvaivñ buojabenama iye Jūmenijicui mearo ñacaiyede bojecubeda ñi Espiritu Santoque. Ne jápiayede Jūmenijicui yávaiyede ñi majiéque coyuiyede, “¿Ûbeni márica?” arí dápiadama na. Ne dápiaru, die bojecubevñ. Ácu põecu Espiritu Santore cuvabecu baru, Jūmenijicu jiede ye coreóvabebi ñ. <sup>15</sup>Ñai Espiritu Santore cuvacu, caiye bueiye ñi jápiayede, “Jūmenijicui majiéque bueyube” o “Põeva ne majiéque bueyube”, nurié arí coyurí majibi ñ. Ûbenita ñi baju bueiye nurié arí coyurí majibebi põecu Espiritu Santore cuvabecu. <sup>16</sup>Yópe arí, toivaicōjēnejauemavñ Jūmenijicu ñi yávaiyede: “Põecu cubebi Jūmenijicui dápiayede majicu. Aru põecu cubebi majicarí buojayñ Jūmenijicure”, arí toivaicōjēnejauemavñ. Ûbenita maja Jesucristore jñ aipõeva dápiavubu yópe ñi dápiayepe.

### **Jūmenijicure memecaivñ ne yóvaino ne baju**

(Hch 18.4-11, 24-28; 1 Co 1.12; 6.19; 2 Co 6.16; He 5.12-13)

**3** <sup>1-2</sup>Muja, jivñ, ji cñe báquede mujaque, coyuyñ buojabetecacu mujare yópe ji coyuiyepe ina Jesúre jñ aipõeva, parure nuivure ne ñmei Espiritu Santoque. Quénora coyuiye jauteavñ yure mujare, Jesúre jñ aipõeva Espiritu Santore cvarivureca, yópe ji coyuiyepe Jesúre jñ abevñ Espiritu Santore cuvabevure. Juedojīnape paivñ bateávñ muja. Juedojīna opeco matuiyeda ũcuñaima aru āiyede āiye majibema. Quédeca muja juedojīnape paivñ muje ũme, quénora Jūmenijicui yávaiye maiyójabede Cristorā jápiarí eavñ muja, aru ñi yávaiye maiyójaede jápiarí eabeteavñ muja. Aru caride máre, bueiye maiyójaede jápiarí eajurorivvacari, jápiarí eabevutamñ muja cāreja. <sup>3</sup>Nopedecabu muje dápiaye boje aru muje ñaiye boje máre yópe ijāravucavñ Jesúre jñ abeni Espiritu Santore cuvabevñ ne dápiayepe aru ne ñaiyepe máre. Muja jaraðavñ muje bajumia cāreja. Aru muja tebutedavñ muje baju cāreja. Muje nópe ñaiye boje, jáðovavñ parure numevñ muje ñmei Espiritu Santoque. Quénora ñare nuñavñ muja yópe ijāravucavñ Jesúre jñ abevure. <sup>4</sup>Cūinácñ mujacacu “Pablo ñi bueimñmu yñ” arí, aru apescu “Apolos ñi bueimñmu yñ” arí, jáðovavñ ijāravucavñ Jesúre jñ abevure paivñbu muja.

<sup>5</sup>¿Ye paruéde cvari ñai Apolos, aru ye paruéde cvari yñ, põeva ne yóvarājiyepe aivñ ñujare? Ñujacapūravñbu Jūmenijicure memecaivñ quéda. Ñuje memecaie boje ũre, muja jñ aivñbu maje jabocu Jesucristore.

Ñuja coapa ðaivubu ñuje memeiye yópe Jūmenijicui memeiçōjeiye báquepe ñujare. <sup>6</sup> Yópe cūinácu jiore memeiðöescu ũi oteiyepe, nopedeca mamarumure Jūmenijicui yávaiye méne coyucacu yu mujare. Aru yópe apecu ũi meadaíyepe iye oteiyepe, nopedeca ji yóboi mujare buequemavu Apolos. Ũbenita yópe Jūmenijicui bucure ðaiyepe iye oteiyepe, nopedeca úrecabe pöevare ju are ðayu ũi yávaiye méne. <sup>7-8</sup> Que baru ye baquinó ámevu yu mamarumucacu, coyucu Jūmenijicui yávaiye méne, yópe oteiðöescu. Aru ye baquinó ámemi ñai Apolos, yóbocacu, ñai bueyu diede máre, yópe meadaíðöescu. Ñujacapuravu cūináturutamu. Cūinácu ñujacacu apecu puenocacu ámemi. Ũbenita Jūmenijicurecabe caivu maja maje puenocacu, ũi ju are ðaiye boje pöevare ũi yávaiye méne, yópe ũi bucure ðaiyepe oteiyepe. Ũbenita mamarumucacu, yu coyucu, aru yóbocacu, ñai bueyu, cūináturu çarivuvacari ñuje memeiyeque, cūináturu ámevu ñuje iye bojeque. Quéhora Jūmenijicu bojedacuyume ñujare coapa, yópe ñujare jauépe ñuje memeiye báque boje. <sup>9</sup> Memecaíðöevarecabu ñuja. Jūmenijicurecabe ñuje memecaimu. Aru ñuje baju yóvaivubu ñuje memecaiyepe úre. Mujacapuravu jiope paivubu. Aru yópe jiore memeiðöescu ũi memeiyepe, nopedeca Jūmenijicurecabe memenu mujare, oatuvacuyu, meara ðacuyu.

Apenore máre jévari coyuiquijivu yu. Muja çuramipe paivu bárājivubu. Aru Jūmenijicurecabe ñai ðayu ðínamine. <sup>10</sup> Yópe pöescu çuvaiyucu meadami çurami çuravaque ðaínamine ũi ðarí buicōjeiyepe ðínamine cūinácu çuraque memeiðöescu me majicure, nopedeca Jūmenijicu yure majide ðaríburu yóboi ũi majiéque, coyurí buicōjeame ũi yávaiye méne mujare. Yópe apecu memeiðöeva ne memene nuiyepe ðínamine, nopedeca apecu yí yóbocavu buede nuñama mujare. Aru yópe ina memeiðöeva ne me jáiyepe aipe ne memeiyepe, nopedeca me jájarari ina mujare bueiðöeva coapa aipe ne bueiyepe, jáve maquiyépe aivu. <sup>11</sup> Yópe memeiðöescu ũi ðarí buojabepe çuravaque ðaínamine çurava çuvabecuva, nopedeca apecu bueni buojabebi Jūmenijicui yávaiyepe jávene, Jesucristorá coyubecuva. <sup>12</sup> Yópe apecu memeiðöeva ne memeiyepe bojecueque, yópe úruque, plataque, aru bojecurijíboa çurajiboaque máre, nopedeca apecu me nurié coyuvubu Jūmenijicui yávaiyepe. Ũbenita yópe apecu memeiðöeva ne memeiyepe bojecubeque, yópe jocuveaque, muiyocaque, aru cōriáque máre, nopedeca apecu nurime coyuvubu Jūmenijicui borore. <sup>13</sup> Jesucristoi daquijáravu, ũi ñájiovaquijáravu baquinói pöevare, ne ámeina teiye boje, me jáðovacuyume ũi toaque aipe árojaene caivu pöeva ne ðaiye báquede ijáravui. <sup>14</sup> Pöescu nurié buedu Cristorá, ũi ðaiye éni cūiméquiyebo no toaque. Aru Jūmenijicu me bojedacuyume úre, yópe memeiçōjeipöescu ũi me bojedaiyepe úre memecayure, bojecueque memenu mácure. <sup>15</sup> Ũbenita pöescu nurime buedu Cristorá, ũi ðaiye éni cūiquíyebo no toaque. Aru Jūmenijicu bojedabecuyume úre, yópe memeiçōjeipöescu ũi bojedabepe úre memecayure, bojecubeque memenu mácure. Nai pöescu ũi ðaiye boje bíjaquiyebu úre jocarí. Ũbenita úvacari bíjabecuyume. Meadaimu macuyúme yópe pöescu ũi cýarí dupini nuiyepe çurami toaque uruiñamine jocarí.

<sup>16</sup> Caivu maja Jesúre ju aipöeva Jūmenijicui çuramipebu, maje çuvae boje ũi Espíritu Santore. Yópe pöeva ne çuepe çurami jívui, ñai Espíritu Santo cubi maje úmei. ¿Diede coreóvabenaru muja? <sup>17</sup> Yópe Jūmenijicui çurami meadami

bajupe, mujarecabu Jūmenijicui pōeva meara baju, memecarājivū ūre. Que baru ácu pōecu, ūi bueiyede jāve āmeque, bījare đaiyurīburu yóboi mujare, ūi dajocare đaiyurīduiyede mujare muje ju aiyede Jesúre, Jūmenijicuvacari bījarocuyume ūre.

<sup>18</sup> Muje bajumia apecure jujoaicōjemejara. Cūinácu mujacacu “¿Majicu bárica yu ijāravucavu Jesúre ju abevu jiede?” arī dāpiayū baru, ūbenina arī dāpiarīduibi ū. Nai nópe arī dāpiayū majibecupe tejacurī ijāravucavu Jesúre ju abevu ne jāiyede, ūre Jūmenijicui majide đaquiyepa ayū majié jāveque. <sup>19</sup> Ijāravucavu Jesúre ju abevu ne majié bojecubevu Jūmenijicui jāinore. Ne coyuiyede ne majiéque, “Ūbenina coyuiyebu”, arī dāpiaibi ū. Yópe arī, toivaicōjenejaquemavu ūi yávaiyede: “Ina ‘¿Majidivū bárica ñuja?’ ūbenina arī majinidivure jaruvaibi Jūmenijicu, ne baju majinidivure boje”, arī toivaicōjenejaquemavu. <sup>20</sup> Aru yópe máre arī, toivaicōjenejaquemavu Jūmenijicu: “Maje jabocu majibi ina ‘¿Majidivū bárica ñuja?’ arī majinidivure ne dāpiaie ye bojecubede”, arī toivaicōjenejaquemavu. <sup>21-22</sup> Que baru arī dāpiabegarā cūinácu pōecu majicure apevu pūeno. Que baru, “Pablo ūi bueimūmu yū”, o “Apolos ūi bueimūmu yū”, o “Pedro ūi bueimūmu yū”, abejarā muja. Caivu mujare bueipōevare aru caiye apede Jūmenijicui mearo đacaiyede epedejaquemavu ū majare boje. Ijāravure, maje cuede, maje yainājiyede, caride, aru javenare máre epedejaquemavu Jūmenijicu, majare boje. <sup>23</sup> Majamu Cristo jina, đarājivū yópe ūi ūrópe. Aru Cristobe Jūmenijicui jicu, đacuyū yópe ūi ūrópe.

**Aipe ne memeino ina Jesúi daroimara coyucarājivū ūi yávaiye méne**

(Hch 18.3; 1 Co 11.1; Fil 3.17; 1 Jn 3.19-21)

**4** <sup>1</sup> Jájara ñujare, Jesucristoi daroimarare coyucarājivū ūi yávaiye méne, yópe ūre memecavure. Ñujare buaicōjeimi pōevare Jūmenijicu “Yópe đacuyūmu yū, meadacuyū pōevare ne āmeina teiyede jaruvārī”, ūi arī dāpiaino jáđovameno mácarōre jipocamia ūbenita jáđovainore caride. <sup>2</sup> Aru ñai pōecu Jūmenijicui buaicōjeimu mácure bueiye javu iye yávaiye méne Cristorā dajocabecuva aru diede oatuvabecuva máre. <sup>3</sup> Yúcapūravure ye baju āmevu muje coyuiyede mearore o āmenore ji bueiyena. Ye baju āmevu yure apevu pōeva máre ne coyuiyede mearore o āmenore ji bueiyena. Aru yúvacari máre mearore o āmenore ye coyubevu ji baju bueiyena. <sup>4</sup> “Boropatebevū yū”, arī dāpiavū cainūmua Jūmenijicui jāinoi. Ūbenita ye baju āmevu ji boropatebedu ji dāpiainore. Maje jabocurecabe ñai coyucuyū yure, “Boropateyubu mu ji jāinoi”, o “Boropatebecabu mu ji jāinoi”. <sup>5</sup> Que baru caivu pōeva ye coyubejarāri apecure mearore o āmenore ūi coyuiyena, ānijāravū maje jabocu Jesucristoi čopaidaquijāravū baquinó jipocamia. Corejarā muja pū ūi copaidaiyeta. Ūrecabe coreóvare đacuyū caiye maje majibede cāreja, pōeva ne đaiyede yavenina. Aru ūrecabe coreóvare đacuyū caivu pōeva coapa ne dāpiaiyede aipe ne đarājiyede máre. Dinūmu maquinóre caivu pōeva coapa ne mearore đaru, mearore jícuyume Jūmenijicu náre coapa.

<sup>6</sup> Muja, jívū, jēvari coyūquijivū yū caiye iyede Apolore aru yure máre, cađatecuyū mujare, muje đaicōjenidubenajiyepa ayū pōevare apede Jūmenijicui yávaiyede ūi arī toivaicōjeiye báquede jocarī aru muje

abenajiyeye ayu cūinācu mujare bueipōecurā, “¿Majicu bārica ũ apevu pueno?” muje āmeina jáiyede apevure. <sup>7</sup>Jāve ũ majibecube apevu pueno. Caiye muje majiède muje cūvaede majide ðaibi Jūmenijicu. ¿Aru ũi majide ðaiye boje diede, aipe teni yávaivurū muja yópe majidivupe muje baju majièque? Que baru, “¿Majidivu bārica ñuja apevu pueno?” arī dāpiaiyee jaubevu mujare.

<sup>8</sup>“Caiye iye Jūmenijicui majiède jave majidivubu ñuja”, arī dāpiarīduyavū muja. Aru, “Caiye iye Jūmenijicui jījuroede jave cūvarivubu ñuja”, arī dāpiarīduyavū muja. Que baru caride “Iye majié Jūmenijicu jie caiyede cūvarivubu ñuja”, ũbenina arī dāpiaðavū muja. “Me cūrivubu ñuja Jūmenijicunque”, ũbenina arī dāpiaðavū muja. “Ñuja jabovatamu, apevu Jūmenijicui pōevare cōjeivu”, ũbenina arī dāpiaðavū muja. Que baru ñujare āmeina jári bojecubevupe jaruvaðavū muja. Muje jāve cōjenu, meajebu ñujare. Ñuja máre yóvaje bu mujare muje jaboteiyede, cūvarājivu Jūmenijicui mearo ðacaiyede mūjaque. <sup>9</sup>Ūbenita ji dāpiainoi, Jūmenijicu epei bi ñujare, Jesúi daroimarare coyucarājivu ũi yávaiye méne, caivu apevu ne cāchinocavupe. Cūrivubu ñuja yópe jabovai buoimara ne boarī jaruvārājimarape. Caivu ijaravucavu, ángeleva aru pōeva máre, jáðama ñuje ñájiyede yópe āmeina teivupe.

<sup>10</sup>Ijaravucavu Jesúre ju abevu, “Majibema na, ũbenina coyui vu”, adama ñuje borore, Jesúi daroimarare coyucarājivu ũi yávaiye méne. Ūbenita mujacapūravu “Jesucristo caiyede coreóvare ðaibi ñujare”, arī dāpiaðavū, ũbenina dāpiaivuvacari. Ñujacapūravu buení majibevu paruéque. Ūbenita mujacapūravu “Paruéque bueivubu ñuja”, arī dāpiaðavū, ũbenina dāpiaivuvacari. Aru mujatamu pōeva ne pueðaimara. Ūbenita ñujatamu ne āmeina jáimara. <sup>11</sup>Que baru javede aru caride máre, cainumua ñáji vubu ñuja. Ávué ijivaivu ñujare. Cūiñóvaivu ñujare. Cuitótecajea jauvaivu ñujare. Ñuje mauva pare ñáji ovaivubu ñujare. Aru cūvabevu ñuje cūramiva. <sup>12</sup>Memevaivubu ñuje puruáque pu ũetuivuta, bojedarájivu ñuje árajíyeva. Pōeva ne āmeina yávaiyede ñujare, “Majepacu mearo ðacajacurí mujare”, ávaivubu náre. Pōeva ne ñáji ne ðaiyede ñujare, napivaivubu ñuja. <sup>13</sup>Pōeva ne borocurí ámenore coyuiyede ñujare, copu mearore coyuvai vubu náre. Ne dāpiaru, jaruvaiyeye paivubu ñuja. Ye bojecubevupe paivure jávaivubu ñujare.

<sup>14</sup>Caiye iye ñuje ñájiyede ji toivaicōjeiyede apecure mujare toivaicōjemevu cūyoje tede ðacuyu mujare. Quénora toivaicōjeivu ũre diede, majicacuyu muja ji ũmarare, jámarape paivure. <sup>15</sup>Muja cūvarivuvacari obedivu baju bueipōevare, cūinācu quécara, yure, cūvarivubu mujepacupe, ji búre ðaiye boje muje cuede Jesucristoque cūinávupe, mamarumure ji coyuiye boje mujare ũi yávaiye méne. <sup>16</sup>Que baru parurōreca jēniaivu mujare: Ðajarā yópe ji ðaiyeye.

<sup>17</sup>Que baru Timoteore jaroivu muje yebai. Éme jímacupe páyu, ji ũmu, ũi cue boje Jesucristoque cūinávupe, ðajocabecuva ũi ju aiye de ũre. Árrure ðacuyume mujare aipe ji ðaiyeye, ji ju aiye boje Jesucristore. Aru cainumua ðaivu yu yópe ji ðaicōjeiyepedeca ji bueiyede caivu Jesúre ju aipōeva cóji jivaivure cainore. <sup>18</sup>Apevu mujacavu arī dāpiarīduyama numecuyureca yu muje yebai, ji jidué boje. Que baru, “¿Majidivu bārica

ñuĵa?” arĩ dápiaĉama na, ne dápiaŕĩduiye boje yu coyubecũncũyũre náre, ne ámeina yávaiye báque boje yure. <sup>19</sup>Ŭbenita maje jabocu ũi uru, jáve ncũyũtu muje yebai maumejiena. Ji eaiyede nore, jácũyũtu ne ĉaiyede, ina ũbenina arĩ dápiaŕĩduivũ ne baju majidivũ. Jácũyũtu ne ĉaru majiéque, o quénora majidivũpe tedu ne yávaiyeque. <sup>20</sup>Maja Jũmenijicui jaboĉaimara teni buojabenamu maje yávaiye boje o apecui yávaiye boje máre. Quénora Jũmenijicui jaboĉaimara teni buojadavũ maje ĉaiye boje yópe Jũmenijicui urópe ũi paruéque. <sup>21</sup>¿Ji eaiyede muje yebai, aipe ĉaji? Muje ĉare nuru yópe muje ĉaiyepe caride, mujare jararĩ ñájine ĉacũdacũyũtu. Ŭbenita oatũvaru muje ĉaiyede, ĉarájivũ yópe Jũmenijicui urópe ũi paruéque, mujare jácũdacũyũtu ji ueque, meacu ũmũpe.

**Aipe ĉaiye jauróre Jesúre ju aipõeva cũinácu nácacu ũi ámeina ĉaiye boje nomióque**  
(Gá 5.9)

**5** <sup>1</sup>Jápiaicacu yu, “Ámeno baju ĉaibiya cũinácu Jesúre ju aipõecu Corintocacu”, põeva ne coyũvarede yure. “Cũbiya jípacui márepaco bajuque”, ávaivũbuya. Pũeno baju ámenotamu no. Que baru ina Jũmenijicũre ju abevũvacari pare ũbema põeva ne ĉaiyede yópe ũi ĉaiyepe. <sup>2</sup>Cũinácu mujacacu nópe ámeina ĉayũvacari, mujacapũravũ “¿Meara márica ñuĵa, me curivũ Jũmenijicũque?” ũbenina arĩ dápiaivaivũbuya. Ŭbenita chõoiye baju jauteavũ mujare, ũi ámeina ĉaiye boje. Muĵa chõoivũ baru, ñai nópe pũeno ámeina ĉayũre jaetovajebu muĵa muje cójijĩnore jocarĩ. <sup>3</sup>Yácapũravũ cũbevũ muĵaque caride. Ŭbenita dápiaivũ yu ji ũmei yópe cójurocũpe muĵaque. Aru jave coreóvaivũ yu ji ũmei aipe ĉaiye jauróre mujare. <sup>4</sup>Muĵa Jesúre ju aipõeva muje cójijiyede, muje majié boje ji dápiaĩnore, yu yópe cójurocũpe cũquijivũ muĵaque. Aru muje cójijiyede, maje jabocu Jesucristoi parué máre cũquiyebu muĵaque. <sup>5</sup>Dinũmũre mujare jícõjecũyũtu ñai ũmũre abujuvai jabocu Satanáre. Que teni, ũre coatede ĉarĩ apevũ Jesúre ju aipõevare jarũvarĩ, ũre dajocarĩ, Satanás ũi ĉaquiyepe ayũ úque yópe ũi urópe, coreóvarĩ buojacũyũme ũ ũi ámeina teiyede. Que teni chõori ũi ámeina teiyede, dajocarĩ ũi ĉaiyede yópe ũi baju ámeina ĉaiyũepe, meadaimũ macũyũme maje jabocu Jesucristoi copaidaquiyede.

<sup>6</sup>“¿Meara márica ñuĵa?” arĩ dápiaiye jaubevũ mujare. Yópe põeva ne arĩ cõmajiyepẽ, “Quíjĩe páure bucũre ĉaiyeque caino jívaibo bucũvoino mávũ”. ¿Diede coreóvabenarũ muĵa? Nopedeca cũinácu ũi ámeina ĉaru, apevũ máre úque cójijivũ ámeina ĉarājarama úpe. <sup>7</sup>Que baru, “Apevũ majacavũ ũi ámeina ĉaiyede jári, ũpedeca ĉaiyurájichũma” arĩ, jaetovajarã ũre muje cójijĩnore jocarĩ. Yópe judíovai Pascua torojuve tenajiye jípcal, ne jarũvaiyepe caiye iye páure bucũre ĉaiye javequede, nopedeca jarũvajarã ũre mujare jocarĩ. Yópe judíovai áiyepẽ páure bucũre ĉaiye cubeque Pascua torojuve teijaravũare, ovejajicũre boarĩburu yóboi, nopedeca cure nũjara muĵa meara matuiye, yópe muje cũepe caride, ámeina ĉayũ cubevũ muje jẽneboi, Cristoi jave yaiye báque boje. Yópe ne ovejajicũre boaiyepe ne ámeina teiye boje, Jũmenijicui ñájine ĉabequiyepẽ aivũ náre, ne ámeina teiye boje, nopedeca Cristore boarĩ jarũvarejaquemavũ maje ovejajicũpe páyũre, maje ámeina teiye boje, Jũmenijicui ñájine ĉabequiyepẽ aivũ majare, maje ámeina teiye boje. <sup>8</sup>Que

baru maja Jesúre ju aipõevare caiye maje ðaiye jauvu ye ãmeina ðabeni, apevure máre ðare ðaiyubevuva aru ye ãmeina dápiabeni apevure, náre ãmenore ðaiyubevuva máre. Quénora ãmeno cubevuva aru mearore dápiarí, ðarí cõmajini yópe maje dápiaiyepe ðaiye jauvu majare.

<sup>9</sup>Jipoc are ji toivaicõjeiye báquede apecure paperayocare, mujare yóvaicõjemetecacu ina ãmeina ðaivure apevuque némarebucuva ãmevuque. <sup>10</sup>Ji nópe toivaicõjeiye ðre, coyubetecacu muje ðaiyede ina Jesúre ju abevuque. Obedivu põeva ijáravucavu Jesúre ju abevu ãmeina ðaivubu apevuque némarebucuva ãmevuque. Aru ãujini, apevure jujovarí ívubu ne cúaede. Aru ñavacurivubu. Aru pẽpeimarare mearore jívubu máre. Muje náre yóvabenaiyepe aivu, etaiye jaujebu mujare ijárvure jocarí. Muje Jesúre ju abevuque ðabedu, ye cubequiyebu muje cãjurõre. <sup>11</sup>Quénora ji toivaicõjeiye báqueque apecure yópe aiyutecacu yu. Ácu põecu majacacu ñi aiye boje “Jesúre ju ayubu yu”, ñbenita ñi ãmeina ðarí cõmajidu, yóvabejará ðre. Ácu põecu ãmeina ðayu apecoque jímarepaco ãmeoque, aru ãujiñu jujovarí ñu apevu ne cúaede, aru pẽpeimarare mearore jíyu máre, Jesúre ju aríduru, yóvabejará ðre. Ácu põecu borocurí ãmenore coyuy apevure, aru pacoteyu, aru ñavacucu máre, Jesúre ju aríduru, yóvabejará ðre. Põecu ðpe páyque ye ãmejara ãiyede. <sup>12-13</sup>Ina Jesúre ju abevu ne ðaiyede jári, corevarí coyubevu yu mearore o ãmenore. Jũmenijicurecabe coyucuy náre ne ðaiyede mearore o ãmenore. Ñbenita mujacapũravure jári, corevarí coyuiye jauvu ina Jesúre ju aivu ne ðaiyede mearore o ãmenore. Que baru jaetovajará ñai ãmeina ðayure muje cõjijinore jocarí.

**Jũmenijicui põeva ne jaraiyede ne bajumia coyuiye jaubeno ãmeina teivure jẽniari jáipõeva Jũmenijicure coreóvabevu ne jivateinoi**

**6** <sup>1</sup>Cũinácu mujacacu Jesúre ju aipõecu jarayu baru apecu Jesúre ju aipõecure, coyuiye jauvu ðre diede Jũmenijicui põeva ne jivateinoi, ne meadarãiyeye ayu diede. Jáve coyuiye jaubevu ðre ãmeina teivure jẽniari jáipõeva Jũmenijicure coreóvabevure ne jivateinoi. <sup>2</sup>Jáve maja Jũmenijicui põeva jẽniari járiburu yóboi caivu ijáravucavure aipe ne ðaiyede, coyurãjaramu mearore o ãmenore Cristoi jabotequiyede. ¿Diede coreóvabenaru muja? Aru mujacapũravu coyurãjivu baru mearore o ãmenore caivu ijáravucavure muje jẽniari járiburu yóboi aipe ne ðaiyede, jáve jẽniari járiburu yóboi coyurí buojaivubu muja mujevure ne majiéda jaraiyede ne bajumia, meadarãjivu diede. <sup>3</sup>Jáve maja Jũmenijicui põeva ángelevareca máre jẽniari járiburu yóboi aipe ne ðaiyede, coyurãjaramu mearore o ãmenore. ¿Diede máre coreóvabenaru muja? Que baru pũeno baju jáve jẽniari járiburu yóboi coyurí buojaivubu muja ijárvuque majiéda jaraiyede, meadarãjivu diede. <sup>4</sup>Que baru muje jaraiyede muje bajumia, coyurãnuie jaubevu mujare diede ãmeina teivure jẽniari jáipõeva Jũmenijicure coreóvabevu ne jivateinoi. Nárecabu Jesúre ju aipõeva ne pueðaimara quĩjino baju. <sup>5</sup>Toivaicõjeivu apecure diede, cuyoje tede ðacuy mujare. “¿Majidivu bárica ñuja?” muja aríduivureca, mujacacu cũináicu majicu cubebí, meadacuy mujevũ ne jaraiyede ne bajumia. Mujacacu majicu cũinácu cucu baru, ðre coyuiye jaujebu mujare muje jaraiyede muje bajumia, ñi meadaquiyeye aivu diede. <sup>6</sup>Ñbenita pũeno baju ãmenotamu aru

cuyojarōtamu muje daino! Muja, Jūmenijicui pōevavacari, jaradavū muje bajumia, aru coyuyavū diede āmeina teivure jēniari jāipōeva Jūmenijicure coreóvabevu ne jivateinoi.

<sup>7</sup>Muje coyuiyue boje muje bajumia jaraiyede apevu ne jivateinoi, coreóvaivu yu dabevure yópe Jesucristoi bueiye báquepe. Que baru vaini tuivubu muja muje daiyeque. Apevure āmenore daicōjeiye javvu mujare coyubevuva. Aru apevure muje cūvaede ícōjeiye javvu mujare jocarī máre coyubevuva. <sup>8</sup>Ūbenita mujacapuravu āmenore dadavū aru iñavu apevu ne cūvaede náre jocarī. Aru mujevu, Jesúre ju aipōevavacari, nárecabu muje āmedaimara.

<sup>9</sup>Jāve pōeva cōmajivu ne āmedaiyede Jūmenijicui jaboteimara āmenajarama. ¿Diede coreóvabenaru muja? Muje bajumia apesure jujovaicōjemejara. Ina pōeva āmeina daivu apevuque nēmarebucūva āmevuque, aru ina pēpeimarare mearore jivu, ina āmeina daivu apevuque nēmarebucūvare jaruvārī, ina ūmūva nomivape daivu aru ina ūmūva máre daivu apevu ūmūvaque yópe ne dájuroepe nomivaque, caivu ina Jūmenijicui jaboteimara ye āmenajarama. <sup>10</sup>Aru ina űavacūrivu, ina āujivu, ina pacoteivu, ina borocurī āmenore coyuiyu apevure, aru ina jujovārī apevure ívu ne cūvaede máre, caivu ina Jūmenijicui jaboteimara ye āmenajarama.

<sup>11</sup>Aru apevu mujacavu inape paivu batequémavu muje Jesúre ju arājiye jipocare. Ūbenita yópe pōeva ne jaruvaiyepe docucuede ne joaiyede, nopedeca Jūmenijicu jaruvarejaquemavu maje āmeina teiyede. Majare coavarī ūre ju abevure jaruvārī, mearape đarī, epedējaquemavu majare ūi pōevava. Aru boropatebevupe đarejaquemavu majare ūi jāinore. Caiye iyede đacarejaquemavu Jūmenijicu majare maje jabocu Jesucristo parucūque aru űai Espiritu Santoque máre.

**Meadaie jaurōre maje bajure Espiritu Santoi cue boje majaque aru maje**

**cue boje Jesucristoque cūinávupe**

(Mt 19.5; 1 Co 3.16; 10.23; 2 Co 6.16)

<sup>12</sup>Yópe ávaivubuya apevu Jesúre ju aipōeva. “Đaicōjeiyede daiye javbevū majare. Que baru caiyede daicōjeimumu yu”, ávaivubuya apevu. Jāvetamu. Ūbenita apede maje đaru, meamejebu majare o apevure máre. Yu caiyede daicōjeimuvacari, yúcapūravu yebacacupe teiyubevu ji daiyue boje apede.

<sup>13</sup>Aru yópe máre ávaivubuya apevu: “Jūmenijicu cuedarejaquemavu āiyede maje yapibu boje aru maje yapibure maje āiye boje”, ávaivubuya. Jāvetamu. Aru Jūmenijicu cūinē đacuyume āiyede aru yapibure máre. Ūbenita cuedabedejaquemavu maje bajure maje āmeina tenajiyepa ayu apevuque majemarebucūva āmevuque. Quénora maje bajure cuedarejaquemavu, maje memecarājiyepe ayu maje jabocu Cristore. Aru cure đarejaquemavu maje jabocu Cristore majaque cūinávupe, maje baju jívui. <sup>14</sup>Yópe Jūmenijicui nacovaiye báquepe maje jabocu Jesucristoi baju bácarōre yainore jaruvārī ūi paruéque, nopedeca majare máre maje bajure nacovacuyume ūi paruéque.

<sup>15</sup>Jāve muje bajubu yópe Cristoi bajucarōpedeca. ¿Diede coreóvabenaru muja? Que baru yópe apeno Cristoi bajucarōre ĩni, coavaiyepe ūi bajure, ye đayū buojabevu yu nomió āmeoque, cūináco ōi bajure bojedado āmeina đacodo ūmūvaque. ¡Aipinumu đabecubu yu nópe! <sup>16</sup>Jāve yópe teyube

ñai cücü nomió âmeoque. Ne bajuá jëori, cûinávũpe teivũbu na. ¿Diede coreóvabenaru muja? Yópe arí, toivaicõjenejaquemavu Jûmenijicu: “Ina pucarâ cûinávũpe tenajarama na”, arí toivaicõjenejaquemavu. <sup>17</sup>Aru quédaca ñai ju ayu maje jabocu Jesucristore cûinávũpe teibi êque ñi ùmei.

<sup>18</sup>Cainumua âmeina ðabejarâ apevũque mujemarebucũva âmevũque. Ape âmeina teiye die pũeno põecu ñi bajure âmedabevũ. Æbenita diede ðayũ baru, ñi bajure âmedaibi. <sup>19</sup>Jãve ñai Espíritu Santo cücübe maje baju jívũi. Que baru maje bajubu yópe Espíritu Santoi cûramipe. Jûmenijicũvacari ðarorejaquemavu êre, ñi cûquiyepẽ ayu majaque. Que baru majavacari majare uparivũ âmevũ aru ðaicõjemevũ maje bajure. Quénora ñai Espíritu Santorecabe majare upacu aru ðaicõjeñũ maje bajure. ¿Diede coreóvabenaru muja? <sup>20</sup>Jûmenijicu ñni bojedarejaquemavu majare. Que baru caiye muje ðaiyede muje bajuque pueðajarâ Jûmenijicure. Ðaicõjeimara âmevũvacari, muje pueðaiye boje Jûmenijicure, me ðajarâ muje ðaiyede muje bajuque.

**Pablo ñi majicaino pũrubuoivũre aru pũrubuobevũre máre**

(Mt 5.32; 19.9; Mr 10.11-12; Lc 16.18)

**7** <sup>1</sup>Caride coyũquijivũ iye jëniari jáiyede muje toivaiye báquede yure paperayocaque. Põecu ñi pũrubuobedu, meajebu. <sup>2</sup>Æbenita obedivũ põeva ne âmeina ðaiyue boje apevũque nẽmarebucũva âmevũque, caivũ ùmũva coapa cũvajarãri nẽmarepaco bajuva aru quédaca caivũ nomiva coapa cũvajarãri nẽmarepacu bajuva máre. <sup>3</sup>Ñai nomicũcu ðajacurí cainumua yópe êre jauépe, me cücüyũ jímarepacoque. Aru quédaca ico ùmũcũco ðajacorí cainumua yópe ôre jauépe, me cũcoðo jímarepacuque. <sup>4</sup>Ñai nomicũcu jímarepacoí baju jinotamu, ñi corequiyepẽ aino nore. Que baru ico ùmũcũco cûinácova ði bajure cõjememico. Aru quédaca ico ùmũcũco jímarepacuí baju jinotamu, ði corecojiyepẽ aino nore. Que baru ñai nomicũcu cûinácũva ñi bajure cõjememi. <sup>5</sup>Que baru muja, pũrubuoivũ, nomicũcu ñi ðaiyũru yópe pũrubuoivũ ne ðarí cõmajiyepẽ, “Æbevũ yũ”, abejacorí jímarepaco. Aru ùmũcũco máre ði ðaiyũru yópe pũrubuoivũ ne ðarí cõmajiyepẽ, “Æbevũ yũ”, abejacurí jímarepacu. Quédata ina pucarâ cûinátũru ne ùme, “Maje ðarí cõmajiyede ðajocarãjavũ apejãravũare, jëniarajivũ majepacu Jûmenijicuque”, arí coyũvũ baru, ðajocarí buojaivũbu diede. Aru dijãravũa “apejãravũa” ne aijãravũa vainíburu yóboi, bediõva cojedeca ðajarãri yópe ne ðarí cõmajiyepedeca, ñai abujuvai jabocu Satanás ñi âmeina ðare ðabequiyepẽ aivũ náre apevũque nẽmarebucũva âmevũque, ne cõjeme boje ne baju ðaiyũrõre ùmũ nomióque aru nomió ùmũque máre.

<sup>6</sup>Iye pũrubuoiyede ji coyũiyede mujare, “Põeva pũrubuoiyurivũ baru, pũrubuorí buojaðama na”, arí coyũyũbu yũ. Æbenita põevare “Pũrubuojarã”, abevũ yũ. <sup>7</sup>Caivũ ne pũrubuobedu, yópe ji pũrubuobepedeca, meajebu ji dápiaru. Æbenita Jûmenijicu majide ðaibi majare coapa bojecubeda ñi majiécãrõre, maje cadatenajiyepẽ ayu apevũre. Aru epeibi majare coapa maje ðarãjiyede ijãravũi. Que baru apevũ majacavũre epeibi ne pũrubuorãjiyepẽ ayu aru apevũre epeibi ne pũrubuobenajiyepẽ ayu.

<sup>8</sup>Caride coyũquijivũ ina pũrubuobevũre aru ina nomiópevare. Meavũ mujare muje cũru yúpe, pũrubuobevũva. <sup>9</sup>Æbenita nácapũravũ cõjeni buojabevũ baru ne baju ðaiyũrõre ùmũ nomióque aru nomió ùmũque máre,

p̄r̄ub̄uojar̄ari na. Métamu ne p̄r̄ub̄uoie ne ñájiye p̄reno, ne nomicube boje o ne ùmucube boje.

<sup>10</sup>Aru caride coyũquijivũ ina p̄r̄ub̄uoivũre. Yópe ðaicõjeivũ mujare: Nomiõ ùmucuco jaruvabecacurĩ jímarepacure. Aru yúvacari ámevũ nópe ðaicõjeñũ. Quénora maje jabocu Cristovacari nópe ðaicõjenejaquemavũ. <sup>11</sup>Ûbenita ùi jaruvacõjemeneca, apeco jímarepacure jaruvado baru, p̄r̄ub̄uojecacurĩ õ apecuque. Cũinácova cõjacurĩ õ, o meadarĩburu yóboi copainũjacurĩ jímarepacu yebai. Aru ùmũ nomicucu máre quédeca jaruvabecacurĩ jímarepacore.

<sup>12</sup>Aru caride coyũquijivũ apecu mujacavũre. Iyede maje jabocu Cristovacari coyubedejaquemavũ; ùbenita yure coyucõjeimi. Jesúre ju aipõecu nomicucu jímarepaco Jesúre ju abecore cuvaco baru, aru õcapũravũ ùque õi cure nuiyuru, jáve õre jaruvabecacurĩ ù. <sup>13</sup>Aru Jesúre ju aipõeco ùmucuco jímarepacu Jesúre ju abecore cuvaco baru, aru õcapũravũ õque ùi cure nuiyuru, jáve ùre jaruvabecacurĩ õ. <sup>14</sup>Muja Jesúre ju aipõeva cũinávũpetamu Jesucristoque muje ùmei. Aru mujemarebucuvaque máre cũinávũpetamu muje bajui. Que baru Jũmenijicu me jáñũme nomicucu Jesúre ju abecore, ùi cue boje jímarepaco Jesúre ju aipõecoque. Aru Jũmenijicu me jáñũme ùmucuco Jesúre ju abecore, õi cue boje jímarepacu Jesúre ju aipõecuque. Die jáve ámenu, Jũmenijicu mujemarare me jámejebu. Ûbenita náre máre me jáñũme ù. <sup>15</sup>Jũmenijicu cutuibi majare, maje curãjiyepe ayu cãrijimenoque. Que baru ina Jesúre ju abevucapũravũ mauteiyubevũ baru némarebucuva Jesúre ju aivũque, ne jaraiye boje ne baju, jaruvajar̄ari náre. Ûbenita nomicucu Jesúre ju aipõecu cuvaco jímarepaco Jesúre ju abecore o ùmucuco Jesúre ju aipõeco cuvaco jímarepacu Jesúre ju abecore, cõjar̄ari náque, ne nópe uru. <sup>16</sup>Que baru ne mauteðu cũináturu, meaquiyebe, ñai ju abecu o ico ju abeco ne ju aru Jesúre, ne cue boje Jesúre ju aipõecoque o Jesúre ju aipõecuque járavũa coapa. Mũ, ùmucuco, Jesúre ju are ðacõjichuvũ mimarepacure, Jũmenijicu meadaquiyepe ado ùre. Ûi ju aquiye de o ùi ju abequiyede majibevũ mũ. Aru mũ, nomicucu, Jesúre ju are ðaquijichuvũ mimarepacore, Jũmenijicu meadaquiyepe ayu õre. Õi ju acojiye de o õi ju abecojiye de majibevũ mũ.

<sup>17</sup>Quénora cure nũjarari caivũ, ðarĩ yópe Jũmenijicu epeiye báquepe náre coapa, ne ðarãjiyepe ayu, ùi cutuquiye jipocamia náre ù jina márãjivũva. Nópe bueyubu yu caivũ Jesúre ju aipõeva cõjijivaivũre. <sup>18</sup>Ñai põecu buraicõjeñũ mácu baru ùi cajede, yópe judío va ne ðaiyepe, Jũmenijicu cutuquiye jipocamia ùre, oatũvabenidujacurĩ iye buraiye báquede. Aru ñai põecu buraicõjemecu bácu baru ùi cajede, yópe judío va ne ðaiyepe, Jũmenijicu cutuquiye jipocamia ùre, buraicõjemenidujacurĩ ùi cajede. <sup>19</sup>Ye baju ámevũ buraicõjenu o buraicõjemeni maje cajede. Maje ju aiepe Jũmenijicu ðaicõjeiyede, diedecabu majare jaué. <sup>20</sup>Caivũ cure nũjarari yópe ne cũepedeca, Jũmenijicu cutuquiye jipocamia. <sup>21</sup>Que baru mũ apecu ùi yebacacu bácu baru Jũmenijicu cutuquiye jipocamia mure, cãrijimejacu ðie mi yebacateiye boje. Ûbenita mi jabocu ùi jodeiyuru mure, etajacu ùre jocarĩ. <sup>22</sup>Ñai põecu apecu yebacacu bácu Jũmenijicu cutuquiye jipocamia ùre, jodeimu mácupe páyube Jũmenijicu jáinore, ùi cue boje Jesucristoque cũinávũre. Aru quédeca ñai põecu apecu yebacacu ámecu bácu Jũmenijicu

cutuquiye jipocamia úre, Jesucristoi yebacacupe páyube Jūmenijicui jáinore. <sup>23</sup>Jūmenijicu ini bojedarejaquemavu majare. Que baru apevure yebacavupe tede daicōjemejara mujare, muje daiye boje yópe ne bueiye jáve ámepe. Quénora đajarā yópe Jūmenijicui urōpe. <sup>24</sup>Muja, jívũ, caivũ cure nujara Jūmenijicui jáinore yópe muje cūpedeca, ũi cutuquiye jipocamia mujare.

<sup>25</sup>Caride coyūquijivũ ina nomiva ũmucubevure cāreja. Maje jabocu Jesucristo coyubedejaquemavu aipe daiye jaurōre náre. Ūbenita yure cōmaje āroje jārĩ, beorĩ epedejaquemavu ũi yávaiye méne coyucōjeimava. Que baru cainumua coyuyubu yũ ũi yávaiyede dajocabecava aru oatavabecava diede máre. <sup>26</sup>Ji dāpiaru, meavu ina ũmucubevure cāreja ne cuede purubuohevũ, pōeva urarō ne nājiye boje ne cuede ijāravui, aru Jesúre ju aipōeva pueno baju ne nājiye boje. <sup>27</sup>Mu nomicucu baru, mimarepacore jaruvabecacu. Aru mu nomicubecu baru, purubuohecacu. <sup>28</sup>Ūbenita mujare ji purubuoicōjemeneca, mu purubuoju baru, ámedabejebu. Aru nomió máre purubuo do baru, ámedabejebu. Ūbenita ina purubuoivũ nājinajarama pare ijāravui ina purubuohevũ ne nājiye pueno. Aru yúcapūravũ mujare vaibéde đaiyurĩdujebu iye nājiyede.

<sup>29</sup>Muja, jívũ, ji nópe coyuiyede yópe aiyuvũ yũ. Obebeujua curivubu maja ijāravui, memecarājivũ Jesúre. Que baru carimata ina nomicurivũ memecajarāri Jesúre cainumua ne oainope, yópe nomicubevũ ne đaiyepe. <sup>30-31</sup>Caiye ijāravuque bĩjare nuivũ. Aru ijāravũ cūiquíyebu. Que baru ina oivũ, yópe obevupe đajarāri na. Ina torojuve teivũ, yópe torojuve tebevupe đajarāri na. Ina cūvede ini bojedaivũ, yópe cūve cūvabevupe đajarāri na. Aru ina cūve cūvarivũ ne íye boje ijāravuquede, yópe diede imevupe đajarāri na. Que baru obejarāri, torojuve tebejarāri, ini bojedabejarāri, aru cūvede imejarĩ máre. Que đavũ baru cainumua, oabejebu memecaivũ Jesúre. Quénora memecajarāri úre cainumua. <sup>32</sup>Diede coyuyubu mujare, ji ũe boje muje cārijimenajíyepe ayũ.

Nai nomicubecūrecabe dāpiayũ maje jabocu Jesucristo jiede aru memecayũ úre caiye ũi ũmeque aru caiye ũi paruéque, ũi torojure đaiyue boje maje jabocu Jesucristore. <sup>33</sup>Ūbenita nai nomicubecūrecabe dāpiayũ pare ijāravuquede aru memecũ ũi paruéque, ũi torojure đaiyue boje jĩmarepacore. <sup>34</sup>Que baru yópe coavaimupe páyube ũ ũi ũmei. Torojure đaiyurĩduibi jĩmarepacore aru maje jabocūre máre. Aru quédeca ico ũmucubecorecabe dāpiado maje jabocu Jesucristo jiede aru memecado úre cūinácũra caiye ōi ũmeque aru ōi bajuque máre. Ūbenita ico ũmucubecorecabe dāpiado pare ijāravuquede, ōi torojure đaiyue boje jĩmarepacūre. <sup>35</sup>Nópe coyuyubu, ji cađateiyue boje mujare. Yebacavupe đaiyubevũ mujare, purubuoicōjenĩ o purubuoicōjemeni mujare. Quénora mujare memecare đaiyuvũ maje jabocu Jesucristore cainumua, caiye muje ũmeque aru caiye muje paruéque máre, muje đarājíyepe ayũ mearore yópe ũi urōpe cainumua.

<sup>36</sup>Ūmu, nomió máre “Purubuoarājaramu nūja”, aivũ bācavũ baru, aru nai ũmu “Đabevũ yũ yópe yure jauépe nūje purubuo boje”, arĩ dāpiayũ baru, ico nomió ōi bucuteiyue báque boje javede aru nai ũmu ũi pare cūvaiyue boje óre, đajacurĩ yópe ũi đaiyuepe. Purubuojarāri na. Purubuoivũ baru, ámeina tebenama na. <sup>37</sup>Ūbenita nai ũmu, me majicu baru ũi ũmei aipe đaiyue jaurōre, aru apēcũ cōjeimũ ámecũ baru, aru ũi me cōjenĩ buojayũ baru ũi

baju ðaiyuröre nomióque, ðajacurĩ yópe ùi ðaiyere. Purubuobejarãri na. Quénora cùjacorĩ ùi yurimacope. <sup>38</sup>Que baru ñai ùmu purubuoyu baru ùi yurimacomaque, mearore ðaibi. Ùbenita ñai ùmu purubuobecu baru ùi yurimacomaque püeno baju mearore ðaibi.

<sup>39</sup>Nomió ùmucuco cùjacorĩ jímarepacuque ùi apuéde cãreja. Ùbenita ùi yainĩburu yóboi, purubuoyuco baru apecuque, purubuojacorĩ. Ùbenita jímarepacu bacuyú Jesúre ju aipõecu bajacurĩ. <sup>40</sup>Ji dápíaru, nomiópeco purubuobeco baru, torojucodome nomiópeco purubuodo püeno. Aru yu coreóvaivu Jümenijicui Espíritu Santo dápíaicõjeñure yure.

**Pablo ùi majicaino àiyena pöeva ne jíye báquede pëpeimarare**

(Mt 25.45; Jn 1.3; Ro 11.36; Ef 4.6; Col 1.16)

**8** <sup>1</sup>Caride coyquijivu iye jëniari jáiyede muje toivaiye báquede yure paperayocaque àiyena pöeva ne jíye báquede pëpeimarare, mearu o meamenu muje àiyede diede. “Coreóvaivubu ñuja ãri buojaivure àiyede ne jíye báquede pëpeimarare, pëpeimu parube boje”, toivacube cüinácu mujacacu. Jãvetamu. Caivu maja diede coreóvaivubu. Ùbenita iye muje coyuiyede muje coreóvaiyede pëpeimarare aru pöeva ne jíyede náre cãrijivu yu. Maja coreóvaivuvacari diede, “¿Meacu bάρica yu apevu püeno?” arĩ dápíabegarã muja. Aru ãmejara diede, dápíabevuva apevu Jesúre ju aipöeva ne dápíaiyede. Áivu baru náre dápíabevuva, náre ùbevu muja. Ùbenita meavu muje uru apevure caiye muje coreóvaie püeno. Põecu ucü apevure, náre cadateibi, ne parure nurajiyeye ayu ne ùmei cainumma. <sup>2</sup>Que baru ñai pöecu “Caiye iye pëpeimara jiede coreóvaivu yu”, ùbenina ãri dápíayu, jãve me coreóvabebi cãreja diede yópe coreóvaie jauröpe ùre. <sup>3</sup>Ùbenita pöecui Jümenijicure aru, Jümenijicuvacari coreóvaibi ùre, aru me jáimi ùre. Ñai pöecu apevure ucü máre, jãve ùrecabe me coreóvayu.

<sup>4</sup>Aru iye muje jëniari jáiyede àiyena ne jíye báquede pëpeimarare yópe coyuyubu yu. Caivu maja majidivubu iyede: Pöeva Jümenijicure coreóvabevu, “Pëpeimara jádovadama aipe ãrojarivure jümenijinare. Aru ne paruéde cuvavivubu”, ùbenina ãri dápíadama. Ùbenita jümenijina ne jádovaimara ãmevu pëpeimara. Jümenijicu cüinácura cubi, ñai Jümenijicu. <sup>5</sup>“Obedivu jümenijina cuma, apevu joborõcavu aru apevu máre cavarõcavu”, ùbenina arĩ dápíadama ina pöeva Jümenijicure coreóvabevu. Que baru obedivure “mu, Jümenijicu”, ùbenina arĩ coyuyama. Aru obedivure máre “mu, ñuje jabocu”, ùbenina arĩ coyuyama. <sup>6</sup>Ùbenita majidivubu maja Jümenijicu cüinácu quécura cucure. Ùrecabe majepacu. Ùvacari cuedarejaquemavu caiyede. Aru majare cuedarejaquemavu, maje ðarãjiyepe ayu yópe ùi uröpe. Aru majidivubu maja maje jabocu cüinácu quécura cucure. Ùrecabe Jesucristo. Ùrecabe Jümenijicui caiyede cuedare ðaimu mácu. Aru ùvacari cure ðaibi majare.

<sup>7</sup>Ùbenita apevu Jesúre ju aipöeva majibema cãreja Jümenijicu cüinácu quécura cucure. Quénora apevu mujacavu cõmajivubu pöeva ne coyuiyede apevu jümenijina ne borore. Que baru ne àiyede ãmajiaruare pöeva ne jíye báquede pëpeimure, “Apecu jümenijicure mearore jívu yu, ji ãiye boje yore”, ùbenina arĩ dápíadama na. Aru, “Meamejuvu ji ðaiye. Ye majibevu yu”, ne arĩ dápíaiye boje, parubenama na ne ùmei. Que baru, “Boropateyubu yu

Jūmenijicui jáinore”, arí dápiadama na. <sup>8</sup>Jūmenijicu majare me jáñu āmemi maje āiye boje o maje āme boje. Maje apede āmenu, Jūmenijicu āmeina jámemi majare. Aru maje apede āru, Jūmenijicu me jámemi majare. <sup>9</sup>Maja āri buojaivureca iye ne jíye báquede pēpeimarare āmeina tebevūva, me jájara muja. Ina majibevū cāreja arí dápiaivu baru muja mearore jíde nuivure pēpeimarare, aru “¿Mearica iye daiye?” arí dápiaivu baru, āmeina tejebu, ne jáiye boje muja āivure diede. <sup>10</sup>Nácacu jáñu maru mujare, majidivure ūi dápiaru, āivure pēpeimure mearore jíñami jívu, jáve āiyucuyume ū máre iye āiyede, ne jíye báquede pēpeimure. <sup>11</sup>Mujacapuravu majidivubu āmeina tebevure muje āiye boje. Ūbenita ūcapuravu arí dápiayube āmeina teyure ūi āiye boje. Que baru muje majié boje, āmedadavū muja ñai mujecure. Cristo yaidéjaquemavu ūre boje, ūi bíjabequiyupe ayu. Ūbenita muja bíjare nure daivubu ūre. <sup>12</sup>Que teni mujecure, Jesúre ju aipōecure, āmeina tede dadavū muja. Ūtame Jesucristo jicu. Que baru muje āmedaiyede ūre, Cristo bajure máre āmedadavū muja. <sup>13</sup>Que baru jícu, apecu Jesúre ju aipōecu, ūi āmeina tedu ji āiye boje āimajiaruare, ye āmecuyumu yu āimajiaruare bedióva cojedeca, āmeina tede dabecuy ūre.

**Pablo ūi jádovaino ūi daiyeque aipe daiye jaurōre**

(Mt 10.10; Lc 10.7; Hch 9.3-6; Ro 15.27; 1 Co 15.8; Gá 1.11-16; 1 Ti 5.18)

**9** <sup>1</sup>Jāve yávacari apecu pōecu yebacacu āmevu. Jāve yávacari Jesús ūi yávaiye méne beorí coyucōjeimumu. Jāve yávacari járejacacu maje jabocu Jesúre. Aru jāve yávacari đacacu méne Jesús ūi đaicōjeiyede yure, muje ju aipe boje ūi yávaiye méne aru muje cue boje ūque cūinávupe. Que baru meajebu muje jídu yure jauéde, ji memecaiye boje mujare. Ūbenita yu yéde jēniamevu mujare cainumua. <sup>2</sup>Apevu “Pablo Jesús ūi yávaiye méne beorí coyucōjeimu āmemi” ūbenina aivureca, mujacapuravu majidivubu yure Jesús ūi yávaiye méne beorí coyucōjeimure, muje ju aipe boje Jesúre, ji coyuiye báque boje mujare ūi yávaiye méne, ūi meadacaiyede pōevare. Que baru muje cue boje Jesucristoque cūinávupe, jádovari buojaivu yu jāve Jesús ūi yávaiye méne beorí coyucōjeimure. <sup>3</sup>Nópe coyuvaiyu yu caivu ina āmecoroivure yure.

<sup>4</sup>Muja jápiaivu ji bueiyede Jesús ūi yávaiye méne, muje jídu yure āiyede aru ūcuiyede máre yópe bojedaiyepe ji memeinore, cadatecuyu mujare, meajebu. Jāve nópe daiye jauvu mujare. <sup>5</sup>Aru ji cūvaru Jesúre ju aipōeco jimarepaco bajurócore, yópe apevu Jesús ūi yávaiye méne beorí coyucōjeimara, aru ñujacacu Pedro máre, aru maje jabocu Jesucristoi yóva ne cavaepe, meajebu. Aru jimarepaco bajurócore cūvaru, yúque ō majurócore nuvaiye jaujebu yure aru jíye jaujebu muja jápiaivure ji bueiyede ō majurócore máre āiyede aru ūcuiyede. <sup>6</sup>Muja jíyavū apevu Jesús ūi yávaiye méne coyupōevare náre jauéde. Ūbenita Bernabé yúmaque memeicarā ñuje puruáque, bojedarájivu ñujare jauéde. Jāve ñuja máre, yópe apevu Jesús ūi yávaiye méne beorí coyucōjeimarape, memeiye ñuje puruáque jaubevu ñujare. Quénora muja jápiaivure ñuje bueiyede jíye jauvu ñujare jauéde.

<sup>7</sup>Churara cūbebi ūi baju āquiyede bojedayu. Aru jiore oteipōecu cūbebi ūi baju oteiyede bucūrī buojarī jēiyede āmecu. Aru oteiāimarare coreipōecu máre cūbebi ina āimara opecore jívu ne opecore ĩmecu. <sup>8</sup>Iye ji coyuiyede

mujare, “Ëi baju arĩ dápiaiye de coyuyubeu ñ”, abejarā muja. Põecureca ñi arĩ dápiaiye de coyubeu yu. Quénora yópe Jūmenijicui ñaicōjeiyede ñi coyuiye báquepe Moisés bácure coyuyubu yu. <sup>9</sup>Yópe arĩ, Jūmenijicu toivaicōjenejaquemavu ñi ñaicōjeiyede ñi põevare: “Ñai oteiāimacu Ɂracu memecayure mujare, buobekarā urre ñi jijecamure, ñi āmequiyepe aivu ñi cūocaiyedeca mujare muje oteiyabeare ñi curaiyede diede”, arĩ toivaicōjenejaquemavu. Ëbenita Jūmenijicu ñi nópe toivaicōjeiye báquede, oteiāimarare quévura cōmaje āroje jámenajaquemavu. <sup>10</sup>Quénora toivaicōjenejaquemavu ñi ñaicōjeiyede Jūmenijicure memecaipõevare boje. Majarecabu ñi nópe arĩ dápiaimara.

Jēvari coyuyubu yu. Ñai jiore memēñu, meadacacuyu jobore ne otequiye jipocamia, coreyube, cuvacyu ñi memeiye bojede, jējāravu baquinó eaiyede. Aru ñai oteiyede ññu coreyube, cuvacyu ñi memeiye bojede máre, jējāravu baquinó eaiyede. <sup>11</sup>Que baru yópe oteipõecui oteiyepe, ññu coyuiyede muje yebai Jesús ñi yávaiye méne, ñi meadacaiyede põevare, cadatenajivu mujare muje ũmei, jāve mujare jýe javvu ññu jave, muje cadatenajiyepe aivu ññu yópe muje bojedaiyepes ññu memeiye. <sup>12</sup>Apevu Jesús ñi yávaiye méne coyucaipõeva eavu bācavu muje yebai mujare jícōjenu náre jave, ne coyuiye báque boje, jāve pueno baju mujare jícōjeiye javvu ññu jave, ññu coyurĩ buiye báque boje mujare diede mamarumure.

Ëbenita ññu ye mujare jícōjemevu ññu jave, ññu coyuiye boje Jesús ñi yávaiye méne muje yebai. Quénora ññu jīcapūravu napīñavu caiyede, muje me jāpiarājīyepes aivu Jesús ñi yávaiye méne aru, “Ina ĩyurivubu náre jave ññu jocarĩ, ne bueiye boje ññu”, ũbenina muje āmecorobenajīyepes aivu ññu. <sup>13</sup>Ññu jīcavvũ judíova Jūmenijicure memecaivu ñi cūrami jīvũ jacopuyama ne ārajīyeva, ne memecaiye boje dīñamine. Ina āimarare boaipõeva jīñajivu na māvure Jūmenijicure ñi cūrami diva urre jīcayede juaivai jacopuyama ina boaimara māvũ jiaruquede ne ārajīyeva, ne memeiye boje. ¿Diede coreóvabenaru muja? <sup>14</sup>Quédecas maje jabocu Jesucristo ñi yávaiye méne coyucaipõevare jacopuicōjeñume náre jave, ne coyuiye boje ñi yávaiye méne. Que baru ina jāpiaivure ne bueiye jícōjeñume náre jave. <sup>15</sup>Ëbenita yūcapūravu ye mujare jícōjemevu yure jave. Aru ye toivaicōjemevu apesure mujare caride, muje jīñajīyepes ayu yure jave. Quénora yayīrucubu yu jacopubecvũ apejīene. Mujare jícōjeñu maru, “¿Meacu bārica yu?” ye arĩ buojabejebu yu.

<sup>16</sup>Yu ye coyubevu Jesús ñi yávaiye méne ji coyuiye boje diede. Quénora Jesucristo coyucōjeimi yure. Que baru ji coyuiyede Jesús ñi yávaiye méne ñi meadacaiyede põevare, “¿Meacu bārica yu?” ye arĩ buojabevu yu. ĩāmeno vaiquýebu yure ji coyubedu Jesús ñi yávaiye méne! Que baru diede coyuiye javvu yure. <sup>17</sup>Diede coyuyu baru ji coyuiye boje, torojube yu. Aru ji torojue bājebu yópe ji bojede ĩyepes. Ëbenita diede coyubevu, ji coyuiye boje. Quénora diede coyuiye javvu yure Jūmenijicui coyucōjeiye báque boje yure diede. <sup>18</sup>Ji bajumica ji coyuiyede Jesús ñi yávaiye méne bojecubeda, torojure ñavu yure. Yure jave jícōjeni buojayvacarĩ yure jāpiaivure, náre ye jícōjemevu yure apejīene.

<sup>19</sup>Yūcapūravu apesvũ ñi yebacacvũ āmecuvacari, yebacacvũ teyvũ ji baju, põeva obedivũ baju ne jāpiarājīyepes ayu ji coyuiyede Jesús ñi yávaiye méne,

ne ju arājiyepe ayu úre, ũi meadacaquiyepes ayu náre ne ámeina teiyede jaruvári, ne curājiyepe ayu me úque cainumua. <sup>20</sup> Ji cuede judío vaque, judío pes teyubu yu, ne me jápiaiyurājiyepe ayu Jesús ũi yá vaiye méne, ũi meadacaiyede pōevare. Que teni ina ðaivu yópe Jūmenijicui ðaicōjeiyede ũi coyuiye báquepes Moisés bácare, ne ju arājiyepe ayu Jesucristore, yu máre ðayubu yópe iye ðaicōjeiyepes ji cuede náque, diede ðaiye jaubedeca yure. <sup>21</sup> Ũbenita ji cuede judío va áme vaque, nácacupes teyubu yu, ne me jápiaiyurājiyepe ayu Jesús ũi yá vaiye méne, ũi meadacaiyede pōevare. Que teni ina ðabevu yópe Jūmenijicui ðaicōjeiyede ũi coyuiye báquepes Moisés bácare, ne ju arājiyepe ayu Jesucristore, yu máre ðabevu yópe iye ðaicōjeiyepes ji cuede náque, ðayuvacari Jūmenijicui ðaicōjeiyede Cristoi cōjeimu mae boje. <sup>22</sup> Aru quēdecabu ina parubevure ne ũmei, ne majibe boje cāreja ne ðaiye méne o ámene Jūmenijicui jáinore. Ji cuede náque, nácacupes teni, ne majibedu apesje méne o ámene, diede ðabevu yu, ne me jápiarājiyepe ayu Jesús ũi yá vaiye méne ũi parure ðaiyede pōevare ne ũmei. Que teni caino ji nuinoi, buecuyu Jesús ũi yá vaiye méne, cainumua ðayubu yu nó cavu ne ðaiyepes, ámenore ðabecuva, Jesús meadacaquiyepes ayu apesvu ná cavure. <sup>23</sup> Caiye iyede ðayubu yu, pōeva ne me jápiarí ju arājiyepe ayu Jesús ũi yá vaiye méne, na máre yúque Jūmenijicui mearo ðacaimara marājiyepes ayu.

<sup>24</sup> Jēvari coyuyubu mujare. Obedivu yajuipōeva cūyaivureca, no yajuino upacu bojede jícuyme cūinácu ina cūyaivucacure quēcura. ¿Diede coreóvabenaru muja? Yópe caivu ina yajuipōeva coapa ne me cūyaiyepes, ne íyue boje no bojede, nopedeca caivu muja máre mearore ðajarā mujes cuede ijārvui, maje jabocu Jūmenijicui jíquiyepes aivu boje méne caivu mujare coapa. <sup>25</sup> Ina yajuipōeva ne cūyarājiyepes jipocai, me coreðama ne ðaiyede, ne íyue boje no yajuino bojede, jipobu adaitarabu laurel ámicuriyocaque ðaitarabure, maume pojequitarabure. Que baru ina ívu ditarabure torojurājarama ditarabucue quíjino baju, pu ditarabu pojeiyeta. Ũbenita majacapuravu me jári coreivubu maje ðaiyede, Jūmenijicui jíquiyepes aivu majare ũi boje méne pojebequiyede cainumua. Que baru torojurājaramu maja Jūmenijicui bojes méque cainumua.

<sup>26</sup> Que baru yábu nápe páyu, ina nurié cūyaivu pu cūyaima turuvaita. Yácapūravu nurié ðayubu yópe Jūmenijicui urōpes ðajocabecuva cainumua. Yábu nápe páyu, ina totarí pēvari yajuivu, nurié totarí pēvari vainájiyu ne mauvare. Yácapūravu nurié ðayubu, vaicúyu ji mauvare, ji memeyepes ijārvui bojecube ámequiyepes ayu. <sup>27</sup> Jēvari coyuyubu mujare. Yópe jara popeiyepes ji bajure, ũbenita ji ũmene, ðayubu yu, me corecuyu ji ðaiyede, Jūmenijicui jíquiyepes ayu yure máre ũi bojes méne. Meamejebu yure, Jūmenijicu ũi jíbedu yure ũi bojes méne, ji ámedaru apesvu Jesús ju aipōesvu majibecure cāreja méne aru ámene máre. Meamejebu yure, Jūmenijicu ũi jíbedu yure ũi bojes méne, ũi jíniburu yóboi diede apesvure, ũi meadacaimarare, ji bueyepes báque bojes náre Jesús ũi yá vaiye méne.

**Pablo ũi majicaino Corintocavure Israecavu bá cavu ne ðaiye báqueque**

(Mr 14.22-24; Lc 22.19-20; 2 Co 6.15-16)

**10**

<sup>1</sup> Muja, jívu, uvu yu mujes majinajiyede jáve aipe vaiyepes báquede ina Israecavu bá cavure, majeñecuvape paivu bá cavure, ne ju

aiye boje Jūmenijicure. Ina caivurecabu vaiváivu bácvu pōcubenoi no oopenibo cāchinoi. Aru ina caivurecabu jataivu bácvu no jia urāda Jūariya āmicuriyare. <sup>2</sup>Ina caivurecabu jádovaivu bácvu Moisés bácuque ne vaiváiyē boje ũ mácuque no oopenibo yóbore aru no jia curō mácarōre. <sup>3</sup>Ina caivurecabu āivu bácvu iye āiyede Jūmenijicui daroiye báquede na mácvure cavarō mearo ũi curōre jocarī. <sup>4</sup>Aru ina caivurecabu ũcuivu bácvu no ocore Jūmenijicui daroino mácarōre na mácvure no cūrabo urabore jocarī. Ūbenita ānibo cūrabo ina pōeva mácvure ne apure đaibo bácarō āmenejaquemavu. Quénora Cristorecabe apure đayvú bácvu na mácvure aru caino ne nūinoi jári coreyvú bácvu na mácvure. <sup>5</sup>Ūbenita nópe Jūmenijicu cadateyvú bácvureca na mácvu caivure, obedivú nácavu bácvu Jūmenijicure torojure đabedejaquemavu, ne āmeina teiye boje. Que baru Jūmenijicu yaidé đarejaquemavu na mácvure no pōcubenoi.

<sup>6</sup>Caiye iye va iye báqueque na mácvure coreóvaivubu maja aipe vaiquýyede majare, āmeina teiyurivú baru yópe ne āmeina teiyue báquepe. <sup>7</sup>Que baru pēpeimarare mearore jíbejarā mǔja, yópe apeyvú na mácvu ne đaiye báquepe. Yópe arī, toivaicōjenejaquemavu Jūmenijicu ũi yávaiyede ne mearore jíyena cūinácu ne pēpeimaracacure: “Ina pōeva dobarī āivu barejaquémavu aru ũcuivu barejaquémavu. Aru no yóboi nacajari upaivu barejaquémavu”, arī toivaicōjenejaquemavu. <sup>8</sup>Āmeina đaiye jaubevú majare apevunque majemarebucvú āmevunque, yópe apeyvú na mácvu ne āmeina đaiye báquepe apevunque nēmarebucvú āmevunque. Ne nópe đaiye báque boje, cūinájaravu baji veintitrés mil paivu baju yaidéjaquemavu.

<sup>9</sup>Maje jabocvú Cristo ũi urarō napiye boje maje āmeina teiyede, “Maja āmeina teivavacari, ñájimenajaramu maja, maje āmeina teiye boje”, ũbenina arī dápiaiye jaubevú majare, yópe apeyvú na mácvu ne nópe arī dápiaiye báquepe. Ne nópe arī dápiaiye báque boje, āđava, Jūmenijicui daroimara mácvu, ne cūriburu yóboi na mácvure, yaidéjaquemavu na mácvu. <sup>10</sup>Jūmenijicure āmeina yávabejarā mǔja, yópe apeyvú na mácvu ne āmeina yávaiye báquepe Jūmenijicure, ne āmecoroieyē báquede ne jabovare, ũi epeimara mácvure. Ne nópe đaiye báque boje, cūinácu ángelede đarorejaquemavu, ũi boarī jaruvaquiyeye ayvú na mácvure. <sup>11</sup>Caiye iye vaiye báqueque na mácvure coreóvaivubu maja aipe vaiquýyede majare, maja đaivu baru yópe ne đaiye báquepe. Aru Jūmenijicu toivaicōjenejaquemavu diede, maje buenajiyeye ayvú. Maja curivubu ijārvuvi buojaijārvuare. Iye “Que vaiquýyebu”, aye báque vaivu caride.

<sup>12</sup>Que baru ácvu pōecu “Āmeina tebevú yvú. Aru āmeina tebecvuyumu máre”, arī dápiaiyu me đajacurī, vainí tubecvuy. <sup>13</sup>Apenumua mǔja “Yópe đaiyvuvú yvú”, arī dápiađavū. Ūbenita nópe đaivu baru, āmeina tejebu mǔja. Nópe vaiyavū caivu pōevare. Ūbenita Jūmenijicu, ñai đayvú cainumua yópe ũi aye báquepedeca, ye đajocabebi mǔjare, mǔje vainí turājiiyepe ayvú mǔje āmeina đaiyue boje. Quénora parure đacvuyume mǔjare mǔje ũmei, mǔje āmeina đabenajiyeye ayvú. Parure đacvuyume mǔjare mǔje ũmei, mǔje napinajiyeye ayvú caiye iye mǔje āmeina đaiyuede, đabevvú diede. Que teni mǔja vainí tújurorivú bácvure vaidé đacvuyume ũ mǔje āmeina đaiyuede jocarī.

<sup>14</sup>Que baru mǔja, jívvú, ji umara, pēpeimarare mearore jíbejarā mǔja.

<sup>15</sup>Coyvuvu mǔjare yópe majidivupe. Nuriéna ji coyvuru, mǔjacapūravu

coreóvaiye majidivubu. <sup>16</sup> Maje āri ūcuiyede, ārurajivū maje jabocu Jesucristo ūi yaiye báquede majare boje, torojuede jívaivubu Jūmenijicure no ūcuidoque boje. Que baru ū mearo đacaibi majare maje ūcuiyede iye ūcuidoquede. Maje ūcuiyede diede, “Majarecabu Jesucristoi meadacaimara, ūi jive meiye boje ūi yaiye báquede”, arī jādovaivubu. Aru iye páure cotavavaivubu maja. Maje āiyede diede, “Majarecabu Jesucristoi meadacaimara, ūi jíye boje ūi bajure ūi yaiye báquede”, arī jādovaivubu. <sup>17</sup> Maja yóvaivu Jesucristore obedivū curivuvacari, cūinábo páuboquede āđavu maja. Que baru cūináyajubo pōeyajubope teni, Jesucristoque cūinávupe cūvu maja.

<sup>18</sup> Dápiajarā ina Israecavu ne āimara boaiyede, ne juarī jícarājiyepe aivu Jūmenijicure, ne āmeina teiye boje. Cójijivū bācavu ne āiyede ina boaimara mácavui jiaruaquede, “Cūináyajubo pōeyajubobu maja. Jūmenijicui yóvaimaratamu maja”, arī jādovaivubu. <sup>19</sup> Ji nópe coyuiye boje, “Āimajiaruare ne jíye báquede pēpeimarare meajiaruabebu apejiarua pūeno”, ūbenina arī ye dāpiabejarā muja. Aru, “Pēpeimara parurivubebu”, ūbenina arī ye dāpiabejarā muja. <sup>20</sup> Quénora yópe aiyuvū yu ji coyuiyeque: Pōeva Jūmenijicure coreóvabevū ne āimara boaiyede ne juarī jícarājivū pēpeimarare, “Jūmenijinare diede jícaivubu maja”, ūbenina arī dāpiadama. Jūmenijina āmema ne jícaimara. Jūmenijicu cūinácu quécara cubi. Quénora abujuvatamu ne jícaimara. Aru ūbevū yu muje yóva iyede abujuvaque. <sup>21</sup> Muja ye buojabevū cūináturu ūcuiyu maje jabocu Jesucristo ūi ūcuidoquede aru abujuva ne ūcuidoquede máre. Muja ye buojabevū cūináturu āivu maje jabocu Jesucristo ūi tuoivaquede aru abujuva ne tuoivaquede máre. <sup>22</sup> Maja āri ūcuiyu baru Jesucristo jiede maje cójijiñami jívui aru abujuva jiede pēpeimara ne cūrami jívui máre cūináturu, jorojīne đarājaramu maja maje jabocu Jesucristore. ¿Parurivu bárica maja ūi pūeno, napinajivū ūi ñājine đaquiyede majare ūi jorojīye boje? Bítamu. Jāve útame parucu maje pūeno.

**Jesúre ju aipōeva apecui yebacavu āmevuvacari, ne jádovaino ne ūede apevure ne đaiyeque**

(Mt 26.26-29; Mr 14.22-25; Lc 22.14-20; 1 Co 4.16; 6.12; 8.7-12; Fil 3.17)

<sup>23</sup> Yópe ávaivubuya apevu Jesúre ju aipōeva. “Đaicōjeiyede đaiye jaubevū majare. Que baru caiyede đaicōjeimumu yu”, ávaivubuya apevu. Jāvetamu. Ūbenita apede maje đaru, meamejebu majare o apevure máre. Aru apede maja đaivu baru, cadatebejebu apevu majevure, ne parure nurajiyepa aivu ne ūmei. <sup>24</sup> Ņame mearore đaiyurídubejarāri ne baju boje. Quénora caivu mearore đaiyujarāri apevure boje quéda.

<sup>25-26</sup> Apenumua Jūmenijicure coreóvabevū ne āimara boaimara mácavui jiaruaquede jīni bojedadama āimajiaruare bojedaitucubua uparivure, pēpeimarare jícarīburu yóbore. Ne que đaiyedeca, ĩni bojedajarā muja āimajiaruare nore, jēniari jámevūva árore ne íyede, “¿Boropateyu bárica?” arī dāpiabenajivū. Maje jabocu Jūmenijicu jietamu caiye ijāravū aru caiye ijāravūque máre. Que baru jēniari jámevūva, āimajiaruare ĩni bojedarī, ājara muja.

<sup>27</sup> Cūinácu Jesúre ju abecu, “Āranujara ji cūrami”, ūi arī cuturu mujare, aru muja nuiyurivu baru, āranujara muja. Áde ūi tuoiyede mujare, ājara muja. Jēniari jámejara árore ūi íyede āimajiaruare, “¿Boropateyu bárica?”

arĩ dápíabenajivũ. <sup>28</sup> Ñbenita apecũ nore cũcũ, “Iyebu ãimajiarũa ne jíye báque pẽpeimarare” ñi aru mũjare, iye jiarũare ãmejara mũja. Ñi que arĩburu yóboi, mũje ãru iye jiarũare, ñcapũravũ arĩ dápiaquijichũbi mũje borore yópe: “Pẽpeimarare pũedaivũbebu na. Que baru meavũbebu Jesúre jũ aipõeva ne pũedaru pẽpeimarare aru ne ãru jiarũare, náre jíye báquede”, ñbenina arĩ dápiaquijichũbi ñ. Que baru ñi arĩ dápíabequiyeye ayũ nópe, aru “¿Boropateyũ bária?” ñi arĩ dápíabequiyeye ayũ máre, ãmejara mũja. <sup>29</sup> Mũja “¿Boropateyũ bária?” arĩ dápíabevũreca, apecũ nópe arĩ dápiaquijichũbi. Que baru ñre boje, nópe coyũyũbu mũjare.

Ñbenita apecũ jẽniari jáquijichũbi: “¿Aipe teni ñaiye jauri yure yópe apecũ ‘¿Boropateyũ bária?’ ñi arĩ dápíajũroepẽ yurã?” <sup>30</sup> ¿Aru ji torojũede jídu Jũmenijicure, ñi jíye boje ji ñquiyede, aipe teni apecũ ãmecorori yure ji ñiyede iyede?” arĩ jẽniari jáquijichũbi.

<sup>31</sup> Apecũ ñi que aru, yópe arĩ coyũjebu yũ. Caiye mũje ñiyũede, caiye mũje ñcuiyũede, aru caiye mũje ñaiyũede máre, apecũ mearore jínajivũ baru Jũmenijicure mũje ñaiye boje, meajebu mũje ñaiye. Ñbenita apecũ “¿Boropateyũ bária yũ?” ne arĩ dápíaru, mũje ñaiye boje, meamejebu mũje ñaiye. “¿Yópe ñayũ baru, apecũ mearore jíde ñajeba yũ Jũmenijicure?” arĩ dápíajarã mũja, mũje ñarãjiye jipocai. <sup>32</sup> Yéde ñabejarã apecũ ne vainĩ turĩ ãmeina tenajiyeye aivũ. Quénora ñajarã cainũmũa apecũ ne vainĩ tubeni ãmeina tebenajiyeye aivũ. Judíovare, aru judíova ãnevũre, aru Jesúre jũ aipõevare máre ãmeina tede ñabejarã náre, mũje ñaiye boje. <sup>33</sup> Yácapũravũ torojure ñaiyũvũ caivũ põevare caiye ji ñaiyeque. Méne vaidé ñaiyũbevũ yũ ji baju. Quénora obedivũ apecũ méne vaidé ñaiyũvũ yũ, Jesús ñi meadaquiyeye ayũ náre.

**11** <sup>1</sup> Yávacari ñare ñũũmu yópe Cristo ñi ñaiye báquedepedeca. Que baru ñajarã mũja yópe ji ñaiyepe.

**Aipe ñaiye jaurõ Jesúre jũ aipõevare ne cójijivaiyede jínajivũ mearore Jũmenijicure**  
(2 Ts 2.15)

<sup>2</sup> Torojuvũ yũ mũje ñrué boje yure aru caiye ji bueiye báquede mũjare, aru mũje ñarĩ cõmajiyeye boje yópe Cristoi bueiye báquedepedeca ji coyũiyeye báquede mũjare. Mũje que ñaiyede me ñadavũ mũja. <sup>3</sup> Ñbenita caride vuvũ yũ mũje coreóvarãjiyeye ayũ iyede. Mũje jũ abedu ñai mũjare jaboteyũre, meamevũ. Cristorecabe jaboteyũ caivũ ñmũvare. Nomicurivũ coapa jaboteivũbu nẽmarepacore. Aru Jũmenijicurecabe jaboteyũ Cristore. <sup>4</sup> Ñmũ cũmañũ maru ñi jipobũre ñi jẽniayede Jũmenijicuque aru ñi coyũcaiyede Jũmenijicui yávaiyede apecũ põevare máre, Cristore pũedabebi. (Põecu ñi jipobũre cũmaimi ñi cuede ñre jaboteipõecui jivateinoi. Ñbenita apecũ ñmũ aru nomió máre ñmũre jaboteivũ ñmema, quénora Cristo baju jaboteyũbe ñmũvare.) <sup>5</sup> Ñbenita nomió cũmameco baru õi jipobũre õi jẽniayede Jũmenijicuque aru õi coyũcaiyede Jũmenijicui yávaiyede apecũ põevare máre, jĩmarepacure pũedabebico ñi jivateinoi cũco cũmamecova. Ñ cũmameco baru õi jipobũre, yópe nomió jĩmarepacui jaboteimo ñmecope tedobe õ. Que baru quédecã bájebu, õi yũvaru caiye õi podare. <sup>6</sup> Nomió õi cũmaiýbedu õi jipobũre õi jẽniayede Jũmenijicuque aru õi coyũcaiyede

ũi yávaivede apevure máre, pñeno meajebu ôre yuvaru ôi podare. Ûbenita cñeyeco baru ô ãmujubepodaque cñco baru aru caiye ôi podare yuvarĩ jaruvado baru, cñmajacorĩ ôi jipobure. <sup>7</sup>Ûbenita ãmure cñmaiye jaubevu ãi jipobure ãi jñiaiyede Jñmenijicuque aru ãi coyucayiede ãi yávaivede apevure máre, Jñmenijicui cñedaiye báque boje ãre ãpe ãrojacure. Que baru ãmuvarecabu curivu, mearore jñajivu Jñmenijicure. Diede jádovaivubu ne cñmameque ne jipobure. Ûbenita nomivarecabu curivu, mearore jñajivu nẽmarepacure. Diede jádovaivubu ne cñmaiyeque ne jipobure.

<sup>8</sup>Jñmenijicu cñedabedejaquemavu ñai mamarumucacu bácu ãmure, ãi ãmiá Adán, ico nomió ôi cñadoque. Quẽnora cñedarejaquemavu ico mamarumucaco báco nomióre, ôi ãmiá Eva, ñai ãmu ãi cñadoque. <sup>9</sup>Aru Jñmenijicu cñedabedejaquemavu ñai ãmure, ãi cadatequiyepe ayu ico nomióre. Quẽnora cñedarejaquemavu ico nomióre, ôi cadatecojiyepe ayu ñai ãmure. <sup>10</sup>Que barureca nomióre cñmaiye jauvu ôi jipobure, jádovacodo jĩmarepacui jaboteimore. Ôi que ðaiyede, ina ángeleva máre ôre me jádama. <sup>11</sup>Ûbenita maje jabocu Jñmenijicui cñedaiye báquede ãmure aru nomióre máre ina pñcarãre jauquiyede majidejaquemavu. Nomióre jaubi ãmu. Aru ãmure jaubico nomió. <sup>12</sup>Que baru jãvetamu ico mamarumucaco báco nomió, ôi ãmiá Eva, Jñmenijicui cñedaimo máco ãmu ãi cñadoque. Aru jãvetamu caivu ãmuva máre curivu nomió ôi juedocuvae báque boje náre. Aru caivure, caiyede máre cñedarejaquemavu Jñmenijicu.

<sup>13</sup>¿Muje dápíaru, meameni nomió jñiaadore Jñmenijicuque ôi jipobure cñmamecova? Mújaca pñravu coreóvaye majidivubu jãve meamenore ôi jñiaru Jñmenijicuque ôi jipobure cñmamecova. <sup>14</sup>Aru pñeva ne ðarĩ cñmajiyeque máre majidivubu maja. Pñeva ãmeina jádama ãmu ãmujue poda cucure. ãmu ãmujue poda cucu baru, cñyoje tejebu ãi. <sup>15</sup>Ûbenita pñeva me jádama nomió ãmujue poda cucore. Nomiva pñeva ne pñedaimaramu ne cñe boje ãmujue poda, cñmarajivu ne jipobure. <sup>16</sup>Apecu mujacacu o apeco mujacaco ju aiyubedu iye ji majicayiede, quẽdata coyuyubu yu diede. Nñja aru caivu apevu Jesúre ju aipñeva cójijivaivu apenoa ãmaroai ye coreóvabevu apevure, mujare jocarĩ, ne nomivare jñiaicõjeivure Jñmenijicuque o coyucacõjeivure ãi yávaivede máre ne jipobure cñmamevva.

**Pñeva ne ãmedaino ne ãri ãcuiyede, ãrurajivu Jesucristoi yaiye báquede**

<sup>17</sup>Caride aipe ðaiye jaurõre muje cójijivaiyede majicaiyuvu yu mujare. Muje cójijiyede ãmedadavũ muja. Que baru torojubevu yu. Muje cójijivaiyede mearore nure ðabevubevu muja muje bajure. Quẽnora ãmenore nure ðaivubevu muja muje bajure. <sup>18</sup>Mamarumure yópe apevu ne arĩ coyuiyede, “Ina Corintocavu Jesúre ju aipñeva yajuboa tede ðaivubu. Ne baju cñináturu ãmevu ne ãmei ne cójijivaiyede. Apevu ne urarõ ãiyede ne davaiyede cójijinami, apevure jíbevũva, ãivubu urarõ, apevu ne ãmeneca”, jápiaivu yu muje borore. Jãve majavũ iye ne coyuiyede. <sup>19</sup>Muje yajuboa tede ðaiye boje, pñeva coreóvaivubu Jñmenijicu ãmeina jãñure mujacavu jíbevure apevure. <sup>20</sup>Maje jabocu Jesucristo jãve ãmeina jãñume muje cójijivaiyede, muje ãri ãcurajiyepe ayu, ãrurajivu ãi yaiye báquede, muje ðabe boje yópe ãi ðaicõjeiye báquepedeca diede. <sup>21</sup>Muja cójijivaivu bácvu, apevu mujacavu ãiyede nñvaivu bácvu coapa muje baju ãiyede ãni ãvaivubuya,

jíbevuva apevure. Aru maumena ári bávaivubuya apevu mjevuvu ne earájiye jipocai. Que baru apevu mujacavure ávué ijivaivuya. Ubenita apevu urarō yapivaivubuya pu ne pacoteiyeta. Mjua cūináturu ámevaivubuya. <sup>22</sup> Mjue que daiyede pare ubevu yu. Ári ūcuiye jauvu pōevare ne cūramiai. Ubenita mjue cūramiare cūvarivuvacari mjua coapa, pueno baju ári ūcuiyuvubuya Jesúre ju aipōeva ne cójijĩnami. Pare ubevu yu mjue ámeina jáiyede Jūmenijicui pōevare aru mjue cūyoje tede daiyede mjevuvu áiyede cūvabevure. Ámeina jámejara mjua Jūmenijicui pōevare. Aru cūyoje tede dabejarā mjua mjevuvu áiyede cūvabevure. ¿Aipe arī coyujī mujare? Ye majibevu yu aipe arī coyucuyure mujare. Jáve torojubevu yu mjue que daiyede. “Me daivubu mjua”, jáve ye abecuyumu yu mujare.

**Jesúre ju aipōeva ne ári ūcuino, ārurajivu ūi yaiye báquede**

(Mt 26.26-29; Mr 14.22-25; Lc 22.14-20)

<sup>23</sup> Iye m aje ári ūcuiyede, ārurajivu Jesucristoi yaiye báquede, Jesucristovacari coreóvare darejame yure. Aru yópe ūi coreóvare daiey báquedepeda coreóvare dacacu mujare. Āniñami mácarōmiareca, Judas bácuī jēni jíye baquiyé jipocai m aje jabocu Jesúre ūi mauvare, páure ĩnejamedā Jesús. <sup>24</sup> Jūmenijicure torojuede jĩniburu yóboi, páure cotuvarejamedā. Aru arejamedā ūi bueimarare: “Dápijarā iye páure yópe mjue dápiaiyepe ji bajure. Jíquijivu yu ji bajure, ne boarí jaruvārājiyepe yure, mujare ji meadaquiye boje. Que baru mjue áiyede iye páure, ārurajara yure”, arejamedā náre Jesús. <sup>25</sup> Aru nopedeca ūcuidore ĩni ne ári bubarĩburu yóboi, Jesús arejamedā: “Dápijarā iye ūcuiyede yópe mjue dápiaiyepe ji jivede. Jíquijivu yu ji jivede, ne boarí jaruvārājiyepe yure, mujare ji meadaquiye boje. Que baru yure mequiyebu ji jive obedivure boje. Jūmenijicu ‘Yópe đajarā mjua, boropatebenajivu ji jáinoi’, ūi yóbocarō coyũino mácarōre pōevare ārurajaramu. Cainũmua mjue ūcuiyede diede, ārurajara yure”, arejamedā Jesús. <sup>26</sup> Cainũmua yópe mjue páure áiyepē aru mjue ūcuidoquede ūcuiyepē máre, pu m aje jabocu Jesucristoi copaidaiyeta, pōevare jádovaivubu Cristoi yaiye báquede náre boje, meadacuyu náre.

**Aipe daiey jaurō Jesúre ju aipōevare ne ári ūcuiyede, ārurajivu ūi yaiye báquede**

(He 12.5-11)

<sup>27</sup> Ácu pōecu puedabecu āñu maru iye páuquede, iye ārure daiey m aje jabocu Cristoi bajure, o ūcuñu maru iye ūcuidoquede, iye ārure daiey m aje jabocu Cristoi jivede, boropatecuyume ūi puedabe boje Cristoi bajure aru ūi jivede máre. <sup>28</sup> Nópe vaibéquiyepe aivu, caivu coapa me dápiarĩ corevajarāri caiye ne daiyede, ne dápiayede máre, “¿Ámeina teyuba yu?” jēniari járajivu ne baju. Aru ámeina teivu baru, chĩori coyujarāri ne ámeina teiyede Jūmenijicure, ūi ārumetenĩ jaruvāquiyepe ayu diede, ne ári ūcurajiye jipocai. <sup>29</sup> Ácu pōecu ūi āru iye páuquede aru ūi ūcuru iye ūcuidoquede máre, dápiabecũva m aje jabocu Cristo baju nájini yayíu bácare, jáve Jūmenijicu nájine dacuyume áre, ūi que daiey boje. <sup>30</sup> Que baru obedivu mujacavubu parubevu aru ĩjimara máre. Aru apevu yayíama. <sup>31</sup> Maja me dápiarĩ corevaru m aje baju daiyede aru m aje baju dápiayede máre, m aje jabocu Jūmenijicu

ñájine ðabejebu majare. <sup>32</sup> Ëbenita maje jabocu Jümenijicu ñájine ðayube majare, majicacuyü majare, maje bñabenajiyeye ayu ùre jocarí ijáravucavu ùre coreóvabevuque.

<sup>33</sup> Que baru, muja, jívü, muje cójijivaiyede äri ùcurajívü yópe maje jabocu Jesucristoi äruhe ðaicójeiyeye mujare, corejarä caivu mujevure, ne earäjiyeye aivu. Que teni äri ùcujara caivu muja cüináturu. <sup>34</sup> Äcu pöecu mujacacu ävué yaíyü baru, äjacurí üi cürami jívüi, Jümenijicui ñájine ðabequiyeye ayu mujare, muje ämedaiye boje muje cójijivaiyede. Apepe muje jëniari jáiye báquede yure, majicacuyumu mujare aipe ðaiye jaüröre ji eaquiyede muje yebai.

**Espíritu Santoi majide ðaino Jesúre ju aipöevare üi majiécáröque  
bojecubeda, ne cadatenajiyeye aino apevure**

(Ro 12.6-8)

**12** <sup>1</sup> Muja, jívü, caride coyquijívü iye jëniari jáiyede muje toivaiye báquede yure paperayocaque Espíritu Santoi majide ðaiyena Jesúre ju aipöevare üi majiécáröque bojecubeda, maje cadatenajiyeye ayu apevure. Ëvu yu muje me coreóvaräjiyeye diede.

<sup>2</sup> Muja iyede coreóvaivubu. Jümenijicure coreóvabevu bácvu càreja, pëpeimara yávabevure mearore jíde ðaimara matequémavu muja, muje ðápiaríduiye boje paruéde cüvarivure. Ne ðaicójeimara matequémavu muja. <sup>3</sup> Que baru caride mujare coreóvare ðaiyuvu yu iyede. Pöecu cubebi Jümenijicui Espíritu Santore cüvacu, “Jümenijicu ñájine ðajacurí Jesúre toabo cüiméboi cainumua”, arí buojayu. Aru pöecu cubebi, “Jesús maje jabocube”, arí buojayu jáve, Jümenijicui Espíritu Santoi nópe coyure ðabedu ùre.

<sup>4</sup> Ëretamu Jümenijicui majiéque üi majide ðaiye üi pöevare bojecubeda. Ëbenita ñai Espíritu Santo cüinácurecabe majide ðayu caivu majare maje majiécáröva. <sup>5</sup> Ëretamu maje memecaiye Jümenijicure aru apevure máre maje majiécáröque. Ëbenita cüináturu ämevu. Aru maje jabocu Jesucristo cüinácurecabe jaboteyu maje memecaiyede. <sup>6</sup> Ëretamu Jümenijicui jádovaiye üi paruéde, üi jíyede majare, maje memecaräjiyeye ayu ùre aru apevure máre üi majiécáröque. Ëbenita cüináturu ämevu. Aru majepacu Jümenijicu cüinácurecabe parure ðayu caivu majare, maje memecaräjiyeye ayu maje majiécáröque.

<sup>7</sup> Jümenijicu majide ðayube caivu majare Jesúre ju aipöeva coapa üi majiécáröre, maje jádovarajiyeye ayu cüvarivure üi Espíritu Santore aru maje cadatenajiyeye ayu apevure. <sup>8</sup> Apevu üi pöevare Jümenijicu üi Espíritu Santore coyure ðaicójeimi üi majiéque. Aru apevu üi pöevare Jümenijicu üi Espíritu Santore majicare ðaicójeimi apevure iye majiéde üi majide ðaiye báquede náre, apevu ne coreóvaräjiyeye ayu diede. <sup>9</sup> Apevu üi pöevare Jümenijicu üi Espíritu Santore jëniare ðaicójeimi éque, “Jáve majivu yu Jümenijicu ðacuyure yópe ji jëniaiyepedeca ùre” arí. Aru apevure Jümenijicu üi Espíritu Santore meadare ðaicójeimi ijimarare. <sup>10</sup> Apevu üi pöevare Jümenijicu üi Espíritu Santore pöeva ne ðarí majibede ðare ðaicójeimi. Apevu üi pöevare Jümenijicu üi Espíritu Santore coyucare ðaicójeimi üi yávaiyede apevure. Aru apevu üi pöevare Jümenijicu üi Espíritu Santore majide ðaicójeimi apecu yávayure yópe Espíritu Santoi yávaicójeiyeye o

yópe abujucu ùi yávaicōjeiyepe. Apevu ùi pōevare Jūmenijicu ùi Espiritu Santore yávare ðaicōjeimi apecamua yávaicamua ne majibecamua. Apevu ùi pōevare Jūmenijicu ùi Espiritu Santore coyure ðaicōjeimi aipe aiyuede iye apecu ùi yávaiyede apecamua yávaicamua ùi majibecamuaque.

<sup>11</sup> Aru caiye iye Jūmenijicui majiéquede ñai Espiritu Santo cūinácara majide ðaibi majare coapa yópe ùi urōpe.

**Jēvari coyūino Jesúre ju aipōeva cójijivaivu yópe pōecu ùi bajupe**

(Ro 12.4-5; Ef 4.11, 14-16)

<sup>12</sup> Jēvari coyūiyede coyūyubu yu mujare. Yópe pōecu ùi baju cūvae ure cūepe, ùbenita ùi baju cūinábaju quénora cūepe, nopedeca obedivutamu maja Jesúre ju aipōeva, ùbenita cūináyajubo pōeyajubo teni, cūinávupe cūvu maja Jesúre ju aipōeva. <sup>13</sup> Caivu maja Jesúre ju aipōeva, judíoia aru judíoia ámevu, yebacavu aru yebacavu ámevu máre, Jūmenijicuque jádovaimara mácavubu ocoque. Nópe ðarí, ñai Espiritu Santo cūinácurebe maja Jesúre ju aipōeva caivure cūináyajubo pōeyajubo tede ðayu. Aru caivu coapa cūvarivubu ñai Espiritu Santore majaque.

<sup>14</sup> Pōecu ùi baju cūináro cūvaecarō ámevu. Quénora ùi baju cūvae uretamu. Quédeca Cristo jina obedivutamu maja. <sup>15</sup> Mi cūboba yávarí buojaiba baru pōecupe aru “Yu ámevu mi puru. Que baru mi baju cūvaecarō ámevu yu”, aiba baru, nópe aibavacari, mi baju cūvaecarō bájebe diba. <sup>16</sup> Aru mi cámuca yávarí buojaica baru pōecupe aru “Yu ámevu mi yacorū. Que baru mi baju cūvaecarō ámevu yu”, aica baru, nópe aicavacari, mi baju cūvaecarō bájebe dica. Quédeca maja cūináturu ámevureca, majacacu cūbebi meacu apevu pūeno. <sup>17</sup> Pōecu ùi baju yacorua matuiye baru, ñai pōecu jápiarí majibejebe. Aru pōecu ùi baju cámuca matuiye baru, ñai pōecu vīni majibejebe. Quédeca cadateiyavū maje baju iye majiéque, ñai Espiritu Santoi majide ðaiyede majare coapa. <sup>18</sup> Ùbenita Jūmenijicurecabe epeyu bácu caiye pōecu ùi baju cūvae yópe ùi urōpe. <sup>19</sup> Cūináro pōecu baju cūvaecarō quénora cūru, pōecu cūbejebe.

<sup>20</sup> Ùbenita pōecu ùi baju cūvae ure cūvacureca, ùi baju quénora cūinárotamu. <sup>21</sup> Mi yacorū yávarí buojaidu baru pōecupe, “Mure jaubevu yure”, aidu majibejebe mi purure. Aru mi jipobu yávarí buojaibu baru pōecupe, “Mure jaubevu yure”, aibu majibejebe mi cūbobare. Quédeca, “Mure jaubevu Cristore” arí, majecure coyubenajarevu maja. <sup>22</sup> Quénora jauvu majare iye maje baju cūvae parube ape maje baju cūvae pūeno, maje apurājiiyepe aivu. <sup>23</sup> Apepe maje baju cūvaequede yópe maje baju jívūquede majié me jáivubu maja. Ùbenita diedecabu maje me coreiye. Aru apepe maje baju cūvaequede apevure jáicōjeiyubevu maja. Que baru cuitótecajeare doivubu, cūmarajivu diede. <sup>24</sup> Ùbenita apepe maje baju cūvaequede die pūeno ye cūmamevu maja. Jūmenijicurecabe epeyu bácu maje baju cūvae, maje me járajiiyepe ayu pūeno baju iye maje baju cūvaequede, maje ámeina jájuroede. <sup>25</sup> Que ðayu bácu Jūmenijicu, maje baju baquiyépe ayu cūinárora, aru caiye maje baju cūvaeque cadatequiyepes ayu ne baju coavabevūva. <sup>26</sup> Maje baju cūvaecarō cūináro ijidu majare, caino maje baju ijivu majare. Aru apecu ùi pueðaru maje baju cūvaecarō cūinárore, maja torojurivubu caino maje bajuque. Quédeca cūinácu Jesúre ju aipōecu ùi ñájiiyede, caivu

maja Jesúre ju aipõeva ñájuvubu. Aru apevu ne pueðaiyede cūinácu Jesúre ju aipõecure, caivu maja Jesúre ju aipõeva ne pueðaimaratamu.

<sup>27</sup> Jēvari coyuyubu mujare. Majatamu yópe Cristo ũi bajupe. Aru majatamu coapa ũi baju cūvaeque. <sup>28</sup> Caivu maja Jesúre ju aipõevare coapa Jūmenijicu epeiḃi, maje memecarājiyepe ayu majevu cōjijivaivure. Mamarumucavubu ũi epeimara Jesús ũi yávaie méne beorī coyucōjeimara. Mamarumucavu ne yóbocavubu ũi epeimara ũi yávaieyede coyucaipõeva. Ne yóbocavubu ũi epeimara bueipõeva. Ne yóbocavubu ũi epeimara põeva ne ðarī majibede ðaipõeva. Ne yóbocavubu ũi epeimara ijimarare meaðaipõeva. Ne yóbocavubu ũi epeimara caðateipõeva, jipocateipõeva, aru apecamua yávaicamua ne majibecamuare yávaipõeva máre. <sup>29</sup> Jāve caivu maja āmevu Jesús ũi yávaie méne beorī coyucōjeimara. Aru jāve caivu maja āmevu Jūmenijicui yávaieyede coyucaipõeva. Jāve caivu maja āmevu bueipõeva. Jāve caivu maja āmevu põeva ne ðarī majibede ðaipõeva. <sup>30</sup> Jāve caivu maja āmevu ijimarare meaðaipõeva. Jāve caivu maja āmevu apecamua yávaicamua ne majibecamuare yávaipõeva. Aru jāve caivu maja āmevu coyucōjeimara aipe aiyūede iye apecu ũi yávaieyede apecamua yávaicamua ũi majibecamuave. <sup>31</sup> Apeno Jūmenijicui majiécārōque pueno baju caðateivubu maja apevure. Que baru pare ũjarā muje cūvarājiyepe iye pueno baju bojecue majiède.

#### Maje ne apevure

(Mt 17.20; 21.21; Mr 11.23; 1 Jn 3.2)

Ñai Espíritu Santo mujare majide ðayureca, caride majicayubu yu mujare aipe ðaiye jaurōre pueno baju parurōre.

**13** <sup>1</sup> Maja yávaivu majijuvu caiye ijārvunque yávaieyede buebevūva diede. Aru yávaivu majijuvu āngeleva ne yávaieyede máre. Ũbenita maje ũbedu apevu põevare, ye baju āmevu caiye iye maje yávarī majijuroede. Apevure ũbedu, caiye iye maje yávaie jápuraivu yópe bujiépe tāuque ðaiyede, pare āmeina jápuraede aru cārijovaiyede máre. <sup>2</sup> Aru maja Jūmenijicui yávaieyede coyucāijuvu paruéque. Jūmenijicui dápiaino jáðovameno mácarōre jipocamia ũbenita jáðovainore caride jápiarī eaijuvu. Caiyede me coreóvāijuvu. Me ju aijuvu Jūmenijicure, jēniari ũre ũi nuicōjequiepe aivu cūracūare apenoita aru majini dicūā nuquicūare. Ũbenita maje ũbedu apevu põevare, ye baju āmevu caiye iye maje majijuroede. <sup>3</sup> Aru maja jījuvu caiye maje cūvaeðe cūve cūvabevure. Pū maje bajure juarī boarī jaruvaicōjeijuvu máre. Ũbenita maje ũbedu apevu põevare, ye baju āmevu caiye iye maje ðájuroede.

<sup>4</sup> Maja apevure ũrivu, napivaivubu náre. Aru mearore ðarī cōmajivaivubu, caðatenajivu náre. Maja apevure ũrivu, ye jorojīmevaivubu náre. Aru, “¿Meara márica muje pueno?” ye arī coyubevaivubu náre. Aru, “¿Meara márica muje pueno?” ye arī dápiabevaivubu náre máre. <sup>5</sup> Maja apevure ũrivu, pueðavaivubu náre. Aru, “Vaijáðeni me yūre”, arī dápiabeni quénora “Vaijáðeni me apevure”, arī dápiarī, memecavaivubu apevure boje, caðatenajivu apevure maje baju pueno. Maja apevure ũrivu, ye jarabevaivubu. Aru apevu ne āmeðaiyede majare, maumena ārumetevaivubu diede. <sup>6</sup> Maja apevure ũrivu, ye torojubevaivubu apevu ne āmeina teiyede, ne coyuiyede jāve āmene máre, aru ne āmeðaiyede apevure, ne coyuiyede jāve āmene

apenvi borore máre. Quénora torojuvaiyubu apenvi ne mearo teiyede, ne coyuiyede jávene máre, aru ne mearo ðaiyede apenvi, ne coyuiyede jávene apenvi borore máre. <sup>7</sup>Maja apenvi urivú, ñájivaivubu caiye ámene apenvi ne ðaiyede majare, ámenore ðabevúva náre copú. Aru ju ávaivubu caiye méne maje jápiaiyede apenvi borore. Ñbenita aiye ámene maje jápiaiyede apenvi borore ju ávabevubu. Maja apenvi urivú, ðajocabevúva corevaivubu ina ámedaivure, ne oatuvári mearore ðarãjiyepe aivú. Aru napivaivubu caiye ámene apenvi ne ðaiyede majare ðajocabevúva maje uede náre.

<sup>8</sup>Cainumua apenvi ne jauquiyebu majare. Iye majié Jñmenijicu ñi Espñritu Santore majide ðaiye majare cñiquíyebu. Cñiquíyebu pñeva ne coyúcaiye Jñmenijicu yávaiyede apenvi. Cñiquíyebu pñeva ne yávaiye apecamua yávaicamua ne majibecamuare. Cñiquíyebu pñeva ne majicaiye apenvi Jñmenijicu majide ðaiye báquede náre, apenvi ne coreóvarãjiyepe aivú diede. <sup>9</sup>Jñmenijicu coreóvaicñeimi majare quénora quíjino ñi majiécarñre. Aru coreóvaicñeimi majare quénora quíjino ñi yávaiyede. <sup>10</sup>Ñbenita Cristo ñi majide ðaquiyede caivú majare caiyede, maje curãjiyede éque cavarñ mearo Jñmenijicu curñ, ñai Espñritu Santo ñi majide ðaiye báque quíjñe majare cñiquíyebu. Dinumú maquinñre caivú majare ye majié jaubequiyebu.

<sup>11</sup>Yú jueñocu cãreja coyuvayú barejacácu yñpe jueñova ne coyuiyepe. Aru corevayú barejacácu méne aru ámene máre yñpe jueñova ne corevaiyepe. Aru dápiavayú barejacácu yñpe jueñova ne dápiaiyepe máre. Ñbenita yú bucucu caride, caiye ji ðaiye báquede jueñova ne ðaiyepe ðajocarejacacu. Quéñeca ji cñe ijarávui jueñocupe páyubu yú, ji coreóvaiye boje quíjino Jñmenijicu jiede. Ñbenita ji cuquiyede cavarñ mearo Jñmenijicu curñ bucucupe páyú bacuyúmu yú, ji coreóvaiye boje urarñ Jñmenijicu jiede.

<sup>12</sup>Caride Jñmenijicu jiede jáivubu maja yñpe maje jáiyepe jivarú javecaruque. Que baru jáve majibevú aipe ãrojaene caiyede. Ñbenita apejãravú ðaquijãravú baquinñre járajaramu Cristo bajure. Caride quénora majié jápiarñ eaiyubu maja Jñmenijicu jiede. Que baru ñ jiede coreóvaiye pare jauvú majare. Ñbenita apejãravú ðaquijãravú baquinñre coreóvarãjaramu caiyede jaubevúva, yñpe Jñmenijicu coreóvaiyepe majare.

<sup>13</sup>Ñbenita yñbecue Jñmenijicu ðarñ majide ðaiye majare ye cñiméquiyebu. Cainumua Jñmenijicu ju aiye jauvú majare. Aru cainumua Jñmenijicu mearo ðacaquiyede majare yñpe ñi aiye báquepedeca napini coreiye jauvú majare. Aru cainumua Jñmenijicu aru apenvi máre ne jauvú majare. Ñbenita yó cñinãrorecabu iye yñbecuecarñ jauñ ape pñeno, maje ne Jñmenijicu aru apenvi máre.

#### Ape Espñritu Santo ñi majide ðaiye jaué ape pñeno

**14** <sup>1</sup>Ñajarã muja caino muje oainope, urãjivú Jñmenijicu aru apenvi máre. Aru pare ñjarã Jñmenijicu Espñritu Santo ñi majide ðaquiyepa aivú majare Jñmenijicu ñi majiéquede, muje cadatenajiyepe ayú apenvi. Aru pñeno baju ñjarã ñi majide ðaquiyepa aivú muje coyucarãjiyepe ayú pñevare Jñmenijicu yávaiyede parueque. <sup>2</sup>Ácu pñecu yávayú baru apecamua yávaicamua ñi majibecamuare, Jñmenijicu arñ yávayube. Ñbenita pñevare ye arñ yávabebi ñ. Éi yávaiye boje ñi úmeque pñeva ne majibede aru ne jáñovamene máre, ñame ye jápiarñ eabejebu ñi yávarñduiyede. <sup>3</sup>Ñbenita ácu

põescu coyucayn baru Jūmenijicui yávaiyede paruéque, cadatejebu apevn Jesúre ju aipõevare, ne parure nurajiyepa ayu ne ũmei. Náre parure ðajebu ne ũmei. Aru chõioivúque, náre orĩ cadatejebu máre. <sup>4</sup>Ñai yávayn apacamua yávaicamua ũi majibecamuaŕe ũi baju quécura parure nujebu ũi ũmei, ũi nópe yávaiye boje. Ũbenita ñai coyucayn Jūmenijicui yávaiyede paruéque apevn Jesúre ju aipõevare parure nure ðajebu ne ũmei, ũi nópe coyuiye boje. <sup>5</sup>Ũvn yu caivn mujare muje yávarājiyepa ayu apacamua yávaicamua muje majibecamuaŕe. Ũbenita pueno baju unv yu muje coyucarājiyepa ayu Jūmenijicui yávaiyede paruéque. Põescu ũi yávaru apacamua yávaicamua ũi majibecamuaŕe ũbenita põescu ũi cubedu coyuiye majicu aipe aiyuede iye yávaiyede, Jesúre ju aipõeva ye parure nuiye majibejebu, ne jápiarĩ eabe boje diede. Que baru me bojescu bajubu põescu ũi coyucaiyepa põevare Jūmenijicui yávaiyede paruéque põescu ũi yávaiye pueno apacamua yávaicamua ũi majibecamuaŕe.

<sup>6</sup>Muja, jívũ, ji eaquiyede muje yebai yávayn baru apacamua yávaicamua ji majibecamuaŕe, ye cadatebejebu mujare, coyubescu baru máre aipe aiyuede. Ũbenita coyuyũ baru mujare ape coyuiyede Jūmenijicui jádovaiye báquede yure, o apede, ñai Espíritu Santo ũi majide ðaiye báquede yure, ji majicaquiyepa ayu mujare, muje coreóvarājiyepa ayu, o ape coyucaiyede Jūmenijicui yávaiyede paruéque, o ape bueiye de máre, cadatejebu mujare. <sup>7</sup>Jēvarĩ coyuiyeque coyuyũbu mujare. Maje pedubare japuiyede aru maje biabeibore bujide ðaiyede máre põeva ne uparājiyepa aivũ, maje japuiyede o maje bujide ðaiyede nurié āmenu, ina upaiyurĩduivũ ye majibejebu aipe upajuroede. <sup>8</sup>Aru quédaca, churarava ne coreiyede jápiarājivũ apescu ũi japuiyore japuiyede náre coedaicõjeinore, náre āradaicõjeinore, aru náre ādamatenanucõjeinore máre, nurié āmenu iye japuiye, ina churarava ye meadabejebu ne baju ādamatenanurajivũ. <sup>9</sup>Nopedecabu majare máre. Maje yávaru apacamua yávaicamuaŕe, caivn põeva ne majibecamuaŕe, ñame jápiarĩ eaiye ye majibejebu maje yávarĩduiyede. ¡Ũbenina yávarĩdujebu maja!

<sup>10</sup>Ũrebebu ijāravucavũ ne yávaicamua. Aru caivn põeyajuboacavũ jápiarĩ eadama ne baju yávaicamuaŕe. <sup>11</sup>Ji coyurĩduru apescuŕe ũbenita jápiarĩ eabedu ũi yávaicamuaŕe, “Ñujacacu āmemi”, écapūravũ ajebu yurā, aru yu máre, “Ñujacacu āmemi”, ajebu ũra. <sup>12</sup>Que baru muja cuvaiyurivũ pare ñai Espíritu Santo ũi majide ðaiyede, pueno baju ujarā muja iye Jūmenijicui majiéquede, cadatenajivũ apevn Jesúre ju aipõevare, ne parure nurajiyepa aivũ ne ũmei.

<sup>13</sup>Que baru ñai yávayn apacamua yávaicamua ũi majibecamuaŕe jēniajacurĩ Jūmenijicuŕe, ũi coyuiye majide ðaquiyepe ayu aipe aiyuede iye yávaiyede apacamua yávaicamua ũi majibecamuaŕe. <sup>14</sup>Yũ jēniañũ maru Jūmenijicuŕe apacamua yávaicamua ji majibecamuaŕe, jāve jēniajebu ji decocuŕe. Ũbenita dāpiabescu majibejebu yu ji ũmei aipe aiyuede. <sup>15</sup>Que baru yópe ðaiye jaivũ yure. Jūmenijicuŕe jēniaiye jaivũ yure dāpiayure ji decocuŕe aru ji ũmeque máre, ji jápiarĩ eaquiyepe ayu aipe ji jēniaiyede. Aru yuriaiye jaivũ yure dāpiayure ji decocuŕe aru ji ũmeque máre, ji jápiarĩ eaquiyepe ayu aipe ji yuriaiyepe. <sup>16</sup>Muje mearore jĩdu Jūmenijicure dāpiabevũva quénora muje decocuŕe, apevn nore curivũ jápiarĩ eabevũva muje yávarĩduiyede, “Jāvemũ ne aiyede”, ye aivũ buojabejebu ne coreóvabe

boje aipe aiyuede diede. <sup>17</sup>Muje mearore jíye me baju bajuvú. Ûbenita ina mujare jápiaríduivu ne coreóvabedu aipe aiyuede muje coyuríduinore, náre cadatebejebu muja. Nácapūravu ye parure nūmejebu ne ūmei muje nópe coyuiye boje. <sup>18</sup>Torojuede jíyubu yu Jūmenijicure ūi Espírиту Santo ūi yávarī majide daiye boje yure apecamua yávaicamua ji majibecamua. Aru dicamuare yávavaivu yu caivu muje pueno. <sup>19</sup>Ûbenita ji cójjivaiyede apevu Jesúre ju aipōevaue, náre ji coyuru cūinápurupe paicamua yávaicamua ne majidicamuauque, buecyu náre, meaje bu ji coyuríduiye pueno caipucapuruape paimil baju yávaicamua ne majibecamuaque.

<sup>20</sup>Muja, jívu, ðabejarā muja yópe jueðova dápiabevū ne ðaiyepe. Muje apevure jáicōjeniduiyede mujare, ñai Espírиту Santo ūi majide ðaimara mae boje, jueðovape teivubu muja. Quénora ðajarā yópe bucūva dápiaivu ne ðaiyepe. Muje apevure cadateiyede, ñai Espírиту Santo ūi majide ðaimara mae boje, bucuvape teivubu muja. Ûbenita yópe jueðova majibevū āmeno ðaiyeque, muja máre majibevupe tejarā āmeno ðaiyeque.

<sup>21</sup>Javede yópe arī, toivaicōjenejaquemavu Jūmenijicu ūi yávaiyede: “Apevu pōeva, apeyajubo pōeyajubocavure coyucaicōjecuyumu yu ji yávaiyede ji pōevare apecamua yávaicamua ne majibecamuaque. Ûbenita yu náre nópe coyucaríduyureca, ye yure jápiarī adabede nūrajarama na”, arejaquemavu maje jabocu Jūmenijicu. <sup>22</sup>Que baru Jūmenijicui coyucōjeiyede pōevare apecamua yávaicamua ne majibecamuaque, ne jápiarī eabe boje diede, jáðovañume náre ju abevure ūre aru ūi cadatebemarare máre. Ûbenita ūi coyucōjeiyede ūre coyucaipōevare ūi yávaiyede paruéque, ne jápiarī eaiye boje diede, jáðovañume ina ju aivure ūre aru ūi cadateimarare máre. <sup>23</sup>Caivu muja Jesúre ju aipōeva, muje cójjivaiyede, caivu ina yávaipōeva ne yávaru apecamua yávaicamua pōeva ne majibecamuaque quénora, aru Jesúre ju abecu o apecu ecoyu baru muje cójjijīñami, jāve “¿Ārumevu bárica?” aje bu ū. <sup>24</sup>Ûbenita caivu mujacavu yávaipōeva ne coyucaru Jūmenijicui yávaiyede paruéque, aru Jesúre ju abecu o apecu ecoyu baru muje cójjijīñami, coreóvaje bu āmeina teyure. Caivu muja yávaipōeva muje coyuiye boje Jūmenijicui yávaiyede, “Ji ðaiyede oatuvaiye javvu yure”, arī dápiaje bu ū. <sup>25</sup>Coreóvaje bu Jūmenijicu majicure caiye ūi dápiaiyede ūi ūmei. Nūatutarī, pueðarī, mearore jíje bu Jūmenijicure. Aru, “Jāve Jūmenijicu cubi mujaque”, aje bu ū.

#### **Jesúre ju aipōeva ne cójjivaiye javrō pueðavū aru codobobobevūa**

<sup>26</sup>Muja, jívu, que baru yópe ðaiye javvu mujare. Muje cójjivaiyede ðajarā caiyede, parure nūrajivu caivu muja muje ūmei. Apevu mujacavu Salmos āmicue yurīayede yurīayurājarama. Aru apevu mujacavu buei yurājarama. Apevu mujacavu coyuiyurājarama ape coyuiyede, Jūmenijicui jáðovaiye báquede, náre coapa. Apevu mujacavu yávaiyurājarama apecamua yávaicamua ne majibecamuaque. Aru apevu mujacavu coyuiyurājarama aipe aiyuede iye ne yávaiyede apecamua yávaicamua ne majibecamuaque. <sup>27</sup>Mujacavu yávaiyurivu baru apecamua yávaicamua ne majibecamua, yávajarāri pucarā o yóbecurā quévura, cūinācu cūinācu, ūbenita cūināturu āmevu. Aru coyuiye javvu apecu aipe aiyuede ne yávaiyede. <sup>28</sup>Ûbenita pōecu ūi cubedu coyuiye majicu aipe aiyuede pōeva ne yávaiyede apecamua

yávaicamua ne majibecamuaque, ñame nópe yávabejarári. Quénora ina nópe yávajurorivü bi ajarári nore muje cójijiñami jívui. Quédara arí dápijarári na coapa ne yávajuroede ne baju aru Jūmenijicuque.

<sup>29</sup>Nopedeca mujacavü coyucaiyurivü baru pōevare Jūmenijicui yávaiyede paruéque, coyujarári pucarā o yóbecurā quévura. Aru coyuiye javvu apecu náre coapa ina yávaivü bācavure yópe Espíritu Santo ũi yávaicōjeiyepe náre. <sup>30</sup>Jūmenijicu ape coyuiyede ũi majide daru apecu mujacacu nore dobacure, ñai coyupōecu coyurí dajocajacurí, apecu ũi buojaquiyeye ayu coyuyü ũi máre. <sup>31</sup>Nópe darí, caivü mujacavü coyucaiyurivü pōevare Jūmenijicui yávaiyede paruéque buojarājarama coyüivü, cūinācu cūinācu, ũbenita cūināturu āmevü, caivü muje bueni majinaiyepe aivü aru parure darājiyepe aivü muje ũmei muje baju. <sup>32</sup>Jūmenijicui yávaiyede coyucaipōevarecabu coyurí majidivü yópe iye Jūmenijicui daicōjeiyepe ji majicaiyede mujare caride. <sup>33</sup>Jūmenijicu ye ũbebi pōeva ne cārijovaiyede ne baju. Ũbebi ne codoboboiyede. Ũbebi ne yávaiyede caivü cūināturu.

Que baru ñajarā muja yópe apenoa ĩmaroacavü Jūmenijicui pōeva ne darí cōmajiyeye ne cójijivaiyede. <sup>34</sup>Muje cójijivaiyede mearore jínajivü Jūmenijicure, nomiva yávaicōjememaratumu. Que baru bi ajarári ina nomiva. Yópe Jūmenijicui daicōjeiyepe ũi coyuiye báquepe Moisés bācure, ju aye javvu nomivare aru jipocatebejarári na. <sup>35</sup>Nomió ũi yávaru Jesúre ju aipōeva ne cójijivaiyede, cūyojarōtamu. Que baru ina nomiva majiyurivü baru apede ne jápiarí eabede, jēniari jájarari némarepacure ne cūrami.

<sup>36</sup>Coreóvajarā muja iyede. Pōeva coyurí búbedejaquemavü Jūmenijicui yávaiyede mujare. Muja mamarumucavurecabu āmevü jápiaivü bācavü Jūmenijicui yávaiyede coyuiyede. Aru muja quévurecabu āmevü jápiaivü bācavü diede. Que baru, “Maje cójijivaiyede mearore jínajivü Jūmenijicure, yópe maje ũrōpe ñarājarevü”, ũbenina āri dápiarídubejarā muja. <sup>37</sup>Ácu pōecu “Jūmenijicui yávaiyede coyucaipōecubu yu”, arí dápiayu baru, coreóvacuyume maje jabocu Jūmenijicui daicōjeiye báquede iye ji toivaicōjeiyepe apecure mujare. Aru ácu pōecu “Jūmenijicui Espíritu Santo majide ñaibi yure”, arí dápiayu baru, coreóvacuyume maje jabocu Jūmenijicui daicōjeiye báquede iye ji toivaicōjeiyepe apecure mujare. <sup>38</sup>Ácu pōecu ũi jápiarí adabedu iye daicōjeiyepe, apecu máre ũi coyuiyede jápiarí adabejarári.

<sup>39</sup>Muja, jívü, que baru yópe ñaiye javvu mujare. Pare ũjarā Jūmenijicui Espíritu Santo ũi coyucare ñauiyepe aivü mujare ũi yávaiyede paruéque pōevare. Aru, “Yávabejarā”, abejarā ina yávaiyurivure apecamua yávaicamua ne majibecamuaque. <sup>40</sup>Ũbenita caiye muje ñaiyede muje cójijivaiyede, mearore jínajivü Jūmenijicure, ñajarā muja yópe pueðaiyure aru codobobobevü máre.

**Pablo ũi coyuiño Cristoi nacajaino mácarōra yainore jaruvári**

(Mt 12.40; 28.16-17; Mr 16.14; Lc 24.34, 36; Jn 20.19; Hch 2.24-32; 8.3; 9.3-6)

**15** <sup>1</sup>Muja, jívü, caride mujare ārure ñaiyuvü yu iye Jesús ũi yávaiye méne ũi meaðaiyena pōevare, ji coyuiye báquede mujare. Iye coyuiyede ju ávü muja. Aru caride máre ju are nuñavu muja. <sup>2</sup>Muja jáve ju are nuivü baru Jesús ũi yávaiye méne, meaðaimara marajáramu muja. Ũbenita muja jáve ju abevü baru, meaðaimara āmenajaramu muja.

<sup>3</sup> Mamarumure Jesucristovacari coreóvare ðarejame yure iye yávaeiye paruéde caiye ape yávaeiye pueno. Aru quédeca nópe ùi coreóvare ðaiye báquepedeca, yúcapūravu coreóvare ðacacu mujare. Iyebu ùi yávaeiye me. Cristo yaicárejameða maje ámeina teiye boje, yópe Jūmenijicui toivaicōjeiye báquepedeca ùi yávaeiye de. <sup>4</sup> Apevu jaruvarejaimaða ùi baju bácarōre pōe jaruvaino cūracobe jīvui. Aru yóbecurijāravua yóboi Jūmenijicu nacovarejaquemavu ūre yainore jaruvārī, apucuyure bediōva, yópe ùi toivaicōjeiye báquepedeca ùi yávaeiye de máre. <sup>5</sup> Jūmenijicu ūre nacovariburu yóboi, majecu Pedro járrejameða Jesúre. Aru no yóboi, ina caipūcapūruape paivu apevu ùi yávaeiye méne beorī coyucōjeimara máre járrejaimaða ūre. <sup>6</sup> No yóboi, apevu quinientos paivu baju majacavu ūre ju aipōeva járrejaimaða ūre cūináturu. Apevu nácavu jave yaivu bácvureca, ūbenita obedivu nácavu apurivubu caride. <sup>7</sup> No yóboi, Santiago aru ùi yóboi caivu Jesús ùi yávaeiye méne beorī coyucōjeimara máre járrejaimaða ūre.

<sup>8</sup> Aru buojainumure caivu apevu ne yóboi, ūre jámejurocu, ūre járrejacacu yu. Que baru majivu ñuja Cristore Jūmenijicui nacovaimu mácvure yainore jaruvārī. Ūre jámejurocubu yu ùi oatuvaiye boje yure. Ūre ju aipōevare boarī jaruvaiyucu bácu caivu pueno oatuvarejame, pu ùi yávaeiye méne beorī coyucōjeimava corebecava, yópe juedocu ùi pōeteiyepe pōeva ne corenajiye jipocamia. <sup>9</sup> Yurecabu caivu Jesús ùi yávaeiye méne beorī coyucōjeimara ne cāchinocacupe páyu baju. Ji cujurī, boarī, ñājine ðaiye báque boje Jesúre ju aipōevare, Jesús beobejebu yure, ji coyūquiyepe ayu ùi yávaeiye méne. <sup>10</sup> Ūbenita Jūmenijicui mearo ðacaiye boje yure, caride apecupe páyubu yu. Ñai pōevare boarī jaruvaiyucu bácupe páyu ámevu yu caride. Jūmenijicui me boje, epedejaquemavu yure, ji memecaquiyepe ayu ūre. Aru ùi nópe epeiye báque ámpeda ámevu. Quénora memevu yu pueno urarō baju caivu apevu ùi yávaeiye méne beorī coyucōjeimara pueno. Ūbenita yúvacari ji baju paruéque mememevu. Quénora Jūmenijicuvacari cadateni, parure ðaibi yure, ùi me boje bojecubeda, ji memecaquiyepe ayu ūre. <sup>11</sup> Caivu ñuja Jesús ùi yávaeiye méne beorī coyucōjeimara cūináturura ñuje yávaeiye de coyucarā ñuja. Que baru ye baju ámevu yu coyuyu bácu baru o apevu coyūvu bácvu baru Jesús ùi yávaeiye méne mujare. Cūináturu coyūvaivubu Jesúi nacajaiye báquede ne boarī jaruvārīburu yóboi ūre. Aru mujavacari ju aðavū diede.

**Jesúre ju aipōeva ne nacajarajiye yainore jaruvārī**

*(Mt 22.44; Ro 5.12-18)*

<sup>12</sup> Caivu maja Jesúre ju aipōeva coyūvaivubu Jūmenijicui nacovaiye báquede Jesucristore yainore jaruvārī, apucuyure cojedeca. Que baru apevu mujacavu yópe arī, “Yaivu bácvure ye nacovamecuyume Jūmenijicu yainore jaruvārī, ne apurājiyepe ayu bediōva cojedeca”, ūbenina arīduyama na. Nópe ne arīduiye jáve ámevu. Árumevupe coyuyama ina, nópe aivu. <sup>13</sup> Jūmenijicui nacovamenu yaivu bácvure yainore jaruvārī, ne apurājiyepe ayu cojedeca, Cristo yaiyú bácu ùi nacovaimu mácu ámejebu yainore jaruvārī. <sup>14</sup> Aru Jūmenijicui nacovamenu Cristo yaiyú bácvure yainore jaruvārī, ùi apūquiyepe ayu cojedeca, iye ñuje coyūiye ūra bojecubejebu. Aru muje ju aie máre ūre bojecubejebu. <sup>15</sup> Pueno ámeno baju bájebu ñuje coyūiye yópe arī: “Nacovarejaquemavu Cristore yainore jaruvārī, ùi apūquiyepe ayu cojedeca”,

ñuĵa borocuĵebu Jūmenijicurā. Jāve maru yaivū bācavū nacajamevure yainore jaruvārī, Cristo máre, yaiyú bācu, nacajari buojabedeĵayume. Que baru, “Cristore nacovareĵaquemavū Jūmenijicu”, ñuĵe arī coyuiyede, borocuĵebu ñuĵa.

<sup>16</sup> Jūmenijicui nacovamenu yaivū bācavure yainore jaruvārī, ne apurāĵiyepe ayu cojedeca, Cristo yaiyú bācu máre ūi nacovaimu mācu āmeĵebu yainore jaruvārī. <sup>17</sup> Aru Jūmenijicui nacovamenu Cristo yaiyú bācure yainore jaruvārī, ūi apuquiyepa ayu cojedeca, muĵe ĵu aye bāĵebu āmepeda. Aru boĵecubeĵebu muĵare. Que baru Jūmenijicu ārumetebeĵebu cāreja muĵe āmeina teiyede. Que baru bĵare nuĵebu muĵa coateĵurorivū Jūmenijicure jaruvārī. <sup>18</sup> Aru ina Jesúre ĵu aipōeva yaivū bācavū máre, coateĵurorivū bācavū Jūmenijicure jaruvārī bĵajebu javede. <sup>19</sup> Maja “Yaivū bācavure ye nacovamecūbe Jūmenijicu yainore jaruvārī Cristoi yaicāye boĵe majare boĵe” āri dāpiaivū baru, aru maja coreivū baru Jūmenijicu jāve mearo đacacuyure majare, maje cue boĵe Jesucristoque cūinávure, maje cuede ijāravui quédaca, cōmaje ārojajebu maja caivū apevu pōeva pueno.

<sup>20</sup> Ūbenita jāve baju Jūmenijicu nacovareĵaquemavū Cristore yainore jaruvārī, ūi apuquiyepa ayu cojedeca. Ūrecabe mamarumucacu caivū apevu yaivū bācavū ĵipocai apucuyū cojedeca, yaibécuyū bediōva cojedeca. Aru ūi nacajaiye báque boĵe, jāve majidivubu maja ūre ĵu aipōevare máre Jūmenijicui nacovaimara mārājivure yainore jaruvārī ūi yóboi. <sup>21</sup> Cūinācu ūmu ūi đaiye báque boĵe, caivū pōeva yaivāivubu. Quédaca apesu ūmu cūinācu ūi đaiye báque boĵe, pōeva majidivubu nacajarajivū yainore jaruvārī, apurāĵivu cojedeca.

<sup>22</sup> Javede cūinācu ūmu mācu, ñai mamarumucacu bācu, ūi āmiá Adán, coateyū bācu ūi baju Jūmenijicure jaruvārī yaidéĵaquemavū, ūi āmeina teiye boĵe. Que baru caivū pōeva máre, ū mācuī pāramena, ū mācupedeca yaivāivubu maje āmeina teiye boĵe. Quédaca, cūinācu ūmu, ñai Jesucristo, yaiyú bācu, Jūmenijicui nacovaimu mācu bareĵaquémavū yainore jaruvārī, apucuyū cojedeca. Que baru caivū ūre ĵu aipōeva máre, ūque curivū cūinávure, ūpedeca Jūmenijicui nacovaimara marājāramu maja yainore jaruvārī, apurāĵivu cojedeca. <sup>23</sup> Majare nacovaijāravua cuvū yópe Jūmenijicui cōĵiyepe. Mamarumu cūinājāravure, Cristore nacovareĵaquemavū Jūmenijicu yainore jaruvārī, ūi apuquiyepa ayu cojedeca. Aru apejāravure, Cristo ūi copaidaquijāravu baquinóre, caivū maja Cristo ĵinare nacovacuyume Jūmenijicu yainore jaruvārī, maje apurāĵiyepe ayu cojedeca.

<sup>24</sup> Dinumu maquinóre ijāravū cūiquíyebu. Caivū ina cōĵeivure, caivū ina parurivure, aru caivū ina purucuvurivure máre, ūi mavure, vainí tucuyume Cristo, náre jaruvārī. Aru ĵipacu Jūmenijicure, ūi mearore ĵímure, jaboteicōĵecuyume caivū ūi jaboteimarare. <sup>25</sup> Jaboteiye ĵauvū Cristore pu Jūmenijicui epeiyea caivū ūi mavure ūi cuboba cāchinoi. Que teni Jūmenijicu jádovacuyume ūi vainí ture đaiyede Cristore náre jaruvārī. <sup>26</sup> Caivū pōevare yaiye ĵauvū. Yópe pōecu ūi maucu ūi vainí tuiyepe ūre jaruvārī, nopedeca yaiyebu pōeva ne maucupe paiye, náre vainí turī. Ūbenita buojainumure, Jūmenijicui nacovaiye báque boĵe Cristore, yaiyú bācure, aru ūi nacovaquiyepa boĵe maja ūi pōevare máre, ye yaibénamu maja bediōva cojedeca.

<sup>27</sup> Jūmenijicu toivaicōjenejaquemavu ũi yávaiyede Cristore vainí turí jaboteicōjecuyure caivure, caiyede máre. Ŭbenita majidivubu maja ũi nópe cōjeiyede Cristore, ye jaboteicōjemecuyure jípacure. Que baru Jūmenijicure jaboteicōjeipōecu cubebi. <sup>28</sup> Cristo caivure, caiyede máre ũi vainí turí jabotequiyede, ũvacari, Jūmenijicui mácu “Mu, ji ju aimu, jabotejacu yure aru ji jaboteimarare máre”, acuyume Jūmenijicure. Que teni Jūmenijicu, ñai Cristore vainí turí jaboteicōjeñu macuyá caivure, jabotecuyume caivure, caiyede máre.

<sup>29</sup> Apevu pōeva Jūmenijicuque jádovaicōjedama ne baju ocoque yaivu bācavure boje. Ŭbenita Jūmenijicui nacovamenu yaivu bācavure yainore jaruvarí, bojecubejebu apevu ne jádovaiye Jūmenijicuque na māvure boje ocoque.

<sup>30</sup> Aru ñuja máre yaijurorivubu jāravua coapa, ñuje ñájiye boje ñuje coyurānuiyede Jesús ũi yávaiye méne. Ñuje ñájiye máre bojecubejebu. <sup>31</sup> Muja, jívū, iyede coyūquijivū yu mujare, ji torojue boje maje cuede maje jabocu Jesucristoque cūinávure. Pōeva boarí jaruvaiyuma yure jāravua coapa, ji coyuiye boje Jesús ũi yávaiye méne. <sup>32</sup> Ji cuede Éfeso āmicurīmaroi, pare ñájacacu yu, nócavu ne maucuvae boje yure yópe āimara jiejecurivū ne maucuvaepe. Die ye bojecubejebu yure, jāve maru yaivu bācavu nacajamevure yainore jaruvarí. Majare ñaiye jaujebu yópe ne aiyepē, “Javena yainájichavu maja. Que baru āri ũcuri torojurājarevu”, adama.

<sup>33</sup> Que baru muje bajumia apēcure jujovaiicōjemejara. Ārujara apēcū ũi yópe arí coyuiyede: “Āmena pōevaque yóvayū baru, mearo ñarí cōmajiyede ārumetecuyume”, aquemavu. <sup>34</sup> Ārumevupe tebejarā muja. Dajocajarā muje āmeina teiyede. Apevu mujacavu coreóvabevu cāreja aipe ārojacure Jūmenijicure. Coyuyubu diede, muje cuyoje tenajiyepē ayu muje ñaiyede.

**Pablo ũi coyūino nacovarajimara ne baju mamabaju baquinóra**

(1 Ts 4.15-17)

<sup>35</sup> Apēcū, yópe arí, jēniari jáquijichubi yure: “¿Aipe ñarí nacajarajidi maja, yainájivū bācavu?” Aru, “¿Aipe ārojaquidi maje baju baquinó?” arí jēniari jáquijichubi. <sup>36</sup> Pōecu nópe jēniari jāñu maru, ye majibecutame. Jēvari coyuiyeque buequijivū mujare. Maje oteiyede jioi, pīaquíye jipocamia, oteiyabede pojeiye jauvu. Oteiyabe pojeniburu yóboi, pīaquíyebu. <sup>37</sup> Trigo āmicue oteiyabede o apēyabe oteiyabede máre maje oteiyede, iye pīaquíye oteiyabepe paiye āmevu. <sup>38</sup> Maje oteniburu yóboi, Jūmenijicu pīaré ñaibi caiye oteiyede coapa yópe “Que baquiyébu” ũi arí dāpaiye báquepedeca, ũi cuedaiye báquede caiyede.

<sup>39</sup> Cūináturu āmevu caivu ne bajuá. Pōeva ne jiarua baju, aru āimara ne jiarua baju, mǐjina ne jiarua baju, aru moa máre ne jiarua baju, caivu coapa ne jiarua apebajure cuvama na. <sup>40</sup> Nopedeca cavarōcavu aru joborōcavu máre ne bajuá cūináturu āmevu. Cavarōcavu ne baju métamu, ne cuede cavarōi. Aru joborōcavu ne baju métamu, ne cuede joborōi. <sup>41</sup> Ñai avía jāravucacu meacu bajube. Aru ñai avía ñamicacu máre meacu bajube. Ŭbenita ñai ñamicacu jāravucacupe pēomemi. Aru ina abiácova máre meara bajuvacari, ũbenita aviávape paivu pēomema. Aru ina abiácova coapa apede pēodama na. Cūináturu āmevu cavarōcavu ne pēoiyeque.

<sup>42</sup> Yópe vaiyepe oteiyabede, nopedeca vaiquíyebu Jūmenijicui nacovaquiyede yaivu bácvure yainore jaruvari. Maja yaináživu bácvu maje baju bácarō, ne yuarī jaruvaibaju bácarō, pojequiyebu. Ūbenita maje baju mamabaju baquinó, maje nacajariburu yóboi yainore jaruvari, ye pojebequiyebu. <sup>43</sup> Maja yaináživu bácvu maje baju bácarō, ne yuarī jaruvaibaju bácarō, bojecubenotamu. Ūbenita maje baju mamabaju baquinó, maje nacajariburu yóboi yainore jaruvari, bojecurō maquiyébu. Maja yaináživu bácvu maje baju bácarō, ne yuarī jaruvaibaju bácarō, parubenotamu. Ūbenita maje mamabaju baquinó, maje nacajariburu yóboi yainore jaruvari, parurō maquiyébu. <sup>44</sup> Maja yaináživu bácvu maje baju bácarō, ne yuarī jaruvaibaju bácarō, mearo mateávū, maje cuede ijāravui. Ūbenita maje baju mamabaju baquinó mearo maquiyébu, maje curājiyede mamajāravu cūimējāravui, maje nacajariburu yóboi yainore jaruvari. Maje ijāravuquebaju cue boje, majidivubu maja mamajāravu cūimējāravuquebaju máre cuquiyebu. Baju cubedu, apué máre cubevu.

<sup>45</sup> Caride maja cvarivubu maje baju yópe Adán mácu baju bácarōpe, Jūmenijicui jíye báquede ū mácvre. Yópe arī, toivaicōjenejaquemavu Jūmenijicu ūi yáviyede: “Mamarumcacu, ūi āmiá Adán, Jūmenijicui cuedaimu marejaquémavu, apucyu ūi bajuque”, arī toivaicōjenejaquemavu. Ūbenita Adán mácu yóbocacu, Cristo, maja mamajāravu cūimējāravucavu maje mamarumcacu, apure dayube majare maje ūmei. Que baru jícuyume majare mamabaju, maje curājiyepe ayu jāravu cūimējāravu baquinóre. <sup>46</sup> Aru maje apué máre quēdecabu. Mamarumure mamajāravu cūimējāravuquebaju cūvabevu. Quénora mamarumure ijāravuquebaju cvarivubu. Aru no yóboi, maje nacajariburu yóboi yainore jaruvari, mamajāravu cūimējāravuquebaju cvarājaramu.

<sup>47</sup> Nai Adán mácu, maje mamarumcacu bácu, Jūmenijicui cuedaimu mácu barejaquémavu joboque. Que baru joborōcacu barejaquémavu ū mácu. Ūbenita ū mácu yóbocacu, Cristobe cavarō mearo Jūmenijicui curōcacu. <sup>48</sup> Caivu joborōcavu cvarivubu maje bajure yópe nai jobore jocarī dayu bácu ūi baju bácarōpe painore. Aru caivu cavarō mearocavu bárāživu cvarājaramu maje bajure yópe nai cavarō mearore jocarī dayu bácu ūi bajupe painore. <sup>49</sup> Yópe caride maje cūvaepe maje bajure nai jobore jocarī dayu bácu, Adán mácu, ūi baju bácarōpe painore, nopedeca cvarājaramu maja maje bajure nai cavarō mearore jocarī dayu bácu, Cristo, ūi bajupe painore.

<sup>50</sup> Mūja, jivu, jāve coyuyubu mujare iyede. Maja curivu buojabenajaramu no Jūmenijicui jaboteinoi ijāravuquebajuque, maje cūvaepe caride. Maje ijāravuquebaju cūimébaju āmevu. Quénora pojequiyebu. Que baru maja curivu buojabenajaramu no Jūmenijicui jaboteinoi ijāravuquebajuque.

<sup>51</sup> Caride mujare coyuyubu yu Jūmenijicui yáviyede jāvene, ūi jáđovameno mácarōre jipocamia ūbenita jáđovainore caride. Caivu maja, Jesúre ju aipōeva, yaibénajaramu. Ūbenita Jūmenijicu oatvacuyume caiye maje bajuáre. <sup>52</sup> Maumejiena, yópe pōecu ūi mimiyepe, iye Jūmenijicui japuicōjequiye japuino bubaino maquinóre jápuraquiyede, Jūmenijicu oatvacuyume maje bajuáre. Aru dinumu maquinómiareca maja Jesúre ju aipōeva yaináživu bácvure nacovacuyume Jūmenijicu yainore jaruvari, maje

yaibénajiyeye ayu cojedeca. <sup>53</sup>Oatuvaiye jauvu maje baju pojejuroribajure, maje cavarājīyeye aivu azebaju cūimébajure. Oatuvaiye jauvu maja yaijurorivure, maje yaibénajiyeye aivu.

<sup>54</sup>Maja yaibénajivure, maje curājīyede maje cūimébajuque, vaiquíyebu yópe Jūmenijicui arī toivaicōjeiye báquepedeca ūi yávaiyede: “Caride pōeva yaibénajarama bediōva cojedeca. Jūmenijicu buojaibi vainí tuyu caivure, caiyede máre, ūre maucavarīduivure jaruvārī. <sup>55</sup>Pōeva vainí tuimara mácavupe paivu ne yaijuroe boje, vainí tuimarape paivu āmevu caride. Pōeva űājine đaimara mácavupe paivu ne yaijuroe boje, űājine đaimarape paivu āmevu caride”, arī toivaicōjenejaquemavu. <sup>56</sup>Ūbenita pōeva āmeina teivu űājinajarama ne yainājīyede, ne āmeina teiye boje. Aru Jūmenijicui đaicōjeiyede ūi coyuiye báqueque Moisés bācure coreōvaivubu maja ina pōeva āmeina teivure űājine đarājīmarape, ne āmeina teiye boje. <sup>57</sup>Ūbenita torojuede jīnajarevu Jūmenijicure. Ūrecabe maje jabocu Jesucristore vainí ture đare đayū majare āmeina teiyede jaruvārī, maje cue boje maje jabocu Jesucristoque cūinávupe.

<sup>58</sup>Que baru mūja, jīvu, ji űmara, parure nūjara mūja mūje űmei, đajocabevuva mūje ju aiyede maje jabocu Jesucristore. Me majīdivubu mūja caiye mūje memecaiyede ūre bojecuede, mūje cue boje űque cūinávupe. Que baru cainumua pūeno űrarō baju ūre memecajarā.

**Pablo ūi jícōjeino Jesúre ju aipōevare, ne cađatenajiyeye ayu névu cuve**

**cuvabevure**

(Ro 15.25-26)

**16** <sup>1</sup>Caride coyūquijīvu iye jēniari jāīyede mūje jīnajiyeina ina Jesúre ju aipōeva, cuve cuvabevure, mūje toivaiye báquede yure paperayocaque. Đajarā mūja yópe ji đaicōjeiye báquepe ina Jesúre ju aipōevare, cójijivaivure Galacia āmicurijoborōi. <sup>2</sup>Sumana coapa domingo jāravui, caivu mūja coapa ĩni epejarā tātuturare, cađatenajīvu cuve cuvabevure. Mūje ĩye báquede no sumana baji ĩni epejarā mūja yópe mūje ĩye báquepe. Que teni ji eaquiyede mūje yebai, tātuturare vorīdurī, ĩni, jícōjeiye jaubequiyebu mūjare. <sup>3</sup>Ji eaquiyē jipocamia, bejarā mūjacavure, ina nūvarajivure iye tātuturare, mūje jīcarājīyede, Jerusalēn āmicurīmaroita. Aru ji eaquiyede mūje yebai paperayocare jīcuyūmu náre, ne nūvari jādovarajiyeye acuyū Jerusalécavu Jesúre ju aivure coreipōevare, ne majīnajiyepe ayu űamejare na aru yéde ne nūvaiyede. <sup>4</sup>Dinumu maquinóre mearu ji dāpiainoi, yu máre náque nūri, yure yóvarājarama.

**Pablo ūi coyūino ūi đájuroede**

(Hch 19.8-10, 21; 1 Co 4.17)

<sup>5</sup>Ji etaquiyede yore jocarī, vaicūyūmu Macedonia āmicurijoborōi. No yóboi, eacuyūmu mūje ĩmaro Corinto. <sup>6</sup>Mautequijichūvu mūje yebai obediaviava baju. Yū eayū baru, mautecuyūmu mūjaque űracoro baede. Dinumu maquinóre que tedu, mūjacapūravu yure cađateivu buojarājaramu, ji nure nūquiyeye aivu áro ji nūquino apenoita. <sup>7</sup>Obebejāravua baju jácunuiyubevu yu mūjare. Maumena vaiyubevu yu mūje ĩmarore jocarī. Quénora mauteiyūvu yu mūjaque obediaviava baju, maje jabocui yure

mauteicōjenu. <sup>8-9</sup> Ëbenita obedivü yócvü jápaiyurivübu Jesús üi yávaei méne. Náre bueiye javvü yure. Aru apevü obedivü máre maucvaridivübu maje jabocü Jesucristore. Náre cãrijoaicōjeiyübevu ina Jesúre ju ájurorivure. Que baru mauteçyumu yore Éfeso ámicurímaroi, pu Pentecostés járavu, judíova ñuje torojüve teijárvuuta.

<sup>10</sup> Timoteo máre, yúpe páyu, maje jabocü Jesucristore memecayube. Que baru üi earu müje yebai, me torojucu cure ðajarä úre. <sup>11</sup> Úre ámeina jámejara müja. Quénora pueðajarä úre. Aru cadatejarä úre, üi nure nuquiepe aivü cãrijimenoque. Yu coreyübu ü copaidacuyure ji yebai apevü majevüque.

<sup>12</sup> Caride coyquijivü iye jëniari jáiyede majecu Apolorä müje toivaiye báquede paperayocaque. Paredeca jëniariducacu úre, üi yóvaquiepe ayü majevure ne járanüye báquede mujare. Ëbenita dinumu mácaröre úcapūravu nüyubeteame. Apenumu üi buojaquinumu jácunucuyume mujare.

### **Pablo üi meaicōjeino Corintocavure**

*(Hch 18.2; 1 Co 1.16)*

<sup>13</sup> Me jájara müja. Ju are nujara müja maje jabocü Jesucristore. Jidubejarä apevü ne ámedajuroede mujare, müje Jesúre ju aye boje. Aru parure nujara müja müje ümei, müje ju aiyede Jesúre ðajocabevüva. <sup>14</sup> Caiye müje ðaiyeque ujarä apevure.

<sup>15</sup> Müja, jívü, me majidivübu Estéfanás ü jinaque ne borore. Nácapūravu ju aima Jesucristore mamarumure, caivü apevü Acaya ámicurijoborōcavü jipocai. Aru memecavaivübu Jümenijicüi pōevare, cadatenajivü náre ðajocabevüva. <sup>16</sup> Ëvu yu müje ju aiyede náre. Náre aru apevü majevü nápe paivure, apevure cadateipōevare aru memecaipōevare máre, ju arí jaboteicōjejara mujare. <sup>17</sup> Torojüvu yu ina Estéfanás, Fortunato, aru Acaico máre ne edaiye báquede yore. Nácapūravu cadateivübu yure yópe müje cadatejuroepe yure, curivü buojaru yúque. <sup>18</sup> Parure nure ðaivübu yure ji ümei, yópe ne parure nure ðaiyepe mujare máre müje ümei. Náre aru apevü nápe paivure máre “Meavu”, arí pueðajarä müja.

<sup>19</sup> Caivü ina Jesúre ju aipōeva cójjivaivü Asia ámicurijoborōi meaicōjedama mujare. Aquila aru Priscamaque aru ina Jesúre ju aipōeva cójjivaivü ne cūrami jívüi urarō meaicōjedama mujare, ne cue boje Jesucristoque cūinávpe mujaque. <sup>20</sup> Caivü Jesúre ju aipōeva yore curivü meaicōjedama mujare. Me jacoyujarä müja müjevure müje jivare nuri, müje Jümenijicu jina mae boje. <sup>21</sup> Caride yúvacari, Pablo, toivaivü, meaicōjeñu caivü mujare.

<sup>22</sup> Ácu pōecu üi ubedu maje jabocü Jesucristore, Jümenijicu ñájine ðajacurí úre toabo cūiméboi cainumua. ¡Mü, maje jabocü Jesús, ðajacu! <sup>23</sup> Maje jabocü Jesucristo mearo ðacajacurí mujare bojecubeda üi me boje. <sup>24</sup> Yu uvü caivü mujare curivure Jesucristoque cūinávpe. Quénoramü.

## 2 Corintios

Mamabuinore coyuiyebu Pablo bácu ũi toivaicõjeiye báquede yóbocayoca paperayocare Corinto āmicurĩĩmarocavũ Jesũre ju aipõevare. Pablo bácu judíovacacu bácuvacari, Jesũs ũi yávaiye méne beorĩ coyucõjeimũ marejaquémavũ, coyucũyũ ũi yávaiye méne judíova āmevũre, judíova ne ju abe boje ũi coyuiyede. Lucas bácu coyurejaquemavũ Pablo bácuĩ borore Hch 7:57-8:1, 9:1-31, 13:1-28:31, aru ũi cuede Corinto āmicurĩĩmaroi 18:1-18. Javede Pablo bácuire toivacaipõecu bácuire toivaicõjenejaquemavũ pucayoca ũi paperayocare Tesalónica āmicurĩĩmarocavũre aru ũi mamayoca paperayocare Corinto āmicurĩĩmarocavũre. Pablo bácu coyurejaquemavũ ũre toivacaipõecu bácuire aipe ũi toivacaquiye báquede diyocare. Toivaicõjenejaquemavũ diyocare āniũju bácarõre 55 d.C., yóbecue ũi cucũniyede, coyucũyũ Jesũs ũi yávaiye méne. Majidivũ ne dāpiayipe, curejaquemavũ Filipos āmicurĩĩmaroi ũi toivaicõjeiye diyocare (Hch 20:1-2).

Diyocaque Pablo bácu coyurejaquemavũ aipe Jũmenijicu “Yópe đajarā mũa boropatenbenajivũ ji jáinore”, ũi yóboque coyuiye báquede põevare. Aru coyurejaquemavũ aipe ũvacari Jesũs ũi yávaiye méne beorĩ coyucõjeimũre, buiepõeva borocũrivũ ne cue báque boje Corinto āmicurĩĩmaroi Jesũre ju aipõeva jẽneboĩ. Ina buiepõeva borocũrivũ ũbenina coyurejaquemavũ ape yáviyede, Jũmenijicu “Yópe đajarā” ũi yávaiye jāve āmene. Aru “Pablo āmemi Jesũs ũi yávaiye méne beorĩ coyucõjeimũ” ũbenina arĩ coyurejaquemavũ. Diyoca coricai Pablo bácu Jesũre ju aipõevare jícõjenejaquemavũ jecũbevũva ne cũvaequede cũve cũvabevũre, ne cadatenajiyepẽ ayũ náre (caps. 8-9).

### Pablo ũi meaicõjeino Corintocavũre

(Hch 18.1)

**1** <sup>1</sup>Yũ, Pablo, toivaicõjeivũ apẽcũre iyoca paperayocare. Meaicõjeivũ mũa cõjijivaivũ Corinto āmicurĩĩmarocavũ Jũmenijicui põevare aru caivũ apẽvũ Acaya āmicurĩjiborõcavũ Jũmenijicui põevare máre. Jũmenijicu beorĩ epeibi yũre Jesucristoi yávaiye méne beorĩ coyucõjeimaracacũre. Timoteo máre, majecu ũi ju aipe boje Jesũre majapedeca, meaicõjeimi mũjare. <sup>2</sup>Majepacu Jũmenijicu, maje jabocu Jesucristomaque, mearo đacajacurĩ mũjare bojecũbeda ũi me boje. Aru torojurĩ cure đajacurĩ mũjare máre cārijimevũva.

### Maja cadateimara maje nājiyede

(1 Co 15.32)

<sup>3</sup>Jĩnajarevũ mearore Jũmenijicure, maje jabocu Jesucristoi mearore jĩmũre, jĩpacũre máre. Majepacu Jũmenijicu cõmaje āroje jáimi majare cainũmũa. Aru cadateibi majare cainũmũa, ũi parũre đaiye boje majare maje ũmei. <sup>4</sup>Cainũmũa maje nājiyede, majepacu Jũmenijicu parũre đarĩ maje ũmei,

cadateyube majare, majacapūravu maje cadatenajiyepe ayu apevu ñáživure. Yópe ñi parure ðaiyepe majare, nopedeca maja parure ðaivubu apevure máre. <sup>5</sup>Yópe Cristoi urarō ñájiye báquepe, nopedeca maja máre urarō ñáživubu. Aru yópe Jūmenijicui urarō cadateiye báquepe ére, nopedeca urarō cadateyube majare, maje cue boje Jesucristoque cūinávure. <sup>6</sup>Ñuja ñáživubu, buojarājivu cadateivu mujare, muje parurājiyepe aivu muje ūmei aru muje meadaimara marajiyepe aivu máre. Jūmenijicui cadateiyede ñujare ñi parure ðaiyede ñuje ūmei, coreóvare ðaibi ñujare aipe ðaiye jaurōre ñujare, ñuje cadatenajiyepe ayu mujare, parure ðarī mujare muje ūmei. Que baru muja máre muje ñájiyede napini buojarājivubu muje ñájinajijāravu baquinói yópe ñuje napiyepedeca ñuje ñájiyede. <sup>7</sup>Majivu ñuja muje ñájiyede yópe ñuje ñájiyepedeca, Jūmenijicu cadateni parure ðacuyure mujare máre muje ūmei, yópe ñi cadateni parure ðaiyepedeca ñujare ñuje ūmei. Que baru jāve napini coreivubu ñuja me baju vaiquiyepa aivu mujare.

<sup>8</sup>Muja, ñujevu, uvu ñuja muje majinajiyede ñuje napiye báquede ñájiño urarō bajure no Asia āmicurijoborōi. Pare āmeno ñuje ñájiye boje, ye napini majibetecarā ñuja. “¿Jāve yainājivu bárica?” arī dāpiarīducarā ñuja. <sup>9</sup>Jūmenijicu nópe arī dāpiaicōjeñume, ñuje napini corebenajiyepe ayu ñuje baju cadatenajiyede. Quénora jāve napini coreiye jauteavū ñujare Jūmenijicare, ñai nacovañu ina yaivu bācavure yainore jaruvārī, ñi cadatequiyepa ayu ñujare, yaijurorivu bācavure. <sup>10</sup>Aru Jūmenijicu jāve meadame ñujare iye ñuje yaijurorō mārōre jocarī. Aru ñujare meadacuyume ñuje ñájiyede jaruvārī. Que baru jāve napini coreivubu ñuja ére. Majivu ñuja jāve meadacuyure ñujare ñuje ñájiyede jaruvārī cainumua. <sup>11</sup>Que baru uvu ñuja muje cadatenajiyepe aivu ñujare muje jēniayede Jūmenijicuque ñujare boje. Obedivu pōeva ne jēniayede Jūmenijicuque ñujare boje, mearo ðacacuyume ñujare. Aru ne jáiyede ñi mearo ðacaiyede ñujare, obedivu pōeva torojuede jínajarama ére.

**Aipe teni Pablo ñi jácunumeno mārō Corintocavure yópe ñi aipe  
báquepedeca**

(Hch 18.5; 19.21; Ef 1.4)

<sup>12</sup>Apevu mujacavu ũbenina arī coyurīduyama ñujare borocurivure. ũbenita ne que aipe jāve āmevu. “Ðaḁavū maja yópe ðaiye jaurōre majare Jūmenijicui jáinore”, ñuje arī dāpiaieque torojurivubu ñuja. Coreóvaivubu ñuja cainumua ðarī cōmajivure jujovabevuva aru āmeno cubevuva máre pōeva Jesúre ju abevuque aru pueno baju muja Jesúre ju aipōevaque. ũbenita nópe ðarī buojabevu ñuja ñuje majiéque. Quénora Jūmenijicu nópe ðarī majide ðaibi ñujare bojecubeda ñi parué majiéque. <sup>13-14</sup>Cainumua ñuje paperayocare, ñuje toivaicōjeiyede apecure mujare, jári boroteni coreóvarī buojajebu muja. ũbenita caride caiye ñuje toivaicōjeiyede apecure coreóvabevureca cāreja, jāve napini coreyubu yu, muje coreóvarājiyepe ayu caiye iye ñuje toivaicōjeiyede apecure mujare. Que baru maje jabocu Jesúi copaidaquiyede caivu maja torojurājaramu. Mujacapūravu torojurājaramu ñuje bueiye báque boje mujare Jesús ñi yávaiye méne. Aru ñujacapūravu torojurājaramu muje ju aipe boje ñi yávaiye méne.

<sup>15-16</sup>Ji coreóvaiye boje diede, arī dāpiarīducacu jácunucuyure muje yebai mamarumū, ji nuiyede Macedonia āmicurijoborōi aru ji copaiyede

nore jocarí máre, muje cadatenajiyeye ayu yure nure nucuyure pu Judea ámicurijoborôita. Puque ji jácunuiyede mujare, puque Jūmenijicu mearo đacajebu mujare. <sup>17</sup>Yu nópe arí dápiarĩduyu bácuvacari, ape borore ji jápiarĩburu yóboi, oatuvacacu ji dápiainore. Que baru numetevu muje yebai cäreja. Ji nūme boje cäreja, apevu mujacavu yópe borocuma yure. “Pablo jujovaibi majare. Ijāravucavu Jesúre ju abevupe, ũbenina coyūibi. Ũi dápiayede ũi đaquiyede ũi baju cadateiyurí, apevure ye cadateiyubebi. Maumena ũi ju aiye báquede oatuvaibi, bi acuyu. Que baru pucaūmea cubi ũ”, ũbenina adama yure. ¿Ju aivurū muja ne nópe arí coyūinore yurā? <sup>18</sup>Ne nópe arí coyūiye yurā jāve āmevu. Jūmenijicu jáinore jāve coyūyubu mujare. Jūmenijicu pucaūmea cubecu, oatuvabecu, ye ũbenina arí coyubebi. Jūmenijicu “Yópe đacuyumu” ayu baru, jāve đayū apa. Aru űuja máre pucaūmea cubevu, oatuvabevu, ye ũbenina arí coyubevu. űuja “Yópe đarājaramu” aivu baru, jāve đavū apa. Que baru yu ju ayu baru apede, ye oatuvabevu. <sup>19</sup>Jāvetamu no, ji đaiye boje yópe Jūmenijicu mácu Jesucristoi đaiyepe. Javede Silvano, Timoteo, aru yu máre coyucarā mujare Jesús ũi yávaiye méne. Jesúrecabe pucaūmea cubecu, oatuvabecu, ye ũbenina arí coyubecu. Cainumua “Yópe đacuyumu” arí coyuyū, jāve đayube yópe ũi aiye báquepedeca. Ju ayu baru, ye oatuvabebi.

<sup>20</sup>Jesucristorecabe ju ayu caiye Jūmenijicu “Yópe đacacuyumu pōevare”, ũi aiye báquede. Ũrecabe đayū caiyede yópe Jūmenijicu aiye báquepedeca, mearo đacacuyū caivu majare ũre ju aipōevare. Que baru cainumua maje mearore jiyede Jūmenijicure, “Cristoi đaiye báque jāvemū. Quédecabu”, arí coyūvaivubu Jesucristoi paruéque. Aru Jūmenijicu torojubi dieque. <sup>21</sup>Jūmenijicurecabe parure đayū űujare aru mujare máre maje ũmei, maje cuede Jesucristoque cūinávupe. Ũrecabe beoyu bācu majare ũ jinava. <sup>22</sup>Ũrecabe daroyu bācu majare ũi Espíritu Santore, ũi cuquiyeye ayu majaque, jáđovacuyū majare Jūmenijicu jinava. Aru ũrecabe majide đayū majare đacacuyure caiye iye méne yópe ũi aiye báquepedeca, ũi daroiye báque boje űai Espíritu Santore.

<sup>23</sup>Caride yu toivaicōjequijivu apecure mujare, coyucuyū aipe teni oatuvayū bācure “Yópe đacuyumu”, ji arí dápiaye báquede. Jūmenijicuvacari majibi jāve ji coyuiyede. Ũrecabe majicu caiye ji dápiayede ji ũmei. Yu numetevu cäreja muje ĩmaro Corintoi, ji jaraiyube boje mujare. <sup>24</sup>űuja jaraivu baru mujare muje đaiye boje, yópe jabova parurivu ne cōjeiyepe, űuja ju aicōjeiyubevu mujare aipe ju aiye jaurōre mujare. Muja me coreóvaivubu aipe muje ju aiye Jesúre đajocabevuva, parurivu muje ũmei. Quénora jaraivu baru mujare, cadateiyurivubu mujare, muje torojurājiyepe aivu muje ũmei.

**2** <sup>1</sup>Yu nuñu maru muje yebai caride, jarajebu mujare. Aru jararu mujare, chīojebu muja. Ũbenita nuiyubevu yu muje yebai, mujare chīore đacuyū bedióva cojedeca. Que baru copainumetevu yu cäreja nore.

<sup>2</sup>Mujarecabu torojure đavū yure. Que baru yu chīore đayū baru mujare, yu máre chīojebu. Caivu maja chīojebu, yu nuñu maru muje yebai caride.

<sup>3</sup>Que baru toivaicōjecacu apecure mujare apecoca paperayoca bácarōre, jaracuyū mujare, muje meadarājiyepe ayu muje đaiyede ji nuquiye jipocamia, ji jaraiyube boje mujare muje jivateinoi. Ji jaraiyede mujare, torojubevu

yü. Ûbenita mujarecabu yure torojure dájurorivü baju. Que baru yure chïore daiye jaubevu mujare. Me coreóvaivü yü iyede. Múje torojubedu, yü máre torojü bevü. <sup>4</sup>Chïoñü baju ji orique toivaicôjecacü apecure no paperayoca bácaröre. Pare ñájjicacü yure jaraiye jaué boje mujare. Ûre toivaicôjemetecacü, chïore dacüyu mujare. Quénora Ûre toivaicôjecacü, múje majinajiyeye ayü pare ji üede mujare.

**Pablo üi árumeteicôjeino Jesúre ju aipôevare  
apecü üi ámecoroino mácaröre Ûre**

<sup>5</sup>Ñai múje yebai cücü ámecoroyü bácu yure chïore dabeteame yure cüinácüva. Qué nor a mujare máre chïore daquemavü ü. O, “Apevu mujacavure chïore daquemavü”, aiye jauvu yure, ji cômaje ároje jáiye boje Ûre. <sup>6</sup>Iye mujacavü obedivü múje ñájine daiye báque Ûre, üi ámeina teiye boje, urarö bajubü. Ape ñájiye jaubevu Ûre. Quénora dajocajará múje ñájine daiyede Ûre. <sup>7</sup>Que baru caride árumetejará üi ámeina teiyede. Ûre cadateni, parure dajará üi ümei. Que daru, ü dajocabecüyüme üi ju aiyede Jesúre, üi pare chïoiye boje múje ñájine daiyede Ûre. <sup>8</sup>Paruröreca jéniaivü mujare múje coyuiyede aru múje jádovaiyede máre bedióva cojedeca Ûre múje umure. <sup>9</sup>Toivaicôjecacü apecure no paperayoca bácaröre, majicacüyu mujare ñájine daiye jauröre ñai umure. Múja cainumua ju aivure yure majiyutecacü yü. Torojuvü yü, majicü múje daiye báquede yópe ji majicaiye báquapedeca. <sup>10</sup>Múje árumetedu üi ámeina teiyede, yü máre árumetecüyümu üi ámeina teiyede. Yure árumeteiye jauéde apecüi ámeina teiyede, árumeteyübu diede mujare boje, caivü múja múje curájiyepe ayü me múje baju, aru Cristore boje, üi jáiye boje caiye ji daiyede, aru ji dápiaiye de máre. <sup>11</sup>Maje árumetedu apecüi ámeina teiyede aru cadatedu Ûre, ñai abujuvai jabocü, Satanás, majare ye buojabebi dápiaicôjeñü aru daicôjeñü máre, yópe üi dájuroepe maje árumetebedu apecüi ámeina teiyede aru cadatebedu Ûre. Me majivü maja aipe árojae ñai jujovayü üi daiyede.

**Pablo üi cãrijino üi cüede Troai  
(Hch 20.1)**

<sup>12</sup>Ji coyucünüiyede Cristoi yávaiye méne, eacacü Troas ámicuríimaroí. Obedivü nócanü jápiaiyuriduima diede. Que baru maje jabocü Cristore memecayü buojariducacü. <sup>13</sup>Ûbenita pare cãrijíñü batecácu mujare. Majecü Titore, ji jaroimü mácure múje yebai, “Ûre coyucüyümu yui”, arí dápíariduynü batecácu. Ûbenita Ûre eabeteacacü nore. Que baru, “Nuñümü” ji aríburu yóboi nócanüre, etacacü nore jocarí, vocünücüyu Titore Macedonia ámicuríjoboróí.

**Cristo üi vainí ture ñaino majare maje mauvare**

<sup>14</sup>Torojúede jínajarevü Jümenijicure. Maje cüe boje Jesucristoque cüinávure, cainumua majare vainí ture dayube Jümenijicü maje mauvare, ina majare coyucôjemeniduivure Jesús üi yávaiye méne. Coyure dayube Jesús üi yávaiye méne caino maje nuño, obedivü pöeva ne coreóvarájiyepe ayü Ûre, yópe pöecüi bicovaiyepe mumijuede, eaquiyeye ayü cainoi. <sup>15</sup>Jümenijicü me baju jáñüme maje coyuiyede Jesús üi yávaiye méne cainoi. Yópe caivü pöeva ne víyepe mumijuede ne bicovaiyede, nopedeca caivü

põeva jápiaivu maje coyuiyede Jesús üi yávaiye méne coreóvaivubu diede. Apevu diede jápiaivu meadare nuivubu cavarõ mearo Jümenijicui curõ, aru apevu bjare nuivubu Jümenijicure jocarí toabo cüiméboi. <sup>16</sup>Ina Jesús üi yávaiye méne jápiarí ju abevu ubema maje coyuiyede yópe põeva ne víyubepe áme corajuede. Maje coyuiye boje, nácapüravu coreóvaivubu ne baju yainájivure aru bjare nurajivure Jümenijicure jocarí toabo cüiméboi. Übenita ina Jesús üi yávaiye méne jápiarí ju aivu uma maje coyuiyede yópe põeva ne víyuepe mumijuede. Maje coyuiye boje, nácapüravu coreóvaivubu ne baju apurájivure aru meadare nurajivure cavarõ mearo Jümenijicui curõ. Põecu cubebi üi baju coyuiye majicu iye yávaiyede, yaidé dayu apevure aru apure dayu apevure máre. Quénora maja coyuvubu diede, Jümenijicui cadateiye boje majare. <sup>17</sup>Obedivu põeva coyuvubu Jümenijicui yávaiyede, inajivu táuturare yópe cavede jini bojedaipõevape. Apevu mujacavu übenina arí coyuríduyama ñjare nápe paivure. Übenita ne que aiye jáve ámevu. Quénora ñja Jümenijicui daroimaramu. Üi coyucõjeimaramu üi yávaiyede ámeno cubevva üi jáinore, ñje cue boje Jesucristoque cüinávpe.

**Pablo üi coyüino Jümenijicu “Yópe ñjará mja, boropatebenajivu ji jáinore”, üi yóbocarõ coyüino mácarõ põevare Cristoque**

(Ro 8.29; Gá 4.19; Fil 3.10)

**3** <sup>1</sup>Apevu põeva ámecororājichuma ñjare bediõva cojedeca, ñje nópe aiye boje. “Pabloj ‘¿Meara márica?’ aivubuya”, übenina aivureca, ne nópe ámecoroiye ñjare jáve ámevu. Javeita ñjare coreóvaðavü mja. Que baru apevure paperayocare toivacaicõjeiye jaubevu ñjare, muje coreóvarājipepe aivu ñameja ñjare aru ye paruède cuvarivure. Iyepe paiyoca paperayocare toivacaicõjeiye jaavu apevu põevare. Übenita mujare jáðovaiye jaubevu ñjacapüravure paperayocare, muje majinajipepe aivu ñjare Jümenijicui daroimarare. Aru mujare toivacaicõjeiye máre jaubevu ñjacapüravure paperayocare, apevu ne majinajipepe aivu ñjare Jümenijicui daroimarare. <sup>2</sup>Mujavacari iyepe paiyoca paperayocape paivubu. Que baru jaubevu ñjare paperayocare, ñameja ñjare aru ye paruède cuvarivure coyuiyocare. Caivu põeva mujare jáivu majinajarama jáve ñjare Jümenijicui daroimarare aru üi paruède cuvarivure, muje oatuvaiye báque boje muje ñaiyede, ñje coyuiye báquede mujare Jesús üi yávaiye méne. Mujare pare huvu ñja. Que baru mujarecabu paperayoca Cristoi toivaino mácarõpe paivu ñje ümei, ñje árumetebenajipepe aivu mujare. <sup>3</sup>Cristo ubi põevare ne járajipepe ayu caiye iye üi mearo ñcaiyede mujare, üi oatuvare ñaiye báquede mujare, muje ju aiye boje üi yávaiye méne, ñje coyuiye báquede mujare. Que baru mujarecabu paperayoca “Mearatamu na”, üi arí toivaino mácarõpe mujare aru üi jícõjeinope paivu ñjare, ijäravucavu ne coreóvarājipepe ayu üi paruède. Übenita toivabeteame ñeminicoroque paperayocarã, aru buraiyoque cüravearã máre. Quénora oatuvaicõjequemavu ñai Espiritu Santore mujare, muje ümene aru muje ñaiyede máre.

<sup>4</sup>Jáve majidivubu ñja me nuriéna coyuvure Jesús üi yávaiye méne, Jümenijicui daroiye báque boje ñjare aru Cristoi beorí coyucõjeiye báque boje ñjare. <sup>5</sup>Ñjavacari Jesús üi yávaiye méne nuriéna coyurí ye majibevu ñje baju majiéque. Quénora Jümenijicurecabe coyurí majide dayu ñjare diede me

nuriéna. <sup>6</sup> Jūmenijicuvacari majide darejame ñujare, úre memecaivure, ñuje coyurājiyepe ayu “Yópe ñajarā muja, boropatebenajivu ji jáinore”, ñi yóbocarō coyūino mácarōre pōevare Cristoque. Toivacaino mácarō āmenejaquemavu iye ñi yóbocarō coyūino mácarō Cristoque, pōeva maje majinajiyepa ayu aipe ñaiye jaurōre majare. Quénora ñi yóbocarō coyūino mácarōque Cristoque Jūmenijicui Espiritu Santo majide ñayube aipe ñaiye jaurōre majare. Jūmenijicui ñaicōjeiye ñi toivaicōjeiye báqueque Moisés bácura pōeva yaivu bácurape ne ũmei coateimara májebu Jūmenijicure jaruvārī, maje ñaiye majibe boje yópe ñi ñaicōjeiyepe. Ũbenita Jūmenijicui Espiritu Santoi ñaicōjeiyeque pōeva apurivubu maje ũmei, ñi ñare ñaiye boje majare yópe ñi ñaicōjeiyepe.

<sup>7</sup> Javede “Yópe ñajarā muja, boropatebenajivu ji jáinore”, Jūmenijicui arī coyurejaquemavu pōevare, ñi coyuiye báquede ñi ñaicōjeiyede Moisés bácura. Iye ñaicōjeiyede toivaicōjenejaquemavu cūravearā. Dinūmu mácarōre paredaca Jūmenijicu meacu baju ñi parué pōrejaquemavu. Que baru Moisés bácuri jiva máre pōrejaquemavu. Iye pōiye bíjare ñuiyedeca, ānina Israel bácuri pāramena mácuru ye jáivu buojabedejaquemavu ñi jivare, pare pōiyeque boje. Que teni Jūmenijicu jáñovarejaquemavu meacu bajure ñi parué pōiyeque, ñi majide ñaiye báquede pōevare aipe ñaiye jaurōre náre ñi ñaicōjeiyeque, iye coatede ñaiye pōevare úre jaruvārī. <sup>8</sup> Que baru pueno baju jáñovarejaquemavu meacu bajure ñi parué pōiyeque, ñi majide ñaiyede pōevare aipe ñaiye jaurōre majare ñi Espiritu Santoque, ñai apure ñayu majare maje ũmei, maje curājiyepe ayu Jūmenijicūque cainūmua.

<sup>9</sup> Jūme nijicu, ñi javecarō coyūino mácarōque Moisés bácuque, pōevare boropateivure jári, ñajicōjenejaquemavu náre. Ũbenita ñi yóbocarō coyūino mácarōque Cristoque, pōevare boropatebevure jári, meañarejaquemavu majare. No ñi javecarō coyūino mácarōque Moisés bácuque, jáñovarejaquemavu meacu bajure ñi parué pōiyeque. Ũbenita yo ñi yóbocarō coyūino mácarōque Cristoque, pueno baju jáñovarejaquemavu meacu bajure ñi parué pōiyeque. <sup>10</sup> Ũi yóboque coyūquiye jipocai, no ñi javecarō coyūino mácarō parurejaquemavu. Ũbenita yo ñi yóbocarō coyūino mácarō Cristoque pueno baju parurōtamu. Que baru yóboquede ñi coyurīburu yóboi, no javecarō ye parubevu. <sup>11</sup> Jūmenijicui coyuiyede no javecarōre Moisés bácuque, “Cūiquíyebu”, arī dápiarejaquemavu. Ũbenita ñi yóboque coyuiyede Cristoque, “Cūiméquiyebo”, arī dápiarejaquemavu. No ñi coyūino mácarō cūiquínoque jáñovarejaquemavu meacu bajure ñi parué pōiyeque. Ũbenita yo ñi coyūino mácarō cūiméno maquinóque pueno baju jáñovarejaquemavu meacu bajure ñi parué pōiyeque.

<sup>12</sup> Ñuje jave napini coreiye boje Jūmenijicu jáñovare nucūyure meacu bajure ñi parué pōiyeque, ñuje coyuiyede Jesús ñi yáyaiye méne, jidubevūva coyuvavubu diede. <sup>13</sup> Moisés bácu, ñai cūmañu mácu ñi jivare cuitótecajeque ānina judíova, Israel bácuri pāramena mácuru, ne jámenajiyepa ayu iye pōiyede bíjare ñuiyede ũ mácura jocarī, coyurejaquemavu Jūmenijicui yáyaiyede jave ne apevu pōevare obebejuare. Ũbenita ñujacapuravu coyuvubu Jūmenijicui yáyaiyede jave ne caivu pōevare cainūmua. <sup>14</sup> Ānina judíova ye coreónvaivu buojabedejaquemavu ne jári boroteiyede Moisés bácuri coyuiye báquede Jūmenijicu “Yópe ñajarā muja, boropatebenajivu ji jáinore”, ñi javecarō coyūino mácarōre.

Aru quédecabu caride máre. Ye coreóvaivu buojabema ina judíoiva, yópe ne cūmaiyepe ne ūmene cuitótecajeque. Pu ne cuiyeta Jesucristoque cūinávape, coreóvaivu buojarājarama na. Cristo quécura majibi yópe cūmaicajede ini jaruvaiyepe. <sup>15</sup>Pu carita ne jári boroteiyede Moisés bácu coyuiye báquede Jūmenijicui javecarō coyūino mácarōre ye coreóvaivu buojabema ina judíoiva, yópe ne cūmaiyepe ne ūmene cuitótecajeque. <sup>16</sup>Ūbenita pōecui ju aiyede maje jabocu Jesucristore, coreóvayu buojaibi Jūmenijicui javecarō coyūino mácarōre, yópe icaje cūmaicajede ini jaruvaiyepe. <sup>17</sup>Maje jabocu Cristo cūináturube ñai Espiritu Santo. Aru ácu pōecu cūvacu ñai Espiritu Santore, abujuvai jabocui cōjeimu āmemi. <sup>18</sup>Caivu maja curivubu yópe cūvaepe maje jiva cūmamejivare, maje coreóvaiye boje Jesucristore. Yópe jivaru cūmamedu jádovaiyepe ñai jáñu nore, nopedeca maja jádovaivubu apévure maje jabocu Cristo meacu baju ūi parué pēoiyede maje cūvae, maje cue boje ūque cūinávape. Maje coreóvare návaiyede ūre cainumua, oatúvare návaiyubu maja, ūpe tenajivu. Jāravua coapa pueno baju jádovare návaiyubu ūi parué pēoiyede maje ñaiyeque. Nópe ñare ñayube maje jabocu Cristo. Ūrecabe ñai Espiritu Santo.

**4** <sup>1</sup>Jūmenijicu ūi cōmaje āroje jáiye boje, ūre memecaicōjeimi ñujare, ñuje coyurājiyepe ayu Jesús ūi yávaiye méne. Que baru uetubevuva diede coyure nurajaramu ñuja. <sup>2</sup>Ñuje coyuiyede, ye ñabevu meatenajivu ñuje baju apévū pueno yópe ñujare āmecororidūivu ne aiyepē. Ye cūyoje tede ñabevu ñuja. Yavenina máre yéde ñabevu ñuja. Jujovabevu pōevare. Aru oatuvabevu Jūmenijicui yávaiye méne. Quénora caiye Jūmenijicui yávaiye méne coyūvaivubu yéde yavebevūva, oatuvabevūva, aru jujovabevūva máre. Nópe ñari Jūmenijicui jáinore jádovaivubu caivu pōevare ñameja ñujare aru ye paruéde cūvarivure, ne mearo dápiarājiyepe aivu ñujare.

<sup>3</sup>Apevu pōeva coreóvaivu buojabema ñuje coyuiyede. Ūbenita nárecabu quévura ina bíjare nuivu Jūmenijicure jocarī toabo cūiméboi. <sup>4</sup>Ñuje coyuiyede Jesús ūi yávaiye méne, náre jápiarī eabede ñai abujuvai jabocu Satanás, ñai jaboteyu ijāravucavu Jūmenijicure coreóvabevure. Pōeva ne jápiarī earī ju aye iye yávaiye méne yopedecabu ne jájuroe Cristo meacu baju ūi parué pēoiyede, ñuje coyuiyede diede. Ūbenita yópe jári eabecu ūi jámepe pēoiyede, nopedeca ina pōeva diede ju abevu coreóvabema Cristo, ñai cūináturu jípacu Jūmenijicūque, meacu baju, ūi parué pēoiyede, yópe ne jári eabepe diede. <sup>5</sup>Ñuja coyubevu ñuje borore, pōeva ne pueðarājiyepe aivu ñujare ne jabovava. Quénora coyūvaivubu maje jabocu Jesucristore. Ñujacapūravu quénora memecavaivubu mujare, ñuje ñaiye boje yópe Jesucristoi urōpe. <sup>6</sup>Mamarumure, Jūmenijicui cuedaiye báquede caiyede, ñeminijāravu bácarōre, “Miadájaro” ayu bácu, miadāre ñarejaquemavu Jūmenijicu. Ūrecabe, yópe miadāre ñaiyepe maje ūmene, coreóvare ñayū meacu baju ūi parué pēoiyeque. Maje coreóvaiyede Cristore, coreóvaivubu Jūmenijicu meacu baju ūi parué pēoiyede, yópe maje jájuroepe Cristo meacu ūi jiva pēoiyede Jūmenijicui paruéque.

**Jesúre ju aipōeva ne ñaino ūi paruéque**

(Ro 14.10)

<sup>7</sup>Iye Jūmenijicu meacu baju ūi parué pēoiyebu pueno bojecue baju. Ūbenita ñuja coreóvaivubu cūvarivure iye parué pēoiyede parubevure ñuje ūmei, ñuje

bojecube boje, yópe jobojorobu parubebupe aru bojecubebupe. Que baru Jūmenijicurecabe parure dayu ñujare ñuje ũmei, jádovacuy caivu pōevare ũre parucure caivu pueno. <sup>8</sup> Apenumua apevu ñujare cārijovaivureca, Jesús ũi yávaiye méne coyurī ye dajocabevutamu ñuja. Apenumua aipe daiye jaurōre ñujare, ye majibevureca, apevu ye vainī turī jaruvaivu buojabevutamu ñujare. <sup>9</sup> Apenumua apevu ñujare ñájine ðaivureca, Jūmenijicu ye coatebebi ñujare jaravarī. Apenumua apevu ñujare ámedaivuvacari, ñujare ye bñjare ðabevutamu na. <sup>10</sup> Caino ñuje nuinoi, ñuje coyuiye boje Jesús ũi yávaiye méne pōeva boarī jaruvaiyuriduivubu ñujare, yópe apevu ne boarī jaruvaiye báquepe Jesúre. Ũbenita ñuja apurivu cāreja jádovaivubu Jesúre, ne boarī jaruvaimu mácare, apucure bediōva cojedeca caride, ñujare cadateyure. <sup>11</sup> Cainumua ñuje cuede ijāravure, pōeva jēni jíniduivavubu ñujare apevure ne boarī jaravarīdurājiyepe aivu ñujare, ñuje coyuiye boje Jesús ũi yávaiye méne. Aru ñuja apurivu cāreja jádovaivubu Jesúre, ne boarī jaruvaimu mácare, apucure bediōva cojedeca caride, ñujare cadateyure. <sup>12</sup> Que baru pōeva ne boarī jaruvaiyuedeca ñujare, ñujacapuravu coyure núvavubu Jesús ũi yávaiye méne, muje curājiyepe aivu cainumua muje diede ju aiyede.

<sup>13</sup> Ye baju ámevu pōeva ne boarī jaruvaiyue ñujare. Cainumua ju aivubu Jūmenijicure. Yópe arī, apecure toivaicōjenejaquemavu Jūmenijicu ũi yávaiyede: “Yu ju aivu Jūmenijicui yávaiyede jávene. Que baru coyuyubu diede”, arī toivaicōjenejaquemavu. Aru quédeca ñuja máre ju aivubu Jūmenijicui yávaiyede jávene. Que baru diede coyuvavubu ñuja. <sup>14</sup> Coreóvavubu ñuja ũi yávaiyede jávene, ũi nacovaiye báque boje maje jabocu Jesúre yainore jaravarī, apure ðacuy ũre bediōva cojedeca. Que baru coreóvavubu ñuja nacovacuyure ñujare máre yainore jaravarī, ñuje apurājiyepe ayu bediōva cojedeca, ñuje cue boje Jesucristoque cūinávupe. Aru ñuja mujaque, caivu majare nūvacuyume ũi curōi, maje curājiyepe ayu ũque cainumua. Que baru jidubevuva coyuvavubu diede. <sup>15</sup> Ñuja vavubu caiye iye ñájiyede mujare boje, cadatenajivu mujare. Pueno baju obedivu pōeva ne ju aiyede Jesús ũi yávaiye méne, ñuje coyuiyede, Jūmenijicu meadaibi náre ne ámeina teiyede jaravarī, ũi mearo ðacaiye boje pōevare bojecubeda ũi me boje. Que baru ina pueno baju obedivu pōeva torojuede jínajarama Jūmenijicure. Aru ũcapūravu pueno baju ne pueðaimu macuyume, ne pueno baju mearore jfy boje ũre.

<sup>16</sup> Que baru ũetubevuvu Jesús ũi yávaiye méne coyure nurajaramu ñuja. Jārvua coapa vainīburu, parubede nuivuvacari ñuje baju, maje ũme parure nuri, mamaeva oatuvare nuivubu maja. <sup>17</sup> Ñájiyureca maje cuede ijāravure, maumena vaiquiyebu maje ñájiyede. Que baru quíjino dápiavubu diede. Aru maje curājiyede cavarō mearore Jūmenijicue, coreóvarājaramu jáve quíjino bajura iye maje ñájiyede ijāravure. Ũbenita maje ñájiye boje pueno urarō mearo baju cūvarājaramu maja cainumua, jārvu cūiméjārvu baquinóre. Que baru urarō dápiavubu diede. <sup>18</sup> Maja dápiare numevu maje ñájiyede, iye maje jári buojaiyede. Quénora dápiare nuivubu iye mearo bajure maje cūvarājiyede, cavarō mearo Jūmenijicui curōi, iye maje jári buojabede cāreja. Iye maje jári buojaiye cūiquiyebu. Maumena vaiquiyebu. Ũbenita iye maje jári buojabe cūiméquiye bu. Cainumua cuquiyebu.

**5** <sup>1</sup> Maje baju ijāravucarō yópebu cūrami maje ũme curīnamipe. Majidivubu pojequibaju baquinóre maje yaiyede. Ũbenita no pojeiyede,

maja Jesúre ju aipõeva cūvavu apebaju, maje ūme curiñamipe. Ūbenita cūrami põeva ne ðaiñamipe āmevu. Quénora Jūmenijicurecabe cuedayū apebaju mamabajure majare. No baju pojebequiyebu. Quénora cuquiyebu cainumua cavarõ mearo Jūmenijicui curõi. <sup>2-3</sup>Uetuvubu maje cuede yo baju ijāravucarõque. Pare napini coreivubu ānijāravū, Jūmenijicui jíquijāravū baquinóre apebaju mamabajure majare. Yópe baquiyébu maje ecoiyepe mamaðami cūrami aru maje doiyepe cuitótecaje mamacajede máre, maje cubequiyeye ayū yópe põecu cuitótecaje cubecupe. Que baru maje ūme baju cuquiyebu cainumua. <sup>4</sup>Maje cuede yo baju ijāravucarõque, pare ñájini, napini coreivubu maje cūvarājiyede apebaju mamabajure. Yópe põecu ūbebi cūcu cuitótecaje cubecupe, nopedeca maja ūbevu curivū maje ūme baju cubevūva. Quénora uvū maja Jūmenijicui oatūvaquiyeye aivū maje bajure maja yaibévūva. Que teni maje baju ijāravucarõ pojequibajure oatūvajebu Jūmenijicu, maje cūvarājiyepe ayū mamabaju pojebequibaju cavarõ mearocarõre. <sup>5</sup>Jūmenijicurecabe ñai majare meadayū bācu, maje baju oatūvaquiyeye ayū. Que baru iye maje baju oatūvaiye jāvetamu. Ūrecabe majide ðayū majare, ðacacuyūre caino mearo yópe ūi aiye báquepedeca, ūi daroiye báque boje ñai Espiritu Santore.

<sup>6</sup>Que baru ye jidūbevūva aru chīomevūva máre napini coreivaivubu maje cuede cainumua, yo baju ijāravucarõque cubevū cāreja, maje jabocu Cristoi curõi. <sup>7</sup>Majidivubu aipe ðaiye jaurõre majare, maje ju aiye boje ūre, majare majide ðayūre. Ūbenita ūre jāmevū cāreja. <sup>8</sup>Jidūbevūva aru chīomevūva máre napini corede nuivubu maja. Pueno baju yayivūvubu maja, curājivū maje jabocu Cristoi curõi. <sup>9-10</sup>Ūbenita caiyede jocarī, yópe maje jabocu Cristoi urõpe ðaiyurivubu maja. Maje cuede ijāravure aru maje cuede ūi curõre máre quénora ūi urõpe ðaiyurivubu maja, caivū maja maje nūrajīye boje Cristoi coyūquiyede maje ðaiye báquede méne o āmene ūi jāinoi. Bojedacuyūme caivū majare yópe maje ðaiye báquepedeca ijāravure. Maje mearo ðaiye báque boje, mearo ðacacuyūme majare. Ūbenita maje āmeno ðaiye báque boje, ñājine ðacuyūme majare.

### **Jūmenijicu ūi cārijimene ðaino majare**

(Jn 3.3-7; Hch 16.23; Ro 14.10; Gá 6.15)

<sup>11</sup>Maje jabocu Cristoi bojedaquīye boje caivū põevare, ūre pueðaiye jāvūvū majare. Que baru põevare ju are ðaiyurīduivubu ñūja Jesús ūi yāvaiye méne. Ūbenita coyūbevu ñūja diede, cūvarājivū ñūje boje méne. Quénora diede coyūvubu, põeva ne ñājimenajīyepe aivū ne ju abe boje. Jūmenijicucapūravū me coreóvayūbe ñūjare, ñūje dāpiayēde ñūje ūmei. Que baru majibi ñūjare jūjavavūre aru mearo ðaivure. Napini coreivū yū mujare máre nopedeca me majidivūre aipe ārojarivūre ñūjare. <sup>12</sup>Bediõva cojedeca ūbenina arī dāpiabejarā muja ji nópe aiye boje mujare coreóvare ðaiyūcure ñameja ñūjare aru ye paruéde cūvarivūre. Quénora mujare torojure ðaiyurīduivubu ñūje ðaiye boje, muje majinajīyepe ayū me ina bueipõeva āmecorojūrorivū ñūjare ne coyūyede. Āmecoroiyurīduivubu ñūjare, ne ūbe boje ne jāiyede aipe ārojarivūre ñūjare. Ūbenita majibema aipe ārojarivūre ñūjare ñūje ūmei. <sup>13</sup>Apevū “Pablojā ārumevūtamū”, ūbenina adama. Ūbenita ārumevū āmevū ñūja. Ārumevūpe ārojaru, ye baju āmevū. Ðaivubu ñūja yópe Jūmenijicui

urõpe, mearore jínajivu úre. Ûbenita jáve ārurivubu ñuja, memecarājivu mujare. <sup>14</sup> Memecaivubu mujare Cristoi ure ðaiye boje ñujare, ùi ue boje caivu põevare.

Maja coreóvaivubu cūinácū ũmu, maje jabocu Cristo, yaicáyū bácure caivu põevare boje. Caivu põeva yaijurorivureca ne ámeina teiye boje, Cristorecabe yaicáyū bácū majare boje. Que baru caivu úre ju aivu yópe yaivu bávavupebu maje cuede úque cūinávupe. <sup>15</sup> Cristo yaicárejaquemavu caivu põevare boje, maja úre ju aivu, maje dajocarājiyepe ayu maje ðaiyede, torojure ðarājivu maje baju quévura, ũbenita quénora maje ðarājiyepe ayu caiyede, maje torojure ðarājiyepe aivu úre. Ûrecabe yaicáyū bácū aru Jūmenijicui nacovaimu mácū máre majare boje. <sup>16</sup> Ñuje ju aie báquemata Cristore, “Que baibi”, arī dāpiabevu aipe ārojacure põecure ñuje jáiye boje úre, yópe ijāravucavu Jesúre ju abevu “Que baibi”, ne arī dāpiaiyepe. Ñuja nápe paivu “Que baibi”, arī dāpiaivu bávavvacari Cristore javede, caride nápe paivu “Que baibi”, arī dāpiabevu. <sup>17</sup> Que baru maja Cristore ju aivu curivubu úque cūinávupe. Jūmenijicui oatuvaimaratamu maja. Yópe mamarumure põeteivu bávavupebu. Maje dāpiaiyede, maje ðarī cōmajiyede, maje ju arājiye jipocai Cristore dajocadavū maja caride. Quénora maje cūvae boje mamaūmene, maje dāpiaiyede, maje ðarī cōmajiyede, oatuvadavū maja caride. Majarecabu dajocaivu bávavu javede maje ðarī cōmajiyē báquede maje ju arājiye jipocai. Quénora ðarī cōmajiyavū mamaene caride.

<sup>18</sup> Jūmenijicurecabe ðare ðayū caiye iyede majare boje. Cristoi ðaiye báque boje, Jūmenijicū cārijimene ðarejaquemavu majare úque, maja úre maucūvarivu bávavu, maje yóvarājiyepe ayu úre. Aru ñujare cārijimene ðare ðaicōjenejame apevu põevare máre úque, na úre maucūvarivu, ne yóvarājiyepe ayu úre. <sup>19</sup> Yópe ayubu yu. Cristoi ðaiye báque boje, Jūmenijicū cārijimene ðaiyurīduibi caivu ijāravucavure úque, ina úre maucūvarivu, ne yóvarājiyepe ayu úre. Coyurī ñājine ðabebi ne vainī tuiye báquede ũi ðaicōjeiyede jocarī. Aru ñujare coyucōjeimi náre ũi yávaiye méne ũi cārijimene ðaiyena. <sup>20</sup> Cristoi daroimaramu ñuja, coyucarājivu ũi yávaiye méne. Ñuje arī coyuiyede põevare “Maucūvabejarā muja Jūmenijicure. Quénora úre cārijimene ðare ðaicōjejara mujare úque” arī, yopedecabu Jūmenijicūvacari ũi que jēniājuroe náre. Ñuja parurõreca jēniacaivubu mujare Cristore boje. Yópe arī, “Maucūvabejarā muja Jūmenijicure. Quénora úre cārijimene ðare ðaicōjejara mujare úque”, Cristo ñujare jēniacōjeimi mujare. <sup>21</sup> Maja curivu Jesucristoque cūinávupe Jūmenijicui cārijimene ðaimaramu caride. Cristovacari ye ámenore ðabedejaquemavu cainumua. Ûbenita Jūmenijicū járejaquemavu úre yópe ũi jáiyepe ámenore ðayue majare boje, meadacuyū majare. Que baru Jūmenijicū jáñume majare curivure Jesucristoque cūinávupe, yópe ũi jáiyepe boropatebevure.

**6** <sup>1</sup> Aru ñuja memecaivu Jūmenijicure mujaque parurõreca jēniavaivubu mujare, muje ju are nurajiyepe aivu Jūmenijicui urarō mearo ðacaiyede, ũi meadaquiyepe aivu mujare. <sup>2</sup> Jūmenijicūvacari, yópe arī, toivaicōjenejaquemavu ũi yávaiyede:

Muje órejarājiyede yure, ji cadatequiyepe aivu mujare, jápiarī cadatecuyumu mujare. Yo jāravu baquinó ji meadaquijāravure, meadacuyumu mujare, arejaquemavu Jūmenijicū.

Jápiajarā mja. Caridecabu Jūmenijicui mujare cadatejurorijāravu. Cari jāravurecabu Jūmenijicui mujare meadajurorijāravu. Mujare cadateni meadaiyubi Jūmenijicu cari jāravu baju. <sup>3</sup> Cainumua űuje memecaiyede Jūmenijicure, ye āmeina teiyubevu űuja aru apevure märe ye āmeina tede ðaiyubevu űuja, űame ne āmeina yávarī buojabenajiyeye aivu űujare aru ju abevu āmenajiyeye aivu Jūmenijicui yávaiye méne, “Diede coyucaipöeva āmeina teivubu aru āmeina tede ðaivubu apevure märe” aivu. <sup>4</sup> Quénora caiye űuje ðaiyeque jáðovaiyurivubu ðaivu me, yópe memecaiipöevare jauépe Jūmenijicure.

Que baru napiyurivubu cainumua űuje űájiyede, űujare jauéde, aru űuje cārijiyede märe. <sup>5</sup> Pöeva űujare jara popeivu bācavuvacari, űujare jēni jacoivu bācavuvacari āmeina teivure jēni jacoĩnami jĩvuĩ, aru űujare maucvārĩ, cārijovari boaiyurivu bācavuvacari märe, caiye űuje ðaiyeque jáðovaiyurivubu ðaivu me, yópe memecaiipöevare jauépe Jūmenijicure. űuja űrarō memeiivu bācavuvacari pu űetuiyeta, aru űuja cāmevu bācavuvacari űuje memeiye boje, aru űuja āiyede āmevu bācavuvacari märe űuje memeiye boje, cainumua jáðovaiyurivubu ðaivu me, yópe memecaiipöevare jauépe Jūmenijicure. <sup>6</sup> Que baru āmeina tebevva ðare űuiyurivubu me Jūmenijicui jáĩnore. Jūmenijicui yávaiyede jávene majide űuiyurivubu. Aru napine űuiyurivubu pöeva ne ðaiyede. Cadatete űuiyurivubu pöevare. Cure űuvaiyurivubu űai Espĩritu Santore aru űre űuiyurivubu pöevare cainumua. <sup>7</sup> Jūmenijicui yávaiyede jávene coyure űuiyurivubu. Aru Jūmenijicui parúeque űuje cūvaede memecare űuiyurivubu. Cainumua mearore ðaiyurivubu, meatenajivu maucvaburĩ āmenore, yópe churarava ne meateiyepe, ne maucvārājiyepe aivu ne mavare.

Que teni majidivubu űuja aipe ðaiye jauřore, vainĩ turĩ jaruvārājivu āmenore aru vainĩ tubenajivu űuja märe. <sup>8</sup> Apenumua apevu pöeva pueðaðama űujare. Aru apenumua pueðabenama űujare. Apenumua apevu pöeva āmeina yávaðama űujare. Aru apenumua me yávaðama űujare. Apenumua “Borocurivubu”, űbenina arĩ dāpiaðama űujare, űuja borocubevva yávaiyede jávene coyuvavureca. űbenita ye baju āmevu űujare. <sup>9</sup> űuja obedivu ne me coreóvaimarareca, apenumua “Caivu ne coreóvabemaratumu”, űbenina arĩ dāpiaðama űujare. Apevu “Näre ne boaicōjeimara mārājima”, űbenina arĩ dāpiaivureca űujare, űuja apurivubu. űujare űrarō űájine ðaivuvacari, űujare boarĩ jaruvabema. <sup>10</sup> Apenumua chĩoivuvacari űujare āmeno vaiye boje, torojurivubu űuje űmei cainumua. Ijāravúque cūve cūvabevuvacari, apevure cūve cūvarivupe tede ðaivubu ne űmei űrarō Jūmenijicui mearo ðacaiyede űuje cūvare ðaiyede náre Jūmenijicui yávaiye méne. Aru űuja ijāravúquede cūvabevuvacari, caiye iye méne Jūmenijicui cūvare ðaiyede ű jinare cūvarivubu űuja.

<sup>11</sup> Mja, jĩvu, Corintocavu, jidubevva coyuvubu mujare nurié, űuje dāpiaiyede ye yavebevva. Jáðovavubu pare űuje uede mujare. <sup>12</sup> Joai āmevu űuje űme mujare jocarĩ. űujacapūravu yóvaiyubevu āmevu mujare. Quénora joai űme cūvu űujare jocarĩ. Mjajacapūravurecabu yóvaiyubevu űujare. <sup>13</sup> Que baru yu jēniaivu mujare parurōreca, yópe népacui jēniaiyepe űi mārare. Yópe ji pare űepe mujare, quéðeca űjarā yure.

**Pablo ñi majicaino Jesúre ju aipõevare, ne yóvabenajiyeye ayu Jesúre ju abevuque**

(1 Co 3.16; 6.19)

<sup>14</sup> Ñbenita ji ñedeca muje yóvarājiyeye ayu yure, yóvabejarā muja ina Jesúre ju abevuque, uparivu teiyede náque aru inajivu tātuturare aru purubuoiyede náque máre. Põeva mearore ðaivu ye buojabenama yóvaivu ina āmenore ðaivuque. Aru põeva miadároi cuivupe, ne mearore ðare nuiye boje, ye buojabenama yóvaivu náque, ina ñeminoi cuivupe, ne āmenore ðare nuiye boje. <sup>15</sup> Cristo ye buojabebi yóvayu ñai abujuvai jabocuque. Aru Jesúre ju aipõecu ye buojabebi yóvayu Jesúre ju abecuque, ne dāpiarī cōmajibe boje cūináturu. Nácapūravu pēpeimarare mearore jívaivubu. Ñbenita majacapūravu Jūmenijicure mearore jívaivubu. <sup>16</sup> Aru pēpeimara ye buojabenama yóvaivu ñai Jūmenijicu apucu ñi mearore jíñami jívui. Maja Jesúre ju aipõevavacari ñai Jūmenijicu apucu mearore jíñamipebu. Yópe arī, toivaicōjenejaquemavu Jūmenijicu ñi yáva iyede:

Ji pōevaque cūcūyumu yu. Yópe ji cuiyeye ne jēneboi yóvacūyumu yu náque. Ne mearore jímū macūyumu yu. Aru nácapūravu ji pōeva marajárama, arejaquemavu Jūmenijicu.

<sup>17</sup> Que baru Jūmenijicu yópe máre arī toivaicōjenejaquemavu ñi yáva iyede, ñi pōeva ne majinajiyeye ayu aipe ðaiye jauřore pēpeimarare mearore jívure:

Náre dajocarī, etajarā muja náre jocarī. Que teni náque yóvabeni, coatejarā muja náre jaruvarī. Ye tuobekarā muja caiye ne cūvaede, ne āmeina ðaiyeque cūvaede. Que ðaru, mujare me copu etacūyumu yu. <sup>18</sup> Yu bacūyumu mujepacu. Aru muja jímara marajáramu, arejaquemavu maje jabocu Jūmenijicu, ñai parucu caivu pūeno.

**7** <sup>1</sup> Jáve Jūmenijicu ðacacūyume majare caiye iye mearo ðacaiyede yópe ñi aiye báquepedeca. Que baru muja, jívui, ji umara, yópe pōevai jaruvaiyeye docucuede ne joaiyede, nopedeca jaruvaiye javvu majare maje āmeina teiyede. Iye maje bajure āmedaiyede aru maje ūmene máre āmedaiyede coatenajarevu diede jaruvarī. Jūmenijicure memecaiye matuiyeda javvu majare, maje puedaiye boje ūre.

**Corintocavu Jesúre ju aipõeva ne jaruvaino ne āmeina teiyede**

(2 Co 2.13)

<sup>2</sup> Ñjarā ñujare. Jāpiarī adabejarā ina āmeina yávaivure ñujare. Ñamene āmeina ðabetecarā ñuja. Ñamene āmeina tede ðabetecarā ñuja. Aru ñamene jujovabetecarā ñuja. <sup>3</sup> Caiye iye ji toivaicōjeiyede apecure mujare toivaicōjemevu āmecorocūyū mujare. Yópe ji toivaicōjeiye báquepedeca apecure mujare jipojīcai, pare urivubu mujare. Ñuje urarō űe boje mujare, yóvayurivubu mujare maje cuede ijāravui. Aru apēvu ne mujare boarī jaruvaiyuru, mujaque yaiyurivubu ñuja. <sup>4</sup> Jidabecūva coyūvu mujare nuríe ji dāpiayede ye yavebecūva. Muja torojure ðadavū yure. Que baru apēvu pōevare coyūyubu muje borore. Caiye maje ñājiyede, muja cadatedavū ñujare, muje parure ðaiye boje ñuje ūmei, aru muje torojure ðaiye boje máre ñuje ūmei.

<sup>5</sup> Ñuje eaiyede yui Macedonia āmicurijoborōi, pu caride máre ye jabuvabevu ñuja cārijivu. Cainūmua ñājivaivubu ñuja, apēvu ne maucūvae

boje ñujare aru ñuje cãrijkiye boje pœeva ne ðájuroede aru muja máre, muje ðájuroede. “Dajocarãjichuma ne ju aiyede Jesús ùi yávaiye méne”, arí dápiarí mujare, cãrijivubu ñuja. <sup>6</sup> Ñbenita Jūmenijicurecabe, ñai cadateyu ina cōmaje ārojarivure, cadateyu bácu ñujare. Parure dáme ñujare ñuje ūmei, Titoi edaiyede yore. <sup>7</sup> Parure ðaibi ñujare ñuje ūmei, ūi edaiye báque boje, cūcūyu ñujaque. Ñbenita pueno baju parure ðaibi ñujare ñuje ūmei, ūi coyuiyede muje parure ðaiyede ūre ūi ūmei. Pare ñujare jáiyurivubuya. Chioivubuya muje āmeina teiyede. Cãrijivubuya ji ñájiyede mujare boje. Que baru pueno baju torojuvu yu ji ūmei.

<sup>8</sup> Mamarumure ji jaroiyede mujare no paperayoca ji toivaicōjeino mácarōre apecure, jaracūyu mujare muje āmeina teiye boje, pare cãrijīñu matecácu yu. “¿Chiore ðaquiichuri yu náre?” arí dápiayu batecácu. Aru muje jári boroteiyede no pape rayoca bácarōre, chioquemavu muja. Yu mujare chiore ðayu bácvacari, “Nore apecure toivaicōjeiye jaubeteavū yure”, arí dápiabevu yu. Chioivu batequémavu muja obebejāravuare. <sup>9</sup> Caride torojuvu yu, ji toivaicōjeiye báque boje apecure no paperayoca bácarōre. Ji chiore ðaiye báquede mujare torojubevu yu. Ñbenita me torojuvu yu, muje chiori oatuvaiye boje muje ðaiyede. Muja jáquemavu muje āmeina teiyede yópe Jūmenijicui jáiyepe diede, muje oatuvaiye báque boje muje ðaiyede. Que baru mujare āmedabetecacu yu, ji toivaicōjeiye báque boje apecure, majicacūyu mujare. Quénora mujare cadatecacu yu.

<sup>10</sup> Ñai jáñu ūi āmeina teiyede yópe Jūmenijicui jáiyepe diede chiori oatuvayube ūi ðaiyede. Que baru Jūmenijicu meadayube ūre, ūi āmeina teiyede jaruvári. Aru chiomecube cainumua. Ñbenita ñai jáñu ūi āmeina teiyede yópe pœeva Jūmenijicure coreóvabevu ne jáiyepe diede chioñame, ūi cuyoje teiye boje pœeva ne jáiyede, ūbenita oatuvaiyubecube ūi ðaiyede. Que baru ñaine Jūmenijicu coavayube ūre jaruvári cainumua. <sup>11</sup> Dápiajarā muja caiye iye mearo vaiyede mujare, muje chiori jáiye báque boje muje āmeina teiyede yópe Jūmenijicui jáiyepe diede. Maumena corebevūva iye āmeina teiyede ðajocaquemavu. Coyucaquemavu ji borore, cadatenajivu yure ji maucu ūi āmecoroiyede yure. Jaraquemavu muje bajumia muje āmeina teiye báque boje. “¿Nópe āmeina tenajichuri maja cojedeca?” arí dápiarí jidutequemavu muje ñájijuroede die boje. Jáiyurīduquemavu yure cojedeca. Cãrijivu yure boje ji ñájiyede mujare boje, yure ju aiyyutequemavu. Aru ñai ji maucure ñájiñe ðaquemavu. Caiye iye muje ðaiye báqueque jádovaquemavu muje baju boropatebevupe caride.

<sup>12</sup> Jáðovaiyubetecacu ñai āmedayu boropateyure, ūi āmeina teiye boje aru yu, ūi āmedaimu mácu, boropatebecure quédada, no paperayoca ji toivaicōjeino mácarōre apecure mujare. Quénora jáðovaiyutecacu mujare Jūmenijicui jáino re muje chioiyede, ñuje ñájiye boje, muje pare urí cadateiyue boje ñujare. <sup>13</sup> Que baru ñujare me cadatedavū muja, parure ðari ñuje ūmei, muje me jápiarí ju aiyede yure.

Torojuvu ñuja, muje nópe cadateiye boje ñujare. Ñbenita pueno baju torojuvu ñuja, ñuje jáiyede majecu Tito ūi torojue boje, caivu muja muje cadateiye báque boje ūre, ūi parure ðaquiyepe ayu ūi ūmei, ūi cue báquede muje yebai. <sup>14</sup> Titoi etaquiye jipocai, jácūñūcūyu muje yebai, muje torojure ðaiye boje yure, “Ñujare me jápiarí ju arājarama majevu Corintocavu”, arí

coyucacu ére muje borore. Aru muje me jápiarí ju aije boje, cuyebevu yu, ji nópe coyuiye báque boje ére. Yópe caiye ñuje coyuiyepe mujare jávepe, quédeca ji coyuiye báque muje borore Titore máre jávetamu. <sup>15</sup> Caride pueno baju ubi mujare, ñi áruéne muje me jápiarí ju aiyede ére, aru muje me jacopuiye báquede ére máre, ére pueðarí yópe muje pueðajuroepe jabocu jidojacure. <sup>16</sup> Pare torojavu yu. Jidubecava aru chiomecava máre majivu yu mujacapuravu ðaivure caiyede yópe mujare jauéde, ye jaubeda.

**Jesúre ju aipóeva ne jínó jecubevúva cuve cuvabevure**

(Ro 12.17; 15.26)

**8** <sup>1</sup> Múja, jívú, caride mujare coreóvare ðaiyurivubu ñuja ina Macedonia ámicurijoborócvu Jesúre ju aipóeva ne mearo ðaiyede Jümenijicui mearo ðacaiye boje náre bojecubeda ñi me boje. <sup>2</sup> Návacari pare ñájivaivubu. Ùbenita ñájivúvacari, jáðovaðama Jesúre ju aivure jáve. Ñájivúvacari, cainumua me torojuma ne ùmei. Aru návacari ure cuve cuvabevutamú. Ùbenita cuve cuvabevúvacari, jecubevúva jívaivubu ina Judea ámicurijoborócvu Jesúre ju aipóeva cuve cuvabevure yópe cuve cuvativu ne jýjuroepe. <sup>3</sup> Jáve coyivú yu mujare. Caino ne oainope jíma na. Aru pueno baju yópe ne jíye buojabejuroepe jíma na. Jíbeteima ne cuvaequede náre jaubede quénora. Ùbenita náre jauéquede máre jíma na. Aru pöecu cubeteame jícöjeñú mácu náre. Quénora návacari “Jínajarevu, cadatenajivu ina cuve cuvabevure”, aquemavu. <sup>4</sup> Paruróreca ñujare jéniaivu bateima, ñuje ñni núvarajiyepe aivu ne táuturare ina Judeacavu Jümenijicui póeva cuve cuvabevure. <sup>5</sup> Ñuje coreiye báque pueno baju, jíma na. Mamarumure “Yópe mi urópe ðarájaramu ñuja”, aquemavu maje jabocu Cristore. Aru no yóboi, “Yópe muje urópe ðarájaramu ñuja”, aima ñujare, Jümenijicui nópe aicöjeiye báque boje náre. <sup>6</sup> Ñuje jáiye boje ina Macedoniacavu Jesúre ju aipóeva ne pare cadateiyuede ina cuve cuvabevure, Titore jéniaicarā ñuja paredeca, ñi copainuquiyepe aivu muje yebai. Javede Tito cójijovarí búquemavu muje jýyede. Que baru jéniaicarā ñi cadatequiyepe aivu mujare, muje cójijovarí buojarájiyeppe aivu táuturare, muje jínajiyede ina cuve cuvabevure.

<sup>7</sup> Múja ju aivubu Jesúre apevu pueno. Múja coyivubu Jesús ñi yávaiye méne apevu pueno. Múja coreóvaivubu iye yávaiyede jávene apevu pueno. Maumena corebevúva múja memecaiyurivubu apevure apevu pueno. Múja urivubu póevare yópe ñuje uepe apevu pueno máre. Que baru quédeca pueno baju jýjarā muje cuvaequede máre, cadatenajivu cuve cuvabevure.

<sup>8</sup> Ji coyuiyede mujare diede, jícöjemevú mujare. Quénora coreóvare ðayubu mujare apevu Jesúre ju aipóeva ne uraró jýyena, ne pare ue cadateiyue boje cuve cuvabevure, muje jáðovarajiyeppe ayu múja máre jáve urí cadateiyurivure náre muje jýyeque jecubevúva. <sup>9</sup> Múja me coreóvaivubu iyede. Maje jabocu Jesucristo, ñi pare ue boje majare, pueno baju mearo ðacarejaquemavu majare bojecubeda. Ñai cuve cuvavúvacari caivu pueno, ñi cuvae boje caiye majepacu Jümenijicui paruéde, póecupe teni cuve cuvabecupe caivu pueno tedejaquemavu ñi. Aru ñi nópe teiye báque boje, cuve cuvativupebu maja, maje cuvae boje caiye iye Jümenijicui méne. Que baru ñi nópe cadateiye báque boje majare, apevure cadateiye javvu majare máre.

<sup>10</sup> Yu jícōjeiyubecuvacarí, majícaiyuvu mujare. Ji dápíaru, meavu mujare muje buojaru iye tãutura cójijovaiye muje buiye báquede apevu barede. Mujarecabu jíní buivu bácvu caivu apevu jívu ne jínaiye jipocai. Aru pueno baju mujarecabu “Jínajarevu” aivu bácvu máre caivu apevu “Jínajarevu”, ne arãíye jipocai. <sup>11</sup> Que baru maumena corebevva buojajarã iye muje buiye báquede. Muja pare buiyurivu bácvu iye tãutura cójijovaiyede, cójijovarí buojajarã máre maumena corebevva. Jíjarã yópe muje oainope, muje cuvæcarðque. <sup>12</sup> Maje jáve jýuru, cadatenajivu apevure, Jümenijicu torojucu me jáñume maje jýyede. Jümenijicu ubi maje jýyede yópe maje oainope, maje cuvæcarðque. Jëniamecube majare maje jýyede maje cuvabede. <sup>13</sup> Yu ubevu muje jínaiyepe ayu apevure jauéde, pu muje cuvabeta mujare jauéde. <sup>14</sup> Quénora uvu yu caivu ne cuvarájiyepe ayu cünáturara. Que baru caride mujacápüruvu, cuváruvu caiye mujare jauéde aru mujare jaué pueno máre, jíjarã, cadatenajivu ina cuvabevure. Aru apenumure nácapüruvu, cuvarájivu caiye náre jauéde aru náre jaué pueno máre, jínajarama, cadatenajivu muja cuvabenajivure. Que teni caivu cünáturu cuvarájivubu. <sup>15</sup> Quédeca yópe arí, toivaicōjenejaquemavu Jümenijicu üi yávaiyede: “Ñai urarõ ññu mácu puruiyede cuvabedejaquemavu. Aru ñai quíjino ññu mácuje jaubedejaquemavu”, arí toivaicōjenejaquemavu.

Nópe ayu, Jümenijicu jývure üi pøevare náre jauéde cainumua aiyurejaquemavu.

#### **Tito aru pucarã üi yóvaimara ne nurajino Corinto**

<sup>16</sup> Jümenijicu Titore cadateiyure ðaibi mujare yópe üi cadateiyure daiyepe yure. Que baru torojuede jívu Jümenijicure. <sup>17</sup> Tito pare cadateiyubi mujare. Apecu copaicōjemecvva üre muje yebai, úvacari “Corinto copaiyuvu yu”, áme. Que baru ji jëniaye báquede üre paredeca, üi copainuquiyepes ayu muje yebai, maumena corebecvva ju áme yure.

<sup>18</sup> Que baru jácunucuyume mujare bedióva. Aru úque jarocuyumu yu apecu majecure, majape ju ayure Jesúre. Caivu Jesúre ju aipøeva me pueðadama üre, üi coyuiye boje Jesús üi yávaiye méne, üi meðaiyede pøevare. <sup>19</sup> Obedivu ne pueðaimuvacarí üi coyuiye boje Jesús üi yávaiye méne, pueno baju ne pueðaimume Macedonia ámicuríjoborðcvvu Jesúre ju aipøeva cójijivaivu, ne beoiye báque boje üre, üi yóvaquiyepes aivu ñujare, ñuje nuvarajiyede iye tãuturare Judea ámicuríjoborði. Cadatecuyume ñujare, ñuje jári corenajiyepe ayu me iye muje jýyede. Me jári coreiyurivubu ñuja diede, pøeva ne mearore jínaiyepe ayu maje jabocu Jesucristo ne pueðaimure aru jáðovarajivu maja Jesúre ju aipøeva maumena corebevva cadateiyurivure majevu cave cuvabevure. <sup>20</sup> Üre yóvaicōjeivubu ñujare, ñame ne ámeina yávarájiyepe aivu ñujare, ñuje nuvaiye boje iye ure tãuturare, muje jýyede. Namene ye ámeno jáicōjeiyubevu ñujare yópe ne jáiyepe ámeina teivure. “Ñuje tãuturare ñavaivubevu”, ubenina arí coyubejarári pøeva. <sup>21</sup> Que teni urivubu ñuja pøeva ne járajíyepe aivu mearo ñuje ðaiyede cainumua, yópe Jümenijicui jáiyepeðeca mearo ñuje ðaiyede. Jümenijicu coreóvayube ñuja jínajivure caiye iye tãuturare ina cave cuvabevure. Ubenita urivubu ñuja pøeva máre coreóvaivure diede.

<sup>22</sup> Aru náque jarocuyumu yu apecu majecure, majape ju ayure Jesúre. Ñuja buojaivubu majidivu üre pare cadateiyucure apevure, ñuje jáiye boje aipe

ðarī cōmajiyure. Ũi jápiaye boje mŭje borore, jāve napini coreyube mŭja jínajivure jecubevŭva, cadatenajivure me ina cŭve cŭvabevure. Que baru pŭeno baju jácŭnuiyŭcŭbe mŭjare. <sup>23</sup>Pōecŭ ũi jēniari járu ñamejare aru ye paruéde cŭvarivure, yópe arī, coyŭjarā mŭja: “Titobe Pablore yóvayŭ, Jesúre memecayŭ aru majare Jesúre ju aipōevare cadateyŭ”, arī coyŭjarā Tito ũi borore. Aru apevŭ ina pŭcarā ũmŭva ne borore, yópe arī, coyŭjarā: “Macedoniacavŭ Jesúre ju aipōeva cōjijivaivŭ ne jaroimaramu, nŭvarajivŭ ne jŭye báquede Judeacavŭ Jesúre ju aipōeva cŭve cŭvabevure, pōeva ne mearore jínajiyeye aivŭ maje jabocŭ Jesucristore ne pueðaimure”, arī coyŭjarā mŭja. <sup>24</sup>Náre me copŭ etarī, pueðarī, cadateni, jáðovajara náre aru náre daroivŭ bácvure máre jāvene ji coyŭiye báquede náre mŭje borore. Ñŭjare torojure ðaivubu mŭja.

### Jesúre ju aipōeva ne jŭno, cadatenajivŭ apevure

**9** <sup>1-2</sup>Apecure mŭjare toivaicōjene nuiye jaubevŭ yure, iye mŭje jínajiyeye ayŭ jecubevŭva, mŭje cōjijovaiye boje tātŭrare apevŭ bácarōre pŭ caride máre. Yŭ majivŭ mŭja cadateiyŭrivure. Que baru mŭja Acaya āmicŭrijoborōcavŭ Jesúre ju aipōeva mŭje borore, yópe arī, coyŭvaivŭ yŭ ina Macedonia āmicŭrijoborōcavŭ Jesúre ju aipōevare: “Majevŭ Acayacavŭ cōjijovaivŭbuya iye ne jínajiyede ina cŭve cŭvabevure apevŭ bácarōre pŭ caride máre”, arī coyŭvaivŭ yŭ. Aru mŭje maumena corebevŭva jŭyŭe boje, obedivŭ ina Macedoniacavŭ máre maumena corebevŭva jŭyŭrivubu. <sup>3-4</sup>Ina yóbecurā majevŭ Jesúre ju aipōevare jarocŭyŭmu yŭ mŭje yebai, ne cadatenajiyeye ayŭ mŭjare, mŭje cōjijovarī buojarājiyepe ayŭ mŭje tātŭrare. Que teni mŭja jáðovarajaramu jāvene iye ji coyŭiye báquede mŭje borore apevŭ majevŭ, Macedoniacavŭ, ne eaiyede yŭque. “Majevŭ Acayacavŭ cōjijovaivŭbuya ne jínajiyede javede”, arī coyŭre nuivŭ yŭ. Ñŭje earājiyede mŭje yebai, mŭje cōjijovabedu cāreja mŭje jínajiyede, pare cŭyejebu yŭ, ji coyŭrīduiye báque boje ũbenina mŭje borore. Aru mŭja máre cŭyejebu pare. <sup>5</sup>Que baru jēniaivŭ ina yóbecurā majevure, ne nŭrajiyeye ayŭ mŭje yebai ji nŭquiye jipocai. Cadatenajarama mŭjare, mŭje cōjijovarī buojarājiyepe ayŭ mŭje jínajiyede, yópe “Jínajaramu”, mŭje aiye báquepedeca jipocamia. Que teni jáðovarajaramu mŭja ji jŭcōjememarare, quénora jŭyŭrivure jecubevŭva.

<sup>6</sup>Árŭjara mŭja iyede. Mŭje majiívarō mearore ðaru apevure, Jŭmenijicŭcapŭravŭ mearo ðacacŭyŭme mŭjare majiívarō baju. Ũbenita mŭje ũrarō mearore ðaru apevure, Jŭmenijicŭcapŭravŭ mearo ðacacŭyŭme mŭjare ũrarō baju. Jēvari coyŭiyeque oteipōecŭ ũi ðaiyede coyŭquijivŭ yŭ. Oteipōecŭ obebeyabea oteiyabeare oteyŭ baru, ĩcŭyŭme majiívarōra jējŭravŭ baquinói. Ũbenita obediyeabea oteiyabeare oteyŭ baru, ĩcŭyŭme ũrarōra jējŭravŭ baquinói. <sup>7</sup>Caivŭ mŭja coapa jŭjarā mŭje cŭvaecarōre yópe “Quéno baju jŭcŭyŭmu yŭ”, mŭje arī dápiayepedeca mŭja coapa mŭje ũmei. Chŭrī jecurivŭ jŭyubevŭpe yéde jŭbejarā mŭja. Apecŭi jŭcōjeimarape máre yéde jŭbejarā. Quénora torojŭrī jecubevŭva jŭjarā mŭja, Jŭmenijicŭi ũe boje ñai torojŭrī jecubevŭva jŭyure. <sup>8</sup>Jŭmenijicŭ jŭyŭ majibi ũi mearo ðacaiyequede, ijŭravŭquede, mŭjare ũrarō baju, ye jaubequiyeye ayŭ mŭjare. Aru caiye mŭjare jauéde jŭniburu yóboi, ũrarō pŭpŭquiyebu mŭjare. Que baru cŭvarajaramu mŭja mearo ðacaiyequede, ijŭravŭquede, cadatenajivŭ

apevure. <sup>9</sup>Yópe arī, toivaicōjenejaquemavū Jūmenijicu ūi yávaiyede ñai pōecu meacu ūi borore:

Ūi cūvaecarōre jīvayūbe jecubecūva ina cūve cūvabevure. Aru ūi mearo ñacaiyede ārurajarama cainūmua, arī toivaicōjenejaquemavū.

<sup>10</sup>Bediōva cojedeca jēvari coyūiyeque coyūquijivū yū. Yópe oteiye pīarī buojari aru bucūri buojari, oteipōecu īyepe ūi āquiyeva aru ūi otequiyeva máre, nopedeca mūja mearore ñaivū baru mūje cūvaeque, cūvarājaramu mūjare jauéde aru mūje jínajiyede máre pueno baju, mearore ñarājivū aru cadatenajivū apēvū pōevare. Jūmenijicūrecabe jīyū oteiyabeare ñai oteipōecūre aru āiyede pōeva ne ārajiyeva. Ūrecabe mearore ñare ñayū mūjare máre. <sup>11</sup>Que baru ūi mearo ñacaiyequede, ijāravūquede, ūrarō cūvarājaramu mūja cainūmua, jínajivū apēvūre jecubevūva. Aru obedivū pōeva, ina majevū Judeacavū Jesúre jū aipōeva cūve cūvabevū, torojuede jínajarama Jūmenijicūre, iye jīye boje mūje jarorājiyede náre ñūjaque. <sup>12</sup>Mūje jīyede apēvūre, mearore ñaivūbu, mūje cūvare ñaiye boje náre jauéde. Ūbenita pueno baju mearore ñaivūbu, obedivū pōevare mūje jīde ñaiye boje ūrarō torojuede Jūmenijicūre. <sup>13</sup>Mūje memecaiyede náre iye jīyede mūje jarorājīyeque, jādovarajivūbu mūja jū aivūre jāve ñajocabevūva Cristoi yávaiye méne, aru mūja jīvūre jecubevūva, cadatenajivūre náre aru apēvūre máre. Que baru mearore jínajarama ne pueðaimūre Jūmenijicūre. <sup>14</sup>Mūjare pare ūrivū jēniarajarama Jūmenijicūque mūjare boje, ūi pare mearo ñacaiye boje mūjare bojecubeda ūi me boje. <sup>15</sup>Torojuede jínajarevū Jūmenijicūre, ūi jīye báque boje majare pueno baju méne. Pōeva ne yávaicamuaque ye buojabenama coyūivū diede.

**Pablo ūi majicaino Jesús ūi yávaiye méne beorī coyūicōjeimara ne ñaiyena**  
(1 Co 1.31)

**10** <sup>1</sup>Caride yávacari, Jesús ūi yávaiye méne beorī coyūicōjeimaracacu, coyūyūbu mūjare, āmecoroivūre yūre. Yópe Cristoi coyūiyepe pōevare, náre cadateni aru pueðarī meacu pōecupe, nopedeca coyūiyūvū mūjare. Que baru mūjare pueðarī meacu pōecupe aru mūjare cadateiyūri, paredeca jēniaivū mūjare, mūje ñajocarājīyepe ayū mūje āmecoroiyede yūre. “Pablo jiducu jararī buojabebi ūi cuede majaque. Ūbenita ūi cuede joai majare jocarī, jidubecūva jararī buojaibi ūi toivaicōjeiyede apēcūre paperayocare majare”, ūbenina arīduivūbuya mūja. <sup>2</sup>Yūrecabu jararī buojayū mūjare jī cuede mūjaque máre. Que baru jēniaivū mūjare. Jarare ñabejarā yūre jī eaquiyede mūje yebai. Mūjacavū yópe arī, “Pablojā ñapiarī cōmajivūbu yópe ijāravūcavū Jesúre jū abevū, Espírītu Santore cūvabevū, ne ñapiarī cōmajīyepe. Que baru nápe ñarī cōmajivūbu Pablojā”, ūbenina arīduivūbuya. Ina nópe arīduivūre jaracūyūmu yū jāve.

<sup>3</sup>Jāve ñūjatamu ijāravūi cūrivū. Ūbenita ijāravūi cūrivūvacari, maucūvabevū ñūje mauvare yópe ijāravūcavū Jesúre jū abevū, ne maucūvaepe. <sup>4</sup>Yópe churarava ne maucūvaepe ne mauvare boaicaroveaque, nopedeca ñūja maucūvarivūbu ñūje arī ñapiarī coyūiyeque. Ūbenita arī ñapiarī coyūri majibevū ñūja pōeva ne arī ñapiarī coyūiyeque. Quénora Jūmenijicu ñūjare majide ñaibi ūi paruéque, ñūje coyūrājīyepe ayū ina ūre maucūvarivūre ūi yávaiyede jāvene, ne majinajīyepe ayū ūbenina ne arī

dápiayede. Ñuja, Jūmenijicui parure ðaimara ũi majiéque, jádovaivubu borocuede ñuje mauva ne ãmecoroyede ñujare. <sup>5</sup>Cainũma ina mujacavu “¿Meara márica apevu pũeno?” arĩduivu, “Jãve ãmevu”, ũbenina ne arĩduiyede Jūmenijicui yávaiye ména, pōeva ne coreóvabenajiyeye aivu Jūmenijicui majiéde, ñuja coyũvaivubu Jūmenijicui paruéque, jádovarajivu ũbenina ne arĩ dápiayede. Que teni yópe churarava ne vainí turĩ jēni jacoíyeye ne mauvare, ju are ðarājíyeye aivu náre ne baju jabocure, ũi cōjequiyeye aivu náre, nopedeca maje jabocu Cristore dápiaicōjene ðaivubu ñuja ñuje mauvare, ne ju arājíyeye aivu ũre ñuje coyũvayede Jūmenijicui paruéque. <sup>6</sup>Muje jádovarajiyede me ju aiyũvivure Jūmenijicure jaubevũva, ñájine ðarājaramu ñuja mujacavu caivure muje ju abedu.

<sup>7</sup>Muja jáivubu aipe ārōjarivure ñuje bajure. Ũbenita majibevu aipe ārōjarivure ñujare ñuje ũmei. Cũinácu mujacacu “Jãve yúbu Cristo jicu” ayu, coreóvajacurĩ ñujare máre Cristo jinare. <sup>8</sup>Ji coyuiyede ñuja Jesús ũi yávaiye méne beorĩ coyũicōjeimarava ñuje parué cũaede, yópe “¿Meara márica?” aivupe coyũyũvacari, yópe yure coyuiye jaubepe, ye cũyebecubu yu. Maje jabocu Cristo ñujare coyũicōjememi mujare ũi yávaiye méne, ñuje ðajocare ðarājíyeye ayu mujare muje ju aiyede ũre. Quénora ñujare coyũicōjeimi mujare diede, ñuje parure ðarājíyeye ayu mujare muje ju aiyede ũre. Que baru cũyebecubu yu ji coyuiyede. <sup>9</sup>Mujare cuavaiyubevu yu yo paperayo care ji toivaicōjeiyede apecure mujare parũrōreca. <sup>10</sup>Cũinácu muje jēneboi cücü, “Pablo paruéque majicayube majare yópe majicupe ũi paperayocare, ũi toivaicōjeiyede apecure. Ũbenita ũi cuede majaque parubecu majicarĩ bujabecube majare. Quénora coyũyube yópe majibecupe”, ũbenina arĩduibiya. <sup>11</sup>Ũbenita ñai que arĩduy coreóvajacurĩ iyede. Yúcapũravu cũináturureca coyũcũyumu mujare ji cuquiyede mujaque, yópe ji toivaicōjeiyeye apecure paperayocaque ji cuede joai mujare jocarĩ.

<sup>12</sup>Jãve ñuja cũináturupe teiyubevu ina muje jēneboi curivu “¿Meara márica maja apevu pũeno?” arĩ dápiavupe. Aru nápe paivu máre jēvari coyũiyubevu ñuja. Nácapũravu majibevutamu. Corevaicōjeivubuya ne ðaiyede yópe ne urōpe. Aru jēvari coyũivubu ne baju. <sup>13</sup>Ũbenita ñujacapũravu “¿Meara márica?” aivu baru, coyũjebu ñuje ðaiyede Jūmenijicui paruéque no joborōre quéno, árore ñujare memecaicōjeame ũre. Ñujare ũre memecaicōjeino mácarōre jocarĩ, ye arĩ coyũbejebu, yópe apevu ne coyuiyeye. Aru no joborō jĩvui cũrivubu muja, ñujare memecaicōjeinoi ũre. <sup>14</sup>Jūmenijicu ñujare coyũicōjeame mujare Cristo yávaiye méne mamarũmure caivu ne jipocai. Que baru ðabetecarã ñuja yópe ũi memecaicōjemeno ñuje copaiyede muje yebai. <sup>15</sup>Ñuja “¿Me ðaivu bárica maja?” arĩ coyubevu apevu ne ðaiyena, yópe ñuje ðájuroepe o ne Jūmenijicure memecaicōjeijoborō ñuje memecaicōjejurorōpe ũre, yópe apevu ne ðaiyeye. Quénora ñuja napini coreivubu mujare pũeno baju ju arājivure Jesúre, memecarājivu Jūmenijicure pũeno baju muje yebai, yópe ũre memecaicōjeino mácarōpe ñujare. <sup>16</sup>Nópe ðarĩburu yóboi, ñuja napini coreivubu, coyurĩ bujarājivu Jesús ũi yávaiye méne ũi meadaiyena pōevare apenoa ímaroai Corinto aepũravui, ároa pōeva ne jápiabenoai cãreja diede. No joborótamu máre Jūmenijicure memecaicōjeijoborō mácarō ñujare. Que teni, “¿Me ðaivu bárica maja?” arĩ coyũbenamu apecu ũi ðaiyena yópe ñuje ðájuroepe, yópe apevu ne arĩ coyuiyeye.

<sup>17</sup>Que baru yópe arī, toivaicōjenejaquemavu Jūmenijicu ūi yávaiyede: “Ácu pōecu ‘¿Jūmenijicure memecayu meacu bárica?’ arī coyuiyacu baru ūi baju, nópe arī coyubejacurī. Quénora ‘Meacu bajube maje jabocu cavarō mearocacu’, arī coyujacurī ū”, arī toivaicōjenejaquemavu Jūmenijicu. <sup>18</sup>Nai “¿Jūmenijicure memecayu meacu bárica?” ayure ūi baju, Jūmenijicucapūravu “Yure memecayu meacubu”, arī coyubecube. Ūbenita nai “Jūmenijicu yure cadateibi ji memecaiyede ūre” ayure, Jūmenijicucapūravu, “Yure memecayu meacubu”, arī coyucuyume.

**Pablo ūi coyuiño ina borocurivu Jesús ūi yávaiye méne beorī  
coyucōjeimarape teivure  
(Fil 4.15-18)**

**11** <sup>1</sup>Jápijarā ji coyucuiyede mujare caride. Ūvu muje napinajiyeye ayu yure ji coyucuiyede. Yu majicuvacari nai “¿Meacu bárica?” ayu ūi bajuma ārumecu bajure, nópe arī jauquiyebu yure, muje dajocabenajiyeye ayu ji coyuiye báquede mujare Jesús ūi yávaiye méne muje pueno baju jápiaiyue boje ape yávaiyede. Que baru napijara yure ji coyucuiyede. <sup>2</sup>Jūmenijicu yure tebutede daibi mujare, yópe ūmu ūi tebuteyeye mamaco bojuyore, “Mu cuvacyumu ōre mimarepacova” ūi arīburu yóboi cūinācu ūmure. Jípacu me jári coreibi mamacore, ōi cubecojiyeye ayu apescu ūmaque, jícyu ōre meaco bajure āmeno cubecova Jūmenijicui jáinore jímarepacu bacuyāre ne purubuoijāravu baquinói. Aru ōi járu apescu ūmure, jípacu jarajebu ōre. Nopedeca mujare coreóvare dacacu yu Cristore, muje curājiyeye ayu ūque cūinávape. Que baru mujare jíyuvu yu ūre āmeno cubevuva Jūmenijicui jáinore. <sup>3</sup>Jiduvu yu vaiquiyede mujare yópe vaiye báquepe Eva bácore. Yópe nai āda majicu ūi jujoyaiye báquepe ō mácore, ōi dāpiabecojiyeye ayu nurié, ōi āmeina tecojiyeye ayu, nopedeca apevu jujoyaiyurivubu mujare, muje dāpiabenajiyeye ayu nurié, muje āmeina tenajiyeye ayu, dajocarar muje ju aiyede Cristore aru muje memecaiyede ūre máre. Que baru jiduvu yu.

<sup>4</sup>Muja torojurivu napivubuya apevu coyuipeōeva eavure muje imaroi. Me jápiaiyurivubuya ne coyuiyede Jesúrā, coyuvureca apede ūra ji coyuiye báquede jaruvarī. Jacopuiyurivubuya apescu decocure ne daroiyūmure, daroiyurivureca apecure, nai Espiritu Santo ji darore daimu mácore jaruvarī. Ju aiyurivubuya ne bueyede Jesús ūi yávaiye méne, ne que aiyede ūbenina, buevureca apede ji bueiyé báquede jaruvarī. <sup>5</sup>Nácapūravu yópe Jesús ūi yávaiye méne beorī coyucōjeimarape teniduivubu. Aru ūbenina arī dāpiaivubu mearare ji pueno. Ūbenita yúcapūravu coreóvaivu iyede. Ne cāchinocacu āmevu yu. Aru ji pueno meara āmena na. Ūbenita nárecabu mujare jaboteivu. <sup>6</sup>Yu yávayu majibecuvacari meacamua yávaicamuaque, jāve me majivu yu Jesús ūi yávaiye méne. Mujavacari me diede coreóvaivubu, muje jápiaiyé báque boje ji coyuiye báquede aru muje jáiyé báque boje ji dāiyé báquede obedinumua.

<sup>7</sup>Apevu pōeva “Pablo āmeina teyube, ūi jacopuiyube boje muje tātuturare, ūi bueiyé boje yópe apevu bueipōeva ne dāiyeye”, ūbenina aivubuya. Ūbenita ye āmeina tebevu yu, ji jacopube boje tātuturare, ji bueiyé boje Jūmenijicui yávaiye méne. Quénora yópe muje cāchinocacupe teni, memecacu ji puruáque, ini bojedacuyu yure jauéde. Que teni coreóvare

đacacu mujare bojecubeda Jesús ũi yávaiye méne, ũi meadaiyede mujare muje ũmei bojecubeda. Que teni mujare yópe ji puenocavupe tede đacacu, mujare memeiye jaube boje, muje jíbenaiyiyepe ayu yure jauéde. <sup>8</sup> Aru ji cue báquede muje ímaroi, buecuyn mujare, jacopucacu apevu Jesúre ju aipōevare, apeno ímaroi cójijivaivure, ne tātuturare, íni bojedacuyun yure jauéde. Náre bojedaicōjecacu yure, náre memecabecuvacari, memecacuyun mujare bojecubeda. <sup>9</sup> Ji cue báquede mujaque, apenũmua yure jauteavũ. Ũbenita ye apejiene jēniametecacu mujacacu cūinácure. Quénora Macedonia āmicurijoborōcavu majevu, ne ju aiye boje Jesúre, ne daroimara mácavu edaivu bácavu muje ímaroi, jíma yure ne jíyede, ji íni bojedaquiyeyepe aivu yure jauéde. Que baru dinũmu mácarōre cārijovametecacu mujare, yure jaué boje. Aru mujare ye cārijovamecuyumu apenũmua máre, yure jaué boje. <sup>10</sup> Meavu ji dápíaru ji coyure nuiyede bojecubeda Jesús ũi yávaiye méne cainoa ímaroa, Acaya āmicurijoborōcarōare. Yu coyuyubu mujare yávaiyede jāvene. Yu Cristo jicubu. Que baru borocubevu yu. <sup>11</sup> Ji que coyuiye boje, “Pablo ñujare ũbebi” ũbenina arí dāpiabejarā muja. Jāve uvu mujare. Jūmenijicu me coreóvaibi yure pare ucure mujare.

<sup>12</sup> Yúcapũravu đare nuquijivu yópe ji đarí cōmajiye báquepe, muje coreóvarājiyepe ayu borocurivure ina muje tātuturare jacopuivure, ne bueiye boje “Pablo memeuñume ñujapedeca”, ũbenina ne aiyede. <sup>13</sup> Nárecabu “Ñujatamu Jesús ũi yávaiye méne beorí coyucicōjeimara” ũbenina aivu. Ũbenita Jesús ũi yávaiye méne beorí coyucicōjeimara jāve āmema. Quénora pōevare jujovaivubu. Ne bajumia jáđovariduivubu yópe Jesús ũi yávaiye méne beorí coyucicōjeimarape. <sup>14</sup> Ne que teiyede, cuavaiye jaubevu majare, Satanás ũi teiye boje. Satanávacari ũi baju majibi jáđovañu meacupe, yópe ángelepe. <sup>15</sup> Que baru cuavaiye jaubevu majare Satanáre memecaipōeva, ina “Ñujatamu Jesús ũi yávaiye méne beorí coyucicōjeimara” ũbenina aivu, ne jáđovaiyede yópe mearo đavupe. Ũbenita Jūmenijicu ñājine đacuyume ina jujovaivure yópe náre ñājine đaiye jauépe, ne que đaiye báque boje.

**Pablo “¿Meacu b́arica?” ũi aino ārũmecupe, Corintocavu ne coreóvarājiyepe ayu Jesús ũi yávaiye méne beorí coyucicōjeimarape teivure**  
(Hch 9.23-25; 14.5, 19; 16.22-23)

<sup>16</sup> Bedióva cojedeca jēniaivu mujare, muje arí dāpiabenaiyiyepe ayu yure ārũmecure. Ũbenita “Pablo ārũmecubebu” arí dāpiaivu baru, jápiajarā ji coyuyiyede. Yure máre, yópe ina “Ñujatamu Jesús ũi yávaiye méne beorí coyucicōjeimara” ũbenina aivu, arí dāpiaivu ji puenocavu ne coyuiyepe coyucicōjejara yure, “¿Meacu b́arica?” ji bajuma ji auiyepe aivu. <sup>17</sup> Maje jabocu Jesucristo iyepe paiye coyuiyede ye coyubejebu. Aru yure máre coyucicōjememi. Quénora yávacari coyuyubu yópe ārũmecu ũi coyuiyepe. <sup>18</sup> Nore muje yebare, “¿Meara ḿarica?” arí coyuvubuya ne bajumia, pōeva ne coreóvarājiyepe aivu ñamejare aru aipe ne đaiyede ijāravui. Que baru yu máre quédeca arí coyuyubu. <sup>19</sup> Mujarecabu me majidivu muje dápíaru. Que baru torojũrivu jápiadavũ ārũmevure. Aru ne coyuiyede napiyavu muja. <sup>20</sup> Muja napiyavu ina mujare đaicōjeivure yópe ne cōjeimara majurórivupe paivure. Napiyavu ina ívure muje cavaede, aru ina jujovaivure mujare. Napiyavu ina āmeina jáivure mujare, “¿Parũrivu b́arica ñuja ne pueno?” arí

dápiavure mujare yópe ne cāchinocavure. Aru napiyavu ina jara boavure muje jijecamure máre. <sup>21</sup> Ji parube boje, ne nópe daiyepe đabetecacu mujare. Ubenita ji pueno náre me jápiadavũ muja. Que baru cuyevu yu, ji parube boje.

Põeva “¿Meara márica?” aivu ne bajumia ārumevureca Jūmenijicu jáinore, ina jidubevuvu nópe aru, yu máre jidubecuvu nópe coyuyubu. <sup>22</sup> Návacari “Hebreovatamu ñuja. Que baru judíova bajutamu aru hebreo āmicuricamua yávaicamuare yávaivubu” aivureca, yu máre napedecabu. Návacari “Israel bácu pāramenacavubu ñuja” aivureca, yu máre napedecabu. Návacari “Abraham mácu pāramenacavubu ñuja” aivureca, yu máre napedecabu. <sup>23</sup> Aru návacari “Cristore memecaivubu ñuja” aivureca, yu ne pueno memecayubu Cristore. Ubenita yópe ārumeçupe yávayubu, que ayu.

Memecacu yu ne pueno. Jabova jēni jacoima yure āmeina teivure jēni jacoĩnami jívui obedinumuare, ne pueno. Jabova jara popeicōjeima yure obedinumuare, ne pueno. Yainíducacu yu obedinumuare ne pueno. <sup>24</sup> Coyuyubu mujare iye ji yainíduye báquede. Cūinápurupe painumua baju ina judíovai jabova jara popeicōjeima yure ne treinta y nueve baju jara popeiyede ne boaime āimacajeque đaimeque. <sup>25</sup> Yóbecurinumua baju ina Roma āmicurō jaborōcavui jabova jara popeicōjeima yure jaradoque. Cūinára pōeva cūraboaque đavarĩ boarĩ jaruvaiyuríduima yure. Yóbecurinumua baju jiadocũ uracũ ji nuicũ mácārō corĩ bĩjaiye báque boje, cútecacu yu jia uradaĩ, aru cūinára jorĩ, nurĩ coreni, mautecacu cūināñamine aru cūinájravure máre. <sup>26</sup> Apenumuare cucunucacu yu joai, coyucuy Jesúš ũi yávaie méne obedĩmaroai. Aru ji cucunuiyede, ñájacacu pare. Apenumuare bejarĩ bĩjariducacu ji jataríduiyede jia yaboiyede. Apenumuare tatorĩ ñavaipōeva ji cúaede ĩni ñavaríduima. Apenumuare apevu ji pōeva, judíovacavu, āmedaima yure. Aru apenumuare ina judíova āmevucavu āmedaima yure. Apenumuare ji cuede ĩmaroai, apenumuare pōecubenoĩ, aru apenumuare jia uradaĩ máre ñájacacu yu. Aru pōeva ũbenina “mũ, ñujecu”, borocurivũ arĩ, Jesúre ju aipōevape teni, na máre āmedaima yure. <sup>27</sup> Apenumuare pare memecacu yu pũ uetuyu baju, eacuyũ tauturare, bojedacuyũ yure jauéde. Obedinumuare cāmetecacu, ji memeiye boje. Ávué ijiteavũ yure aru cūinóavu yure máre. Apenumuare āiyede cuvabetecacu. Apenumuare ji curĩñamine cuvabetecacu. Aru apenumuare cuitótecaje jauteavũ yure.

<sup>28</sup> Aru apede máre ñájacacu yu. Ubenita caiye iye pueno, jāravua coapa ñájivaivu yu, ji cārĩiye boje cainoa ĩmaroacavu Jesúre ju aipōeva cōjijivaivure. <sup>29</sup> Cūinácũ nácacu ũi parubedu ũi ju aiyede Jesúre, chíori vaivu yu pare. Aru cūinácũ nácacu apecu jujovaimũ mácu āmeina tedu, yúvacari cārĩjini ñájivu pare.

<sup>30</sup> “¿Meacu bárica?” yure aye jauu ji bajuma, arĩ coyuiyubevu yópe parucupe. Quénora coyuiyuvu, muje majinaiyepe ayu yure parubecure ji bajuma. <sup>31</sup> Maje jabocu Jesucristoi mearore jímũ, jípacu máre, majibi jáve ji coyuiyede. Ure mearore jíye jauvu majare cainumua. <sup>32</sup> Javede Jūmenijicu jáđovame yure parubecure ji bajuma. Damasco āmicurĩmaro no joborōcarōre ñai jabocu Aretas ne aimũ jaboteame. Apecure jaboteicōjequemavu ina Damascocavure. Ñai jabocu, Aretai epeimũ, coreicōjequemavu jáipōevare ĩmaro jedevacobeai, ne jēni jacorídurājiyepe ayu yure. <sup>33</sup> Ubenita ji yóvaimara, yure cadateipōeva,

epeima yure pue urapue jívui. Aru no biaido tarabu jáicobei émeóvaima yure pu joboróita biaido apepuravui, ji dupini nuquiyepe aivu ñai jabocure jocarí.

**Pablo ñi jáino mácarō yópe decoboainope**

**12** <sup>1</sup>Pōecu “¿Meacu bárica?” ayu bojecubecupe páyube úre aru apevure máre. Ëbenita muje jápiaye boje ina jujovaiyu ne coyuiyede yávaiyede jáve ámene ji coyuiye pueno Jesús ñi yávaiyede jávene, ji bajuma coyuiye jauvu yure. Ina bueipōeva borocurivu “¿Meara márica ñuja apevu pueno?” adama, ne jáiye boje yópe decoboainope. Que adama na. Que baru yu máre coyuijivü mujare maje jabocu Jesucristoi járe ðaiye báquede yure yópe decoboainope aru ñi coreóvare ðaiye báquede yure máre, ñi majiéquede. <sup>2</sup>Cüinácu ñmü, ji coreóvaimü, Cristoque cucu cüinávupe, jáme yópe decoboainope catorce paíjuua jipocamía. Yópe apecu bajarócupe coyuyubu ji bajuma, ji cuyeie boje. Dinümü mácaróre Jümenijicu nuvame yure pu cavarō mearo ñi curōi, yóbecurítucubaíta, mñjina ne vuitucubu aru aviávai curitucubu puenoi. Yure nuvañu mácu baru ji bajuque o ji ñmeque, majibevü yu. Jümenijicu cüinácuva majibi. <sup>3-4</sup>Majivü yu yure ñi nuvaimü mácupe pu Paraíso ámicurō cavarō mearocaróita. Nore jápiacacu yu yávaiye me bajure, maja pōeva maje yávaicamuaque ye yávarí buojabevü diede, aru Jümenijicu yure yávaicōjemeteame diede. Bedióva coyuyubu mujare, yure ñi nuvaimü mácupe majicuvacari, ji bajuque o ji ñmeque majibevü yu. <sup>5</sup>“¿Meacu bárica?” arí coyuijivü no boje, ji jáino mácarō decoboainope boje. Ëbenita ape vaiye báquede yure ji bajuma “¿Meacu bárica?” arí coyubequijivü. Ji bajuma arí coyuijivü ji parubede. <sup>6</sup>“¿Meacu bárica?” arí coyure nuíyacu baru ji bajuma, ji apede jáiye boje yópe decoboainope, árumecupe tebejebu, caiye ji coyujuroe jáve boje. Ëbenita diede coyubequijivü. Mujare me jáicōjeniduiyubevu yure, ji jáiye boje yópe decoboainope.

Quénora mujare me jáicōjeiyuvü yure, muje jáiye boje ji ðaiyede aru muje jápiaye boje ji coyuiyede. <sup>7</sup>Ji arí dápiabequiyupe ayu meacure caivu pueno, caiye iye me bajure Jümenijicu coreóvare ðaiye báque boje yure, Jümenijicu yure ñai abujuvai jabocu Satanáre ñájine ðaicōjeimi. Satanás ñájine ðarí cãrijovavaibi yure yópe miuyo jëiyupe ji bajui. <sup>8</sup>Yóbecurínümüa jëniacacu maje jabocu Cristore, ñi ðajocare ðaquiyepe ayu iye ñi ñájine ðaiyede yure. <sup>9</sup>Ëbenita yópe arí, coyúame: “Dajocare ðabecubu yu mi ñájiyede iye parubede ðaiyede mure. Quénora cainümüa parure ðacuyumu mure ji mearo ðacaiyeque bojecubeda ji me boje. Que teni ye jaubequiyebu mure cainümüa. Mátamu cucu ye parubecu, yéde ðaiye majibecu. Dinümümareca yúvacari jádovañumu ji parué majiéde, cadatecyu mure”, áme maje jabocu Cristo. Que baru yu torojucu baju “¿Meacu bárica?” arí coyure nuquijivü pueno baju, ji parube boje ji bajuma, cuvacyu Cristoi parué majiéde, apevu ne járajiepe ayu diede. <sup>10</sup>Aru, “Meavu” ayubu, torojucu máre yure ijiéde, apevu yure ne ámeina yávaiyede, yure jauéde, apevu yure maucuvári ne ñájine ðaiyede yure, aru ji cãrijiyede. Caiye iye ámeno vaiyede yure Cristo jicu bae boje, “Meavu yure” ayu, torojuvü yu. Ji parube boje, majivü Cristo cadateyure yure ji ðaiyede ñi parué majiéque.

**Pablo ñi cãrijino Corintocavu Jesúre ju aipōevare boje**

<sup>11</sup>Ji nópe toivaicōjeiye boje apecure, árumecupe teivu yu. Ëbenita jauteavü yure, muje jápiaye boje ina Jesús ñi yávaiye méne beorí coyucōjeimarape

tenidivũ ne borocurĩ coyuiyede Jesús ñi yávaiye ména aru yurã máre. Ñamene yure aru yéde ji paruéde coyuiye jaurĩduavũ mujare. Ubenita muje coyube boje, coyuiye jauteavũ yure ji bajuma. Na “Pablo bojecubecube”, ubenina ávaivubuya. Ubenita yũ bojecubecuvacari, ye ne cāchinocacu āmevu yũ. Aru ji pueno meara āmema na. <sup>12</sup> Ji cue báquede mujaque Jūmenijicu yure dare dāme pōeva ne jámene, ne darĩ majibede, aru ape paruéque daiyede máre, jádovacuyũ yure jáve Jesús ñi yávaiye méne beorĩ coyucōjeimũ bajure. Caiye iye ji daiyede napini đacacu yũ. <sup>13</sup> Yũ āmevu apevu ne cāchinocacu. Quédeca mujacapuravu máre āmevu apevu Jesúre jũ aipōeva cójijivaivũ ne cāchinocavu ji jáinore. Mearo đacaiyede ye đabetecacu yũ pueno baju apevure boje muje pueno. Jáve jēniametecacu muje tātuturare, yópe ji jēniaiyepe apevu Jesúre jũ aipōeva cójijivaivure. Ubenita, “Pablo ñujare āmeina jáñumebu”, ubenina arĩ dāpiabejarã muja. Muje ubedu ji jēniamē máquede muje tātuturare, chĩori jēniañumu muje ārumenajiyepa ayũ diede.

<sup>14</sup> Javede puque jácunucacu mujare. Aru caride meadayubu ji cuvede, jácunucuyũ mujare bediōva cojedeca. Aru yópe jipocai ji đaiye báquepedeca, jēniamecuyũmu muje tātuturare. Muje cūvaede cūvaiyubevu yũ. Quénora cūvaiyuvũ yũ mujare Cristo jinava. Mujarecabu yópe jimarape yure. Ubenita mamara āmevurecabu bojedacaiyvũ nébucuvare ne ārajiyeva. Quénora nébucuvarecabu bojedacaiyvũ nēmarare ne ārajiyeva. Que baru yũ jacopuiyubevu muje tātuturare. <sup>15</sup> Yũ torojucu baju jícuyũmu caiye ji cūvaede aru ji bajure máre, cadatecuyũ mujare, ji ne boje mujare. Ubenita mujare pueno baju urre nuñureca yũ, mujacapuravu ji jáinore quĩjino baju urre nuivubu yure.

<sup>16</sup> Apevu mujaque curivũ, yópe arĩ, āmecorovaivubuya yure: “Jāve Pablo jēniamemĩ ñuje tātuturare. Ubenita jujovarĩ ññume ñuje tātuturare majibevũva”, ávaivubuya. <sup>17</sup> ¿Aipe đarĩ mujare jujovarĩ, ññũ buojari yũ muje tātuturare? ¿Muje dāpiaru, ina ji jaroimara māvavure jujovaicōjeari mujare? <sup>18</sup> Titore jēniacacu parurōreca, ñi nuquiyepa ayũ muje yebai. Aru jarocacu apescu majecu Jesúre jũ aipōecure úque. ¿Muje dāpiaru, Titojã jujovarĩ mujare? Muja me majidivubu jáve Titojã jujovabevu bācavure mujare. Me majivu yũ náre, yupedeca, cainumua mearore dāpiaivure aru mearore đavure máre. Que baru ñuja ye jujovabevu mujare.

<sup>19</sup> Caiye iye ji toivaicōjeiyede apecure mujare jári boroteivũ bācavu dāpiabejarã muja coyuyure ñuje daiyede, muje arĩ coyurājiyepe ayũ “Meavũ” o “Meamevũ”. Muja āmevurecabu coyurājivũ méne o meamene ñuje daiyede. Quénora Jūmenijicurecabe coyucuyũ diede ñujare. Ubenita caiye iye ji toivaicōjeiyequa apecure coyuyubu yũ Jūmenijicui jáinore, ji cue boje Cristoque cūinávũpe, muje parure nurajiyepa ayũ muje ũmei. Que baru muja, jívũ, caiye ñuje daieque cadateiyurivubu mujare. <sup>20</sup> Jiduvũ yũ ji copaidaquiyede muje yebai, apevu mujacavu đabevu bārājivure yópe mujare jauépe. Apevu jararĩ pare ādamateiyurājichuma. Aru apevu tebutenajichuma. Apevu jijatenaichuma ubenina. Apevu đarājichuma ne baju urōpe dāpiabevũva mearore o āmenore apevure. Apevu coyurājichuma āmenore caivũ ne jápiaiyede apevui borore. Apevu yávarājichuma jápiaibenoi āmenore apevui borore. Apevu “¿Meara mārīca apevu pueno?” arĩ dāpiarājichuma. Aru apevu maucuvarĩ, cārijovari, boaiyurājichuma apevure.

Mujacavü ne nópe ðaru, ji copaidaquiyede torojubecuyumu yu. Aru muja máre torojubenajaramu, ji jararí ñáline ðaquiye boje mujare, muje nópe ámeina teiye boje. <sup>21</sup> Jiduvü yu ji copaidaquiyede muje yebai Jümenijicu ji mearore jímü cüyoje tede ðacuyure yure bediöva cojedeca muje jáinore. Apevü mujacavü curivubuya muje ámeümeque. Apevü mujacavü ámeina ðarí curivubuya apevüque némarebucüva ámevüque. Aru apevü mujacavü caino ámenore ðaivubuya. Nópe teni ámeina teima javede. Aru chiomeni oatuvabenama cáreja ne ðaiyede. Quénora ámeina tede nuivubuya. Chiomeni oatuvabedu ji ðaquiye jipocai, chñori ocuyumu yu pare, náre boje.

**Pablo üi majicaino aru meaicöjeino Corintocavure**

(Mt 18.16)

**13** <sup>1</sup> Ji eaquiye bu cari yóbecue ji eaiye jácunuiyede muje yebai. Yópe arí, toivaicöjenejaquemavü Jümenijicu üi yáva iyede: “Ñai póecu apevü ne boro coyurí adaimü maru, ‘Ámeina ðayube’ aivü baru üi borore, pucarä o yóbecurä o apevü máre majidivü bácvü üi ámeina ðaiye báqueda boro coyuiye javü náre üi borore”, arí toivaicöjenejaquemavü. <sup>2</sup> Ji eaquiye jipocamia muje yebai bediöva cojedeca, paruröreca coyuiyuvü mujare yo paperayocaque ji cuede joai mujare jocarí. Ji cari eaquiyede napimescva jáve jararí ñáline ðacuyumu caivü mujacavü ámeina ðare nuivure. Javede, ji puque cue báquede mujaque, quédeca coyucacu paruröreca mujare. Coyucacu mujacavü ámeina ðaivure ji eaquiye jipocamia aru caivü apevure máre. <sup>3</sup> Mujarecavu jëniavü ji jádovaquiyepa aivü yure Cristoi coyucöjeimü bajure. Ji eaquiyede jádovacuyumu jáve baju ji cüvaede Cristoi paruéde. Ürecabe parubecu ámecü. Quénora parucü bajutame. Que baru parure ðacuyume yure muje jëneboi, ji ñáline ðaquiyepe ayu üre ju aipöeva ámeina ðarí cömajivure. <sup>4</sup> Cristo jádovamecü bácvacari üi paruéde ne pëvari boarí jaruvaiye báquede üre jocucujaravena, caride apucu cubi Jümenijicui paruéque. Üpedeca ñuja üi yáva iye méne beorí coyucöjeimara, úque curivü cüinávpe, parubevüvacari, jádovarajaramu üi paruéde ñuje cüvaede, ñuje ñáline ðaräj iyede mujacavü üre ju aipöeva ámeina ðarí cömajivure.

<sup>5</sup> Jári corevajarä muja coapa muje baju, jádovarajivu ju are nuivure maje jabocu Jesucristore dajocabevüva o üre ju aiyede dajocavü bácvure. Me dápíarí corevajarä muje bajumia. Que teni coreóvaräjaramu curivure Jesucristoque cüinávpe, üre ju aivü baru. Übenita üre ju abevü baru, coreóvaräjaramu cubevure úque cüinávpe. <sup>6</sup> Muje coreóvaräj iyede curivure Jesucristoque cüinávpe, coreóvaräjaramu ñujare, mujare coreóvare ðaivü bácvure, üi yáva iye méne beorí coyucöjeimara bajure. <sup>7</sup> Ñuje earäj iyede, mujacavü ámeina ðarí cömajivu baru, muja coreóvaräjaramu ñujare Jesús üi yáva iye méne beorí coyucöjeimara bajure, ñuje ñáline ðaräj iye boje náre Cristoi paruéque. Übenita ñuja jëniavü Jümenijicüque, muje ámeina ðabenajiyepa aivü. Muje ámeina ðarí cömajibedu, ñamene ye ñáline ðabenajaramu ñuja paruéque. Ñuje paruéde jádovamenu, “Jesús üi yáva iye méne beorí coyucöjeimara ámemä”, übenina arí dápíaräjichvü muja ñujare. Ye baju ámevü ñujare. Pare urivübu ñuja caiye pueno, muje mearore ðaräj iyepa aivü.

<sup>8</sup> Pöeva ne mearore ðaiyede, ðaivübu yópe Jümenijicui ðaicöjeiyepe üi yáva iye jáveque. Aru Cristo ñujare jádovaicöjememi üi paruéde, ñuje

ãmeina ðarãjiyepe ayu ina yávaiyede jávene ðaipõevare. Quénora ñujare jádovaicõjeimi ñi paruéde, ñuje cadatenajiyepe ayu náre. <sup>9</sup>Muje mearore ðaiyede, parure nuivubu muje úmei. Aru mujare ñájine ðaiye jaubevu ñujare. Que baru ñuja buojabenamu jádovaivu iye paruéde, Cristoi cuvare ðaiyede ñujare. Aru parubevupe teivubu muje jáinore. Ubenita parubevuvacari, torojavu ñuja, muje parure nuiye boje muje úmei. Aru cainumua jëniavaivubu Jümenijicuque, ñi parure nure ðaquiyepe aivu mujare muje úmei, pu mujare ye jaubeta.

<sup>10</sup>Yo paperayocare toivaicõjeivu apecure mujare ji cuede joai mujare jocarí, muje meatenajiyepe ayu muje ðaiyede, ji eaquiye jipocamia muje yebai. Que tedu, mujare ñájine ðaiye jaubequiyebu yure, yópe Cristoi ðaicõjeiyepe yure caivu úre ju aipõevare ãmeina ðarí cõmajivure. Ürecabe parure ðabecu ñujare, ñuje chõre ðarí, ðajocare ðarãjiyepe ayu põevare ne ju aiyede úre. Quénora parure ðaibi ñujare, ñuje torojure ðarí, parure ðarãjiyepe ayu náre ne ju aiyede úre.

<sup>11</sup>Muja, jívü, quénoramu caride. Meatejarã muje ðaiyede. Aru cainumua püeno baju mearore ðare nujara muja. Me jápiarí ju ajarã ji coyuiyede mujare. Cüináturu muje úme me cüjarã caivu muja cüináturu. Cãrijimenoque me cüjarã muja. Que ðaru, Jümenijicu, ñai majare ucu aru majare cãrijimenoque cure ðayu, cucuyume mujaque. <sup>12</sup>Me jacoyujarã muja mujevure muje jivare nuri, muje Jümenijicu jina mae boje. <sup>13</sup>Caivu Jesúre ju aipõeva yore curivu meaicõjedama mujare. <sup>14</sup>Maje jabocu Jesucristo mearo ðacajacurí mujare bojecubeda ñi me boje. Majepacu Jümenijicu, mujare ucu, ure ðajacurí mujare. Aru ñai Espíritu Santo yóvajacurí mujare cüinávure. Quénoramu.

# Gálatas

Mamabuínore coyuiyebu Pablo bácu ùi toivaicōjeiye báquede paperayocare Galacia āmicurijoborōcavu Jesúre ju aipōevare. Pablo bácu judíovacacu bácuvacari, Jesús ùi yávaiye méne beorí coyucōjeimu marejaquémavu, coyucuy ùi yávaiye méne judíova āmevure, judíova ne ju abe boje ùi coyuiyede. Lucas bácu coyurejaquemavu Pablo bácu borore Hch 7:57-8:1, 9:1-31, 13:1-28:31, aru ùi cuede Galacia āmicurijoborói Hch 13-14, 16:1-7. Apevu ne dāpaiyepe, Pablo bácu toivaicōjenejaquemavu iyoca paperayocare āniuju bácarōre 48 d.C. ùi cuede Antioquía āmicuríimaro Siria āmicurijoborōcarói. Ubenita apevu ne dāpaiyepe, ù mácu toivaicōjenejaquemavu diyocare āniuju bácarōre 52 d.C. puque ùi cucunuiyede, coyucuy Jesús ùi yávaiye méne, ùi cuede Corinto āmicuríimaroí. Aru apevu ne dāpaiyepe, ù mácu toivaicōjenejaquemavu diyocare āniuju bácarōre 56 d.C. yóbecue ùi cucunuiyede, coyucuy Jesús ùi yávaiye méne, ùi cuede Éfeso āmicuríimaroí. Pablo bácu coyurejaquemavu úre toivacaipōecu bácuire aipe ùi toivacaquiye báquede diyocare (Gá 6:11).

Diyocaque Pablo bácu jádovarejaquemavu ù baju Jesús ùi yávaiye méne beorí coyucōjeimure. Aru coyurejaquemavu pōeva ne boropatebenajiye majibede Jūmenijicui jáinore ne ðaiye boje yópe ðaicōjeiyepe. Coyurejaquemavu pōeva yópe boropatebevape Jūmenijicui jáinore ne ju aiqueque Jesucristoi ðaiye báquede ùi yaiyede jocucujaravena náre boje. Coyurejaquemavu pōecu cubecure ðaiye majicu yópe boropatebecupe ùi bajure Jūmenijicui jáinore.

## Pablo ùi meaicōjeino Galaciavure

(Mt 20.28; Mr 10.45; 1 Ti 2.6; Tit 2.14)

**1** <sup>1</sup>Yu, Pablo, Jesús ùi yávaiye méne beorí coyucōjeimutamu. Pōecu āmemi beorí daroyu yure epecuy Jūmenijicui yávaiye méne coyupōecuva. Quénora Jesucristorecabe, majepacu Jūmenijicunque, ñai nacovañu mácu Jesucristore yainore jaruvari, epeyu bácu yure coyucuyuva ùi yávaiye méne. <sup>2</sup>Yu aru caivu majevu, Jesúre memecaivu yúque curivunque, meaicōjeivubu mujare, Jesúre ju aipōeva cójijivaivure cójijijnāmaiai Galacia āmicurijoborói. <sup>3</sup>Majepacu Jūmenijicu, maje jabocu Jesucristomaque, mearo ðacajacurí mujare bojecubeda ùi me boje. Aru torojurí cure ðajacurí mujare cārijimevuvu. <sup>4</sup>Jesucristo, ju arí majepacu Jūmenijicure, ðarejaquemavu yópe Jūmenijicui urōpe. Que teni ùi bajuma yaidéjaquemavu, maje boropatebenajiyepe ayu maje āmeina teiye boje, meadacuy mujare, maje āmeina tebenajiyepe ayu yópe apevu ijāravucavupe. <sup>5</sup>Que baru mearore jínajarevu Jūmenijicure cainumua. Quédecabu.

**Cūinárora Jūmenijicui meadaino pōevare**

*(1 Ts 2.4)*

<sup>6</sup>Cuecumari jáivu yu muje daiyede. Maumejiena dajocaivubuya muja Jūmenijicure, ñai cutuyu bácuere mujare ũ jiña márajivuva Cristoi mearo ñacaiye báquede mujare ũi yayiede majare boje. Ũre dajocarĩ, ju aivubuya muja ape yávaiyede, Jūmenijicui yávaiye méne jaruvarĩ. <sup>7</sup>Ũbenita ape yávaiye me cubevu. Cūinároramu cuvũ: Jesucristo majare meadayube. Coyuyubu mujare diede, apevu pōeva ne bueiye boje apeno bueinore. Que teni cārijovaivubuya mujare. Aru oatuvaiyurĩduivubuya iye yávaiye méne, Cristoi meadaiyede majare. <sup>8</sup>Ũbenita ácu pōecuĩ coyuru mujare ape yávaiyede iye yávaiye méne ñuje mujare mamarumure coyuiye báquede jaruvarĩ, aru “Coyuyubu mujare Cristoi yávaiye méne” ũi aru ũbenina, Jūmenijicu ñájine ñajacurĩ ũre toabo cūiméboi cainumua. Ye baju ámevu yávacarĩ ji coyuru o ángele cūinácũ Jūmenijicui curōcacuvacarĩ ũi coyuru ape yávaiyede, ñájine ñajacurĩ Jūmenijicu ñujare máre. <sup>9</sup>Javede coyucacu mujare diede. Aru caride máre coyuyubu diede mujare, Jesucristore ju aivure, cojedeca: Ácu pōecuĩ coyuru mujare ape yávaiyede, iye Cristoi yávaiye méne jaruvarĩ, Jūmenijicu ñájine ñacuyume ũre toabo cūiméboi cainumua. <sup>10</sup>Ji nópe coyuiye boje, coreóvaivubu muja jáve pōeva ne me jáiyede vobecure. Quénora jáve voyubu Jūmenijicu ũi me jáiyede yure. Jáve buebevu yópe pōeva ne urōpe. Quénora bueivu Jūmenijicui urōpe. Yu bueyu baru pōeva ne urōpe, memecabejebu Cristore.

**Pablo ũi coyũino Jesũi coyucōjeiyede ũre ũi yávaiye méne**

*(Hch 8.3; 9.3-6, 26-30; 11.30; 15.2; 22.3-10; 26.9-11, 13-18)*

<sup>11</sup>Muja, jívũ, uvũ yu muje coreóvayiede iye Jesús ũi yávaiye méne ji coyuiyede pōeva ne dápiayie ámene. <sup>12</sup>Pōecu cubebi coyuyu bácu yure diede. Aru pōecu cubebi bueyu bácu yure diede. Quénora Jesucristovacari coreóvare ñarejame yure.

<sup>13</sup>Javede mujavacarĩ jápiadavũ ji borore, ji ñaiye báquede yópe caivu judíovape, ji ju aquiye jipocamia Jūmenijicure. Jūmenijicui pōeva Jesúre ju aivure kujurĩ, boarĩ, ñájine ñayu barejacacu yu cōmaje ároje jámecuva. Coavaiyurĩduyu barejacacu yu ne cójijiyede, ne dajocarājiyepe arĩduyu ne ju aiyede Jesúre. <sup>14</sup>Aru ji mearore jíye báquede Jūmenijicure yópe caivu judíovape, ñare ñurejacacu yu apevu judíova pueno, ina pōeteivu bácuvere yáque. Que baru ne pueno ju arĩ, ñare cuyu barejacacu iye ñaicōjeiyede ñujeñecuva mácavu ne bueiye báquede némarare aru népāramenare máre.

<sup>15</sup>Ũbenita nópe ñayu bácuereca, Jūmenijicucapũravũ yópe ñacarejaquemavũ yure. Beorejaquemavũ yure ji pōetequiye jipocamia. Aru cuturejaquemavũ yure, ũi pare ne boje pōevare, ji memequiyepe ayũ áque. <sup>16</sup>Coreóvare ñarejaquemavũ yure mamacure, Jesucristore, ji coyũquiyepe ayũ ũi yávaiye méne ina judíova ámevure. Que baru Jūmenijicui coreóvare ñarĩburu yóboi yure mamacure, ñamene jēniari jámenejacacu aipe ñaiye jaurōre yure. <sup>17</sup>Cūiná Jerusalén ámicurĩmaroi jácũnumenejacacu yu ina ji jipocai Jesús ũi yávaiye méne beorĩ coyucōjeimarare, buecuyũ náque. Quénora cūiná ñurejacacu yu Arabia ámicurĩjoborōi, copaidacuyũ cojedeca nore jocarĩ Damasco ámicurĩmaroi.

<sup>18</sup> Ñbenita yóbecuriñjua vainíburu yóboita, nurejacacu yu Jerusaléi, Pedrorre jácññu. Cñrejacacu ñque pucasumana bajura. <sup>19</sup> Aru apevu ina Jesús ñi yávaiye méne beorí coyucójeimarare jámenejacacu yu dinumure. Quénora járejacacu yu ñai Santiagore, maje jabocui yócure. <sup>20</sup> Iye ji coyuiye jávetamu. Borocubecuva coyuiyu yu diede mujare Jñmenijicui jáinoi.

<sup>21</sup> Aru ji nuriburu yóboi Jerusaléne jocarí, nurejacacu yu Siria aru Cilicia ñmicurijoboróai. <sup>22</sup> Ina Jesúre ju aipóeva cójijivaivu ímaroa coapa Judea ñmicurijoborócvu jámenequemavu yure cäreja dinumure. <sup>23</sup> Quénora jápiarejaquemavu ji borore, yópe aiyede: “Ñai cujurí boarí ñájine ñayü bácu Jesúre ju aipóevare javede, ne dajocaräjiyepe aríduyu ne ju aiyede Jesúre, caride coyuyube Jesús ñi yávaiye méne, póeva ne ju aräjiyepe ayu ñre”, arejaimada náre yurä. <sup>24</sup> Que baru mearore jídejaquemavu na Jñmenijicure, ñi mearo ñare ñaiye boje yure.

**Apevu Jñmenijicui yávaiye méne beorí coyucójeimara  
ne me jáino Pabloi memeinore**

**2** <sup>1</sup> Catorce pañjua vainíburu yóboi, nñcacu yu cojedeca Jerusaléi. Bernabé yóvame yure. Aru nuvacarä Titore máre. <sup>2</sup> Nñcacu yu Jñmenijicui jáñovaiye boje nñiye jauróre yure noi. “Ji bueiye báque, aru caride ji bueiye, póevare ñbenina bíjaquijichñvu, jabova ne ñbedu ji bueiyede”, arí ñápiacacu yu ji baju. Que baru cójijicacu yu Jesúre ju aipóevai jabovaque, coyucñyu náre Jesús ñi yávaiye méne ji bueiyede judíova ñnevure, majicñyu méne o ñmene ji bueiye. <sup>3-4</sup> Aru apevu póeva buraicójeiyuríduquemavu ji yóvaimu Titore ñi cajede judíovape, ñi bñcvu judíova ñnevureca. Ñbenita ina jabova ye buraicójemeteima ñre. Ina buraicójeiyuríduivu Jesúre ju aivupe teivu yavenina ñarí cójijima ññjaque, majinajivu aipe ññje ñaiyede. Boro coyurí ññaiyuríduima ññjare, ññje ññbe boje caiye Jñmenijicui ññicójeiyede, ñi coyuiye báquede Moisés bácvure. Caiye diede ñaiye jaubevu ññjare caride, ññje cñe boje Jesucristoque cñinávupe, ñi boropatebede ñaiye boje majare Jñmenijicui jáinore. Ñbenita nácapñravu yebacñvupe tede ññaiyuríduima ññjare, “Ñajarä caiye iye Jñmenijicui ññicójeiyepe ñi coyuiye báquede Moisés bácvure”, ne ainoque. <sup>5</sup> Ñbenita ññjacapñravu ye ññbetecarä yópe ne ñröpe. Ññja ññivu baru yópe ne ñröpe, buebejebu iye yávaiye méne jávene, Jesucristoi meañaiyede majare. Que baru ññbetecarä yópe ne ññicójeniduiyepe, oatñvabenajivu Jesús ñi yávaiyede jávene. <sup>6</sup> Aru ina Jesúre ju aipóevai jabovavacari ju arí ññjare, ye apeñiene oatñvaicójemeteima ji bueiyede Jesús ñi yávaiye méne.

Ina jabovabu Jesúre ju aivu ne aimara parñrivu, ne cñe báque boje Jesúque. Ñbenita Jñmenijicñvacari jáimi caivu póevare cñináturu. Que baru ye baju ñnevü yure ina jabova ne parñé póeva ne jáiyede. <sup>7</sup> Oatñvaicójemeteima yure ji bueiyede. Quénora, “Jñve coreóvaivñbu caride”, aima na. “Jñmenijicui epeimumu mu, bueyu Jesús ñi yávaiye méne judíova ñnevure yópe ñi epeiye báquepe Pedrorre bueyu diede judíovare”, aima yure ina jabova. <sup>8</sup> Aru Jñmenijicñvacari epedejaquemavu yure Jesús ñi yávaiye méne beorí coyucójeimu judíova ñnevure, yópe ñi epeiye báquepe Pedrorre Jesús ñi yávaiye méne beorí coyucójeimu judíovare. <sup>9</sup> Que baru ina Jesúre ju aipóevai jabova parñrivu póeva ne jáiyede; Santiago,

Pedro, aru Juan máre; coreóvaima dinumure Jūmenijicu yure memecare dayure úre, ũi mearo đacaiye boje bojecubeda. Que baru caivu ñuja, ina yóbecurã aru yu Bernabémaque, purujêcarã ñuje baju, jáđovarajivu ne ju aiyede ñuje memecaiyede Jūmenijicure. Que teni ñuje ũme cūináturu, “Pablo Bernabémaque buenajarama Jesús ũi yávaiye méne judíova ámevure. Aru Santiago, Pedro, aru Juan máre buenajarama Jesús ũi yávaiye méne judíovare”, acarã ñuja. <sup>10</sup>Que aiyede, cūináro apejinore ina jabova coyũima ñujare. Jēniaima ñuje dajocabenajiyeye aivu ñuje cadateiyede ina cōmaje árojarivure. Aru yúcapūravu pare cadatede nuiyucu batecácu náre.

**Pablo ũi yávarĩ meadaino Pedroke Antioquái**

*(Hch 11.2-17)*

<sup>11</sup>Ūbenita ji cuede Antioquá ámicurĩmaroi, Pedro edame noi Jesúre ju aipōevai cōjijiñami. Apejāravua vainĩburu yóboi, ámeina đáme ũ. Dinumu yávacacu yu úre copu Jesúre ju aipōeva ne jápiainoi, ũi ména đabe boje ũi daiyede. <sup>12</sup>Mamarumure Pedro mearo dayu bateáme. Āñu mateáme ina Jesúre ju aipōevacavu judíova ámevūque. Ūbenita apejāravua vainĩburu yóboi, apevu ũmuva, Santiagoi daroimara mácavu, ne edaiyede Antioquái, Pedro yóvabeteame ina Jesúre ju aipōevacavu judíova ámevure. Dajocame ũi áiyede náque. Aru coateni buame ũi baju náre jaruvarĩ. Nópe đáme ũi jidué boje ina edaivu bācavu ne buraicōjeiyue boje caivu Jesúre ju aipōeva ũmuvare ne cajede judíovape. <sup>13</sup>Pedro majicuvacari Jūmenijicu me jáñure Jesúre ju aipōeva judíova ámevure, aru majicuvacari coateiye jaubenore ina Jesúre ju aipōevacavu judíova ámevure jaruvarĩ, coateame ũi bajuma. Aru apevu Jesúre ju aipōevacavu judíova máre, úpe đarĩ buima. Que teni na máre majidivuvacari coateiye jaubenore Jesúre ju aipōevacavu judíova ámevure jaruvarĩ, coateima ne bajumia. Aru Bernabé máre náque nuame ũ. <sup>14</sup>Ji jáinore ne nópe daiyede ye ũbetecacu yu. Que baru yópe arĩ, coyucacu Pedroke caivu ne jápiainoi: “Mávacari judíotamu. Ūbenita đabevu mu judíova ne daiyepe. Quénora đaivu mu judíova ámevu ne daiyepe. Que baru, ¿aipe teni đare đaiyurĩduyurũ mu ina judíova ámevure judíova ne daiyepe? Mi dajocaiye boje náre, na yóvayurivu baru mure, đaiye jaujebu náre judíovape. Que baru meamevu mi đare đaiyurĩduiye náre”, acacu yu Pedroke.

**Jūmenijicu ũi meadaino judíovare aru judíova ámevure máre ne ju aiyede**

**Cristore**

*(Ro 3.20, 22; Fil 1.21)*

<sup>15</sup>Pōetedejcarã ñuja judíova. Que baru judíova bajubu ñuja. “Judíova ámevu ámeina teivubu ne cuvabe boje Jūmenijicui đaicōjeiyede Moisés bācui toivaiye báquede”, arĩ dápiaivubu ñuja. <sup>16</sup>Ūbenita pōecu cubebi Jūmenijicu “Boropatebevũ mu ji jáinore”, ũi aimu, ũi đaiye boje yópe Jūmenijicui đaicōjeiyede Moisés bācui toivaiye báquepe. Quénora Jūmenijicu “Boropatebevũ mu ji jáinore”, aibi pōevare ne ju aiyede Jesucristore. Diede me majidivubu ñuja judíova Jesúre ju aivu. Aru ñuja judíovavacari ju aivubu Jesucristore, Jūmenijicu “Boropatebevũ mu ji jáinore”, ũi aquiyeye aivu đabevuva yópe Jūmenijicui đaicōjeiyede Moisés bācui toivaiye báquepe. Que baru pōeva cubema boropatebevũpe Jūmenijicui jáimara, ne đaiye

boje yópe daicōjeiyepe. <sup>17</sup>Que baru ñuĵa napini coreivũ Jūmenijicui jáiyede ñuĵare boropatebevũpe ñuĵe ĵu aye boje Jesucristore, dajocađavũ ñuĵe ñuĵarĩduiyede yópe Moisés bácuĩ daicōjeiye báquepe. Aru apevũ ne jáiyede ñuĵa nópe teivure, “Jūmenijicui daicōjeiye vainĩ tuivũbu na yópe judíova āmevũpe”, arājichũma na. Aru, “Cristo vainĩ ture ñuĵaĩ pōevare Jūmenijicui daicōjeiyepe jarũvari”, arājichũma na. Ĵaipinũma nópe abejarāri! Ne que aru jāve āmevutamu.

<sup>18</sup>Que baru yópe bueyũbu yũ: “Pōevare boropatebevũpe Jūmenijicui jáquiyepe aivũ, ne ĵu aye Jesucristore ĵaũvũ náre”, arĩ bueyũbu. Ŭbenita, “Muĵe me curājiyepe aivũ Jūmenijicuque, ñuĵe ĵaũvũ muĵare yópe Moisés bácuĩ daicōjeiyepe”, abevũ yũ muĵare. Aru nópe cōjeñũ maru, vainĩ tuĵebu yũ Jūmenijicui daicōjeiyepe. <sup>19</sup>Aru javede Jūmenijicui daicōjeiyepe ũi coyuiye báquede Moisés bácuĩ ñuĵarĩduiyecacũ yũ, boropatebecũyũ Jūmenijicui jáĩnore. Ŭbenita nópe ñuĵarĩduiyecacũ, cainũma boropateyũpe bareĵacacũ. Ŭbenita caride ĵi cuede Jesucristoque cūĩnāvũpe, boropatebecutamu yũ Jūmenijicui jáĩnore. Que baru caride Moisés bácuĩ daicōjeiye báquede quénora ñuĵarĩduiyecacũ yũ. <sup>20</sup>Maje ĵabocũ Jesucristo yaiyũ bácuĩ ĵocucũjaravena oatũvareĵaquemavũ ĵi āmene. Que baru caride ĵipocai ĵi cue báquepe āmevũ yũ. Cristo cucũ yũque ñuĵe ñuĵaĩ yópe ũi urōpe. Que baru javede ĵi ñuĵe báquepe ñuĵarĩduiyecacũ. Quénora ñuĵarĩduiyecacũ Cristo ĵiede. Ĵi āmeĩna teiye boje, yaidėĵaquemavũ. Que baru ũre ĵu arĩ, ũi daicōjeiyepe ñuĵarĩduiyecacũ yũ. <sup>21</sup>Que baru ĵarũvabevũ yũ Jūmenijicui ĵiye boĵecũbede ũi me boje, iye Jesucristoĩ mearo ñuĵarĩduiyecacũ yũ, ĵi ñuĵarĩduiyecacũ yópe Moisés bácuĩ daicōjeiyepe. Jūmenijicui ĵarũ pōevare boropatebevũpe ne ñuĵarĩduiyecacũ yópe ũi daicōjeiyepe, Jesucristoĩ yaino mǎcarō ĵaubeĵebu. Yaiĵėbu ũi ũbenina.

**Pablo ũi bueno pōeva boropatebevũ āmevure Jūmenijicui jáĩnore ũi daicōjeiyepe Moisés bácuĩ toivaiye báquepe**

(Hch 3.25; Ro 1.17; 4.3, 16; 10.5)

**3** <sup>1</sup>Muĵa, Galacia āmicurĩĵoborōcavũ Jesũre ĵu aivũ, ārũmevũpe nuriė dǎpiabevũ muĵa. Muĵe jáiyede nuriė coyucacũ muĵare Jesucristoĩ yaiye báquede ne pėvaimure ĵocucũjaravena maje āmeĩna teiye boje. Ŭbenita muĵamu apevũ ne ĵuĵovaimara. <sup>2</sup>Que baru muĵe ĵu aiyede iye yǎvayede ĵǎvene, ĵi coyuiye báquede muĵare, dajocaivũbuya muĵa. Quénora ũbenina dǎpiarĩ búyavũ boropatenĩ buoĵaivũ Jūmenijicui jáĩnore muĵe ñuĵarĩduiyecacũ yópe iye daicōjeiyepe Moisés bácuĩ toivaiye báquede. Ŭbenita Jūmenijicu ĵave darobedeĵaquemavũ majeure ũi Espĩritu Santore majeure ñuĵe ñuĵaĩ yópe ũi daicōjeiyepe Moisés bácuĩ toivaiye báquepe. Quénora ĵave daroreĵaquemavũ ũre majeure ĵǎpiarĩ ĵu aye boje Jesús ũi yǎvayede mēne. <sup>3</sup>Jūmenijicui Espĩritu Santo apure ñuĵarĩ búquemavũ muĵare mamaũmene. Que baru buoĵaiyue ĵaubevũ muĵare iye muĵe cũvaede mamaũmene muĵe majiėqueda. Nópe ñuĵarĩduiyecacũ baru, ārũmevũpe ñuĵarĩduiyecacũ.

<sup>4</sup>¿Caiye iye yaiye báque boĵecũbedi muĵare? Ĵave dǎpiarĩ coreóvǎvũ ĵaipino boĵecũede iye muĵare yaiye báquede. <sup>5</sup>Jūmenijicu ĵave darobebi muĵare ũi Espĩritu Santore aru ñuĵarĩduiyecacũ pōeva ne ñuĵarĩduiyecacũ majeure ĵeneboi, majeure ñuĵe ñuĵaĩ yópe ũi daicōjeiyepe Moisés bácuĩ toivaiye báquepe. Quénora ĵave daroĩbi ũre aru ñuĵarĩduiyecacũ die de majeure ĵeneboi, majeure ĵǎpiarĩ ĵu aye boje Jesús ũi

yávaiye méne. <sup>6</sup> Aru caride dápiajarā Abraham mácre. Yópe arī, Jūmenijicu toivaicōjenejaquemavu ūi yávaiyede: “Abraham ju arejaquemavu Jūmenijicui đaquiyede yópe ūi aye báquepedeca. Que baru Jūmenijicu coyurejaquemavu ūre, ‘Boropatebecubu mu ji jáinore’, ūi ju aye báque boje Jūmenijicure”, arī toivaicōjenejaquemavu.

<sup>7</sup> Que ba ru coreóvaiye jauvu mujare iyede: Ina pōeva ju aivu Jūmenijicure, nárecabu Abraham mácuī pāramena baju. <sup>8</sup> Javede Jūmenijicu toivaicōjenejaquemavu ūi yávaiyede, pōeva ne coreóvarājiyepe ayu boropatebede đacuyu ūi jáinore ina judfova āmevure ne ju ayeque ūre. Jūmenijicu coyurejaquemavu Abraham mácre mearo đacacuyure ū mácre ūi mearo đacauiye jipocai yópe arī: “Mu ju aivu yure. Que baru mre ji mearo đacaiye báquepedeca ijāravucavu apevu, caivu yure ju aivure máre, mearo đacacuyumu yu”, arī toivaicōjenejaquemavu Jūmenijicu. <sup>9</sup> Abraham mácuī ju aye boje Jūmenijicure, ū mearo đacarejaquemavu ū mácre. Que baru Jūmenijicu mearo đacaibi caivu pōeva ju aivure ūre yópe ūi mearo đacaiye báquepedeca Abraham mácre.

<sup>10</sup> Caivu ina pōeva đaiyurīduivu yópe Jūmenijicui đaicōjeiyede Moisés bácuī toivaiye báquepe Jūmenijicui jáquiyepē arīduivu náre boropatebevure, jāve Jūmenijicui nājine đaimara marajárama na, ne āmeina teiye boje. Coreóvaivubu maja die jāvene, Jūmenijicui toivaicōjeiye báque boje, yópe arī, ūi yávaiyede: “Ácu pōecu đabecu baru cainumua yópe caiye Jūmenijicui đaicōjeiyede Moiséi toivaiye báquepe, jāve nājicuyume ū, ūi vainí tuiye boje diede”, arī toivaicōjenejaquemavu Jūmenijicu. <sup>11</sup> Aru coreóvaivubu maja iyede: Pōecu cubebi boropatebecu Jūmenijicui jáinore, ūi đaiye boje yópe Jūmenijicui đaicōjeiyede Moisés bácuī toivaiye báquepe. Jūmenijicui toivaicōjeiye báque boje, yópe arī, ūi yávaiyede: “Ina Jūmenijicui boropatebede đaimara mácavu, ne ju aye boje ūre, apurājivubu cainumua. Que baru coatede đabemara mārāvivubu na Jūmenijicure jaruvārī”, arī toivaicōjenejaquemavu Jūmenijicu. <sup>12</sup> Nai Jūmenijicure ju ayu, “Jūmenijicurecabe boropatebede đacuyu yure”, aibi. Ūbenita nai đarīduyu yópe iye đaicōjeiyede Moisés bácuī toivaiye báquepe, “Yurecabu boropatebede đacuyu ji bajure ji đaiyeque iye đaicōjeiyede”, arīduibi. Ūbenita ūrecabe boropatecuyu, ūi đarī buojabe boje caiye iyede. Coreóvaivubu maja die jāvene, Jūmenijicui toivaicōjeiye báque boje, yópe arī, ūi yávaiyede: “Nai đarī buojayv caiye iye Jūmenijicui đaicōjeiyede cucuyume ū aru coatede đabemu macuyume ū Jūmenijicure jaruvārī”, arī toivaicōjenejaquemavu Jūmenijicu.

<sup>13</sup> Ūbenita Cristorecabe cadateyu bácu majare. Jūmenijicui nājine đaiye jaurīdurejaquemavu majare, maje đabe boje caiyede yópe Jūmenijicui đaicōjeiyepe. Ūbenita Cristovacari nājicarejaquemavu yaiyú, ne pēvaimu mácu jocucujaravena, majare boje. Que teni bojedarejaquemavu maje vainí tuiyede, maje nājimenajiyepē ayu maje baju āmeina teiye boje. Coreóvaivubu maja jāvene Cristoi nājicaiye báquede jocucujaravena majare boje. Jūmenijicu toivaicōjenejaquemavu, yópe arī, ūi yávaiyede: “Caivu ina ne pēvaimara jocucurā Jūmenijicui nājine đaimaramu na, ne āmeina teiye boje”, arī toivaicōjenejaquemavu Jūmenijicu. <sup>14</sup> Cristo nājīñu yaicárejaquemavu muja judfova āmevure boje máre, muje cvarājiyepe ayu iye mearo đacaiyede, yópe

Jūmenijicu “Mearo đacacuyumu yu mujare”, ũi aiyे báquepedeca Abraham mácure, aru maje copu etarājiyepe ayu ũai Espíritu Santore yópe Jūmenijicu “Cadateyure darocuyumu yu mujare”, ũi aiyे báquepedeca.

**Jūmenijicu ũi coyūino “Yópe mearo đacacuyumu” ũi coyūiqiye jipocare ũi đaicōjeiyede**

(Ro 4.14)

<sup>15</sup> Muja, jivu, caride coyūqijivu mujare maja pōeva maje đarī cōmajiyena muje coreóvarājiyepe ayu. Pucarā ũmava “Yópe đarī memenajare”, ne arī toivaru ne āmiāre diena, ũame buojabebi jaruvayu aru oatuvayu diede, ina ũmava ne ju abedu. Quédeca Jūmenijicu “Yópe đarājare”, ũi aiyе báquede ũame buojabebi jaruvayu aru oatuvayu diede máre. <sup>16</sup> Jūmenijicu “Yópe mearo đacacuyumu yu mujare”, ávarejaquemavu Abraham mácure aru ũi pāramenacacu bacuyure máre. Ubenita Jūmenijicu toivaicōjemenejaquemavu ũi yāvaiyede “mipāramena mārājivu”, obedivu ainore. Quénora toivaicōjenejaquemavu ũi yāvaiyede “mipāramenacacu bacuyú”, cūinácu ainore. Aru Cristorecabe ũai cūinácu. <sup>17</sup> Ji coyūiyede mujare yópe ayurōtamu: “Yópe đarājaramu maja”, arejaquemavu Jūmenijicu Abraham mácure. Aru que arīburu yóboi, Jūmenijicu “Jāve đacuyumu yu yópe ji aiyе báquepedeca mure”, arejaquemavu Abraham mácure. Que baru Jūmenijicu ũi aiyе báquede cuatrocientos treinta paíjua jipocai ye jaruvabedejaquemavu aru oatuvabedejaquemavu ũi đaicōjeiyeque, Moisés bācui toivaie báqueque cuatrocientos treinta paíjua yóboi. Jāve Jūmenijicu đaiibi yópe ũi aiyе báquepedeca. <sup>18</sup> Pōevai boropatebeni buojaru Jūmenijicui jāinore ne đaiyeque yópe iye đaicōjeiyepe Moisés bācui toivaie báquede, Jūmenijicu “Yópe mearo đacacuyumu pōevare”, ũi aiyе báque bojecubejebu. Ubenita pōeva boropatebevu buojabema ne đarīduiyeque yópe Jūmenijicui đaicōjeiyepe. Que baru Jūmenijicu “Yópe mearo đacacuyumu pōevare”, ũi aiyе báque bojecuvu. Aru Jūmenijicu mearo đacayū pōevare, jāimi náre boropatebevure yópe ũi aiyе báquepedeca Abraham mácure: “Caivu pōeva yure ju aivure yópe mi ju aiyеpe yure mearo đacacuyumu yu”, arejaquemavu.

<sup>19</sup> Jāve Jūmenijicu coyurejaquemavu ũi đaicōjeiyede Moisés bācure, “Yópe ji đaicōjeiyepe đajarā muja”, arīduyu judíovare. Jūmenijicu coyurejaquemavu diede, pōeva ne coreóvarājiyepe ayu vainí tuivure ne āmeina teiye boje. Abraham mácui pāramenacacu Jesucristoi daiyede, iye đaicōjeiyepe daiye cūinéjaquemavu. Que baru Jesucristoi daiyede, Jūmenijicu mearo đacarejaquemavu pōevare yópe ũi aiyе báquepedeca. Iye Jūmenijicui đaicōjeiyede Jūmenijicu yāvarejaquemavu ángelevare. Aru na yāvarejaquemavu Moisés bācure. Aru ũi mácu toivarejaquemavu diede, pōeva ne majinājiyepe ayu. Que teni Jūmenijicu coreóvare đarejaquemavu pōevare ũi đaicōjeiyede ũi coyūiyeque arevure, ina ángelevare aru Moisés bācure máre. <sup>20</sup> Ubenita Jūmenijicu coyubedejaquemavu “Yópe mearo đacacuyumu”, ũi aiyede Abraham mácure apecuque. Quénora Jūmenijicuvacari cūinácura coyurejaquemavu diede ũi mácure apecui cubeda.

**Jūmenijicu ũi đaiyurō iye ũi đaicōjeiyeque**

(Ro 4.13; 8.15-17; Col 2.8, 20)

<sup>21</sup> Jūmenijicu bojecubede đarejaquemari iye “Yópe mearo đacacuyumu”, ũi ávaiye báquede Abraham mácure ũi đaicōjeiyeque, ũi coyūiye

báquede Moisés bácre? ¡Bi, ye que ámevu! ¡Aipinumu vaibéjarōri nópe! Jūmenijicu ye jámecube pōevare boropatebevupe maje daiye boje yópe ũi ðaicōjeiyepe. Maja ye mearore daiye majibevu, Jūmenijicui cure ðaquiyepe aivu majare járavu cūiméjáravu baquinóre. Cainumua maje mearo daiye jaavu Jūmenijicui jáinore. Que baru ðaicōjeiyepe ðarīduvuvacari, caivu pōeva eabenajarama járavu cūiméjáravu baquinóre. Ye boropatebevubojabenajaramu maja Jūmenijicui jáinore maje mearo ðaiyurīduiyeque. <sup>22</sup> Jūmenijicu toivaicōjenejaquemavu ũi yávaiyede, coreóvare ðacuyu majare caivu ijāravucavu ðaicōjeimarare ne baju ámeina ðaiyeque. Que baru pōeva ne ju aiyede Jesucristore, Jūmenijicu jáimi náre boropatebevupe “Yópe mearo ðacacuyumu”, ũi aye báquepedeca. Aru ina pōeva ju aivu Jesucristore quévurabu Jūmenijicui jáimara boropatebevupe.

<sup>23</sup> Jesucristoi ðaquiye jipocare caivu pōeva ðaicōjeimarape paivu barejaquémavu, maje ðarīduiye boje yópe Jūmenijicui ðaicōjeiyede ũi coyuiye báquepe Moisés bácre. Nópe barejaquémavu pu Jesucristoi daiyeta. Cristo ũi daiyede, Jūmenijicu jáðovarejaquemavu majare boropatebevupe ũi jáinore maje ju aiyede Jesucristore. <sup>24</sup> Que baru Jesucristoi ðaquiye jipocare, caivu pōeva jueðova coreimarape paivu barejaquémavu. Aru Jūmenijicui ðaicōjeiye ũi coyuiye báque Moisés bácre majare coreipōecupe paiye barejaquémavu. Yópe coreipōecui coreóvare ðaiyepe jueðovare ñájinajivure ne mearo ðabedu, nopedeca iye ðaicōjeiyeque coreóvarejaquemavu ñájinajivure, maje ámeina teiye boje. Nópe barejaquémavu pu Jesucristoi daiyeta, maje boropatebenajiyeye aye Jūmenijicui jáinore maje ju ayeque Jesucristore. <sup>25</sup> Caride Jūmenijicu jáimi majare, Jesucristore ju aivure, boropatebevupe. Ñuja Jesucristore coreóvaivu, ũre ju aivu, coreimarape ámevutamu iye ðaicōjeiyeque.

<sup>26</sup> Aru caivu muja Jūmenijicui máramu muje ju ayeque Jesucristore, éque curī cūinávupe. <sup>27</sup> Muja jáðovaimara mácavu Jesucristoque ocoi curivubu éque cūinávupe. Que baru caride cuvū muja Jesucristope árojarivu. <sup>28</sup> Que baru caride ye baju ámevu judío o judío ámecu, yebacacu o yebacacu ámecu, aru ũmu o nomío máre. Caivu cūináturape paivubu maja, maje cue boje Jesucristoque cūinávupe. <sup>29</sup> Muja Cristo jina mae boje, Abraham mácui pāramena bajubu muja. Que baru Jūmenijicu mearo ðacacuyume mujare yópe ũi aye báquepedeca.

**4** <sup>1</sup> Yópe coyquijivu mujare cojedeca maje cuede Jesucristoque ũ jinava, ðaicōjeimara ámevu. Mamacu, bucūriburu yóboi, cuvacuyume jípacu jiede. Ũbenita jueðocu cāreja, jabocu bacuyávacari, yebacacupe páyu apevui cōjeimume ũ. <sup>2</sup> Jueðocu cāreja, apevu jári coreivubu ũre aru ũ jie baquiyéde máre pu ānijāravu, jípacui beoijāravu baquinóita, ne dajocarājiyepe aivu ne jári coreiyede ũre aru ũi cuvaede máre. <sup>3</sup> Nopedeca vaidéjaquemavu majare máre maje majibede cāreja Jūmenijicui yávaiye méne. Yópe jueðova ne cōjeimarape, maja máre yebacavu barejaquémavu, iye ðaicōjeiyeque, majeñecuva ne ðarī cōmajiye báqueque.

<sup>4</sup> Ũbenita majare nápe paivu bácvure ānijāravu, Jūmenijicui beoijāravu bácarōi, Jūmenijicu ðarorejaquemavu mamacure ijāravuita. Ũ máre caivu apevu pōevape, cuvarejaquemavu jípacore. Aru pōetedejaquemavu judíovacacu. Que baru ju arī Jūmenijicui ðaicōjeiyede ũi coyuiye báquede

Moisés bácure curejaquemavu ñ, mamacu. <sup>5</sup> Ñi daiye boje Jūmenijicui ñaicōjeimupe páyuvacari, bojedayu buojarejaquemavu ina ñaicōjeimara mácvure iye ñaicōjeiyeque, ne ñáñimenajiyeye ayu ne vainí tuiye báque boje diede. Aru ñi nópe ñaiye báque boje, buojaibi cure ñayu majare Jūmenijicui märke. <sup>6</sup> Muje Jūmenijicui mára teiye boje, ñ daroibi mamacu Espiritu Santore, ñi cuquiyeye ayu muje ũmei, jádovacayu jáve Jūmenijicui märke muja. Aru ñai Espiritu Santo “m, jipacu”, ari jēniari buojare ñaibi caivu majare Jūmenijicuque. <sup>7</sup> Jūmenijicui nópe ñaiye boje, caride yebacavupe, apevui ñaicōjeimarape paivu ānevū muja. Quénora Jūmenijicui märke muja, ñi jáve mearo ñacaiye boje mujare yópe ñi aiyē báquepedeca. Caiye iye ñi cūvaede ñi jíquiyede ñi märke jícuyume mujare.

**Pablo ñi dāpiaino aipe nuquinore Galaciavure**

(Hch 16.6; Ro 8.29; 2 Co 3.18; Fil 3.10; Col 2.8, 20)

<sup>8</sup> Javede muje coreóvabede cäreja Jūmenijicure, ijaravure cōjeivū ne yebacavupe paivu barejaquemavu muja. “Jūmenijinamu na”, ari dāpiariduiyū barejaquemavu muja. Ñbenita ye jūmenijina āmema na. Ñai Jūmenijicu cūinácura, caiyede cuedayu bácure coreóvabeni mearore jíbadejaquemavu muja. <sup>9</sup> Ñbenita caride muja coreóvaivubu Jūmenijicure, ñi coreóvaiye báque boje mujare mamarumure. Que baru, ¿aipe teni dajocaiyurivurū muja muje cuede jocarī Jesucristoque cūinávupe, yebacavupe tenajivu bediáva cojedeca iye ñaicōjeiyeque, majeñecuva mácvu ne ñari cōmajiye báqueque? Iye ñaicōjeiye parubetamu. Que baru muja ye cadatebemaramu iye ñaicōjeiyeque. Aru cure ñabejarā muje baju yebacavupe cojedeca muje ñari buiyeque yópe judíovape. <sup>10</sup> Muja dāpiariduiyū muje ñaiyede judíovape, Jūmenijicui mearo ñacaiyeye aivu mujare. Que baru torojave teivubu yópe judíovape apejāravuai, apevū aviávai, aru apejuvai máre. <sup>11</sup> Muje que ñaiye boje chíoivu yu mujare. Que baru, “¿Ye bojecubedi ji bueiye báque náre?” ari dāpiaivu yu.

<sup>12</sup> Muja, jívū, parurōreca jēniaivu mujare, muje ñarājiyeye ayu yópe ji ñaiyeye. Yu judíovacari, ñabevū yópe Jūmenijicui ñaicōjeiyede Moisés bácu toivaiye báquepe. Que baru yu máre ñaivu yópe muje ñaiyeye. Mujape teyubu yu. Diede dajocarejacacu yu. Āmeno ñabeteavū muja yure. Quénora mearo ñávū muja yure. <sup>13</sup> Coreóvaivubu muja yure ijimu bácure. Aru ji ijeteiye boje mamarumure coyucunucacu Jesús ñi yávaiye méne muje yebai. <sup>14</sup> Aru yure ijíe báque boje, copu etaiyubejebu muja yure. Ñbenita āmeina jánevua jaruvabeteavū yure. Quénora me copu etavū yure yópe muje copu etajuroepe cūinácū ángele, Jūmenijicui daroimure, aru yópe muje copu etajuroepe Jesucristore máre. <sup>15</sup> Mamarumu ji bueiye ñajare Jesús ñi yávaiye méne, torojurivu bateávū muja. ¿Aipe teni torojubevurū muja caride? Yúvacari majivu aipe muje ñaiyede dínimure. Caijēne ñajebu muja, cadatenajivu yure, ívū muje yacoruare, jínajivu yure. <sup>16</sup> Ñbenita caride jáivubu muja yure yópe muje maucupe, ji coyuiye boje yávaiyede jávene mujare.

<sup>17</sup> Apevū, ina bueivū ape yávaiyede, torojure ñaiyurivubu mujare, muje me pueðarājiyeye aivu náre. Ñbenita ne ñaiyuriduiye meamejebu mujare. Maucuvare ñariduiyū muje yúque, muje ju arājiyeye aivu ne bueiye. <sup>18</sup> Pōeva ne cadateiyue apevure mému cainumua, ne cadatedu náre ne baju

dápiaino mearoque. Ubenita meamevu ne cadateiye mujare ji cuede mujaque ubenita ne cadatebe mujare ji cubede mujaque. Que baru cadatejarári mujare ne dápiaino mearoque cainumua, ji cuede aru ji cubede máre.  
<sup>19</sup> Muja, jímajinape paivu, bedióva cojedeca ñájiyu yu mujare boje yópe ico juedocuvacodo òi ñájiyepe. Ñájiyu yu, jácuyu mujare Cristope árojarivure.  
<sup>20</sup> Pare cārijivu yu mujare boje. “¿Aipe ñarí Galaciavure cadateje bárica yu?” arí dápiavu yu. Que baru cuiyuríduivu yu mujaque caride, oatuvacuyu ji coyuiyede mujare.

**Pablo ñi jēvari coyuiño ñaicōjeiyede ñaríduivu ne ñaiyena aru  
 Jūmenijicui mára ne ñaiyena máre pucarā nomiva ne cue báqueque**

<sup>21</sup> ¿Caivu muja ñaiyuríduivu yópe Jūmenijicui ñaicōjeiyede Moisés bácu toivaiye báquepe, jápiarí eabenaru muja iye ñaicōjeiyede? Jáve jápiarí eabevu muja diede. <sup>22</sup> Jápiarā caride Moisés bácu toivaiye báquede Abraham mácu borore. Abraham mácu ina pucarā mamarumu pōteivu bácvure cuvarejaquemavu pucarōmiva nomivaque. Cūinācu Abraham mácu márepacoí yebacacoí mácu barejaquemavu. Aru apecu Abraham mácu márepaco bajui mácu barejaquemavu. <sup>23</sup> Ñai yebacacoí mácu re juedocuvarejaquemavu yópe caivu apecu pōevape. Que baru jíbucu pōtedējaquemavu yópe caivu apecu juedovape. Ubenita ñai jímarepaco bajui mácu re juedocuvarejaquemavu Jūmenijicui coyuiye báque boje cūvarājivure mamacure. Que baru ímacu pōtedējaquemavu Jūmenijicui pōeva ne ñarí majibede ñaiyeque, jípacoí pare bucūco bae boje.

<sup>24</sup> Maje coreóvaye Agar bácu borore aru Sara bácu borore máre jádovaiyu majare ape yávaiyede jávene. Yópe vaiye báquepedeca ina pucarōmiva nomivare, vaivu pōevare ne voiyede Jūmenijicui me jáquiyepe aivu náre. Apecu ñaiyurivubu yópe Jūmenijicui ñaicōjeiyede ñi coyuiye báquede Moisés bácu re, Jūmenijicui me jáquiyepe aríduivu náre. Aru apecu ju aivubu “Yópe mearo ñacacuyumu mujare”, Jūmenijicui aiye báquede, ñi me jáquiyepe aivu náre. Ico yebacaco Agar ámicurejaquemavu. Aru ò máco jádovaimico majare ne ñaiyede, ina voivure Jūmenijicui me jáquiyepe aríduivu ne ñaiye boje. Nápe paivubu caivu ñaiyurivu yópe Jūmenijicui ñaicōjeiyede Moisés bácu toivaiye báquepe Sinaí ámicuricū cūracūi. Que baru yebacavupe paivubu na, úpe Agar bácu mácupe. <sup>25</sup> Aru Agar báco jádovaimico majare pucarōa curōare, Sinaí ámicuricū cūracūre, Arabia ámicurijoborōcacūre, aru Jerusalén ámicuríimarore ijāravucarōre, judíovai ímaro urarōre. Aru ina judíova ñaríduivubu yópe Jūmenijicui ñaicōjeiyede. Que baru Agar báco népacope pádobe aru òpedeca yebacavupe paivubu na. <sup>26</sup> Ubenita Sara báco jádovaimico majare apeno ímaro Jerusalén ámicuríimarore, cavarō mearo Jūmenijicui curōre, Jūmenijicure ju aivu ne ímaro mearore. Aru maja ju aivubu Jūmenijicure. Que baru Sara báco majepacope pádobe aru òpedeca yebacavupe paivu ámevutamu maja. <sup>27</sup> Que baru Jūmenijicui mára, caivu Jesucristore ju aivu, obedivu barājáramu maja. Ubenita ina ñaríduivu yópe Jūmenijicui ñaicōjeiyede ñi coyuiye báquede Moisés bácu re, obebejina marajárama na. Nópe arí Jūmenijicu toivaicōjenejaquemavu ñi yávaiyede:

Mu, juedocuvabeco, torojujaco mu mi ũmei. Mu, ñájimeco cāreja juedocuvaede, codobobojaco mu mi torojue boje. Que baru ico nomío

jímarepacui jaruvaimo máco, ñmucucodome cojedeca. Que baru mamara cuvacodome ico ñmucuco pueno, arí toivaicōjenejaquemavu Jūmenijicu.

<sup>28</sup> Aru mja, jívũ, yópe Abraham mácuí mácu Isaac bácuí pōeteiye báquepe Jūmenijicu “Yópe baquiyébu” ñi aiyé báquepe, nopedeca mujamu Jūmenijicui mára yópe ñi aiyé báque boje. <sup>29</sup> Javede Abraham mácuí mácu mamarumu pōeteyũ bácu, Agar bácoi mácu, ñai ne juedocuvamu mácu yópe caivũ apevũ pōeva ne juedocuvaepe, ñájine ñayũ barejaquemavu imacu bácu, Sara bácoi mácu, ñai ne juedocuvamu mácu Jūmenijicui Espiritu Santoi parure ñaiyeque ñi bucva bácu. Aru quēdecabu caride máre. Ina ñare ñaicōjeiyurĩduivũ yópe Jūmenijicui ñaicōjeiyepe ñájine ñaivũbu majare máre. <sup>30</sup> Ñbenita yópe arí, toivaicōjenejaquemavu Jūmenijicu ñi yáviyede: “Ico yebacacoi mácu cuvabecuyũme jípacui cuvaede. Quénora ico ñi márepaco bajui mácu cuvabecuyũme caiye jípacui cuvaede. Que baru jaetovajacu ico mi yebacacore aru mamacũre máre yore jocarí”, arí toivaicōjenejaquemavu Jūmenijicu. <sup>31</sup> Mja, jívũ, que baru maja yebacacoi mape paivũ ñevũ maja. Quénora majamu majepacui márepaco bajui mape paivũbu. Que baru mearore cvarajaramu maja, majepacu Jūmenijicui jíquiyede majare.

#### Yebacavũpe tebejarā mja cojedeca

(Mt 19.19; 20.26; Jn 8.32-36; Ro 13.8-10; 1 Co 5.6)

**5** <sup>1</sup> Mja yebacavũpe paivũ bácuve mapeñecuva ne ñarí cōmajiye báqueque jave meadaibi majare Jesucristo. Ñrecabe bojedacayũ bácu mape ñeina teiyede, mape curajiyepa ayũ me Jūmenijicuque. Que baru maja, Jūmenijicui mára, ju ávaivũbu Jesucristore. Que baru jápiarí adabejarā ina ñare ñaicōjeiyurivũ yópe Jūmenijicui ñaicōjeiyepe ñi coyuiye bácuve Moisés bácu.

<sup>2</sup> Jápijarā yure. Yúvacari, Jesús ñi yáviye méne beorí coyicōjeimaracacu, coyivũ mja. Mje buraicōjenu mje cajede Jūmenijicũ me jáicōjenidivũ mja yópe ina ñare ñaicōjeiyurivũ ne ñaicōjeiyepe, Jesucristoi yaiye bácu bojecubequiyebu mja. <sup>3</sup> Bediōva cojedeca parurōeca coyivũ mja. Ácu pōecu buraicōjeñũ maru ñi cajede ñaiye jajebu ñre yópe caijĩ Jūmenijicui ñaicōjeiyepe ñi coyuiye bácuve Moisés bácu. <sup>4</sup> Mujacavũ vorí eaiyurĩduivũ Jūmenijicui jáquiyepa aivũ mja boropatebevũpe, mje ñaiye boje yópe ñi ñaicōjeiyepe ñi coyuiye bácuve Moisés bácu, jave coatedavũ mja Cristore jaruvarí. Mujacupuravũ jave ñbeni jaruvadvũ mja jaruvarí Jūmenijicui jíyede pōevare bojecubeda ñi me boje. <sup>5</sup> Ñbenita majacupuravũ napini coreivũbu aru jave coreóvaivũbu Jūmenijicui jáquiyede majare boropatebevũpe ñi Espiritu Santoi paruéque mje ju aiyede ñre. <sup>6</sup> Que baru mape cuede Jesucristoque cūinávũpe ye baju ñevũ buraicōjenu o buraicōjemenu mape cajede. Ñbenita mape ju aiyede Cristore apevũ pōevare urí, mearo ñaivũbu maja, cadateivũ náre. Aru diedecabu bojecue mja.

<sup>7</sup> Mamarumũre me nũre nũrevũ mja mje cuede Jesucristoque cūinávũpe. ¿Ñame matedí dajocare ñaivũ mja mje ju aiyede iye yáviyede javene? <sup>8</sup> Ácu pōecu Jūmenijicu ñmemi. Jūmenijicu mja cutuyube ñ jina mrajivũva. Que baru ucube mje ju are nrajiyepa ayũ

Jesucristore. <sup>9</sup> Yópe pôeva ne quíjie páure bucure daiyeque bucúovainope caino jivaibore, nopedeca obebe bueiye jáve âme meamene đarĩ buojaivu obedivu pôevare. <sup>10</sup> Muja aru yu máre curivubu Jesucristoque cûinávupe. Que baru majivu yu Jesucristo cadatecuyure mujare, muje dápiane nưajiepe ayu ji dápiaiyepe. Aru yúcapұravu majivu Jūmenijicu nájine đacuyure nái mujare cārijovañure, ye baquinó âmevu ácu pôecure.

<sup>11</sup> Muja, jivu, yúcapұravu “Ũmuvare ne cajede buraicōjeiye javvu mujare”, ji arĩ coyure nuru, ina judíova cārijovamejebu yure. Aru ji buraicōjenu ũmuvare ne cajede, ina judíovacapұravu cārijimejebu ji coyuiye boje Jesucristoi yaiye báquede jocucujaravena. Ũbenita na cārijivutamu, ji pôevare ju aicōjeiye boje Jesucristore, ne curājiepe ayu me Jūmenijicque. Que baru cārijovađama yure âmeno ji vaiquíyepe aivu. <sup>12</sup> Ina mujare cārijovare cuivure, buraicōjeiyurivure muje cajede, nācapұravure cûiná burarĩ jaruvaicōjejara ne cajede.

<sup>13</sup> Muja, jivu, mujarecabu Jūmenijicui cutuimara mácavu ũ jina mārąjivu, đabenajivu iye đaicōjeiyede yebacavupe. Ũbenita me jājara diede, yebacavupe tede daiyede. Mujare đaiye javbe boje iye đaicōjeiyede, “Caiye maje âmeina đaiyuede đarĩ buojaivubu maja”, arĩ dápiabejarā. Quénora dápiajarā muje baju yópe yebacavupe, cadatenajivu mujacavu Jesúre ju aipôevare, muje ue boje caivu Jesúre ju aivure. <sup>14</sup> Caiye iye Jūmenijicui đaicōjeiye ũi coyuiye báque Moisés bácure aru caiye ape đaicōjeiye máre cuebu cûináromia yópe: “Muja coapa ұjarā mujevure yópe muje uepedeca muje bajure”, aiyuebu iye. <sup>15</sup> Ũbenita muja jijatede nuivu baru muje bajumia aru boaivu baru muje bajumia yópe âimara jijecurivupe, me jājara muja, bįjare cuiye muje me cuede muje bajumia.

**Pôeva ne âmeina đaiyue aru Jūmenijicui Espiritu ũi mearo đaicōjeiye**

*(Ro 6.3-14; 7.15-23; Gá 2.20; 6.14)*

<sup>16</sup> Yópe coyuiyvuvu yu mujare. Nái Espiritu Santoi đaicōjeiyepe đavvu cujarā muja ũi urópe. Đabejarā yópe muje baju âmeina đaiyuepe. <sup>17</sup> Maje baju âmeina đaiyue Espiritu Santoi mearo đaicōjeiyepe âmevu. Quédeca Espiritu Santoi mearo đaicōjeiye maje baju âmeina đaiyuepe âmevu. Maucұvarôreca painotamu no. Ũbenita maje ju aiyede nái Espiritu Santore, đarĩ buojabevu yópe maje âmeina đaiyuepe. <sup>18</sup> Muja đavvu baru yópe nái Espiritu Santoi mearo đaicōjeiyepe, đaicōjeimarape paivu âmevu muja Jūmenijicui đaicōjeiyeque ũi coyuiye báquede Moisés bácure. Que baru đarĩduiye javbevū mujare diede, muje curājiepe aivu me Jūmenijicque.

<sup>19</sup> Caivu majima aipe ārőjæ ne đaiyede ina ne baju âmeina đaiyueque đavvu. Âmeina đavvubu apevūque nēmarebucuva âmevūque, curivubu âmeũmeque, aru caino âmenore đavvubu. <sup>20-21</sup> Mearore jívubu pēpeimarare, aru yaviéde đavvubu. Maucұvarivubu ne baju, jaraivubu, tebutivubu, jijateivubu ũbenina, aru đavvubu ne baju urópe dápiabevūva mearore o âmenore apevure. Jarare đavvubu apevure, yajuboa tede đavvubu maucұvarājivū apeyajubocavūque, aru jorőjívubu. Pacoteivubu, bujéque ũcuri aru urarō arĩ torőjūve teivubu, aru apeno nópe paino urarō âmenore đarĩ cōmajivubu na. Parurôreca coyuivu mujare diede, nópe ji coyuiye báquepedeca mujare javede, muje majinajiepe ayu Jūmenijicu jabotebecuyure ina nópe đavvure.

<sup>22</sup> Ëbenita ðaivu maja yópe ñai Espíritu Santoi mearo ðaicôjeiyepe, yópe ãrojaetamu maje ðaiye. Ërivubu apevure. Torojurivubu maje ùmei. Cuvivubu me cãrijimevuvu. Aru napivubu. Mearo ðaivubu apevure. Cadateivubu apevure. Aru jávene ðaivubu yópe “Ðarãjare”, maje aiye báquepedeca. <sup>23</sup> Meara pœvape cuvivubu me. Aru maje bajure curi majidivubu. Nópe ðaiyede caiye ðaicôjeiye bíjarorí buojabevu. <sup>24</sup> Jesucristo ùi yaiyede jocusujaravena jaruvarejaquemavu maje âmeina teiyede. Que baru maje cuede Jesucristoque cûinávupe, dajocaivubu maje âmeina teiye báquede aru jáve ðabevu yópe maje âmeina ðaiyuepe. <sup>25</sup> Ñai Espíritu Santo apure ðaibi majare mamaûmeque. Que baru úre coreicôjeiye javvu majare caiye maje ðaiyede, maje dápiaiyeede máre. <sup>26</sup> “¿Meara márica apevu pueno?” arí dápiaiye jaubevu majare. Majacavure jarare ðaiyue jaubevu majare. Aru jorojine ðaiye máre jaubevu majare.

### **Cadatejarã muje baju**

(2 Ts 3.13)

**6** <sup>1</sup> Muja, jívũ, cûinácũ mujacacũ ùi vainí turu âmeina ðayũ, muja ñai Espíritu Santoi ðaicôjeimara cadatejarã úre, ùi dajocaquiyepe aivũ ùi âmeina teiyede. Ména meadarí, cadatejarã úre. Aru me jájara, muja máre vainí tubenajivũ úpe. <sup>2</sup> Muje baju cadatejarã, apecũ ùi ñájimequiyepe aivũ. Nópe ðaivu baru, ðaivubu muja yópe Cristoi ðaicôjeiyepe.

<sup>3</sup> Ácũ pœcũ “Mearo ðaivu yũ”, arí dápiaiũ baru mearore ðabecuvacari, ùi bajuma jujoyayube ù. <sup>4</sup> Caivũ jári corevajarári ne baju ðaiyede, coreóvarãjivũ mearore o âmenore. Aru ñai mearore ðayũ torojujacurí ùi nópe ðaiye boje. Ëbenita jámecuva apevu ne ðaiyede, “¿Name pueno mearore ðari?” arí jëniari jámejacurí ù. <sup>5</sup> Que baru muja coapa me jári corevaiye javvu mujare muje ðaiyede.

<sup>6</sup> Ñai bueyũ Jûmenijicui yávaiye méne jíjacurí úre bueipœcure apejïe ùi me cûvaede, que ðarí cadatecuyũ úre bueipœcure javéde.

<sup>7</sup> Muje bajumia apecure jujoaicôjemejara. Jûmenijicũ bojedacuyume caivũ pœvare yópe ne ðaiyepedeca. Que baru pœcũ cubebi jujovari buojayũ Jûmenijicure. <sup>8</sup> Nai ðayũ yópe ùi baju âmeina ðaiyuepe ùi baju âmedarí coatecuyume Jûmenijicure jaruvarí aru ñájicuyume cainumua. Ëbenita ñai ðayũ yópe ñai Espíritu Santoi mearo ðaicôjeiyepe cuvacyume járavu cûiméjáravu baquinóre Cristoque. <sup>9</sup> Que baru ùetubevuvu mearo ðarãjarevu, Jûmenijicui bojedacuiyepe aivũ majare me ãnijáravu, ùi beoijáravu baquinói. Majare me bojedacuyume, maje ùetubevuvu dajocabedu maje ðaiye méne, cadatenajivũ apevure. <sup>10</sup> Que baru mearo ðarãjarevu caivũ pœvare cainumua. Aru pueno mearo ðarãjarevu majacavu Jesúre ju aivure.

### **Pablo ùi majicaino aru meaicôjeino Galaciavure**

(Jn 3.3-7; 2 Co 5.17)

<sup>11</sup> Jájara muja caride yo ji toivacainore mujare urarõa toivaivũ ji bajui. <sup>12</sup> Ina pœva buraicôjene ðaiyuríduivũ mujare muje cajede nópe ðaivubu, judíova ne me járajaiyepe aivũ náre. Ëbenita nópe ðaivubu, ina judíova ne ñájine ðabenajiyeye aivũ náre yópe ne ñájine ðaiyepe ina coreivure Jûmenijicui meadaquiyede náre Cristoi yaiye báque boje jocusujaravena.

<sup>13</sup>Ina buraicōjeivūvacari ne cajede đabenama yópe Jūmenijicui đaicōjeiyede ũi coyuiye báquepe Moisés bácure. Ŭbenita buraicōjene đaiyurivūbu mujare, yópe torojurī “Ina pōeva ju arī, buraicōjedama ne cajede yópe ñuje đaicōjeiyepe náre”, arī coyurājivū. <sup>14</sup>Ŭbenita ye baju āmevū yure yópe ne đaicōjeiye. Quénora torojvū yū ji ũmei yo boje: Jesucristo yaidéjaquemavū jocusujaravena yure boje. Que baru caride ũbevū yū caiye iye āmeina teiyede ijāravūcavū ne đaiyede. Yū ye dāpiabevū yópe ijāravūcavū ne dāpiaiyepe. Aru na máre ũbenama yure caride. <sup>15</sup>Que baru ye baju āmevū pōecui buraicōjenu ũi cajede o buraicōjemenu. Quénora bojecvū majare maje cuede mamarūmū pōteivūpe meaūmeque. <sup>16</sup>Jūmenijicu torojurivū me cure đajacurī cārijimevūva aru cōmaje āroje jājacurī caivū ina đaivūre yópe ji bueiyepe Jesucristoi đaicōjeiyede. Ina nópe đaivū jāve Jūmenijicui pōevatamu na.

<sup>17</sup>Yurecabu cūvacū ji churiá báquede ji bajui, ji memecaiye boje Jesúre. Que baru yo jipocare ina Jesucristore ju aivūre cārijovaivū chīore đabejarāri yure.

<sup>18</sup>Muja, jívū, maje jabocu Jesucristo mearo đacajacurī mujare muje ũmei bojecubeda ũi me boje. Quédecabu. Quénoramu.

# Efesios

Mamabuinore coyuiyebu Pablo bácu ũi toivaicōjeiye báquede paperayocare Éfeso āmicurīīmarocavu Jesúre ju aipōevare. Pablo bácu judíovacacu bácuvacari, Jesús ũi yávaiye méne beorī coyuićōjeimu marejaquémavu, coyucyu ũi yávaiye méne judíova āmevure, judíova ne ju abe boje ũi coyuiyede. Lucas bácu coyurejaquemavu Pablo bácu borore Hch 7:57-8:1, 9:1-31, 13:1-28:31, aru Éfeso āmicurīīmarocavu ne borore Hch 18:19-20:1, 20:17-38. Javede Pablo bácu toivacaipōecu bácu toivaicōjenejaquemavu pucayoca ũi paperayocare Tesalónica āmicurīīmarocavure, aru pucayoca ũi paperayocare Corinto āmicurīīmarocavure, ũi paperayocare Galacia āmicurīījoborōcavure, aru ũi paperayocare Roma āmicurīīmarocavure máre. Apevu ne dāpaiyepe, javede toivaicōjenejaquemavu ũi paperayocare Filipos āmicurīīmarocavure. Toivaicōjenejaquemavu yōbecuriyoca ũi paperayocare āniuju bácarōre 60 d.C., ũi cuede āmeina teivure jēni jacoĩnami Roma āmicurīīmaroi, cūináyocare Éfeso āmicurīīmarocavure, apeyocare Colosas āmicurīīmarocavure, aru apeyocare Filemón mácu. Tíquico bácu nuvarejaquemavu iyoca yōbecuriyocare cūináturu ũi nuiyede Roma āmicurīīmarore pu Asia āmicurīījoborōi. Pablo bácu coyurejaquemavu ũre toivacaipōecu bácu aipe ũi toivacaquiye báquede diyocare.

Diyocaque Pablo bácu coyurejaquemavu Jūmenijicui coreóvaiye báquede ũi cuedaquiye jipocamia caivure aru caiyede máre, epecuyure caivu Jesúre ju aipōeva mārājivure, judíova aru judíova āmevure, yópe cūináyajubocavupe aru Jesucristo maje jabocuva. Pablo bácu jádovarejaquemavu maje cuede Jesucristoque cūinávupe yōbecue ũi jēvari coyuiyeque: maja yópe cūramipe aru Cristo yópe cūravape cūramitōbui (2:20-22); maja yópe pōecui bajupe aru Cristo yópe maje jipobupe (4:15-16, 5:23); aru maja yópe jímarepacope aru Cristo yópe majemarepacupe (5:27-32). Aru Pablo bácu maucvaicōjenejaquemavu Jesúre ju aipōevare abujucque jēvari coyucu yópe churara ũi curinmu bácarōcacu bácu ũi cuvaepe (6:11-17).

## Pablo ũi meaicōjeino Éfesocavure

(Hch 18.19-21; 19.1)

**1** <sup>1-2</sup> Yu, Pablo, meaicōjeivu mujare, Éfeso āmicurīīmarocavure Jūmenijicui pōevare. Yūbu Jesucristoi yávaiye méne beorī coyuićōjeimaracacu. Yu toivaicōjeivu apere iyoca paperayocare mujare, Jesucristore ju aivure dajocabevuva aru curivure ũque. Majepacu Jūmenijicu, maje jabocu Jesucristomaque, mearo đacajacurī mujare bojecubeda ũi me boje. Aru torojurī cure đajacurī mujare cārijimevuvu.

## Cristo ũi mearo đacaino maje ũmene

(Mr 10.45; 14.24; Lc 24.49; Jn 14.26; 16.13-15;

Hch 1.4; 2.33; 9.12-14; 2 Co 1.22; Col 1.14)

<sup>3</sup> Jínajarevu Jūmenijicure mearore, maje jabocu Jesucristoi mearore jímure, jípacure máre. Ũrecabe mearo đacayu majare, maje cue boje

Cristoque cūinávũpe. Maje ũmene mearo đacaibi ũ caiye méque, ũi jaboteiye boje majare. <sup>4</sup> Javede Jũmenijicui cuedaquiye jipocamia ijárovũre, beorejaquemavũ majare ũi pœva márovivũva, maje curājiye boje Cristoque cūinávũpe. Majare beorejaquemavũ, maje curājiyepe ayũ pueno meara baju aru ye āmeno cubevũ ũi jǎinore. <sup>5</sup> Jũmenijicui ũe boje majare, jipocamia majidejaquemavũ epecũyũre majare ũi mǎrape paivũ bǎrǎjivũre Cristoi đaquiye boje. Ũi ũrœpe đaiyũcũ, “Que đacũyũmu yũ”, arĩ dǎpiarejaquemavũ Jũmenijicũ.

<sup>6</sup> Jĩdevũ Jũmenijicũre mearore, ũi ũrarō mearo đacaiye boje majare. Ũi daroiye bǎque boje mamacũre, pare ũi ũmũre, ũrarō mearo đacarejaquemavũ majare. <sup>7</sup> Jesucristoi jive meiyẽ bǎque boje ũi yaiyede, bojedaibi majare, jodecũyũ. Que baru Jũmenijicũ ārumeteibi maje vainĩ turĩ āmeina teiyede. Que đaibi Jũmenijicũ ũi ũrarō mearo đacaiye boje. <sup>8</sup> Pueno ũrarō baju mearo đacaibi majare ũi majiéque, maje me coreóvarĩ đarājiyepe ayũ. <sup>9</sup> Jũmenijicũ majide đaibi majare ũi ũrœre yo jǎđovameno mǎcarœre jipocamia ũbenita jǎđovainore caride. Que đaibi majare yœpe ũi ũrœpe, maje majinajiyepe ayũ caiye iye ũi mearo đacakiyede majare, Cristoi đaiye bǎque boje. <sup>10</sup> Iye ũi đaiyuede đacũyũme Jũmenijicũ ānijǎravũ, ũi beojǎravũ baquinói. Cójijovacũyũme caivũ ũi cuedaimarare, cavarōcavũre aru joborōcavũre mǎre, Cristoi jabotequiyepe ayũ caivũre.

<sup>11</sup> Jũmenijicũ beorejaquemavũ ñũjare judíova Jesũre jũ aivũre, epecũyũ ũi pœvare Cristoque cūinávũpe. Jipocamia Jũmenijicũ majidejaquemavũ nœpe đacũyũre yœpe ũi dǎpiarĩ đaiyũrœpe. Jũmenijicũrecabe ñai vaidé đayũ caiyede yœpe ũi ũrœpe. <sup>12</sup> Que baru caivũ ñũjare, mamarũmũcavũ napĩni coreivũre Cristoi meadaquiyepe ñũjare, Jũmenijicũ mearore jícœjeimi ñũjare ũre, ñũje mearore jĩmũ macũyũ cainũmũ, ñũje cuede cǎreja. Mearore jĩye jāvũ ñũjare Jũmenijicũre, ũi me boje caivũ pueno. <sup>13</sup> Aru mũjare mǎre epedejaquemavũ Jũmenijicũ ũ jinare Cristoque cūinávũpe. Mũje jǎpiaiyẽ bǎquede iye yǎvaiyede jǎvene, Jesucristoi yǎvaiye mēne, jũ arejaquemavũ mũja diede. Que baru dinũmũre ñai Espĩritu Santore darorejaquemavũ mũjare Jũmenijicũ yœpe “Đacũyũmu”, ũi aiyẽ bǎquepedeca. Ũre darorĩ, jǎđovarejaquemavũ mũjare ũ jinare. <sup>14</sup> Ñai Espĩritu Santoi cœ boje mũjaque, majivũ maja jǎve cǎvarǎjivũre caiye iye mēne Jũmenijicũ “Jícũyũmu” ũi aiyẽ bǎquepedeca. Que baru majivũ maja Jũmenijicũ meara baju đacũyũre majare, caivũ ũ jina mǎrajivũre, yœpe ũi ũrœpe. Que baru jĩnajarevũ mearore ũre.

**Pablo ũi jēniaino Jũmenijicũque ũi majide đaquiyepe ayũ Jesũre jũ aipœvare**

(Mt 22.44; 1 Co 15.27; Col 1.18)

<sup>15-16</sup> Jũmenijicui mearo đaiye boje caiye iyede, torojuede jĩvũ yũ ũre. Jǎpiaivũ yũ mũje borore, jũ aivũre maje jabocũ Jesũre aru ũrivũre caivũ Jũmenijicui pœvare mǎre. Diede ji jǎpiainũmũ mǎcarœre pũ caride mǎre, đajocabecũva jĩvũ yũ torojuede Jũmenijicũre mũjare boje. Cainũmũ ārvũ mũjare ji jēniayẽ coapa Jũmenijicũque. <sup>17</sup> Jēniavũ yũ maje jabocũ Jesucristoi mearore jĩmũre, ñai majepacũ meacũ bajure, ũi majide đaquiyepe ayũ mũjare mũje ũmei, mũje coreóvarĩjĩyepe ayũ Jũmenijicui jǎđovaiyede mũjare jǎvene. Que jēniavũ yũ, mũje coreóvarĩ nurajiyepe ayũ Jũmenijicũre pueno baju me.

<sup>18</sup> Jēniaivū yū Jūmenijicure, ūi dāpiare đaquiepe ayū mǎjare me nurié, mǎje majinajiepe ayū ūi mearo đacaquiyede mǎjare. Mǎjarecabu ūi cutuimara mǎcavū, napini coreñajivū ūi mearo đacaquiyede mǎjare. Ŭvū yū mǎja coreóvaivure iye mǎje napini coreiyede. Mǎjavacari cǎvarājaramu ūi űrarō mearo đacaquiyede mǎjare yópe “Jícuyūmu” ūi aiey bǎquepe caivū ūi pōevare. Ŭvū yū mǎja coreóvaivure iye mǎje cǎvarājīyede. <sup>19-20</sup> Mǎjarecabu cǎvarivū ūi paruéde pūeno űrarō bajure. Iye űre parué cūiméque Jūmenijicu cǎdateibi mǎjare, caivū Jesucristore jū aivure. Ŭvū yū mǎja coreóvaivure iye mǎje parué cǎvaede. Yópe iye Jūmenijicui majié paruéque ūi nacovaiye bǎquepe Cristore yainore jarǎvarī aru yópe iye ūi dobare đaiye bǎquepe mǎre űre ūi meapǎravū yebai cavarō mearoi, quédecabu iye ūi majié paruéque. Dieque cǎdateibi mǎjare Jūmenijicu. <sup>21</sup> Aru ñai Cristorecabe jaboteyū caivū jabova pūeno. Caivū cōjeivure, parǎrivure, pǎrucǎvarivure, aru jabovare mǎre pūeno jaboteyube Cristo, cavarōcavure aru joborōcavure mǎre. Que baru caivū náre me pueđaiye javvū űre. Quédecabu caride ijǎravui. Aru quédeca baquiyébu mamajǎravū, Jūmenijicui đaquijǎravui mǎre, ijǎravū cūinǎburu yóboi. <sup>22</sup> Majepacū Jūmenijicu epeibi Cristore ne jabocǎva caivure. Caivū pōeyajuboacavū Jesúre jū aivure ijǎravui, Jūmenijicu epeibi űre mǎje jabocǎva. <sup>23</sup> Mǎje cue boje Cristoque, jaubevū űre. Yópe ūi mǎjaque cǎcu buojaiyepe ijǎravui, buojaibi ū. Nopedeca Cristoi cue boje cainore, ijǎravure aru cavarō mearore mǎre, jaboteyube caiyede.

**Jūmenijicu ūi meadaino mǎjare ūi mearo đacaiye bojecubeda**

*(Ef 6.11-12; Col 1.13; 2.13; 3.6)*

**2** <sup>1</sup> Javede mǎjarecabu yaivū bǎcavupe mǎje űmei coateimara mǎcavū mǎja Jūmenijicure jarǎvarī, mǎje vainī tuiye bǎque boje aru mǎje āmeina đaiyue bǎque boje mǎre. <sup>2</sup> Dinūmu mǎcarōre mǎja curivū barejaquémavū āmeina đaiyū yópe ijǎravǎcavū ne cǎepe āmeina đaiyū. Mǎja jū aivū barejaquémavū ñai āmecū, abujuvai jabocure. Ŭrecabe buoyū ina pōeva Jūmenijicure jū abevure. <sup>3</sup> Javede mǎja caivū, ina Jūmenijicure jū abevupe, curivū barejaquémavū, āmeina đaiyū. Mǎje āmeina đaiyuepe đarī, mǎje baju űrōpe đarī, aru mǎje űme dǎpiaiyepē mǎre đaiyū barejaquémavū mǎja. Que baru mǎjare Jūmenijicu āmeina jǎri, ñájine đacuyū barejaquémavū caivū apevū pōevape mǎje āmeina teiye boje. <sup>4</sup> Mǎja Jūmenijicui ñájine đarājimara majurórivǎvacari, pare cōmǎje āroje jǎimi mǎjare ū, ūi űrarō baju űe boje mǎjare. <sup>5</sup> Que baru ū jǎñū mǎcǎvacari mǎjare yaivū bǎcavupe paivure mǎje āmeina teiye boje, apure đaiibi mǎjare apué mamaeque yópe ūi nacovaiye bǎquepe Cristore yainore jarǎvarī. Nopedeca jǎimi mǎjare Cristoque cūinǎvupe. Que baru curivūbu mǎja apué mamaeque. Jūmenijicui mearo đacaiye bojecubedecabu meadaiye mǎjare.

<sup>6</sup> Mǎje cue boje Cristoque cūinǎvupe, yópe Jūmenijicui nacovaimara mǎcavupe yainore jarǎvarī curivūbu mǎja caride. Aru Jūmenijicu jǎimi mǎjare yópe ūi jaboteimarape, ñai abujuvai jabocui buobe boje mǎjare caride. Jūmenijicu jǎimi mǎjare yópe ūi dobare đaimara mǎcavupe Cristoque cavarō mearoi. <sup>7</sup> Nópe đaiibi, jǎđovacuyū caivū pōevare cainūmūa pūeno űrarō mearo ūi cōmǎje āroje jǎiyede mearo đacayure bojecubeda mǎjare, Cristoque curivure cūinǎvupe. <sup>8</sup> Jūmenijicui mearo đacaiye bojecubedecabu

úi meadaiye majare maje âmeina teiyede jaruvârî, maje ju aiye boje ére. Maja meadarî oabevu maje bajumia. Jûmenijicurecabe meadayu majare. <sup>9</sup>Ûbenita meadabebi majare maje mearo daiye boje. Maje mearo ðarîduiye quíjie bajutamu. Que baru urarô jaurôtamu. Ye meadaiye majibevu maje bajumia. Quénora Jûmenijicu meadaibi majare úi mearo ðacaiye bojecubeque. Que baru pôecu cubebi “¿Meacu bárica yu?” arî buojayu. <sup>10</sup>Jûmenijicurecabe ñai cuedayu majare. Apué mamaeque cure daiyurejaquemavu majare, maje mearo ðarâjiyepe ayu caivu pôevare cainumua. Que ðarejaquemavu úi cutuiye báque boje majare, maje ju arâjiyepe ayu Cristore. Jipocamia “Ðajarârî na mearo matuiyeda”, arî dápiarejaquemavu Jûmenijicu maja curâjivurâ Cristoque cûinávpe.

**Maje cue cârijimenoque Cristoi daiye báque boje**

(Mt 21.42; Jn 14.27; 1 Co 3.16-17; Col 1.20; 2.14; 1 P 2.4-5)

<sup>11</sup>Muja, judíova âmevu, dápiajarâ aipe muje cue báquede javede. Muje pôeteiye báquede ijâravui, Jûmenijicui pôeva âmenejaquemavu muja. Ñuja ùmva judíova buraicôjeivu ñuje cajede, coreóvare ðarâjivu ñuje baju Jûmenijicui pôeva, âmeina járejaquemavu muja buraicôjemevure. “Jûmenijicure coreóvabevubu”, aivu barejaquémavu mujare. Ûbenita iye buraiye ùmvai bajure pôeva ne ðaiyedecabu ne bajumia quénora. <sup>12</sup>Dinumu mácarômiareca curivu barejaquémavu muja Cristore cuvabevuva. Jûmenijicui pôeva úi beoimara mácavu âmenejaquemavu muja. Que baru cubevu barejaquémavu muja Jûmenijicui pôevaque. Jûmenijicu “Mearo ðacacuyumu yu mujare”, úi arî coyuiye báque boje úi pôevare, “Yurecabu muje jabocu. Aru mujarecabu ji jaboteimara”, arî coyurejaquemavu na mácavure. Úi nôpe coyuiye báquede, ye coyubedejaquemavu mujare. Ijâravui curivu barejaquémavu muja Jûmenijicure coreóvabevuva. Que baru, “Ye meadaimara âmenajaramu maja”, arî dápiarejaquemavu muja. <sup>13</sup>Ûbenita caride curivubu muja Cristoque cûinávpe. Muja Jûmenijicui pôevacavu âmenejaquemavu javede. Ûbenita caride cójijovaimaramu ñujaque. Que ðaibi mujare Jûmenijicu, Jesucristoi jive meiyé báque boje úi yaiyede.

<sup>14</sup>Jesucristorecabe cure ðayu majare cârijimenoque. Javede maucvarivu barejaquémavu maje baju, judíova aru judíova âmevuque. Maje baju coateivu barejaquémavu maja. Ûbenita Jesucristo úi yainoque jaruvarejaquemavu majare coatede ðaino mácarôre, cure ðacuyu majare yópe cûináyajubopeda, judíovare aru judíova âmevure máre. <sup>15</sup>Cristoi yaiye báque boje, coreóvaivubu maja buojabenajivure boropatebevu Jûmenijicui jáinore maje ðarîduiye boje yópe úi ðaicôjeiyepe úi coyuiye báquede Moisés bácare. Aru Cristoi ñájcáiye báque boje caivure iye ðaicôjeiyepe ðabevure, coreóvaivubu maja Jûmenijicui ñájine ðabenajimarare, maje ðabe boje yópe úi ðaicôjeiyepe. Que baru ina pucayajuboa pôeyajubocavu bácavu Jesúre ju aivure, cûináyajubo mamayajubo pôeyajubocavure cuedarejaquemavu ú, ne curâjiyepe ayu úque cûinávpe. Que baru cârijimenoque cavu maja caride. <sup>16</sup>Ñuja judíovare aru muja judíova âmevure máre, Jûmenijicu jáimi majare cûináturara boropatebevpe. Cristoi yaiye báque boje jocucjaravena, buojarejaquemavu ina pucayajuboa pôeyajubocavu ne maucvave báquede ne baju. Que teniburu yóboi, cójijovaibi majare cûináyajubo pôeyajubocavpe,

cārijimevva cure daibi majare Jūmenijicuque ūi yaiye báque boje jocucjaravena.

<sup>17</sup>Que baru darejaquemavu, coyucōjecuyu iye yávaiye méne pōevare cārijimena cure daiyede Jūmenijicuque. Diede coyucōjecudaibi mujare, judíova āmevure, Jūmenijicui pōeva āmevu bācavure. Aru ñujare máre, judíovare, cainumua Jūmenijicui pōevare, coyucōjecudaibi ū iye yávaiye méne. <sup>18</sup>Cristorecabe jēniare dayu caivu majare majepacu Jūmenijicuque. Ūi yaiye báque boje, cure daibi majare ūque cūinávure. Ñai Espíritu Santo cūinácu cadateibi caivu majare, judíovare aru judíova āmevure máre, maje jēniarajiyeye ayu majepacu Jūmenijicuque.

<sup>19</sup>Que baru caride mña, judíova āmevu, Jūmenijicui pōeva āmevure cubevu mña. Ijāravucavu Jūmenijicure ju abevure paivu cubevu mña caride. Quénora Jūmenijicui pōevatamu mña. Cavarō mearocavure paivutamu mña. <sup>20</sup>Maja Jūmenijicui pōeva ūi cūramipebu. Cūravaque daīnamipebu diñami cūrami. Ñña Jesúre ju aivu ne daroimara coyurājivu Jesús ūi yávaiye méne aru Jūmenijicui yávaiyede coyucaipōeva mamarumure ju arejacarā ñña Jesucristore. Aru bueni bárejacarā iye ūi yávaiye méne.

Que baru ñujatamu yópe cūrava Jūmenijicui mamarumu epeivape cūrami cāchinore. Aru mujatamu yópe apeva cūrava ūi epeivape ññe puenora, mñe ju aiye boje ūre ññapedeca. Aru Jesucristorecabe yópe cūravape cūramitōbui, paruriva apeva pueno. <sup>21</sup>Yópe ñai cūramine daipōecu caiva cūravare ūi tuoiyepe ároi tuoiye jaurōi, nopedeca Cristorecabe epeyu majare ároi majare cue jaurōi. Yópe ñai cūramine daipōecui vorī, cójijovarī tuore nuiyepe apeva cūravare buojacuyu diñami ūi daīnamī cūramine, nopedeca Cristorecabe ūre ju are nure daivu tenajiyeye ayu Jūmenijicure memecaivure. Yópe cūramine daipōecui meadami cūramine daiyeye pōeva ne Jūmenijicure mearore jīnajiñamine, nopedeca Cristorecabe pueno meara baju dayu ūre memecaivure, maje cue boje ūque cūinávure. <sup>22</sup>Que baru mña judíova āmevu máre curivu ūque cūinávure, Jūmenijicui cójijovaimaramu caivu apevu Jesucristore ju aipōevaque. Aru ñai Espíritu Santo cubi mñaque máre. Que teni apevu majare jári, Jūmenijicure pueđarī jīnajarama mearore majare boje.

**Pablo Jesús ūi bueicōjeimu ūi yávaiye méne judíova āmevure**

(1 Co 15.9; Gá 1.12; Col 1.25-27; 3.12-13)

**3** <sup>1</sup>Mña judíova āmevu, mñe Jūmenijicui pōeva teiye boje, jēniaivu yu ūque mujare boje. Yu, Pablo, buoimumu āmeina teivure jēni jacoīnami jīvui, ji coyuiye boje Jesús ūi yávaiye méne. Jesucristore memecayubu yu mña judíova āmevure boje. <sup>2</sup>Jāve majidivubu mña Jūmenijicu epeyu bācure yure, ji memecaquiyeye ayu ūre mujare boje, ūi mearo đacaiye bojecubeda. Que teni yure coyure daibi mujare iye ūi mearo đacaiye bojecubeda. <sup>3</sup>Jūmenijicu majide daibi yure ūi dāpiaye báquede javeita Cristorā, yo jáđovameno mácarōre jipocamia ūbenita jáđovainore caride. Que baru obebecamuaque toivaicōjeivu mujare diena.

<sup>4-6</sup>Yópebu ūi dāpiaye báquepe jipocamia: Mñe jápiaye boje Jesucristoi yávaiye méne, mña judíova āmevu Jūmenijicui meadaimaramu ñña judíovaque. Ññaque jacopurājaramu mña caiye iye Jūmenijicui mearo

ðacaiyede, ùi jíquiyede ùi pœvare. Ñujaque cūináyajubo pœyajibocavubu muja. Que baru ñujaque mearo ðacacuyume mujare Jūmenijicu yópe ùi aiyé báquepe. Caiye iye mujetamu, muje cue boje Jesucristoque cūinávupe. Iye ji toivaicōjeiye báquede jáivu baru coreóvarājaramu muja yure me majicure Jūmenijicui uróre yo jáðovameno mácaróre jipocamia ũbenita jáðovainore caride. Javede ácu pœcure Jūmenijicu jáðovamenejaquemavu diede, ùi dápiarí jáðovame máquede. Que baru javede, “Judíova quévuratamu Jūmenijicui meadarājimara”, arí dápiaríðurejaquemavu. ũbenita caride ñai Espíritu Santore majide ðaibi Jūmenijicui dápiayuróre, ñuja Jesúre ju aivure ne daroimarare coyurājivure Jesús ùi yávaiye méne aru Jūmenijicui yávaiyede coyucaipœvare, úre memecaivure.

<sup>7</sup>Yurecabu Jūmenijicui teorí epeimu úre memecacuyuva. Ũi majide ðaiye bojecubeda yure, bueyubu yu Jesús ùi yávaiye méne. Majide ðaibi yure ji ũmei ji buequiyeye ayu ùi uraró majiéque. <sup>8</sup>Yurecabu caivu ina Jūmenijicui pœva ne cāchinocacupe páyu baju. ũbenita Jūmenijicu uraró mearo ðacaibi yure, bueicōjeñu muja judíova ámevure iye yávaiye méne, muje coreóvarājiyepe ayu aipe baju meacure ñai Cristore aru aipe uraró mearo cūiménore ðacayure úre ju aivure. <sup>9</sup>Jūmenijicu ùi dápiainore jáðovameno mácaróre coreóvare ðaicōjeimi yure pœvare cūináturura beobecuva. Nai cuedayu bácu caiye ijāravauquede yópe ùi ðaiyepe ðaibi ũ ùi cuedariburu yóbore pu carita. <sup>10</sup>Que ðaibi Jūmenijicu caivu cōjeivure aru parurivure máre, ángelevare aru abujuvare máre, ne coreóvarājiyepe ayu caride ũ majicure caiyede aru caiye ùi dápiaye me matuiyede. Diede coreóvarājarama ne jáiyede Jūmenijicui ðaiyede ũ jinare caivu Jesucristore ju aivure.

<sup>11</sup>Que baru Jūmenijicu ðarejaquemavu yópe ùi dápiarí ðaiyurópe, “Que ðacuyumu” ùi aino mácarópedeca, ijāravure ùi cuedaquiye jipocamia. Maje jabocu Jesucristoi ðaiye báque boje, Jūmenijicu ðarejaquemavu caiyede ùi uróre. <sup>12</sup>Maje cue boje Jesucristoque cūinávupe aru maje ju aiyé boje úre jidubevuva jēniaivubu Jūmenijicuque. Majidivubu jidué jaubede majare ùi jáinore. <sup>13</sup>Que baru paruróreca jēniaivu mujare. Ũetubevuva chīomejara muja ji ñájiyede ji bueiye báque boje mujare. Ji ñájiyede mujare boje, mujarecabu Cristoi meadaimara. Jáve uraró mearo caðateino cvarivubu muja caride.

### Pablo ùi jēniaino Éfesocavure Jūmenijicuque

<sup>14</sup>Muja, judíova ámevure, muje Jūmenijicui pœva teiye boje, majepacu Jūmenijicure ñuatutarí torojuede jívu yu ùi jáinore. <sup>15</sup>Majepacu Jūmenijicurecabe cuedayu bácu caivu cavaró mearocavure aru caivu ijāravucavure máre. Caivu náre ne yajuboa coapa epedejaquemavu ũ. Que teni népacupe páyu curí, coreóvare ðaibi náre coapa aipe meacu ārojajurocure pœcui pacure. Que baru jēniaivu Jūmenijicuque mujare boje. <sup>16</sup>Uraró mearo bajutamu Jūmenijicui parué. Que baru jēniaivu yu úque, ùi pueno ju are nure ðaquiyepe ayu mujare ùi majiéque yópe ùi parué cūimépe. Ñai Espíritu Santorecabe pueno ju are nure ðayu mujare ùi majiéque. <sup>17</sup>Jēniaivu yu Cristo cacuyure mujaque muje ũmei. Que ðacuyume ũ, muje ju aiyé boje úre. Jēniaivu yu ueque dápiarājivure muja aru ðarājivure caiye muje ðarājiyede, muje ue boje apevu Jesúre ju aipœva.

<sup>18</sup> Que baru muja caivu, apevu Jūmenijicui pōevaue, coreóvaivu buojarājaramu aipe Jūmenijicu urarō meacure. Yópe mearo đacaivybi ũ jabovare aru jabova āmevure máre. Cainoa joborōacavure mearo đacaivybi cainumua, Cristoi ũe boje pōevare. <sup>19</sup> Iye Cristoi ũede pōevare ye jápiarĩ eaivu buojabenamu maja. Ũbenita maja coreóvarĩ buojabevureca caiye ũi ũede, jēniaivu yu muje urarō coreóvare nurajipepe ayu. Ũi ũede coreóvarĩ tenanurajaramu muja yópe Jūmenijicu bajupe.

<sup>20</sup> Mearore jįjarāri caivu majepacu Jūmenijicure. Ũi majié parúeue urarō mearo đare đacaibi majare, maje ũre jēniajuroe pueno aru maje dápiajuroe pueno máre. <sup>21</sup> Caivu pōeyajuboacavu Jesúre ju aivu ne cue boje aru Jesucristoi cue boje máre, mearore jįjarāri caivu majepacu Jūmenijicure dajocabevuva cainumua, jádovarajivu ũre meacu bajure. Quédecabu.

**Espíritu Santo ũi cójijovaino caivu Jesúre ju aipōevare cūináyajubocavupe**  
(Col 2.19; 3.12-13)

**4** <sup>1</sup> Caiye iye ji toivaicōjeiyede apecure mujare dápiaiĩ caride, parurōreca jēniaivu yu, muje đarājiyepe ayu yópe đaiye jaúepe mujare. Yábu buoimu āmeina teivure jēni jacoĩnami jįvui, ji memecaiye boje Jesucristore. Đajarā muja yópe Jūmenijicu “Que đajarāri” ũi arĩ dápiaiino mácarōpedeca, ũi cutuiye báquede mujare ũ jina marajiyépe ayu. <sup>2</sup> “¿Meara márica apevu pueno?” abejarā muja. Aru ména meadarĩ cadatejarā apevure. Napijara apevure. Aru jorojimevuvu náque jádovajara muje ũede náre. <sup>3</sup> Nai Espiritu Santo cārijimenoque cure đaiibi mujare. Cójijovaibi mujare cūináyajubocavupe cūináturu muje ũmei. Que baru đajarā caiyede muje oainope, meadarājivu iye muje cuede cūináturu muje ũmei.

<sup>4</sup> Cūináyajuborabu maja Jesucristore ju aipōeva. Cūinácưabe nai Espiritu Santo. Cūinároramu yo maje napini coreino Jūmenijicui mearo đacaquiyede majare, ũi cutuimara mácavure, maje cıvarājiyepe ayu diede. <sup>5</sup> Cūinácưabe maje jabocu Cristo. Cūináenamu iye yávaiye me, maje ju aye. Cūinácưabe nai maje jádovaimu ocoque. <sup>6</sup> Cūinácưabe majepacu Jūmenijicu, maje mearore jįmu, caivu Jesúre ju aipōeva majepacu. Caivu Jesúre ju aipōeva maje jabocube ũ. Caivu Jesúre ju aipōevare memecicōjeimi ũre maje đaiyeque majare coapa. Aru caivu Jesúre ju aipōevaue cubi ũ.

<sup>7</sup> Majare coapa đare đaiibi Cristo ũi majide đaiye bojecubeda. Yópe ũi urōpe mearore đare đaiibi majare coapa. <sup>8</sup> Cristoi que đare đaiyede, yópe arĩ, Jūmenijicu toivaicōjenejaquemavu javede ũi yávaiyede:

Vaidėjaquemavu ũi mauva mácavure. No yóboi, copaini  
muri nurejaquemavu ũmui. Que baru na obedivure, ũi  
buoimarare, nuvarejaquemavu ũi yóboi. Que teni ěmuriburu  
yóboi, darorejaquemavu pōevare ũi majide đaiyede náre, arĩ  
toivaicōjenejaquemavu Jūmenijicu.

<sup>9</sup> “Copaini muri nurejaquemavu ũmui”, Jūmenijicui yávaiyede coyucaipōecu bácuĩ aino mácarō, aipe aiyurōma no? Yópe aiyurōmu: Cristo ũi muri nuquiyi jipocai, javede ěmeñu mácu ijāravui, corejaquemavu joborō jįvui, yaivu bácvu ne curōi. <sup>10</sup> Aru nai ěmeñu mácvurecabe muri nuñu cojedeca pu cavarō mearo Jūmenijicui curōita, cıcu cainore caride aru cıcvuy cainore cainumua máre. <sup>11</sup> Nai Cristorecabe jįy ũre ju aipōevare majide đaiyede, maje mearo

ðaivu buojarājiyepe ayu yópe ūi ūrōpe. Epeibi apegvure ūi yāvaiye méne beorī coyūicōjeimara mārāživūva, aru apegvure Jūmenijicui yāvaiyede coyūcaipōeva mārāživūva. Epeibi apegvure ūi yāvaiye méne coyūipōeva mārāživūva, aru apegvure ūre ju aivure ne coreipōeva mārāživūva, aru nāre bueivū mārāživūva märe. <sup>12</sup>Que ðaibi meaðacuyū caivū Jūmenijicui pōevare, maje memecaivū buojarājiyepe ayu ūre.

Que teni pūeno baju ðare ðaibi caiyajuboa pōeyajuboacavū Jesúre ju aipōevare Jūmenijicui ūrōpe yópe pōecui baju bucuiyepe. Majamu Cristoi bajupe paivū. <sup>13</sup>Jūmenijicui ūrōpe pūeno ðare nūrajaramu maja, pū maje eaiyeta curāživū cūināturu maje ju aiyede Jesucristore, Jūmenijicui mácure, aru cūināturu maje coreóvayede märe aipe ārojacure ūre. Bucuvape paivū barājāramu maja maje ūmei. Que baru buojarājaramu curivū Cristo bajupedeca. Aru Jūmenijicure ju arī coreóvarājaramu maja ye jaubeda. <sup>14</sup>Que baru juedovape paivū maje cubenajiyepe ayu, Cristo jībi majare ūi méne. Juedova pūcaūmea curivūbu. Napedeca ina Jesúre ju aipōeva pūcaūmea curivū baru, oatūvaivūbu ne dāpiaiyede cainūmua, ape bueiyede jápiaivūva. Ina bueipōeva borocurivū me majidivūbu aipe ju are ðarājivū apegvure ne borocueque. Que baru bucuvape paivū barījārajarevū maje ūmei, jušovaimara āmenajivū yópe juedovape. <sup>15</sup>Ūbenita coyurājarevū Jesús ūi yāvaiyede jāvene. Maje yópe coyuiyede jáðovarajarevū maje uede maje bajumia, aru nāre maje coyūimarare märe.

Que ðaivū baru, Jūmenijicui ūrōpe ðare nūrajaramu maja, maje cūe boje Cristoque cūinávūpe. Maja ūre ju aivū caiyajuboa pōeyajuboacavū ūi bajupe paivūbu. Aru ūvacari maje jabocube, majare ðaicōjeñū. <sup>16</sup>Ūi ðaicōjeiye boje, maja caivū ðarī majidivūbu yópe majare jauēpe ūi ūrōre. Cristoi bajucarōpebu maja coapa. Pōecu cuvacu baru caiye ūi bajuquede āri die cūe jauřōi, ðaquiyepe ayu yópe ðaiye jauēpe, me cubi ñai pōecu. Quédecabu maje cūede Cristoque. Cristoi bajure bucúóvayipebu, maje ðaiyede ðare nūmuri yópe ūi majide ðaiyepe, aru maje cadateiyede apegvure, nāre ūrī.

#### **Apué mamae jauřō majare, Jesúre ju aipōevare**

*(Ro 1.21-25; 12.5; Col 3.9-10, 13; Stg 1.19-20)*

<sup>17</sup>Ji cūe boje Jesucristoque cūinávūpe, coyūquijivū mūjare paredeca. Ðabejarā mūja yópe ina Jūmenijicure ju abevū ne ðaiyepe. Iye ne ðaiyepe paiyede dajocajarā mūja. Nāmu ūbenina dāpiaivū. <sup>18</sup>Que baru jápiarī coreóvabema na. Iye apué mamaene, Jūmenijicui cuvare ðaiyede ū jinare, cuvabema na. Ūi yāvaiyede jápiaiyubema. Que baru Jūmenijicure coreóvabema. <sup>19</sup>Iye chīomema ne āmeina ðaiye boje, ne dāpiaino mearo cube boje. Torojurivū ðaðama caino āmenore. Ūrarō baju āmenore ðaðama dajocaiyubevūva. <sup>20</sup>Nópe ne ðaiyedeca mūjacapūravū buebedequemavū Jesucristore ju aivū ne ðaiyepe jauřōre. <sup>21</sup>¿Jāve jápiabedecarārū mūja Jesús ūi yāvaiye méne? ¿Buebedecarārū mūja diede? <sup>22</sup>Que ðaivū baru, dajocajarā aipe ārojae máquede mūje āmeina ðaiyueque. Ðare nūivū barejaquémavū āmenore mūje āmeina ðaiyue boje. No boje, jušovaimaratamu mūja. Que baru pūeno āmenore ðaivū baru aru dajocabevū baru mūje javeque ðaiye báquede, bījarājaramu mūja coateivūpe Jūmenijicure jarūvarī. <sup>23</sup>Mūje cūe boje apué mamaeque caride, Jūmenijicure oatūvaicōjejara mūja, cuvārāživū

muje mamaũmene aru muje dápiaino mamarore máre. <sup>24</sup>Đajarā muja yópe ina apué mamaene cūvarivure đaiye jauépe. Jūmenijicu ubi mujare curivure yópe ũi cuepedeca. Que baru cure đai bi mujare apué mamaeque aru mamaũmeque máre. Que baru meara mājara Jūmenijicui jáinore aru mearo đajarā apevu pōeva ne jáinore máre, yópe ũi yávaiyede jāvene coyuiyepe.

<sup>25</sup>Que baru borocubejarā muja caride. Quénora caivu muja coapa borotejarā jāvene muje baju. Cūináyajubo pōeyajubope paivubu maja. Cristoque cūinábajupe paivubu. Que baru jāve borotejarā muja. <sup>26</sup>Jaraivu baru, āmeina đabejarā muja muje jaraiye boje. Quénora vaidé đajarā muje jaraiyede maumena, dijāravumareca. <sup>27</sup>Muje jaraiye boje, jujovaicōjemejara ñai abujuvai jabocure, āmenore đabenajivu muje baju. <sup>28</sup>Cūinácū mujacacū ñavacacū baru, dajocajacurī ũi ñavaiyede. Quénora memeicōjējara ũre memeino mearore, ũi bojedaquiyeye aivu ũre jauéde aru ũi cadatequiyeye aivu ina cōmaje ārojarivure máre. <sup>29</sup>Muje yávaiyeque āmeina đabejarā apevure. Quénora me cadatejarā náre dieque. Muje yávaiyeque pare ju are nure đajarā náre Jesucristore. Coyujarā me yópe náre jauépe. Que đarī cadatenajaramu náre, ina jápiaivure mujare. <sup>30</sup>Chĩore đabejarā muja ñai Espíritu Santore, Jūmenijicu jicure. Ũrecabe jádovañu majare Jūmenijicu jinava. Ñai Espíritu Santoi cue boje majaque, majidivubu jāve cūinájāravu daquijāravu baquinóre meara baju jaubeda đacuyure majare yópe Jūmenijicui urōpe. <sup>31</sup>Ñájine đabejarā pōevare muje yávaiyeque. Jorojĩmejara náre. Aru jarabejarā náre. Jararī cođobobobejarā máre. Coyubejarā āmenore caivu ne jápiaiyede apevui borore. Aru āmeina dápiabejarā apevure máre. <sup>32</sup>Quénora cōmaje āroje jári, cadatejarā muje bajumia. Aru ārumetejarā apevu ne āmeina đaiyede mujare yópe Jūmenijicuvacari ũi ārumeteiye báquepe muje āmeina teiyede, diede jaruvārī, muje cue boje Cristoque cūinávupe.

### Aipe đaiye jaurō Jūmenijicui mārare

(Col 3.16-17; 4.5)

**5** <sup>1</sup>Majamu Jūmenijicui mára pare ũi umara. Que baru me đarī járajarevu, đarājivu yópe Jūmenijicui đaiyepe. <sup>2</sup>Caiye maje đaiyede đarājarevu maje ũe boje Jūmenijicure aru apevure máre. Cristovacari ũcu majare, boarī jaruvaicōjenejaquemavu ũi bajure majare boje. Ũi nópe đaiye báque cojurejaquemavu Jūmenijicure, yópe cojuépe ũre pōeva ne cūvaequede jíye aru ne āimarare boarī juarī jíye máre. Yópe iye jíye me corajavu ũre mumijuepe, nopedeca Cristoi yaiye báque majare boje me cojurejaquemavu Jūmenijicure. Yópe Cristoi đaiye báquepe urarō baju ũi ũe boje majare, nopedeca urarō ũre nuiye javvu majare máre.

<sup>3</sup>Majamu Jūmenijicui pōeva, ũre memecaivu. Que baru āmeina đaiye jaubevu majare. Aru āmeina đaiyede apevuque mujemarebucava āmevuque ye dápiabejarā muja. Aru muja ũmva nomivaque āmenore đaiyurī dápiabejarā muja. Aru muja nomiva máre ũmvaque āmenore đaiyurī dápiabejarā muja. Aru muje cūvae pueno baju cūvaiyurī dápiabejarā muja. Caiye diepe paiye muje dápíaru, meamenotamu. <sup>4</sup>Aru apejĩene máre đaiye jaubevu mujare. Que baru coyubejarā āmene cūyoje tede đaiyede. Aru yávabejarā ārumevupe máre. Yurivupeda yávabejarā āmeina baju yávaiye máre. Meamevu diepe paiye yávaiye. Quénora pueno baju torojuede jíjarā

Jūmenijicure. <sup>5</sup>Me majijarā mūja iyede jāve: Pōeva ðaivū baru āmenore apevuque nēmarebucava āmevuque aru pōeva āmeina ðaivū baru ūmuva nomivaque aru nomiva ūmuvaque, ina pōeva nōpe ðaivū curānūmenajarama Jūmenijicuque aru Cristoque märe. Ye ne jaboteimara āmenajarama na. Aru pōeva ūrivu baru pūeno baju ne cūvaede Jūmenijicure jaruvārī, pēpeimarare mearore jīvūpe paivubu na. Que baru pōeva nāpe paivubu cubenajivū Cristoque cavarō mearo Jūmenijicui curōi. <sup>6</sup>Jūmenijicu jorojīni jāri, nājine ðacuyume pōevare diepe paiyede ðaivure, ūre ju abevure, ne āmeno ðaiye boje. Que baru űamene jujoaicōjemejara mūja ūbeni cūeque, “Ye baju āmevu űuje ðaru āmenore”, ne aiye. <sup>7</sup>Ye ðabejarā nāpe ina āmenore ðaivūpe.

<sup>8</sup>Mujarecabu űeminoini cuivū bācavūpe javede, mūje āmenore ðare űiye bāque boje. Ūbenita caride, mūje ju aiye boje maje jabocu Jesucristore, miadāroī cuivūpebu mūja caride. Que baru mujare ðaiye jauvu yōpe ina miadārijāravui cuivū ne ðaiyepe. <sup>9</sup>Que teni meara marajāramu mūja Jūmenijicui jāinore. Caino mearore ðarājaramu mūja apevu pōeva ne jāiyede. Aru yāvaiyede jāvene coyurājaramu mūja märe. <sup>10</sup>Me ðarī jārajarevu, ðarājivū mearore yōpe Jūmenijicui ūrōpe. <sup>11</sup>Mujacapūravu ðabejarā yōpe ina pōeva űeminoini cuivūpe. Ina āmenore ðaivubu űeminocavu. Iye ne ðaiye bojecubetamu. Que baru iye ne āmeina ðaiyede coreóvare ðajarā näre. <sup>12</sup>Iye āmene ne ðaiye pōeva ne jāmene ūrarō baju cūyojetamu die. Que baru ye coyūiye jaubevū pōevare diena. <sup>13</sup>Ūbenita ne ðaiyede mūje coreóvare ðarīburu yóboi, majinajarama Jūmenijicu āmeina jāñure ne que ðaiyede. <sup>14</sup>Mūje coreóvare ðaiyede näre diena yōpe űeminore pēoiyepebu. Que baru pōeva, yōpe arī, yūriaivubu diepe paiyede ðaivurā:

Mū, Jūmenijicure coreóvabecu, cāñūpe páyu, coedajacu, coreóvacuyu ūre. Nacajajacu yainore jaruvārī. Aru Cristo cure ðacuyume mure miadāroī, arī coyūivubu.

<sup>15</sup>Que baru me matuiyeda ðajarā apejīe mūje ðaiyede. ðabejarā yōpe ina coreóvabevū, Jūmenijicure ārūmevu, ne ðaiyepe. Quénora ðajarā mūja yōpe ina coreóvaivū, Jūmenijicure ārūrivū, ne ðaiyepe. <sup>16</sup>Caride ijāravucavu Jūmenijicure ju abevū ūrarō āmene ðaivubu. Que baru cainūmua mūje oainope Jūmenijicure memecaiye jauvu mujare. <sup>17</sup>Que baru ðabejarā coreóvabevūpe. Quénora me ðarī jājara, coreóvarājivū maje jabocu Cristoi ūrōre, mūje ðarājiyepe ayu yōpe űi ūrōpe. <sup>18</sup>Ūcumejara pacotebeburī mūja. Pacoteivu baru, āmedarājaramu mūja, mūje ðaicōjeme boje mūje bajure. Quénora mujacapūravu ðaicōjeara űai Espiritu Santore űi majiéque. <sup>19</sup>Mūja que ðaivū baru, torojurājaramu. Que baru coyujarā mujevure iye Salmos āmicueque. Aru mearore jījarā Jūmenijicure yūriainoque, aru űi Espiritu jino yūriainoque märe. Yūriajarā mearore jīyede aru Salmore märe maje jabocu Cristore. Yōpe ðaivū mearore jīyeque yūriaivubu mūja mūje űmei. <sup>20</sup>Que baru caiye űi vaidé ðaiyede, torojuede jījarā majepacu Jūmenijicure cainūmua maje jabocu Jesucristoi paruéque, mūje cūe boje űque cūināvūpe. <sup>21</sup>Puedarī jāpiajarā mūja mūje bajumia, mūje puedaiye boje Cristore.

**Mearo ðaiye jauřō cūramicavūque aru memeivūque märe**

(Mt 15.4; 19.5; 2 Co 11.2; Col 3.18-25; 4.1; 1 P 3.1, 7; Ap 21.2, 9)

<sup>22</sup>Mūja, űmucurivū, ju ajarā mujemarepacure yōpe mūje ju aiyepe mūje jabocu Cristore. <sup>23</sup>Nomicucu jaboteyube jīmarepacore yōpe Cristoi

jaboteiyepe caivu majare, úre ju aivure. Cristorecabe ñai meadayu majare, caivu úre ju aivure. Úvacari maje jabocube, majare ñaicōjeñu. Que baru útame maje jipobupe páyu. <sup>24</sup>Aru majamu ñi bajupe paivu. Que baru yópe maje ju aipe jauépe Cristore cainumua, nopedeca ñmucucore ju aipe jauvu jímarepacure cainumua.

<sup>25</sup>Muja, nomicurivu, jecujarā mujemarepacore yópe Cristoi jecuépe caivu majare, úre ju aivure. Cristo pare ucu mujare, boarí jaruñaicōjenejaquemavu ñi bajure. <sup>26</sup>Que ñarejaquemavu maje ñameina teiyede jaruvarí, meadacuyu majare aru coavacuyu majare ñ jinava. Majare, úre ju aivure, meadarí joarejaquemavu majare maje ju aipe báquede aru maje jádovaiye báquede Jūmenijicure ocoque.

<sup>27</sup>Caiye iyede ñaibi, cuvacuyu ñ jinava majare. Yópe pōescu cuvaiyuepe jímarepaco bacodóre meaco bajure, nopedeca Cristo cuvaiyubi majare. Ico purubucodó bojyo baju, ye ñmeno cubecope, ñpedeca barājáramu maja, Jesucristore ju aivu máre. Pueno meara bajure aru ye ñmeno cubevure cuvacuyume Cristo majare, ñi baju ñaiye báque boje. <sup>28</sup>Ina nomicurivure coreiye jauvu némarepacore, ye jaubequiyepa aivu óre, yópe ne coreiyepe ne bajuáre náre coapa. Ñai coreyu jímarepacore coreyube ñi bajure. <sup>29-30</sup>Pōescu cubebi cōenícu ñi bajure. Quénora javateni me cucube. Aru cūinábajupe paivubu maja Cristoque. Que baru úrecabe coreyu majare.

<sup>31</sup>Jūmenijicu toivaicōjenejaquemavu ñi yávaiyede, yópe arí: “Que baru caride ácu pōescu jímarepaco bacodó cuvacuyu, ñi bucuvare ñajocacuyume. Aru jímarepaco cūvarí ómaque cūinávupetamu Jūmenijicui jáinore”, arí toivaicōjenejaquemavu Jūmenijicu. <sup>32</sup>Iye yávaiye Jūmenijicui toivaicōjeiye báque maiyójaevacari majare ñiede jápiarí coreóvajuorivare jávetamu iye. Ji dápiaru, iye yávaiye coreóvare ñaivu majare aipe ñrojaene Cristoi cuede majaque, úre ju aivunque. <sup>33</sup>Ubenita mujare máre coyuvu die. Muja nomicurivu, muja coapa jecujarā mujemarepacore. Aru muja ñmucurivu, muja coapa pueðajarā mujemarepacure.

**6** <sup>1</sup>Muja, jueðova, ju ajarā me mujebucuvare ne coyuiyede mujare, muje ju aipe boje Jesucristore. <sup>2-3</sup>Nópe ñaiye jauvu mujare. Nopedeca ñaicōjenejaquemavu Jūmenijicu ñi coyuiye báquede Moisés bácuere iye caipucapuruaape paiye ñaicōjeiye pueno me bajure. Jūmenijicu ñi coyuiye báquede yo ñaicōjeinore, “Yópe mearo ñacacuyumu yu”, arejaquemavu máre: “Mipacure aru mipacore máre urí ju ajarā. Que ñaivu baru, me curājaramu obediuja iñaravui”, arí coyurejaquemavu Jūmenijicu.

<sup>4</sup>Muja, nébucua, jorojine ñabejarā mujemarare. Quénora buejarā náre aru majicajará náre aipe ñaiye jauóre, ne torojure ñarājiyepe aivu Jūmenijicure ne ñaiyeque.

<sup>5</sup>Muja, memecaivu, ju ajarā me muje jabova iñaravucavure ne coyuiyede mujare. Mujamu náre memecaivu. Que baru pueðajarā náre me. Juovabevuva memecajará náre yópe muje Cristore memecajuroepe. <sup>6</sup>Cainumua ju ajarā náre me muje ñmeque. Ju aivu ñmejara náre quénora ne jáiyede mujare, “Mearo ñaivubu” ne arājiyepe aivu mujare. Yópe Jūmenijicui urópe memecajará muja, muje memecaíye boje Cristore. <sup>7</sup>Torojurivu memecajará muja. Yópe muje pōevare memecajuroepe ñmevu. Quénora yópe maje jabocu Cristore muje memecajuroepe ñajarā muja. <sup>8</sup>Coreóvajarā

me maje jabocu Jesucristovacari bojedacuyure caivu pōevare nāre coapa yebacavure aru memecaivure märe, ne mearo ðaiye báque boje.

<sup>9</sup>Muja, ne jabova, quédeca mujare memecaivu ne ðaiyepe me, muja märe ðajarā me. Cainumua “Bojedabequijivu mujare”, abejarā nāre. Coreóvajarā muja me ñai cavarō mearocacu caivu muje jabocure. Mujare memecaivure aru mujare märe, cūinácūrabe ñai muje jabocu. Ûtame jáñu caivu pōevare cūináturu. Que baru caivu nāre coapa bojedacuyume me yópe ne ðaiye báquepe.

**Jesúre ju aipōeva ne maucavarō abujuvai jabocure**

(Ro 13.12-14; Col 4.2-4; 1 Ts 5.8; He 4.12)

<sup>10</sup>Caride buojaivu yu iye ji toivaicōjeiyede apecure mujare. Parure ðajarā muja muje ũmei, muje cūe boje Jesucristoque cūinávure ũi parué pñeno urarō bajuque. <sup>11</sup>Cainumua meateivu bájarā muja, maucavarājivu copu ina āmenaque ijāravui. Yópe Romacacu churara ũi doiyepe meatecuyu ũi bajure, meatejarā muja iye Jūmenijicui jýe báquei muje ũmene ũi meaðaiyeque. Que teni abujuvai jabocu ye vainí tuyu buojabecube mujare ũi jujovaiyeque. <sup>12</sup>Pōevare copu maucavarivu āmevu maja. Quénora ijāravucavu abujuvare copu maucavarivubu maja. Ina cōjeivu, ina parurivu, aru ina jabova märe, nárecabu ijāravucavure jaboteivu. Ijāravu āmejāravu ñamipe paijāravubu, ina abujuva ne jaboteiye boje yore. <sup>13</sup>Que baru iye Jūmenijicui jýe báquei majare, maje meatenajiyeye ayu maje ũmene, ñni cuvajarā muja. Diede cavarivu cainumua abujuvai jujovaiyurinumure nāre copu maucavarivu bujarājaramu muja. Vainí tubenajarama mujare. Aru maucavariburu yóboi, curājaramu muja ijāravui parurivu muje ũmei.

<sup>14</sup>Que baru cainumua meateivu bájarā, maucavarājivu. Yópe ñai churara ũi buoiyepe ũi jārídícāvare, nopedeca buojarā muje bajure Jūmenijicui yávaiyede jāvene muje majiéque. Yópe ñai churarai taoiyepe ũi bajure jājaricaje doicajeque, nopedeca taojarā muje bajure muje mearo ðaiyeque. <sup>15</sup>Yópe curaidoare ũi doiyepe tutué núcyu, aru nurié cucuyu märe, nopedeca tutué nújara muje ũmei aru nurié coyujarā Jūmenijicui yávaiye méne, cārijimenoque cure ðaiyede pōevare ũque. <sup>16</sup>Yópe ñai churara ũi jēiyepe ũi taoivare ðomecuyu ũi mauvai tāuyoa uruiyoare, nopedeca cainumua jējara muja muje Cristore ju aiyede, abujuvai jabocu āmecu baju ũi āmedabequiyeye aivu mujare ũi jujovaiyueque. <sup>17</sup>Yópe ñai churara ũi cūvaepe moibo jājaribore taocuyu ũi jipobure, nopedeca cuvajarā muja Jūmenijicui meaðaiyede ũi jýe báquede mujare bojecubeda, muje meatenajiyeye aivu muje dápiayede. Aru yópe ñai churara ũi vainí tuiyepe ũi mauvare jaruvarí ũi boaicaroveque, nopedeca vainí tujarā muja ina muje ũmene copu maucavarivure Jūmenijicui yávaiyeque, ñai Espírиту Santoi jýeque mujare.

<sup>18</sup>Cainumua dajocabejarā muje coyuiyede Jūmenijicunque. Caiye muje ðaiyede coyujarā ũre ñai Espírиту Santoi cadateiyeque. Torojuede jíjarā ũre ũi mearo ðacaiye boje majare. Aru jēniajara Jūmenijicunque caiye mujare jauéde. Ûetubevuva me dápiajarā muje coyuiyede Jūmenijicunque. Jēniare nujara caivu Jūmenijicui pōevare boje dajocabevuva. <sup>19</sup>Aru muje coyuiyede jēniajara Jūmenijicunque yure märe. Jēniajara ũi majide ðaquiyepe aivu yure aipe yávaiye jauřore yure pōevaque, ne jápiarí coreóvarājiyepe ayu

Jūmenijicui yávaiye méne ne jápiabe báquede cāreja. Jēniajara ji buequiyepē aivū diede jidūbecūva. <sup>20</sup>Ji coyūiye báque boje iye yávaiye méne Cristoi borore, āmeina teivūre jēni jacoĩñami jívui cuvū yū tāumeaque caride. Cristoi daroimūmu yū, coyūcacūyū ūi yávaiye méne ároi ji curōi. Jēniajara Jūmenijicūque, ūi yávayū bñojare đaquiyepē aivū yūre, ji coyūquiyepē aivū diede jidūbecūva caivū ne jápiaiyede yópe yūre jauépe.

**Pablo ūi meaicōjeino Éfesocavūre**

(Hch 20.4; Col 4.7-8; 2 Ti 4.12)

<sup>21</sup>Caiye iye vaiyede yūre ñai Tíquico coyūcūyūme mñjare. Ūrecabe majecū, maje ūmū, aru maje jabocū Jesucristore memecayū yáque dajocabecūva. Mñje coreóvarājiyepē ayū ji borore, coyūcūyūme aipe cūcūre, đayūre máre. <sup>22</sup>Darocūyūmu ūre yo paperayocaque mñje yebai, ūi coyūquiyepē ayū aipe vaiyede ññjare, ūi torojure đaquiyepē ayū mñjare mñje ūmei.

<sup>23</sup>Majepacū Jūmenijicū, maje jabocū Jesucristomaque, cure đajacurĩ caivū majevū Jesucristore jū aivūre cārijimevūva. Ūre đajacurĩ caivū majare maje bajumia, maje jū aiye boje ūre. <sup>24</sup>Mearo đacajacurĩ caivū maja ūrivū maje jabocū Jesucristore maje ūe cūiméque, ūi mearo đacaiye boje pōevare bojecūbeda. Quénoramū.

# Filipenses

Mamabuinore coyuiyebu Pablo bácu ũi toivaicōjeiye báquede paperayocare Filipos āmicuriīmarocavu Jesúre ju aipōevare. Pablo bácu judíovacacu bácuvacari, Jesús ũi yávaiye méne beorí coyuičōjeimū marejaquémavu, coyucūy ũi yávaiye méne judíova āmevure, judíova ne ju abe boje ũi coyuiyede. Lucas bácu coyurejaquemavu Pablo bácu borore Hch 7:57-8:1, 9:1-31, 13:1-28:31, aru ũi cuede Filipos āmicuriīmaroi Hch 16:11-40, 20:1-6. Pablo bácu toivaicōjenejaquemavu iyoca paperayocare ũi cuede āmeina teivure jēni jacoīñami. Apevu ne dāpiaiyepe, toivaicōjenejaquemavu diyocare āniūju bácarōre 55 d.C., ũi cuede āmeina teivure jēni jacoīñami Éfeso āmicuriīmaroi. Ūbenita apevu ne dāpiaiyepe, toivaicōjenejaquemavu diyocare āniūjua báquede 60-63 d.C., ũi cuede āmeina teivure jēni jacoīñami Roma āmicuriīmaroi. Que baru javede Pablo bácu toivacaipōecu bácu toivaicōjenejaquemavu pucayoca ũi paperayocare Tesalónica āmicuriīmarocavure, aru pucayoca ũi paperayocare Corinto āmicuriīmarocavure, aru ũi paperayocare Galacia āmicuriīborōcavure. Aru apevu ne dāpiaiyepe, javede toivaicōjenejaquemavu ũi paperayocare Roma āmicuriīmarocavure, aru Éfeso āmicuriīmarocavure, Colosas āmicuriīmarocavure, aru Filemón mácure máre. Pablo bácu coyurejaquemavu ũre toivacaipōecu bácu aipe ũi toivacauiye báquede diyocare.

Diyocaque Pablo bácu torojuede jídejaquemavu ina Filipos āmicuriīmarocavu Jesúre ju aipōevare ne daroiye báquede tāutūrare ũre (2:25, 4:14-19). Pablo bácu jabova ne buoimuvacari torojurejaquemavu (1:12-26, 2:17-18, 3:20-4:1, 4:10-13). Aru diyocaque jádovarejaquemavu Jesúre ju aipōeva torojurivure ye baju āmevu ne cuede, ne cuede méne o āmene máre ijāravui, yōpe Jesucristoi đaiye báquepe (2:5-11). Coyurejaquemavu Timoteo bácu borore (2:19-24), aru Epafrodito bácu borore (2:25-30), ũi baju ũi đaiyede (1:3-8, 12-26, 3:4b-14), aru aipe đaiye jaurōre Jesúre ju aipōevare (1:9-11, 27-2:4, 2:12-16, 3:1-4a, 4:2-9).

## Pablo ũi meaicōjeino Filipocavure

(Hch 16.12)

**1** <sup>1</sup>Yū, Pablo, aru ñai Timoteo máre Jesucristore memecaivū, meaicōjeivubu mujare, Filipos āmicuriīmarocavu Jūmenijicui pōevare, Jesucristore ju aivure. Yū toivaicōjeivū apēcure iyoca paperayocare mujare, Jesúre ju aivure coreipōevare, aru náre cađateipōevare máre, aru caivū muja Jūmenijicui pōeva curivure Jesucristoque cūinávure. <sup>2</sup>Majepacu Jūmenijicu, maje jabocu Jesucristomaque, mearo đacajacurī mujare bojecubeda ũi me boje. Aru torojurī cure đajacurī mujare cārijimevūva.

## Pablo ũi jēniaino Jūmenijicūque Jesúre ju aipōevare

<sup>3</sup>Cainūmua ji āruéne mujare, torojuede jívū yū Jūmenijicure, ji jabocure aru ji mearore jímure, mujare boje. <sup>4</sup>Aru cainūmua ji jēniacaiyede Jūmenijicūque caivū mujare boje, torojuvū yū ji ũmei. <sup>5</sup>Yū torojurī jívū

torojuede Jūmenijicure, muje cadateiye boje yure ji coyuiyede Jesús ũi yávaie méne muje mamarumu Jesúre ju aijáravu bácarōmiareca pu caride máre. <sup>6</sup>Dijáravu, muje mamarumu ju aijáravu bácarōi, Jūmenijicu mearo đacarī búrejaquemavu mujare. Aru coreóvaivu yu mearo đacare nucuyure mujare pu Jesucristoi copaidaquijáravu baquinóita. Dijáravu baquinóre muja meara márajivubu yópe Jūmenijicui aie báquepedeca ũi đaquiyede yópe ũi urópe. <sup>7</sup>Jūmenijicu ũi meacu baju boje memecare đaiibi caivu majare Jesucristore. Que baru áravu yu mujare, ji umarare, ji ũmei. Aru ji que árué métamu, caivu muja muje cadateiye boje yure. Muja cadateivubu yure caride buoimu cucure, aru ji jáđovaiyede jávene Jesús ũi yávaie méne aru ji ju are đaiyede pōevare diede. <sup>8</sup>Jūmenijicuvacari majibi jáve ucure caivu mujare urarōreca, yópe Jesucristo ũi uepedeca mujare.

<sup>9-11</sup>Yópe arī, jēniacaivu yu Jūmenijicucue mujare boje: “Ñujepacu Jūmenijicu, pueno baju nure đajacu náre, ju aivure ne uede ne bajumia, aru ne majiéde mi yávaieyede jávene, aru ne coreóvaieyede aipe đaiye jaurōre náre”. Yópe arī jēniaivu, muje beorājiyepe ayu iye pueno baju mearo đaiye jaurōre mujare. Que teni ámeno cubequiyebu mujaque aru boropatebenajivubu muja Jesucristoi copaidaquijáravu baquinóre, pōeva ne pueđarājiyepe aivu Jūmenijicure aru ne jínajiyepa aivu mearore ũre. Que đarājivubu na, muje mearo đaiye boje. Aru Jesucristorecabe cūinácara no mearo đare đayu mujare.

**Pablo “Yúcapūravu cuvū ijāravui memecacuyū Cristore” ũi yávaino**

(Hch 16.19-40; 28.30; Gá 2.20; Col 3.4)

<sup>12</sup>Muja, jívū, coreóvare đaiyuvu mujare apevu obedivu jápiaivure Jesús ũi yávaie méne iye vaiye boje yure. <sup>13</sup>Que baru caivu ina churarava, jabocui cūramine coreivu, aru caivu apevu máre, coreóvaivubu yure jabovai buoimure, ji memecaiye boje Cristore. <sup>14</sup>Aru obedivu ina majevu Jesúre ju aipōeva, ne jáiyede yure buoimure, parure nuñama ne ju aiyede Jesucristore. Que teni caijáravua pueno baju parurōreca coyuvubu Jesús ũi yávaie méne jidubevuva. <sup>15</sup>Apevcapūravu jorojīñama yure, pōeva ne pueđaiye boje yure, ji coyuiye boje Jesús ũi yávaie méne. Que baru coyuyama Jesús ũi yávaie méne pueno baju parurōreca, pōeva ne pueđarājiyepe aivu me náre, yure ne pueđaiye pueno. Que teni ne jorojīni maucuvaiyue boje yure, coyuvubu Jesús ũi yávaie méne. Ũbenita apevcapūravu coyuvubu Jesús ũi yávaie méne, ne mearo đaiyue boje aru ne cadateiyue boje yure. <sup>16</sup>Aru ina coyuvubu Jesús ũi yávaie méne ne ue boje yure. Coreóvaivubu na Jūmenijicu cure đayure yure buoimure, ji coyuyuyepa ayu “Jávemu” Jesús ũi yávaie ména. <sup>17</sup>Ũbenita apevu coyuvubu Jesús ũi yávaie méne, ne jorojīye boje yure ne ámeno dápiaiyeque. Coyubema na meaūmeque. Quénora coyuyama meara nure đarājivu apevu pueno. Nópe đaiyubu pueno baju chīori ñájine đaiyurīduivu yure, ji jápiaiyede ne đaiyede ji buoimu cuede. <sup>18</sup>Ye baju ámevu ne ñájine đarīduiyede yure. Quéda meavu ne coyuiye Cristorā. Ye baju ámevu ina coyupōeva ne coyūino ne dápiaiino mearoque o ne dápiaiino ámenoque. Quédata torojuvu yu ji ũmei, caivu náre ne coyuiye boje Cristorā.

Aru torojure nuquijivu ji ũmei. <sup>19</sup>Yu me majivu jođenajivure yure ámeina teivure jēni jacoīñamine jocarī, muje jēniacaiye boje yure Jūmenijicucue

aru Jesucristoi Espíritu Santoi cadateiye boje yure. <sup>20</sup> Pare unu yu caiye vaiquiyede yópe ji coreiyepe, cayoje tebecuyu cainumua ji daiyeque. Quénora daiyuvu yu cainumua yópe daiye jauépe yure. Que baru caride aru cainumua jidubecava coyquijivu Cristorā. Que teni puedaquijivu Cristore caiye ji daiyeque, pōeva ne majinaiyepe ayu ũ pueno meacu bajure. Que daquijivu yu apucu baru o yaiyú baru máre. <sup>21</sup> Yúcapūravu cuvū memecacuyu Cristore ijāravui, pōeva ne mearore jínaiyepe ayu ũre. Aru ji yaiyede pueno baju meaquiyebo yure, ji cūquiye boje Cristoque. <sup>22</sup> Ūbenita carī jaroyn baru ijāravui, apevu pōevare ju are dayu buojaquijivu Jesucristore. Que baru ye majibevu yu aipe beoiye jauōre yure. <sup>23</sup> Pucāūmeamu ji ũme. Pare yaiyuvu yu, cūcuyu Cristoque. Que baru ji yaidú, pueno mearo baju meajebu yure. <sup>24</sup> Ūbenita pueno baju jauvu mujare ji cue cāreja ijāravui, cadatecuyu mujare. <sup>25</sup> Que baru yu me majivu aipe ji beoquiyede. Beocuyumu cūcuyu cāreja ijāravui, cadatecuyu caivu mujare, muje ju arājiyepe ayu pueno baju Jesucristore, aru torojure dacuyu mujare muje ũmei, pueno baju muje ju aiye boje ũre. <sup>26</sup> Que teni ji cuede mujaque cojedeca pueno baju mearore jínajaramu muja Jesucristore yure boje.

<sup>27</sup> Yo cūinārore darī cōmajide nurajino jauvu mujare. Cainumua dajarā muja yópe Jesús ũi yávaiye me daicōjeiyepe. Que baru yu nuñu maru o nūmecu baru muje yebai, jápiacuyumu muje borore muja ju aivure parurōreca iye yávaiye méne, dajocabevava diede, cūináturu muje ũmei aru cūináro muje urōre máre. Que teni jápiacuyumu muja memeivure parurōreca cūinávure, pōeva ne ju arājiyepe ayu Jesús ũi yávaiye méne. <sup>28</sup> Cuavaicōjemejara ina maucuvavure mujare. Jidubejarā náre. Que teni muja jádovarajaramu náre, nácapūravu bíjarājivure Jūmenijicure jocarī. Ūbenita mujacapūravu jádovaivubu muje daiyeque meadarājimarare. Jūmenijicu meadacuyume mujare. <sup>29</sup> Que baru mujarecabu Jūmenijicui mearo daimara, muje memecarājiyepe ayu Jesucristore muje ju aiyepe ũre aru no puenoreca muje nājiyede máre, ũi yávaiye méne coyuiye boje. <sup>30</sup> Aru caride muja yūpedeca cūináturu nājini memeivubu maja, coyurājivu iye yávaiye méne. Javede muja jávu ji nājiyede. Aru caride máre ji nājiyede jápiaivubuya muja.

**Cristo, Jūmenijicu baju, ũi pōecupe teino aru ũi jaboteino caivure**

(Mt 26.39; Jn 1.1-3; 10.18; Col 1.15; He 2.9; 5.8; 12.2)

**2** <sup>1</sup> Jesucristorecabe parure dayu mujare muje ũmei. Ūi ue boje mujare cārijimene daibi mujare muje ũmei. Ūi Espíritu Santo cubi mujaque muje ũmei. Aru ure daibi mujare, muje cadatenaiyepe ayu aru muje cōmaje āroje járajivure ayu mujevure. <sup>2</sup> Que baru parurōreca jēniaivu mujare, muje torojure darājiyepe ayu yure ji ũmei pueno baju, cūináturu muje dāpiaiyeque, cūináturu muje ueque mujevure, cūináturu muje ũmeque, aru cūináturu muje urōque máre. <sup>3</sup> Dabejarā muje daiyede, meara nure darājivu apevu pueno. Aru dabejarā muje daiyede “¿Meara márica apevu pueno?” aivu. Quénora dāpiabejarā muje baju mearape apevu pueno. Cainumua “Apevu ji pueno mearamu na”, arī dāpiajarā. <sup>4</sup> Aru vobejarā quénora muje baju pueno meara nuiyede. Quénora dajarā apevure máre, ne meara nurajiyepa aivu pueno baju.

<sup>5</sup> Dāpiajarā muje baju yópe Jesucristoi dāpiaiye báquepedeca ũi baju, darājivu yópe ũi daiye báquepedeca.

<sup>6</sup> Cainumua Jūmenijicu bajurecabe ũ. Ŭbenita “Jūmenijicu paruépedeca cūvavu yu”, abedejaquemavu. <sup>7</sup>Quénora ũi baju ũe boje dajocarejaquemavu iye ũi paruéde, pōevare memecacuyu. Que teni pōetedejaquemavu pōecu. Cuetedejaquemavu pōecu ārojacu. <sup>8</sup>Dápiabedejaquemavu ũi baju meacupe apevu pñeno. Quénora paruerejaquemavu ũi baju apevu cāchino. Que teni ju arejaquemavu jípacu Jūmenijicure pu ũi boarí jaruvaicōjeiyeta ũi mauvare ũi baju. Aru cūyoje đarí, boarí jaruvarejaquemavu ũre, ne pēvaimu mácore jocucujaravena. <sup>9</sup>Que baru Jūmenijicu epedejaquemavu ũre caivu ne jabocūva. Aru amidorejaquemavu ũre yo āmiá mearo bajure caivu ne pueđaiāmia pñeno. <sup>10</sup>Que baru caivu cavarō mearo Jūmenijicu curōcavu, aru caivu ijoborōcavu, aru caivu joborō jívucavu máre ne jápiaiyede Jesús āmiāre ũuatutarājarama, pueđarājivu ũre. <sup>11</sup>Aru caivu ju aivu, “Jesucristo maje jabocube”, arí coyurājarama caivu ne jápiaiyede. Que teni caivu mearore jínajarama majepacu Jūmenijicure.

### Maje boropatebeno Jūmenijicu jáinoi

<sup>12</sup>Muja, jívū, ji ũmara, que baru yópe đajarā. Muje đarí cōmajiepe ji cōjeiyede yópe ji bueiyeđe javede ji cuede mujaque, nopedeđa pñeno baju yure ju arí, đajarā ji bueiyeđe caride, ji cuede joaí mujare jocarí. Muja Jūmenijicu meadaimaratamu. Que baru pueđajarā Jūmenijicure me. Aru cainumua memene nujara muje đaiyeque, curājivu me aru cūvabenajivu pūcaūmea máre. <sup>13</sup>Jūmenijicurecabe ārure đayu mujare muje ũmei iye mearo đaiye jaurōre mujare, muje torojurí đaiyurājiepe ayu mearo đaiyede. Aru ũrecabe cadateyu iye mearo đaiye jaurōre yópe ũi urōpe.

<sup>14</sup>Caiye muje đaiyede đajarā torojurí āmeina yāvabevūva aru jarabevūva muje baju máre. <sup>15</sup>Que baru boropatebenajaramu muja. Aru muje āmeno đaiye cubequiyebu. Aru Jūmenijicu mára, āmeno cubevūva, barājáramu muja. Muje cuede ijaravucavu jujoaivu aru pñeno āmeno đaivu ne jēneboi, muje cadateiye javu náre, ne járajiepe aivu ne āmeina teiyede aru muje mearo teiyede yópe abiacovai cadateiyeđe pōevare cojiéque, ne járajiepe aivu ũamine. <sup>16</sup>Nopedecđa muja cadateivubu ijaravucavure muje coyuiyede náre iye yávaiye méne, ne coreóvarājiepe aivu aipe cūvarājivu jaravu cūimějárvu baquinóre. Muje que đaru, jáđovarajivubu ji mememeniduiye báquede muje yebai ji bueiye báquede mujare. Que baru torojucuyumu yu ji ũmei mujaque Cristoi copaidaquijárvu baquinói, ji coreóvaiye boje ji cūe báque aru ji memecaiye báque máre bojecube āmene. <sup>17</sup>Jūmenijicu me torojubi muje ju aiyede Cristore. Ŭi nópe torojuede coreóvau yu. Apevu yure boarí jaruvaiyuma, ji bueiye boje mujare Cristo jiede. Ŭbenita yure boarí jaruvareca, torojucuyumu yu. <sup>18</sup>Quédecđa muja máre torojurā muje ũmei. Aru ũjarā ji torojuede ji ũmei máre mujaque. Que teni caivu maja torojurājaramu maje ũmei cūináturu.

### Timoteo aru Epafrodito ne curānuino Filipino

(Hch 16.1-3)

<sup>19</sup>Maje jabocu Jesús ũi ũru, jaroiyumu yu Timoteore muje yebai, ũi cadatequiyepa ayu mujare. Que teniburu yóboi, ũi copaidaquiyede ji yebai

cojedeca, torojucuyucu yu ji ũmei ji jápiaquiyede muje borore. <sup>20</sup>Ñai Timoteo cūinácucabe cōmaje āroje dápiau mujare ji dápaiyepedeca. Ũrecabe jáve cadateiyucu mujare. <sup>21</sup>Caivu apevu ye dápibema aipe darí cadateni buojarájivure iye memecaiyede Jesucristore darájivure yópe ũi urōpe. Quénora ne bajumia cadateiyurí dadama ne urōpe. <sup>22</sup>Aru mujavacari coreóvaivubu jáve cadateyure iye memecaiyede Jesucristore. Ũi daiye báquede jádovaimi memecayu meacure. Ũ coyui bi Jesús ũi yávaie méne yúque, apevu pōeva ne jápiarájiyepe ayu diede, yópe juedocu ũi memeiyeye jipacucue cadateyu ũre. <sup>23</sup>Que baru ũrecabe ji jaroquimu muje yebai, cūiná ji majiquiyeye ayu aipe yócavu ne jabova ne darájiyede yúque. <sup>24</sup>Aru maje jabocu Jesús ũi uru, yu máre maumena jácunuiyuvu muje yebai.

<sup>25</sup>Ji dápiau jaroie jauvu yure muje yebai majecu Epafroditore, muje daroimu mácuere ji yebai, ũi cadatequiyeye aivu yure. Ũ memeimi yúque ñuje memecaiyede Jesucristore, apevu ne maucuaedeca ñujare. <sup>26</sup>Ũ jácunuiyubi caivu mujare pare. Urarō cārijimi ũi ũmei ũi jápiarīburu yóboi muje jápiaie báquede ũi borore ijimure. <sup>27</sup>Jāve iji mu mateáme. Pare ñájiameru ũi yainíduiyeta. Ũbenita Jūmenijicu cōmaje āroje jáquemavu ũre, quénora ũ matuiyeda āmevu, yure máre. Que baru Jūmenijicu ũmedavaquemavu ũre, ji chíomequiyeye ayu pueno baju. <sup>28</sup>Que baru pueno baju jaroiyuvu yu ũre muje yebai, muje torojurájiyepe ayu muje ũmei cojedeca, muje jáiyede ũre bedióva, ji chíoiye cūiquiyeye ayu. <sup>29</sup>Que baru torojurivu copu etajarā ũre me, yópe Jesúsre ju aipōeva ne copu etaiye jauépe apevu névure. Pueđajarā caivu ũpe paivure. <sup>30</sup>Ũrecabe yainíduyu bācu, ũi memecaiye boje Jesucristore. Jidubeteame ũi baju yaijuroede, cadatecuyu yure, muje cadateivu buojabe boje yure.

#### **Pōeva ne boropateiye cubeno ne daiyeque**

(Hch 8.3; 9.1-2; 22.4; 23.6; 26.5, 9-11; Ro 2.28-29; 6.11-13;

8.29; 11.1; 2 Co 3.18; Gá 4.19; 6.14-15; Col 2.11-13)

**3** <sup>1</sup>Muja, jívuvu, cujarā torojurí maje jabocu Jesucristoque cūinávupe. Ũetubevu toivaicōjeivu yu apecure bedióva cojedeca iye majié jauéde mujare, muje curájiyepe ayu me Jesucristoque. <sup>2</sup>Me jájara ina apevu pōeva ne āmeina jáimarare, aru āmeina đavure, aru ũmuva ne baju ne cajede buraicōjeivure máre. Ne cajede buraicōjeiye boje, “¿Jūmenijicui pōeva máríca maja?” arí dápíaríduyama. Que teni nácapūravu napini coreniduivubu Jūmenijicui meadaquiyede náre, ne nópe daiye boje. <sup>3</sup>Ũbenita majacapūravu jáve Jūmenijicui pōevatamu. Que baru majarecabu mearore jívuvu Jūmenijicure jáve, Espíritu Santoi buojare daiye boje majare. Aru majarecabu torojurí curívu Jesucristoque cūinávupe. Aru majarecabu “¿Jūmenijicu meadaquidica majare maje daiye boje?” arí dápíabevu.

<sup>4</sup>Ácu pōecu napini coreni buojaru Jūmenijicui meadaquiyede ũre ũi daiye boje, yúvacari ũi pueno napini coreyu buojajebu diede. <sup>5</sup>Yurecabu ne buraimu mácu ji cajede ocho pajāravua ji pōeteniburu yóboi, yópe ne đaiyepe caivu ũmuva judíovare. Aru yurecabu Israecacu, aru pōeyajubo Benjamín āmicuriyajubocacu. Jipacu aru jipaco máre judíovabu. Judíovai yávaicamuare yávaivu yu. Aru yúvacari, fariseo bācu, đarí cōmajidejacacu Jūmenijicui đaicōjeiyede ũi coyuiye báquede Moisés bácuere yópe apevu

fariseovape. <sup>6</sup> Ƴrarō ji memecaiyurĩduiyede Jūmenijicure, yávacari nájine ðarejacacu ina Jesúre ju aipōevare. Aru Ƴrarō ji ðaiyurĩduiyede yópe caiye iye ðaicōjeiyepe meacu bacuyú, pōecu cubedejame āmeina yávarĩ buojayũ yure.

<sup>7</sup> Jipocamia caiye diede corevarĩdurejacacu bojecuepe yure. Ƴbenita caride corevayubu caiye diede ye bojecubede yure, Jesucristoi mearo ðacaiye boje yure. <sup>8-9</sup> Aru pueno bajutamũ caijĩe ji cuvajuroe. Corevayubu bojecubede yure. Bojecuvũ yure caiye pueno ji coreóvaiye ji jabocu Jesucristore. Que baru ðajocaivũ caiye iye ji ðaiye báquede, aru ji cuvae báquede, aru ji napini coreiye báquede máre, memecacuyũ Cristore. Caiye iye báquede ji coreóvayede jaruvaiyepe paiyebu caride, Cristo jicu bacuyáre aru cacyure úque cūinávũpe. Que baru caride yu ðabevũ yópe Jūmenijicui ðaicōjeiyepe, ũi jáquiyepẽ arĩduyũ yure meacupe yópe ji ðarĩduiye báquedepeda. Quénora caride Jūmenijicu jáimi yure meacupe, ji ju aiye boje Cristore. Que teni Jūmenijicurecabe meacu ðayu yure ũi jáinoi ji ju aiyede Cristore.

<sup>10</sup> Que baru cūinároratamu ji Ƴrō caride. Coreóvayuvũ yũ Cristore me, coreóvacuyũ iye paruéde nacovaiye báquede úre yainore jaruvarĩ, nájicuyũ ũi nájiiye báquedepeda, aru ārojacyũ úpe ũi yaiye báquede. <sup>11</sup> Que baru napini coreivũ yũ Jūmenijicui nacovaquiyepẽ ayũ yure máre yainore jaruvarĩ, ji cuquiyepẽ ayũ jaravũ cūiméjaravũ baquinóre.

### **Jūmenijicu ũi pōevare bojedaquino**

(1 Co 4.16; 11.1)

<sup>12</sup> Yópe arĩ, abevũ yũ: “Jave buojaivũ yũ caiye iye yure ðaiye jauéde, meacu bacuyú yópe Jūmenijicui Ƴrōpe”, abevũ yũ. Javuvũ yure cāreja ji meacu baquiyépe yópe Jūmenijicui Ƴrōpe. Javede Jesucristo beorĩ inejaquemavũ yure ũ jicvũ, ji cuquiyepẽ ayũ úque cavarō mearoi meacu baju yópe Jūmenijicui Ƴrōpe. Aru cainumua memecaiyũ yũ Jesucristore caiye ji majiéque aru caiye ji paruéque máre, eacuyũ ji cuquinore úque cavarō mearo Jūmenijicui curōi. <sup>13</sup> Muja, jívũ, yúcapūravũ corevabevũ jave eayũ bácare diede. Que baru cūinároramu ji ðaino: Ārumevũ yũ iye ji ðaiye báquede; quénora ārvũ yũ iye ji ðaquiyede, yure jauquiyede. <sup>14</sup> Yópe yajuipōecui cúyaiyepe nurié, pũ cúyaima turuvaita, nopedeca yávacari nuñũmu nurié pũ buojayuta ji memecaiyede Jesucristore, cacyũ úque cavarō mearoi jaravũ cūiméjaravũ baquinóre, yópe Jūmenijicui Ƴrōpe ũi cutuiyede ina curájivure Jesucristoque cūinávũpe.

<sup>15</sup> Nópe dápiaiye javũ caivũ majare, coreóvavure aipe maje ju aiyede Jesúre. Que baru cūináturu maje úme dápjarājavũ maja. Ƴbenita ajevũ mujacavũ “Jave meara matuivubu maja yópe Jūmenijicui Ƴrōpe”, ũbenina ne arĩ dápjaru, Jūmenijicu coreóvare ðacuyũme ne que dápiaiye jāve āmene. <sup>16</sup> Cūinároramu ji coyũno mujare caride. Maje dápiaiye aru maje eaiye máre ðaiye javũ majare coapa, yópe iye Jūmenijicui yávaiyede jāvene, maje coreóvayepẽ.

<sup>17</sup> Muja, jívũ, ðare nujara yópe ji ðaiyepe. Yóvajarā ajevure ina ðavure ji ðaiyepedeca. Aru me jájara ina curivure ñuje cūepedeca. <sup>18</sup> Obedijāravũ javede yũ coyucacu mujare iye coyuiye, chĩore ðaiyede yure. Aru coyũquijivũ caride bedióva cojedeca ji orique, ji Ƴrarō chĩoiye boje. Obedivũ pōeva

cuma maucuvavivü iye yávaiye méne Cristoi yaiye báquede jocucujaravena. Ne cuede ijāravui jāđovaivubu, “Ye baju āmevü Cristoi yaino mácarō jocucujaravena”, ne arī dāpiaiyede. <sup>19</sup>Nārecabu bījaroimara mārājivü Jūmenijicure jocarī. Que đaimara, nūrajarama na toabo cūiméboi. Nārecabu mearore jībēvü Jūmenijicure. Ūbenita jýyama mearore ne baju űrōpe. Que teni ne āiye ne jūmenijicupei paiyebu. Cuyoje tebenama ne āmeina đaiyede. Quénora, “¿Meara mārīca maja?” adama űbenina. Nārecabu dāpiabēvü cavarō mearo Jūmenijicui curōquede. Quénora dāpiadama ijāravuquede. <sup>20</sup>Ūbenita majacapūravü ijāravucavü āmevü. Quénora cavarō mearo Jūmenijicui curōcavutamu maja. Que baru torojurī maje űmei napini coreivubu, űrarō jāiyurivü majare meadaipōecure, maje jabocu Jesucristore, űi daquiyede ijāravui cojedeca, cavarō mearo űi curōre jocarī. <sup>21</sup>Ūi daquiyede, oatvacayume maje bajuā parūbebajua yainājibajuare, maje cvarājiyepe ayu maje bajuā cūimébajua majare coapa űi baju cūimébajupe. Nōpe đacuyume űi majié parūéque. Iye űi majiéque pūrucuvabi caiye ijāravuquede aru caivu ijāravucavure máre. Que teni caiye vaiquýyebu yópe űi űrōpe.

**Torojurarā mūje űmei mūje cue boje Jesucristoque cūinávupe**

(Col 4.2-7; 1 Ts 5.16-18)

**4** <sup>1</sup>Muja, jívü, ji űmara, pare jāiyvü mūjare. Torojurī ārvü mūjare. Mūje ju aiye boje ji bueiye, yu cūvacayumu mearore cavarō mearo Jūmenijicui curōi. Paredeca ju are nūjara Jesús űi yávaiye méne. Jaruvabejarā diede. Quénora cūjarā cūinávupe Jesucristoque, yópe mūje cuepe caride.

<sup>2</sup>Parūrōreca jēniavü ico Evodiare aru ico Síntiquede máre. Ne Jesúre ju aiye boje, curivubu űque cūinávupe. Que baru cūináturu dāpiajarāri na ne űmei. <sup>3</sup>Aru jēniaivu mure, ji yóvaimure, jāve cadateyure yure. Cadatejacu ina pūcarōmiva nomivare, ne cārījimene đarājiyepe ayu ne bajure. Nārecabu memēivü bācavü paredeca yúque, pōeva ne ju arājiyepe aivu Jesús űi yávaiye méne. Que baru mi cadateiye javvü náre caride. Memedama Clementequē aru apevu Jesucristore memecaivūque máre. Aru ne āmiá cuvü toivaiye curōita, Jūmenijicui paperatucubo, caivu ina jāravü cūimējāravü baquinóre cūvarivü űque ne āmiāre toivaitucubo jívui.

<sup>4</sup>Cūjarā torojurī mūje űmei cainumua mūje cuede maje jabocu Jesucristoque cūinávupe. Que baru coyivü mūjare cojedeca: Torojurarā mūje űmei. <sup>5</sup>Caivu pōeva coreóvajarāri mūjare cadateiyurivure apevu pōevare. Maje jabocu Jesucristo űi copaidaquino maquinó joabenotamu. Que baru cadatejarā caivure. <sup>6</sup>Aru caiye iye mūjare vaiyede, cārījimejara mūja. Ūbenita caiye iye mūjare vaiyede, torojuede jīni Jūmenijicure, coyujarā űre mūjare javéde. Aru jēniajara űre mūje jēniaiyede máre. <sup>7</sup>Que teni mūja curājaramu me cārījimevüva Jesucristoque cūinávupe. Jūmenijicurecabe cārījimene đayvü mūjare nōpe, jāri corecuyvü mūje űmene aru mūje dāpiaiyede máre. Aru yo cārījimenō Jūmenijicui jýyede ye jāpiarī eaivu buojabenama na, pōeva űre ju abevü.

**Dāpiajarā mūja mearore**

<sup>8</sup>Muja, jívü, caride buojaivu yu iye ji toivaicōjeiyede apecure mūjare. Yópe dāpiajarā mūja: Ārūjara caiye iye yávaiyede jāvene, aru caiye iye pōeva ne

puedaiyede máre. Ārūjara caiye iye méne, aru caiye iye me Jūmenijicui jáinore máre. Ārūjara caiye iye pōevare ūre đaiyede. Aru ārūjara caiye iye pōeva ne me yávaiyede máre. Dápijarā caiye iye pūeno baju méne aru caiye iye pōeva ne mearore jíyede máre. <sup>9</sup>Đajarā muja yópe ji coyuiye báquepe mujare, aru yópe ji đaicōjeiye báquepe mujare. Đajarā yópe muje jápiaiye báquepe ji coyuiyede, aru yópe muje jáiye báquepe ji đaiyede máre. Que đaru, ñai Jūmenijicuvacari, cārijimenoque cure đayu majare, cūcuyume mujaque.

### Filipocavu ne cadateino Pablöre

(Hch 17.1; 2 Co 11.9)

<sup>10</sup>Pare torojuvu yu ji ūmei ji cuede cūinávupe maje jabocu Jesucristoque, muje cadateivu buojaiye boje yure. Muje coreniburu yóbo joe baju, cadateivubu yure caride. Coreóvaivu yu dinumureca muje coreiyede, cadatenajivu yure cojedeca. Ārumetebetevu muja yure. Quénora cadateni majibeteavū muja. <sup>11</sup>Yúvacari torojuvu ji ūmei, ji majiéde cūvae boje. Que baru ñájimevu muje cadatebede yure. <sup>12</sup>Yurecabu coreóvayu cūcure ji cūvae ūreque, aru cūcure yure jauéque máre. Que baru cainumua aru ári ji curōi máre torojuvu yu ji ūmei. Yu ji āquiyede cūvacu baru aru ji āquiyede cūvabecu baru máre, torojurī majivu yu ji ūmei. Aru pūeno ūre ji cūvae baru aru pūeno yure jaué baru máre, torojurī majivu yu ji ūmei.

<sup>13</sup>Cristoi cue boje yáque cūinávupe, parure đaiibi ji ūmei. Que baru caijīe vaiyede yure, đaiye majivu yure jauéde yópe ūi ūrōpe. <sup>14</sup>Ūbenita meateavū muje cadateiyede yure ji ñájiyedeca.

<sup>15</sup>Muja, Filipocavu, mujavacari coreóvaivubu me ji etaiye báquede Macedonia āmicūrōre jocarī, apenoa ĩmaroacavu Jesúre ju aipōeva cōjijivaivu cadatebevu bācavure yure. Dinumui ji buiye báquede bueyu Jesús ūi yávaiye méne mujare, muja quévura, Jesúre ju aivu cōjijivaivu Filipoi, jīavū yure tāuturare, bojedarājivu ji bueiye báquede mujare. Que teni jīni aru jacopurī máre buavū maja maje baju. <sup>16</sup>Ji cue báquede Tesalónica āmicūrīmaroi cūinárumu aru apenumua máre muja jaroávū yure tāuturare, yure jaué boje. <sup>17</sup>Torojuvu yu ji ūmei muje jíyede yure. Ūbenita pūeno baju torojuvu yu ji ūmei, Jūmenijicui me jáiye boje mujare muje yópe đaiye boje, muje cadateiye boje yure. <sup>18</sup>Jacopuvu yu caiye muje daroiye báquede yure Epafroditoque. Ūre cūvaede davacube yure, muje jíye báquede. Que baru caride pūeno baju cūvavu yu. Aru ye jaubevū yure. Yure muje jíye báque cojuvu Jūmenijicure yópe pōeva ne juaiye mumijuede ne jíye cojuépe ūre. Nopedeca muje jíye báque máre me cojuvu ūre. <sup>19</sup>Aru majepacu Jūmenijicu, ji memecaimu, ūre cūve cūvabi. Que baru jīcuyume caiye mujare jauéde, muje ju aiyé boje Jesucristore. <sup>20</sup>Jínajarevu maja mearore majepacu Jūmenijicure cainumua. Quédecabu.

### Pablo ūi meaicōjeino Filipocavure

<sup>21</sup>Meajarari na, caivu ina Jūmenijicui pōeva, ina curivu Jesucristoque cūinávupe. Ina Jesúre ju aipōeva yáque curivu caride meaicōjedama mujare. <sup>22</sup>Caivu ina Jūmenijicui pōeva yóvacu meaicōjedama mujare. Caivu pūeno meaicōjedama mujare ina Jūmenijicui pōeva ñai jabocu ijaravucacu pūeno baju parucui cūramicavu. <sup>23</sup>Maje jabocu Jesucristo mearo đacajacurī mujare bojecubeda ūi me boje. Quénoramu.

# Colosenses

Mamabuinore coyuiyebu Pablo bácu ũi toivaicõjeiye báquede paperayocare Colosas ámicuriimarocavu Jesúre ju aipõevare. Pablo bácu judíovacacu bácuvacari, Jesús ũi yávaiye méne beorí coyuiçõjeimu marejaquémavu, coyucayu ũi yávaiye méne judíova ámevure, judíova ne ju abe boje ũi coyuiyede. Lucas bácu coyurejaquemavu Pablo bácu borore Hch 7:57-8:1, 9:1-31, 13:1-28:31. Ubenita Pablo bácu aipiyede numecuvacari Colosas ámicuriimaroi, toivaicõjeiyurejaquemavu ũre toivacaipõescu bácu nâre, ũi ue boje nâre (2:1-5) aru Épafra bácu coyuiye báque boje Pablo bácu Colosacavu ne borore (1:7-8). Javede toivaicõjenejaquemavu pucayoca ũi paperayocare Tesalónica ámicuriimarocavure, aru pucayoca ũi paperayocare Corinto ámicuriimarocavure, ũi paperayocare Galacia ámicurijoborõcavure, aru ũi paperayocare Roma ámicuriimarocavure máre. Apevu ne dápaiyepe, javede toivaicõjenejaquemavu ũi paperayocare Filipos ámicuriimarocavure. Toivaicõjenejaquemavu yõbecuriyoca ũi paperayocare ániyu bácarõre 60 d.C., ũi cuede ámeina teivure jêni jacoĩnami Roma ámicuriimaroi, cûináyocare Éfeso ámicuriimarocavure, apeyocare Colosas ámicuriimarocavure, aru apeyocare Filemón mácu. Tíquico bácu nuvarejaquemavu iyoca yõbecuriyocare cûináuru ũi nuiyede Roma ámicuriimarore pu Asia ámicurijoborõi. Pablo bácu coyurejaquemavu ũre toivacaipõescu bácu aipe ũi toivacaquie báquede diyocare.

Diyoque Pablo bácu daicõjenejaquemavu Jesúre ju aipõevare yópe nâre jauéde ne cue boje Jesucristoque cûinávupe (3:1-4:6). Coyurejaquemavu nâre Cristorã, caiyede cuedayu bácu aru cure dayure máre, que baru parucure caivu pueno (1:15-23) aru cûinácura meadaye majicure ũre ju aivure dabevuva yópe bueipõeva borocurivu ne daicõjeniduiyepe (2:6-23).

## Pablo ũi meaicõjeino Colosacavure

**1** <sup>1-2</sup> Yu, Pablo, aru majecu Timoteo máre ũi ju aipe boje Jesucristore meaicõjeivubu mujare, Colosas ámicuriimarocavu Jûmenijicu põevare. Yûbu Jesucristoi yávaiye méne beorí coyuiçõjeimaracacu. Yu toivaicõjeivu apecure iyoca paperayocare mujare, ñuevure, Jesucristore ju aivure, ũi urõpe daivure, aru curivure úque dajocabevuva cûinávupe. Majepacu Jûmenijicu, mearo ñacajacurí mujare bojecubeda ũi me boje. Aru torojurí cure ñacajacurí mujare cãrijimevuvu.

## Pablo ũi jênaiino Jûmenijicuque Jesúre ju aipõevare

(Ef 1.7; 6.12; Col 4.12; Flm 23)

<sup>3</sup> Torojuede jívubu ñuja Jûmenijicure, ñai maje jabocu Jesucristoi pacure, cainmua ñuje jênaiye coapa Jûmenijicuque mujare boje. <sup>4</sup> Jápiaivubu ñuja muje ju aiyede Jesucristore aru urivure máre caivu ina Jûmenijicui põevare. Que baru torojuede jívubu Jûmenijicure mujare boje. <sup>5</sup> Javede muja jápiarejaquemavu iye yávaiyede jávene, Jesús ũi yávaiye méne.

Muje jápiaiyede diede, jápiarejaquemavu iye borore Jūmenijicui mearo đacaquiyede mujare cavarō mearo ũi curōi. Muje napini coreiye boje iye Jūmenijicui mearo đacaquiyede mujare, muja ju aivubu Jesucristore aru urivubu caivu ina Jūmenijicui pōevare. <sup>6</sup>Yópe muje jápiaiyeye iye Jesús ũi yáviaye méne, nopedeca obedivu pōeva apenoa joborōacavu máre jápiadama diede. Que baru caijāravua apenvu pōeva ju adama diede. Aru pueno baju mearo đadama, ne ju aiyé boje diede. Aru quédeca vaidéjaquemavu mujare. Mamarumure muje jápiaiyede iye Jesús ũi yáviayede jávene pu caride máre, coreóvaivubu muja jáve Jūmenijicu mearo đacayure bojecubeda, ũi pueno meacu baju boje. Que baru caijāravua apenvu mujacavu ju adama diede. <sup>7</sup>Diede bueibi ñuje umu Épafras. Ñai Épafrarecabe, memecayu Jesucristore ñujaque, coreóvare dayu bácu mujare iye Jūmenijicui mearo đacaiyede pōevare bojecubeda. Que teni cadateyu ñujare memecaibi Jesucristore. <sup>8</sup>Ũi coyui bi ñujare aipe ñai Espiritu Santo ure dayure mujare caivu Jūmenijicui pōevare.

<sup>9</sup>Que baru ñuje jápiaiyé boje muje borore, coyuvubu mujare Jūmenijicuque máre. Ñuje jápiaiyede muje borore coyurí búcarā mujare Jūmenijicuque. Aru caride máre coyure nuivubu mujare Jūmenijicuque. Jēniaivubu úque ũi coreóvare đaiyede mujare jáve caino yo ũi urōre, muje đarājiyeye aivu yópe ũi urōpe. Que baru jēniaivubu Jūmenijicuque, muje cavarājiyeye aivu majié caiyede aru coreóviaye méne muje ũmeque. <sup>10</sup>Jēniaivubu diede, muje đarājiyeye aivu yópe ina Jūmenijicu jina ne đaiyeye, Jūmenijicui torojuyeyeye aivu mujaque cainumua. Pueno baju jēniaivubu Jūmenijicuque muje mearo đarājiyeye aivu yópe ũi urōpe aru muje coreóvarānurajiyepe aivu Jūmenijicure pueno baju caijāravua. <sup>11</sup>Aru pueno baju jēniaivubu Jūmenijicuque, ũi parure đaquiyeye aivu mujare muje ũmei ũi majié pueno baju paruéque ũi jáđovaiyede pōevare, muje napinajiyepe aivu muje ñájinajiyepe cainumua torojurivu muje ũmei. <sup>12</sup>Aru pueno baju jēniaivubu Jūmenijicuque, muje torojuede jínajiyepe aivu majepacu Jūmenijicure, ũi cūvare đaiye boje mujare iye muje cavarō coapa, ũi mearo đacaquiyede ũi pōevare cavarō mearo ũi curō miadároi.

**Maje cue cārijimevua Jūmenijicuque Jesúi yaiye báque boje**

(Jn 1.1–3.18; Hch 26.23; Ef 1.22–23; 2.16; 4.15; 6.12; He 1.2–3; Ap 1.5)

<sup>13</sup>Jūmenijicu meadaibi majare ñai abujuvai jabocui jaboteino ñeminore jocarí. Que baru epeibi majare maje jabocua mamacure, ũi umure. <sup>14</sup>Ñai mamacure bojedare đai bi majare, ũi jina marajiyepe ayu. Que baru arumeteibi maje ámeina teiyede. <sup>15</sup>Ñai mamacu cūináturube jípacu Jūmenijicuque. Aru pōeva jári buojarejaquemavu Jesucristore. Ũbenita jári buojabenama Jūmenijicure. Ñai mamacu parucu caivu pueno curejaquemavu jípacuque caiyede cuedaquiye jipocare. <sup>16</sup>Ũrecabe Jūmenijicui caiyede cuedare daimu mácu. Ũrecabe cuedayu bácu caijēne cavarō mearo ũi curōquede, aru joborōquede máre, aru caijēne maje jáiyede aru maje jámene máre. Que baru cuedarejaquemavu caivu ina jabovare, aru parucavariyure, cōjeivure, aru parurivure máre cavarō mearo ũi curōcavure. Que teni Jūmenijicu ũre cuedare đarejaquemavu caiyede. Aru cuedare đacarejaquemavu caiyede ũre boje, ñai mamacu caivu ne mearore jimu maquiyépe ayu. <sup>17</sup>Cristorecabe

caivu ne jipocacau. Êrecabe cûcu caiyede cuedaquiye jipocare. Aru êrecabe Jûmenijicui caiyede mautede dare ðaimu, caiye cûquiyepe ayu me. <sup>18</sup> Maja êre ju aivu caiyajuboa pœeyajuboacavu ûi bajupe paiyubu. Aru êvacari, maje jipobupe páyu, maje jabocube, majare ðaicôjeñu. Êrecabe cure ðayu jáve caivu ina êre ju aivure ne bajure aru ne ûmene máre, ûi nacajaiye báque boje yainore jaruvári caivu jipocai, jabotecuyu parucu caivu apevu pueno cainumua.

<sup>19</sup> Jûmenijicuvacari beorejaquemavu cûcure mamacûque yópe ûi baju urôpe. Que baru Cristorecabe jáðovañu jáve aipe ârojacure jípacu Jûmenijicure. Aru Jûmenijicupe páyu matuiye cojvuv jípacure. <sup>20</sup> Jûmenijicu cârijimene ðaiyurejaquemavu caivure êque. Aru ména cure ðaiyurejaquemavu caiyede máre. ðaiyurejaquemavu diede mamacûque, caiye ne mearore jímû maquiýepe ayu. Que baru mamacui jive meiyê báque boje ûi yaiye báquede jocucujaravena, Jûmenijicu cârijimene ðarejaquemavu caivure êque, caivu ijâravucavure aru caivu cavarô mearocavure máre. Aru caiye ijâravuquede aru caiye cavarô mearoquede máre ména cure ðarejaquemavu Jûmenijicu.

<sup>21</sup> Aru mujacapûravu javede âmeina dápiaivu barejaquémavu aru âmenore ðaivu barejaquémavu. Que baru Jûmenijicure coreóvabevuva maucvarivuv barejaquémavu muja. <sup>22</sup> Ubenita caride Jûmenijicu cârijimene ðarí yóvare ðaibi mujare êque. Nópe ðarejaquemavu mamacui yaiye báquede ûi baju. Nópe ðacarejaquemavu mujare, ðacuyu meara yópe ûi urôpe, ye âmeno cûbequino mujare, aru pœeva ne boro coyurí aðarí buojabenajino muje borore, ûi ecovaquiye ðarejaquemavu mujare ûi yebai. <sup>23</sup> Nópe vaiquíyebu muje ðaiye boje yópe ðaiye jauépe. Jauvu mujare muje ju are nuiye Jesús ûi yávaiye méne, “¿Jáve márica?” arí dápiabevuva. Aru jauvu mujare muje napini corede nuiye maje curâjiyede Jûmenijicûque cainumua yópe muje napini coreni buiye báquepe muje mamarumu jápiaiyede iye Jesús ûi yávaiye méne. Iye yávaiye méne obedivuv pœeva cainoa joborôacavu jápiadama. Aru yúvacari, Pablo, Jûmenijicure memecayu, coyuyubu diede.

### **Pablo Jesús ûi memecaicôjeimu êre ju aipœevare**

*(Ef 3.2; Ap 3.14-22)*

<sup>24</sup> Caride torojuvuv yu ji ûmei ji ñâjiyede mujare boje. Que teni buojaivu yu ji ñâjiquiye jauôrre yure ji baju, caðatecuyu ina caiyajuboa pœeyajuboacavu Jesûre ju aivure. Ji ñâjiyebu yópe Cristoi ñâjiye báquepe ina caiyajuboacavu êre ju aivure boje. Jesucristoi bajupe paivubu na. <sup>25</sup> Yurecabu Jûmenijicui epeimu, corecuyu aru caðatecuyu mujare. Que baru memecayurecabu ina caiyajuboa pœeyajuboacavu Jesûre ju aivure, coreóvare ðacuyu mujare caiye iye Jûmenijicui yávaiye méne. <sup>26</sup> Javede Jûmenijicu jáðovamenejaquemavu iye yávaiye méne, caivu ina pœeva javecavu bácvu ne majibenajiyepe ayu. Ubenita caride jáðovaimi diede ûi pœevare, ne majinajiyepe ayu. <sup>27</sup> Jûmenijicu ubi muje majinajiyepe ayu muja judíova âmevu ûi pueno baju mearo ðacaimara márâjivure urarô ûi pueno baju mearo ðaiyeque. Que baru jáðovaimi diede. Iyebu yávaiye jáðovame máque pœevare jipocamia: Cristo cûbi cûinávpe majaque. Que baru torojurí maje ûmei napini coreivubu maja yo mearo maje cûvarâjinore cavarô mearo Jûmenijicui curôi.

<sup>28</sup>Que baru ñuĵa coyuiwubu Cristoi borore caiwure. Coyuiwubu caiwure parurõreca aipe ðaiye ĵaurõre nãre. Aru caiwure majicaiwubu ãi majiẽque. Nõpe ðacaivubu ñuĵa caiwu curiwure Jesucristoque cõinãwure, ne curãjiyepe aiwu meara baju ĵaubeda yõpe Jũmenijicui urõpe, ñuĵe eare darãjiyepe aiwu nãre Jũmenijicu yebai. <sup>29</sup>Que baru yu pũeno baju memẽnu pu uetuyuwacari. Que ðare ðaibi yure Cristo ãi majiẽ paruẽque.

**2** <sup>1</sup>Coreõvare ðaiywu mujare pũeno baju ji memeiyepe pu uetuyuwacari, cadatecyu mujare aru ina Jesũre ĵu aiwu Laodicea ãmicũĩmarocawure, aru apevu Jesũre ĵu aiwure mãre, yure ĵãmevu bãcawure. <sup>2</sup>Yõpe memeiwu, paruẽre ðacyu caiwu mujare muje õmei, muje cue boje cõinãwure muje uede muje bajumia. Aru yõpe memeiwu, muje ĵãparĩ coreõvarãjiyepe ayu ĵãve caiye iye Jũmenijicui majiẽde ãi meadaiyede mujare. Que teni ĵãve coreõvarãjaramu muĵa Cristoi borore. Urecabe Jũmenijicui ĵãðovamemu mãcu cãreja javede. <sup>3</sup>Cristo cõinãcurabe majicu pũeno baju caiye iye põeva ne majibede aru ne coreõvabede mãre. Majibi caiyede. Aru ãi majiẽbu pũeno baju me, yõpe põecui bojecuede yaveiyepe paiye. <sup>4</sup>Caiye diede toivaicõjeiwu apẽcure mujare, apevu ne ĵujovabenajiyepẽ ayu mujare borocũeque. <sup>5</sup>Ji cuedeca joai mujare jocarĩ aruwu yu mujare cainumua. Coreõvaivuwu yu mujare curiwure Jesucristoque cõinãwure aru ĵu aiwure õre parurõreca. Que baru torojuwu yu ji õmei.

**Apuẽ mamae ĵaurõ mujare, Jesũre ĵu aipõẽvare**

*(Ro 6.4; Gã 4.3, 9; Ef 2.1-5, 15)*

<sup>6</sup>Muje ĵu aiyẽ bãque boje iye maje jabocu Jesucristoi yãvaiyede, ðajarã muĵa cainumua yõpe ne ðaiye ĵaurõpe ina curiwu Jesucristoque cõinãwure. <sup>7</sup>Que teni ĵu are nuĵara Jesucristore, aru ðare nuĵara yõpe ñuĵe bueiyepe mujare ãi yãvaiye mẽne mamarumure. Caiĵãravua pũeno baju ðare nuĵara yõpe ãi urõpe. Aru, “Jesucristoi yãvaiye me ĵãvetamu”, are nuĵara. Nopedeca buedejaquemavuwu mujare mamarumure. Aru pare torojuede ĵide nuĵara majepacu Jũmenijicure cainumua.

<sup>8</sup>Me ĵãĵara muĵa. Muje bajumia apevure ĵujovaicõjemeĵara ne bueiye bojecũbeque aru borocũeque mãre, ne ðabenajiyepẽ aiwu mujare ne bueimare. Iye ne bueiye põeva nẽnecuva mãcavu ne ðarĩ cõmajiyebu. Iye ne bueiye põeva ne majiẽbu. Aru iye ne bueiyedecabu Cristoi yãvaiyede, “Jãve ãmevu” aiyẽ. Que baru ĵãve ãmevu aru bojecũbevuwu iye ne bueiye.

<sup>9</sup>Jũmenijicuwacari cubi Cristoque. Uĩ bajurecabe ãri Jũmenijicu cacu ĵãðovaũ ĵãve aipe ãrojacure. Que baru maje ĵãiyede Cristore, majiwu aipe ãrojacu bajure Jũmenijicure. <sup>10</sup>Jũmenijicu ĵãve cure ðaibi mujare muje õmei, muje cue boje cõinãwure Cristoque, ñai jaboteyu caiwu ĵabovare aru cõjeiwure mãre. Que baru ye ĵaubevuwu mujare muje õmei. <sup>11</sup>Yõpe õmuvu ne buraicõjeiyepe ne cajede, arurajiwu ne baju Jũmenijicu ĵinava, nopedeca Cristo ðaibi mujare Jũmenijicu ĵinare, muje cue boje uẽque cõinãwure. Ubenita u burarĩ ñi ĵaruvabebi muje cajede. Quẽnora ðaiyubede ðaibi mujare ãmeina teiyede, muje ãmeina teiye ðaiyue cõjeimara ãmenajiyepẽ ayu.

<sup>12</sup>Muje ĵãðovaiye bãquede Jũmenijicure ocoque yaivuwu bãcawure tedejaquemavuwu muĵa Cristoque, aru ne põẽ ĵaruvainoi epeiye bãquepe mujare uẽque, aru Jũmenijicui nacovaiye bãquepe mujare uẽque mãre yainore ĵaruvarĩ.

Que ðacarejaquemavu Jūmenijicu mujare ũi majié paruéque muje ju aiyede ũre, “Jāve Jūmenijicu nacovarejaquemavu Cristore yainore jarūvari”, muje aiyede. <sup>13</sup>Muja yaivu bācavupe muje ũme coatete daimara marejaquémavu Jūmenijicure jarūvarī, muje vainí tuiye boje aru muje ðaicōjeiye boje muje āmeina ðaiyueque. Dinumure Cristo epebedejaquemavu mujare cāreja Jūmenijicu jinava. Ũbenita caride Jūmenijicu apure ðaibi mujare apué mamaeque Cristoque. Que teni ārumeteibi caiye maje āmeina teiyede. <sup>14</sup>Jūmenijicui toivaicōjeiye báque boje ũi ðaicōjeiyede, ðaiye jaurejaquemavu majare. Ũbenita maje ðabe boje diede, bojecube ðaiye cuvarejaquemavu Jūmenijicuque. Maja ðabevu bācavureca iye ðaicōjeiyede, ye boropateivupe jāmenejaquemavu majare Jūmenijicu. Quénora Cristoi yaiye báqueque jocusjaravena jarūvarejaquemavu maje bojecube ðaiye báquede ũre. <sup>15</sup>Que ðayu Jūmenijicu pueno baju vainí turejaquemavu caivu ina jabovare aru cōjeivure ũi cāchinoi. Náre cuyoje tede ðarī, jáðovaimi parucure caivu apevu pueno Cristo ũi ðaiyeque. Que ðaibi Jūmenijicu caivu pōeva ne jáiyede.

**Ijāravuque buobevu Jesúre ju aipōeva**

(Mt 15.9; 22.44; Ro 6.4-11; 14.1-6; Gá 2.19-20;

Ef 1.22; 4.15-16; Fil 1.21; Col 2.21; He 1.3)

<sup>16</sup>Que baru jápiarī adabejarā muja ácu pōecu āmeina yāvayure mujare, muje āiye boje aru muje ũcuiye boje máre, aru muje torojūve tebe boje ũpe ũi torojūve teijāravuare caijua coapa, caivu aviáva coapa, aru sábadore máre caisumana coapa. <sup>17</sup>Iye javeque ðaicōjeiyeque āiyeda coyuiyede, aru torojūve teiyeda coyuiyede, aru apejīena coyuiyede máre Jūmenijicu epedejaquemavu, buecuyū ñujare. Iye ðaicōjeiyeque Jūmenijicu jáðovañu marejaquémavu aipe ũi ðaquiye yóbore. Cristo cucuyurā máre jáðovañu marejaquémavu ũ. “Yópe ũre vaiquíyebu”, arī jáðovañu marejaquémavu. Que barīdurejaquemavu iye ðaicōjeiye. <sup>18</sup>Aru jápiarī adabejarā muja ácu pōecu āmeina yāvayure mujare, muje mearore jíye boje Jūmenijicure ũpe āmevu. Que teni apecu ũi cāchinocavupe tebejarā muja. Aru mearore jíbejarā ángelevare máre, yópe ũi ðaiyepe. Ũrecabe arīduyu ũbenina “Jāvemū ji coyuiye, ji jáiye báque boje apucu yópe decoboainope”. Ũbenita jámemi iyede, ũi coyuiye borore. Aru, “¿Meacu bārica apevu pueno?” ũbenina arīduibi. Nópe arīduibi ũi ðaicōjeiye boje ũi dāpiainore ũi āmeina ðaiyueque. <sup>19</sup>Ũrecabe dajocayu bācu ũi cuede Cristoque cūinávupe. Que baru majibebi iye bueiye jāvene Cristoi borore. Cristo maje jabocube. Que baru ðaicōjeimi caivu ina caiyajuboa pōeyajubocavu ũre ju aivure, ne pueno baju ðare nurajiyere ayu yópe Jūmenijicui urōpe. Que baru caijāravua pueno baju majide nuñama na, ũre ju aivu caivu, me curājivū ne ũmei yópe Jūmenijicui urōpe.

<sup>20-21</sup>Muje cue boje Cristoque cūinávupe, yaivu bācavupe paivubu ũque. Aru jaubevu ina yaivu bācavure ne ju aiyē ðaicōjeiyede. Que baru jaubevu mujare muje ju aiyē iye ðaicōjeiyede pōeva ne majiéque coyuiyede. Que barureca apevure ðaicōjeiye jaubevu mujare. Jaubevu mujare cāreja muje ju aiyē pōeva ne ðaicōjeiyede, yópe ne aiyede: “Jēmejara apejīene. Aru āmejara apejīene. Aru tuobejarā apejīene máre”, ne aiyede. <sup>22</sup>Quénora iye ijāravuque cūiquiyede coyuyama pōeva ne ðaicōjeiyede coyuiyeque. Aru diedecabu

põevavacari ne ðaicõjeiye aru ne bueiye máre. <sup>23</sup>Põeva iye ðaicõjeiyede ðaivu Jümenijicure pueðaiyvpe ãrojariduvubu. Aru jáðovariduvubu ne baju apevu ne cãchinocavure. Ñájine ðarĩ ne bajure, Jümenijicure pueðaiyvpe teniduvubu na. Iye ne ðaiyede yópe ne ðaicõjeiyepe majiduvpe teniduvubu. Ëbenita iye ðaicõjeiyede ðaivuvacari, ye dajocabema ne baju ãmeina ðaiyuede. Que baru iye ðaicõjeiye ne cuvæ bojecubevu náre.

**3** <sup>1</sup>Mujarecabu yópe Jümenijicui nacovaimara mácavupe Cristoque yainore jaruvarĩ. Que baru Cristo jinatamu muja. Que baru muje ãmeina teiyede muje javeque ðaiyede dajocarĩ, oatuvadavũ muja, mearo ðarãjivu. Oatuvaimara mácavu muja, cainumua ure nujara yo cavarõ mearo Jümenijicui curõcarõre. No cavarõ mearotamu Cristo ñi curõ, dobacu ñi dobarõ mearo Jümenijicui meapûravu yebai, ñi parué cuvæ boje.

<sup>2-3</sup>Caride muja ðabevu yópe muje ðaiye báquepe, muje yaivu bácapupe paiye boje Cristoque. Que baru coatede ðaimaratamu muja muje cue báquede jaruvarĩ. Quénora curivubu muja muje ñmei Cristoque cüinávupe Jümenijicui jáinore. Ëbenita apevu põeva jámema cãreja iye muje jáve cuede Cristoque. Quénora Jümenijicui yaveimarapebu muja caride. Que baru cainumua dápiare nujara yo cavarõ mearo Jümenijicui curõcarõre. Dápiabearã iye ãmene ijãravuquede ijãravucavu ne ðaiyede. <sup>4</sup>Cristorecabe jáve cure ðayv mujare muje ñmei. Ëi copaidaquiyede ijãravui cojedeca caivu ne jáiyede, muja máre curãjaramu ñque. Dinumu maquinóre meara marajáramu muja ye jaubeda yópe Jümenijicui urõpe.

#### Aipe ðaiye jaurõ Jesúre ju aipõevare

(Ef 2.3, 10; 4.2, 22, 24, 32; 5.19-20)

<sup>5</sup>Coatejarã muje baju muje ãmeina ðaiyuede jaruvarĩ. ãmeina ðabejarã apevuque mujemarebucuva ãmevuque, aru ãmeina ðabejarã ñmuvva nomivaque aru nomiva ñmuvvaque máre. Caiye iye ãmene ðaiyubejarã muja. Muje baju ãmeina ðaiyupe ðabejarã muja. Ëbejarã pueno baju muje cuvæde. Que ðaivu baru, ðajebu muje cuvæde yópe jümenijinape. <sup>6</sup>Aru Jümenijicu jorojĩni jári ina ñre jápiabevure, ñájine ðacuyume náre, ãmene ne ðaiye boje. <sup>7</sup>Muja máre javede ãmenore ðarejaquemavu napedeca muje jápiabede cãreja Jümenijicure. <sup>8</sup>Ëbenita caride mujacapûravu dajocajarã caiye ãmene. Que baru jarabejarã apevure. Aru jorojimejara náre máre. ãmeina dápiabearã apevure. Aru coyubejarã ãmenore caivu ne jápiayede apevui borore. ãmeina yávabejarã apevure ne jápiayede máre. <sup>9</sup>Que baru borodabejarã muje bajumia. Muja aipe ãrojarivu bácapupe muje ãmeina ðaiyuque aru muje ðare nuiye báquede ãmenore dajocadavũ muja.

<sup>10</sup>Caride mearape ãrojarivubu muja. Aru caijãravua Jümenijicu pueno baju meara nure ðaibi mujare, muje ãrojarajiyeye ayv ñpe, ñai mujare cuedayv bácupe mamañmeque, muje coreóvarãjiyepe ayv ñre jáve. <sup>11</sup>Que baru caride ye baju ãmevu põecu judío o judío ãmecu, aru buraicõjeñu ñi cajede o buraicõjemecu diede, aru yávayv griego ãmicuricamua yávaicamuare o yávabecu diede, aru ñmarocacu o ñbeni curijicu, aru apecui yebacacu o apecui yebacacu ãmecu máre. Quénora Cristorecabe cüinácura paruçu caivu apevu pueno cainumua. Aru caivu ñ jinaque cubi ñ.

<sup>12</sup>Muja Jümenijicu ñi beoimaramu, ñ jinatamu, aru ñi umaramu máre. Que baru yópe paivu bájarã muja. Cõmaje ãroje jájara mujevure. Aru

cadatejarā náre. Dápiabejarā mŭje baju mearape apevu pŭeno. Puedajarā mŭjevure meara pŭevape. Aru napijara náre. <sup>13</sup>Jarabejarā mŭje bajumia. Aru apesu mŭjecu ũi ámeina yávaru o ámeina ðaru mŭjare, árumetejarā ũi ámeina ðaiyede. Yópe mŭje jabocu Jesucristo ũi árumeteiye báquepe mŭje ámeina teiyede, mŭja máre árumetejarā mŭjevu ne ámeina teiyede. <sup>14</sup>Aru paruébu caiye die pŭeno mŭje ue mŭje baju. Mŭje uede apevure, curájaramu cŭinávure yópe Jŭmenijicui urŭpe. Que baru ɔjarā apevure.

<sup>15</sup>Cristo cārijimene ðaibi mŭjare. Aru Jŭmenijicu cuturí epei mŭjare, mŭje curájipeye ayu cŭinávure cārijimevŭva. Que baru cārijimena cure nŭjara mŭja. Aru cainumŭa torojuede jíde nŭjara Jŭmenijicure. <sup>16</sup>Coreóvare nŭjara caiye iye yávaiye méne Cristoi borore. Yópe ðajarā mŭje bueiyede aru mŭje coyuiyede paruŭreca mŭjevure máre ure majiéque. Majicajarā aru coyujarā paruŭreca Salmos ámicueque, aru mearore jíjarā Jŭmenijicure yuríainoque, aru ũi Espíritu jino yuríainoque máre. Que teni yuríajará Jŭmenijicure, torojuede jínajivu ũre mŭje ũmeque.

<sup>17</sup>Que baru caiye mŭje coyuiyede aru caiye mŭje ðaiyede máre, ðajarā yópe ina Jesucristore ju aivure jauépe, ina jéniaivu ũi paruéque. Aru cainumŭa Cristoi cadateiyeque torojuede jíjarā majepacu Jŭmenijicure.

**Mearo ðaiye jauŕō cŭramicavŭque aru memevŭque máre**

(Ef 5.16, 22, 25; 6.1, 4-9, 18-20; Fil 4.6; 1 P 3.1, 7)

<sup>18</sup>Mŭja, ũmucurivu, ju ajarā mŭjemarepacure ũi coyuiyede mŭjare. Ju aiyे jauvu mŭjare ũre, mŭje cue boje mŭje jabocu Cristoque cŭinávure. <sup>19</sup>Mŭja, nomicurivu, jecujarā mŭjemarepacore. Jarabejarā űre.

<sup>20</sup>Mŭja, jueðova, cainumŭa ju ajarā me mŭjebucŭvare ne coyuiyede mŭjare. Jŭmenijicu torojurí jáimi mŭje ju aiyede náre. <sup>21</sup>Mŭja, nébucŭva, jorojŭne ðabejarā mŭjamarare, ne chŭomenajipeye aivu.

<sup>22</sup>Mŭja, memecaivu, cainumŭa ju ajarā me mŭje jabova ijáravŭcavure ne coyuiyede mŭjare. Cainumŭa ju ajarā náre me mŭje ũmeque. Ju aivu ámejara náre quénora ne jáiyede mŭjare, “Mearo ðaivubu” ne arájipeye aivu mŭjare. Ju ajarā náre, mŭje puedaiye boje mŭje jabocu Cristore. <sup>23</sup>Torojurivu memecajarā mŭja. Yópe mŭje pŭevare memecajuroepe ámevu. Quénora yópe mŭje jabocu Cristore mŭje memecajuroepe ðajarā mŭja. <sup>24</sup>Cristorecabe mŭje jabocu jáve. ũrecabe mŭje memecaimu jáve. Que baru coreóvaivubu mŭja mŭje jabocŭvacari Cristo bojedacŭyure mŭjare yópe Jŭmenijicui aiyे báquepedeca, ũi mearo ðacaquiyede mŭjare. <sup>25</sup>ũbenita ácu mŭjacacu ũi ámeina ðare nŭru, Jŭmenijicu, jáñu caivu pŭevare cŭináturura, nájine ðacŭyme ũre ũi ámeina ðaiye báquepedeca. Que teni Jŭmenijicurecabe bojedayu caivu pŭevare yópe ne ðaiye báquepedeca.

**4** <sup>1</sup>Mŭja, ne jabova, ðajarā me mŭjare memecaivure yópe mŭjare jauépe Jŭmenijicui jáinore, mŭje coreóvaiye boje mŭje jabocu cavarŭ mearocacu cŭcure, mŭje coyurájimure aipe mŭje ðaiye báquede.

<sup>2</sup>ũetubevŭva coyujarā Jŭmenijicueque. Mŭje coyuiyede ũque, me dápiajará mŭje coyuiyede aru torojuede jíjarā ũre. <sup>3-4</sup>Aru mŭje coyuiyede jéniajara Jŭmenijicueque yure boje máre, cŭcure ámeina teivure jēni jacoñami jívui, ji coyuiye báque boje iye yávaiye méne, Cristoi borore, jáðovameno mácarűre jipocamia ũbenita jáðovainore caride. Jéniajara Jŭmenijicueque ũi yávayv

buojare ðaquiyeye yure, ji coyũquiyeye aivũ diede caivũ ne jápiaiyede yópe yure jauépe.

<sup>5</sup> Coyujarã muja Jesús ùi yávaiye méne ina úre ju abevure. Cainũmua muje cuede náque me majiéque ðajarã náre. <sup>6</sup> Coyujarã náre, me coyũquiyeye aivũ náre aipe ãrojarore muje coyũnore. Que teni coreóvarãjaramu muja aipe ãrojae jauróre mujare muje coyuiyede náre ne jëniari jáiyede mujaque.

#### **Pablo ùi meaicõjeino Colosacavure**

(Hch 12.12, 25; 13.13; 15.37-39; 19.29; 20.4; 27.2; Ef 6.21-22;

Col 1.7; 2 Ti 4.10-12; Flm 2, 10-12, 23-24; Ap 3.14-22)

<sup>7</sup> Caiye iye vaiyede yure ñai Tíquico coyũcũyume mujare. Úrecabe majecu, maje umũ, yure cadateyu dajocabecũva, aru maje jabocu Cristore memecayũ yúque máre. <sup>8</sup> Darocũyumu úre muje yebai, ùi coreóvare ðaquiyeye ayũ aipe vaiyede ñujare, ùi torojure ðaquiyeye ayũ mujare muje ùmei. <sup>9</sup> Aru nãvacũyume ñai Onésimore úque, majecu dajocabecũre, maje umũre, muje ìmarocacure. Na pucarã coyũrãjarama mujare caiye vaiyede ñuje yebare.

<sup>10</sup> Ñai Aristarco, ãmeina teivure jëni jacoĩnami cũcũ yúque, meaicõjeimi mujare. Aru ñai Marcos máre, Bernabé ùi chimacu, meaicõjeimi mujare. Javede coyũcacũ mujare ùi borore. Que baru ùi earu muje yebai, me copũ etajarã úre. <sup>11</sup> Aru ñai Jesús máre, apenũmu ne aimũ Justo, meaicõjeimi mujare. Ina yóbecurã quévura judíovacavũ Jesucristore ju aivurecabu memeivũ yúque caride, põeua ne jaboteicõjenaiyeye aivũ Jũmenijicure náre. Na cadateivũ yure me torojure ðadama ji ùmei. <sup>12</sup> Aru ñai Épafras máre, muje ìmarocacũ, aru Cristore memecayũ, meaicõjeimi mujare. Úrecabe cainũmua pũeno baju jëniañũ mujare Jũmenijicuque. Jëniañume muje meara marajiyépe ayũ muje ùmei ye jaubeda yópe Jũmenijicui urópe aru muje coreóvarãjiyeye ayũ aipe caino Jũmenijicui uróre, “¿Jãve márica?” arĩ dápiabevũva. <sup>13</sup> Pũeno baju ubi muje curãjiyeye ayũ me Jũmenijicui jáinore, aru náre máre, ina Jesucristore ju aivure Laodicea ãmicurĩimarocavure aru Hierápolis ãmicurĩimarocavure máre. Que baru paruróreca jëniaimi Jũmenijicuque mujare boje. Yúvacari coreóvaivũ die jãvene. <sup>14</sup> Aru ñai Lucas, majare juoipõecu, maje umũ, aru Demas máre, meaicõjedama mujare.

<sup>15</sup> Meajarari na Jesúre ju aipõeua Laodiceacavũ. Aru meajarari Ninfa aru ina Jesúre ju aipõeua cójijivaivũ òi cũrami jívui. <sup>16</sup> Jãri boroteicõjejara iyoca paperayocare muje cójijinoi caivũ ne jápiaiyede. Aru muje jápiarĩburu yóboi, jãri boroteicõjejara diyocare ina Laodiceacavũ Jesúre ju aipõeua ne cójijinoi caivũ ne jápiaiyede máre. Aru apeyoca paperayocare máre, ji toivaino mácaróre, Laodiceacavure muja máre jãri boroteicõjejara diyocare muje cójijinoi caivũ ne jápiaiyede. <sup>17</sup> Yópe arĩ, coyujarã ñai Arquipore: “Me jájacu mũ, buojacũyũ yo mi memeinore maje jabocu Jesucristo ùi epeiye báquede mũre mi cũe boje cũinávũpe úque”. Que ajarã úre.

<sup>18</sup> Yúvacari, Pablo, toivaivũ ji pũruque caride. Meaicõjeivũ caivũ mujare. ãrujara yure ne buoimure tãumeaque, ãmeina teivure jëni jacoĩnami cũcũre. Jũmenijicu mearo ðacajacurĩ mujare bojecubeda ùi me boje. Quénoramu.

# 1 Tesalonicenses

Mamabuĩnore coyũiyebu Pablo bácu ũi toivaicõjeiye báquede mamayoca paperayocare Tesalónica ãmicurĩĩmarocavu Jesúre ju aipõevare. Pablo bácu judíovacacu bácuvacari, Jesús ũi yávaiye méne beorĩ coyucõjeĩmu marejaquémavu, coyucũyũ ũi yávaiye méne judíova ãmevure, judíova ne ju abe boje ũi coyuiyede. Lucas bácu coyurejaquemavu Pablo bácuĩ borore Hch 7:57-8:1, 9:1-31, 13:1-28:31, aru ũi cuede Tesalónica ãmicurĩĩmaroi Hch 17:1-10, 20:1-5. Caiye iyoca, Pablo bácuĩ toivaicõjeiyoca báque curiyoca Majepacu Jũmenijicui yávaiye mamaene coyuitucubo jívui, mamarũmure ũre toivacaipõescu bácuire toivaicõjeneaquemavu iyoca paperayocare ũi toivaicõjeiquiye jipocare apeyocare. Pablo bácu coyurejaquemavu ũre toivacaipõescu bácuire aipe ũi toivacaquiyi báquede diyocare. Toivaicõjeneaquemavu diyocare ãniũjua báquede 50-51 d.C. pũque ũi cucũniyede, coyucũyũ Jesús ũi yávaiye méne, ũi cuede Corinto ãmicurĩĩmaroi.

Pablo bácu toivaicõjeneaquemavu diyocare ũi cucũniye eabe boje Tesalónicacavu ne yebai aru Timoteo bácuĩ coyũiyi boje ne borore ũi mácuire (2:17-3:6). Coyurejaquemavu náre méne ne parure nuiye boje Jesucristoque, dajocabevũva ne ju aiyede aru ne ñaiye boje yópe ũi urõpe (1:2-10, 3:7-9). Coyurejaquemavu náre aipe ñare nuiye jaũrõre náre yópe Jũmenijicui urõpe (4:1-12, 5:12-22), aru ne majibeno mácarõre Jesucristoi copaidaquino maquinõra aru ũre ju aivũre ne yainĩburu nacajarajiyeda (4:13-5:11). Aru ãrũre ñarejaquemavu ina Tesalónicacavure aipe ũi ñaiye báquede ne jẽneboi, ne ju abenajiyepi ayu apevu borocuẽde coyurĩduivũre Pablojã ne borore (2:1-16).

---

## Pablo ũi meaicõjeino Tesalónicacavure

(Hch 17.1)

**1** <sup>1</sup>Yũ, Pablo, toivaicõjeĩvu apecure iyoca paperayocare. Silvano aru Timoteoque yũ meaicõjeĩvu mũjare, Tesalónica ãmicurĩĩmarocavu Jesucristore ju aipõeva cõjijivaivũre. Mũja majepacu Jũmenijicu aru maje jabocu Jesucristo jinatamu mũja. Majepacu Jũmenijicu, maje jabocu Jesucristomaque, mearo ñacajacurĩ mũjare bojecubeda ũi me boje. Aru torojũrivũ cure ñajacurĩ mũjare cãrijimevũva.

## Tesalónicacavu ju aipõevape ne jãðovaino

(Hch 17.5-9)

<sup>2</sup>Torojũede jívubu ñũja Jũmenijicure cainũmua jẽniaiye coapa caivũ mũjare, mũje ju aipe boje Jesúre. <sup>3</sup>Ñũje coyuiyede majepacu Jũmenijicunque, ñũja ãrũrivũbu mũje memẽĩnore, mũje ju aipe boje Jesúre. Ñũja dápiaivũbu mũje memecainore apevũre, mũje ue boje Jesúre aru náre máre. Ñũja ãrũrivũbu mũje napinĩ ñãjĩyede, mũje coreiye boje maje jabocu Jesucristoi copaidaquijãravũre. <sup>4</sup>Mũja, ñũjevũ, coreóvaivũbu ñũja mũjare Jũmenijicui

umarare. Ñuja majivu mujare Jūmenijicui beoimarare, ũ jivu bārājivure. <sup>5</sup>Jesús ũi yávaiye méne coyucarā mujare. Ūbenita buebetecarā mujare diede quénora yávaiyeque. Quénora jádovacarā ñai Espíritu Santo ũi paruéde pōeva ne ñari majibede ñaiyeque. Jádovacarā ñuje majiéde máre yavebeda Jesús ũi yávaiye méne jāvene. Ārujara ñaivure me ñuje cuede muje jēneboi, aru ñuje cadateiyede mujare.

<sup>6</sup>Mujacapuravu ñávũ me ñujape aru maje jabocu Jesucristope máre. Yópe ñuje ñaiyepe me ñajivureca, nopedeca muja máre ñajivuvacari ñadavũ me. Muje ju aiye boje Jesús ũi yávaiye méne, apevu ñajine ñaima mujare urarōreca. Ūbenita ñajiyē cuedeca jacopuavũ muja Jesús ũi yávaiye méne torojurĩ. Aru ñai Espíritu Santorecabe torojure ñayu mujare iye torojueque. <sup>7</sup>Que baru caivu ina Jesúre ju aipōeva Macedonia aru Acaya āmicurijoborōacavu, jápiaivu muje borore, ñaivubu me mujape. <sup>8</sup>Mujavacari majide ñaivubu pōevare maje jabocu Jesucristo ũi yávaiye méne. Que baru nora jápiañama muje borore ina Macedoniavavu aru ina Acayavavu máre. Ūbenita obedivu apenocavu máre majidivubu muja ju aivure Jūmenijicure caride. Que baru coyuiye jaubevu ñujare apēvure muje borore, jave ne majié boje. <sup>9</sup>Quénora caivu ina pōeva coyuyama muje jacopuiyede ñujare me, ñuje eaiyede muje ĩmaroi. Coyuyama muje ñajocaiyede muje pēpeimarare, memecarājivu ñai Jūmenijicu apucure aru jāvene máre. <sup>10</sup>Coyuyama muje napini coreiyede máre ñetubevũva Jūmenijicui mácure, copaidacuyure ĩjārvuvi cavarō mearo Jūmenijicui curōre jocarĩ. Ñai Jesúrecabe Jūmenijicui mácu. Ūi yainĩburu yóboi, Jūmenijicu nacovarejaquemavu ĩre yainore jaruvarĩ. Ñai Jesús meadayu majare, maje ñajimenajiyēpe ayu Jūmenijicui ñajiovaquijārvavu baquinóre pōevare, ne āmeina teiye boje.

**Pablo Tesalónicai ũi memecaino**

(Hch 9.23, 29; 13.45, 50; 14.2, 5, 19; 16.19-24;

17.1-9, 13; 18.3, 12; Gá 1.10; 2 Ts 3.8)

**2** <sup>1</sup>Muja, ñujevu, mujavacari coreóvaivubu ñuje daiyede muje ĩmaroi, me jápiaivure ñuje coyuiyede. Que baru ñuje daiye muje yebai bojecube āmeteavũ. <sup>2</sup>Aru mujavacari coreóvaivubu javede ñuje cuede Filipos āmicurĩmaroi, nócavu ne jabova ne ñaiyede ñujare. Ñajine ñaima ñujare. Aru āmeina yávaima ñujare máre. No yóboi, ñuje eaiyede muje ĩmaroi, obedivu pōeva maucvateima ñujare. Ūbenita Jūmenijicu coyucōjeame ñujare jidubevũva. Aru ne maucvaede ñujare, coyucarā mujare ũi yávaiye méne, Jesús meadayure pōevare. <sup>3</sup>Ñuja buebevu mujare jāve āmene. Aru buebevu āmeũmeque máre. Aru jujovabevu pōevare ñuje bueiyeque. <sup>4</sup>Quénora Jūmenijicui me jāiye boje ñujare, ũ beoibi ñujare, ñuje buenajiyēpe ayu pōevare Jesús ũi yávaiye méne. Que baru cainumua bueivubu yópe Jūmenijicui bueicōjeiyepe. Buebevu ñuja, pōeva ne me járajiyēpe aivu ñujare. Quénora bueivubu ñuja, Jūmenijicui me jáquiyēpe aivu ñujare. Jūmenijicurecabe majicu maje ñajiaiyede. Que baru Jūmenijicu jāimi pōeva ne ñaiyede aru ne ñajiaiyede máre.

<sup>5</sup>Mujavacari coreóvaivubu ñuje ñaiye báquede muje jēneboi. Cainumua yávabecarā, jujovarājivu mujare, muje ñarājiyēpe aivu yópe ñuje urōpe. Buebetecarā mujare quédada ĩnajivu muje tātuturare. Jūmenijicuvacari

majibi ñuje ðaiye báquede muje jëneboi. <sup>6</sup> Põevare pueðaicõjemetecarã ñujare. Vobetecarã ñuja mujare aru apevure máre, mearore jiyede ñujare. <sup>7</sup> Ñujamu Jesús ñi yávaiye méne beorí coyucõjeimara. Que baru ñuja ðaicõjeni buojaivubu apevure. Ëbenita ðaicõjemetecarã mujare. Quénora meara pøevape cútecarã muje jëneboi. Yópe népacoí meaðaiyepe mamarare meadacarã mujare. <sup>8</sup> Ñuje urarõ jecué boje mujare, torojurí buecarã Jümenijicui yávaiye méne. Aru caiyede ðaiyutecarã, cadatenajivu mujare pu ñuje yainumuita. Que baru ñuje pare jecumaramu muja. <sup>9</sup> Muja, ñujevu, mujavacari ãrurivubu ñuje pare memeni voinore ñujare jauéde. Ñuje cuede muje jëneboi memecarã ñuja jãravure aru ñamine máre, muje ñájimenajiyeye aivu, bojedaivu ñujare jauéde ñuje bueiye Jümenijicui yávaiye méne mujare.

<sup>10</sup> Mujavacari jáivubu, aru Jümenijicu máre majibi ñuje ðaiye báquede muja Jesúre ju aipðevaque. Caiye ñuje ðaiye báquede mujare ðacarã mearoque yópe Jümenijicure memecaivupe. Aru caiye ñuje ðaiye báquede mujare meatevu Jümenijicui jáinore. Que baru ñame buojabema boropaðaivu ñujare ñuje ðaiye báquede muje jëneboi. <sup>11</sup> Mujavacari coreóvaivubu ñuje ðaiye báquede mujare coapa yópe népacu ñi ðaiyepe mamarare. Bueivu batecárã mujare, muje torojure ðarãjiyepe aivu. Cadateivu batecárã mujare, muje chïomenajiyeye aivu. <sup>12</sup> Aru ðaicõjeivu batecárã mujare yópe ina Jümenijicu jina ne ðaiye jaurõpe, Jümenijicui torojuiyeyepe aivu mujaque. Jümenijicurecabe cutuyu mujare meara mårajivure aru ñi jaboteinocavu bárãjivure máre.

<sup>13</sup> Ñuja jívubu torojuede Jümenijicure cainumua muje jápiaie báque boje ñujaque Jümenijicui yávaiye méne. Dápiabeteavü muja pøeva ne yávaiyepe iye yávaiyede ñuje bueiye. Quénora ju ávü muja diede Jümenijicui yávaiyepe. Aru jávetamu ñuje bueiye Jümenijicui yávaiyede. Que baru Jümenijicu oatuvayube mujare me, muje ju aiyede ñi yávaiye méne. <sup>14</sup> Muja, ñujevu, muje ímarocavu ñájine ðávü mujare nópe ina judíova ñájine ðaiye báquepedeca ina Jesúre ju aivure Judea ámicurijoborócavure. Cünáturu vaivu mujare máre. <sup>15</sup> Ina judíova, nárecabu boarí jaruvaivu bácvu maje jabocu Jesucristore. Javede ina judíovavacari boarí jaruvarejaquemavu ina Jümenijicui yávaiyede coyucaipðeva mácvure máre. Aru caride máre ina judíovavacari ñájine ðarí jaetovadama ñujare máre. Ne que ðaiyeque jorojïne ðaivubu na Jümenijicure. Aru maucavavivubu caivu apevu pøevare máre. <sup>16</sup> Ina judíovavacari ñujare coyucõjemenidivubu Jümenijicui yávaiye méne ina judíova ánevure, ne meatebenajiyeye aivu. Que teni buojaivubu caiye ne ámeina teiyede. Que baru caride uetuibi Jümenijicu jáñu ðaivure ámeno. Que baru ñájine ðacuyume náre.

**Pablo ñi jácunuiyurõ Tesalónicacavure cojedeca**

(Hch 17.5; 18.5)

<sup>17</sup> Muja, jívü, ñujare coatede ðaima ñuje mauva mujare jaruvári. Cücõjemetema ñujare mujaque. Ëbenita árucõjemeni buojabema na ñujare. Que baru cainumua ãrurivubu mujare. Maje coateniburu yójtboi, ñuja chïori árutecarã mujare. Járadaiyuríducarã mujare. <sup>18</sup> Ñuja copainuiyuríducarã muje yebai, járajivu mujare cojedeca. Cainumua

yávacari, Pablo, mujare jácucopaiyuriducacu. Ñbenita ñai abujuvai jabocu, Satanás, nuicôjemetequemavu ñujare. <sup>19</sup>Ñbenita ñuja torojurâjaramu mujare boje maje jabocu Jesucristo ñi copaidaquiyede. Mujarecabu napini corede ðaivu, ñuje cûvarâjiyepe aivu mearore. Mujarecabu torojure ðaivu ñujare. Aru mujarecabu ñuje jádovaimara mearore ñuje bueinore, ñuje bueiye boje muje jêneboi. <sup>20</sup>Jâve mujarecabu ñuje mearore jímara aru ñuje torojumara máre.

**3** <sup>1</sup>Ñbenita ñuja napini buojabetecarâ jámevu mujare. Que baru cûináturu ñuje ñme majitecarâ ñuje ðarâjiyede. Ñuja pucarâ mauteçarâ Atenas âmicuriîmaroi. <sup>2-3</sup>Aru jarocarâ ñai majecu Timoteore muje yebai. Ñ yóvaibi ñujare memecayu Jûmenijicure, coyuyu Jesús ñi yávaie méne. Que baru jarocarâ ñre cadatecuyure mujare, aru parure ðacuyure mujare máre muje ñmei, muje ju ainore Jesúre pueno baju parurô nure ðacuyure, muje dajocabenajiyepe aivu muje ju aiyede Jesúre, pœva ne ñâjine ðaiye boje mujare. Mujavacari coreóvaivubu me majare ñâjiye jaurôre. <sup>4</sup>Javede ñuje cuede mujaque, coyucarâ maje ñâjinajiyede. Aru mujavacari coreóvaivubu me jave vaivu majare yópe ñuje aye báquepedeca. <sup>5</sup>Que baru yúcapûravu napini buojabetecacu coreni majibecu cäreja muje borore. Que baru jarocacu ñai Timoteore, coreóvacuyu aipe curivure muja yópe iye yávaie méne coyuiyepe muje ju aiyede. “Ñai abujuvai jabocu kujovaiyucabebu náre. Aru ñuje bueiye báque náre bojecubejebu”, arí ðápiacacu yu.

<sup>6</sup>Caride Timoteo copaidaibi mujare jocarí. Ñi coyuiyede ñujare muje borore torojure ðaibi ñujare pare. Coyuibi aipe ju aivure Jesúre aru aipe urivure muje bajumia máre. Coyuibi aipe torojurí ârurivure ñujare cainumua aru aipe jáiyurivure ñujare máre, quédeca ñuja máre járanuiyuvu muje yebai. <sup>7</sup>Que baru muja, ñujevu, iye ñi coyuiyede muje borore parure ðaibi ñujare ñuje ñmei, caiye iye ñâjine ðaiye cuedeca yui ñuje jêneboi. <sup>8</sup>Caride ñuja coreóvaivubu jáve ju aivure muja Jesúre. Muja dajocabenajivubu maje jabocu Jesucristore. Que baru me curí torojurivubu ñuja. <sup>9</sup>Urarô torojuede jívubu ñuja Jûmenijicure mujare boje. Ñuje coyuiyede Jûmenijicuque pueno baju torojurivubu, muje ju aye boje Jesúre parurôreca. <sup>10</sup>Jâravure aru ñamine máre parurô jëniaivubu ñuja Jûmenijicuque, mujare ñi járanure ðaquiyepe ayu ñujare, buenajivu cojedeca mujare iye muje coreóvabede cäreja. Jëniaivubu diede, muje me majinajiyeye aivu aipe ðaiye jaurôre muje cuede yópe Jûmenijicui urôpe.

<sup>11</sup>Jëniaivubu majepacu Jûmenijicuque aru maje jabocu Jesúque máre, ne nure ðaquiyepe aivu ñujare muje yebai. <sup>12</sup>Aru maje jabocu Jesús pueno baju urarô nure ðajacurí mujare muje uede muje bajumia aru apevure máre, muje uburí apevure me yópe ñuje uepe mujare. <sup>13</sup>Que teni parure ðajacurí mujare muje ñmei, ñame ne buojabenajiyepe aivu boropadaivu mujare muje meara mae boje majepacu Jûmenijicu ñi jáinoi maje jabocu Jesús ñi copaidaquijâravu baquinói ñi jivu mearaque. Quédecabu.

Pablo “Jûmenijicure torojure ðaiyurivu, yópe ðajarâ” arí, ñi coyuíno

**4** <sup>1</sup>Muja, ñujevu, maje jabocu Jesús ñujare bueicôjeimi mujare cojedeca yópe ñuje bueiyepe mujare javede. Coyuivubu mujare, muje me majinajiyeye aivu aipe jaurôre muje ðaiyede, Jûmenijicui me jáquiyepe aivu

mujare. Caride ðaðavū muja yópe Jūmenijicui urópe. Que baru paruróreca jēniaivubu űuja mujare, muje ðarājiyepe aivu yópe Jūmenijicui urópe pūeno baju cainumua. <sup>2</sup>Mujavacari coreóvaivubu bueivure űuja mujare yópe maje jabocu Jesús űi bueicójeiyepe. <sup>3</sup>Yópe űbi űai Jūmenijicu: Muja coapa ðajarā mearore cainumua. Meara mājara muja, ű jina muje teiye boje. Que baru cubejarā muja apevuque mujemarebucava āmevuque. <sup>4</sup>Me cūjarā muja coapa mujemarepacoque Jūmenijicui jāinore aru pōeva ne jāiyede máre. Pueðajarā muja coapa mujemarepacore. <sup>5</sup>Ðabejarā nápe ina Jūmenijicure coreóvabevupe. Ðaðama na āmenore, Jūmenijicui űbenore, ne pueðaiye majibe boje nomivare. Ðaðama āmenore náque. <sup>6</sup>Que baru mujovabejarā muja apescu mujecure, āmeno ðaivu jímarepacoque. Javeita űuja coyucarā mujare paruróreca aipe maje jabocu Jūmenijicu űājine ðacuyure caivu ina nópe āmeno ðaivure. <sup>7</sup>Jūmenijicu cutuibi majare ű jina mārājivuva. Que baru buojabevu maja curivu āmeūmeque. Quénora maje meara mae jauvu majare, maje curājiyepe aivu me Jūmenijicui jāinore, ű jina mae boje. <sup>8</sup>Aru ácu pōescu ju abescu baru iye űuje bueiyede, ju abeniduibi ű apescu pōescui bueiyede. Quénora ju abebi ű Jūmenijicui yávaiyede, űai daroyu mujare űai Espiritu Santore.

<sup>9</sup>Iye muje uede muje bajumia toivabenajivubu űuja. Muja me urivubu muje bajumia. Que baru diede toivaiye jaubevū űujare. Javede Jūmenijicuvacari majicaibi mujare, Jesúre ju aipōevare, jauřóre muje bajumia uede. <sup>10</sup>Nopedeca mujacapūravu cainumua urivubu ina Jesúre ju aipōevare, caino Macedonia āmicurijoborōcavure. Paruróreca jēniaivubu űuja mujare, muje urājiyepe aivu yópe Jūmenijicui urópe pūeno baju cainumua. <sup>11-12</sup>Caiye muje ðaiyeque pūeno ðajarā, cārijimevuva curājivu apevuque. Ðaicōjemejara apevure aipe ðaiye jauřóre náre ne ðaiyede. Memejara muja coapa, cuvārājivu muje āiyede, muje curiñamiare, aru caiye apede mujare jauéde máre. Yópe iye űuje ðaicójeiyepe mujare caride, nopedeca ðaicōjecarā mujare jipocamia, ina Jesúre ju abevū ne pueðarājiyepe aivu mujare me, muje corebe boje apevu ne jiyede mujare jauéde, aru ye jaubequiyepa aivu mujare.

### **Maje jabocu Jesús űi copaidaquino**

(Mt 24.30-31, 43; Mr 13.26-27; Lc 12.39; Ro 13.12;

1 Co 15.51-52; Ef 6.13-17; 2 P 3.10)

<sup>13</sup>Muja, űujevu, űvu űuja muje majinajiyede jāve aipe vaivure ina Jesúre ju aipōeva yaivu bācavure. Chīomejara muja mujevu ju aipōeva yaivu bācavu boje yópe ina ju abevū ne chīoiyepe, ne napini corebe boje jāravu cūiméjāravu baquinóre. <sup>14</sup>Coreóvaivubu maja yaivū bācure Jesús, aru nacajañu mácure yainore jaruvári. Que baru coreóvaiye jauvu majare nacovacuyure Jūmenijicure ina Jesúre ju aipōeva yaivu bācavure Jesús űi copaidaquiyede ijāravui.

<sup>15</sup>Que baru caride űuja coyuyurivubu mujare me iye Jesús űi bueiye báquepe űujare. Jesúre ju aipōeva apurivu ijāravui maje jabocu Jesúi copaidaquijāravu baquinóre copu numenajaramu űre ne jipocamia ina Jesúre ju aipōeva yaivu bācavure jocarí. <sup>16</sup>Pōeva jāpiarājarama coðoborí cōjeiyede; aru ángelevai jabocui yávainore; aru Jūmenijicui japuiyore, trompeta āmicuriyore, japuiye pare bujiéde máre. Dinumumiareca maje

jabocu Jesúvacari êmecuyume cavarõ mearo Jûmenijicui curõre jocarî. Aru ina Jesúre ju aipõeva yaivû bâcavû nacajarajarama yainore jaruvârî. <sup>17</sup>No yóboi, maumena Jûmenijicu cójijovascuyume ina Jesúre ju aipõeva apurivure cãreja ina ùi nacovaimara mâcavûque. Aru cûináturu caivû maja copu nûri jacoyurãjaramu maje jabocu Jesúre ùmûi ocopeniboa yebai. Que teni curãjaramu maja maje jabocu Jesúque cainumua. <sup>18</sup>Que baru chîomejara muja. Coyujarã iye borore, torojure ðarãjivu muje bajumia.

**5** <sup>1</sup>Muja, ñujevû, põecu cubebi majicu aipijãravua jaurõre aru aipe vaiquýede maje jabocu Jesús ùi daquie jipocare. Que baru toivaiye jaubevû ñujare diede. <sup>2</sup>Mujavacari coreóvaivûbu me maje jabocu Jesús copaidacuyure ijãravûi põeva ne corebede, ùi copaidaquinumure majibedeca yópe ñavaipõecu daiyepe ñamine põeva ne corebedeca. <sup>3</sup>Põeva, yópe arî, coyurîdurãjarama ne bajumia: “Caino cârijimene ðaivû. Yéde jidubevû maja”, arîdurãjarama. Aru ne nópe coyurîduiyedeca, cûinã bíjarãjarama na. Ñájini búrãjarama maumejiena. Aru dupini majibenajarama na diede jocarî. Ñájinajarama na yópe ico jueðocuvacodo maumejiena âmei ijiéde ñájiyepe pøedare ðacodo mamajicure.

<sup>4</sup>Ûbenita muja, ñujevû, mujacapûravû Jûmenijicure coreóvabevû âmevû muja. Aru âmeina teivû âmevû muja nápe, Jesúre ju abevû, ñeminoi curivûpe. Que baru muje coreóvaiye boje maje jabocu Jesús dacuyure, ù cuavabescuyume mujare ùi copaidaiyede ijãravûi, yópe ñavaipõecu ùi cuavaiyepe cûramicavure. <sup>5</sup>Caivû muja Jesúre ju aivû majidivûpe ðaivûbu cainumua põeva ne jáinoi muje ðaiyede, muje coreóvaiye boje Jûmenijicure. Que baru caivû muja miadãroi curivû jãravucavûpebu. Maja Jesúre ju aivû ðabevû cainumua majibevûpe, ne coreóvabe boje Jûmenijicure põeva ne jáiyede maje ðaiyede. Que baru ñamicavû aru ñeminocavû máre âmevû maja. <sup>6</sup>Que baru dãpiabenajarevû maja nápe, Jesúre ju abevûpe. Cãivûpebu na. Quénora dãpiarãjarevû maja me apurivûpe, me oaburî coreivû maje bajure. <sup>7</sup>Ñaminecabu ina cãivû ne cãiyede. Aru ñaminecabu ina pacoteivû ne pacoteiyede. <sup>8</sup>Ûbenita majacapûravû coateivûbu ina ñamicavure jaruvârî. Aru ñeminoi cubevû maja. Quénora jãravucavutamu maja. Aru miadãroi cuivûbu maja.

Que baru me ðaicõjeiye javûvû maje bajure. Maje ju aie Jûmenijicure javûvû majare aru maje ùe apevure máre. Yópe ðarî taoivûbu maja nópe churarava ne taoiyepe ne bajure jãjaricaje doicajeque. Aru javûvû majare maje napini coreiye Jûmenijicui meadaquiyede. Nópe ðarî taoivûbu maja yópe churarava ne taoiyepe ne jipobure jãjaribo moiboque. <sup>9</sup>Que baru Jûmenijicu epebebi majare ñájine ðacuyû. Quénora epeibi majare maje jabocu Jesucristoi meadaquiyeye ayû, ñájimemuri âmenaque. <sup>10</sup>Jesús yaidéjamedã majare boje, maje curãjiyepe ayû ùque cainumua. Ina apurivû cãreja aru ina yaivû bâcavû máre ùi copaidaquiyede caivû maja cûináturu curãjaramu ùque cainumua. <sup>11</sup>Que baru parure ðajarã muja pûeno baju cainumua, muje baju ju aiyede Jesúre parurõ nure ðaquiyepe aivû. Aru cadatejarã cainumua muje bajumia, nopedeca muje ðare nuiyepe caride.

**Pablo ùi majicaino Jesúre ju aipõevare aipe ðaiye jaurõre náre**

(Fil 4.4, 6; Col 4.2-7)

<sup>12</sup>Muja, ñujevû, ñuja jëniaivûbu parurõreca mujare, muje pueðarãjiyepe aivû ina memecaivure maje jabocu Jesúre muje jëneboi. Nárecabu maje

jabocu Jesúi epeimara, jabotenajivu aru majicarājivu máre. Aru buenajivubu mujare aipe daiye jauróre, muje đarājiyepe aivu mearo maje jabocu Jesús ũi jáinoi. <sup>13</sup>Que baru puedajarā náre. Aru pare ũjarā náre, ne cađateiye boje mujare. Čujarā muja cārijimevva mujevunque.

<sup>14</sup>Muja, ñujevu, ñuja jēniaivubu parurōreca, muje đarājiyepe aivu yópe mujare jauéde. Majicajarā ina memeiubevure, ne memenajiyeyepe aivu. Torojure đajarā ina jidurivure, ne jidubenajiyeyepe aivu. Cađatejarā ina chōivure, ne torojure đarājiyepe aivu ne ũmei. Aru napijara caivure.

<sup>15</sup>Apecu ũi āmeno đaru cūinācu mujacacure, đabejacurī āmeno ũre copu. Quénora cainumua napini dāpiajarā muje đarājiyede mearore muje bajumia aru caivu pōevaque máre.

<sup>16</sup>Torojujarā muja muje ũmei. <sup>17</sup>Aru ũetubevva coyujarā Jūmenijicuque.

<sup>18</sup>Aipe vaiye vaijārōri mujare. Cainumua torojuede jījarā Jūmenijicure. Jūmenijicu ũbi maje nōpe daiyede, maje ju aiye boje ũre.

<sup>19</sup>Ñai Espíritu Santore maucuvabejarā muja ũi đaiyurōre mujaque.

<sup>20</sup>Jūmenijicui yávaiyede coyucaiyedeca jápiaiyubevure tebejarā muja.

<sup>21</sup>Caiyede me jári coreóvajarā muja. Aru coreóvarīburu yóboi, đajarā caiye méne. <sup>22</sup>Ŭbenita đabejarā caiye āmene.

<sup>23</sup>Jūmenijicuvacari, cārijimenoque cure đayv pōevare, cure đajacurī mujare caivu meara baju. Aru corejacurī mujare coapa caivu, muje decocure, muje ũmene, aru muje bajure máre, muje boropatebenajiyeyepe aivu maje jabocu Jesucristoi copaidaquijāravu baquinói. <sup>24</sup>Jūmenijicu cutuibi mujare ũ jina mārājivva. Aru cainumua đayube yópe ũi aiye báquepedeca. Que baru ũvacari mearo đacacuyume mujare.

#### **Pablo ũi meaicōjeino Tesalónicacavure**

<sup>25</sup>Muja, ñujevu, jēniajara Jūmenijicuque ñujare. <sup>26</sup>Meaicōjeivubu ñuja caivu muja Jesúre ju aipōevare. Me jacoyujarā muja mujevure, muje jivare nuri, muje Jūmenijicu jina mae boje. <sup>27</sup>Maje jabocu Jesús ũi jáinoi yv jári boroteicōjeivu mujare iyoca paperayocare caivu mujevuv Jesúre ju aipōevare.

<sup>28</sup>Me čujarā muja maje jabocu Jesucristo ũi mearo đacaiye bojecubeda ũi me boje. Quénoramu.

## 2 Tesalonicenses

Mamabuinore coyuiyebu Pablo bácu ùi toivaicōjeiye báquede yóbocayoca paperayocare Tesalónica āmicurīīmarocavū Jesúre ju aipōevare. Pablo bácu judíovacacu bácvacari, Jesús ùi yávaiye méne beorī coyucōjeimū marejaquémavū, coyucuyū ùi yávaiye méne judíova ānevure, judíova ne ju abe boje ùi coyuiyede. Lucas bácu coyurejaquemavū Pablo bácu borore Hch 7:57-8:1, 9:1-31, 13:1-28:31, aru ùi cuede Tesalónica āmicurīīmaroi Hch 17:1-10, 20:1-5. Javede Pablo bácu toivacaipōecu bácu toivaicōjenejaquemavū ùi mamayoca paperayocare Tesalónica āmicurīīmarocavure, aru obebeaviava yóbore toivaicōjenejaquemavū diyocare, āniñua báquede 50-51 d.C. máre, puque ùi cucunuiyede, coyucuyū Jesús ùi yávaiye méne, ùi cuede Corinto āmicurīīmaroi. Pablo bácu coyurejaquemavū ùre toivacaipōecu bácu aipe ùi toivacauiye báquede diyocare.

Pablo bácu toivaicōjenejaquemavū diyocare napicōjecuyū ina Tesalónicavure ne ñájiyede ne ju aipe boje Jesúre (1:3-12, 2:13-3:5), aru coyucuyū nurié Jesucristoi copaidaquino maquinóra, ne dápiabenajiyeye ayū javede copaidayū bácu yópe apevu borocurivū ne ubenina arī coyuiye báquepe (2:1-12), aru memecōjecuyū Jesúre ju aipōevare (3:6-15).

---

### Pablo ùi meaicōjeino Tesalónicavure

(Hch 17:1; 1 Ts 1.1)

**1** <sup>1</sup>Yu, Pablo, toivaicōjeivū iyoca paperayocare. Silvano aru Timoteoque yū meaicōjeivū mujare, Tesalónica āmicurīīmarocavū Jesucristore ju aipōevare. Muja majepacu Jūmenijicu aru maje jabocu Jesucristo jinatamu muja. <sup>2</sup>Majepacu Jūmenijicu maje jabocu Jesucristomaque mearo đacajacurī mujare bojecubeda ùi me boje. Aru torojurī cure đajacurī mujare cārijimevūva.

### Jūmenijicu ùi ñájine đaquino āmeina teivure Cristoi copaidaiyede

<sup>3</sup>Muja, ñujevū, torojuede jívubu ñūja Jūmenijicure mujare cainumua. Ñūje nópe daiye javū ñujare. Aru mearomu. Muja coreóvaivubu aipe daiye jaurōre mujare muje cuede yópe Jūmenijicuī urōpe, caride jave báque pueno. Aru caivū muja coapa urívubu mujevure caride jave báque pueno. <sup>4</sup>Que baru ñujacapuravū torojurī coyuvubu muje borore apeno ĩmaroacavū Jesúre ju aipōevare. Coyuvubu muje pare napiyede aru muje ju aiyede Jesúre, apevu ne maucūvaede mujare aru ne ñájine đaiyede máre mujare.

<sup>5</sup>Muja ñájivubu muje ju aipe boje Jesúre. Aru muje đajocabe boje muje ju aiyede ùre űetubevūva, Jūmenijicu cure đacuyūme mujare ùi jaboteinoi. Yópe acuyūme mujare coapa: “Bojedacuyūmu mure mi ñájiyede, mi ju aipe boje Jesúre”, acuyūme Jūmenijicu. Que teni jādovacuyūme meacure ùi đacaiyede pōevare yópe ùre javépe. <sup>6</sup>Que baru Jūmenijicu đacuyūme

yópe jauépe. Nájine đacuyume ina caride nájine đaivure mujare. <sup>7</sup>Aru muja caride nájivure, aru nujare máre, Jūmenijicu đajocare đacuyume maje nájiyede. Nópe đacuyume Jūmenijicu maje jabocu Jesús ũi copaidaquijāravu baquinóre. Ėmecuyume cavarō mearo Jūmenijicui curōre jocarī ũi ángeleva ũi paruéde cūvarivūque. Aru darājarama toa uruiye jēneboi. <sup>8</sup>Nájine đacudacuyume ina Jūmenijicure coreóvabevure aru ina ju abevure máre maje jabocu Jesús ũi yávaiye méne. <sup>9</sup>Nácapūravu nájinajarama nájino cūiménoi. Maje jabocu Jesús, meacu baju, jaruvacuyume náre ũre jocarī, ne jámenajiyepa ayu ũi urarō paruéde. <sup>10</sup>Caiye iye vaiquíyebu añijāravu, maje jabocu Jesúi copaidaquijāravu baquinóre. Copaidacuyume ijāravui, ũ jina meara ne jínajiyepa ayu mearore ũre. Que baru caivu ina ju aivu me pueđarājarama ũre dijāravu baquinói. Aru muja máre náque curājaramu, muje ju aiye báque boje nūje coyuiye báquede mujare Jesús ũi yávaiye méne.

<sup>11</sup>Que baru jēniavaivubu nūja mujare nūje coyuiyede Jūmenijicuque cainumua, “Muja, Tesalónicacavu Jesúre ju aipōeva, bojedacuyumu yu mujare muje curājino mearoque, ji cutuiye báque boje mujare”, ũi aquiyepe aivu. Jūmenijicu mujare đare đajacurī caiye méne yópe muje đaiyuepe ũi paruéque. Aru mujare buojare đajacurī caiye muje mearo đacaiyede, muje ju aiye boje Jesúre ũi paruéque. <sup>12</sup>Que teni pōeva pueđarājarama maje jabocu Jesúre, ũi mearo đacaiye báque boje mujare. Aru mujare máre pueđacuyume majepacu Jūmenijicu maje jabocu Jesucristomaque bojecubeda ũi me boje.

#### Pablo ũi coyurī meadaino Jesúi daquinore

(Mt 24.24; 1 Ts 4.15-17)

**2** <sup>1-2</sup> Muja, nūjevū, coyurājivubu mujare maje jabocu Jesucristo ũi copaidaquiyede aru maje cójijinaiyede ũque. Jēniavubu nūja mujare, apecu ũi coyuru mujare, yópe arī: “Nai Espíritu Santo aibi: ‘Maje jabocu Jesucristoi copaidaijāravu eaivu jave’”, o “Pablojā aima: ‘Maje jabocu Jesucristoi copaidaijāravu eaivu jave’”, o muja jacopuivu baru paperayoca toivaiyede nūja Pablojā nūjapeda teivu: “Maje jabocu Jesucristoi copaidaijāravu eaivu jave” arī, ju abejarā diede. Maumejiena oatuvabejarā muje dápiaiye. Aru cuavare đabejarā muje ũmene, apecui coyuiye boje o no paperayoca toivaiye boje máre. <sup>3</sup>Quéda apecure jujoivaicōjemejara mujare.

Dijāravu baquinó, Jesúi copaidaquijāravu, eabequiyebu pu obedivu pōeva ne urarō maucūvaeta Jūmenijicure. Dinumu maquinó nai ũmu āmecu, bījacyu yóboi, cūetecuyume Jesúi copaidaquiyepi jipocai. Jūmenijicu nájini đacuyume ũre, nai ũmu āmecure, toabo cūiméboi cainumua. <sup>4</sup>Nai ũmu āmecu maucūvacuyume caivu pōeva ne pēpeimarare, aru ne jūmenijinare, caivu apevu ne mearore jímarare, aru Jūmenijicure máre. Yópe arī, nai ũmu āmecu “Yurecabu paruacu caivu apevu pūeno”, acuyume. Que teni ecocuyume Jūmenijicui cūrami, dobacyu yópe jabocupe. Aru, “Yurecabu Jūmenijicu”, acuyume caivure.

<sup>5</sup>Caiye iyede jave coyure cucacu yu mujare ji cūede cāreja mujaque. Ĵārumenaru muja?

<sup>6</sup>Muja coreóvaivubu cūinācu cūcure caride, nai ũmu āmecu ũi járobequiyede cāreja. Ũbenita yóboi, Jūmenijicui beoijāravu baquinói, nai ũmu āmecu cūetecuyume. <sup>7</sup>Jipocamia Jūmenijicu jáđovamenejaquemavu

aibe ùi ðaquiyede pōeva āmeina ðaivure. Ùbenita caride jáðovacuyume aibe ùi ðaquiyede náre. Cūinácu mauyaibi ñai ùmu āmecure. Ùbenita Jūmenijicu ĩcuyume ñai mauyayure úre jocarĩ. <sup>8</sup>Dinumu maquinóre cuetecuyume ñai ùmu āmecu. Ùbenita maje jabocu Jesucristo ùi copaidaiyede boarĩ jaruvacuyume úre ùi yávaiye paruéque. Que baru copaidayu pueno meacu baju bĵarocuyume úre.

<sup>9</sup>Ñai ùmu āmecu cuvacyume ñai abujuvai jabocu, Satanás, ùi paruéde. Jáðovacuyume ùi urarō paruéde ùi ðaquiyede caijiene pōeva ne jámene aru ne ðarĩ majibede máre, “¿Jūmenijicu bárica ù?” pōeva ne arājiyepe ayu ùbenina. <sup>10</sup>Û jujovacuyume caiye ùi āmeina ðaiyeque ina bĵarājivure Jūmenijicure jocarĩ. Û jujovarĩ buojacyume náre, ne jacopubenĩ ube boje Jūmenijicui yávaiyede jāvene. Aru ne jaruvaiye boje ùi yávaiyede, Jūmenijicu meadabecuyume náre. <sup>11</sup>Que baru Jūmenijicuvacari jujovaicōjecuyume náre, ne ju arājiyepe ayu borocuede. <sup>12</sup>Que baru ñájine ðacyume caivu ina urivure ne āmeina teiyede aru ùi yávaiyede jāvene ju abevure máre.

#### Pablo ùi aino “Jūmenijicu beoibi meadacyu mujare”

<sup>13</sup>Muja, ñujevu, Jūmenijicure jíye javu ñujare torojuede cainumua, muja Jūmenijicui umarare boje. Javede ùi cuedaquiyepi jipocai caiyede, Jūmenijicu beorejaquemavu meadacyu mujare, ñai Espiritu Santoi ðaiye báque boje mujare Jūmenijicu jinava, aru muje ju aye báque boje Jūmenijicui yávaiyede jāvene. <sup>14</sup>Ñuje bueiye báquede mujare iye Jūmenijicui yávaiye méne, ùi cuturejaquemavu mujare, muje jabotenajiyepe ayu maje jabocu Jesucristoque ùi jabotequiyede.

<sup>15</sup>Que baru, ñujevu, parurōreca ju ajarā cainumua iye ñuje bueiye jāvene, ñuje coyuiye báquede mujare aru ñuje toivaiye báquede paperayocaque máre. Aru cainumua dajocabejarā diede.

<sup>16</sup>Jēniaivubu ñuja maje jabocu Jesucristore majepacu Jūmenijicumaque, majare ucure. Majare cađateyube, ùi me boje dajocabecuva. Aru majare napini corede ðayube ùi mearo ðacaquiyede majare. <sup>17</sup>Đajacurĩ mujare parurivu muje ũmei aru jidubevu muje coyuiyeque aru muje ðaiyeque máre, me maquiyépe cainumua.

#### Pablo ùi aino “Jēniajara ñujare Jūmenijicue”

**3** <sup>1</sup>Muja, ñujevu, jēniajara ñujare Jūmenijicue, apevu obedivu pōeva ne jápiarājiyepe aivu maje jabocu Jesucristoi yávaiye méne maumena, ne ju arājiyepe aivu diede, aru ne jínajiyepe aivu mearore Jūmenijicure, nópe vaiye báquepedeca mujaque. <sup>2</sup>Aru jēniajara ñujare Jūmenijicue, ùi meadaquiyepi aivu ñujare ina pōeva āmena, ne āmeno ðabenajiyepe aivu ñujare. Pōeva obebevu ju aivubu Jūmenijicui yávaiye méne. Que baru ina āmeina ðaivu aru ajevure máre āmeno ðare ðaivu āmeno ðaiyurivubu ñujare.

<sup>3</sup>Ùbenita maje jabocu Jesucristo cainumua ðayube yópe ùi aye báquepedeca. Que baru jāve parure ðacyume mujare muje ũmene. Aru jārĩ corecyume mujare ñai abujuvai jabocu, ùi āmeno ðabequiyepi ayu. <sup>4</sup>Ñuja coreóvaivubu maje jabocu Jesucristo cađateyure mujare, muje ju aye boje úre. Que baru coreóvaivubu muja ðaivure yópe ñuje bueiye báquepe mujare,

aru ðarājivure máre yópe ñuje bueiyepe iyocaque caride. <sup>5</sup>Ñuja jēniaivubu maje jabocu Jesucristoque, ũi napine ðaquiyepe aivu mujare parurōreca yópe ũi baju napino mácarōpe, aru muje urājiyepe aivu pōevare yópe majepacu Jūmenijicu ũi uepe majare.

### **Memeiye jaurō**

(Hch 18.3; Gá 6.9; 1 Ts 2.9)

<sup>6</sup>Muja, ñujevu, yóvaicōjemevu ñuja mujare, maje jabocu Jesucristoi paruéque, ina mujacavu jūracurivure aru ðabevure máre yópe ñuje bueiye báquepe. <sup>7</sup>Mujavacari coreóvaivubu aipe ðaiye jaurōre mujare, ðarājivu nópe ñuje ðarī cōmajiye báquepe muje jēneboi curivu cāreja. Memeiyubevu āmetecarā ñuja. Quénora jūracubevuva urarō memecarā. <sup>8</sup>Jacopubetecarā ñuje āiyede mujaque bojecubeda. Quénora cainumua bojedacarā mujare muje jiye báquede ñujare. Urarō memeivu batecārā jāravure aru ñamine máre, muje ñājimenajiyepe aivu ñujare jaué boje. <sup>9</sup>Ñuja jēniari buojajebu ñujare jauéde, ñuje bueiye boje Jesús ũi yávaiye méne. Ũbenita quéda jēniametecarā mujare. Jádovacarā mujare ñuje ðaiyeque aipe ðaiye jaurōre mujare. Que baru ðajarā muja yópe ñuje jádovaiye báquepe. <sup>10</sup>Javede ñuje cúvaquede muje jēneboi, yópe arī, “Nai memeiyubecure jíbejarā āiyede”, ðaicōjeivu batecārā mujare. <sup>11</sup>Nópe arī, coyuvubu ñuja mujare, ñuje jápaiye boje ne borore, apevu mujacavu jūracurivure. Nácapūravu mememema, bojedarājivu náre jauéde. Quédata cārijovadama náre ina memeivure ména.

<sup>12</sup>Que baru, ina mujevu memeiyubevure coyuvubu ñuja caride. Maje jabocu Jesucristo ũi paruéque memeicōjeivubu náre. Aru parurōreca jēniaivubu náre, ne memenajiyepe aivu cārijovamevuva apevure, ne cūvarājiyepe aivu ne āiyeva.

<sup>13</sup>Ũbenita muja, ñujevu, ũetubejarā mearo ðaivu.

<sup>14</sup>Apecu mujacacu ũi ju abedu ñuje coyuiyede yo paperayocaque, ũre coreóvarī caivu muja yóvabejarā ũre, ũi cūyoje tequiyepe aivu. <sup>15</sup>Ũbenita jámejara ũre yópe muje jáiyepe muje maucure. Quénora coyujarā aipe ðaiye jaurōre ũre yópe muje majicaiyepe mujeyocure.

### **Pablo ũi meaicōjeino Tesalónicacavure**

<sup>16</sup>Maje jabocu Jesucristovacari cārijimenoque cure ðayu pōevare, cure ðajacurī mujare cārijimevuva cainumua. Maje jabocu Jesucristo cūjacurī caivu mujaque. <sup>17</sup>Yúvacari, Pablo, toivaivu ji puruque caride. Meaicōjeivu caivu mujare. Caiyoca ji paperayocare toivaivu yu yópe, jádovacayu mujare jáve ji toivaicōjeiye báquede. Que toivaivu yu. <sup>18</sup>Urarō mearo ðacajacurī mujare maje jabocu Jesucristo bojecubeda ũi me boje. Quénoramu.

# 1 Timoteo

Mamabuinore coyuiye bu Pablo bácu ũi toivaicōjeiye báquede mamayoca paperayocare Timoteo bácu. Pablo bácu judíovacacu bácu vacari, Jesús ũi yávaiye méne beorí coyuićōjeimu marejaquémavu, coyucuyu ũi yávaiye méne judíova ámevure, judíova ne ju abe boje ũi coyuiyede. Lucas bácu coyurejaquemavu Pablo bácu borore Hch 7:57-8:1, 9:1-31, 13:1-28:31, aru Timoteo bácu borore Hch 16:1-3, 17:13-16, 18:5, 19:22, 20:4. Pablo bácu toivaicōjeiye de ũre toivacaipōecu bácu de diyocare, javede toivaicōjenejaquemavu apeyoca caipucapuruape paiyoca ũi paperayoca curiyocare Majepacu Jūmenijicui yávaiye mamaene coyutucubo jívui. Diyocare toivaicōjeniburu yóji boi, toivaicōjenejaquemavu Tito bácu de bácu, aru no yóbore yoca buojaiyocare yóbocayocare Timoteo bácu. Pablo bácu coyurejaquemavu ũre toivacaipōecu bácu aipe ũi toivacaquiye báquede diyocare. Toivaicōjenejaquemavu diyocare áni ju bácarōre 63 d.C., ũi cuede Macedonia ámicurijoborói.

Pablo bácu toivaicōjenejaquemavu diyocare parure đacu yu Timoteo bácu ũi ũmei (1:12-19, 4:1-16, 6:11-21), aru dajocare đaicōjecuyu ũi mácu de Éfesocavure ne bueno jáve ámene (1:3-11, 6:3-10), aru coyucuyu ũi mácu aipe đaiye jaurōre Jesús ju aivure coreipōevare aru náre cadateipōevare máre (3:1-16, 5:1-6:2), aru aipe đaiye jaurōre Jesús ju aipōevare ne mearore jýyede Jūmenijicure (2:1-15).

## Pablo ũi meaicōjeino Timoteore

(Hch 16.1-3)

**1** <sup>1</sup>Yu, Pablo, toivaicōjeivu apecure iyoca paperayocare. Yábu Jesús ũi yávaiye méne beorí coyuićōjeimaracacu. Jūmenijicu meadaibi majare. Aru Jesucristo napini corede đaiibi majare caiye iye ũi mearo đacaquiye de. Ne coyuićōjeimumu yu Jesús ũi yávaiye méne. <sup>2</sup>Mu, Timoteo, yu meaicōjeivu mure. Jáve jímacu pe páyubu mu, mi ju aipe boje Jesús. Majepacu Jūmenijicu, maje jabocu Jesucristomaque, mearo đacajacurí mure bojecubeda ũi me boje. Aru cōmaje ároje jájacurí mure. Aru torojurí cure đajacurí mure cārijimecuva.

## Pablo ũi buaicōjemeno boro ámene

<sup>3</sup>Dajacu mu yópe ji coyuiye bácu pe mure ji nuiyede Macedonia ámicurijoborói. Yu mauteicōjecacu mure Éfeso ámicurímaroi, mi dajocare đacu iye pe ayu apevu nócavure ne bueiye de jáve ámene maje bueiye de jocarí. <sup>4</sup>Coyuićōjemejacu náre ne coyuiño mácarōre aru ne áru riduiyede néne cuva mácu ne ámiá coapa. Ne nópe đaiye de, jēniari jáđama ne bajumia ye majibevuva cainumua. Ne nópe đaiye de, coreóvaivu buojabema na Jūmenijicui urōre náre ne đarājiye de, yópe jaurōre náre ju aivu baru Jesús.

<sup>5</sup>Đaicōjejacu náre ji coyuiye pe, ne urājiye pe ayu apevure me ne dāpaiye que “Boropatebevū yu”, ne arí dāpaiye que aru jáve ne ju aie que

Jesúre. <sup>6</sup> Ëbenita ina pœva yópe ðabema na. Quénora coyúvubu ðbenina. <sup>7</sup> Bueiyurívubu na Jūmenijicui ðaicōjeiyede ùi coyúiye báquede Moisés bácore. Ëbenita coreóvabema ne baju ne coyuiyede aru aipe aiyuede ne bueniduiyede máre majidivupe.

<sup>8</sup> Coreóvaivubu maja méne Jūmenijicui ðaicōjeiyede ùi coyúiye báquede Moisés bácore, pœva ne coreóvaru aipe teni Jūmenijicui coreóvare ðaiye báquede diede. <sup>9</sup> Coreóvaiye javvu pœvare aipe teni Jūmenijicui coreóvare ðaiye báquede iye ðaicōjeiyede. Jūmenijicu coyurejaquemavu iye ðaicōjeiyede Moisés bácore, jáðovacuyu dieque pœva ne ámeina teiyede. Que baru ina pœva boropatebevure Jūmenijicui jáinore, ne ju aipe boje Jesúre, javbevú náre iye ðaicōjeiye. Quénora ina ámeina teivure iye ðaicōjeiyeque Jūmenijicu jáðovaimi ne ámeina teiyede.

Ámeina teivu ne ðaiye nópe paiyebu. Námu Jūmenijicui ðaicōjeiyede ju abeni ðabevu. Puedabevubu Jūmenijicure, ámeina ðaivu. Námu Jūmenijicui ðbemara aru yurivu Jūmenijicure máre. Námu boarí jarúvaivu népacure, aru népacore, aru apévure máre. <sup>10</sup> Námu curivu apévunque némarebucúva ámevunque, aru úmúva ámeina ðaivu ne baju apévú úmúvaque. Námu ñavaivu pœvare, jínajivu náre yebacavupe. Námu borocurivu aru “Coyucuyumu jáve”, ne aríburu yóbore borocurivu. Jūmenijicu jáðovaimi ùi ðaicōjeiyeque caiye iye ðare ðaiyede copu ámenore iye bueiye méne jocarí.

<sup>11</sup> Aru bueivu yu iyede jávene, coyuyu Jūmenijicui yávaie me pueno baju méne, pœva ne majinajiyepé ayu aipe Jūmenijicu meadayure náre. Ñai Jūmenijicu meacu baju jári coreicōjeimi yure aru bueicōjeimi yure ùi yávaie méne.

### **Pablo ùi torojuede jínó Jūmenijicure ùi cōmaje ároje jáiye boje**

(Hch 8.3; 9.4-5)

<sup>12</sup> Yu torojuede jývubu maje jabocu Jesucristore, ùi jáiye boje yure yópe ùi uróre ðayupe. Que baru epeibi yure, ji memecaquiyepé ayu úre. Aru parure ðaibi yure, ji buequiyepé ayu ùi yávaie méne. <sup>13</sup> Yópe mearo ðacaibi yure javede, ámeina úre yávayu bácoreca, cujurí ñájine ðayu bácoreca úre ju aivure, aru maucúvacu bácoreca úre. Ëbenita Jūmenijicu cōmaje ároje járejaquemavu yure, ji que ðaiye boje caiye iyede coreóvabecupe, ji ju abe boje Jesúre cāreja. <sup>14</sup> Aru Jūmenijicu pueno urarō mearo baju ðacarejaquemavu yure. Ëi mearo ðacaiye boje yure bojecubeda, caride yu ju ayubu Jesucristore aru uvu yu úre.

<sup>15</sup> Jāvetamu iye. Que baru ju aipe javvu caivure iyede. Jesucristo ðarejaquemavu ijāravú, meadacuyu ámeina teivure. Aru yurecabu ámeina teivúcacu bácu ámecu baju caivu pueno. <sup>16</sup> Ëbenita Jūmenijicu cōmaje ároje járejaquemavu yure, Jesucristo ùi jáðovaquiyepé ayu aipe ùi napino urarō pœvare. Napinejaquemavu yure, ámecu bajure caivu apévú ámeina teivu pueno, ji ju aquiyepe ayu úre. Que teni jáðovaimi ùi urarō napinore ina ji yóbocavú úre ju aivu, ne cuvārājīyepé ayu jāravú cūiméjāravú baquinóre, ne jáiyede ùi meadaiye báquede yure, ámecu bajure.

<sup>17</sup> Ñai maje jabocu, cainumua jāboteyure caivure, pueðarājarevu úre aru mearore jínajarevu úre máre. Úrecabe apucu cainumua. Úrecabe maje jámemu. Aru úrecabe Jūmenijicu cūinácura. Quéðecabu.

<sup>18</sup> Mũ, Timoteo, jímacupe páyubu mũ. Mũre coyucōjeivũ yũ pōevare ji bueiyeede mũre. Ārujacu apevũ ne coyucaie bāquede mura aipe vaiquiyede mũre. Ārucu diede, parure đajacu mi ũmene, memecacuyũ Jũmenijicure yópe ũi ırópe, apevũ ne maucvāedeca mũre, nopedeca ñai churara ũi me ādamateiyepe boainoi. <sup>19</sup> Cainũmua ju ajacu Jesús ũi yávaiyeede méne jāvene. Aru, “Boropatebevũ yũ”, arĩ dápíarĩ, cujacu mũ. Apevũ pōeva meateiyubema ne boropateiyede. Quénora ju adama apeno bueno jāve āmenore. Aru đajocadama ne ju aie bāquede Jesúre. <sup>20</sup> Pucarā ũmva cuma nópe đavũ, ne āmiá Himeneo aru Alejandro. Jave jícacu náre ñai abujuvai jabocu Satanáre, ne coreóvarājiyepe ayũ āmeina yávaiye jaubede náre Jũmenijicure.

**Pablo ũi bueno aipe jēniainore Jũmenijicure**

(Mt 20.28; Mr 10.45; Gá 1.4; 2 Ti 1.11; Tit 2.14; 1 P 3.3)

**2** <sup>1</sup> Mamarumure yũ coyuiyuvũ mũre iyede. Caivũ Jesúre ju aipōeva coyujarāri Jũmenijicure náre jauéde, aru apevũre jauéde máre. Yópe đarĩ jjarāri torojuede máre Jũmenijicure aru jēniajarari na Jũmenijicure caivũ pōevare boje máre. <sup>2</sup> Jēniajarari Jũmenijicure jabovare aru caivũ ina cōjeipōevare máre, maje curājiyepe aivũ me, maucvabevũva aru cārijimevũva máre. Que teni mearore jĩni Jũmenijicure aru pueđarĩ apevũ pōevare curājaramu maja me. <sup>3</sup> Maje jēniaie Jũmenijicure meavũ apevũre, aru cojvũ Jũmenijicure, majare meadayure. <sup>4</sup> Ũre cojvũ ũi ũe boje caivũ pōeva ũi meadaimara mārājivũre aru coreóvarājivũre máre ũi yávaiyeede jāvene.

<sup>5</sup> Cũinácure ñai Jũmenijicu. Aru cũinácure ñai pōevare meara cure đayũ Jũmenijicui jāinore. Ñai meadaipōecu ũrecabe Jesucristo. Ũvacaribe ũmũ. <sup>6</sup> Boarĩ jaruvaicōjenejaquemavũ ũi bajure, pōeva ne āmeina teiye boje, bojedacacuyũ caivũre, Jũmenijicu jina marājiyépe ayũ. Ũi que đaiye bāque boje Jũmenijicui beojāravũ bācarōi, jáđovarejaquemavũ Jũmenijicu meadaiyucure caivũ pōevare.

<sup>7</sup> Aru Jesús epedejame yure ũre coyucaipōecvũ aru ũi yávaiye méne beorĩ coyucōjeimvũ máre, ji coyucuiyepe ayũ ũi yávaiye méne. Ũ buaicōjenejame yure ina judfova ānevũre iye yávaiyeede jāvene, ne ju arājiyepe ayũ ũre. Coyuivũ mũre jāve. Yũ borocubevũ.

<sup>8</sup> Yũ vuvũ ũmva ne jēniarājiyepe ayũ Jũmenijicure cainoa ne cōjijinoai, jāmũóri ne pũuáre āmenore đabevũva. Quénora memecajarāri Jũmenijicure. Jarabejarāri apevũre. Aru jāve napini corejarāri Jũmenijicui ju aquinore ne jēniaiyede.

<sup>9</sup> Aru yũ vuvũ nomiva ne dorājiyepe ayũ ne doiyeede yópe nomiva meara ne doiyepe. Dobejarāri yópe āmenape, apevũ ne jārājiyepe aivũ náre. Quénora doarāri ne cuitótecajeare yópe Jũmenijicure cojuépe. Que teni đabejarāri ne pođaque cāoidũ āmeno baju. Aru adabejarāri cámuca yuyuiyede aru amuyo adaitarabware máre cūrajiboa bojecurijĩboaque aru úruque máre. Dobejarāri cuitótecajeare bojecuricajeare máre, apevũ ne jārājiyepe aivũ náre. <sup>10</sup> Ũbenita đajarāri yópe nomiva Jũmenijicure ırivũpe, apevũ ne jārājiyepe aivũ náre ne cadateiye boje me apevũre.

<sup>11</sup> Jũmenijicui yávaiyeede bueiyeedeca, caivũ nomiva me jápíarĩ, majijarāri iye bueiyeede bídeca coyubevũva. Aru pueđajarāri caivũ náre cōjeivũre

máre. <sup>12</sup> Yũ nomivare bueicõjemevũ ãmuvare. Aru yũ nomivare máre jaboteicõjemevũ ãmuvare. Quénora bi ajarári na, nomiva. <sup>13</sup> Yũ ñaicõjeivũ náre nópe, Jũmenijicui cuedaiye báque boje Adán mácre mamarumure aru Eva bácore ãi yóboi. <sup>14</sup> Aru yũ máre ñaicõjeivũ náre nópe, Adán mácre abujuvai jabocui jujovabe báque boje. Ubenita Eva báco abujuvai jabocui jujovaimo máco barejaquemavũ õ. Que baru ico nomio vaini turejaquemavũ Jũmenijicui ñaicõjeiye báquede. <sup>15</sup> Ubenita nomiva meadaimara mǎrajivubũ, me ne bucúvayie boje nǐmarare yópe Jũmenijicui urõpe, na cainumua ju aivũ baru Jũmenijicui yávaiye méne, aru urivũ baru apévare máre, aru memecaivũ baru Jũmenijicure me.

### Aipe ñaiye jaurõ Jesúre ju aivure coreipõevare

(Tit 1.6-9)

**3** <sup>1</sup> Jǎvetamu iye. Ñai põecu coreiyucu baru Jesúre ju aipõevare, ã memecaivybi me Jũmenijicure. Que baru mearomu ãi ñaiyurõ. <sup>2</sup> Ñai coreiyucu Jesúre ju aipõevare ñaiye jaurũ úre cainumua yópe põeva “Ámecube ñai”, ne boro coyurĩ adaivũ buojabenajiyeye aye ãi borore. Aru ñaiye jaurũ úre cainumua yópe põeva ne jǎdovamenajiyeye aye ãi ámeina teiyede. Jaurũ úre máre ãi cavaquiyeye jǐmarepaco cūinácora. Coreiye jaurũ úre me ãi ñaiyede. Aru ñaiye jaurũ úre majiéque. Ñaiye jaurũ úre yópe põeva ne puedaimupe. Me copũ etarĩ jacoyũiye jaurũ úre ina curǎdaivure. Aru me bueiye jaurũ úre ãi coreimarare máre. <sup>3</sup> Ucumejacurĩ pacotede ñaiyede. Aru ádamateiyubejacurĩ. Quénora meacu põecu bajacurĩ. Aru jarabecurĩ. Tǎuturare jecubeni, diede pare urĩ vore nǐmecurĩ. Aru áujimejacurĩ apévũ ne cǎvaede. <sup>4-5</sup> Ñai ãmũ buojabecu baru jaboteyũ ãi cǎramicavure, jǎve buojabecube coreyũ Jũmenijicui cǎramicavure, Jesúre ju aipõevare. Que baru jaurũ úre ãi jaboteiye me ãi cǎramicavure, mamara ne ju arǎjiiye aye úre aru ne puedarǎjiiye aye úre máre cainumua. <sup>6</sup> Cūinácũ ãmũ mama ju ayũ Jesúre corebejacurĩ apévũ Jesúre ju aipõevare, “¿Meacu bárica yũ apévũ pueno?” arĩ dǎpiabecuyũ. Uĩ que aru, Jũmenijicu “Ñájicuyũmu mũ”, ajebu úre nópe “Ñájicuyũmu mũ”, ãi aye báquepedeca ñai abujuvai jabocure. <sup>7</sup> Aru ñai Jesúre ju aivure coreipõecure ñaiye jaurũ cainumua yópe ina Jesúre ju abevũ ne me yǎvarǎjiiye aye úra. Uĩ ména ñabedu ina ju abevũ ámeina yǎvarǎjarama úra. Que teni vainĩ tucuyũme úre ñai abujuvai jabocu ãi jujovaiyeque. Ñai abujuvai jabocu jǎcuyũme úre nopedeca doriñũ jǎiyepe moacure.

### Aipe ñaiye jaurõ Jesúre ju aivure cadateipõevare

<sup>8</sup> Quédecã ina Jesúre ju aivure cadateipõeva máre, jaurũ náre ne mearo ñaiye cainumua. Jaurũ náre ne ñaiye yópe põeva ne puedaimarape, aru ne yávaiye máre jǎve caivure jujovabevũva. Urarõ ucuiyede ucumejarari na pu ne pacotede ñaiyeta. Aru vorĩ eabejarári na tǎuturare ámei dǎpiaiyeque. <sup>9</sup> Jaurũ náre ne ju aye jǎve “Boropatebevũ yũ”, ne arĩ dǎpiaiyeque iye bueiyede jǎvene, Jũmenijicui jǎdovameno mǎcarõre jipocamia ubenita jǎdovainore caride. <sup>10</sup> Apévũ jǎrajarama ne cuede. Aru náre ámeina teiyede jǎmenu, memecajarári na Jesúre ju aivure cadateipõevape. <sup>11</sup> Quédecã ina nomiva Jesúre ju aipõevare cadateinomiva máre, jaurũ náre ne mearo

ðaiye cainumua, yópe pōeva ne pueðaimarape. Yávabejarāri borocuede apevui borore. Corejarāri me ne ðaiyede máre. Jauvu náre máre ne buojaiye me caiye ne memeiye. <sup>12</sup> Jauvu ina Jesúre ju aivure caðateipōevare ne cavarājiyepe némarepacova cūinácora. Aru jauvu náre ne jaboteiye me némarare aru caivu ne cūamicavure máre. <sup>13</sup> Que teni ina Jesúre ju aivure caðateipōeva ne memecaru me, pōeva pueðarājarama náre. Que baru nácapūravu buojarājarama coyuivu jidubevva aipe ne ju aiye de maje jabocu Jesucristore.

### **Jūmenijicu ũi jáðovameno mácarōre jipocamia coyuiño**

<sup>14-15</sup> Jácsnuiyuvu yu mure maumena. Ũbenita caride toivaicōjeivu apecure mure yo paperayocare, ji járobedu mi majiquiyepe ayu aipe ðaiye jauřōre ne bajumia Jūmenijicui pōevare, Jesúre ju aipōevare, ñai Jūmenijicu apucu jinare. Nácapūravu coyuyama Jūmenijicui yáva iyede ũi toivaicōjeiye báquede ne bajumia. Aru buedama apecure parurōreca diede máre. <sup>16</sup> Jáve pueno métamu iye bueiye jáve, Jūmenijicui jáðovameno mácarō jipocamia ũbenita jáðovaino caride, maje majinajiyepa aipe aipe ðarī curājivu meara Jūmenijicui jáinore. Yópe arī, coyuiyubu maja:

Cristo járorejaquemavu ijaravui pōecu. Aru ñai Espiritu Santo jáðovarejaquemavu ũre pueno meacu bajure. Ina ángeleva járejaquemavu ũre. Pōeva coyurejaquemavu ũi borore caivu joborōcavure. Ijaravucavu ju arejaquemavu ũre. Aru Jūmenijicu mūvarejaquemavu ũre cavarō mearo ũi curōi, arī coyuiyubu maja.

### **Ina dajocaivu ne ju aipe báquede Jesúre**

**4** <sup>1</sup> Ñai Espiritu Santo jáve coyui bi buojaijaravure apevu Jesúre ju aipōeva mácavu dajocarājivure ne ju aipe báquede. Que teni jápiarājarama na abujavare ne bueiyede, ina jujovaliyurivure pōevare ne bueiye jáve ámeque. <sup>2</sup> Buede ðarājarama pōeva borocurivure. Que teni jujovalarājarama pōevare ne bueiye jáve ámeque. Ina bueipōeva coreóvarājarama ne bueiye jáve ámene. Ũbenita ye chiomenajarama ne jujovaliyede, “Boropatebev yu”, ne arī dápiabe boje. <sup>3</sup> Yópe arī, buenajarama na: “Parububejarā mja” aru “Ámejara mja apejē āiyede”. Ne nópe bueiye meamevu. Caiye maje āiyede cuedarejaquemavu Jūmenijicu, Jesúre ju aipōeva, ũi yáva iyede jávene majidivu, torojuede jini ũre, ne ārājiyepe ayu diede. <sup>4</sup> Que baru caiye iye Jūmenijicui cuedaiye báquede maje āru, mearotamu. Maje torojuede jidu ũre maje jacopuiyede ũi cuedacaiyede majare, jaruvaiye jaubev diede majare cainumua. <sup>5</sup> Jūmenijicui yáva iyede ũi toivaicōjeiye báque boje aru maje jēniaiye boje áque máre, jivubu mearore ũre. Jūmenijicu me jáñume diede.

### **Aipe ðarī Jesucristore memecay me**

<sup>6</sup> Mū coyuy baru yópe ji toivaicōjeiyepe apecure ina Jesúre ju aipōevare, mi baju máre bueiyede ca iye yáva iye méne mi ju arīburu yóboi Jesúre aru caride máre, meacu memecapōecu bacuyámu mū Jesucristore. <sup>7</sup> Ũbenita jápiabejacu iye ijaravūque coyuiyede pueðabede Jūmenijicure aru ārumene máre. Qué nora buejacu mi baju, pueðacuy Jūmenijicure pueno baju mi ðaiyeque cainumua. <sup>8</sup> Pōecu ũi parure ðaru ũi bajure, quijino mearomu

úre. Ëbenita pœcu ũi parure ðaru ũi ũmene, urarô mearomu úre. Ëi bajui paruru, mearomu úre ijárvumiata. Ëbenita ũi ũmei paruru, urarô mearomu úre ijárvure aru daquijárvu baquinóre máre. <sup>9</sup> Jáveta mu iye. Que baru ju aipe javvu diede caivure. <sup>10</sup> Que baru memeivubu maja pu uetuiuvacari, maje napini coreiye boje Jūmenijicui cadatequiyede majare. Yópe coreivubu Jūmenijicui apué boje aru ũi buojaiye boje meadayu caivu pœvare máre. Que baru Jūmenijicu meadacuyume caivu ina ju aivure Jesúre. <sup>11</sup> Iye ji coyuiyede mure, nopedeca buejacu aru ðaicōjejacu.

<sup>12</sup> Pœvare pueðabede ðabejacu mi bojué boje. Quénora yávajacu me. Mearo ðajacu máre. Aru ũjacu apévure. Ju ajacu Jesúre máre. Aru āmeno ðabejacu. Que teni pœvare pueðare ðajacu mure, mi jáðovaiye boje náre aipe ðaiye jaurôre caivu Jesúre ju aipœvare. <sup>13</sup> Caride aru pu ji caiyeta uetubecuva jári borotejacu pœvare Jūmenijicui yávaiyede ũi toivaicōjeiye báquede. Coyujacu aipe ðaiye jaurôre náre. Aru buejacu náre máre. <sup>14</sup> Ārujacu Jūmenijicui majiéde, ũi jíye báquede bojecubeda mure javede, ina Jesúre ju aivure coreipœva ne coyucaiye báquede mura aipe vaiquiyede mure, aru ne tuoieye báquede mi jipoburā ne puruáque. Āruri ðajocabejacu ðayu yópe mi majiéque Jūmenijicui jíye báquede mure.

<sup>15</sup> Me dápiajacu caiye iye ji coyuiyede mure. Caijárvua pueno ðajacu yópe ji coyuiyepe, pœva mure jári ne majinaiyepe ayu ðayure yópe mi coyuiyepe.

<sup>16</sup> Me jájacu mi ðaiyede. Aru buejacu yávaiyede jávene máre. Nópe ðajacu cainumua. Que teyu mi baju meadacuyumu mu. Aru meadacuyumu mu ina jápiaivure mi bueiyede máre.

### Aipe ðaiye jaurô Jesúre ju aipœvague

(Mt 10.10; 18.16; Lc 10.7; 1 Co 9.9)

**5** <sup>1</sup> Jarabejacu mu ina ũmva bucuvare. Quénora coyujacu me aipe ðaiye jaurôre náre, nopedeca mipacure mi coyuiyepe. Ina ũmva bojvure máre, coyujacu nopedeca míyovare mi coyuiyepe. <sup>2</sup> Ina nomiva bucürömvare máre, coyujacu nopedeca mipacore mi coyuiyepe. Ina nomiva bojurömvare máre, coyujacu nopedeca míyorömvare mi coyuiyepe. Aru cainumua āmeno ðabejacu náque.

<sup>3</sup> Pueðajacu ina nomiöpeva cūinácova curivure némara aru népāramena máre cubevure. Jáve cōmaje ārojarivubu na. Que baru cadatejacu náre javéde.

<sup>4</sup> Ëbenita ico nomiöpecoi mamara curivu baru o jípāramena máre curivu baru, javvu náre ne cadateiye ôre. Que baru napini corebejarāri ina Jesúre ju aipœvare ne cadatenaiyepe aivu népacre o nēñecore máre. Quénora jíjarāri na ôre javéde. Ōi me jári coreiye boje náre jueðovare cāreja, ô bucucó caride, ôre jári coreiye javvu náre. Que teni Jūmenijicu me jáñume ina pœva jári coreivure me nébucuvare. <sup>5</sup> Ëbenita ico nomiöpeco cūinájico cūco, ôre jári coreipœcu cuvabeco, napini coreibico ô Jūmenijicu cadatecuyure ôre. Que baru jēniadome úre cainumua, ũi cadatequiyepede ado ôre jarávure aru ñamine máre. <sup>6</sup> Ëbenita ico nomiöpeco torojuve teiyede voðore, cadatebejacu ôre. Que teni ô apúbico ôi baju. Ëbenita yaiyó bácope páðobe ôi ũmene Jūmenijicui jáinore. <sup>7</sup> ðaicōjejacu mu ina Jesúre ju aipœvare yópe ji coyuiyepe. Que teni apēvu buojabenama āmeina yávaiyu ne borore. <sup>8</sup> Ina ju abevuvacari jima ne

bucuvare jauéde. Que baru cūinácu Jesúre ju aipōecu jíbecu baru ũ jivure aru ũi cūramicavure máre náre jauéde, ũcapūravu ámecu bajube ju abevu pueno.

<sup>9</sup>Mi toivarĩ cūvarōre ne ámiáre ina nomiópēvare, toivajacu ico nomiópeco sesenta paiũjua pueno cūvacore jári baju, aru cūinácura ũmucuco bácore dajocabecova ũre, Jesúre ju aipōeva ne cadatenajiyēpe ayu. <sup>10</sup>Pōeva ne pueðaimo majacórĩ ō. Coyujarāri na ōi borore, “Ico nomiópeco mearo ðaibico ō”. Jauvu ōre ōi bucúóvaye báque me mamarare, aru ōi copu etaiye báque curáðavure, ōi joaiye báque Jūmenijicui pōevai cubobare, aru ōi cadateiye báque cōmaje ārojarivure máre. Que teni jauvu ōre ōi mearo ðacaiye apevure cainumua.

<sup>11</sup>Ūbenita toivabejacu ne ámiáre, Jesúre ju aipōeva ne cadatebenajiyēpe ayu ina nomiópeva bojūrōmivare. Ina purubuoivurivū baru apēcūque, dajocarājarama ne memecaiyede Jesucristore. <sup>12</sup>Que teni ðabenajarama yópe “Yū bácojivu memecado”, ne aye báquepe Jesucristore. <sup>13</sup>Aru ina nomiópeva bojūrōmiva jūracurivū, cure cuyama cūramia coapa. Borore coyurĩ jiodama na. Cārijovaðama pōevare. Aru boroteðama boroteiye jaubede máre. <sup>14</sup>Que baru yu uvu ina nomiópeva bojūrōmivare ne purubuoorĩ juedocūvarājiyēpe ayu jári coreivuva ne cūramiare. Que teiyede maje maucu buojabecube ámeina yávayu Jesúre ju aipōeva ne borore. <sup>15</sup>Javede apevu nomiópeva dajocaquemavu ne ju aye báquede Jesúre. Que teni memecaðama ñai abujuvai jabocu Satanáre. Que baru que aivu yu mure.

<sup>16</sup>Cūináco nomió Jesúre ju ado cūvaco baru nomiópēvare ō jivu jēneboi, cadateiye jauvu ōre, ina Jesúre ju aipōevare cadateiye jaubequiyēpe aye náre. Nópe ðaiyede ina Jesúre ju aipōeva jáve cadatenajarama ina nomiópēvare, ñame ne cadatebemarare jáve cōmaje ārojarivure.

<sup>17</sup>Ina Jesúre ju aipōeva uraró pueðajarāri náre ina coreipōevare, ne jaboteiye boje náre. Aru ina Jesúre ju aivure coreipōeva bueivure aru coyuvure máre Jūmenijicui yávaiye méne pueno baju pueðajarāri aru bojeðajarāri náre ména. <sup>18</sup>Que baru yópe arĩ Jūmenijicui toivaicōjenejaquemavu ũi yávaiyede: “Ñai oteiáimacu uracu memecayure mujare, buobejarā ũre ũi jijecamure, ũi ámequiyēpe aivu ũre ũi cūocaiyedeca mujare muje oteiyabeare, ũi curaiyede diede”. Que baru ũi áiye memeiye bojepebu. Aru, “Memecaipōecure bojeðaiye jauvu ũi memeinore”, arĩ toivaicōjenejaquemavu. Que baru me bojeðajarā muja ina mujare bueivure.

<sup>19</sup>Cūinácu pōecu ũi boro coyurĩ adaru cūinácu Jesúre ju aivure coreipōecure, jápiarĩ adabejacu mu ũi coyuiyede. Ūbenita pucarā o yóbecurā majidivū bácvu ũi ámeina teiye báqueda ne boro coyurĩ adaru ũre, jápiarĩ adajacu mu ne boro coyuiyede. <sup>20</sup>Aru jarajacu ũre caivu apevu Jesúre ju aipōeva ne jáinoi, ne jidurājiyēpe ayu ðarājivu ámeno ũpe. <sup>21</sup>Iye ji toivaicōjeiyede apēcure mure Jūmenijicui, aru Jesucristo, aru ina ángeleva meara baju máre majima. Que baru ne jáinoi ju aicōjeivū mure ji ðaicōjeiyede. Que baru arĩ dāpiabejacu mi baju apēcū ámeina ðayure ũi coyūquiyē jipocai. Aru jámejacu ũbenina apēcū meacure apevu pueno.

<sup>22</sup>Dāpiabecūva, mi puruáque tuorĩ, epebejacu apēcure Jesucristore memecaipōecupe. Mu que ðayu baru, aru ũi ámeina tedu, múvacari ju ajebu ũi ámeina teiyede. Que baru apevure ámeno ðare ðabejacu mu. Aru múvacari ámenore ðabejacu cainumua.

<sup>23</sup> Apenumua mure yapibu ijíe boje, ùcumejacu oco matuiyeda. Quénora ùcujacu apecoro vino úyaicorore, juocuyi mi bajure.

<sup>24</sup> Apevu pœvare, ne ñájinajiye jipocamia, caivu javede jádama ne ámeina teiyede. Ùbenita apevu pœva ámeina tedama yavenina. Que teni pu ne ñájinajjáravu baquinó eaiyeta apevu jámenama ne ámeina teiyede.

<sup>25</sup> Quédeca apevu pœva mearo ñadama caivu ne jáiyede. Aru caivu coreóvadama aipe ne mearo ñaiyede. Ùbenita apevu pœva mearo ñadama yavenina. Ùbenita yaveni ñaivu buojabenama na cainumua. Quénora cūinájjáravu baquinói apevu coreóvarājarama aipe ne mearo ñaiyede.

**6** <sup>1</sup> Caivu Jesúre ju aipœva memecaivure pueðaiye javvu ne jabocure cainumua, apevu ne ámeina yáabenajiyeye aivu Jūmenijicure aru maje bueiyede máre. <sup>2</sup> Aru apevu memecaivu baru Jesúre ju aipœvare, ñajocabejarári ne pueðaiyede náre, ne ju aipe boje nápe. Quénora pñeno mearo baju memecajarári náre, ne ju aipe boje Jesúre aru Jūmenijicui ue boje náre.

### Maje bojecue jáve

(He 13.5)

<sup>3</sup> Maje jabocu Jesucristo bueibi majare jáve, maje majinajiyeye ayu aipe ñaiye javröre majare, maje curājiyeye ayu yópe Jūmenijicui uröpe. Ùbenita apevu curivubu, ju abevu Jesús ũi bueiyede. Quénora bueivubu na ape bueiyede jáve ámene. <sup>4</sup> Ina pœva ñapiaivubu ne baju mearape apevu pñeno. Ùbenita ye majibema na. Jēniari jáiyurivubu ũbenina ne bajumia. Aru jaraivubu ne bajumia aipe aiyuröre ne yávaicamuaque. Ne que ñaiye boje, pœva jorojivubu, aru jaraivubu, yávaivubu borocuede apevui borore, aru “Ámeina ñaiyubi yure”, arí ñapiaivubu apevui borore. <sup>5</sup> Que teni ina ne ñapiaino ámenoque cārijovaivubu ne bajumia aru ñajocabevu ne jaraiyede ne bajumia, ne jaruvaiye boje iye bueiyede jávene. Ina pœva bueiyurivubu Jūmenijicui yávaiyede, ñajivu urarö ne bojeva. Coatejacu náre jaruvarí. <sup>6</sup> Jáve Jūmenijicui yávaiyede bueiye pare bojecuebu pœvare, ũbenita ina torojurivure ne cuvaequeda. <sup>7</sup> Davabedejaquemavu maja maje cuveva ijāravure. Aru buojabenamu nuvaivu maje cuveva ijāravure jocarí. <sup>8</sup> Que baru maje cuvaru maje áiyeva aru maje cuitótecaveva máre, meaquiyebu majare. <sup>9</sup> Ùbenita apevu urivubu ne cuveva. Que baru ñai abujuvai jabocu jujoyavube náre, ne ámeina tenajiyeye ayu, cuvarājivu cuvede. Que teni ũ jēñume náre yópe ññoibo jēiyeye áimacure. Áramevure vore cuivubu cuvede. Que teni ámeno ñaivubu ne baju aru apévure máre. Bjárre ñaivubu ne baju Jūmenijicure jocarí. Aru ñájinajivubu na. <sup>10</sup> Pœva ne ue boje tāturare, ñadama caiye ámenoquede, cuvarājivu diede. Apevu pœva cuma, ne ju aipe báquede Jesúre jaruvaiyu bácanu, cuvarājivu tāturare. Aru caride chñori ñájiñama na.

### Jūmenijicui jiede ñajarā ámene ñabevuva

(Jn 18.37)

<sup>11</sup> Mu Jūmenijicui pœcubu. Ére memecayubu mu. Que baru ñabecacu caiye iye ámeina teiyede yópe ji coyuiyere. Pñeno baju ñajacu cainumua, mearo ñacuyi Jūmenijicui jáinoi, pueðacuyi ére, ju acuyi Jesús ũi yávaie méne,

нснун pōevare, napicнун mi nājijede, aru meacu pōescupe cнснун apevuque. <sup>12</sup> Jūmenijicu cutuquemavu mure, mi cнquiyeye ayu me ũi urōpe aru mi cнvaquiyeye ayu jāravu cūimējāravu baquinóre. Dijāravu b́acarō, Jūmenijicui mure cutuijāravu b́acarōi, ḿavacari ũre ju ávŭ obedivŭ ne j́aiyede. Que baru pŭeno baju đajacu, cнснун yópe mi ju aiyeye Jesúre, aru cнvacнун jāravu cūimējāravu baquinóre máre. <sup>13</sup> Caride yu đaicōjeivŭ mure Jūmenijicu, cure đayŭ caivure, aru Jesucristo máre, coyнун b́acu Jūmenijicui ýavaiye méne Poncio Pilato b́acure, ne j́apiayede. <sup>14</sup> Ju aicōjeivŭ mure iye ji đaicōjeiyede. Đaiye javuŭ mure caiyede yópe ji coyuiyeye. Apejĭene ārumetebejacu mu. Aru oatuvabejacu mu iye ji đaicōjeiyede mure. Que teni ńame buojabecube āmeina ýavayŭ mure mi đaiyede. Nópe đajacu mu cainumŭa pu maje jabocu Jesucristoi copaidaiyeta. <sup>15</sup> Jūmenijicu j́arore đacнume Cristore meajāravu ũi beoijāravu baquinóre. Ũ parŭcu pŭeno baju cūinácŭa jaboteyube caivure aru caiyede máre. Que baru meacu bajube Jūmenijicu. Ũrecabe jaboteyu caivŭ apevu jабovare. Aru ũrecabe cōjeñŭ caivŭ apevu cōjeivure máre. <sup>16</sup> Ũrecabe cūinácŭa yaibécŭ ũi baju. Ũ cнcŭ miadáro mearoi, noi pōeva joabenoi nuri buojabema. Ũrecabe pōevai j́amemu javede aru caride máre. Ńame buojabecube j́añŭ ũre cainumŭa. Caivŭ pueđajarári Jūmenijicure aru jabotejacurĭ ũ cainumŭa. Quédecabu.

<sup>17</sup> A ru ina cŭve cŭvarivŭ ijāravuquede yópe arĭ, coyŭjacu náre: “Đápiabejará muja mearape apevu pŭeno”, ajacu náre. Aru, “Ńuje cŭve cŭvae boje, napini coreivubu ńuja”, arĭ đápiabejarári na. Que baru ijāravuque cŭve cūiquiyebu. Aru ńame buojabebi majicu aipino joe cнquiyede diede. Quéhora náre napini coreicōjejacu Jūmenijicure. Ũrecabe j́yŭ majare urarō baju caiyede, maje torojurájiyeye ayu. <sup>18</sup> Ina cŭve cŭvarivure đaicōjejacu me apevure. Jecubevŭa j́icōjejacu náre ne cŭvaequede, ne coapavarájiyeye ayu cōmaje ārojarivure, cadatenajivŭ náre. <sup>19</sup> Nópe ne cadateiye boje apevure, cŭvarājarama na coapa ne bojeđarájiyede daquijāravu baquinóre cavarō mearo Jūmenijicui curōi. Jáve torojurivŭ ne ũmei cŭvarājarama na jāravu cūimējāravu baquinóre.

### Pablo ũi cōjeino Timoteore yóbocarō baju

<sup>20</sup> Mu, Timoteo, Jūmenijicu epeibi mure, mi coyŭquiyeye ayu iye Jesús ũi ýavaiye méne. J́apiabejacu iye coyuiyede pueđabenore Jūmenijicure aru ārumenore máre. J́apiabejacu iye bueiyeđe jáve āmene. Ina pōeva borocŭrivŭ bueniduyama majidivure. “Me majivŭ ńuja. Ńuje bueiye j́avemu”, arĭduyama. Ũbenita majibema na. <sup>21</sup> Aru apevu yópe bueivŭ, javede đajocađama ne ju aiyе b́aqueđe Jesúre. Jūmenijicu mearo đacajacurĭ caivŭ mujare bojecubeda ũi me boje. Quénoramu.

## 2 Timoteo

Mamabuinore coyuiyebu Pablo bácu ùi toivaicōjeiye báquede yóbocayoca paperayocare Timoteo bácu. Pablo bácu judíovacacu bácuvacari, Jesús ùi yávaiye méne beorí coyucōjeimu marejaquémavu, coyucuy ùi yávaiye méne judíova ámevure, judíova ne ju abe boje ùi coyuiyede. Lucas bácu coyurejaquemavu Pablo bácu borore Hch 7:57-8:1, 9:1-31, 13:1-28:31, aru Timoteo bácu borore Hch 16:1-3, 17:13-16, 18:5, 19:22, 20:4. Caiye apoyoca doce paiyoca Pablo bácu toivaicōjeiyoca úre toivacaipōecu bácu ùi paperayoca curiyocare Majepacu Jūmenijicu yávaiye mamaene coyutucubo jívui javede toivaicōjenejaquemavu ùi toivaicōjequiyede jipocare diyoca ùi buojaiyocare. Pablo bácu coyurejaquemavu úre toivacaipōecu bácu aipe ùi toivacaquiyede báquede diyocare. Toivaicōjenejaquemavu diyocare āniñju bácarōre 64 d.C., ùi cuede āmeina teivure jēni jacoĩnami Roma āmicurĩmaroi, ùi yaiquíye jipoĩcai. Dinumure Lucas bácu quécu dajocabedejaquemavu Pablo bácu (4:11).

Pablo bácu toivaicōjenejaquemavu diyocare ùi coreóvaiyede maume jabova ne boarí jaruvaquimure. Parure ñaiyurejaquemavu Timoteo bácu ùi ũmei aru ñaicōjenejaquemavu aipe ñaiye jaurōre ũ mácu (1:3-14, 2:1-13, 3:14-4:2, 5). Jári coreicōjenejaquemavu ũ mácu apevu ne bueiye jāve āmene (1:15-18, 2:14-3:9, 4:3-4). Coyurejaquemavu aipe vaiye báquede ũ mácu (3:10-13, 4:6-8, 14-18). Aru ñaicōjenejaquemavu Timoteo bácu Marcos bácuque ùi yebai ùi cuveque (4:9-13, 21).

### Pablo ùi meaicōjeino Timoteore

(Hch 16.1; 1 Ti 1.2)

**1** <sup>1</sup>Yū, Pablo, toivaicōjeivu apecure iyoca paperayocare. Yúbu Jesús ùi yávaiye méne beorí coyucōjeimaracacu. Jūmenijicu ũbi ji coyuiyede pōevare, ne majinajiyepa ayu ũ cure ñacuyure caivu ina Jesúre ju aipōevare Jesucristoque jāravu cūiméjāravu baquinóre. <sup>2</sup>Mu, Timoteo, yu meaicōjeivu mure, ji umure, jímacupe páyure. Majepacu Jūmenijicu, maje jabocu Jesucristomaque, mearo ñacajacurí mure bojecubeda ùi me boje. Aru cōmaje āroje jājacurí mure. Aru torojurí cure ñajacurí mure cārijimecua.

### Pablo ùi coyūino pōevare Cristorā

(Hch 16.1; 1 Ti 2.7)

<sup>3</sup>Yu torojuede jívu Jūmenijicure, ji memecaimure, “Boropatebevu yu”, ji arí ñápiayequa, nópe jíñecua mácu máre ne úre memecaiye báquapedeca. Ji jēniayedeca Jūmenijicuque jāravure aru ñamine máre ārvu mure cainumua. <sup>4</sup>Árvu mi oíye báquede. Que baru urarō jāiyuvu mure cojedeca, torojucuy ji baju. <sup>5</sup>Árucu yu mi ju aipe báquede Jesúre jāve. Mamarumure mĩñeco Loida aru mipaco Eunice máre ju arejaima Jesúre. Aru jāve majivu yu mure máre ju ayure úre.

<sup>6</sup>Que baru āruicōjeivū mure Jūmenijicui jīye báquede bojecubeda ji tuoiyede mure ji puruáque mi jipoburā, mi đaquiyeye ayu yópe Jūmenijicui urōpe. <sup>7</sup>Aru Jūmenijicu daroibi majare ñai Espiritu Santore. Ū jidure đabecube majare. Quénora parure đaiibi majare, maje ūmei memecarājiyepe ayu me Jūmenijicure. Ūre đaiibi majare Jūmenijicure aru pōevare máre. Aru majide đaiibi majare maje oaburī coreivū maje bajure coreóvaivūva me.

<sup>8</sup>Que baru cūyebjacu mū iye maje coyuiyede maje jabocu Jesucristorā. Aru cūyebjacu yure máre, buoimū cucureca ūre boje. Quénora yúvacari ñájiyubecu āmevū ji coyuiye boje Jesús ūi yávaiye méne, mū máre ñájiyubecu cubejacu mi coyuiye boje Jesús ūi yávaiye méne. Napijacu mi ñájiyede Jūmenijicui paruéque. <sup>9</sup>Jūmenijicu meadaibi majare aru cutuibi majare máre, maje meara baju barājiyēpe ayu. Ūbenita die boje maja memecabevū ūre. Quénora Jūmenijicu mearo đacaibi majare bojecubeda nópe ūi đaiyue boje. Javede ijāravū búquiye jipocai, Jūmenijicu majidejaquemavū meadacuyure majare Jesucristoi đacaquiye boje. <sup>10</sup>Aru ñai meadaipōecu Jesucristo ūi daiye báquede ijāravui, Jūmenijicu jādovaimi ūi mearo đacaiye bojecubeda majare. Jesucristo āmei vaibéde đaiibi majare maje yaijuroede. Que baru yaidé đainore jiduē jaubevū majare. Aru Jūmenijicu jādovaimi maje ju aiyede Jesús ūi yávaiye méne cūvarājivure jāravū cūimējāravū baquinóre aru apebaju pojebebajure máre.

<sup>11</sup>Yúvacari Jūmenijicui epeimūmu, coyucuyū Jesús ūi yávaiye méne aru buecuyū pōevare diede máre. Que baru Jesús ūi yávaiye méne beorī coyūicōjeimūmu yū. <sup>12</sup>Que baru ñájivū yū caride buoimūpe. Ūbenita cūyojarō cubevū yure. Que baru coreóvaivū yū ñai Jesucristore, ji ju aimure. Aru jāve bjárōicōjemecuyūme ū iye ji memecaiye báquede ūre cainūmua. Que majivū yū jāve.

<sup>13</sup>Cainūmua coyujacu mū iye yávaiyede jāvene cūináturu ji coyuiyeye mi jápiaiye báquede. Ju ajacu Jesúre. Aru ūjacu Jūmenijicure, pōevare máre, mi cūe boje Jesucristoque cūinávūpe. <sup>14</sup>Jūmenijicu coyūicōjeimi mure iye yávaiye méne, apevū ne oatuvabenajiyeye ayu diede. Nai Espiritu Santo máque cucu cadatecuyūme mure, me mi coyūquiyepe ayu Jūmenijicui yávaiye méne.

<sup>15</sup>Mū coreóvaivū caivū ina Jesúre ju aipōeva Asia āmicurijoborōcavū javede dajocaivure yure, aru pucarā nácavū ne āmiá Figelo aru Hermógenes máre. <sup>16-17</sup>Ūbenita Onesíforocapūravū ūi edaiyede Roma āmicurīimaroi, cūiná vore cuquemavū ūetubecūva pū yure earīta. Aru obedijāravua torojure dāme yure, cūyojarō cure đabecu ji cuede ne buoimūpe. Que baru cōmaje āroje jājacurī maje jabocu Jesucristo Onesíforo jivure. <sup>18</sup>Mávacarī coreóvaivū me aipe Onesíforo ūi cadateiye báquede ūrarō majare, curivū bācavure Éfeso āmicurīimaroi. Que baru ānijāravū, Jūmenijicui ñájiovaquijāravū baquinóre pōevare, ne āmeina teiye boje, cōmaje āroje jājacurī Onesíforore máre.

#### Jesucristoi churara meacu

(Mt 10.33; Lc 12.9; 1 P 5.1)

**2** <sup>1</sup>Mū, jīmacureca páyū, parure đajacu mi baju mi ūmei Jesucristoi mearo đacaiye boje mure bojecubeda. <sup>2</sup>Aru iye ji coyuiyede mi jápiainoi obedivū pōeva ne jápiaiye bueicōjejacu mū ūmūva mearare, mi majimarare aru bueni majidivure máre, ne buenajiyeye ayu apevū pōevare máre.

<sup>3</sup>Napijacu yápe ñuje ñájiyede Jesucristore boje yópe churara meacu ñi ñájiyede napiyepe. <sup>4</sup>Đajacu yópe churarape. Ñai churara đabi yópe ñi jabocu, úre órejayu báciu, ñi urópe. Que baru ñi memecayuvacari ñi jabocu memecayuridubebi churara amecure. Quédaca mu Jesúre memecayuvacari memecabejacu apecure mi jabocupe. <sup>5</sup>Aru đajacu yópe cúyayupe. Nopedeca ñai yajuipōecu máre eabebi yo ñi yajuino bojede ména, đabecu baru yópe yajuipōevare ne cōjeiyepe. Quédaca mu đayu baru yópe Jesucristoi đaicōjeiyepe, cūvacayumu no bojede. <sup>6</sup>Aru đajacu yópe jiore máre memēñupe. Ñai memeipōecure íye javu caivu jipocamia die ñi oteiye báque jēnumure ñi jie baquiyé, ñi urarō memeiye báque boje. Quédaca mu memecayu baru Jesucristore uetubecūva, cūvacayumu mi bojede. <sup>7</sup>Me đapiajacu mu caiye ji coyuiyede. Mi me đapiaru diede, maje jabocu Jesús japiarī eare đacuyume mure caiyede.

<sup>8</sup>Ārujacu mu ñai Jesucristore, Jūmenijicui nacovaimu mácure yainore jaruvārī aru ñai jabocu David báciu pāramecure máre. Ūi yávaiye méne coyuyubu yu pōevare. <sup>9</sup>Aru iye yávaiyede ji coyuiye boje ñájiyu yu. Carita apēvu maucūvarivubu yure buoiyeta tāumeaque yui āmeina teivure jēni jacoĩnami jívui āmeina đayupe. Ūbenita ñame buojabecube buoyupe đayu Jūmenijicui yávaiye méne. <sup>10</sup>Que baru napivu yu caiye iye ñájiyede náre boje, ina Jūmenijicui beoimarare, Jesucristo ñi meadaquiyupe ayu náre máre, ne curājiyepe ayu úque ñi curō pūeno mearo cavarōi cainumua.

<sup>11</sup>Jāvetamu iye.

Đabēvu maja yópe maje đaiye báquepe maje ju arājiye jipocare Jesúre. Que teni yaivu bācavūpebu maja Cristoque. Que baru curājaramu maja úque. <sup>12</sup>Aru napivubu maja maje ñájiyede. Que baru jabotenajaramu maja úque. Ūbenita maje ju abedu úre, ū máre ju abecuyume majare coapa. <sup>13</sup>Aru maje ju abedu úre, úcapūravu đacuyume majare yópe ñi aiye báquepedeca, đacuyu ina úre ju abevure. Que baru ñi baju, “Que āmevu”, arī buojabebi ū.

Jāvetamu die.

### **Memeipōecu meacu**

(Jn 10.14; 1 Co 8.3)

<sup>14</sup>Ārure đare đajacu mu ina bueipōevare iye ji coyuiyede mure. Coreóvare đajacu náre Jūmenijicui jānoi, ne jarabenajiyepe ayu ne baju aipe aiyrōre ne yávaicamuaque. Bueipōeva ne jaraiye boje, cubejebu die. Quénora ne jaraiyeque āmedadama ina jápiaivure náre. <sup>15</sup>Méneca đarī jājacu, cūcuy Jūmenijicui jāinore úre memecayu ñi ju aimupe. Que teni cūyebecubu mu mi bueiye boje me Jūmenijicui yávaiyede. Aru buejacu pōevare yávaiyede jāvene.

<sup>16</sup>Ūbenita buebejacu iye ijāravūque coyuiyede pueđabede Jūmenijicure aru ārumene máre. Ina nópe bueivu pūeno āmenape baju nuivubu na. <sup>17</sup>Aru ne bueiyeque āmeina đavubu apēvure nópe ñai ijimu pojeiyeque pūeno amecu baju ñi nuiepe. Pucarā nópe bueđama, ne āmiá Himeneo aru Fileto máre. <sup>18</sup>Ina đajocadama ne ju aiye báquede iye yávaiyede jāvene. Borocurī, yópe arī, “Javeta Jūmenijicu nacovaquemavu pōevare yainore jaruvārī”, ūbenina arī coyuvubu na. Que teni cārijovaivubu apēvure, ne arājiyepe

aivü, “Majibevü ñuja aipe jauröre ñuje ju aiyede”. <sup>19</sup> Ëbenita ñame buojabema oatuvaivü iye Jümenijicui yávaiyede jävene. Que baru ñame buojabema bjäre ðaivü Jümenijicui ðaiyede. Jümenijicu parure ðaibi üi pöevare ne ümei. Aru jáðovaimi diede üi toivaicöjeiye báquede üi yávaiyede, yópe arí: “Maje jabocu Jesús majibi ü jinare. Que baru caivü ina aivü, ‘Jesucristobe ji jabocu’, dajocajarári na ne ámeina teiyede”, arejaquemavu Jümenijicu.

<sup>20</sup> Cürami uraðami jívure jororua ure cuvü. Apedua úruque ðaidua aru plataque ðaidua máre, ðbenita apedua jocuque ðaidua aru joboque ðaidua máre cuvü. Diduäre úruque, plataque máre, ðaidua bojecuriduare, ñai cürami upacu epeicöjeñume üi yebai curáðavüre. Ëbenita diduäre jocuque aru joboque máre, ðaidua bojecubeduare, epeicöjeñume cüramicavüre. <sup>21</sup> Que baru ñai pöecu dajocayu baru üi ámeina teiyede, memecacuyume me maje jabocüre. Üi mearo ðaiye boje, pöeva pueðaräjarama maje jabocüre, nopedeca diduá bojecuriduaque ñai cürami upacu pueðaiyepe ñai úre jácudayüre. Que teni ñai Jümenijicüre memecayu me, coreibi ðacuyü caino memecaino mearore cainumua. <sup>22</sup> Que baru ðabejacu mü ámenore yópe apevu bojüvu ne ðaiyepe ne baju uröpe. Quénora mearo ðarí jájacu, ðacuyü mearore Jümenijicui jáinoi cainumua, aru ju acuyü Jesús üi yávaiye méne, ucuyü Jümenijicüre aru pöevare máre, aru cãrijimecuyü náque, ina jéniaivü maje jabocüre, üi caðatequiyeye ayü náre aru curivüre ne dápiaino mearoque máre.

<sup>23</sup> Jápiarí adabebacu mü apevu ne coyuiyede bojecubede aru árumene máre. Nácapüravu me coreóvabevübu. Ëbenita mácapüravu coreóvaivü pöeva yópe coyüvüre, jararí búràjivüre. <sup>24</sup> Ëbenita ñai memecayu Jümenijicüre jaraiye jaubevü úre apevuque. Quénora caivuque pöecu meacupe bajacurí. Aru buejacurí me. Napíjacurí jarabecüva pöevaque máre. <sup>25</sup> Que teni buejacurí ðuibareca pöecu meacupe ina maucvarivüre Jümenijicui yávaiye méne. Que ðaru, Jümenijicu náre oatüvare ðacuyume ne dápiainore, ne ju aräjíyepe ayü üi yávaiyede jävene. <sup>26</sup> Que teni nácapüravu dupini nüjebu ñai abujuvai jabocüre jocarí. Üme náre jēñu mácu yópe doriñu jēiyepe moare. Üi jujovaiye báque boje, cuvabi náre ámeina teivupe, náre ðare ðacuyü üi uröpe.

### Aipe pöeva ne ðaräjino buojaquijäravua baquiyéde

**3** <sup>1</sup> Coreóvajacu mü iyede. Änijäravua buojaquijäravua baquiyéde, Cristoi copaidaquijäravu baquinó jipocai, pöeva ámena maiyójare ðaräjarama apevüre. <sup>2</sup> Yópe ðaräjarama na, ina ámena. Ne baju uräjarama. Aru jecuräjarama táuturare. Dápiaräjarama ne baju mearape apevu püeno. Aräjarama, “Mearamu ñuja apevu püeno”. Aru ámeina yávaräjarama. Jueðova ju abenajarama nébucuvai coyuiyede. Jíbenajarama torojuede. Aru pueðabenajarama Jümenijicüre máre. <sup>3</sup> Jecubenajarama névüre. Aru cõmaje äroje jámenajarama apevüre. Yávaräjarama borocuede apevü borore. Oarí corebenajarama ne baju ðaiyuede. Jijecuräjarama. Aru ðbenajarama caino mearore máre. <sup>4</sup> Jēni jínajarama pöevare ne mauvare. Aru ðaräjarama árumevüre. Dápiaräjarama ne baju majidivüre caiyede apevu püeno. Jümenijicui uröpe ðabenajarama na. Aru cojubenajarama úre. Quénora ðaräjarama cojuräivü ne baju yópe ne baju uröpe. <sup>5</sup> Apevu pöeva ne jáiyede náre ðaräjarama yópe ina mearore jívü Jümenijicüre ðaiyepe. Ëbenita Jümenijicüre parure ðaicöjemenajarama ne ümene ðaräjivü yópe üi uröpe.

Dupini nujacu mu nápe paivure jocarí. <sup>6</sup>Apevu nácavu duibajieneca ecoicōjene ðaivubu náre apevu ne cūramiai, jujovarājivu nomiva ārumevure. Ina nomiva, ne dāpiaiey āmeque ðaiye boje, ðaiyurivubu āmenore urarō. <sup>7</sup>Cainumua jápiaivubu obedivu pōeva ne bueiye mamaene. Ūbenita ye buojabema coreóvaivu áde yávaieyede jāvene. <sup>8</sup>Yópe ina yaviva bácavu ne āmiá Janes aru Jambres ne maucuvae báquepe Moisés bácure, nopedeca na máre, ina jujovaivu nomivare, maucuvavivubu iye yávaieyede jāvene. Dāpiaivubu āmenore cainumua. Aru Jūmenijicui jaruvaimaramu na, ne ju abe boje iye yávaieyede jāvene. <sup>9</sup>Ūbenita obedivu pōeva coreóvarājarama aipe ārojarivure náre. Járarajama náre ārumevupe, yópe ne jáiyepe ina pucarā Moisés bácii mauva mácavupe paivure.

**Pablo ūi cōjeino yóbocarō baju Timoteore**

(Hch 13.14-52; 14.1-20)

<sup>10-11</sup> Ūbenita múcapūravu coreóvaivu aipe ji bueiye báquede, aru ji ðaiye báquede, ji ðaiye báquede, ji ju aipe báquede Jūmenijicure, ji napiye báquede, ji űe báquede pōevare, aru ji nājiiye báquede máre. Mu coreóvaivu aipe ina Antioquía, Iconio, aru Listra āmicurīmaroacavu ne nājine ðaiye báquede yure. Ne nājine ðaiyedeca yure, cainumua napinejacacu yu. Aru maje jabocu Jesucristovacari meadarejame yure cainumua. <sup>12</sup>Jāve caivu ina meara maiyurivu Jūmenijicui jáinoi curivu Jesucristoque cūinávupe nājinajarama na. <sup>13</sup>Ūbenita ina pōeva āmena aru ina jujovaivu máre pueno āmena nurajarama na. Jujovarājarama apévure. Aru náre máre jujovarājarama pueno baju.

<sup>14</sup>Ūbenita múcapūravu ðajocabejacu mi ju aiyede caiye iye mi bueiye báquede. Majivu mu jāve diede. Que baru mu coreóvaivu ina mure bueivu bácavure iye yávaieyede jāvene. <sup>15</sup>Aru mu coreóvaivu juedocu cāreja, caride máre, majicure iye Jūmenijicui toivaicōjeiye báquede ūi yávaieyede, mi majiquiyepe ayu Jūmenijicu meadacuyure mure, mi ju aipe boje Jesucristore. <sup>16</sup>Caiye iye Jūmenijicui yávaieyede ūvacari toivare ðarejaquemavu ina űre toivacaivu bácavure. Que baru ūi yávaieye bojecuvu majare, maje buenajiyepe aipe iye yávaieyede jāvene, aru maje coreóvarājiyepe aipe maje āmeina teiyede, aru maje oatavarājiyepe aipe maje ðaiyede, aru maje majinajiyepe aipe aipe ðaiye jaurōre, curājivu meara Jūmenijicui jáinore. <sup>17</sup>Nai Jūmenijicure memecayube nópe ðarí me majini, napini coreyu, ðacuyu caiye méne.

**4** <sup>1</sup>Caride majepacu Jūmenijicu, maje jabocu Jesucristomaque, jápiaibi iye ji coyuiyede mure. Jesucristo copaidacuyume ijārvui. Nājine ðacuyume pōeva apurivure aru yaivu bácavure máre, ne āmeina teiye boje. Aru jabotecuyume caivu pōevare. Que baru parurōreca ðaicōjeivu yu mure yópe ji coyuiyepe. <sup>2</sup>Coyujacu Jesús ūi yávaieye méne pōevare. Me jári coreni buejacu náre cainumua, ne jápiaiyuru aru ne jápiaiyubedu máre. Coyujacu mu pōevare aipe ne āmeina teiyede. Aru ðajocaiçōjejacu náre diede. Buejacu aipe ðaiye jaurōre náre máre. Aru buejacu napiyeque. <sup>3</sup>Eaquiye bu ajejārvua āmejārvua. Ānijārvua baquiyéde pōeva jápiabenajarama bueiye méne. Quénora ne baju urōpe vorājarama obedivu bueipōevare, ne buenajiyepe aivu náre yópe ne baju jápiaiyuepe, ne ðarājiyepe aivu āmeina teiyede yópe ne baju urōpe. <sup>4</sup>Que teni jápiabenajarama iye bueiyede jāvene. Ūbenita jápiarājarama néñecuva mácavui

coyuiye báquede. <sup>5</sup>Aru parurõreca ãaicõjeivũ yũ mure cojedeca. Múcapûravũ ãaicõjejavũ me mi baju, coreóvayũpe cainũmũ. Napijavũ mi ñájiyede. Aru coyujavũ Jesús ñi yávaiye méne põevare máre. Que teni mi memecaiyede maje jabocũ Jesucristore ñajavũ caiyede yópe mure ñaiye jaurõpe.

<sup>6</sup>Aru yúcapûravũ joabejĩnotamu ji yaiquĩno. Maumena yũre boarĩ jarũvarãjarama, ji memecaiye boje Jesucristore. <sup>7</sup>Iye Jesús ñi yávaiye méne coyuiyede coyuivũ yũ oabecũvacari. Que teni ñavũ yũ yópe ñai cúyayũ apevũque ñi cúyaiyepe oabecũvacari. Aru iye Jũmenijicũi urõpe ñaiyede ñavũ yũ oabecũvacari. Que baru bũojaivũ yũ yópe ñai cúyayũ apevũque ñi cúyarĩ bũojaiyepe turũvaita. Aru iye maje jũ aiyede Jesucristore ñajocabevũ yũ. Quénora jũ aivũ yũ úre cainũmũ. <sup>8</sup>Que baru yópe ñai cúyayũ ñi jacopũiyepedeca ñi cúyaiye bojede eayũ apevũ jipocai, yure máre jícũyume maje jabocũ Jesucristo ñi ñajujãravũ baquinóre, ji mearo ñaiye báque boje. Aru yũ cũinãcura ãmevũ, quénora jícũyume caivũ ina úre urivũ napini coreivũre ñi ñajujãravũ baquinóre.

#### Pablo ñi ñaicõjeino Timoteore

(Hch 12.12, 25; 13.13; 15.37-39; 20.4, 6; Ro 2.6; 2 Co 8.23;

Gá 2.3; Ef 6.21-22; Col 4.7-8, 10, 14; Tit 1.4; Flm 24)

<sup>9</sup>Caride meatejavũ, jãcũdacũyũ maumena ji yebai. <sup>10</sup>Ñũ Demas ñajocame yũre ñi ñe boje ijãravũquede aru ñuamedã Tesalónica ñamicũriĩmaroi. Crescente ñuamedã Galacia ñamicũrijoborõi. Aru Tito máre ñuamedã Dalmacia ñamicũrijoborõi. <sup>11</sup>Ñai Lucas quécũrabe cũcũ yũque caride. Vorĩ ñavajavũ múque Marcõre, ñi coreóvayũ boje cadateiyede ji memeinore. <sup>12</sup>Jarocavũ yũ Tíquicore Éfeso ñamicũriĩmaroi. <sup>13</sup>Mũ ñayũ, ñavacajavũ yũre ji pũenocacaje cuitótecacaje, ji ñajocaino mácarõre Troas ñamicũriĩmaroi, Carpoi cũrami. Aru ñavacajavũ ji paperatucubõare aru ji toivaiyocare máre. Úvũ yũ iye toivaiyocare pũeno baju.

<sup>14</sup>Ñai Alejandro, tãure memepõecũ, ñarejame urarõ ñmeno yũre. Maje jabocũ Jesucristo ñájiñe ñacũyũme úre ñi nópe ñaiye báque boje. <sup>15</sup>Que teni múvacari máre me jãjavũ úre, ñi maucũvae boje parurõreca maje yávaiye méne.

<sup>16</sup>Mama rũmũre ji ñuiye báquede jãbova ne ñmeina teivũre jẽniari jãĩñami, coyucũyũ ji ñaiye báquede ne boro coyurĩ ñaiye báque boje yũre, põecũ cũbeteame yóvayũ yũre. Quénora caivũ ñajocaima yũre. Jẽniaivũ Jũmenijicũque ñi ñrũmetequiyepe ayũ yo ne ñmeno ñaino mácarõre yũre. <sup>17</sup>Úbenita maje jabocũ Jesucristo cadateame yũre aru parũre ñame yũre, ji coyũquiyepẽ ayũ caiye iye ñi yávaiye méne. Aru cainoa joborõacavũ nore cũrivũ bácvũ jãpiaima diede. Que teni maje jabocũ Jesucristo meadame yũre urarõ ñmenore jarũvarĩ, yópe jẽni ñiyepe põecũre yavide jocarĩ. <sup>18</sup>Que baru jãve coreóvayũ yũ maje jabocũ Jesucristo meadacũyũre yũre cainũmũ. Aru cũre ñacũyũme yũre ñi meadaimũpe ñi jãboteinũmũre cavarõ mearo ñi cũrõi. Que baru mearore jĩñajarevũ úreca cainũmũ, jãðovarajivũ úre meacũ bajure. Quédecabũ.

#### Pablo ñi meaicõjeino Timoteojãre

(Hch 18.2, 18; 19.22; 20.4, 21, 29; Ro 16.23; 2 Ti 1.16-17)

<sup>19</sup>Meajarari Prisca, aru Aquila, aru caivũ ina Onesíforo ñi cũramicavũ máre. <sup>20</sup>Ñai Erasto mauteamedã Corinto ñamicũriĩmaroi. Aru ñai Trófimo

ijimure dajocacacu Mileto amicuriĩmaroi. <sup>21</sup>Me ðari jájacu, dacucu ji yebai uracoro jipocamia. Eubulo, Pudente, Lino, Claudia, aru caivu apecu Jesúre ju aipõeva meaicõjedama mure.

<sup>22</sup>Maje jabocu Jesucristovacari cujacurĩ múque. Aru Jūmenijicu mearo ðacajacurĩ caivu mujare bojecubeda ũi me boje. Quénoramu.

# Tito

Mamabuĩnore coyuiyebu Pablo bácu ũi toivaicōjeiye báquede paperayocare Tito bácu. Pablo bácu judíovacacu bácuvacari, Jesús ũi yávaiye méne beorĩ coyucōjeimũ marejaquémavu, coyucuyũ ũi yávaiye méne judíova ámevũre, judíova ne ju abe boje ũi coyuiyede. Lucas bácu coyurejaquemavu Pablo bácuĩ borore Hch 7:57-8:1, 9:1-31, 13:1-28:31. Pablo bácu coyurejaquemavu Tito bácuĩ borore ũi paperayocaque ũi toivaicōjeiye báquede ũre toivacaipōescu bácuĩ Galacia ámicurijoborōcavũre aru yóbocayocaque Corinto ámicurĩimarocavũre, aru yóbocayocaque Timoteo bácuĩ máre. Javede toivaicōjenejaquemavu apeyoca once paiyoca ũi paperayoca curiyocare Majepacu Jũmenijicui yávaiye mamaene coyutucubo jívui. Diyocare toivaicōjeiquiye jipojĩcai toivaicōjenejaquemavu mamayoca ũi paperayocare Timoteo bácuĩ. Pablo bácu coyurejaquemavu ũre toivacaipōescu bácuĩ aipe ũi toivacaquiye báquede diyocare. Toivaicōjenejaquemavu diyocare ániũju bácarōre 63 d.C. Majidivũ ne dápaiyepe, curejaquemavu Macedonia ámicurijoborōi ũi toivaicōjeiyede diyocare.

Diyocaque Pablo bácu coyurejaquemavu Tito bácuĩ aipe ðaiye jaurōre Jesũre ju aivũre coreipōevare (1:5-9). Majide ðarejaquemavu ũ mácuĩ aipe bueiye jaurōre Creta ámicurijavũcavũre (2:1-15, 3:8) aru aipe ðaiye jaurōre Jesũre ju aipōevare (1:10-16, 3:1-2, 9-11, 14). Árũre ðarejaquemavu ũ mácuĩ Jesũs ũi yávaiye méne (1:1-3, 3:3-7). Ũ mácuĩ apevũre caðateicōjeni, ðaicōjenejaquemavu ũi yebai (3:12-13).

## Pablo ũi meaicōjeino Titore

(2 Co 8.23; Gá 2.3; 2 Ti 4.10)

**1** <sup>1</sup>Yũ, Pablo, toivaicōjeivũ apecure iyoca paperayocare mure. Jũmenijicure memecayũbu yũ. Aru Jesucristo ũi yávaiye méne beorĩ coyucōjeimaracacũbu yũ máre. Nōpe ðayũbu, Jũmenijicui beoĩmara mácvũ ne ju arãjiyepe ayũ Jesũs ũi yávaiye méne aru ne majinajiyepẽ ayũ caiye iye bueiyyede jãvene aipe ðarĩ Jũmenijicu ũcure pōeva ne ðaiyyede. <sup>2</sup>Maja Jesũre ju aipōeva napini coreivũbu Jũmenijicu jĩcuyũre jãravũ cũimějãravũ baquinóre majare. Javede, ijãravũ búquiye jipocai, Jũmenijicu arejaquemavu jĩcuyũ pōevare jãravũ cũimějãravũ baquinóre. Aru Jũmenijicu borocubecube cainũmũ. Que baru ðacuyũme yōpe ũi aipe báquepedeca. <sup>3</sup>Aru Jũmenijicui beojãravũ bácarōre coyucōjenejaquemavu ũi yávaiye méne, coreóvare ðacuyũ diede majare. Aru yũvacari Jũmenijicui epeimũmu, coyucuyũ ũi yávaiye méne. Que baru Jũmenijicu, majare meaðaipōescu, yũre coyucōjenejaquemavu pōevare diede. <sup>4</sup>Mũ, Tito, yũ toivaicōjeivũ diyoca paperayocare mure. Jãve jĩmacupe páyũbu mũ, maje ju aipe boje Jesũre cũinátũrũra. Majepacu Jũmenijicu, maje jabocu Jesucristomaque, mearo ðacajacurĩ mure bojecubeda ũi me boje. Aru torojurĩ cure ðajacurĩ mure cãrijimecũva.

## Tito ñi memecaino Cretacavure

(1 Ti 3.2-7)

<sup>5</sup>Yu dajocacacu mure nore, Creta ãmicurijjavui, mi ñaquiyeye ayu caiye iye ñaiye buojabede cãreja ina nõcavu Jesúre ju aipõevare. Que baru ñmaroa coapa epejacu mu ina Jesúre ju aivure coreipõevare yópe ji cõjeiye báquepe mure. <sup>6</sup>Ácu põecu mi epeimu macuyúre, corecuyure Jesúre ju aipõevare, ñaiye javvu úre cainumua yópe põeva “Ãmecube ñai”, ne boro coyurĩ adaivu buojabenajiyeye aiyeye ñi borore. Aru ñaiye javvu úre cainumua yópe põeva ne jãdovamenajiyeye aiyeye ñi ãmeina teiyede. Javvu úre máre ñi cõvaquiyeye jãmarepaco cõinácora. Javvu mamarare máre ne ju aiyeye Jesúre. Aru javvu ne ñaiye cainumua yópe põeva “Ãmenamu na”, aru “Ne bucuvare ju abema na”, ne boro coyurĩ adaivu buojabenajiyeye aiyeye ne borore. <sup>7</sup>Ñai Jesúre ju aipõevare coreipõecu Jũmenijicure memecayube. Que baru põeva boro coyurĩ adaivu buojabejarãri úre. Jaboteiyubejacurĩ jãpiabecuva apevure. Aru jijecubejacurĩ. Ûcumejacurĩ pacotede ñaiyede. Ãdamateiyubejacurĩ. Aru vorĩ eabejacurĩ tãuturare ãmei dãpiaiyequé máre. <sup>8</sup>Quénora javvu úre ñi copu etarĩ jacoyiye me ina curãdaivure. Aru mearo ñacaiyue javvu úre apevure cainumua. ñaiye javvu úre majiéque. Mearo ñaiye javvu úre Jũmenijicui jãinoi. Jũmenijicure cõinácura memecaiye javvu úre. Aru ñi bajure curĩ majié javvu úre máre. <sup>9</sup>Javvu úre ñi ju aiyeye jãve iye Jũmenijicui yãvaiyede jãvene, ne bueiye báquede úre, ñi cadateni buojaquiyeye aiyeye apevure ne buenajiyede iye bueiye jãvene, ne jãdovari buojarãjiyeye aiyeye ina Jũmenijicui yãvaiye méne maucuvavure ne ãmeina ñaiyede.

<sup>10</sup>Que baru obedivu põeva curivu, ye jãpiabema. Quénora ñavubu yópe ne baju urõpe. Coyuivubu ñbenina. Que baru ne coyũno bojecubevu caivu jãpiaivure náre. Aru jujovavubu põevare máre. Judíova obedivu nápe paivu cõma. Buede cuivubu, yópe arĩ: “Ûmva Jesúre ju aipõevacavu ne cajede buraicõjeiye javvu náre coapa”, are cuivubu na. <sup>11</sup>Bueivubu na yópe bueiye jãbepe náre, ãmei dãpiaiyequé vorĩ earãjivu põeva ne tãuturare. Que ñarĩ cãrijoavubu apedãmia cõramiacavure, ne dajocarãjiyeye aivu Jũmenijicui yãvaiye méne. Que baru bi aicõjejacu mu náre. <sup>12</sup>Cõinácũ cãcoé namuõipõecu Creta ãmicurijjavucacu bácu arejaquemavu ñi joborõcavurã: “Cretacavu borocurivubu cainumua. ãimara jijecurivupe paivubu. Múivubu. Aru jũracurivubu máre”. Que arejaquemavu ñi mácu.

<sup>13-14</sup>Aru ne borore coyurejaquemavu jãvene. Que baru majicajacu paredca ina bueivure yãvaiyede jãve ãmene, jãdovacuyú náre ne ãmeina ñaiyede, ne coreovarãjiyeye ayu bueiye jãvene, aru ne jãpiarĩ adabenajiyeye ayu ina judíovai coyuiye báquede, aru ne jãpiarĩ adabenajiyeye ayu ina põeva dajocavvu bácvu yãvaiyede jãvene ne ñaicõjeiyede máre. <sup>15</sup>Põeva “Boropatebevũ yũ”, ne arĩ dãpiaru, caino ne ñaino máre mearotamu. Ûbenita põeva “Boropateivũ yũ”, ne arĩ dãpiaru, aru ne ju abedu Jesúre máre, caino ne ñaino máre ãmenotamu. Quénora dãpiadama na ãmeno matuiye. Que baru “Boropateivũ yũ”, aiyeye javvu náre cainumua. Que teni ne ãmeina ñaiyede chĩomenama na. <sup>16</sup>Yópe arĩ, “Jũmenijicure coreovavubu ñũja”, ñbenina aivubu na. Ûbenita ne ñaiyeque jãdovavubu coreovabevure Jũmenijicure. ãmena bajubu na Jũmenijicui jãinore. Aru jãpiabeni ju abevubu úre. Que baru ye mearo ñaiye majibema na.

**Pablo ñi coyũino Titore bueiye méne**

(Mt 20.28; Mr 10.45; Gá 1.4; 1 Ti 2.6; 1 P 2.9; 2 P 1.1)

**2** <sup>1</sup>Ubenita múcapũravũ coyũjacũ pœvare iye bueiye de jãvene. <sup>2</sup>Ina ãmũva bucũva corejarãri me ne ðaiyede. Aru ðajarãri yópe pœva ne puedaimarape. Ðajarãri majiéque. Ju ajarãri parurœreca iye bueiye de jãvene. Jũmenijicure ujarãri aru pœvare máre. Aru napijarari ne ñãjiyede máre. <sup>3</sup>Quédeca ina nomiva bucũrœmiva ðajarãri yópe nomiva Jũmenijicure ju aivũpe. Yávabejarãri borocuede apevũ borore. Aru ùcumejarari na pu ne pacotede ðaiyeta. Quénora jáðovajarari apevũre mearo ðaiyede ne baju ðaiyeque. <sup>4</sup>Que teni majide ðajarãri ina nomiva bojũrœmivare aipe ðaiye jaurœre, ne urãjiyepe aivũ némarepacũva aru némarare máre. <sup>5</sup>Majide ðajarãri náre aipe ðaiye jaurœre, ne ðarãjiyepe aivũ majiéque, aru ne ðabenajiyepe aivũ ámenore, ne memenajiyepe aivũ me ne cũramiai, ne caðatenajiyepe aivũ apevũre, aru ne ju arãjiyepe aivũ torojurivũ némarepacure. Que ðaiye jãvũ náre pœva ne ámeina yávabenajiyepe aivũ Jesús ñi yávaiye méne.

<sup>6</sup>Quédeca coyũjacũ parurœreca ina ãmũva bojũvũre, ne ðarãjiyepe ayũ majiéque máre. <sup>7</sup>Jáðovajacũ náre cainũmua mi baju mearo ðaiyeque aipe ðaiye jaurœre náre. Mi bueiye de náre buejacũ caiye iye yávaiyede jãvene. Árumetebejacũ aru oatuvabebacũ apejiene. Que baru mi bueiye bajadéni nurié cainũmua. Aru buejacũ ina mũre jápiaivũ ne puedarãjiyepe ayũ mũre aru mi bueiye de máre. <sup>8</sup>Coyũjacũ náre iye yávaiyede jãvene, pœva “Ámecube ñai”, aru “Ámene buebi ñ”, ne arĩ buojabenajiyepe ayũ. Que teni apevũ maucũvarivũ baru maje bueiye de, cũyoje tenajarama, ne boro coyurĩ adarĩ buojabe boje majare.

<sup>9</sup>Quédeca coyũjacũ ina memecaipœvare, ne ju arãjiyepe ayũ ne jabovare cainũmua. Ðajarãri ina memecaipœva yópe ne jabovai urœpe, cojuquiyepe náre. Aru ámeina yávabejarãri ne jabovare. Quénora puedajarãri náre cainũmua. <sup>10</sup>Aru ñavamejarari ne jabovai cuae de. Quénora jáðovajarari ne jabovare ne mearo ðacaiyede cainũmua. Que teni ina memecaipœva me járe ðarãjarama apevũ pœvare iye Jũmenijicũ yávaiyede, majare meadayũ, ñi buicõjeiyede majare.

<sup>11</sup>Que baru Jũmenijicũ meacũ baju jáðovaimi ñi mearo ðacaiye bojecubeda majare. Que teni Jũmenijicũ buojare ðayũbe caivũ pœvare ñi meadaiyurĩduimara márãjivũre. <sup>12</sup>Que baru majidivũbu maja majare jaurœre maje ðajocaiye maje ámeina teiyede iye Jũmenijicũ ubede, aru maje ðajocaiye maje ðaiyuede yópe Jesúsre ju abevũ ne ðaiyepe máre. Quénora maje cuede ijãravũ jãvũ majare maje ðaiye majiéque, maje mearo ðaiye Jũmenijicũ jáinoi, aru maje memecaie máre Jũmenijicure ñi urœpe. <sup>13</sup>Que ðaiye jãvũ majare maje napini coreiyede torojurivũ iye jáve vaiquýede: Jesucristo, majare meadayũ, maje ju aimũ pueno meacũ baju, copaidacũyme ijãravũ. <sup>14</sup>Jesucristo boarĩ jarũvaicõjenejaquemavũ ñi bajure ñi mavũre, meadacũyũ majare maje ámeina teiyede jarũvari. Que ðaicõjenejaquemavũ, meara ðacũyũ majare, maje torojurĩ memecarãjiyepe ayũ áre me ñ jinape.

<sup>15</sup>Que baru buejacũ mũ caiye iyede. Coyũjacũ parurœreca ina Jesúsre ju aipœvare, ne ðarãjiyepe ayũ caiye iyede. Jáðovajacũ ina pœva nópe ðabevũ

căreja aipe daiye jaurôre nâre. Aru buejacu nâre paruéque. Que teni âmeina jáicôjemejacu pôevare mure.

**Aipe daiye jaurôre Jesúre ju aipôevare**

(Ef 5.26)

**3** <sup>1</sup>Ârure ďajacu mu ina Jesúre ju aipôevare jaurôre nâre ne ju aipe ina jabovare aru côipecpôevare máre. Đajarâri yópe ina jabova ne ďaicôjeiyepe. Aru napini corejarâri, mearo ďarâjivu cainumua. <sup>2</sup>Âmeina yávabejarâri apevui borore. Jarabevuva cãrijimene ďajarâri pôevare. Aru duibareca meara pôevape pueďajarâri caivu pôevare cainumua.

<sup>3</sup>Javede maja máre ârumevu dâpiabevu barejávũ. Aru ju abevu barejávũ Jũmenijicure. Pueno âmeno nuivu barejávũ, ina bueivu yávaiyede jáve âmene ne jujovaiye boje majare. Buojabedejavũ dajocaivu maje âmeina ďaiyuede, cojuquiyeye majare. Dâpiare cuivu barejávũ âmeina ďaiyede cainumua. Aru jorojivu barejávũ. Apevu ubedejaima majare. Aru majavacari ubedejavũ majevure máre. <sup>4</sup>Ubenita Jũmenijicuvacari, majare meadaipôecu, jáďovaimi ũi baju meacure aru ucure pôevare máre. <sup>5</sup>Que baru meadaibi majare. Ubenita meadabebi majare, maje mearo ďarĩduiye boje. Quénora meadaibi majare ũi baju cômaje âroje jáiye boje. Maje âmeina teiyede jaruvaibi, meadacuyu majare. Que teni ñai Espĩritu Santo apure ďaibi majare, maje apurãjiyepe ayu apué mamaeque. <sup>6</sup>Jesucristo, majare meadaipôecu, cure ďaibi ñai Espĩritu Santore maje ũmei. Que baru Jũmenijicu daroibi ñai Espĩritu Santore maje ũmei, ũi cadatequiyeye ayu majare urarôreca. <sup>7</sup>Que teni Jũmenijicu meadaibi majare, ũi coavaiyede majare maje âmeno ďaiyede jaruvãri. Uĩ mearo ďacaiye bojecubeda ũi me boje, “Boropatebevũ muja ji jáinoi”, arĩ coyui bi majare. Que baru caride maja Jũmenijicui maramu. Aru jáve cuvarãjaramu jãravu cũimějãravu baquinóre. Que baru napini coreivubu diede.

<sup>8</sup>Jãvetamu die. Que baru uvu yu mi coyũquiyede caiye iyede parurôreca, ina Jũmenijicure ju aipôeva ne mearo ďarãjiyepe ayu cainumua. Iye bueiye jáve métamu. Aru bojecuetamu máre. Que baru caivu pôeva majima aipe daiye jaurôre nâre, iye bueiye jáveque. <sup>9</sup>Ubenita jarabejacu ubenina apevuque. Aru ârure ďabejacu pôevare néñecuva mácavu ne âmiá coapa. Coyubejacu náque, ina aivure, “Mu coreónabevu aipe aiyurôre Jũmenijicui ďaicôjeiyede ũi coyuiye báquede Moisés bácure”. Náque jarabejacu mu. Caiye iye bojecubevu aru cadatebevũ máre. <sup>10</sup>Ăcu pôecu Jesúre ju ayu ũi maucuvãriduru apevu Jesúre ju aipôevare, dajocaicôjeyacu ũre ũi que ďaiyede. Uĩ dajocabedu, dajocaicôjeyacu ũre cojedeca, ũi ďabequiyeye ayu diede. Aru ũi dajocabedu căreja, ye yóvabejacu ũre. <sup>11</sup>Uĩ que daiye boje, coreóvaivu mu ñai ũmu âmecu bajure. Uvacari majide ďaibi apevure, ũi âmeina teiye dajocabe boje. Urecabe ñãjicuyu.

**Pablo ũi ďaicôjeino Titore**

(Hch 18.24; 20.4; 1 Co 16.12; Ef 6.21-22; Col 4.7-8; 2 Ti 4.12)

<sup>12</sup>Yúcapũravu cuquijivu Nicópolis âmicurĩĩmaroi uracorore. Que baru jaroquijivu mi yebai Ártemare o Tíquicore. Ñai ũmu ũi eaquiyede nore, meatejacu jácunucuyu Nicópolis, yure corucuyu noi. <sup>13</sup>Aru meatejacu

cadatecuyũ ñai ñaicōjeiyede bueipōecure ñi ãmiá Zenas aru Apolore máre. Jijacu náre caiye náre jauéde, ne buojarājiyepe ayũ ne curānuiyede. Ye apejĩe jaubejañeni náre. <sup>14</sup> Aru caivũ apevũ ina Jesúre ju aipōeva quédeca buejarāri, na máre mearo ñarājivũ aru cadatenajivũ ina cōmaje ārojarivure náre jauéde. Que teni mearo ñarājarama ne cuede ijāravui.

**Pablo ñi meaicōjeino Titojāre**

<sup>15</sup> Caivũ ina Jesúre ju aipōeva yúque curivũ meaicōjedama mure. Meajarari caivũ ñujevũ, Jesúre ju aipōeva nócavũ, ñujare urivũ. Aru Jūmenijicũ mearo ñacajacurĩ caivũ mujare bojecubeda ñi me boje. Quénoramu.

# Filemón

Mamabuinore coyuiyebu Pablo bácu ùi toivaicōjeiye báquede paperayocare Filemón mácore, Colosas ámicuriimarocacure. Pablo bácu judíovacacu bácuvacari, Jesús ùi yávaie méne beorí coyucōjeimū marejaquémavu, coyucuy ùi yávaie méne judíova ámevure, judíova ne ju abe boje ùi coyuiyede. Lucas bácu coyurejaquemavu Pablo bácu borore Hch 7:57-8:1, 9:1-31, 13:1-28:31. Javede toivaicōjenejaquemavu pucayoca ùi paperayocare Tesalónica ámicuriimarocavure, aru pucayoca ùi paperayocare Corinto ámicuriimarocavure, ùi paperayocare Galacia ámicurijoborōcavure, aru ùi paperayocare Roma ámicuriimarocavure máre. Apevu ne dápiayepe, javede toivaicōjenejaquemavu ùi paperayocare Filipos ámicuriimarocavure. Toivaicōjenejaquemavu yóbecuriyoca ùi paperayocare ániūju bácarōre 60 d.C., ùi cuede ámeina teivure jēni jacoīnami Roma ámicuriimaroi, cūináyocare Éfeso ámicuriimarocavure, apeyocare Colosas ámicuriimarocavure, aru apeyocare Filemón mácore. Tíquico bácu núvarejaquemavu iyoca yóbecuriyocare cūinátura ùi nuiyede Roma ámicuriimarore pu Asia ámicurijoborōi. Pablo bácu coyurejaquemavu úre toivacaipōecu bácore aipe ùi toivacaiyue báquede diyocare.

Onésimo bácu, Filemón mácu yebacacu, dupini nuñu bácu ùi jabocure jocarí, earejaquemavu Roma ámicuriimaroi. Nore ùi jápiaiyede Pablo bácu coyuiyede Jesús ùi yávaie méne, ju arejaquemavu diede. Pablo bácu úre toivacaipōecu bácore toivaicōjenejaquemavu diyocare, jēniacuy Filemón mácore ùi copu etaiyuepe ayu Onésimo mácore yópe ùi copu etajuroepe Pablo bácu bajure.

## Pablo ùi meaicōjeino Filemóre

(Col 4.17)

<sup>1</sup>Yū, Pablo, buoimū ji coyuiye báque boje Jesucristoi yávaie méne, toivaicōjeivū apēcure iyoca paperayocare mure, Filemóre. Yū aru Timoteo, majecu ùi ju aie boje Jesúre, meaicōjeivubu mure, ñuje umure ñujape memēñure. <sup>2</sup>Meajarari ina Jesúre ju aipōeva cōjijivaivū mi cūrami. Aru Apia máre, ñujeco ōi ju aie boje Jesúre meajacorí ō. Aru Arquipo máre meajacurí ū. Ñujape coyuii Jesús ùi yávaie méne apevu ne maucuaedeca ñujare. <sup>3</sup>Majepacu Jūmenijicu, maje jabocu Jesucristomaque, mearo đacajacurí mujare bojecubeda ùi me boje. Aru torojurí cure đajacurí mujare cārijimevūva.

## Filemón ùi urō pōevare aru ùi ju aino Jesucristore

<sup>4-5</sup>Mū, jicu, Filemón, ji coyuiyede jipacu Jūmenijicuque torojuede jívaivū mure boje cainumūa. Jápiaivū mi borore mi uede Jesúre ju aipōevare aru mi ju aiyede maje jabocu Jesúre. Que baru jívaivū mearore Jūmenijicure. <sup>6</sup>Aru ina pōevare, mi ju are đaimara Jesúre, mi coyuiye boje náre ùi yávaie méne, yū Jūmenijicuque náre máre jēniavaivū, ne coreóvarājiyepa ayu me

caie iye Jūmenijicui mearo đacaquiyede majare, maje cue boje Jesucristoque cūinávpe. <sup>7</sup>Mu, jicu, caride torojavu yu. Mu torojare đavu yure mi me cadateiyede ina Jesúre ju aipǽvare, mi ue boje náre.

**Pablo ũi jēniaino Filemóre ũi cadatequiyepa ayu ñai yebacacure,**

**Onésimore**

(Col 4.9)

<sup>8</sup>Que baru jēniaivu mure mi cadatequiyepa ayu. Yu cadateicǽjeiyubevu mure ji paruéque, Cristoi parure đaiye báquede yure. <sup>9</sup>Quénora jēniaivu mure, mi cadatequiyepa maje ue boje, Cristoi cure đaiye báquede majare. Bucucubu yu. Aru ji bueiye boje Jesús ũi yávaie méne buoimumu caride.

<sup>10</sup>Jēniaivu mure mi cǽmaje ároje jáquiyepa ayu ñai Onésimore. Ũi jápiaie báquede ji coyuiye báquede Jesús ũi yávaie méne ji cuedeca yui ámeina teivure jēni jacoĩnami, ju áme Jesúre. Que baru jímacu páyube ũ. <sup>11</sup>Javede ũi yebacacue báquede mure, ñai Onésimo cadatebetequemavu mure. Ũbenita caride cadateibi mure aru yure máre. <sup>12</sup>Jacopaiyovaquijivu ũre mi yebai cojedeca. Copu etajacu ũre yópe mi copu íjuroepedeca yure. <sup>13</sup>Yúcapuravu buoimumu caride ji coyuiye báque boje Jesús ũi yávaie méne. Aru yu coreóvaivu iyede: Mu cucu baru yui, cadatejebu yure. Ũbenita mu cubevu yui. Que baru mautede đaiyurĩduvu Onésimore, ũi cuquiyepa ayu yore ji yebai, ũi cadatequiyepa ayu yure yópe mi baju cadatejuroepe yure.

<sup>14</sup>Ũbenita yu mautede đabevu ũre ji yebai, mi ju aie jaué boje yure cǽreja. Que baru ubevu yu cadatecyure yure ji cǽjeiye boje mure. Quénora uvu yu cadatecyure yure mi baju ue boje. <sup>15</sup>Ñai mi yebacacu Onésimo apenumu coateyu bácu bateichuame mure jaruvari, mi cǽvaquiyepa ayu ũre bediáva cojedeca aru cainumua. <sup>16</sup>Caride yebacacu bacuyá ámemi ũ. Ũ máre, majape, ju aibi Jesúre. Que baru majecupe, maje umume ũ. Ũ pare cadateibi yure. Ũbenita pueno baju cadatecyume mure.

<sup>17</sup>Que baru mu coreóvayu baru majare curivure Jesucristoque cūinávpe, copu etajacu Onésimore nopedeca mi copu íjuroepe yure. <sup>18</sup>Ũi cue báquede múque, mure ámedaru, meadacyumu yu mure ũre boje. Aru ũi cue báquede múque, mure bojecube đaru, bojedacyumu yu mure ũre boje. <sup>19</sup>Yúvacari toivaivu ji puruque. Jáve bojedacyumu mure. Ũbenita árvure đaiyubevu mure mi baju bojecube đayure yure, ji coyuiye báque boje Jesús ũi yávaie méne mure. Que baru múvacari bojecube đavu yure mi cǽvaquiyede jaravu cūiméjaravu baquinóre. <sup>20</sup>Mu, jicu, maje ju aie boje cūináturu maje jabocu Jesucristore, cadateni, torojare đajacu yure.

<sup>21</sup>Yu toivaicǽjeivu apecure iyoca paperayocare mure, ji majié boje đacyure jáve yópe ji jēniainope, aru ji jēniainore múque pueno baju máre. <sup>22</sup>Aru meadacajacu yure cūinátucubure, ji cuquitucubuva ji jácunquiyede mi yebai. Muja jēniadavu Jūmenijicuque, ũi etavaquiyepa aivu yure ámeina teivure jēni jacoĩnamine jocarĩ. Que baru mujare jácunuiyurĩ, napini coreyabu yu.

**Pablo ũi meaicǽjeino Jesúre ju aipǽvare**

(Hch 12.12, 25; 13.13; 15.37-39; 19.29; 27.2; Col 1.7; 4.10, 12, 14; 2 Ti 4.10-11)

<sup>23</sup>Épafra meaicǽjeimi mure. Ũ máre buoimume yúque, ũi coyuiye boje Jesús ũi yávaie méne. <sup>24</sup>Ina apevu máre, Marcos, Aristarco, Demas, aru

Lucas máre meaicōjedama mure. Caivũ ina yúque memecaivũbu Jesúre.

<sup>25</sup>Maje jabocũ Jesucristo mearo đacajacurĩ mujare bojecũbeda ũi me boje.  
Quénoramu.

# Hebreos

Mamabuĩnore coyuiyebu iyoca paperayocare cūinácu pōecu ũi toivacaino mácarō ina judíova Jesúre ju aivu Hebreos āmicurivu bācavure. Caivu majibevu ñamene toivacayu bācure diyocare. Ūbenita iyede majivu: Ñai toivacayu bācu diyocare jápiabedejaquemavu Jesúre, quénora jápiarejaquemavu Jesús ũi yáyaiye mēne coyupōeva māvure (2:3). Ūi toivacaimara ne cōjijinocacu āmenejaquemavu (13:7). Copaiyurejaquemavu ũi toivacaimara ne yebai (13:19). Pablo bācu yóvaimaracacu bācu barejaquémavu (13:23). Italia āmicurijoborōcavu Jesúre ju aipōeva māvavu ne yóvaimu marejaquémavu (13:24). Obedivu majidivu ne dāpiaiyepe, Apolos bācu toivacarejaquemavu diyocare (Hch 18:24-28). Apevu ne dāpiaiyepe, Lucas bācu toivacarejaquemavu diyocare, diyoca ārojariyoca boje apeyoca pucayoca Lucas bācu toivacaiye báquepe. Apevu ne dāpiaiyepe, Bernabé bācu toivacarejaquemavu diyocare (Hch 11:22-26, Gá 2:11-21). Āmarocavu bācavure mamarumure caiyoca bācarō diyocare máre, aru āimaro ñai toivacayu bācu ũi curiimaro ũi toivacaiyede diyocare máre caivu majibevu. Apevu “Jerusalén āmicuriimarocavure” arī, aru apevu “Antioquía āmicuriimarocavure” arī, apevu “Roma āmicuriimarocavure” arī, aru apevu “Alejandría āmicuriimarocavure”, arī dāpiaivubu. Toivacarejaquemavu Jūmenijicu cūrami Jerusalén āmicuriimarocadāmi māvurōre churarava ne tūvarī jaruvārājiye jipocai, que baru āniñju bācarōre 70 d.C. jipocare. Majidivu ne dāpiaiyepe, toivacarejaquemavu āniñju bācarōre 66 d.C.

Ñai toivacayu bācu diyocare toivacarejaquemavu ina judíova Jesúre ju aivu bācavure, ne dajocabenaijiyepe ayu ne ju aiyede. Dāpiariduvu barejaquémavu oatuvārājivu, mearore jīnājivu Jūmenijicure yópe ne jīye báquepedeca ne Jesúre ju arājiye jipocare. Toivacarejaquemavu coyuyu na māvure yópe ne oatuvaiyepe majibevure, Jūmenijicu bojecubede ñaiye báque boje javede, Jesúi yainfuru nacajaiye báquede, āniñami javedadāmi ũre mearore jīñami māvurōre, aru ānina ũre jīcaiye jípōeva, sacerdoteva bācavure, aru ānina āimara ũre jīcāimara māvure máre. Aru ũi bojecubede ñaiyepe caiye iyede epedejaquemavu Jesúre cūinácura majare jīcaiyepe jīyure, aru epedejaquemavu Jesúi jivede cūinārora ũre jīcaiyepe, aru epedejaquemavu cavarō mearore cūinārora maje ũre mearore jīñamine. Que baru ñai toivacayu bācu jádovarejaquemavu Jūmenijicu “Que ñarājare”, ũi aino pōevare Jesúque mearore ũi aino māvurō Moisés bācuque pueno, aru Jesúvacarī meacu bajure caivu Jūmenijicure coyucaipōeva māvavu pueno.

## Jūmenijicu ũi coyuinno mamacque pōevare

(Mt 22.44; Jn 1.1-3; Col 1.15-17)

**1** <sup>1</sup>Javede Jūmenijicu ũi yávaiyede coyucaipōeva māvure coyucōjenejaquemavu. Majeñecuva māvure coyurejaquemavu. Obedinmua yávarejaquemavu. Apecu Jūmenijicu yávaiyede coyucaipōecu apede coyurī aru apecu máre apede, obedivu coyurejaquemavu. Que teni Jūmenijicu pōevare jádovari búrejaquemavu aipe ārojacure. <sup>2</sup>Ūbenita

caride, ijāravu buojaijāravuare, maje curijāravuare, Jesucristoi darīburu yóbore, Jūmenijicu yāvarī jebeibi majare mamacuque. Ūrecabe Jūmenijicui cuedaicōjeimu mǎcu ijāravure aru caiye ijāravuquede. Ūrecabe Jūmenijicu purucūvaicōjeimu mǎcu caiyede, ūi cuedaquiye jipocamia. <sup>3</sup>Ūrecabe jáđovañu Jūmenijicu meacu bajure. Coreóvaivūbu aipe ārojacure Jūmenijicure mamacui đaiyeque aru ūi coyuiyeque máre. Ūrecabe cūnáturu jīpacu Jūmenijicuque. Ūrecabe caiyede cure đayū, ūi cōjeiyeque, ūi yávaie paruéque, caiye nuquiyepe ayū yópe Jūmenijicui urōpe. Ūrecabe jaruvayū bǎcu maje āmeina teiyede, Jūmenijicui ārumetequiyepe ayū diede, maje curājiyepe ayū yópe docucūbevūpe maje ūmei. Que teniburu yóboi, ūrecabe dobacu bǎcu jīpacu Jūmenijicu paracu caivū pūeno ūi meapūravūi cavarō mearoi, ūi cūvae boje caiye jīpacui paruéde ūpe, jabotecuynū caiyede. Aru nore cubi caride. <sup>4</sup>Jūmenijicu mamacure parure đarejaquemavū caivū ángeleva pūeno, ūi jaboteicōjeiyede ūre caiyede. Aru quédeca Jūmenijicu āmidorejaquemavū mamacure “jīmacu”, jáđovacuyū ūre parucure ina ángeleva pūeno.

**Jūmenijicui mǎcu paracu caivū ángeleva pūeno**

(Mt 22.44; Mr 12.36; Lc 20.42-43)

<sup>5</sup>Ácu ángele cubebi ūre, yópe arī, Jūmenijicui toivaicōjeino mácarōre:

Jīmacurecabu mū. Caride caivū ne jāpiainoi yāvacari jaboteicōjeivū mure, arejaquemavū Jūmenijicu mamacure.

Quédeca ácu ángele cubebi ūra, yópe arī, bedióva apeno Jūmenijicui toivaicōjeino mácarōre:

Yū bacuyūmu ūi pacu. Aru ū macuyūme jīmacu, arejaquemavū Jūmenijicu, ūi daroquiye mamacure.

<sup>6</sup>Aru Jūmenijicu ūi daroquiye jipocamiareca mamacu parucure, caivū ne pueđarājimure, bedióva ijāravūi, yópe arī, coyucuyūme:

Caivū ina ji ángeleva mearore jījarāri ūre, Jūmenijicu mamacurā acuyūme.

<sup>7</sup>Que baru ángelevacapūravū ne borore yópe arī, toivaicōjenejaquemavū Jūmenijicu:

Jūmenijicu ūi daroimara ángeleva ūmevūpe paivure đaiibi náre. Náre, ūre memecaivure, toa uruinope paivure đaiibi ū, ne nūraiye boje ne memecaiyede ūre, arī coyurejaquemavū.

Que arī, jáđovarejaquemavū ángeleva oatūvaivure aru dajocaivure ne memecaiyede ūre. <sup>8</sup>Ūbenita mamacucapūravure yópe arī, toivaicōjenejaquemavū Jūmenijicu:

Mū, Jūmenijicu baju, cainūmua pōevare jabotecuynūmu mū. Mútamu meacu baju. Que baru cainūmua pōevare jabotecuynūmu mū ména. Aru náre mearore đare đacuyūmu yópe mi urōpe. <sup>9</sup>Mearo đaiyede đaiyūnu mū. Cainūmua đaiivū mū yópe ji đaicōjeiyepe. Aru āmeno đaiyede đaiyūbevū mū. Cainūmua đabevū mū yópe ji đaicōjemepe. Que baru yū, Jūmenijicu, mi mearore jīmu, beoivū mure, caivū ne pueđaimū macuyūre, mi jaboteiyede náre. Yū epeivū mure parucure caivū mi yóvaimara, ina ángeleva pūeno. Aru mure ne pueđarājimū mae boje pare torojure đaiivū yū mure aru ina ángeleva mi yóvaimarare máre, Jūmenijicu arī coyurejaquemavū mamacure.

<sup>10</sup> Bediôva cojedeca Jūmenijicu, yópe arí, coyurejaquemavu mamacure:

Mu, caivu ne jabocu yúque, mamarumure mǎvacari cuedarejavu yo pǒevai curijoborǒre. Aru mǎvacari cuedarejavu cavarǒre máre.

<sup>11</sup> Caiye iye mi cuedaiye báque cūiquíyebu. Ūbenita mǎcapǔravu cainumua cūimécubu. Quénora cǔcǔyumu cainumua. Caiye iye mi cuedaiye báque yópe cuitótecaje javecacajepe pojequiyebu. <sup>12</sup> Yópe pǒeva ne pǐpejeiyepedeca ne cuitótecaje javecacajede, ne doiyyede mamacaje cuitótecajede, nopedeca mǎvacari pǐpejene ďacǔyumu caiye mi cuedaiye báquede, mi epeiyyede joborǒ mamarore aru cavarǒ mamarore máre. Yópe pǒeva ne oatǔvaiyepe ne cuitótecajede, nopedeca mǎvacari oatǔvacǔyumu caiye mi cuedaiye báquede. Ūbenita mǎcapǔravu oatǔvabecubu cainumua. Bucutebecubu. Aru yaibécubu mu, arí toivaicǒjenezjaquemavu Jūmenijicu.

<sup>13</sup> Aru ácu ángele cubebi úre, yópe arí, Jūmenijicui toivaicǒjeino mǎcarǒre: Dobajacu ji meapǔravui, mi cǔvae boje parúede yǔpedeca. Aru yu epecǔyumu mi mauvare mi cuboba cǎchinoi. Que teni mure vainí jarǔvare ďacǔyumu yu náre, mi jabotequiyepes ayu náre, arí coyurejaquemavu Jūmenijicu mamacure.

<sup>14</sup> Ūbenita caivu ina ángelevacapǔravu torojurívu memecaivubu Jūmenijicure aru mearore jívu bu úre. Námu Jūmenijicui daroimara, pǒeva ne jámemara, cadatenajívu maja ũi meadainara mǎrajívre, cǔvarǎjívure caiye iye ménes Jūmenijicui ďacaquiyede majare.

#### **Jūmenijicu ũi meadaino majare me baju**

(Hch 2.22; 2 Co 12.12)

**2** <sup>1</sup> Caride coreóvaivubu maja Jūmenijicui mǎcu parǔcure caivu ina ángeleva pǔeno. Que baru pǔeno baju me jápiarí ďaiye javu majare iye ũi yǎvaiyyede jávene maje jápiaiye báquede, maje nǎjimenajíyepes aiyes maje jápiarí ďadabe bojes. Diede ju arí, ďaiyes javu majare yópe maje jápiaiye báquepedeca. Que ďaivu baru, ju are nuri, árumetebenajívu bu aipes ďaiyes jaurǒre majare, maje bíjabenajíyepes aivu majes ũmene. Ūbenita majes ju aiyedes ďajocarí buivu baru, bíjares nurajívu bu majes majes ũmene.

<sup>2</sup> Javede Jūmenijicu ũi ángelevares coyúicǒjenezjaquemavu ũi ďaicǒjeiyyedes Moisés bácu, ũi toivarí epequiyepes ayu diede majes necuva mǎcavure, ne majinajíyepes ayu diede. Iye ángeleva ne coyúiyes báque Jūmenijicui yǎvaiyes jáve marejaqué mavu. Que baru caivu vainí tuívu bácu diede nǎjinezjaquemavu ne vainí tuíyes báque bojes, yópe Jūmenijicu “Ina vainí tuívu ji ďaicǒjeiyyedes nǎjinajarama”, ũi aiyes báquepedeca. Aru caivu diede ju abevu bácu máre nǎjinezjaquemavu ne ju abe báque bojes, yópe Jūmenijicu “Ina ju abevu yures nǎjinajarama”, ũi aiyes báquepedeca. <sup>3</sup> Que baru coreóvaivubu maja jáve nǎjívus bácvures ina jápiarí ďadabevu bácu ángelevai yǎvaiyyedes. Pǔeno baju coreóvaivubu maja jáve nǎjinajívre majare, jápiarí ďadabevu baru Jūmenijicui yǎvaiyes mamaenes, ũi coyúiyedes caiyes iyes ũi mearo ďacaquiyedes majares, ũi meadaiyyedes majares me.

Yópe epedezjaquemavu majares ũi yǎvaiyes mamaenes. Maje jabocu Cristovacari mamarumucacu coyurejamede Jūmenijicui meadaiyyedes pǒevares me baju. Aru ina úre jápiaívu bácu coreóvares ďarejaima majares

Cristoi yávaiyede jãvene ne coyuiyede diede majare. <sup>4</sup>Aru Jũmenijicu máre coreóvare ðaibi majare Cristoi yávaiyede jãvene ùi ðare ðaiyeque diede coyuiþõevare caijie þõeva ne ðarĩ majibede, ne jãmene, aru ùi ðaiye paruéde máre, aru ùi jĩni coavaiyeque ùi Espĩritu Santoi majiécarõre ùi þõevare yópe ùi urõpe, ne cadatenajiyeye ayũ aþevure.

### **Jesucristo þõevare meadaipõecu**

(Fil 2.6-11; He 12.2)

<sup>5</sup>Jápiarĩ aðaiye jãvũ majare iye Jũmenijicu yávaiye mamaene, ùi coyuiçõjeiye báquede Cristore, maje jabotenajiyeye boje Cristoque. Ángeleva ãmenejaquemavũ Jũmenijicu jaboteicõjeimara ùi jaboteinocavure mamajãravũ edaquijãravũ baquinóre, ijãravũ ji mujare yávaijãravure. <sup>6</sup>Quénora maja þõeva marejaquémavũ Jũmenijicu jaboteicõjeimara ùi jaboteinocavure e mamajãravũ edaquijãravũ baquinóre. Yópe arĩ, toivaicõjenejaquemavũ Jũmenijicu ùi yávaiyede:

Mũ, Jũmenijicu, þõeva parubevureca mi jáinoi aru ãrué jaubenovacari mure náre, ãruri dápiayubu mũ náre. Þõeva parubevureca mi jáinoi aru coreiye jaubenovacari mure náre, coreyubu mũ náre.

<sup>7</sup>Obebenũmua epeivũ mũ þõevare quĩjino parucu Ángeleva cãchijinomia. Ëbenita que ðayuvacari, epeivũ mũ ina þõevare meara baju caivũ ne jáinoi. Aru caivũ puedaðama náre. <sup>8</sup>Que teni jabotede ðaivũ mũ ina þõevare caiye mi cuedaiye báquede, arĩ toivaicõjenejaquemavũ Jũmenijicu.

Que arĩ, Jũmenijicu þõevare jaboteicõjenejaquemavũ caiyede. Ye jaboteino cubeno aiyurõtamu no. Ëbenita caride jámevũ maja þõevare caiyede jaboteivure. <sup>9</sup>Quénora coreóvaivubu maja Jesúrã. Obebenũmua Jũmenijicu epedejaquemavũ ùre quĩjino parucu Ángeleva cãchijinomia. Nópe ðarejaquemavũ Jũmenijicu ùi ue boje caivũ þõevare, Jesús ùi yaicáquiyeye ayũ majare boje. Ëbenita caride coreóvaivubu maja Jesúre Jũmenijicu epeimure meacu bajure aru maje puedaimure máre, ùi ñájiye báque boje ùi yaiyede.

<sup>10</sup>Jũmenijicu ye jaurõ cubecu ðarejaquemavũ Jesúre, ùi ñájiyede earĩ buojare ðacuyũ obedivũ þõevare Jũmenijicu mára márãjivũva, maje curãjiyepe ayũ meara baju Jũmenijicuque cavarõ mearo ùi curõi. Meavũ Jũmenijicu, ñai cuedayũ bácu caiyede ùi cuvaiyue boje diede, ùi eavare ðaiye majare ùi yebai ùi mára márãjivũva. Aru Jesúrecabe yópe ùi jipocateni nvaiyepe ùi mái, majare meadarĩ eare ðayũ caiye iye Jũmenijicu mearo ðacaquiyede majare. <sup>11</sup>Majare meadarĩ, Jũmenijicu jina tede ðaibi Jesús. Ñai jipocateyũ þõevare Jũmenijicu yebai aru maja ùi jipocateimara máre cũináturu cuvãrivubu majepacu Jũmenijicure. Que baru Jesúvacari “mũja, jívũ” ayũ majare, cyebebi ù. <sup>12</sup>Yóbecue ùi coyuiyede, Jesús “jívũ”, arĩ coyurejaquemavũ maje borore, ùre ju aipõevare. Apenũmũ yópe arejaquemavũ jípacũ Jũmenijicure:

Coyũcuyũmi mi borore jívure. Ne cójijiyede, mearore jínajivũ mure, yurĩacuyũmi yũ, mearore jícyũ mure, arejaquemavũ jípacũ Jũmenijicure.

<sup>13</sup>Yópe máre arejaquemavũ:

Yávacari ju acuyumu jipacu Jūmenijicure jāve, yópe ina jivu ne ju aiyepes úre, arejaquemavu ũ.

Aru cojedeca yópe máre arejaquemavu:

Yui cūvu yu jivūque, ina pōeva Jūmenijicui jímara mácavūque, arejaquemavu ũ, coyuyu maje borore, ũi eavarājimarare Jūmenijicu yebai.

<sup>14</sup> Maja pōevatamu. Que baru Jesúvacari “Pōescu tecuyumu” arĩburu, majape páyureca tedejaquemavu ũ. Pōevape ārojarejaquemavu ũ. Que tedejaquemavu parubede đacuyu űai abujuvai jabocure, űai cūvacu ũi cōjeimarape caivu pōeva jidurivu ne yainájiyede, ne boropateiyede, ne āmeina teiye boje. Jesús ũi yayiede parubede đarejaquemavu űai abujuvai jabocure. <sup>15</sup> Que teni meadaibi pōevare. Javede maje cue báquede abujuvai jabocui cōjeimara curejavū maja, maje jidúe boje yainore. Ũbenita yópe ne jodeiyepe cōjeimarare, nopedeca Jesús ĩnejaquemavu majare abujuvai jabocui paruède jocarĩ, maje jidubenaiyiyepe ayu yainore. Ũi bojedaiye báque boje caiye maje āmeina teiyede ũi jiveque, boropatebevubu maja caride. Que baru jidubevubu maje yainájinore.

<sup>16</sup> Me coreóvaivubu maja iyede: Jesús pōetebedejaquemavu, cadatecacuyu ángelevare. Quénora pōetedejaquemavu, cadatecacuyu maja pōevare, Abraham mácuĩ páramenare, maje ju aiyepes boje Jūmenijicure. <sup>17</sup> Nōpe đacuyu baru, cūináturu teiye jaurejaquemavu Jesúre yópe ũ jivu Jūmenijicure ju aivupe. Cūináturu majapedeca tebecu baru, sacerdotevare jaboteipōescu teni buojabejebu ũ, Jūmenijicui cōjeiyepe đacuyu pōevare boje, ũi me jáquiyepe ayu majare. Cūináturureca majape páyu teni, cōmaje āroje jári, aru dajocabecuva đarĩ úre đaiye jauède, sacerdotevare jaboteipōescu teni buojarejaquemavu űai Jesús. Memecarejaquemavu Jūmenijicure, ũi ārumetequiyepe ayu maje āmeina teiyede aru ũi me jáquiyepe ayu majare, Jesúi jícaiye báque boje ũi bajure Jūmenijicure. <sup>18</sup> Jesúvacari abujuvai jabocui jujovaiyumu maridurejaquemavu. Aru űájinejaquemavu diede. Que baru caride úrecabe cadateni buojayu majare, abujuvai jabocui jujovaiyumarare.

### Jesús paracu Moisés bácu pueno

**3** <sup>1</sup> Caiye iye ji coyuiye mujare jāvetamu. Que baru muja, jivu, Jesúre ju aivu aru Jūmenijicu jina, yúpe paivubu muja máre Jūmenijicui cutuimara mácavu ũ jina mārājivu, cūvarājivu caiye iye Jūmenijicui mearo đacaquiyede majare. Me ārujara muja Jesúre, coreóvarājivu me aipe ārojacure aru aipe đayure. Úrecabe Jūmenijicui daroĩmu mácu, úre coyucaipōescu, majide đacuyu majare Jūmenijicu “Que đarājare” ũi aino mácarōre majare. Aru sacerdotevare jaboteipōescube ũ, cadatecacuyu majare, maje đarājiyepe ayu yópe maje aiyepedeca, maje ju aiyepes boje Jūmenijicure. <sup>2</sup> Jūmenijicu beorejaquemavu Jesúre úre memecaipōescuva.

Aru Jesús memecaiibi Jūmenijicure dajocabecuva yópe úre đaiye jaurōpe, yópe Moisés bácuĩ memecaiye báquepe Jūmenijicure dajocabecuva, ũi jaboteiyede Jūmenijicui pōeva Israecavu bācavure. <sup>3</sup> Ũbenita Jesúre pueđaiye jauvu Moisés bácuire pueđaiye pueno. Moisés bácu cūinácu Jūmenijicui pōevacacu barejaquemavu. Ũbenita Jesús, caiyede cuedayu bácu, Jūmenijicui pōevare máre đarejaquemavu. Nopedeca pōescu cūramine đarĩburu yóboi,

püeno baju, “Ñai pöecu cüramine ðaiyede majibi me”, pöeva adama. Ñbenita majiéda, “Cürami meadamimu”, adama na. Que baru, ñai ðayu bácu ne püedaimume ñi ðaiye báque püeno. Aru ñai cüedayu ne püedaimume ñi cüedaimara püeno. <sup>4</sup>Cürami cubevu pöecu diñamine ðayu cubedu. Ñbenita Jümenijicurecabe caiye jjáravunque cüedayu bácu.

<sup>5</sup>Moisés bácu, Jümenijicui pöevacacu. Jümenijicure memecarejaquemavu, coreyu ñi pöevare. Ñre memecaiyurejaquemavu. Que baru ðajocabecüva ðarejaquemavu yópe ñre ðaiye jauröpe. Moisés bácuapüravu ñi coyuiyeque aipe ðaiye jauröre Jümenijicui pöevare, coreóvare ðarejaquemavu náre jãvene iye Jümenijicui coyuiyede aipe ðaiye jauröre obediñua yóboi Jesucristoque. <sup>6</sup>Ñbenita Cristocapüravu Jümenijicui mácube. Aru jabocui mácube parucu ñre memecaipöecu püeno. Que baru Cristobe parucu Moisés bácu püeno. Caride Cristorecabe ðajocabecüva coreyu Jümenijicui pöevare, yópe ñre ðaiye jauröpe. Aru majamu Jümenijicui pöeva, jidubevava aru torojurí ðajocabevava napini corede nuivu baru iye ñi mearo ðacaquiyede majare.

### **Jümenijicui pöeva ne cárijimequino**

(Ef 6.17)

<sup>7-8</sup>Mujamu Jümenijicui pöeva. Que baru me jájara muja, yópe Jümenijicui coyucaicöjeiye báquepe ñai Espíritu Santore:

Caride muje jápiaiyede Jümenijicui coyuiyede, jápiaiyubevupe tebejarã muja, yópe mujeñecüva mácavu ne teiye báquepe. Na mácavucapüravu ju abedejaquemavu Jümenijicure ne cuede pöecubenoí. Ñre ju abeni, ñi uröre majidivú bácvuvacari ðabedejaquemavu na mácavu. “Ñájine ðabecube Jümenijicu majare, ñre maje ju abedu”, arí dápiaríðurejaquemavu ñbenina na mácavu, arejaquemavu ñai Espíritu Santo.

<sup>9</sup>Jümenijicu, yópe arí, toivaicöjenejaquemavu ñi coyuiye báquede:

No pöecubenoí mujeñecüva mácavu yure ju abeni, ji uröre majidivú bácvuvacari ðabedejaquemavu. Pare maucuvarejaima yure, járiduivu bácvuvacari caiye ji ðaiyede pöeva ne ðari majibede cuarenta paiñua baju. <sup>10</sup>Que baru jorojini járejacacu na mácvure. Yópe arí dápiarejacacu nára: “Cainumua ina pöeva jápiaiyubema yure. Que baru ji uröre aru ji ðaiyede coreóvabenama na”, arí dápiarejacacu yu. <sup>11</sup>Que baru pare baju jorojini jáñu, yópe arí dápiarejacacu yu: “Yúbu Jümenijicu. Que baru yópe coyuyubu jãve. No joborö ji náre cárijimene ðájuroríjoboröre ye eabenama na”, arí dápiarejacacu yu, na mácvure jarayu, arí coyurejaquemavu Jümenijicu.

<sup>12</sup>Que baru muja, jívü, Jesúre ju aivu, me ðajarã, mujacacu cüinácu ñi ãmeina dápiabequiyepa aivu ñi ñmei, ðajocaiyucu ñi ju aiyede ñai Jümenijicu apücre. <sup>13</sup>Quénora parure ðajarã muja, cadatenajivu mujacavure, parurö nure ðaräjivu muje ju aiyede Jümenijicure. Nópe ðajarã muja, “Jesúre ju are nuivu bájarã”, caijãrvua muje cuede cãreja “caride”, Jümenijicui yáviyede coyuiye báquepe. Mujacacu cüinácu yáviyede jãvene jápiaiyubevupe tebejacurí, abujuvai jabocui mujovaiye báque boje ñre ñi

borocuede coyuiyeque Jūmenijicūrā. Nópe dayu baru, āmeina tejebu. Aru āmeina teyu baru, dajocajebu ūi ju aiyede Jesúre. <sup>14</sup> Cainumua maje cuede cāreja ijāravui dajocabevuva ju are nuiye jauvu majare Jesúre paruéque, yópe maje mamarumure ju aye báquepedeca ūre. Nópe daiye jauvu caivu majare, yóvarājivure Cristore, memenajivure ijāravui ūque, aru curājivure cavarō mearo Jūmenijicui curōi. <sup>15</sup> Que baru yópe arī, toivaicōjenejaquemavu Jūmenijicu:

Caride maje jápiaiyede Jūmenijicui coyuiyede, jápiaiyubevupe tebejarā muja, yópe mujeñecuva mácavu ne teiye báquepe. Na mácavucapūravu Jūmenijicure ju abedejaquemavu, arejaquemavu ū.

<sup>16</sup> Caivu ina majeñecuva mácavu, Moisés bácu jipocateimara mácavu Egipto āmicurijoborōre jocarī, Jūmenijicui coyuiyede jápiaivu bācavuvacari ju abeni maucuvarejaquemavu ūre. <sup>17-18</sup> Aru caivu ina ju abevu bācavure ūi cōjeiyede yópe pare baju arejaquemavu Jūmenijicu: “Yábu Jūmenijicu. Que baru yópe coyuyubu jāve. No joborō ji náre cārijimene dájurorijoborōre ye eabenama na”, arejaquemavu. Aru Jūmenijicu āmeina jorojīnejaquemavu na mácavūque ne āmeina teiye boje cuarenta paiñua baju. Que baru yaidé darejaquemavu na mácavure no pōecubenoī. <sup>19</sup> Que baru coreóvaivubu maja aipe vaiye báquede na mácavure. No joborō ne cārijimejurorijoborōre eabedejaquemavu na mácavu, ne jápiaiyubeni ju abe báque boje Jūmenijicure.

**4** <sup>1</sup> Aru Jūmenijicu “Que đacacuyumu yu jāve” arī, cārijimene đaiyubi majare máre ūque, yópe ūi cārijimene đaiyurđuiye báquepe majeñecuva mácavure. Que baru me jáiye jauvu majare Jūmenijicu ūi eaicōjemequiyepe aye cūnácū mujacacure ūi cārijimene đaiyede yópe “Jāve đacacuyumu”, ūi aye báquepedeca. <sup>2</sup> Yópe majeñecuva mácavu ne jápiaiye báquepe iye yávaiye méne Jūmenijicui cārijimene đaiyuede pōevare, nopedeca maja máre jápiaivu bācavubu iye yávaiye méne. Ūbenita na mácavu diede jápiarđuiuvacari, ju abedejaquemavu diede. Que baru na mácavu barejaquému Jūmenijicui cadatebemara. <sup>3</sup> Ūbenita maja Jesúre ju aivurecabu Jūmenijicui cārijimene đaimara. Jūmenijicurecabe cārijimene đaiye majicu. No cārijimene đaiyede Jūmenijicu, yópe arī, coyurejaquemavu:

Jorojīni jāñu pare baju, yópe arī dāpiarejacacu: “Yábu Jūmenijicu.

Que baru yópe coyuyubu jāve. No joborō ji náre cārijimene dájurorijoborōre ye eabenama na”, arī dāpiarejacacu yu, na mácavure jarayu, arī coyurejaquemavu Jūmenijicu.

Nópe arejaquemavu Jūmenijicu, majicu bácu ūi caiyede cuedaquiye jipocamia, caiyede ūi đaquiye, cārijimene đacuyu majare ūque. Aru cuedarī buojarī, ūi memeinore buojarejaquemavu Jūmenijicu. <sup>4</sup> Jūmenijicui yávaiyede, yópe arī, toivaicōjenejaquemavu no jāravu ūi cuedarī buojaijāravu bācarōra.

Seis paijāravua vaiyede, cuedarī dajocarī buojarejaquemavu

Jūmenijicu, cārijimecu, arī toivaicōjenejaquemavu ū.

<sup>5</sup> Yópe ji coyuiye báquepe mujare jipocamia, iye ūi cārijimene đaiyede, yópe arī, toivaicōjenejaquemavu Jūmenijicu:

“No joborō ji náre cārijimene dájurorijoborōre ye eabenama na”, arī toivaicōjenejaquemavu ū, Jūmenijicu.

<sup>6</sup>Ina majeñecuva mácvu, mamaru jápiaivu bácvu iye yávaiye méne Jūmenijicui cārijimene ñaiyuede pōevare, cārijimene ñaimara āmenejaquemavu na mácvu, ne diede jāpiarīdurī ju abe báque boje. Ũbenita apevu pōeva cuma caride, Jūmenijicui cārijimene ñaimara. <sup>7</sup>Diede coreóvaivubu maja Jūmenijicui beoijārvure, “cari jāravu” ũi aijārvure. Que baru obediūva vainīburu yóbore, yópe ji coyuiye báquepe mujare jipocamia, yópe arī, David bácvre toivaicōjenejaquemavu Jūmenijicu cūináro yurainore:

Caride muje jápiaiye Jūmenijicui coyuiyede, jápiaiubevure tebejarā muja, arī coyurejaquemavu David bácu.

<sup>8</sup>Ũi que aye báque boje, coreóvaivubu maja Jūmenijicu cārijimene ñaiyucure apenūmucavure, Josué bácu yóbocavure. Josué bácu jaboteiyede majeñecuva mácvure, ne mauva mácvure boarī, vainī turejaquemavu. Aru dinūmure yópe Jūmenijicu “Jāve ñacacuyumu”, ũi aye báquepedeca, cārijimene ñarejaquemavu na mácvure. Ũbenita Jūmenijicu ũi coyūicōjeiyede David bácvre bedióva apejārvurā, “caride” arī, maje cārijimenajiyede coyurejaquemavu.

<sup>9</sup>Caiye iye jāvetamu. Que baru Jūmenijicui pōeva eavubu curivu ijārvui cārijimenoque maje ũmei. Yópe Jūmenijicui cuedarī ñajocaiye báquepedeca cuedayu bácu seis paijārvuai, nopedeca maja ũi pōeva máre ñajocavubu maje āmeina teni ñaiyuede, maje ju aiyede Jesúre. <sup>10</sup>Caivu maja ñajocavui bácvu maje ñaiye báquede cārijimenoque maje ũmei curivubu caride, ñarājivu yópe Jūmenijicui ũrōpe, yópe Jūmenijicu cārijimecu ũi cūepe ũi cuedarīburu yóbore caiye ijārvuquede, ñe nuquiyepa aivu yópe ũi ũrōpe.

<sup>11</sup>Que baru caino maje oainope ñaiye jāvu majare, earājivu maje cuede Jūmenijicuque cārijimenoque. Nópe ñaiye jāvu majare, majacacu cūinácu ũi cubequiyepa aivu eabecu ũi cuede Jūmenijicuque cārijimenoque, ũi ñajocaiye boje ũi ju aiyede Jesúre, yópe majeñecuva mácvu ne eabe báquepe ne cuede Jūmenijicuque cārijimenoque, ne jāpiabeni ju abe báque boje ũi yávaiyede.

<sup>12</sup>Jūmenijicu ũi yávaiyeque coyūube pōevare ũi dápiainore. Que baru ũi yávaiyebu apuēpe. Aru ũi majide ñayube pōevare ũi ũrōre ũi yávaiyeque. Que baru ũi yávaiyebu parué. Yópe carove ũpujīdive caipucapūrvua burarī coavaiyepa me, nopedeca aru pueno baju me coavaiyebu Jūmenijicui yávaiye. Yópe carove cotuvaiyepa pōecu bajure, nopedeca Jūmenijicui yávaiye cotuvaiyebu pōecu jīvui pu ũi ũmeita aru pu ũi decocuita máre. Que baru maje buiyede Jūmenijicui yávaiyede coreóvarī eavubu méne o āmene maje ũrōre aru maje dápiainore máre. <sup>13</sup>Pōecu cubebi apejīene yaveiye majicu Jūmenijicure jocarī. Caiye iye maje dápiayede jārī majibi Jūmenijicu. Aru ũrecabe maje coyurājimū caiye maje ñaiyede ijārvui.

**Jesús sacerdotevare jaboteipōecu parucu caivu pueno majare boje**

(Mt 26.36-46; Mr 14.32-42; Lc 22.39-46; Jn 10.18; Fil 2.8; He 1.5)

<sup>14</sup>Caride coyūquijivu mujare bedióva cojedeca Jesucristo Jūmenijicui mácvre, sacerdotevare jaboteipōecu parucure caivu pueno. Ñai sacerdotevare jaboteipōecu coyūcaibi Jūmenijicure majare boje. Jesucristorecabe ecoyu bácu cavarō mearo Jūmenijicui curō bajui. Que baru majare parure nuiye jāvu maje ũmei, ñarājivu yópe maje aiyepedeca maje ju aye boje

Jūmenijicure. <sup>15</sup> Ñai sacerdotevare jaboteipōecu majare boje jāve cōmaje āroje jāñume majare maje ñājiyede, maje parube boje maje ūmei. Ñai abujuvai jabocu ūi jujovaiyede majare, ñājiñavu maja. Jesúre máre, majapedeca, jujovarĩdurejaquemavu ñai abujuvai jabocu. Que baru Jesús me coreóvaibi maje ñājiyede. Caino ūi oainope ñai abujuvai jabocu jujovarĩdurejaquemavu Jesúre. Ūbenita ye jujovarĩ oabedejaquemavu ūre. Aru Jesúcapūravu ye āmeina tebedejaquemavu cainumua. <sup>16</sup> Que baru, yópe maje joabejinoi nuiyepē ūi yebai, jēniarajarevu jidubevava Jūmenijicu parucu bajure. Nópe đarājarevu, ūi cōmaje āroje jāquiyepē aivu majare, ūi ārumetequiyepē aivu maje āmeina teiyede, aru ūi jíquiyepē aivu bojecubeda majare jauéde, ūi cadatequiyepē aivu majare.

**5** <sup>1</sup> Caride ārure đaquijivu mujare aipe ārojarivure ina sacerdotevare jaboteipōeva mácavure. Jūmenijicu beorejaquemavu caivu sacerdotevare jaboteipōeva mácavure nácavu ne jēneboi. Aru epedejaquemavu na mácavure, ne memecarājiyepē ayu ūre pōevare boje. Ūre memecarejaquemavu jícavū Jūmenijicure āimara ne boaimara mácavure juaiyede, nácavu aru ne baju máre ne āmeina teiye boje, ūi ñājine đabequiyepē aivu náre die boje, aru ape jícayede máre, pueđarĩ Jūmenijicure, torojuede jínajivu, ūi cadateiye báque boje náre. <sup>2</sup> Sacerdotevare jaboteipōecuvacari parubedejaquemavu ūi ūmei, yópe apevu pōevape. Que baru cōmaje āroje jāñu coreóvarejaquemavu ina āmeina teivure coreóvabevava, ne majibe boje yéde āmeina teiyede. <sup>3</sup> Aru ūvacari ūi parube boje ūi ūmei, Jūmenijicure jícaye jaurejaquemavu ūre āimara boaimara mácavure juaiyede, pōeva ne āmeina teiye boje aru ūi baju āmeina teiye boje máre.

<sup>4</sup> Sacerdotevare jaboteipōecu bácu barejaquémavu pōeva ne pueđaimu, ūi memecaiye boje Jūmenijicure paruéque. Aru pōecu cubebi ūi bajure beorĩ epeyu sacerdotevare jaboteipōecuva. Quénora Jūmenijicurecabe cūinácura beorĩ, cuturĩ, epeyu sacerdotevare jaboteipōecuva. Quédeca barejaquémavu Aarón mácū, pōeva ne pueđaimu mácū, Jūmenijicui beorĩ, cuturĩ, epeiye báque boje ū mácure sacerdotevare jaboteipōecuva.

<sup>5</sup> Aru nopeđeca vaidéjaquemavu Cristore. Ūvacari ūi bajure beorĩ epedejaquemavu sacerdotevare jaboteipōecuva. Quénora Jūmenijicuvacari ūre beorĩ, epeni, yópe arejaquemavu ūre:

Jímacurecabu mu. Caride caivu ne jápiainoi yúvacari jaboteicōjeivu mure, arejaquemavu Jūmenijicu mamacure.

<sup>6</sup> Aru apeno Jūmenijicui coyūino mácārōre Cristore, yópe arĩ, toivaicōjenejaquemavu:

Cainumua sacerdote tecuyumu mu dajocabecuva, yópe Melquisedec ūi sacerdote teiye báquepedeca dajocabecuva, arejaquemavu Jūmenijicu.

<sup>7</sup> Cristo ūi cuede cāreja ijāravui coyuvarejameđa Jūmenijicūque, aru jēniarejameđa ūque, ūi cadatequiyepē ayu. Orique codoborĩ jēniavarejameđa Jūmenijicure, ñai meadaiye majicure ūre ūi yaijurorōre jocarĩ. Aru Cristoi pueđarĩ ju aiye boje, ūi jēniayede Jūmenijicure, “Mi urōpe đajacu mu” arĩ, Jūmenijicucapūravu Cristoi jēniayede jápiarĩ ju arejaquemavu, ūi cadateiyede Cristoi đaquiyepē ayu yópe ūi urōpe.

<sup>8</sup> Cristo, Jūmenijicui mácū, jípacure ju aiye majicuvacari, ñājiñu majini

jebedejaquemavu aipe ärojaene Jümenijicure jápiarĩ ju aiyede aru üi uröpe ðaiyede. <sup>9</sup>Cristoi ðaiye báquede caiye iye üre jauéde yópe Jümenijicui uröpe, pôevare meadaipöecu tedejaquemavu. Que baru caivu maja üre jápiarĩ ju arĩ ðaivure yópe üi uröpe meadayube ü, maje cavaräjiyepe ayu caiye iye Jümenijicui mearo ðacaquiyede majare, aru maje jabotenajiyeye ayu Cristoque cainumua. <sup>10</sup>Aru Jümenijicu epedejaquemavu üre sacerdotevare jaboteipöecüva cainumua, yópe üi epeiye báquepedeca Melquisedede sacerdotevare jaboteipöecüva.

### Dajocabejarä müje ju aiyede Cristore

(1 Co 3.2)

<sup>11</sup>Toivacaiyurĩduivu mujare urarö iye Cristoi sacerdotevare jaboteiyede. Übenita mujacapüravu jüracurivu tedavü. Que baru ji coyuru mujare Cristoi sacerdotevare jaboteiyede, jápiabejebu müja. Que baru maiyójavu yure diede ji coyuyurĩduiyede mujare. <sup>12</sup>Javede majivu müja iye yávaiye méne Cristorä. Aru üre ju aivubu obediüare. Que baru parurivu baru müje ümei, mujavacari buejebu apevure, ne jápiarĩ ju aräjiyepe aivu diede. Übenita quénora pu caride máre mujavacari me jápiarĩ eabevu. Javvu mujare apevu ne bueiye bedióva cojedeca no bueino maiyójabenore, yópe mamarumu müje bueino mácaröpe Jümenijicui yávaiyequede.

Mujavacari jueðojĩnape paivu tedavü. Jueðojĩna opeco matuiyeda ücuñaima. Übenita bucüva äiyede äiye majima. Quédeca pôeva jueðojĩnape paivu ne ümei quénora Jümenijicui yávaiye maiyójabede jápiarĩ eadama na. Übenita pôeva bucuvape paivu ne ümei Jümenijicui yávaiye maiyójaede máre jápiarĩ eadama na. <sup>13</sup>Caivu ina äri majibevu aru opeco matuiyeda ücuivu jueðojĩnatamu. Bucüva ämevutamu cäreja. Pôeva majibevu yéde ðaiye méne aru ämene máre jueðojĩnape paivubu ne ümei. Dápiarĩ majibevu cäreja iye maiyójaede Jümenijicui yávaiyequede. <sup>14</sup>Übenita ina äri majidivu bucuvatamu. Pôeva majidivu aipe ðaiye méne aru ämene máre bucuvape paivubu ne ümei, ne dápiarĩ cömajiye boje caiye ne ðaiyede mearo maru o ämeno maru. Dápiarĩ majidivubu iye maiyójaede Jümenijicui yávaiyequede.

**6** <sup>1</sup>Que baru bueiye javvu majare Jümenijicui yávaiye maiyójaede üi yávaiye méne Cristorä, yópe ina bucuvape ne ümei ne bueiypedeca, maje ðaräjiyepe aipe járavua coapa yópe Jümenijicui uröpe Cristoi paruéque. Buebenajaramu bedióva cojedeca Jümenijicui yávaiye maiyójabede üi yávaiye méne Cristorä, yópe maje mamarumu bueiye báquepe, yópe ina jueðojĩnape ne ümei ne bueiypedeca. Que baru mujare buebequijivu cojedeca iye müje mamarumu bueiye báquede. Maja buebenajaramu pôeva ne chioiyede ne ämeina teiyede aru ne dajocaiyede diede, oatüvaräjivu ne ðaiyede, Jümenijicui jarüvaquiyeye aivu diede, náre coavajüroede üre jarüvarĩ. Aru pôeva ne ju aiyede Jümenijicure buebenajaramu maja. <sup>2</sup>Mujare buebequijivu cojedeca iye bueiyede pôeva ne Jümenijicuque jáðovaiyede ocoque aru ne apevure tuoiyede ne puruáque, Jümenijicui mearo ðacaquiyeye ayu ina tuoimarare. Mujare buebequijivu cojedeca iye bueiyede pôeva ne nacajarajiyede yainore jarüvarĩ, cüräjivu cainumua mamabaju cüimébajuque, aru Jümenijicui jaroquiyede caivu pôevare ne cüräjinoi járavu cüiméjáravu baquinóre, apevure cavarö mearo üi cüröi aru apevure toabo cüiméboi, na

coapa ne daiye báque boje ne cuede ijáravui. <sup>3</sup> Quénora bueiye jañvu majare Jūmenijicui yávaiye maiyójaede ũi yávaiye méne Cristorā bucuvape tenajivu maja maje ũmei ye jaubeda. Bucuvape teiyuru maje ũmei, Jūmenijicu bueicōjecuyume majare ũi yávaiye maiyójaede. Aru Jūmenijicui nópe bueicōjenu majare, coreóvarājivubu Cristore ye jaubeda.

<sup>4-6</sup> Ūbenita nópe bueni buojabevu apevu pōeva. Pōecu ũbenina bueyu bácu Jūmenijicui yávaiyede aru ju arĩduyu bácu Cristore, ũi ju abeni dajocarui ũi ju arĩduiye báquede Cristore, pōecu cubebi majicu chĩore ðayu, ũi dajocaquiyeye ayu ũi āmeina teiyede aru ũi oatuvaquiyeye ayu ũi ðaiyede. Pōeva ũpe paivurecabu cūinára coreóvaivu bácvu Jūmenijicui yávaiye méne jāvene Cristorā, aru cūvarivu bácvu Jūmenijicui mearo ðacaiyede náre ũi meadaíye báquede náre aru ũi cure ðaquiyeede náre jāravu cūiméjāravu baquinóre ũque, aru cūvarivu bácvu Jūmenijicui Espĩritu Santoi majicārōre, aru majidivũ bácvu Jūmenijicu ðayure cainumua yópe ũi aiye báquipedeca ũi yávaiyeque, aru jáivu bácvu Jesúre ju aipōeva ne ðaiyede Jūmenijicui paruéque, yópe Jūmenijicu ðacuyure ũi jaroquiyede apevu pōevare ũi curōi aru apevu pōevare toabo cūiméboi. Caiye diede majidivũ bácvu vacari, nárecabu dajocaiyu bácvu ne ju aiye báquede Cristore. Que ðarĩ yópe pēvaiyeye Jūmenijicui mácvure cojedeca jocucujaravena, ne ũbe boje ũre, pōeva ne yurĩnajiyepe aivu, ðadama na.

<sup>7</sup> Que baru jēvarĩ coyurĩ, pōevamu yópe joborōpe. Jūmenijicu ocare ðaibi joborōi. Nore ne jiore pōeva ne memeniburu yóbore aru ne oteiye báque pĩarĩburu yóbore, ũre jēiye méne iñama ina memeipōeva. Que baru Jūmenijicu mearo ðacaibi no joborōre, pōeva ne memeíye boje. <sup>8</sup> Ūbenita no joborōre pōeva ne mememenu, miumenejaiye aru āmecōriámenejaiye máre quéda pĩaiyavu nore jiorojai. No joborō bojecube boje, jēiye cube boje nore, pōeva ne juarĩburu yóbore caiye iye miumenejaiyede aru iye āmecōriámenejaiyede máre dajocadama no jiorojare jocarĩ. Que baru Jūmenijicu āme ðaibi no joborōre, pōeva ne mememe boje. Quédeca Jūmenijicu mearo ðacaibi ũre ju aivure aru nājine ðaibi ũre ju abevure.

**Maja dajocabevu maje ju aiyeede Cristore maje napini  
coreíye boje Jūmenijicui me ðacaquiyede majare**

<sup>9</sup> Muja, jívu, ji ũmara, yu toivacayuvacari nópe paruéque ji coyuiyede, majicacuyũ mujare, ũbenita cārijimevũ yu mujare boje. Quénora coreóvaivu yu ðare nuivure yópe jauépe mujare, Jūmenijicui pōevare, ũi meadaíye báque boje mujare. Ðadavũ yópe mujare jauépe muje memecaiyede Jūmenijicure aru muje cadateiyede apevu pōevare. <sup>10</sup> Cainumua Jūmenijicu mearo ðaibi, yópe ũre jauépe. Que baru jāve ārucuyume muje memecaiyede ũre. Muja cadatedavũ apevu majevu Jesúre ju aipōevare javede aru caride máre. Que teni muje ũede Jūmenijicure jádovadavu. Diede Jūmenijicu ārumetebecuyume cainumua. <sup>11</sup> Ūrarōreca uvũ yu mujare coapa muje memecare nurajiyepe ayu Jūmenijicure torojarivũ, muje cadateíyeque apevure cainumua muje cuede ijáravui. Que ðaivu baru, caiye iye Jūmenijicui mearo ðacaquiyede mujare, muje napini coreiyede, earājaramu muja. <sup>12</sup> Ūbevũ yu mujare jūracrivũ tede nuivure muje jápaiyede Jūmenijicui yávaiyede. Quénora ina ũi yávaiyede jápiarĩ ju aivure tejarā muja. Ina dajocabevupe ne ju aiyeede Jūmenijicure

aru napivupe ne ñájiyede tejara muja. Nápe paivurecabu earáivu caiye iye Jümenijicui mearo ñacaquiyede náre yópe ñi aiyé báquepedeca.

<sup>13-14</sup> Nápe páyurecabe majeñecu mácu Abraham mácu. Javede yópe arejaquemavu Jümenijicu ñi mácu: “Yábu Jümenijicu. Que baru yópe coyuyubu mure jáve. Mure mearo baju ñacacuyumu yu. Aru mipáramena máravivu obedivu baju tenajarama ina máravivu”, arejaquemavu Jümenijicu. Jümenijicui nópe aiyé báquede Abraham mácu, “Jáve baju ñacacuyumu yu nópe ji aiyé báquepedeca”, arejaquemavu. Apecu ñi cube boje parucu Jümenijicu pueno, “Yúvacari jádovacuyumu jávene ‘Jáve baju ñacacuyumu’, ji aiyé báquepedeca”, arejaquemavu ñi. <sup>15</sup> Abraham mácuapūravu napini corede nurejaquemavu Jümenijicui ñacaquiyede yópe ñi aiyé báquepedeca. Aru Jümenijicu vaidé ñarejaquemavu ñi mácu yópe ñi aiyé báquepedeca.

<sup>16</sup> Pōeva “Jáve ñacacuyumu yu” ne aiyede, ne baju pueno baju parucure cainumua jēniavaivubu, ñi jádovaquiyepa aivu jávene ne aiyé báquede. Apecu cubebi yávere nuri majicu, pōecu que aru. Quénora caivu “¿Ñacacuyu bárica yópe ñi aiyepa?” abevuva, coreóvaivubu jáve ñacacuyure caino ñi oainope. <sup>17</sup> Aru quédeca “Jáve ñacacuyumu”, arejaquemavu Jümenijicu, jádovacuyu parurōre ñi coyūno mácarōre. Jümenijicupūravu ye oatuvabebi ñi dápiainore ñi ñaiyuede. Diede coreóvare ñaiyurejaquemavu ina ñi mearo ñacaimara máravivure yópe ñi aiyé báquepe. Que baru, “Yúvacari jádovacuyumu jávene ‘Jáve baju ñacacuyumu’, ji aiyé báquepedeca”, arejaquemavu Jümenijicu.

<sup>18</sup> Jümenijicu “Jáve ñacacuyumu yu”, ñi aiyé ye oatuvaiye buojabevu cainumua. Aru, “Yúvacari jádovacuyumu jávene ‘Jáve baju ñacacuyumu’, ji aiyé báquepedeca”, ñi aiyé máre ye oatuvaiye buojabevu cainumua. Diena ye borocurí buojabebi Jümenijicu. Que baru maja Jümenijicui pōevatamu, cūiná ñajocaivu bávacu caiye maje ámeina teni ñaiyuede aru ñi meadaimara curivu maje ámeina teiyede jaruvarí. Aru torojueque napini corede nuivubu, earáivu Jümenijicui mearo ñacaquiyé jáve bajure majare. <sup>19</sup> Maja napini coreivu diede, parurivubu maje ũmei aru ye ñajocabevu maje ju aiyede Jümenijicure. Que baru ámedaimara tebevū maje ũmei. Yópe sacerdotevare jaboteipōecu bácu ecoiyé báquepe no Jümenijicui cūramicacaje uracaje bácarō apecūravure, nopedeca ñai maje napini coreñajimu ecorejaquemavu cavarō mearo Jümenijicui curōita. <sup>20</sup> Ũrecabe Jesús. Cadatecuyu majare, ecorejaquemavu Jümenijicui curō mearoi maje jipoca. Aru sacerdotevare jaboteipōecu teibi yópe Melquisedei sacerdote teiyé báquepedeca.

**Jesús ñi sacerdotevare jaboteino Melquisedec ñi sacerdote teino mácarōpe**

(He 5.6)

**7** <sup>1</sup> Ũrre ñaquijivu mujare ñai Melquisedede, ñamene aru aipe ñi ñaiyé báquede. Ñai Melquisedec Salem ámicurímarocavu bávacu ne jabocu barejaquemavu. Aru Jümenijicu caivu pueno parucure memecarejaquemavu sacerdotepa. Majeñecu Abraham mácu copaiyede ñi jivu bávacuque ne boarí, vainí turíburu yóbore apecu jabovacavujá mácavure, Abraham mácu copu nuri, jēniarejaquemavu Jümenijicure, ñi mearo ñacaquiyepa ayu Abraham mácu. <sup>2</sup> Aru caiye iye cavede ñi íyá báquede ñi boarí, vainí tuimara mácavure jocarí, caipucapūruape paiyede coavaríburu yóbore,

cūináro iye coavaiye báquecaröre júdejaquemavu Melquisedede Abraham mácu. Nópe đarejaquemavu Melquisedec ũi sacerdote teiye báque boje. No āmiá Melquisedec “jabocu méne đayũ” aiyurõtamu. Aru no āmiá Salem “cārijimeno” aiyurõtamu. Que baru jabocu méne đayũ aru cārijimene đayũ barejaquemavu ñai Melquisedec. <sup>3</sup>Pöecu cubebi yéde coreóvayu Melquisedei pacu bácu borore, aru ũi paco bácu borore, aru ũi ñecuva mácvu ne borore máre. Name majibema ũi pöeteino mácaröra aru ũi yaino mácaröra máre. Que baru Jūmenijicui mácupe páyu sacerdotebe cainumua, ñai Melquisedec.

<sup>4</sup>Me majivu maja ñai Melquisedec maje pueďaimure majeñecu Abraham mácu püeno. Abraham mácu barejaquemavu majeñecu mamacu bácu, maja Israecavu maje pöeyajuboare búyu bácu. Que baru ũi mácu maje pueďaimume. Ũbenita ũi mácuvaru Melquisedede júdejaquemavu no cūináro iye coavaiye báquecarō mearo bajure, ũi íye báquede caipucapũuape paiye coavaiye báquede ũi boarí, vainí tuimara mácvure jocarí, ũi jiquiyepe ayu diede Jūmenijicure.

<sup>5</sup>Aru me majivu maja apevu ina Abraham mácu pāramecu bácu Leví āmicucu bácu pāramenacavu Jūmenijicure memecaipöeva mácvure sacerdotevape. Na mácvurecabu Jūmenijicui jacopuicöjeimara mácvu caivu apevu Israecavu bácvu, majeñecuva mácvure cūináro iye caipucapũuape paiye ne cuvae coavaiyecaröre, yópe Jūmenijicui đaicöjeiyepe ũi coyuiye báquede Moisés bácu. Ina Israecavu bácvu névu bácvuvacari, Abraham mácu pāramena mácvuvacari, ina sacerdoteva bácvu cuvade jacopurejaquemavu na mácvure. <sup>6</sup>Ũbenita Melquisedecapũravu Leví bácu pāramecu āmecuvacari, Abraham mácu, ñai Jūmenijicu “Jāve mearo đacacũũu yu mure”, ũi aimu mácu, jacopurejaquemavu no cūináro iye caipucapũuape paiye ũi cuvae coavaiye báquecaröre, Abraham mácu jíye báquede Melquisedede. Aru Melquisedec jēniarejaquemavu Jūmenijicure, ũi mearo đacaquiyepe ayu Abraham mácu. <sup>7</sup>Caivu pöeva coreóvaivubu iyede: Pueďaimutame ñai jēniañu Jūmenijicui mearo đacaquiyepe ayu apecure ũi jēniacaimu püeno.

<sup>8</sup>Apede máre me majivu maja. Caivu ina sacerdoteva Leví bácu pāramenacavu bácvu barejaquemavu yainájuvu. Ne cuede ijaravu Jūmenijicure memecarí jacopurejaquemavu névu bácvu jíye coapa na mácvure cūináro iye caipucapũuape paiye ne cuvae coavaiyecaröre. Ũbenita caivu ina sacerdoteva bácvure đajocaiye jaurejaquemavu ne memecaiyede, ne yaiye boje. Caivu ina sacerdoteva bácvu ne bucuteni yainíburu yóbore, apevuta ne memecaino mácaröre memecarejaquemavu. Ũbenita Jūmenijicu ũi yáviyede toivaicöjemenejaquemavu Melquisedei yaiye báque borore. Que baru Melquisedecapũravu yaibécupe páyube. <sup>9</sup>Ina sacerdoteva bácvu Leví bácu pāramenacavu bácvu jacopurejaquemavu névu bácvu jíye coapa na mácvure cūináro iye caipucapũuape paiye ne cuvae coavaiyecaröre. Aru Leví bácu Abraham mácu pāramecu barejaquemavu. Que baru Abraham mácu jíye báquede no cūináro coavaiye báquecaröre iye caipucapũuape paiye iye cuve ũi íye báquede ũi boarí, vainí tuimara mácvure jocarí, yópe barejaquemavu Leví bácu máre ũi jíye báquepe. <sup>10</sup>Melquisedei copu nuiye báquede Abraham mácu, Leví bácu Abraham mácu pāramecu bacuyú boje, yópe barejaquemavu Leví bácu

pötebecu bácvacari cáreja, aru caivu avenu Abraham mácuí pāramena mārājivu máre, ne cüepe nēñecu mácuque Jūmenijicuí jáinoi.

<sup>11</sup> Jūmenijicu coyurejaquemavu ũi ðaicōjeiyede Moisés bácuere, Israecavu bácvu ne majinajiyeye ayu aipe ðaiye jauřore na māvavure, boropatebenajivure Jūmenijicuí jáinoi. Que teni Jūmenijicu epedejaquemavu Aarón mácuere aru ũi pāramena māvavure, Leví bácuí pāramenacavu bácvure, ne jīnajiyeye ayu ũre pōeva ne jīcaiyede ne āmeina teiye boje. Ŭbenita ina sacerdoteva bácvu, Aarón mácuĵā, ñamene ye boropatebevu teni jebeni oabedejaquemavu. Que baru caiye iye Jūmenijicuí mearo ðacaiyuede pōevare ye ðabedejaquemavu Jūmenijicu ina sacerdoteva bácvu, Aarón mácuĵaque. Ne boropatebevu teni jebedu pōevare, apecu sacerdote ũi daiye jaubejebu. Ŭbenita apecu sacerdote, Aarón mácupe páyu āmecu quénora Melquisedepe páyu, ũi daiye jauřejaquemavu, ũi boropatebevu teni jebequiyepe aipe pōevare.

<sup>12</sup> A ru apecu sacerdote ũi daiye jaué báque boje, oatuvaiye máre jauřejaquemavu iye ðaicōjeiyede, iyeque pōeva ne majinajiyeye aipe aipe ðaiye jauřore náre, boropatebenajivure Jūmenijicuí jáinoi. <sup>13</sup> űai apecu sacerdote ũi bororā toivaicōjenejaquemavu Jūmenijicu ũi yāvaiyede. Ŭrecabe maje jabocu. Leví bácuí pāramecu āmemi. Quénora apeyajubo pōeyajubocac ũbe ũ. Aru ye pōecu cubebi diyajubocacu sacerdotepe Jūmenijicure memecayu. <sup>14</sup> Me majivu maja maje jabocu Jesucristore Judá bácuí pāramecure. Que baru Judá āmicuriyajubocacu pōetedejaquemavu ũ. Ŭbenita Moisés bácu, ũi coyuiyede sacerdotevarā, ye coyubedejaquemavu diyajubocavu Judá āmicuriyajubocavurā.

<sup>15</sup> Me majivu maja iye ðaicōjeiyede oatuvaiye jauéde apecu sacerdote ñai Melquisedepe páyu ũi daiye báque boje. <sup>16</sup> Jūmenijicu ũre sacerdoteva epedejaquemavu. Ŭbenita nópe ðabedejaquemavu no ðaicōjeino mārārō paruéque, Aarón mácuere aru ũi pāramena māvavure memecaicōjeino mārārō paruéque. Quénora ũi cainũmua cüe paruéque, ũi yaibé boje, Jūmenijicu ũre sacerdoteva epedejaquemavu. <sup>17</sup> Que baru Jūmenijicu ũi yāvaiyede, yópe arī, toivaicōjenejaquemavu:

Cainũmua sacerdote tecuyumu mu dajocabecava, yópe Melquisedec  
ũi sacerdote teiye báquepedeca dajocabecava, arejaquemavu  
Jūmenijicu.

<sup>18</sup> Que teni Jūmenijicu oatuvarejaquemavu “Yópe ðarājare”, ũi aino mārārōde pōevare. Iye ðaicōjeiyeque ũi coyuiye báquede Moisés bácuere pōeva boropatebeni buojabename na. Diedecabu parube aru bojecube máre. Que baru iye javeque ðaicōjeiyede dajocarī jaruvarejaquemavu Jūmenijicu. <sup>19</sup> Pōeva ne cuede Jūmenijicuque yópe náre jauépe eabenama na iye ðaicōjeiyeque. Ŭrarō javvu náre, ne ðaiye majibe boje caiye diede. Ŭbenita iye napini coreniduiye báquede iye mearore maje cuvajuroede Jūmenijicuque dajocarī, ca ride pueno baju napini coreivubu maja iye mearore maje cuvārājiyede Jūmenijicuque. Jūmenijicu napini corede ðaibi majare, maje curājiyepe ayu ũque yópe majare jauépe. Que baru yópe maje joabejīnoi nuiyepe ũi yebai, ũre jēniari eaivubu maja jidubevuvu.

<sup>20</sup> A ru Jūmenijicuí epeiye báquede ñai apecu sacerdoteva, “Jāve ayubu. Jī aipe báquepedeca ðacuyumu”, arejaquemavu ũ. Ŭbenita ũi epeiye báquede

apevu sacerdotevava Leví bácuí páramenacavu bácvure “Jáve ayubu”, abedejaquemavu ũ. <sup>21</sup> Jesucristorecabe Jūmenijicui epeimu mácu sacerdoteva, “Jáve ayubu”, ũi arī coyuiye báqueque. Yópe arī, toivaicōjenejaquemavu:

Maje jabocu Jūmenijicu “Jáve baju đacuyumu yu yópe ji aiye báquepedeca”, aibi ũ. Aru ye oatuvabecube ũ, “Đacuyumu”, ũi arī dápiaiye. Yópe arī, coyubi: “Cainumua sacerdote tecuyumu mu”, arejaquemavu Jūmenijicu Jesucristore.

<sup>22</sup> Jūmenijicu “Jáve ayubu”, ũi aiye báque boje ũi epeiye báquede Jesúre maje sacerdoteva, mearo bajubu yo ũi “Yópe đarājare”, ũi aino mácarō yóbocarō no ũi “Yópe đarājare”, ũi aino mácarō javecarō pueno. Que baru Jesúrecabe jáve đayu caiyede yópe ũre jauépe, maje curājiyepe ayu me Jūmenijicuque.

<sup>23</sup> Aru ũi javecarō aino mácarōque, ina sacerdoteva bácvu Leví bácuí páramenacavu bácvu obedivu barejaquému, ne yaiye boje. Caivu ina sacerdoteva bácvu ne bucuteni yainfburu yóbore, ajevuta ne memecaino mácarōre memec arejaquemavu. Ne yaiye boje, ye memecare nuivu buojabedejaquemavu na mácvu caivu. <sup>24</sup> Ūbenita Jesúcapūravu cubi cainumua, ũi yaibé boje bediōva cojedeca. Apecu ye memecabecube ũi memecaiyede ũi baju memecare nuiye boje cainumua. <sup>25</sup> Que baru cainumua jaubecuva meadayu buojaiibi caivu maja vorī eaiyurivure maje curājiyede me Jūmenijicuque yópe majare jauépe, Jesú cadateiye boje majare, maje cvarājiyepe ayu caiye iye Jūmenijicui mearo đacaquiyede majare. Jesús cubi cainumua, jēniacacuyu Jūmenijicuque majare boje.

<sup>26</sup> Que baru Jesúrecabe űai sacerdotevare jaboteipōecū majare jamu baju. Ūrecabe đayu caiye ũre jauéde, cadatecuyu majare. Ūrecabe meacu baju Jūmenijicui jáinoi aru ye đabecu āmenore, Jūmenijicui ũbenore. Ūrecabe ye āmeno cubecu aru cucū bácvuacari ijaravui āmeina teipōevaque ye āmeina tebecu cainumua. Ūrecabe Jūmenijicui jamuóimu mácu pu cavarō mearoi ũi curōita aru ũi parure đaimu caivu pueno. <sup>27</sup> Apevu sacerdotevare jaboteipōevape páyu āmemi ũ. Ūi āmeina tebe boje, jícaiye jaubevū ũre jícaiye Jūmenijicure ũi baju āmeina teiye boje jāravua coapa yópe apevu sacerdotevare jaboteipōeva bácvu ne đaiye báquepe. Na mácvuapūravu, apenumua jícarī aru apenumua jícaicōjeni apevu sacerdoteva bácvure, jícvarejaquemavu ne jícaiye Jūmenijicure jāravua coapa. Mamamure ne baju āmeina teiye boje aru no yóbore caivu pōeva névu bácvu ne āmeina teiye boje, āimara ne boaimara mácvure juarī jícvarejaquemavu na mácvu. Ūbenita Jesúcapūravu cūinára jícarejaquemavu ũi jícaiye Jūmenijicure caivu pōeva maje āmeina teiye boje. Ūi bajure jícarejaquemavu ũ, ũi yaiye báquede majare boje.

<sup>28</sup> Ūm ũva parubevu bácvurecabu ne ũmei, ne đaiye majibe boje yópe Jūmenijicui ũrōpe, Jūmenijicui epeimara mácvu sacerdotevare jaboteipōevava ũi đaicōjeiyeque ũi coyuiye báquede Moisés bácvure. Na mácvure jaurejaquemavu cāreja, ne đarājiyepe aiye yópe na mácvure jauépe. Ūbenita obediujua yóbore iye đaicōjeiyede đajocarī jaruvacuyu, Jūmenijicu “Jáve baju đacuyumu yu yópe ji aiye báquepedeca”, ũi aino mácarōque, epedejaquemavu mamacure sacerdotevare jaboteipōecūva. Aru űai mamacure ye jaubevū, ũi đaquiyepa aiye yópe ũre jauépe. Que baru ũrecabe cucu yópe ũre jauépe, aru đayu caiyede yópe Jūmenijicui ũrōpe cainumua.

**Jūmenijicu “Que đarājare”, ũi aino pōevare Jesúque pueno mearo ũi que  
aino mácarōre Moisés bácuque**

(He 1.13)

**8** <sup>1</sup>Caiye iye ji toivacaiye mujare yópe aiyrōtamū: Maje sacerdotevare jaboteipōecu cubi, nópe ji coyuiye báquedepedeca javede. Ũrecabe dobacu bácu, jabotecuyū cavarō mearo Jūmenijicui curōi, jīpacu Jūmenijicu paracu caivu pueno ũi dobarō mearo meapūravui. Que baru maje sacerdotevare jaboteipōecu Jesús máre jaboteibi Jūmenijicuque.

<sup>2</sup>Majeñecuva mácavu ne cuede pōecubenoi cuvarejaquemavu náque diñami cūrami ne āimacajeaque ne đaiñami mácarō, iveá cūravea báque Jūmenijicui đaicōjeiye ũi coyuiye báquede Moisés bácu toivainoque ne curiñami mácarō, ne Jūmenijicure mearore jīñami mácarōre. Ũbenita Jesúcapūravu Jūmenijicure memecabebi diñami, pōeva ne đaiñami mácarō jīvui. Quénora ũrecabe sacerdotevare jaboteipōecu Jūmenijicure memecayū cavarō mearo Jūmenijicui curōi. Nore cuvū Jūmenijicure mearore jīñami baju, Jūmenijicuvacari ũi đaiñami. Diñami jívuita Jūmenijicure memecaibi Jesucristo.

<sup>3</sup>Jūmenijicu epedejaquemavu caivu sacerdotevare jaboteipōeva bácvure, ne memecarājiyepe ayū ũre pōevare boje. ũre memecarejaquemavu jīcaivu Jūmenijicure āimara ne boaimara mácvure juaiyede, nácavu aru ne baju máre āmeina teiye boje, ũi nājiye đabequiyepe aivu na mácvure die boje, aru ape jīcaiyeđe máre, pueđarī Jūmenijicure torojuede jīnajivu, ũi cađateiye báque boje na mácvure. Que baru Jesucristore máre, maje sacerdotevare jaboteipōecure, jīcaiye javu Jūmenijicure ũi jīcaiyeđe. <sup>4</sup>Ũi cue boje cavarō mearo Jūmenijicui curōi, nore memecaibi Jūmenijicure majare boje. Ũbenita ũi cucu baru ijaravui, ye sacerdote āmejebu, Jūmenijicui epeiye báque boje apevu ijaravucavu sacerdotevare, ne jīcarājiyepe ayū caiye iye jīcaiyeđe, yópe Jūmenijicui đaicōjeiyepe Leví bácu pāramenacavu bácvure, ũi coyuiye báquede Moisés bácu.

<sup>5</sup>Nácapūravu Jūmenijicure memecarejaquemavu ijaravucadāmi, Jūmenijicure mearore jīñami mácarō jīvui. Ũbenita ne memecaiye báquebu quénora majiēđa ārojaepe pāriduiye Jesúi memecaiyepe cavarō mearo Jūmenijicui curōi. Cūináturu āmevu. Yópe bótaiyeđe pōecu decocu jāve āmepe, nopedeca ijaravucadāmi Jūmenijicure mearore jīñami mácarō jāve āmenejaquemavu. Coreóvaivubu maja caiye cavarō mearo Jūmenijicui curōque jāvene aru ye jaubede, ũbenita caiye ijaravūque jāve āmene aru jauēđe, Jūmenijicui yópe coyuiye báque boje Moisés bácu. Moisés bácu barejaquémavu diñami Jūmenijicure mearore jīñami mácarōre đaicōjecuyū. Aru ũi đaicōjequiye jipocamia, Jūmenijicu, yópe arī, coyurejaquemavu ũi mácu: “Me đajacu mū. Caiye mi đaicōjequiyeđe memeipōevare yure mearore jīñamine đaicōjecacu yópe ārojaepe paiyeđe iye ji jáđovaiye báquede mure no cūracū Sináí āmicuricū puenoi”, arejaquemavu Jūmenijicu.

<sup>6</sup>Ũbenita caride Jesúcapūravu, Jūmenijicui epeimu mácu sacerdoteva, me baju memecaibi apevu sacerdoteva bácvu ne memecaiye báque pueno. Ũi memecaiyebu parué baju ne memecaiye báque pueno. Quédecu iye Jūmenijicu “Que đarājare” arī, ũi yóboque coyuiye báquebu pōevare

Jesúque, me baju ānié “Que đarājare” arī, ũi mamarũmũque coyũie báque pũeno Moisés bácũque. Jũmenijicu “Que đarājare” arī, ũi coyũie báquede Jesúque “Yópe đacacũyũu yũ mũjare”, ũi aye báquebu me baju “Yópe đacacũyũu yũ mũjare”, ũi aye báque pũeno ānié “Que đarājare”, ũi coyũie báquede Moisés bácũque. Moisés bácũque “Mũje āmeina teiyede jarũvacũyũu yũ, mũje đaru yópe ji đaicõjeiyepe”, arejaquemavũ. Ŭbenita Jesúque “Mũje āmeina teiyede jarũvarĩburu yóboi, ye ārũmecũbu yũ diede, mũje ju aru Jesucristoi đacaiye báquede mũjare boje”, arejaquemavũ. Que baru ũi yóboque coyũie báque me bajutamũ ũi mamarũmũque coyũie báque pũeno.

<sup>7</sup> Ānié Jũmenijicu mamarũmũque coyũie báque Moisés bácũque jaũbedu, ape ũi yóboque coyũie báque Jesúque jaũbejebu. <sup>8</sup> Ŭbenita Jũmenijicu járējaquemavũ Israecavũ bácavũre boropateivũpe ne đabe boje yópe “Que đarājare” arī, ũi mamarũmũque coyũie báquepe na mácavũre. Que baru na mácavũre, yópe arī, toivaicõjeneaquemavũ Jũmenijicu:

Yópe aibi maje jabocu Jũmenijicu: “Jápiajarā. Apejāravũa edaquijāravũa baquiyéde bedióva cojedeca ‘Que đarājare’, acũyũu yũ ape coyũie mamae coyũiyede caivu ji põevare, Judá āmicurijayubocavũre aru apevũ Israel bácũ pāramena ne yajuboacavũre máre. <sup>9</sup> Néñecũva mácavũre ‘Que đarājare’ arī, coyũrejacacu yũ no jāravũ bācarõre ji nũvaiye báquede na mácavũre Egipto āmicurijoborõre jocarĩ. Yópe népacũ nũvaiyepe mamarare đũibajĩ, ne pũrũare jēni, nopedeca na mácavũre nũvarejacacu yũ no ocopenibo bācarõque. Ŭbenita ye đabedejaima na mácavũ yópe ‘Que đarājare’ arī, ji aye báquepe. Que baru na mácavũre āmeina jārĩ đajocarejacacu yũ. Iye ji yóboque coyũie ‘Que đarājare’ arī, ānié ji mamarũmũque coyũie báquepe cũinátũrũ āmequiyebu. Nópe ayũbu yũ, Jũmenijicu. <sup>10</sup> Que baru yópe ‘Que đarājare’ arī, coyũcũyũu yũ caivu Israel bácũ pāramena mārājivũ ne yajuboacavũre”, aibi Jũmenijicu. Aru yópe are nũmi maje jabocu Jũmenijicu: “Apejāravũa edaquijāravũa baquiyéde na mārājivũre dāpiare đacũyũu ji đaicõjeiyeda yópe ji epejũroepedeca diede ne ũmei. Aru me coreóvare đacũyũu diede máre yópe ji toivajũroepedeca diede ne ũmedurā, torojũeque ne đarājiyepe ayũ diede. Yũrecabu ne jabocu bacũyũ. Aru nárecabu ji jaboteimara mārājivũ. <sup>11</sup> Dinũmũ maquinóre caivu põeva me majinajarama yũre ne jabocũva. Ina parũbevũ aru ina parũrivũ máre majinajarama yũre ne jabocũva. Que baru ñamene buieye ye jaũbequiyebu ũi imarocavũre aru ũ jinare máre, ne coreóvarājiyepe ayũ yũre ne jabocũva. Põecu cũbecũbe yũre coreóvabecũyũ cāreja. <sup>12</sup> Náre cõmaje āroje jārĩ, jarũvacũyũu yũ ne āmeno đaiyede apevũre. Aru ye dāpiabecũbu diede cojedeca. Aru ārũmetecũyũu yũ caiye ne āmeina teiyede máre”, aibi Jũmenijicu.

<sup>13</sup> Jũmenijicu “Ape coyũie mamae coyũiyede coyũyũbu mũjare” ayũ, aiyũrejaquemavũ ũi jipocaque coyũie báque javeque bajure aru bojecũbede máre. Aru apejĩe javeque tedu aru bojecũbedu máre, maumejiena oatũvaquiyebu.

**Jūmenijicure mearore jínami cavarō mearoi meadami úre mearore jínami  
mácarō pueno ijāravui**  
(Mt 26.28; 27.45)

**9** <sup>1</sup>Mamarumure Jūmenijicu “Que darājare”, ũi coyuiye báquede majeñecuva mácvure Moisés bácuque ðaicōjenejaquemavu na mácvure, ne coreóvarājiyepe ayu aipe ðaiye jauřōre, ne jínajiyepe ayu mearore Jūmenijicure yópe ũi urōpe. Aru ðarejaquemavu ne Jūmenijicure mearore jínami mácarōre ijāravui, jínajivu mearore úre nore, yópe ũi ðaicōjeiye báquepe. <sup>2</sup>Muja coreóvaivubu aipe ārojariñami ðíñami cūrami mácarōre. Ðíñami cūrami ne ðaiñami mácarō āimacajeaque aru cuitótecajeaque ðaiñami mácarō marejaqué mavu. Pucatucubua curiñami mácarō marejaqué mavu. Ðíñami cūrami mácarōre japoporí dabuborí jocuyoaque taitóri núvarejaquemavu majeñecuva mácvu. Cūinátucubu, uratucubu, ne mamarumu ecoitucubu, “meatucubu sacerdoteva ne Jūmenijicure memecaitucubu” āmicuritucubu bácarō marejaqué mavu. Ditucubu bácarō jívui ānjarabo cūinájarabo pēoibua tuojarabo bácarō curejaquemavu. Aru cūináva tuoiva bácarōra āniboa páuboa doce paiboa báque Jūmenijicure ne jíye báque sacerdoteva bácvu ne ārajiye curejaquemavu. <sup>3</sup>Ditucubua pucatucubua coricōpavaitucubua báque barejaqué mavu cuitótecaje bácarōque. Dicaje bácarō ānipūravui apetucubu quíjitucubu bácarō curejaquemavu. “pueno baju meatucubu sacerdotevare jaboteipōecu Jūmenijicure memecaitucubu” āmicuritucubu bácarō marejaqué mavu.

<sup>4</sup>Ānitōcu mumijuede juaitōcu úruque cūmaitōcu mácarō curejaquemavu, meatucubu ne aitucubu bácarō jívui. Ũbenita pueno meatucubu bácarōcatōcu mácarō marejaqué mavu. Ānitōcu adaitōcu jocutōcu úruque cūmaitōcu mácarō jívure aru puenore máre, Jūmenijicu “Que darājare”, ũi coyuiye báquede majeñecuva mácvure ne āruritōcu mácarō curejaquemavu ditucubu quíjitucubu pueno baju meatucubu ne aitucubu bácarō jívui. Ditōcu mácarō jívui ānibu jorobu úruque cūmaibua bácarō curejaquemavu. Ānié āiye báque, maná āmicue, Jūmenijicui jíye báque majeñecuva mácvure ne cue báquede pōecubeno ne ārajiye curibu bácarō curejaquemavu. Aru āniyo abojīyo, Aarón mácu tuturiteiyo bácarō, Jūmenijicui pīarē ðaiyo bácarō, curejaquemavu ditōcu mácarō jívui. Aru ānivea pucavea cūravea Jūmenijicui ðaicōjeiyeque toivaivea báque máre curejaquemavu ditōcu mácarō jívui. <sup>5</sup>Ditōcu mácarō puenora pucarā pēpeimara mácvu querubín āmicurivu ārojariyu, pōeva ne úruque ðaimara mácvu curejaquemavu. Ina querubín āmicurivu caveá curivu bácvu, Jūmenijicuque curivubu cainumua. Caipucaturuvai ditōcu moaino mácarō puenora curejaquemavu na coapa, ne ārurajiyepe aipe Jūmenijicui miadáro mearo curōre. Ne caveáque taorejaquemavu ditōcu moaino mácarōre, sacerdotevare jaboteipōecu bácu bojedacaino Jūmenijicure pōeva ne āmeina teiye boje. Ditōcu moaino mácarō puenora sacerdotevare jaboteipōecu bácu ũi epeino mácarō curejaquemavu āimara ũi boaimara mácvu ne jive báquede, bojedacacuyu Jūmenijicure pōeva ne āmeina teiyede. Ũbenita caride mujare coyuiye jaubevū yure apejiene ðíñamique báquede.

<sup>6</sup>Diñami cūrami mácarō nópe barejaquemavũ. Que baru caijāravũ coapa ditucubũ uratucubũ ne mamarũũ ecoitucubũ bácarōre ecovarejaquemavũ ina sacerdoteva bácvũ, memecarājivũ Jūmenijicure yópe jauépe na mácvũre. <sup>7</sup>Ūbenita ditucubũ quíjítucubũ jívucatucubũ bácarō jívũi ecorejaquemavũ ñai sacerdotevare jaboteipōecu bácu quécũra. Aru ɰjáá coapa cūinájāravũ quénora ecorejaquemavũ ũ mácu. Aru ũi ecoiyede nore, nũvarejaquemavũ jivede, āimara ũi boaimara mácvũ ne jive báquede, jícayũ Jūmenijicure. Ūre jídejaquemavũ iye jive báquede ũi baju āmeina teiye boje aru pōevare boje máre, ne āmeno ðaiye báquede, majibevũva ne baju āmeina teivũre.

<sup>8</sup>Caiye dieque ñai Espíritu Santo coreóvare ðarejaquemavũ pōevare iyede: Ānitucubũa pucatucubũa cue báquede Jūmenijicure mearore jíñami mácarō jívũi, apevũ pōeva sacerdotevare jaboteipōecu āmevũ buojabedejaquemavũ ecoivũ ditucubũ pueno baju meatucubũ bácarō jívũi. <sup>9</sup>Caiye dieque, yópe jáðvainope, coreóvaivũbu maja aipe vaiyede caride. Sacerdoteva bácvũ caiye iye ne jícaiye báqueque Jūmenijicure āimara ne boaimara mácvũre ne juaiye báquede aru apejĩe ne jícaiye báquede máre, ye jáve baju cadatebedejaquemavũ pōevare. Caiye dieque ye “Boropatebevũ yũ”, arĩ dápĩarĩ buojabedejaquemavũ ina Jūmenijicure mearore jívũ bácvũ. <sup>10</sup>Na mácvũcapũravũ quénora ju arejaquemavũ iye ðaicōjeiyede, Jūmenijicui coyũiye báquede Moisés bácvũre, pōeva ne jári buojaiyede, aipe ne āiyede, aipe ne ũcuiyede, aipe ne joaiyede ne cūvede, aru aipe ne cuyaiyede ne bajure máre. Dieque cūrejaquemavũ pōeva Jūmenijicueque pu “Que ðarājare” arĩ, ũi yóboque coyuiyeta.

<sup>11</sup>Ūbenita javede Cristo ðarejaquemavũ. Maje sacerdotevare jaboteipōecube ũ, maje cūvarājīyēpe ayũ caiye iye Jūmenijicui mearo ðacaiye jāvene. Yópe ijāravũcacũ sacerdotevare jaboteipōecu bácu ũi vaiye báquepe no meatucubũ sacerdoteva bácvũ ne Jūmenijicure memecaitucubũ bácarōre, ecocuyũ no pueno baju meatucubũ sacerdotevare jaboteipōecu bácu Jūmenijicure memecaitucubũ bácarōre, nopedeca vaidéjaquemavũ Cristo apetucubũ meatucubũ baji. Ūbenita ditucubũbu parũritucubũ ijāravũcatucubũ pueno baju meatucubũ bácarō pueno. Aru jaubetucubũbu ijāravũcatucubũ pueno baju meatucubũ bácarō pueno. Ditucubũ, Cristoi memecaitucubũ, pōeva ne ðaitucubũ āmevũ. Aru cūedaitucubũ, ijāravũcatucubũ máre āmevũ. <sup>12</sup>Cristo ecorejaquemavũ no tucubũ pueno baju meatucubũre. Ūbenita cabrava bácvũ ne jive báqueque aru oteivescu mamajina mácvũ ne jive báqueque máre ecobedejaquemavũ ũ. Quénora ecorejaquemavũ ũi jive bajuque, jícacuyũ diede Jūmenijicure pōevare boje. Que teni cūinára quénora ecorejaquemavũ. Aru yópe pōecu bojedacarĩ joðeni meaðaiyēpe buoimara mácvũre, nopedeca Cristo bojedacarĩ joðeni meaðarejaquemavũ majare, maje āmeina teiyeque buoimarape tede ðaiye báquede jocarĩ ũi jiveque.

<sup>13</sup>Majeñecuva mácvũ ne jēni jáiye báquede yaiyũ bácu baju bácarōre aru apede ne ðaiye báquede máre Jūmenijicui ũbede, na mácvũ ecoicōjememara marejaquemavũ Jūmenijicure mearore jíñami mácarō jívũi. Ne que ðarĩburu yóboi, sacerdoteva bácvũ jaijédejaquemavũ na mácvũre cabrava bácvũ ne jive báquede apenũmũa, aru oteivescu bácvũ ne jive báquede apenũmũa, aru apenũmũa oteivescuco ne boarĩ juaimo mácoi ũapena

máquede ocoque. Que teni ina sacerdoteva bácvu majeñecuva mácvure buojare ðarejaquemavu jívu mearore Jūmenijicure bediôva cojedeca. Ne baju puenomia boropatebevū barejaquémavu Jūmenijicui jáinore. Ūbenita ne ūmei boropateivū barejaquémavu cāreja. <sup>14</sup>Ūbenita Cristoi jive meiye báque boje ūi yainūmu mácarôre majare boje, pueno baju cadateibi majare Jūmenijicui jáinore. Me jáñume majare Jūmenijicu Jesúi jiveque ūi jáiye báque pueno majare āimara ne boaimara mácvu ne jive báqueque. Nai Espírиту Santo cainūmua cucu parure ðarejaquemavu Cristore, ūi boarí jaruvaicôjequiyepa ayū ūi mauvare ūi bajure. Que baru Jūmenijicure jícaiyepe tedejaquemavu ū. Ye āmeno cubecūva aru jaubecūva ūi baju jícarejaquemavu Jūmenijicure majare boje. Yópe joaiyepe docucūede ocoque, nopedeca Cristo joaiyepe ðaibi maje āmeūmene aru maje dápiaino āmenore maje āmeina teiye boje, “Boropatebevū yu” maje arí dápiarí buojarájiyepe ayū. Iye maje āmeina teiye boje maja coavajurōmaramu Jūmenijicure jaruvārí. Nópe ðacarejaquemavu Cristo majare boje, maje mearore jíní memecarájiyepe ayū ñai Jūmenijicu apucure.

<sup>15</sup>Cristoi yaicáiye báque boje pôevare, Jūmenijicu coyurejaquemavu “Que ðarājare” arí, ūi yóboque coyuiye báquede Cristoque. Que baru Jūmenijicu mearo ðacacuyume caivu maja ūi cutuimara mácvure ū jina mārājivūva. Ina yaivu bácvure Cristoi yaiquíye jipocai máre mearo ðacacuyume ū. Na mácvu ūi mearo ðacaimara marajárama cainūmua yópe “Jāve mearo ðacacuyumu yu mujare”, ūi aye báquepedeca na mácvure. Pôeva ne cūe báquede Jūmenijicu “Que ðarājare” arí, ūi mamarūmūque coyuiye báqueque, boropateivū barejaquémavu Jūmenijicui jáinore ne āmeina teiye boje. Ūbenita Cristoi yaiye báquede, yópe bojedacarí jodeni meadaiyepe tedejaquemavu pôevare maje āmeina teiyeque buoimarape tede ðaiye báquede jaruvārí, Jūmenijicui ārumetequiyepa ayū diede. <sup>16</sup>Yópebu apevu pôeva ne ðaiye: Cūinácū pôecu pôeva ne jápiaiyede coyuru ne āmiāre ina cūvarājivure ūi cūvaede ūi yainíburu yóbore, náre jáðovaiye javu yaíyú bácvure, ne cūvarājiye jipocai ūi cūvaede. <sup>17</sup>Nai coyuyū bácu yaibécū cāreja, ūi coyuiye báque bojecūbevū ina ne āmiāre coyūimara mácvure. Quénora ūi yainíburu yóboita náre bojecūvu ūi coyuiye báque die. <sup>18</sup>Quédecabu Jūmenijicu “Que ðarājare” arí, ūi coyuiyeque. Que baru ānié “Que ðarājare” arí, ūi mamarūmūque coyuiye báquede pôevare Moisés bácuque máre, āimara ne boaimara mácvu ne jive báqueque búrejaquemavu. Aru iye jive cube báque baru, búbejebu die báque.

<sup>19</sup>Mamarūmūre Moisés bácu coyurejaquemavu majeñecuva mácvure caiye iye ðaicôjeiyede Jūmenijicui toivaquino mácarô diveá cūravea báqueda. No yóbore oteivecūva bácvu ne jive báquede ĩni, aru cabrava bácvu ne jive báquede máre ĩni ocoque jōmeni jīvari buojarí jajiédejaquemavu āniyoca paperayoca ūmujuriyoca cāriáiyoca iye ðaicôjeiyeque toivacaiyoca bácarōra aru pôevara máre. Hisopo āmicuricu jocujicu cavabua báquede puyorí buojarí, cuitótēmea jūarimea lana āmicurimea máqueque buorí, ānié jive báque ocoque jōmeni jīvaiye báquede jajiédejaquemavu ū mácu. <sup>20</sup>Aru yópe arejaquemavu: “Jūmenijicu mujare ju aicôjeimi ‘Que ðarājare’ arí, ūi coyuiye báquede, muje ðarājiyepe ayū caiye iye ðaicôjeiyede. Iye jiveque jáðovañūmu yu yópe ūi coyuiye báquepedeca ðaiye jaurôre caivu mujare. Aru ū máre ūi

coyuiye báquepedeca dacuyume ù”, arejaquemavu Moisés bácu. <sup>21</sup> Quédeca diñami cūrami ne Jūmenijicure mearore jīñami mácarōra aru caiye ānié diñamique ne mearore jīyeque báqueda máre āimara ne boaimara mácvu ne jive báquede jajiédejaquemavu Moisés bácu. <sup>22</sup> Jāvetamu yópe coyuiye Jūmenijicui daicōjeiye ūi coyuiye báque Moisés bácu. Ūre cūve ne Jūmenijicure mearore jīyeque báquede ina sacerdoteva bácvu mearore darejaquemavu Jūmenijicui jāinore ne jive báquede jajiéiye báqueque, Jūmenijicure jīnāvū mearore dieque bediōva cojedeca. Aru pūeno baju jive meiye javvū. Jive memenu, Jūmenijicu ye jaruvabeni ārumetebecube pōeva ne āmeina teiyede.

**Jūmenijicu ūi jaruvārī ārumeteino pōvai āmeina teiyede Cristoi yaiye  
báque boje  
(He 1.13)**

<sup>23</sup> Die ijāravūque Jūmenijicure mearore jīñami mácarōque cūve báquede mearore dare daiye jaurejaquemavu majeñecuva mácvu ne ecorī buojārājiyepe aiye no mácarōre, nópe ji jave coyuiye báquepe. Diedecabu quénora majiéda ārojaepe párīduiye iye cavarō mearo Jūmenijicui curōque ūre mearore jīñamique. Cūináturū āmevū. Que baru pūeno baju me jícaiye javvū die cavarō mearo Jūmenijicui curōque cūvede, mearore daquiyepe aiye, pōeva maje ecorī buojārājiyepe aiye nore. <sup>24</sup> Ūbenita Cristocapūravū ecobedejaquemavu diñami cūrami Jūmenijicure mearore jīñami pōeva ne daiñami mácarō. Diñami cūrami mácarō jāve baju āmenejaquemavu. Quénora majiéda ārojaepe párīduiye báquebu āniñami cūrami Jūmenijicure mearore jīñami jāve baju cavarō mearoi curīnamipe. Quénora ecorejaquemavu cavarō mearo Jūmenijicui curō baji. No Jūmenijicu yebai caride cubi, jēniacacuyū Jūmenijicūque majare boje, ūi cadatequiyepe ayū majare. <sup>25</sup> Caijūa coapa maja judiōva maje sacerdotevare jaboteipōecu bácu ecorejaquemavu ditucubū pūeno baju meatucubū ūi Jūmenijicure memecaitucubū bácarō jīvui āimara ūi boaimara mácvu ne jive báqueque, ūbenita ūi baju jive báque āmeque. Ūbenita Cristocapūravū ecovabedejaquemavu pūeno baju meatucubure obedinūma jícuyū ūi bajure. <sup>26</sup> Que teyū bácu baru, Cristo yaijēbu obedinūma Jūmenijicui ijāravure cuedaiye báquemiata. Quénora caride, ijāravure buojaijāravuare, maje curijāravuare, Cristo darejaquemavu ijāravui cūinára, jaruvacuyū āmeina teiyede, Jūmenijicui ārumetequiyepe ayū diede, Cristo ūi bajure ūi boarī jaruvaicōjeiye báquede ūi mauvare.

<sup>27</sup> Jāve caivū pōeva yainājaramu cūinára. Aru jāve maje yainīburu yóboi, Jūmenijicu coyucuyume ārore maje curājīnore jāravū cūimējāravū baquinóre majare coapa, maje daiye boje maje cuede ijāravui. Apevū curājaramu cavarō mearo Jūmenijicui curōi aru apevū curājarama toabo cūiméboi. <sup>28</sup> Aru quédeca jāve ñai Cristo máre yaidéjaquemavu cūinára. Ūi bajure boarī jaruvaicōjenejaquemavu cūinára, jaruvacuyū obedivū pōeva, caivū Jūmenijicure jū aivū, maje āmeina teiyede, Jūmenijicui ārumetequiyepe ayū diede. Aru jāve dacuyume ū ijāravui bediōva cojedeca. Ūbenita maje āmeina teiyede jaruvacudabecuyume, diede ūi jaruvacudaiye báque boje javede. Quénora meadacudacuyume caivū majare, ūre napini coreivure, ūi cūvare daiyede majare caiye iye Jūmenijicui mearo đacaquiyepe ūi pōevare.

**10** <sup>1</sup> Cоуқуқийвұ мұјаре апеде, мұје мајинајиепе ауа аипе тені жауэ бáқuede Jesucristoi yaiye бáқuede. Јūменіјісuі даісōјеіеуі ўі сoууіеуі бáқue Moisés бáсuе ye јáве бaју áмевu. Que baru iye јáве бaјуpe сūнáтuру áмевu. Quénora yópe бóтаіе пōсcуі decocу јáве áмеpe, nopedeca iye даісōјеіеуі máре јáве áмевu. Majiéda áројаеpe пáрдuіебу caіе iye Јūменіјісuі mearo даcaқуіеуі јáве, iye maje сuвақуіеуі. Cūнáтuруrecabu sacerdoteva бáсавu ne јícaіеуі бáқue Јūменіјісuі áмара ne boaimara мáсавuе ne áмеіна teіеуі boје јáравuа coapa, ұжуá coapa, cainumua. Ёбеніта мајеñecuva мáсавu ne Јūменіјісuі јícaіеуі бáқuede yópe ўі даісōјеіеуіеуі, yópe нuри earі бuојabepe Јūменіјісuі yebai, ye boropatebevupe теnі бuојabedejaquemavu, na мáсавuе жаубеде теbe бáқue boје.

<sup>2</sup> Ina пōева Јūменіјісuі mearore јівu бáсавu boropatebevу бáсавu baru Јūменіјісuі јáнoре сūнáра, сūнáро iye јícaіеcarō máсарōque, boropatebeјebu na мáсавu. Aru caіе iye ne јícaіеуі бáқuede Јūменіјісuі дајocaјebu na мáсавu. <sup>3</sup> Ёбеніта quénora áрuре даімара мáсавu барејақуémavу ne áмеіна teіеде iye јícaіеуі бáқueque ұжуá coapa. <sup>4</sup> Oteіvecuva бáсавu ne јiveque aru cabrava бáсавu ne јiveque máре Јūменіјісuі ye јарuвaбені áрumetebecube пōева ne áмеіна teіеде. Que baru diepe paіеуі јícaіеque, пōева boropateіvу cuma cäreja.

<sup>5</sup> Que baru Cristore ўі daіеуі бáқue іјáравuі жаурејақуемavу, ўі јícaқуіеуіеуі аіеуі ўі бaјуpe пōева ne áмеіна teіеуі boје. Aru mamarumу ўі дақуіеуі јіpocare іјáравuі, yópe areјақуемavу јіpacу Јūменіјісuі:

Пōева áмара ne boaimara мáсавuе ne јícaіеде мuре aru ape ne јícaіеде мuре ubevу mu. Ёбеніта yäre пōсcуі бaјуque пōтеде дақуіјівu mu, јі јícaқуіеуіеуі ауа јі бaјуpe мuре. <sup>6</sup> Caride пōева мuре ye torojure дабema ne јícaіеде мuре áмара ne boaimara мáсавu јуарі јарuвaімара мáсавuе, пueдарāјівu мuре, aru ape ne јícaіеде máре, ne áмеіна teіеуі boје. <sup>7</sup> Aru que arіburu yóboі, areјacacу yу: “Mу, јіpacу, Јūменіјісuі, јáјacу. Yui cуvu yу, даcacуyу yópe mі urōpe. Javede nópe arі, toіvaісōјeneјavū mu јі borore áнuјoca paperayoca ўмұјарuјoca cāріáіуoca mі yávaiеque toіvacaiуoca бáсарōque”, areјақуемavу Cristo.

Нópe arі, toіvaісōјeneјақуемavу Јūменіјісuі.

<sup>8</sup> Mamarumure Cristo areјақуемavу јіpacу Јūменіјісuі ubecure пōева ne јícaіеде ўре áмара ne boaimara мáсавuе, aru ape ne јícaіеде ўре, aru ne јícaіеде ўре áмара ne boaimara мáсавu јуарі јарuвaімара мáсавuе, ne пueдарāјіеуіеуі ауа ўре, aru ne јícaіеде ўре ne áмеіна teіеуі boје máре. Caіеуі dieque пōева ye torojure дабema ўре. Que areјақуемavу Cristo Јūменіјісuі, Јūменіјісuі јícaісōјеñу мáсuреca caіеуі iye јícaіеде ўре ўі даісōјеіеуіеуі ўі сoууіеуі бáқuede Moisés бáсuе. <sup>9</sup> Que arіburu yóboі, yópe arі, Cristo areјақуемavу јіpacу Јūменіјісuі: “Jáјacу. Yui cуvu yу, даcacуyу yópe mі urōpe”, areјақуемavу. Que baru Cristo ўі yaіеуі бáқue boје caіеуі ape јícaіеде Јūменіјісuі парubepe jaure darі, boјecubede дарејақуемavу. Quénora Cristo ўі yaіеуі бáқуemiata, Јūменіјісuі јícaіno сūнáрorатamu парuрō boјecurō Јūменіјісuі јáнoре. <sup>10</sup> Jesucristoi yaіеуі бáқue boје yópe Јūменіјісuі urōpe, caіvу маја ўре јu aіvу, boropatebevу Јūменіјісuі јáнoре, yópe нuри eaіеуіеуі бuојаіvубu маја Јūменіјісuі yebai ye жаубеде даімара.

Yópe joaiyepe docucuede ocoque, nopedeca Cristo jaruvarejaquemavu maje âmeina teiyede, ñi bajure ñi boarí jaruvaicôjeiye báquede ñi mavare cûinára.

<sup>11</sup> Maja judíova maje sacerdoteva bácapucapûravu coapa núrivu bácapu ñarejaquemavu ne memecaiye báquede Jûmenijicure jâravua coapa. Aru ye buojabedejaquemavu memeiñu cainumua. Obedinumua cûináturura ne jícáiye báquede Jûmenijicure jícarejaquemavu na mácapu coapa bediôva cojedeca. Ëbenita caiye iye ne jícáiye báqueque Jûmenijicu ye jaruvabeni ârumetebedejaquemavu pôeva ne âmeina teiyede. <sup>12</sup> Ëbenita Cristocapûravu cûinára ñi bajure jícarejaquemavu Jûmenijicure, maje âmeina teiye boje. No ñi jícaino mácarô cûinároque, Jûmenijicu cainumua jaruvarí ârumetecuyume maje âmeina teiyede. Aru ñi bajure jícariñu yóboi, ñi buojaiyede caino ñi memeiñu mácarôre, Cristocapûravu dobarejaquemavu jîpacu Jûmenijicui meapûravui, ñi cûvae boje caiye jîpacui paruéde épe, jabotecuyu caiyede. <sup>13</sup> Caride noi napini coreibi, pu jîpacu Jûmenijicui epeiyea ñi mavare ñi cûboba câchinoi, náre vainí turí jabotecuyu. <sup>14</sup> Que baru cûinára ñi bajure jícaino mácarôque cainumua ye jaubede ñarejaquemavu caivu maja ñi boropatebede ñaimarare Jûmenijicui jáinore, ñi jipocateimarare Jûmenijicu yebai.

<sup>15</sup> Aru ñai Espíritu Santo máre, yópe arí, diede ju arí, toivaicôjenejaquemavu:

<sup>16</sup> Yópe aibi maje jabocu Jûmenijicu: “ ‘Que ñarâjare’, arí coyucuyumu yu Israel bácu pâramena márajivu ne yajuboacavure apejâravua edaquijâravua baquiyéde. Na márajivure me coreóvare ñacuyumu yu ji ñaicôjeiye yópe ji epejuroepedeca diede ne ñmedurâ. Aru na márajivure dápiare ñacuyumu diede yópe ji toivajuroepedeca diede ne ñmei”, aibi Jûmenijicu.

<sup>17</sup> Aru que aríburu yóboi, yópe are ñurejaquemavu maje jabocu Jûmenijicu: Jáve ârumetecuyumu yu caiye ne âmeina teiyede. Aru jaruvacuyumu yu ne âmeno ñaiyede ajevure. Aru ye dápiabecubu diede cojedeca, aibi Jûmenijicu, arejaquemavu ñai Espíritu Santo.

<sup>18</sup> Que baru Jûmenijicu ñi ârumeteiye boje maje âmeina teiyede aru maje âmeno ñaiyede ajevure, ye jaubevu bediôva cojedeca sacerdotevare ne jícáiye ére. Áimara ne boaimara mácapure o apejîene máre ye jaubebu caride, maje âmeina teiye boje.

**Jûmenijicu yebai yópe ñuri eaiyepe maje napini coreiyede maje baju parure ñarí maje ñmei ñure ñurajare**

(Mt 27.51; Mr 15.38; Lc 23.45; Ro 12.19; He 13.20)

<sup>19</sup> Jesucristo jáve memecaibi Jûmenijicure cavarô mearoi majare boje. Que baru muja, jîvu, Jesúre ju aivu caride jidubevua buojaivubu boroteivu maja Jûmenijicu bajuque, yópe maje ecoiyepe no curô pueno mearo, cavarô mearo Jûmenijicui curô. Nópe buojaivubu Jesúi jaruvaiye báque boje caiye maje âmeina teiyede ñi jive meiyé báque boje ñi yainumu mácarôre. <sup>20</sup> Yópe ñai sacerdotevare jaboteipôecu bácu ñi ecoiye báquepe no pueno baju meatucubu bácarô jîvui ánicaje coricôpavaicaje bácarôre ñi vaiye báque boje, nopedeca Jesúi yaiye báque boje ecoivupe teivubu maja Jûmenijicu yebai. Que baru

dicaje bácarō corica baji jadeni nurejavūya Jesúi yainumu mácarōre. Que teni Jesucristo nuimape tedejaquemavu, yópe maje nuri eari buojarājiyepe ayu Jūmenijicu yebai. Jipocare ũi yebai ye nuri eaiyepe buojabedejavū maja. Ũbenita caride Jesucristo yópe nuri eari buojare ðaibi majare Jūmenijicu yebai. Que baru, “¿Nuri eari buojarājidica?” abevūva, jāve majivu maja boroteni buojaivure Jūmenijicu bajuque. <sup>21</sup>Aru Jesucristorecabe maja Jūmenijicui pōeva maje sacerdotevare jaboteipōecu, majare jări coreyu yópe cūrami upacui jări coreiyepe ũi cūramicavure. <sup>22</sup>Ũi yaiye báque boje majare boje, yópe joaiyepe docucuede ocoque, nopedeca maje āmeūmene, maje dāpiaino āmenore, aru maje ðaiye āmene máre joaimara mácavure paivubu maja, boropatebevu Jūmenijicui jāinore. Que baru Jūmenijicuque borotenaarevu pucaūmea cubevūva aru maje ju aiyede ũre dajocabevūva.

<sup>23</sup>Coreóvaivubu maja Jūmenijicu jāve ðayure yópe ũi aiyē báquepedeca cainumua. Que baru paruéque Jesúre ju are nurajarevu yópe maje ju aiyē báquepedeca mamarumure. Aru ye “Jūmenijicu ðabecube yópe ũi aiyē báquepe” abevūva, napini corenarevu Jūmenijicui ðacaquiyede caiye iye mearore yópe “Jāve mearo ðacacuyumu yu mujare”, ũi aiyē báquepedeca. <sup>24</sup>Tororurivu ðaiyurājarevu yópe majare jaurōpe pueno méne nure ðare nurajivu maje baju maje ũmei, cadatenajivu majacavure, aru urājivu majacavure, mearo ðarājivu náre máre. <sup>25</sup>Apevu mujacavu dajocadama ne cójijivaiye báquede apevu Jesúre ju aipōevaque. Ũbenita nópe ðaiye meamevu náre. Quénora cójijnajarevu maja, parure ðarājivu majacavu ne ju aiyede Jesucristore. Joabejīnotamu ānījāravu baquinó maje jabocu Jesucristoi coyūquiyede árore maje curājinore jāravu cūiméjāravu baquinóre, cavarō mearoi o toabo cūiméboi, maje ðaiye boje maje cuede ijāravūi. Que baru pueno baju parure ðarājarevu majacavu ne ũmene.

<sup>26</sup>Parure ðabevu baru majacavu ne ũmene, bediōva cojedeca āmeina tévarānuvaje bu maja. Āmeina tede nuivu baru, coreóvaivuvacari Jūmenijicui yāvaiyede jāvene, ye Jūmenijicure jícayede cuvabejebu maja, maje āmeina teiye boje. <sup>27</sup>Quénora coreiye jaujebu majacavu āmeina tede nuivure Jūmenijicui nājine ðaquiyede náre. Jūmenijicu nājine ðacuyume caivu ũi mauvare, ina náre jaboteicōjemevu ũre, ne bíjarājiyepe ayu ũre jocarí no toabo urabo āmebo cūiméboque. <sup>28</sup>Ácu pōecu Jūmenijicure puedabecava ju abecu bácu ũi ðaicōjeiyede ũi coyuiye báquede Moisés bácuře jāve nājinejaquemavu. Pucarā o yóbecurā majidivu bácvu apescu ju abe báquede Jūmenijicui ðaicōjeiyede ne boro coyurí ðaiyede ũre, cōmaje āroje jāmevūva boarí jaruvarejaquemavu ñai ju abecu bácuře. <sup>29</sup>Que baru pueno urarō baju nājicuyume ñai āmeina jānu Jūmenijicui mácuře.

Ũre puedabecava ju abedu, “Jūmenijicui mácu āmemi” ayu, pōeva ne jápiayede, yópebu jaruvaiyepe ũre. Pueno urarō baju nājicuyume ñai “Ye baju āmevu. Ye bojecubevu” ayu, Jūmenijicui mácu jive meiyede ũi yaiye báquede, Jūmenijicui coyūquiyepē ayu pōevare apeno “Que ðarājare”, ũi coyuiye yóboquede. Jesucristoi jiveque joaimara mácavure paivubu caivu ũre ju aivu boropatebevu Jūmenijicui jāinore. Ũbenita ñai “Ũi jivebu caivu apevu ne jivepe” ayu, joaimure āmemi aru boropateyube. Que baru pueno urarō baju nājicuyume. Aru pueno urarō baju nājicuyume ñai āmeina yāvayū ñai Espírítu Santore, “Abujucu paruéque pōeva ne ðarí majibede ðarejaquemavu Jesús” ayu, Jūmenijicui mearo ðacare ðaimure bojecubeda ũ jinare, ũi ne boje náre.

<sup>30</sup> Coreóvaivubu maja jāve nájicnyure maje jabocu Jūmenijicu ūi yópe aiye báque boje: “Yūrecabu nájine đacnyu ina āmeina đaiyu bācavure apevure. Yávacari bojedare đacnyumu náre no boje yo āmeno ne đaino mácarōre”, arejaquemavu. Aru yópe arī, toivaicōjenejaquemavu: “Maje jabocu Jūmenijicu coynnyume ūi pōevare nájije jaūrōre o nájije jaubede náre coapa ne đaiye báque boje ijaravui”, arī toivaicōjenejaquemavu ū. <sup>31</sup> Nái Jūmenijicu apnyu “Nájicnyumu mny”, ūi coynmu mácu curu, jidojarō baju bájebu ūre. Que baru pueno baju parure đarājarevu majacavu ne ūmene.

<sup>32</sup> Ārumetebejarā muja aipe muje cue báquede javede muje coreóvarīburu yóji boi Jūmenijicu yávaiye méne jāvene Cristorā, ūi meadaiyede majare. Dinumu mácarōre urarō nájimore napini nuavya muja. Ūbenita dajocabevuva ye vaini turī numeteavūya muja. <sup>33</sup> Apenumua mujacavūque nūri yóvavūya muja náre, pōeva Jesúre ju abevu ne āmeina yávaiyede náre caivu ne jápaiyede aru ne āmeno đaiyede náre caivu ne jáiyede máre. Aru apenumua mujare máre āmeina yávavūya caivu ne jápaiyede aru āmeno đávūya caivu ne jáiyede máre.

<sup>34</sup> Mujacavu jabova ne buoimarare cōmaje āroje jári, cadateivu bateávūya muja, muje jiyede náre jauéde. Náque nájivu bateávūya muja. Muje ju aiye boje Jesúre, ina muje mauva jēni nuvari muje cūvaede, muja ne ĩcaimaravacari napivu bateávūya chíomevūva. Quénora torojure nuivu bateávūya, muje coreóvaiye boje cūvarivure caiye iye mearore Jūmenijicu jíquiyede mujare cavarō mearo ūi curōi, yópe ūi aiye báquepedeca. Aru iye Jūmenijicu mearo đacaiye bojecue bajubu ijaravūque pueno aru cūimétamu máre.

<sup>35</sup> Que baru yópe muje ju aiye báquepedeca Jesúre ju are nuvara muja jidubevuva. Aru urarō mearo bojedainore earājaramu muja. <sup>36</sup> Muje nájiyede, napiye jauédecabu mujare, muje ju arājiyepe aiye Jesúre yópe Jūmenijicu urōpe. Que teni earājaramu iye mearore ūi đacaquiyede mujare yópe ūi aiye báquepedeca. <sup>37</sup> Yópe arī, Jūmenijicu toivaicōjenejaquemavu Cristorā:

Maumejiena nái đacnyu đacnyume. Joe corebecube ū. <sup>38</sup> Aru ina ji boropatebede đaimara mácavu ne ju aiye boje yure, apurājivubu cainumua. Que baru coatede đabemara mārājivubu na yure jaruvarī. Ūbenita apecu nácacu ūi dajocarū ūi ju aiye báquede yure, ye torojubecubu yu ūque, arejaquemavu Jūmenijicu.

<sup>39</sup> Ūbenita majarecabu ye dajocaiyu āmevu maje ju aiyede. Que baru coatede đaimarape bījabenamu Jūmenijicure jocarī. Quénora Jūmenijicure ju are nuri ūi meadaimaratamu maja, cūvarājivu caiye iye mearore ūi đacaquiyede majare.

### Pōeva ne ju aiye Jūmenijicure

(Ro 4.17-22; He 13.14)

**11** <sup>1</sup> Jūmenijicure ju aivurecabu jāve majidivu eare đaimara mārājivure iye maje napini coreiyede, maje cūvarājiyede méne Jūmenijicuque, cūvabevuvacari cāreja diede. Me majidivubu iye maje jámene cāreja jāve bajure, aru vaiquiyede jámevuvacari cāreja diede. <sup>2</sup> Jūmenijicu me járejaquemavu majeñecuva mácavure ne ju aiye báque boje ūre. Aru cadatedejaquemavu na mácavure ūi đaiye báquede pōeva ne đarī majibede.

<sup>3</sup> Maje ju aiye boje Jūmenijicure, coreóvaivubu cuedayū bācure ijaravure aru caiye ijaravūquede ūi yávaiye paruéque. Que baru caiye iye maje jári buojaiyede cuedarejaquemavu ū maje jári buojabeque.

<sup>4</sup> Abel bácu ùi ju aiye báque boje Jūmenijicure, jídejaquemavu ānié jícaiye mearore Jūmenijicui jáinore Caín mácu jícaiye pueno. Mearore jídejaquemavu Jūmenijicure Caín mácu yópe ùi urópe. Ūbenita mearore jídejaquemavu Jūmenijicure Abel bácu yópe Jūmenijicui urópe. Que baru Jūmenijicu “Boropatebecubu m̄u ji jáinore”, arejaquemavu Abel bácu. Aru jacopurejaquemavu ùi jícaiye ùre. Abel bácu yayú bácuvacari, majare coreóvare ðaibi caride aipe ðaiye jauróre majare maje mearore jíyede Jūmenijicure, ùi ju aiye báque boje ùre.

<sup>5</sup> Enoc ùi ju aiye báque boje Jūmenijicure, yaibédejaquemavu ù. Quénora apucureca ùre nūvarejaquemavu Jūmenijicu Paraíso āmicurōi. Que baru Enoc cubedejaquemavu cojedeca ijāravui. Aru Jūmenijicu ùi nūvaquiye jipocai Enore, yópe arejaquemavu ùi borore: “Yure torojure ðayube ū” arejaquemavu Jūmenijicu, yópe Moisés bácu toivaquiye báquepedeca obediūna yóbore. <sup>6</sup> Pōecu ju abecu baru Jūmenijicure, ye buojabebi torojure ðayu ùre. Ácu pōecu yópe nuri eaiyuepe Jūmenijicu yebai, cuiyucu me éque, borotecuyu ùre, ñai pōecure ju aiye javu Jūmenijicu cucure aru me bojedayure caivu ina ùre voivure, ùi cadatequiyepe aiye náre ne jēniayede éque.

<sup>7</sup> Noé mácu ùi ju aiye báque boje Jūmenijicure, jiaðocū uracū cūrami curicūre ðarejaquemavu yópe Jūmenijicui coyuiye báquepedeca ū mácu, meaðacuyu ū ji na mácvure muiváibore jocarī. Jūmenijicu coreóvare ðarejaquemavu ū mácu ānié āmene vaiquíye báquede, ānié jáme máquede cāreja. Aru Noé máccupūravu jápiarī aðarī ju arejaquemavu ùre. Ūbenita ijāravucavu Jūmenijicure ju abevu bácvu Noé mácu jápiarī aðabeni ju abedejaquemavu ū mácu. Que baru Jūmenijicui ñājine ðarājimara marejaquemavu na mácvu. Ūbenita Noé mácu “Boropatebecubu m̄u ji jáinore”, arejaquemavu Jūmenijicu, ùi ju aiye báque boje ùre.

<sup>8</sup> Abraham mácu ùi ju aiye báque boje Jūmenijicure, etarejaquemavu ùi joboróre jocarī, nucuyu apejoborōita, yópe Jūmenijicui coyuiye báquepedeca ū mácu. Jūmenijicu ū mácu cuturī ū jicu bacuyáva, “Mi apeno curō mi cuquinore mure jáðovacuyumu yu”, ùi aiye báquede ū mácu, árore ùi nuquinore majibecuvacari, ju arī etarī nurejaquemavu ū, Abraham mácu.

<sup>9</sup> Ūi ju aiye báque boje Jūmenijicure, curejaquemavu no joborō Jūmenijicui jíquijoborōi ùi pāramena mārājivure, yópe dijoborōcavu ānevū ne cūepe. Abraham mácu ū jinaque, cuivu bácvu, ùi mácu, Isaac bácu, aru ùi pāramecu, Jacob bácu máre, curejaquemavu āniāmia cūramia āimapodaque ðaiāmia máque jívu. Aru na mácvu máre, Isaac bácu aru Jacob bácu, Jūmenijicu “Mearo ðacacuyumu yu mure”, ùi coyumara marejaquemavu na mácvu coapa. <sup>10</sup> Abraham mácu napini coredejaquemavu ùi cuquiye no ĩmaro cūiméno Jūmenijicui cainumua curiīmaroi. Jūmenijicurecabe dápiayu bácu aipe ārojaru maquinóre diīmarore aru ðayu bácu máre diīmarore.

<sup>11</sup> Abraham mácu ju aiye báque boje Jūmenijicure, parure ðarejaquemavu Jūmenijicu ū mácu ùi juedocuvaiyepe ayu. Bucucu baju bácuvacari ū mácu aru jímarepaco Sara báco juedoeabeco bácovacari ō máco, na mácvure juedocuvare ðarejaquemavu Jūmenijicu. Abraham máccupūravu “Jāve Jūmenijicu ðacuyume yópe ùi aiye báquepedeca”, arī dápiarejaquemavu ùi ju aiye Jūmenijicure ðajocabecuva. <sup>12</sup> Que baru ùi juedocuvajuroróre juedocuvai buojabecu bácu yayú bácu bajupe cuvacu bácuvacari, obediū

baju ũi pāramena cuma caride. Abiácovape obedivũ teni, ēpayabeape obedivũ máre tedama na, Abraham mácuĩ pāramena.

<sup>13</sup>Caivũ ina pōeva mácvũ jũ arejaquemavũ Jũmenijicure, pũ ne yaiyeta dajocabevũva. Eabedejaquemavũ cāreja ānié Jũmenijicui jĩquiye báquede yópe ũi aipe báquepedeca na mácvure. Obediũjua Jũmenijicui mearore jĩquiye jipocai, coreóvarejaquemavũ na mácvũ Jũmenijicu jāve jĩcũyure. Que baru torojurejaquemavũ iye vaiquiye boje yópe Jũmenijicui aipe báquepedeca. Coreóvarejaquemavũ aipe paiye na mácvũ ne cuede. “Apenoacavũ curivũbu maja. Maje joborõre jocarĩ dajocaivũbu maja”, are nuivũ barejaquémavũ na mácvũ. <sup>14</sup>Pōeva diepe paiyede aivũ jāve vore nuivũbu, earājivũ apeno curõre, ne curājĩnõre. <sup>15</sup>Na mácvũ ārurivũ baru ne curõ mácarõre, copainuivũ buojajebu na mácvũ nore. <sup>16</sup>Ubenita quénora apeno curõ pũeno mearo curõ cavarõ mearo Jũmenijicui curõre, ne pũeno torojurājĩye boje nore, urĩ, vorĩ, napini coredejaquemavũ na mácvũ. Jũmenijicu no ĩmaro mearore meadacarejaquemavũ na mácvure. Que teni jáđovarejaquemavũ cũyebecũva jaboteyũ na mácvure. Aru ne mearore jĩmũ cũyebedejaquemavũ ũ.

<sup>17-18</sup>Abraham mácu ũi jũ aipe báque boje Jũmenijicure, nuvarejaquemavũ mamacu Isaac bácu juarĩ jicarĩducũyũ ũ mácu Jũmenijicure. Jũmenijicu Abraham mácu juarĩ jicaicõjenejaquemavũ ũi mácu baju cũinácure, Jũmenijicui majiyũ boje aipe ārojaene Abraham mácu jũ aiyede ũre. Abraham mácuĩ jáđovaquiyepẽ ayũ aipe ārojaene ũi jũ aiyede Jũmenijicure, “Quévũra ina Isaai pāramena marajárama mipāramena baju”, Jũmenijicu ayũ bácvacari, Abraham mácu Isaac bácu juarĩ jĩcacũyũ barĩdurejaquemavũ Jũmenijicure. <sup>19</sup>Yópe arĩ, “Jĩmacure ji boarĩ jarũvarũ, Jũmenijicu nacovañũ buojaibĩ ũre yainore jarũvarĩ”, arĩ dápiarejaquemavũ Abraham mácu. Isaac bácu jĩpacu bácuĩ boarĩ jarũvajũromũ mácu barejaquémavũ. Que baru yópe nacovaimũpẽ páyũ barejaquémavũ yainore jarũvarĩ. Aru caiye dieque coreóvare ðaibĩ majare Jũmenijicu nacovañũre yaijũrorivũre yainore jarũvarĩ.

<sup>20</sup>Isaac bácu ũi jũ aipe báque boje Jũmenijicure, ũi yaiquiye jipocamia jēniarejaquemavũ Jũmenijicui mearo ðacaquiyede mamara pũcarāre, Jacob bácu aru Esaú bácu máre.

<sup>21</sup>Jacob bácu ũi jũ aipe báque boje Jũmenijicure, ũi yaiquiye jipojĩcai, jēniarejaquemavũ Jũmenijicui mearo ðacaquiyede mamacu José bácuĩ mára pũcarāre. No jipocai tutayũ bácvacari ũi tuturiteiyorā ũi parũbe boje, mearore jĩcũyũ Jũmenijicure, parũéque jēniarejaquemavũ iye mearo ðacaquiyede ĩmacu bácu jĩbcu bácu pũeno, José bácu oatuvaiyurĩduyũ bácvacari ũi nópe ðaie báquede.

<sup>22</sup>José bácu ũi jũ aipe báque boje Jũmenijicure, coyũrejaquemavũ Israel bácuĩ pāramena márajivũ ne etarājĩyede Egipto āmicurijoborõre jocarĩ. Aru nuvaicõjenejaquemavũ ũi cũa máquede, ne jarũvarājĩyepẽ ayũ diede cũracobei ne copainurajiyede Canaán āmicurijoborõĩ.

<sup>23</sup>Moisés bácuĩ bucũva bácvũ ne jũ aipe báque boje Jũmenijicure, yavedejaquemavũ ũ mácu ne cũrami jĩvũ yóbecurā aviávare ũi pōetenĩburu yóboi. Nópe ðarejaquemavũ ñai jũedocũ meajicu baju boje aru na mácvũ ne jidũbe boje Egipto āmicurijoborõcavũ ne jabocu bácu Faraón mácu.

Jidubedejaquemavu ũi nájine dájuroede na mácvure, ne dabe báque boje yópe ũi boarí jaruvaicójeiye báquede jipocare Israel bácuí pāramena ne jueдова ũmuvare.

<sup>24</sup> Moisés bácu ũi ju aiyé báque boje Jūmenijicure, bucucu teyure ubedejaquemavu pōeva “Nai jabocu Faraón ũi mácoi bucúvaimume ũ, Moisés”, ne aiyede ũra. <sup>25</sup> Quénora ina Egiptocavu ne yebacavu, ũi pōeva, Jūmenijicui pōeva, ina judíovaque, nájiyurejaquemavu Moisés bácu. Egiptocavu ne jēneboi torojucu me cucu bácu baru ijāravuque ũreque, Jūmenijicui ũrópe dabejebu. Quénora coateni Jūmenijicure jaruvarí, āmeina tejebu. Aru obebenuuara torojuebu ũ mácu. <sup>26</sup> Ũi dāpiainope pueno baju bojecurō marejaquémau nájicuyure pōeva ne āmeina yávaiyede ũ mácvure, ũi coreóvayie boje Jūmenijicui daroquimure, Cristore, ũi pōeva, ina yebacavucavu ne pāramecu bacuyáre. Que baru ina yebacavu bácvuque nájini, cadateni, meadaiyurejaquemavu Moisés bácu. Aru caiye ānié cūvaede, Egiptoque me bajure, ũbeni jaruvarejaquemavu. Nópe darejaquemavu ũi napini coreiye boje caiye iye mearore Jūmenijicu jícuyure ũ mácvure.

<sup>27</sup> Moisés bácu ũi ju aiyé báque boje Jūmenijicure, etarejaquemavu Egipto āmicurijoborōre jocarí. Nai jabocu bácu Faraón mácuí jaraimu mácvacarita etarí nurejaquemavu Moisés bácu, jidubecuva. Ũ mácu yópe jáñupe barejaquémau nai Jūmenijicure, pōeva ne jámemure. Que baru ũi ju aiyede ũre dajocabecuva, etarí nurejaquemavu.

<sup>28</sup> Ũi ju aiyé báque boje Jūmenijicure, ina Israel bácuí pāramena mácvure jajiéicōjenejaquemavu ovejava mamajina ne boaimara mácvui jivede ne jedevacobea puenora aru caipucapūravuai, ángele boarí jaruvabequiyepé ayu diñamia cūamiacavure. Nai ángele Jūmenijicui daroimu mácu barejaquémau, boarí jaruvacuyu caivu ũmva ina mamarumu pōteivu curivure Egiptoi, jivede cuvabevva ne jedevacobea yebai. Ũbenita ina Israel bácuí pāramena mácvu ye āmedabemara marejaquémau. Aru Moisés bácuí ju aiyé báque boje Jūmenijicure, Pascua āmicurō torojuve teinore búrī, oveja jiaruare bucure daiye cube páuque āri torojuve teicōjenejaquemavu ina Israel bácuí pāramenare ũjuá coapa cainnuma.

<sup>29</sup> Ina Israel bácuí pāramena mácvu etaivu bácvu Egiptore jocarí Moisés bácuque ne ju aiyé báque boje Jūmenijicure, joborōi vaivárí jatarejaquemavu no Jūariya āmicuriya jia urada curō mácarō coricare. Ũbenita ne yóbore ina Egiptocavu jataiyuríduivu bácvu nápe, ina Israecavu bácvupe, corí nuri yaidéjaquemavu na mácvu.

<sup>30</sup> Israel bácuí pāramena mácvu ecoivu bácvu Canaán āmicurijoborōi ne ju aiyé báque boje Jūmenijicure, Jūmenijicu ture darejaquemavu Jericó āmicuriimaro biaido parurido bácarōre. Siete paijāravua baju na mácvu ne tarabuteni jacoturíburu yóbore diimaro jedevare turejaquemavu no biaido parurido bácarō.

<sup>31</sup> Rahab báco, nomió ōi baju bojedado ũmuvare āmenore dādo báco náque, ōi ju aiyé báque boje Jūmenijicure, yaibédejaquemavu ina Israecavu bácvu ne boarí jaruvaiyede apevu ōi curōcavu bácvu Jūmenijicure ju abevure. Ne meadaimo máco barejaquémau ōi torojurí me jacyurí cadateiye báque boje ina Israecavu bácvu pucarā ne jabocui daroimara mácvu jārī coreóvarājivure yavenina aipe ārojarore diimaro mácarōre.

<sup>32</sup> Coyurí buojajebu yu apevu obedivu Jūmenijicure ju aipōeva mácvure. Apejāravua yure curí cojióru, na mácvu ne borore coyuebu mujare.

Coyujebu Gedeón mácuí ðaiye báquede, Barac bácuí ðaiye báquede, Sansón mácuí ðaiye báquede, aru Jefté bácuí ðaiye báquede; aru David bácu Samuel mácumaque ne ðaiye báquede; aru apevu ánina Jūmenijicui yáviayede coyucaipōeva mácavu ne ðaiye báquede máre, ne ju aiye báque boje Jūmenijicure. <sup>33</sup>Nácavu bácvu aru apevu Jūmenijicure ju aivu bácvu máre pōeva ũre ne ðarī majibede ðarejaquemavu, ne ju aiye báque boje Jūmenijicure. Nácavu bácvu boarī, vainí turejaquemavu apenoa joborōacavu, ádamatenanũivu bácvure na mácvuque. Nácavu bácvu me jabotedejaquemavu pōevare, ne ðarājiyepe aivu mearo ne baju. Nácavu bácvu jēniarejaquemavu Jūmenijicure, ũi cadatequiyepe aivu na mácvure. Aru ũ cadatedejaquemavu caivu ina mácvure, yópe ũi aiye báquedepedeca. Nácavu bácvu biede ðarejaquemavu áimara jijecurivu, león ámicurivu, yavipe paivu ne jijecamure, ne ámenajiyepe aivu na mácvure. <sup>34</sup>Nácavu bácvu jabova ne jaruvaicōjeimara mácvuvacari toabo ũrabo ámebo jívui, éimara ámenejaquemavu. Dupini nurejaquemavu, apevu ne totarī boarī jaruvabenajiyepe aivu nácavu bácvure boaicaroveque. Nácavu bácvu parubevu bácvure parure ðarejaquemavu Jūmenijicu. Churarava parurivu tedejaquemavu nácavu bácvu. Aru nácavu bácvu apenoa joborōacavu bácvu ne ñavaranyiyede ne oteiye báquede jēiyede aru ne oteiáimarare máre, ina ñavaivu bácvure cunjurī copaide ðarejaquemavu ne joborōita. Nópe ðarejaquemavu na mácvu ne ju aiye báque boje Jūmenijicure. <sup>35</sup>Aru nácavu nomiva mácvu máre jacopurejaquemavu apurivure cojedeca névu yaivu bácvu Jūmenijicui nacovaimarare. Apevu nácavu bácvu jabova ne bñoimara mácvu barejaquémavu, ne ju aiye báque boje Jūmenijicure. Ina jabova bácvu churarava bácvure pare jara popeicōjenejaquemavu na mácvure. Que teni, “Muje ju abedu Jūmenijicure, jaetovarājaramu mujare”, arĩdurejaquemavu na mácvure ina jabova bácvu. Ũbenita ina Jūmenijicure ju aivu bácvu ye ju abevuva tedejaquemavu cainumua. Quénora ina jabova bácvure boarī jaruvaicōjenejaquemavu na mácvure, nacajarajivu yainore jaruvarī apurivu cojedeca aru curājivu pueno baju me cavarō mearo Jūmenijicui curōi. <sup>36</sup>Apevu nácavu bácvure yurini, jara popedejaquemavu. Aru apevu bácvu pueno baju ñájivure tãumeaque buorī ñavarejaquemavu ámeina teivure jēni jacoĩnami. <sup>37</sup>Apevu bácvure cūraboaque ducarī boarī jaruvarejaquemavu. Apevu bácvure jocuburaiveque coriburarī boarī jaruvarejaquemavu. Aru apevu bácvure boaicaroveque totarī boarī jaruvarejaquemavu. Nópe ðarejaquemavu, na mácvare ju abevuva teni ðarĩdurājivu Jūmenijicure. Nácavu bácvu cuitótecajea cubevva dorejaquemavu oveja podaqué ðaicajede o cabra podaqué ðaicajede. Aru na mácvu cūramia cuvabevuva vaivárejaquemavu apenoita apenore jocarī, ne curijoborōre cuvabevuva. Cũve cuvabevu baju, áiyede ye cuvabedejaquemavu. Pare ñájivu baju barejaquémavu. Aru apevu ne ámeno ðaimara marejaquémavu. <sup>38</sup>Caivu na mácvu, Jūmenijicure ju aivu, meara baju barejaquémavu apevu ijāravucavu pueno. Nácavu bácvu ne curō cuvabedejaquemavu. Que baru vaivárejaquemavu pōecubenoĩ aru cūracūai máre. Cārejaquemavu cūracobea jívui aru jobocobea jívui máre.

<sup>39</sup>Jūmenijicu me járrejaquemavu caivu na mácvure ne ju aiye báque boje ũre. Ũbenita me jáñu mácvuacari na mácvure, ne yainájiye jipoca nácavu

cūinācu ye eabedejaquemavu caiye iye mearore yópe Jūmenijicu “Jāve đacacuyumu mujare”, ũi aiye báquepedeca. <sup>40</sup> Jūmenijicui dápiaiye boje majare máre, pueno baju métamu ũi dápiaiđacaiyue majare, ũi yóboque “Que đarājare” ũi coyuiye báqueque, ũi yópe nuri eari buojare đaiyepe ũi yebai majare aru na mácvure máre. Que baru na mácvure ye jaubede đacuyume ũ majaque. Aru jaubede đabecuyume na mácvure maje cubeda.

**Daiye jaurō majare Jesúi đaiyepe yópe Jūmenijicui urōpe maje  
napinajiyeye aiye**

(1 Co 11.31-32; Fil 2.6-11; He 1.13; 2.9)

**12** <sup>1</sup> Maje csebu ijāravui yópe cúyaivu ne cúyaiyepe. Obedivu pōeva jáđama ne cúyaiyede. Aru ina cúyaivu cuitótecajeare dođama obebecajea ũmujubede, aru đucuéde jocarí nuvamenama, cúyarājivu maumejiena. Quédecabu majare máre. Majare jáđama ina obedivu pōeva napivu bácvu nájiyede pu ne yayieta, ne ju aiye báque boje Jūmenijicui yáyaiyede jāvene. Que baru napedeca napinajarevu maja maje nájiyede dajocabevuva. Dajocarājarevu majare jocarí caiye iye đaicōjemene majare yópe Jūmenijicui urōpe aru caiye maje āmeina teiyede, maje đaiye cōmajiyede. Maje āmeina teiyebu yópe cuitótecaje ũmujuricaje āradoare buojuroricaje ina cúyaivu ne dajocarí jaruvaiye báquepe ne cúyarājiye jipocare. Aru iye đaicōjememu majare yópe Jūmenijicui urōpe yópe đucué ina cúyaivu ne dajocarí jaruvaiye báquepe ne cúyarājiye jipocare.

<sup>2</sup> Cainumua dápjarājavu Jesúre yópe maje jáimupe. Ũrecabe majare ju are đayu Jūmenijicure aru jaubede đayu maje ju aiyede Jūmenijicure máre, majare meadari eare đayu caiye iye Jūmenijicui mearo đacaquiyede majare. Jesúvacari ũi nájiyede napini dajocabedejaquemavu, yaiyú bácvacarita jocucjaravena. Pōescu yaiye jocucjaravena urarō āmeno cuyorōtamu, pōeva ne dápiaiyepe. Quénora Jesúcapūravu ũi dápiaiye boje iye urarō mearo torojuede cūvacuyure ũi yainíburu yóbore, āmeina jámenejaquemavu ũi yaiquíyede jocucjaravena. Que baru ye baju āmenejaquemavu ũre iye cuyoje tede đaiye. Aru caride dobacube, jabotecuy, jipacu Jūmenijicu ũi dobarō mearo meapūravui. <sup>3</sup> Que baru me ārūjara muja Jesúre, coreóvarājivu me aipe nájijnú mácvure. Pōeva āmeina teivu ũre ũbeni maucvarivu “ ‘Jūmenijicui daroimumu yu’, borocurí aibi Jesús”, ne aiye báquede, ne ũre nájine đaiye báquede ũre jāve napinejaquemavu ũ. Ũre āruri chīori parubetebejarā muja muje ũmei. Dajocarí jaruvabejarā muje ju aiyede Jūmenijicure.

<sup>4</sup> Pōeva āmeina teivu mujare boarí jaruvabenama cāreja, muje napiyedeca ne nájine đaiyede mujare, muje āmenore đabe boje yópe ne đaiyepe. <sup>5</sup> ¿Aru ārūmetenaru muja iye Jūmenijicui majicaiyede majare yópe mamarape? Yópe arí, toivaicōjenejaquemavu:

Mu, bucū, me jápiarí adajacu maje jabocu Jūmenijicu majicayure mure aipe đaiye jaurōre. Chīori parubetebejacu mi ũmei ũ coreóvare đayure mi āmeina teiyede. <sup>6</sup> Que teni maje jabocu Jūmenijicu caivu ũi ũmarare majicaibi. Aru caivu ũi jacopuimara mamarape nájine đalibi ũ, arí toivaicōjenejaquemavu.

<sup>7</sup> Napijara muje nájiyede ijāravui yópe jueđova ne napiyepe ne nájiyede népacui majicaiyede náre. Muja nájivu baru, coreóvaivubu Jūmenijicu

dayure mujare mamarape, muje darājiyepe ayu yópe ũi urōpe. Caivu majivu mamacu cubecure jīpacui nājine dabemu, majicacuyū ũre. <sup>8</sup> Aru Jūmenijicu majicayube caivu ina mamarare. Que baru muja ũi nājine dabemara maru ũi majicaiyede mujare, mamara baju āmevutamu muja. Quénora eaimarape paivubu muja. <sup>9</sup> Coreóvaivubu maja majebucava ũmuvare coapa, majare urivure, ne daiye cōmajiyede majare. Nācapūravu nājine daivu barejáima maja jueðovare cāreja, majicarājivu majare. Aru náre, pōevareca, ju arī pueðaivu barejávū maja. Que baru pueno baju ju arī pueðaiye javvu majare ñai majepacu cavarō mearocacure, Jūmenijicu bajure, maje curājiyepe aivu me ũque jāravu cūiméjāravu baquinóre. <sup>10</sup> Majebucava ũmva coapa ijāravucavucapūravu majare nājine ðarejaima, majicarājivu majare yópe náre me jauépe ne dāpiaru obebejuare maje cuede jueðova cāreja. Ubenita majepacu Jūmenijicucapūravu majare nājine ðaibi majicacuyū majare, caðatecuyū majare maje pueno meara baju barājiyepe ayu yópe ũ bajupe. <sup>11</sup> Jāve pōescu cubebi nājiyacu. Que baru maje nājinumure ye torojubevubu maja. Quénora chōivubu maja nājivu. Ubenita nājivucapūravu Jūmenijicui majide ðaimaramu, maje nājiye báque boje. Que baru maje nājininburu yóbore, cārijimenoque curivubu mearore ðarī yópe Jūmenijicui urōpe majare jauépe.

<sup>12</sup> Que baru yópe cúyaivu ne parure ðaiyepe ne āmuvede aru ne ñuaboare máre, parure ðajarā muja muje ũmei. <sup>13</sup> Yópe ne voiyepe cúyaima nurinimare nácacu ijinoque cúyayu ũi meaðaquiyepa aivu aru nácacu cuiye majibecu ũi cúyarī majiquiyepa aivu máre, nopedeca mearore ðajarā muja yópe Jūmenijicui urōpe mujare jauépe, muje dajocabenajiyepa aivu muje ju aiyede Jesúre aru muje caðateni parure darājiyepe aivu ne ũmei mujacavu parubevure cāreja ne ũmei, na máre ne dajocabenajiyepa aivu ne ju aiyede Jesúre.

**Me bajure maje ðaru yópe Jūmenijicui urōpe ubenita āme bajure maje  
ðabedu yópe ũi urōpe**  
(Mt 3.12; 2 Ts 1.7-8)

<sup>14</sup> Caino muje oainope caðatejarā mujevure, ne curājiyepe aivu cārijimevava. Aru caino muje oainope caðatejarā mujevure, ne curājiyepe aivu mearore ðaivu yópe Jūmenijicui urōpe cainumva. Nópe ðabecu baru, pōescu cubebi cucuyū maje jabocu Jesucristoque. <sup>15</sup> Caino muje oainope me ðajarā muja. Mujacacu cūinācu ye dajocarī jaruvabecacurī iye Jūmenijicui jījuroede mearore bojecubeda, ũi ju abeque Jesúre, ñai Jūmenijicui daroimu mácre, ũi meaðaquiyepa ayu pōevare. Mujacacu cūinācu ye āmedabecacurī yópe ijede āmene oteiyepa oteiyepa me máquede. Cūinācu mujacacu bueyu baru jāve āmene aru que teni coateyu baru Jūmenijicure jaruvarī, apevu mujacavure máre coatede ðacuyume ũ, Jūmenijicure dajocarī jaruvayū bácu. <sup>16</sup> Mujacacu cūinācu ye āmeina ðabecacurī, ũmu nomióque aru nomió máre ũmuque. Aru ye Jūmenijicure ubeni yaribecacurī ũre máre. Nópe ðarejaquemavu Esaú bácu. Ũ mácu cuvacyu cūinācu jororū āiyeque jororure imacu bácre bojeðarejaquemavu mamarumu pōeteyu ũi cuvajuroe báquede, Jūmenijicui mearo ðacajuroe báquede ũ mácre. <sup>17</sup> Muja coreóvaivubu aipe vaiye báquede ũ mácre. Ũi bojeðarīburu yóbo diede, urīdurejaquemavu jīpacu bácu jēniacaiye báquede Jūmenijicue, ũi mearo ðacacuiyepe ayu

ũ mácuře. Ubenita ũ mácu ũi urĩduiyede ye eabedejaquemavu. Pare oyũ bácuvacari, ye buojabedejaquemavu oatuvayu iye ũi ðaiye báquede.

<sup>18</sup> Majacapũravu nũmenamu Jũmenijicu yebai yópe añina Israecavu bácvu ne nũiye báquepe ũi yebai. Na mácvuvcapũravu jári jẽni majidejaquemavu no curõ, ne Jũmenijicure vorãnuĩnõre, ũi coyuiye báquede na mácvure “Que ðarãjare”, ũi aino mácarõre Moisés bácuque. No curõ, Sinaĩ ãmicuricũ cũracũ, toabo uruĩnoque ênejaquemavu. Nẽmitedejacquemavu. Ocopenibo dicũre taorejaquemavu. Aru ãmeĩ ãmẽvu parurõ japurejaquemavu dicũ cũracũre. <sup>19</sup> Na mácvuvcapũravu jápiarejaquemavu japuiyo, trompeta ãmicuriyo, bujié báquede aru Jũmenijicui yávaino mácarõre máre. Uĩ yávaiyede jápiarĩ, cuēcumaivũ jẽniarejaquemavu Jũmenijicui yávabequiyepẽ aivũ na mácvure ne jidué boje. <sup>20</sup> Cuēcumarejaquemavu na mácvu Jũmenijicu, yópe arĩ, ũi coyuiye báque boje na mácvure: “Nai jári curayu bajurõcure icũ cũracũ turũvare, boarĩ jaruvajarã muja. Põecu baru u oteiãĩmacu baru, cũraboaque o tãuyoque ðuvarĩ boarĩ jaruvajarã muja úre”, arejaquemavu Jũmenijicu. Uĩ nópe coyuiye báquede ye jápiarĩ napimenejaquemavu na mácvu. <sup>21</sup> Caiye ãnié nópe vaiye báque pare jidojãe boje, Moisés bácuvacari, “Jiducu bidini jáiyubevu yu”, arejaquemavu. Que baru majeñecuva mácvu ye nuri eabedejaquemavu Jũmenijicu yebai.

<sup>22</sup> Ubenita majacapũravu maje jẽniaiyede Jũmenijicunque yópe nuri earĩ buojadavũ apecũ cũracũ, Jũmenijicui cũracũ, Sion ãmicuricũ cũracũ. No curõ Jũmenijicu apucu ũi ãmaro, Jerusalén ãmicuriĩmaroĩ, cavarõ mearoĩ, yópe nuri earĩ buojadavũ maja, maje jẽniaiyede Jũmenijicunque. Diĩmaro ángeleva obedimillones baju ne ãmaroĩ yópe nuri earĩ buojadavũ maja, maje jẽniaiyede Jũmenijicunque. Ina ángeleva torojurivũ cójijidama mearore jínajivũ Jũmenijicure. <sup>23</sup> Aru caivũ ina Jũmenijicui mára ũi mamarũmũ põeteivũpe paivũ, na máre torojurivũ cójijidama, mearore jínajivũ Jũmenijicure. Nárecabu ina ne ãmiã toivaino mácarõre cuvãrivũ cavarõ mearo Jũmenijicui curõĩ, jáðovaquiyepẽ aivũ ne curãjinõre. Na torojurivũ baju ne cójijinoĩ yópe nuri earĩ buojadavũ maja, maje jẽniaiyede Jũmenijicunque. Jũmenijicuvacari, ñai coyucuyũ caivũ põevare árore maje curãjino coapa, cavarõ mearore o toabo cũimẽbore, maje ðaiye báque boje maje cuede ijãravũ, ũi yebai yópe nuri earĩ buojadavũ maja, maje jẽniaiyede Jũmenijicunque. Ina põeva meara mácvu Jũmenijicui jáĩnõre, ina ũi jaubede ðaimara mácvu ne ãmene, ne yebai yópe nuri earĩ buojadavũ maja, maje jẽniaiyede úque. <sup>24</sup> Aru Jesũvacari, úque Jũmenijicu ayũ bácu “Que ðarãjare” arĩ, ũi yóboque coyuiye báquede, ũi yebai yópe nuri earĩ buojadavũ maja, maje jẽniaiyede Jũmenijicunque. Jesũĩ jive meiyẽ báque boje, boropatebede ðaibi majare Jũmenijicui jáĩnõre. Nai Abel bácu ũi jive meiyẽ báque boje jĩbcu bácuĩ boarĩ jaruvaiye báquede ũi mácuře, Jũmenijicu ñãjine ðarejaquemavu úre boarĩ jaruvayu bácuře. Ubenita Jesũĩ jive meiyẽ báque boje, Jũmenijicu meadayube põevare. Que baru Jesũĩ jivebu bojecue baju Abel bácuĩ jive pũeno.

<sup>25</sup> Que baru me ðajarã muja. Me jápiarĩ adajarã Jũmenijicui yávaiyede mujare. Úre jápiaiyubeni ju abevũ tebejarã muja. Jũmenijicui coyũcaicõjeiyẽ báquede ijãravucacu Moisés bácuře Israecavu bácvure, ina jápiabeni ju abevũ bácvu ye dupivũ majibedejaquemavu Jũmenijicui ñãjine ðaiyede jocarĩ, ne ju abe boje. Que baru jáve pũeno baju dupivũ majibenajivubu maja, jápiabeni ju abevũ baru Jũmenijicu ũi coyũcaicõjeiyede majare cavarõ mearocacu Jesũre. <sup>26</sup> Dinũmu

mácarõre Jūmenijicui coyucaicõjeiye báquede Moisés bácore ina Israecavũ bácvure, cújiovarejaquemavũ caino joborõre. Ûbenita caride yõpe aibi Jūmenijicu: “Cūináro bediõva cojedeca caino joborõre cújiovacuyumu yũ urarõ baju. Aru caino cavarõre máre cújiovacuyumu yũ urarõ baju. Jāve ñacuyumu”, aibi Jūmenijicu. <sup>27</sup>“Cūináro bediõva cojedeca” ñi aiyẽ báque boje, coreóvare ñaibi majare caiye iye ñi cuedaiye báquede cújiovarĩ bjárocuyume Jūmenijicu. Que teniburu yõboi, quẽda iye ñi cújiovabeno, ñi jaboteinoque, cuquiyebu.

<sup>28</sup>Cújiovaino buojabenotamu no curõ Jūmenijicui jaboteino. Majarecabu ñi epeimara, jabotenajivũ áque nore. Que baru maje curãjiye boje áque cainumua ñi ímaro cavarõ mearoi áre memecarãjarevũ ñi mearore jíyeque majare bojecubeda. Aru, “Jūmenijicure ye jarare ñabenajarevũ ñuñaque”, arĩ ñapiarĩ cuecumari, aru áre pueðaivũ máre ñi paruẽ boje, mearore jínajarevũ áre, torojure ñarãjivũ áre. <sup>29</sup>Ûbenita yõpe toa bjárőiye cuvede, nopedeca Jūmenijicu, maje mearore jímũ, bjárocuyume ina ñi yávaiyede jápaiyubeni ju abevure. Que baru iye ñi yávaiyede me jápiarĩ ju arãjarevũ maja.

**Torojũre ñarãjiyepe aiyẽ Jūmenijicure maje ñaiye maje ñe boje**

(Mt 25.35-46; Lc 15.4-5; Jn 10.1-16; Ro 12.13;

Fil 4.11-13; 1 Ti 6.6-10; He 10.29; 1 P 4.9)

**13** <sup>1</sup>Ûre nuñara apevũ Jesũre ju aivure ñajocabevũva, yõpe jauẽpe ñ jinare. <sup>2</sup>Cainumua torojurivũ me copũ etarĩ jacoyuñarã muja ina curãðavure muje cūramia coapa. Nópe ñaiyede ñajocabejarã muja. Apevũ majeñecua mácvũ ne nópe ñaiyede, coreóvabevũva copũ etarejaquemavũ Jūmenijicui daroimara ángelevare.

<sup>3</sup>Ðápiare nuñara muja náre, ámeina teivure jēni jacoĩnamĩ jívũĩ curivure, caðatenajivũ náre yõpe muje ájuroepe apevũ ne caðateiyede mujare, jabova ne buoimara maru. Ðápiare nuñara muja ina ñájivure, caðatenajivũ náre máre yõpe muje ájuroepe apevũ ne caðateiyede mujare, ñájivũ baru.

<sup>4</sup>Caivũ pōeva purubuoivũ ne purubuoiyede, ne cuede yõpe cūinávure, pueðajarãri ne baju. Que teni ñmuvã nomicurivũ cubejarãri apecoque aru nomiva ñmucurivũ máre cubejarãri apesque, nēmarebucuvare jaruvãri. Caivũ ina purubuoivũ apevũque curivũ baru, nēmarebucuvare jaruvãri, Jūmenijicui ñájine ñaimara mǎrajivũbu na. Aru caivũ ina nomicubevũ nomióque curivũ baru aru ñmucubevũ máre ñmuque curivũ baru, Jūmenijicui ñájine ñaimara mǎrajivũbu na máre.

<sup>5</sup>Tǎuturare jecubeni, diede pare arĩ, vore ñumejara muja. Quénora torojurivũ cuñarã muja quẽda muje cuvaeque, Jūmenijicui yõpe aiyẽ báque boje: “Cainumua jicuyumu mure jauẽde. Aru cainumua ñajocabecuyumu mure”, arejaquemavũ Jūmenijicu. <sup>6</sup>Que baru jidubevũva yõpe arãjarevũ:

Maje jabocu Jūmenijicurecabe yure caðateyũ. Que baru jidubecubu yũ.

Pōecu cubebi ámedarĩ buojayũ jĩ ñmene, arãjarevũ maja.

<sup>7</sup>Arũjara muja ina muje jabova bácvure, Jūmenijicui yávaiye mēne yávacaĩmara mácvure mujare. Ðápiarã aipe ne ñaiye báquede yõpe Jūmenijicui urõpe pũ ne yayieta. Na mácvũ Jesũre ju aivũ bácvure paivũ bájarã muja. Aru ne ñaiye báquepedeca ñajarã muja. <sup>8</sup>Que baru Jesucristorecabe oatuvabecu cainumua. Û cūinátururecabe pōevare meaðayũ bácu javede, aru pōevare meaðayũ caride, aru pōevare meaðayũ bacuyũ

cainumua máre. <sup>9</sup> Jujoaicōjemejara apevu pōevare ne ape bueiyeque, Jūmenijicui yáyaiye méne jāve āmeque mujare. Iyepe paiye bueiye de jápiarī ju abejarā. Métamu parure đaru muje ūmei Jūmenijicui mearo đacaiyeque mujare bojecubeda. Bojecubeda Jūmenijicu cadateibi majare ūi mearo đacaiyeque. Ūbenita pōeva ju aivu baru apevu ne đaicōjeiyede, “Apede ājara. Ūbenita apede ye āmejara muja” arī, ye cadatebemaratumu na. Que baru maje ju aiyeque iyepe paiye đaicōjeiyede maje ūmei parure đarīduiye jaubevu majare.

<sup>10-11</sup> Maja judíova maje sacerdoteva bācavu āivu barejaquémavu jiaruare āimara ne boaimara māvavūquede, majeñecuva māvavu ne jícaiye báquede, ne āmeina teiye boje jāravua coapa. Ūbenita ānījāravu cūinājāravu bācarō ujuā coapa, űai sacerdotevare jaboteipōecu bācu nuvaiyede āimara ūi boaimara māvavu jivede ditucubu pueno baju meatucubu bācarō jīvui, jícuu diede Jūmenijicure pōevai āmeina teiye boje, ye āmenejaquemavu sacerdoteva bācavu jiaruare, ina āimara ūi boaimara māvavūquede. Que baru ye mearore ĩmenejaquemavu ina sacerdoteva bācavu ina āimara ne boaimara māvavure. Quédeca caivu ina pōeva mearore jýurīduivu Jūmenijicure yópe “Que đarājare” ūi aino mācarōpe Moisés bācuque, ye mearore ĩmeni, meadabemaramu na. Ūbenita maja mearore jivu Jūmenijicure yópe “Que đarājare” ūi aino mācarōpe Jesúque, ūi meadaimaramu maja. Jesúi yaiye báquebu jocucjaravena pōeva ne āmeina teiye boje yópe ne jícaiye báquepe āimara ne boaimara māvavure pōeva ne āmeina teiye boje. Ūbenita Jesúi yainíburu yóbore cūináro, Jūmenijicu ye ūbebi caiye ape jícaiye de. Aru űai sacerdotevare jaboteipōecu bācu juarī jaruvaicōjenejaquemavu ina āimara ūi boaimara māvavure ne ĩmaro jedevai, pōeva ne ūbe boje na, āimara māvavure. <sup>12</sup> Quédeca Jesús máre űājini yaidējaquemavu ĩmaro jedevai, pōeva ne ūbe boje ūre. Yópe joaiyepe docuuede ocoque, nopedeca Cristo joaiyepe đaiibi pōevare maje āmeina teiyede jaruvārī, ūi jive meiye báque boje, maje curājiyepe ayu yópe Jūmenijicui űrōpe. <sup>13</sup> Que baru yópe Jesúi yaiye báquepe pōeva ne cūojeda đaimu mācu ūi yaiye báque boje ĩmaro jedevai, nopedeca maja máre đajocarājarevu maje mearore jíyede Jūmenijicure yópe “Que đarājare” ūi aino mācarōpe Moisés bācuque, judíovai mearore jíyepes. Aru pōevare cūyoje teicōjenajarevu majare máre yópe ne đaiyepes Jesúre. Maje đajocaiye judíovai bueiye de, yópebu Jesúi etaiye báque judíovai ĩmaro űrarōre jocarī, yaicúu.

<sup>14</sup> Ye ĩmaro cubevu majare ijāravui, ĩmaro cainumua curīĩmaro. Quénora vore nuivubu, earājivu apeno ĩmarore, maje curājinore. <sup>15</sup> Que baru cainumua mearore jínajarevu Jūmenijicure. Maje mearore jíyedecabu ūre maje jícaiye ūre. Aru Jūmenijicure mearore jīni buojaivubu maja, Jesúi yaiye báque boje ūi jaruvaquiyepe aivu maje āmeina teiyede aru ūi jēniacaiye boje Jūmenijicuque majare boje cainumua. Maje torojuede jíyebu, yópe arī, “űujepacu, Jūmenijicu, meacu bajubu mi daroiye báque boje Jesúre, ūi meadaquiyepe ayu űujare”, maje jícaiye ūre. <sup>16</sup> Aru maje mearore đaiyebu maje jícaiye máre Jūmenijicure. Que baru maje cadateiyebu apavure maje jíyede náre maje cūvavequede, ne cūvarājiyepe aivu náre jauéde, maje jícaiye ūre. Caiye dieque ūre me torojure đaivubu maja. Que baru ārumetebejarā muja mearore đaiyede aru pōevare cadateiyede máre.

<sup>17</sup>Me jápiajarā muja, Jesúre ju aipōeva, mujare coreipōevare. Náre pueđarī, ne coyuiyede ju arī, đajarā yópe ne đaicōjeiyepe. Cainumua mujare urī, jári coređama ye jabuóvabevuva. Aru nópe đadama, ne coreóvaiye boje coyurājivure Jūmenijicure aipe ne đaiyede iye ũi náre coreicōjeiyepe mujare. Muja ne coyuiyede ju arī, diepe muje đaru, torojurivu coyurājarama Jūmenijicure muje ju aiyede. Ūbenita muja ne coyuiyede ju abeni, diepe muje đabedu, chōiovu coyurājarama Jūmenijicure muje ju abede. Aru chōiovu coyuru, ye meamejebu mujare. Jūmenijicu űájine đajebu mujare, muje ju abe boje náre.

<sup>18</sup>Cainumua đaiyurivubu űuja caiyede yópe mearope Jūmenijicui jáinore ũi cadateiyeque. Que baru, “Boropatebevu yu”, arī đápiarī buoiaivubu űuja. Que baru jēniacare űujara muja Jūmenijicuque űujare boje, ũi cadatede űuquiyepe aivu űujare. <sup>19</sup>Paredeca jēniaivu yu mujare, muje jēniacarājiyepe ayu Jūmenijicuque ũi copaini nuicōjequiyepe ayu yure, cucunujivari muje yebai pueno maumejena.

<sup>20</sup>Jūmenijicurecabe cārijimenoque cure đaiye majicu pōevare. Ūrecabe nacovañu mácu maje jabocu Jesúre yaivu bācavu ne curōre jocarī. Maje jabocu Jesús caivu maja ũre ju aivure jári coreyube me baju apevu majare coreivu pueno. Yópe ovejavare coreipōecui jári coreiyepe, nopedece maje jabocu Jesús jári coreyube majare. Ūi jive meiye báque boje ũi yaiye báquede, Jūmenijicu “Que đarājare” arī, ũi yóboque coyuiye báque pōevare jáve jaubedejaquemavu. <sup>21</sup>Mujare mearare đarī jaubede đajacurī majepacu Jūmenijicu, űai cārijimene đayu, muje đaiye majinajiyepe ayu caiyede mearo bajure yópe ũi urōpe. Aru majepacu Jūmenijicu Jesucristore mearare đare đajacurī majare, maje torojure đarājiyepe ayu ũre. Que baru mearore jínajarevu Cristore cainumua, jáđovarajivu ũre meacu bajure. Quédecabu.

### Meaicōjeino

<sup>22</sup>Muja, jīvu, Jesúre ju aivu, paredeca jēniaivu mujare, muje napinajiyepe ayu iye ji toivaiye báquede aipe đaiye jaurōre mujare. Ūrarō ji toivacajuroede yu toivabecuvacari, toivacaivu mujare parure đacuyu muje ũmei, cadatecuyu mujare. <sup>23</sup>Majecu Timoteoi borore jaroivu mujare. űai jabova ne buoimu mácu, ne jođeimume caride. Maumejena ji yebai ũi earu, cūináturu nurajaramu űuja muje yebai. <sup>24</sup>Meajarari caivu mujevū, Jesúre ju aivure coreipōeva, aru caivu apevu Jūmenijicui pōeva máre. Italia āmicurijoborōcavu űujaque curivu meaicōjedama mujare. <sup>25</sup>Aru Jūmenijicu mearo đacajacurī caivu mujare bojecubeda ũi me boje. Quédecabu. Quénoramu.

# Santiago

Mamabuinore coyuiyebu Santiago bácu ùi toivacaiye báquede paperayocare doce paiyajuboacavu Israecavu Jesúre ju aipõevare, ne joborõare jocarĩ dajocaivu b́acavure, curájivure apenoa joborõai. Santiago bácu judíovacacu barejaquémavu. Jesucristoi yócu barejaquémavu. Majidivu ne dápiaiyepe, toivacarejaquemavu diyocare ániujua báquede 40-60 d.C. Aru apevu ne dápiaiyepe Santiago bácu toivacarejaquemavu diyocare caiyoca apeyoca Majepacu J́umenijicui ýavaiye mamaene coyuitucubo j́ivui curiyoca jipocai ániujua báquede 40-50 d.C.

Diyocaque napicõjenejaquemavu ina judíova Jesúre ju aipõevare ne ñájiyede (1:2-4, 12-18). Aru coyurejaquemavu Jesúre ju aipõevare aipe ðaiye jaurõre (1:5-11, 19-27, 2:14-26, 3:13-18, 5:7-20) aru aipe ðaiye jaubenore (2:1-13, 3:1-12, 4:1-17, 5:1-6).

## Santiago ùi meaicõjeino Jesúre ju aipõevare

(Mt 13.55; Mr 6.3; Hch 15.13; Ǵd 1.19; 1 P 1.1)

**1** <sup>1</sup>Ýu, Santiago, toivacaiyu mujare. Majepacu J́umenijicure aru maje jabocu Jesucristore máre memecayubu ýu. Meaicõjeivu mujare, j́ivure, doce paiyajuboacavu Israecavure, muje joborõare jocarĩ dajocaivu b́acavure, curájivure apenoa joborõai.

## Põevare J́umenijicu majiéde ùi j́ino

(Mt 7.7-11; Jn 16.23-24; Stg 3.13-17; 1 P 1.24-25)

<sup>2</sup>Muja, j́ivu, torojujarā muja muje ũmei muje ñájiyede apej́ie ámeque. <sup>3</sup>Que baru coreóvaivubu muja ñájivu baru dajocabevuva muje ju aiyede Jesucristore, pueno baju napinajivure muje ñájiyede. Que teni j́ari corevaivubu muja muje ju aiyede. <sup>4</sup>Me napijara muje ñájiyede, curájivu meara matuiye yópe J́umenijicui urõpe aru ye jaubequiyepe aivu mujare J́umenijicui j́ainore.

<sup>5</sup>Apecu majacacu majibecu baru aipe ðaiye jaurõre úre, j́eniajacurĩ J́umenijicue ùi cadatequiyepe ayu úre. Aru J́umenijicu majide ðacuyume úre aipe ðaiye jaurõre. Que baru cadateiyubi põevare jecubecuva aru jarabecuva náre, ne j́eniaiye boje úre. <sup>6</sup>Ûbenita ñai j́eniañure, “J́ave yure cadatecuyume J́umenijicu. Ðacacuyume ji j́eniaiñore úque”, arĩ dápiaiye javvu, ùi ju aipe boje J́umenijicure, “J́umenijicu cadatequijichubi yure”, abecuva. Yópe ṕaiaboa núraiyepe ũmevuque, nopedeca ñai põecube arĩ dápiayu apenũa “Majivu yu J́umenijicu cadatecuyure yure”, aru apenũa “Majibevu yu J́umenijicu ùi cadatedu yure”, arĩ dápiayu. Û nópe dápiayu ćuináro ùi dápiaino, J́umenijicu úre majide ðacuyure, ye dápiabebi ũ. Que baru ṕaiaboapebu ùi dápiaye. <sup>7</sup>Ñai põecu nópe dápiayu ùi j́eniaiyede

Jūmenijicuque, maje jabocu Jūmenijicu đacabecube ũre yópe ũi jēniainope. <sup>8</sup>Ŋai pōecu nōpe dāpiayū pucaũmea cubi. Que baru coreóvaino āmevū aipe đaiye jaurōre ũre cainumua.

<sup>9</sup>Jesúre ju ayū cūve cūvabecu, apecū ne coyūimū, “cōmaje ārojacu aru bojecubecu”, bojecubi Jūmenijicui jāinore. Que baru torojujacurī ũi ũi ũmei.

<sup>10</sup>Ŭbenita Jesúre ju aipōecu cūve cūvacu torojujacurī ũi ũmei coreóvayū ũi cūve bojecubede Jūmenijicui jāinore. Ŭi baju cūiquíyebu yópe cōvua cūiyepe.

<sup>11</sup>Aviá ũi cōari, bōrī, popovaibi cōriáre. Que teni cōvua poporī, turī yayíyebu. Nopedeca űai cūve cūvacu bījacuyūme, ũi vorī earīduiyepedeca pūeno baju cūvede. Que baru yópe cōvua bījaiyepe cōriáre, nopedeca ũi cūve bījaquiyebu cūve cūvacure.

### Maje űaiye aru āmeno đaiyue

(1 P 1.23)

<sup>12</sup>Torojubi ũi ũmei űai pōecu napiñū caiye iye ũi űaijyede. Ŭi űajiniburu yóboi đajocabecūva ũi ju aiyede Jesucristore, Jūmenijicu bojedacuyūme ũre me. Cūvare đacuyūme ũre jāravū cūimējāravū baquinóre. Que đacuyūme yópe “Đacacuyūmu yū mujare”, ũi aye báquepedeca ina űrivure ũre. <sup>13</sup>Ácu pōecu āmeno đaiyede dāpiayū bācu, yópe arīdurī, “Jūmenijicu jujovaibi yure”, abejacurī. Jūmenijicu jujovaimū āmemi, đacuyū āmenore. Aru Jūmenijicu ye jujovabebi pōecure, ũi đaquíyepē ayū āmenore. <sup>14</sup>Quénora ácu pōecu jujovaimū đacuyū āmenore, ũi baju jujovaibi. Ŭi baju āmeina đaiyuede đainomu ũre yópe moacu ũi jāiyepe cū piaváinore, aru no yóboi nore ũi vorī nuiyepe, pōecu ũi jajovarī boaquíyepē aye ũre. <sup>15</sup>Aru yópe juedearīburu yóboi juedocure pōeteiye jāuepe, aru ũi bucūrīburu yóboi ũre yayíe jāuepe, nopedeca pōecu ũi dāpiarīburu yóboi āmenore āmeina teibi, aru āmeina teniburu yóboi coatecuyūme ũi baju Jūmenijicure jarūvarī.

<sup>16</sup>Muja, jívū, ji űmara, jápijarā. Muje bajumia apecure jujovaicōjemejara. Dāpiabejarā űbenina Jūmenijicu đayure muje āmeno đaiyuede. <sup>17</sup>Quénora me matuiyede đayube Jūmenijicu. Caiye méne aru jāubede máre maje cūvaede jacopuivūbu maja cavarō mearo Jūmenijicui curōre jocarī, majepacu Jūmenijicui jiyede majare. Jūmenijicu cūedarejaquemavū ina cavarōcavū miadāre đaivure. Aru nácapūravū oatuvavū buojadama aru bótainore đadama. Ŭbenita Jūmenijicucapūravū ye oatuvabebi ũ. Cainumua cūináturu cubi. Aru ũi yávaiyede máre oatuvabebi cainumua. <sup>18</sup>Jūmenijicurecabe cure đayū majare apué mamaeva yópe ũi űrōpe ũi yávaiye jāveque. Que teni yópe jēidua mama jūaidua pūeno mearuape, nopedeca maja máre Jūmenijicui pōeva mama curivūbu aru mearamu máre caivū ũi cūedaimara pūeno.

### Ju aye Jūmenijicure jāve

<sup>19</sup>Muja, jívū, ji űmara, coreóvajarā iyede: Caivū pōeva yaué jápijarārī me. Ŭbenita đuibareca yávarī bújarārī me dāpiarī adaivū ne yávaiyede. Aru đuibareca jarajarārī. <sup>20</sup>Pōecu jarayū baru, mearore đayū buojabebi yópe Jūmenijicui űrōpe. <sup>21</sup>Que baru đajocajarā caiye āmeina teiyede mujare jarūvarī. Aru đabejarā āmenore. Meara pōevape ju ajarā iye yávaiyede jāvene, iye coiye báquede muje ũmei yópe oteiye coiyepe joborōi. Iye yávaiye parué boje, meadaimara marajáramu muja.

<sup>22</sup> Ûbenita jujovabejarã muje baju. Ina jápiaivũ iye yávaiyede jávene quéda, ðabevũva yópe iye ne bueiye báquepe, jujovadama ne baju. Que baru ðajarã muja yópe muje bueiye báquepe iye yávaiyede jávene. <sup>23</sup> Ñai jápiayũ diede quéda, ðabecũva yópe ãi bueiye báquepe, ãrecabe ñai pœcũ jáñũpe páyũ ãi jivare jivarũque. <sup>24</sup> Aru ãi járiburu yóboi, cüiná copedini nũri jivarũre jocarĩ ãrumetecũyũme ãi jáino mácarõre. Nopedeca cüinácu jáñũme ðabecũva aru apecũ jápiayũbe ðabecũva. Ne ðabe boje, ãrumetedama cüinácu ãi jáino mácarõre aru apecũ ãi jápiaino mácarõre. Que teni cüinácu ãi jáino mácarõ aru apecũ ãi jápiaino mácarõ bojecũbevũ náre. <sup>25</sup> Ûbenita ñai me dápiarĩ buede nũñũ Jũmenijicũ ðaicõjeiyede aru ãrumetebecũ ãi jápiaino mácarõre diede, quénora ðayũ yópe ãi bueiye báquepe, ãrecabe torojũcu bacũyũ ãi ãmei ãi ju aieyque diede. Aru Jũmenijicũ ðaicõjeiye métamu aru jaubebu. Que baru ñai pœcũ ãi ðaiyue boje diede cõjeimũpe ãmemi.

<sup>26</sup> Ácu pœcu dápiayũ baru ãi baju ju ayũ Jũmenijicure me, ãbenita ãmeina yávaicõjeñũ maru ãi baju, ãrecabe jujovayũ ãi baju. ãrecabe ãbenina ju arĩduyũ Jũmenijicure. <sup>27</sup> Ûbenita ñai ju ayũ Jũmenijicure jáve, aru meacu, aru ãmeina tebecũ majepacu Jũmenijicu ãi jáinore, ãrecabe cadateyũ ina tẽumarare aru ina nomiopevare máre. Aru ãvacari ðabebi ãmenore yópe ijãravũcavũ Jũmenijicure ju abevũ ne ðaiyepe.

### **Jámejara apecũ pœvare me apecũ pũeno**

(Mt 5.21, 27; 19.19)

**2** <sup>1</sup> Muja, jívũ, maje jabocu meacu baju Jesucristore ju aivũ, jámejara apecũ pœvare me apecũ pũeno. <sup>2-3</sup> Ecoyũ baru muje cõjijiñami cüinácu ãmũ cũve cũvacũ, ãmuyo adaitarabua úruque aru meacaje cuitótecajede máre doyũ, aru ecoyũ baru muje cõjijiñami apecũ ãmũ máre, cũve cũvabecu, cõmaje ãrojacu, aru meamecaje javecacaje cuitótecajede doyũ, ne ecoiyede, muja me jári ñai cũve cũvacũre aivũ baru ãre, “Dobajacu mũ yo dobarõ mearore”, ãbenita ãme jári ñai cũve cũvabecũre aivũ baru ãre, “Nújacũ mũ nore o dobajacu joborõĩ ji cũboba yebai”, muje nópe ðaru, meamejebu no. <sup>4</sup> Que ðaivũ baru, mujavacari pũacũmea cũvũ. Apevũre jáivũ baru me baju apecũ pũeno, beoivũbu apecũ bojecũrivũre muje járu aru jarũvaivũbu apecũ bojecũbevũre muje járu. Que dápiaru, ãmenotamu.

<sup>5</sup> Muja, jívũ, ji ãmara, jápiajarã. Javede Jũmenijicu beorejaquemavũ ina ijãravũcavũ cõmaje ãrojarivũ cũve cũvabevũre, ne ju arãjiyepe ayũ ãre cũve cũvarivũpe bárãjivũ ne Jũmenijicũ jaboteinocavũ bae boje yópe ãi aieye báquepedeca. Jũmenijicu “Mearo ðacacũyũmu yũ mujare”, arejaquemavũ ina urivũre ãre jáve. <sup>6</sup> Ûbenita mujacápũravũ cũyoje ðaivũbu ina cũve cũvabevũre. Ina cũve cũvarivũrecabũ ñãjine ðaivũ mujare. Nárecabũ jabũboivũ mujare jabova ne ãmeina teivũre jẽniari jáiñami. <sup>7</sup> Mujavacari “Jesucristo jinamu maja”, aivũbu, muje ju aieye báque boje ãre. Ûbenita nárecabũ ãmeina yávaivũ Jesucristore, muje pũedaimure.

<sup>8</sup> Jũmenijicu toivaicõjenejaquemavũ ãi yávaiyede ãi ðaicõjeino mácarõ pũeno parũrõ cõjeinore, yópe arĩ: “Ûjacũ mícũre yópe mi ãepe mi baju”, arĩ toivaicõjenejaquemavũ. Muja ðaivũ baru jáve yópe yo cõjeinope, mearo ðaivũbu muja. <sup>9</sup> Ûbenita muja jáivũ baru apecũ pœvare me apecũ pũeno, ye jecũbevũ caivũre cüináturũra. Que teni ãmeno ðaivũbu muja, muje ju

abe boje Jūmenijicui ðaicōjeiye báquede aru muje vainí tuiye boje diede. <sup>10</sup>Pōecu ju arī ðaiyuriduyu baru Jūmenijicui ðaicōjeiye matuiyede, ũbenita quéno cūinájino cōjeinore ðabecu baru, boropateibi ũ Jūmenijicui jáinore ũi ju abeni, vainí tújuroepe caiye diede. <sup>11</sup>Jūmenijicuvacari “Cubejarā apevuque mujem arebucuvare jaruvārī”, arejaquemavu. Aru ũ máre “Boarí jaruvabejarā pōevare”, arejaquemavu. Que baru muja cubevu baru apevuque mujemarebucuvare jaruvārī, ũbenita boarí jaruvaivu baru pōevare, mujarecabu ju abeni, vainí tuivu Jūmenijicui ðaicōjeiyede. <sup>12</sup>Muja coreóvaivubu Jūmenijicu jári coyucuyure méne o āmene muje ðaiyede. Jácyume aipe ārojaene diede, yópe ũi ðaicōjeiye me, aru ye jaube, aru buoimarare ðabepe máre. Que baru me yávajarā aru me ðajarā máre yópe Jūmenijicui urōpe. <sup>13</sup>Jūmenijicu cōmaje āroje jámecu nájine ðacyume ñai pōecu cōmaje āroje jámecure ũ jicure. ũbenita jidué jaubequiyebu ina cōmaje āroje jáivure apevure Jūmenijicui nájiovaquijjáravu baquinói pōevare, ne āmeina teiye boje.

**Pōeva ne ðaiye me bojecurō ne yávaiye pueno**

(Ro 4.3)

<sup>14</sup>Muja, jívū, jápijarā. Ñai pōecu coyuyu “Ju aivu yu Jesucristore”, ũbenita mearore ðabecuvacari, ũbenina coyuriduibi ũ ju ayure. Ye baju āmevu no ju aino jáve āmeno. Pōecu ũi ju aino nópe painoque meadaimu macuyú buojabebi. <sup>15-16</sup>Cūinácu mujacacu o cūináco mujacaco cuvabedu cuitótecajede aru āiyede máre, aru náre “Me nujara muja. Cūmajara muja me aru me javatejarā máre” muje aru, ũbenita mujavacari ye jíbedu náre ne doiyeva aru ne āiyeva máre, meamejebu no. Ye baju āmevu muje que ðaiye. <sup>17</sup>Quédecabu ñai pōecu ayu “Ju aivu yu Jesucristore”, ũbenita mearore ðabecuva. Ñai ju ayu jáve āmemi.

<sup>18</sup>Aru apecu ũi aru: “Mu ju ayubu Jesucristore aru yu mearore ðayubu”, yópe arī, coyujebu yu: “Jáðovajacu yure mi ju aiyede Jesucristore mearore ðaiye cuvabecuva. Aru yúcapūravu jáðovaquijívu mure ji ju aiyede ũre ji mearore ðaiyeque”. Que ajebu yu. <sup>19</sup>Mu coreóvayubu Jūmenijicu cūinácura cūcure. Mearotamu no mi coreóvaino. Abujuva máre coreóvaðama Jūmenijicu cūinácura cūcure. Aru ũre jidurivu bidiyama na. ũbenita ne coreóvaiyede ũre cadatebevu náre.

<sup>20</sup>Mu, ārumecu, jáðovaquijívu mure pōecu ũi ju aiyede mearore ðabecuva ju aiyé jáve āmene aru cadatebede ũre. <sup>21</sup>Jūmenijicu járejaquemavu majeñecu mácure, Abraham mácure, boropatebecupe, ũi buoiye báquede mamacure, Isaac bácare, ũi boarí, juarí jácaquiyupe ayu ũre Jūmenijicure, yópe Jūmenijicui ðaicōjeino mácarōpedeca ũre. <sup>22</sup>Que teni coreóvayubu mu Abraham mácuí jáðovaiye báquede ũi ju aiyé báque Jūmenijicure jávene ũi ðaiye báqueque. Aru ũi ðaiye báqueque jáðovarejaquemavu ũi ju aiyé báque ye jaubede. <sup>23</sup>Que teni vaidéjaquemavu yópe Jūmenijicui aiyé báquepedeca. Abraham mácurā Jūmenijicu toivaicōjenejaquemavu ũi yávaiyede, yópe arī: “Abraham ju arejaquemavu Jūmenijicu ‘Yópe ðacyumu’, ũi aiyé báquede ũre. Que baru Jūmenijicu coyurejaquemavu ũre, ‘Boropatebecubu mu ji jáinore’”, arī toivaicōjenejaquemavu. Aru Abraham mácu, “Jūmenijicui yóvaimume”, ne aimu marejaquemavu.

<sup>24</sup>Que baru coreóvaivubu muja Jūmenijicu coyuyure, “Boropatebevu muja ji jáinore”, ina pōeva mearore ðaivure. Ubenita pōecu quénora coyuyu baru “Ju aivu yu Jūmenijicure”, javvu ũre Jūmenijicui jáinova. <sup>25</sup>Quédecabe ico nomió máco, ōi baju bojedado ũmuvare āmenore ðado báco náque, ōi āmiá Rahab. Jūmenijicu járejaquemavu ō mácore boropatebecope ōi ðaiye báqueque. Ō máco copu etarejaquemavu ina Josué bácu jaroimara mácavure. Aru cadatedejquemavu na mácavure máre, ne dupini nưajiyepede ōi jáðovaiye báquede na mácavure apema, ne dupini nuima macarōre. <sup>26</sup>Que baru yópe pōecu ũme cubecu, yaiyú bácupe, nopedeca ñai pōecu mearo ðabecu ju ayu Jūmenijicure jáve āmemi. Cadatebebi ũ. Aru ũi ju aiyepedecubevu.

### Maje jemedo yávaino

**3** <sup>1</sup>Muja, jívu, jápijarā. Maja, bueipōeva, bueivu apevure Jūmenijicui yávaiyede ũi toivaicōjeiye báquede maje buedu jáve āmene, Jūmenijicu ñájine ðacuyume majare apevu pueno baju. Que baru obedivu mujacavure bueiye javbevū apevure. <sup>2</sup>Caivu maja vainí turí āmeno ðaivubu obedinūmua. Pōecu cucu baru vainí turí āmeno ðabecu cainumua ũi yávaiyeque, ñai pōecu meacu baju bájebu. Ũi baju me matuiyeda ðaicōjejebu. <sup>3</sup>Quíjiyo cōjeiyo táuyore epeivubu maja caballore ũi jijecamui, nuicōjenajivu ũre cōjeimeaque ári maje nuiyurōi. Que teni ju are ðaivubu ũre aru ũi baju me matuiyeda ðaicōjeivubu maja. <sup>4</sup>Quédecabu jiadocū uracūque. Uracū bajubu. Aru ũmevu parurō copu japuivu. Ubenita jipocateipōecu nuicōjeimi dicūre quíjiye japuvaiveque ári ũi nuiyurōi. <sup>5</sup>Quédecabu maje jemedoque. Quíjinomu maje jemedo. Ubenita maje quíjiye yávaiyeque urarō ðaivubu maja. Nopedeca quíjino toaque macarō urarō éiyavu. <sup>6</sup>Aru maje jemedo toapebu. Yópe toa éiyepe caino macarōre, nopedeca maje jemedo āmedaivu maje baju matuiyede. Aru ñai abujuvai jabocuvacari iye āmeina ðaiye ðare ðayube. Maje yávaiyeque āmeina ðaivubu aru ñájine ðaivubu máre yópe abujuvai curō, toabo cūimébo, āmeina ðaiyepe aru ñájine ðaiyepe máre.

<sup>7</sup>Maja, pōeva, ðaicōjeni buojaivubu caiyajuboa āimayajuboacavure: macarōcavu jijecurivure, aru mījinare, papeivure, aru jiacavure máre. <sup>8</sup>Ubenita pōecu cubebi ðaicōjeni buojayu ũi jemedore. Āmeina yávaiyede dajocarí majibevu maja. Yópe āða jīmaque ũi ijetede ðaiyepe ũi cūiyede, nopedeca maja máre ijié ðaivubu maje yávaiyeque. <sup>9</sup>Maje jemedoque mearore jívubu majepacu Jūmenijicure. Aru no jemedomiareca āmeina yávaivubu maja pōevare, ina Jūmenijicui cuedaimara mácavure ũpe paivure. <sup>10</sup>Cūinácamu jijecamuque yávaivubu méne aru āmene máre. Muja, jívu, que ðaru meamevu. <sup>11</sup>Macajia cubevu oco me aru oco jūme máre piapóri cūináturura. <sup>12</sup>Aru muja, jívu, higeracure olivorua jēiye buojabevu. Aru úyaimure máre higerarua jēiye buojabevu. Quédecaca oco yuquiraque aru oco me etarí buojabevu cūináro oco piapóinore jocarí.

### Majié jáve

(Stg 1.5)

<sup>13</sup>Mujacacu apescu cucu baru majicu aru jápiarí eayū, jáðovajacurí ũi majiédi aru ũi jápiarí eaiyede ũi mearo ðaiyeque, “¿Meacu bárica yu apevu

püeno?” arí dápiabecüva. <sup>14</sup>Übenita mujacacü apecü cücü baru âmei jorojĩñũ ñi ñmei aru cadateiyücü ñi baju apecü püeno, “Me majivu yũ”, borocueque arí dápiabecacurí. Üpe páyube übenina ayu, jávene majibecu. <sup>15</sup>Ëi majié jáve âmevü. Jümenijicüi jíye âmevü. Quénora iye majié ijáravuquebu. Aru pöeva ne uröpe yópe âimara dápiabevüpebu. Aru abujuvai dápiayequebu máre. <sup>16</sup>Pöeva jorojĩvü baru aru cadateiyurivü baru ne baju apecü püeno, cãrijovaðama ne bajumia aru ðaðama caino âmenore máre. <sup>17</sup>Übenita Jümenijicü majide ðayube pöevare majié jáveque. Mamarumüre ina pöeva majidivü me Jümenijicü jiede caino mearo ðaivübu. Aru cãrijimene ðaivübu. Cadateivübu apecüre. Jijecübevüva curivübu apecüque. Cõmaje âroje jáivübu apecüre. Püedaivübu apecüre. Jáivübu caivüre cüináturura, jámevüva apecüre me apecü püeno. Pücaümea cubevübu. Aru mearore ðaivübu. Québu ina pöeva majidivü Jümenijicüi majiéque. <sup>18</sup>Na cãrijimene ðaivübu caivü apecüque, curájivu ðaivü me.

### Maje yóvayie ijáravucavüque jaubevü majare

(Mt 6.24; 23.12; Lc 16.13; 1 P 5.5-6)

**4** <sup>1</sup>¿Aipe teni boaivüba müja müje baju? Aru, ¿aipe teni áðamateivüba müja müje baju? Müje âmeina ðaiyue yópe maucüvaepebu müje dápiayequé. <sup>2</sup>Müja urivü baru apejĩene aru eabevü baru diede, boarí jaruvaiyurivübu pöevare, cüvarídurájivü diede. Aru müja áujivü baru apejĩene aru cüvarivü buojabevü baru diede, maucüvarí boaivübu, cüvarídurájivü diede. Müja cüvabevütamu, müje jëniame boje Jümenijicüque. <sup>3</sup>Müje jëniariduiyede Jümenijicüque, jëniariduivübu yópe jaubenope mujare müje dápiayie âmeque. Quéða jëniariduivübu Jümenijicüque, cojuquiyepé aivü müje âmeina ðaiyuede. Que baru müja jacopubenamu müje jëniariduiyie báquede. <sup>4</sup>Âmena bajutamü müja. Jümenijicüre jaruvarí dajocaiyurivübu müja yópe nomió âmecoi dajocaiyepé jímarepacüre jaruvarí. Ina yóvaivü ijáravucavüre ne âmeina teiyeque yópe ne baju uröpe maucüvarivübu Jümenijicüre. ¿Coreóvabenarü müja diede? Jáve müja me coreóvaivübu diede. Que baru ácu pöecu yóvayücü ijáravucavüre ne âmeina teiyeque yópe ne baju uröpe, úrecabe maucüvacü Jümenijicüre.

<sup>5</sup>¿Dápiavürü müja Jümenijicüi toivaicõjeiye báquede ñi yávaiyede übenina? ¡Que âmevü! Yópe arí, toivaicõjeneaquemavü ñ: “Jümenijicü cüedabedejaquemavü pöeva jorojĩnajivüre. Maje ümene Jümenijicüi epeiye báquede majare, maucüvare ðabevü apecüre”, arí toivaicõjeneaquemavü. <sup>6</sup>Aru Jümenijicü püeno baju cadateibi majare ñi me boje. Que baru yópe arí, Jümenijicü toivaicõjeneaquemavü ñi yávaiyede: “Jümenijicü maucüvaibi ina ‘Meara márica apecü püeno?’ aivüre. Übenita ñi me boje cadateibi ina ‘Apecü cãchinotamu maja’, aivüre”, arí toivaicõjeneaquemavü.

<sup>7</sup>Ju ajará müja Jümenijicüre, müje ðarájipeye aivü yópe ñi uröpe. Maucüvajará ñai abujuvai jabocüre, müje ðabenajipeye aivü yópe ñi uröpe. Aru que ðaru, ñ dupini nücüyme mujare jocarí. <sup>8</sup>Püeno baju coreóvayujará Jümenijicüre. Aru que ðaru, Jümenijicü mujare coreóvare ðacüyme úre. Müja, âmeina teivü, dajocajará müje âmeina teiyede. Müja, pücaümea curivü, oatuvajará müje dápiayiede, müje uede cüinárora Jümenijicüre aru ijáravuquede máre. <sup>9</sup>Müje que dápiayie boje, ñájijara, ojará, aru chõjara

mujá. Yurivú baru, dajocajarã muje yuríyede aru ojarã. Aru torojurivú baru, dajocajarã muje torojuede aru chiojara. <sup>10</sup>Que baru, “Apevú cãchinotamu yú”, ajarã muja Jũmenijicure, ùi cadatequíyepe aivú mujare ùi paruéque. Que teni Jũmenijicu mearore jícuyume mujare.

#### **Coyuiye jaubevú majare ajevure ne ðaiyede**

<sup>11</sup>Muja, jívú, yávabegarã ámenore caivú ne jápiaiyede ajevui borore. Ñai coyuyú ámenore ù jicui borore aru “Ãmeina teivú mũ” ayú úre, úrecabe yávayú ámenore Jũmenijicui ðaicõjeiyede. Ñai que ayú, “Ámetamu Jũmenijicui ðaicõjeiye”, ayube. Muja yávaivú baru ámenore Jũmenijicui ðaicõjeiyede, muja ju abevú diede. Quénora muja ðaivubu yópe muje baju urõpe. <sup>12</sup>Ûbenita Jũmenijicu cûinácure ðaicõjeñu majare. Aru Jũmenijicu cûinácure coyuyú maje ðaiye méne o ámene máre. Que baru úrecabe cûinácura meadayú buojaibi pôevare, ne ñájimenajíyepe ayú ne ámeina teiye boje. Aru úrecabe cûinácura jaruvayú buojaibi pôevare, ne ñájinajíyepe ayú ne ámeina teiye boje. Ûbenita mujacapuravú ye ámenore coyurí buojabevú ajevui borore.

#### **Põeva aipe vaiquýede javenare ne majibeno**

<sup>13</sup>Caride me jápiajarã muja yópe arí dápiaivú: “Caride o javenare nurajarevú maja apeno ímaroi. Mautenajarevú nore cûinájũ memeni, bojedari, earájivú ure táuturare aru cavede máre”, aivubu. <sup>14</sup>Muja ye coreóvabevú aipe vaiquýede javenare. Coreóvabevú aipiyede muje yainájijaravú baquinóre. Muje apuró yópe painomu abobicope. Yópe abobico járorí, maumena bíjaiyepe, nopedecabu maje apuró máre maumena cûino. <sup>15</sup>Que baru yópe arí dápiaiye javú mujare: “Jũmenijicui uru, curí, memeni, ðarãjarevú apejĩene”. Que aipe javú. <sup>16</sup>Ûbenita mujacapuravú boroteivubu muje baju majiéque, Jũmenijicui majiéde jaruvari. Ûbenina “Jũmenijicu jaubebi majare”, arí dápíariduvubu muja. Que ðaru ámenomu. <sup>17</sup>Ñai coreóvayú ðayú méne, ðabecu baru méne yópe ùi coreóvaiyepe, ámeina ðayube ù, ùi ðabe boje yo mearore ðayú majicupe.

#### **Majicaino cuve cuvavure**

(Mt 6.19)

**5** <sup>1</sup>Caride jápiajarã muja, cuve cuvavivú. Codoboborí ojarã muja muje ñájinajinore. <sup>2</sup>Muje cuve pojeiyebu. Aru muje doiye bocomiva ne áiyebu. <sup>3</sup>Aru muje táuturatavá, úru aru plata máre, cura etaiye. Iye cura etaiye jádovaiyú muje cadatebe báquede ina cõmaje árojarivure muje cuveque. Que baru muja ñájinajivubu yópe pôecu ñájiyepe toa éiyede ùi bajure. Muja jéivubu mujeva uraró cavede ijáravua, buojaijáravuare, Jũmenijicui ñájiovaquijáravú baquinó jipocai pôevare, ne ámeina teiye boje. <sup>4</sup>Járijide apa. Ina memecaivú mujare muje jioai chioivú codoboboivubu, muje jibe boje iye bojedaiye jauéde náre, ne memecaiye báque boje. Ina muje jujovaimara, muje bojedabemara, ne boro coyurí adaiyede jápiaibi ñai Jũmenijicu, caivú ijáravucavú ne jabocu. <sup>5</sup>Ijáravui torojurí curivubu muja muje ure cuveque. Urabucuvabu muje áiye boje méne. Que baru yópe oteiáimacu coreóvabecupe pôevai jíyede úre uraró áinore, ðarájivú jiacucure ne boarájiye jipocai úre,

nopedeca muje ñájinajjāravu baquinó edaquiyebu mujare, corebevure. <sup>6</sup>Mujacapūravu āmenore coyurī ñájićōjeivubu aru boarí jaruvaivubu máre ina cōmaje ārojarivu mearare. Ūbenita nácapūravu maucavabema mujare.

**Pōeva ne napiyeque ne jēniaino Jūmenijicuque**

(Mt 5.34-37; Mr 6.13; Lc 10.34)

<sup>7</sup>Mu ja, jívũ, caride napini corejarā muja maje jabocu Jesucristoi copidaquiyede. Dápijarā ñai oteyure. Napini coreibi icuyu iye jēiye bojecuede. Napini coreibi mama ocainore aru ocaino yóbocarōre máre. Aru no yóboi, jēiyede iñũ buojaibi. <sup>8</sup>Quédeca muja máre napini corejarā. Parure ñajarā muje ūmene. Caijāravua vainiburu yóboi, Cristoi copidaquino pueno joabenotamu.

<sup>9</sup>Muja, jívũ, boro coyurī adabejarā mujevure muje ñájiye boje. Que ñaru, mujavacari ñájiñe ñaimara mārājivubu. Jūmenijicurecabe ñájiñe ñayũ pōevare ne āmeina teiye boje. Aru ūi náre ñájiñe ñaquino joabenotamu.

<sup>10</sup>Muja, jívũ, dápijarā ina Jūmenijicui yávaiyede coyucaipōeva māvavure. Ne ñájiye báquede napini coredejaquemavu na māvavu. Napedeca napini corejarā muja. <sup>11</sup>Tororurivutamu maje jáinoi ina napivu caiye iye ne ñájiyede. Javede jápiañavũ muja Job bácu borore. Coreóñavavũ muja urarō ñájiye báquede napiñũ māvure Job bácu. Aru Jūmenijicui cōmaje āroje jáiye boje aru ūi mearo ñacaiyue boje pōevare Job bácu ñájiniburu yóboi, Jūmenijicu mearo ñacarī buojarejaquemavu ū māvure.

<sup>12</sup>Mu ja, jívũ, caiye mujare jañé pueno yo cūináro jaurōtamu. Muje yávaiyede jēniamejara cavarō mearo Jūmenijicui curōcavure aru ijāravu cavure máre, ne ñare ñarājiyepe aivu mujare yópe muje jēniayepedeca. Quénora cainũmua borocubevava coyujarā yávaiyede jāvene, jaubequiyepa aive mujare cavarō mearocacui āmiáque aru ijāravucacui āmiáque máre, pōeva ne majinajiyepa aivu muja yávaiyede jāvene coyuvure. Muje yávaiyede, nurié ju aiyurivu baru, ju ajarā, aru bi aiyurivu baru, bi ajarā quénora, Jūmenijicui ñájiñe ñabequiyepa aivu mujare.

<sup>13</sup>Apecu mujacacu ñájiñũ maru, jēniacacurī ū Jūmenijicuque. Aru apecu mujacacu torojucu baru, yurijacurī, jícuyu mearore Jūmenijicure. <sup>14</sup>Aru apecu mujacacu ijimũ maru, cutujacurī ina Jesũre ju aivure coreipōevare, ne jēniarajiyepa ayu ūre maje jabocu Jesucristoque ne yuayiede ūra olivo āmicuricu jēidua córoque. <sup>15</sup>Aru ne jēniayiede “Jesucristo meadarī majicutame”, ne arī dápiaru, ñai ijimũ meadaimũ macuyũme. Maje jabocu Jesucristo meadacuyũme ūre. Aru ijimũ māvũ baru ūi āmeina teiye báque boje, Jūmenijicu ārumetecuyũme diede. <sup>16</sup>Que baru coyujarā mujevure muje āmeina teiyede. Aru jēniajara Jūmenijicuque mujevure, ūi meadaquiyepa aivu mujare. Ñai pōecu meacu Jūmenijicui jáinoi, ūi jēniayiede Jūmenijicuque, jāve Jūmenijicu jápiaibi aru cañateibi ūre yópe ūi jēniayepa. <sup>17</sup>Ñai Jūmenijicui yávaiyede coyucaipōecu Elías majape páyu barejaquemavu. Paruēque jēniarejaquemavu ū Jūmenijicuque, ocabequiyepa ayu. Que baru ocabedejaquemavu ūi joborōi yóbecuriñua coricai. <sup>18</sup>Aru bediáva cojedeca jēniarejaquemavu Jūmenijicuque, ocaquiyepa ayu. Que baru ocarejaquemavu. Aru pōeva ne oteiye báque bucurejaquemavu.

<sup>19-20</sup>Muja, jívũ, jápijarā. Apecu mujacacu ūi ñajocaru ūi ju aiyede iye yávaiyede jāvene, aru apecu ju are ñayũ baru ūre diede cojedeca, ñai

oatavare ðayũ apecure ũi dápiaiñore, ũi dajocaquiyepẽ ayũ ũi ãmeina teiyede jarũvarĩ, ũi jũ aquiyepẽ ayũ iye yáva iyede jãvene cojedeca, meadaibi úre, ũi ñãjimequiyepẽ ayũ ũi ãmeina teiye boje. Que baru Jũmenijicũ jarũvacũyũme caiye ũi ãmeina teiye báquede. Aru ãrũmetecũyũme diede máre. Coreóvajarã mũja diede. Quénoramu.

# 1 San Pedro

Mamabuinore coyuiyebu Pedro bácu ũi toivacaiye báquede paperayocare judíova Jesúre ju aipõevare, ne joborõare jocarĩ dajocaivu bácvure, curãjivure apenoa joborõai, die ãmiá Ponto, aru Galacia, Capadocia, Asia, aru Bitinia máre (1:1). Pedro bácu judíovacacu barejaquemavu. Jesús ũi yáyaiye méne beorĩ coyucõjeimu marejaquemavu. Lucas bácu toivarejaquemavu Pedro bácu borore Hch 1:12-5:42 aru 9:32-12:19 aru cap. 15. Majidivu ne dápiayepe, toivacarejaquemavu diyocare ãniujua báquede 63-64 d.C. ũi cue báquede Babilonia ámicuriimaroi (5:13).

Toivacarejaquemavu árure dacuyu ina judíova Jesúre ju aipõevare napini coreivure Jūmenijicui mearo ñacaquiyede náre ne ju aiyे boje Jesucristore (1:2-12), aru Jesucristoi ñájiye báquede náre boje (2:18-25), aru Espíritu Santoi oatuvaiyede náre (4:1-11). Coyurejaquemavu Jesúre ju aivure ne ñájiyede ijāravui (3:8-22, 4:12-19). Aru coyurejaquemavu máre aipe ñaiye jaurõre náre meara bajupe (1:13-2:3), ne memecaiyede ũre (2:11-17), purubuoivure (3:1-7), aru Jesúre ju aivure coreipõevare (5:1-11). Jēvari coyurejaquemavu Jesúi jaboteiyede ũi põevare yópe cūrava apurivape paiyede (2:4-10).

---

## Pedro ũi meaicõjeino Jesúre ju aipõevare

(Stg 1.1)

**1** <sup>1</sup>Yábu Pedro, Jesucristoi yáyaiye méne beorĩ coyucõjeimaracacu. Toivacaiju mujare, muje joborõare jocarĩ dajocaivu bácvure, curivure caride apenoa joborõai die ãmiá Ponto aru Galacia, Capadocia, Asia, aru Bitinia máre. <sup>2</sup>Majepacu Jūmenijicu beorejaquemavu mujare, ũi majié boje aipe vaiquiyede. Aru ñai Espíritu Santo epede ñarejaquemavu mujare Jūmenijicui põevare, muje ju arãjiyepa ayu Jesucristore aru muje meadaimara marajiyépe ayu muje ámeina teiyede jaruvari, ũi jive meiyе báque boje, ũi yaiye báquede majare boje. Jūmenijicu mearo ñacajacurĩ mujare bojecubeda ũi me boje. Aru torojurĩ me cure ñajacurĩ mujare cãrijimevava pueno baju.

## Jāve maje napini coreino

(Jn 3.3-7; 20.29; Ro 6.4-13; 1 P 1.22)

<sup>3</sup>Jñajarevu Jūmenijicure mearore, maje jabocu Jesucristoi mearore jímure, jipacure máre. Ũi cõmaje ãroje jáiye boje, cure ñaibi majare apué mamaeque ũi nacovaiye báquede Jesucristore yainore jaruvari. Que baru torojurĩ napini coreivubu maja Jūmenijicui ñacaquiyede majare, maje coreóvaiye boje Jūmenijicu jāve mearo ñacacuyure. <sup>4</sup>Iye Jūmenijicui cūvare ñaquiye majare yaibébu. Que baru pojebequiyebu. Ámedabequiyebu. Aru javecarõpe tebeni bñjabequiyebu máre. Caiye iye mearore Jūmenijicui ñacaquiyede napini coreivubu maja. Jūmenijicuvacari corecayube diede mujare nore, cavarõ mearo ũi curõi. <sup>5</sup>Muje ju aiyede Jūmenijicure, meadaihi mujare ijāravui ũi

paruéque. Aru buojaquijáravu baquinóre jádovacuyume mujare meara baju yópe ùi urópe. Que teni buojacuyume meadacayu mujare, muje cavarájiyepe ayu caiye iye ùi mearo đacaquiyede mujare.

<sup>6</sup>Caride torojujarā muja muje ùmei caiye iye Jūmenijicui mearo đacaquiyede mujare. Apenumua chīorajaramu muja, muje nājinajiye boje ure nājiyede. <sup>7</sup>Muja nājinajaramu, Jūmenijicui jádovaquiyepa aivu muje ju aiyede Jesucristore jāvene. Yópe pōeva ne juaiyepe úrure, ne majinajiyepe aivu jāve maru, nopedeca Jūmenijicu nājine đayube mujare, jádovacayu muje ju aiyede Jesucristore jāvene. Aru yo úru me bojecurōvacari buojari bjaivu. Ubenita muje ju aye Jesucristore pueno bojecuvu Jūmenijicui jāinore aru cūiméquiye bu. Que baru Jūmenijicu me jácuyume mujare, mearape đacuyume mujare, aru pueđacuyume mujare máre ānijáravu Jesucristoi jádovaquijáravu baquinóre. <sup>8</sup>Nai Jesúrecabe muje umu jámevva úre caride. Que baru torojurivubu muja urarō torojue méque. Pōeva ne yávaiyeque coyurī majibema die torojuede, pueno baju me boje. <sup>9</sup>Torojurivubu muja Jūmenijicui meadaiye boje mujare. Aru muja ju aivubu Jesucristore, Jūmenijicui meadaquiyepa aivu mujare.

<sup>10</sup>Iye Jūmenijicui meadaiyede pōeva úre ju aivure, ina Jūmenijicui yávaiyede coyucaipōeva mácavu me majiyurejaquemavu, coreóvarājivu caiye iye yávaiyede pōevare meadaiyena. Coyucarejaquemavu Jūmenijicui đacaquiyede mujare bojecubeda ùi me boje. <sup>11</sup>Ne bueiyeque iye Jūmenijicui yávaiyede coyucaiyede majinidurejaquemavu ñame cucuy Jūmenijicui meadaipecure aru aipiyede đacuyure máre. Nai Espíritu Santo jádovañu marejaquemavu ānijáravu baquinóre ùi Jūmenijicui yávaiyede coyucare đaiye báquede ina Jūmenijicui yávaiyede coyucaipōeva mácavure. Jūmenijicui yávaiyede coyucarejaquemavu iye napiye jauquinore ùi nājiquiyede Jesucristore aru yo urarō mearore Jūmenijicu đacacuyure úre ùi nājini buru yóboi. Jesucristovacari darorejaquemavu ñai Espíritu Santore, ùi Jūmenijicui yávaiyede coyucare đaquiyepa ayu na mácavure. <sup>12</sup>Jūmenijicu coreóvare đarejaquemavu ina ùi yávaiyede coyucaipōeva mácavure ne coyuiye cadatebequiyede náre. Ubenita mujare cadateiye baquiyebu. Ne coyuiyede coreóvabevva, diedecabu iye Jesús ùi yávaiye méne muje jápaiye caride. Nai Espíritu Santo, Jūmenijicui daroimu mácu cavarō mearo ùi curōre jocarī parure đai bi ne ùmei ina Jesús ùi yávaiye méne coyuipecare, ne coyurájiyepe ayu diede paruéque. Aru ángeleva máre coreóvayuridivvu caiye iyede.

### Maje memecaino Jūmenijicure jauróre

(Jn 3.3-7; Stg 1.10-11, 18; 1 P 1.3)

<sup>13</sup>Caiye iye méne Jūmenijicu đacaibi mujare boje. Que baru me dápiajarā muje đarājiyede aru me đajarā caiye muje đaiyede majidivupe. Que teni napini corejarā cūinārora caiye iye Jūmenijicui mearo đacaquiyede mujare, ùi jádovaquiyede Jesucristore.

<sup>14</sup>Ju ajarā Jūmenijicure yópe mamara meara ne ju aiyepa nébucavare. Aru đabejarā yópe muje āmeina đaiyepa, yópe muje đaiye báquepe coreóvabevva cāreja Jūmenijicui yávaiye méne. Que baru đabejarā yópe muje đaiye báquepe javede, muje ju arājiye jipocare Jesucristore.

<sup>15</sup> Ûbenita méne ðajarā mujacapuravu caiye muje ðaiyede, Jūmenijicu, mujare cutuyu bácu ù jina mǎrajivava, ùi me boje caivu pueno. <sup>16</sup> Yópe arí, toivaicōjenejaquemavu Jūmenijicu ùi yávaiyede: “Meara baju bájarā muja. Yábu meacu baju caivu pueno. Que baru muja máre, ji pōeva, meara baju bájarā muja”, arejaquemavu Jūmenijicu.

<sup>17</sup> Muje jēnaiyede Jūmenijicunque, “mū, jipacu” aivubu úre. Aru Jūmenijicurecabe ñai jáñu caivu pōevare cūináturu, coyuy majare coapa, mearo ðayure o āmeno ðayure máre, maje ðaiye báque boje ijāravure. Que baru puedajarā úre muje cuedeca yore ijāravui. <sup>18</sup> Me majidivubu muja ðajocare ðaimara mǎcavure muje cue báquede jocarí yópe apescu ũmūi bojedaiyepe ùi yebacavure. Die cue báquebu yopedeca mujeñecuva mǎcavu ne cue báquepe. Ne majicaiye báquede aru ne jádovaiye báquede mujare ye cadatebedejaquemavu mujare. Que teni muja mearore ðaridurejaquemavu aru torojuridurejaquemavu máre. Ûbenita muja buoimarape paivu barejaquénavu die cue báque boje. Mujare bojedaiye báque bǎjabequiyebu aru pojebequiyebu máre, yópe bojedaiyepe úrure aru platare máre. <sup>19</sup> Ûbenita muja bojedaimara mǎcavubu Jesucristoi jive bojecueque, ùi yaino mǎcarōque, yópe urarō bojecurōre jǎcayipe Jūmenijicure. Que teni ñai Jesucristo ovejǎicupe barejáme ye āmeno cubecuva, jaubecuva, quénora pueno meacu baju, ne jǎnajiyepe aivu úre ne juaimupe Jūmenijicure.

<sup>20</sup> Jūmenijicui cuedaquie jipocamia ijāravure majidejaquemavu darocuy mamacure, ùi yaicáquiyepes ayu majare, jaruvacuyu maje āmeina teiyede. Que teni Jūmenijicu beorejaquemavu Jesucristore meadaipōescu bacuyure javede. Aru jádovarejame úre ijāravui buojaquijāravuai. <sup>21</sup> Muje coreóvaiye boje Jesucristore caride, ju aivubu Jūmenijicure nacovañu mǎcure Jesúsre yainore jaruvarí aru epeyu bácu úre meacu baju caivu pueno. Que baru muja ju aivubu Jūmenijicure aru napini coreivubu iye ùi mearo ðacaquiyede mujare yópe ùi aiye báquepedeca.

<sup>22</sup> Muje ju aiye báque boje iye yávaiyede jávene muje jápaiye báquede diede, ðajocavubu muja muje āmeina teiye báquede caride. Yópe teni jáve buojaivubu muja urivu aevure Jesúsre ju aipōevare. Que baru pare ujarā muja muje baju caiye muje ũme méque. <sup>23</sup> Muja curivubu caride yópe mamarumu pōeteivupe cojedeca juedovape népacu yaibecu quénora apucu cainumua. Jūmenijicui yávaiye apuépe paiyebu aru oatuvabebu máre. Aru dieque Jūmenijicu cuvare ðaibi mujare mamaūmene. <sup>24</sup> Yópe arí, Jūmenijicu toivaicōjenejaquemavu ùi yávaiyede:

Caivu pōeva cōriápe paivubu. Que baru ne majié cóvuape paiyebu.

Iye cōriá popoiyavū. <sup>25</sup> Aru iye cóvua tuiyavū. Ûbenita Jūmenijicui yávaiye cuquiyebu cainumua, arí toivaicōjenejaquemavu.

Iye Jūmenijicui yávaiye mému. Diedecabu Jūmenijicui yávaiye méne coyupōeva ne coyuiye báque mujare.

**2** <sup>1</sup> Caride ðajocajarā muja caiye muje āmeina teiyede. Aru borocubejarā muja. Jujobejarā aevure, jorojǐmejara aevure, aru āmeina yávabegarā aevure máre. <sup>2</sup> Yópe mamajina mamarumu pōeteivu pare nuiyuepe népacoí opecore, nopedeca muja máre pare buejarā Jūmenijicui yávaiyede jávene. Que teni yópe mamajina ne opecore nuiye boje me bucuiyepe, nopedeca muja máre, muje pueno baju me jápiarí aru ju arí nuiye

boje Jūmenijicui yávaiyede, me jápiarī earājaramu muja diede. Que teni muje ūmene me parure đarī, meadaimara mārājivubu muja. <sup>3</sup>Nópe đajarā, muje coreóvaiye boje aipe Jūmenijicu urarō mearore đacayure mujare.

### Jesucristo cūrava apurivape páyu

(Mt 21.42; Ro 9.25-26, 33; Tit 2.14)

<sup>4</sup>Pueno baju majinadajarā Jesucristore. Ūrecabe jaboteyu ūi pōevare. Nai Espíritu Santoi đacaiye boje, náre cójijovaibi, ne curājiyepe ayu ūque cūinávupe. Jesucristorecabe yópe cūrava apuriva Jūmenijicui mamarumu epeivape ūi đainore yópe cūramipe. Apevucapūravu jaruvarejaquemavu diva cūravare. Ūbenita Jūmenijicuvacari beorejaquemavu diva cūrava meava bajure, epecuy ūi đaiñamine. <sup>5</sup>Aru mujacapūravu yópe bájārā cūrava apurivape, Jūmenijicui đaquiyep mujaque ūi đaiñamine yópe cūramine đaipōecu ūi đaiyepe cūramine cūravaque. Aru Jūmenijicui đaiñami ūi Espíritu Santoi cuquino maquiyébu. Noi muja memecarājaramu nápe, sacerdotevape, jínajivu Jūmenijicure jícaiyeđe muje ūmequede aru méne ūi jáinoi. Aru Jesucristo cadateibi mujare, muje jínajiyep ayu muje ūmeque aru Jūmenijicui jáquiyep ayu me. <sup>6</sup>Jávemu no Jūmenijicui toivaicōjeiye báque boje ūi yávaiyede, yópe arī:

Beoivu yu cūináva cūrava bojecuriva bajure. Divare epeivu yu ji ĩmaroi, Jerusalén āmicurĩmaroi, yópe cūramitōbui cūravape ji đaquĩnami. Ācu pōecu ju ayu baru maje jabocure, ñai divape páyure, cainumua chĩomecube ūi ju aipe boje ñai jabocure. Quénora cainumua torojucuyume ūi ju ayeque ūre, arejaquemavu Jūmenijicu.

<sup>7</sup>Aru muja ju aivabu Jesucristore. Que baru ūrecabe meacu baju mujare. Ūbenita ina ju abevure ūre, yópe arī Jūmenijicu toivaicōjenejaquemavu ne borore:

Iva cūrava ina cūrami đaipōeva ne jaruvaiva bácārō apeva cūrava bojecuriva cubevu diva pueno. Quénora diva Jūmenijicui epeivabu cūramitōbu yebai. Que baru parurivabu apeva cūrava pueno, arejaquemavu Jūmenijicu.

<sup>8</sup>Aru apenumu Jūmenijicu, yópe arī, toivaicōjenejaquemavu ūi yávaiyede:

Iva cūrava boje, pōeva torī turĩdurājarama. Aru iva cūrava boje, pōeva turājarama máre, arī toivaicōjenejaquemavu.

Que baru pōeva ne ju abede Jūmenijicui yávaiyede jávene vaivu náre yópe pōecui torī turĩduiyepe. Que teni ina pōeva đavubu yópe Jūmenijicui majié báquepedeca ina pōeva ne đarājiyede. <sup>9</sup>Ūbenita mujacapūravu Jūmenijicu jinava, ūi beoimaramu. Mujarecabu ñai jabocure memecaivu ūi sacerdotevape. Mujamu pōeyajubocavu Jūmenijicui coatede đaimara āmenore jaruvārī ū jina mārājivu. Mujamu Jūmenijicui pōeva ūi beoimara, muje coyurājiyepe ayu iye yávaiye méne Jūmenijicui pueno mearore đacaiyede pōevare. Ūvacari cuturejaquemavu mujare, muje đajocarājiyepe ayu āmeina teiyede jaruvārī yópe etaiyepe ñeminore jocarī, muje cue báquede Jūmenijicure coreóvabevu cāreja. Jūmenijicu cuturejaquemavu mujare, muje đarājiyepe ayu meatede đaiyede yópe ecoiyepe ūi pueno mearo miadároi. Que baru muja coreóvaivubu Jūmenijicure caride. Aru āmeina tebevubu. <sup>10</sup>Javede Jūmenijicui pōeva āmenejaquemavu muja.

Ubenita caride ùi pōevatamu muja. Javede Jūmenijicui cōmaje āroje jāiyede majibedejaquemavu muja. Ubenita caride cōmaje āroje jāimi mujare. Que baru majidivubu ūre pare cōmaje āroje jāñure.

### Maje memecaino Jūmenijicure

<sup>11</sup> Muja, ji umara, parurōreca jēniaivu mujare. Muja ijāravucavu paivu āmevu. Quénora cavarō mearo Jūmenijicui curōcavu barājāramu muja. Muja curivubu ijārvui obebejiena. Muje āmeina ðaiyue yópe maucuvaepebu muje ūmeque. Que baru ðabejarā yópe muje āmeina ðaiyuepe. Ðaicōjemejara muja muje dāpiaino āmenore muje bajure. <sup>12</sup> Quénora mearo ðarī me cūjarā muja ina Jesucristore ju abevu ne jēneboi. Que teni ne āmeina yāvaiyede mujare āmeina teivu, návacari, muje mearo ðaiyede jāri, yópe arī, “Āmeina teivu āmema na. Me ðadama na”, arī coyurājarama mujara. Que baru mearore jīnajarana na Jūmenijicure ūi ðaquiājārvu baquinóre, nājine ðacuyu pōevare, ne āmeina teiye boje.

<sup>13</sup> Muja ðaiyurivu baru yópe Jūmenijicui urōpe, ju ajarā caivu muje jabovare. Ju ajarā ñai jabocu ijāravucacu pueno baju parucure. <sup>14</sup> Aru ju ajarā caivu apevu jabovare ūi cāchino parurivure. Nāmu ūi daroimara, nājine ðarājivu ina āmeno ðaivure aru jīnajivu mearore ina mearo ðaivure. <sup>15</sup> Que baru Jūmenijicu ūbi muje bi are ðarājīyepe ayu ina pōeva ārumevure ne āmeina yāvaiyede mujare, ne coreóvabe boje. Muje mearo ðaiyeque ðarājivubu muja diede. <sup>16</sup> Caride jaubevū mujare muje ðaiye yópe caiye iye Jūmenijicui ðaicōjeiye báquepe pōevare Cristoi ðaquiye jipocai. Que baru muja yebacavu paivu āmevutamū. Ubenita dāpiabejarā muja āmeina teni buojaivure, muje cue boje yebacavu āmevūpe. Quénora jauvu mujare muje ðaiyede yópe Jūmenijicure memecaivupe. <sup>17</sup> Puedajarā caivu pōevare. Ujarā apevu Jesucristore ju aipōevare. Jūmenijicure puedarī, mearore jījarā ūre. Aru puedajarā ñai jabocu ijāravucacu pueno baju parucure.

### Cristoi nājīye báquede coreóvare ðaino majare aipe ðaiye jaurōre

<sup>18</sup> Muja, memecaipōeva, ju ajarā muje jabovare aru puedajarā me náre. Nópe ðajarā ina jabova jījecubevure aru ina jījecurivure máre. <sup>19</sup> Jūmenijicu me jāimi aru mearo ðacaibi mujare muje napiyede nājīyede āmeina ðabevuva. Muje coreóvaiye boje Jūmenijicui urōre, muja napivubu āmeina ðabevuva. <sup>20</sup> Muje napinu ne jara popeiyede mujare, muje āmenore ðaiye báque boje, meamejebu mujare. Ubenita muje napinu nājīyede muje mearore ðaiyede, Jūmenijicu me jācuyume aru mearo ðacacuyume mujare. <sup>21</sup> Que baru muja Jūmenijicui cutuimaramu, nājīnajivu. Cristovacari nājicarejame mujare boje, cadatecuyū mujare. Que teni jáðovarejame mujare ūi ðaiye báqueque aipe ðaiye jaurōre mujare, muje majīnājiyepe ayu aipe ðarī nājīnajivure ūi nājīye báquepe. <sup>22</sup> Ye āmenore ðabedejame ū. Aru ye borocurī jujovabedejame ū. <sup>23</sup> Pōeva ne āmeina yāvaiye báquede ūre, ūcapūravu āmeina yāvabedejame náre copu. Aru pōeva ne nājine ðaiye báquede ūre, ūcapūravu “Nājine ðaquiivū mujare”, abedejame náre. Quénora yópe arejaquemavu Jūmenijicure: “Mu, jipacu, cadatejacu yure. Napini coreivū mure”, arejaquemavu Jesús. Que teni napini coredejaquemavu Jūmenijicure, ñai meacu bajure, bojedacuyure caivu pōevare yópe ne ðaiye báque jauépe náre.

<sup>24</sup> Jesucristovacari ne pëvaimu mácu jocucujaravena yaicárejame maja ámeina teivure boje. Yópe sacerdotei nuvaiyepe ñi jicaiyede juainoi, nopedeca Jesucristo nuvarejaquemavu maje boropateiyede maje ámeina teiye boje úque ñi yaiye báquede. Que teni jaruvarejaquemavu maje ámeina teiyede. Que baru majarecabu coatete ðaimara caride maje ámeina ðaiyuede jaruvári. Aru curivubu, ðaräjivü mearore. Mujarecabu meaðaimara caride Jesucristoi churiá boje. <sup>25</sup> Javede coatetejaquemavu muja Jümenijicure jaruvári yópe ovejava mamateivupe numevü náre coreipöecuque. Ñbenita caride muja oatuvári curivubu yópe Jümenijicui uröpe, yópe ovejavare vorí earíburu yóboi ne jacopaiyovaiyepe náre coreipöecu yebai. Que baru Jümenijicu jári coreyube mujare aru meadayube muje ümene.

**Aipe ðaiye jauřo purubuoivure**

(Ef 5.22, 25; Col 3.18-19; 1 Ti 2.9)

**3** <sup>1</sup> Muja ümucurivü máre, ju ajará mujemarepacure nopedeca ina memecaivü ne ju aiyepene jabovare. Que teni apevü nácvü ne ju abedu Jümenijicui yávaiyede, muja yávabevüva ju are ðaräjaramu náre, muje mearo ðaiye boje. Jaubequiyebu muje coyuräjiye náre, ne ju aräjiyepe aivü Cristore. <sup>2</sup> Quénora ne jaiyede mujare mearo ðaivure pucaümea cubevüva aru pueðavure máre, ju aräjarama Cristore. <sup>3</sup> Muje meaðaiyede muje bajure, ðabejará jáicöjenajivü apevure mujare. Que baru muje vaivéiyeque muje poðare, aru muje aðaiyeque cöðeimeare máre, aru muje doiyeque cuitótecajeare máre, jáicöjemejara apevure. <sup>4</sup> Quénora meara májara muja, muje meaüme boje. No mearo oatuvabenotamu aru cüiménotamu, muje üme jijecubeque aru cärijimeque máre. No mearo bojecuvü me Jümenijicui jáinore. <sup>5</sup> Quédecabu ina nomiva mácvü javede Jümenijicure mearore jivü bácvü. Napini coredejaquemavu na mácvü Jümenijicure, ñi mearo ðacaquiyepene aivü náre. Aru ju arejaquemavu némarebucüva bácvüre. Que teni meara ðarejaquemavu ne bajure. <sup>6</sup> Quédecabe cüináco nácvü, Sara báco. Ó máco ju arejaquemavu jímarepacu Abraham mácvüre. “mü, ji jabocu”, aðo barejaquemavu. Aru mujavacari öpe paivubu buojaivü, mearore ðaivü baru jidubevüva.

<sup>7</sup> Aru muja nomicurivü máre, me coreóvajará aipe ðaiye jauřore mujare mujemarebucüvare. Na muje cächino parurivubu. Que baru pueðajará náre. Aru na cuvuräjarama jaravu cüiméjaravu baquinóre cüinátvü mujaque. Que baru pueðajará náre. Me cuvurá náque, muje jëniari buojaräjiyepe aivü Jümenijicure yópe mujare jauépe.

**Jesúre ju aivü ne mearo ðaiye boje ñaiyede coyüno**

(Mt 5.10)

<sup>8</sup> Quénora coyuvubu mujare die borore. Dápiajará caivü muja muje ümei cüinátvü. Apevü ne chöoru, chöojara náque. Aru apevü ne torojuru, torojurá náque. Ujará mujevüre yópe muje üepe mujeyovare. Cadatejará ina cömaje ärojarivüre. “¿Meara márica apevü pueno?” arí dápiabejará. <sup>9</sup> Apevü ne ámeno ðaru mujare, copü ámeno ðabejará náre. Apevü ne ámeina yávaru mujare, copü ámeno yávabejará náre. Quénora jëniajara Jümenijicuque, ñi mearo ðacaquiyepene aivü caivü náre, muje coreóvaiye boje Jümenijicu cutuyü

bácure mujare, muje mearo darājiyepe ayu yópe ũi mearo đacaquiyepe mujare. <sup>10</sup>Yópe arī, Jūmenijicu toivaicōjenejaquemavu ũi yávaiyede:

Ácu pōescu torojuiyucu baru aru cuiyucu baru me ijāravui, āmeina yávabecacurī, aru dajocajacurī ũi borocuede máre. <sup>11</sup>Dajocajacurī ũi āmeno đaiyede. Aru đajacurī mearo. Uetubecuva pueno baju vorī eajacurī ũi ũmeque cārijimene đacuyu apevure. <sup>12</sup>Maje jabocu jārī coreyube ina mearo đavure. Jāpiayube ne jēniaiyede. Ubenita maucuvacube ina āmeno đavure, arī toivaicōjenejaquemavu.

<sup>13</sup>Ŋame āmeno đabenama majidivu mujare muje ũmei, muje torojurī đaru mearo. <sup>14</sup>Ubenita muja űājivu baru, muje mearo đaiye boje, urarō torojurājaramu muja. Jidubejarā ina űājine đavure mujare. Aru cuicumamejara. <sup>15</sup>Quénora mearore jījarā Cristore muje ũmei. Aru pueđajarā ũre, muje jabocure. Ŋame ne jēniaru mujare, muje coyurājiyepe aivu iye muje napini coreiyede Cristoque, maumena coyurī majijarā me iye borore muje napini coreimure. <sup>16</sup>Aru coyujarā náre jijecubevuva aru pueđavū náre. Cainumua mearo đajarā, yópe muje majiépe, “Boropatebevū yu”, muje arī dāpiainoque. Que teni apevu āmeina yávaivu baru mujare, mearo đavureca muje ju aye boje Jesucristore, návacarī cuyoje tenajivubu ne āmeina yávaiye báquede muje borore. <sup>17</sup>Que baru Jūmenijicui űājicōjenu mujare, yópe ũi urōpe, muje űājiye meavu, muje mearo đaiye boje. Ubenita meamevu, muje āmeno đaiye boje.

<sup>18</sup>Cristocapūravū űājini yaidějame cūinára, pōevare maje āmeina teiye boje, maje boropatebenajiyeye ayu diede. Ŋai meacu űājinejame āmeina teivure boje, meara đacuyū majare Jūmenijicui jānoi aru cūiné đacuyū maje coateiye báquede Jūmenijicure jaruvārī, maje Jūmenijicu jina tenajiyeye ayu. Cristobe pōeva ne boarī jaruvaimū mácu ũi bajure, ubenita Jūmenijicui ũmedavaimū mácu ũi ũmene. <sup>19</sup>Aru decocupe ũi baju cubecuva, coyucunrejaquemavu ina yaivu bácvu buoimarape paivure. <sup>20</sup>Na mácvu apurivu cāreja ju abedejaquemavu Jūmenijicui yávaiyede ānijārvua báquei, Noé mácu ũi đaiye báquede jiađocū uracūre. Dinumure Jūmenijicu napini coreyu barejaquémavu, na mácvu ne ju arājiyepe ariduyū ũre. Ubenita obebejīna baju, ocho paivu quévura, na mácvu meadaimara marejaquémavu dicūque muiváibore jocarī. Ocoi jorī, ocoque meadaimara marejaquémavu. <sup>21</sup>Quédecabu iye muje jáđovaiye Jūmenijicure ocoi. Yópe Jūmenijicui meadaiye báquepe Noéja mácvure ocoque, nopedeca caride Jūmenijicu meadaibi mujare máre ocoque muje jáđovaiyede ũre Jesucristoi nacajaiye báque boje yainore jaruvārī. Aru maja jáđovamevu Jūmenijicure ocoi, joarājivu maje docure. Quénora jáđovavubu Jūmenijicure ocoi, jēniarajivu ũre, “Boropatebevū yu” ũi arī dāpiare đaquiyeye aivu majare. Aru boropatebevū maja, ũi ārumeteiye báque boje maje āmeina teiyede. <sup>22</sup>Javede űai Jesucristo nrejaquemavu cavarō mearo Jūmenijicui curōi. Caride cubi Jūmenijicui meapūravui, ũi paruéde cuvae boje. Jaboteyube caivu ina ángelevare, aru cavarōcavu jabovare aru paruvivure máre.

**Maje memecaino Jūmenijicure Espiritu Santoi majide đainoque majare coapa**

(Ro 12.13; 1 Co 13.7)

**4** <sup>1</sup>Jesucristo űājinejame ũi baju ũi cuede ijāravui. Que baru muja máre, dāpiarī ũi dāpaiye báquedepedeca, jidubejarā muje űājinajiyede. Ácu

põecu ñájiñu, âmeina teiyede dajocaibi. <sup>2</sup>Que baru caride muje cuede ijâravui ðaicõjemejara muje bajure yõpe muje baju urõpe. Quénora ðaicõjeara Jûmenijicure muje bajure yõpe ñi urõpe. <sup>3</sup>Ina Jûmenijicure ju abevu ðaivu ne baju urõpe. Javede muja máre nápe ðaivu barejaquémavu obediuja. Que teni muja âmeno ðaivu barejaquémavu. Muje âmeina ðaiyerepe ðaivu barejaquémavu. Pacoteivu barejaquémavu. Bujiéque ucuri torojave teivu barejaquémavu. Ucuri upaivu barejaquémavu. Aru âmeno ðaivu barejaquémavu mearore jivu pẽpeimarare Jûmenijicure ubevuva. <sup>4</sup>Aru caride coreóvabema na muje náre yóvabe boje ne urarõ âmeno ðaiyede. Que baru arí dâpiari, “¿Aipe teivu bárica yóvabevu majare?” arí, âmeina yávaðama mujare ne bajumia. <sup>5</sup>Ubenita návacari núrajarama, coyurãjivu ne baju ne borore caiye ne ðaiye báquede, aru ne yávaie báquede, aru ne dâpiaie báquede máre Jûmenijicui jivateinoi, ñi ñájiñe ðauiyede caivu põevare ne âmeina teiye boje, yaivu bácvure aru apurivure máre. <sup>6</sup>Ne majinajiyeye ayu diede, javede iye Jûmenijicui yávaie méne coyurejaquemavu ina yaivu bácvure caride. Que baru ñájiñe ðaimara mácvuvacari ne yaie báquede yõpe caivu põevape ne bajure, apurivu curivu bujarãjarama ne ñmene yõpe Jûmenijicupe.

<sup>7</sup>Caijãravu vai vu, pueno joabenotamu ijãravu cûiquíno. Que baru me ðaicõjeara muje dâpiaiyede aru muje ðaiyede máre, me jêniamuri Jûmenijicupe yõpe ñi urõpe. <sup>8</sup>Caiye mujare jaué pueno, yo cûináro jaurotamu: Ujarã apevure parurõreca. Urivu baru apevure, arumeteiyurãjivubu ne âmeina teiyede. <sup>9</sup>Torojurivu copu etajarã mujevure me. Jecubejarã ne ðiyede, “Ubevũ yu náre copu etarí”, abevuva. <sup>10</sup>Jûmenijicui Espíritu Santo majide ðaibi mujare coapa, muje ðarãjiyepe ayu apeno memeinova, cadatenajivu apevu mujevure. Me ðajarã iye ñi majide ðaiyede yõpe coreipõecui me ðaiyepe iye ñi jabocui cuvade ñi coreicõjeie báquede úre. <sup>11</sup>Ñai coyuyu, coyuiye jauvu úre Jûmenijicui yávaiyede jãvene. Aru ñai memecayu, memecaiye jauvu úre iye paruéque Jûmenijicui jíyede úre. Que baru caiye muje ðaiyeque Jesucristo mearore jíde ðaibi Jûmenijicure, mearore aru paruéde máre cuvacu cainumua. Quédecabu.

### Jesucristore ju aivu ne ñájinajino

(Ro 8.17; 1 P 4.1)

<sup>12</sup>Muja, ji umara, cucumamejara ne ñájiñe ðaiyede mujare. Muje ñájiyeque jáðovarajivubu muje ju aiyede Jûmenijicure jãve, yõpe ne jáðovaiyepe táure jãve toaque. Que baru caivu Jesucristore ju aivu ñájinajaramu. <sup>13</sup>Que baru cucumamejara. Quénora torojurã muje ñmei muje ñájiyede yõpe Jesucristo ñi ñájiñe báquede. Que baru pueno baju torojurãjaramu caivu ne járãiyede Cristo meacu bajure. <sup>14</sup>Põeva ne âmeina yávaru mujare, muje ju aie boje Cristore, torojurã muja muje ñmei. Caivu muja ne âmeina yávaimara Cristore boje, mujarecabu cavarivu Jûmenijicui Espíritu Santore, ñai Espíritu pueno baju meacure. Aru ñ cubi mujaque. <sup>15</sup>Muja ñájiñu baru, ñájiñe yõpe põevare boarí jaruvaivupe, aru ñavaipõevape, aru apevu âmeno ðaipõevape máre. Aru ñájiñe yõpe ina “Yõpe ji coyuiyepe ðaiye jauvu mujare”, coyuvupe apevure. <sup>16</sup>Ubenita muja ñájiñu baru muje ju aie boje Cristore, cuyoje tebejarã muje ju aiyede úre. Quénora mearore jjarã Jûmenijicure muje Cristo jina mae boje.

<sup>17</sup>Joabejĩnoi Jũmenijicu búcuyme ũi ñájine ñaquiyede pœvare, ne ãmeina teiye boje. Mamarũmure Jũmenijicu ñájine ñacuyme ũ jinare. Aru Jũmenijicui ñájine ñaiye boje ũ jinare, ina ju aivure ũi yávaiye méne, jáve pũeno urarõ ñájine ñacuyme ina ju abevure ũi yávaiye méne. <sup>18</sup>Yópe arĩ Jũmenijicu toivaicõjenejaquemavu ũi yávaiyede: “Ina pœva meara meadarĩduimara maru, pũeno baju meadarĩduimaramu ina pœva ãmena, ãmeina teivu”, arĩ toivaicõjenejaquemavu. <sup>19</sup>Iye ji coyuiyede yópe aiyurõtamu: Ina pœva ñájivu Jũmenijicui urõpe mearore ñare cuiye javvu ñare cainũma. Aru ju aiye javvu ñare Jũmenijicure, ñare cuedayu bácuire aru cainũma ñayure yópe ũi aiye báquepedeca, ũi meadaquiyeye aivu ne ũmene.

### Jesucristore ju aivure majicaino

(Mt 6.25-34; 23.12; Lc 14.11; Jn 21.15-17; He 13.20; Stg 4.6, 10)

**5** <sup>1</sup>Caride coyuiyvu yu mujevure, Jesúre ju aivure coreipœvare. Yu máre Jesúre ju aipœvare coreyubu. Yávacari járejacacu Jesúi ñájiye báquede. Aru Jũmenijicui jádovaquiyede Jesús meacu bajure, yu máre meacu baju cacyumu.

<sup>2</sup>Yu jẽniaivu mujare, coreipœvare, muje corenajiyepe ayu me ina Jesúre ju aipœvare cõjijivaivure muje yebai, yópe ovejavare coreipœva ne me coreiyepe ne ovejavare. Corebejarã ñare parurõque. Quénora corejarã ñare muje ue boje. Aru memecabejarã Jũmenijicure ne jíye boje tãuturare mujare. Quénora memecajarã ũre muje cadateiyue boje ajevure. <sup>3</sup>Aru jabova parurivu ne cõjeiyepe cõjemejara muja ina muje coreimarare. Quénora cujarã me ne jáiyede, jádovarajivu ñare aipe ñaiye javrõre ne curãjiyede me Jũmenijicui jáĩnoi. <sup>4</sup>Que teni ñai Cristo, caivu maja coreipœvare maje jabocu, majare coreyu, jícuyume mujare bojedaino pũeno baju mearore cũiménore ũi jádovaquiyede.

<sup>5</sup>Aru muja, bojvu, ju ajarã ina Jesúre ju aivure coreipœvare. Aru caivu muja dápiabejarã muje baju meara ajevũ pũeno. Quénora memecajarã muje bajumia yebacavupe, jabocupe tebevũva. Yópe arĩ Jũmenijicu toivaicõjenejaquemavu ũi yávaiyede:

Jũmenijicu maucuvaiibi ina dápiaivure ne baju pũeno meara ajevũ pũeno. Ũbenita ũi pũeno meacu baju boje, cadateyube ina “¿Meara márica?” abevure, arĩ toivaicõjenejaquemavu.

<sup>6</sup>Que baru yebacavupe tejarã muja, Jũmenijicu ũi cadatequiyeye aivu mujare ũi paruéque. Que teni ũi beojãravũ baquinóre Jũmenijicu mearare epecuyume mujare. <sup>7</sup>Jũmenijicu mujare pare ucu coreibi me. Que baru cãrijimejara muja. Quénora coyujarã Jũmenijicure caiye iye cãrijovaiyede mujare. Aru yópe pœva ne epeiyepe ñare ducuéde, nopedeca epejarã muja iye cãrijovaiyede mujare Jũmenijicurã.

<sup>8</sup>Me jájara. Apurivupe, coreivupe, me ñaicõjeara muje dápiayede. Yópe yavi jijecucu oyũ bujiéque ũi vorĩ ñre cuiyepe ũi ãquimure, nopedeca muje maucu, ñai abujuvai jabocu, vorĩ bíjaroiyucu cuibi pœvare, ne ñajocarãjiyepe ayu ne ju aiyede Cristore. <sup>9</sup>Ũbenita ñajocabejarã muje ju aiyede ũre. Quénora maucuvajarã ñai abujuvai jabocure, muje coreóvayie boje caino joborõacavu ijãravui Jesúre ju aivu, na máre ñájiñama muje ñájiyepe. <sup>10</sup>Obebejaravũ

ñájinajaramu mɔja. Mɔje ñájiniburu yóboi, Jūmenijicɔvacari ye jaubede darĩ, nurié dápiare darĩ, parure darĩ, bíjabede đacuyume mɔjare. Ñai Jūmenijicu pueno meacu baju, úrecabe cutuyu bácu mɔjare, mɔje cɔvarãjiyepe ayu mearo cūiménore, mɔje cɔe boje Jesucristoque cūinávure. <sup>11</sup> Paruéde cɔvacube Jūmenijicu cainumua. Quédecabu.

**Pedro ũi meaicōjeino Jesúre ju aipōevare**

(Hch 12.12, 25; 13.13; 15.22, 37-40; Col 4.10; Flm 24)

<sup>12</sup> Toivacaivu mɔjare iyoca paperayoca quíjiyocare Silvanoĩ cađateiyeque. Úrecabe Jesúre ju ayu dajocabecɔva ji jáinoĩ. Parure đaiyvɔvɔ mɔjare mɔje ũmei. Aru majide đaiyvɔvɔ mɔjare jáve iye ji toivacaiyede Jūmenijicui mearo đacaiyede mɔjare ũi pueno me boje. Que baru dajocabejarã mɔje ju aiyede úre.

<sup>13</sup> Ina Babilonia āmicurĩĩmarocavɔ Jesúre ju aipōeva, Jūmenijicui beoimara mɔjape paivɔ, meaicōjedama mɔjare. Aru Marcos máre, jímacɔpe páyu, meaicōjeimi mɔjare. <sup>14</sup> Me jacoyɔjarã mɔja mɔjevure, mɔje jivare nuri, mɔje Jūmenijicu jina mae boje. Caivɔ mɔja cɔrivɔ Jesucristoque cūinávure me cɔjarã cãrijimevɔva. Quénoramu.

## 2 San Pedro

Mamabuinore coyuiyebu Pedro bácu ùi toivacaiye báquede yóbocayoca paperayocare. Apevu ne dápiyaiye, toivacarejaquemavu judíova Jesúre ju aipõevare, ne joborõare jocarí dajocaivu bácvare, curãjivare apenoa joborõai, die âmiá Ponto, aru Galacia, Capadocia, Asia, aru Bitinia máre (1 P 1:1). Ëbenita obedivu ne dápiyaiye, toivacarejaquemavu caivu Jesúre ju aipõevare. Pedro bácu judíovacacu barejaquémavu. Jesús ùi yávaiye méne beorí coyucõjeimu marejaquémavu. Lucas bácu toivarejaquemavu Pedro bácu borore Hch 1:12-5:42 aru 9:32-12:19 aru cap. 15. Majidivu ne dápiyaiye, toivacarejaquemavu diyocare âniñju bácarõre 64 d.C. Ëbenita âimaro Pedro bácu ùi curiimaro ùi toivacaiyede diyocare caivu majibevu. Apevu “Babilonia âmicuriimaroí curejaquemavu” arí, aru apevu “Roma âmicuriimaroí curejaquemavu”, arí dápiavubu.

Toivacarejaquemavu Jesúre ju aipõeva, ne me járajiiyepe ayu Jümenijicure ju abevu ne ñujovabenajiiyepe ayu náre ne bueiye jáve âmeque, ne vainí turí bíjabenajiiyepe ayu ne ju aiyede jaruvarí (3:17). Coyurejaquemavu aipe ârojae jaurõre Jesúre ju aipõevare (1:1-15), aru aipe ârojae máquede Jesúí jádovaiye báquede meacu bajure aru Jümenijicure coyucaipõeva mácavu ne yávaiye jávene (1:16-21), aipe ârojaene borocuede bueivu ne coyuiyede (cap. 2), aru aipe ârojaene Jesucristoí copaidaquiyede (cap. 3).

---

### Pedro ùi meaicõjeino Jesúre ju aipõevare

(Tit 2.13)

**1** <sup>1</sup>Yábu Simón Pedro, Jesucristore memecayu aru ùi yávaiye méne beorí coyucõjeimaracacu. Toivacaivu yu mujare, ju aivare cüináturu ñujaque Jümenijicure, majare meadaipõecu püeno meacu baju Jesucristore. <sup>2</sup>Jümenijicu mearo ñacajacurí mujare bojecubeda ùi me boje. Aru torojurí me cure ñajacurí mujare cãrijimevuvu püeno baju muje majiéque maje jabocure.

### Jesúre ju aipõeva ne mearo ñaino

(Jn 21.18-19)

<sup>3</sup>Jümenijicu coreóvare ñaibi majare Jesucristore, ñai cutuyu bácvare majare, maje ù jina marajiiyepe ayu. Cutuibi majare, maje cvarãjiiyepe ayu me épe aru maje ñarãjiiyepe ayu mearore ùi ñaiyepe. Caride maje coreóvayie boje Jesucristore, Jümenijicu cvare ñaibi majare caiye jauéde majare, maje curãjiiyepe ayu me ùi jáinoi, ére memecaivu ùi paruéque. <sup>4</sup>Ijáravucavu âmena âmeina dápiadama aru âmedadama ne âmeina ñaiyuepe. Que teni bíjare nuñama na. Ëbenita Jümenijicu püeno meacu baju me dápiabi aru me ñaibi máre. Que teni cubi me cainumua. Aru Jümenijicu “Mearo ñacacuyumu yu mujare”, ùi urarõ mearo aino mácarõque, bíjabede ñaibi mujare, yópe ne buoimarare dupini nure ñaiyepe, muje curãjiiyepe ayu me

úpe. Que baru muja meara, me dápiaivn, me ðaivn máre buojarājivubn. <sup>5</sup>Que baru jauvñ mujare muje memenajie, muje curājiepe aivñ me Jūmenijicui jáinoi. Javede ju adavñ Jesucristore. Ju arñ, meara tejarā muja. Meara teni, coreóvajarā mearore aru āmenore máre. <sup>6</sup>Mearore aru āmenore máre coreóvarñ, ðaicójeja me muje dápiaiyede aru muje ðaiyede máre. Ðaicójeni muje baju me, napijara muja. Napini, me cujarā muja yópe Jūmenijicui urópe ũre memecaivñ. <sup>7</sup>Me curñ yópe Jūmenijicui urópe ũre memecarñ, ũjarā muja apevn Jesúre ju aivñre yópe muje ũepe mujeyovare. Aru urñ apevn Jesúre ju aivñre, ũjarā muja caivñre máre.

<sup>8</sup>Muja ðaivñ baru diede, aru caijāravñ pñeno baju ðaivñ baru diede, jūracuñenamu muja. Aru muje ðaiye bojecube āmequiyebu. Quénora ũetubevñ memecarājivubn muja, muje coreóvaiye boje me maje jabocu Jesucristore. <sup>9</sup>Ūbenita ñai ðabecu baru diede aru die jauñ ũre, yópe pōecupe joarōi jári eabecu mimini quíjino jáññ joabeno, nopedeca jápiarñ eabecu cavarō mearoque, Jūmenijicui jinore coreóvabebi. Quénora jápiarñ eayñ ijāravñque, coreóvaibi diede. Ūrecabe āñmeteyñ Jūmenijicui āñmeteiye báquede ũi āmeina teiye báquede aru Jūmenijicui jarñvaiye báquede ũi boropatejuroe báquede. <sup>10</sup>Muja, jivñ, que baru muje memecaiye méque, muje ðaiye mearoque máre, coreóvare ðajarā jāve Jūmenijicui beoiye báquede mujare, ũi cutuiye báquede máre. Que ðaivñ baru, muja ye vainñ turñ bñjabenamu Jūmenijicure jocarñ. <sup>11</sup>Que baru torojurñ copñ etaimara máravivubn muja maje jabocu Jesucristo, majare meadayñ, ũi jaboteino cūiménoi.

<sup>12</sup>Que baru āñre cure ðaiyvñ yñ mujare cainumñ iye yávaiye ji coyuiyede. Javede muja coreóvarejaquemavñ diede aru ju arejaquemavñ iye yávaiyede jāvene ne bueiye báquede mujare. <sup>13</sup>Meavñ āñre ðayñ mujare ji cuede cāreja ijāravñ iye yávaiye méne ji coyuiyede, muje dápiare nñrajiepe ayñ diede. <sup>14</sup>Maumejie yaicúyñ yñ yópe maje jabocu Jesucristo ũi majide ðaiye báquepe yñre. <sup>15</sup>Que baru ðaquijivñ yñ caiyede ji oainope, muje āñri buojarājiepe ayñ caiye iye yávaiye méne ji yainñburu yóbore máre.

### Ina Jesucristo meacu bajure jáivñ bācavñ ne coyñino

(Mt 17.1-5; Mr 9.2-7; Lc 9.28-35)

<sup>16</sup>Borocubedejagarā mujare ññje bueiye báquede maje jabocu Jesucristoi paruéde. Aru borocubedejagarā mujare ññje bueiye báquede dacññre cojedeca ijāravñ. Ññje bueiye báque ññje baju dápiaye āmevñ. Quénora ññjavacarñ járejagarā ññje baju ññje yacorñaque Cristoi urarō paruéde. <sup>17</sup>Majepacu Jūmenijicuvacarñ pñedarejame Jesúre aru mearore jídejame ũre ũi aye báquede ũi yávaino mearoque: “Ññime jímacñ, ji ũmñ. Torojvñ yñ ũre”, arejame. <sup>18</sup>Aru ññjavacarñ jápiarejagarā ññje baju ññje cāmucobeaque iye yávaino mácarōre cavarō mearore jocarñ ññje cue báquede Jesucristoque dicñ cñracñ meacñ bajui, Jūmenijicui cue báque boje nore.

<sup>19</sup>Ññje jáino mácarō aru ññje jápiaino mácarō máre nopedecabu iye Jūmenijicui yávaiyede coyñaiye báquepe javede. Que baru iye Jūmenijicui yávaiyede coyñaiye báqueque ũ jáñovaimi jāvene ññje coyuiyede iye vaiye báquede ññjare. Jápiarñ adajarā muja iye Jūmenijicui yávaiyede coyñaiye báquede. Yópe pñobuque pñeva ne quíjino jári eaiyepe ññmino

pü miadáe tuyeta aru aviá üi boiyeta ne járariyepe aivü me, nopedeca iye Jümenijicui yávaiede coyucaie báqueque ü coreóvare ðaibi mujare quíjino pü Jesucristoi copaidaiyeta, üi coreóvare ðaquiyede mujare me caiyede muje ümei. <sup>20</sup>Mamarümü coreóvajarä muja iyede: Pöecu cubebi üi baju coyurí buojayü aipe aiyuróre Jümenijicui yávaiede coyucaino mácaróre üi toivaicójeino mácaróre üi yávaiede. <sup>21</sup>Que baru üi yávaiede coyucayü bácu cubedejaquemavü coyuyü bácu üi baju dápiainore yópe üi baju urópe. Quénora caivü ina Jümenijicui yávaiede coyucaivü bácvü memecarejaquemavü üre. Aru coyurejaquemavü üi dápiayede yópe üi urópe. Jümenijicui Espíritu Santo coyucójenejaquemavü na mácvure.

### Ina borocuede bueivure coyüino

(Mt 12.45; Lc 11.26; Jn 8.34; Ro 6.6, 16; Jud 4-13)

**2** <sup>1</sup>Javede Israecavü bácvü ne jëneboi curejaquemavü Jümenijicui yávaiede coyucaipöeva übenina. “Jümenijicui yávaiede javeneca yávaivübu ñüja”, borocurí arejaquemavü na mácvü. Nopedeca bueipöeva übenina curäjivübu muje jëneboi. “Jümenijicui yávaiede javeneca bueivübu ñüja”, borocurí aräjivübu na. Übenita yavenina bueni búrajivübu ne yávaiede jave ämene. Aru ju abevüvacari maje jabocu Jesucristore, ñai meadayü bácvure náre, “Maje jabocu ämemi ü”, aräjivübu na. Yópe pöecu üi bojedaiyepe üi uróre bojedainoi ü jino maquiyépe ayü, nopedeca Jesucristo ü jinare ðaibi náre üi meiyé báque boje üi jivede. Aru ne yávaiede jave ämene bueiye boje, maumejiena bíjare ðaräjarama ne baju. <sup>2</sup>Obedivü pöeva náre ju arí, yóvarí nuri, napedeca uraró ämeno ðaräjivübu. Ne ðaiye boje nópe, ämeina yávaräjarama ina ju aivure Jesucristore. <sup>3</sup>Äujinajivübu na apevüi cüvede, täuturare máre. Que teni jujovaräjivübu mujare ne bueiye borocueque, ñajivü muje cüvaede. Übenita javede Jümenijicu “Ina borocuede bueivü ñájinajarama”, arejaquemavü. Que teni bíjaräjarama na Jümenijicure jocarí.

<sup>4</sup>Ina ängeleva ämeina teivü bácvure Jümenijicu ärumetebedejaquemavü ne ämeina teiye báquede. Quénora ðarorí jarüvarejaquemavü náre ñeminitucubüi, ina ñájinajivure ne coreinoi. Nore nárecabu buoimara täumeaque coreivü pü Jümenijicui ñájiovaquijärvü baquinóita.

<sup>5</sup>Quédeca ina ijärvücvü javcvü bácvure máre, Jümenijicu ärumetebedejaquemavü ne ämeina teiye báquede. Quénora ocare ðarí, muivári yaidé ðarejaquemavü caivü ina ämeina ðaivü bácvure. Übenita meadarejaquemavü Noé mácvure, ñai coyure curiduyü bácvure pöevare ne mearore ðaiye jauquiyépe ariduyü bácvure. Aru apevü siete paivü bácvure quévura Noé mácvure Jümenijicu meadarejaquemavü muiváibore jocarí.

<sup>6</sup>Quédeca Sodoma aru Gomorra máre ämicuríimaroacavü bácvure Jümenijicu ärumetebedejaquemavü ne ämeina teiye báquede. Quénora cüraboa uruiboá ðarorí ocainopedeca, éni bíjare ðarejaquemavü caivü diimaroacavü bácvure. Que teni diimaroa quédata üapena teni cüinéjaquemavü. Que ðarí, Jümenijicu coreóvare ðaibi caivü ijärvücvü curäjivure ämeina ðaivü báräivure ü ñájine ðacuyure na máräivure ne ämeina teiye baquiyé boje. <sup>7</sup>Übenita meadarejaquemavü Lot bácvure, ñai meacu bácvure. Üraró chíoñü marejaquemavü Lot bácu üi ümei ina

Jūmenijicure ju abevu bācavure ne āmeina teiye bāquede. <sup>8</sup>Ņai ūmu meacu cucu barejaquémavu ne jēneboi. Aru űājīñu marejaquémavu űi űmei űi jāiyede aru űi jāpaiyede märe ne vaini tuiyede jāravua coapa.

<sup>9</sup>Maje jabocu Jūmenijicu majibi meadayu ina űre ju arī mearo daivure yópe űi űrōpe, űujovavure jaruvarī. Aru ű majibi coreyu ina űre ju abeni āmeno daivure, űājinajivure pu űi űājiovaquijāravu baquinóita. <sup>10</sup>Jūmenijicu űājine dacuyume ina torojurī daivure āmeina ne baju űrōpe aru ju abeni āmeina jāivure űre apevu pueno.

Puedabenama ina borocuede bueivu. Dađama yópe ne baju űrōpe. Aru jidubevuva āmeina yāvadađama ina pueno parurivure. <sup>11</sup>Que teivureca ina āngelevacapūravu, ne pueno parurivu aru ne pueno cōjeivu märe, puedarī āmeina yāvabenama ina pueno parurivure Jūmenijicui jāinoi űājine darājivu näre. <sup>12</sup>Ūbenita ina borocuede bueivu coreóvabenama ina pueno parurivure ne āmeina yāvaimarare. Que baru āimara ārumevupe dāpiabevuva dađama yópe ne baju űrōpe. Yópe pōeva ne jēiyepe āimarare boarājivu näre, nopedeca na märe bījaroimara mārājivubu, ne bījare đaiye boje apevure. <sup>13</sup>Āmeina űājinajivubu na yópe ne baju āmeina űājine đaiyepe apevure, ne űājiye đaiye boje apevure. Torojuve tedama űbenina jāravure aru űamine märe. Que teni dađama yo āmenore, cuyoje tenajivu ne baju pōeva ne cuyojeda jāiyede. Aru ne yóvarāñuiyede muje torojuve teinoi cuyoje tede dađama mujare ne torojurī űujovaiyede mujare. <sup>14</sup>Āco nomió ne jāimore āmenore đaiyuřī dāpiaivubu óque. Ūetubevuva āmeina đarī ne āmeina teiyede dajocaiye majibema na. Vaini ture dađama ina ju aivure Jesucristore parubevuva cäreja ne ju aiyede űre. Näre űujovadađama yópe moa boaipōecu űi jajovaiyepe moacure cúvaque. Cainumua dāpiadađama ne cuvaiyuede caiye ne jāiyede. Que baru űurorī āujiñama na. Nārecabu Jūmenijicui űājine đaimara mārājivu. Que baru űi coavaimara mārājivubu űre jaruvarī. <sup>15</sup>Dajocadađama ne ju aiyede Jūmenijicui yāvaiyede jāvene. Que teni mamatedađama ne baju yópe pōecu mái nuri macarōi űi mamateiyepe űi dajocaiyede dimare jocarī. Dađama yópe Balaam mácupe. Ņai Balaam mácu Beor bācui mácu barejaquémavu. Jūmenijicui yāvaiyede coyucaipōecu bācuvacari, borocucu barejaquémavu. űi āmeina teiye bāque boje, bojede vorī eaiyuřidurejaquemavu ű mácu. <sup>16</sup>Ūbenita űi tubamu, āimacu yāvabecu bācu, jararejaquemavu ű mácure. Yāvarejaquemavu űre ape yāvaiyeque yópe pōecui yāvaiyepe, dajocare đacuyu űai Jūmenijicui yāvaiyede coyucaipōecu bācure űi đaiye bāquede ārumecupe.

<sup>17</sup>Yópe pōeva ocore earī coreniduivu ne chīoiyepe ococobe pīapóri popoiye boje, nopedeca pōeva chīodađama ina bueipōeva borocurivu ne bueiyeque, ne űujovaiye boje. Aru yópe ocopenibo űmevuque japurī jaroiyepe pōeva majibevuva, nopedeca ina bueipōeva borocurivu ne bueiyede majibenama, ne űujovaiye boje. Que teni ne bueiye bāque bojecubevu. Que baru Jūmenijicu meadaibi näre ne curājino pueno baju űeminore, ne űājinajinore. <sup>18</sup>Yāvadađama paruéque yópe majidivu ne yāvaiyepe. Ūbenita quėda űbenina yāvadađama na. Apevu pōeva dajocadađama ne bueiye jāve āmene jaruvarī, yópe buoimu űi dupini nuiyepe. Đaicōjeivubu näre, ne đarājiyepe aivu cojedeca no āmenore yópe ne dajocarīduino macarōpe. <sup>19</sup>Yópe arī, coyuvubu näre: “Muja yebacavu āmevu. Que baru đajarā caiyede yópe muje baju űrōpe”,

adama na. Ubenita ne que aiyedeca, nárecabu yebacavupe paivu. Ne ámeina ðaiyuède ðaicôjeiye boje náre, bíjaráramama na. Ñai ðaicôjeñu apevure, úrecabe ne jabocu. Aru apevu ùi yebacavubu. Nopedeca pôecu apeiene ðaicôjeimu maru, úrecabe yebacacupe páyu. <sup>20</sup>Ina pôeva jaruvaivu bácvu ijárvucavu ne ámeno ðaiyede, ne coreóvaiye boje maje jabocu Jesucristore, majare meadaipôecure, oatuvaivu baru ne úmene, ámeina tenajivu cojedeca, buojaráramama na ámena ne mamarumure ámeno ðaino mácarô pueno. <sup>21</sup>Ne jaruvavu Jümenijicui ðaicôjeiye méne ùi coyuiye báquede náre, pueno baju meajebu náre, ne majibedu iye bueiye de aipe ðarí pôeva curí buojarájivu mearare Jümenijicui jáinoi. <sup>22</sup>Ðaðama na yópe majidivu ne coyüino mácarôpe: “Yavimi copedini áñume ùi baju bijoiye báquede. Aru várico ne cuyavaimo máco copainuri paradobe yaoburá”, adama na.

### Maje jabocu ùi copaidaquinore coyüino

(Mt 24.43; Lc 12.39; 1 Ts 5.2; 2 Ti 3.1-5; Jud 18; Ap 16.15; 21.1)

**3** <sup>1</sup>Muja, ji umara, caride toivacavü mujare cojedeca. Javede toivacacü mujare apeyoca paperayocare. Diyoca pucayocaque árure ðaiyvü mujare iye bueiye de jávene muje jápaiye báquede, muje dápiarájiyepe ayu nurié. <sup>2</sup>Árujara ina Jümenijicui yáva iyede coyucaipôeva mácvu, Jümenijicure memecavü bácvu, ne bueiye báquede mamarumure. Árujara maje jabocu Jesucristo, majare meadaipôecu, ùi ðaicôjeiye báquede máre ùi yáva iyede méne beorí coyucôjeimara ñuje bueiye báquede mujare.

<sup>3</sup>Mamarumure coreóvajará muja iyede: Ánijárvu buojaquijárvu baquiyéde, Cristoi copaidaquijárvu jipocare, darájarama pôeva Jümenijicure ju abevu, yurivü, aru ne ámeina ðaiyuere ðaivu. Yurinajarama Jümenijicure aru Jesucristore ju aipôevare máre. <sup>4</sup>Yurini, yópe arájarama na: “Muja aivu, ‘Copajdacuyumu yu ijárvui’, arejameða Cristo, aivubu muja. Jáve maru no, ¿Ári curi ù? Obediújua vaivu majeñecuva mácvu ne yainíburu yóbore. Aru ne curinmure, caride máre, caiye vaivu cüinárvu iye vaiye báquedecade Jümenijicui ijárvure cuedainumu yóbore”, arí yurinajarama na. <sup>5</sup>Ubenita nácapúrvu coreóvaiyubenama Jümenijicui cuedaiye báque caijiene. Mamarumure Jümenijicu cuedarejaquemavu cavaróre aru joboróre máre ùi yáva iyede. Cuedarejaquemavu ijárvure ocoque aru oco jêneboi. <sup>6</sup>Aru ocoque máre jaruvári bíjare ðarejaquemavu ánijárvucavu bácvure muiváiboque. <sup>7</sup>Aru caride máre meadayube ijárvure, cavaróre aru joboróre máre, ùi yáva iyede. Meadayube ijárvure pu ùi ñájiovaquijárvu baquinóita, ùi ñájine ðauiyede caivu ámenare, ne coatenajipepe ayu úre jaruvári. Dinumu maquinóre cüiné ðacuyume ijárvure toaque.

<sup>8</sup>Muja, ji umara, árumetebejará iyede: Jümenijicu jáñume cüinárvu vainore yópe maje jáiyepe mil paíjua vainore. Aru Jümenijicu jáñume mil paíjua vainore yópe maje jáiyepe cüinárvu vainore. <sup>9</sup>Maje jabocu Jesucristo “Copajdacuyumu yu” arejame. Ubenita apevu pôeva ne majiépe, ne járvuare corevaiyepe, ðuibáñemu ùi daiyuríduino. “Dabebi cáreja. Que baru dabecuyume”, arí dápiadama ubenina. Ubenita daiyubecu ámemi. Quéhora napiñume mujare. Jümenijicu ubi caivu pôevare meadaimara marajiyépe ayu. Que baru ubebi ù cüinácu ùi coateiyede úre jaruvári toabo cüiméboi.

<sup>10</sup>Yópe ñavaipõecui daiyepe ñamine, pōeva ne majibede, nopedeca dacuyume Jesucristo, pōeva úre ne corebede. Dinumu maquinóre yo cavarō cūiquíyebu urarō jidojarō bujinoque. Aru caiye iye ijāravui cue báque me éni cūiquíyebu toaque pu ne bíjarī cūiyeta. Aru maje curijoborō máre, caiye ijāravuque máre, Jūmenijicui cuedaiye báque, pōeva ne ðaiye báque máre, me éni cūiquíyebu.

<sup>11</sup>Que teni caiye bíjarī cūiquíyebu. Que baru me cūjarā mūja meara teni Jūmenijicui jáinoi úre memecaivu. <sup>12</sup>Napini corejarā maje jabocu Jesucristoi copaidaquiyede. Aru ðajarā mūja caiye iye jauéde mujare cāreja ũi daquiyे jipocare. Que teni daicōjenajivubu mūja úre maumena. Dijāravu ũi copaidaquijāravu baquinóre, yo cavarō me éni cūiquíyebu toaque pu bíjarī cūiyeta. Aru caiye iye ijāravui cue báquede toaijiquiyebu toaque pu énuricoro teni cūiyeta. <sup>13</sup>Ūbenita cūquiyebu cavarō mamaro aru joborō mamaro máre. Jūmenijicu aibi majare, “Apejāravu mamajāravu meajāravu baquinó cūquiyebu jāve”. Aru caivu dinumu maquinócavu meara cūrājarama cainumua Jūmenijicui jáinoi.

<sup>14</sup>Mūja, ji umara, mūje napini coreiyedeca diede ðajarā caiyede mūje oainope, maje jabocui eaquiyе aivu mujare āmeno cubevure. Quénora eajacurī mujare pueno baju mearare aru me curivure cārijimevua. <sup>15-16</sup>Coreóvajarā iyede: Maje jabocu Jesucristo napini coreibi pōevare, ne meadarājiyepe ayu. Quédeca caiyoca ũi paperayocaque toivaicōjequemavu diede majecu, maje umu, Pablo. Apeyoca ũi paperayocare apevu pōeva jápiarīduyama. Ina majibevu aru ina ju aivu Jesucristore parubevua cāreja coyurīduyama aipe aiyuróre iye ũi toivaicōjeiye báquede aru ape toivaiye báquede máre, Jūmenijicui toivaicōjeiye báquede ũi yāvaiyede. Ūbenita ũbenina coyuyama na. Que baru ne baju coatedama Jūmenijicure jaruvārī.

<sup>17</sup>Mūja, ji umara, javede majivu mūja diede. Que baru me jájara ina pōeva Jūmenijicure ju abevure, ne jujobabenajiyе aivu mujare ne bueiye jāve āmeque, mūje vainí turī bíjabenajiyе aivu mūje ju aiyede jaruvārī. <sup>18</sup>Quénora pueno baju mūjara mūja, Jūmenijicui mearo ðacaimara bojecubeda ũi me boje. Aru pueno baju coreóvajarā maje jabocu Jesucristore, majare meadaipõecure. Mearore jínajarevu úreca caride aru cainumua, jádovarajivu úre meacu bajure. Quédecabu. Quénoramu.

# 1 San Juan

Mamabuinore coyuiyebu Juan mácu ñi toivacaiye báquede iyoca mamayoca ñi paperayocare. Juan mácu barejaquemavu judíovacacu, Galilea ámicurijoborôcacu, aru Jesús ñi yávaiye méne beorí coyucôjeimaracacu. Ñi mamicu Santiago bácuque moa boaipôecu bácu barejaquemavu, Jesúí órejaquiye jipocare ñi mácu. Lucas bácu coyurejaquemavu Juan mácu borore Hch 3:1-4:22. Majidivú ne dápiayipe, toivacarejaquemavu diyocare ñi mácu cucu bácu Éfeso ámicurímaroi, ne coreóvayipe boje ñi mácu Éfesocavu Jesúre ju aipôevare coreipôecu bácu. Apevu ne dápiayipe, toivacarejaquemavu Partia ámicurijoborôcavu bácu. Pôecu cubebi majicu ye ñu ñi toivacaiju bácarôre diyocare, ñbenita obedivú ne dápiayipe ániujua báquede 87-90 d.C. baji, ñi toivaquiye jipocare ñi coyuiyede Jesucristorá aru Jesucristoi jádovayipe báquede ñi mácu.

Bueipôeva borocurivú bácvu “Jesús ámemi Jümenijicui mácu” arí, buenidurejaquemavu Juan mácu toivacaimara mácvure. Que baru ñi mácu toivacarejaquemavu na mácvure, Jesúre ju aipôevare, ne majinajiyipe ayu jáveneca Jesúre Jümenijicui mácu, aru ne torojurájiyipe ayu ne ju aiyeque úre, aru ne majinajiyipe ayu caivu úre ju aivure jáveneca meadaimara mácvu aru járavu cüiméjáravu baquinóre cvarivure úque (1:1-4, 2:18-3:3, 4:1-6, 5:1-15). Na mácvure buedejaquemavu diyocaque caiye pueno jáurôre ne uede Jümenijicure aru Jesúre ju aivure máre (2:9-17, 3:11-24, 4:7-21), aru aipe ðaiye jáurôre Jesúre ju aipôevare ne ámeina teniburu yóbore (1:5-2:8, 3:4-10, 5:16-21).

---

## Ñai Jümenijicui dápiainore coyucdayu

(Jn 1.1, 4, 14, 18; 6.68; 1 Jn 2.13-14)

**1** <sup>1</sup>Toivacaiyu mujare Jesucristorá. Ñai cucu bácu caiyede ñi cuedaquiye jipocamia, aru caride máre ñi cubi. Úvacari apure ðayube pôevare apué mamaeque. Majide ðayube apué jávene. Que baru ñi majare Jümenijicui dápiainore coyucdayube. Ñi cuede ijárvui, ñujavacari jápiarejacadá ñi coyuiyede aru járejacadá úre. Aru úre jáve jári coreóvarí jënejacadá ñuja. <sup>2</sup>Nai apure ðayu pôevare apué mamaeque cуетedejame ijárvui. Aru ñuja járejacadá úre. Que baru coyuiyubu ñuje jári majié boje. Coyuiyubu mujare ñi borore, ñai apucure cainumua. Ñi curejaquemavu majepacu Jümenijicucue cavarô mearoi. Ñbenita darejaquemavu nore jocarí pu ijárvui, cуетecuyu yui. <sup>3</sup>Urivubu ñuja muje yóvarájiyipe aivu ñujaque cüinávupe cüináturu maje úmei, majepacu Jümenijicucue aru mamacu Jesucristoque máre. Que baru ñuja coyuiyubu mujare ñuje jáiye báquede úre, aru ñi bueiye báquede máre. <sup>4</sup>Que baru toivacaiyu yu mujare iye coyuiyede, maje mearo torojurájiyipe aivu maje úmei.

### Jūmenijicu āmeina daiyue cubecu

<sup>5</sup>Iye yāvaiyede Jesucristo coyurejame ñujare. Aru caride ñuja coyuvubu iye yāvaiyede mujare máre. Jūmenijicu miadárope páyube. Que baru meacube ũ. Jūmenijicure ñeminijino cubevu. Que baru āmeno cubecube ũ. Miadároque pōeva jáivubu aipe ārojarore ijāravure. Nopedeca Jūmenijicu jádovaiyubi pōevare ne majinajiyeye ayu ũ meacure. <sup>6</sup>Maja āmenore ðaivuvacari, “Majepacu Jūmenijicuque yōvaivubu maja cūinávupe cūináturu maje ũmei” aivu baru, ðabevuvacari mearore, borocuvubu maja. Ūbenita jāve ñeminoi curivupe ðaivubu maja āmenore. <sup>7</sup>Ūbenita maja ðaivu baru mearore Jūmenijicupe, aru yópe miadároi curivupe baru, jāve maja curājaramu cūinávupe cūináturu maje ũmei. Aru Jūmenijicui mácu Jesús bojedarejame maje yōvaiyede Jūmenijicuque ũi jiveque, ũi yaicáye báquede majare maje āmeina teiye boje. Que baru Jūmenijicu ārumeteibi maje āmeina teiyede, Jesúu ðacaiye báque boje majare.

<sup>8</sup>Maja aivu baru “Āmeno cubevu majare”, ñujovaivubu maje bajuma. Que aru, maje aiye jāve āmevu aru Jūmenijicui jāve coyuiye cubevu majare. <sup>9</sup>Ūbenita maje coyuru Jūmenijicure aipe maje āmeina teiyede, Jūmenijicucapūravu ārumetení jaruvacyume diede. Nópe ðacyume ũi ðaiye boje cainumua yópe “Ðacacyumu yu mujare”, ũi aiye báquepe, ũi ðaiye boje mearore quéda. <sup>10</sup>“Āmenore ðabevu maja” aivu baru, Jūmenijicure borocucupe dápiaivubu maja aru jāve ju abevu maja ũi yāvaiyede.

### Cristo majare me coyucayu

(Jn 14.15, 21, 23; Ro 6.11-14; 1 Jn 4.10)

**2** <sup>1</sup>Muja, jímajinape paivu, toivacaivu mujare diede, muje ðabenajiyeye ayu āmenore. Ūbenita ácu pōecu āmenore ðarīburu yóbore, apesu cubi majare coyurī cadateni coyucacyu me majepacu Jūmenijicuque maje borore. Aru ñai majare cadatecyu, ũrecabe Jesucristo, ñai meacu baju Jūmenijicui jáinore. <sup>2</sup>Aru ñai Jesucristovacari yaidéjame majare boje. Ūi yaiye boje, Jūmenijicu ārumeteibi maje āmeina teiyede. Que baru maje meateimume ũ majepacu Jūmenijicuque, maja aru caivu ijāravucavu máre.

<sup>3</sup>Maja ðaivu baru yópe Jūmenijicui ðaicōjeiyepe buoñadvu maja coreóvaivu Jūmenijicure. <sup>4</sup>Ūbenita ñai pōecu “Yu coreóvaivu Jūmenijicure” ayu baru, ðabecuvacari yópe Jūmenijicui ðaicōjeiyepe, borocucube ũ. Que teni Jūmenijicui jāve coyuiye cubevu ũre. <sup>5</sup>Ūbenita ñai ðayu yópe Jūmenijicui ðaicōjeiyepe, ũrecabe jāve coreóvayu me aipe ðarī ucu Jūmenijicure. Que teivu maja coreóvaivubu curivu Jūmenijicuque cūinávupe, cūináturu maje ũmei. <sup>6</sup>Aru ácu pōecu “Yu yóvaivu Jūmenijicure cūinávupe” ũi aru, ũre cue jauvu yópe Jesucristovacari ũi cue báquepedeca.

### Ðaicōjeino mamaro

(Jn 13.34; 15.12; Ro 13.12-14; Stg 1.27)

<sup>7</sup>Muja, jīvu, ji umara, yo ðaicōjeino, ji toivacaino mujare caride, ðaicōjeino mamaro āmevu. Quénora cūináturubu no ðaicōjeino yo muje ju aino mácarō mamarumure ju aivu Jesúre. Que baru javede muja jápiarejaquemavu yo ðaicōjeino javecarōre. <sup>8</sup>Ūbenita yo ji toivacaino mujare ðaicōjeino

mamarotamu máre. Aru yo mamaro jávemu. Cristo ùi ðaiye jádovaivu nore jáve, aru muje ðaiye máre. Pöeva ne Jümenijicui yávaiye méne majibede, ñeminoi curivupe paivubu. Aru ne majiéde diede, miadároi curivupe paivubu. Que baru Cristoi daiyede yópe miadáre ðaiyepe ijáravui yo ñemino mácarō bñjare nuivu caride. <sup>9</sup>Ñai pöecu “Cuvu yu miadároi, ðayv mearore yópe Jümenijicui cöjeiyepe” ayuvacari ubecu baru ù jicure, ñeminoi cubi ù càreja. Que baru ðabebi ù mearore. <sup>10</sup>Ñai ucu ù jicure cubi ù yópe miadároi cucupe. Que baru ðaibi mearore. Aru ye àmei vaini turì ðare ðabecube apecure àmenore. <sup>11</sup>Ûbenita ñai ubecu ù jicure cubi ù yópe ñeminoi cucupe. Que baru ðaibi àmenore. Que teni ye coreóvabebi aipe ðaiye jaurōre úre. Ûi àmeno ðaiye boje, buojabebi dápiayv coreóvayupe. Que baru ùi dápiaino ñeminomu yópe pöecu jári eabecu ñeminoi coreóvabepe ári ùi nuinore.

<sup>12</sup>Muja, jímajinape paivu, yu toivacaivu mujare Cristo ùi yaicáye báque boje mujare, bojedacuyv muje àmeina teiyede. Que baru Jümenijicu árumeteibi muje àmeina teiyede. <sup>13</sup>Aru muja, jíbucuvape paivu, yu toivacaivu mujare muje coreóvaiye boje ñai cucure caiyede ùi cuedaquiye jipocamia. Aru muja, bojuvv, yu toivacaivu mujare máre muje vaini tuiye boje ñai abujuvai jabocure.

Aru muja, jímajinape paivu, yu toivacaivu mujare muje coreóvaiye boje majepacu Jümenijicure. <sup>14</sup>Aru muja, jíbucuvape paivu, yu toivacaivu mujare muje coreóvaiye boje ñai cucure caiyede ùi cuedaquiye jipocamia. Aru muja, bojuvv, yu toivacaivu mujare máre muje cuvae boje Jümenijicui yávaiye méne muje úmei, aru muje ju aye boje diede parurōque, aru muje vaini tuiye boje ñai abujuvai jabocure.

<sup>15</sup>Ûbejarā muja iyede, ijáravucavv Jümenijicure ju abevv ne uede. Aru ubejarā yo ijáravucarō cüiquínore máre. Ñai ucu baru ijáravure aru ijáravuquede máre, ñai buojabebi ucu majepacu Jümenijicure. <sup>16</sup>Que baru ina ijáravucavv ne dápiaino, ne urō, aru ne cuvarō máre Jümenijicu jino àmevv. Quénora ijáravucavvvacari jinomu no. Aru ñai abujuvai jabocu jinomu no. Ðaiyurivubu yópe ne àmeina ðaiyuepe. Aru cuvaiyurivubu caiye iye àmene ne jáiyede. Aru, “¿Meara márica caivu apevv püeno?” arì cuiyurivubu. <sup>17</sup>Ûbenita ijáravucavv bñjare nuivubu ne àmeina ðaiyueque. Quénora ñai ðayv yópe Jümenijicui urōpe cuvacyume járavv cüiméjāravv baquinóre.

### Jāve aipe aru borocue

(1 Co 2.10-16)

<sup>18</sup>Muja, jímajinape paivu, joabenomu ijáravv cüiquíno. Javede jápiadavv muja cüinácu dacuyure, ñai Cristoi maucu bacuyúre. Aru caride obedivv maucuvavivubu Cristore. Que baru coreóvaivubu maja joabenore ijáravv cüiquínore. <sup>19</sup>Ina Cristore maucuvavivv maje jēneboi cúteima. Ûbenita majevv àmema. Que baru etadama na majare jocarì. Majevv baru, cujebu na majaque. Ûbenita ne etaiye báque boje majare jocarì, majidivubu maja majevv àmevure.

<sup>20</sup>Mujareca Cristo daroibi Espíritu Santore. Que teni ñai Espíritu Santo majide ðaibi mujare yávaiyede jávene aru jáve àmene máre. Que baru caivu majidivutamu muja. <sup>21</sup>Yu toivacabevv mujare muje majibe boje iye yávaiyede

jāvene. Quénora yu toivacaivu mujare muje majié boje diede, aru muje majié boje iye borocubede, iye jāve coyuiye.

<sup>22</sup> Ácu pōecu “Jesús Jūmenijicui mácu Cristo āmemi” ayu baru, úrecabe borocucu. Nāi nópe ayu maucūvaibi Cristore. Que teni ju abebi Jūmenijicure aru Cristore máre. <sup>23</sup> Ácu pōecu “Jesús Jūmenijicui mácu Cristo āmemi” ayu baru, yóvabecube majepacu Jūmenijicure. Ūbenita nai “Jesús Jūmenijicui mácu Cristobe” ayu baru, úrecabe yóvayu majepacu Jūmenijicure máre.

<sup>24</sup> Que baru ārūjara iye Jūmenijicui yávaiye méne muje jápaiye báquede muje ju aipe báquede Jesúre mamarumure. Me dápijarā iye yávaiyede jāvene muje ūmei. Maja me dápiaivu baru iye muje jápaiye báquede, mujacapūravu yóvarājaramu Jūmenijicui mácu Jesucristore, aru Jūmenijicure máre cūinávupe, cūináturu muje ūmei. <sup>25</sup> Aru yorecabu Jesús “Yu cūvare dacuyumu mujare jāravu cūimējāravu baquinóre”, ūi aino mácārō.

<sup>26</sup> Yu toivacaivu mujare muje majinajipepe ayu apevu ne borore, ina mujare juovaiyurivure. <sup>27</sup> Ūbenita mujacapūravu javede jacopūquemavu nai Espírиту Santore, cūcure mūjaque, Jesucristo ūi daroimu mácure mujare. Aru nai Espírиту Santo bueibi mujare caiyede. Aru ūi bueiye mujare jāvetamu. Borocubetamu die. Que baru apecu jaubebi mujare majicacuyu iye yávaiyede jāvene. Que baru yóvajarā maja Jesucristore cūinávupe cainumua, cūináturu muje ūmei.

<sup>28</sup> Aru maja, jímajinape paivu, quédata yóvajarā maja Jesucristore cūinávupe, cūináturu muje ūmei caride aru pu ūi copaidaquijāravuita, maja númuri aivu ūi jipocai jidūbevūva aru cūyojarō máre cubeda. <sup>29</sup> Coreóvaivubu maja Jesucristore meacu bajure Jūmenijicui jáinore. Que baru coreóvaiye jaovu mujare iyede máre: Caivu daivu mearore, nárecabu Jūmenijicui mára.

### Jūmenijicui mára

(Jn 1.12, 29; He 2.14-15)

**3** <sup>1</sup> “Jímaratamu maja”, aibi majepacu Jūmenijicu majare. Que baru coreóvaivubu maja aipe Jūmenijicu urarō ucure majare. Aru jāve ūi māratanu maja. Ūbenita apevu pōeva ijāravucavu coreóvabema majare. Jūmenijicure aru Jesucristore máre coreóvabema na. Que baru majare máre coreóvabema na. <sup>2</sup> Maja, jívū, ji umara, caride Jūmenijicui māratanu maja. Ūbenita coreóvabevu maja cāreja aipe ārojarajivu bárājivure yóbore. Quédata coreóvaivubu maja Jesucristoi daquiyede úpe tenajivu, maje jári majinajipe boje úre aipe ārojacure. <sup>3</sup> Aru caivu maja napini coreivubu Jūmenijicui oatūvaquiyede majare maje Cristope barājijéde, dare numemuri āmeina teiyede. Quénora mearore daivurivubu yópe Cristovacari mearore daipepe cainumua, ūi me boje.

<sup>4</sup> Caivu ina āmeina teivu ju abema Jūmenijicui daicōjeiye báquede. Que teni maucūvadama Jūmenijicure. Que baru āmeina teiye cūináturubu ju abepedeca Jūmenijicui daicōjeiye báquede. <sup>5</sup> Jesucristo cūetedejame ijāravui jaravacuyu āmeina teiyede. Aru úcapūravu meacu bajube. Que baru ye āmeina teiye cubevu ūre. Javede coreóvaivubu maja diede. <sup>6</sup> Que baru caivu maja yóvaivu Jesucristore cūinávupe, cūináturu maje ūmei, āmeina tévabevu. Ūbenita caivu ina āmeina tévaivu ye jápiarī eabema Jesucristore aru coreóvabema úre.

<sup>7</sup>Muja, jímajinape paivu, jápiabejarā ina jujovaiyurivure mujare. Ñai dayu mearore cainumua daibi mearore yópe Jesucristovacari ũi daiyepe mearore cainumua. <sup>8</sup>Ūbenita ñai dayu āmeina teiyede, ñai abujuvai jabocu jicube. Mamarumure ñai abujuvai jabocu maucuvarejaquemavu Jūmenijicure. Que teni mamarumure aru pu caride máre, cainumua āmeina teiyede daibi ũ. Que barureca darejame Jūmenijicui mácu, jaruvacuyū ñai abujuvai jabocui daiyede. <sup>9</sup>Caivu maja Jūmenijicui mára Jūmenijicui apure daiyede mamaene cuvavu maja. Que baru cūinácu cubebi Jūmenijicui māraccu cōmajiye dayu āmeina teiyede cainumua. Aru āmeina tévayu buojabebi ũ. <sup>10</sup>Ácu pōecu mearore daiyubecu baru, Jūmenijicu jicu āmemi ũ. Aru ácu pōecu ũ jicure máre ubecu baru, Jūmenijicu jicu āmemi ũ. Que baru coreóvaivubu maja ñamene Jūmenijicui mārare aru ñamene abujuvai jabocui mārare máre.

### **Ūrājarevu maja majevure**

*(Jn 5.24; 13.34; 15.12-13)*

<sup>11</sup>Já pia ivubu muja iye yáva iyede muje ju aije báquede Jesúre mamarumure aru caride máre. Ūe jauvu majare majevure. <sup>12</sup>Đaiye jaubevu majare yópe Caín mácu ũi daiye báquepe. Ū mácu ñai abujuvai jabocu jicu barejaquemavu, aru boarí jaruvarejaquemavu imacu bácu. ¿Aipe teni boarí jaruvarejaquemari ũ mácu? Caín mácu dare nurejaquemavu āmenore Jūmenijicui jáinore. Ūbenita imacu bácu dare nurejaquemavu mearore Jūmenijicui jáinore. Que baru Caín mácu boarí jaruvarejaquemavu imacu bácu ũi baju jorojīnina.

<sup>13</sup>Muja, jīvu, cucumamejara muja ina ijāravucavure Jūmenijicure ubevu ne ube mearore máre.

<sup>14</sup>Jīpocamia maja yaivu bácvupe paivvacari, apurivupe barejávū. Ūbenita caride apué mamaene cuvativubu maja. Aru coreóvaivubu maja apurivure jāve caride, maje ũe boje majevure. Ūbenita ñai ubevu ũ jivure apucvacari caride, jāve yaivú bácupe páyube ũ. <sup>15</sup>Ácu pōecu ubevu ũ jicure, boaipōecu páyube ũ. Aru coreóvaivubu muja boaipōecu cubecure apué mamaeque. Que baru cuvabecube ũ jāravu cūiméjāravu baquinóre.

<sup>16</sup>Jesucristo jádovarejame majare aipe đarí maje urājīnore majecure, yaicáyū majare boje. Quédeca daiye jauvu majare máre, jīvu maje bajure yaicáivu majevure boje. <sup>17</sup>Ácu pōecu cuve cuvacu baru aru jáñu maru ũ jicure cuve cuvabecure ũre jauéde, ũbenita yéde jībecu ñai cōmaje ārojacure cadatebebi ũre. Jáve “Yū ũvu Jūmenijicure ji ũmeque”, arí buojabebi ũ. Quéñora ñai cōmaje āroje jámecu ubebi Jūmenijicure jāve. <sup>18</sup>Muja, jímajinape paivu, quéda “Ūvu yu jicure” abenajarevu. Quéñora jádovarajarevu urivu majevure maje daiyeque. Que baru cadatenajarevu náre.

### **Jidubevuva Jūmenijicui jáinore**

*(Jn 13.34; 15.12, 17)*

<sup>19</sup>Maja urivu baru majevure jāve, coreóvaivubu maja đavure yópe Jūmenijicui yávaie jāvepe. Que teni cārījimevūva maje ũmei jidubevu maja Jūmenijicui jáinore. <sup>20</sup>Ūbenita maja jidurivu baru maje dápiaiye bojedabevu yópe Jūmenijicui yávaie jāvepe, cārījiye jaubevu majare. Que baru maja nájine đabenajaramu maje bajure maje dápiaiye boje. Quéñora Jūmenijicu

ņājine dačuymē majare ūi majié boje caiyede. <sup>21</sup> Mūja, jīvū, ji ūmara, maja jidūbevū baru maje dāpiaieque, mēna cūrivūbu maja Jūmenijicūi jāinore, jēniarajivū ūre maje ūede. <sup>22</sup> Aru Jūmenijicū dačacuymē majare caiyede yōpe maje jēniaiepe ūre, maje ju aie boje ūi daicōjeie bāquede aru maje daie boje yōpe ūi ūrōpe. <sup>23</sup> Jūmenijicū daicōjeimi majare, maje ju arājiepe ayu mamacu Jesucristore, aru maje ūrājiepe ayu majevūre, yōpe Jesūi daicōjeiepe. <sup>24</sup> Caivu maja ju aivu Jūmenijicūi daicōjeie bāquede yōvaivūbu Jūmenijicure cūināvūpe, cūināturu maje ūmei. Corēōvaivūbu maja Jūmenijicūi cuede majaque, maje cūvae boje ūai Espīritu Santore, Jūmenijicūi daroimu mācure majare.

**Jūmenijicūi Espíritu Santo aru űai Cristore maucuvacu**

(Mt 7.15; Jn 8.47; 15.19; 2 Jn 7)

**4** <sup>1</sup> Múja, jávu, ji umara, ju abejará múja caivu ina “Jūmenijicui Espíritu coyuicōjeimi yure” aivure. Ubenita cainumua cūinácu pōecu “Que aibi Jūmenijicu” ūi arī coyuru, jári coreóvajarā múja ūi coyuiyede, majinajivu jāve Jūmenijicui Espíritu dápiacōjeñure ūre. Que đajarā múja, obedivu Jūmenijicui yáva iyede coyucaipōevape tenidivũ ne daiye boje. Coyure cuivubu “Jūmenijicui yáva iyede coyucaipōecubu yu” aridivũ. Ubenita borocurivubu na. <sup>2</sup> Coyuquijivu mujare aipe đarī coreóvarī buojarājivure cūinácu pōecu dápiayure yópe Jūmenijicui Espíritu ūi cōjeiyepe. Caivu ina aivu “Jesucristo, Jūmenijicui mácu, jāve daibi pōecupe ijāravũ”, dápiavubu na yópe Jūmenijicui Espíritu ūi dápiacōjeiyepe. <sup>3</sup> Ubenita ñai jāve dápiabecu yópe Jūmenijicui Espíritu ūi dápiacōjeiyepe, dápiaibi yópe Cristoi maucu ūi dápiayupe. Javede jápiadavũ múja ñai Cristoi maucu dacuyure. Aru caride curivubu ijāravũ ina Jūmenijicui yáva iyede coyucaipōevape tenidivũ, ūbenita borocurī. Yópe Cristoi maucu ūi dápiayupe dápiavubu. Que baru borocueque coyivubu na.

<sup>4</sup> Maja, jímajinape paivu, mujacapuravu Jūmenijicu jinatamu. Que baru Jūmenijicu Espíritu Santo dápiaicōjeimi mujare. Ijāravucavu Jesúre ju abevu ñai abujuvai jabocu jinatamu. Aru ñai abujuvai jabocu dápiaicōjeimi náre. Ūbenita parucube ñai dápiaicōjeñu mujare, ñai náre dápiaicōjeñu pueno. Que baru maja vainí tuivubu ina Jūmenijicu yáviyede coyucaipōevape teniduivu borocurivure. <sup>5</sup> Nácapuravu ijāravucavu Jesúre ju abevu névutamu. Que baru cainumua coyuvubu na ijāravuquede. Aru ina jápiaivu náre máre ijāravucavu Jesúre ju abevutamu na. <sup>6</sup> Ūbenita majacapuravu Jūmenijicu jinatamu. Ñai coreóvay Jūmenijicure torojucu jápiaibi maje bueiyede. Ūbenita ñai coreóvabecu Jūmenijicure jápiabebi maje bueiyede. Que ñari coreóvaivubu maja ñamene coyuyure yáviyede jávene aru ñamene yáviye borocuede.

## Jūmenijicu ūbi pōevare

(Mt 5.44-45; Mr 12.29-31; Jn 1.18; 3.16-17; Ro 8.9; 1 Jn 3.24)

<sup>7</sup>Maja, jīvu, ji ūmara, Jūmenijicu ūre daibi majare majevure. Que baru ūe jaŋvu majare majevure. Caivu ūrivu apevure Jūmenijicui maramu maja. Aru coreóvaivubu maja Jūmenijicure máre. <sup>8</sup>Jūmenijicu ūbi caivu pōevare. Que baru űai ūbecu ű jivure, Jūmenijicure coreóvabebi ű. <sup>9</sup>Jūmenijicu

jáðovarejaquemavu ùi urõre majare daroyu bácu mamacure cûinácura yui ijáravui, maje cûvarájiyepe ayu jàravu cûiméjàravu baquinóre, mamacui yaiye báque boje majare. <sup>10</sup>Maja buojarĩ urivubu Jûmenijicure quíjinora. Ëbenita Jûmenijicu buojarĩ ubi majare pueno urarõ baju. Yópebu Jûmenijicui ue jàve: Jûmenijicu darorejaquemavu mamacure ijáravui, jícuyu ùre ùi yaicáquiyepe ayu majare boje, Jûmenijicui árumetequiyepe ayu maje ámeina teiyede.

<sup>11</sup>Muja, jívu, ji umara, nópe urarõ baju ubi Jûmenijicu majare. Que baru nopedeca ue jauvu majare máre maje baju. <sup>12</sup>Ácu pōecu Jûmenijicure jáñu mácu cubebi ù. Ëbenita maje uru majevure, Jûmenijicu yóvaibi majare cûinávupe, cûináturu maje ùmei. Que teni coreóvaivubu me aipe ðarĩ buojarĩ urivu Jûmenijicure jàve. <sup>13</sup>Jûmenijicu darorejaquemavu ñai Espíritu Santore, ùi cuquiyepe ayu majaque, maje majinajiyepe ayu jàve Jûmenijicui yóvaiede majare aru maje cuvaede ùre máre cûinávupe, cûináturu maje ùmei. <sup>14</sup>Aru ñujavacari járejacarã Jûmenijicui mácure. Que baru coyuvubu majepacu Jûmenijicui daroiye báquede mamacure ijáravui. Pōevare coyuvubu majepacui daroiye báquede mamacure, ùi meadaquiyepe ayu ijáravucavure abujuvai jabocui paruéde jarívarĩ. <sup>15</sup>Ácu pōecu “Jesucristo Jûmenijicui mácube” ayu, ù jàve yóvaibi Jûmenijicure aru Jûmenijicu máre yóvaibi ùre cûinávupe, cûináturu ne ùmei.

<sup>16</sup>Que baru maja coreóvaivubu Jûmenijicu ucure majare. Aru ju aivubu maja diede jàve. Jûmenijicu ubi caivu pōevare. Ñai ucu Jûmenijicure aru ajevure máre cainumua, ùrecabe yóvayu Jûmenijicure aru Jûmenijicu máre yóvaibi ùre cûinávupe, cûináturu ne ùmei. <sup>17</sup>Coreóvaiye jauvu majare aipe ðarĩ maje urõre Jûmenijicure jàve, jidubenajivu ùi ñájiovaquijàravu baquinóre ámeina teivure. Jesucristoi pacu Jûmenijicube. Aru maja máre, ijáravu curivui pacube ù. <sup>18</sup>Ñai ucu Jûmenijicure jàve jidubecube ùre ùi ñájiovaquijàravu baquinóre. Ë majibi Jûmenijicu ñájine ðabecuyure náre, ina urivure ùre jàve, ne ámeina teiye boje. Que baru jidubecube ù. Ëbenita ácu pōecu jiducu baru, buojabebi ucu Jûmenijicure jàve cãreja.

<sup>19</sup>Jûmenijicucapûravu ùrejaquemavu majare mamarumure. Que baru maja máre uvu Jûmenijicure caride. <sup>20</sup>Ñai “Jûmenijicure uvu yu” ayu baru, aru que ayuvacari ubecu baru ù jicure, ñai pōecu borocubi ù. Ñai ubecu baru ù jicure, ùi jáimure, jàve buojabebi ucu Jûmenijicure, ùi jámemure. <sup>21</sup>Que baru ðaicõjeimaramu maja. Ñai ucu Jûmenijicure, ujacurĩ ù jicure máre.

#### Maje vainĩ tuino ijáravucarõ ámenore

(Mt 11.30; Jn 14.15; 2 Jn 6)

**5** <sup>1</sup>Caivu “Jesúrecabe Jûmenijicui mácu Cristo” aivu, Jûmenijicui máramu maja. Cûinácu ucu baru apescu pacure, mamacure máre ubi ù. <sup>2</sup>Que baru maja urivu baru Jûmenijicure aru ðaivu baru yópe ùi ðaicõjeiye báquepe, coreóvaivubu urivu Jûmenijicui márare máre. <sup>3</sup>Ñai ucu Jûmenijicure ðayube caiyede yópe ùi ðaicõjeiye báquepe. Aru caiye iye Jûmenijicui ðaicõjeiye báque maijójabevu ñai pōecure ùi ðaiyede. <sup>4</sup>Caivu ina Jûmenijicui mára vainĩ tuivubu caino no ijáravucarõ ámenore. Jesucristo javede vainĩ turejaquemavu ijáravucarõ ámenore. Que baru maje ju aiye boje ùre maja máre vainĩ tuivubu nore. <sup>5</sup>Ñai ju ayu Jesucristore, Jûmenijicui mácure, ùrecabe vainĩ tuyu ijáravucarõ ámenore.

**Jūmenijicui mácūrā jāve coyuiño***(Jn 3.36; 5.32-37; 8.18)*

<sup>6</sup>Ñai Jesucristorecabe dayu bácu ijāravui. Ėrecabe jáđovaimu mácu Jūmenijicui mácu ocoque, Juan Bautista bácu ũi jáđovaiye báquede ũre Jūmenijicuque ocoque. Ũbenita quéda ocoque jáđovaimu mácu Jūmenijicuque amemi ũ. Quénora Ėrecabe jáđovaimu mácu Jūmenijicui mácu jiveque máre, ũi yaiye báquede jocucujaravena aru ũi nacajaiye báquede yainore jaruvarí. Ñai Espíritu Santovacari cainumua borocubecu ju aibi diede jāve. <sup>7-8</sup>Maja coreóvaivubu Jesucristore Jūmenijicui mácure jāve bajure yóbecue jáđovaiye cue boje. Mamarumure ñai Espíritu Santo coreóvare dayube diede. Aru maja coreóvaivubu diede Jesús ũi jáđovaiye báque boje Jūmenijicuque ocoque. Caiye iyeque coreóvaivubu maja Jesucristore Jūmenijicui mácure jāve bajure. <sup>9</sup>Pōeva “Jāvemu no” ne aiyede, maja ju aivubu náre. Ũbenita apenumua pōeva borocuma na. Ũbenita Jūmenijicucapūravu borocubecube cainumua. Que baru pñeno baju jaavu majare maje ju aye ũre. Aru Jūmenijicuvacari “ñai jímacu”, arí coyuii Jesucristorā. <sup>10</sup>Ñai ju ayu Jūmenijicui mácu Jesúre, majibi ũi ũmei Jūmenijicui coyuiye báquede jāvene. Ũbenita ñai ju abecu Jūmenijicui mácu Jesúre, yópe borocucupe dápiabi Jūmenijicure, ũi ju abe boje Jūmenijicui coyuiye báquede mamacurā. <sup>11</sup>Iye Jūmenijicui coyuiye báquebu ũi cuvare ðaiye majare jāravu cūiméjāravu baquinóre. Aru Jūmenijicu cuvare ðaibi majare diede maje ju aiyede mamacure. <sup>12</sup>Ñai yóvayu Jūmenijicui mácure cuvabi jāravu cūiméjāravu baquinóre ũque máre. Ũbenita ñai yóvabecu Jūmenijicui mácure cuvabebi jāravu cūiméjāravu baquinóre ũque.

**Toivarí buojarí majicaino***(Mt 7.7-11; Lc 11.9-13; Jn 15.7, 16; 16.23-24; 17.3; 20.31; 1 Jn 3.21-22)*

<sup>13</sup>Caiye iyede yu toivacaivu mujare, Jūmenijicui mácure ju aivure, muje majinajiyeye ayu cuvavivure jāravu cūiméjāravu baquinóre ũque.

<sup>14</sup>Coreóvaivubu maja maje jēniaiyede Jūmenijicuque yópe ũi urōpe jápiayure majare. Que baru jēniaivubu ũre jidubevva. <sup>15</sup>Aru yópe maje majiépedeca jápiayure maje jēniaiyede, quédeca majivu maja maje jēniaiyede Jūmenijicuque jacopūivure diede.

<sup>16</sup>Cūinácu pōecu jáñu maru ũ jicure āmeina teyure aru majicu baru Jūmenijicu ārumeteni buojayure no āmeina ðainore, jēniacaiye jaavu ñai pōecure ũ jicure boje, ũi cuvavuiyeye ayu jāravu cūiméjāravu baquinóre. Aru Jūmenijicu ārumeteni majicu baru, cuvare ðacuyume ũre jāravu cūiméjāravu baquinóre ũque. Ũbenita cūinácu pōecu āmeina ðayu baru Jūmenijicui ārumeteni buojabede, ñai pōecu nájicuyume, coateyu Jūmenijicure jaruvarí. Yu coyubevu mujare muje jēniacaiyede Jūmenijicuque ñaine. <sup>17</sup>Caiye pōeva ne āmeina ðaiye, diedecabu āmeina teiye. Ũbenita ape āmeina teiye coatede ðabevu pōevare Jūmenijicure jaruvarí. Quénora Jūmenijicu ārumeteibi diede.

<sup>18</sup>Majidivubu maja caivu ina Jūmenijicui mārare ðare numevure āmeina teiyede caride. Jūmenijicui mácu coreibi náre, abujuvai jabocu ũi imequiyeye

ayn náre. Que baru ámeina ðare numema na. <sup>19</sup>Coreóvaivubu maja Jūmenijicui mārare. Ūbenita caivn apevn ijāravucavn cūma abujuvai jabocui ðaicōjeimara. <sup>20</sup>Aru majidivubu maja Jūmenijicui mácure dayn bácure ijāravui, ũi coreóvare ðaquiyepe aivn majare ñai Jūmenijicure jāve. Maja cūrivubu éque, Jūmenijicu jāveque. Aru cūrivubu maja Jūmenijicui mácū Jesucristoque máre. Jesucristo Jūmenijicutame. Aru cūvare ðaibi majare jāravn cūimējāravn baquinóre éque. <sup>21</sup>Muja, jímajinape paivn, jíbejarā muja mearore pēpeimarare. Quénoramu.

## 2 San Juan

Mamabuinore coyuiyebu Juan mácu ùi toivacaiye báquede iyoca mamayoca yóbocayoca ùi paperayocare. Juan mácu barejaquémavu judíovacacu, Galilea ámicurijoborôcacu, aru Jesús ùi yávaiye méne beorí coyucôjeimaracacu. Ùi mamicu Santiago bácuque moa boaipôecu bácu barejaquémavu, Jesúí ôrejaquiye jipocare ùi mácure. Lucas bácu coyurejaquemavu Juan mácuí borore Hch 3:1-4:22. Majidivu ne dápiaiyepe, toivacarejaquemavu diyocare ùi mácu cucu bácu Éfeso ámicuríimaroi, ne coreóvaye boje ùi mácu Éfescavu Jesúre ju aipôevare coreipôecu bácu. Apevu ne dápiaiyepe, ico ju aipôeco báco aru ôi mára mácavu, ùi toivacaimara mácavu, Partia ámicurijoborôcavu barejaquémavu. Pôecu cubebi majicu ye ùju ùi toivacaiju bácarôre diyocare, ùbenita obedivu ne dápiaiyepe ániñjua báquede 87-90 d.C. baji, ùi toivaquiye jipocare ùi coyuiyede Jesucristorâ aru Jesucristoi jáðovaiye báquede ùi mácure, ùbenita ùi toivacaríburu yóbore ùi mamayoca paperayocare.

Toivacarejaquemavu Jesúre ju aipôevare, ne urájiyepe ayu Jümenijicure aru apevu Jesúre ju aipôevare máre, aru ne majinaiyepe ayu aipe ðaiye jaurôre jujovaiñque, ina Jesúre ju aivupe teniduiñque.

---

### Bueiye jáve aru jáve ùe máre

(Jn 13.34; 14.15, 23-24; 15.12, 17; 1 Jn 5.3; 3 Jn 3)

<sup>1</sup>Yu, bucucu, Jesucristore ju aivure coreipôecu, toivacaiñ mure, jíco, Jümenijicui beoimore aru mímarare máre. Meaicôjeivñ mujare. Yávacari jáve ùvñ mujare, maje coreóvaye boje Jümenijicui yávaiyede jávene. Aru yñ cüinácura ámevñ ùcñ mujare. Ùbenita caivñ ina coreóvaivñ Jümenijicui yávaiyede jávene, na máre urivubu mujare. <sup>2</sup>Ñuja urivubu mujare, ñuje majié boje Jümenijicui yávaiyede jávene. Que baru caivñ maja curivubu majidivñ iye yávaiyede jávene caride. Aru cainumua curâjaramu maja dieque. <sup>3</sup>Maje cuede ijâravñ curâjaramu maja me, coreóvaivñ Jümenijicui yávaiyede jávene aru urivñ majevure. Majepacu Jümenijicu, mamacu Jesucristomague, mearo ðacacuyume majare bojecubeda ùi me boje, ùi cômaje âroje jáiyede aru ùi cãrijimene cure ðaiyede máre.

<sup>4</sup>Majivñ yñ apevñ mímaracavure curivure ju arí Jümenijicui yávaiyede jávene yópe majepacu Jümenijicu ùi ðaicôjeiyepe majare. Que baru pare torojvñ yñ ji ùmei. <sup>5</sup>Aru mñ, jíco, ji ùmo, caride yñ jëniaivñ mure. Urâjarevñ majevure, caivñ maja Jesúre ju aivñ. Yu toivacabevñ mure apeno ðaicôjeino mamarore. Quéñora ji toivacaiye mure cünáturubu no ðaicôjeino mácarô, maje ju aiyé báque Jesúre mamarumure. <sup>6</sup>Aru maja urivñ baru Jümenijicure, ðarâjivubu caiyede yópe ùi ðaicôjeiye báquepe. Ðaicôjeimi ùi majare apevure urí curivure. Mña jápiaivubu no ðaicôjeino mácarôre, mñje ju aiyé báquede Jesúre mamarumure. Aru caride máre ju aivubu nopedecca.

### Ina jujoivaivü pōevare

(Mt 7.15; 1 Jn 2.18, 22-23; 4.1-3, 15)

<sup>7</sup>Obedivü jujoivaivü cuivübu yore ijāravüi. Nárecabu ju abevü Jesucristore jāve dayü bācure pōecupe ijāravüi. Ácu pōecu que ayü baru, úrecabe jujoyayü pōevare aru maucuvacu Cristore máre. <sup>8</sup>Me jájara müja, müje bíjabenajiyeye aivü yo bojedaino jaurōre mujare, müje memecaiye boje. Quénora me đajarā müja, cavarājivü caino no bojedaino jaurōre mujare.

<sup>9</sup>Aru ácu pōecu buebecu yópe Jesucristo üi bueiye báquepedeca quénora bueyü baru ape bueiyede Jesúi bueiye báquede jarüvarī, úrecabe yóvabecu Jūmenijicure. Übenita ácu pōecu bueyü baru yópe Jesucristo üi bueiye báquepedeca, úrecabe yóvayü Jūmenijicure aru Jūmenijicui mácure máre. <sup>10</sup>Ácu pōecu buecudayü baru müje yebai ape bueiyede Jesúi bueiye báquede jarüvarī, ñaine copü etabejarā müje cūramiai aru jacoyubejarā úre. <sup>11</sup>Que teni úre jacoyüivü baru, ju aivü üi bueiye borocuede, yóvaivübu úque ámeina đaivü.

### Meaicōjeino

(3 Jn 13-14)

<sup>12</sup>Apeno urarō coyüinore coyüiyüvü mujare. Übenita yore toivaiyübevü yü. Quénora napini coreivü yü jácudacayü müje yebai, yávacyü ji bajumiareca, maje buojarājiyeye ayü torojurivü maje ümei. <sup>13</sup>Mimamicoi mára, Jūmenijicui beoimo mácoi mára, meaicōjedama müre. Quénoramu.

### 3 San Juan

Mamabuinore coyuiyebu Juan mácu ùi toivacaiye báquede iyoca ùi buojaiyoca paperayocare. Juan mácu barejaquémavu judíovacacu, Galilea ámicurijoborôcacu, aru Jesús ùi yávaie méne beorí coyucôjeimaracacu. Ùi mamicu Santiago bácuque moa boaipôecu bácu barejaquémavu, Jesúí órejaquiye jipocare ùi mácure. Lucas bácu coyurejaquemavu Juan mácuí borore Hch 3:1-4:22. Majidivú ne dápiayepe, toivacarejaquemavu diyocare ùi mácu cucu bácu Éfeso ámicuríimaroi, ne coreóvaiye boje ùi mácu Éfesocavu Jesúre ju aipôevare coreipôecu bácu. Apevu ne dápiayepe, ñai Gayo bácu, Jesúre ju aipôecu bácu, ùi toivacaimu mácu, Partia ámicurijoborôcacu barejaquémavu. Pôecu cubebi majicu ye ujú ùi toivacaiju bácarôre diyocare, ubenita obedivú ne dápiayepe ániujua báquede 87-90 d.C. baji, ùi toivaquiye jipocare ùi coyuiyede Jesucristorá aru Jesucristoi jádovaiye báquede ùi mácure, ubenita ùi toivacaríburu yóbore aveyoca pucayoca ùi paperayocare.

Toivacarejaquemavu “Torojuvu yu mujaque”, coyucuy ñai Gayo bácu aru Demetrio bácu máre, ne ðaiye boje yópe jaurópe Jesúre ju aipôevare. Ubenita coyurejaquemavu ùi ubede ñai Diótfefes bácu ðaiyede.

---

#### Gayo mearore jímú

(Hch 19.29; Ro 16.23; 1 Co 1.14; 2 Jn 4)

<sup>1</sup>Yu, bucucu, Jesucristore ju aivure coreipôecu, toivacaiyu mure, ji yóvaimu, ji umu, Gayo. Yúvacari jáve uvu mure, maje coreóvaiye boje Jūmenijicui yávaieyede jávene.

<sup>2</sup>Mu, ji yóvaimu, ji umu, yu Jūmenijicucue jēniacaiyu mure, ùi cadatequiyepe ayu mure caiye mi ðaiyede, aru ùi me cure ðaquiyepe ayu mi bajure duica ijiéde jaruvarí yópe mi ūme cuepe me ámeina teiyede jaruvarí.

<sup>3</sup>Pare torojuvu yu ji ūmei apevu majevu Jesúre ju aipôeva ne coyuiyede, ne járiburu yóboi mure, aipe mi cuede Jūmenijicui yávaieyede jávene ju ayu.

<sup>4</sup>Yúcapūravu pueno baju torojuvu majicu muje borore jímajinape paivure, curivure ju arí Jūmenijicui yávaieyede jávene, yópe ùi urópe. Ye apejīe cubevu torore ðaiye yure die pueno.

<sup>5</sup>Mu, ji yóvaimu, ji umu, cainumua mearo ðaiyu mu yópe ðaiye jauépe mure mi cadatevaiyede majevure Jesúre ju aipôevare mi majibemara mácavureca. <sup>6</sup>Ina copaiyu bácvu mure jocarí coyuyama mi borore yui Jesúre ju aipôeva ne jápiayepe. Coyuyama aipe mi cadateiyede náre mi ue boje. Aru ne copaiyede mi yebai, cadatejacu náre cojedeca náre jauéde. Que teni mu me buojare ðaquiývú náre yópe Jūmenijicui urópe, ne curānuiyede. <sup>7</sup>Na etaima coyurájivú Jesús ùi yávaie méne ina Jesúre ju abevure cāreja. Aru náque yéde jacopubeteimada apejīene. <sup>8</sup>Que baru cadateiye jauvu majare máre ina Jesúre ju aivure ina coyuvure iye yávaieyede jávene, ne memecarājīyepe aivu Jūmenijicure jáve.

**Diótfrefes ũi āmeno đaino aru Demetrio ũi mearo đaino**

*(1 Jn 2.29; 3.6, 9-10)*

<sup>9</sup>Apeyoca paperayocare toivacavũ yũ caivũ Jesũre jũ aipõevare mi yebai. Ŭbenita Diótfrefes, ñai caivũre jaboteiyũcũ, jápiaiyũbebiya ji coyũiye báquede aru jũ abebiya yũre. <sup>10</sup>Que baru ji daiyede mi yebai coreóvare đaquijivũ yũ caivũre aipe ũi đaiye báquede. Borocucũ āmeina yávaibiya ñũjare. Aru pũeno āmeno đaiibiya. Ŭvacari copũ etabebiya majevũre curānũivũre. Pũeno āmeno đayũ, náre copũ etaicõjememiya ina curānũivũre Jesũre jũ aipõevacavũ copũ etaiyũrivũre náre. Pũeno āmeno đayũ, ina curānũivũre copũ etaiyũrivũreca ecoicõjememiya Jesũre jũ aipõeva ne cójijiñami jívũi. Que đaiibiya ñai Diótfrefes.

<sup>11</sup>Mũ, ji yóvaimũ, ji mũmũ, đabejacũ mũ nápe, āmeina đaivũpe. Quénora đajacũ mũ nápe, ména đaivũpe. Ñai põecũ ména đayũ Jũmenijicũ jicũbe ũ. Ŭbenita ñai põecũ āmeina đayũ coreóvabebi Jũmenijicũre.

<sup>12</sup>Demetriocapũravũ caivũ ne me yávaimũme. Ŭvacari cũbi me ũi majié boje Jũmenijicũi yávaiyede jāvene. Ñũja máre coyũivũbu ñũje jáiye báque boje aipe ũi mearo đaiyede. Aru majivũ mũ ñũje yávaiyede jāvene.

**Meaicõjeino**

*(2 Jn 12)*

<sup>13</sup>Apeno urarõ coyũinore coyũiyũvũ mũre. Ŭbenita yore toivaiyũbevu yũ. <sup>14</sup>Quénora napini coreivũ yũ jácũdacũyũ mi yebai maumejiena, yávaburĩ maje baju ména. <sup>15</sup>Cārijimenoque cũjacũ mũ. Caivũ mi yóvaimara yócvũ meaicõjedama mũre. Meajarari na, caivũ ñũje yóvaimara coapa nócavũ. Quénoramu.

# San Judas

Mamabuinore coyuiyebu Judas bácu ùi toivacaiye báquede paperayocare Jesúre ju aipõevare (1-3). Ùbenita árocavù ùi toivacaimara mácvure aru ári ùi cuede ùi toivacaiyede diyocare máre caivu majibevu. Judas bácu judfovacasu barejaquémavu. Jesucristoi yócu barejaquémavu. Majidivu ne dápiayepe, toivacarejaquemavu diyocare ániujua báquede 66-90 d.C.

Toivacarejaquemavu Jesúre ju aipõeva, ne me járajiyepe ayu, Jümenijicure ju abevu ne jujobenajiyeyepe ayu náre ne bueye jáve ámeque, ne vainí turí bíjabenajiyeyepe ayu ne ju aiyede jaruvarí (4-16). Coyurejaquemavu náre aipe ðaiye jaurore Jesúre ju aipõevare (17-23). Aru ùi toivacarí buojaiyede, jídejaquemavu mearore Jümenijicure, majare meadayure Jesucristoi ðaiye báque boje (24-25).

---

## Judas ùi meaicõjeino Jesúre ju aipõevare

(Mt 13.55; Mr 6.3)

<sup>1</sup>Yábu Judas, Santiagoi yócu, Jesucristore memecayu. Toivacaiyu yu mujare, Jümenijicui cutuimara mácvure. Majepacu Jümenijicui jecumaramu muja. Aru Jesucristoi coreimaramu muja máre. <sup>2</sup>Jümenijicu pueno baju cómaje ároje jájacurí mujare, me cure ðajacurí mujare cárijimevua, aru jecujacurí mujare.

## Ina borocuede bueivure coyüino

(He 11.4; 2 P 2.1-7; 1 Jn 3.12; Ap 2.14; 12.7)

<sup>3</sup>Muja, ji umara, yu toivacaríduivu mujare iye ména maje cuvaede caride, Jümenijicui meadayure báque boje majare maje ámeina teiyede jaruvarí. Ùbenita javvu yure ji jëniaye paruéque mujare, muje corenajiyeyepe ayu iye yávaiye méne maje ju aiyede, Jümenijicu cüinára ùi jíye báquede ùi põevare. Que baru apevu ne ámeina yávaru diede aru apevu ne oatuvaiyuru diede, parurõreca coyujarã muja iye yávaiyede jávene. <sup>4</sup>Apevu jujovaiyu carivubu maje jëneboi, yavenina ecoivu bácvu maje cójijinaamia jívu. Ina yópe teivu ùbenina dápiare ðaiyuríduyama mujare. Ùbenita Jümenijicure ju abevu, ámeno ðaðama. Jümenijicui mearo ðacaiyedeca ina põevare bojecubeda ùi me boje, urarõ ámenore ðaiyu, “Jümenijicu árumetecuyume caiye iyede”, arí dápiaríduyama na. Aru ju abenama Jesucristore, majare upacure aru maje jabocure cüinácura. Que baru yópe arí, “Jesucristo jabocu cüinácura ámemi”, borocurí adama na. Javede Jümenijicu toivaicõjenejaquemavu ùi yávaiyede, põeva nópe aivu nájinajivure, ne ámeina teiye boje.

<sup>5</sup>Iye ji coyuiyede mujare caride jave majivu muja. Ùbenita áruure ðaiyuvu mujare Jümenijicu nájine dayure ámeina teivure, ne ámeina teiye boje. Ina Israecavu bácvure, maje jabocu Jümenijicu ùi etavaríburu yóboi meadacuyu

na mácavure Egipto ámicurijoboröre jocarí, bíjare ðarejaquemavu nácavu bácavu ju abevu bácavure úre. <sup>6</sup>Aru ina ángelevare máre, ðabevure iye ne memeyede Jūmenijicui ðaicōjeiye báquede náre, Jūmenijicure ne ũbeni jaruvarĩburu yóboi aru ne curō mearore jocarí etarĩburu yóbore máre, Jūmenijicu buorí epedejaquemavu náre ñeminitucubui. Noi buoimara mautenajarama táumeaque cainumua pu dijáravu Jūmenijicui ñájiovaquijáravu baquinóita. <sup>7</sup>Aru quédecá ina Sodoma aru Gomorra ámicuriimaroacavu bácavure, aru apenoa imaroa joabenoacavu bácavure máre, Jūmenijicu ñájine ðarejaquemavu na mácavure toabo cūiméboque, ne urarō ámeno ðaiye báque boje ne bajumia. Dajocarejaquemavu na mácavu ne ðaiye báquede ne baju yópe Jūmenijicui cuedaiye báquepedeca pōevare ũi urōpe, ne ðarājiyepe ayu urarō cuyojarō ne ðaiye báquede ne baju ũmva matuivú bácavu. Jūmenijicu éicōjenejaquemavu na mácavure, apevu ne majinajiyepes ayu aipe vaiquýede pōeva nópe ámeno ðaivure.

<sup>8</sup>Aru napedeca ina jujoaivú, borocuede bueivú, maje jēneboi jujovadama ne baju. “Jāvemú no” aru “Mearomú yo”, arí dápíarĩduyama na. Ũbenita ámeina ðadama ne bajumia. Ju abenama jabovare. Aru ámeina yávadama ina pueno parurivure máre. <sup>9</sup>Ũbenita Miguevacari, ñai ángelevai jabocu, ũi jaraiye báquede ñai abujuvai jabocure ne jijateiye báquede ũi íye báqueda Moisés bácu baju bácaröre pueðayú ámeina yávabedejaquemavu úre. “Ñájicuyumu mu”, abedejaquemavu, ũi pueðaiye boje úre. Quénora “Jūmenijicu ñájine ðajacurí mure”, arejaquemavu Miguecapūravu. <sup>10</sup>Ina jujoaivú, borocuede bueivú, ámeina yávadama iye ne coreóvabede. Aru iye ne coreóvayede coreóvabenama ne majiéque yópe pōeva dápíavupe. Quénora coreóvadama diede ne dápíaiyeque jícua yópe áimara dápíabevupe. Aru bíjarājarama na no boje.

<sup>11</sup>¡Chīorajarama na! Ðadama yópe Caín mácupe, ñai imacu bácure boarí jaruvayú bácupe. Aru ámeina tedama, earājivú táuturare yópe Balaam mácupe. Ũbenita bíjarājarama, ne ju abe boje jabovare yópe Coré bácupe. <sup>12</sup>Yópe cuitótecajede muje docu jacorí ámedaiyepe, nopedeca ina jujoaivú, borocuede bueivú, ámetede ðadama mujacavure, ne cuyoje tede ðaiye boje pueðabevva apévure muje áranuiyede torojave teinoai. Yópe ovejavare coreipōeva ne baju me áiyepes ũbenita jĩbevva áiyede ovejavare, nopedeca ina jujoaivú ári ũcuñama apévú pueno. Aru yópe ocopeniboa ũmevunque japuino ũbenita ocabeni cadatebenope pōevare ne ocainore coreniduiyede, nopedeca ina borocuede bueivú, cadatebenama pōevai ũmene ne bueiyeque. Aru yópe jocucu jéidua cubecu jējāravure meamecupe, nopedeca ina jujoaivayede bueivú yaivú bácavupe paivúbu na, ne meame boje. Aru yópe pueno baju meamecupe dicure iniburu yóbore caino nūoque jobore jaruvarí, nopedeca pueno baju meamema na. <sup>13</sup>Aru yópe pācaiboa uraboa jia uraðai jaruvaiaboape écarui caivú ne jáinoi yaore aru pojeiyede máre, áme ũrojuede, nopedeca ina jáicōjedama caivure ne ðaiye cuyojeda. Aru yópe abíacova tuivú bácavupe ne nuimare jocarí pu ñeminitucubui, nopedeca ina jujoaivú curājarama cainumua ñeminitucubú pueno baju ñeminoi, no Jūmenijicui náre ðacaino mácaroi.

<sup>14</sup>Ina jujoaivure, borocuede bueivure, Enoc Jūmenijicui yávaiyede coyucarejaquemavu javede nápe paivú ne borore. Ñai Enoc yaibécu,

Jūmenijicui nuvaimu mácu apucura ijāravure jocarī, Adán mácu pāramecu bácu pāramecu bácu pāramecu barejaquémavu ũ, Enoc. Yópe arī, Jūmenijicui yávaiyede coyucarejaquemavu ũ: “Me jájara. Maje jabocu Jūmenijicu dacuyume. Aru obedivu baju ũi ángeleva meara baju darājarama úque. <sup>15</sup>Bojedacuyume caivu pōevare, ne đaiye báque boje ijāravui. Nájine đacuyume caivu ina āmeno đaivure ne āmeina teiye báque boje ne ju abe báquede úre, aru ne āmeina yávaiye báque boje copu úre”, arejaquemavu Enoc. <sup>16</sup>Ina jujovaivu, borocuede bueivu, āmeina yávađama caiyede. Ye apeno ne jáino ye baquinó āmevu náre. Aru āmecorodama caivu apevure máre. Ne āmeina đaiyuepe đadama na. Ne baju “Ńuja apa mearo đaivubu apenvu pueno”, ũbenina arī coyuyama. Aru “Muja máre mearo đaivubu apenvu pueno”, borocurī coyuyama apevure. Que arī, mamarumure vorī eadama náva méne apenvu pueno.

### Judas ũi majicaino Jesúre ju aipōevare

(2 Ti 3.1-5; 2 P 3.3)

<sup>17</sup>Muja, ji umara, ārūjara iyede Jesucristoi yávaiye méne beorī coyucōjeimara ne coyuiye báquede mujare jipocamia. <sup>18</sup>Coyiivu barejaquémavu mujare, yópe arī: “Ānijārvua buojaquijārvua baquiyéde, Cristoi copaidaquijārvu jipocare, darājarama pōeva Jūmenijicure ju abevu, yurivu, aru ne āmeina đaiyuepe đaivu”, arī coyurejaquemavu na. <sup>19</sup>Ina jujovaivu, borocuede bueivu, nárecabu coatede đaiyurivu mujacavure muje baju. Đaivubu ne āmeina đaiyuepe yópe āimara dapiabevupe. Aru carivubu űai Espírиту Santore cuvabevuva.

<sup>20</sup>Ŭbenita muja, jivu, ji umara, parure đajarā muje ũmei muje Jesucristore ju aiyequ me, Jūmenijicui majide đaiye báquede majare ũi yávaiye méne, maje meara marajiyépe ayu jaubevuva ũi jáinoi. Aru jēniajara Jūmenijicure űai Espírиту Santoi cadateinoque. <sup>21</sup>Cainumua đajarā muja yópe Jūmenijicui urōpe ũi űe boje mujare, muje napini coreiyedeca Jesucristoi cuvare đauiyede jārvu cūimējārvu baquinóre, ũi cōmaje āroje jáiye boje.

<sup>22</sup>Cōmaje āroje jájara muja ina ju abevure cāreja yávaiyede jāvene. <sup>23</sup>Apevure meadajarā maumena yópe muje íyepē pōecure toabore jocarī. Corebevuvu coyujarā náre Cristoi yávaiye méne. Aru apevure cōmaje āroje jájara, ne āmeina teiye boje. Coyujarā náre máre Cristoi yávaiye méne. Ŭbenita me đajarā, muje đabenajiyepē aivu āmenore nápe. Nácapūravu ne pare āmeina teiye boje cuitótecaje docucuricajede doivupe paivubu na. Que baru ũbejarā ne āmeina teiyede yópe muje ũbepe dicajede.

### Mearore jini buojaino

<sup>24-25</sup>Jūmenijicu cūinácuvare majicu aru parucu meadacuyu mujare, muje vainí tubenajiyepē ayu ye āmeno cubevuva. Ŭvacari núre đaibi mujare ũi jáinoi torojurivure muje ũmei. Jūmenijicu meacu baju meadaibi majare, Jesucristoi đaiye báque boje. Mearore jínajarevu úre. Ŭtame meacu baju, majicu urarō, pueno parucu, aru caivu pueno jabocu jārvu jipocare aru caride aru cainumua. Quédecabu. Quénoramu.

# Jesucristoi jáđovaiye báque

## Apocalipsis

Mamabuinore coyuiyebu Juan mácu ñi toivacaiye báquede Jesucristoi jáđovaiye báquede ñ mácure. Juan mácu barejaquemavu judíovacacu, Galilea ámicurijoborôcacu, aru Jesús ñi yávaiye méne beorí coyucôjeimaracacu. Ñi mamicu Santiago bácuque moa boaipôecu bácu barejaquemavu, Jesúí órejaquiye jipocare ñ mácure. Lucas bácu coyurejaquemavu Juan mácuí borore Hch 3:1-4:22. Éfeso ámicuríimarocavu Jesúre ju aivure coreipôecu barejaquemavu. Iye jáđovaiye báquede járejaquemavu ñi cue báquede jabova ne buoimu Patmos ámicuríiavui (1:9). Apevu ne dápiayepe, toivacarejaquemavu iyoca paperayocare ñi cuede nore. Ubenita apevu ne dápiayepe, toivacarejaquemavu diyocare ñi cuede Éfeso ámicuríimaroi o apeno ímaroi, ñ mácure ne jaetovaríburu yóbore no jiavure jocarí. Toivacarejaquemavu Jesúre ju aipôeva cójijivaivure siete paiñamia cójijiñamiai Asia ámicurijoborói (1:4). Pôecu cubebí majicu ye ujú ñi toivacaiju bácarôre diyocare, ubenita obedivu ne dápiayepe ániñua báquede 94-98 d.C. baji. Caiye ape toivaiye Majepacu Jümenijicui yávaiye mamaene coyuitucuboque toivaiye báquede ne toivaríburu yóbore, Juan mácu toivacarejaquemavu diyocare.

Juan mácu coyurejaquemavu diyocaque ñi jáino mácarôre Jesucristo meacu bajure, ñai toivaicôjeñu mácu ñ mácure caiye iye ñi jáđovaiye baquiyéde ñ mácure (cap. 1). Ina coreipôeva mácavure Jesúre ju aipôevare siete painoa ímaroacavu bácvure toivacarejaquemavu paperayocare (caps. 2-3). No yóboi, toivacarejaquemavu parure dacuyu Jesúre ju aipôeva ñáivure ne ju aiyé boje, ne majinajiyépe ayu aipe vaiquiyéde ijárvui buojaijárvuare, Jesucristoi vainí tuquiyéde abujuvai jabocure jaruvarí aru mamajárvu báquiyéde máre.

---

### Juan ñi coyurí buino

**1** <sup>1</sup>Iye coyuiyebu Jesucristoi coreóvare ñaiyue pôevare. Jümenijicui coreóvare ñaicôjequemavu Jesucristore iyede úre memecavure, ne coreóvarájiyepe ayu iye vaiquiyéde maumena. Que baru ñ daroquemavu cüinácu ñi ángelede ji yebai, ñi jáđovaquiyépe ayu yure, Jüare, úre memecayure, aipe tequinore ijárvui. <sup>2</sup>Yu coyucuijivü mujare caiye ji jáiye báquede, Jesucristo ñi coyüino mácarô jáve bajure yure Jümenijicui yávaiye.

<sup>3</sup>Torojucuyume ñai jári boroteyü ji toivaiye báquede iye Jümenijicui yávaiye coyucayéde apevure. Aru torojuráramama ina jápiaivü diede aru ju arí ñaiyu yópe iye toivaiye ñaicôjeiyépe. Maumena vaiquiyebu caiye iye.

**Juan ũi meaicōjeino ina Jesúre ju aipōeva cójjiivaivure**

(Mt 24.30; Mr 13.26; Lc 21.27; Jn 19.34, 37; Hch 26.23;

Col 1.18; 1 Ts 4.17; Ap 1.17; 4.5; 5.10; 20.6; 22.13)

<sup>4</sup>Yũ, Juan, toivacaivũ iyoca paperayocare mujare, siete paiyajuboare Jesúre ju aipōevare Asia āmicurijoborõi. Jūmenijicu mearo đacajacurĩ mujare bojecubeda ũi me boje aru torojurivũ muje ũmei me cure đacajacurĩ mujare ũque cārijimevũva. Que đacajacurĩ mujare Jūmenijicu, ñai cucu caride, aru cucu bācu javede, aru dacũyũ apejāravũre. Aru que đacajarāri mujare ina siete paivũ decova curivũ Jūmenijicu jabocui dobarõ mearo jipocai. <sup>5</sup>Que đacajacurĩ mujare Jesucristo, ñai coyũyũ bācu yāvaiyede jāvene Jūmenijicũrā pũ ne yaiváiyeta ũre, aru mamarumũ nacajañũ mācu yainore jarũvarĩ, aru cōjeñũ caivũ ina ijāravacavũ jabovare. Ñai Jesucristorecabe ũcu majare. Majarecabu ñajijurorivũ maje āmeina teiye boje. Ũbenita ũi ũe boje majare, ũrecabe boarĩ jarũvaicōjeñũ mācu ũi bajure, bojedacũyũ majare ũi jiveque, maje āmeina teiyede jarũvarĩ. <sup>6</sup>Ũrecabe epeyũ majare ũi jaboteimara mārājivũva aru sacerdoteva bārājivũva máre, maje memecarājiyepe ayũ ũi mearore jímure, jípacure. Mearore jījarāri caivũ Jesucristore, ñai parucũ caivũ pũeno cainumũa. Quédecabu.

<sup>7</sup>Jájara. Cristo dacũyũme ocopeniboaque. Caivũ pōeva jārājarama ũre, ina ũre pēvaivũ bācavũ jocucujaravena. Aru caiyajuboa pōeyajubocavũ Jesúre ju abevũ chĩori orājarama ne jidué boje, ne jāiyede ũre ěmeñũre cavarõre jocarĩ. Quédecabu.

<sup>8</sup>Maje jabocu Jūmenijicu, yópe arĩ, coyũyũbe, “Yurecabu báyũ bācu aru yóbocacũ máre. Que baru cuvũ yũ cainumũa”, arĩ coyũyũbe Jūmenijicu, ñai parucũ caivũ pũeno. Que baru ũ cubi caride, aru curejaquemavũ javede, aru dacũyũme apejāravũ baquinóre máre.

**Juan ũi jáino Cristo meacũ bajure**

(Ap 1.8; 2.8; 22.13)

<sup>9</sup>Yũ, Juan, mujecũbu, maje ju aiyẽ boje Jesucristore. Curivũbu maja ũque cūināvũre. Yũ máre ñājivũ mujapedeca. Aru Jesucristo parũre đaibi yũre máre yópe ũi parũre đaiyepe mujare, maje napinajiyepe ayũ maje ñājiyede. Aru jabotede dacũyũme majare ũque. Cútecacũ yũ jabova ne buoimũ Patmos āmicurijivũ, ji coyũiyẽ báque boje Jūmenijicui yāvaiyede Jesucristorā. <sup>10</sup>Nore ji cuede ñai Espĩritu Santo dāpiaicōjeame yũre. Aru jápiacacũ ji yóboi yāvaino bujĩnore, yópe trompeta āmicuriyo japuiyore japuiyepe. <sup>11</sup>Ñai yāvayũ yũre coyũame, yópe arĩ:

—Toivajacũ caiye mi jāiyede caride paperayoca ũmujuriyoca cāriáiyocaque. Aru toivarĩburu yóboi jarojacũ diyocare diyajuboa siete paiyajuboa Jesúre ju aipōevare Asia āmicurijoborõi. Diyajuboa pōeva curivũbu Ēfeso, Esmirna, Pérgamo, Tiatura, Sardis, Filadelfia, aru Laodicea āmicurĩmaroai.

Nópe arĩ, toivaicōjeame yũre.

<sup>12</sup>Copedicacũ, jácũyũ ũre, ñai yāvayũre yũre. Copedini jácacũ siete pajjaraboa pēoibũa tuojjaraboa úruque đajjaraboare. <sup>13</sup>Aru dijjaraboa coricai cúteame cūinácũ ũmũ. Maja, pōevape páyũ bateáme ũ. Doame ũmujuricaje cuitótecape ũi cubobaita eicajede aru buoáme úruque đaicāvare ũi ñareba

cūináturu baji. <sup>14-15</sup> Ëi poða boe matuiye bateávũ yópe oveja poða lana ãmicuripodape, aru abobico jujurõpe máre. Ëi yacorua cojiteavũ yópe toa uruiyepe, aru ãi cuboba cojidiba bateávũ yópe táure toaijide darĩburu yóbope. Aru ãi yávaino jápurateavũ yópe cūratācuve uratācuve bujinope. <sup>16</sup> Cuvateame ãi puru meapūravucapurui siete paivu abiācovare. Ëi jijecamure jocarĩ etavũ cūináve boicarove caipucapūravua upujidivepe. Aru ãi jiva pēoávũ yópe aviá pēoiyepe járavu coricare.

<sup>17</sup> Ji jáiyede ũre, tucacu yu ãi cuboba yebai yópe yaiyũ bácupe. Quénora tuoáme yure ãi puru meapūravucapurue. Aru áme yure:

—Jidubejacu mu. Yurecabu búyu bácu aru yóbocacu máre. Que baru cuvũ yu cainumua. <sup>18</sup> Yurecabu apucu cainumua. Yávacari yaidéjacacu. Ubenita apuvũ yu cojedeca. Aru apucuyumu cainumua. Quédecabu. Yurecabu llavede cuvacu yaivu bácvũ ne curõre máre. Que baru yurecabu buojayũ nuicõjeñũ pōevare toabo cūiméboi. <sup>19</sup> Que baru toivajacu caride mi jáiyede aru aipe vaiquiyede yóbore máre. <sup>20</sup> Que baru coyquijivũ mure caride aipe aiyurõre ina siete paivu abiācovare, mi jáimara curivure ji puru meapūravucapurui, aru ijaraboa siete pajjaraboa pēoibua tuojaraboa úruque ñaijaraboare máre. Diebu aru námu Jūmenijicui jádovameno jipocamia ubenita jádovaino caride. Jēvari coyuvũ ina siete paivu abiācovape paivure. Nárecabu yópe ina siete paivu coreipōevape, Jesúre ju aipōeva cójijivaivu diimaroai siete paiimaroacavũ ne coreipōevape. Aru jēvari coyuvũ ijaraboa siete pajjaraboare. Dijaraboarecabu yópe siete paiyajuhoape Jesúre ju aipōeva ne yajuboa cójijivaivu diimaroa, siete paiimaroai.

Que arĩ, coyúame yure.

**Juan ãi toivacaino Éfesocavũ Jesúre ju aipōevare**

(Ap 22.2)

**2** <sup>1</sup> Que arĩ, toivaicõjeame yure.

—Toivajacu ũre, ñai coreipōecure Jesúre ju aipōeva cójijivaivure Éfeso ãmicuriimaroĩ. Yópe arĩ, toivajacu mu: “Yópe arĩ, coyuibĩ ñai cuvacu ina siete paivu abiācovare ãi puru meapūravucapurui, ñai cucu ijaraboa siete pajjaraboa pēoibua tuojaraboa jēneboi. <sup>2</sup> Coreóvaivu yu mi memeinore, memecayure uetuyureca, aru mi napini ñájiyede máre. Coreóvaivu yu ye buojabecure napiñũ pōeva ámenare, aru jári coreóvayure ina, ‘Ñujamu Jesúre ju aivure ne daroimara coyurājivũ Jesús ãi yáviye méne’, mi majiquiyepe aivure ubenina jáve maru ne coyũino. Que teniburu, coreóvaivu mu Jesúre ju aivure ne daroimara ámevure. Quénora borocurivabu na. <sup>3</sup> Coreóvaivu yu uetubecvua napiñũre mi ñájiyede yure boje dajocabecvua.

<sup>4</sup> Ubenita cūináro mi ñainore ámeina jáivu yu. Quĩjino bajuta uvu mu yure caride. Mamarumure úteavũ mu yure pare mi ũmei. Ubenita caride dajocaivu mu mi uede yure. <sup>5</sup> Caride árujacu yure javede mi pare ue báquepe. Chĩori jaruvajacu mi ámeina teiyede. Aru oatuvajacu mi ñaiyede, ñacuyũ yópe mi ñaiye báquepe mamarumure mi coreóvaivure yure. Pare úteavũ mu. Ubenita que ñaiyubecu baru, ubecu bacuyũmu mu yure. Que baru mi yebai darĩ, mi pēoibua tuojarabore ñini, nuvacuyumu dijarabore mure jocarĩ.

<sup>6</sup> Ubenita cūináro mi ñainore me jáivu yu, mi ámeina jáiyede ina nicolaíta ãmicuriyajubocavũ ne ñaiyede. Yu máre ámeina jáivu ne ñaiyede.

<sup>7</sup>‘Caivũ me jápiajarã ñai Espíritu Santoi coyuiyede Jesúre ju aipõeva cójijivaivure: ‘Ina mujacavũ vainí tuivure âmenore jaruvarí âicõjecuyũmu yũ Jûmenijicui jioba coricacacũ jocucũ jêiduare, apure ðajjocucũ dicũ âmiá’, arí coyuyube ñai Espíritu Santo”, arí toivaicõjeame yure.

**Juan ãi toivacaino Esmirnacavũ Jesúre ju aipõevare**

(Ap 1.17; 20.14; 21.8; 22.13)

<sup>8</sup>Bediõva cojedeca yópe âme yure.

—Toivajacũ úre, ñai coreipõecure Jesúre ju aipõeva cójijivaivure Esmirna âmicuriĩmaroi. Yópe arí, toivajacũ mu: “Yópe arí, coyuiĩ ñai búyũ bácu aru yóbocacũ máre, ñai yaiyũ bácu nacajañũ mácu apucũ cojedeca. Que baru cuvũ yũ cainumua. <sup>9</sup>Coreóvaivũ yũ mi ñájiyede yure boje. Coreóvaivũ mure cve cuvabecure máre. Ubenita jáve ure cve cuvavũ mu Jûmenijicui cve méne. Aru coreóvaivũ yũ caiye iye ne âmeina yávaivede mi borore ina ‘Judíovabũ ñũja’ ubenina aivure. Ubenita judíova baju âmema na. Quénora nárecabũ Satanás jina. Aru cójijivaivubũ, memecarãjivũ úre.

<sup>10</sup>Jidubejacũ mi ñájiquinore. Jájacũ. Ñai abujuvai jabocũ bñore ðacuyũme apevũ mujacavure âmeina teivure jêni jacoĩnami, jári coreóvacuyũ muje ju aiyede yure. Caipucapũrũape pajjáravũ baquiyéde ñájinajaramu muja. Ju ajacũ yure pũ mi yaiyeta. Que teyure, yũ bojedacuyũmu mure me. Mure cure ðacuyũmu jãravũ cũimêjãravũ baquinóre yáque.

<sup>11</sup>‘Caivũ me jápiajarã ñai Espíritu Santoi coyuiyede Jesúre ju aipõeva cójijivaivure: ‘Ina mujacavũ vainí tuivure âmenore jaruvarí nũmenajarama toaboi cũiméboi’, arí coyuyube ñai Espíritu Santo”, arí toivaicõjeame yure.

**Juan ãi toivacaino Pérgamocavũ Jesúre ju aipõevare**

(Jn 6.48-50)

<sup>12</sup>Bediõva cojedeca yópe âme yure.

—Toivajacũ úre, ñai coreipõecure Jesúre ju aipõeva cójijivaivure Pérgamo âmicuriĩmaroi. Yópe arí, toivajacũ mu: “Yópe arí, coyuiĩ ñai cuvavũ ive boaicarove caipucapũravũ upũjivede. <sup>13</sup>Coreóvaivũ yũ mi curõre. Mu cuvũ nore Satanás ãi jaboteĩnore, ãi jaboteimara jêneboi. Ubenita nore cucuvacari, me ju ayũbu mu yure. Ænijãravũ bácarõ Satanás jina ne boarí jaruvaiye báquede Ántipas bácuire, ðajocabeteavũ mi ju aiyede yure. (Ñai Ántipas bácu coyuyũ barejãme yávaivede jávene yurã pũ ne boarí jaruvaiyeta úre.) Boarí jaruvaima ãi mácuire no mi ĩmaro, Satanái curõi.

<sup>14</sup>Ubenita apejĩ mi ðaiyede âmeina jáivũ yũ. Apevũ mujacavũ curivũ ðaivubũ yópe Balaam mácu ãi bueiye báquepe. Javede ñai Balaam mácu majicarejaquemavũ Balac bácuire ãi âmeina ðare ðaquiyepe ayũ ina Israecavũ bácvure. Áicõjenejaquemavũ na mácvure áiyede pẽpeimarare ne jíye báquede. Aru âmeina ðaicõjenejaquemavũ na mácvure apevũque nẽmarebucũva âmevũque máre. Nópe Balac bácuire ðaicõjenejaquemavũ Balaam mácu. <sup>15</sup>Quédecã apevũ mujacavũ ðaivubũ yópe ina nicolaĩta âmicuriyajibocavũ ne bueiyepe.

<sup>16</sup>‘Que barureca chĩori jaruvajacũ mi âmeina teiyede. Aru oatuvajacũ mi ðaiyede. Ubenita mi que ðaiyubedu, maumena ðacuyũmu yũ mi yebai,

ãdamatecuyũ náre, ina Balaam mácuĩ ðaiyepe ðaivure aru ina nicolaítava ne ðaiyepe ðaivure máre, ive boaicarove etaiveque ji jïjecamure jocarĩ.

<sup>17</sup>'Caivũ me jápiajarã ñai Espíritu Santoi coyuiyede Jesúre ju aipõeva cójijivaivure: 'Ina mujacavũ vainĩ tuivure ámenore jaruvarĩ áicõjecuyũmu yũ áiye me cavarõ mearo Jũmenijicui curõquede, iye áiye yaveiyede ijãravucavure jocarĩ. Aru jïcuyũmu náre coapa cũinájibo cũrajibo borijĩbore. Dijiborã toivaino cuvũ cũináro ámiá mamaro ámiáre. Aru ina jacopurãjivũ quévura coreóvarãjarama no ámiáre. Apecũ cubecube coreóvayũ no ámiáre', arĩ coyuibĩ ñai Espíritu Santo", arĩ toivaicõjeame yure.

**Juan ñi toivacaino Tiatiracavũ Jesúre ju aipõevare**

(Mt 16.27)

<sup>18</sup>Bedióva cojedeca yópe áme yure.

—Toivajacũ úre, ñai coreipõecure Jesúre ju aipõeva cójijivaivure Tiatira ámicurĩĩmaroi. Yópe arĩ, toivajacũ mu: "Yópe arĩ, coyuibĩ Jũmenijicui mácu, ñai yacorũa cojididua cucũ aru ñi cuboba máre cojidiba yópe táure toaijide ðarĩburu yóbope. <sup>19</sup>Coreóvaivũ yũ mi ðainore. Aru majivũ ucure yure aru apevure máre, ju ayure yure, memecayure Jũmenijicure, aru napiñure mi ñájiyede máre. Coreóvaivũ mi ðaino mearore. Mearo ðaivũ mu caride mamarũmu ju ayũ yure mi ðaino mácarõ pueno.

<sup>20</sup>'Ubenita cũináro mi ðainore ámeina jáivũ yũ. Mu jaetovabevũ nomióre õi ámiá Jezabel. Õ muje jëneboi 'Jũmenijicui yávaivede coyucaipõecobu yũ', ubenina aibico õ. Õi buieyeque jujoaibico ina yure memecaivure. Que baru ámeina ðare ðaibico náre apevũque nẽmarebucuvã ámevũque. Aru áre ðaibico náre áiyede pẽpeimarare ne jíye báquede máre. <sup>21</sup>Joe coreniduivũ yũ õi chiori oatuvacojiyepe ayũ õi ðaiyede, õi jaruvacojiyepe ayũ náre õi ámeina tede ðaiyede jaruvarĩ. Ubenita oatuvaiyubebico õ. <sup>22</sup>Que baru ñájiine ðacuyũmu óre pare. Aru ijimo macodóme õ, parãdo õi parainoi. Aru ina óque ámeina ðaivũ b́acavũ ne chiori oatuvabedu ne ámeina ðaiyede ópe, paraicõjecuyũmu náre máre õpedeca, pare ne ñájinajiyeye ayũ. <sup>23</sup>Aru boarĩ jaruvacuyũmu caivũ ina õi jujovaimara mácavure, mamara majurórivũpe paivure.

'Que ðarĩburu caivũ Jesúre ju aipõeva cójijivaivũ coreóvarãjarama. Yurecabu coreóvayũ caivũ põevare caiye ne d́apiayede aru caiye ne uede máre. Que baru bojedacuyũmu mujare coapa yópe muje ðaiye báquedepedeca. <sup>24</sup>Ubenita mujacapuravũ Tiatiracavũ ðabevũ yópe õi buieyepe. Coreóvaivũbevũ muja iye Satanái majié yaveiyede apevũ ne ðaiyepe. Cubevũ apeno ji ðaicõjeino mujare copũ. <sup>25</sup>Quénora ðajarã yópe ji coyuiyepe ji yávaiepe méne pu ji copaidaiyeta.

<sup>26-27</sup>'Ina mujacavũ vainĩ tuivure ámenore jaruvarĩ aru ðaivure yópe ji urõpe pu ne yayiyeta, jabotede ðacuyũmu náre cainoa joborõacavure iye parúeque yópe jipacui jabotede ðaiye báquepe yure. Jabotenajarama náre parúeque. Que baru cainoa joborõacavũ ne ju abedu, ðarãjarama náre yópe jobojororure boarĩ yavaiyepe abodo táuque ðaiyoque. <sup>28</sup>Aru cuvare ðacuyũmu náre ñai abiácorũ pẽoñũ miadáre ðaiyede.

<sup>29</sup>'Caivũ me jápiajarã ñai Espíritu Santoi coyuiyede Jesúre ju aipõeva cójijivaivure", arĩ toivaicõjeame yure.

**Juan ñi toivacaino Sardicavũ Jesúre jũ aipõevare**

(Mt 10.32; 24.43-44; Lc 12.8, 39-40; Ap 16.15; 20.12)

**3** <sup>1</sup>Bediõva cojedeca yópe áme yure.

—Toivajacũ úre, ñai coreipõecũre Jesúre jũ aipõeva cójjivaivũre Sardis ámicurĩĩmaroi. Yópe arĩ, toivajacũ mu: “Yópe arĩ, coyũibi ñai daroyũ Espiritu Santore Jesúre jũ aivũ ne cójjijĩnamiai siete paĩĩmaroai aru cũvacũ ina siete paivũ abiácovare máre. Coreóvaivũ yũ aipe ñayũre mure. Ñbenina arĩ, ‘Ñayũbe Jũmenijicũi urõpe ñi parũéque’, coyũivũbu mura. Ñbenita coateyũ bajubu mu Jũmenijicũre jarũvarĩ. <sup>2</sup>Jũracacũ, jabũóvayũ buojabevũ mu mi memecaiyede jocarĩ Jũmenijicũre. Que baru Jũmenijicũ ámeina jáimi mure. Que baru cãñũpe ámejacũ mu. Pueno parũre ñarĩ jũ are nũre ñajacũ mĩvũre ne ñmei, ina coatebevũre cãreja Jũmenijicũre jarũvarĩ, ne coateni bĩjabenajiyepẽ ayũ úre jarũvarĩ. <sup>3</sup>Que baru áũre nũjacũ caiye iye Jũmenijicũi yáyaiye mēne ne bueiyede mi jápiaiye báquede. Diede jápiarĩ, jũ arĩ, chĩori oatuvajacũ mi ñaiyede, jarũvacũyũ mi ámeina teiyede. Ñbenita nópe mi ñabedu, ñacũyũmu yũ mi yebai yópe ñavaipõecu ñi ñaiyepẽ. Aru ji ñaquinũmure ye majibecũyũmu mu.

<sup>4</sup>Ñbenita obebejĩna curivũbu no Sardis ámicurĩĩmaroi ámene ñabevũ, yópe põeva docũtede ñabepe ne cuitótecajeare, ne ñaiye boje yópe Jũmenijicũi urõpe. Nárecabu ñorãjivũ cuitótecajea boricajeare aru curãjivũ yũque. Que ñarãjarama me, ne napini coreiye boje Jũmenijicũi jĩye báquede náre.

<sup>5</sup>‘Ina mujacavũ vainĩ tuivũ ámenore jarũvarĩ nápe paivũ cuitótecajea boricajeare ñorãjarama. Ne ámiá toivaino mácarõre ánitucubo Jũmenijicũi paperatucubo, caivũ ina jãravũ cũiméjãravũ baquinóre cũvarãjivũ yũque ne ámiáre toivaitucubore tũreni jarũvabecũyũmu yũ ne ámiáre. Quénora, ‘Ji põevatamu na’, arĩ coyũcũyũmu jipacũ jáĩnora aru ñi ángeleva máre ne jáiyede.

<sup>6</sup>‘Caivũ me jápiajarã ñai Espiritu Santoi coyũiyede Jesúre jũ aipõeva cójjivaivũre”, arĩ toivaicõjeame yure.

**Juan ñi toivacaino Filadelfiacavũ Jesúre jũ aipõevare**

(Ap 21.2)

<sup>7</sup>Bediõva cojedeca yópe áme yure.

—Toivajacũ úre, ñai coreipõecũre Jesúre jũ aipõeva cójjivaivũre Filadelfia ámicurĩĩmaroi. Yópe arĩ, toivajacũ mu: “Yópe arĩ, coyũibi ñai meacũ baju, memecayũ Jũmenijicũre, aru jãvene bueyũ máre. Ñrecabe cũvacũ llavede, ñai jabocũ David bácu jino mácarõre. Yópe põecũi voaiyepẽ bieivede aru bieicõjemepẽ apẽvũre ñivede, nopedeca ñi ñaicõjeiyede põevare apede, ñame buojabenama ñaicõjemevũ náre diede. Aru yópe põecũi bieniburu yóbore ñivede máre, voaicõjemepẽ apẽvũre ñivede, nopedeca ñi ñaicõjemene põevare apede, ñame buojabenama ñaicõjeivũ náre diede. <sup>8</sup>Coreóvaivũ yũ aipe ñayũre mure. Coreóvaivũ yũ obebejĩna mĩvũ curivũre memecarãjivũre yure. Jũ aivũ mu ji yáyaiyede. Aru ‘Jesucristobe ji jabocũ’, jũ arĩ coyũivũ mu. Que baru jẽvari coyũrĩ, yópe põecũi apẽcũre ecoicõjeiyepẽ jedevacobe bieivede voarĩ aru apẽcũre bieicõjemepẽ ñivede, nopedeca mure memecaicõjeivũ yure. Aru põecũ cubebi mure memecaicõjemeni majicũ.

<sup>9</sup>‘Coyuivü mure ne borore ina ‘Judíovabu ñuja’ aivüre, ùbenita judíova baju àmema na. Quénora Satanás jinatamu cójijivaivü memecarājivü úre. Náreca ñuatutare dacuyumu yu mi cuboba yebai, ne coreóvarājiyepe ayu ji baju ucure mure. <sup>10</sup>Napivü mü mi ñājiyede yópe ji ñaicójeiye báquepe mure. Que baru jári corecuyumu yu mure mi ñājine ñaiyede. Caivü ijāravucavü Jesucristore ju abevü ne ñājinajiye javü náre. Ùbenita mure cadatecuyumu yu, mi ñājimequiyeyepe ayu iye ñājiovaiyeque. <sup>11</sup>Maumena dacuyumu yu. Ñajacu yópe mi bueiyepe ji yávaiepe méne apesu ùi imequiyeyepe ayu mi bojede mure.

<sup>12</sup>‘Ina mujacavü vainí tuivüre ámenore jaruvarí epecuyumu jabova parurivüva Jūmenijicui cūrami jívüi yópe bucporarua parure ñaiyepe cūramine. Aru etabenajarama na nore jocarí cainumua. Aru toivacuyumu yu nára Jūmenijicui ámiáre, aru Jūmenijicui ímaro ámiáre máre. No mamaro ímaro Jerusalén ámicurótamu. Ēmequiyebu cavarō mearo Jūmenijicui curōre jocarí. Aru toivacuyumu nára ji ámiá mamarore máre.

<sup>13</sup>‘Caivü me jápiajarā ñai Espíritu Santoi coyuiyede Jesúre ju aipōeva cójijivaivüre”, arí toivaicójeame yure.

**Juan ùi toivacaino Laodiceacavü Jesúre ju aipōevare**

(Jn 1.3; 16.33; Col 1.15, 18; He 12.6; Ap 5.5)

<sup>14</sup>Bedióva cojedeca yópe áme yure.

—Toivajacu úre, ñai coreipōecure Jesúre ju aipōeva cójijivaivüre Laodicea ámicuríimaroí. Yópe arí, toivajacu mü: “Yópe arí, coyubi ñajocabecüva, ñai coyuyü yávaieyede jāvene Jūmenijicurā pu ne boarí jaruvaiyeta úre. Úrecabe Jūmenijicui caiyede cuedare ñaimü mácu. <sup>15</sup>Coreóvaivü yu aipe ñayure mure. Coreóvaivü yu maucuvabecure yure yópe jujuteyure. Aru coreóvaivü yu memecabecure mi úmei yópe toaijiteyure. Mü ju ayuvacari yure, majiéda quénora ju ayubu. Yópe oco avia ùi boiyeque toaijide ñaiocore úcuiyubepe maja, nopedeca mi majiéda ju aiyede yure ùbevu yu. Mi me ju arí memecaru yure, yópe toaijiteyure meajebu. Mi ju abeni maucvaru yure, yópe jujuteyure, meamejebu. Ùbenita mi ju aiepe boje yure majiéda quénora, pueno baju meamevu. Que baru coavajacu mi baju yure jaruvarí o memecajacu yure mi úmei. <sup>16</sup>Ùbenita mi ñabe boje yópe ji urōpe majiéda toaijicupebu mü. Que baru jaruvacuyumu mure yure jocarí yópe ji jēcutuiyeyepe oco majiéda toaijiede ji jījecamure jocarí.

<sup>17</sup>‘Mácapūravü ‘Ure cuve cuvavü yu’, aríduivü mü. Aru ‘Apejē ye jaubevu yure’, aríduivü mü. Aru ‘Caiye cūináturu me nuivü yure ji majié boje’, aríduivü mü. Ùbenita ye coreóvabecubu mü mi baju chioñure, yópe cōmaje ārojacupe, cuve cuvabecupe, jári eabecupe, aru cuitótECAJE cuvabecupe máre. Yópe jári eabecu ùi jári eabepe ijāravuquede, nopedeca majide eabevü mü Jūmenijicu jiede. Aru yópe cuitótECAJE cuvabecu ùi cūyepe, nopedeca cūyevü mü mi ámeina teiye boje Jūmenijicui jáinore. <sup>18</sup>Que baru majicayubu mure aipe ñaiye javrōre mure. Yópe pōescu bojedaíyepe úrure mearo baju toaijide ñaino mácarōre, mü jāve cuve cuvaiyucu baru, ijacu yure iye méne ji cūvaede. Dinumu maquinóre jāve cuvacuyumu mü urarō méne Jūmenijicu jiede. Aru yópe pōescu ñni bojedaíyepe cuitótECAJE boricajede ùi doquiyeyepe ùi bajure cūyoje tebecuyü, yópe ámeina teiyede joaimü mácupe bájacu mü

ji yaiye boje, cuyoje tebecuyū mi āmeina teiye boje. Aru yópe pōescu īni bojedaiyepe yaco taiyóiyede, ūi me jāri eaquiepe ayū ūi epequiyede, me jāpiarī ađajacu iye bueiye de Jūmenijicui yāvaiyede, me majicuyū diede. <sup>19</sup>Yurecabu coreóvare đayū caivū ji ūmarare ne āmeina teiye de aru nājine đayū náre die boje máre. Que baru pūeno baju đaiyujacu Jūmenijicui ūrōpe. Chīori jarūvajacu mi āmeina teiye de. Aru oatūvajacu mi đaiye de.

<sup>20</sup>Jājacu. Yópe pōescu núcu cūrami bieīñamine jedevai ecoiyūscure, mautescuyū diñamicavūque, nopedeca yū mauteiyūvū múque. Yópe ūi órejaiyepe diñamicavūre, ne majinajiyeye ayū cūcūre, aru ne voarājiyepe ayū bieivede, nopedeca mi coreóvaiyede yū mauteiyūscure múque, mauteicōjejacu yūre. Dinūmūmica jīcu bājacu mū. Mi mauteicōjeiye de yūre múque, mautescuyūmū múque. Aru yópe pōeva ne torojuepe cōjijini āivū, nopedeca me curājaramu maja. Yū mi yóvaimū macuyūmu. Aru mū ji yóvaimū macuyūmu.

<sup>21</sup>Īna mujacavū vainī tūivūre āmenore jarūvarī dobaicōjecuyūmu yūque jabocu ji dobarō mearoi, ne jabotenajiyeye ayū yūque. Quédecā vainī tūrejacacu yū āmenore jarūvarī. Aru caride dobaivū yū jipacūque jabocu ūi dobarō mearoi, jaboteyū ūque.

<sup>22</sup>‘Caivū me jāpiajarā nāi Espíritu Santoi coyuiyede Jesúre jū aipōeva cōjijivaivūre”, arī toivaicōjeame yūre.

**Juan ūi coyūino cavarō mearocavū ne mearore jiyede Jūmenijicūre**

(Ap 1.4; 8.5; 11.19; 16.18)

**4** <sup>1</sup>No yóboi jácacu yū cojedeca jedevacobe bieivede voaicobe bácarōre cavarō mearo Jūmenijicui curōi ecoicobede. Jāpiacacu cojedeca iye yāvainore, ji mamarūmū jāpiaie báquede bujīepe yópe trompeta āmicuriyo japuiyore japuiyepe. Nāi yāvayū yure coyūáme, yópe arī:

—Dajacu yo cavarō mearoi. Mure jádovacuyūbu iye vaiquīye jané yóbore, arī coyūáme yūre.

<sup>2</sup>Dinūmūmiareca nāi Espíritu Santo dāpiaicōjeame yūre. Jácacu cūináro jabocui dobarō mearore no cavarō mearo Jūmenijicui curōi. Aru jácacu cūinácū dobacūre noi. <sup>3</sup>Nāi dobacu noi yópe cūrajīboa pare bojecurijīboa cojidijīboape ārojacu cojiteame. Jaspe āmicurijībo pare cojidijībope aru cornalina āmicurijībo jūarijibope ārojacu cojiteame ū. Aru jabocui dobarō mearo tarabutēni náme cúteame. Nāi náme cojiteame yópe apebo cūrajibo pare bojecurijībo esmeralda āmicurijībope. <sup>4</sup>Jabocui dobarō mearo yebai apenoi jabovai dobarōa mearoa veinticuatro painoa yópe meatarabū dobarī jāpurino mateávū. Aru die coapa dobateima veinticuatro paivū bucūva, doivū cuitótecajea boricajeare aru ne jipobui cuvateima úruque đaitarabūare máre.

<sup>5</sup>No jabocui dobarō mearo coricacarōre jocarī yaroino, yāvaino bujino, aru ōpo tuino máre etavū. No jabocui dobarō mearo coricacarō jipocai cúteavū siete paivea cāmavea pēoivea cojiéque. Diedecabu ina siete paivū Jūmenijicui decova. <sup>6</sup>Aru no jabocui dobarō mearo coricacarō jipocai cúteavū apeda yópe jia ūrada jivarupe paia, ūbenita me jāri javaiyoia bateávū diya.

No jabocui dobarō mearo coricacarō tarabutēni yóvaicūvaitōbuacapūrvavūai cúteima yóvaicūvaivū apūrivū. Aru ina apūrivū cúteima yacorūa caipūcapūrvavūa jipocare aru yóbore máre. <sup>7</sup>Cūinácū nácacu yavi jūacūpe

ãrojateame. Apecu yópe oteivecupe ãrojateame. Apecu apucu ùmure ãrojateame ùi jiva. Aru apecu yópe mfyavipe, águila ámicucu vuyupe, ãrojateame. <sup>8</sup>Ina yóvaicuvaivu apurivu cvarivu seis paicavea ne caveá náre coapa. Aru civateima yacorua caino ne caveái, puenocapūravui aru cāchinocapūravui máre. Jāravure aru ñamine máre dajocabevuva yópe aivu bateima:

Meacube, meacube, meacube maje jabocu Jūmenijicu. Érecabe parucu caivu pueno. Érecabe cucu bácu javede, cucu caride, aru dacuyu apejāravu baquinóre, aivu bateima na.

<sup>9</sup>Ina apurivu mearore jivu, pueðaiivu aru torojuede jivu bateima ñai dobacure no jabocui dobarō mearo coricacarōi, ñai cucure cainumua. <sup>10</sup>Ne nópe ðaiyedeca, ina veinticuatro paivu bucuvu pueðarī ñuatutaima úre dobacure no jabocui dobarō mearo coricacarōi ùi jipocai. Mearore jima úre, cucure cainumua. Davaima ne jipobu adaitarabuare jabocui dobarō mearo jipocai. Aru yópe aima úre:

<sup>11</sup>Mu, ñuje jabocu Jūmenijicu, murecabu caiyede cuedayu bácu. Caiye iye mi cuedaiye báque cuvū yópe mi urópe. Que baru mi meacu baju boje, ñuje mearore jíye aru ñuje pueðaiye máre javu mure aru ñuje coreóvarājiye mi paruéde máre, arī coyuima na.

**Juan ùi coyuino iyoca paperayoca ùmujuriyoca cāriáiyocarā aru Cristorā, ovejajicure ne aimura, máre**

(Jn 1.29; 16.33; 1 Co 5.7; Ap 1.6; 3.21; 8.3; 20.6)

**5** <sup>1</sup>Jácacu ñai dobacure jabocui dobarō mearo coricacarōra ùi puru meapūravucapuvui cūináyoca paperayoca ùmujuriyoca cāriáiyocare. Caiṛucapūravua toivaiyoca bateávū. Aru diyoca jedeva turuvai bieino mácārō mateávū yópe juturijoboyabea jājariyabea siete paiyabeaque. <sup>2</sup>Aru jácacu yu cūinácu ángle parucure jēniari jǎñure yávaino bujinoque, yópe arī:

—¿Namema meacu baju burarī majicu iyabea siete paiyabea jājariyabeare, voacuyu iyoca cāriáiyocare? arī jēniari jáme.

<sup>3</sup>Úbenita cūinácu cubeteame buojarī voayu diyabeare. Cavarō mearocacu cubeteame. Ijāravucacu cubeteame. Aru yaivu bácvu ne curōcacu máre cubeteame. Cūinácu cubeteame buojarī voayu diyabeare, jácuyu diyocare.

<sup>4</sup>Que baru yúcapūravu ocacu pare, ne eabe boje cūinácu meacu bajure, ùi voaquiyepe ayu diyabeare, jácuyu diyocare. <sup>5</sup>Úbenita cūinácu ina veinticuatro paivu bucuvacacu, yópe arī, coyuáme yure:

—Obejacu mu. Ñai parucu Judá ámicuriyajubocacu león ámicucu yavipe páyu daibi. Ñai jabocu David bácu pāramecu meacu bajube ù. Érecabe javede vainí tuyu bácu ámenore jaruvarī. Que baru ù macuyáme burarī buojayu iyabea siete paiyabea jājariyabeare aru voarī buojayu diyoca cāriáiyocare, arī coyuáme yure.

<sup>6</sup>Dinumu jácacu cūinácu ovejajicure no jabocui dobarō mearo coricacarō yebai ina yóvaicuvaivu apurivu aru ina veinticuatro paivu bucuvu ne jēneboi. Boarī jaruvaimu mácupe ãrojacuvacari núteame ù nore. Cúteame siete pajavaroa aru siete paidua ùi yacorua. Diedecabu ina siete paivu Jūmenijicui decova ùi daroimara mácavu cainoa joborōai. <sup>7</sup>Ñai ovejajicu nuri íame diyoca cāriáiyocare ñai dobacure ùi puru meapūravucapuvure jocarī. <sup>8</sup>Úi nore

íyedeca, ina yóvaicuvaivü apurivü aru ina veinticuatro bucüva máre pueðari ñuatutaima ñai ovejañicüi jipocai. Cuvateima biabeiboare arpa ámicuriboare ne purüi náre coapa. Aru cuvateima jororüa úruque ðaiduare mumijue buidíduare máre náre coapa. Jēvari coyurí diedecabu yópe Jūmenijicüi pōeva ne boroteiyepe paiye úque. <sup>9</sup>Aru yópe arí, yuríaima cūináro yuríaino mamarore:

Murecabu meacu baju. Que baru iyoca cāriáiyocare ñni, jājariyabeare burarí buojaivü mü. Meacu bajubu, müre ne boarí jaruvaiye báque boje. Murecabu bojedayü bācu pōevare mi jiveque ne vainí turí ámeina teiyede jaruvarí, Jūmenijicüi pōeva marajiyépe ayü. Bojedarejaquemavü mü náre, caiyajuboa pōeyajuboacavüre, aru caicamua yávaicamuacavüre, cainoa ímaroacavüre, aru caijaborðacavüre máre. <sup>10</sup>Epeivü mü náre, ne jabotenajiyepe ayü múque aru ne memecarājiyepe ayü majepacu Jūmenijicüre sacerdotevape. Aru nárecabu jabotenajivü ijāravucavüre, arí yuríaima na.

<sup>11</sup>Bedióva cojedeca jácacu. Aru jāpiacacu obedivü ángeleva ne yávaiyede. Jabocüi dobarō mearo coricacarō tarabuteni ina yóvaicuvaivü apurivüre aru ina veinticuatro paivü bucüvare máre ne dobarōa yóbore cúteima ina ángeleva, tarabuteni. Obedimillones baju bateima na. <sup>12</sup>Aru yópe arí, coðoboboima:

Ñai ovejañicü, ne boarí jaruvaimü mácvacari, meacu bajube. Que baru caivüre mearore jíye javvü úre. Yópe arí, coyjarārí na: “Úrecabe caiye paruéde cuvacu, aru caiye cue upacu, caiyede coreóvayü, aru caiyede ðaiye majicu máre”. Que baru caivü pueðajarārí úre, mearore jjarārí úre, aru torojuede jjarārí úre máre, aima na.

<sup>13</sup>Aru jāpiacacu yu obedivü yuríavüre. Caivü cavarō mearo Jūmenijicüi curōcavü, aru caivü ijāravucavü, caivü yaivü bācavü ne curōcavü, aru caivü jia urðacavü máre, caivü Jūmenijicüi cuedaimara yuríaima, yópe arí:

—Ñai dobacüre jabocüi dobarō mearo coricacarōra aru ñai ovejañicüre máre, caivü mearore jínajarevü, aru náre pueðarājarevü cainumua. Nárecabu pueno meara baju aru parurivü baju caivü pueno cainumua, arí yuríaima na.

<sup>14</sup>Ina yóvaicuvaivü apurivü, “Quédecabu”, aima na. Aru ina veinticuatro paivü bucüva ñuatutaima, mearore jínajivü ñai cucüre cainumua.

**Juan üi coyüino iye siete paiyabea jājariyabearā**

(Mt 24.29; Mr 13.24-25; Lc 21.25; 23.30; Ap 11.13; 16.18, 20)

**6** <sup>1</sup>No yóbore, jácacu Cristore, ovejañicü ne aimüre, burayüre cūináyabede iye siete paiyabea jājariyabeaqueda. Aru jāpiacacu cūinácu ina apurivucacu ayüre üi yávaino bujinoque yópe ôpo tuinope. Yópe arí, “Dajacu”, áme ü. <sup>2</sup>Jácacu cūinácu caballo bocüre. Nai tubacu úra cuvacu üi témutarabüre üi purüi. Jímu mateáme cūinátarabu jipobu adaitarabüre yópe ne jíyepe ñai vainí tuyüre. Etame vainí tuyü apevüre jocarí, aru vainí tucvü máre.

<sup>3</sup>Ñai ovejañicü üi buraiyede aveyabe jājariyabede, jāpiacacu apescu ina apurivucacüre, “Dajacu” ayüre. <sup>4</sup>Que aiyeda, etame apescu caballo, jūacu. Nai tubacu úra ádamatede ðaicōjeimü mateáme ijāravucavüre, ne boarí

jaruvarājiyepe ayu ne baju. Que teni cārijimenore cūiné daicōjeimu mateáme. Cuvateame cūináve boaicarove ūmujurivede.

<sup>5</sup>No yóboi, ñai ovejajīcu ūi buraiyede apeyabe jājariyabede, jāpiacacu apesu ina apurivucacure, “Dajacu” ayure. Jācacu cūinácu caballo ñemicure. Ñai tubacu ūra cuvateame cūináro ducuéde corevainore ūi purui. <sup>6</sup>Jāpiacacu apeno yávainore yópe. Jāpurateavū ina yóvaicuvaivu apurivu jēnebore. Yópe arī, coyuaúvū:

—Cūinákilo quénora trigo āmicue páu ñaiye bojedari eaino mávu pōecu cūinájāravure ūi memeiye báque bojeque. Aru yóbecurikilos quénora cebada āmicue páu ñaiye bojedari eaino mávu pōecu cūinájāravure ūi memeiye báque bojeque. Ūbenita āmedabecacu olivo āmicuricu jēidua córore aru vino ūyaicorore máre, arī coyuaúvū.

<sup>7</sup>No yóboi, ñai ovejajīcu ūi buraiyede apeyabe jājariyabede, jāpiacacu apesu ina apurivucacure, “Dajacu” ayure. <sup>8</sup>Jācacu cūinácu caballo cūrajumecure. Ñai tubacu ūra Yaino āmicucu. Aru ūi yóbore dáme cūinácu, Toabo cūimébo āmicucu. Boarī jaruvaicōjeimara mateima ina obedivu pōeva ijāravucavu. Caivu ijāravucavu yópe yóvaicuvaivu yajuboa teni, yópe cūináyajubocavu boarī jaruvaicōjeimara mateima na boainoque, aru āvūéque, duica ijiéque, aru āimara jiejecurivucque máre.

<sup>9</sup>No yóboi, ñai ovejajīcu ūi buraiyede apeyabe jājariyabede, jācacu apesu yaivu bācavu ne ūmene. Caivu ina boarī jaruvaimara māvavure ne coyuiye báque boje Jūmenijicui yávaiyede, ne ūmene jācacu yu Jūmenijicure jīcaiye de juaiva cāchinoi. Dajocabevūva “Jāvemu” arī coyurejaquemavu Jesucristoi yávaiye méne. <sup>10</sup>Bujíe codoboborī, yópe aima:

—Mu, ñuje jabocu, caivure cōjeñu, meacu baju, aru jāveque coyuyubu. ¿Joe baju corede ñacuyurū mu ñujare “Boropateivubu muja”, mi aiyeta ijāravucavure Jesucristore ju abevure? ¿Aru joe baju corede ñacuyurū mu ñujare mi ñájine ñaiyeta náre ne boarī jaruvaiye báque boje ñujare? codoboborī aima na.

<sup>11</sup>Ina yaivu bācavu jímara mateima ne cuitótecajea boricajeare. Aru coyumara mateima iye yávaiyede:

—Jabuóvajarā cāreja pu ne boarī jaruvaiyeta caivu ina mujevu memecaivure Jūmenijicure. Boarī jaruvaimara marajárama mujare, Jūmenijicui yávaiyede coyuiye boje, jāpiaima na.

<sup>12</sup>No yóboi, jācacu ñai ovejajīcu ūi buraiyede apeyabe jājariyabede. Pare cūjiavū caino joborō. Avia ñemiteame yópe pōeva ne doiyepe ñeminicajede, orājivu yaivu bācavure. Aru avia ñamicacu jūacu bajura bateáme yópe jivepe.

<sup>13</sup>Ina abiácova tuima cavarōre jocarī, yópe jocusu jēidua tuiyepe jocusure jocarī ūmevu pare japuiyede. <sup>14</sup>No cavarō bíjavū, yópe toivaiye báque bíjaiyepe paperayocare cāriáriburu yóboi. Aru caicūa cūracūa, caiye jiavua máre jaruvavū die curōre jocarī. <sup>15</sup>Dinūmure caivu jabova, aru cōjeivu, churaravai jabova, cūve cūvarivu, parurivu, yebacavu, aru yebacavu āmevu máre dupinanūma cūracobea jívui aru cūracūa űracūa cūraboja jēneboi máre. <sup>16</sup>Codoboborī órejaima cūracūa űracūare aru cūraboare máre, yópe arī:

—Tuajacūari ñujare. Yavejacūari ñujare ūre jocarī, ñai dobacure jabocui dobarō mearo coricacarōra, ūi jāmequiyeye aino ñujare. Yavejacūari ñujare

ûre jocarî, ñai ovejajîcu jorojîni jáñure. <sup>17</sup>Jave eaivu ijâravu parurijâravu, caivu Jûmenijîcure ju abevu ne ñájijâravu. Ñame buojari númenama náre copu, ñai jabocui dobarô mearo coricacarôî dobacure aru ñai ovejajîcure máre, arî codoboboima na, jidurivu.

**Juan ûi coyûino ina ciento cuarenta y cuatro mil paivu Israecavurâ**

**7** <sup>1</sup>No yóboi, jácacu yóvaicuvaivu ángelevare nûrivure maje curijoborô turuvai yóvaicuvaiturva yebai na coapa. Japuicôjemeteima náre coapa iye yóvaicuvaiye ûmevure ijâravuquede. Que teni japuicôjemeteima joborôre copu, jia uradare copu, aru apescu jocucure copu máre. <sup>2</sup>Aru jácacu apescu ángelede muri dayure aviá dainocapûravure jocarî. Cuvateame ûi purui ñai Jûmenijîcu apucu ûi jádovare dainore û jinare. Ñai ángele codoboboame, majicacuyu apescu yóvaicuvaivu ángelevare, ina Jûmenijîcui paruéde jímara mácavure, ne ámedare darâjiyepe ayu joborôre aru jia uradare máre. <sup>3</sup>Yópe arî, codoboboame:

—Ámedabejarâ cäreja yo joborôre, jia uradare, aru jocucure máre. Yéde ámedabejarâ pu ñuje jádovaiye baquiyéta ina maje jabocu Jûmenijîcure memecavure ne tütuvurâ náre coapa, jádovarajivu náre û jinare, codoboborî áme ñai ángele.

<sup>4</sup>Aru jápiacacu aipivu ina obedivu jádovaimara mácavure ne tütuvurâ Jûmenijîcu jinape. Caiyajuboa doce paiyajuboa Israecavure jocarî ciento cuarenta y cuatro mil paivu baju cúteimada. <sup>5</sup>Judá bácuî pâramenacavu doce mil paivu jádovaimara mateimada. Aru Rubén bácuî pâramenacavu doce mil paivu jádovaimara mateimada. Gad bácuî pâramenacavu doce mil paivu jádovaimara mateimada. <sup>6</sup>Aser bácuî pâramenacavu doce mil paivu jádovaimara mateimada. Neftalí bácuî pâramenacavu doce mil paivu jádovaimara mateimada. Aru Manasés bácuî pâramenacavu doce mil paivu jádovaimara mateimada. <sup>7</sup>Simeón bácuî pâramenacavu doce mil paivu jádovaimara mateimada. Leví bácuî pâramenacavu doce mil paivu jádovaimara mateimada. Isacar bácuî pâramenacavu doce mil paivu jádovaimara mateimada. <sup>8</sup>Aru Zabulón bácuî pâramenacavu doce mil paivu jádovaimara mateimada. José bácuî pâramenacavu doce mil paivu jádovaimara mateimada. Aru Benjamín bácuî pâramenacavu doce mil paivu jádovaimara mateimada máre. Caivu ina jádovaimara Jûmenijîcu jinape ciento cuarenta y cuatro mil paivu baju bateimada na.

**Juan ûi coyûino ina obedivu Jûmenijîcu jina boricajeare doivurâ**

(Mt 24.1; Mr 13.19; Jn 1.29; 4.10; 7.37; 10.1-16; 1 Jn 1.7; Ap 21.4)

<sup>9</sup>No yóboi, jácacu obedivu baju pœevare. Ne obedivu cûe boje, ñame buojari corevabejebu náre. Caijaborôacavu, aru caiyajuboa pœeyajubocavu, caicamua yávaicamuacavu, aru caiîmaroacavu máre cúteima na. Núteima no jabocui dobarô mearo coricacarô jipocai aru Cristo, ovejajîcu ne aimu, ûi jipocai máre. Caivu ina doima ne cuitótecajea boricajeare. Aru ûjamedua paiyede cuvateima náre coapa ne puruái. <sup>10</sup>Yópe arî, bujié codoboboima:

Maje jabocu Jûmenijîcu, ñai dobacu jabocui dobarô mearo coricacarôra, meadayube majare. Aru ñai ovejajîcu máre meadayube majare, aima na.

<sup>11</sup>Caivu ina ángeleva núrivu ina veinticuatro paivu bucava ne yóboi, ina yóvaicavaivu apurivu ne yóboi, no jabocui dobarō mearo coricacarō yebai, mori tuma ne jivare, mearore jínajivu Jūmenijicure. No jabocui dobarō mearo coricacarō jipocai mearore jima Jūmenijicure. <sup>12</sup>Yópe arī, mearore jima ūre:

Quédecabu. Maje jabocu Jūmenijicurecabe caivu ne mearore jimu, aru ne torojure daimu máre. Ūrecabe caiyede coreóvayu. Caivu torojuede jījarāri ūre aru pueđajarāri ūre. Ūrecabe caiye paruéde cavaçu aru caiye méne đaiye majicu máre cainumua. Quédecabu, aima na.

<sup>13</sup>Aru cūinācu nācacu, ina veinticuatro paivu bucavacacu, yópe arī, jēniari jáme yure:

—¿Namema ina pōeva doivu ne cuitótecajea boricajeare? ¿Árocavuba na? jēniari jáme yure.

<sup>14</sup>Yópe arī, coyucacu ūre:

—Mu, ji jabocu, majibevu yu. Murecabu coreóvayu náre, acacu yu.

Aru coyúame yure:

—Nárecabu napivu bācavu ne ñájiye báquede pūeno urarō baju. Joquemavu ne cuitótecajeare, bore đarājivu dicajeare ñai ovejajicu jiveque.

<sup>15</sup>Que baru núrivubu Jūmenijicu jabocui dobarō mearo jipocai. Memecaivubu ūre ūi cūrami jivui jaravure aru ñamine máre. Ñai dobacu jabocui dobarō mearo coricacarōra jārī corecuyume náre ūi cue boje náque. <sup>16</sup>Aipinumu ñájimenama na āvúena. Aru aipinumu cūiñómebu náre máre. Aipinumu aviá bōrī émecube náre. Aru aipinumu toajino máre cārijovamebu náre. <sup>17</sup>Nópe baquiyēbu ñai ovejajicu cūcu jabocui dobarō mearo coricacarō yebai dobacu ūi jārī coreiye boje náre. Jipocatecuyume náre oco apure đaioco pīapóino curōi. Tūrecuyume caiye oride ne yacorware. Aru torojure đacuyume náre cainumua, arī coyúame ñai bucacu yure.

### Juan ūi coyūino piniducayabe jājariyabena

(Ap 5.8; 11.19; 16.18)

**8** <sup>1</sup>No yóboi Cristo, ovejajicu ne aimu, burame apeyabe piniducayabe jājariyabede diyoca cāriaiyocare jocarī. Ūi buraiyede diyabede, ye yávaino jāpurabeni, caivu bi aima no cavarō mearo Jūmenijicui curōi coricaorare. <sup>2</sup>Aru jácacu ina siete paivu ángeleva núrivure Jūmenijicui jipocai. Jímara mateima siete paiyoa japuiyoare trompeta āmicuriyoare náre coapa. <sup>3</sup>Apecu ángele dáme. Cuvateame ūi purui cūináru jororu úruque đaidure mumijuede adaidure. Darī, nuteame Jūmenijicure jicaiyede juaiva jipocai. Jimu mateame ū ure mumijuede, ūi jicaquiyepa ayu caivu Jūmenijicui pōeva ne boroteiyede úque. Que teni jiamē dīede Jūmenijicure iva juaiva úruque đavarā Jūmenijicu jabocui dobarō mearo jipocai. <sup>4</sup>Iye mumijue éiyede, bico muavu Jūmenijicu jipocai ñai ángelei purure jocarī. Muavu Jūmenijicui pōeva ne boroteiyede úque. <sup>5</sup>Aru ñai ángele nūvari buiváme idu jororure toatūchia, ūi íno mácarōre Jūmenijicure jicaiyede juaivare jocarī. Buivárīburu yóboi, đuvame didure joborōi. Ūi đuvaiyede didure ōpo tuavū, yávaino bujino jāpurateavū, yaroino cojiteavū, aru joborō máre cújiavū.

### Juan ūi coyūino iye siete paiyoa japuiyoa trompeta āmicuriyoarā

<sup>6</sup>Dinumure ina siete paivu ángeleva cavarivu siete paiyoa japuiyoare trompeta āmicuriyoare meadāima, japurājivu diyoáre.

<sup>7</sup> Cūinācu āngele nācacu mamarumucacu japuáme mamarumu ũi japuiyore. Ũi japuiyede, ocavũ jājaro yópe cūrajiboape, aru toabo jiveque ocainope tuavũ joborõi. Yópe yóbecue coavaiyepe caino joborõre, cūináro iye yóbecuecarõ éni bĭjavũ. Caiye yóbecuricua jocucua curĭ, cūinācu éni bĭjavũ. Aru yópe yóbecue coavaiyepe caiye cōriá jūmenicōria máre, cūináro iye yóbecuecarõ, éni bĭjavũ.

<sup>8</sup> Aru cūinācu yóbocacu āngele japuáme ũi japuiyore. Ũi japuiyede, cūinācu cūracū uracūpe paicū, éicū toaque duvaicū mateávũ jia uradaí. Yópe yóbecue coavaiyepe caiya jia uradare, cūináro iye yóbecuecarõ jiveteavũ.

<sup>9</sup> Caivu yóbecurā apurivu jia uradacavu curivu, cūinācu yaiáme. Aru caiye yóbecuricua jiadocua uracua cue, cūinācu bĭjavũ.

<sup>10</sup> Aru pūcarāi yóbocacu āngele japuáme ũi japuiyore. Ũi japuiyede, cūinācu abíacoru uracu uruyu tuame yópe cāmavepe cavarõre jocarĭ. Caiye yóbecuriya jia curiyare, cūinādare tuame ñai abíacoru uracu. Aru cainoa yóbecurā oco pĭapóino cūrõare máre, cūinárore tuame ũ. <sup>11</sup> Jūmecu āmicuteame ñai abíacoru. Yópe yóbecue coavaiyepe caiye oco ũcuicore, cūináro iye yóbecuecarõ jūmeteavũ. Obedivu pōeva yaima, ina ũcuivu bācavu die oco jūmene.

<sup>12</sup> Aru yóbecurāi yóbocacu āngele japuáme ũi japuiyore. Ũi japuiyede ñai aviá yóbecue coavaiyepe ũre, cūináro iye yóbecuecarõ āmedaino mateávũ. Quédeca vaiávũ ñai aviá ñamicacure aru ina abíacovare máre. Cūináro ne yóbecuecarõ āmedaino mateávũ náre coapa. Que baru caivu ina yópe yóbecue coavaiyepe náre, cūináro iye yóbecuecarõ ñemiteavũ náre coapa. Yóvaicuvaiora jāravure ñai aviá bóbeteame. Aru yóvaicuvaiora ñamine ina ñamicavu máre pēometeima.

<sup>13</sup> Aru jácacu cūinācu mĭyavipe páyure, águila āmicucure. Vuyu bateáme pare ũmũ, cavarõ corica bajui, aviá ũi curõ jāravu corica baji. Jápiacacu ũi yópe ainore yávaino bujinoque:

—Āmeno bajutamu. Ina apevu yóbecurā āngeleva ne japurājiyede ne japuiyoare āmeno baju vaiquíyebu ijaravucavu Jesúre ju abevure, arĭ codoboboame ũ.

**9** <sup>1</sup> Aru yóvaicuvaiuvi yóbocacu āngele japuáme ũi japuiyore. Ũi japuiyede, jácacu cūinācu āngele abíacorupe ārojacu tuyu bācure cavarõre jocarĭ pu joborõita. Jímu mateáme llavede, voacuyu ecoino ũmujuricobede abujuva ne napini coreinoi ecoinore. <sup>2</sup> Ñai abíacoru voame no ũmujuricobe ecoinore. Ũi voaiyede nore, toabico etavũ dicobede jocarĭ. Yópe toabo urarõ uruiyede bico urarõ etaiyepe bateávũ die toabico. Aru die toabico ñemié ture ďávũ aviá ũi boiyede aru ũmevure máre. <sup>3</sup> Aru no toabico jocarĭ mujuñuva darĭ ěmeima joborõita. Ina mujuñuva paruéde jímara mateima, dorenajivu yópe muriva joborõcavupe. <sup>4</sup> Āmedaicōjememara mateima caiye cōriáre, caicua jocucure, aru caiye ape pĭaiyede máre. Qué Nora ina jáđovamemara mácavure ne tūtvarā Jūmenijicu jinape quévura ñájine ďaicōjemara mateima ina mujuñuva. <sup>5</sup> Ũbenita boarĭ jarvaicōjememara mateima ina ne dorenajimarare. Qué Nora ñájine ďaicōjemara mateima náre cūinápuupe paaviava baju. Ina ne doreimara ñájima yópe pōecui ñájiyepe muri doreiyede. <sup>6</sup> Ina ne doreimara ñájinajarama pare ānijāravua baquiyéde. Ne āmei ñájiye boje, yayurājarama na. Ũbenita yaino jēmequiyebu náre.

<sup>7</sup>Ina muju ñuva ãrojateima yópe caballova meadaimara mácvu boarânurajivupe. Ne jipobui cuvateima náre coapa apede yópe jipobu adaitarabua úruque ðaitarabuape. Aru ne jiva náre coapa ãmuvai jivape ãrojateavũ. <sup>8</sup>Ne poda náre coapa nomivai podape ãrojateavũ. Aru ne cõpiá máre león ãmicucu ãmacu yavipe páyui cõpiápe ãrojateavũ. <sup>9</sup>Ne ñarebare cuvateima náre coapa apede yópe cûmaicajea tâucajeape paiyede. Ne caveá máre bujiteavũ yópe pôeva boarânũvu jãturuicûa caballovaque cûyaivu bujiépe. <sup>10</sup>Ne pîcomua náre coapa muri pîcomupe ãrojateavũ. Aru doreima yópe muri ãi doreiyepe. Ne pîcomuaque ñãjine ðarĩ majiteima pôevare cûinápurupe paiaviava baju. <sup>11</sup>Ina mujuñuva ne jabocu cúteame. Ñ mateáme ñai ángele jári coreyu dicobe ãmujuricobede. Hebreovai yávaicamuaque Abadón ãmicubi. Aru griegovai yávaicamuaque Apoliôn ãmicubi. Que aino pôevare, ñãjine ðayu aiyurõtamu.

<sup>12</sup>Que teiyede, cûináro ñãjiovaino vaiávũ. Ñbenita pucarõa jauvu cãreja.

<sup>13</sup>No yóboi, cûinápurupe paivui yóbocacu ángele japuáme ãi japuiyore. Ñi japuiyede, jápiacacu yu cûinácu ãi yávainore. No yávaino etavũ Jûmenijicure jícaiye de juai va úruque ðaivare jocarĩ. Diva Jûmenijicu jipocai curivai yóvaicuvaitõbuare jocarĩ etavũ no yávaino. <sup>14</sup>Yópe arĩ, coyuvávũ no yávaino ñai ángele ãi japuiyore cuvacure:

—Jodejacu ina yóvaicuvai vu ángelevare buoimara mácvure jia urada Éufrates ãmicuriya yebai, arĩ coyuvávũ.

<sup>15</sup>Que baru ina yóvaicuvai vu ángeleva jodeimara mateima. Meadaimara mácvu batequémavu, boarĩ jaruvurãjivu obedivu pôeva ijãravucavure. Caivu yajubo curivupe yóbecurãque cûinácure boarĩ jaruvurãjivu bateima na. Meadaimara mácvu batequémavu nôpe ðarãjivuvu cûinóra beoiorare, cûinãjaravu beoijãravure, cûinácu avia beoiaviare, aru cûinãju beoijure máre. <sup>16</sup>Jápiacacu yu aipivu churarava caballovarã tubarivu daivure. Caivu ne obeno doscientos millones paivu cúteimada na.

<sup>17</sup>Yópe decoboinope jácacu ina caballovare aru nára tubarivure máre. Ne ñarebare cuvateima náre coapa cûmaicajea tâucajeare. Jûaro baju toape, jûmeno cavarõpe, aru cûrajumeno azufrepe máre jácacu yu ne cûmaicajeare. Ina caballova ne jipobua yópe león ãmicucu ãmacu yavipe páyui jipobupe bateávũ. Aru ne jijecamuaque jocarĩ etavũ toa, bico, aru azufrede máre.

<sup>18</sup>Iye toa, bico, aru azufreque máre boarĩ jaruvaima na obedivu pôeva ijãravucavure. Caivu yóbecurã curivu, cûinácu nácacure boarĩ jaruvaima ina caballova. <sup>19</sup>Ne boarĩ jaruvaiye parué cúteavũ ne jijecamui aru ne pîcomui máre. Ne pîcomua yópe ððavape bateávũ. Ne pîcomuaque cûima pôevare yópe ððavai cúiepe, ijide ðarãjivu náre.

<sup>20</sup>Caiye iye vainĩburu yóbore, ina pôeva ijãravucavu yaibévu bácvu cãreja ye jaruvaiyubeteima na ne pêpeimara mácvure. Quénora dajocabeteima ne mearore jíyede abujuvare. Aru dajocabeteima ne mearore jíyede pêpeimara mácvure. Ina pêpeimara mácvu pôeva ne ðaimara mácvubu úruque, aru plataque, bronceque, cûraboaque, aru jocucuaque máre. Nárecabu yéde jári majibevũ aru jápiarĩ majibevũ. Aru cuivu máre buojabema. <sup>21</sup>Aru chîomevu, ne ãmeina teiyede jaruvaiyubevũ, oatuvabeteima ne ðaiyede. Dajocabeteima ne boarĩ jaruvaiyede pôevare, ne yavié teiyede, ne ãmeina ðaiyede apevuque némarebucvu ãmevuque, aru ne ñavaiyede máre.

**Juan ñi coyũino ángelena ñai cɔvacaɾã quĩjiyoca paperayoca cãriáiyocare**  
(Hch 4.24)

**10** <sup>1</sup>No yóboi, jácacu apecu ángele parucure, ěmeñure cavarõ mearo Jũmenijicui curõre jocarĩ. Cũinábõ ocopenibo cũmavũ úre. Cũinácũ náme cúteame ñi jipobũ puenoi. Ñi jiva pẽoávũ yópe aviái pẽoiyepe. Aru ñi árađoa yópe edivea uruiyepe toaque árojae mateávũ. <sup>2</sup>Cuvateame ñi purũ cũináyoca quĩjiyoca paperayoca cãriáiyocare. Diyoca voaiyoca bácarõ mateávũ. Núteame ñi cuboba meapũravucacubobaque jia urađai aru ñi cuboba cãcopũravucacubobaque joborõi. <sup>3</sup>Codoboboame yávaino bujinoque yópe león ámicũcũ áimacũ yavipe páyũ codoboboiepe. Ñi codoboborĩburu yóbore, jápiacacũ siete painoa õpo tuinoare. <sup>4</sup>Õpo turĩburu yóboi, toivajurocũ batecácu ne yávainore. Ubenita jápiacacũ apeno yávaino cavarõ mearo Jũmenijicui curõre jocarĩ. Yópe arĩ, coyúávũ yure:

—No yávainore, siete painoa õpo tuinoa coyũino mácarõre mure toivabejacũ mũ. Yavejacũ caivure jocarĩ ne coyũino mácarõre, arĩ coyúávũ yure.

<sup>5</sup>Dinũmure ñai ángele, ji jáimũ mácu núcure jia urađai aru joborõi máre, jámuóame ñi purũ meapũravucapũrũre cavarõ mearo Jũmenijicui curõi. Aru yópe arĩ, coyúáme:

<sup>6</sup>—Jũmenijicurecabe apũcũ cainũmũ. Úrecabe cuedayũ bácu cavarõre aru caivũ cavarõcavure aru caiye cavarõquede máre, aru joborõre aru caivũ joborõcavure aru caiye joborõquede máre, aru jia urađare aru caivũ jia urađacavure aru caiye jia urađaquede máre. Ñai Jũmenijicũ ðare ðajacurĩ yópe ji aiepe: Napini corequiye cubejadeni. Jãravũ cũiquíyebu. <sup>7</sup>Quénora apecu ángele, ina siete paivũ piniducacũ, ñi japurĩ buiyede ñi japuiyore, Jũmenijicũ ðacuyũme yópe ñi dápiaiye báquedepedeca. Ðacuyũme yópe ñi jáðovameno mácarõpe jipocamia ñi coyuiye báquede ina ñi yávaiyede coyũcaipõeva mácavũ úre memecaivũ bácvure, arĩ coyúáme ñai ángele.

<sup>8</sup>Dinũmure jápiacacũ bediõva cojedeca no yávainore, ji jápiaye báquede cavarõ mearo Jũmenijicui curõre jocarĩ. Yópe arĩ, coyúávũ yure:

—Ícunũjacũ diyoca quĩjiyoca paperayoca cãriáiyoca voaiyocare ñai ángele núcu jia urađai aru joborõi máre ñi purũre jocarĩ, arĩ coyúávũ yure.

<sup>9</sup>Que baru ñai ángele yebai nũri jẽniacacũ, ñi jíquiyepe ayũ yure diyoca quĩjiyocare. Aru úcapũravũ áme yure:

—Iyocare ñni ájacũ. Jũmetequiyebe mi yapibũ. Ubenita mi jijecamure mumicorope ěmijuquiyebe, áme yure.

<sup>10</sup>Diyoca quĩjiyocare ícacũ ñi purũre jocarĩ. Aru ácacũ yũ. Mumicoro ěmijũre dápurateavũ ji jijecamure. Ubenita járũorĩburu yóboi jũmeteavũ ji yapibũ. <sup>11</sup>Dinũmure coyũima yure, yópe arĩ:

—Jauvũ mure mi Jũmenijicui yávaiyede coyũcaquiyepe cojedeca ina obedivũ ímaroacavũrã, aru põeyajuboacavũrã, yávaicamuacavũrã, aru jabovarã máre, arĩ coyũima yure.

**Juan ñi coyũino ina pũcarã coyũcaipõevara**  
(Lc 21.24; Ap 6.12; 8.5; 13.5-7; 16.18-21; 17.8)

**11** <sup>1</sup>Maje jabocũ jiame yure cũinádo corevaiyore yópe abojĩyope paiyore. Aru coyúáme yure, yópe arĩ:

—Corevacunujacu mu Jūmenijicui cūramine, aru ūre jīcaiye de juaivare aru ina mearore jīvure ūre nore märe. <sup>2</sup>Ūbenita corevabejacu tāibure Jūmenijicui cūrami jedevare, judíoia āmevure jīno mácārōre. Ina judíoia āmevū bījarorājarama no ĩmaro Jūmenijicu jinore cuarenta y dos paiaviava baju. <sup>3</sup>Aru yu jarocuyumu pucarā ūmuvare, ne coyucarājiyepe ayu yurā ajevure mil doscientos sesenta paijārvua baju pu ajevū nāre boarī jaruvaiyeta. Ina pucarā dorājarama cuitótecajeare yópe pōeva ne doiyepe orājivū yaivū bācavure, arī coyūāme yure.

<sup>4</sup>Ina pucarā coyūcaivū ūra, jēvari coyurī nárecabu icuā pūcacua jocucua olivo āmicuricua ijaravucavū jabocu jipocarā curicuaape paivū. Aru jēvari coyurī nárecabu ijaraboa pūcajaraboa pēoibua tūoijaraboa ijaravucavū jabocu jipocarā curijaraboaape paivū märe. <sup>5</sup>Ācu pōecu ūi nājine daiyuriduru nāre, toa etarī ne jījecamure jocarī ēni bījaroquiye bu ne mauvare. Que baru nōpe yainājarama nāme nājine daiyuridui vū ina pucarāre. <sup>6</sup>Ina pucarā paruē cūvarivūbu ocabede đarī buojarājivū ne coyuiyedeca cāreja Jūmenijicurā. Aru paruē cūvarivūbu jivetede đavū buojarājivū oco pīapóinoare. Aru duica ijié cure đavū buojarājivūbu märe ijaravucavure aipino ne ūrōpe. <sup>7</sup>Ina pucarā ne buojaiyede ne coyuiyede, nāi āimacu jījecucu āmecu muñū ūmujuricobede jocarī ādamatecuyume nāre. Ādamateni, vainī turī, boarī jaruvacuyume nāre.

<sup>8</sup>Yaivū bācavū ne bajuá báque cuquiye bu ūrarō ĩmarocamara, ne Jesucristore boarī jaruvaiĩmaroi, ne pēvaiye báquede ūre jocucujaravena. Diĩmarore pōeva adama “Sodoma” aru “Egipto” märe, ne jādovarajiyepe aivū aipe āmeno ārojarore no ĩmarore. <sup>9</sup>Cainoa ĩmaroacavū, aru caiyajuboa pōeyajuboaacavū, caicamu yávaicamuacavū, aru caijaborōacavū märe jārājarama ina yaivū bācavū ne bajuá báquede yóbecurijārvua corica bajureca. Yuarī jaruvaicōjemenajarama na ne bajuá báquede. <sup>10</sup>Ijaravucavū Jesucristore ju abevū torojurājarama ina pucarā ne yaie boje. Ina pucarā Jūmenijicui yāvaiyede coyūcaipōeva mácavū ne nājine đaiye báque boje pare ijaravucavū pōevare, nācapūravū torojuve teni jīnajarama ne bojecubeda jīyuede ne baju.

<sup>11</sup>Ūbenita yóbecurijārvua corica bajureca cāreja nore curīburu yóboi, Jūmenijicu nāre nacovari yainore jaruvārī, apure đaquemavū nāre cojedeca. Que baru nacajaima ina pucarā. Aru caivū ina jāivū bācavū nacajai vure cucumaima pare. <sup>12</sup>Dinumvure ina pucarā Jūmenijicui yāvaiyede coyūcaipōeva jāpiaima apeno yāvainore bujinoque, yópe ainore cavarō mearo Jūmenijicui curōre jocarī:

—Muri đajarā yui, ávū nāre.

Ne mauvai jāiyedeca nāre, muri nuima ina pucarā ocopeniboque pu cavarō mearo Jūmenijicui curōita. <sup>13</sup>Aru dinumumiareca joborō cújiavū pare. Yópe caipucapūruape paiye coavaiyepe caino no ĩmarore, cūináro iye caipucapūruape paiyecarō bījavū. Aru siete mil baju pōeva yaima no joborō cújiye boje. Caivū ajevū diĩmarocavū apūrivū cāreja cucumaima pare aru mearore jīma nāi Jūmenijicu cavarō mearocacure.

<sup>14</sup>Que teniburu yóbore, pucarōa nājiovainoa vaiávū caride. Ūbenita cūináro javū cāreja. Maumejiena vaiquíye bu no.

**Juan ũi coyũino siete ángeleva piniducacui  
japuiyena ũi japuiyo trompeta ámicuriyore**

<sup>15</sup>No yóboi, apecu ángele, ina siete paivu piniducacu, japuáme ũi japuiyore. Ũi japuiyede, yópe arĩ, coyũima obedivu cavarõ mearo Jũmenijicui curõcavu bujiéque:

Caride maje jabocu Cristoque jaboteivubu caivu ijāravucavure. Aru ũrecabe jabotecuyũ cainũmua, arĩ coyũima na.

<sup>16</sup>Dinũmure ina veinticuatro paivu bucũva dobarivu jabovai dobarõa mearoai Jũmenijicui jipocai joborõita mori turĩ mearore jĩma ũre. <sup>17</sup>Que teni yópe arĩ, coyũima:

Mũ, ñũje jabocu Jũmenijicu, parucu caivu pũeno, cucu caride aru cucu bácu javede, torojuede jĩvubu mure. Murecabu jaboteni báyu caivu pœvare mi parué ureque. Que baru torojuede jĩvubu mure. <sup>18</sup>Eaivu yo jāravu mi jādovaijāravu mi jorojĩni jáiyede pœva ne ámeina teiye boje. Eaivu yo jāravu mi jārĩ corevaijāravu caivu ina yaivu bácvure ne ðaiye báquede. Que baru caivu ijāravucavu mure ju abevũ jĩjateima pare. Caride eaivu yo jāravu mi bojedaijāravu pœvare ne ðaiye báque bojede. Me bojedacũñũmu mũ caivu mure memecaivure, ina mi yávaivede coyucaipœvare aru mi pœvare, ina mure pũedaivure máre, quĩjinare aru bucũvare máre. Aru bíjaroquijivu mũ caivu ina ijāravucavu ajevure ñájine ðaivure, arĩ coyũima na.

<sup>19</sup>No yóboi, Jũmenijicui cũrami, cavarõ mearo ũi curõĩ curĩñami voavũ. Nore jáino mateávũ ánitõcu ina judĩovai adaitõcure iveá cũravea Jũmenijicu “Yópe ðacacũyũmu yũ mujare”, ũi arĩ toivaiye báque curitõcure. Aru yaroino cojiteavũ, yávaino bujino jāpurateavũ, õpo tuavũ, joborõ cújiavũ, aru ocaino jājaro yópe cũrajiboape tuavũ máre.

**Juan ũi coyũino nomiõra aru āijuacurã máre**

(Lc 10.18; Jud 9)

**12** <sup>1</sup>No yóboi, cũináro jādovaino urarõ jāroteavũ cavarõĩ. Jāroteaco cũináco nomiõ cũmaimo máco aviáque yópe cuitótecajede cũmaiyepe. Núteaco aviá ñamicacu puenora. Őĩ jipobui cúteavũ jipobu adaitarabu doce paivu abiácovaque. <sup>2</sup>Micaco, juedocũvacodo bateáco maumejiena. Que baru pare odo bateáco, õre ijié boje. <sup>3</sup>Aru jácacu. Apeno jādovaino urarõ jāroteavũ cavarõĩ. Jāroteame cũinácu āijuacu uracu baju. Siete paibua jipobua cucu bateáme caipucapũruape pajavaroaque. Cúteavũ ũi jipobua coapa cũinátarabu jipobu adaitarabu. <sup>4</sup>Ũi pĩcomuque jabũboame obedivu abiácvare cavarõre jocarĩ pũ joborõita. Caivu yóbecurã abiácvare curivu, cũinácure jabũborĩ ture ðáme ũ joborõita. Ñai āijuacu mauteame ico nomiõ jipocai, áccũyũ õĩ juedocũvacojimure mama pœteyũra. <sup>5</sup>Ico nomiõ juedocũvateaco mamacu ũmujicure, jabotecũyũre caivu pœvare paruéque, yópe ũi cũvajũroepa abodo táuque ðaiyore. Que baru ñame ðabejebu yópe ũi cõjeiyepe. Ũbenita ñai juedocu ĩni nũvaimũ mateáme pũ Jũmenijicu yebaita, jabocui dobarõ mearoita. <sup>6</sup>Aru ico nomiõ dupini nũaco pœcũbenoi, Jũmenijicui õre meadacaino mácarõĩ. Nore āiye jĩmo macodóme õ mil doscientos sesenta pajāravua baju.

<sup>7</sup>No yóboi, ádamateino mateávũ cavarõ mearo Jũmenijicui curõi. Ángelevai jabocu ãi ãmiá Miguel ãi Ángelevaque ádamateame ñai ãijuacũre. Aru ñai ãijuacu máre ãi Ángelevaque ádamateniduame Miguejãre copũ. <sup>8</sup>Ûbenita ãijuacujãcapũravũ ye vainĩ tubeteima na, Miguejãcapũravũre. Que baru ãijuacujãre cavarõ mearo Jũmenijicui curõre mauteicõjememara mateima na cãreja. <sup>9</sup>Que baru ñai ãijuacu uracu ne jaetovaimũ mateáme cavarõ mearo Jũmenijicui curõre jocarĩ. Êrecabe ãñũ ãijuacu javecacu ãi ãmiá Satanás, abujuvai jabocu. Êrecabe jujovayũ caivũ ijãravũcavũre. Ë ãi Ángelevaque, nárecabu ãi jaetovaimara mácavũ cavarõ mearo Jũmenijicui curõre jocarĩ pu joborõita.

<sup>10</sup>Dinũmũre jápiacacu apeno yávainore bujinoque, yópe ainore cavarõ mearo Jũmenijicui curõre jocarĩ:

—Caride jave eaivũ Jũmenijicui meadaijãravũ põevare. Jũmenijicu jáðovaimi ãi paruéque ãi jaboteiyede. Cristo máre jáðovaimi ãi paruéde. Caride jaetovaimũme cavarõ mearo Jũmenijicui curõre jocarĩ abujuvai jabocu, ñai boro coyurĩ adaiðõecu bácu majevũ Jesucristore ju aipõevare. Jipocamia ñai núcu bateáme Jũmenijicu jipocai, boro coyurĩ adacuyũ náre jãravũre aru ñamine máre. <sup>11</sup>Cristo, ñai ovejãicu ne aimũ, ãi jive meiyẽ báqueque bojedarejaquemavũ majevũ Jesucristore ju aipõevare ne ãmeina teiyede. Ne ju aiyequẽ vainĩ tuyama ñai abujuvai jabocũre. Aru coyũima Jũmenijicui yávaiyede dajocabevũva “Jãvemũ” ne aiyede Jesucristoi yávaiye méne. Aru iye ne yávaiye méne coyũieque máre vainĩ tuyama ñai abujuvai jabocũre. Boarĩ jarũvarãjimaravacari ne nópe bueiye boje Cristo jiede, nácapũravũ buede nuivũ bateima ã jiede dajocabevũva. Que baru jecubeni ne baju apuéde ijãravũ, jidubevũva napini coreima ne yainãjinore. Que baru boro coyurĩ adaino cubevũ náre copũ caride. <sup>12</sup>Que baru torojue cuquiyebu cavarõ mearo Jũmenijicui curõi. Torojujarã muja cavarõ mearo Jũmenijicui curõcavũ. Ûbenita pare chõrajarama ijãravũcavũ, ina joborõi curivũ aru ina jia uradaĩ curivũ máre. Ñai abujuvai jabocu êmeimi muje yebai jarayũ baju, ãi coreóvaiye boje maumejiena ñãjicuyũre.

Nópe jápiacacu yũ.

<sup>13</sup>Ñai ãijuacu ãi coreóvaiyede ãi baju ne jaetovaimũ mácure joborõita, cujuáme ico nomióre, mamacure jueðocũvaco bácore. <sup>14</sup>Ûbenita ócapũravũ jĩmo mateáco pũcacavea, mĩyavĩpe águila ãmicucui caveáre, vũcodo põecubenoĩ, Jũmenijicui óre jĩno mácarõre õi curõita ãijuacũre jocarĩ joaita. Nore ãiye jĩye jauquiye bateávũ óre yóbecurĩjua aru apevũ corica bajĩ. <sup>15</sup>Dinũmũre ñai ãijuacũcapũravũ jẽcuturi japurĩ jaroáme urarõ ocore ãi jijecamure jocarĩ yópe jiape, õi muicojiyepe arĩduyũ óre, õi bĩjacojiyepe arĩduyũ. <sup>16</sup>Ûbenita yo joborõ cadateávũ óre. Yo joborõ jãruóiyepẽ dávvũ iye urarõ ocore, ñai ãijuacui jẽcuturi japurĩ jaroíye báquede. <sup>17</sup>Que baru ñai ãijuacu pare jĩjateyũ óre, ádamatecũnuame caivũ apevũ õi pãramenaque copũ. Nárecabu caivũ ina ju aivũ Jũmenijicui daicõjeiyede aru dajocabevũva coyũivũ Jesús ãi yávaiyede jãvene pu apevũ náre boarĩ jarũvaiyeta. <sup>18</sup>Aru ñai ãijuacu núcũnuame êpacũra jia urada êcarui.

**Juan ãi coyũino ina pũcarã ãimara jijecurivurã**

(Mt 24.24; 2 Ts 2.9-10; Ap 3.5; 17.3, 7-12)

**13** <sup>1</sup>Dinũmũre jácacu cũinácũ ãme ãimacu jijecũcũre murĩ dayũre jia uradare jocarĩ. Siete paibua jipobua cucu bateáme caipũcapũruape

paijavaroaque. Cúteavū ũi javaroa coapa cūinátarabū jipobū adaitarabū aru ũi jipobua coapa āmiá āmeāmiare toivaino mácarō. No āmiá cojubeteavū Jūmenijicure. <sup>2</sup>Ŋai ji jāimū yópe ārojateame: Yavipe páyū bateáme ũi baju. Ũi cuboba miei cubobape bateávū. Aru ũi jijecamu āimacū jijecucū león āmicucūi jijecamupe bateávū. Ŋai āijuacu jiaime ũi paruéde ŋai āimacure. Dobaicōjeame jabocūi dobarō mearora. Aru jaboteicōjeame ũre obedivū pōevare. <sup>3</sup>Ŋai āimacure, cūinábū ũi jipobuacabū yaivájurorichuri bácarō curō ārojateavū. Ũbenita no churi bácarōvacari paparī meateavū. No churi meateinore jāivuvata, caivū ijāravucavū Jesúre ju abevū pare cuicumaima. Aru nūima na ŋai āimacū yóboi, ne ju aipe boje ũi buieyede. <sup>4</sup>Coreóvaima na ŋai āijuacu jiyū bácare ũi paruéde ŋai āimacure. Que baru mearore jima ŋai āijuacure. Aru mearore jima ŋai āimacure máre. Yópe arī, mearore jima na: —Apecū cubebi paruacu ŋai āimacupe páyū. Name maucuvārī, ādamateni vainī tuivū buojabenama ũre, aima na.

<sup>5</sup>Ŋai āimacū coyicōjeimū mateáme, “¿Meacu bárica yū apevū pueno?” acuyū aru āmeina yávacuyū Jūmenijicure máre. Aru jaboteicōjeimū mateáme cuarenta y dos paivaiava baju. <sup>6</sup>Que baru āmeina yávame Jūmenijicurā, aru ũi cūramina, aru caivū ina cavarō mearo Jūmenijicūi curōi curivurā máre. <sup>7</sup>Ādamateicōjeimū mateáme Jūmenijicūi pōevare copū ũi vainī tuiyeta. Aru jaboteicōjeimū mateáme caiyajuboa pōeyajubocavure, aru caimaroacavure, caicamua yávaicamuacavure, aru caijaborōacavure máre. <sup>8</sup>Ŋai āimacure mearore jínajarama caivū ijāravucavū Jesúre ju abevū. Nāmu ne āmiāre toivabemara mácavū ānitucubo paperatucuboi, caivū ina jāravū cūimējāravū baquinóre cuvārājivure ne āmiāre toivaitucuboi. Ditucubo Cristo, ovejajicu ne aimū, ũi tucubobu. Ŋai ovejajicu ne boarī jaruvaimū macuyāre Jūmenijicu majidejaquemavū ũi cuedaquiye jipocai ijāravure.

<sup>9</sup>Caivū me jāpiajarā. <sup>10</sup>Ina buoimara mārājivū, jāve buoimara

marajárama na. Aru ina boarī jaruvaimara mārājivū, jāve boarī jaruvaimara marajárama na.

Que baru caivū Jūmenijicūi pōevare jāve ne napiye jauquiyebu caiye ne ŋājiyede. Aru jāve ne ju aipe jauquiyebu náre dajocabevūva Jūmenijicūi coyūye báquede ũi mearo đacaquiyede náre.

<sup>11</sup>No yóboi, jácacu apecū āme āimacū jijecucure mūrī dayūre joborōre jocarī. Pucarōa javaroa cuvateame yópe ovejai javaroape. Ũbenita yávame yópe āijuacūi yávaiyepe. <sup>12</sup>Ŋai āimacū jia urādere jocarī dayū bācu cuvateame ũre paruéde. Caiye ũi paruéde cuvateame ŋai āimacū joborōre jocarī dayū bācu. Ŋai jia urādere dayū bācūi jāinoi ŋai joborōre dayū bācu jaboteame ũre paruéque. Caivū ijāravucavū Jesúre ju abevure mearore jide đáme ŋai jia urādere dayū bācare, ŋai churi meateino mácarōre cuvare.

<sup>13</sup>Aru ũre pōeva ne đarī majibede máre đáme ũ. Toabore jōđaicōjeame cavarōre jocarī pū joborōita caivū pōeva ne jāinoi. <sup>14</sup>Pōeva ne đarī majibede đaicōjeimū mateáme ũ ŋai jia urādere dayū bācūi jāinoi. Yópe đarī jujovame caivū ijāravucavū Jesúre ju abevure. Đaicōjeame náre, ne pēpeimure ne pueđarājiyepe ayū ŋai āimacū apucure cāreja, buraimū mácureca boaicaroveque. <sup>15</sup>Ne pēpeimure đarīburu yóboi, ŋai joborōre dayū bācu ũmene japuicōjeimū mateáme pēpeimure, yávayū ũi buojaquiyeye ayū aru boarī jaruvaicōjeñū ũi buojaquiyeye ayū caivū ina mearore jiyubevure ũre.

<sup>16</sup>Toivaicōjeame caivu pōevare ne pūru meapūravarā o ne tūtūvarā. Quíjinare aru bucūvare máre, cūve cūvarivure aru cūve cūvabevure máre, yebacavure aru yebacavu āmevure máre, caivure toivaicōjeame ũ. <sup>17</sup>Ácu pōescu cūvabecu baru no toivainore, bojedarī ĩñu aru jini bojedayū máre buojabeteame. No toivaino mateávū ñai jia ũradare dayū bācui āmiá o yo número ũi āmiáque curō. <sup>18</sup>Majíe jāvū ũre coreóvayucure nore. Ñai coreóvayū corevajacurī ñai āme āimacu jijecucui número. Yo númerobu pōescu número. Yo númerobu seiscentos sesenta y seis.

**Juan ũi coyūino ina ciento cuarenta y cuatro mil paivu baju yuriaivurā**

(Stg 1.18; Ap 7.3)

**14** <sup>1</sup>No yóboi, jácacu cojedeca. Jácacu Cristore, ovejajicu ne aimu, núcure Sión āmicuricū cūracūi. Aru ũque cūteima obedivu pōeva, ciento cuarenta y cuatro mil paivu baju. Nárecabu cūvarivu ũi āmiáre aru jipacui āmiáre máre toivaino mácarōre ne tūtūvarā náre coapa. <sup>2</sup>Que teni jápiacacu cūináro bujinore cavarō mearo Jūmenijicui curōre jocarī. Jápurateavū yópe cūratācūve ũratācūve bujinope aru yópe ōpo tuino pūeno baju bujinope. Yópe obedivu biabeiboare arpa āmicuriboare ne upaiye bujíepe jápurateavū no bujino. <sup>3</sup>Ina ciento cuarenta y cuatro mil paivu baju pōeva yuriaima yo yuriaino mamarore no jabocui dobarō mearo coricacarō jipocai, ina yóvaicūvaivu apūrivu aru ina veinticuatro paivu bucūva ne jáinoi. Ina ciento cuarenta y cuatro mil paivu baju ijāravūcavu Cristoi meadaimara mácavu quévura yuriarī majiteima no yuriaino mamarore. Apecu cūbebi yuriarī buojayū nore. <sup>4</sup>Inarecabu āmetebavu bācavu nomivaque. Nomivaque cūbeteima na. Nárecabu nuivū ñai ovejajicu yóboi ári ũi nuinoi. Nárecabu bojedaimara mácavu caivu ijāravūcavu jēneboi, jínajimara márjivu Jūmenijicure aru ñai ovejajicure máre yópe jēidua mamarumu bucūidua pūeno mearua jíyepe. <sup>5</sup>Nárecabu ye borocubevū aru ye āmeno cubevū máre cainumua.

**Juan ũi coyūino yóbecurā ángeleva ne coyūiyena**

(Ap 10.6; 16.19; 18.2)

<sup>6</sup>No yóboi, jácacu apecu ángele, vuyure pare ũmūi, cavarō coricai avía ũi curōi jāravū corica baji. Coyuáme iye coyūiye cūiméne cainumua caivu ijāravūcavu ne jápiayede. Coyuáme caijaborōacavure, aru caiyajuboa pōeyajuboaacavure, caicamua yávaicamuacavure, aru caiīmaroacavure máre. <sup>7</sup>Yópe arī, coyuáme yávaino bujinoque:

—Puedajarā Jūmenijicure. Mearore jíjarā ũre ũi pūeno majíe boje. Eaivu iora pōevare ũi nájiovaquiora ne āmeina teiye boje. Que baru mearore jíjarā ñai dayū bācure cavarōre, aru joborōre, jia ũradare, aru oco pīaróinoare máre, arī coyuáme ñai ángele.

<sup>8</sup>Apecu ángele dáme ũi yóboi, yópe arī coyūyū:

—Jave bíjaivu no ĩmaro ũrarō Babilonia āmicurō. No ĩmarocavu ne pare āmeina ñaiye báque boje aru ne pare āmeina ñare ñaiye báque boje caivu ijāravūcavu Jesucristore ju abevure caijaborōai, bíjare ñaimaramu na, arī coyuáme ñai ángele.

<sup>9-10</sup>Apecu ángele dáme ina pūcarā yóboi, yópe arī, yávaino bujinoque coyuáme:

—Pare ñájinajarama caivu ina mearore jívu ñai áme áimacu jijecucu jia uradare dayu bácuere aru ñi pèpeimure máre, aru ina toivare ñaicójeivu ne títuvará náre coapa aru ne pururá máre ñi ámiáque o ñi númeroque máre. Ne que ñaiye boje, Jūmenijicu pare jorojini jáñu náre, ñájjine ñacuyume náre pare yópe ñi aiye báquepedeca. Que teni ñocuyume náre azufre ámicue tãu uruino jívui, ñi ángeleva meara baju aru Cristo, ovejãicu ne aimu, máre ne jáiyede. <sup>11</sup>Ibo toabo náre ñájjiovaibore jocarĩ bico porĩ muivu cainumua. Que baru cūiméquiye bu ne ñájiye. Quénora jabuóvabevuva ñájinajarama jãravure aru ñamine máre caivu ina mearore jívu ñai jia uradare dayu bácuere aru ñi pèpeimure máre, aru ina toivare ñaicójeivu ne bajure ñi ámiáque, arĩ coyúame ñai ángele.

<sup>12</sup>Que baru Jūmenijicui pōeva, ina ju aivure ñi ñaicójeiyede aru ju aivu Jesure máre ñajocabevuva ne ju aiyede ñre cainumua, ñacapuravure jãve ne napie jauquiye bu ñre ne ñájiyede.

<sup>13</sup>Dinumure jãpiacacu cūináro yávainore cavarō mearo Jūmenijicui curōre jocarĩ. Yópe arĩ, coyúávũ yure:

—Yópe arĩ, toivajacu mu: “Caride aru cainumua torojurãjarama caivu yainãjivu curivu Jesucristoque cūinávupe”, toivaicójeame yure.

Aru ñai Espiritu Santo ju arĩ coyúame:

—Jãvemu. Cūivũ ne ñájiye. Quénora jabuóvarãjarama. ñajocarãjarama ne pare memecaiyede. Aru cavarãjarama ne memecaino mácarō boje méne, arĩ coyúame ñai Espiritu Santo.

**Juan ñi coyũino Jūmenijicui ñaquinora jãravucavure yópe pōeva ne ñaiyepe ñinajivu ne oteye báquede**

(Ap 19.15)

<sup>14</sup>Dinumure jãcacu cojedeca. Cúteavũ cūinábo ocopenibo boribo. Aru diborã dobateame cūinácu. Maja, pōevape ñrojacu bateáme ñi. Cuvateame cūinátarabu jipobu adaitarabu úruque ñaitarabure ñi jipobui. Aru ñaruáme cūináve tãuve oteiyede buraive jevucurivede ñi purui. <sup>15</sup>Dinumure apecu ángele etame Jūmenijicui cūramine jocarĩ. Yópe arĩ, yávaino bujinoque coyúame ñai dobacure ocopeniborã:

—Jave eavũ iye oteye jẽjãravũ. Iye oteye jãravui bucuiye bu. Que baru burarĩ jãcu mu iye oteye bucuiyede, arĩ coyúame ñai ángele.

<sup>16</sup>Ñi que aiyeda, ñai dobacu bácu ocopeniborã burarĩ ñame caiye iye oteye bucuiyede jãravure jocarĩ.

<sup>17</sup>No yóboi, apecu ángele etame Jūmenijicui cūramine jocarĩ no cavarō mearo ñi curõĩ. Ñi máre cuvateame cūináve tãuve jẽidure buraive jevucurivede ñi purui. <sup>18</sup>Dinumure apecu ángele, ñai toare jãri coreyũ, etame Jūmenijicure jãcaiye juaivare jocarĩ. Yópe arĩ, yávaino bujinoque coyúame ñai ángele ive tãuve oteiyede buraive jevucurivede cuvacure:

—Iboá vino úyaiboa jãravucaboa ñemiboabu caride. Que baru burarĩ jãcu mu iboá vino úyaiboa ñemiboare, arĩ coyúame ñai ángele.

<sup>19</sup>Ñi que aiyeda, ñai ángele ive tãuve oteiyede buraive jevucurivede cuvacu burarĩ ñame caiboa iboáre ñemure vino úyaimure jocarĩ. Burarĩ ñiniburu yóboi, ñuvame iboáre pipoino jívui. Yópe ñarĩ Jūmenijicu, pare jorojini jáñu, ñájjine ñacuyume obedivu pōevare, ne ámeina teye boje. Que aiyurõtamu no.

<sup>20</sup> Yópe vino áyailboare pipoicorore yuaiyepe, nopedeca Jūmenijicui ñájine ñaimara ñájima ímaro jedevai. Aru ne jive etaiyede yuarí yabovaiyepe nuavu pu trescientos paikilometros joaita aru eavũ caballovare cõjeimeita.

**Juan ñi coyũino iye siete paiye ñájiovaiye yóboquede**

**15** <sup>1</sup> Dinũmũre jácacu apeno jádovaino urarõre cavarõí. Cuecumacacu ji jáiyede nore. Cúteima siete paivu ángeleva cavarivu náre coapa siete paiye ñájiovaiye yóboquede. Iye siete paiye ñájiovaiye vainíburu yóboi, Jūmenijicu ye ñájine ñabecube pōevare cojedeca. Iye siete paiye ñájiovaiyeque Jūmenijicu buojacuyũme ñi jádovaiyede ñi jorojĩni jáiyede.

<sup>2</sup> Aru jácacu apedare yópe jia urađa jivarũpe ubenita me járĩ javaiyoiya bateavũ. Aru toaque jĩvainope ārõjateavũ diya jĩvui. Diya écarui núteima ina vainí tuivũ bácavu ñai áme áimacu jijecucu jia urađare dayũ bácure. Vainí tuima ére ne mearore jĩbe báque boje ére aru ñi pēpeimure máre. Vainí tuima ére ne toivaicõjeme máque boje ne bajurã yo número ñi ámiáque curõre. Ina vainí tuivũ bácavu cuvateima biabeiboare arpa ámicuriboare, Jūmenijicui jĩboare, ne purui cavarivu náre coapa. <sup>3</sup> Yuríaima na yo yuríaino Moisés bácu Jūmenijicure memecayu bácu yuríaino mácarõre aru Cristo, ovejajĩcu ne aimũ, ñi yuríainore máre. Yópe arĩ, yuríaima na:

Mũ, ñũje jabocu Jūmenijicu, parucu caivu pũeno, caiye mi ñaiye urebu aru cuavaiyebu máre. Mũ jaboteyubu caivu pōevare, caijaborõacavũre. Caiye mi ñaiye mému aru jávemũ máre. <sup>4</sup> Mũ, ñũje jabocu, caivu pōeva pueđarājaramũ ñũja mũre jáve. Caivu pōeva mearore jínajaramũ ñũja mũre jáve. Mũ cūinácũrabũ meacu. Caivu pōeva caijaborõacavũ mũre mearore jínadarājarama ne jáiye boje mi ñaiye méne, arĩ yuríaima na.

<sup>5</sup> No yóboi, jácacu Jūmenijicui cūramine, cavarõ mearo ñi curõí curĩnamine voaiñamine. Diñamimũ iveá cūravea Jūmenijicui ñaicõjeiyeque epeiñami. <sup>6</sup> Dinũmũre ina siete paivu ángeleva cavarivu náre coapa iye siete paiye ñájiovaiyede etaima diñamine jocarĩ. Doima ne cuitótecajea docucubecajea, cojídicajeare, boricajea lino ámicuricajeare. Aru buoima járĩcõcava úruque ñaicávare ne ñareba cūinátũru bajĩ. <sup>7</sup> Aru cūinácũ ina yóvaicũvaivũ apurivũcacũ jĩame ina siete paivu ángelevare siete paidũa jororũa úruque ñaidũare náre coapa. Diduá jĩvui cúteavũ iye Jūmenijicui ñájiovaquiye pōevare, ñi jorojĩni jáiye boje ne ámeina teiyede. Ñai Jūmenijicu cubi cainũmũ. <sup>8</sup> Aru Jūmenijicu meacu ñi cue boje, aru ñi parué cuvae boje máre, bico porĩ mũri buiávũ diñami ñi cūramine. Que baru ñame buojabeteima ecoivũ diñami Jūmenijicui cūramine pu ne buojaiyeta iye siete paiye ñájiovaiyede ina siete paivu ángeleva ne davarājĩyede.

**Juan ñi coyũino iduá jororuarã ñájiovaiyeque**

(Mt 24.43-44; Lc 12.39-40; Ap 3.3; 6.14; 8.5; 11.13, 19; 14.10)

**16** <sup>1</sup> Dinũmũre jápiacacu apeno yávaino bujino etaiyede Jūmenijicui cūramine jocarĩ. Bujíéque yópe arĩ, coyuvũ ina siete paivu ángelevare.

—Iduá siete paidũa jororũa mũje cavaridũaqueque jayuarĩ jebenanuñara mũja ijāravui. Jūmenijicu ñájine ñacuyũme ijāravũcavũ Jesucristore ju

abevure iye siete paiye nájiovaiyede ũi jorojĩni jáiye boje ne âmeina teiyede, arĩ coyúávũ.

<sup>2</sup> Que arĩburu yóboi, cūinácu ángele, nácacu mamarumucacu, jayuárĩ jebecunũame ũi jororui cue báquede joborõi. Ũi que ðaiyede, obedivu pōevare etavũ churiá âmechuria. Caivu ina toivaicōjeivu b́acavure ne bajurã ñai âme âimacu jijecucu jia uradare jocarĩ dayu b́acui toivaiyequede aru mearore jivu b́acavure ũi pēpeimure máre etavũ náre churiá âmechuria aru âmeina ijié máre.

<sup>3</sup> Aru cūinácu yóbocacu ángele jayuárĩ jebeáme ũi jororũquede jia uradai. Ũi que ðaiyede, caiye oco jia uradare jiveteavũ yópe yaiyú b́acui jivepe. Aru caivu ina apurivu carivu jia uradai yaima na.

<sup>4</sup> Aru pucarãi yóbocacu ángele jayuárĩ jebeáme ũi jororũquede caiye jiare aru cainoa oco piapóinoare máre. Ũi que ðaiyede caiye iye oco máre jiveteavũ. <sup>5</sup> Dinũmure jápiacacu apesu ángelede, ñai ocore jári coreyure, yópe arĩ coyũyure:

—Mu, Jūmenijicu meacu baju, cūcu caride aru cūcu b́acu javede, mi yópe nájine ðaiye báque pōevare métamu caride. <sup>6</sup> Ne boarĩ jarũvaiye báque boje mi pōeva ḿacavure aru mi yávaiyede coyũcaipōeva ḿacavure máre, ne jivede mene ðaiye báque boje ne nájiiye métamu. Que baru caride murecabu bojedayu náre, ne nópe ðaiye báque boje. Murecabu ũcure dayu náre jivede yópe náre jauépe, arĩ coyúáme ñai ángele.

<sup>7</sup> Dinũmure jápiacacu cojedeca apeno yávaino jápuraede Jūmenijicure j́aiyede juaiware jocarĩ. Yópe arĩ, coyúávũ:

—Mu, ñũje jabocu Jūmenijicu, paracu caivu pueno, mi nájine ðaiye pōevare mému aru jávemu máre, arĩ coyúávũ.

<sup>8</sup> Aru yóbecurãi yóbocacu ángele jayuárĩ jebeáme ũi jororũquede aviárã. Ũi que ðaiyede, ñai aviá b́orĩ, éni, juaicōjeimu mateáme pōevare yópe toa éiyepe. <sup>9</sup> Ũi urarõ éiye boje, caivu pōeva ij́aravucavu Jesucristore ju abevu juaimara mateima na. Ũbenita juaimara ḿacavũvacari, chĩomevũ ne âmeina teiyede oatuvabeteima na ne ðaiyede. Aru ye mearore jíbeteima na Jūmenijicure máre. Quénora pueno baju âmeina yávare nuima Jūmenijicure, ñai paruéde cuvacu dayure iye nájiovaiyede.

<sup>10</sup> Aru yóvaicũvaivui yóbocacu ángele jayuárĩ jebeáme ũi jororũquede ñai âme âimacu jijecucu jia uradare jocarĩ dayu b́acui jabocui dobarõ mearora. Ũi que ðaiyede ñemié tuavũ caino ñai âimacu ũi jaboteinore. Aru caivu ũi jaboteimara cūivu bateima ne baju ne jemedoare, pare ne nájiiye boje. <sup>11</sup> Ũbenita nájivũvacari aru âmechuriare cuvativũvacari, dajocabeteima ne âmeina ðaiyede. Quénora ne nájiiye boje aru ne churiáre cuvæe boje máre pueno baju âmeina yávare nuima Jūmenijicure, cavarõ mearocacure.

<sup>12</sup> Aru cūinápurupe paivui yóbocacu ángele jayuárĩ jebeáme ũi jororũquede iya Éufrates âmicuriya jia uradarã. Ũi que ðaiyede, diya jia popoávũ, ina aviá ðainocavu jabova ne jatarãjiyepe aino diyare. <sup>13</sup> Dinũmure j́acacu yóbecurã abujuvare yópe momavape árojarivure. Cūinácu abujucu etame ñai áijuacu ũi jijecamure jocarĩ. Apecu etame ñai âme âimacu jijecucu jia uradare jocarĩ dayu b́acu ũi jijecamure jocarĩ. Aru apecu etame ñai Jūmenijicui yávaiyede coyũcaipōecupe teyu, borocuede coyũyũ, ũi jijecamure jocarĩ.

<sup>14</sup> Ina abujuva pōeva ne ðarĩ majibede ðaiye majiteima na. Etaivu bateima

cójjiovarānūrajivū caivū ijāravūcavū jabovare, ne ādamatenajiyeye aivū Jūmenijicuque, ñai parucure caivū pueno, ānijāravū, ūi pōevare pueno baju ñājiovare bŭojaquijāravū baquinóre, ne āmeina teiye báque boje. <sup>15</sup>Yópe arī, coyúame Jesucristo:

—Muje yebai dacuyumu muje majibedeca yópe ñavaipōecui daiyepe cūrami upacui majibedeca. Torojucuyume ñai apucu jári coreyu yure. Aru yópe pōecui meadaiyepe ūi cuitótécajede cuyoje tebecuyu ūi cuitótécaje cube boje, nopedeca torojucuyume ñai meadayū ūi ñaiyede cuyoje tebecuyu ji ñaiyede, āme Jesucristo.

<sup>16</sup>Ina jabova, abujuva ne cójjiovaimara, cójjima na apeno curōi, hebreovai yávaicamuaque Armagedón āmicurōi.

<sup>17</sup>Aru apecu ángele, ina siete paivū piniducacu, jayuarī jebeáme ūi jororūquede ūmevārā. Ūi que ñaiyede etavū apeno yávaino bujinoque no jabocui dobarō mearo coricacarō yebai Jūmenijicui cūramine jocarī. Yópe arī, coyúávū:

—Quénoramu, arī coyúávū.

<sup>18</sup>Dinūmumia yaroino cojteavū, yávaino bujinoque jápurateavū, ōpo tuavū, aru urarō joborō cújiavū máre. No joborō cújino āmeno mateávū cainoa apenoa joborō cújinoa pueno, Jūmenijicui pōevare cuedainumu mácarōmiata. <sup>19</sup>Que teni no uraimaro mácarōre bururī, bururī yōbecurōcarōape mauteavū no mácarō. Caiye ĩmaroa ijāravūque bĳainoa mateávū. Aru Jūmenijicu ārutequemavū no ĩmaro urarō Babilonia āmicurōre. Que baru bojedame nócavure ne āmeina ñaiye boje. Pare jorojĳĳū, ñājine ďame náre pare. <sup>20</sup>Caiye jĳavua aru caicūa cūracūa máre bĳavū. <sup>21</sup>Aru cavarōre jocarī tuavū ocaino jājaro urarō baju yópe cūraboape. Diboá coapa cuarenta paikilos ducuriboa bateávū. Tuavū pōevara, ijāravūcavū Jesucristore ju abevure. Ūbenita nácápūravū, ñājivūvacari diboá tuiye boje, pueno āmeina yávare nuima na Jūmenijicure, iye ñājiovaiye pare ñājine ñaiye boje náre.

**Juan ūi coyúino ico nomió āmeco baju ōi ñājiyena**

(Ap 3.5; 11.7; 13.1, 8; 19.16)

**17** <sup>1</sup>No yóboi, cūinacu ina siete paivū ángeleva iduá siete paidua jororūare cūvarivū bācavūcacu coyucudame yure. Yópe arī, coyúame:

—Dajacu. Jāđovacuyūbu mure aipe ñājicođore ico nomió ōi bajure bojedado ūmūvare urarō āmenore đacodo náque. Ōrecabe dobaco obediya jĳa puenora. <sup>2</sup>Caivū ina jabova ijāravūcavū ōi ñaiyepedeca ñaiyurivū bateima, yópe ne āmeina đájuroepe ōque. Jūmenijicu jiede ūbeteima. Yópe ōi pacotede đájuroepe ijāravūcavū Jesucristore ju abevure aru yópe ōi āmeina đare đájuroepe náre máre, nopedeca náre pare baju āmeina ñaiyure đaco ō. Que baru náre āmeina đare đaco ō, āme ñai ángele.

<sup>3</sup>Dinūmure ñai Espĳritu Santo jáicōjeame yure. Que teiyede ñai ángele nūvame yure pōecubenoī. Noi jācacu cūināco nomióre. Ō tubaco bateáco āme āimacu jĳecucu jūacurā. Ūi baju caibaju toivaino mateávū āmiā āmeina yávaiāmiaque Jūmenijicure copū. Siete paibua jipobua cúteame caipūcapūruape pajavaroaque. <sup>4</sup>Ico nomió doaco bateáco ōi cuitótécaje jūaricaje aru ñemijuaricajede. Ōi bajure meatedo báco bateáco úruque, aru

quíjiboa cūrajiboa cojidijīboa bojecurijīboaque aru perla āmicurijīboaque máre. Cuvateaco ōi purui cūináru jororū úruque daidure. Didu jívure buiávū caiye āmeina daiye, aru caiye ōi bajuque pueno āmene daiye báque máre.

<sup>5</sup> Ōi tūtavarā toivaino cúteavū cūináro āmiá: “No urarō ĩmaro āmiá Babilonia aino, yópe aiyurō mateávū no. Caivu ina ne bajure bojedaivu āmeina đarājivu apevūque népacopec pádobe. Caivu ijāravucavu Jesucristore ju abevure cainoa joborōai urarō āmeina dare đadobe”, ainore toivaino mateávū ōi tūtavarā.

<sup>6</sup> Dinumure coreóvacacu ico nomió boarí jaruvado bācore obedivu ina Jūmenijicui pōevacavure. Yópe ōi torojūjuroepe pacoco baru, nopedeca torojuteaco ō ōi mene daiyede ne jivede ōi boarí jaruvaiyede náre. Náre boarí jaruvaco, ne coyuiye báque boje Jūmenijicui yáviyede dajocabevūva ne “Jāvemū” aiyede Jesucristoi yávaiye méne. Que baru pare cucumacacu yū.

<sup>7</sup> Dinumure űai ángele, yópe arí, jēniari jāme yure:

—¿Aipe teni cucumañuru mu? Coyūquijivu mure aipe aiyuede mi jāiyede. Coyūquijivu ne borore, ico nomióre aru űai āimacu ōi tubamū cuvacure siete paibua jipobuare caipūcapūruape pajavaroaque. <sup>8</sup> űai āme āimacu jijecucu mi jāimu mācu cúteame javede. Aru cubebi caride. Ūbenita mūri dacuyume icobe űmūjuricobede jocarí űi bījacunūquiyē jipocai. Aru caivu ijāravucavu Jesucristore ju abevū pare cucumarajarama, ne jāiye boje űai āimacu cucu bācure javede, cubecure caride, űbenita dacuyure cojedeca. Ina cucumarajivurecabu ne āmiāre toivabemara mācavu ānitucubo Jūmenijicui paperatucuboi, caivu ina jāravu cūimējāravu baquinóre cuvarājivu ne āmiāre toivaitucuboi. Ditucubo toivaino marejaquémanū Jūmenijicui cūedaquiyē jipocai ijāravure.

<sup>9</sup> Majié javu űre coreóvaiyūcure nore. Jēvari coyurí ibuá siete paibua jipobua, diedecabu siete paicūa cūracūa ico nomió āmeco ōi dobae. Aru jēvari coyurí ibuá siete paibua jipobua diedecabu, siete paivu jabova.

<sup>10</sup> Cūinápūrupe paivu nācavu yaiquémanū javede. Cūinācu nācavu jaboteyube caride. Aru apecu dabecube cāreja. Ūbenita űi jabotecudaquiyede obebejāravua jabotecuyume ű. <sup>11</sup> űai āme āimacu jijecucu cucu bācu javede aru cubecu caride, ű macuyume apecu jabocu, ina siete paivu ne yóbocacu. Ūbenita cūinācu ina siete paivucacūvacaribe máre. űrecabe bījacuyū baju bījaiye baji.

<sup>12</sup> Caipūcapūruape pajavaroa mi jāiye báque, jēvari coyurí diedecabu caipūcapūruape paivu jabova bārājivu, jaboteni búbevū cāreja. Ūbenita cūināora baju jaboteicōjeimara marajárama űai āme āimacu jijecucuque.

<sup>13</sup> Caivu ina caipūcapūruape paivu jabova ne űme cūináturūbu. Que baru cūinārotamu ne đaiyurō. Cadatenajarama űai āme āimacu jijecucure ne paruéque aru ne cōjeiyeque máre. <sup>14</sup> Adamatenajarama na Crístore, ovejajicu ne aimure copū. Ūbenita űcapūravu jaboteyube caivu apevu jabovare aru cōjeñume caivu apevu cōjeivure. Que baru vainí tucuyume ina űre maucūvarivure. űi ādamatecudaiyede yóvarājarama ina Jūmenijicui beorí cutuimara mācavu dajocabevū cainūma ne ju aiyede űre, āme yure űai ángele.

<sup>15</sup> Aru űai ángele, yópe arí, coyure nūame yure:

—Jēvari coyurí iya obediya jia ico nomió āmeco ōi dobae, diedecabu ĩmaroacavu, aru pōeyajuboacavu, obedivu yávaicamuacavu, aru jaborōacavu

máre. <sup>16</sup>Ñai áme áimacu jijecucu aru ina caipucapucuafe paivu jabova, jêvari coyurî yópe ùi javaroape, mi jáimara mácvu jáiyubenajarama ico nomió ámecore. Caiye ôi cûvaede ñajarama ôre jocarî, dajocarâjivu ôre cuitótecaje cubecore. Árajarama ôi bajure. Aru bíjare ñarâjarama ôre toaboi. <sup>17</sup>Jûmenijicuvacari dápiacôjecuyume ina caipucapucuafe paivu jabovare. Que baru cûináturu baquiyébu ne ùme. Cadatenajarama ñai áme áimacu jijecucure, ñarâjivu yópe Jûmenijicui urôpe pu ne ñaiyede buojaiyeta caiye iye ùi ñaiyue báquede yópe ùi aiye báquedepedeca. <sup>18</sup>Aru jêvari coyurî ico nomió ámeico mi jáimo máco, ôrecabe yópe no ñimaro ñaicôjeïmarope caivu ina ñjaravucavu jabovare, áme yure ñai ángele.

**Juan ùi coyûno Babilonia ámicurîïmaro bíjainora**

(Mt 22.2-3; Ef 5.23-32; Ap 7.14; 14.8)

**18** <sup>1</sup>No yóboi, jácacu apescu ángele êmeñure cavarô mearo Jûmenijicui curôre jocarî. Parúêque cõjeáme. Aru ùi mearoque miadâre ñáme cainore. <sup>2</sup>Bujíêque yópe arî, codoboboame ù:

—Jave bíjaivu no ñimaro urarô Babilonia ámicurô. Diïmaro mácarô abujuva ne curô teivu. Obediyajuboa áimara vuivu pôeva ne ùbemara máre ne curô teivu no ñimaro mácarô. <sup>3</sup>No ñimaro mácarôcavu urarô ámeina ñare ñaima caivu ñjaravucavu Jesucristore ju abevure cainoa joborôai. Aru caivu ina jabova ñjaravucavu ámeina ñaima diïmaro mácarôcavuque. Aru caivu ñjaravucavu bojedaipôeva cûve cûvarivu bateima diïmarocavu ne urarô ámeina ñaiye boje. Que baru bíjaivu no ñimaro mácarô, áme ñai ángele.

<sup>4</sup>Aru jápiacacu apeno yávainore cavarô mearo Jûmenijicui curôre jocarî. Yópe arî, coyúávû:

—Muja, ji pôeva, etajarâ diïmarore jocarî, muja ámene ñabenajivu nócvuque, muje ñájimenajiyeye aivu náque. <sup>5</sup>Diïmarocavu ámene ñare ñuivu bateima, yópe cainiyutubope teni ne ámenoque pu cavarô mearo Jûmenijicui curôita. Urarô baju ámene ñaima na. Que baru Jûmenijicu árami caiye iye ne ámeina ñaiyede. <sup>6</sup>Nócvure ñajarâ yópe ne ñaiyepe ajevure. Yópe ne ajevure ñájine ñaiyepe, ñájine ñajarâ náre puquedeca. Aru yópe ne ajevure ámeno ñaiyepe, ámeno ñajarâ náre puque. <sup>7</sup>Yópe urarô mearore aru ure cûve bojecuede máre ne íye báquepe ne baju, nopedeca ñcavajarâ náre ñájiyede ure aru chîoiyede máre ure cûináturura. Yópe arî dápiarîduyama na ne ùmei: “Yui jabotenajivu dobarivûbu ñuja. Apejîe ye jaubevû ñujare. Cõmaje árojarivu ámenajaramu ñuja cainumûa. Aru chîomenajaramu, ñájimenajaramu máre cainumûa”, arî dápiarîduyama nócvu, “¿Meara márica ajevû pueno?” aivu. <sup>8</sup>Que baru cûinájjaravu baquinómiareca urarô ámeno daquiyebu diïmarocavure. Maumejiena nócvu chîori, ávûé ñájini, yainájarama na. Aru ne ñimare juarî bíjaino maquiyébu. Yópe vaiquiyebu, maje jabocu Jûmenijicu parucu baju “Ñájijara” ùi aiye boje.

Nópe jápiacacu apeno yávainore cavarô mearo Jûmenijicui curôre jocarî.

<sup>9</sup>Caivu ina jabova ñjaravucavu ámeina ñaivu bácvu diïmaro mácarôcavuque bujíêque codoboborî, ñarebare totarî orâjarama na, ne jáiyede toabico porî muinore no ñimaro mácarôre éiyede. <sup>10</sup>Jidurivu ne ñájiyube boje diïmarocavu bácvupe, joai mautenajarama. Aru yópe arî, orâjarama na:

—¡Ayu, ayu, mujare pare meamevü Babilonia âmicurîmarocavüre! Pare chîoivübu müja. Maumejiena no îmaro urred, parué curô mâcarô bíjaivü, orî codoboborâjarama.

<sup>11</sup> Caivü ijâravücvü bojedaipöeva mâre bujiéque codoboborî, ñarebare totarî orâjarama diîmarocavü bâcavüre boje. Que baru ñame cubenama caride ne cüvede bojedârî ívü. <sup>12</sup> Pöecu cubecube bojedârî îñu náre ne úrure, ne platare, ne cûrajiboa bojecurijîboare, ne perla âmicurijîboa bojecurijîboare mâre, ne cuitótecajea meacajea lino aru seda âmicuricajeare, aru ne cuitótecajea bojecuricajea jûaricajeare aru ñemijuaricajeare mâre. Pöecu cubecube bojedârî îñu náre caiye jocücua me mumijuricüare, ne cüve bojecuricüvede âimacü javaro marfil âmicurijavaroque ðaiyede, aru jocücua bojecuricüaque ðaiyede, bronce âmicue tâuque ðaiyede, hierro âmicue tâuque ðaiyede, aru cûrabo boribo mármol âmicuriboque ðaiyede mâre. <sup>13</sup> Pöecu cubecube bojedârî îñu náre ne canela âmicue mumijüede aru ape mumijüede mâre, ne juarâjinore mumijüröre ðaquiyepe aivü, aru ape mumijüede mirra âmicue aru olíbano âmicüede mâre. Pöecu cubecube bojedârî îñu náre ne vino úyaicorore, ne neo carorâjiyepe aivü neore, ne páure ðaiyede harina âmicue, aru ne trigo âmicue oteiyede mâre. Pöecu cubecube bojedârî îñu náre ne oteiâimarare ðucüéde úmaivüre, ne ovejavare, ne caballovere, ne jäturuicüare, aru ne yebacavüre mâre, ina dâpiaivüre. <sup>14</sup> Ina bojedaivü bâcavü, yópe arî, coyurâjarama diîmaro mâcaröcavüre:

—¡Ayu, ayu, jave cüivü mujare iduá jocücü jêidua mearua pare cojuteavü mujare! Jave bíjaivü mujare jocarî caiye müje cüve bojecüede aru müje tâturare mâre. Que baru diede ye cuvabenajaramu müja bediöva cojedeca, arî coyurâjarama na, chîoivü.

<sup>15-16</sup> Ina caiye iyede bojedaivü bâcavü cüve cüvateima ne bojedaiye báque boje diîmaro mâcaröcavü bâcavüque. Ina bojedaivü bâcavü joai mautenajarama, ne jáiyübe boje diîmaro mâcaröcavü ne ñáiyede. Aru bujiéque codoboborî, ñarebare totarî orâjarama, yópe arî:

—¡Ayu, ayu, pare meamevü no îmaro urred mâcarô! Nomió cüve cüvacope paino mateávü no îmaro mâcarô. Diîmarocavü bâcavü cuitótecajea meacajea lino âmicuricajeare, jûaricajeare aru ñemijuaricajeare mâre doivü bateima na. Aru úrure, aru perla âmicurijîboa bojecurijîboare, aru apejîboa cûrajiboa cojidijîboa bojecurijîboare mâre adaivü bateima na. <sup>17</sup> Maumejiena caiye iye ure cüve báque me cüivü, arâjarama ina bojedaivü bâcavü, chîoivü.

Caivü ina jiadocüa uracüare japuvaipöeva aru caivü ina curânüivü jiadocüa uracüaque, caivü ina jiadocüa uracüa memeipöeva aru caivü jia uradai memeipöeva mâre joai mautenajarama na. <sup>18</sup> Ne jáiyede toabico porî murî no îmaro mâcarô éiyede, yópe arî, codoboborâjarama:

—Apeno îmaro urred, ári nópe paino cubeteavü cainümare, arâjarama na.

<sup>19</sup> Que arî, duvarâjarama jobore ne baju jipoburâ ne chîoie boje. Bujiéque codoboborî, ñarebare totarî orâjarama na, yópe arî:

—¡Ayu, ayu, pare meamevü no îmaro urred mâcarô! Caivü ina cüvarivü bâcavü jiadocüa uracüare jia uradai cüve cüvarivü bateima diîmarocavü bâcavü ne bojedaiye báque boje na mâcavüre ure cüvede. Maumejiena caiye iye me bíjarî cüivü. <sup>20</sup> Müja, cavarô mearo Jûmenijicüi cüröcavü, torojujarâ müja no îmaro

mácarôcavu bácvu ne ñájiye boje. Muja, Jūmenijicui pôeva, Jesucristoi yávaiye méne beorí coyucôjeimara aru Jūmenijicui yávaiyede coyucaipôeva máre torojujarā muja Jūmenijicui ñájine ðaiye boje nócvu bácvure. Ëi ñájine ðaiyede, bojeðai bi na mácvure yópe ne āmeno ðaiye báquepedeca mujare, arājarama na.

<sup>21</sup> Dinumure cūinácu ángele parucu cūinábo cūrabo urabore, oteiyabeare cūoibo pe paibore, ñni dvarí jaruvame jia uradaí. Yópe arí, coyúame:

—Yópe bijaino maquiyébu no imaro urarō Babilonia āmicurō. Buojari jāmenamu cojedeca cainumua. <sup>22</sup> Ye jápura bequiyebu cojedeca no imaro mácarōre ne yuriaiye báque arpaque, flautaque, aru trompetaque máre. Ye cubenama cojedeca memeipôeva no imaro mácarōre. Ye jápura bequiyebu cojedeca no imaro mácarōre ne cūoiye oteiyabeare cūoiboque, ne páure ðarājivū. <sup>23</sup> Ye pēoibū cojibequiyebu cojedeca no imaro mácarōre. Que baru ñemiquiyebu nore. Ye purububenama cojedeca no imaro mácarōre. Que baru jápura bequiyebu cojedeca nore ne torojuve teiye báque pôeva ne purubuoiyede. Nópe vaiquiyebu diimaro mácarôcavure ne bojeðaipôeva parurivū bácvu caivū apevū ijāravucavū bojeðaipôeva pueno. Nópe vaiquiyebu diimarocavure mujovai vū bácvure caivū ijāravucavū Jesucristore ju abevure ne yavié ðaiye báqueque, áme ñai ángele.

<sup>24</sup> Ina Babilonia āmicuriimaro mácarôcavu bácvu ñájima ne boarí jaruvaiye báque boje caivū ina Jūmenijicui yávaiyede coyucaipôeva mácvure, ina Jūmenijicui pôeva mácvure, aru caivū ijāravucavū boarí jaruvaimara mácvure máre.

**19** <sup>1</sup> No yóboi, jápiacacu yū bujino urarōre yópe cūináyajubo obedivū pôeva ne yávaiye bujiépe. Cavarō mearo Jūmenijicui curōre jocarí jápiacacu náre, yópe arí coðobobo iyede:

¡Alelúya! Mearore jínajarevū Jūmenijicure. Évacari jāve meðai bi pôevare. Aru jāve meacu bajube. Pueno parucube máre. Jāve majepacu Jūmenijicube ũ. <sup>2</sup> Caiye ũi ðaiye métamu. Aru caiye ũi coyuiye jāvetamu máre. Ñájine ðai bi ico nomió ōi baju bojeðaðo bácore ũmuvare urarō āmenore ðacoðo náque. Ō āmeina ðare nuño mateáco caivū ijāravucavūque, cainoa joborōai Jesucristore ju abevure ōi urarō āmeina ðaiyeque. Jūmenijicu ñájine ðai bi bojeðayu óre, ōi boarí jaruvaiye báque boje ũre memecaivure. Que baru mearore jínajarevū Jūmenijicure, aima na.

<sup>3</sup> Bedióva cojedeca coðoboborí aima:

—¡Alelúya! Mearore jínajarevū Jūmenijicure. No imaro urarō éni ðajocabevū cainumua. Que baru toabico porí muivū nore jocarí cainumua, aima na, mearore jívū Jūmenijicure.

<sup>4</sup> Ina veinticuatro paivu bucva aru ina yóvaicuvai vū apurivū morí tuma joborōita mearore jínajivū Jūmenijicure, ñai dobacure jabocui dobarō mearo coricacarōra, yópe arí:

—Quédecabu. ¡Alelúya! Mearore jínajarevū Jūmenijicure. Jūmenijicurecabe maje mearore jímū, aima na.

<sup>5</sup> Dinumure jápura teavū apeno yávaino no dobarō mearo coricacarō yebare jocarí. Yópe arí, coyúavū:

Mearore jíjarā majepacu Jūmenijicure. Caivū ũre memecaivū aru caivū apevū pôeva máre, ina quíjina aru bucva máre, caivū ũre pueðai vū, mearore jíjarāri ũre, arí coyúavū.

**Juan ũi coyũino ne torojũve teinora Cristo,  
ovejajĩcu ne aimũ, ũi pũrubũoiyede**

<sup>6</sup>No yóboi, jápiacacu yũ bujino urarõre yópe cũináyajubo obedivũ põeva ne yávaiyepe yópe cũratãcuve uratãcuve bujinope aru yópe õpo tuino pũeno baju bujinope. Jápiacacu náre, yópe arĩ codoboboivũre:

¡Alelúya! Mearore jĩnajarevũ Jũmenijicure. Maje jabocu Jũmenijicu parucu caivũ pũeno jabotenĩ báyube caride. Que baru mearore jĩnajarevũ ũre. <sup>7-8</sup>Eaivũ caride Cristo, ovejajĩcu ne aimũ, ũi pũrubũoijãravũ. Jĩmarepaco bacodó meadaibico õi baju. Maje jabocu doicõjeimi õre meacaje lino ãmicuricaje docucũbenĩ cojidicajede. Aru jẽvari coyurĩ dicajedecabu yópe Jũmenijicui põeva ne ãaiye mépe. Que baru torojurãjarevũ maja. Torojurivũ maje ũmei mearore jĩnajarevũ maja Jũmenijicure, aima na.

<sup>9</sup>Dinũmure ñai ángele, yópe arĩ, toivaicõjeame yũre:

—Toivajacu mũ iyede: “Torojurãjarama caivũ ina cutuimara mácavũ ne arajiyeye ayũ ñai ovejajĩcui pũrubũoiyede torojũve teinoi”, áme ñai ángele.

Aru yópe arĩ, cuturĩ jaroáme:

—Iye ji coyuiye mũre caride Jũmenijicui yávaiye jãvetamu, áme ũ.

<sup>10</sup>Ji jápiaiyede ũi nõpe aiyede, ñuatutacacu yũ ũi cuboba yebai, mearore jĩyurĩduyũ ũre. Ũbenita yópe arĩ, mearore jĩcõjemeteame ũ yũre:

—Que ãbejacu mũ. Yũ máre memecayũbu Jũmenijicure mũpedeca aru mĩvũpe páyũ máre, ina coyũivũ Jesús ũi yávaiyede jãvene dajocabevũva pũ ajevũ náre boarĩ jarũvaiyeta. Que baru mearore jĩjacu mũ maje jabocu Jũmenijicure cũinãcurata, áme yũre.

Ñai Espĩritu Santo m aji de ãaibi caivũ ina Jũmenijicui yávaiyede coyũcaipõevare, ne coyurãjiyepe ayũ Jesús ũi yávaiyede jãvene.

**Juan ũi coyũino ñai caballo bocurã tubacurã**

(Jn 1.1, 14; Ap 13.1-18; 14.20; 17.14)

<sup>11</sup>Dinũmure jãcacu yũ cavarõ mearo Jũmenijicui curõ voainore. Aru nore jãroteame cũinácu caballo bocu. Ñai tubacu ũra bojedãibi põevare méque. Aru ãdamateibi méque ũi mauvare máre. Que baru ũtame jãve yávayũ aru méne ãayũ máre cainũmũ. <sup>12</sup>Ũi yacorũa cojiteavũ yópe toa uruiyepe. Cãvateame obeditarabũa jipobũ adaitarabũa ũi jipoburã, ũi jaboteiye boje obediyajubocavũre. Aru cũináro ãmiã toivaino mãcarõre cãvateame. Ũbenita ũ cũinácvũ majibi nore. <sup>13</sup>Doame ũi cuitótecaje pũenocacajede jiveque ãnuicaje bácarõre. Ũrecabe “Jũmenijicui dãpiainore coyũcuedacuyũ” ne aimũ. <sup>14</sup>Ũi yóboi daima ina cavarõ mearo Jũmenijicui curõcavũ ãdamateipõeva tubarivũ caballova borivurã na coapa. Aru doaima meacajea lino ãmicuricajea cuitótecajeare. <sup>15</sup>Ñai ne jabocure etavũ ũi jĩjecamure jocarĩ cũináve boaicarove mũpĩjídivepe. Diveque boarĩ vainĩ tucuyũme caivũ ijãravũcavũ Jesucristore ju abevũre. Ũrecabe jabotecuyũ náre parũéque. Aru ũvareca ñãjine ãacuyũme náre yópe põeva ne vino ũyaiboare piporĩ córore yuuiyepe Jũmenijicui jorojĩni jãiyẽ boje náre, ne ãmeina teiye boje. <sup>16</sup>Ñai ne jabocu ũi cuitótecajena aru ũi tãarurã máre yópe arĩ toivaino mateávũ: “Jaboteyũbe caivũ ajevũ jabovare aru cõjeũme caivũ ajevũ cõjeipõevare máre”, arĩ toivaino cũteavũ.

<sup>17</sup>Aru jácacu cūinácú ángele núcure aviárā. Yópe arī, codoboboame paruéque caivu ina cavavape paivure, ina vuivú cavarō coricai, avia ũi curōi járavú corica baji:

—Āradajarā. Cójijijarā āmuri yo javateino urarō Jūmenijicui meadacaquinore mujare. <sup>18</sup>Ina jabovare, aru churaravai jabovare, ũmva parurivure, caballovare, aru caballovārā tubarivure, yebacavure, yebacavú āmevure, qujjinare, aru bucavure máre, caivu ne jiaruare āradajarā, áme ũai ángele.

<sup>19</sup>Aru jácacu ũai áme āimacu jiejecucure aru caivu ina jabovare ijāravucavú boaipōevaue cójijivure ne boarídurājiyepe aivu ũai caballo bocurā tubacure aru ina úque curivure máre. <sup>20</sup>Ūbenita ũai áme āimacu jiejecucu ne jēimu mateáme. Aru ũai Jūmenijicui yáyaiyede coyucaipōecupe teyu, borocuede coyuyú, máre ne jēimu mateáme. Ūrecabe pōeva ne darī majibede dayu bácu jipocamia ũai áme āimacu jiejecucui jáinoi. Iye pōeva ne darī majibede ũi đaiyeque mujovame obedivu pōevare jipocamia. Ina cuvarivu bácvure ũai áme āimacu jiejecucui toivaino mácarōre aru ina mearore jívú bácvure ũai áme āimacu jiejecucui pēpeimure máre mujovame ũ. Ina pucarāre jēni, jaruvaimara mateima apurivura cāreja toabo azufreque cūiméboi. Noi ũai áme āimacu jiejecucu aru ũai Jūmenijicui yáyaiyede coyucaipōecupe teyu, borocuede coyuyú, énajarama cainumua. <sup>21</sup>Aru caivu apevu náque nuivurecabu ũi boarī jaruvaimara mácvu ũai caballo bocurā tubacu ive boaicaroveque cuvacu ũi jiejecamui. Aru caivu ina cavavape paivu javateni yapima na mácvu ne jiarua báquede.

**Juan ũi coyūino mil paijua baju Cristo ũi jaboteiyena**

(Mt 19.28; Lc 22.30; Ap 1.6; 5.10; 6.9; 13.16-17; 14.9)

**20** <sup>1</sup>Jácacu cūinácú ángele ěmeñure cavarō mearo Jūmenijicui curōre jocarī. Cuvateame ũi purui no llavede, ũi voaquinore aru biequinore máre no ũmujuricobe ecoinore. Aru cūináme tǎume ducurimene máre cuvateame ũ. <sup>2</sup>Jēame ũai āijuacu cucure mamarumure pu caride máre. ũai āijuacube abujuvai jabocu. Diablo āmicubi ũ. Aru Satanás máre āmicubi ũ. ũai āijuacure jēni buoáme úre mil paijua baju. <sup>3</sup>Ūre buoriburu yóbore, ũai ángele jaruvame úre no ũmujuricobe jívui. Ūre jaruvariburu yóbore nore, dicobe ecoinore bieáme llaveque. Jājaro đáme dicobe ecoinore ũai ángele. Nópe đáme ũai abujuvai jabocure, ũi mujovabequiyepa ayu ijāravucavure bediōva cojedeca pu mil paijua vainiburu yóboita. Dinumu maquinóre jodeimu macuyúme obebejáravua bajura.

<sup>4</sup>Aru jácacu jabovai doborōa mearoare. Ina dobarivu iye dobarōara maje jabocui nājine đaicōjeimara mateima pōevare, ne ámeina teiye boje. Aru ina yaivu bácvu ne coyuiye báque boje Jesús ũi yávaiye méne aru Jūmenijicui yáyaiyede máre dajocabevuva ne ũmene jácacu yu. Na mácvurecabu mearore jíbevu bácvu ũai áme āimacu jiejecucure, aru ũi pēpeimure máre. Aru ũi toivaino mácarōre máre cuvabeteima na mácvu ne tǔtvarā aru ne puruārā máre. Nacajari yainore jaruvarī, apurivu teni jaboteima na Cristoque mil paijua bajureca. <sup>5</sup>Nómu pōeva ne mamarumu nacajaiye yainore jaruvarī. Ūbenita apevu ina yaivu bácvu nacajameteima cāreja pu dijua mil paijua vainiburu yóboita. <sup>6</sup>Torojurājarama ina Jūmenijicui

nacovaimara yo mamarum̃ nacovaino yainore jaruvārī. Nāmu Jūmenijicui pōeva. Sacerdoteva barājārama na, memecarājivū ũre aru Cristore märe. Jabotenajarama na Cristoque mil paiujuareca. Que baru numenajarama na toabo cūiméboi.

**Juan ũi coyũino Cristo ũi vainí tuiyena abujuvai jabocure**

<sup>7</sup>Que baru mil paiujua vainĩburu yóboi, ñai Satanás joðeim̃ macuyáme. <sup>8</sup>Etacuyame dicobe ũmujaricobede jocarī, ñujovacunucuyū pōevare, cainoa joborōacavure. Ñujovacunucuyūme ina Gog āmicurōcavure aru ina Magog āmicurōcavure märe. Ina pōeva obedivū barājārama yópe ēpayabea cūepe jia uraða ēcarurā. Näre cōjijovacuyūme Satanás, ne ādamatenajiyeye ayū. <sup>9</sup>Ina pōeva obedivū cainoa joborōare jocarī darī, cōjijini, nuri jacoturājarama Jūmenijicui pōevare, ina boacáivure, aru Jūmenijicui imarore, ũi jecurōre. Ũbenita toa ocainope turī cavarō mearo Jūmenijicui curōre jocarī éni bíjaroquiyebu näre. <sup>10</sup>Aru ñai abujuvai jabocu, näre ñujovayū bácu, jaruvaim̃ macuyá toabo azufreque cūiméboi märe. Que teni vainí tuquiyebu ũre yópe ñai āme āmacu jiejecure ũi vainí tuiye báquepedeca aru ñai Jūmenijicui yāvaiyede coyucaipōecupe teyu, borocuede coyuyure, märe. Noi ñajinajarama na jaravure aru ñamine märe cainum̃a.

**Juan ũi coyũino Jūmenijicui bojedaiyena yaivū bācavure ne ñaiye báque bojede**

(Mt 25.41; Ap 2.11; 3.5; 21.8)

<sup>11</sup>Dinum̃ure jácacu jabocui dobarō mearo cūináro, urarō borō dobarōre aru ñai dobacure nora. Joborō aru cavarō märe bíjavū. Jārobeteavū cojedeca. <sup>12</sup>Aru jácacu ina yaivū bācavū caivure, quíjinare aru bucavure märe, núrivure no jabocui dobarō mearo urarō jipocai. Paperatucuboa voaino mateávū. Aru apetucubo paperatucubo märe, Jūmenijicui paperatucubo caivū ina jāravū cūimējāravū baquinóre cūvarājivū ũque ne āmiäre toivaitucubo voaino mateávū. Aru ina yaivū bācavū ñājicōjeimara mateima yópe ne ñaiye báquepedeca aru iye toivaiye cūepedeca ditucuboa paperatucuboi. <sup>13</sup>Caivū ina yaivū bācavū jia uraðaí cūteima no jabocui dobarō mearo urarō jipocai. Aru caivū ina yaivū bācavū coreivū bācavū ne curōi märe cūteima no jabocui dobarō mearo urarō jipocai. Que baru caivū ina yaivū bācavū cūteima nore. Aru caivū ina ñājicōjeimara mateima yópe ne ñaiye báquepedeca. <sup>14</sup>Caride ina yaivū bācavū yainājarama cojedeca. Na māvavure coreino mácārō jaruvaino mateávū toabo cūiméboi. Ina yaivū bācavū yainājarama pūque, mamarum̃ ne bajuque ijāravūi aru no yóboi ne ũmeque toabo cūiméboi. No toabobu yópe jia uraða uruinope urarō baju. Nore ñajinajarama cainum̃a. <sup>15</sup>Caivū ina ne āmiá toivaino cūvabevū bācavū ditucuboi, Jūmenijicui paperatucubo caivū ina jāravū cūimējāravū baquinóre cūvarājivū ũque ne āmiäre toivaitucuboi, nárecabu jaruvaimara māvavū dibo toabo cūiméboi.

**Juan ũi coyũino cavarō mamarora aru joborō mamarora**

(Mt 25.41; Jn 4.10, 14; 7.37; Gá 4.26; 2 P 3.13; Ap 2.11; 3.12; 7.17; 19.7-8; 20.14)

**21** <sup>1</sup>No yóboi, jácacu cavarō mamarore aru joborō mamarore märe. No cavarō javecarō mácārō aru no joborō javecarō mácārō märe bíjaiye

bateávũ. Aru diya jia urala máre bíjaiya bateávũ. <sup>2</sup> Aru jácacu no imaro pueno mearo Jūmenijicui imarore, mamaro Jerusalén amicuriimarore. No imaro emene dávũ Jūmenijicui jivateino cavarõ mearo ũi curõre jocarĩ. Yópe nomió purubuocodo õi meadaiyepe torojure dacodo jímarepacu bacuyúre, nopedeca no imaro meadaino mateávũ torojure daquiepe aino Cristore. <sup>3</sup> Aru jápiacacu apeno yávaino bujino etaiyede no jabocui dobarõ mearo coricacarõre jocarĩ. Bujiéque yópe arĩ, coyuávũ:

—Caride Jūmenijicu cubi pøevaquer. Cũcũyume náque. Aru nácapūravũ ũi pøeva marajárama. Jūmenijicuvacari cũcũyume náque. Ne mearore jĩmu macũyume ũ. <sup>4</sup> Tũrecũyume caiye oride ne yacorũare. Torojure dacũyume náre cainũua. Caiye javede cue báque jave bíjavũ cari. Que baru pøeva ye yaibénajarama. Chĩomenajarama. Obenajarama. Aru ijibequieyebu náre máre, arĩ coyuávũ.

<sup>5</sup> Dinũmure ñai dobacu jabocui dobarõ mearora, yópe arĩ, coyuáme:

—Caride caiyede mamae ñayũbu yũ, áme.

Aru yópe arĩ, toivaicõjeame yũre cojedeca:

—Iye yávaiye métamu aru jávetamu máre. Que baru toivajacu mũ iye ji yávaiyede, áme yũre.

<sup>6</sup> Aru ñai dobacu jabocui dobarõ mearora, yópe arĩ, coyuáme:

—Quénoramu. Yũrecabu mamarũmũcacu aru yóbocacu máre. Yũrecabu báyu bácu, bubayu máre. Que baru cũvũ yũ cainũua. Ácu pøecu ũi ũcuiyũru, ũre jĩcũyũmu yũ oco bojecubede no oco piapóino apũre ñaiocore jocarĩ. <sup>7</sup> Yópe mearo dacacũyũmu yũ ñai vainĩ tũyũre amẽnore jarũvarĩ. Ũi mearore jĩmu macũyũmu yũ. Aru jĩmacu bacũyũme ũ. <sup>8</sup> Ũbenita caivu ina ñájiyũbevu yũre boje ne jidué boje, aru ina dajocaivu ne ju aiyede yũre, ina caijĩe amene ñaiyu, ina pøevare boarĩ jarũvaivu, ina amẽina ñaiyu apevuque nẽmarebũcũva amẽvuque, ina yaviéde ñaiyu, ina mearore jĩvu pẽpeimarare, aru ina borocũrivũ máre, caivu ina nũrajarama ne curãjinoi, no toabo azufreque cũiméboi. Que baru jẽvari coyũrĩ yópe ne yaiyepe pũque nũrajarama na.

### Juan ũi coyuino mamaro Jerusalén amicurõra

(Mt 5.8; Jn 8.12; Ef 2.20; 1 Jn 3.2; Ap 16.1; 21.23)

<sup>9</sup> No yóboi, cũinácu ina siete paivu ángeleva iduá siete paidua jororua ñájiovaiye buidídua jororũare iye siete paiye ñájiovaiyeque cũvarivũ bávavacacu coyũcudame yũre. Yópe arĩ, coyuáme:

—Dajacu. Jáðovacũyũbu mũre ico nomió purubuocodore Cristo, ovejãicu ne aimũque, áme yũre ñai ángele, áme.

<sup>10</sup> Aru ñai Espĩritu Santo dápiaicõjeame yũre. Que teni ñai ángele nũvame yũre cũracũ ũmũjuricũ pũenoita. Noi curivuta, jáðovame yũre no imaro mearo baju, Jūmenijicui imaro Jerusalén amicuriimarore. No imaro emene daino mateávũ Jūmenijicui jivateino cavarõ mearo ũi curõre jocarĩ.

<sup>11</sup> Jūmenijicui cue boje nore, uralõ pẽoávũ no imaro. Yópe cũrabo cojidibo pare bojecuribore jári javaiyoibo jaspe amicũribope pẽoávũ no imaro.

<sup>12</sup> Pare ũmũjurido biaido cúteavũ no imaro yóbore. Dido biaido cũvateavũ doce paicobea jedevacobea. Dicobea jedevacobearã toivaino mateávũ ne amíá ina doce paiyajuboa Israecavũ ne yajuboa amíá coapa. Aru doce paivu

ángeleva jári coreivũ bateima dicobea jedevacobea coapa. <sup>13</sup>Yóbecuricobea jedevacobea cúteavũ caiyovaicuvaiþuravuai coapa. Avia dainocapûravui yóbecuricobea jedevacobea cúteavũ. Avia daino meapûravui yóbecuricobea jedevacobea cúteavũ. Avia doinocapûravui máre yóbecuricobea jedevacobea cúteavũ. <sup>14</sup>No biaido me jájaro núvari ðaido bateávũ cûrava urava parurivarã. Doce paiva cûrava cúteavũ. Diva cûravarã toivaino mateávũ ñuje ámiã ñuja doce paivũ ñai ovejajicui yávaie méne beorí coyucôjeimara ñuje ámiã coapa.

<sup>15</sup>Ñai ángele yávayũ yure cuvateame cûinãdo corevaiyo úruque ðaiyore, corevacuyũ no ímarore, dicobea jedevacobeare, aru biaidore máre. <sup>16</sup>No ímaro yóvaicuvaitôbua cúteavũ. Caiye yóvaicuvaitôbua cûináturu bateávũ. Ûmujurô vaibóque cûináturu bateávũ. Ûi corevaiyede corevame no ímarore pucamil doscientos paikilometros baju ñmujurôre, pucamil doscientos paikilometros baju joarôre, aru pucamil doscientos paikilometros baju urarôre máre. <sup>17</sup>No yóboi, corevame no biaidore máre. Yópe pœeva ne corevaiyepesenta y cinco paimetros baju corevame no biaidore.

<sup>18</sup>No biaido ðaino mateávũ jaspe ámicuriva cûrava bojecurivaque. Aru no ímaro ðaino mateávũ úru me baju docucubeque. Que baru jivarupe paino ubenita jári javaiyoino mateávũ. <sup>19</sup>No ímaro jájaro núvari ðaino mateávũ cûrava urava parurivarã. Aru divarã cúteavũ apeva bojecuriva meava baju. Doce paiva cûrava bojecuriva cúteavũ. Diva mamarumucava ímaro núrivarã jaspe ámicuriva bateávũ. Apeva cutuiva ímaro núrivarã zafiro ámicuriva bateávũ. Apeva cutuiva ágata ámicuriva bateávũ. Apeva cutuiva esmeralda ámicuriva bateávũ. <sup>20</sup>Apeva cutuiva ónice ámicuriva bateávũ. Apeva cutuiva cornalina ámicuriva bateávũ. Apeva cutuiva crisólito ámicuriva bateávũ. Apeva cutuiva berilo ámicuriva bateávũ. Apeva cutuiva topacio ámicuriva bateávũ. Apeva cutuiva crisoprasa ámicuriva bateávũ. Apeva cutuiva jacinto ámicuriva bateávũ. Aru diva piniducava ímaro núrivarã amatista ámicuriva bateávũ. <sup>21</sup>Dicobea doce paicobea jedevacobea ðaino mateávũ perla ámicuriva bojecuriva cûravaque. Caicobea jedevacobea coapa cûináva perla ámicurivaque ðaino mateávũ. Aru ðima no ímaro urama ðaino mateávũ úru me baju docucubeque. Que baru jivarupe paima, ubenita jári javaiyoima, mateávũ.

<sup>22</sup>No ímaroi jámetecacu Jûmenijicui cûramine. Caino no ímarore Jûmenijicui cûrami cubeteavũ. Maje jabocu Jûmenijicu parucu caivũ pueno cubi caino no ímaroi. Aru Cristo, ñai ovejajicu, máre cubi caino no ímaroi. Que baru Jûmenijicui cûrami jaubevũ nore. <sup>23</sup>Aru jaubevũ avia aru avia ñamicacu máre ne pœoie nore. Jûmenijicui cue boje nore, urarô pœóvũ no ímarore. Aru ñai ovejajicu pœoibupe pœoñme nore. Que baru avia aru avia ñamicacu máre jaubema na nore. <sup>24</sup>Caivũ pœeva cainoa joborôacavũ vaivárãjarama no ímaro miadãeque. Aru caivũ jabova davarãjarama caiye ne cûvaede, ne tãuturare máre no ímaroita. <sup>25</sup>Caijãravua no ímaro jedevacobea voacobea baquiyébu. Aru ñami cubequiyebu nore. Que baru no ímaro jedevacobea ye biebecobea baquiyébu cainumua. <sup>26</sup>Caivũ pœeva cainoa joborôacavũ davarãjarama caiye ne cûvaede, ne tãuturare máre no ímaroita. <sup>27</sup>Ubenita ye ámeno cubequiyebu nore. Ye pœeva cuyojeda teivũ aru borocurivũ máre ecobenajarama nore. Quénora caivũ ina cûvarãjivũ

jāravu cūimējāravu baquinóre Jūmenijicuque ne āmiāre toivaiye báque boje ānitucubo, űai ovejajicuī paperatucuboi, ecorājarama nore.

**22** <sup>1</sup>No yóboi, cojedeca űai āngele jādovame yure cūināda jiare. Diya jia meada cojidiya etaiṽu no jabocuī dobarō mearore, Jūmenijicuī dobarōre aru űai ovejajicu māre űi dobarōre jocarī. Diya jia apure ḁaiṽu pōevare mamaūmeque. <sup>2</sup>Diya jia bejaivṽu ma űrama coricai no īmaro Jūmenijicuī īmaroi. Aru diya ēcaruāi caipucapūravuāi jocucuā apure ḁaicuā cuṽu. Caiaviava jējāravuā eaiṽu. Que baru doce paituvaboā caiuṽuā coapa jēiduare jivṽu dicuā jocucuā. Aru dicuā jocucuā yoca meadaivṽu caivṽu pōevare cainoa joborōacavure. <sup>3</sup>No īmaroi ye cubequiyebu caiye iye jorojīni jāre ḁaiye Jūmenijicure. Que baru ye āmeno űājine ḁaino pōevare cubequiyebu nore. No jabocuī dobarō mearo, Jūmenijicuī dobarō aru űai ovejajicuī dobarō māre, cuquiyebu no īmarore. Aru Jūmenijicure memecaipōeva mearore jīnarama űre. <sup>4</sup>űi jivare jārajarama na. Aru űi āmiāre toivaino maquiyēbu ne tūtavarā. <sup>5</sup>űami cubequiyebu nore. Maje jabocu Jūmenijicu miadāre ḁacacuyme nōcavure. Que baru jaubequiyebu náre pēoibua aru aviā māre. Aru nōcavṽu jabotenajarama jāravu cūimējāravu baquinóre.

**Juan űi coyūino Jesucristo copaidacuyure ijāravui bediōva cojedeca**

(Jn 4.10, 14; 7.37; Ap 1.8, 17; 2.8)

<sup>6</sup>Dinumure űai āngele, yópe arī, coyūáme yure:

—Iye ji yāvaiye métamu aru jāvetamu māre. Maje jabocu Jūmenijicu, űai majide ḁayṽu bácu ina űi yāvaiyede coyucaipōevare, daroáme yure űi āngelede, űi jādovaquiyēpe ayṽu űre memecaivure iye vaiquīye jauéde maumejiena, āme űai āngele yure.

<sup>7</sup>Aru Jesúvacari yópe aibi:

—Jājacu. Maumejiena dacuyumu yṽu. Torojūrājarama caivṽu me jāpiarī ju aivṽu caiye iye Jūmenijicuī yāvaiyede coyucaiyede toivaiye báquede itucubo paperatucuboi, aibi Jesús.

<sup>8</sup>Ųu, Juan, jāpiacacu aru jācacu caiye iye ji toivaiye báquede. Diede jāpiarī aru jāriburu yóboi, űuatutacacu yṽu űai āngele űi cuboba yebai, űai jādovañṽu mácu yure caiye iyede, mearore jiyuriduyṽu űre. <sup>9</sup>Ųbenita yópe arī, yure mearore jícōjemeteame űre:

—Que ḁabejacu mu. Ųu māre memecayubu Jūmenijicure mupedeca aru mivṽupe páyu māre, ina Jūmenijicuī yāvaiyede coyucaipōeva, aru nápe paivṽu māre, caivṽu ina me jāpiarī ju aivṽu caiye iye toivaiye báquede itucubo paperatucuboi. Que baru maje jabocu Jūmenijicure cūinācura mearore jījacu mu, āme yure.

<sup>10</sup>Aru yópe arī, coyūáme yure cojedeca:

—Joabejīnotamu vaiquīno yópe iye toivaiye báquepedeca ditucubo paperatucuboi. Que baru yavebejacu pōevare jocarī caiye iye Jūmenijicuī yāvaiyede coyucaiyede toivaiye báquede itucubo paperatucuboi. <sup>11</sup>Dinumure caiye iye nópe vaiquīnumure, ácu pōecu āmecu baru, āmenore ḁare nuiye jauṽu űre. Aru ácu pōecu āmecu baju baru, āmeno bajure ḁare nuiye jauṽu űre. Ácu pōecu meacu baru, mearore ḁare nuiye jauṽu űre. Aru ácu pōecu meacu baju baru Jūmenijicure űi memecaiye boje, mearo bajure ḁare nuiye jauṽu űre, āme yure űai āngele.

<sup>12</sup> Bedióna cojedeca Jesús, yópe arí, coyuáme:

—Jájacu. Maumejiena dacyuutu yu. Davacyuutu caivu pōevare ne bojede, bojedacyu caivure yópe ne ðaiye báquepe náre coapa. <sup>13</sup> Yurecabu mamarumcacu aru yóbocacu máre. Yurecabu cucu bácu caiyede cuedaquiye jipocai aru cuscuy caie cūiníburu yóbore. Aru yurecabu búyu bácu, bubayu máre. Que baru cūv yu cainumua.

<sup>14</sup> 'Torojŕāja rama caivu ji meadaimara ne āmene jaruvaiye báque boje yópe ne jaruvaiyepe docure ne joaiyede ne cuitótecajeare. Nárecabu āicōjeimara mārājivū dicu jocucu apure ðaicu jēidure. Aru nárecabu ecoicōjeimara mārājivū no ĩmaro jedevacobeai. <sup>15</sup> Ūbenita no ĩmaro jedevai mautenajarama caivu ina āmena baju, ina yaviéde ðaivu, ina āmeina ðaivu apevuque nēmarebucūva āmevuque, ina pōevare boarí jaruvaivu, ina mearore jívū pēpeimarare, aru ina borocurí jujovaiyurivū apevure máre, áme Jesús.

<sup>16</sup> Aru yópe arí, coyuáme Jesús cojedeca:

—Yu, Jesús, darocacu ñai ángelede, ũi coyūquiyepe ayu caiye iyede mujare, yure ju aivure, muje cójijinoai. Yurecabu ñai jabocu David bácu pāramecu. Aru yurecabu ñai abíacoru pēoñu miadáre dayu, áme Jesús.

<sup>17</sup> Ñai Espiritu Santo “Dajacu”, ayube Jesúre. Aru ico ovejājicūi márepaco “Dajacu”, adobe Jesúre. Aru caivu ina jápiaivu diede “Dajacu”, ajarāri na máre. Yópe cūiñóimara ne pare ũcuiyuepe ocore, nopedeca mija nuiyurivū baru Jūmenijicūi curōi, pare ũjarā Jesúre. Ūtame yópe oco apure ðaiocope. Caivu ũre urivū Jūmenijicūi cure ðaimara marajárama ũi curō mearoi cainumua bojecubeda.

<sup>18</sup> Yu, Juan, mearo ðaicōjeivū paredca caivu ina jápiaivure caiye iye Jūmenijicūi yáva iyede coyucayede toivaiye báquede itucubo paperatucuboi. Pōecu ũi toivaru apejēne epecuyū iyeque, Jūmenijicu pueno baju ñájine ðacyume ũre iye ñájiovaiyeque, coyuiye báquede ditucubo paperatucuboi. <sup>19</sup> Aru pōecu ũi tūreni jaruvuru apejēne itucubo paperatucuboquede, iye Jūmenijicūi yáva iyede coyucayede toivaiye báquede, Jūmenijicu ũre āicōjemecuyume apure ðajocucu jēidure. Que baru me curí buojabecuyume Jūmenijicuque cainumua. Aru Jūmenijicu cuicōjemecuyume ũre no ĩmaro mearo bajure. Dicu jocucurā aru diīmarora máre coyūino mateávū itucubo paperatucuboi.

<sup>20</sup> Ñai caiye diede coyuyū aibi:

—Maumena dacyuutu, aibi.

Que bajarōri. Mŕ, maje jabocu Jesús, dajacu.

<sup>21</sup> Maje jabocu Jesucristo mearo ðacajacurí mujare bojecubeda ũi me boje. Quédacabu. Quénoramu.

# Aipe aiyue apecamua ñaradaviva yávaicamua Majepacü Jñmenijicüi yávaiye mamaene coyuitucuboque cámuu

**ágata** Cūináva cūravabu no ĩmaro mamaro Jerusalén āmicuriĩmaro jājaro núvari ðaiva, boriva aru ñeminiva máre, yópe mevamevarivape.  
(Ap 21.19)

**águila** Míyavipe páyube, ũbenita pñeno uracu. Pare jijecucube ũ.  
(Ap 4.7; 8.13; 12.14)

**amatista** Cūináva cūravabu no ĩmaro mamaro Jerusalén āmicuriĩmaro jājaro núvari ðaiva, ñemijuariva. (Ap 21.20)

**Areópago** Cūracū Atenas āmicuriĩmaro coricacacūmu, 115 paimetros ũmujuricū, Atenacavu bācavu ne cójijino mácáro, borotenajivu.  
(Hch 17.19, 22)

**Armagedón** Joborō āmiá ũbenita pōeva ne majibeno nore coyuiyebu Apocalipsis 16.16. Nore cójijinajarama caivu ina jabova ijāravucavu ādamatenajivu copu Jesucristoque.

**arpa** Pōeva aru ángeleva torojuve teivu ne biabeibobu, cuarenta y seis paimea biabeimeu cuvü, yóbecurivea jocuvea jívui.  
(Ap 5.8; 14.2; 15.2)

**Artemisa** Pēpeimo máco nomiópe ārojaco Éfesocavu bācavu aru apevu Asia āmicurijoborōcavu bācavu máre ne mearore jímó marejaquémavu. Ne dápiaiyepe ō aviá ñamicacure cōjeipōeco barejácoda. Aru nomiva micava juedocūvarājivure cadatedo barejácoda. Que baru ōre mearore jídejaquemavu. (Hch 19.23-41)

**azufre** Tāu cūrajumemu. Pōeva ne éiyede diede, ěnuricoro teiyavü yópe jia uruiyape. (Ap 9.17-18; 14.9; 19.19-20; 20.10; 21.8)

**Baal** Cananeo āmicuriyajubocavu bācavu Jñmenijicure ju abevü ne mearore jímume. (Ro 11.4)

**Babilonia** ĩmaro ũrarō mácáro marejaquémavu jia Éufrates āmicuriya ěcarui. Apevu Israel bācui pāramena mácavu ne eaiĩmaro mácáro marejaquémavu ne mauva mácavu ne bñorĩ nāvaiye báquede na mácavure. (Mt 1.11, 17; Hch 7.43; 1 P 5.13) Aru ĩmaro ũrarō maquinó maquiyeü ijāravü cūiquiye jipojĩcai, āmeina teipōeva Jesucristore ju abevü ne curājiĩmaro. (Ap 14.8; 16.19; 17.5; 18.2, 10, 21)

- Beelzebú** Cūináro āmiá abujuvai jabocui āmiámu. Ape ũi āmiámu Diablo aru Satanás. (Mt 10.25; 12.24; Mr 3.22; Lc 11.15)
- berilo** Cūináva cūravabu no ĩmaro mamaro Jerusalén āmicuriĩmaro jājaro núvari ðaiva, apenũa jūmeniva yópe cōriápe, aru apenũa jūmeniva yópe cavarópe, aru apenũa boriva. (Ap 21.20)
- bronce** Tāu joboró jívui cuvũ, ne ĩye úrupe ārojae, ũbenita majiēda cūrajume, aru jūae maque ārojae. Diemareca Israecavũ bācavũ ðarejaquemavũ ne Jūmenijicure mearore jĩnamique cūvede. (Jn 3.14; Ap 9.20; 18.12)
- burra, burro** Pōeva ne tubamũe aru ne cūvede ũmañũe. Oteiāmacube caballope ārojacu, ũbenita quĩjicu. (Mt 21.2-7; Mr 11.2-7; Lc 13.15; 19.29-34; Jn 12.14-16)
- camello** Pōeva ne tubamũe aru ne cūvede ũmañũe. Oteiāmacube caballope ārojacu, ũbenita pũeno ũracũ aru yapitũu cainidũ cucũ. (Mt 3.4; 19.24; 23.24; Mr 1.6; 10.25; Lc 18.25)
- canela** Jocucu curiájĩe jūaricuriajĩemu. ũbenita ĩmijuebu. Apevũ pōeva ne āiyede ĩmijue ne ðaiye bu. (Ap 18.13)
- Cástor aru Pólux** Griego āmicuriyajubocavũ bācavũ aru Roma āmicurō jaboteinocavũ bācavũ pucarā ne obedivũ jūmenijinacavũ bācavũ barejáimada. Pējava marejáimada. Jia ũraðai nuicũa jiaðocũa ũracũa máquena memeiðeva mācavũ ne mearore jĩmara marejáimada. (Hch 28.11)
- cebada** Cainijicũa jēiyebu quĩjichĩajiboa. Judíova aru apevũ pōeva máre cūve cuvabevũ ne páu ðaiye. Apenũa judíova bācavũ jĩcarejaquemavũ Jūmenijicure ne páu cebadaque ðaiye báquede. Aru caballova, camellova máre ne āiyebu. Octubre baji, ocorũũ yóboi oteðaima dieðe, aru jēiyede ĩñaima abril baji. (Jn 6.9, 13; Ap 6.6)
- celote** Pōecu cūinácu ina judío āmicuriyajubocacube. Celote āmicuriyajubo oatũvaiyũrejaquemavũ ina Romacavũre ne jaboteiyede. ũbedejaquemavũ César bácu ũi jaboteiyede judíovare. Quénora nācavũvareca ne jaboteiyede ũrejaquemavũ ina celote āmicuriyajubocavũ. (Mt 10.4; Mr 3.18; Lc 6.15; Hch 1.12)
- cobre** Tāu jājae joboró jívui ne ĩye jūae ārojae aru mecarijĩepe paiye bu. (Mt 10.9)
- cornalina** Cūináva cūravabu no ĩmaro mamaro Jerusalén āmicuriĩmaro jājaro núvari ðaiva, jūariva. (Ap 4.3; 21.20)
- crisólito** Cūináva cūravabu no ĩmaro mamaro Jerusalén āmicuriĩmaro jājaro núvari ðaiva, cūrajūmeniva. (Ap 21.20)
- crisoprasa** Cūináva cūravabu no ĩmaro mamaro Jerusalén āmicuriĩmaro jājaro núvari ðaiva, jūmeniva yópe cōriápe. (Ap 21.20)
- Cristo** Griego āmicuricamua yávaicamuaque aiyurōmu Jūmenijicui daroimũ mácũ.
- Diablo** Cūináro āmiá abujuvai jabocui āmiámu, Borocucu aiyurōmu griego āmicuricamua yávaicamuaque. Ape ũi āmiámu Beelzebú aru Satanás. (Ap 20.2)
- epicúreo** Pōecu bueyube cūinácu bueiðecũ bācui bueiye báquede, ũi āmiá Epicúreo (341-271 a.C.). ũ mácũ buedejaquemavũ pōeva ne torojũe jaurōre náre caiye pũeno. (Hch 17.18)

**esmeralda** Cūináva cūravabu no ĩmaro mamaro Jerusalén āmicurĩmaro jājaro núvari ðaiva, jūmeniva yópe cōriápe. (Ap 4.3; 21.19)

**estoico** Põecu bueyũ cūinácu bueipõecu bácuĩ bueiye báquede, ũi āmiá Zenón (335-263 a.C.). Ë mácu buedejaquemavũ pøevare ye baju āmene ne torojue aru ne chĩoiye aru ne ñájiye máre. (Hch 17.18)

**eunuco** Põecu parucu jabocure o jabocore caðateipõecu barejaquémavũ. Jaborõcarõre cūvede o tātuturare coreipõecu barejaquémavũ. Aru ũi baju nomicubecu barejaquémavũ. (Hch 8.27)

**fariseo** Judíovacacu Moisés bácu ũi toivaiye ðaicõjeiye báquede bueivucacu barejaquémavũ. Aru ape ðaicõjeiyede máre, ne baju ðarĩ cōmajiyede, bueivucacu barejaquémavũ. Fariseova āmicurivũ Moisés bácu ũi toivaiye báquede bueivũ barejaquémavũ aru ju aivũ barejaquémavũ nópe ðie ðaicõjeiyepe.

**flauta** Tāraiyo bu japuiyo. (Ap 18.22)

**Genesaret** Apeāmiamu Galilea āmicurijitabu macajitabu urabu.

(Mt 14.34; Mr 6.53; Lc 5.1)

**Gog** Gog āmicurõcavũ maucũvarājarama Jesucristore ũi copaidaquiyede ijāravui. (Ap 20.8)

**griego** Grecia āmicurijoborõcacube aru dijoborõcavũ ne yávaicamuamu. (Hch 6.1; 9.29, 36; 13.8; 21.37; Col 3.10)

**hebreo** Israel bácuĩ pāramenacacube aru ũi mácuĩ pāramena ne yávaicamuamu. (Jn 20.16; Hch 6.1; 2 Co 11.22)

**Hermes** Cūináyajubo pøeyajubo griego āmicuriyajubocavũ obedivũ pøeimara mácvure cūvarejaimada. Ne pøeimmaracacu bácu Zeus āmicucui mácu Hermes āmicurejameða. Ne dápiaiyepe ũi, Hermes, cõjenejameða pøeva ne yajuiyede, ne bojeðaiyede, ne mároare, aru apecũ pøeimara mácvure boro nuvacaipõecu barejameða. (Hch 14.12)

**higuera** Cūinácu jocucubu 4 pu 7 paimetros ũmujuricu. Jēidua mearua curicubu aru bótaicubu. (Mt 21.17-21; 24.32; Mr 11.11, 13, 19-20; 13.28; Lc 13.5-9; 21.29; Jn 1.48; Stg 3.12)

**higo** Higuera cu āmicuricu jocucu jēiduabu. Puque ujuá coapa jēiye bu. Ocorũmure jēiduabu quíjidua aru jājaridua. Ëbenita mearua jēiye bu ujurũmure. (Mt 7.16; Mr 11.13; Lc 6.44)

**hisopo** Jocujĩcu pare jājariyoca curijĩcubu. Que baru icu jocujĩcu cavabuaque judíova sacerdoteva bácvũ ne ðarĩ cōmajiyede ne memecaiyede Jūmenijicure jajiédejaquemavũ āimara ne boaimara mácvũ ne jivede. (Jn 19.29; He 9.19)

**Israel** Apeāmiamu Jacob bácuĩ āmiá, Isaac bácuĩ mácu bácuĩ āmiá. Que baru ũi mácuĩ pāramena “Israecavũ” o “israeva” āmicũma apenũmua. Aru apenũmua āmicũma “judíova”, aru apenũmua “hebreova”.

**italiano** Italia āmicurijoborõcacube. (Hch 10.1)

**jacinto** Cūináva cūravabu no ĩmaro mamaro Jerusalén āmicurĩmaro jājaro núvari ðaiva, jūmeniva yópe cavarõpe. (Ap 21.20)

**Janes aru Jambres** Pũcarã yaviéde ðaipøeva mácvũ barejaquémavũ, ina maucũvarivũ bácvũ Moisés bácvure aru Aarón mácvure dijāravũ, ne oatũvajāravũ bácarõ ne tuturiteiyoa báquede āðava apurivũ ðarĩ. (2 Ti 3.8)

- jaspe** Cūináva cūravabu no ĩmaro mamaro Jerusalén āmicurĩmaro jājaro núvari ðaiva, jūmeniva yópe cōriápe. (Ap 4.3; 21.11, 18-19)
- Jerusalén** Judíova ne ĩmaro űrarōmu, ne curijoborōcarō. Aru mamaro ĩmaro maquinó máre, Jūmenijicui pōeva ne curājino maquiyébu.
- judío** Cūináyajubo pōeyajubocacubu, Israel bácu pāramenacacu. Ina judíovare apenũma “Israecavu” o “israeva” adama náre, aru apenũma “hebreova”.
- lana** Oveja o cabra āmicurivũ oteiāimara poðaque ne ðaime cuitótemepebu. (He 9.19; Ap 1.14)
- laurel** Jocucubu. Dicu yocaque ðarejaquemavu jipobu adaitarabuaire, yajuipōeva ne yajuiye me boje. (1 Co 9.25)
- león** Macarōcacu yavi jūacupe páyube, űbenita pueno űracu aru pueno jijecucu. (He 11.33; Ap 5.5; 9.8, 17; 10.3; 13.2)
- levita** Jacob bácu mácu barejaqué mavu Leví bácu. Leví bácu pāramena levita āmicurejaquemavu. Na mácavu barejaqué mavu Jūmenijicui cūramine memeipōeva, oeivu bácvu aru joaivu bácvu diñamine aru diñamiquede. (Lc 10.32; Jn 1.19; Hch 4.36)
- lino** Cóvua curichĩabo aru tedovea yoca curichĩabobu. Yobedoque nuomuare ĩni, cuitótemea cuitótecajea ðaimeare ðaiyebu. (Mt 27.59; Mr 14.51; 15.46; Lc 23.53; 24.12; Jn 19.40; Ap 15.6; 18.12, 16; 19.7-8, 14)
- lobo** Macayavimipe ārojacube. Ŭbenita pueno űracu, pare jijecucube. Joborō jujurōi curiāimacube. Que baru poða űrarō cucube. (Mt 7.15; Jn 10.12)
- Magog** Magog āmicurōcavu maucũvarājarama Jesucristore űi copaidaquiyede ijāravui. (Ap 20.8)
- maná** Āiye barejaqué mavu Jūmenijicu űi jýe báque israeva bácvure ne cuiyede pōecubenoĩ cuarenta paiũjua baju. Maná āmicue quĩjijabea boriyabea ētayabeape, űbenita ēmijue mumipe barejaqué mavu. (Jn 6.31, 49; He 9.4)
- marfil** Elefante āmicucu āimacu miepe ārojacube űbenita pueno űracu pucajavaroa cucu. Dijaravoa borijavaroa marfil āmicuvu. Pare jājarijavaroa aru pare bojecuvu. (Ap 18.12)
- mármol** Cūravapebu pare jājariva, aru boriva, aru bojecuriva. (Ap 18.12)
- Mesías** Hebreo āmicuricamua yávaicamuaque aiyurōmu Jūmenijicui ðaroimũ mácu. (Jn 1.41; 4.25)
- mirra** Jocuĩcu yoca pōeva ne mumijue ne ðaiyebu. Pōeva yaivu bácvure judíova ne jarũvarājiyebu. Aru jũoiye ðaiyebu máre. Die pōevare ĩjinore dápiabede ðaiyebu. (Mt 2.11; 27.34; Mr 15.23; Jn 19.39; Ap 18.13)
- Moloc** Cūináyajubo pōeyajubo amonita āmicũriyajubocavu bácvu ne mearore jĩmu marejaqué mavu. Jūmenijicure ne mearore jýepe aimũ marejaqué mavu, űbenita Jūmenijicu āmecureca. Ŭi pēpeimũ mácu pōecupe ārojarejaquemavu űbenita jipobuque yópe oteivecui jipobupe. (Hch 7.43)
- mostaza** Cainicu quĩjijabe biapemepe paiyabeque otecubu. Ŭbenita bucũĩ muicubu yóbecurimetros baju. Dicu jēiyabeabu yópe betacajĩdoape

cūrajume ārojae. Aru majiéda ijiébu bia cāchijino. Israeva aru apévū pōeva ne ānōre jīvari āiye bu. (Mt 13.30-31; 17.20; Mr 4.31; Lc 13.17, 19; 17.6)

**nardo** Cainichābo yoca curī, miu curī, aru cōvua boricovūabu. Cainiñu aru nūomuare mumijue ne daiye bu. Ūbenita pare bojecue bu, dichābo pīaiye boje pōecubenoī, cūracūa ūmujuricūa puenoī. Me mumijue bu. (Mt 26.6; Mr 14.3; Jn 12.3)

**nazareno** Pōecu ju ayu barejaquémavu Jesús Nazarecacu ūi bueiyede apenūmua pōeva ne aimu nazareno. (Hch 24.5)

**nicolaíta** Pōecu pēpeimarare mearore jīyu barejaquémavu aru āmeina dayu barejaquémavu nomivaque jímarepaco āmevūque. (Ap 2.6, 15, 16)

**olíbano** Jocuñicu mumijue curijicubu. Jocuñicu Asia āmicurijoborōcacubu. Boe cuidó jutué curicu me mumijue bu. (Mt 2.11; Ap 18.13)

**olivo** Cūinācu jocucubu jēidua curicu dicu jēidua āmiāmu olivōua. Ūre cavabua curicubu. Aru quíjie yoca curicubu. Pare jājaricu, ūbenita judíova pare bojecurivubu. (Mt 21.1; 24.3; 26.30; Mr 6.13; 11.1; 13.3; 14.26; Lc 10.34; 16.6; 19.29, 37; 21.37; 22.39; Jn 8.1; Hch 1.5, 11; Ro 11.17; Stg 3.12; 5.14; Ap 11.4)

**ónice** Cūināva cūravabu no īmaro mamaro Jerusalén āmicurīimaro jājaro nūvari daiva, apenūmua nēminiva aru apenūmua boriva. (Ap 21.20)

**oveja** Oteīāmacu cāmuca yuyuica cucu, ūi pođa mecarījie cucu, aru ye jijecubecube. Obedivū ovejavare boarī juarī jídejaquemavu judíova bācavu Jūmenijicure, ne āmeina teiye báque boje.

**Paraíso** Pōeva Jūmenijicure ju aivu bācavu yaiva bācavu Jesucristoi daquiye jipocai ijāravū ne coreino mārōmū pu Jesucristoi nūvaijāravū bācārōita cavarō mearōi ūi yainfūbu yóbore. (Lc 4.25; 23.43; 2 Co 12.4; He 11.5)

**Pascua** Aiyurō āngele ūi vaino mārō aiyurōmū ina israeva bācavu ne cuede Egipto āmicurijoborōi. Ángele vaidéjaquemavu israeva bācavu ne cūramia puenora, boacūyu caivu mama juēdova ūmuvare. Nópe đarejaquemavu Jūmenijicu Faraón mācu ūi jaetovaquiyepe ayu ina israeva bācavure Egipto āmicurijoborōre jocarī, ne yebacavupe ne curō mārōre jaravārī. Pascua judíova ne torojuve teinomū, dijāravū bācārōre āruri, torojuede jīvu Jūmenijicure. (Lc 2.41; Jn 2.13, 23; 6.4; 11.55; 12.1, 12; 13.1; Hch 12.4; 1 Co 5.7; He 11.28; Mt 26; Mr 14; Lc 22; Jn 18-19)

**Pentecostés** Cūināro torojuve teinomū, judíova ne yóbecue parué baju torojuve teiye ūjuá coapa. Yo torojuve teinomū siete paisumana o cincuenta pajāravua Pascua torojuve teijāravu yóboi, ne oteiyede jēijāravuare. Que baru torojuede jīyaima Jūmenijicure aru jīcadaima ūre ne páure, mamarūmu ne daiyede mamauju jēiyeque. (Hch 2.1; 20.16; 1 Co 16.8)

**perla** Cūrajibo quíjibobu pare bojecurijībo, cavarupe páyu ūi jēcuque đajībo borijībo. (Mt 7.6; 13.45-46; Ap 17.4; 18.12, 16; 21.21)

**querubín** Cavarō mearocacu Jūmenijicure memecarī aru mearore jīni majibi caivu pueno. Pucarā pēpeimara mārō nāpe ārojarivu curejaquemavu ānitōcu judíova bācavu ne cūve meacūvede adaitōcu mārō puenora. (He 9.5)

- Ramá** Cūináĩmaro Benjamín āmicuriyajibocavũ bācavũ ne ĩmaro mácarō ocho paikilometros Jerusalén āmicuriĩmaro joarōi aviá daino meapũravui. Diĩmaro mácarō joabenoĩ cūracobe jívui jarũvarejaquemavũ Raquel bācore, Jacob bācui márepaco bācore. (Mt 2.18)
- Refán** Apevũ ne pēpeimaracacũ bācũ āmiá ne mearore jĩmũ marejaquemavũ ũ, Refán. Apevũ Israecavũ mearore jídejaquemavũ ũre ne Egipto āmicurijoborōi cuede, ne ju abe boje Jũmenijicui cōjeiyede. (Hch 7.43)
- sacerdote** Jacob bācui mācũ Leví bācui pāramena levita āmicurejaquemavũ. Cūinācũ nācacũ bācũ, Aarón āmicũcũ, aru caivũ ũmũva ũi pāramena mācavũ sacerdoteva barejaquemavũ. Āimara ne boaimara mācavũre aru ape jícaiyede märe jĩcarejaquemavũ Jũmenijicure judíova pōeva ne āmeina teiye boje.
- saduceo** Judíovacacũ quénora buedejaquemavũ Moisés bācũ ũi toivaiye báquede. Ape de buebedejaquemavũ. Que baru cūináturu āmenejaquemavũ ne dāpiaino fariseova aru saduceovaque. Saduceovacapũravũ ju abedejaquemavũ yainore jarũvarĩ nacajainore aru āngeleva ne cuede, aru decova märe ne cuede.
- Satanás** Cūináro āmiá abujuvai jabocui āmiámu, Maucũ aiyurōmu hebreo āmicuricamua yávaicamuaque. Ape ũi āmiámu Beelzebú aru Diablo. (Mt 4.3, 10; 16.23; Mr 1.13; 8.33; Lc 4.2; 10.18; 22.3, 31; Jn 13.27; Hch 26.18; Ro 16.20; 1 Co 5.5; 7.5; 2 Co 2.11; 4.4; 11.14-15; 12.7; 1 Ts 2.18; 2 Ts 2.9; 1 Ti 1.20; 5.15; Ap 2.9, 13, 24; 3.9; 12.9; 20.2, 7-8)
- seda** Cuitótcaje meacaje bajubu, ācuriova o júva ne jēcumeaque ne ñaicafe. (Ap 18.12)
- sicómoro** Cūinācũ jocucũbu higueraupe paicũ. ũre yoca curicũbu. (Lc 19.14)
- Sión** Cūracũmu Jerusalén āmicuriĩmarocacũ. Jesucristo ũi copaidaquiyede ijāravui núcũyume dicũi. (He 12.22; Ap 14.1)
- Tiberias** Apeāmiamu Galilea āmicurijitabũ macajitabũ urabũ. (Jn 6.1, 23; 21.1)
- topacio** Cūináva cūravabũ no ĩmaro mamaro Jerusalén āmicuriĩmaro jājaro núvari ñaiva, cūrajumeniva. (Ap 21.20)
- trigo** Cainijicũa jēiyebu quĩjichĩajiboa. Judíova aru apevũ pōeva märe ne páu ñaive. Octubre baji, ocorũmu yóboi otedaima diede, aru jēiyede ĩñaima junio baji. (Mt 13.24, 30, 38; Lc 16.7; Hch 27.38; 1 Co 15.37; Ap 6.6; 18.13)
- trompeta** Japuiyobu tãuque ñaivo, japuru bujidiyo. (Mt 24.31; 1 Ts 4.16; He 12.19; Ap 1.10; 4.1; 8.2, 6; 18.22)
- vino** Ũyaimu jēidũare ne córo ñaivebu. (Mt 9.17; 26.28; 27.34, 47; Mr 2.20; 14.25; 15.23, 35; Lc 1.15; 5.37-38; 10.34; 22.18; Jn 2.3, 9; 19.29; 1 Ti 5.23; Ap 6.6; 14.17-19; 18.13; 19.4)
- zafiro** Cūináva cūravabũ no ĩmaro mamaro Jerusalén āmicuriĩmaro jājaro núvari ñaiva, jũmeniva yópe cavarōpe. (Ap 21.19)
- Zeus** Cūináyajubo pōeyajubo griego āmicuriyajibocavũ obedivũ pēpeimara mācavũre cūvarejaimada. Cūinācũ ne pēpeimaracacũ bācũ Cronos

---

ãmicucui mácu Zeus ãmicurejamedá. Ne dápiaiyepe ã, Zeus,  
purucuvarejamedá caivu cavarôcavure aru cavarôquede máre. Nópe  
dápiarejaquemavu na mácavu Jūmenijicu jāve arucure aru cūcure  
máre ne majibe boje. (Hch 14.12-13)